

শীর্ষেন্দু মুখোপাধ্যায়  
দূরবীন



# দূরবীন

শীর্ষেন্দু মুখোপাধ্যায়



আনন্দ পাবলিশার্স প্রাইভেট লিমিটেড

কলকাতা ৯

প্রথম সংস্করণ জানুয়ারি ১৯৮৬ থেকে সপ্তম মুদ্রণ নভেম্বর ১৯৯৪ পর্যন্ত  
মুদ্রণ সংখ্যা ৩২৭০০  
অষ্টম মুদ্রণ জুন ১৯৯৫ মুদ্রণ সংখ্যা ১০০০০

প্রচ্ছদ অমিয় ভট্টাচার্য

ISBN 81-7066-436-5

আনন্দ পাবলিশার্স প্রাইভেট লিমিটেডের পক্ষে ৪৫ বেনিয়াটোলা লেন  
কলকাতা ৭০০ ০০৯ থেকে দ্বিজেন্দ্রনাথ বসু কর্তৃক প্রকাশিত এবং  
আনন্দ প্রেস অ্যান্ড পাবলিকেশনস প্রাইভেট লিমিটেডের পক্ষে  
পি ২৪৮ সি আই টি স্ট্রিম নং ৬ এম কলকাতা ৭০০ ০৫৪ থেকে  
তৎকর্তৃক মুদ্রিত।

মূল্য ১০০.০০

“রা-স্বা”

পূজনীয়  
শ্রীঅমরেন্দ্রনাথ চক্রবর্তী (বড়দা)  
শ্রীচরণকমলেষু



এই লেখকের অন্যান্য বই

ঘুণপোকা

পারাপার

কাগজের বউ

আশ্চর্য ভ্রমণ

যাও পাখি

দিন যায়

শ্যাওলা

লাল নীল মানুষ

ক্ষয়

ফজল আলি আসছে

নীলু হাজারার হত্যারহস্য

ফুল চোর

শিউলির গন্ধ

উজান

জাল

গৌরের কবচ

১৯২৯ সালের শীতকালের এক ভোরে হেমকান্ত চৌধুরির হাত থেকে দড়ি সমেত কুয়োর বালতি জলে পড়ে গেল। অসহনীয় শীতের সেই নির্জন ব্রাহ্মমুহূর্তের অন্ধকারে হেমকান্ত অসহায়ভাবে দাঁড়িয়ে শুনলেন জলে দড়ি ও বালতির পড়া ও ডুবে যাওয়ার শব্দ। তাঁর জীবনে এরকম ঘটনা এই প্রথম।

একটু দূরে উঁচু বারান্দার ধারে হ্যারিকেনটা রাখা। তার আলো কুয়োর পাড়ে খুব ক্ষীণ হয়ে আসছে। হেমকান্ত সেই একটুখানি আলোয় নিজের দুখানা হাতের পাতার দিকে চেয়ে দেখলেন। এই বিশ্বস্ত হাত থেকে গতকাল পর্যন্ত কখনো কুয়োর বালতি পড়ে যায়নি।

হেমকান্ত বিস্ময় ও অবিশ্বাসভরে নিজের দুখানা হাতের দিকে চেয়ে রইলেন অনেকক্ষণ। তারপর সিদ্ধান্তে এলেন, তিনি বুড়ো হয়েছেন। যথেষ্ট বুড়ো।

বাড়িতে দড়ি আছে, বালতি তোলার কাঁটাও মজুত। ইচ্ছে করলে হেমকান্ত কেউ জানবার আগেই বালতিটা তুলে ফেলতে পারতেন। কিন্তু সে চেষ্টা আর করলেন না। কেনই বা করবেন? জীবনের অনেক কাজকেই আজকাল তাঁর তুচ্ছ বলে মনে হয়।

১৯২৯ বা তদানীন্তন কালে বয়স ত্রিশ পেরোলেই গড়পড়তা বাঙালী পুরুষ নিজেকে বুড়ো ভাবতেন। পঁয়ত্রিশ ছত্রিশ বছর বয়সে অনেকেই নাতি-নাতনি হতে শুরু করত। কাজেই নিজেকে বুড়ো ভাবার দোষ ছিল না। সেই হিসেবে হেমকান্তকেও বুড়োর দলে ফেলা যায়। ঘটনার সময় তাঁর বয়স কমবেশী পঁয়তাল্লিশ। উনিশ বছর বয়সে তাঁর বিয়ে হয় কিশোরগঞ্জের মোক্তার সুধীর চক্রবর্তীর মেজো মেয়ে সুনয়নীর সঙ্গে। পঁয়ত্রিশ বছর বয়সেই তিনি ছয় সন্তানের জনক হন। সাঁইত্রিশে বিপত্তীক। তাঁর জ্যেষ্ঠ পুত্র কনককান্তির বয়স চব্বিশ। বিবাহিত এবং দুই সন্তানের পিতা। মেজো সন্তান মেয়ে সবিতা। তার বরিশালে বিয়ে হয়েছে। তৃতীয় জন ছেলে জীমুতকান্তি। সেও বিবাহিত, তবে সন্তান হয়নি। চতুর্থ ও পঞ্চম পর পর দুই মেয়ে ললিতা ও বিশাখা। ললিতার বিয়ে দিয়েছেন কলকাতায়। ষষ্ঠটি পুত্র সন্তান। বয়স দশের বেশী নয়। তার নাম প্রথমে রাখা হয়েছিল কৃষ্ণকান্তি। হেমকান্ত পরে নিজের নামের আদলে কান্তির বদলে কান্ত যোগ করায় এখন সে কৃষ্ণকান্ত। বিশাখা ও কৃষ্ণকান্ত ছাড়া হেমকান্তের কাছে কেউই থাকে না। প্রকাণ্ড বাড়ি হা-হা করছে। আছে বিশ্বস্ত কয়েকজন দাস-দাসী, একটা বশংবদ দিশি হাউন্ড জাতীয় সড়ালে কুকুর। একটা বুড়ো ময়ূর। কয়েকটা পোষা পাখি। গোঁটা দশেক গরু। কয়েকটা কাবলি বেড়াল।

জমিদার সুলভ কোনও বদ অভ্যাস হেমকান্তের বংশে কারও নেই। হেমকান্তও সে-সবের উর্ধ্বে। মদ ছোঁন না, বাইজী নাচান না, ইয়ারবন্ধুও বিশেষ নেই। এমন কি পাশা তাস ইত্যাদিরও নেশা নেই তাঁর। বড় ভাই বরদাকান্তের বাল্যকাল থেকেই একটা উদাসী ভাব ছিল। যৌবনে ভাল করে পা দেওয়ার আগেই সে একদল সন্ন্যাসীর সঙ্গে ভিড়ে নিরুদ্দেশ হয়ে যায়। বরদাকান্তর

পরিত্যক্তা স্ত্রী প্রভা ঢাকায় তাঁর বাপের বাড়িতে আজও জীবন ধারণ করে আছেন। কেমন আছেন তা হেমকান্ত জানেন না। তাঁর ছোটো এক ভাই ছিল। নলিনীকান্ত। তার পরোপকারের নেশা ছিল। ব্রহ্মপুত্রে এক ঝড়ের রাতে তার নৌকাডুবি হয়। নৌকোর অন্যান্য যাত্রীরা বেঁচে গেলেও নলিনীকান্তের লাশ পাওয়া যায় ঘটনাস্থল থেকে তিন মাইল ভাঁটিতে। তিন ভাইয়ের স্বভাবেই মিল আছে। কেউই খুব বিষয়াসক্ত নন। এসরাজ বাজানো ছাড়া হেমকান্তের কোনো আমোদ-প্রমোদও নেই। একসময়ে ফুটবল খেলতেন। ব্যাস আর কিছু নয়। তিনি স্বাবলম্বী, আত্মনির্ভরশীল, শান্ত ও হিসেবী মানুষ। কোনো ব্যাপারেই তিনি অসতর্ক নন। তাঁর জমিদারী খুব বড় নয়। অন্যান্য জমিদারের তুলনায় তিনি নিতান্তই চুনোপুটি। তবে হেমকান্ত কারো সঙ্গে পাল্লা দেওয়ার চেষ্টা করেন না। তাঁর চাল-চলতিও জমিদারের মতো নয়। দাপট নেই, রাগ নেই, কর্তৃত্ব নেই। তাঁর কথা কম, হাসি কম, ভালবাসা বা আবেগও নগণ্য।

হেমকান্ত হ্যারিকেনটা বাইরে রেখে ঘরে ঢুকলেন। অন্যান্য দিন এই সময়ে তিনি আফ্রিক করতে বসেন। আজ বসলেন না। তাঁর শান্ত ও ভাবলেশহীন মন আজ কিছু চঞ্চল। বিলিতি টেবিল ল্যাম্পের সলতে ধরিয়ে তিনি বসলেন বিষয়টি নিয়ে চিন্তা করতে।

“ইহাই কি বার্বাক্য নহে? পেশীর দৌর্বল্য দেখা দিয়াছে, স্নায়ু আর আগের মতো সতেজ নাই। ক্রমে ক্রমে স্থবিরতা আসিবে। আয়ু ফুরাইবে। যৌবনে প্রায় কেহই মৃত্যুকে ভয় করে না। কিন্তু রক্তের তেজ কমিয়া আসিলে দিনান্তে একা বসিয়া প্রিয় ও মৃতদের কথা ভাবিতে গিয়া কখন যেন পৃথিবীর সহিত আসন্ন বিরহের কথা মনে করিয়া হৃদয় ভারাক্রান্ত হইয়া উঠে। সেদিন কোকাবাবুকে দেখিতে গিয়াছিলাম। উদুরিতে পেটটা ফুলিয়া ঢাক হইয়াছে। পিঠভরা বেডসোর। হাঁ করিয়া কষ্টে শ্বাস লইতেছেন। একেবারে শেষ অবস্থায় তাঁহাকে বাড়ির পিছন দিকে একটি ঘরে স্থানান্তরিত করা হইয়াছে। ঘরে ঢুকলেই মনে হয় চারিদিক মৃত্যুর বীজাণুতে ভরা। ঘরের এক কোণে একটি ভাড়াটিয়া কীর্তনীয়া ছোট করতাল লইয়া ক্লান্ত ও যান্ত্রিক স্বরে তারকব্রহ্ম নাম করিতেছিল। গুঠনবতী এক দাসী কেবল তাঁহার পরিচর্যা করিতেছে। বাহিরের ঘরে তাঁহার দুই পুত্র উদ্বিগ্ন মুখে বস। মেয়েরাও আসিয়াছে। কাল্মাকাটিও কিছু কিছু চলিতেছে। কোকাবাবুর স্ত্রী চিরক্ষণ। তাঁহাকে আমি বিশেষ হাঁটাচলা করিতে দেখি নাই। সেদিনও তিনি শয্যাশায়িনী ছিলেন। কোকাবাবুর জন্য যে বিশেষ শোক অনুভব করিতেছিলাম তাহা নহে। তাঁহার যথেষ্ট বয়েস হইয়াছে। কিন্তু সেই সময় একটি ঘটনায় সমস্ত চিত্রটিরই এক অন্যরূপ অর্থ প্রতিভাত হইল। কোকাবাবুর নাতি শরৎ অকস্মাৎ এক হাতে বন্দুক ও অন্য হাতে গোটাকয় মৃত বেলেহাঁস লইয়া ঘরে প্রবেশ করিল। বলিল ‘চর থেকে মেরে আনলাম বাবা, আজ আর খালিহাতে ফিরিনি’। তোমাকে কী বলিব। সেই ঘোষণায় এবং বেলেহাঁস দেখিয়া বাড়ির লোকজনের মধ্যে যেন একটা উত্তেজনা বহিয়া গেল। শরৎ কিশোর বয়স্ক। তাহার টিপ যে কি সাংজাতিক হইয়াছে এবং তার সাহসও যে কত তাহাই তাহার বাবা গগন আমাকে বুঝাইতে লাগিল। শুনিতে শুনিতেই টের পাইলাম, ভিতর বাড়িতে বেলেহাঁস তরিবৎ করিয়া রাঁধিবার নানা তোড়জোড় চলিতেছে। কয়েক মুহূর্তের জন্য যেন কোকাবাবুকে সকলেই ভুলিয়া গেল। বার্বাক্যে ও মৃত্যুতে যে মানুষ কতটা একা ও নিঃসঙ্গ তাহা সেদিন বুঝিলাম। এও বুঝিলাম কোকাবাবুর আত্মীয়-পরিজনের মুখে যে উদ্বেগ ও আগাম শোকের ছাপ পড়িয়াছে তাহার সবটাই খাঁটি নয়, ছদ্মবেশও আছে। সেইদিনই মনে প্রশ্নের উদয় হইল, আমাদের প্রিয় পরিজনদের মধ্যে যে ভালবাসা সমবেদনা ও প্রেম দেখিতে পাই তাহার অনেকটাই বোধহয় আমাদের চোখের ভ্রম। সচ্চিদানন্দ, এবার একবার লম্বা ছুটি লইয়া আস। তোমারও আমার মতই বয়স হইয়াছে। জীবনের মেকী ও খাঁটিগুলিকে বাছাই করার জন্য তোমার সঙ্গে দীর্ঘ পরামর্শ আছে।.....” পরদিন এই চিঠি হেমকান্ত তাঁর আবাল্য সুহৃদ সচ্চিদানন্দ বিশ্বাসকে।

হেমকান্তের দেশভ্রমণের নেশা নেই। বস্তুত বাইরের জগৎ সম্পর্কে তাঁর ভীতি ও অজ্ঞতা

সর্বজনবিদিত । নিজের জমিদারীরও সর্বত্র তিনি যাননি । অপরিচিত পরিবেশ ও অচেনা মানুষজনের মধ্যে তিনি বড় অস্বস্তি বোধ করেন । হেমকান্তর বন্ধু হোমিওপ্যাথ যোগেন্দ্র সিংহ প্রায়ই বলেন, তোমার বাপু এটি একটি মানসিক রোগ । পুরুষ মানুষের ঘরকুনো স্বভাব খুব স্বাভাবিক ব্যাপার নয় ।

কিন্তু হেমকান্ত ভাবেন, ঘরের বাইরে যে বিশাল পৃথিবী তার যত বৈচিত্র্যই থাকুক, নিজের গণ্ডীবদ্ধ জীবনেও যে তিনি বৈচিত্র্যের শেষ পান না । দুর্গাবাড়ির মণ্ডপের পিছনে একটি পোড়ো জমি আছে । এদিকটায় কেউই বড় একটা আসে না । এই ছাড়া-জমির একপাশে একটি শুকনো খাদে বাড়ির আবর্জনা ফেলা হয় । এই জমিটায় এক সময়ে হয়তো বাগান ছিল । এখন আগাছার নীচে মাটিতে মখমলের মতো শ্যাওলা পড়েছে । বাগানের শেষপ্রান্তে একটি ভাঙা ব্রহ্ম গাড়ি পড়ে আছে কবে থেকে । তাকে আটপেঠে জড়িয়ে উঠেছে লতানো গাছ । হেমকান্ত মাঝে মাঝে কামলা ডেকে কিছুটা করে পরিষ্কার করান । তাই জঙ্গল খুব ঘন হতে পারেনি । কিন্তু এই জায়গাটার বন্য ও পরিত্যক্ত ভাবটিকে কখনো নষ্টও হতে দেন না হেমকান্ত ।

কেন এই জায়গাটা হেমকান্তর প্রিয় তার সুস্পষ্ট কোনো উত্তর তাঁর নিজেরও জানা নেই । তবে এই জায়গায় পা দিলেই তার ভিতরটায় একটা সুবাস বয়ে যায় । প্রায় আড়াই বিঘের এই ভূমিখণ্ডটি উঁচু পাঁচিল দিয়ে ঘেরা । পাঁচিলের গায়ে গায়ে চিরুনির দাঁড়ার মতো রুজু রুজু ঢাঙা পাম গাছ । পৃথিবী থেকে আলাদা করে নেওয়া এই ভূমিখণ্ডে হেমকান্তর মন অবাধে বিস্তার লাভ করে । কত দার্শনিক চিন্তা আসে । ব্রহ্ম গাড়িটার একটি পাদানী ঝেড়েঝুড়ে রোজ পরিষ্কার করে রেখে যায় চাকর রাখাল । হেমকান্ত বিকেলের দিকে প্রায়ই এসে সেই পাদানীতে বসেন । চারধারে কীট-পতঙ্গ পাখিদের শব্দ । বনজ একটা গন্ধ তাঁকে আচ্ছন্ন করে রাখে । কাশী বৃন্দাবন, হিমালয় বা সমুদ্র কোথাও যাওয়ার কোনো প্রয়োজন বা তাগিদ তিনি বোধ করেন না । 'তঁার মনে হয়, এই তো বেশ আছি । মানুষের মন এক অদ্ভুত চিত্রকর । চেনা পরিচিত জায়গাতেও সে কত নিপুণ হাতে তুলির একটু-আধটু টানে কত অপরিচিত দৃশ্যই না ফুটিয়ে তোলে । ব্রহ্ম গাড়ির পাদানীতে বসে হেমকান্ত তাঁর মনটিকে কাজ করে যেতে দেন । ধীরে ধীরে তাঁর সামনে ফুটে ওঠে অপ্রভেদী পাহাড়, তরঙ্গস্কন্ধ সমুদ্র, কনখলের রাস্তা বা ইংলণ্ডের মফঃস্বল ।

মনোরোগ ? না, তাঁর কোনো মনোরোগ নেই তো ! তবে একটা দুঃখ আছে । খুব গোপন দুঃখ । কিংবা হয়তো তা গোপন এক সুখই আসলে । সেই দুঃখ বা সুখের কথা তিনি বড় একটা কাউকে বলেননি কখনো । শুধু সচ্চিদানন্দ জানে ।

যেদিন কুয়ের বালতি হাত থেকে পড়ে গেল, সেদিন ভারী ও বিপুল বেলজিয়ামের কাছে তৈরি তিন খণ্ডের পূর্ণাবয়ব আয়নার সামনে কিছুক্ষণ দাঁড়ালেন তিনি । স্ত্রী-বিয়েগের পর একবার মৃত্যু-চিন্তা এসেছিল তাঁর । সেটা স্থায়ী হয়নি । বিসর্জিত অশ্রুই সেই মৃত্যু-চিন্তা ও শ্মশানবৈরাগ্যকে ধুয়ে নিয়ে গিয়েছিল । হেলে পড়া গাছ যেমন ঠেকনায় ভর দিয়ে বেঁচে থাকে, তেমনি স্ত্রী-বিয়েগের সময় তাঁকে ঠেকা দিয়ে রেখেছিল রঙ্গময়ী । শুধু রঙ্গময়ী বলেই পেরেছিল । নইলে তখনই হেমকান্তর সংসার ছাড়ার কথা ।

বেলজিয়ামের খাঁটি ও মহান আয়না তাঁকে কিছুই বলল না । তিন খণ্ডে তাঁকে ভাগ করে বিশ্লেষণ করল, তাঁর তিনটি প্রতিবিশ্বকে কোলে নিয়ে ভাবল অনেকক্ষণ কিন্তু কিছুই বলল না । সব কথা বলতে নেই । হেমকান্ত বিষমবদনে এসে বসলেন সেই ব্রহ্ম গাড়ির পাদানীতে ।

বিকেল হয়েছে । ফার্ন জাতীয় কিছু সুন্দর গাছ গজিয়েছে ব্রহ্ম গাড়িটার আশেপাশে । ভারী সুন্দর গাছগুলি । হেমকান্তর পায়ে মোজা এবং তালতলার চটি । সেই চটির ডগা দিয়ে তিনি গাছগুলিকে একটু আদর করলেন ।

একটা আবছা ধোঁয়ার আন্তরণ হালকা মেঘের মতো ভেসে আছে সামনে । দুর্গাবাড়ির পিছনের

অংশটা দেখা যাচ্ছে না। যে ঘাসে-ছাওয়া শ্যাওলায় পিছল আঁকা-বাঁকা পায়ে-চলা পথটি ধরে রোজ তিনি ব্রাহ্ম গাড়িটার কাছে আসেন সেটাও আজ ওই আবছায়ায় অর্ধেক আড়াল। সেদিকে চেয়ে তিনি ভোররাত্রির ঘটনাটা আবার তৈরি করতে লাগলেন মনে মনে। তুচ্ছ ও সামান্য একটা ঘটনা

ইদারার মধ্যে একটু ঝুঁকে দাঁড়িয়ে আছেন হেমকান্ত। বাঁ হাতে দড়ির লাছি সতর্ক মুঠোয় ধরা, ডান হাতের আলগামুঠির ভিতর দিয়ে পিছল সাপের শরীরের মতো নেমে যাচ্ছে পাটের মজবুত দড়ি। শীতকালে জল নেমে যায়। বালতি সেই অনন্ত গহ্বরে নামছিল তো নামছিলই। কোথাও অনামনস্কতার কোনো কারণ ছিল না। আর কেউ খবর রাখে না, শুধু হেমকান্তই জানেন, ক্ষুদ্রাতিক্ষুদ্র কাজেও তাঁর মতো সতর্ক লোক দ্বিতীয়টি নেই। এই গুণের জন্য গোপনে একটু গর্ববোধও আছে তাঁর। আচমকা দড়ির প্রান্তে বাঁধা বালতি জল স্পর্শ করল। শব্দ পেলেন হেমকান্ত। বহিরাগতের স্থল স্পর্শে নিখর ঘুমন্ত জলে কুমারী-শরীরের মতো শিহরণ। বাঁ হাতের শক্ত মুঠিতে ছিল দড়ির লাছি এবং শেষ গিট। ডান হাতও সতর্ক ছিল। তবু কেন তাঁর দুটি হাতের কোনোটাই ধরে রাখল না দড়িটাকে? অসতর্কতা নয়, অনামনস্কতা নয়। হেমকান্তের মনে হয়, তাঁর দুটি হাত ছেড়ে দিতে চেয়েছিল দড়িটাকে, তাই দিল। হেমকান্তের কিছু করার ছিল না।

সেই দুটি হাতের দিকে শীত অপরাহ্নের পড়ন্ত স্নান আলোয় কিছুক্ষণ চেয়ে রইলেন হেমকান্ত। শ্রমের কাজ জীবনে কমই করেছেন। হাত দুটি কোমল ও লাভণ্যময় এখনো। হাতের চোঁটো এখনো তুলতুলে, এখনো রক্তাভাময় লম্বা ও পুরুস্ত শিল্পের আড়ল। ময়লাহীন নরুণে সুন্দর করে কাটা নখ। এ দুটি হাতের কোনো আলাদা সত্তা নেই, হেমকান্ত জানেন। তবু আজ ভাঙা ব্রাহ্ম গাড়ির পাদানীতে বসে তাঁর মনে হল, এ দুটি হাত তাঁকে কিছু ইঙ্গিত করছে। বলছে, ছেড়ে দাও, পার্থিব যা কিছু আছে ছেড়ে দাও। বাঁধনে থেকো না তুমি। চলো।

কিন্তু চলো বললেই তো আর যাওয়া যায় না। কোথায় যাবেন বাইরের ধূসর অচেনায়? এই তো তিনি বেশ আছেন। সংসারে কোনো বন্ধন তাঁর কখনো ছিল না, এখনো নেই। ছেলেমেয়েদের মধ্যে কাউকেই তাঁর কোলেপিঠে মানুষ করতে হয়নি। স্ত্রীর মৃত্যুর পর ছোটো দুটি ছেলেমেয়ের ভার নিয়েছিল পুরোনো ও বিশ্বাসী দাসীরা। আর দশভুজার মতো রঙ্গময়ী। এমন কি নিজের স্ত্রীর সঙ্গেও এক অপরিমেয় দূরত্ব ছিল তাঁর। অন্দরমহল ও সাংসারিক কাজেই ব্যস্ত থাকতে হত সুনয়নীকে। শেষ কয়েক বছর দুরারোগ্য ক্ষতে শয্যাশায়ী ছিলেন। সুতরাং হেমকান্তের বন্ধন বলতে কিছু নেই। কেউ তাঁকে ধরে রাখেনি। তবু হেমকান্তের কোথাও যাওয়ার নেই। এই পোড়ো জংলা ভূমিখণ্ডই তাঁকে অনন্তের আশ্বাদন দেয়।

কুয়াশার ভিতরে অস্পষ্ট এক ছায়ামূর্তিকে দেখে অনামনস্ক হেমকান্ত একটু চমকে উঠলেন। উত্তরের পরিত্যক্ত দেউলের ভেঙে পড়া দেওয়ালের এক অংশ দিয়ে ছায়ামূর্তি ঢুকল। ওদিকে রাস্তা নেই। চারদিকে হুঁট ছড়িয়ে পড়ে আছে। লম্বা ঘাসের জঙ্গল। সাপের প্রিয় সে পথ ধরেই এগিয়ে আসছিল সে। চকিত পায়ে।

হেমকান্তের হাতের লাঠিটায় ঝুঁতনির ভর রেখে সকৌতুকে চেয়ে রইলেন। রঙ্গময়ী এখনো চকিত-চরণা, চকিত-নয়না, চকিত-রসনা।

রঙ্গময়ীর বয়স ত্রিশের আশেপাশে। তাকে হঠাৎ-সুন্দরী বলা যায় না। একপলক তাকিয়ে দেখলে তাহ্রাত গাত্রবর্ণের মেয়েটিকে তেমন নজরে পড়বে না। রঙ্গময়ীর শরীর কৃশ এবং কিছু দীর্ঘ। চোট দুটি বড় এবং মাদকতাময়। সবচেয়ে সুন্দর তার বকবক দাঁত। লম্বাটে মুখখানায় একটু আপাত-কঠোরতা আছে বটে, কিন্তু বিন্দুমাত্র পুরুষালী ভাব নেই। গস্তীর থাকলে রঙ্গময়ীকে ওরকম দেখায়। হাসলে মুখের আশ্চর্য রূপান্তর ঘটে। আশ্চর্য তার চোখ। একবার তাকালে আঠাকাঠির মতো চোখ লেগে থাকে। ফেরাতে ইচ্ছে করে না। কী গভীর মায়া, কত ছলছলে আর করুণ!

শীতের পোশাক বলতে রঙ্গময়ীর অঙ্গে শুধু একটা মোটা সূতীর চাদর জড়ানো। পায়ে চটি নেই। এই শীতে রঙ্গময়ীর পায়ের চামড়া ফেটে একাকার কাণ্ড। ফিতে-পেড়ে সাদা খোলের একটা শাড়ি পরনে।

হেমকান্তর স্নিগ্ধ মুখে ক্ষীণ হাসির রেখা ফুটল। বললেন, বড় ঠাণ্ডা পড়েছে, খালি পায়ে ঘোরা ঠিক নয়।

রঙ্গময়ী বলল, আহ্লাদের কথা পরে হবে। ও-সব তোমার মুখে মানায় না। শরৎ খবর দিয়ে গেল কোকাবাবুর শ্বাস উঠেছে। একবার যাও।

হেমকান্ত নড়ে উঠলেন, খুব খারাপ অবস্থা নাকি

এখন আর খারাপ নয়, একেবারে শেষ অবস্থা। একবার যাও।

হেমকান্ত গম্ভীর হলেন। বললেন, আমি গিয়ে কী করব? বোকার মতো দাঁড়িয়ে থাকতে হবে। গোটা কয়েক সান্ত্বনার বুলি আউড়ে যেতে হবে। এছাড়া আর কি?

রঙ্গময়ী খুব শান্ত স্বরে বলল, সেটুকুও তো করা দরকার।

আজ আমার শরীর ভাল নেই মনু। মনটাও খারাপ।

তাহলে যাবে না?

নাই গেলাম। এ-সব সামাজিকতা আমার ভাল লাগে না।

নাকি চোখের সামনে কাউকে মরতে দেখতে চাও না!

হেমকান্ত একটু হাসলেন। বললেন, তাও বটে।

রঙ্গময়ী হেমকান্তর দু হাত দূরত্রে দাঁড়ানো। তার গা থেকে একটা আঁচ আসছে বলে মনে হল হেমকান্তর। রঙ্গময়ী বলল, তুমি আমি সবাই একদিন না একদিন তো মরবোই। মরতে দেখা ভয়ের কী?

হেমকান্ত অন্য পন্থা ধরে বললেন, কোকাবাবু যদি মরেন তাহলে আমাকে তো আবার স্নান না করিয়ে ঘরে ঢুকতে দেবে না।

স্নান করবে। তাতে কি? গরম জল করা থাকবে। আগুন আর লোহা ছুঁয়ে ঘরে ঢুকবে আমি সব তৈরি রাখব।

রাখবে জানি। কিন্তু আজ আমার অত হাস্কামা ভাল লাগছে না।

রঙ্গময়ী একটু হতাশার গলায় বলে, কোনোকালেই তো কোনো হাস্কামা পোয়ালে না। এমন জড়ভরত হয়ে দিন কাটাতে ভাল লাগে তোমার?

হেমকান্ত বিষণ্ণ গলায় বললেন, সংসার বাস্তবিকই বড় জটিল জায়গা মনু। সুনয়নী গেছে, ভেবেছিলাম এরপর আর লোক-লৌকিকতা, ভদ্রতা অভদ্রতার ধার ধারতে হবে না। আপনমনে থাকব। এখন দেখছি, নিজের মতো করে থাকবার উপায় নেই।

অত রেগে যাচ্ছে কেন? ব্যাপারটা খুব সামান্য। কোকাবাবু তোমাদেরই জ্ঞাতি। এক শহরে বাস। না গেলে কেমন দেখাবে? এ সময়ে শত্রুও তো যায়।

মনু, তুমি কোনোদিন আমার কোনো অসুবিধে বুঝলে না। কোনটা আমি ভালবাসি, কোনটা বাসি না সেটা জেনেও তুমি সবসময়ে অপছন্দের কাজটাই আমাকে দিয়ে করাতে চাও। মরার সময় নাই বা গেলাম, কোকাবাবুর অসুখের সময় তো আমি প্রায়ই দেখতে গেছি।

রঙ্গময়ী হাসল না বটে, কিন্তু তার মুখে কিছু কোমলতা ফুটল। যেমন শিশুর অসহায়তা দেখে মায়ের মুখে ফোটে। রঙ্গময়ী খুব মৃদু স্বরে বলল, সঙ্গে আমি গেলে?

হেমকান্ত এ কথায় হঠাৎ মুখ তুলে রঙ্গময়ীর দিকে তাকান। বিভ্রান্তের মতো বলেন, তুমি গেলে—তুমি গেলে—

সহিস্কে গাড়ি যুততে বলো গে, আমি তৈরি হয়ে আসছি।

হেমকান্ত হঠাৎ বললেন, খারাপ দেখাবে না মনু ?

রঙ্গময়ী যেতে যেতে মুখ-ফেরাল। মুখে একটু হাসি। কী অপরূপ হয়ে গেল মুখটা ! বিহুল হেমকান্ত চেয়ে রইলেন।

রঙ্গময়ী বলল, দেখাবে। তবু তোমার জন্যেই যেতে হবে।

বরং খবর পাঠিয়ে দাও, আমার শরীর খারাপ।

সেটা অজুহাত হল, অজুহাত কি ভাল ?

মানুষের শরীর খারাপ হয় না ?

হয়। তোমার হয়নি।

কে বললে হয়নি ?

রঙ্গময়ী একটু হুঁকুচে চিন্তাশ্রিত মুখে বলে, সত্যি বলছো নাকি ? শরীর সত্যিই খারাপ হেমকান্ত একটা দীর্ঘশ্বাস ফেললেন। বললেন, তোমরা তো কেউ আমার কোনো খবর রাখো না মনু। সে না হয় নাই রাখলে, কিন্তু মুখের কথাটুকু অন্তত বিশ্বাস করো।

রঙ্গময়ী এই অভিমানের কথায় মুচকি হেসে বলল, শরীর খারাপ তা বুঝব কি করে ? দিবি্য তো ফুল-ফুল সেজে কুঞ্জবনে এসে বসে আছো।

হেমকান্ত ডাক-হাঁক বা প্রচণ্ড প্রতাপের মানুষ নন ! তবে বন্ধ কপাটের মতো তার একটা নীরেট গাষ্ঠীর্য় আছে। সেইজন্য সকলেই তাঁকে সমীহ করে। তাঁর মুখের দিকে চেয়ে তরল কথাবার্তা কেউই শুনেনা। অবশ্য রঙ্গময়ী তার ব্যতিক্রম। হেমকান্তও রঙ্গময়ীর কাছেই কিছু প্রগল্ভ হয়ে ওঠেন। রঙ্গময়ীর একথাটায় তিনি হাসলেন না। বোধহয় পুরোনো ক্ষতে ব্যথাতুর স্পর্শ পেলেন। বললেন, আজকের দিনটা আমার ভাল যাচ্ছে না মনু। মনটা মুষড়ে আছে। এর ওপর যদি কোকাবাবুর মৃত্যুটা চোখে দেখতে হয় তবে সারা রাত আর ঘুম হবে না।

রঙ্গময়ী তার মায়াবী চোখ দিয়ে যতদূর সম্ভব ঝুটিয়ে লক্ষ্য করে হেমকান্তকে। তারপর বলে, মনের আর দোষ কি ? পুরুষ মানুষরা হাঁটে, বেড়ায়, আড্ডা দেয়, তাস পাশা খেলে। তোমার তো সে-সব কিছু নেই। কেবল বসে বসে আকাশ পাতাল কী যে ভাবো।

হেমকান্ত একটু ব্যঙ্গের হাসি হেসে বললেন, আমি কি কেবল বসেই থাকি ? কিছু করি না ?

তা বলিনি। নিজের সব কাজ তুমি নিজেই করে নাও। কিন্তু সেটাও কি বাপু পুরুষ মানুষকে মানায় ? নিজের ছাড়া কাপড় ধুচ্ছে, নিজের জল গড়িয়ে নিচ্ছে, নিজের মশারি টাঙাচ্ছে বা জুতো বুরুশ করছে, পুরুষ মানুষের এ কেমন ধারা ? অত দাসদাসী তবে আছে কেন ?

তাহলে কিছু করি বলছো ?

করো, কিন্তু ওসব করো বলে আমি তোমার প্রশংসা করতে পারব না।

তোমার প্রশংসা ! ওরে বাবা ! সে তো নোবেল প্রাইজ পাওয়ার শামিল।

আমার প্রশংসা তো বড় কথা নয়। তোমার বউও দুঃখ করে বলত, উনি যে কেন সকলের এত ছৌয়াচ বাঁচিয়ে চলেন।

বলত নাকি ?

বলবে নাই বা কেন ? তাকে তো তুমি স্বামীসেবার সুযোগই দাওনি। জ্বর হলে মাথাটা পর্যন্ত টিপে দিতে ডাকতে না।

সেটা ভাল হয়নি বুঝি ?

ভাল কি মন্দ সে জানি না। মেয়েমানুষের বুদ্ধি অল্প, তার ওপর আমি মুখ্য মানুষ। আমাদের চোখে ভাল লাগে না বলেই বলি।

রঙ্গময়ীর স্বরে একটু অভিমানের সুর ছিল কি ? হেমকান্ত মনে মনে একটু উদ্ভিগ্ন হলেন। জগৎ ও জীবন সম্পর্কে তাঁর নিজস্ব যে মতগুলি আছে তা তিনি কদাচিৎ লোকের কাছে ব্যক্ত করেন

তর্ক করতে কেউ তাঁকে দেখেনি কখনো । হেমকান্ত মৃদু স্বরে বললেন, তোমার বুদ্ধি অল্প নয় । মূর্খও তোমাকে কেউ বলেনি । আমার সম্পর্কে তোমার সিদ্ধান্তও সঠিক । আমি নিজে আমার ত্রুটিগুলি খুব ভাল বুঝি । কিন্তু মনু, দোষ জেনেও কি সব সময়ে মানুষ সে দোষ ছাড়তে পারে ?

রঙ্গময়ী দৃকুটি করে বলে, তোমার দোষ দেখে বেড়ানোই বুঝি আমার কাজ ? সে সব নয় । কিছু মনে কোরো না আমার কথায় । শরীর খারাপের কথা বলছিলে, কী হয়েছে তা তো বললে না ।

এখনো তেমন কিছু হয়নি । হয়তো শরীর ততটা খারাপ নয় । মনটা খারাপ । আর মন খারাপ বলেই শরীরটাও ভাল লাগছে না ।

চুপচাপ বসে থাকলে কি মন ভাল হবে ? একটু বেড়িয়ে এসো গিয়ে । কোকাবাবুর বাড়িতে না যাও, অন্য কোথাও তো যেতে পারো ।

হেমকান্ত হঠাৎ দাঁড়ান । বলেন, না তার দরকার নেই । চলো, বরং দুজনেই কোকাবাবুর বাড়িতে যাই ।

এ কথায় রঙ্গময়ী যেন একটু খুশি হয় । একটা দীপ্তি ক্ষণেক খেলা করে যায় মুখে । চোখের গভীর দৃষ্টি যেন বলে, এই তো চাই ।

রঙ্গময়ীর সঙ্গে হেমকান্তের বাইরের সম্পর্কটা খুবই পলকা । প্রায় কিছুই নয় । রঙ্গময়ী এ বাড়ির পুরুতের মেয়ে । পুরুত বিনোদচন্দ্র এখন খুবই বুড়ো হয়ে পড়েছেন । তাঁর ছেলে লক্ষ্মীকান্তই এখন পূজো-আর্চা করে । বিনোদচন্দ্রের অনেকগুলি ছেলেমেয়ে । তাদের অধিকাংশই লেখাপড়া শেখেনি । ভাল করে খাওয়াই জুটত না তাদের । রঙ্গময়ী বিনোদচন্দ্রের চতুর্থ কন্যা । তাঁর আশা ছিল মিদার শ্যামকান্তের মধ্যমপুত্র হেমকান্তের সঙ্গে এই মেয়েটির বিয়ে হবে । শ্যামকান্তের স্ত্রী মেয়েটির সুলক্ষণ দেখে একবার এরকম অভিমতও ব্যক্ত করেন । কষ্টেসৃষ্টে তিন মেয়ের বিয়ে দিলেও চতুর্থ রঙ্গময়ীর জন্য বিনোদচন্দ্র অন্যত্র বিয়ের চেষ্টা করেননি । বয়সে রঙ্গময়ীর চেয়ে হেমকান্ত প্রায় পনেরো বছরের বড় । কিন্তু রঙ্গময়ীর যখন বছর পাঁচেক বয়স তখন হেমকান্তের বিয়ে হয়ে যায় । এরপর বিনোদচন্দ্র নলিনীকান্তের আশায় বসে রইলেন । কিন্তু শ্যামকান্ত বা তাঁর স্ত্রীর তরফ থেকে তেমন কোনো আশাব্যঞ্জক ইঙ্গিত পেলেন না । তাঁর বড় তিনটি মেয়েই গরীবের ঘরে পড়েছে । তাদের একজন আবার অকাল বৈধব্যের কবলে । ছেলেরা কেউই মানুষ হয়নি । বিনোদচন্দ্র তখন রঙ্গময়ীকে জমিদারের ঘরে বিয়ে দেওয়ার জন্য মরিয়া । পুরোহিত হলেও তাঁর নীতিজ্ঞান প্রথর ছিল না । গলগ্রহ এক বালবিধবা বোন তাঁর সংসারে আছে । কনকপ্রভা । কনকের বুদ্ধি তীক্ষ্ণ, তবে বঁাকা । কনক একদিন বিনোদচন্দ্রকে বলল, সোনাভাই, যদি চৌধুরীবংশেই মনুকে দিতে চাও তো সোজা পথ ছাড় । বিনোদচন্দ্র সোজা পথ ছাড়তে রাজি, কিন্তু বঁাকা পথ পেলে তো !

কনক সেই বঁাকা পথের সন্ধান দিল না । তবে নিজেই দায়িত্ব নিল ।

নলিনী বড় দালানে থাকত না । কাছারিঘরের পাশে খাজাঞ্চী মুহুরি বা ওই ধরনের কর্মচারীদের জন্য যে এক সারি ঘর ছিল তারই একটায় থাকত । বিলাসবাসনের ধারেকাছেও ঘেঁষত না সে । ঘরে একটি তক্তাপোশ, তাতে দীন বিছানা । কয়েকটা বইয়ের আলমারি আর লেখাপড়ার জন্য একটা টেবিল আর চেয়ার ছিল । অনেক রাত অবধি জেগে সে পড়াশুনো করত সেই ঘরে ।

সেই ঘরে মাঝে মাঝে কনক রঙ্গময়ীকে পাঠাত । রঙ্গময়ীর কাজ ছিল গিয়ে জিঞ্জিঙ্গ করা, আপনার কি কিছু লাগবে ?

এরকম নিরীহভাবে ব্যাপারটা শুরু হয়েছিল । নলিনীর ঘরে মাঝে মাঝে খাওয়ার জল বা ঘোলের সরবৎ দিয়ে আসত রঙ্গময়ী । কাজটা তাকে দিয়ে কেন করানো হচ্ছে তা অবশ্য সে বুঝত না । নলিনীর প্রতি সে কোনো যুবতীসুলভ আকর্ষণও বোধ করত না ।

নলিনীও ছিল হৃদয়চর্চা থেকে বহুদূরের মানুষ ।

কিন্তু কনক ধৈর্য হারাচ্ছিল । মেয়েটা হাবা, ছেলেটা গবেট ।



সুতরাং আর একটু বাঁকা পথ নিতে হল কনককে । একদিন একটু বেশী রাত্রে সকলে ঘুমোনার পর রঙ্গময়ীকে ঠেলে তুলে দিল কনক, যা তো, নলিনীর বোধহয় খুব জ্বর এসেছে । দেখে আয় তো ।

রঙ্গময়ী ঘুমচোখে একটু অবাক হলেও তড়িঘড়ি গিয়ে ঢুকেছিল নলিনীর ঘরে । নলিনী পড়তে পড়তে মুখ তুলে অবাক হয়ে চাইল । এত রাত্রে রঙ্গময়ী !

কিছু বুঝবার আগেই বাইরে থেকে দরজা টেনে শিকল তুলে দিল কনক ।

নলিনী চমকে উঠল ।

আর থরথর করে কেঁপে উঠল রঙ্গময়ী !

## ॥ ২ ॥

টহলদার একটা কালো পুলিশ ভ্যান খুব শ্লথ গতিতে ফ্রি স্কুল স্ট্রিট ধরে উত্তরমুখে এগিয়ে আসছে । হেড লাইটের সামনে ফুটপাথ ধরে দুজন মাতালকে দৌড়োতে দেখা যাচ্ছে । একজন লম্বা, ফিট চেহারা । অন্যজন কিছু থলথলে । দুজনেই দৌড়োচ্ছে ল্যাং ল্যাং করে, টলোমলো পায়ে । পড়ছে, আবার উঠছে । পিছু ফিরে দেখছে বারবার । ভ্যানটা তাদের ঠিক তাড়া করছে না, কিন্তু অনুসরণ করছে । লেগে আছে আঠার মতো পিছনে ।

হাঁফাতে হাঁফাতে প্রশান্ত বলে, রোজ ন্যাকড়াবাজি ! শালা, রোজ ন্যাকড়াবাজি ! আমাদের পেয়েছেটা কী ? আই ধু-ধুব, আয় কেলো করি সেদিনের মতো ।

লম্বাজন ধুব । হাইড্র্যান্টের উঠে-থাকা ঢাকনায় একটা হৌচট খেয়ে খানিক দূর ভারসাম্যহীনভাবে পড়ো-পড়ো হয়ে গিয়েও দাঁড়ায় । কোমরটা চেপে ধরে বলে, মাইরি ! মাইরি ! রোজ পিছনে ভূতের গাড়ি ! আর পারা যায় না ।

অনেক রাত । ফাঁকা রাস্তায় হকারদের উঠে-যাওয়া অস্থায়ী দোকানপাটের ইঁট পড়ে আছে ফুটপাথে । প্রশান্ত একটা ইঁট তুলে নিয়ে ধুবর দিকে চেয়ে বলে, ঝাড়বো ?

কেস খরাপ হয়ে যাবে । সেদিনের কথা মনে নেই ?

আজ ফুটো করে দেবো । দেবো ?

দাঁড়া একটু ভাবি ।

গাড়িটা কিছু দূরে হেড লাইট জ্বেলেই দাঁড়িয়ে আছে । তারা দৌড়োলে আবার পিছু নেবে ।

ধুব সেদিকে চেয়ে বলল, এটা পুলিশের ভ্যান নয় ।

তাহলে ?

এটা মাইরি ভূতের গাড়ি ।

তোর বাপের মাথা । দুটো ইঁট ঝাড়, ভাগবে ।

ধুব মাথা নেড়ে বলে, কালুর দোকানে হটোপাটা করাটা আজ ঠিক হয়নি ।

আলবাং ঠিক হয়েছে । শালা মাল বেচে খায়, তার আবার টাইম লিমিট কিসের ? বারোটোর পর সেল ক্রোজড, ইয়ার্কি পেয়েছে ?

তা বলে ভাঙচুর করবি ? সিভিলাইজেশন নেই ?

আমি তো সেকথাই কালুকে বললুম, ঘর থেকে বার করে দিচ্ছি, এটা কোন দেশী ভদ্রতা ! বল, প্রথমে আমি রং দেখিয়েছি ? ওই শালাই তো রং নিচ্ছিল ।

ক্ষমাও তো করতে পারতি !

ক্ষমা ? প্রশান্ত একটু বেকুব বনে চেয়ে থাকে । তারপর জিভে চুক চুক দুটো শব্দ করে বলে, ইস শালা, তখন কথাটা মাথায় আসেনি মাইরি । অথচ দ্যাখ ধু-ধুব, আমি শালা লোককে ক্ষমা করতে

কত ভালবাসি। হাজার হাজার লোককে রোজ ক্ষমা করে দিচ্ছি শালা, আর কালুটাকে পারলুম না !  
এঃ !

ধুব কিছু গম্ভীর হয়ে বলে, কোথায় আমাদের একটা গোলমাল হচ্ছে বল তো ! রোজ গণ্ডগোল !  
একটা না একটা গণ্ডগোল। আর রোজ শালা পিছনে ভূতের গাড়ি।

এঃ। আমার দুগালে দুটো থাপ্পড় মারবি ধুব ? কেন শালা আমি রোজ ক্ষমা করতে ভুলে যাই  
বল তো ! মারবি থাপ্পড় !

মারাই উচিত। তোর সঙ্গে মেশাও উচিত নয়।

প্রশান্ত একটু থতিয়ে যায়। ধরা-ধরা গলায় বলে, তুইও ওর অনেকগুলো বোতল ভেঙেছিস।  
টেবিল চেয়ার উপেটে ফেলেছিস—

সে তো তোরটা দেখে।

গাড়িটা সামান্য একটু এগিয়ে আসে।

প্রশান্ত বিস্ফারিত চোখে চায়। বলে, আসছে ! ধু-ধুব ! দৌড়ো !

ইট মারবি না ?

না, না। ক্ষমা ! ক্ষমা ! দৌড়ো !

পারবি না। গাড়ির সঙ্গে কোনো হিউম্যান বিয়িং দৌড়ে পেরেছে ?

তাহলে ?

কেস কর। বিবেকানন্দ বলেননি, বর্বরদের মুখোমুখি হও !

কে ?

গ্রেট ম্যান।

বিবেকানন্দ ? কোথায় বলেছে বল তো !

কোথায় যেন। বলতে বলতে ধুব একটা ইট তোলে।

প্রশান্ত চাপা উত্তেজিত স্বরে বলে, মার ! ফুটো করে দে ! হুই-হুই-হুই-ই-

ধুব ইটটা ছুঁড়তে গিয়ে টাল সামলাতে না পেরে উবু হয়ে পড়ে যায়। ইটটাও প্রায় তার সঙ্গেই  
পড়ে।

এঃ মিস। বলে প্রশান্ত নিজের হাতের ইটটা খুব নিশানা করে ছুঁড়ে মারে। অদূরের হাইড্রান্টের  
জল ছিটকে ইটটা নিরাপদে অবতরণ করে।

গাড়িটা থেমে যায় ফের। সামনের দরজা খুলে একজন নামে। হেড লাইটের আলোর আড়ালে  
দাঁড়িয়ে লোকটা অনুচ্চ স্বরে বলে, ধুববাবু, হান্সা মাচাচ্ছেন কেন ? বাড়ি যান।

প্রশান্ত চোখ মিটমিট করে গাড়ির আলোর দিকে চেয়ে থেকে বলে, বাড়ি যাবো কিনা তাতে ওর  
বাবার কি ?

ধুব ওঠে। কাঁকালে হাত দিয়ে একটা ব্যথার শব্দ করে বলে, বাড়ি যেতে বলছে ?

বলছে। বাট দ্যাট ইজ নট হিজ বিজনেস। মার ইট। রোজ পিছু নেওয়া ! রোজ ন্যাকড়াবাজি !  
দে ফুটো করে। বলতে বলতে আর একটা ইট তোলে প্রশান্ত।

ধুব কর্তৃত্বের একটা হাত তুলে বলে, দাঁড়া, কী হয়েছিল যেন কালুর দোকানে ! হান্সাবাজি ?

ও মালের আড্ডায় একটু-আধটু হয়। কালু শালা মাল বেচে খায়, ওর অত ন্যাকড়া কিসের ?

ধুব মাথা নেড়ে বলে, আজ আমাদের মাল খাওয়ার কথা ছিল না। কাল আমরা প্রমিস  
করেছিলাম, আজ মাল খাব না।

আজকের কথা হয়নি। কথা ছিল, হুণ্ডায় একদিন বাদ দেবো। সেটা আজ হতে পারে, কাল হতে  
পারে, পরশু হতে পারে।

আজকের কথাই হয়েছিল। আজ ড্রাই ডে না ?

আজ ! ওফ, মনেই ছিল না মাইরি ! ইস, ছিঃ ছিঃ !

ওই ভূতের গাড়িটার দোষ নেই। ক্ষমা করে দে।

দেবো ? মাইরি ?

দে। ক্ষমার মতো জিনিস নেই।

প্রশান্ত হাতের ইঁটটা ফেলে দেয়। গাঢ় স্বরে বলে, ক্ষমার মতো জিনিসই হয় না। আমি রোজ হাজার হাজার লোককে ক্ষমা করি। যেদিন কাউকে ক্ষমা করতে ভুলে যাই সেদিন ভাল করে খেতে পারি না, ঘুমোতে পারি না, মাল খেলেই কান্না পায়। তোর ?

আমারও ওসব হয়। সকলের হয়।

হবেই। ক্ষমা করতে আমি এত ভালবাসি যে, মাঝে মাঝে নিজেকেও ক্ষমা করে দিই।

বহু মাতলামি করছিস প্রশান্ত ! আজ ব্যাপারটা শুরু হল কি করে বল তো !

কোন ব্যাপারটা ?

আমাদের মাল টানাটা ! উই ব্রোক দা প্রমিস, কি করে শুরু হল ?

নার্সিং হোম থেকে। তোর বাচ্চাটা অপয়া। দারুণ অপয়া।

আমার বাচ্চা ! বলে খুব ভূ কৌঁচকায়, তারপর ফ্যাক ফ্যাক করে হাসে, আমার বাচ্চা ! হাঃ হাঃ—

প্রশান্ত সন্দেহের গলায় বলে, তোরই তো ! ঠিক বলিনি ?

দূর শালা ! তোকে একটা কথা বলে রাখি। তোকে বলেই বলছি। বাচ্চাটা আমার নয়।

তবে কার ?

অত আমি জানি না। তবে লাস্ট টু ইয়ারস আমি বউয়ের সঙ্গে শুইনি।

মাইরি বলছিস ?

মাইরি।

সামনের মোড়ে আর একটা জীপগাড়ি বাঁক ফেরে এবং এগিয়ে এসে ভ্যানটার পিছনে থামে। দু একজন লোক নামে। কিন্তু ভ্যানটার হেড লাইট এখনো জ্বলছে বলে কাউকে দেখা যায় না।

একটু অপেক্ষা করে খুব আর প্রশান্ত।

ভ্যানের কাছে থেকে একজন চুঁচিয়ে বলে, খুববাবু !

প্রশান্ত আবার ফেলে-দেওয়া ইঁটটা তোলে। বলে, শালারা বহু ভ্যানতারা করছে।

খুব হাত তুলে প্রশান্তকে থামায়। কয়েক কদম এগিয়ে গিয়ে অদৃশ্য লোকটার উদ্দেশ্যে বলে, কেন ঝুটমুট ঝামেলা করছেন ? আমরা কিছু করিনি।

লোকটা হেঁড়ে গলায় বলে, বাড়ি যাবেন, না ধরে নিয়ে যাবো ?

খুব কাঁধ ঝাঁকিয়ে মুখটা বিকৃত করে একটু। তারপর বলে, যাচ্ছি বাবা, যাচ্ছি।

হেড লাইটের আড়াল থেকে লোকটা আবার বলে, আপনার বাবা একটু আগেই থানায় টেলিফোন করেছিলেন। বলেছেন, এমনিতে না গেলে হাসপাতালে গিয়ে পাম্প করে পেট থেকে মাল বের করে তারপর ভ্যানে করে পৌঁছে দিতে।

খুব বলে, যাচ্ছি। কিছু করতে হবে না। আপনারা ডিউটিতে যান।

লোকটা নাছোড়বান্দা। বলে, যাচ্ছি বললে হবে না। আপনি ভ্যানে এসে উঠুন। আমরা পৌঁছে দেবো।

খুব দু পা পিছিয়ে গিয়ে ভয়ার্ড গলায় বলে, ভ্যান লাগবে না। আমরা ট্যাকসি ধরে নেবো।

তাহলে ধরুন। যতক্ষণ না ট্যাকসিতে উঠছেন ততক্ষণ আমরা ফলো করব। আমাদের ওপর স্ট্রিকট অরডার আছে।

প্রশান্ত বিড়বিড় করে বলে, তোর বাপটা বহু খচ্চর। ভি আই পি আছে তো কী আছে ? ছেলে

বলে কি চাকর ?

খুব চাপা স্বরে বলে, সিভিলাইজেশন বলে একটা কথা আছে প্রশান্ত । আজ আমরা খুব গণ্ডগোল করেছি ।

মাল খায় তো লোকে একটু গণ্ডগোল করবে বলেই শুরু ।

খুব গম্ভীর হয়ে মাথা নেড়ে বলে, আজ গণ্ডগোলের দিন ছিল না । কালুর দোকানে ছটোপাটা করা ঠিক হয়নি ।

ছটোপাটা হত না মাইরি । একটা কালো মতো রোগা মতো লোক আজ কালুর দোকানে বসেছিল । ভেজা বেড়াল শালা ! খুব নজর করছিল আমাদের ।

বটে ! ঠিক দেখেছিস ?

খুব ঠিকসে দেখেছি শুরু । গায়ে একটা ফান্টুস জ্যাকেট ছিল । খুনিয়া রঙের জ্যাকেট । শেষদিকে ওই লোকটা কালুকে চোখ মারায় কালু বাঁপ ফেলে দিল ।

ভূতের বাচ্চাটা কে বল তো !

পুলিশের খৌঁচড় হবে ।

খুব একটা হাই তোলে । বলে, ঠিক আছে । যা হওয়ার হয়ে গেছে । চল ।

লিগুসে স্ট্রিটে মোড় নিয়েই দুজনে দাঁড় করানো ট্যাকসি দেখতে পায় । ট্যাকসির সামনে একজন কনস্টেবল দাঁড়িয়ে ।

প্রশান্ত একটা হতাশার শ্বাস ফেলে বলে, অ্যারেনজমেন্ট ! মাইরি, তোর সঙ্গে ফুর্টি করে সুখ নেই ।

মুখটা একটু বন্ধ রাখবি বাবা ?

কনস্টেবলটা ট্যাকসির পিছনের দরজা খুলে ধরে । বলে, উঠুন । ড্রাইভারকে বলা আছে ।

খুব একটু লজ্জিত মুখ করে গাড়ির ভিতরে গাড়িয়ে চলে যায় । প্রশান্ত উঠবার আগে কনস্টেবলটার দিকে কটমট করে একটু চেয়ে থাকে । কনস্টেবল দরজাটা বন্ধ করে দেয় । ট্যাকসি চলতে থাকে ।

প্রশান্ত এক পকেট থেকে সিগারেটের প্যাকেট বের করে এ পকেট ও পকেট হাতড়ে বলে, আমার দেশলাই ?

খুব অলস গলায় বলে, আমারটাও কালুর দোকানে পড়ে আছে । এই যে ড্রাইভার, আপনার দেশলাইটা দেখি ।

ড্রাইভার জবাব দেয় না, তবে একটা হাতে একটা দেশলাই এগিয়ে দেয় । সিগারেট ধরাতে যাতে অসুবিধে না হয় তার জন্যই বোধ হয় গাড়ির গতিও ধীর করে দেয় ।

দুজনে সিগারেট ধরানোর পর প্রশান্ত বলে, ভি আই পি-দের হাত লম্বা হয় ঠিক শালা ভূতের হাতের মতো । সেই যে ঘর থেকে হাত বাড়িয়ে লেবু গাছ থেকে লেবু ছিঁড়ে এনেছিল, মনে নেই ? ঠিক সেইরকম ।

খুব ঝিমোতে ঝিমোতে বলে, মুখটা বন্ধ করবি বাপ ! আমার মনটা ভাল নেই । আমি একটু চোখ বুজে ভাবছি ।

কী ভাবছিস ? যে বাচ্চাটা তোর বউ আজ পয়দা করল সেটা তোর নয় ?

ওটা আমার নয় ঠিকই, কিন্তু ওটা নিয়ে ভাবছি না ।

তবে কী নিয়ে ভাবছিস ?

অনেক সিরিয়াস প্রবলেম আছে । তুই সব বুঝবি না । মুখ বুজে থাক । ভবানীপুর এলে নামিয়ে দেবো ।

প্রশান্ত একটু গম্ভীর হয়ে বিজ্ঞের মতো বলে, তোর প্রবলেম কোনটা জানিস ?

আমার অনেক প্রবলেম ।

তোর প্রবলেম আসলে একটাই । সেটা হল তোর বাপ ।

বাবাও একটা প্রবলেম বটে ।

বহুৎ গভীর কঠিন প্রবলেম । বাপের জন্যই তোর লাইফটা বিলা হয়ে যাচ্ছে । শালা পাবলিকের কাছে ইমেজ খারাপ হয়ে যাবে, ভোটে টান পড়বে, তাই তোর বাপ তোরা পিছনে হরবকত লোক লাগিয়ে রেখেছে । তুই বাঁচতে চাস তো পালা । ফোট ।

ধুব দু হাতে কান ঢেকে বলে, ওঃ এমন চোঁচাচ্ছিস ! মাথা ধরে যাচ্ছে !

চোঁচালুম ? আচ্ছা, ক্ষমা ।

ধুব একটু বিরক্তির গলায় বলে, সিগারেটের ফুলকি আসছে । ঠিক করে ধর । জানালার কাচটা পুরো তুলে দে ।

দিচ্ছি গুরু ।

প্রবলেমের কথাটা শুনতে চাস ? তোকে বলেই বলছি ।

বল না ।

কাউকে বলবি না । বাবা রিসেন্টলি এনিমি প্রপার্টির অনেক টাকা পেয়ে গেছে । কয়েক লাখ টাকা ।

এনিমি প্রপার্টি ? সেটা কী জিনিস ?

ধুব শালা ! ইস্টবেঙ্গলে আমাদের মেলা প্রপার্টি ছিল না ?

ওঃ, সে প্রপার্টি !

সেই প্রপার্টি ।

টাকা পেলে আর প্রবলেমের কী ?

আছে । টাকাটা আমাদের তিন ভাইয়ের মধ্যে ভাগ হওয়ার কথা ।

তোরা ভাগে কত পড়বে ?

ঠিকমতো ভাগ হলে অনেক । কিন্তু হচ্ছে না ।

কেন ?

বাবারা যে চার ভাই । দলিল বাবার কাছে ছিল বলে বাবা পেয়ে গেছে । কিন্তু টের পেয়ে আমার জ্যেষ্ঠত্বতো ভাইরা অবজেকশন দিয়েছে ।

গাড্ডা । কিন্তু তোরা বাপ ঠিক বেরিয়ে আসবে । খচ্চর লোক ।

ধুব মাথা নাড়ে । বলে, পারছে না । বহুৎ গাড্ডা । এখনকার আইনের অনেক প্যাঁচ । বাপের প্রপার্টিতে মেয়েদেরও দাবি আছে । তাই পিসিরাও নেমে পড়েছে ।

তোরা বাপ তাহলে করছে কী ?

বাবা খুব ক্ষেপে আছে । আমি ভেবেছিলাম এ টাকাটা হাতে পেলে কেটে পড়ব । একদম হাওয়া হয়ে যাবো ।

কোথায় যাবি ?

যেখানেই যাই, তোরা বাপের কী ? ধুব ধমকে ওঠে ।

প্রশান্ত খিলখিল করে হাসে, ন্যাকড়াবাজি শালা ?

ধুব সিগারেটে একটা টান মেরে বলে, আরে বাবা, এ সেই বাড়ি থেকে পালানো নয়, আমার বাবাও সিরিয়াসলি চাইছে, আমি কেটে পড়ি ।

মাইরি ?

চাইবেই । আফটার অল হি ইজ এ লিডার । আমি থাকলে বাবার কনস্ট্যান্ট হেডেক । আমাকে কাটিয়ে দেওয়ার জন্য বাবা একটা অ্যারেনজমেন্ট করেছিল । নাসিকে বাবার এক বন্ধু আছে । তার

সঙ্গে আমাকে ভেড়াতে চাইছে বাবা । আমি বাবাকে বলেছি, রাজি আছি তবে লাখ দুই টাকা ছাড়ুন ।

দু লাখ ! সে তো অনেক টাকা ! প্রশান্ত চোখ বড় করে ।

দূর শালা ! ঘরের টাকা নাকি ? বাবা তো এনিমি প্রপাটির টাকাটা ফালতু পেয়ে গেছে । সেটা থেকেই দেওয়ার কথা ছিল ঘরের টাকা হলে বাবা রাজি হত নাকি ?

সে কেসটা তো বিলা হয়ে গেছে বলছিস !

হাঁ । দারুণ কিচান হচ্ছে । মামলা-টামলাও হতে পারে । তবে বাবাকে সবাই ভয় খায় বলে এখনো তেমন কিছু করছে না ।

তোর বাবা পুরো টাকাটা ঠিক হজম করে দেবে । লিডাররা সব পারে ।

যা বুঝিস না, জানিস না তা নিয়ে কথা বলিস কেন ?

এ আর না বোঝার কী আছে গুরু ?

আছে । সম্পত্তিটা আসলে বাবারই ছিল । শেষ বয়সে দাদু বাবার নামে সব লিখে দিয়ে যায় । উইলের প্রবেটও আছে । কিন্তু উইল কেউ মানছে না বলে ঝামেলা । বাবা সকলের সঙ্গে নেগোশিয়েসন চালাচ্ছে, আত্মীয়দের বলছে, কিছু ছাড়ছি, তোমরা মেলা ঝামেলা কোরো না ।

তোর বাপকে সব দিয়ে গেল কেন ?

বাবা ছিল যাকে বলে ড্যাডি'জ ব্রু আইড বয় । সে অনেক কথা । আমাদের ফ্যামিলি অ্যাফেয়ার তোর অত জানার কী দরকার ?

প্রশান্ত একটা হাই তুলে বলে, কে জানতে চাইছে গুরু ? তখন থেকে তুইই তো ফ্যাচ ফ্যাচ বকে যাচ্ছিস । আমার মাথা ধরে গেছে । পাকিস্তানে তৌদের ক' পহার সম্পত্তি ছিল রে ? তোর বাপ লিডারী করে তার চেয়ে ঢের বেশি কমিয়েছে । ওসব বাত ছোড় ।

কমিয়েছে তো কী ? আমার বাবা সাফারও করেছে । হি ওয়াজ এ পোলিটিক্যাল সাফারার ।

প্রশান্ত আবার খিক খিক করে হেসে বলে, জানি বাবা জানি । ব্রিটিশ আমলে তিন দিন যে জেল যেটেছে তারও এখন রবরবা । আমার তকমা পাচ্ছে, মাসে মাসে পেনসন । বিজঘুড়ি করবার । ওয়াঃ ওয়াঃ ।

মুড় মিছরি কি এক দর রে শালা ? আমার বাবার নাম স্বাধীনতার ইতিহাসেও লেখা আছে । পড়ে দোখস । বাপ তুলে কথা বলিস শালা ? আমার বাপ যখন জেল খাটছে তখন তোর বাপ কী কবত জানিস ? দুটির মধ্যে শাট গুঁজে পরে হাফ সাহেব সেজে সাহেবদের তেল দিত । ইয়েস স্যার, নো স্যার, ভেরি গুড স্যার ।

প্রশান্ত একটু মাথা চুলকে বলে, তা হতে পারে । তবে আমাদের ফ্যামিলিতে অত বুট ঝামেলা নেই । ফালতু কেউ চুলকে ঘা করতে যেত না ।

চামচা ফ্যামিলি ।

ঠিক কথা । কিন্তু স্টেট ফ্যামিলি । চামচা তো সবাই চামচা । তোর ফ্যামিলিটা জগা খিচুড়ি, একটা চামচা, একটা বিপ্লবী, একটা কেপ্তান তো আর একটা হাড় বজ্জাত ।

সবচেয়ে বজ্জাত কোনটা জানিস ?

কোনটা ?

লালটুদা ।

আরে বাবা ! যে লোকটা ইস্টবেঙ্গলে খেলত সেই না ?

সেই । এন ব্যাংকের অফিসার । সাপের পাঁচ পা দেখেছে ।

বহোৎ খানেপিনেওলা লোক মাইরি ।

খায় । আবার খাওয়ায়ও । ওসব ঠিক আছে । কিন্তু বাবার সঙ্গে যে সবচেয়ে বেশী লড়ে যাচ্ছে সে হল লালটুদা ।

প্রশান্ত হঠাৎ একটু ঝুঁকে রাস্তাটা দেখে নিয়ে ড্রাইভারকে বলে, আরে ব্যাস, ব্যাস। আমার গাড্ডায় এসে গেছে।

ট্যাকসি থামে। প্রশান্ত নেমে যায়। জানালা দিয়ে উঁকি মেরে বলে, গুড নাইট গুরু! ফির মিলেঙ্গে।

চোখ বুজে মাছি তাড়ানোর মতো একবার হাত নাড়ে ধুব। কোথায় যেতে হবে ড্রাইভার জানে। সুতরাং সে আর বাকি রাস্তাটা মুখ খোলে না।

ধুব যখন তাদের কালীঘাটের বাড়ির সামনে এসে ট্যাকসি থেকে নামে তখনো তিনতলার একটা ঘরে আলো জ্বলছে। অনেক রাত পর্যন্ত সেই ঘরে আলো জ্বলে।

বাড়ির সামনে একটু বাগান আছে। ফটক পেরিয়ে ঢুকলে ঘোঁরানো রাস্তা। তারপর গাড়িবারান্দা। সিঁড়ি, বৈঠকখানা। বাড়িটার চেহারা বেশ পয়মস্ত। নিজেদের বাড়ি হলেও ধুব মাঝে মাঝে নিরপেক্ষ তৃতীয় ব্যক্তির চোখে বিচার করে দেখেছে। তার মনে হয়েছে, এ বাড়ির মালিকের বর্তমান সমাজ ব্যবস্থায় টিকে থাকার মতো এলিমেন্ট আছে।

বৈঠকখানার দরজায় জগাদা দাঁড়িয়ে। মাথায় সেকেলে লেঠেলদের মতো ঝাঁকড়া চুল। জোয়ান চেহারা। গায়ে এই শীতকালেও একটা ফর্সা গেঞ্জী আর ধুতি। বয়স ষাটের ওপরে হবে, কিন্তু বিপুল স্বাস্থ্যে চাপা পড়ে বয়স টি টি করছে।

আরে জগাদা!

জগা এক ধরনের নিষ্পলক চোখে তাকে দেখছিল। এখন জগাকে ভয় পাওয়ার মতো কিছু নেই ধুবর। তবে সে যখন ছোটো ছিল, এবং জগাদা যখন আরও কমবয়সী এবং আরও স্বাস্থ্যবান তখন চড় চাপড়টা মাঝে মাঝে খেতে হত। আশ্চর্য এই, এ বাড়ির কাজের লোক হয়েও জগাদার সেই অধিকারে কেউ হস্তক্ষেপ করত না। এখন আর ভয় খায় না ধুব, বরং পিছনে লাগে।

জগা বললে, এতক্ষণে এলে?

খুব রাত হয়ে গেছে নাকি? ধুব একটু অবাক হওয়ার ভান করে বলে।

জগা মাথা নেড়ে বলে, ফুটির পক্ষে রাত হয়নি মোটেই। কিন্তু আজকের দিনটা রাত না করলেও পারতে।

কেন, আজ কী?

আজ কী সে তো তোমারই জানার কথা।

ও, ধুব মাছি তাড়ানোর মতো করে হাত নেড়ে বলে, সব ব্যাপারে তোমরা অত সিরিয়াস কেন বলো তো! দুনিয়াটা গোমড়ামুখোয় ভরে গেল মাইরি।

জগা একটু চাপা গলায় বলে, জোরে কথা বলো না। বাড়িসুদ্ধ সবাই জেগে আছে।

কেন? জেগে আছে কেন? আমার বিচারসভা বসবে নাকি?

সে কে জানে। তুমি ঘরে যাও। বেশী শব্দসাদা কোরো না।

যাচ্ছি বাবা যাচ্ছি। চতুর্দিকে এত গারজিয়ান থাকলে বড় মুশকিল। তোমাকে এখানে খাড়া থাকতে বলেছে কে?

কেউ বলেনি। তুমি ঘরে যাও।

জগাদা, তুমি কি এখনো এবাড়ির চাকর?

জগা একটু হাসে, তোমার কী মনে হয়?

মনে হয় তুমি চাকর হয়েই জন্মেছো। এ জন্মে আর স্বভাবটা ছাড়তে পারবে না।

না হয় নাই পারলাম।

কেন পারছো না? ম্যাকিনেল বেরীতে তুমি আট শো টাকা মাইনের চাকরি করো। বাগনানে তোমার জমিজিরেত বউ-বাচ্চা আছে। এই সমাজ ব্যবস্থায় তুমি যথেষ্ট ভদ্রলোক, তবু চাকরের

মতো হাবভাব কেন ?

চৈঁচিও না, বলছি না, সবাই জেগে আছে ।

ধুব চট করে জিভ কেটে বলে, তাই তো । ভুলে যাচ্ছিলাম । আসলে তোমাকে দেখলে আমি আর নিজেকে সামলাতে পারি না । পঞ্চাশ বছরেরও বেশী এ বাড়ি তোমার রক্ত মজ্জা মেদ মাংস শুষে খেয়েছে । তোমার গায়ে, চরিত্রে, স্বভাবে স্ট্যাম্প মেরে দিয়েছে চাকর বলে । আমার চোখের সামনে একবার তোমাকে সোনাজ্যাঠা চটিপেটা করেছিল । আজও তবে কেন তুমি এবাড়ির গোলামী করো তোমার ভিতরে আশুন নেই ? বিদ্রোহ নেই ?

একতলার একটা লম্বা প্যাসেজ পেরোচ্ছিল তারা । অনেকগুলো সারিবদ্ধ ঘর । বেশীর ভাগই খালি এবং তালো দেওয়া । শেষ প্রান্তের ঘরটায় আলো জ্বলছে । এ ঘরটাই ধুবর । ধুবর একার । তার বউ এ ঘরে থাকে না । এখন অবশ্য সে নার্সিং হোমে ।

জগা কথা বলছিল না । সঙ্গে সঙ্গে হাঁটছিল শুধু ।

ধুব নিজের ঘরের দরজায় দাঁড়িয়ে জগার দিকে ফিরে বলল, ভাঙো জগাদা, ভাঙতে শুরু করো ।

কী ভাঙবো

এ বাড়ির বনিয়াদ । হাতের কাছে যা পাও তাই দিয়েই ভাঙতে শুরু করো । বাড়ি ভাঙো, মানুষ ভাঙো, সিস্টেম ভেঙে উড়িয়ে দাও ।

জগার কাছে এসব কথা নতুন নয় । বহুবাব শুনেছে । পেটে জিনিস পড়লেই ধুব একটু বিপ্লবী হয়ে যায় । জগা হাত ধরে ধুবকে ঘরে টেনে ঢোকালো । তারপর দরজাটা আবজ্ঞে দিয়ে বলল, আজকের দিনটা বাদ দিতে পারলে না তোমার আজ প্রথম ছেলে হল !

এক ভেলে আমার মাইর জগাদা, সব জেনেশুনে তুমিও একথা বললে !

চুপ আচমকাই জগা একটা বাধা গর্জন করে ওঠে ।

ধুব দু পা পিছিয়ে যায়, কী যে চৈঁচাও না মাথা ধরে যাচ্ছে ! চৈঁচাচ্ছ কেন ? এমন কী বলেছি

যা বলেছো তা আর বলে না ।

কেন বলব না ?

জগা একটা গভীর হতাশার চোখে ধুবর দিকে চেয়ে বলে, বউমার অবস্থা ভাল নয় । তার মানে ?

নার্সিং হোম থেকে একটু আগেই টেলিফোন এসেছে । ছোটোবাবু খবর পেয়েই চলে গেছেন ।

ধুব চুপ হয়ে যায় । তার আর কিছু বলার থাকে না ।

॥ ৩ ॥

চোখের পলকে অবস্থাটা বুঝে নিয়েছিল কিশোরী রঙ্গময়ী । মেয়েদের বাস্তববুদ্ধি একটু বেশীই দেন বিধাতা । রঙ্গময়ী বুঝেছিল, ওই বন্ধ কপাট তার জীবনের সব সম্ভাবনার পথে খিল তুলে দিল । সে ঝাঁপিয়ে পড়ল বন্ধ দরজার ওপর । চৈঁচানোর উপায় নেই, করাঘাত করা বিপজ্জনক । দরজায় মৃদু কিল দিতে দিতে সে চাপা গলায় বলতে লাগল, দরজা খোলো, পিসি, দরজা খোলো ! ও পিসি...

নলিনীকান্ত বজ্রাহতের মতো বসে অবাক চোখে দৃশ্যটা দেখছিল, কিছুক্ষণ সে বোধহয় মানুষ ছিল না, পাথর হয়ে গিয়েছিল । তারপর হঠাৎ উঠে দাঁড়িয়ে বলল, কী হয়েছে বলো তো ! কে বাইরে থেকে দরজা বন্ধ করল ?

রঙ্গময়ী তখনো থরথর করে কাঁপছে । নলিনীকে তার ভয় ছিল না । সে জানত নলিনী নারীমুখী



নয়। মেয়েমানুষের প্রতি তার কোনো আগ্রহ নেই। রঙ্গময়ীর ঢের বেশী ভয় সমাজকে, কলঙ্কে। কাঁপতে কাঁপতে জ্বরগ্রস্ত রুগীর গলায় সে বলল, পিসি, আমার পিসি। ওপাশে শেকল তুলে দিয়েছে।

কেন? বাইরে থেকে শেকল তুলে দেওয়ার মানে কী?

জানি না। আপনি দরজাটা খুলে দিন।

নলিনী অনুচ্চ স্বরেই কথা বলছিল। কিন্তু সেই মৃদু স্বরও রাগে থমথম করে উঠল, এত রাতে তুমিই বা আমার ঘরে এলে কেন?

রঙ্গময়ী সেই রাগের আভাস দেখেই অপরাধবোধে কঁদে ফেলল। ভাঙা বিকৃত গলায় বলল, আমি তো আসিনি। পিসি বলল, আপনার কিছু দরকার আছে কিনা জিজ্ঞেস করতে। পিসি সঙ্গে এসেছিল।

হঠাৎ নলিনীর মুখ রুদ্ধ রোষে টকটকে লাল হয়ে গেল। বলল, তোমার পিসি?

হ্যাঁ, আমি কিছু জানি না।

নলিনী রাগলেও সেই রাগ রঙ্গময়ীর ওপর প্রকাশ করল না। চুপ করে দাঁড়িয়ে সম্ভবত পরিস্থিতিটা একটুক্কণ ভেবে নিল। তারপর হঠাৎ হাসল। তার হাসি বরাবর সুন্দর। অমলিন, সরল। দাঁতের ঝিকিমিকির ভিতর দিয়ে তার হৃদয় দেখা যেত।

মাথাটা একটু নেড়ে সে বলল, এভাবে কি হয়?

রঙ্গময়ী ভীত গলায় বলল, কী হয়?

নলিনী মাথাটা আগের মতোই নাড়তে নাড়তে বলল, এভাবে হয় না। তোমার পিসিকে সুযোগমতো বোলো, এভাবে হয় না। তুমি বড় ছোটো, ঠিক বুঝবে না। তোমার পিসি ভুল করেছেন।

আপনি দরজাটা খুলে দিন।

ভয় পেও না রঙ্গময়ী। চেয়ারটায় বোসো। দেখি আমি কী করতে পারি।

রঙ্গময়ী আর্ত গলায় বলল, পিসি দরজা বন্ধ করে দিল কেন?

সেটা তোমার পিসিকেই জিজ্ঞেস করো। তিনি যদি বলতে নাও চান তাহলেও ক্ষতি নেই রঙ্গময়ী। বয়স হলে তুমি নিজেই বুঝতে পারবে।

রঙ্গময়ী হয়তো বুঝতে পারছিল, আবার পারছিলও না। কিশোরী বয়সের বয়ঃসন্ধি। আলো-আঁধারির সময়। পিসি একটা অঘটন ঘটাতে চাইছে, টের পাচ্ছিল সে। কিন্তু কেন, তা ভেবে তার মাথা কুল-কিনারা হারিয়ে ফেলছিল। এত রাতে একা পরপুরুষের ঘরে কী করে পিসি ঠেলে দিতে পারে তাকে?

তবে নলিনীকে রঙ্গময়ী জানত। এ পুরুষ বটে, কিন্তু বিপজ্জনক নয়। না, কথাটা ঠিক হল না। নলিনী হয়তো বা বিপজ্জনকই ছিল। পরবর্তী কালে তার জীবনের একটা গোপন দিক প্রকাশ হওয়ার পর সেটা জানা গিয়েছিল। কিন্তু সেই বিপদ মেয়েদের জন্য নয়, ইংরাজদের জন্য। তাই রঙ্গময়ীর সেই রাতে ভয় করেনি। লজ্জা ও আত্মগ্লানিতে ফুঁপিয়ে ফুঁপিয়ে কঁদতে কঁদতে সে গিয়ে নলিনীর টেবিলের সামনে কাঠের চেয়ারে বসল।

বুদ্ধিমান নলিনী দরজা খুলবার চেষ্টা করল না। শাস্তভাবে ফিরে এসে সেও বসল নিজের চেয়ারে। রঙ্গময়ী দুহাতে মুখ ঢেকে কঁদছে। নলিনী ধীর স্বরে বলল, দরজার পাশ্চাটা খুব ভারী। জোর করে খুলতে গেলে শব্দ হবে। কাউকে তো এ অবস্থায় ডাকাও যায় না।

রঙ্গময়ী ভীত স্বরে বলল, তাহলে?

তোমার পিসি খুব নিশ্চিন্তে বসে থাকবেন না নিশ্চয়ই। এক সময়ে এসে ঠিকই দরজা খুলে দেবেন। ততক্ষণ আমাদের অপেক্ষা করতে হবে।

সে কতক্ষণ ? রঙ্গময়ী আকুল গলায় প্রশ্ন করে ।

নলিনী তেমনি ঝকঝকে হাসি হেসে বলে, তোমার পিসির তো মাথায় গোলমাল । বিকারগ্রস্ত লোক । তিনি কখন এসে দরজা খুলবেন তা কে জানে ! হয়তো একা আসবেন না, সঙ্গে লোক জুটিয়ে আনবেন ।

লোক জোটাবেন কেন ?

তুমি বড় বোকা রঙ্গময়ী । আমার যতদূর ধারণা, উনি তোমাকে আর আমাকে ফাঁদে ফেলতে চাইছেন ।

সর্বনাশ !

নলিনী মাথা নেড়ে বলল, কিছু সর্বনাশ নয় । চিন্তা কোরো না । বসে বসে বই পড়ো বরং । কী পড়বে ? বঙ্কিম ?

রঙ্গময়ীর বই পড়ার মতো মনের অবস্থা নয় । সে মাথা নেড়ে জানাল, বই পড়বে না ।

তাহলে কী করবে ?

বসে থাকবো । ওই জানালাটার শিক ভাঙা যায় না ?

যায় । তবে তার জন্য একটা ছোটোখাটো হাতি লাগবে । দেখছো তো, কী মোটা শিক !

রঙ্গময়ী ভারী হতাশ হয়ে আবার মুখ ঢাকল । ফোঁপাতে লাগল ।

নলিনী এবার আর তাকে বাধা দিল না । কাঁদতে দিল । নিজে যে বইখানা পড়ছিল সেটা ফের তুলে নিয়ে চঞ্চলভাবে পাতা ওল্টাতে লাগল । কিন্তু পড়ার মতো মনের অবস্থা নয় । একসময়ে বইটা টেবিলে রেখে শান্তভাবে রঙ্গময়ীর দিকে চেয়ে বলল, মানুষের মনের নোংরামি দেখলে আমার ভারী ধূগা হয় । পৃথিবীতে তোমার পিসির মতো মানুষের কোনো প্রয়োজন নেই, তবু এরা জন্মায় কেন বলো তো।

রঙ্গময়ী কী জবাব দেবে ? তার পিসি কনকপ্রভা খারাপ না ভাল তা সে কখনো বিচার করে দেখেনি । পিসি পিসিই । কোলেপিঠে করে তাদের মানুষ করেছে । আদরে সোহাগে শাসনে । শুদ্ধাচারী বিধবা । তার বিচার রঙ্গময়ী কি করতে পারে ? তাই কথটা তার কানে লাগল । কিন্তু পিসির পক্ষ হয়ে তো কিছু বলারও নেই । তাই চুপ করে নখ দিয়ে টেবিলক্ৰুথের এমব্রয়ডারির একটা ফোঁড় খুঁটতে লাগল সে ।

নলিনী উঠে চঞ্চল পায়ে পায়চারী করতে করতে বলল, তোমার পিসি এর আগে আমার কাছে বিয়ের প্রস্তাবও এনেছেন । আমি তাঁকে অনেক বুঝিয়ে বলেছি, বিয়ে করা আমার পক্ষে সম্ভব নয় । আমি কখনো নারীচিন্তা করি না, সংসারধর্ম পালনের বিন্দুমাত্র আগ্রহ আমার নেই । তোমার পিসি সেটা শুনেছেন, কিন্তু বিশ্বাস করেননি ।

এ কথা শুনে রঙ্গময়ীর মরে যেতে ইচ্ছে করছিল লজ্জায় । পিসি তার অজান্তে এত কাণ্ড করেছে, সে জানত না । টেবিলের দিকে আরো ঝুঁকে পড়ল সে ।

নলিনী বলল, তিনি ভাবলেন আমি বোধহয় গরীবের মেয়ে বলেই তোমাকে বিয়ে করতে রাজি নই । আশ্চর্য ! গরীবিয়ানা তো একটা অবস্থার ভেদ মাত্র । নিত্য পরিবর্তনশীল সমাজে ধনী ও দরিদ্র কারো স্থায়ী পরিচয় তো নয় । তা ছাড়াও একটা কথা আছে রঙ্গময়ী ।

রঙ্গময়ী এক পলক তাকাল নলিনীর দিকে । তারপর আবার মুখ নামিয়ে নিল ।

নলিনী ধীর স্বরে বলল, তোমাকে বা আর কোনো মেয়েকে আমার কোনোদিনই বিয়ে করার সম্ভাবনা নেই । আমি ভিন্নতর এক কাজে ব্যস্ত । কিন্তু তোমাকে একটা কথা জিজ্ঞেস করতে চাই ।

রঙ্গময়ীর বুক কাঁপছিল । ভয় সব সময়ই অজানাকে ঘিরে । সে তো জানে না নলিনী কী জিজ্ঞেস করবে । সে শক্ত হয়ে রইল ।

নলিনী জিজ্ঞেস করল, তুমি কি কারো প্রতি আসক্ত রঙ্গময়ী ?

রঙ্গময়ী আকাশ থেকে পড়ল। আসক্ত ? কই না তো ! কিন্তু তবু তার মুখ রাঙা হয়ে উঠল লজ্জায়। কঠ রোধ হল। এ কী কথা ! এ কেমন কথা !

নলিনী তার মুখের দিকে তীক্ষ্ণ চোখে চেয়ে ছিল।

রঙ্গময়ী মাথা নেড়ে জানাল, না।

নলিনী মৃদু স্বরে বলল, তুমি হয়তো জানো না। বয়স কম বলে হয়তো আসক্তিটা ঠিক বুঝতেও পারছ না। এমন কি হতে পারে ?

আপনি এসব কী বলছেন ? রঙ্গময়ী আত্ননাদ করে ওঠে।

তোমাকে যন্ত্রণা দেওয়ার জন্য বলছি না। আমি বলছি, কোনো মেয়ে যদি কোনো পুরুষের প্রতি আসক্ত হয় এবং বর্ণে, ধর্মে, শিক্ষায় দীক্ষায় যদি মিল থাকে তবে তাকেই তার বিয়ে করা উচিত। যদি বিবাহ সম্ভব নাও হয় তবে অন্য কোনো পুরুষকেও তার গ্রহণ করা উচিত নয়।

রঙ্গময়ী স্তব্ধ হয়ে বসে রইল। মাথা তুলতে পারল না। বুকের মধ্যে একটা ঝোড়ো বাতাসের দোলা। সেই বয়ঃসন্ধির সময়ে তার কোনো বোধবুদ্ধিই পরিণত ছিল না। মনে একটা আলো-আঁধারির আবহাওয়ায় কত চিন্তার ছবি ভেসে যেত। সত্য বটে, সেই বয়সে যখন তার বিয়ের কথা চলেছে তখন সে মাঝে মাঝে তার সম্ভাব্য স্বামীর রূপ কল্পনা করেছে। কিন্তু সেই রূপ সেই চেহারা—ছিঃ ছিঃ। রঙ্গময়ী দুহাতে মুখ ঢেকে ফেলল অপ্রতিরোধ্য লজ্জায়। কিন্তু সেই শ্রীর গোপন কথা তো আর কারো জানা সম্ভব নয়।

নলিনী মৃদু স্বরে বলল, তোমাকে কিছু বলতে হবে না রঙ্গময়ী। কেউ কিছু জানবে না। আমি তোমাকে খুবই স্নেহ করি। মাঝে মাঝে আমার মনে ইচ্ছে হয় তোমাকে একজন আদর্শ নারী হিসেবে প্রস্তুত করে দিই। কিন্তু সেটা হয়তো আর সম্ভব নয়। এখন থেকে তোমার সংস্রবও আমাকে এড়িয়ে চলতে হবে। তবে একটা কথা বলি, বয়সকালে তোমার প্রথম ব্যক্তিত্বের স্ফূরণ ঘটবে। সেই তেজ তোমার মধ্যে আছে। কিন্তু যার প্রতি তোমার এক রহস্যময় আকর্ষণ জন্মেছে সেই পুরুষটি ব্যক্তিত্বহীন। যদি সম্ভব হয় তবে তাকে পাহারা দিয়ে রেখো।

নলিনী সেই পুরুষটির কথা আর ভেঙে বলেনি। তবে রঙ্গময়ী অনেকক্ষণ বাদে চোখের ঢাকনা খুলে যখন টেবিলরূপের নকশার দিকে অবোধ চোখে চেয়ে ছিল তখন তার মনে হয়েছিল, নলিনী বোধহয় অসুস্থামী।

নলিনী তার চেয়ারে ফিরে গিয়ে বসল, অনেক শান্ত সে। স্থির। বলল, কনকপ্রভাকে বোলো আমাকে বাঁধা তাঁর পক্ষে সম্ভব নয়, কারো পক্ষেই সম্ভব নয়। নারীমাত্রই আমার কাছে মা।

এ কথায় চমকে উঠেছিল রঙ্গময়ী। নলিনী যুবাপুরুষ। বংশের ধারা অনুযায়ী তার চেহারাও সুন্দর ও সূঠাম। সুপুরুষ এক যুবা পৃথিবীর সব নারীকেই মা ভাবে, এ কেমন অলুক্ষণে কথা ? নলিনীর সবকিছুই একটু অন্যরকম বটে, কিন্তু এতটাই যে অন্যরকম তা রঙ্গময়ীর জানা ছিল না। কথাটা শুনে রঙ্গময়ী হঠাৎ নলিনীর মুখের দিকে চাইতে আর সংকোচ বোধ করল না।

নলিনী মৃদু একটু হাসি মাখানো মুখে বলল, তুমিও আমার মা।

অস্ফুট একটা শব্দ করল রঙ্গময়ী। তবে বোবা শব্দ, ভাষা ছিল না তাতে। একটা ঘোর ঘোর আচ্ছন্নভাবে ভিতর থেকে নলিনী বলল, মাতৃভাব হৃদয়ে প্রতিষ্ঠিত না হলে ক্রীলোককে ছুঁতে নেই। যত দূরে থাকা যায় ততই ভাল, এমন কি মুখদর্শন না করা আরও ভাল। কিন্তু এইভাবে ভাবিত হওয়া খুব সহজ নয়। বুকের জোর চাই। ফল পাকলেই যেমন পাখিতে ঠোকরাতে শুরু করে আমার এখন তেমন অবস্থা। কেন এত জ্বালায় বোলো তো সবাই ! আমাকে তিষ্ঠাতে দিচ্ছে না।

রঙ্গময়ী তার রুদ্ধ কণ্ঠে অতি কষ্টে বলল, কারা জ্বালায় আপনাকে ?

নলিনী ঘোর ঘোর আচ্ছন্ন ভাব থেকে জেগে উঠে মৃদু হেসে বলল, যে সুযোগ পায় সে-ই। এই তো দেখ না, তোমার পিসি কী কাণ্ডটাই করে গেছে। কনকপ্রভার মাথার ঠিক নেই। কত কাণ্ডই

যে সে করে ।

রঙ্গময়ী উদগ্রীব হয়ে বলল, কী কাণ্ড ?

নলিনী একথার জবাব দিল না, শুধু মৃদু মৃদু রহস্যময় হাসতে লাগল । অনেক পরে বলল, বালবিধবার বড় কষ্ট ।

রঙ্গময়ী বোকা নয় । নলিনীর কথার মধ্যে যে গভীরতার ইঙ্গিত ছিল তা বুঝল সে । কিন্তু আর প্রশ্ন করল না । তবে নিজের পিসি সম্পর্কে যে কৌতূহলহীন নির্বিকারত্ব ছিল সেটা কেটে গেল । কনকপ্রভাকে সুন্দরী বলা চলে না । তবে পূর্ণ যুবতী এই মহিলার মধ্যে যৌবনোচিত আকর্ষণ কিছু কম ছিল না । সে থান পরে, নিরামিষ সামান্য কিছু ব্যঞ্জন দিয়ে অবেলায় পাথরের থালায় দিনে একবার মাত্র ভাত খায়, আচার বিচার মেনে চলে । সে রূপটান মাখে না, সাজে না । কিন্তু তবু তার দুকূল ছাপানো যৌবনও তো ক্রিয়াশীল । তার খাজনা মেটাতে পিসি কোনো পন্থা নিয়েছে কি ? রঙ্গময়ী উদগ্রীব হল জানতে । তবে সরাসরি প্রশ্ন করল না । মৃদু স্বরে বলল, পিসি আজ খুব খারাপ কাজ করেছে ।

নলিনী হেসে হেসেই বলল, হ্যাঁ, খুব খারাপ । যদি আমি ইচ্ছে করি তবে এর জন্য তোমাদের হয়তো এই বাড়ি থেকে তাড়িয়েও দিতে পারি । অন্তত কনকপ্রভাকে তো বটেই ।

রঙ্গময়ী এই দিকটা ভেবে দেখেনি । নলিনী পরোপকার করে বেড়ায়, দেশের কাজ নিয়ে ব্যস্ত থাকে, কখনো জমিদারের মতো বাবহার করে না কারো সঙ্গে । এ সবই ঠিক । কিন্তু তবু সে তো এই বংশেরই ছেলে । ইচ্ছে করলে সামান্য পুরোহিতকে উচ্ছেদ করা তার পক্ষে অতি তুচ্ছ ব্যাপার । রঙ্গময়ী তাই ভয়ে একটু জড়োসড়ো হয়ে গেল । মৃদু স্বরে বলল, আমাদের তো কোনো দোষ নেই । পিসি...

নলিনী মাথা নেড়ে বলল, আমাকে কিছু বলতে হবে না রঙ্গময়ী । আমি তোমাদের তাড়াবো না কনকপ্রভাও যেমন আছে থাকুক । তবে আমাকেই হয়তো দূরে সরে যেতে হবে ।

রঙ্গময়ী ব্যাকুল হয়ে বলল, আপনি যাবেন কেন ? আপনি যাবেন না । এরকম আর হবে না । আমি পিসিকে বলব ।

বলে লাভ নেই । বললাম না, তোমার পিসির মাথার ঠিক নেই । ছট করে আবার হয়তো আর একটা বিপজ্জনক কাণ্ড করে বসবে ।

হঠাৎ অত্যন্ত দুঃসাহসভরে বুদ্ধিমতী রঙ্গময়ী প্রশ্ন করল, আপনি তো সবাইকেই মা বলে ভাবেন, পিসিকে ভাবতে পারেন না ?

কেন এই কথাটা সে বলল তা রঙ্গময়ী আজও সঠিক জানে না । মানুষের মন বড়ই রহস্যময় । কোন গন্ধে গন্ধে তার অনুভূতিশীল মনের মধ্যে এইরকম একটা সন্দেহের বীজ অঙ্কুরিত হয়ে উঠেছিল হঠাৎ ।

নলিনী গভীর হয়ে উঠতে পারত, রেগেও যেতে পারত । কিন্তু হল ঠিক উল্টো । সামান্য শব্দ করে হেসে ফেলল সে, চোখে হঠাৎ একটু বিস্ময়বোধও ফুটে উঠল তার । সে বলল, তুমি বড় পাঞ্জি মেয়ে । বুদ্ধিও রাখো ।

রঙ্গময়ী বায়না ধরার গলায় বলল, না । আগে বলুন, আপনি যাবেন না !

নলিনী বলল, শুধু এই কারণই তো নয় । আমাকে যে অন্য কাজের জন্যও দূরে চলে যেতে হতে পারে ।

রঙ্গময়ী কথাটা বিশ্বাস করল না । বলল, না, আপনি আমাদের জন্যই চলে যেতে চাইছেন । আমি পিসির কথা বাবাকে বলে দেবো । বাবা বকে দেবে ।

নলিনী বলল, অত কিছু করতে হবে না ।

তাহলে বলুন, আপনি যাবেন না ।

আগে তুমি একটা কথার জবাব দাও । তোমার পিসিকে আমি মা বলে ভাবতে পারি না একথা তোমার মনে হল কেন ?

রঙ্গময়ী লজ্জায় অধোবদন হয়ে বলল, আমি সেভাবে বলিনি ।

তাহলে কীভাবে বলেছো ?

আমি কিছু ভেবে বলিনি । হঠাৎ কথাটা মুখ দিয়ে বেরিয়ে পড়ল ।

নলিনীর উজ্জ্বল চোখে কৌতুক খেলা করছে । সে লঘু গলায় বলল, না কি আমার কথাটা তোমার বিশ্বাস হয়নি ! আমি পৃথিবীর সব মেয়েকেই মা বলে ভাবতে পারি এটা অবশ্য অনেকেই কাছে বিশ্বাসযোগ্য নয় ।

রঙ্গময়ী তখন শীতের মধ্যও ঘামতে শুরু করেছে ।

নলিনী অবশ্য আর ঘাঁটাল না । একটা হাই তুলে বলল, কনকপ্রভাও তাই ভাবে । মেয়েদের প্রতি মাতৃভাবটা একটা ভড়ং মাত্র । কনকপ্রভা মা ডাক শুনতে ভালবাসে না ।

রঙ্গময়ী চুপ ।

নলিনী বলল, এবার ঘরে গিয়ে শুয়ে থাকো গে যাও ।

রঙ্গময়ী বলল, যাবো ? দরজা যে বন্ধ ।

নলিনী মৃদু হেসে বলল, বন্ধ ছিল । এখন আর নেই । তোমার পিসি বোধহয় দরজায় শিকল তুলে এতক্ষণ কান পেতে আমাদের কথা শুনছিল । তার উদ্দেশ্য সফল হয়নি দেখে এইমাত্র শিকল খুলে চলে গেছে । তুমি শব্দ পাওনি, কিন্তু আমি পেয়েছি । খালি পায়ে সে যে বারান্দা পেরিয়ে চলে গেল তাও টের পেয়েছি ।

রঙ্গময়ী উঠে দাঁড়াল । দরজার কাছে গিয়ে পাল্লা টানতেই সেটা খুলে এল । রঙ্গময়ী একটু দ্বিধাজড়িতভাবে দাঁড়িয়ে রইল । তারপর বলল, যাই ?

যাও ।

আর আসবো না কখনো ?

আসবে না কেন ? তবে রাতবিরেতে নয় ।

রঙ্গময়ী ধীর পায়ে বেরিয়ে আস্তে আস্তে চলে এল ঘরে । পিসির সঙ্গেই এক বিছানায় সে শোয় । বিছানায় পিসি ওপাশ ফিরে শুয়ে ছিল । রঙ্গময়ী লেপ দিয়ে মুখ ঢেকে চুপ করে জেগে পড়ে রইল বিছানায় । ঘুম আসার কথা নয় সহজে । শুয়ে শুয়ে টের পেল, পিসি কান্দছে । ফুলে ফুলে ।

রঙ্গময়ী কোনো প্রশ্ন করল না । তার চোখও তখন ভেসে যাচ্ছে জলে ।

আজ ঘোড়ার গাড়িতে হেমকান্তর মুখোমুখি বসে রঙ্গময়ীর সেই রাতের কথা মনে পড়ে । শুধু আজ নয়, এতদিন ধরে প্রায় রোজই কখনো না কখনো সেই অদ্ভুত রাত্রিটির স্মৃতি এসে হানা দিয়েছে ।

নির্জন সন্ধ্যা । ব্রহ্মপুত্রের ওপর প্রগাঢ় কুয়াশা জমে আছে । নদীর ধার দিয়ে হাঁট-বাঁধানো এবড়ো-খেবড়ো রাস্তায় ঘোড়ার গাড়ি চলেছে । কুয়াশায় মাঝে মাঝে রাস্তার পক্ষশে বড় বড় গাছের ভূতুড়ে চেহারা দেখা দিয়েই মিলিয়ে যায় । জোনাকি পোকাক ফুলঝুরির মতো থোকা থোকা আলো ছাড়া নদীর দিকটায় আর কোনো আলো নেই । কুয়াশা না থাকলে নদীর ওধারে শত্ৰুগঞ্জের পতিত জলা জমিতে দপদপিয়ে উঠতে দেখা যেত আলোয়ার অদ্ভুত আলো । জলে পাট ও মুলি বাঁশ পচছে । তার কাঁট গন্ধে বাতাস মধুর । এই ব্রহ্মপুত্রেরই কোনো বাঁকে নলিনীর প্রাণহীন দেহ পাওয়া গিয়েছিল । সেও কবেকার কথা । তবু মনে পড়ে ।

রঙ্গময়ী তার পাশের জানালাটা তুলে দিল । উত্তরে ভয়ংকর বাতাস আসছে । হেমকান্ত জানালা তুলবেন না । বন্ধ কপাট, বন্ধ জানালা হেমকান্তর সহ্য হয় না । অস্থির বোধ করেন তিনি । আজ

অস্থিরতা কিছু বেশী। যদিও তাঁর দেহখানি নিষ্পন্দ এবং স্থির, চোখ বাইরের কুয়াশাচ্ছন্ন অন্ধকার নিসর্গে মগ্ন, তবু তাঁর অস্থিরতা টের পায় রঙ্গময়ী। বড় বেশী স্বাবলম্বী এবং ততটাই অসহায় এই একটি মানুষ।

কালীবাড়ির গায়ে কতগুলো দোকানের আলো ঝলমলিয়ে মিলিয়ে গেল। গাড়ি বাঁক ফিরছে। নদী চলে গেল চোখের আড়ালে।

হেমকান্ত মুখ ফেরালেন। বললেন, না এলেই ভাল হত।

রঙ্গময়ী মাথা নেড়ে বলে, ভাল হত না। তুমি শক্ত হও।

হেমকান্ত শক্ত হলেন কিনা বলা শক্ত তবে চুপ করে বসে রইলেন। নর্দমার গন্ধের সঙ্গে ঘোড়ার গায়ের গন্ধ মিশে বাতাসটা কিছু ঘোলা। ওডিকোলোনে ভেজানো রুমালটা পকেট থেকে বের করে নাকে চেপে ধরলেন হেমকান্ত।

অন্ধকারে হেমকান্তকে স্পষ্ট দেখা যাচ্ছে না। তবু রঙ্গময়ী মাঝে মাঝে অস্পষ্ট হেমকান্তের মুখের দিকে চাইছে। বড় দুর্বল এই মানুষটি। আবার খুবই আত্মনির্ভরশীল। রঙ্গময়ী আর কোনো পুরুষমানুষ দেখেনি হেমকান্তের মতো, যার চরিত্রে এমন বিপরীত সব গুণাবলী আছে।

সে বলল, আমরা এসে গেছি। শোনো, আমি গাড়িতেই চুপ করে বসে থাকব। তুমি গিয়ে কোকাবাবুকে দেখে এসো।

একা ?

একা কেন ? ও বাড়িতে এখন গিজগিজ করছে লোক।

তুমি তো যাবে না।

আমি সঙ্গে না গেলেই কি তুমি একা ?

তা বটে।

রঙ্গময়ী মৃদু শব্দে হেসে ফেলে। বলে, লোকে হয়তো কিছু বলবে। আমার না যাওয়াই ভাল।

সহিস নেমে এসে দরজাটা খুলে ধরে আছে। হেমকান্ত ধীরে ধীরে নামলেন।

কোকাবাবুদের বাড়িটা প্রকাণ্ড। সামনে মস্ত ফটক, নহবৎখানা। ভিতরে বাগান। তারপর পুরোনো আমলের দুই মহলা বাড়ি। ফটক আজ হাঁ করছে খোলা। ভিতরে অনেক গাড়ি দাঁড়িয়ে আছে। কিন্তু ভিতরে গাড়ি ঢোকাতে আগে থেকে সহিসকে বারণ করে রেখেছিলেন হেমকান্ত। কিন্তু এখন গাড়ি থেকে নেমে তাঁর দ্বিধা এবং জড়তা দেখা দিল।

গাড়ির জানালা দিয়ে নির্নিমেষ চোখে দৃশ্যটা দেখতে থাকে রঙ্গময়ী। ফটক দিয়ে হেমকান্ত ভিতরে ঢুকছে। এক হাতে কৌচাটি ধরা। ঢুকবার আগে বার দুই ফিরে তাকালেন। হাতে ছড়িটা অনির্দিষ্টভাবে কয়েকবার আফালন করলেন। গলা খাঁকারি দিলেন। যদিও কারুকাজ করা শালে দিব্যকান্তি হেমকান্তকে খুবই অভিজাত দেখাচ্ছে, তবু তাঁর ভাবভঙ্গিতে আজ সহজ স্বাভাবিক ভাবটি নেই। বড় বড় গাছপালায় ভরা বাগানটার মধ্যে মিলিয়ে গেলেন হেমকান্ত।

রঙ্গময়ী তবু যাত্রাপথের দিকে চেয়ে রইল। চোখে কোনো দৃষ্টি নেই। চোখ স্মৃতিভারাক্রান্ত। বহুদিন আগেকার একটা দৃশ্য দেখছে।—

সুনয়নী বাপের বাড়ি যাবে বলে ঘাটে বজরা তৈরি। সাজ শেষ করে সুনয়নী এসেছে বিগ্রহ প্রণাম করতে। অনেকক্ষণ উপুড় হয়ে বিড়-বিড় করে কী যেন বলল। তারপর উঠে চরণামৃতের জন্য অভ্যাসবশে হাত বাড়াল। তামার পাত্রটি হাতে দাঁড়িয়ে ছিল রঙ্গময়ী। দিতে গিয়ে কী কারণে কে জানে এক ঝলক পড়ে গেল মেঝেয়।

সুনয়নী উপুড় হয়ে আঁচলে মেঝেটা মুছে নিয়ে বলল, হাত কেঁপে গেল ঠাকুরঝি ?

রঙ্গময়ী তটস্থ হয়ে পড়ল। সে জানে তার হাত কাঁপেনি। যদি কেঁপে থাকে তবে তা সুনয়নীরই হাত। কিন্তু সে কিছু বলল না।

সুনয়নী উঠে দাঁড়িয়ে রঙ্গময়ীর চোখে চোখে স্থির দৃষ্টিতে চেয়ে রইল একটুক্কণ । বলতে নেই, সুনয়নী ডাকের সুন্দরী । চোখ দুখানা বড় বড় । অনেকক্ষণ সেই দুখানা বড় বড় চোখে চেয়ে নিঃশেষ করে দেখল সে রঙ্গময়ীকে । তারপর একটা শ্বাস ফেলে বলল, তোমার সঙ্গে পারলাম না ।

কী পারলে না ?

তোমার সঙ্গে কি পারা যায় ? রঙ্গময়ী কত রঙ্গই জানে ।

রঙ্গময়ী হতবাক্, বিব্রত, কুণ্ঠিত । বলল, কী বলছো তুমি ?

বেরোবার সময় কতাকে বললাম, ওগো যাচ্ছি, ভালমতো থেকো । উনি কী বললেন জানো ? বললেন, ও নিয়ে ভেবো না । রঙ্গময়ী তো আছে ।

রঙ্গময়ী অপ্রতিভ হয়ে একটু হাসল, এই কথা !

এই কথাটুকু বড় কম নয় । অন্য বউ হলে এই ব্যাঙের গর্ত থেকেই চ্যাং মাছ বের করত । যাই, দুজনে রইলে কিন্তু ।

এই রহস্যময় ইঙ্গিত সেই প্রথম নয় । আগেও শুনেছে রঙ্গময়ী । বহুবাব, নানা প্রসঙ্গে । গায়ে মাথেনি ।

সেদিন মাখল । বড় লজ্জা হল, ঘেন্না এল নিজের ওপর ।

সেইদিনই বিকেলবেলা হেমকান্ত একা বসে ছিলেন তাঁর কুঞ্জবনে ভাঙা গাড়িটার পাদানিতে । রঙ্গময়ী হানা দিল সেখানে ।

শোনো, তোমার সঙ্গে আমার কথা আছে ।

বলো রঙ্গময়ী, বলো । হৃদয়ের অব্যবহৃত দ্বার খুলে দাও ।

তখন হেমকান্ত ওরকমই ছিলেন । কখনো কখনো তরল আবেগ বেরিয়ে আসত, চটুল ইয়ার্কিও করতেন মাঝে মাঝে ।

রঙ্গময়ী ভূঁ কুঁচকে বলল, হঠাৎ এত খুশি-খুশি ভাব কেন ? বউ বাপের বাড়ি গেছে, এখন তো তোমার বিরহদশা চলার কথা ।

হেমকান্ত মৃদু হেসে বললেন, তা বটে । তবে কি জানো, মাঝে মাঝে একটু বিরহ ভাল । বউ সবসময়ে কাছে থাকলে কেমন একঘেয়ে লাগে ।

তা তো বুঝলাম । কিন্তু আমার জীবনটাকে জ্বালিয়ে পুড়িয়ে থাক করছো কেন তুমি ? আমি ! হেমকান্ত বিস্মিত, ব্যাধিত ।

তুমি নও তো আর কে ? বউঠান আজ বাপের বাড়ি যাওয়ার সময় সেইসব ইশারা ইঙ্গিত করে গেল ।

কোন সব ?

তোমাকে আমাকে নিয়ে মাঝে মাঝে যা রটে ।

সুনয়নী তো সেরকম নোংরা মনের মেয়ে নয় ।

আহা গো । তোমার বউকে নোংরা মনের মেয়ে বলেছি নাকি ? সে কেমন তা আমি ভালই জানি । সেভাবে সে বলেওনি । একটু রসিকতা করেছে । কিন্তু কথাটা আমার আজ লাগল খুব ।

হেমকান্ত বিব্রত মুখ করে বলে, কিন্তু আমি তার কী করব বলো তো ? সুনয়নী এলে বরং—

কী বুদ্ধি ! বউয়ের কাছে বলবে যে রঙ্গময়ী তার নামে নালিশ করেছে ? বললে আমার সুখ খুব বাড়বে বুঝি ?

তাহলে কী করব ?

আমাকে দূর করে দাও । সেটাই ভাল হবে ।

তোমাকে দূর করার আমি কে ? দূর করবোই বা কেন ?

লোকে মিথ্যে রটাবে আর আমি তাই মুখ বুজে সয়ে যাবো চিরকাল ? আমার নামে কেন এত

মিথ্যে রটনা হবে বলে তো !

হেমকান্তর মুখ শুকিয়ে গেল ভয়ে । তিনি আমতা আমতা করে বললেন, রাগ কোরো না রঙ্গময়ী । লোকের কথা ধমতে - নেই ।

রঙ্গময়ীর সেদিন বড় জ্বালা করছিল বুক । নলিনীর ঘরে পিসি কনকপ্রভা সেই যে ঠেলে ঢুকিয়ে দিয়েছিল এক রাএ তার জের সহজে খামেনি । কিছু কান ও চোখ জেগে ছিল ঠিকই । নলিনী যে তাকে মা বলে ডেকেছিল তা কে বিশ্বাস করবে ? কেবল যুবকের ঘরে নিশুতিরাতে এক কিশোরীর অভিসারটাই ধরে নিয়েছিল লোকে । পাঁচকান হয়ে সে কথা রাজা জুড়ে ছড়িয়ে গেল । বিনোদচন্দ্র বহু চেষ্টা করেও মেয়ের বিয়ের সম্বন্ধ জোগাড় করতে পারলেন না আর । টাকার জোর থাকলে কলঙ্কের ওপর চুনকাম করা যেত । দুর্ভাগ্যবশে বিনোদচন্দ্রের তাও নেই । নলিনীর মৃত্যুর পর রঙ্গময়ীকে আজকাল জড়ানো হয় হেমকান্তর সঙ্গে ।

রঙ্গময়ী বলল, লোকের কথা না ধরলে তোমাদের চলে, আমি গরীবের মেয়ে, আমার চলে না । আমি কাল থেকে আর তোমাদের ধরদোরে যাবো না ।

যাএ না

না । যতদিন বউঠান নেই ততদিন না ।

লোকে কী বলে রঙ্গময়ী ? তোমার আর আমার মধ্যে ভালোবাসা আছে ?

তাই বলে, লোকে তো জানে না যে, কথটা কত বড় মিথ্যে !

বাখিত ও বিমর্ষ হেমকান্ত উঠে দাঁড়ালেন । শরবিদ্ধ হরিণের মতো কাতর একটা শব্দ করে বললেন, আমার বৃকের বাঁ দিকটা বড় ব্যথা করছে রঙ্গময়ী । আমাকে একটু ধরে নিয়ে ঘরে পৌঁছে দাও ।

## ১৪

খবরটা কতখানি গুরুতর তা বুঝতে খানিক সময় নিল ধ্রুব । ফ্যালফ্যাল করে জগার মুখের দিকে কিছুক্ষণ চেয়ে থেকে বলল, মরে গেছে ?

না । তবে অবস্থা খুব খারাপ ।

কতটা খারাপ ?

আমি অত জানি না । তবে বাবু ফিরে এলে তাঁর কাছে গিয়ে শুনে আসতে পারো ।

তুমি আসল খবরটা লুকোচ্ছো না তো !

আরে না । তেমন খারাপ খবর হলে কি আর বাসা এত চূপচাপ থাকত ?

রেমির বাপের বাড়িতে খবর দেওয়া হয়েছে ?

হ্যাঁ, তারা সব নার্সিং হোম-এ আছে ।

আমারও কি একবার যাওয়া দরকার ?

জগা বলে, গেলে বোধ হয় ভালই করতে । তবে তোমার যা অবস্থা দেখছি তাতে গিয়ে আবার একটা কেলেকারী বাঁধাবে । তার চেয়ে রাতটা কাটিয়ে দাও । সকালে যেয়ো ।

ততক্ষণ যদি রেমি না বাঁচে ?

আমরা তো খবর নিচ্ছিই । লতু টেলিফোনের সামনেই বসে আছে । তাছাড়া গেলেও দেখা করতে তো আর পারবে না । দেখা করা একদম বারণ করে দিয়েছে ডাক্তার ।

ধ্রুব একটা চেয়ারে বসে পড়ে ।

খুবই চিন্তিতভাবে দু হাত জড়ো করে তাতে ধূতনির ভর রেখে কিছুক্ষণ শূন্য চোখে চেয়ে থাকে সামনের দিকে । তারপর বলে, তুমি আজ রাতটা আমার ঘরে শোবে জগাদা ?

কেন ?

শোও না, খবরটা শোনার পর থেকে গাটা কেমন হুমহুম করছে ।



জগা অবাক হয়ে বলে, কিসের ছমছম?

রেমি আমাকে পছন্দ করে না, জানোই তো। যদি আজ রাতে রেমি মরে যায় তবে ঠিক ওর ভূত আমার গলা টিপতে আসবে।

জগা কানে আঙুল দিয়ে বলে, ছিঃ ছিঃ, এ কী কথা তোমার মুখে! অমন অলুঙ্কণে কথা বলতে আছে?

ধুব বলে, তুমি জানো না তাই বলছ। ও যে আমাকে কী ভীষণ ঘোষা করে।

তা বলে জ্যাস্ত মানুষটাকে ভূত বানাবে?

তুমি শোবে কিনা বলো।

শোবোখন। কিন্তু তোমরা লেখাপড়া শিখে কী হলে বলো তো!

ধুব বিবর্ণ মুখে একটু কাঠ-কাঠ হাসি হেসে বলে, বই-পড়া বিনোদে জীবনে কোনো কাজে লাগে না। এ তো জানোই জগাদা। থিওরেটিক্যালি আমি ভূতে বা ভগবানে বিশ্বাস করি না, কিন্তু ইন প্র্যাকটিস অন্য ব্যাপার।

তাই তো দেখছি। রাতে কিছু খাবে তো? নাকি খেয়ে এসেছো?

খাওয়া? ও বাবা খাওয়ার কথা ভাবতেই পারি না।

রাতে তো প্রায় দিনই খাচ্ছো না। কাজটা ঠিক হচ্ছে না। শুকিয়ে যাবে।

ধুব ঠ্যাং ছড়িয়ে বলে, তুমি বরং আলমারিটা খুলে দেখ। একটা ব্র্যান্ডির বোতল আছে। চার আঙুলের মতো ঢেলে দাও।

জগা চোখ গোল করে বলে, আরো খাবে?

নইলে ঘুম আসবে না। অমনিতেই আজ নেশা জমেনি, একটা হুজ্জাত বেঁধে গিয়েছিল। তারপর রেমির এই খবর।

হুজ্জাত বাঁধালে কেন? জগা ভূঁ কুঁচকে তীক্ষ্ণ চোখে চেয়ে বলে।

ধুব মাছি তাড়ানোর মতো হাত নেড়ে বলে, সে অনেক ব্যাপার।

বাবুর নাম তুমিই ডোবাবে।

ধুব মুখের একটা বিকৃতি ঘটিয়ে বলে, কেন, সেটা বাবা নিজে পারে না?

তার মানে?

যা সব করে বেড়াচ্ছে তাতে নিজের নাম নিজেই ডোবাবে। ছেলের দরকার হবে না।

জগা অত্যন্ত গম্ভীর গলায় বলে, আজ কী হয়েছিল?

কালুর দোকানে একটু গুণ্ডগোল, তেমন কিছু নয়।

কতটা গুণ্ডগোল?

বললাম তো। বেশী নয়।

দেখ কুট্রি, আমার কাছে লুকিও না।

ধুব হঠাৎ উঠে তার ট্রাইজারস ছাড়তে ছাড়তে বলে, পায়জামাটা কোথায় দেখ তো। শোবো। মাথা ঘুরছে।

জগা কথাটার জবাব দেয় না। তবে একধরনের বিপজ্জনক জ্বলজ্বলে চোখে ধুবর দিকে চেয়ে বলে, যা কিছু করে বেড়াচ্ছে তা বাপের ঝুটির জোরেই। না হলে এতদিনে কয়েকবার জেল খেটে আসতে হত, তা জানো?

ধুব ছাড়া প্যাশ্টটা একটা লাথি মেরে উড়িয়ে দেয়। সেটা গিয়ে দরজার কাছে পড়ে। গায়ের আঁটো পুলওভারটা খুলতে গিয়ে বগলের কাছ বরাবর আটকে গেল। জগার দিকে ঘুরে সে বলে, একটু টেনে খুলে দাও তো।

জগা একটা প্রকাণ্ড হাত বাড়িয়ে একটা হ্যাঁচকাঁটান মেরে সোয়েটারটা খুলে আনে। সোয়েটারটা

খুলে আসে বটে, কিন্তু হ্যাঁচকা টানে টাল খেয়ে অবলম্বনহীন ধুব দুটো হাত ওপর দিকে তুলে অসহায়ভাবে পড়ে একটা কাতর শব্দ করে। জগা হাত বাড়িয়ে তাকে আর একটা হ্যাঁচকা টানে তুলে চেয়ারে বসিয়ে দিয়ে বলে, বাপের নাম বংশের নাম ডোবাতে এ বাড়ির ছেলে হয়ে তোমার লজ্জা করে না, কিন্তু আমরা চাকর হয়েও তোমার কাণ্ড দেখে লজ্জা পাই।

ধুব একটু হাঁফাচ্ছিল। মাথাটা দু হাতে চেপে ধরে বলল, ওঃ। এত কথা বলো কেন? একটু ব্র্যাণ্ডি দাও, নেশাটা পুরো না হলে আমার মাথাধরাটা ছাড়বে না।

চাবিটা দাও।

কিসের চাবি?

লোহার আলমারির। তাইতেই তো ব্র্যাণ্ডি আছে বললে।

ওঃ সেই চাবি। ওই চেস্ট অফ ড্রয়ার্সের ওপরের ড্রয়ারটা দেখ।

জগা গিয়ে ড্রয়ার খুলে চাবিটা বের করে নেয়। তারপর ধুবর দিকে চেয়ে বলে, আমি যাচ্ছি। খেয়ে আবার আসব। ততক্ষণ চূপচাপ বসে থাকো।

ধুব তাড়াতাড়ি ওঠার চেষ্টা করে। কিন্তু পারে না। জগা দরজা খুলে বেরিয়ে যায়। বাইরে থেকে দরজাটা টেনে দেয় সাবধানে।

ধুব আতঙ্কিত চোখে দরজাটার দিকে চেয়ে থাকে কিছুক্ষণ। অবোধ দৃষ্টি। তারপর ফাঁকা ঘরটার চারদিকে চায়। হঠাৎ খুব শীত করতে থাকে তার। নাভির কাছ থেকে একটা কাঁপুনি উঠে আসছে। সে গিয়ে কাঠের ওয়ার্ডরোব খুলে একটা ধোয়া পায়জামা বের করে খুব কষ্টে পরে নেয়। গায়ে একটা আলোয়ান জড়ায়। তারপর দরজা খুলে বেরোয়। আস্তে আস্তে দোতলার সিঁড়ি ভেঙে উঠতে থাকে। নেশাটা খুব একটা টের পাচ্ছে না এখন।

তার বাবার লাইব্রেরি ঘরটা জিনিসে ঠাসা। চারদিকে লম্বা লম্বা বইয়ের আলমারি। মস্ত বড় ডেস্ক আর রিভলভিং চেয়ার। একটা ডিভান এবং তার সামনে একটা টুল। বসবার জন্য আরো গোটা চারেক গদি আঁটা চেয়ার রয়েছে। কয়েকটা টেবিলে রয়েছে বাঁকুড়ার ঘোড়া থেকে শুরু করে হরেক একমের শিল্পকর্মের নিদর্শন। কিছু প্রত্নতাত্ত্বিক জিনিসও রয়েছে। রিভলভিং চেয়ারটায় বসে লতু একটা বই পড়ছে। তার বয়স কুড়ির মধ্যে। চোখে চশমা, অত্যন্ত ফর্সা রং, মুখশ্রীও সুন্দর। তবে মুখচোখ তার সবসময়েই ভীষণ সিরিয়াস এবং বিরক্তিতে ভরা। সে যে হাসে খুবই কম তা তার মুখের দিকে একবার তাকালেই বোঝা যায়। বোঝা যায়, এই পৃথিবী বা এই মানবীজন্ম সে একটুও পছন্দ করছে না।

ধুব ঘরে ঢুকতেই লতু চোখ তুলে চাইল।

ধুব তার বোন লতুকে যে ভয় পায় তা নয়, কিন্তু এর সামনে সে একটু অস্বস্তি বোধ করে। মেয়েটা যেন কেমনতরো। তাছাড়া রেমির সঙ্গে লতুরই ভাব কিছুটা গাঢ়।

ধুব শীতে কাঁপছিল। সেই কাঁপুনি তার গলাতেও প্রকাশ পেল, কিছু খবর আছে নাকি রে লতু?

লতুর গলা খুবই নির্বিকার। বলে, অবস্থা ভাল নয়।

কী হয়েছে? আজ বিকেলেও তো নরমাল ছিল।

হেয়ারেজ। অপারেশন করা হতে পারে।

আমি একটু বসব এখানে?

বোসো। বলে লতু দাদার দিকে একটু যেন তাকিল্যের দৃষ্টিতেই তাকায়, কখন ফিরেছো? একটু আগে। বলে ধুব টেবিলের ওপর টেলিফোনটার দিকে ইশারা করে বলে, কতক্ষণ আগে লাস্ট খবরটা এসেছে?

আধ ঘণ্টা।

কে ফোন করেছিল?

বাবা ।

কী বলল ?

ওই তো যা বললাম । তুমি গিয়ে শুয়ে থাকো না । আমরা খবর নিচ্ছি ।

কেন, আমি এখানে বসে থাকলে কি তোর অসুবিধে হবে ?

না, তা হবে কেন ?

তবে ? ফোনটা আমাকে দে, আমি একটু কথা বলব ।

লতু টেলিফোনটা ঠেলে এগিয়ে দিয়ে বলে, বলতে পারো, তবে লাভ নেই । বাবা ওখানে আছেন । খবর কিছু থাকলে উনিই টেলিফোন করবেন বলেছেন ।

ধুব তবু টেলিফোনটা তুলে নেয় । লতুর দিকে চেয়ে বলে, নারসিং হোমের নম্বরটা বল তো ।

লতু জবাব দেয় না, একটা প্যাড এগিয়ে দেয় । তাতে লাল পেনসিলে নম্বরটা লেখা ।

ডায়াল করতে করতেই ধুব টের পায়, সে কোনো খবর জানতে চায় না । রেমির জন্য চিন্তা করার অনেক লোক আছে । রেমিকে নিয়ে যে উদ্বেগ ও ব্যস্ততা চলছে তার মধ্যে নিজেকে ভেড়াতেও সে চাইছে না । সে চাইছে এই সময়টা একা ঘরে বসে ভয়ংকর সব চিন্তার আক্রমণ থেকে কিছুক্ষণ দূরে সরে থাকতে ।

একটা মোটা গলা নারসিং হোমের নামটা উচ্চারণ করল ওপাশ থেকে ।

ধুব খুব দায়িত্বশীল এবং উদ্বিগ্ন স্বামীর মতোই বলল, রেমি চৌধুরির কনডিশন কেমন ? কেবিন নম্বর ফাইভ ।

একটু ধরুন ।

কিছুক্ষণ চুপচাপ ।

তারপর তাকে চমকে দিয়ে ভারী গলাটা বলে, হ্যালো ।

বলুন ।

কনডিশন একই রকম ।

অপারেশন হবে ?

হ্যাঁ । ওটিতে নিয়ে যাওয়া হবে কিছুক্ষণ বাদে ।

খুব চিন্তার কিছু আছে কি ?

ডাক্তাররা বলতে পারেন । আমাদের পক্ষে বলা সম্ভব নয় ।

ডাক্তার মজুমদারকে একটু দিতে পারেন টেলিফোনে ?

উনি এখন ভীষণ বিজি ।

আচ্ছা শুনুন, রেমি চৌধুরির একটা বাচ্চা হয়েছিল আজ বিকেলে । সেই বাচ্চাটা কেমন আছে ?

বাচ্চা ভাল আছে ।

আর ইউ সিওর ?

হ্যাঁ ।

থ্যাংক ইউ ।

এতক্ষণ লতু একবারও দাদার দিকে তাকায়নি । বই পড়ছিল । এবার তাকিয়ে একটা হাই তুলে আবার বইয়ে মুখ গুঁজল ।

ধুবর একটু লজ্জা করছিল । রেমির জন্য যে তার কোনো উদ্বেগ আছে তা বোধ হয় লতু এখনো বিশ্বাস করে না । আর বসে থাকার মানে হয় না । ধুব উঠে ঘর থেকে বেরিয়ে দোতলার বারান্দাটায় দাঁড়ায় । দোতলায় গোটা সাতেক ঘর আছে । লাইব্রেরি ছাড়া আরো চার-পাঁচটা ঘরে আলো আছে । বাইরে থেকে বাড়িটাকে যতটা ঘুমন্ত পুরী মনে হয়েছিল ততটা নয় ।

কিন্তু এখন ওইসব ঘরের কোনোটাতেই গিয়ে দুদণ্ড বসবার বা সময় কাটাবার উপায় নেই ।

বোমা মেরে মাঝে মাঝে এই বাড়টাকে উড়িয়ে দিতে ইচ্ছে করে তার। সেটা পারছে না বলেই অন্যভাবে সে প্রতিশোধ তুলে নিচ্ছে।

তাতে কাজ হচ্ছে কি? বনেদী বাড়ি এবং ভি আই পি বাবার ভিত একটুও নড়াতে পেরেছে কি সে? ঠিক বুঝতে পারছে না।

ধুব আস্তে আস্তে সিঁড়ি বেয়ে নেমে আসে নীচে। আসার পথে দু-একজন চাকর-বাকর শ্রেণীর লোকের সঙ্গে চোখাচোখি হয়ে যায় তার। প্রত্যেকের মুখেই একটা উদ্বেগ ও গাভীর লক্ষ করে সে। তবে তার সঙ্গে কেউই কথা বলে না বা অভিবাদনও করে না কোনোরকম। এ বাড়ির সবাই বুঝে গেছে, ধুব ফালতু লোক।

নিজের ঘরের ভেজানো দরজাটার সামনে এসে ধুব দাঁড়ায়। ঘরে ঢুকতে কেমন অস্বস্তি আর ভয়-ভয় করছে তার। আশ্চর্যের বিষয়, ভয়টা ভৌতিক। কিন্তু সেরকম ভয়ের কোনো কারণ মটেনি। রোম এখনো মরেনি এবং হয়তো মরবেও না। তাহলে ভয়টা কিসের?

ধুব খুব ভাল ব্যাখ্যা করতে পারছিল না ব্যাপারটা। শরীরের অবস্থা পরিষ্কার চিন্তা করার মতো নয়। আগখ্যাচড়া নেশা করার ফলেই বোধ হয় ভয়টা খাবা গেড়ে আছে মাথায়। নেশা না করলে বা প্যুরো নেশা করলে এরকম হয়তো হত না। এক অদ্ভুত শীতে তার শরীর এখনো থরথর করে কাপছে, সে দাঁড়িয়ে থাকতে পারছে না।

দেয়ালে শরীরের ভর রেখে সে কিছুক্ষণ চোখ বুজে রইল। চোখ বুজতেই দেখতে পেল রেমির মুখ। নারসিং হোমের বালিশে আধো-ডুবন্ত সেই মুখ শীর্ণ, সাদা এবং তৎসঙ্গেও সুন্দর। চোখ গোঁজা, চোখের পাতায় একটা হালকা নীল ছোপ পড়েছে। ঠোঁট শুকনো। দৃশ্যটা দেখে শিহরিত হয় ধুব। চোখ খোলে।

প্যাসেজ ধরে একটা লোক আসছে। বগলে গোটানো বিছানা। চাকর। এ বাড়িতে চাকর অনেক। পুরোনোদের চেনে ধুব। কিন্তু আজকাল অনেক নতুন রিক্রুট হয়েছে, তাদের নামও ধুব জানে না। এই লোকটাও তাদের দলে। বয়স বেশী নয় ছোকরার। ধুবকে দেখে উল্টোদিকের দেয়াল ঘেঁষে সভয়ে চলে যাচ্ছিল।

ধুব ডাকল, এই শোনা।

ছেলেটা দাঁড়িয়ে যায়।

জগাদা কোথায় বলো তো?

খাওয়ার ঘরে।

যাও তো, গিয়ে বলো আমি তাড়াতাড়ি আসতে বলেছি।

উনি তো হাসপাতালে যাবেন।

সে কী? হাসপাতালে কেন?

বউদির জন্য?

কেন?

বলছিলেন যদি রক্ত দিতে হয় তাই যাবেন।

ধুব চিন্তিত হয়ে পড়ে। জগাদা নারসিং হোমে যাচ্ছে, তার মানে কত রাতে ফিরবে বা আদৌ ফিরবে কিনা তার ঠিক নেই। কিন্তু একা ঘরে তার পক্ষে থাকা সম্ভব নয়। ধুবর মাথায় চকিতে একটা বুদ্ধি খেলে যায়। সে ছোকরটাকে বলে, তুমি কোথায় শুতে যাচ্ছে?

আজ্ঞে ওই পিছন দিককার সিঁড়ির নিচে।

আজ ওখানে শুতে হবে না। তুমি বরং আজ আমার ঘরে শুয়ে পড়ো।

ছেলেটা অবাক হয়। বলে, কিন্তু বাবা আমাকে ওখানেই শুতে বলেছেন।

বাবা! তোমার বাবা কে?

আজ্ঞে শ্রীজগবন্ধু রায়। যাকে আপনি জগাদা বললেন।

জগাদার ছেলে তুমি ?

আজ্ঞে হ্যাঁ।

ধুব হঠাৎ একটু চটে গিয়ে বলে, জগাদার ছেলে হয়ে তুমি এ বাড়িতে চাকরের কাজ করতে ঢুকেছো কেন ? আর কাজ পেলে না ?

ছেলেটা একটু হকচকিয়ে গিয়ে বলে, আমি আর এক জায়গাতেও কাজ করি।  
কোথায় ?

বাবার কোম্পানিতে। বেয়ারা।

কী পাশ করেছে ?

হায়ার সেক্রেটারি।

কোন ডিভিশন পেয়েছিলে ?

সেক্রেট ডিভিশন।

আর পড়োনি কেন ?

পড়ছি তো।

পড়ছ ? ধুব অবাক হয়। কী পড়ছো ?

নাইট কলেজে বি কম ক্লাসে ভর্তি হয়েছি।

এ বাড়িতে কী কাজ করতে হয় ?

এই ফাইফরমাস।

সম্মানে লাগে না ?

ছেলেটা মুশকিলে পড়ে গিয়ে বলে, কিছু অসুবিধে হয় না।

তুমি যে বি কম পড়ছ তা বাড়ির মালিক জানে ?

জানে।

তা সত্ত্বেও ফাইফরমাস করে ?

ছেলেটা এবার একটু হেসে বলে, বাবাও তো এ বাড়িতে কাজটাজ করে। তাই আমিও করি।

আর অফিসে যে বেয়ারার চাকরি করো সেটা কেমন লাগে করতে ?

খারাপ লাগে না। খাটুনি তো বেশী নয়। আমি পড়ার বই নিয়ে যাই, অফিসে বসে পড়ি।

ধুবর একটু ক্লান্তি লাগে।

জগাদার এই ছেলেটিকে সে কখনো দেখেনি। ছেলেটা জীবনের মোড় ফেরানোর জন্য জানপ্রাণ দিয়ে লড়ছে। নিজের শ্রেণীকে ছাড়িয়ে উচ্চতর শ্রেণীতে প্রবেশের ছাড়পত্র একদিন পেয়ে যাবেই। কিন্তু এত পরিশ্রম এরা করে কী ক'রে ? দিনে বেয়ারা, সকালে বিকেলে বাড়ির চাকর আর রাতে কলেজের পড়ুয়া। আরেবাস !

ধুব একটু হেসে বলল, তুমি আজ আমার ঘরেই শোও। আমি জগাদাকে বলে দিচ্ছি। আমার শরীরটা আজ ভাল নেই, ঘরে একজন লোক থাকা দরকার।

ছেলেটা এ কথায় মাথা নেড়ে রাজি হয়ে গেল।

ধুব দরজা খুলে ভিতরে ঢুকল। পিছনে ছেলেটি, সসঙ্কোচে।

ওই কোণের দিকে বিছানাটা পেতে নাও। মশারি আছে ?

আছে।

আমি জগাদাকে বলে দিয়ে আসছি।

ছেলেটা বিছানাটা কাঠের আলমারির সামনে নামিয়ে রেখে বলল, আপনাকে যেতে হবে না, আমিই বাবাকে বলে আসছি। বাবা বলেছিলেন, দরকার হলে আমাকেও রক্ত দিতে যেতে হবে।

দরকারের সময় যদি আমাকে খুঁজে না পান তাহলে রেগে যাবেন।

ধুব বিছানায় বসে নিজের কপাল চেপে ধরল। মাথা নেড়ে অশ্রুট গলায় বলল, আচ্ছা। ছেলেটা যাওয়ার সময় সাবধানে দরজাটা ভেজিয়ে দিয়ে গেল।

ধুব নিজের হাতঘড়িটা দেখল। বারোটো বেজে চল্লিশ মিনিট। এতক্ষণে কি রেমিকে অপারেশন থিয়েটারে নিয়ে গেছে? বোধ হয়। না, রেমির জন্য তার কিছু করার নেই। তাকে কেউ কিছু করতে বলছে না। এমন কি রক্ত দেওয়ার জন্য বাড়ির কাজের লোকদের প্রস্তুত রাখা হচ্ছে, তাকে নয়। তার রক্ত বোধ হয় অশুচি।

খুবই দুঃখ হতে লাগল ধুবর। আসলে নেশাটা আধখ্যাঁচড়া হলেই তার দুঃখ-টুঃখ উথলে ওঠে। সে ভেবে দেখল, রেমির জন্যই শুধু নয়, পৃথিবীর কারো জন্যই তার কিছু করার নেই। একটা মশা ডান পায়ে গোড়ালিতে কামড়াল। বসে বসে একটু ঢুলুনি এসেছিল ধুবর, মশার কামড়ে চমকে উঠল। না, ছেলেটা এখনো আসেনি। বিছানাটা তেমনি গোটানো অবস্থায় পড়ে আছে।

এ বাড়িতে আগে মশা ছিল না। আজকাল হয়েছে। কিন্তু ধুব নিজের মশারিটা টাঙানোর কথা ভাবল না। প্যাক্টের পকেট থেকে সিগারেট আর দেশলাই বের করে টেবিলে রেখেছিল। প্যাকেটটা তুলে নিয়ে একটা সিগারেট ধরায় সে। ঘুম আসবে না। বড় শীত করছে।

দরজাটা আস্তে আস্তে খুলে যাচ্ছে না? ধুব স্থির হয়ে গেল। খুব জ্বারে রেলগাড়ি দৌড়তে লাগল বৃকের মধ্যে।

হাঁ, দরজাটা খুলে যাচ্ছে একটু একটু করে। কোনো দরজাই এত রহস্যময়ভাবে খোলা উচিত নয়। কোনো অশরীরী, কোনো অচিন বাতাস কি খুলছে দরজা?

কে, বলে বিকট একটা চিৎকার করে ওঠে ধুব।

দরজাটার ফাঁক হওয়াটা থেমে যায়। মৃদু মোলায়েম একটা মিয়াও আওয়াজ ক্ষীণ এসে পৌঁছায় ধুবর কানে।

আশ্চর্য! সাদা আর বাদামীতে মেশানো সেই কাবলে বেড়ালটা না? রেমির বেড়াল। এটাকে কোনোকালে দু চক্ষু দেখতে পারে না ধুব, কী চায় বেড়ালটা? এ ঘরে তো কখনো আসে না!

ধুব বিস্ময়িত চোখে চেয়ে ছিল। মনের মধ্যে অনেক উল্টোপাল্টা যুক্তিহীন কার্যকারণ কাজ করে যাচ্ছে। রেমির বেড়াল কখনো এঘরে আসে না, কিন্তু আজ এল কেন? এর মানে কি, কোনো অশুভ 'ইঙ্গিত'? নাকি বেড়ালটি মৃতপ্রায় রেমির প্রতিনিধি হয়ে কিছু বলতে এসেছে তাকে?

বেড়ালটা নির্নিমেষ চোখে চেয়ে ছিল ধুবর দিকে। মৃদু আর একটা মিয়াও আওয়াজ করল সে।

আতঙ্কিত ধুব কিছুতেই বেড়ালটার চোখ থেকে চোখ সরাতে পারছিল না। তার মনে হচ্ছিল বেড়ালটা তাকে সম্মোহিত করে ফেলেছে। খুব ধীরে ধীরে তার বাহ্যচেতনা লুপ্ত হয়ে যাচ্ছে।

অসহায় ধুব বিকারগ্রস্তের মতো ডাকল, জগাদা জগাদা!

দরজাটা হাট করে খুলে গেল হঠাৎ। জগার বিশাল চেহারাটা দাঁড়াল দরজা জুড়ে।

কী ব্যাপার এখনো শোওনি?

ধুব বেড়ালটার দিকে আঙুল দেখিয়ে বলল, ওটা এখানে কেন? কী চায়?

জগা বেড়ালটাকে দেখে নীচু হয়ে কোলে তুলে নিয়ে একটু আদর করে বলল, আহা, বউমা নেই বলে ভারী একা হয়ে পড়েছে বেচারী! ঘুরে ঘুরে খুঁজছে।

ধুব একটা বড় শ্বাস ফেলল। ভয়টা বেরিয়ে গেল শ্বাসের সঙ্গে। বলল, তোমার ছেলেকে এখানে শুতে বলেছি।

হাঁ, বলছিল আমাকে। কিন্তু শোওয়ার কি কারো সময় হবে আজ? বউমার অপারেশন শুরু হল বলে। বাবু ফোন করেছিল, রক্ত দিতে পারে এমন কয়জন লোক চাই।

ধুব হঠাৎ নড়েচড়ে বসে বলল, সে তো আমিও দিতে পারি।

জগা হাসল, সে তো ভাল কথা। বউমার জন্য যদি কিছু করতে পারো তাহলে বুঝবো মরদ।  
কিন্তু যা মাল টেনে বসে আছে এ অবস্থায় ডাক্তাররা কি তোমার রক্ত নিতে চাইবে?

তবু আমি সঙ্গে যাবো।

তুমি খুব ভয় খেয়েছো কুট্রি। কিসের এত ভয় তোমার?

জানি না। তবে ভয় খাচ্ছি ঠিকই, জগাদা চাবি দাও। আর খানিকটা না খেলে আমি মরে যাবো।

জগা ট্যাক থেকে চাবিটা বের করে ধুবর দিকে ছুঁড়ে দিয়ে বলল, কুট্রি, তোমার সব সাহস বিপ্লব আর তেজ গিয়ে এখন বোতলে জমা হয়েছে। এটা কিন্তু খুব কেরদানির কথা নয়। যাও, গিলে পড়ে থাকো। মা বাপ বউ বা দুনিয়ার জন্য কিছু তোমাকে ভাবতে হবে না। কিছু ভাল লোক দুনিয়াকে চালিয়ে নেয়, আর তোমার মতো কিছু ফালতু লোক বসে বসে খায় আর ফুটি করে।

তুমি আমাকে ঘেন্না করো জগাদা?

না, কোলে পিঠে করে মানুষ করেছে। ঘেন্না করতে চাইলেই বা পারব কেন?

আমি তোমাদের সঙ্গে যাবো তার আগে একটু মেরে নিই দাঁড়াও।

॥ ৫ ॥

ধনীর বাড়িতে শোকের তেমন উচ্ছ্বাস থাকে না। অর্থ, আরাম, বিলাস ও বাসন মানুষের সঙ্গে মানুষের সম্পর্কের মধ্যে একটা দূরত্ব রচনা করে। আত্মীয়তার বন্ধন সেখানে শিথিল হতে বাধ্য। কোকাবাবুর বাড়িতে শোকের একটা সৌজন্যসূচক স্তব্ধতা বিরাজ করছে বটে, কিন্তু প্রকৃত শোক যে এ নয় তা বারবাড়ি পার হয়ে গাড়িবারান্দা অতিক্রম করে বৈঠকখানায় ঢুকতে ঢুকতেই অনুভব করলেন হেমকান্ত।

কোকাবাবুর এসটেটের কর্মচারীরা অভ্যাগতদের অভ্যর্থনা জানাতে প্রস্তুত হয়েই ছিল। প্রৌঢ় নায়েব বিশ্বেশ্বর এগিয়ে এসে জোড়হাতে বলল, আসুন, আসুন।

হেমকান্তর বুকে এক প্রগাঢ় যন্ত্রণা থাবা গেড়ে আছে। না, কোনো ব্যথা বা বেদনা নয়, জ্বালা নয়। যেন একসেরী একটা লোহা তাঁর হৃৎপিণ্ডের সঙ্গে লেগে ঝুলে আছে। বৈঠকখানায় অনেক বিশিষ্ট ব্যক্তি সময়োচিত গাভীর মুখে মেখে বসে আছেন। প্রায় সকলকেই হেমকান্ত চেনেন। নীরবে দু-একজন হাত জোড় করে নমস্কার জানালেন তাঁকে। দু-একজন হতাশাভরে মাথা নাড়লেন। মোস্তার রাজেনবাবু উঠে এসে হেমকান্তর সঙ্গে ভিতরবাড়ির দিকে হাঁটতে হাঁটতে বললেন, কোকাবাবুর বিষয় সম্পত্তির অবস্থা খুবই খারাপ।

হেমকান্তকে খবরটা স্পর্শ করল না। নির্বিকার মুখে বললেন, তাই নাকি?

কেন, আপনি জানেন না?

না তো।

ইদানীং প্রায় সবই গোপনে বিক্রি করে দিচ্ছিলেন। কিন্তু নগদ টাকাও কিছু দেখা যাচ্ছে না কোথাও। ছেলেতে ছেলেতে তুমুল হচ্ছে।

হেমকান্ত আর একটু বিবর্ণ হয়ে গেলেন। রাজেনবাবু ফের বৈঠকখানায় ফিরে গেলেন। বিশ্বেশ্বর আগে আগে পথ দেখিয়ে নিয়ে হেমকান্তকে কোকাবাবুর ঘরে হাজির করে দিল।

আশ্চর্য, আজও কোকাবাবুর ঘরের এক কোণে বসে ক্লান্ত এক কীর্তনীয়া তারকব্রহ্ম নাম করে যাচ্ছে, মৃদু করতালের সঙ্গে। ডাক্তার সূর্যকান্ত সেন একটি চেয়ারে গম্ভীর মুখে বসে আছেন। আর একটি চেয়ারে কোকাবাবুর বড় ছেলে মাথায় হাত দিয়ে বসা। দু-একজন দাসী ও চাকর

উদ্দেশ্যহীনভাবে দাঁড়িয়ে আছে। কোকাবাবুর শ্বাস উঠেছে। জ্ঞান নেই। গলায় আজ একটা নতুন জিনিস দেখতে পেলেন হেমকান্ত। সোনার একটা চেন ছিল। সেটি নেই। তার জায়গায় একটা কাঠির মালা পরানো।

কী একা, কী আত্মীয়-পরিজনহীন আজ কোকাবাবু! মৃত্যু মানেই কি একাকীত্ব ও পরিজনহীনতা? মূমূর্ষু ওই মানুষটি কি এই মুহূর্তে টের পাচ্ছেন যে, তাঁর স্ত্রী আছে, পুত্রকন্যা আছে, বিষয় সম্পত্তি আছে? এমন কি দেহ বা অস্তিত্বই কি অনুভব করছেন? সেই ফর্সা ও সুন্দর চেহারাটির আজ কী দশা! এই দেহটি একটু পরেই অগ্নিতে সমর্পিত হবে। তখন কোকাবাবু কোথায়?

কে একজন একটি চেয়ার এগিয়ে দিল। কিন্তু হেমকান্ত বসলেন না। তাঁর মনে হল বসতে গেলেই তিনি মুহুঁত হয়ে পড়ে যাবেন।

তিনি সূর্য ডাক্তারের চেয়ারের হাতলটি ধরে দাঁড়িয়ে রইলেন। সূর্য ডাক্তার ধীরে ধীরে উঠে তাঁর কানে কানে বললেন, আর কয়েক মিনিট। হয়ে এসেছে।

হেমকান্ত জিভ দিয়ে শুকনো ঠোঁট ভেজানোর চেষ্টা করলেন। কিন্তু জিভটাও শুকনো এবং খড়খড়ে। মানুষ এত নিষ্ঠুরভাবে আর একজন মানুষের মৃত্যুর কথা ঘোষণা করে কী করে? নিজের মৃত্যুর অমোঘতার কথা তার মনে পড়ে না?

কোকাবাবুর অস্বাভাবিক শ্বাসের শব্দ ক্রমেই ঘরখানা ভরে তুলছিল। এত বিশাল ও বিষম শব্দ হেমকান্ত আর কখনো শোনে ননি। তাঁর পায়ের নীচে মৃদু একটা ভূমিকম্প টের পাচ্ছিলেন তিনি। আসল ভূমিকম্প নয়, তাঁর নিজেরই শরীরের অপ্রতিরোধ্য আন্দোলন। তাঁর শিথিল হাত থেকে কুয়োঁর বালতির দড়ি অস্তহীন নেমে যাচ্ছে। তিনি ঠেকাতে পারছেন না সেই নিম্নগতি।

হেমকান্ত যে ঘর থেকে বেরিয়ে যাবেন সেই শক্তিরূপে পর্যন্ত নেই। তিনি স্থবির ও প্রস্তুতরীভূত হয়ে গেছেন কোকাবাবুর জড়বৎ দেহটি এক প্রবল সম্মোহনে তাঁকে আটকে রেখেছে। তিনি দৃষ্টি দেখতে চাইছেন না, কিন্তু না দেখেও যেন উপায় নেই।

সূর্যকান্ত গিয়ে কোকাবাবুর হাতখানা তুলে নাড়ি দেখলেন। ব্রু কিছু কৃষ্ণিত, মুখে যথাযথ উদ্বেগ। কোকাবাবুর গলায় একটা ঘরঘর শব্দ হচ্ছিল, সেটা আস্তে আস্তে স্তিমিত হয়ে এল। একটা হেঁচকি ওঠার মতো শব্দ হল কি? কিন্তু ঘরটা অকস্মাৎ শব্দহীন হয়ে গেল। সূর্যকান্ত কোকাবাবুর হাতখানা নামিয়ে রাখলেন। গগন মুখ তুলে তাকাল। সূর্যকান্ত ডাইনে বাঁয়ে মৃদু মাথা নাড়লেন।

এ সবই বুঝতে পারছেন হেমকান্ত। ইংগিত স্পষ্ট ও প্রাঞ্জল। নিস্তব্ধ ঘরে ক্রান্ত কীর্তনীয়া হঠাৎ তার নামগান চৌদুনে তুলে দিল। একজন দাসী সরু স্বরে কেঁদে উঠে ভিতরবাড়িতে ছুটে গেল।

কতক্ষণ দাঁড়িয়ে আছেন তা সম্পূর্ণ বিস্মৃত হয়েছিলেন হেমকান্ত। ঘরখানা যখন আত্মীয় পরিজন ও অতিথিতে ভরে উঠল তখন খুব আস্তে আস্তে তিনি বেরিয়ে এলেন।

ঘোড়ার গাড়িতে উদ্বিগ্ন মুখে বসে আছে রঙ্গময়ী। অপলক চোখে চেয়ে আছে হেমকান্তের আসা-পাথের দিকে। হেমকান্ত গাড়ির কাছে আসতেই কোচোয়ান দরজা খুলে দেয় এবং রঙ্গময়ী হাত বাড়িয়ে তাঁকে ধরে।

হেমকান্ত তাঁর দুদিকের জানালা তুলে দিলেন। গাড়ির ভিতরটা গভীর অন্ধকারে ডুবে গেল।

রঙ্গময়ী কোনো কথা বলল না। কিন্তু এই নিভৃত অন্ধকারে লোকচক্ষুর অগোচরে সে নির্লজ্জের মতো হেমকান্তের একখানা হাত ধরে রইল।

হেমকান্তের স্বাভাবিক অবস্থা ফিরে আসছিল না। হাত থরথর করে কাঁপছে। গা বড় বেশী ঠাণ্ডা। স্বরভঙ্গ ঘটেছে। ভাঙা গলায় হেমকান্ত হঠাৎ জিঞ্জেস করলেন, মনু, তুমি আছো তো? থাকব না তো কোথায় যাবো?

বড় অন্ধকার।



জানালা খুলে দিই ?

না, জানালা খুলো না। আমার বড় শীত করছে। কাঁপছি।

বীজমন্ত্র জপ করো। আস্তে আস্তে ঠিক হয়ে যাবে।

হেমকান্ত ফিস ফিস করে বললেন, সুনয়নীকে আমি চোখের সামনে মরতে দেখিনি। তুমি দেখেছো, না ?

সে কথা হঠাৎ আজ কেন ?

আজ প্রথম একজন মানুষকে আমি নিজের চোখে মরতে দেখলাম।

তাতে কী হয়েছে ? ডাক্তাররা তো অনবরত মানুষকে মরতে দেখছে। প্রথম প্রথম হয়তো খারাপ লাগে, তারপর আর অস্বাভাবিক বলে মনে হয় না।

তুমি সুনয়নীকে মারা যেতে দেখেছো মনু ?

দেখেছি। আমি আরো মৃত্যু দেখেছি।

তোমার খারাপ লাগে না ?

মৃত্যু মাত্রই খারাপ।

ওঃ মনু ! বলে হঠাৎ হেমকান্ত রঙ্গময়ীর হাত চেপে ধরেন। তারপর আস্তে আস্তে বলেন, আমি কেন আজ এত একা মনু ? কেন আমার এত একা লাগছে ? তোমরা কেউ কি নেই আমার কাছে ? রঙ্গময়ী এক হাত বাড়িয়ে জানালা খুলে দেয়। ব্রহ্মপুত্রের হিমশীতল বাতাস আসে ছ-ছ করে। সঙ্গে পচা মুলি বাঁশ আর পাটের গন্ধ।

হেমকান্ত আস্তে হাতটা টেনে নেন। তারপর বলেন, কাজটা তুমি ঠিক করোনি।

কোন কাজটা ?

এই কোকাবাবুর কাছে আমাকে নিয়ে আসাটা।

তুমি পুরুষমানুষ, এত ভয় পেলে চলে ?

হেমকান্ত মাথা নেড়ে বলেন, ভয় নয়। এ অন্য একরকম অনুভূতি। তুমি ঠিক বুঝবে না। শৈশব গেছে, কৈশোর গেছে, যৌবন গেছে, এখন এল বার্ধক্য। এই বার্ধক্যকে আমি সইতে পারছি না।

তোমার বার্ধক্য ? রঙ্গময়ী অবাক হয়।

তুমি জানো না। তুমি জ্বানো না।

রঙ্গময়ী চুপ করে থাকে।

গাড়ি একটা বাঁক ফেরে। তারপর খানিকটা ঢালু বেয়ে গড়িয়ে নামতে থাকে দেউড়ি পেরিয়ে বাড়ির চৌহদ্দির মধ্যে।

হেমকান্ত নামেন। বাড়ির সব ঘরে আজকাল আলো জ্বলে না। এক বৃহৎ অন্ধকারে ডুবে আছে তাঁর পিতৃপুরুষের এই বাসস্থানটি। তিনি সেই অন্ধকারের দিকে চেয়ে থাকেন কিছুক্ষণ। মৃত্যু তাঁর কাছে নতুন নয়। এ বাড়িতে তাঁর মায়ের মৃত্যু ঘটেছে, বাবার মৃত্যু ঘটেছে। ব্রহ্মপুত্রের জলে ভেসে গেছে নলিনীর মৃতদেহ। সুনয়নী গেল এই তো সেদিন। কিন্তু সেদিনের হেমকান্ত আজ আর নেই।

রঙ্গময়ী নেমে হেমকান্তের পাশে দাঁড়িয়ে মৃদুস্বরে বলল, তুমি ঘরে যাও। আমি একটু বাদে আসব।

হেমকান্ত মাথা নাড়লেন। একজন চাকর লঠন হাতে সিঁড়িতে দাঁড়িয়ে আছে সসন্ত্রমে। হেমকান্ত আস্তে আস্তে সিঁড়ি ভেঙে উঠলেন। ঢুকবার মুখেই বাঁ ধারের ঘরখানায় কৃষ্ণকান্ত তার গৃহশিক্ষক প্রভুলের কাছে পড়াশুনো করছে। হেমকান্ত কদাচিৎ এই ঘরে ঢোকেন। আজও ঢুকলেন না। দরজায় কয়েক সেকেণ্ড দাঁড়িয়ে কৃষ্ণকান্তের দিকে চেয়ে রইলেন।

কৃষ্ণকান্ত বালক মাত্র। ভারী সুদর্শন। তাঁর ছেলেদের মধ্যে এই কৃষ্ণকান্তর আদল কিছু আলাদা। অন্যদের চেহারায জৌলুষ আছে কিন্তু বুদ্ধির এত দীপ্তি নেই। দশ এগারো বছর বয়সেই কৃষ্ণকান্তর মুখে ধারাল বুদ্ধি ও দৃঢ় আত্মপ্রত্যয়ের ছাপ। বলা বাহুল্য কৃষ্ণকান্তর প্রতি হেমকান্তর দুর্বলতা কিছু বেশী। আর সেইজন্যই অন্যান্য ছেলের নামে কান্দি যোগ করলেও কৃষ্ণকান্তর কান্দি ছেঁটে দ্বিধে নিজের নামের কান্টটুকু তিনি যোগ করেছেন।

কৃষ্ণকান্ত তাঁর উপস্থিতি টের পেয়ে তাকাল এবং উঠে দাঁড়াল। সঙ্গে প্রতুল। প্রতুল খুব মেধাবী এবং দরিত্র। সে বি এ পড়ে। হেমকান্তর সাহায্য না পেলে সেটুকুও পারত না। কৃষ্ণকান্ত ও প্রতুল দুজনেই জিজ্ঞাসু চোখে চেয়ে থাকে তাঁর দিকে। হেমকান্ত একটু লজ্জা পান। মাথা নেড়ে বলেন, কিছু নয়। পড়ো তোমরা, পড়ো।

ধীরে ধীরে চাকরের লঠনের আলোয় পথ দেখে দেখে তিনি নিজের ঘরে আসেন। সেখানে অবশ্য উজ্জ্বল সেজবাতি জ্বলছে।

আর একজন চাকর তাঁর পোশাক ছাড়িয়ে দেয়। ধুতি, মোজা ও বাল্যপোষের কোট পরে তিনি মস্ত খাটের বিছানার একটা শাল জড়িয়ে বসেন। আজ তাঁর মনে হয় একটা কোনো নেশা থাকলে বেশ হত। এখন একটু বেশী মাত্রায় হুইস্কি বা ব্র্যান্ডি খেয়ে শুয়ে পড়লে গাঢ় ঘুম হত তাঁর।

এ কী? তুমি ঘরে যে! রঙ্গময়ী হঠাৎ আবির্ভূত হয়ে বলে।

কেন, কী হয়েছে?

মড়ার ঘরে ঢুকেছিল! চানটান করোনি! আশুন ছোঁওনি! কী অশুচি কাণ্ড! ওঠো, ওঠো! বিছানাপুস্তর সব ফেলতে হবে। মশারি শুদ্ধ। ঘরে গঙ্গাজল দিক। ওঠো শীগগির।

হেমকান্ত ওঠেন। কিছু তটস্থ, কিছু অপ্রতিভ।

“কত আদরের এই দেহ। তবু যখন দেহ মরে তখন তাহা অশুচি হইয়া যায়। প্রিয়জন যতক্ষণ জীবিত থাকে, ততক্ষণ কত সমাদর, কত আদর ও সোহাগ। সেই প্রিয়জন যখন মৃতদেহে পর্যবসিত হইল তখনই তাহা অস্পৃশ্য। দেহ পোড়াও, গোর দাও, যত শীঘ্র পার তাহা বিনাশ করিয়া ফেল। তাহার সংস্পর্শে যত কিছু ছিল তাহা কাচিয়া, গঙ্গাজল, গোবরছড়া দিয়া শুদ্ধ করিয়া লও। এরূপ নিয়ম আমার ভাল লাগে না, কিন্তু বুঝি ইহার কিছু প্রয়োজন আছে। মৃতদেহ রোগজীর্ণ, জীবাণুযুক্ত, পচনশীল। কিন্তু যতক্ষণ প্রাণ থাকে ততক্ষণ তাহার আদর।

“এই চিন্তা হইতে আমি প্রাণের প্রশ্নে উদ্বেলিত হইলাম। প্রাণ কী? আত্মা কী? দেহের সঙ্গে প্রাণ বা আত্মার যোগসূত্রই বা কী? দেহমুক্ত আত্মার অবলম্বনই বা কী?

“আমি এইসব প্রশ্ন লইয়া একজন জানবুঝওয়ালা লোকের সঙ্গে আলোচনা করিবার ফিকির খুঁজিতেছিলাম। তুমি কাছে নাই। বিজ্ঞ বয়স্যের একান্তই অভাব। অগত্যা আমাদের কুলপুরোহিত বিনোদচন্দ্রের শরণ লইতে হইল। বিনোদচন্দ্র পুরোহিত হিসাবে কেমন তাহা কখনো খোঁজ করি নাই। তিনি আবার বাবার নিযুক্ত পুরোহিত। কিন্তু হা হতোম্মি! বিনোদচন্দ্র আমাকে যাহা বুঝাইবার চেষ্টা করিল তাহা বাসাংসি জীর্ণানির অধিক কিছু নহে। আমি তাহাকে বলিলাম, জীর্ণ বাস পরিত্যাগ করে যে শরীর তাহা তো একটি বস্তু। কিন্তু শরীর ছাড়িয়া যে বাহির হয়, যাহাকে প্রাণ আত্মা দেওয়া হইয়া থাকে তাহা কোন বস্তুতে নির্মিত? আত্মার পদার্থই বা কিরূপ? উনি বলিলেন, বায়ু জাতীয় পদার্থ।

“আমি তাহাকে পুনরায় জিজ্ঞাসা করিলাম, আপনি আত্মাকে প্রত্যক্ষ করিয়াছেন কিনা। উনি জবাবে বলিলেন, বহু আত্মা দেখিয়াছি। পরিষ্কার জলে ক্ষুদ্র মাছেরা যেরূপ সন্তরণ করে আমাদের চতুর্দিকে সেরূপ বহু আত্মা সন্তরণ করিতেছে। তবে দেখিবার জন্য চক্ষু ও মনকে প্রস্তুত করিতে হয়।

“আমি চক্ষু ও মনকে প্রস্তুত করিতে রাজি। বিনোদচন্দ্র তখন ফাঁপরে পড়িলেন। বলিলেন, এখন

কিছুদিন শুদ্ধাচারে জপতপ করুন, পরে পদ্ধতি শিখাইব। কিন্তু তাঁহার হাবভাব দেখিয়া মনে হইল, পদ্ধতি তিনিও বড় একটা জানেন না।

“কোকাবাবু গত হইলেন। তাঁহার দেহ পঞ্চভূতে মিশিয়াছে। আমার দেহও মিশিবে। সেইজন্য বড় একটা চিন্তিত নহি। আমি মৃত্যুর স্বরূপকে জানিতে চাই। এই আকাঙ্ক্ষা নিতান্ত তত্ত্বগত নহে। এই আকাঙ্ক্ষা আমার অন্তরে নিরন্তর রক্তক্ষরণ ঘটাইতেছে।

“মানুষের সহিত এই পৃথিবীর একটা সম্পর্ক তাহার জীবৎকালে রচিত হয়। আমাদের আয়ুষ্কাল মহাকালের তুলনায় পদ্মপত্রে নীরবৎ ক্ষণস্থায়ী। এত জানি বুঝি, তথাপি এই পৃথিবীর সহিত নিজেকে আটপেট্টে বাঁধবার আয়োজন বড় কম করি না। কিন্তু এই দৃশ্যমান জগৎ ও জীবনের অতিরিক্ত আর একটি নীরব প্রবাহ আছে। তাহার কথা কি কখনো তোমার মনে হয়?

“আমার প্রিয় কুঞ্জবনটির কথা তুমি নিশ্চয়ই ভুলিয়া যাও নাই। আজকাল রোজ অপরাহ্নে, সেইখানে বসিয়া কত কথা ভাবি। সেই যে একদিন স্থলিত হাত হইতে কুমার বালতি পড়িয়া গেল সেই হইতেই এই আন্দোলনের সূত্রপাত। তোমার মতো আমি কাজের মানুষ নহি। বলিতে কী, সারাটা জীবন আমি নিজেকে লইয়াই আছি। বড় জোর নিজের কাজটুকু নিজে করিয়া লই। কিন্তু বৃহৎ জগৎ ও জীবনের সহিত আমার সম্পর্ক নাই। তাই বোধ হয় আমার মনটিও কিছু নিষ্কর্মা। এইসব চিন্তা করিবার অবকাশ পাই।

“কিন্তু ভায়া সচ্চিদানন্দ, চিন্তা বড় সুখের নহে। আমার দাদা কেন সংসারত্যাগী হইয়াছিল তাহা আমার সঠিক জানা নাই। সংসার ছাড়িয়া সে কোন পরমার্থ লাভ করিয়াছে তাহারও সংবাদ পাই নাই। আমার তো সম্ম্যাস গ্রহণেরও দরকার নাই। সংসারে আমি তো সম্ম্যাসীর মতোই বসবাস করিতেছি। আজকাল সেই বৈরাগ্য তীব্রতর হইয়াছে। কিন্তু ভাই, আমি সংসার ছাড়িয়া বনেজঙ্গলে যাইতে পারিব না। আমার সেই সাহস নাই।

“আমার এই অসময়ে তোমাকেই আমার সবচেয়ে বেশী প্রয়োজন। তুমি কাছে থাকিলে হয়তো দু-একটি কথার ফুৎকারে আমার অন্তরের জ্বালা নিবারণ করিতে পারিতে। তোমার সাহচর্যই হয়তো আমার বহু জটিল প্রশ্নের মীমাংসা করিয়া দিত। কিন্তু তুমি ব্যস্ত মানুষ, আমার পূর্ব পত্রের জবাবটাই এখনো দিয়া উঠিতে পার নাই।

“আজকাল নিজেকে বড়ই স্বজনহীন মনে হয়।.....”

কোকাবাবুর শ্রাদ্ধের নিমন্ত্রণ রক্ষা করে এসে হেমকান্ত সচ্চিদানন্দকে এই চিঠি লিখলেন।

বাড়ির মধোই বাঁধানো পুকুর। চারধারে মস্ত মস্ত পাম গাছ। তার ছায়া জলে এত দীর্ঘ হয়ে পড়ে যে, পুকুরটিকে অতল গভীর বলে মনে হয়। বাস্তবিক পুকুরটি গভীরও। জলে ঘোর গভীরতার একটি কৃষ্ণ রং আভাসিত হয়। বাঁধানো সিঁড়ির ধাপ বহু দূর নেমে সেই কালো জলে কোথায় হারিয়ে গেছে।

পুকুরের ধারেই বাঁধা থাকে দু'টি হরিণ। অনেকখানি দড়ির ছাড় দেওয়া থাকে। তারা ইচ্ছেমতো চরে। সিঁড়ি দিয়ে নেমে এসে জল খায়। কখনো গাছের তলায় বিশ্রাম করে।

এ বাড়ির বড় বউয়ের বাবা মস্ত শিকারী। মেয়ের বিয়ের সময় কথা দিয়েছিলেন, একজোড়া হরিণ আর হরিণী কোনো সময় উপহার পাঠাবেন। অবশেষে কিছুকাল আগে এই দুটি চিত্রল হরিণ আর হরিণী এসে পৌঁছেছে।

বিশাখা এই দুটি অবোধ জীবকে বড় ভালবাসে। প্রথমে ওরা ভয় পেত তাকে। আজকাল পায় না। বিশাখা তাদের কমলালেবুর খোসা ও রোঁয়া, লেবু পাতা, ভেজানো আতপচাল, ছোলা খাওয়ায়। হরিণের চেহারা যত সুন্দর, ডাক তত সুন্দর নয়। কিন্তু পৃথিবীতে সব তো একসঙ্গে পাওয়া যায় না। হরিণ দুটিকে দেখেই বিশাখার চোখ জুড়িয়ে যায় আর একটা ব্যাপারও হয়। তার গা কেমন করে।

কেমন করে ?

রাজেন মোক্তারের মেয়ে সুফলাকে সে একদিন জিজ্ঞেস করল, হরিণ দুটো দেখে তোর কেমন মনে হয় রে ?

খুব সুন্দর। কী সরু সরু পা ! অথচ কেমন দৌড়ায় !

সে তো জানি। কিন্তু আর কিছু মনে হয় না ?

সুফলা অবাক হয়ে বলে, আর কী মনে হবে ?

তোর গা কেমন করে না ?

কেমন করবে ?

কেমন যেন শিরশির শিরশির। আমার করে কিন্তু।

না বাবা, আমার সাপ দেখলে গা শিরশির করে। আর কেঁচো।

সে তো আমারো করে। এ তা নয়। অন্যরকম শিরশির।

কিরকম শিরশির ?

তোর কেবল প্রশ্ন। তাকিয়ে তাকিয়ে অনেকক্ষণ ধরে দেখ, তোরও করবে।

দোতলার বারান্দা থেকে পুকুরের পাড়ে বাঁধা হরিণদুটোকে অনেকক্ষণ ধরে দেখল সুফলা।

তারপর বলল, যাঃ।

কিন্তু বিশাখা অন্যরকম জানে। দীঘল চেহারা ছিমছাম দু'টি হরিণ তার ভিতরে এক অনুভূতির কম্পন তোলে। একটা অশ্রুটি কিছু যেন তার ভিতর থেকে বেরিয়ে আসতে চায়।

বিশাখা লেখাপড়া করেছে সামান্য। খানিকটা বিনোদচন্দ্রের কাছে, আর খানিকটা রঙ্গময়ীর কাছে। ইস্কুলে ভর্তি হয়েছিল, কিন্তু ছাড়িয়ে দেওয়া হয়েছে। এখন অপেক্ষা বিয়ের।

এই বাড়ি ছেড়ে পরের বাড়িতে চলে যেতে বিশাখার যে খুব কষ্ট হবে, তা নয়। এ বাড়িতে তার সত্যিকারের আপনজন কেউ নেই।

দুপুরে বিশাখা স্নান করতে এসেছিল ঘাটে। সঙ্গে তেল, গামছা, শাড়ি নিয়ে দাসী। স্নানে কোনো বাধা নেই। উঁচু দেয়াল দিয়ে চারদিক ঘেরা। ঘাটের পাটায় বসে কিশোরী বিশাখা তেল মাখল। গায়ে ঝাঁঝালা সর্ষের তেল। মাথায় ফুলেল।

বিশাখার রূপ সাজঘাতিক। রঙ যেমন দুধে-আলতায়, তেমনই তার লম্বা ডৌলের চমৎকাল প্রতিমার মতো মুখ। মাথায় চুলের বন্যা। তবে কোঁকড়ানো বলে চুল খুব দীর্ঘ হয়ে পড়েনি। কোমর অবধি মেঘের মতো ঘনিয়ে থাকে। হেমকান্তর সন্তানদের মধ্যে বিশাখারই রূপ সবচেয়ে বেশী।

চুনী দাসী হলেও সখির মতোই। বিশাখার কাছাকাছি বয়স। তেরো বা চৌদ্দ। দুজনে একসঙ্গেই পুতুল খেলে, লুডো খেলে। একটু দূরত্ব থাকে মাত্র। অর্থাৎ বিশাখার সব কথাতেই চুনীকে সায দিতে হয়। তার মাও এবাড়ির দাসী। সেই মেয়েকে শিখিয়ে দিয়েছে, মনিবের মেয়ের মুখে মুখে কখনো জবাব দিবি না।

দুজনেরই পরনে ডুরে শাড়ি। বিশাখারটা কিছু দামী। চুনীরটা আটপৌরে। চুনী কিছু স্বাস্থ্যবতী। বিশাখা রোগার পর্যায়ে।

বিশাখা কালো জলে পাম গাছের লম্বান প্রতিবিম্ব দেখছিল। গভীর নীল আকাশ। জল প্রায় নিখর। মাঝে মাঝে একটু হাওয়া এসে কাঁপিয়ে দেয় ছায়া। কখনো বড় বড় মাছ ঘাই দেয়। সেটুকু ছাড়া জল বড় স্তব্ধ ও গভীর। পুকুরের বিপরীত ঘাটের কাছে কামিনী ঝোপের নিচে বসে আছে একটা হরিণ। আর একটা চরছে একটু দূরে

কী সুন্দর ! বিশাখা বিমুগ্ধভাবে বলল।

কী সুন্দর ? কিসের কথা বলছ ? চুনী তার শাড়ির পাড়ে বাঁধা খোঁপা খুলতে খুলতে জিজ্ঞেস করল।

বিশাখা বলল, দেখছিস না, জলে কেমন ছায়া ! আকাশটা ! আর হরিণ !  
হা গো, সত্যি ভারী সুন্দর । জল যা ঠাণ্ডা না । স্নান করতে বুঝবে । আজ আমার খুব কাঁপুনি হবে ।

তোর এত কাঁপুনি হয় কেন আজকাল ?

চুনী একটু লজ্জার হাসি হেসে বলে, সেই যে সেদিন স্নানের সময় ডিল পড়েছিল সেই থেকে । বিশাখা একটু ভুঁ কৌচকায় । ডিল পড়েছিল ঠিকই । সে বলল, কে ছুঁড়েছিল জানিস ? না, কী করে জানব ? দেয়ালের ওপিঠ থেকে এসেছিল । কী বড় ডিল !

লক্ষ্মণকে বলেছিলাম । সে খোঁজ করেছিল । কাউকে পায়নি ।

দুপুরবেলা যারা ঢেলা ছোঁড়ে তারা তো আর মানুষ নয় ।

তবে কি ভূত ?

তা নয় তো কী ?

বিশাখার বয়স এমন নয় যে, ভূতে বিশ্বাস করবে না । ভূতে তার অবিচল বিশ্বাস । তবু তার কেন যেন মনে হয় সেদিনকার সেই ডিলটা কোনো ভূত ছোঁড়েনি ।

বিশাখা কিছু বলল না । তেল মাথা হয়ে গেছে । উদাস চোখে সে সামনের দিকে চেয়েছিল । ঠিক উদাসও নয় । তার চোখে মায়ার এক অঞ্জন মাথা । আজকাল সে যা দেখে তাই সুন্দর বলে প্রতিভাত হয় ।

হঠাৎ চুনী চাপা গলায় বলে উঠল, ওই দেখ ! ওই দেখ ছোড়দি ! দেয়ালের ওপর ও কার মুণ্ড !

## ॥ ৬ ॥

নারসিং হোমে রক্তের অভাব নেই । টাকা ফেললেই বোতল বোতল রক্ত পাওয়া যায় । কিন্তু কৃষ্ণকান্তের সেই সব অজ্ঞাতকুলশীল রক্তে আস্থা নেই । সেই জন্য পরিবার এবং আত্মীয়স্বজন সবাইকে খবর দিয়ে রেখেছেন । বউমার অপারেশন, রক্ত দরকার, তোমরা এসো ।

প্রথমেই ট্যাকসি হাঁকড়ে এসে গেল লালটু । ভিতরে ভিতরে যত বিরোধী থাক, পরিবারের কেউ বিপদে পড়লেই সে আগে ঝাঁপিয়ে পড়ে ।

লাউঞ্জে বসে কৃষ্ণকান্ত একটা কোল্ড ড্রিংক খাচ্ছিলেন । ভিতরে প্রচণ্ড উদ্বেগ ও দুশ্চিন্তা, গলা শুকিয়ে কাঠ । নারসিং হোমের কর্তৃপক্ষ অবশ্য তিনি উঠতে বললে উঠছে, বসতে বললে বসছে, কিন্তু তাতে তিনি নিশ্চিত হতে পারছেন না । জীবন-মৃত্যুর ওপর কোনো খলিফারই তো হাত নেই ।

লালটু ঢুকল বুনা মোমের মতো । তেমনই প্রকাণ্ড চেহারা, বেশ বড়সড় একটা ভুঁড়ি, বড় বড় শ্বাস ফেলে, প্রচণ্ড জোরে কথা বলে । ঢুকেই বলল, সেই হারামজাদাটা কোথায় ?

কৃষ্ণকান্ত একটু হতাশ ভঙ্গীতে মাথা নাড়লেন । হারামজাদা এক ও অদ্বিতীয় ধ্রুব । ছেলেটা তাঁকে কতদূর ডোবাবে তা তিনি এখনো জানেন না । মতিগতি ফেরানোর জন্য একটু অল্প বয়সেই বিয়ে দিয়েছিলেন । লাভ হয়নি ।

লালটু বলল, আপনি বাড়ি চলে যান কাকা । আমরা তো আছি । আপনি বুড়ো মানুষ, রাত জেগে বসে থাকার কী দরকার ?

কৃষ্ণকান্ত একটু গা ঢিলে দিয়ে একটা সোফায় বসে আছেন । পাশে নারসিং হোমের সুপারিনটেনডেন্ট ও আর একজন উচ্চপদস্থ গোছের লোক খুব সতর্ক মুখচোখ নিয়ে উপবিষ্ট । কৃষ্ণকান্ত কোল্ড ড্রিংকের স্টুতে আর একটা মৃদু টান দিয়ে বললেন, যাবো । রক্ত দেওয়ার লোকজন সব আসুক ।

আর কে আসবে

কৃষ্ণকান্ত লালটুর কথার জবাব দেওয়ার আগেই সুপারিনটেনডেন্ট বিনীতভাবে বলল, ব্লাড উইল বি নো প্রবলেম স্যার।

কৃষ্ণকান্ত এ কথাটায় বিরক্ত হলেন। মাথা নেড়ে বললেন, প্রবলেমটা তোমার বোঝার কথা নয় মিত্র। তোমরা সব আপ টু ডেট লোক। ব্লাডের ব্যাপারটা বোঝো না। আমার একটু সংস্কার আছে। আই ওয়ার্ল্ড ব্লাড অফ মাই ওন ক্ল্যান। এটা সায়েন্টিফিক ব্যাপার কিছু নয়, কিন্তু সংস্কার।

মিত্র কথা বাড়াল না। শ্রদ্ধার সঙ্গে চূপ করে রইল।

লালটু বলল, কত রক্ত লাগবে? ধুবর বউ তো একটা চিংড়ি মাছের মতো। যা লাগবে আমিই দিতে পারবো বলে একখানা অতিশয় বলিষ্ঠ হাত বাড়িয়ে দেখাল।

কৃষ্ণকান্ত বললেন, যা লাগার লাগবে। প্রস্তুত থাকা ভাল। ওই তো বোধহয় কানু আর চানু এল দেখ তো লালটু।

লালটু লাউঞ্জের সিঁড়ি দিয়ে নামে। একটা ট্যাকসি থেকে কানু আর চানু নামছে। তার খুড়তুতো ভাই। বড় কাকার ছেলে। দুজনই ব্রিলিয়ান্ট। একজন শিবপুরের বি.ই. অনাজন এম.বি.বি.এস পাশ করে এম.এস. করছে। তাদের সঙ্গেই এসেছে বড় পিসির ছেলে সুশান্ত। সে ব্রিলিয়ান্ট নয় বটে, কিন্তু দুর্দান্ত মস্তান। হাঁক ডাকে ওস্তাদ লোক। লালটু তিনজনকে তাড়া দিয়ে বলল, যা যা ভিতরে যা আমি একটু এগিয়ে দেখি আর কে আসে।

তিনজনই দৌড় পায়ে ভিতরে চলে গেল। লালটু বাইরে এসে দাঁড়াল। সামনেই একটা তেমাথা। পেটরোল পাম্প। রাত গভীর হওয়ায় রাস্তায় লোকজন নেই। মাঝে মাঝে এক-আধটা মোটর বা ট্যাকসি দারুণ জোরে বেরিয়ে যাচ্ছে। মধ্যরাত্রির কলকাতার একটা অদ্ভুত চরিত্র আছে। এই কলকাতাকেই লালটুর বেশী পছন্দ। লালটুর বয়স ষয়ত্রিশ ছত্রিশ। মাত্র ছ' সাত বছর আগেও সে কলকাতার ফার্স্ট ডিভিশনে ফুটবল খেলেছে। দু বছর ইস্টবেঙ্গলেও ছিল। জীবন এখনো তার কাছে ফুটবলের মতোই উপভোগ্য, টানা-পোড়েন ও উত্তেজনায় ভরা। লালটু ফুর্তি করতে ভালবাসে, মারপিট করতে ভালবাসে, মড়া পোড়াতে ভালবাসে। তার ভালবাসা বিচিত্র ও বহুমুখী। তার রাগ সাংঘাতিক, ভালবাসাও সাংঘাতিক। যাকে ভালবাসে তার জন্য জান দিতে পারে, যার ওপর রাগ হয় তার গলা কেটে ফেলার কথা ভাবে। এই চরমপন্থী মনোভাব তাকে বহুব্যবহার বহু সমস্যায় ফেলেছে। ইস্টবেঙ্গল ক্লাবে সে টিকে থাকতে পারেনি এই স্বভাবের দরুণ। এই স্বভাবের জন্যই যে মেয়েটিকে সে সত্যিকারের ভালবাসত তাকে বিয়ে করতে পারেনি। সবচেয়ে যেটা গুরুতর সেটা হল, উগ্র মেজাজের জন্য ঘছবার তাকে চাকরি ছাড়তে হয়েছে। এখন সে ব্যাংকের অফিসার বটে, কিন্তু আরও একটু উঁচু জায়গায় তার এতদিনে থাকার কথা ছিল। আত্মীয়স্বজনরা বলে, লালটুর পাতিল কালা হয় না। বাঙাল ভাষার কথাটার সাদা অর্থ হল, তার হাঁড়ি কালো হয় না। তবে সে যে দিলদরিয়া লোক এটা সবাই স্বীকার করে। নিজেদের বৃহৎ পরিবার ও আত্মীয়স্বজনের প্রতি তার আনুগত্য নিরোঁট ও অটল। ছোটোকাঁকার সঙ্গে তার একটা কাজিয়া চলছে বটে, কিন্তু কাকা কাকাই। রক্তের গভীর সম্পর্ক।

লালটু বাইরে দাঁড়িয়ে ফাঁকা রাস্তাঘাট লক্ষ্য করছিল। আরো লোক আসবে। তাদেরই জ্ঞাতিগুষ্ঠি সব। রেমির অত রক্ত কিছুতেই লাগবে না। কিন্তু ছোটোকাঁকার স্বভাবই হল ওই। যে কোনও উপলক্ষে নিজের বৃহৎ পরিবারটির সকলকে জড়ো করে ফেলবেন। গোষ্ঠীপতি হিসেবে তিনি নিজের ক্ষমতাটা এইভাবেই যাচাই করতে ভালবাসেন মাঝে মাঝে।

লালটুর হঠাৎ নজরে পড়ল, বাইরের আবছায়ায় দেয়ালে ঠেস দিয়ে একটা অল্পবয়সী ছেলে দাঁড়িয়ে আছে। খুব উদাস ভঙ্গী। লালটুর ছেলেটাকে চেনা চেনা লাগছিল। সে দু পা এগোলো।

আরে! তুমি রেমির ভাই না?

ছেলেটা একটা জ্বলন্ত সিগারেট টুক করে ফেলে চটিতে মাড়িয়ে বলল, হ্যাঁ, আপনি তো

লালটুদা !

কতক্ষণ এসেছো তুমি ?

অনেকক্ষণ । সেই সন্ধে থেকেই । আমি একা নই । বাবা, মা, দাদা সবাই আছে ।

কোথায় ! দেখলাম না তো !

ওরা ওপরে । বারান্দায় দাঁড়িয়ে আছে । আমার হাসপাতালের গন্ধ ভাল লাগে না বলে নীচে এসে দাঁড়িয়ে আছি ।

ছেলেটার গায়ে এই শীতেও মাত্র শাট দেখে লালটু বলল, গরম জামাও তো পরে আসিনি দেখছি ।

সময় পাইনি । দিদির খবর পেয়ে তাড়াছড়ো করে চলে এসেছি ।

আরে, এত চিন্তার কী ? আমরা তো আছি । আফটার অল রেমি আমাদের বাড়ির বউ । তুমি মা বাবাকে নিয়ে বাড়ি চলে যাও । টেক রেস্ট ।

ছেলেটা একটু অভিমান ভরে বলল, যদি কোনো দরকার হয় সেই জন্যই আছি । শুনেছিলাম দিদির রক্ত লাগবে । কিন্তু তালুইমশাই কিছুতেই আমাদের রক্ত অ্যাকসেপট করতে রাজি নন । কেন বলুন তো !

লালটু হোঃ হোঃ করে হাসল । বলল, আরে ! তার জন্য রাগছ কেন ? কাকার একটু বাতিক আছে ।

এটা কী ধরনের বাতিক ? আমরা তো দিদির পর নই । আমাদের রক্ত কি অশুচি ? তালুইমশাই অত্যন্ত ক্লাস কনশাস ।

লালটু ছেলেটাকে একটু ভাল করে দেখল । রোগা ফর্সা চেহারা । গালে কৈশোরের নরম কিছু দাড়ি এবং গোঁফ । আজকাল দাড়ি গোঁফটা বেশ চালু ফ্যাশন । ছোকরার মাথার চুলও মেলা । ঘাড় পর্যন্ত বাবরি । লালটু বুঝতে পারছিল না ছোকরা কমিউনিস্ট কিনা । আগে পায়জামা এবং পানজাবি ছিল দেশী কমিউনিস্টদের মাকামারা পোশাক । দেখেই চেনা যেত । আজকাল অবশ্য বাইরেটা দেখে চেনা মুশকিল । ছেলেটার নাম কিছুতেই মনে পড়ছিল না লালটুর । তবে সে বিগ ব্রাদারের মতো ছোকরার কাঁধে হাত রেখে বলল, আরে না, ক্লাস কনশাস কথাটা বড্ড ভারী । ওসব নয় । কাকার ধারণাটা কী জানো ? শুনলে তুমি হাসবে, বাট ইট ইজ এ ফ্যাকট । কাকার বিশ্বাস, যারা ইস্টবেঙ্গলের লোক তারা এককালে ভাল খেয়েছে-দেয়েছে, ফ্রেশ এয়ার পেয়েছে, কাজেই তাদের রক্তটা একটু বেশী পিউরিফায়েড অ্যাণ্ড হেলদি ।

বলে লালটু আর একচোট হোঃ হোঃ করে হাসল ।

কিন্তু রেমির ভাই হাসল না । বলল, এই বিজ্ঞানের যুগে ওসব বিশ্বাস অচল । রক্ত কার কত পিউরিফায়েড সেটা স্পেশালিস্টরা বলবে । আমরা পশ্চিমবঙ্গের লোক বলে আমাদের রক্ত পিউরিফায়েড নয় এটা তো অশিক্ষিত লোকের ধারণা । তাই যদি হবে তবে পশ্চিমবঙ্গের মেয়ের সঙ্গে ছেলের বিয়ে দিতে যাওয়াই বা কেন ?

প্রশ্নটা হক্কের । জবাবটা লালটু খানিক জানে । তবে সে কথা এই দুধের বাচ্চাকে বলবার মতো নয় ! সে একটু উদার গলায় বলল, আফটার অল কাকা বুড়ো হয়েছেন, কিছুটা সেনিলিটিও এসে যায় এই বয়সে । এক সময়ে জমিদারী করেছেন, মেজাজটাও তেমন । ঠঁর ওপর আমরা কোনো কথা বলি না । তবে জানি, ঠঁর অনেক ধারণাই লজিক্যাল নয় ।

রেমির ভাই গম্ভীর মুখে বলল, এই বিয়েতে আমরাও খুব খুশি নই । জামাইবাবুর বিহেবিয়ার খুব খারাপ । দিদি সাইকোলজিক্যালি ভীষণ আপসেট । অনেকদিন ধরেই আমরা সব কিছু মুখ বুজে সহ্য করে আসছি লালটুদা । কিন্তু এখন রক্তের পিউরিটির ব্যাপারটা আমাদের কাছে খুব হাস্যকর লাগছে । জামাইবাবুর রক্ত কি আপনার কাছে খুব পিওর বলে মনে হয় ?

কোথাও কিছু না, এই সামান্য কথাটায় হঠাৎ লালটুর মাথাটা দপ করে জ্বলে উঠল। সেই আশুন ঝলসে উঠল তার চোখেও। ঠিক কথা, ধুব অল্প বয়স থেকে মদ খায়, অন্যান্য দোষও আছে। কিন্তু তা বলে তার সম্পর্কে এরকম কথা অন্তত কুটুমের মুখে মানায় না। লালটু একটু দম ধরে থেকে রাগটা সামলাল। চণ্ড রাগটাকে সে নিজেই আজকাল ভয় পায়। তারপর চাপা রাগের গনগনে গলায় বলল, ধুবকে আমি বাচ্চাবেলা থেকে জানি, হি ইজ মাই ব্রাদার। মদ আমিও খাই। কিন্তু কোন শুয়োরের বাচ্চা আমার রক্তকে ইমপিওর বলবে হে ?

রেমির ভাই যে এই ধমকে ভয় খেল এমন নয়। বরং খুবই উদাস একরকম বেপারোয়া মুখে স্তিমিত গলায় বলল, একটু আগে আমার বাবাকে তালুইমশাই ইনডিরেকটলি অপমান করেছেন। দিদির এই প্রথম বাচ্চা। একটা প্রিমিটিভ নিয়ম আছে প্রথম বাচ্চা হওয়ার দায়দায়িত্ব মেয়ের বাপের বাড়ির। আমার বাবা নারসিং হোমের খরচটা নিজে দিতে চেয়েছিলেন। তাতে তালুইমশাই এমন সব কথা বললেন যাতে মনে হয় এখনো এদেশে সামন্ততন্ত্র চালু আছে এবং গোটা দেশটাই ঊর জমিদারী। নারসিং হোমের খরচ দিতে চেয়ে আমার বাবা যেন ঊকে অপমান করেছেন।

লালটু খুবই অবাক হয়ে গেল। তার ছোটো কাকা নেতা মানুষ। পাবলিক তাঁর সম্পর্কে ভাল কথাও বলে, খারাপ কথাও বলে। কিন্তু তা বলে কুটুমরা বলবে কেন ? লালটুর গা হাত পা নিশপিশ করছিল।

ঠিক এই সময়ে একটা প্রাইভেট গাড়ি এসে থামল নারসিং হোমের ফটকে। দরজা খুলে প্রথমে নামল জগা। তার পর ধুব। সঙ্গে আর একটা বাচ্চা চাকর।

লালটুর রাগটা গিয়ে পড়ল ধুবর ওপর। সে গিয়ে শরীরটা চিতিয়ে দাঁড়াল তার সামনে। গলায় ফেটে পড়ল রাগ, এতক্ষণ কোথায় ছিলি রে হারামজাদা ? তোর জন্য কি আমাদের মুখে চূণকালি পড়বে ? শালার তিন পয়সার সব কুটুমও আজকাল লম্বা চওড়া লেকচার ঝেড়ে যায় ! ফর ইউ ! ওনলি ফর ইউ !

বলে আচমকা ধুবর পুলওভারের বৃকের কাছটা খামচে ধরে দুটো মগজ-নাড়ানো ঝাঁকুনি দিল লালটু।

এই একটা লোককে ধুব বরাবর ভয় পায়। নেশা এখন আর নেই। মাথাটা এমনতেই কেমন ভোঙ্কল হয়ে আছে। ঝাঁকুনিতে সে আরও ভ্যাবাচ্যাকা খেয়ে যায়। বলে, কেন, কী হয়েছে ? ইজ শী ডেড ?

মরলে তোরই মরা উচিত। গো হোম অ্যাণ্ড শুট ইওরসেলফ।

ধুব কিছু বুঝতে পারছে না। অসহায় ভাবে বলল, কী হয়েছে লালটুদা ? এনিথিং রং ? এভরিথিং রং। যেসব লোক আমাদের জুতোবরদার হওয়ার যোগ্যতা রাখে না তাদের মেয়ের সঙ্গে বিয়ে দেওয়াই বোকাশি হয়েছে। যা ভিতরে যা। কাকা বসে আছেন।

ধুব অবশ্য ভিতরে গেল না। চুপ করে দাঁড়িয়ে রইল। জগা দৃশ্যটা দাঁড়িয়ে দেখে আস্তে আস্তে ভিতরে চলে গেল। লালটু এগিয়ে গেল পেটরোল পাম্পটার কাছাকাছি। পা ফাঁক করে দাঁড়িয়ে একটা সিগারেট ধরিয়ে টানতে লাগল।

রক্তের শুদ্ধতা সম্পর্কে তার শুচিবায়ু নেই। ওটা কাকার বাত্বিক ঠিকই। কিন্তু লালটু জানে তাদের পরিবারে আজ অবধি বেচাল কিছু হয়নি। নিজেদের বংশ সম্পর্কে তাদের গৌরব এখন হয়তো বৃথা, কিন্তু এটাও ঠিক গৌরব করার মতো বংশ খুব বেশী লোক পায় না। তারা ভাগ্যক্রমে পেয়েছে। ব্যতিক্রম অবশ্য ধুব। একমাত্র ধুব।

আড়চোখে চেয়ে লালটু দেখে, রেমির ভাই আর একটু দূরে সরে গিয়ে দেয়ালে ঠেস দিয়ে আবার সিগারেট ধরিয়েছে। একটা ট্যাকসি বাঁক নিল। তার হেডলাইটের আলোয় রেমির ভাইয়ের সাদা এবং দাড়িওলা মুখটা কয়েক সেকেন্ডের জন্য স্পষ্ট দেখা গেল।



চোখ বাঁচাতে মুখ নামিয়ে নিল ছেলোট।

ট্যাকসি থেমেছে। তাদেরই লোক। লালটু এগোলো। তার অনুমান ঠিক। ট্যাকসি থেকে একে একে নেমে আসছে শচীন, অলক, মৃদুল, জয়িতা, শান্তনু আর পৃথা। ছোটো কাকার গোষ্ঠী বা ক্ল্যান। আরো আসবে। আত্মীয়রাই তো শুধু নয়, ছোটোকাকার বিশাল পরিচিতির জগৎ। রাজনৈতিক দলের লোকেরা আছে। প্রভাবশালী বন্ধুবান্ধব আছে। চামচা আছে। একটু বাদেই নারসিং হোম হয়তো বা জনসমুদ্রে পরিণত হবে।

পায়ে পায়ে আবার লাউঞ্জে ফিরে আসছিল লালটু। হঠাৎ অবাক হয়ে দেখল, ধুব তার দুবিনীত শালাটির কাছে গিয়ে দাঁড়িয়েছে ইতিমধ্যে। দুজনে নীচু স্বরে কথা বলছে।

দৃশ্যটা ভাল লাগল না লালটুর। ধুবর উচিত স্বশুভবাড়ির সঙ্গে কোনো সম্পর্কই না রাখা। ব্যাপারটা একদিন ধুবকে বুঝিয়ে দেবে সে।

পায়ে পায়ে লাউঞ্জে ফিরে আসে লালটু। ছোটোকাকা ভূঁচকে বসে আছেন সেই একই জায়গায়। অন্যরা নীরবে দাঁড়িয়ে।

কী হয়েছে? লালটু জিজ্ঞেস করে।

কৃষ্ণকান্ত তার দিকে একবার চেয়ে মাথা নাড়লেন। গলাটা সাফ করে নিয়ে বললেন, হেমারেজটা বন্ধ হচ্ছে না। কণ্ঠশন গ্রেভ। লালটু, নিতাইটাকে দেখ তো। বোধহয় গাড়িতে ঘুমোচ্ছে। ওর কাছে আমার প্রেশারের বড়ি আছে। নিয়ে আয়।

আপনি বাড়ি চলে যান না! একটা কামপোজ খেয়ে ঘুমিয়ে পড়ুন। আমরা আছি।

না, ঠিক আছে। ওই গর্ভস্রাবটা কোথায়?

ধুব বাইরে আছে। ডাকব?

ডাকতে হবে না। শুধু বল গিয়ে, বউমার অবস্থা ভাল না।

বলে কী হবে? আপনি উত্তেজিত হবেন না। অপারেশন তো হবে। দেখা যাক।

যে রুগী বাঁচতে চায় না তাকে বাঁচাবে কে?

বাঁচতে চায় না?

তাই তো শুনছি। সারজেন দাশগুপ্ত বলল, পেশেন্ট বলছে, আমার বাঁচার ইচ্ছে নেই। আমি বাঁচতে চাই না। এমন কি বাচ্চাটার জন্যও না।

লালটু বুঝে নিল, বউমার জন্য দৃষ্টিভঙ্গা, ছেলের ওপর রাগ সব মিলিয়ে ছোটো কাকা আজ একটু বেহেড। সে গিয়ে ছোটোকাকার পাশের খালি জায়গাটায় বসে বলল, ভেঙে পড়বেন না। এভরিথিং উইল বি অলরাইট। আমি বলি, আপনার বাড়ি চলে যাওয়াই ভাল।

কেন, বাড়ি যেতে বললেন কেন? বাড়ি গিয়ে কী করব? সারাক্ষণ দৃষ্টিভঙ্গা হবে। তার চেয়ে এই-ই ভাল। যা হওয়ার চোখের সামনে হোক। বাচ্চা মেয়েটা... এই স্ট্রেন দিয়ে দিয়ে আনলাম। স্টিল এ চাইন্স। ওই গর্ভস্রাবটার দোষে...

কাকা! লালটু সাবধান করে দেয়। দেয়ালেরও কান আছে

শেপাশেই।

কোন কথার কোন অর্থ ধরবে তা তো বলা যায় না। গলা খাঁকারি দিয়ে

ধুবরও তো বয়স

বেশী না। পঁচিশ কি ছাব্বিশ। এই বয়সে কত আর কাণ্ডগোল হয় মানুষের!

এই বয়সে যার হয় না তার কোনোকালেই হয় না। ও জমেছে আমাদের শেষ করার জন্য।

অপারেশন থিয়েটারে রেমি তখন আলোর নীচে শুয়ে। এত আলো তবু যেন সব আলোও অন্ধকারকে তাড়াতে পারছে না। অন্ধকার চোখে নয়। ভিতরে।

রক্তে সে আজ স্নান করছে কখন থেকে। ভেসে যাচ্ছে নিজের রক্তের স্রোতে।

বাচ্চাটা জন্মাল দুপুরের একটু পর। অনেক যন্ত্রণা দিয়ে নাত্তী ছিড়ে, শরীর অবশ করে নেমে গেল। দুর্বল যন্ত্রণার অবসান। কচি গলার কান্নার শব্দ পৃথিবী জুড়ে মাদল বাজাতে লাগল।

ছেলে ? না মেয়ে ?

ছেলে ! ছেলে ছেলে হয়েছে গো ! সোনার গয়না দিতে হবে কিন্তু । খুইয়ে মুছিয়ে ছেলেটাকে দেখিয়ে এই কথা বলে নিয়ে গেল একটা আয়া ।

কিন্তু তারপর থেকে রেমির শরীরের ভিতরে রক্তের কলধ্বনি আর থামতে চায় না ।

হেমারেজটা ধরতে অনেক সময় নিয়েছে ডাক্তার । কিন্তু শুধু ডাক্তারেরই কি দোষ ? লেবার রুম থেকে বেড-এ নিয়ে যাওয়া পর্যন্ত সব টের পেয়েও কি চূপ করে থাকেনি রেমি ?

শুধু সে টের পেয়েছিল । কিন্তু কিছু বলেনি কাউকে । রক্তে ভেসে যাচ্ছিল অয়েলরুথের ওপর পাতা চাদর । ঢাকা কম্বলের নীচে তার শরীর নিস্তেজ হয়ে আসছিল । বিমবিম করছিল মাথা । কানে সব শব্দ ক্ষীণ থেকে ক্ষীণতর হয়ে আসছিল ।

কে ?

আমি । আমি ধুব ।

খুব লাজুক মুখেই ধুব এসে দেখা করেছিল ।

চোখের দুর্বল পাতা অতি কষ্টে তুলে রেমি জিঙ্ক্রেস করল, ওকে দেখেছো ?

কাকে ?

বাচ্চাটাকে ।

ন্ নাঃ । দেখবো । তাড়া কী ?

দেখো । ভাল করে দেখো ।

তোমার কি খুব কষ্ট হয়েছে ?

না । কষ্ট কিসের ? মেয়ে হয়ে জন্মেছি, এ কষ্ট তো কপালের লেখন ।

তা বটে । বাপদের গর্ভযন্ত্রণা নেই । কিন্তু অন্য যন্ত্রণা আছে ।

আছে নাকি ?

আছে আছে ।

রেমির চোখে সেই সময় একটা মন্ত পাথর চাপা দিল কে । আবার একটু বাদে চোখ মেলতে পারল সে । গলাটা বড্ড শুকনো । ক্ষীণ কণ্ঠে বলল, আমাকে একটু জল দিতে বলো । বড় তেষ্ঠা ।

ধুব নিজেই জল খাইয়ে দিল তাকে । খুব সাবধানে, আস্তে আস্তে । তবু ধুবর হাত কাঁপছিল । অল্প অল্প চলকাচ্ছিল জল ছোট্ট পোসিলিনের মগটা থেকে ।

আঃ, গায়ে জল পড়ছে । ঠাণ্ডা না

আমার হাতটা আজকাল কাঁপে কেন বলো তো ! মাল খাই বলে নাকি ?

তুমি যাও, আয়াকে বলো । না হয় নার্সকে ডাকো ।

আমিই না হয় দিলাম । দাঁড়াও, গলায় তোয়ালে দিয়ে নিই ।

আর লাগবে না । হয়েছে ।

ধুব মগটা রেখে দিল । বলল, এবার কেটে পড়তে হবে । বাবা আসবে ।

তাই পড়ো না । কে থাকতে বলেছে ?

তোমার চেহারাটা ভাল দেখাচ্ছে না রেমি ! ইউ আর সিক !

না, মোটেই না । আমি ভাল আছি । খুব জোর দিয়ে রেমি বলেছিল । কিন্তু সে ঠিকই টের পেয়েছিল, সে ভাল নেই । তলপেটে একটা ব্যথা মেরে মেরে নিচ্ছিল । রক্তের কলধ্বনি শুনতে পাচ্ছিল সে । কিন্তু সে বলেনি সেই কথা । কাউকে বলেনি ।

কত বয়স হবে তার এখন ? কুর্ডি. ? না, একুশ । হ্যাঁ একুশ । এখনো সে কলেজের ছাত্রী । এই এত অল্প বয়সে সে বড় হয়েছে, মাও হয়ে গেল । এত তাড়াতাড়ি দরকার ছিল না এসব হওয়া । অপেক্ষা করা উচিত ছিল ।

সে আচমকা বলল, শোনো, একটা কথা বলি।

কী ?

বাচ্চাটাকে দেখো।

তার মানে ?

বাচ্চাটাকে একবার দুটো চোখে দেখে এসো।

বলছি তো দেখব। তাড়া किसের ?

শোনো, এই বাচ্চাটা—এটা তোমার।

তার মানে ?

আমাকে সন্দেহ কোরো না।

ধুব একটু লজ্জা পেল কি ? হ্যাঁ, পেল। ফর্সা রং একটু লাল হল। বেশ দেখতে লোকটা। লম্বা ছিপছিপে চাবুকের মতো চেহারা। স্পষ্টই বোঝা যায় গায়ে অভিজাত বংশের রক্ত আছে। তবু গোলমালটা কোথায় ? কেন গোলমাল ? কেন লোকটা স্বাভাবিক নয় ?

বিয়ের পরই তাদের জোড়ে দার্জিলিং পাঠিয়েছিলেন স্বশ্রমশাই। সেটা এক ধরনের হানিমুনই হবে। আর সেখানে একটা অদ্ভুত ঘটনা ঘটেছিল।

## ॥ ৭ ॥

“ভাই হেমকান্ত, তোমার পত্রখানি ঠিক তিন দিন আগে পাইয়াছি। তাহার পর হইতে কেবলই ভাবিতেছি, তোমাকে কী লিখিব। ভাবিয়া দেখিলাম, দুইটি পত্ৰ আছে। তোমার মানসিক বৈকল্যে প্রলেপ দিতে দু-একটা সাস্তুনার কথা, স্তোকবাক্য অথবা এই বৈকল্যকে তোমার দার্শনিক চেতনা বলিয়া বর্ণনা করিয়া লেখা যায়। তাহাতে তোমার মানসিক বৈকল্যের কতদূর কী প্রশমন ঘটিবে জানি না, কিন্তু তোমার দুর্বলতাকে প্রকাশান্তরে প্রশ্রয় দেওয়া হইবে। দ্বিতীয় পত্ৰ মোহমুদগর। অর্থাৎ তোমার মতো কৃপমণ্ডককে দেশকাল ঘটনাপ্রবাহ সম্পর্কে সচেতন করিয়া তুলিয়া তুমি যে কত বড় অপদার্থ তাহাই তোমার চক্ষুর সম্মুখে তুলিয়া ধরা। আমি দ্বিতীয় পত্ৰটিই গ্রহণ করিলাম।

“তোমার পত্ৰ হইতে যতদূর উদ্ধার করিতে পারিলাম তাহার মোদ্দা কথা হইল, তোমার নবনীন্দিত কোমল কর হইতে কুয়ার বালতি স্থলিত হইয়া জলে পড়িয়াছে। ঘটনা তো তবে সাংঘাতিক। সারা বিশ্বে তো সাম্প্রতিককালে এরূপ বিশাল বিপর্যয় আর ঘটে নাই। ফলে তোমার মনে হইল, তুমি বুড়া হইতেছ, জীবনদীপের শিখা নিস্তেজ হইতেছে ইত্যাদি। ভাল কথা। কিন্তু এই অবিমিশ্র জলীয় মানসিকতার উৎসটি কোথায় তাহা কোনোদিন স্থিরচিহ্নে ভাবিয়া দেখিবার অবকাশ পাইয়াছ কি ? তোমার হস্তাক্ষর মুক্তার ন্যায় সুন্দর, ভাষাও প্রাঞ্জল। তথাপি বলি, তোমাকে বাল্যকালাবধি গভীরভাবে জানি বলিয়া পত্ৰটির অন্তর্নিহিত অর্থটি খানিকটা হৃদয়ঙ্গম করিতে পারিয়াছি। সাধারণ মানুষ এই পত্ৰ পড়িয়া মাথামুণ্ড কিছুই বুঝিবে না। বড় জোর ভাবিবে, ইহা বোধ করি কুপিত বায়ুর প্রভাব।

“তোমার মনে আছে কিনা জানি না, বাল্যকালে আমরা উভয়ে পাঠশালায় যাইতাম। একদা ব্রহ্মপুত্রের তীরে এক বুড়া পাগল আমাদের তাড়া করিয়াছিল। দোষটা আমারই। সে নিরিবিলিতে বসিয়া বিষ্ঠা ত্যাগ করিতেছিল। আমি তাহাকে একটি ঢিল মারি। খানুপাগলা তাহাতে ক্ষেপিয়া গিয়া অস্ত্রের একটিমাত্র আবরণ ছেঁড়া গামছাখানি পরিত্যাগ করিয়া ভীম হুহুংকারে আমাদের ধাওয়া করিল। প্রকৃতপক্ষে কে ঢিল মারিয়াছিল তাহা সে জানিত না। প্রভাতসমীরে ব্রহ্মপুত্রের পারে বসিয়া নিবিষ্টমনে সে প্রাকৃতিক ক্রিয়া সারিতেছিল। ঢিল খাইয়া সে চমকিত হইয়া আমাদের দেখিল

এবং তৎক্ষণাৎ তাড়া করিল। কে অপরাধী তাহা সে জানিত না, তবে তোমার রাঙামূলার মতো চেহারাটিই তাহার পছন্দ হইয়া থাকিবে। সুতরাং আমাকে ছাড়িয়া সে তোমার পিছু লইল। সেই বয়েসের পক্ষে যথেষ্ট নাদুসনুদুস শরীর লইয়া তুমি প্রাণভয়ে বইখাতা ফেলিয়া দৌড়াইতেছ আর দিগম্বর খানুপাগলা তোমাকে তাড়া করিয়া লইয়া যাইতেছে, দৃশ্যাটা যথেষ্ট হাস্যোদ্রেককারী। কিন্তু মুক্তিলাভ হইল সেই সময়ে তুমি দৌড়বাপ ভাল জানিতে না। এমন কি আমাদের মতো হাঁটিয়া পাঠশালায় যাওয়ার অভ্যাসও তোমার ছিল না। তোমার দৌড় দেখিয়া মনে হইতেছিল যেন স্বয়ং জরদগব দৌড়াইবার চেষ্টা করিতেছে। কালীবাড়ি পর্যন্ত পৌছাইতেই তোমার দম বাহির হইবার জোগার, আতঙ্কে চোখ ডিম্বাকৃতি ধারণ করিয়াছে, কেমন যেন দিগবিদিগজ্ঞানশূন্য দিশাহারা অবস্থা। জমিদার-নন্দনের সেই দুরবস্থা দেখিয়া পথচারীরা অবশ্য হস্তক্ষেপ করিল এবং খানুপাগলাও নিরস্ত হইল। কিন্তু বহুক্ষণ তোমার স্বাভাবিক অবস্থা ফিরিয়া আসে নাই। তোমার বাকা সরিতে ছিল না, আর বারবার শিহরিয়া উঠিতেছিলে, চোখে এক অস্বাভাবিক দৃষ্টি। তোমার অবস্থা দেখিয়া আমি ভয় পাইয়া গিয়াছিলাম, পাগলের তাড়া, কুকুরের কামড়, বা অন্যতর নানাবিধ উৎপাত বাল্যকালের নিত্যসঙ্গী। ইহাতে অতটা আতঙ্কিত হওয়ার কী আছে তাহা আমার শিশু মস্তিষ্কে ঢোকে নাই। তবে, বুঝিয়াছিলাম, তোমার মন তেমন শক্তপোক্ত নহে। অথচ তোমারই অগ্রজ বরদাকান্ত অসম সাহসী বালক ছিল। তোমার সহোদর নলিনীর সাহসিকতার খ্যাতি তো ব্যাপক

“তুমি যুবা বয়সে ফুটবল খেলিয়াছ এবং তেমন মন্দ খেল নাই, তোমার জীবনে একমাত্র ওইটিই যা পুরুষোচিত। সেও খেলিয়াছ আমারই তাড়নায়। নহিলে বাল্যকালে বিদ্যালয়ে তুমি ছিলে বালকদের উপহাস ও লঘুক্রিয়ার উপকরণ। কিন্তু তোমার মধ্যে যে সৎ ও মহৎ একটি মানুষের বাস তাহা অনুভব করিয়া আমি তোমাকে প্রচণ্ড ভালবাসিতাম। তাই তোমাকে লইয়া বিদ্যালয়ে যে লঘু হাস্য-পরিহাস চলিত তাহা আমি পছন্দ করিতাম না। তাই সর্বদা তোমাকে রক্ষা করিয়া চলিতাম। একদিন মনে হইল, তুমি যদি নিজেই নিজেকে রক্ষা করিতে শিক্ষা না কর তবে আমার সাধ্য নাই বহির্বিশ্বের নানাবিধ আক্রমণ হইতে তোমাকে সর্বদা রক্ষা করিতে পারি। ফুটবল একটি উপলক্ষ মাত্র। তবে তাহার বিশেষ উপযোগ শরীর ও মনকে একযোগে গড়িয়া তোলে। বলিতে কী, ফুটবল তোমাকে জীবনের অনেক বাতুলতা বর্জন করিয়া একমুখীন হইতে শিখাইয়াছিল। বিপক্ষের গোলপোস্ট যখন আমাদের লক্ষ্যস্থল তখন ক্রীড়াটিও অর্থপূর্ণ ও লক্ষ্যাভিমুখী সংবেগ লাভ করে। ওই গোলপোস্টটি যদি না থাকে তবে ক্রীড়া অর্থহীন হইয়া যায়। ক্লান্তি আসে ও সমগ্র পরিশ্রমটাই পণ্ড্রম হইয়া পড়ে। ভাই হেম, জীবনটাও কি তাহাই নহে?

“তোমার জীবনটা এইরূপ লক্ষ্যহীন হইয়া ওঠার অবশ্য কারণ আছে। বরদাকান্ত সন্ন্যাসীও নলিনী স্বদেশী হইয়া যাওয়ায় তোমার পিতামাতা তোমার সম্পর্কে বিশেষ সাবধানী হইয়া পড়েন। অত আদর সতর্কতা তোমাকে ঘিরিয়া থাকায় তুমি ছায়াবৃত্ত বৃক্ষের মতো তেমন বাড়িয়া ওঠ নাই। মা-বাবার মুখ চাহিয়া তোমাকে অনেক অনভিপ্রেত গ্রহণ বর্জন করিতে হইয়াছে। ফলে তোমার চরিত্রের স্বাভাবিক বিকাশ ঘটে নাই। উপরন্তু জমিদার-নন্দন হইয়া জন্মগ্রহণ করিয়াছ বলিয়া তোমাকে খাওয়াপারার ভাবনাও ভাবিতে হয় নাই। কল্লনাবিলাসী হওয়া তোমার পক্ষে স্বাভাবিক। কিন্তু ভাই হেম, কল্লনাবিলাসী হওয়া কি আমাদের সাজে?

“দেশ তথা বিশ্বের পরিস্থিতি যদি কিছুটা অনুধাবন করার চেষ্টা কর তাহা হইলে দেখিবে আমরা কি রকম সংকটের ভিতর দিয়া চলিয়াছি। একটা বিশ্বযুদ্ধ শেষ হইয়াছে তো আফগানিস্তান লইয়া আর এক বিশ্বযুদ্ধের সম্ভাবনা দেখা দিয়াছে। আমানুল্লাহকে সিংহাসন ছাড়িতে হইয়াছে। রুশীরা ফৌজ পাঠাইয়াছে। এদিকে সাইমন কমিশনরূপ এক দুষ্টচক্র এদেশে ব্রিটিশ শাসন কায়ম করিবার ফন্দি আঁটিতেছে। সংবাদপত্রটিও কি পড়িবার মতো আগ্রহ বোধ কর না? এদেশে

প্রতি বৎসর ইংরাজ ১১১ কোটি টাকার পণ্য বিক্রয় করে। ভারতবাসীকে লইয়া যে ছেলেখেলা ও দুষ্ট ব্যবসা চলিতেছে সে সম্পর্কে সচেতন হও। কল্লনার ভূমি হইতে দেশ কাল পরিস্থিতির মধ্যে অবতীর্ণ হও। মৃত্যুচিন্তা কর্পরের মতো উড়িয়া যাইবে।

“তুমি বৃদ্ধ হইয়াছ ভাবিলেও হাসি পায়। কৈ, আমি তো তোমার বয়স হইয়াও বৃদ্ধ হই নাই! তবে তোমার বার্ষিকের বোধ কোথা হইতে আসিতেছে? বলিলে হয়তো রাগ করিবে, তবু বলি, তোমার আসল খাঁকতি অন্য জায়গায়। তোমার সেই স্পর্শকাতর ও সযত্নগোপন স্থানটির সন্ধান আমি কতকটা জানি। বলি কি, লোকলজ্জা পরিত্যাগ করিয়া বরং রঙ্গময়ীকে বিবাহ কর। আর কতকাল একতরফা, প্রকাশবিমুখ, গোপন ও মুক প্রণয়ের জ্বালায় পুড়িয়া থাক হইবে? রঙ্গময়ী বাস্তববোধসম্পন্না, বুদ্ধিমতী ও সাহসী। সে সম্পূর্ণভাবে তোমার ভার লইলে এখনো জীবনে অনেক কিছু করার পথ খুলিয়া যাইবে। তোমার দেহ বৃদ্ধ হয় নাই, হইয়াছে তোমার মন। সুনয়নী আজ বাঁচিয়া থাকিলে আমি একথা উচ্চারণ করিবার সাহস পাইতাম না। যদিও জানি সুনয়নীর প্রতি তোমার প্রেম তেমন গভীর ছিল না। কেন ছিল না সে প্রশ্ন করিব না। হৃদয়ের আচরণ চিরকালই বিচিত্র। সুনয়নীর তো সৌন্দর্যের কোনো অভাব ছিল না। তবু সে তোমার মন পায় নাই। তোমার যখন বিবাহ হয় তখন রঙ্গময়ী নিতান্তই শিশু। তবু তাহার সঙ্গে তোমার বিবাহের একটা প্রস্তাব আসিয়াছিল। দরিদ্র পুরোহিত-কন্যাকে শেষ অবধি অবশ্য তোমরা গ্রহণ কর নাই। কিন্তু বর্জনই কি করিতে পারিলে!

“রঙ্গময়ী তোমাদের বিশাল বাড়ির আনাচে কানাচে ঘুরিয়া এবং তোমাদেরই ভুক্তবশেষ খাইয়া বড় হইয়াছে। তাহাকে লইয়া রটনাও বড় কম হয় নাই। কিন্তু যখন কৈশোর উত্তীর্ণ হইয়া সে যৌবনে পা দিয়াছে তখনই তাহাকে দেখিয়া বৃথিতাম, তাহার আলাদা একটা সত্তা ও ব্যক্তিত্ব দেখা দিতেছে। সে সুনয়নীর মতো সুন্দরী নহে বটে তবে আমাদের বাড়ির মেয়েদের মতো জলভাতও সে নহে। তুমিও রঙ্গময়ীর প্রসঙ্গ উঠিলে লজ্জা পাইতে শুরু করিলে। রোগটা আমি তখনই ধরিয়াছিলাম। কিন্তু তখনো সুনয়নী তোমার ঘর আলো করিয়া বিরাজ করিতেছে। কাজেই বিষয়টি বেশী তলাইয়া দেখি নাই। আমার বিশ্বাস, পুরুষমানুষ একটিমাত্র নারীর দ্বারা সম্পূর্ণ পোষণ পাইতে পারে না। বহু নারীর প্রতি তাহার আকর্ষণ স্বাভাবিক ও প্রকৃতি-অনুমোদিত। কিন্তু বহুবিবাহের হ্যাঁপাও বড় কম নহে। তাই রঙ্গময়ীর প্রতি তোমার দুর্বলতা আন্দাজ করিয়াও চূপ করিয়া ছিলাম। উপরন্তু এই যুগে ও পরিবেশে স্বাভাবিক বিবেকসম্পন্ন কোনো পুরুষের নারীপ্রেম লইয়া মাথা ঘামানোটা পাপ বলিয়াই মনে করি। প্রেম যদি কোথাও নিবেদন করিতে হয় তবে তাহা দেশমাতৃকার পায়ে। কিন্তু সেই বীরত্ব তোমার নাই। তবে তোমার সংখম আছে, কুণ্ঠা ও সৌজন্যবোধ আছে। প্রেম থাকিলেও তাহা তোমাকে প্রগল্ভ করিয়া তুলিবে না ইহাও জানিতাম। কিন্তু ভিতরে ভিতরে ওই প্রেমই তোমাকে খাইবে।

“ভাই হেম, আজ তোমার যে সব মৃত্যুচিন্তা ও অনিত্যের ভাবনা দেখা দিয়াছে, আজ যে ভূমি নিবিষ্টমনে জগতে কে আত্মজন ও কে পর তাহা বিচার করিতে শুরু করিয়াছে তাহা কিন্তু বাস্তবিক কোনো দার্শনিকতা নহে, বোধিও নহে। প্রবৃত্তির ক্ষুধা একটি ক্ষেত্রে নিবৃত্ত না হইলে অন্য দিক দিয়া ফুটিয়া বাহির হয়। জানিও, দুনিয়ার অধিকাংশ সন্ন্যাসী বৈরাগীই নানা অচরিতার্থ প্রবৃত্তির শিকার। তোমার ক্ষেত্রেও মনে হয়, প্রকৃতি প্রতিশোধ লইতেছে মাত্র। ওই বৈরাগ্যের মূলে আছে সেই নারীপ্রেম যাহা চরিতার্থ হয় নাই। গ্রাসটি সম্মুখে লইয়া ক্ষুধার্ত বাঘটি বসিয়া আছে। সংকোচবশে ভোজন করিতেছে না। প্রবৃত্তি চাহিতেছে, কিন্তু সৌজন্য ও সংকোচ বাধা দিতেছে। বিশেষ করিয়া, তোমার কনিষ্ঠ সহোদরকে জড়াইয়া এই রঙ্গময়ীর নামে কলঙ্ক রটিয়াছিল। তদুপর সে পুরোহিতকন্যা। এর উপর আবার তোমার পুত্রকন্যারা সাবালক হইয়াছে, তোমার নাতি নাতনীও জন্মগ্রহণ করিয়াছে। সংকোচ স্বাভাবিক। কিন্তু ক্ষুধা ছাড়িবে কেন? সে তাই অন্য পন্থা লইয়াছে।

তোমার মনের বৈষ্ণব ঘটাইয়া এখন সে তোমাকে লইয়া ছিনিমিনি খেলিবেই।

কুয়ার বালতি লইয়া আর গভীর চিন্তা করিও না। বাইরের ঘটনাগুলি ঘটনাই নয়। আসলে যাহা ঘটে তাহার গভীরে আছে আমাদের মন। সেই মনের সম্মুখীন হও। অকপটে নিজের কাছে নিজেকে প্রকাশ কর। তাবের ঘরে আর চুরি করিও না।

“প্রিয় হেমকান্ত, তোমাকে এইসব কথা লিখিয়া কিছু ক্রেশও বোধ করিতেছি। হয়তো এতটা কঠোর সমালোচনা না করিলেও পারিতাম। কিন্তু শল্য চিকিৎসারই যদি প্রয়োজন দেখা দেয় তবে সংকটাপন্ন রোগীকে বাঁচাইতে অস্ত্র ধরিতেই হয়।

“শীঘ্র দেশে যাওয়া হইবে না। কলিকাতায় কংগ্রেসের সভায় যোগ দিতে আসিয়াছি। যে বিপুল সমারোহ, উৎসব ও উদ্দীপনা এই সম্মেলনকে উপলক্ষ করিয়া দেখা দিয়াছে তাহা অভাবনীয়। মানুষ যদি এইভাবে জাগিয়া ও জাগরণটুকু ধরিয়া রাখিতে পারে তবে স্বরাজ আসিতে কতদিন লাগিবে ?

হেমকান্ত সচ্চিদানন্দের দীর্ঘ চিঠিটা বার দুই পড়লেন। তাঁর গা একটু জ্বালা করছিল। রাগ, ক্ষোভ তাঁর সহজে হয় না। তবু সচ্চিদানন্দের চিঠি পড়ে হল।

বিশাল ডেকচেয়ারে আধশোয়া হেমকান্ত কাশ্মীরি কারুকাজওলা ছোট্ট ত্রিপুরার ওপর চিঠিটা রেখে জানালা দিয়ে চেয়ে রইলেন। দক্ষিণের এই জানালা দিয়ে বাড়ির ভিতর দিককার বাগান চোখে পড়ে। দুপুরের কবোষ রোদ এসে পড়ে গিয়ে।

অনেক দূর পর্যন্ত বিস্তৃত ভিতরের অঙ্গন। কুকুর আছে, গাছপালা আছে, লন আছে। নীল উজ্জ্বল আকাশের গায়ে স্পর্ধিত ভঙ্গীতে দাঁড়িয়ে আছে পাম গাছের সারি। সেদিকে চেয়ে রইলেন হেমকান্ত

সচ্চিদানন্দ দেশকাল পরিস্থিতির মধ্যে নেমে আসার পরামর্শ দিয়েছে। চিরকালই সে এইরকম। তার মাথায় ছেলেবেলা থেকেই দেশ কাল পরিস্থিতির চিন্তা। তা বলে সব ছেড়েছড়ে সন্দেহী করতে সে নেমে পড়েনি। আইন পাশ করে প্রবল প্রতাপে ওকালতি করছে। কংগ্রেসের সঙ্গে তার সম্পর্ক গভীর। বার দুই সে ধরা পড়েছে আবার ছাড়াও পেয়েছে। সচ্চিদানন্দের সবই ভাল, কিন্তু বড় বেশী বস্তুবাদী এবং ঠোঁটকাটা। সেই কারণেই হেমকান্তর তাকে ভাল লাগে, আবার খারাপও লাগে।

সচ্চিদানন্দের নগ্ন আক্রমণাত্মক চিঠিটার ঝাঁঝ হেমকান্তকে প্রায় ছেয়ে ফেলেছে। বৃকে একটা যন্ত্রণার সূত্রপাত হয়েছিল কয়েকদিন আগে। এখন আবার সেরকম যন্ত্রণা হচ্ছে। স্বাসকষ্টের মতোও লাগছে যেন একটু। মনটা অস্থির।

হেমকান্ত উঠে ভিতর দিককার দরদালানে এসে পায়চারি করতে লাগলেন। দোতলার এই দরদালানটি বিশেষ রকমের নির্জন। হেমকান্ত পায়চারি করতে করতে ভাবতে লাগলেন। কুয়ার দড়ি, রঙ্গময়ী, শৈশবকাল, সচ্চিদানন্দ। ভাবনার কি শেষ আছে! ভাবতে বড় ভাল লাগে তাঁর। কিন্তু তিনি কিছুতেই বুঝতে পারছেন না, সচ্চিদানন্দের এই বিশ্লেষণ কতদূর সত্য এবং কতটাই বা ভ্রান্ত। কিন্তু তাঁর একটু লজ্জাবোধ হচ্ছে। আপনমনে হাসছেনও। মাঝে মাঝে মাথা নাড়ছেন।

ইদানীং এই রোগটা দেখা দিয়েছে তাঁর। একা হলেই আপনমনে ভাবতে ভাবতে কখনো হাসেন, মাথা নাড়েন, একটু-আধটু বিড়বিড়ও করেন। সচ্চিদানন্দটা পাগল। রঙ্গময়ীকে বিয়ে করতে উপদেশ দিয়েছে। হেমকান্ত রাগ করতে গিয়ে হেসেই ফেললেন ইঠাৎ। কেমন দেখাবে? মাথায় টোপর পরে ছাঁদনাতলায় যেতে? সিঁথিমোরে রঙ্গময়ীর রূপই বা কেমন খুলবে? পাগল! সচ্চিদানন্দ একটা পাগল।

“মা গো!” বলে কে চোঁচালো না পুকুরের ধারে?

হেমকান্ত দরদালানের জানালায় গিয়ে নীচের দিকে চেয়ে দেখলেন, পুকুরের ঘাটে বিশাখা আর চুনী। দুজনেই পিছনের দেয়ালের দিকে চেয়ে আছে। চোখে রোদ পড়েছিল বলে হেমকান্ত

প্রথমটায় ভাল দেখতে পেলেন না। তারপর লক্ষ্য করলেন, পাঁচিলের ওপর একটা কে যেন দাঁড়িয়ে আছে। জেলখানার মতো উঁচু পাঁচিল। ওঠা খুব সহজ নয়। কে ওটা? বাইরের লোক? না, বাড়িরই কেউ?

বিরক্ত হেমকান্ত অনুচ্চ স্বরে ডাকলেন, হরি।

তাঁর খাস চাকর দৌড়ে এল।

হেমকান্ত ভুঁ কঁচকে বললেন, দেখ তো কে একটা লোক পিছনের দেয়ালে উঠেছে। ধরে নিয়ে আয়। পালাতে যেন না পারে দেখিস।

হরি চলে গেল।

হেমকান্ত আবার জানালায় এসে দাঁড়ানোর আগে ঘরে গিয়ে কাঠের আলমারি থেকে দূরবীনটা নিয়ে এলেন। বিদেশে তৈরি শক্তিশালী দূরবীন। চোখে তুলে তিনি দেয়ালের ওপরে দাঁড়ানো লোকটাকে দেখলেন।

লোক নয়, নিতান্তই অল্পবয়সী ছেলে একটা। সতেরো আঠারোর বেশী বয়স হবে না। পরনে মালকোঁচা মারা ধুতি, গায়ে হাফ শাট। রং বেশ ফর্সা। সদা দাড়ি গোঁফ গজিয়েছে। ছেলেটা পিছনের মস্ত আমবাগানের দিক থেকেই দেয়ালে উঠেছে বলে আন্দাজ করলেন হেমকান্ত। তবে ছেলেটার হাবভাব একটু কেমনতরো। মুখটা শুকনো। চুল এলোমেলো। চোখের চাউনিটা যেন লক্ষ্যহীন। চারদিকে টালুটালু করে চেয়ে দেখছে।

হেমকান্ত দূরবীনটা নামিয়ে রাখলেন। বরকন্দাজরা দেয়ালের নীচে পৌঁছে গেছে। ছেলেটার পালাবার পথ নেই।

হেমকান্ত সিঁড়ি বেয়ে আস্তে ধীরে নেমে এলেন নীচে। সামনের বৈঠকখানায় বসে অপেক্ষা করতে লাগলেন।

কয়েক মিনিটের মধ্যেই পিছমোড়ায় ধরে বরকন্দাজরা নিয়ে এল ছেলেটিকে। হেমকান্ত লক্ষ্য করলেন, ছেলেটা ল্যাংচাচ্ছে।

হেমকান্ত নিষ্ঠুরতা পছন্দ করেন না। কিন্তু এই ছেলেটার বেয়াদবিও সহ্য করার মতো নয়। অন্দরমহলের দেয়ালে উঠবে বাইরের লোক, এ কেমন কথা? ওখানে মেয়েরা স্নান করে, বেড়ায়।

হেমকান্ত গম্ভীর গলায় জিজ্ঞেস করলেন, তুমি কে?

ছেলেটা খুবই ঘাবড়ে গেছে। শুকনো ঠোঁট জিভ দিয়ে চেটে বলল, আমার অনায়া হয়ে গেছে। ওটা যে ভিতরের মহল তা বুঝতে পারিনি।

কথাটা সত্যি হতেও পারে। হেমকান্ত বললেন, তোমার নাম কি? কোথা থেকে আসছো?

আমার নাম শশীভূষণ গঙ্গোপাধ্যায়। বাড়ি বরিশাল জেলা।

এখানে কী করতে এসেছো?

চাকরি খুঁজতে।

দেয়ালে উঠে কী করছিলে?

ছেলেটা ঠোঁট কামড়ে একটু যেন ভেবে নিয়ে বলল, আমি গত দুদিন ওই আমবাগানটায় আছি।

হেমকান্ত অবাক হয়ে বলেন, আমবাগানে আছো মানে?

কোথাও থাকার জায়গা পাচ্ছিলাম না, তাই আমবাগানে ছিলাম।

এই শীতে?

আজ্ঞে হ্যাঁ। খুব কষ্ট হচ্ছিল।

তাহলে সরাসরি এসে কাছারিবাড়িতে বলানি কেন? এ বাড়িতে বা যে কোন বাড়িতে গেলে একটা আশ্রয় জুটে যেত।

আমার উপায় ছিল না।

কেন ?

শশীভূষণ ঘাবড়ে গেছে বটে, কিন্তু ভেঙে পড়েনি। হেমকান্তর চোখের দিকে চেয়ে বলল, সেটা খুব নিরাপদ হত না। আপনার লোকেরা একটু তফাৎ হলে সব কথা বলতে পারি।

হেমকান্ত বিরক্ত হলেন। তবু চোখের ইশারায় সবাইকে সরে যেতে বললে সবাই সরে গেল। এবার বলো।

আমি দুদিন ধরে কিছু খাইনি। পুলিশের তাড়া খেয়ে এখানে এসে পড়েছি।

কেন, পুলিশ তোমাকে তাড়া করেছে কেন ?

তাদের সন্দেহ আমি স্বদেশী করি।

কুণ্ঠিত ভূ সটান হল হেমকান্তর। একটু হাসলেন। আগেই তাঁর অনুমান করা উচিত ছিল ব্যাপারটা।

হেমকান্ত বললেন, তাই বলো।

শশীভূষণ ক্ষীণ একটু হেসে বলল, আমবাগানে বড্ড মশা। আমি ওখানে আর থাকতে পারছি না।

হেমকান্তর হঠাৎ সচ্চিদানন্দের চিঠিটার কথা মনে হল। দেশ কাল পরিস্থিতি নিয়ে ভাবিত হতে তাঁকে বলেছে সচ্চিদানন্দ। তা দেশকালের তো এই অবস্থা। এইটুকু ছেলে লেখাপড়া ছেড়ে, বাড়িঘর ফেলে স্বদেশী করে বেড়াচ্ছে। হয় গুলিটুলি খেয়ে মরবে, নয় তো জেলে পচবে।

হেমকান্ত বললেন, দেয়ালে উঠে কী দেখছিলেন ?

দেখাচোখাম এদিকে কোনো পোড়ো ঘরটির আছে কিনা।

অন্য কোনো মতলব ছিল না তো ?

শশীভূষণ মাথা নেড়ে বলল, না। অন্য মতলব কী থাকবে ? চুরি ?

ধরো তাই।

খাবার পেলে চুরি করতাম। তাছাড়া আর কিছু চুরির মতলব ছিল না।

তোমার বাবা কী করেন ?

মাস্টারী। সামান্য মাইনে।

সে জানি। মাস্টারির মাইনে আর আমাকে শেখাতে হবে না। তুমি কতদূর লেখাপড়া করেছে ?

বি এ পড়ছিলাম।

এখন পড়ছো না ?

না। কলেজ ছেড়ে দিয়েছি।

মা-বাপের প্রতি কর্তব্য নেই ?

আছে।

সেটা আগে না করেই দেশসেবায় বেরিয়ে পড়েছো ?

দেশসেবা তো নয়। পুলিশের সন্দেহ যে, আমি স্বদেশী। বরিশালে একজন পাত্রী খুন নিয়ে আমাদের বাড়িতে সার্চ হয়। বাবাই আমাকে পালিয়ে যেতে বলেন।

পাত্রীকে কারা খুন করেছে ?

জানি না। তবে লোকটা পাত্রী নয়। পুলিশের স্পাই।

সে যাই হোক, তোমাকে আশ্রয় দেওয়া বিপজ্জনক।

তা আমি জানি। আমি দুদিন কিছুই খাইনি।

দুদিন ? বলে হেমকান্ত অবাক হয়ে চেয়ে রইলেন।

খাওয়ার পয়সারও নেই। বেরোতেও ভয় করছিল। আমাকে যদি কিছু খাবার দেন তাহলে আবার রওনা হয়ে যেতে পারি।



কোথায় যাবে ?

ঢাকা । সেখানে আমার পিসির বাড়ি ।

গাড়িভাড়া আছে ?

না । তবে এতটা আসতে পেরেছি, বাকিটাও চলে যেতে পারব ।

আর যদি ধরা পড়ে ?

পড়ব না ।

সচ্চিদানন্দের দেশ কাল পরিস্থিতিই কি শশীভূষণের রূপ ধরে এসে হাজির হল ?

হেমকান্ত একটা দীর্ঘশ্বাস ছেড়ে হরিকে ডেকে বললেন, একে কিছু খেতে দে । তারপর গারবাড়ির নলিনীর ঘরটায় নিয়ে যা ।

শশীভূষণ হঠাৎ আতঙ্কিত হয়ে বলে, আমি ঘরেটরে যাবো না ।

হেমকান্ত মৃদুস্বরে বললেন, ভয় নেই, ধরিয়ে দেবো না । একটু বিশ্রাম নাও । তারপর চলে য়েয়ো ।

॥ ৮ ॥

ফাষ্ট ক্লাস কুপে কামরায় হানিমুনটা শুরু থেকেই জমে যাওয়ার কথা । একদিকে তরতাজা একটা ছেলে, অন্যদিকে টগবগে একটা মেয়ে । কিন্তু জমল না । গাড়ি শেয়ালদা ছাড়তে না ছাড়তেই ধুব তার স্যুটকেসে জামাকাপড়ের তলায় সযত্নে শোয়ানো বোতলটি বের করে বসে গেল এবং খুব নিবিষ্টমনে প্রায় একনাগাড়ে মদ খেয়ে যেতে লাগল । ফলে খাওয়ার জলের বোতলটা বর্ধমান যেতে না যেতেই শেষ ।

রেমি ধুবর দিকে তাকাচ্ছিল না । জানালার ধারে আড়ষ্টভাবে বসে বাইরের চলন্ত প্রকৃতি দেখার চেষ্টা করছিল । এ কার সঙ্গে বিয়ে হল তার ? একজন নেতা এবং বড়লোকের ছেলে, এই পরিচয় দেখেই কি বাবা ধুবর সঙ্গে বিয়ে দিল তার ? আর কোনো খোঁজখবর করল না ? ধুব সুপুরুষ সন্দেহ নেই । রেমি এও জানে, খাওয়া-পরা বা বিলাস-ব্যসনের কোনো অভাব তার হবে না । কিন্তু সেইটেই তো সব নয় । এ লোকটা বিয়ের দিন থেকেই গণ্ডগোল করে যাচ্ছে যে ! বিয়ের দিন যখন সাজগোজ করানো হচ্ছে রেমিকে, সেই সময় একবার খবর এল ধুবকে বাড়িতে পাওয়া যাচ্ছে না । দুটো মিনিবাস ভর্তি রক্ষ ও উগ্র চেহারার বরযাত্রীরা এসে বাড়ি গরম করে ফেলেছে তখন । তাদের অনেকেই ভারী ভারী সোনার গয়না দিয়ে আশীর্বাদও করে গেল তাকে । অন্তত বিশ-ত্রিশ ভরি সোনা রোজগার করে ফেলল রেমি । কিন্তু বরের গাড়ি আসেনি, বর আনতে গিয়েছিল দাদা । সেই টেলিফোন করে জানাল, ধুব বাড়িতে নেই । কৃষ্ণকান্তবাবু খুব রাগারাগি করছেন । এমন কি পুলিশকে পর্যন্ত কাজে লাগানো হয়েছে ।

রেমির কানে খবরটা হয়তো এসে পৌছতো না । কিন্তু সঙ্কের লগ্ন পেরিয়ে যাওয়ায় ফিসফাস গুজগুজ শুরু হয়ে গিয়েছিল । বাঙালরা একটু উচ্চস্বর হয়েই থাকে, বড় একটা ঢাকঢাক গুড় গুড় নেই । তাদের মধ্যে একজন বেশ চঁচিয়েই বলছিল, দেখ কোথায় গিয়ে মাল খেয়ে গড়াগড়ি যাচ্ছে । ওর কি কোনো কাণ্ডজ্ঞান আছে ! কৃষ্ণদা যে কেন এটার বিয়ে দিচ্ছেন তাই বোঝা যাচ্ছে না ।

বাঙাল বাড়িতে বিয়ে নিয়ে রেমির আত্মীয়স্বজনের মধ্যে দ্বিধা এবং ভয় ছিলই । বাঙালদের রীতিনীতি আলাদা, আচার-ব্যবহার আলাদা, রেমিদের বাড়িতে আর কেউ বাঙাল বিয়ে করেও নি । তাই বাঙাল ছেলের সঙ্গে বিয়ের ব্যাপারে অনেকে আপত্তি তুলেছিল । কিন্তু বাবার উপায় ছিল না কৃষ্ণকান্তবাবুর কাছে অনেক ব্যাপারেই তার টিকি বাঁধা । তিনি নিজের ছেলের জন্য রেমিকে পছন্দ

করায় বাবা আর অপত্তি করতে পারেনি । কিন্তু বর বোপান্তা হওয়ায় সকলেই ঘাবড়ে গেছে । বরযাত্রীদের মন্তব্য বর সম্পর্কে তাদের আরো ভীত করে তুলল ।

তবে কৃষ্ণকান্ত অতি ক্ষমতাবান লোক । সারা কলকাতা এবং গোটা রাজ্য জুড়ে তাঁর অজস্র কৰ্মিকা । বাড়িতে বসে শুধু টেলিফোন করে কৃষ্ণকান্ত তার কৰ্মিকাগুলিকে সক্রিয় করে তুললেন । দলীয় কৰ্মী, পুলিশ, চামচা, ভক্ত, আত্মীয়স্বজন, আড়কাঠি, বন্ধুবান্ধব সকলেই সজাগ হয়ে উঠল ।

পরের লম্বা রাত এগারোটার কাছাকাছি । তার অন্তত আড়াই ঘণ্টা আগে নৈহাটি স্টেশনের কাছে রুটি এবং মাংস ভক্ষণরত ধুবকে প্রায় ঐটো হাতেই তুলে আনা হল । শোনা যায় সেই শুভদিনে ছেলেকে ধরে আনার পর কৃষ্ণকান্ত নিজের হাতে তাকে চটিপেটা করেন । তবে তাঁর প্রধান অভিযোগ ছিল, উপোস ভেঙে সে বিয়ের দিন রুটি মাংস খেয়েছিল কেন ।

ধুব যখন বিয়ের পিড়িতে এসে বসল তখন তার মুখ গভীর এবং থমথমে । একটা মন্তব্য সে উচ্চারণ করেনি বিয়ের সময় । শুভদৃষ্টির সময় কনের মুখের দিকে তাকায়নি । শুধু পাথরের মতো চূপচাপ বসে ছিল । রেমি তখনই জানত বাবা তাকে হাত-পা বেঁধে জলে ফেলে দিয়েছে । এটা বিয়েই নয় । এই লোকটা হয় পাগল, নয় বদমাশ । সারা জীবন একে স্বামী হিসেবে কল্পনা করাও তার পক্ষে কষ্টকর হবে ।

ফুলশয্যার রাত্রে ঘরে এসেই একটা আলমারি খুলে মদের সরঞ্জাম বের করে বসে গেল ধুব । তাকে বলল, খাওয়ার ঘরের ফ্রিজ থেকে বরফের ট্রেটা নিয়ে এসো তো ।

অবাক রেমি বলল, তুমি আজ মদ খাবে ?

খেলে কী ? রোজ তো খাই, আজ নয় কেন ?

আজকের দিনেও খায় কেউ ?

মুখটায় রাজ্যের বিরক্তি ফুটিয়ে ধুব বলল, প্যান প্যান কোরো না । নিজে না পারো তো একটা চাকরবাকর কাউকে বলো । এনে দেবে ।

আমি পারব না ।

ধুব একটু স্থির দৃষ্টিতে তাকিয়ে রইল রেমির দিকে । তবে বাড়িবাড়ি করল না । কিছুক্ষণ তাকিয়ে থেকে চোখ নামিয়ে নিয়ে বলল, তুমি বেশ সুন্দরী । তবে তোমাকে কিন্তু আমি নিজে পছন্দ করে আনিনি । সুতরাং আমার বেশী দায়দায়িত্বও নেই ।

রেমি একটু দাপটের সঙ্গেই বলল, তোমার দায়দায়িত্বের বোধ কেমন তা আমি জানি । আমাকে আর বোঝাতে হবে না ।

ধুব এই কথায় অনেকক্ষণ চূপ করে বসে রইল । বেল আর জুঁই ফুলে সাজানো ঘর মাতাল হয়ে উঠছিল গন্ধে । দামী সেন্ট ছড়ানো বিছানা অপেক্ষা করছিল তাদের জন্য । চালু ছিল শব্দহীন এয়ারকুলার । সেই অদ্ভুত মাদকতাময় ঘরে একা খাটের ওপর পা তুলে শিকারী বেড়ালের মতো তীব্র চোখে রেমি লক্ষ্য করছিল ধুবকে । এই লোকটা কোনোদিন তাকে ছোঁবে বা আদর সোহাগ করবে ভাবতেও গা ঘিন্‌ঘিন করছিল তার ।

অনেকক্ষণ চূপ করে অনড় হয়ে বসে রইল ধুব । তারপর একসময়ে চেয়ারটা রেমির দিকে ঘুরিয়ে বসল ।

রেমি দেখল ধুবের মুখে রাগ নেই, বিদ্বেষ বা ঘৃণাও নেই । এক ধরনের তীব্র ও গভীর বিষণ্ণতা আছে ।

ধুব ধীর স্বরে বলল, তোমার নাম তো রেমি !

রেমি সামান্য বিদ্রূপ করে বলল, না, আমার নাম বঙ্গবাসিনী ।

ধুব তার দিকে চেয়ে একটু হাসল । বলল, নামটা আমার জানা উচিত, তাই না ?

তুমি কি উচিত অনুচিত মানো ?

ধুব রাগল না। ধীর স্বরে বলল, ঠিক আমার মতো অবস্থায় না পড়লে তুমি কখনোই আমার সমস্যার কথা বুঝতে পারবে না রেমি। আমাকে ঘেন্না করা খুব সোজা। এই বাড়ির সকলেই আমাকে ঘেন্না করে। কারণ তাদের সেটা শেখানো হয়েছে।

কথাটা রেমি ভাল বুঝল না। তবে চুপ করে রইল।

ধুব নিজেই খানিকক্ষণ বিরতি দিয়ে বলে, আমার মা নেই, জানো?

রেমি বলল, তোমার মা নেই তাতে কী হল? অনেকেরই থাকে না।

ঠিক কথা। কিন্তু আমার মায়ের এখনো বেঁচে থাকার কথা ছিল। মা গায়ে আঙুন লাগিয়ে মারা যায়। আমি তখন ছোটো, বছর দশেক বয়স হবে হয়তো। পদ্মপুকুরের বাড়িতে থাকতাম তখন। বাথরুমে ঢুকে মা গায়ে কেরোসিন ঢেলে আঙুন দেয়। গোটাটা পুড়ে গেল, অথচ মা একটাও শব্দ করেনি। হান্ড্রেড পারসেন্ট বারনিং, হাসপাতালে তিন দিন বেঁচে থেকে মারা যায়। সেই মৃত্যুটা যতদিন মনে থাকবে ততদিন তোমার স্বপ্নের সঙ্গে আমার লড়াই শেষ হবে না।

রেমি বুঝতে পারছিল না। বলল, কিসের লড়াই?

লড়াইটা বহুমুখী, কারণ বহু কিছুর জন্যই ওই লোকটা দায়ী। লোকটা বর্বর, নির্বোধ, ক্ষমতালোভী, নিষ্ঠুর, অহংকারী। জানো এসব?

না। মাথা নাড়ল রেমি।

ধীরে ধীরে জানবে। তবে লোকটার গুণও অনেক। সমস্তরকমের বিরুদ্ধতাকেই জয় করতে পারে, সমস্ত প্রতিকূলতাকেই নিজের অনুকূলে ঘুরিয়ে নিতে পারে। ব্রিটিশ আমলে এ লোকটা বিস্তার সাফার করেছে, লাঠি গুলি ফাঁসির দড়িকে ভয় খায়নি। তাই লোকটাকে উড়িয়ে দেওয়া যায় না। সবচেয়ে বড় কথা কী জানো? সবচেয়ে বিস্ময়কর কথা? এই লোকটা নিজের দেশ এবং দেশের মানুষকে বাস্তবিকই ভালবাসে।

রেমি এই স্বপ্নপ্রসঙ্গ খুব উপভোগ করছিল না। ছেলের মুখে বাপের নিন্দে এমনিতেও সুস্বাদু নয়। সে বলল, আমার মাথা ধরেছে। আমি একটু শুচ্ছি।

ধুব উদাস স্বরে বলল, এ বাড়িতে যে ঘেন্নার বীজাণু ঘুরে বেড়াচ্ছে তোমাকেও তা আটক করেছে, বুঝলে? সেটাই অবশ্য স্বাভাবিক। এনি ওয়ে, তুমি শুয়ে পড়ো। আমার বোধহয় আজ রাতে আর ঘুম আসবে না।

রেমি শুয়ে পড়ল এবং একসময়ে ঘুমও এল। খুব সকালবেলা তুমুল চেষ্টামেচিতে ঘুম ভাঙল তার। বাইরের প্যাসেজে ধুব চৈতন্যে বাড়ি মাথায় তুলছিল, কোনো শালার রাইট নেই আমাকে আটকে রাখার। ছাড়ো আমাকে, ছাড়ো! নইলে আমি গুলি করে উড়িয়ে দেবো সবাইকে, সুইসাইড করব...

রেমি বৃকে ধড়ফড়ানি নিয়ে দৌড়ে দরজায় গিয়ে দেখল, চার পাঁচজন ষণ্ডামার্কী লোক চেপে ধরে আছে ধুবকে। ধুব রক্তচক্ষুতে চেয়ে চেষ্টাচ্ছে। কিন্তু নড়তে পারছে না।

কৃষ্ণকান্ত সিঁড়ি বেয়ে নেমে এলেন। টকটকে গৌরবর্ণ সুপুরুষ। দীর্ঘকাঁয় এবং মজবুত গড়ন। এসে ছেলের সামনে দাঁড়ালেন। মুখে কথা নেই।

কিন্তু জোঁকের মুখে যেন নুন পড়ল। সপ্তম স্বর টিটি করতে লাগল ধুবর। সে বলল, দেখুন, আপনার লোকেরা আমাকে ধরে রেখেছে।

কৃষ্ণকান্ত গমগমে গলায় বললেন, ওদের ওপর সেরকমই হুকুম আছে।

কেন, আমি কী করেছি?

কৃষ্ণকান্ত বললেন, ওদের ওপর হুকুম আছে, তুমি বাড়ি থেকে পালানোর চেষ্টা করলে তোমাকে যেন ধরে আনা হয়।

আমি পালানোর চেষ্টা করিনি।

তবে কী করেছিলে ?

মাথা ধরেছে বলে একটু বাইরে যাচ্ছিলাম । হাওয়ায় ।

কৃষ্ণকান্ত মাথা নেড়ে বললেন, আজকের দিনটা শুধু বেরিও না । চেষ্টা করলেও বেরোতে পারবে না । তবে কাল যেখানে খুশি যেও । কেউ বাধা দেবে না ।

এই বলে কৃষ্ণকান্ত আবার ওপরে চলে গেলেন ।

রেমির বুকের ধড়ফড় অনেকক্ষণ ছিল । লোকগুলো ধুবকে আবার ঠেলে ঘরে ঢুকিয়ে দিয়ে গেল ।

রেমি জিঞ্জেরস করল, কোথায় যাচ্ছিলে ?

ধুবর মুখচোখ রাগে লাল । ঘনঘন শ্বাস ফেলছিল । চাপা গর্জন করে বলল, যেখানে খুশি যাচ্ছিলাম, তাতে তোমার বাবার কী ?

রেমি দাঁতে দাঁত পিষে বলল, আমার বাবার কিছু নয়, তবে তোমার বাবার তো দেখলাম বেশ মাথাবাথা ।

ধুব চেয়ারে বসে বোতল তুলে নিল । রেমি অবাক হয়ে দেখল, বোতলটা সারা রাত খোলেনি ধুব । অর্থাৎ ফুলশয্যার রাতটা ধুব বাস্তবিকই মদ খায়নি । তবে ভোরবেলা সেই অপমানের পর খেল ।

পরদিনই পাহারা তুলে নিলেন কৃষ্ণকান্ত । কিন্তু আশ্চর্যের বিষয়, ধুব আর পালানোর চেষ্টা করল না । খুব শান্ত হয়ে রইল ক'দিন । বেশী বেরোতও না বাড়ি থেকে ।

রেমির সঙ্গে অবশ্য ধুবর দেখা হত খুবই কম । পারিবারিক নিয়ম অনুযায়ী দিনের বেলা স্বামীর সঙ্গে দেখা করার উপায় ছিল না । দেখা হত রাত্রিবেলা । সেই কয়েকদিন ধুব খুব শান্ত রইল বটে, কিন্তু সেই সঙ্গে কেমন একরকম উদাসীন দূর্বৃত্ত বজায় রাখত । কথা বলত না একদম । দাড়ি কামাত না বলে গালে কোমল দাড়ি গজিয়ে ভারী সুন্দর দেখাত ওকে । আলাদা একটা ছোটো খাটে শুয়ে থাকত ।

খুবই কচি এবং কাঁচা বয়স ছিল তাদের । সেই সময়ে তো দুজনের ভিতরেই তীব্র চৌম্বক আকর্ষণ থাকার কথা । ধুবর প্রতি বিদ্রোহ ও স্ফোভ রেমিকে প্রথম ক'দিন উদ্ভ্রান্ত রাখলেও একদিন অন্যরকম ঘটল ।

সেদিন একটু রাত করেই ঘরে এসেছিল রেমি । ধুব একটু কাৎ হয়ে শুয়ে আছে । ঘুমন্ত । লম্বা চুলওলা মাথাটা একটু গড়িয়ে গেছে বালিশ থেকে । লাল টুকটুক করছে ঠোঁট । বিশাল চোখের নীচে ক্লান্তির কালো ছোপ । গায়ে একটা ফর্সা পাঞ্জাবি, সোনার বোতামগুলো ঝকঝক করছে । ফর্সা বুকে কিছু রোম দেখা যাচ্ছিল । একটা তাবিজ ঝুলে আছে গলা থেকে ।

বড় মায়া হল রেমির । মাথাটা তুলে দিল বালিশে । এ লোকটাকে তার ভালবাসতে ইচ্ছে করে । কিন্তু লোকটা যেন কেমনধারা । কিছুতেই কারো ভালবাসা নিতে হাত বাড়ায় না । বিদ্রোহী ? কিন্তু সেই বিদ্রোহের রকমটা এরকম বিদঘুটে কেন ?

কয়েক মুহূর্তের বিভ্রম । রেমি ধুবর মাথার চুলে একটু হাত বুলিয়ে দিল । তারপর তার পাশেই একটু জায়গা করে নিয়ে শুয়ে পড়ল । ডাকল, এই, ঘুমোলে ? শোনো, আমার একা শুতে বুকি ভয় করে না ?

ধুব বাস্তবিকই ঘুমিয়ে পড়েছিল । চোখ খুলে তাকে দেখে একটু অপ্রস্তুত হল । তবে রাগ করল না, বিরক্তও হল না । বরং ঠাট্টা করে বলল, তুমি কোন শিবিরের লোক তা জানো তো ? জানি ।

তোমাকে আমি তাই বিশ্বাস করি না ।

নাই বা করলে ।

আমাকে শোধরানোর জন্যই বাবা তোমাকে বউ করে এনেছে। কিন্তু আমি এত সহজে শোধরাবো না রেমি।

তুমি কি খুব খারাপ ?

আমি খুব খারাপ হতে চাই।

এখন একটু খারাপ হও না ব্রহ্মচারী, দেখি।

খুব কাছ থেকে ধ্রুবর মুখখানা দেখে সম্মোহিত হয়ে গেল রেমি, কী সুন্দর ! তার মেয়েলী অহংকার ভেসে গেল, উবে গেল অভিমান রাগ বা ঘৃণা। শরীর ও হৃদয় জুড়ে বেজে যাচ্ছিল এক নামামা। এই সেই রণবাদা যা অবশ্যাস্তাবী করে তোলে দুই বিপরীত শরীরের সংঘর্ষ ও সংঘাত। একটি দুটি রাত্রি কাটল শরীরের উন্মত্ততায়।

কিন্তু এই বাড়ির ভিতরে ভিতরে যে বিভেদ, বিদ্বেষ ও অবিশ্বাস জমেছে বহুদিন ধরে, তা ছাড়বে কেন তাদের ?

বিয়ের একমাস পরেই ইলেকশন। কৃষ্ণকান্ত বিধানসভার নমিনেশন পেয়েছেন, বাড়িতে প্রচুর লোকের আনাগোনা এবং ভীষণ ব্যস্ততা দেখা দিল। রান্নাঘরে বিশাল উনুন জ্বলে সারাদিন। দলের কর্মীরা অনেকেই এসে খায়। তা হচ্ছে প্রায় চব্বিশ ঘণ্টা। বাড়িটা প্রায় বারোয়ারি বাড়ি হয়ে উঠল।

একদিন সন্ধ্যাবেলা ধ্রুব একটা লোককে কলার ধরে হিড় হিড় করে টানতে টানতে ভিতরে নিয়ে এল। চৈচিয়ে কৃষ্ণকান্তের উদ্দেশে বলতে লাগল, দেখুন, আপনার লোকজনকে একটু দেখে যান।

কৃষ্ণকান্ত দলের লোকজনকে নিয়ে ওপরতলায় জরুরী মিটিং করছিলেন। মিটিং অবশ্য সারাদিন লেগেই থাকত। বিরক্ত মুখে কৃষ্ণকান্ত গাড়িবারান্দার ছাদে এসে দাঁড়ালেন। বললেন, কী হয়েছে ? চৈচাচ্ছে কেন ?

ধ্রুব বলল, এই লোকটাকে চেনেন তো ! এ হচ্ছে আপনার একজন ক্যামপেনার। রঘুবীর দাশশর্মা।

চিনব না কেন ? ও কী করেছে ?

একটু আগে হাজরা পার্কের উল্টোদিকে গলিতে এ দুটো ছেলেকে মেরেছে। তারা দেয়ালে লিখছিল। সেই দেয়াল নাকি আপনার। শুধু এই কারণে দলবল নিয়ে এ গিয়ে ওদের তাড়া করে। গলিতে নিয়ে গিয়ে পেটে ছোরা মেরেছে। তারপর এসে ফুটপাথে বেঞ্চ পেতে বসে বিড়ি ফুকছে।

কৃষ্ণকান্ত গমগমে গলায় বললেন, চৈচিও না, ছেড়ে দাও ওকে, আমি দেখছি।

কী দেখবেন ?

সে আমি বুঝব।

আপনি বুঝবেন কেন ? এ লোকটাকে পুলিশের হাতে দেওয়া উচিত।

কৃষ্ণকান্ত ধমক দিয়ে বললেন, ধ্রুব ! ওকে ছেড়ে দাও। পুলিশে দেওয়ার দরকার হলে আমিই দেবো। তুমি তোমার কাজে যাও।

সেটা তো আইন নয়।

আইন তোমার চেয়ে আমি ভাল জানি।

জানেন, কিন্তু মানেন না।

কৃষ্ণকান্ত একটু বিপদে পড়লেন। কারণ দলের লোকজন সব উঠে গাড়িবারান্দার ওপরে ভীড় করে পিতা-পুত্রের নাটক দেখছে। নীচে এবং ফটকের বাইরেও লোক জমা হচ্ছে।

কৃষ্ণকান্ত মরীয়া হয়েই বললেন, ও যে মেরেছে তার কোনো সাক্ষী আছে ?

আমিই সাক্ষী।

তুমি একা ?

তাছাড়া আর কে সাক্ষী দেবে ?

তুমি ঠিক দেখেছো ?

নিশ্চয়ই। আপনি থানায় টেলিফোন করুন। আমি সাক্ষী দেব।

রঘুবীর দাশশর্মা চূপচাপ দাঁড়িয়ে ছিল। একটু হাসছিলও মাঝে মাঝে। সে জানে ধুব একটু পাগলা গোছের। সে এও জানে কৃষ্ণকান্ত চৌধুরী যে কোনো বিপদ থেকে তাকে উদ্ধার করবেনই।

কৃষ্ণকান্ত বললেন, আমি থানায় ফোন করছি। রঘুবীরকে ওপরে আসতে বলা।

ব্যাপারটা এইখানেই মিটে গেল অবশ্য। ঘটনাক্ষণের মধ্যেই পুলিশ এসে রঘুবীরকে ধরে নিয়ে যায় এবং তার পরদিনই রঘুবীর ছাড়া পেয়ে অন্য এলাকায় কৃষ্ণকান্তর হয়ে খাটতে থাকে।

কৃষ্ণকান্ত তখন একদিন রেমিকে ডেকে বললেন, বাস্‌প্যাঁটারা গুছিয়ে নিয়ে দাম্‌ড়টাকে সঙ্গে করে কদিন দার্জিলিং বেরিয়ে এসো তো মা। রিজার্ভেশন হয়ে গেছে।

সেই তারা হানিমুনে চলল। রক্ষণশীল পরিবারের পক্ষে দারুণ আধুনিক ব্যাপার।

মধুচন্দ্রিমা না নিমচন্দ্রিমা তা কে বলবে ? ধুব সেই আগের মতোই অস্বাভাবিক। কিছুতেই রেমিকে চিনতে চায় না। তাকায় না, কথা বলে না। দিনরাত একনাগাড়ে মদ খেয়ে যাচ্ছে।

ইলেকশনের সময়ে তাকে কেন সরিয়ে দেওয়া হচ্ছে তা কি বোঝেনি ধুব ? ঠিকই বুঝেছিল। আর রেমি বুঝতে পারছিল মাত্র কয়েকদিনের শারীরিক প্রেম ধুবর ফুরিয়ে গেছে। শরীর আর কতদিন শরীরের বাঁধনে বাঁধা থাকতে পারে। যেখানে স্বামী-স্ত্রীর সম্পর্কের মধ্যে যৌনতাই প্রধান সেখানে সম্পর্ক বাতাসের ভর সয় না।

বর্ধমানে ধুব রেমিকে বলল, যাও না, প্ল্যাটফর্মের কল থেকে জলের বোতলটা ভরে আনো।

আমি ? রেমি অবাক হয়ে বলল, আমাকে জল আনতে বলছো ?

কেন, তুমি আনলে কী হয় ?

মেয়েরা কখনো এসব করে ? যদি গাড়ি ছেড়ে দেয় আমি তো দৌড়ে এসে চলন্ত ট্রেনে উঠতেও পারব না।

চেষ্টা করলে সব পারা যায়। পারবে।

তুমি পারো গিয়ে। আমি তোমার মদ খাওয়ার জন্য জল আনতে পারব না।

তাহলে আমি বাথরুমের জলই মিশিয়ে খাবো।

তা খেতে পারো।

খাবো ? তুমি আমাকে খেতে দেবে ? জানো, গাড়ির জলে এক লক্ষ রকমের জীবাণু আছে ?

তা আমি কী করব ? তোমাকে তো আমি মদ খেতে বলিনি।

মাইরি, যাও না।

বলেছি তো পারব না।

ঠিক আছে, তাহলে আমিই নামছি। যদি গাড়িতে উঠতে না পারি তাহলে তুমি একাই দার্জিলিং যেও।

এই বলে ধুব নিজেই উঠল এবং জলের বোতল নিয়ে নেমে গেল। সেটা গ্রীষ্মকাল। প্ল্যাটফর্মের কলে দারুণ ভীড়। রেমি দেখল, ধুব সেই ভীড়ের মধ্যে ঠেলাঠেলি করে ঢুকে পড়ল। কিন্তু তারপর আর তাকে দেখা যাচ্ছিল না।

জল নিয়ে যাত্রীরা ছুড়োছুড়ি করে ফিরে আসছে। কল প্রায় ফাঁকা হয়ে গেল। কিন্তু ধুবকে আর দেখতে পেল না রেমি। গার্ডের ছইশিল বাজল। একসময়ে গাড়ি নড়েও উঠল।

কিন্তু ধুব ?

আতকে জানালা দিয়ে রেমি তারস্বরে চৈঁচাতে লাগল, এই তুমি কোথায় ? ওগো, তুমি এসো

শীগগির ! গাড়ি ছেড়ে দিল যে !

কিন্তু কোথায় ধুব ? বর্ধমান প্ল্যাটফর্ম ধীরে ধীরে সরে যাচ্ছে পিছন দিকে ।

মরীয়া রেমি গাড়ির অ্যালার্ম চেন ধরে বুলে পড়ল । গাড়ি থামতেই সে নেমে পড়ল আগুন-গরম প্ল্যাটফর্মে । তারপর ছুটতে লাগল পিছন দিকে ।

ধুবকে অবশ্য পাওয়া গেল সহজেই । খুব নিবিষ্টমনে হুইলারের দোকানে দাঁড়িয়ে একটা ম্যাগাজিনের পাতা ওন্টাচ্ছিল । রেমি গিয়ে তার হাত ধরতেই সে একটুও লজ্জিত না হয়ে একটা হাই তুলে বলল, প্রেমের চেয়ে তাহলে সিকিউরিটিই বড় ! কী বলো ?

১৯১

তখন সঙ্কের কুয়াশামাখা অঙ্ককার ধীরে ধীরে গড়িয়ে আসছে চারদিক থেকে । জন-স্থল-অন্তরীক্ষের সব বাস্তবতা হারিয়ে যাচ্ছে এক রহস্যময় কুহেলিকায় । ব্রহ্মপুত্রের বুক থেকে আঁশটে গন্ধ বয়ে নিয়ে হু-হু করে উত্তরে হাওয়া এল । কাছেপিঠে ডেকে উঠল একশ শেয়াল ।

বিকেল থেকেই শশিভূষণ টের পাচ্ছিল, জ্বর আসবে । কিন্তু পরের বাড়িতে অচেনা লোকজনের কাছে সে কথটা বলতে পারেনি । একটা ঘর আর একটা বিছানা পেয়ে সে বর্তে গিয়েছিল । শেষ বেলায় এক পেট খেয়ে অঘোরে লেপমুড়ি দিয়ে ঘুমোচ্ছিল । ঘুম ভাঙল মাথার ব্যথা আর শরীরের কম্প । কাউকে ডাকবে কিনা বুঝতে পারছিল না সে । এরা রাজা জমিদার মানুষ । এসব লোক কেমন হয় তা তার ভাল জানা নেই । আশ্রয়টুকু দিয়েছে সেই ঢের । এরপর আবার অসুখ-বিসুখের কথা শুনলে হয়তো বিরক্ত হবে । শশিভূষণের অবশ্য জ্বরের সঙ্গে চেনাজানা বহু দিনের । এ হল ম্যালেরিয়া । খুব বেশীক্ষণ থাকে না । কিন্তু যতক্ষণ থাকে ততক্ষণ অস্তিত্বকে নাড়িয়ে দিয়ে যায় । ঘরে কেউ আলো জ্বেলে দিয়ে যায়নি । অবশ্য আলোর ব্যবস্থা আছে । জ্বেলে নিলেই হয় । কিন্তু শশিভূষণ ভয়ে আলো জ্বালল না । ঘরে যে লোক আছে সেটা পাঁচজনকে জানান দেওয়ার কী দরকার ?

লেপমুড়ি দিয়ে শশিভূষণ ঠকঠক করে কাঁপতে লাগল । তারপর ধীরে ধীরে লুপ্ত হয়ে যেতে লাগল চেতনা । চোখের তারা উন্টে গেল । কিছুক্ষণ ঘোরের মধ্যে সে ওয়ার্ডসওয়াথের কবিতা আর শেকসপীয়রের নাটক থেকে মুখস্থ বলতে লাগল । মাঝে মাঝে “ভূত ! ভূত !” বলে চুঁচিয়ে উঠতে লাগল ।

ঘরের দরজা ভিতর থেকে বন্ধ করে দিয়েছিল সে । উঠে সেটা আর খুলে দিতে পারেনি । জানালার একটা পাল্লা ভাঙা । তা দিয়ে ভয়ংকর ঠাণ্ডা হাওয়া আসছিল ঘরে । অঙ্ককারে একটা কি দুটো জোনাকি পোকা ঘুরে ঘুরে ওড়ে । গাছের ডালে রহস্যময় সব শব্দ হয় । শেয়াল ডাকে । জ্বরের ঘোরে এই সব আবহ এক বিচিত্র পরপারের ছবি রচনা করে শশিভূষণের চারপাশে ।

বিকেল পেরিয়ে সন্ধে নামার পরও কৃষ্ণকান্ত বারবাড়ির মাঠে একটা টাটু ঘোড়া চালাচ্ছিল । ঘোড়া চালাতে সে সদাই শিখেছে । রোমাঞ্চকর এই অভিজ্ঞতার প্রথম স্বাদ সে যতক্ষণ পারে উপভোগ করে নেয় । সারা বিকেল ঘোড়া চালিয়েও সে ক্লান্ত হয়নি । আরো অনেকক্ষণ চালাতে পারে । কিন্তু উপায় নেই । একটু বাদেই প্রতুল মাস্টারমশাই আসবেন হরি এসে তাকে ডেকে নিয়ে যাবে ।

তার এই ঘোড়া দাবড়ানোর দৃশ্যটা দেখছিল মাত্র একজন সে হল হর কমপাউণ্ডার । এই বিশ্ব সংসারে তার আপনজন আর কেউ অবশিষ্ট নেই । বছর দুই আগে কৃমি বিকারে তার মেয়েটা মরার পরই সব মায়ামোহের বাঁধন একদম কেটে গেল তার । কিন্তু সেই সঙ্গেই দেখা দিল মস্তিষ্ক বিকৃতির লক্ষণ । পাঁচ টাকা বেতনে সে জ্ঞানদা দাতব্য চিকিৎসালয়ে চাকরি করত । কৃষ্ণকান্ত তখন প্রায়ই

গিয়ে ডাক্তারখানার পেছন দিককার ওয়ুধের ঘরে বসে থাকত। অবাক হয়ে দেখত হর কমপাউণ্ডার কেমন ওয়ুধের সঙ্গে ওয়ুধ মেশায়, শিশির গায়ে নকশাকাটা কাগজের দাগ সাঁটে আঠা দিয়ে। মাঝে মাঝে মেজার গ্লাসে কৃষ্ণকান্তকে মিষ্টি ও সুগন্ধী সিরাপ খাওয়াত সে। বিস্তর ভূত-প্রেতের গল্প শোনাত।

মাথা খারাপের লক্ষণ দেখা দেওয়ায় হর কমপাউণ্ডারের চাকরিটি গেছে। কিন্তু হেমকান্ত তাকে তাড়িয়ে দেননি। হর কমপাউণ্ডারকে চাকরি দিয়েছিলেন তাঁর বাবা শ্যামকান্ত। বাপের আমলের পুরোনো ও বিশ্বাসী লোকটিকে তাই এখনও নিজের আশ্রয়ে রেখেছেন।

মায়ামোহ মানুষের জন্মগত অভিশাপ। সহজে কাটে না। আপন না পেলে পরকে আঁকড়ে ধরে। এমন কি বেড়ালটা, কুকুরটা, গাছটা পর্যন্ত মায়াবশে মানুষের আপন হয়। হর কমপাউণ্ডারেরও হয়েছে তাই। এ বাড়ির চৌহদ্দিতে তার একটা অদৃশ্য খোঁটা পোঁতা আছে। সেই খোঁটায় বাঁধা মায়ার দড়ি। কে যেন টানে। হর কমপাউণ্ডার তাই আর কোথাও যেতে পারেনি শেষ পর্যন্ত।

এই যে কৃষ্ণকান্ত, দশ-এগারো বছরের তেজী সুন্দর ছেলেটা, এ হল মনিবের ছেলে। জাতীয়তা নেই, অবস্থা বয়স ইত্যাদির ফারাকও যথেষ্ট। তবু এ ছেলেটাকে দেখলেই বুকটার মধ্যে কেমন উথলে-ওঠা ভাব হয় তার। ছেলেটার যা দেখে তাই তার ভাল লাগে। এই যে আবছায়া মতো আলায় সাদা টাটু ঘোড়ায় চেপে চারদিকে ঢেউ তুলে দাবড়ে বেড়াচ্ছে কৃষ্ণকান্ত, এই দৃশ্যটাকে তার পার্থিব কিছু বলে মনে হয় না। এ যেন এক স্বপ্ন-দৃশ্য। বিলিতি ছবির বইতে এরকম সব ছবি আছে। তা থেকেই যেন বেরিয়ে এসেছে ছেলেটা, আবার ছবির মধ্যে ফিরে যাবে।

কাছারির মাঠের চারধারে ঝুঁপু পাম গাছের মিছিল। তারই ফাঁকে ফাঁকে মাঝে মাঝে হারিয়ে যাচ্ছে কৃষ্ণকান্ত। ঘোড়ার খুরের শব্দ ধরিত্রীর হৃদস্পন্দনের মতো ধুকপুক ধুকপুক করে বেজে যাচ্ছে অবিরল।

মস্ত একটা চক্কর দিয়ে কৃষ্ণকান্ত ঘোড়া ছুটিয়ে কাছে আসে। আবার দূরে চলে যায়। হর কমপাউণ্ডার কাছারির সিঁড়ির শেষ ধাপটায় বসে একটা নসি়া রঙের আলোয়ানে সারা গা ঢেকে চূপচাপ দেখতে থাকে। তার মুখে একটু হাসি লেগে আছে সেই কখন থেকে।

পৃথিবী জায়গাটা ভাল না খারাপ তা আজকাল আর বুঝতে পারে না হরনাথ। তবে সে বোঝে যে, এখানে তার আর কোনো কাজ নেই। কাজ শুধু চেয়ে থাকা, শুধু বসে থাকা, শুধু বেঁচে থাকা। আর কিছু নয়।

কৃষ্ণকান্ত গল্প শুনতে বড় ভালবাসে। আগে তাকে অনেক গল্প শোনাত হরনাথ। আজকাল আর গল্প মনে পড়ে না। একটা গল্প শুরু করে অন্য গল্পে চলে যায়। মাথাটা ঠিক নেই কিনা। আজ তার বদরুদ্দিনের গল্পটা মনে পড়েছে। সবটা নয়, তবে কিছুটা। কৃষ্ণকান্ত ঘোড়া চালানো শেষ করে তার পাশটিতে এসে বসবে। তখন গল্পটা শোনাবে হরনাথ। তাই প্রাণপণে সে গল্পটা মাথার মধ্যে ধরে রাখার চেষ্টা করছে। আজকাল বেশীক্ষণ কিছুই সে মাথায় রাখতে পারে না।

বদরুদ্দিনের ঘোড়াটার বয়স হয়েছিল। তার ওপর চোখে ছানি পড়তে লাগল। বদরুদ্দিনও বৃড়ো মানুষ। চোখের নজর তারও তখন কমে এসেছে। তবু সওয়ারির জন্য কানা ঘোড়ায় ছ্যাকরা গাড়ি যুতে বদরুদ্দিন রোজ বেরোতো। তবে গণ্ডগোলও হত খুব। প্রথম প্রথম আন্দাজে রাস্তা ঠাহর করত। পরে ভুল রাস্তায় নিয়ে গিয়ে সওয়ারির ধমক খেত। বদরুদ্দিন রেগে গিয়ে চাবুক চালাত শপাশপ। কিন্তু ঘোড়াটাই বা কী করে! মার খেয়ে বেচারী চিহিঁ করে কঁদে উঠত শুধু। তারপর একদিন গাঙ্গিনার পাড়ে রাস্তা ছেড়ে ঘোড়াটা গিয়ে পড়ল একটা মাদার গাছের ওপর। গলায় ফাঁস লেগে ঘোড়াটা আর ঘাড় ভেঙে বদরুদ্দিন নিজেও সেইখানেই মরে গেল। তা বলে গল্পটা শেষ হল না কিন্তু। শরীর ছেড়ে উঠে দাঁড়াল বদরুদ্দিন। গা ঝাড়া দিয়ে উঠল তার ঘোড়াও।



দুজনেই তখন চোখে বেশ স্পষ্ট দেখতে পাচ্ছে। ভাঙা গাড়িটায় আবার ঘোড়া যুতে নিল বদরুদ্দিন। তারপর পংকিরাজের মতো উড়ে বেড়াতে লাগল শহরময়। মাঝরাতে না জেনে কেউ কেউ এখনো বদরুদ্দিনের ছাকরা গাড়ির সওয়ার হয়। আর রাস্তা ভুল হয় না।

বুড়ো সহিস লঠন হাতে এসে দাঁড়িয়ে আছে মাঠের মধ্যখানে। ঘোড়ার পায়ের শব্দ এগিয়ে আসছে।

ও ছোটোকর্তা, এবার নামো। ঘোড়ার মুখ দিয়ে ফেনা বেরোচ্ছে। আর না।

কৃষ্ণকান্ত ঘোড়া থামায়। হাঁফাতে হাঁফাতে এসে বসে হরনাথের পাশে। বলে, ওফ, দারুণ চালিয়েছি আজ। না, হরদা?

খুব।

দুজনেই চুপচাপ কিছুক্ষণ বসে থাকে। কুয়াশা এবং অন্ধকার ঘনিয়ে ওঠে। মন্দির থেকে শব্দধ্বনি আসে।

কৃষ্ণকান্তর সত্যিকারের কোনো অভিভাবক নেই। হেমকান্ত তার প্রতি নজর দেন না। কেউই দেয় না। মাঝে মাঝে রঙ্গময়ী একটু-আধটু ডাক খোঁজ করে মাত্র। কৃষ্ণকান্ত বেড়ে উঠছে নিজের মতো করেই। সময় মতো লেখাপড়া করা আর ইসকুলে যাওয়া ছাড়া বাদবাকি সময়টা সে কী করে বেড়ায় তার খোঁজ কেউ নেয় না। সুতরাং নানা সৃষ্টিছাড়া কাণ্ড করে সে। তিনতলার চোর কুঠুরিতে পুরোনো আমলের কিছু অস্ত্রশস্ত্র আছে। সেই ঘর থেকে একদিন একটা তরোয়াল বের করে এনেছিল কৃষ্ণকান্ত। সারাদিন খোলা তরোয়াল হাতে করে ঘুরে বেড়াল। কয়েকজন অবশ্য বারণ করেছিল, সে শোনেনি। বস্তৃত হেমকান্ত ছাড়া আর কারও কথা শোনে না সে। ফয়জলের গোটা দুই ছাগল আর ছানাপোনারা রোজই ঘাস খেতে আসে বারবাড়ির পশ্চিম দিককার গোচর ভূমিটায়। কখন যে কৃষ্ণকান্ত সেখানে হাজির হয়েছে তা কেউ জানে না। হঠাৎ তার আর্তনাদ শুনে লোকজন ছুটে গিয়ে দেখল ধারি ছাগলটার মুণ্ডু খসে পড়ে আছে মাটিতে, ধরটা ছটফট করছে, রক্তে ভেসে যাচ্ছে জায়গাটা। কৃষ্ণকান্ত রক্তমাখা তরোয়াল হাতে দৃশ্যটার দিকে সম্মোহিতের মতো চেয়ে থরথর করে কাঁপছে।

কৃষ্ণকান্ত চমৎকার সাঁতার কাটতে পারে। বিশেষ করে ডুবসাঁতার। একদিন তার ইচ্ছে হল, অশ্রমরমহলের দিকে যে অথৈ পুকুরটা আছে তার তলা থেকে মাটি খামচে আনবে। যেই কথা, সেই কাজ। একদিন ডুব দিল তো দিলই। আর ওঠে না। হরি বিপদ বুঝে লোকজন নিয়ে ঝাঁপিয়ে পড়ল জলে। যখন কৃষ্ণকান্তকে তোলা হল তখন মৃত্যুর ঘণ্টা প্রায় বেজে গেছে।

হেমকান্তর অন্যান্য ছেলেরা যেমন শান্ত ও সুশীল কৃষ্ণকান্ত তেমন নয়। ঘরের চেয়ে বাইরের আকর্ষণ তার ঢের বেশী। বাড়ির পিছন দিকে পগারের ওপারে হেমকান্তর কিছু প্রজা বাস করে। তারা গরীব ও অসংস্কৃত। কৃষ্ণকান্ত নিয়মিত সেই পাড়ায় যায়। সেখানে তার একদমল অনুচরও জুটে গেছে। কৃষ্ণকান্ত তাদের সঙ্গী করে মাঝে মাঝে মারপিট লাগায় অন্য পাড়ার ছেলেদের সঙ্গে। এর ওর তার বাড়ি থেকে ফুল বা ফল চুরি করে। তাদের সঙ্গে ফুটবলও খেলে।

ব্রহ্মপুত্রের ধারে যেসব ডিঙ্গি নৌকো থাকে সুযোগ পেলেই কৃষ্ণকান্ত দড়ি খুলে সেগুলো শ্রোতের মুখে ঠেলে দিয়ে আসে। বুড়ো রামভজুয়া দারোয়ানের কানে সে একবার গোকুলপিঠের গরম রস ঢেলে দিয়েছিল। রামভজুয়ার সেই কান একদম গেছে।

হেমকান্তর কাছে অবশ্য এসব খবর বড় একটা পৌছায় না। প্রথম কথা, কৃষ্ণকান্ত যে হেমকান্তর আদরের ছেলে এটা সবাই জানে। দ্বিতীয় কথা, মা-মরা ছেলে বলে সকলেরই একটু মায়্যা আছে। তাই কেউ নালিশ করতে যায় না। হেমকান্তর বড় ছেলে কণককান্তি কলকাতায় তাঁদের কালীঘাটের বাড়িতে থাকে। শ্বশুরের সঙ্গে সে একটা ব্যবসায় নেমেছে। ব্যবসা কিসের তা খোঁজ করেননি হেমকান্ত। তবে আয় বোধহয় ভালই হচ্ছে। কণককান্তি টাকার জন্য বাপকে চিঠি

লেখে না। সম্প্রতি সে একটা প্রস্তাব পাঠিয়েছে। সে কৃষ্ণকান্তকে নিজের কাছে রেখে মানুষ করতে চায়। হেমকান্ত না বা হ্যাঁ কোনোটাই জানাননি। কৃষ্ণকান্তকে ছেড়ে থাকতে তাঁর কষ্ট হবে। তবু তাকে যে কলকাতায় পাঠানোই উচিত তাও তাঁর মনে হয়। এখানে কৃষ্ণকে দেখার কেউ তেমন নেই। কণককান্তিও আগ্রহের সঙ্গেই চাইছে।

কিন্তু কলকাতায় যাওয়ার প্রস্তাবে কৃষ্ণকান্ত কেঁদে ভাসিয়েছে। বাবা তাকে এখনো কিছু বলেনি ঠিকই, কিন্তু যদি বলে ? বাবার কথার ওপর তো আর কথা চলে না। মনু পিসি বা রঙ্গময়ীই হচ্ছে তার একমাত্র ভরসা। বড়দা তাকে কলকাতায় নিয়ে যেতে চায় শুনে সে গিয়ে মনু পিসির ওপর হামলে পড়ল, আমি কিন্তু কিছুতেই যাবো না, বলে দিচ্ছি। তুমি বাবাকে রাজি করাও।

কৃষ্ণ কোথাও চলে যাবে এটা রঙ্গময়ীও ভাবতে পারে না। সুনয়নী চলে যাওয়ার পর এই দুধের বাচ্চটিকে সে বুকে আগলে এত বড়টি করেছে। তবু সে বলল, যাবি না তো কী করবি ? এখানে কে তোকে অত চোখে চোখে রাখবে ? কখন পুকুরে ডুবে মরিস, কার সঙ্গে মারামারি করে মাথা ফাটিয়ে আসিস তার তো ঠিক নেই। কলকাতায় ধরাবাঁধা জীবন, সেখানেই গিয়ে থাকা ভাল।

এরপর কৃষ্ণকান্ত রেগে রঙ্গময়ীকে আঁচড়ে কামড়ে চুল ছিঁড়ে একাকার কাণ্ড করল। রঙ্গময়ী ভরসা দিল, আচ্ছা যা, তোর বাবাকে রাজি করানোর চেষ্টা করব।

কৃষ্ণকান্ত ভরসা পেল বটে, কিন্তু ভয়টা আজও কাটেনি। কণককান্তি সামনের মাসে আসছে। সেই সময় আবার তাকে কলকাতা নিয়ে যাওয়ার কথা উঠবে। সেখানে এমন অব্যবহিত মাঠঘাট নেই, ঘোড়া নেই, বন্ধু নেই, ধারেকাছে নেই নদী বা পুকুর। বড়দা লোকটা ভারী গোমরামুখো। বউদিও ভীষণ রাগী।

কৃষ্ণকান্ত হঠাৎ জিপ্সেস করল, হরদা, কখনো কলকাতায় গেছ ?

গেছি। অনেকদিন আগে।

তোমার ভাল লাগে ?

না।

তোমার এ জায়গাটাই বেশী ভাল লাগে, না হরদা ?

হ্যাঁ।

আমারও। তবু বড়দা আমাকে কলকাতায় নিয়ে যেতে চাইছে।

হরনাথ উদ্বিগ্ন হয়ে বলে, সে কী ? তুমি যেও না।

কিন্তু জোর করে নিয়ে গেলে কী করব ?

তুমি জোর করেই এখানে থেকে যাবে।

কৃষ্ণকান্ত এ কথায় হেসে উঠে বলল, হরদা, তুমি সত্যিই পাগলা। বাবা যদি বলে, ওরে কৃষ্ণ, কণকের সঙ্গে কলকাতায় যা তা হলে কী হবে ?

তুমি লুকিয়ে থেকে। আমি তোমাকে একটা জায়গা দেখিয়ে দেবো। কেউ খুঁজে পাবে না তোমাকে।

কৃষ্ণকান্ত সঙ্গে সঙ্গে কৌতূহলী হয়ে বলে, আছে সেরকম জায়গা ?

অনেক আছে। কেউ খুঁজে পাবে না।

জায়গাটা দেখাবে আমাকে ?

হরনাথ মুগ্ধ চোখে চেয়ে দেখছিল কৃষ্ণকান্তকে। এ ছেলে ভবিষ্যতে খুব বড় কেউ একজন হবে। চোখের দৃষ্টি এই কয়সেই কী গভীর ! কেমন ধারালো চেহারা। সে বলল, দেখাতে পারি।  
একটু ভয়ের জায়গা।

ভয় কিসের ভয় ?

এখানে আরও একজন থাকে কিনা।

সে কে ?

তোমার কাকা । নলিনীকান্ত ।

কী যে বলো ! কাকা তো বেঁচে নেই ।

তা না থাক, মরে তো আছে ।

তার মানে ?

হরনাথ নির্বিকার গলায় বলে, নলিনীবাবুর ঘরে এখনো নলিনীবাবু থাকেন ।

কৃষ্ণকান্তর গায়ে একটু কাঁটা দিল । হরনাথের কাছ ঘেঁষে বসে সে বলল, সত্যি বলছ ?

তিন সত্যি । মাঝরাত্রে সাইকেল চালিয়ে আসেন । ঘরে ঢোকে । সব টের পাই ।

কখনো দেখেছো ?

দু-একবার । আমি তাঁর সাড়া পেলেই ঘর থেকে বেরিয়ে আসি । রোজ দেখতে পাই না অবশ্য ।

তবে দু'বার দেখেছি । একবার আমাকে ইশারায় কাছেও ডাকেন ।

তুমি কাছে গেলে ?

গিয়েছিলাম । কিন্তু তারপর আর কিছু দেখতে পেলাম না ।

ও বাবা ! ও ঘরে আমাকে লুকিয়ে থাকতে বলছ ?

ভয় পেও না । উনি তোমার কাকা হতেন । তোমার কোনো ক্ষতি করবেন না । বরং, ভালই করবেন । ওদের ভয় পেতে নেই । আমাদের যেমন একটা জগৎ আছে, ওদেরও তেমনি একটা আলাদা জগৎ আছে ।

তুমি ভূত দেখতে পাও ?

খুব দেখতে পাই । তোমার মাকেও মাঝে মাঝে দেখি, ভিতরের দরদালানের জানালায় দাঁড়িয়ে দুপুরবেলা চুল শুকোচ্ছেন । কাল যখন বিকেলে তুমি ঘোড়া চালাচ্ছিলে তখন উনি এসে সামনের গাড়িবারান্দার ছাদে দাঁড়িয়ে এক দৃষ্টিতে দেখছিলেন তোমাকে ।

কৃষ্ণকান্ত খুব ঘনিষ্ঠ হয়ে বসল হরনাথের সঙ্গে । বলল, মা আমাকে কেন দেখছিল ?

দেখবে না ? ছেলে বলে কথা ! তোমাকে একটুখানি দেখে চলে গেছেন, এখন তুমি কত বড়টি হয়েছেো ! ঘোড়া চালাও, ইসকুলে যাও, ফুটবল খেল । মা তাই দেখতে আসেন ।

ভয় ভয় করলেও কৃষ্ণকান্তর ঘটনাটা খারাপ লাগল না । মার কথা তার মনেই নেই । তবু মা যে চোখের আড়ালে এখনো আছে সেটা ভাবতে ভালই লাগে ।

হরনাথ অশ্রুট গলায় বলে, দুলিকেও দেখি । জঙ্গলে জঙ্গলে ঘুরে শাক তোলে । আঁচলে মাছ ধরে । কখনো ঘরেও আসে । আমার মাথার কাছটিতে চূপ করে বসে থেকে আবার চলে যায় ।

তবে যে প্রতুল মাস্টারমশাই বলে, ভূত বলে কিছু নেই ।

কী জানি । আমি তো সব স্পষ্ট দেখি । এই যেমন তোমাকে দেখছি । তবে তাদের সঙ্গে কথাবার্তা হয় না ।

আমার মাকে দেখাবে ? আমার খুব দেখতে ইচ্ছে করে ।

দেখা কি আর না যায় ? চেষ্টা থাকলে, ইচ্ছে থাকলে দেখা যায়ই । দুলি মরার পর আমি কেবল দিনরাত তাকে ভাবতাম আর কান্দতাম । ভাবতে ভাবতে আর কান্দতে কান্দতে মাথাটা কেমন গণ্ডগোল হয়ে গেল । তারপর থেকে সব দেখতে পাই । কোকাবাবু যেদিন মারা গেলেন—

সেদিন কী ?

সেদিন তাঁকেও দেখছি । সন্কেবেলা ব্রহ্মপুত্রের জলে নেমে স্নান করলেন । সুন্দর একটা পিন্ধি এল । তাইতে উঠে কোথায় চলে গেলেন ।

কৃষ্ণকান্ত একটু কাঠ কাঠ হয়ে গেল ভয়ে ।

চারদিকে অন্ধকার ঘন হয়ে এসেছে । শেয়াল ডেকে উঠল । উত্তরের হাওয়া এল অন্ধুত এক

হাহাকারের শব্দ নিয়ে ।

হরনাথ উঠে বলল, চলো, লুকিয়ে থাকার জায়গাটা তোমাকে দেখিয়ে দিই ।

কৃষ্ণকান্ত ভয় পায় বটে, কিন্তু ভয়ে কঁকড়ে যায় না, ভেঙেও পড়ে না । তার ভিতরে এক অফুরন্ত কৌতূহলই তাকে ভয়ের মুখেও এক ধরনের সাহস দেয় । সে উঠে বলল, কোথায় যাবে ? কাকার ঘরে ?

কাকার ঘরেই । তবে তার মধ্যেও একটু ব্যাপার আছে । চলো দেখাচ্ছি ।

দুজনে আবছা অন্ধকার টানা বারান্দা ধরে কাছারিঘর ছাড়িয়ে ভিতর দিকে হাঁটতে থাকে ।

সারি সারি ঘর । এত ঘর কোনো কাজে লাগে না । এক সময়ে এই কাছারি বাড়িতে বিস্তর লোক কাজ করত । আজকাল জমিদারির আয় কমেছে । লোকজনও কমে গেছে । গোটা চারেক বড় বড় মোকদ্দমায় হেরে গেছেন হেমকান্ত, কেবল তদবিরের অভাবে এখন শোনা যাচ্ছে, বড় ভাই বরদাকান্তর স্ত্রীও সম্পত্তির অংশ চেয়ে মামলা করবে । হেমকান্ত এসব বৈষয়িক ব্যাপার নিয়ে মাথা ঘামান না । তাঁর কর্মচারীরাও তাঁর কানে সব কথা তোলে না । কিন্তু এই মস্ত জমিদারিতে যে অলক্ষ্মীর সঞ্চার ঘটেছে তাতে সন্দেহ নেই । এই শূন্য ঘরগুলো তারই আগাম ইঙ্গিত বহন করছে ।

নলিনীর বন্ধ দরজার সামনে এসে হরনাথ দাঁড়ায় । দরজায় কান পেতে কী একটু শোনে । তারপর ফিসফিস করে বলে, ওই শোনো । নলিনীবাবুর গলা !

আচমকা কৃষ্ণকান্তও শুনতে পেল, ঘরের মধ্যে একটা গলা বিকট স্বরে চৈচিয়ে উঠল, ভূত ! ভূত

কুশামাথা অন্ধকারে ভূতুড়ে ছায়া ধীরে ধীরে গড়িয়ে আসছে চারদিক থেকে । বাস্তব হারিয়ে যাচ্ছে এক রহস্যময় কুহেলিকায় ব্রহ্মপুত্রের বুক থেকে আঁশটে গঙ্গা বয়ে নিয়ে ছ ছ করে উত্তুরে গাওয়া এল । কাছেপিঠে ডেকে উঠল একশ শেয়াল ।

ভয় পাওয়ারই কথা । শশিভূষণকে যখন ধরে আনা হয় তখন কৃষ্ণকান্ত ইসকুলে । তাই ঘটনাটার কথা সে জানে না । কৃষ্ণকান্ত একবার ভাবল, দৌড় দেবে । কিন্তু জানার কৌতূহলও তার অসীম । সে দরজায় দমাদম ঘা দিয়ে বলল, কে ? কে ভিতরে ?

তোমার কাকা । ফিসফিস করে হরনাথ বলে

কিন্তু কৃষ্ণকান্ত লক্ষ্য করেছে, দরজাটায় তালা দেওয়া নেই । এ ঘরটায় সর্বদাই তালা দেওয়া থাকে । ভিতরের কণ্ঠস্বর যদি নলিনীকান্তর প্রেতাত্মারই হয় তবে দরজার তালাটা খোলবার দরকারই হত না নিশ্চয়ই কেউ আছে ।

আবার সে দরজায় ধাক্কা দিতে লাগল ।

সেই শব্দে লোক জড়ো হতে দেরী হল না । গগন মুহুরি বলল, ও ঘরে একজন অতিথি আজ দপ্তর থেকে আছে । কর্তাবাবু তার ওপর নজর রাখতে বলেছেন ।

কৃষ্ণকান্ত একটু রাগের গলায় বলল, লোকটা দরজা খুলছে না কেন ? কে লোকটা ? গগন মাথা চুলকে বলল, আমরা চিনি না । তবে পাগলের মতো চেহারা ।

কৃষ্ণকান্ত আরো কয়েকবার দরজায় ধাক্কা দিয়ে বলল, লোকটার বোধহয় অসুখ করেছে ।

৭১ জটা ভাঙতে হবে ।

খবর পেয়ে হেমকান্তও দরজা ভাঙার হুকুম দিলেন । ভিতরে ঢুকে দেখা গেল, শশিভূষণের জ্ঞান

৭২ ৫ । গায়ে প্রবল জ্বর ।

৭৩ ৬ ময়ময়ীকে কিছু বলতে হয় না । সে চট করে পুকুর থেকে এক বালতি জল নিয়ে এসে সযত্নে

৭৪ ৭ মাথা দুইয়ে দিয়ে জলপটি দিতে লাগল কপালে । কুমুদ ডাক্তার এসে ওষুধ দিয়ে বলে গেল, খারাপ

৭৫ ৮ ৭৬ ৯ ম্যালেরিয়া । মাথায় রক্তের চাপ প্রবল ।

কৃষ্ণকান্ত জনে জনে জিজ্ঞেস করেও লোকটার নাম ছাড়া আর কিছুই জানতে পারল না ।

শশিভূষণের বয়স প্রতুল মাস্টারমশাইয়ের সমান। কিন্তু চেহারাটা একদম মড়ার মতো গুটকো, সাদা। গালে দাড়ি। লম্বা লম্বা চুল।

মনু পিসি, লোকটা কি পাগল? সে রঙ্গময়ীকে জিজ্ঞেস করল।

না রে, দু দিন আমবাগানে লুকিয়ে ছিল। খায়দায়নি। তাই ওরকম দেখাচ্ছে।

লুকিয়ে ছিল কেন?

শুনছি তো, পুলিশে নাকি তাড়া করেছিল।

কেন তাড়া করেছিল?

স্বদেশী করত যে!

এটা আর বুঝিয়ে বলার দরকার হয় না কৃষ্ণকান্তকে। স্বদেশীদের সে খানিকটা চেনে। তবে ভাল চোখে দেখে না। সে বলল, তা হলে পুলিশে খবর দিচ্ছে না কেন?

ওরে চূপ, চূপ! পুলিশ এলে তোর বাপেরও রেহাই নেই। ওসব বলিস না। তোকে বলাই ভাল হয়েছে দেখছি।

কৃষ্ণকান্ত জিজ্ঞেস করল, কোন আমবাগানে? বাড়ির পিছনেরটা?

তাই তো শুনছি।

ওখানে ছিল লোকটা? দু দিন?

হ্যাঁ।

মশা কামড়ায়নি?

তা আর কামড়ায়নি! সারা গায়ে তো দেখছি দানা দানা হয়ে আছে।

কিছু খায়ওনি?

কী খাবে? শীতকালে কি আর আমবাগানে আম পাওয়া যায়?

লোকটার দিকে আর একবার ভাল করে চেয়ে দেখল কৃষ্ণকান্ত। চেহারাটা তার পছন্দ হল না ঠিকই। তবে যে-লোক দুদিন না খেয়ে আমবাগানে লুকিয়ে থাকতে পারে তাকে একটু শ্রদ্ধা না করে উপায় কী?

## ॥ ১০ ॥

দিশাহারা রেমি অবিস্বাসের চোখে ধুবর দিকে চেয়ে থাকল কিছুক্ষণ। তার সন্দেহ, ধুব স্বাভাবিক মানুষ নয়। হয় পাগল, না হয় পয়লা নন্দরের বদমাশ। তবু মাঝরাত্তায় এই লোকটির সঙ্গে গোলমাল লাঁথিয়ে লাভ নেই। রেমির চোখে তখন জল এসে গেছে। ফোঁপাতে ফোঁপাতে সে বলল, চলো শীগগির। তোমার পায়ে পড়ি। ট্রেন ছেড়ে দেবে।

ধুব ম্যাগাজিনটা বগলদাবা করে ধীরে সুস্থে দাম মেটাল। তারপর বলল, চলো। কিন্তু একটা কথা বলে দিচ্ছি। অবাধ্যতা কোরো না। আমার কিন্তু কোনো কাণ্ডজ্ঞান নেই।

তারা কামরায় ফেরার পর গার্ড সাহেব একবার হানা দিয়েছিলেন। কিন্তু কৃষ্ণকান্তর ছেলে বলে পরিচয় পাওয়ায় জল আর বেশীদূর গড়ায়নি। এমন কি জরিমানা পর্যন্ত দিতে হয়নি তাদের।

শিলিগুড়ি পর্যন্ত বাকি রাত্তাটা ধুব আর গোলমাল করেনি। কারণ প্রচুর মদ খেয়ে সে একদম অচেতন অবস্থায় গাড়ির মেঝেয় পড়ে থেকেছে। একবার টেনে হিঁচড়ে তাকে শীটে তুলে শুইয়েছিল রেমি। দশ মিনিটের মাথায় আবার সে দড়াম করে মেঝেয় পড়ে যায় এবং পড়েই থাকে। রেমি আর তাকে তোলার সাহস পায়নি। পড়ে গিয়ে যদি ঝড় বা হাত-পা ভাঙে?

কৃষ্ণকান্তর বন্ধু সুদর্শন রায় শিলিগুড়ির মস্ত ধনী লোক। তাঁর চা বাগান ঝাঠের ব্যবসা, নিউ মারকেটে বাহারী দোকান, কী নেই? দার্জিলিংে তাঁর একটা ভাল হোটেলও আছে। সেই সুদর্শনবাবু গাড়ি নিয়ে স্টেশনে হাজির ছিলেন। সোজা তাদের নিয়ে তুললেন হাকিমপাড়ায় নিজের

প্রকাশ বাড়িতে। বললেন, দার্জিলিং তো যাবেই। একদিন এখানে রেস্ট নিয়ে যাও।

ধুব একটু গাঁইগুঁই করেছিল বটে, কিন্তু থেকেও গেল।

ওই একটি দিন রেমির বড় চমৎকার কেটেছিল। সুদর্শনবাবুর দুটি যুবতী মেয়ের সঙ্গে তার ভীষণ ভাব হয়ে গেল। বড়লোকের মেয়ে বলে কোনো দেমাক-টেমাক নেই, কিংবা থাকলেও তা রেমিকে দেখায়নি। সেই সঙ্গে জুটে গেল সুদর্শনবাবুর ভাইপো সমীর। যেমন ঝকঝকে চেহারা তেমনি বুদ্ধিদীপ্ত তার চালচলন আর কথাবার্তা। তারা চারজনে মিলে চমৎকার একটা টিম হয়ে গেল। এত তড়াতাড়ি যে কারও সঙ্গে বন্ধুত্ব হতে পারে তা রেমির অভিজ্ঞতায় ছিল না। সম্ভবত দায়িত্ব ও কাণ্ডজ্ঞানহীন ধুবর কাছ থেকে ধাক্কা খেয়েই রেমির মধ্যে একটা ভয় ও নিঃসঙ্গতার বোধ জন্ম নেয়। তাই এই তিনটি স্বাভাবিক, প্রাণপ্রাচুর্যে ভরা যুবক যুবতীকে পেয়ে সে আঁকড়ে ধরল। সেই টিমে ধুব ছিল না। কারণ আগের দিনের অটেল মদ তখন তার ওপর শোধ নিচ্ছে, দারুণ মাথাধরা, বমির ভাব ও দুর্বলতায় আচ্ছন্ন হ্যাংওভার কাটাতে সে সারাদিনটাই প্রায় বিছানা আলিঙ্গন করে রইল।

নন্দা, ছন্দা আর সমীরের সঙ্গে রেমি বেরোলো শহর দেখতে। কী সুন্দর শহরটি। খানিকটা কলকাতার সঙ্গে খানিকটা গ্রাম মেশালে যেমন হয় আর কী! শহর ঘেঁষে একটি পাহাড়ী নদী বয়ে যাচ্ছে। মহানন্দা উত্তরে মহান হিমালয়।

সমীর বলল, শিলিগুড়ি এখন ওয়েস্ট বেঙ্গলের সেকেণ্ড সিটি। কলকাতার পরই শিলিগুড়ি কলকাতা-গরবিনী রেমি বলল, আহা রে, কলকাতার সঙ্গে টক্কর দেওয়া অত সস্তা নয় মশাই শিলিগুড়িকে সাত জন্ম তপস্যা করতে হবে।

সমীর ছাবলা নয়। এ কথা জবাবে মৃদু একটু হাসল মাত্র। হুড খোলা জীপগাড়িটা চালাচ্ছিল সে-ই চোখে গগলস কিছুক্ষণ বাদে সেই গগলসের ভিতর দিয়ে রেমির দিকে চেয়ে বলল, কলকাতা শুধু আপনারই নয় কিন্তু, আমাদেরও।

তাই নাকি?

যে কোনো বাঙালীকেই জিজ্ঞেস করুন। নোংরা হোক, যিঞ্জি হোক, কলকাতার নিন্দে করলে যে কোনো বাঙালী চটে যায়। আমি আরো বেশী চটি। কারণ কলকাতাকে আমার মতো করে কেউ আবিষ্কার করেনি। আমার রক্তে রক্তে কলকাতা।

রেমি বলল, তবু ভাল। আমি ভাবলাম আপনি বুঝি শিলিগুড়িকে তোলাই দিতে গিয়ে কলকাতাকে ছোটো করছেন।

মোটেই নয়

নন্দা বলল, সমীরদা অসম্ভব কলকাতাই। ছুটি পেলেই পালাবে। আমাদের তো বাবা সপ্ট লেকে অত বড় বাড়ি পড়ে আছে। কিন্তু আমার গিয়ে বেশীদিন থাকতে ইচ্ছে করে না।

ছন্দার অবশ্য অন্য মত। সে বলে, না বাবা, আমার কলকাতাই ভাল লাগে।

সেদিন তারা রেস্টুরেন্টে খেল, চোরাই হংকং মারকেটে ঘুরে ঘুরে বিদেশী শাড়ি আর কসমোটিকস কিনল, সেভক রোড ধরে চলে গেল কালিঝোড়া পর্যন্ত। আর তারই ফাঁকে চারজনের টিমটা আরও আঠালো হয়ে উঠল।

পরদিন সেই চারজন এবং ধুব একটা জোঙ্গা জীপগাড়িতে গেল দার্জিলিং। সমীর পাহাড়ী রাস্তায় গাড়ি চালাচ্ছিল বলে বেশী কথা বলছিল না। তার পাশে বসা ধুবও চুপচাপ। কলকল করছিল শুধু তিন যুবতী পিছনের দিকে বসে। একার মাইল রাস্তা টেরই পাওয়া গেল না।

কিন্তু মুশকিল হল বিকেলবেলা, যখন রেমি আর ধুবকে দার্জিলিং-এ রেখে ওরা ফিরে আসবে। কারণ ধুব হোটেলে ঢুকেই বার-এ স্টেটে বসে গিয়েছিল। বিকেল নাগাত সে চুরচুর মাতাল! সুতরাং নন্দা, ছন্দা আর সমীর যদি শিলিগুড়ি ফিরে আসে তাহলে রেমি একা পড়ে যায়। এই অনাঙ্খীয়

শহরে একা একটি যুবতী মেয়ের কেমন কাটবে ?

ধ্রুবকে সুদর্শনবাবুর হোটেলের রেখে তারা চারজন একটু বেড়াতে বেরিয়েছিল। ধ্রুব যেতে চায়নি বলেই তাকে নেওয়া হয়নি। বেড়িয়ে ফেরার পর ধ্রুবের অবস্থা দেখে সমীর মুখে আফশোষের চকচক শব্দ করে বলল, ম্যাডাম তো খুব অসুবিধেয় পড়বেন দেখছি। ধ্রুববাবু তো আউট।

ভয়ে বুক টিবিটিব করছিল রেমির। শুষ্ক গলায় সে বলল, আপনারা প্লিজ যাবেন না। ওর যদি কিছু হয় তাহলে কে দেখবে ?

সমীর তার দিকে চেয়ে একটু হেসে বলে, ওর কিছু হবে না। বিছানায় নিয়ে শুইয়ে দিলেই রাত কেটে যাবে। ভয় আপনাকে নিয়ে। আপনার রক্ষক তো কেউ থাকছে না।

নন্দা আর ছন্দাও অস্বস্তি বোধ করতে লাগল। তারা বুঝতে পারছিল রেমিকে এই অবস্থায় ফেলে যাওয়াটা ঠিক নয়। কিন্তু তাদেরও ফেরা দরকার। ছন্দার কলেজ আছে। নন্দারও কী সব এনগেজমেন্ট।

খানিকক্ষণ শলা পরামর্শের পর ঠিক হল, সমীর থেকে যাবে। দুই বোন ফিরে যাবে শিলিগুড়ি। তাদের ফিরতে কোনো অসুবিধে নেই। সুদর্শনবাবুর হোটেলেরই নিজস্ব গাড়ি তাদের পৌঁছে দিয়ে আসবে।

কিন্তু রেমি আজ জানে, সমীরেরও থেকে যাওয়ার কোনো দরকার ছিল না। সেই সুন্দর ছিমছাম হোটেলটির মালিক স্বয়ং সুদর্শনবাবু। হোটেলের বশংবদ কর্মচারীরা তাদের ভালই দেখাশোনা করতে পারত। সুতরাং সমীরের ওই কথাটা “আপনার রক্ষক তো কেউ থাকছে না” ঠিক নয়।

কিন্তু বলতে নেই, সমীর থাকায় রেমির বুকের মধ্যে এক আনন্দের খামচাখামচি শুরু হয়েছিল। সেই অবোধ রহস্যময় অনুভূতির কোনো মানে হয় না। এত বেহায়া বেহেড রেমি বিয়ের আগেও ছিল না কোনোদিন। কিন্তু মাতাল ধ্রুবই কি তাকে ঠেলে দিয়েছিল ওই অসামাজিক এক সম্পর্ক শুরু করার রাস্তায় ?

নন্দা আর ছন্দা চলে যাওয়ার পর ধ্রুবকে বিছানায় পৌঁছে দেওয়া হল। একজন বেয়ারা মজুত থাকল ঘরে। নিঃসাড়ে ঘুমোতে লাগল ধ্রুব।

সমীর বলল, চলুন সেকেন্ড রাউণ্ড বেড়িয়ে আসি। ভাল করে ঢাকাচুকি দিয়ে নিন। দারুণ শীত।

জোঙ্গা গাড়িটায় আবার দুজনে বেরোলো। তখন সন্দের পর রাস্তাঘাট বেশ ফাঁকা, ম্যাল প্রায় জনশূন্য, মেঘ করে হঠাৎ একটু বৃষ্টিও পড়ছে। রেমির তবু খারাপ লাগছিল না। বুকটা একটু কেমন করছিল। বারবার মনে হচ্ছিল এবার একটা কিছু হবে, কিছু ঘটবে, জীবনে একটা মোড় ফিরবে।

আস্তে আস্তে গাড়িটা বিভিন্ন চড়াই উতরাই ভেঙে চালাচ্ছিল সমীর। কোথাও যাক্স ছিল না। উদ্দেশ্যহীন চলা।

জিপ্সেস করল, ধ্রুববাবু সম্পর্কে আমি খুব বেশী কিছু জানি না। কিন্তু শুনেছি এক সময়ে উনি খুব রাইট বয় ছিলেন। এরকম কবে থেকে হল ? ইজ হি ফ্রাস্ট্রটেড ?

রেমি তার কী জানে ? সে মদুস্বরে বলল, আমি তো বিয়ের পর থেকেই এরকম দেখছি। আগে কীরকম ছিল জানি না।

আপনি নিশ্চয়ই খুব লোনলি ফিল করেন !

সেটা কি আর বলতে হবে !

উনি খুবই ইয়ং। বয়সে বোধহয় আমার চেয়েও ছোটো। এই বয়সে এত ডীপ ফ্রাস্ট্রেশন আমি দেখিনি কারও। এর সঙ্গে আপনি ঘর করবেন কী করে ?

সেটাই তো ভাবছি।

ভাবছেন ? যাক বাঁচালেন। প্রশ্নটা করেই আমি মনে মনে জিব কাটছিলাম, অর্থাৎ চর্চা হয়ে

গেল ভেবে ।

রেমি ম্লান একটু হেসে বলল, অত ফরমাল হওয়ার দরকার নেই । আমি ভীষণ প্রবলেমের মধ্যে আছি । এই সময়ে আমার একজন বন্ধু দরকার যে গাইডেনস দিতে পারবে । আমি আপনার পরামর্শ চাই । ওকে নিয়ে কী করব বলুন তো ।

সমীর একটু ভেবে বলল, আপনি যদি অনুমতি দেন তবে কাল সকালে আমি গুঁর সঙ্গে একটু কথা বলে দেখতে পারি । তবে উনি খুব গম্ভীর । কাল থেকে বহুবার কথা বলার চেষ্টা করেছি । উনি তেমন ইন্টারেস্ট দেখাচ্ছেন না ।

তবু আপনি একটু কথা বলে দেখবেন । তবে দয়া করে আমার রেফারেন্স দেবেন না । তাহলে চটে যাবে ।

আরে না না, আমি অত বোকা নই । আপনাকে আড়াল করাই তো আমার উদ্দেশ্য ।

রেমি মৃদুস্বরে বলল, আমার খুব ভয় করছে দার্জিলিং বেড়াতে এসে ।

কিসের ভয় ?

আমার মনে হচ্ছে কতটুকু অ্যাবনরম্যাল । যে কোনও সময়ে আমার কথা ভুলে গিয়ে হয়তো আমাকে ছেড়েই কোথাও চলে যাবে ।

ধুববাবু কি এতই ইরেসপনসিবল ?

হ্যাঁ । আপনি ধারণা করতে পারবেন না । আসার সময় বর্ধমান স্টেশনে এমন একটা কাণ্ড করেছিল যে আমার ভিতরে একটা ভয় ঢুকে গেছে । আমি ওকে বিশ্বাস করি না ।

সমীর খুব হাস্কা গলায় বলল, আপনার মতো মেয়েকে ভুলে গিয়ে বা ফেলে রেখে কি যাওয়া যায় ?

সমীরের এই স্তুতিটুকু তার ভালই লাগল । সে বলল, আমি এমন কিছু না ।

সে আপনি জানেন না । আমরা জানি । কিন্তু ধুববাবু অ্যাবনরম্যাল এটা কি ঠিক জানেন জানি । ওর সবচেয়ে বেশী রাগ ওর বাবার ওপর ।

কেন বলুন তো ! কৃষ্ণকান্তবাবুকে আমি চিনি । দারুণ লোক ।

শ্বশুরমশাইয়ের তুলনা হয় না । তবু ও ওর বাবাকে দেখতে পারে না । সেটাই অস্বাভাবিক ।

জেলাসি নয় তো !

কে জানে কী । এ প্রসঙ্গটা বাদ দিন ।

সরি । দার্জিলিং আপনার কেমন লাগছে ?

ভাল ।

ধুববাবু নরম্যাল থাকলে আরো ভাল লাগত ।

সেটা ঠিক । তবে যতটা খারাপ লাগার কথা ছিল এখন ততটা খারাপ লাগছে না ।

এ হচ্ছে কথার পিঠে কথার খেলা । কিন্তু রেমি বাস্তবিক কথার খেলা জানে না । সে যা বলেছিল তা অকপট মন থেকে উঠে আসা কথা । সত্যিই তো তার খারাপ লাগছিল না ।

তারা যখন হোটেলে ফিরল তখন দার্জিলিং-এর নিয়ম অনুযায়ী অনেক রাত । রাস্তাঘাট সম্পূর্ণ জনশূন্য । হোটেলেও দু-চারজন মদ্যপায়ী ছাড়া বাকি সবাই ঘরে দোর দিয়েছে ।

ফাঁকা ডাইনিং হল-এ বসে রেমি আর সমীর রাতের খাবার খেল । খেতে খেতে রাত গড়িয়ে দিল অনেকটা । কথা আর শেষ হতে চায় না । ধুবর সঙ্গে সাতদিনে যত কথা না হয় তার চেয়ে ঢের বেশী সেই কয়েকঘণ্টায় হল সমীরের সঙ্গে রেমির । খাওয়ার পর লাউনজে ইলেকট্রিক হিটারের সামনে নরম সোফায় কশ্বলমুড়ি দিয়ে বসেও অনেকক্ষণ সময় কাটাল তারা ।

তারপর একসময়ে রেমির মনে হল, এবার ঘরে যাওয়া দরকার । হোটেলে কেউ আর জেগে নেই । ধুবকেও অনেকক্ষণ একা রাখা হয়েছে ।



সে অনিচ্ছার সঙ্গে বলল, এবার যাই।

আরে বসুন বসুন, সব তো সঙ্গে।

এইভাবে যাই-যাই করে কাটল আরো কিছু সময়। যখন বাস্তবিকই ঘরে এল রেমি তখন রাত পৌনে একটা।

ধুব তখনো অচেতন। রেমির অনেকক্ষণ ঘুম এল না। কেমন একটা উদ্ভ্রান্ত উত্তেজনায় বুক কাঁপছে। বারবার শিহরিত হচ্ছে সর্বাঙ্গ। এরকম তার আগে কখনও হয়নি। এমন কি ফুলশয্যার রাতেও নয়। নিজেকে বহুবার ধিক্কার দিল সে। তারপর ঠাকুর দেবতার পায়ে মাথা কুটতে লাগল মনে মনে, আমাকে রক্ষা কর। এ আমার কী হল? কেন হল? ছিঃ ছিঃ।

পরদিন ধুবর ঘুম ভাঙল বেলায়। গভীর হ্যাংওভার। ভাল করে তাকাতে পারছে না। মাথা ধরা বমি বমি ভাব।

রেমি তীব্র বিরাগের সঙ্গে বলল, এটা কী ধরনের হানিমুন হচ্ছে আমাদের?

ধুব মাথা চেপে ধরে আধশোয়া অবস্থায় তার দিকে চেয়ে বলল, কে বলেছে হানিমুন? এটা হল একসাইল। কৃষ্ণকান্ত চৌধুরির পলিটিক্যাল ফিল্ড থেকে ধুব চৌধুরিকে সরিয়ে দেওয়া। শুধু দেখাশোনা করার জন্য সঙ্গে তুমি।

তাই নাকি?

একজ্যাকটলি তাই। যাও একটা হেভি ব্রেকফাস্ট অরডার দিয়ে এসো। আর আমাকে ধরে একটু বাথরুমে ঢুকিয়ে দিয়ে যাও।

স্নান এবং ছোটো হাজরির পর কিন্তু ছিপছিপে তেজী চেহারার ধুবকে আবার বেশ তরতাজা দেখাচ্ছিল। নিজেই পোশাক-টোশাক করল। বলল, চলো, একটু ঘুরে আসি।

হঠাৎ ভূতের মুখে যে বড় রাম নাম।

ধুব একটু হেসে বলে, চলো, দেখা যাক একসাইলটাকে হানিমুন করে তোলা যায় কিনা।

সত্যি নাকি?

একটা দীর্ঘশ্বাসকে চাপা দিল রেমি। ভিতরকার উত্তেজনায় সারা রাত সে এপাশ ওপাশ করেছে। পাপবোধ তাকে ছিঁড়ে খেয়েছে। সকালে-সে তখন বড় অবসন্ন। ধুবর সঙ্গে বেড়াতে যাওয়ার শারীরিক বা মানসিক শক্তিতে তখন টান ধরেছে।

সে বলল, আমি হাঁটতে পারব না।

হাঁটতে হবে না। হোটেল থেকে একটা গাড়ি ম্যানেজ করা যাবে।

রেমি একটু তটস্থ হয়ে বলে, হোটেলের গাড়ি দরকার নেই। কালকের সেই জীপগাড়িটাই তো আছে।

কোন জীপগাড়িটা?

যেটায় আমরা এলাম। সমীরবাবুও আছেন।

কে সমীরবাবু? সুদর্শনকাকার ভাইপো?

অকারণে লাল হয়ে এবং মুখ নামিয়ে রেমি বলল, হ্যাঁ। তোমার ওই অবস্থা দেখে উনি আর কাল ফিরে যাননি।

ধুব ভূঁচকে বোধহয় সেকেণ্ড দুই রেমির দিকে চেয়ে রইল। আর রেমির তখন মনে হল, ধুব তার ভিতরকার সব দৃশ্য দেখে ফেলছে। কী যে অস্বস্তি! সে তাড়াতাড়ি উঠে সাজপোশাকে একটু সংশোধন শুরু করে দিল।

ধুব বলল, সুদর্শনকাকার মেজো মেয়েটার নাম যেন কী!

ছন্দা, কেন বলো তো!

ওই ছন্দার সঙ্গে বোধহয় সমীরের একটা আনহেলদি রিলেশন আছে।

রেমি ইলেকট্রিক শক খাওয়ার মতো চমকে উঠে বলে, যা : কী যে বলো না !

ধুব একটু অপ্রতিভ হয়ে বলে, অবশ্য আমার ভুলও হতে পারে । কিন্তু আমার মনে হচ্ছিল ।

ওরা আপন খুড়তুতো জ্যাঠতুতো ভাইবোন, সেকথাটা ভুলে যেও না ।

তা বটে । তাহলে লেট আস গো । সমীরকে রেডি হতে বলো ।

বলাই আছে । উনি তৈরি । আমরা নামলেই হয় ।

যখন দুজনে নীচে নেমে এল তখন ধুবর ফিটফাট চেহারা দেখে সমীর কিছুটা অবাক । বলল, আপনি হানড্রেড পারসেন্ট ফিট দেখছি ।

ধুব খুব লাজুক মুখে হেসে বলল, কাল একটু বেসামাল হয়েছিলাম । কিছু মনে করবেন না । শুনলাম, আমার জন্যই আপনি আটকে গেলেন ।

ও কিছু নয় ।

ধুব খুব ভদ্র গলায় বলল, কাল আপনি প্রায় সারাদিন গাড়ি চালিয়েছেন । আজ পাশে বসে রেস্ট নিন । আমি চালাবো ।

পারবেন ? পাহাড়ী রাস্তা কিন্তু ।

পারব ।

আশ্চর্য এই, ধুব চমৎকার পারল । গাড়ি টাল খেল না, ঝাঁকুনি লাগল না, এতটুকু বেসামাল হল না কোথাও । অত্যন্ত দক্ষ পাহাড়ী ড্রাইভারের মতোই সে ঘুম মনাস্টারি, সিনচল লেক হয়ে কারশিয়ং পর্যন্ত নেমে এল । তারপর নিরাপদে আবার গাড়ি ফিরিয়ে আনল হোটেলে । পিছনে বসে মুগ্ধ বিস্ময়ে দৃশ্যটা দেখছিল রেমি । বুকের মধ্যে যেন দুটো হৃৎপিণ্ড ধুক ধুক করছিল তার । ধুব ! ধুব যদি স্বাভাবিক হয়ে ওঠে তবে রেমি ধুব ছাড়া আর কাউকে পাস্তা দেবে কি ?

দুপুরে ভাত খাওয়া অবধি তিনজনে চমৎকার সময় কাটিয়ে দিল ।

সমীর বলল, আজ আমার ফিরে যাওয়ার কথা । যদি অনুমতি দেন তাহলে যাই ।

ধুব মৃদু হেসে বলল, আমাকে বিশ্বাস করবেন না । দার্জিলিঙের ওয়েদারের মতোই আমার মেজাজ । এই ভাল আছি, চার ঘণ্টা পরে হয়তো দেখবেন মেঝেয় গড়াগড়ি খাচ্ছি । তার চেয়ে বরং সুদর্শনকাকাকে একটা ফোন করে দিই, আপনি কয়েকটা দিন আমাদের সঙ্গেই থাকুন । রেমিরও একটা কমপ্যানি হবে ।

সমীর হঠাৎ সেই সময়ে বলল, আপনার সঙ্গে আমার কিছু কথা আছে ধুববাবু । আজ আপনার মেজাজটা ভাল আছে বলেই বলতে চাইছি ।

আরে বলুন না ! কী কথা রেমি বরং ঘরে গিয়ে রেস্ট নিক । আমরা দুটো বীয়ার নিয়ে লাউনজে বসি ।

সেই ভাল ।

রেমি কাঁপা-কাঁপা বুক নিয়ে ঘরে এল । সমীর কী বলবে সে জানে না । কিন্তু হে ঠাকুর, এমন কিছু যেন না হয় যাতে ও চটে যায় কিংবা রেমিকে সন্দেহ করে ।

অস্থির রেমি বিছানায় শুয়ে বই পড়ার চেষ্টা করল অনেকক্ষণ । মন দিতে পারল না । ঘণ্টা তিনেক কেটে যাওয়ার পর সে ক্লান্ত হয়ে একটু ঘুমিয়ে পড়েছিল । যখন ঘুম ভাঙল তখন সন্কে হয়ে গেছে । ঘর ফাঁকা ।

তাড়াতাড়ি উঠে নীচে নেমে এসে দেখল সমীর গম্ভীরভাবে লন-এ পায়চারি করছে একা ।

সে কী ? আপনি একা ! ও কোথায় ?

সমীর একবার কপালে হাত দিয়ে হতাশার ভঙ্গি করে বলল, হি ইজ বিয়ণ্ড এভরিথিং ।

তার মানে ?

কিছু করা গেল না রেমি । আমি ভাল করে কথা বলা শুরু করার আগেই উনি আসছি বলে কেটে

পড়লেন। কোথায় গেলেন কে জানে। ঘণ্টা দুই বাদে বিভিন্ন জায়গায় ফোন করতে শুরু করলাম।  
খবর পেলাম, বাজারের কাছে একটা বার-এ মদ খেয়ে প্রচণ্ড হাঙ্গামা বাঁধিয়েছেন।

সে কী! রেমির চোখ কপালে উঠল।

ব্যাপারটা স্যাড। কয়েকটা নেপালী ছোকরার সঙ্গে মারপিট হয়েছে। খুব বেশীদূর গড়ায়নি  
অবশ্য। তাহলে পেটে কুকরি ঢুকে যেত। তবে একটু চোট হয়েছে।

রেমি আত্ননাদ করে উঠল, ও কোথায় বলুন।

ডাক্তারখানায়। এখুনি আসবেন। ভয় পাওয়ার কিছু নেই।

নিশ্চয়ই আছে। ও কি উগুড?

না না, সেরকম কিছু নয়। বরং দুটো ছোকরা ওর হাতেই বেশী ঠ্যাঙানি খেয়েছে। উনি ঠিক  
আছেন। কপালটা একটু কেটেছে। আপনি অস্থির হবেন না। আমাদের হোটেলের ম্যানেজার নিজে  
গেছেন স্পটে।

রেমি অবশ্য হয়ে লনের একটা বেনচে বসে পড়ল। অত্যন্ত সেকলে ভঙ্গিতে বলল, কী হবে?

হয়তো কিছু হবে না। কিন্তু লোক্যাল ছেলের সঙ্গে গুগোল করায় এখানে আপনাদের  
খাকাটা আর সেফ নয়। আপনি বরং ঘরে গিয়ে এসেনশিয়াল কিছু গুছিয়ে নিন। সুটকেস,  
টুটকেসগুলো থাক, পরে পাঠিয়ে দেবে। ধুববাবু এলেই আমি আপনাদের নিয়ে শিলিগুড়ি নেমে  
যাবো।

রেমি ভয় পেয়ে বলল, কেন? লোকাল ছেলেরা কি গুগোল করবে?

করতে পারে। সেটাই স্বাভাবিক।

রেমির হাত পা ভয়ে আড়ষ্ট হয়ে গেল। কোনোরকমে ঘরে এসে সে পাগলের মতো ভুলভাল  
জিনিস ভরে একটা কিট ব্যাগ গোছাচ্ছিল। মাথায় ব্যাণ্ডেজ বাঁধা ধুব ঘরে ঢুকে বিরক্ত গলায় বলল,  
কী করছো? আমরা শিলিগুড়ি যাচ্ছি না।

রেমি দৌড়ে এসে ঝাঁপিয়ে পড়ল ধুবর বৃকে, কী করেছো তুমি? কী সর্বনেশে কাণ্ড করেছো?  
জানো না, এখানে মারপিট করতে যাওয়া কী ভীষণ রিস্কি? কেন মারপিট করেছো?

ধুব তাকে জড়িয়ে ধরে বলল, আরে, অত তাড়াতাড়ি সব কথার জবাব কি করে দেবো?  
মারপিট করিনি, নিজেকে বাঁচাতে মেরেছি। তা বলে পালাবো কেন?

কিন্তু সমীর যে বলল—

হ্যাং সমীর। আমার গায়ে হাত পড়লে জল অনেকদূর গড়াবে রেমি। তুমি স্বশুরের কথা ভুলে  
যাচ্ছে!

তখন স্থির হল রেমি। সত্যিই তো। ঘটনার আকস্মিকতায় সে বিস্মৃত হয়েছিল যে তার স্বশুর  
কৃষ্ণকান্ত চৌধুরি। শুধু দার্জিলিং কেন, সারা দেশের সর্বত্রই তাঁর প্রভাব ছড়ানো। তবু সে বলল,  
কিছু হবে না তো?

কী হবে? বলে ব্যঙ্গের হাসি হেসে ধুব বলে, বাবার কাছে অলরেডি ট্রাংক কল-এ খবর চলে  
গেছে। পুলিশ হেভি অ্যাকশন নিচ্ছে। কিছু ভেবো না রেমি, লিডারের ছেলে হতে কপাল লাগে।

সকালটা সুন্দর কেটেছিল রেমির। কিন্তু সেই সন্কেবেলাই আবার ধুবর মেজাজ পাল্টাল।

॥ ১১ ॥

পিতার বাৎসরিক কাজটি হেমকান্ত প্রতিবছর বেশ ঘটা করেই করেন। শ'খানেক ব্রাহ্মণকে  
ভোজন করানো হয় এবং ভালরকম দক্ষিণা ও অন্যান্য দানসামগ্রী দেওয়া হয়। ব্রাহ্মণ ছাড়াও  
আমন্ত্রিতের সংখ্যা বড় কম হয় না।

এ বছর হেমকান্ত একটু দ্বিধায় পড়লেন। আয় ভাল নয়। হিসেবপত্র করে যা দেখছেন তাতে এসটেট চালানোই যথেষ্ট কষ্টকর। এর ওপর বাড়তি কোনো খরচের বোঝা বইতে গেলে উপরি আয় চাই। প্রচলিত ও প্রথাসিদ্ধ অনুষ্ঠানে কাটছাঁট করার ইচ্ছে হেমকান্তের নেই। বিশেষ করে বাবার বাৎসরিকের প্রসন্ন যেখানে। অগত্যা তিনি রঙ্গময়ীকে ডেকে পাঠালেন।

শোনো মনু, সুনয়নীর বেশ কিছু গয়নাগাটি আছে। সেগুলো কোথায় আছে আমি সঠিক জানি না। মেয়েদের মহলে গিয়ে খোঁজ খবরও করা যাবে না। খবরটা আমাকে এনে দিতে পারবে? গোপনে?

কেন, সুনয়নীর গয়নার খোঁজ করছ কেন?

দরকারেই করছি।

দরকারটা শুনি।

আহা, অত দারোগাগিরির কী আছে। গয়নাগুলোয় তো আমারও খানিকটা অধিকার আছে, না কি?

ওমা, তোমার নেই তো আছে কার? কিন্তু সুনয়নী এতকাল মরেছে, এ খোঁজটা এতদিন পরে করছো কেন?

বললাম তো দরকার আছে।

গয়না কোথায় আছে জানি। কিন্তু কী অবশিষ্ট আছে তা বলতে পারব না।

তার মানে? অবশিষ্ট কথটা বললে কেন? চুরি-টুরি গেছে নাকি?

চুরি নয়। সুনয়নীই কিছু গয়না মেয়েদের আর বউদের ভাগ করে দিয়ে গিয়েছিল। আর যা ছিল তাও সব নেই। মেয়েরা স্বস্তরবাড়ি থেকে আসে, এটা ওটা নিয়ে যায়। বউরাও নিয়েছে।

হেমকান্ত বিরক্তিতে ভূঁকুঁচকে বলেন, গয়নার একটা হিসেব থাকা উচিত ছিল।

সুনয়নী অত হিসেবী মেয়ে ছিল না।

তোমার তো নিশ্চয়ই মনে আছে।

রঙ্গময়ী হেসে ফেলে বলে, গয়না তোমার বউয়ের আর তার হিসেব রাখতে হবে আমাকে? হিসেব কি সত্যিই নেই?

রঙ্গময়ী মাথা নেড়ে বলে, না। তবে সুনয়নী আমাকে একজোড়া বালা আর একটা হার দিয়েছিল।

তোমাকে দেওয়া গয়নার কথা আসছে কেন?

আসছে তার কারণ আছে। সুনয়নী কাউকে সাক্ষী রেখে গয়না দুটো আমাকে দেয়নি। আমি পরিও না। পরলে চোর-দায়ে ধরা পড়তে পারি। সেগুলো পড়ে আছে বাস্ত্বে। তোমার গয়নার দরকার থাকলে নিতে পারো।

দূর, কী যে বলো।

রঙ্গময়ী একটু হাসল। প্রশান্ত গলাতেই বলল, তোমার মতো মানুষ বউয়ের গয়নার খোঁজ করছে এটা ভাবাই যায় না। ইদানীং কি খুব হিসেবী হয়েছে?

হলে দোষ কী?

দোষ তো নয়ই। বরং তুমি হিসেবী হলে আমি বাঁচি। কী দরকার বলো তো? বেচবে নাকি?

হেমকান্ত অস্বস্তি বোধ করেন। প্রসঙ্গটা খুবই লজ্জাজনক। হেমকান্ত ঘরের সোনা বেচতে চান এটা পাঁচকান হলে গোটা পরিবারটারই মর্যাদার হানি। তিনি মাথা নেড়ে বললেন, আরে না। হঠাৎ মনে হল, গয়নাগুলো গেল কোথায়?

সুনয়নীর ঘরে দেয়ালের সিন্দুকে সব পাবে। তার চাবি আছে তোমার পড়ার ডেসকের ড্রয়ারে।

ঠিক আছে।

এ কথাতে রঙ্গময়ী চলে গেল না। চূপ করে খানিকক্ষণ দাঁড়িয়ে থেকে গলাটা সামান্য নামিয়ে বলল, গয়না দিয়ে তুমি কী করবে জানি না। তবে আমি বলি, ও গয়না থেকে একটাও এদিক ওদিক না করাই ভাল। তোমার হিসেব না থাক, তোমার মেয়ে আর বউদের আছে। কিছু সরালেই তারা টের পাবে।

হেমকান্ত বিস্মিত হয়ে বলেন, তারা টের পাবে? তা পাক না।

রঙ্গময়ী একটু বিব্রত হয়। একটু অপ্রতিভ হাসে। মৃদুস্বরে বলে, তুমি ভাবছো, তোমার বউয়ের গয়না, সুতরাং ওর ওপর তোমারই অধিকার।

তাই তো হওয়া উচিত মনু।

উচিত তো অনেক কিছুই। কিন্তু ও গয়নায় হাত পড়লেই কুরুক্ষেত্র লেগে যাবে। তোমার মেয়ে আর বউরা বনবেড়ালের মতো খাবা পেতে বসে আছে। পূজোর সময় কী কান্ড হয়েছিল তা তো জানো না।

কী কান্ড?

সে তোমার শুনে কাজ নেই। অন্দরমহলে অনেক কিছু হয়, সবটাই পুরুষের কানে না যাওয়া ভাল।

নিশ্চয়ই ঝগড়া?

হ্যাঁ, ভীষণ ঝগড়া। আর সেটা সুনয়নীর গয়না নিয়েই। তাই বলছিলাম হট করে গয়নায় হাত দিও না।

হেমকান্ত একটা দীর্ঘশ্বাস ফেললেন। মুখখানায় বিমর্ষতার ছায়াপাত ঘটল। হেমকান্ত বসেছিলেন নিজের শাওয়ার ঘরখানায় পূর্বাসা হয়ে। মেঝের ওপর পুরু উলের গালিচা, তার ওপর একটা ছোট্টো ডেসকে প্যাড ও লেখার সরঞ্জাম সাজানো। সকালের রোদ এসে পড়েছে গালিচার ওপর। সেই আলোয় গালিচার অপক্লপ রং ও নকশা স্ফুরধার হয়ে উঠেছে।

হেমকান্ত গালিচার নকশার দিকে চেয়ে থেকে বললেন, কত ভরি গয়না আছে জানো?

না। তবে শুধু সুনয়নীরই বোধহয় হাজার ভরির মতো সোনা ছিল। এখন বোধহয় অত নেই।

ওরা কতটা নিয়েছে তা বোধহয় জানো না?

না। ওরা যখন সিন্দুক খোলে তখন আমি কাছে থাকি না।

তবে জানলে কী করে যে, নিয়েছে?

মেয়েমানুষ হচ্ছে হীন জীব।

হেমকান্ত হাঁ করে চেয়ে থেকে বললেন, এ কথাটার মানে বুঝলাম না।

রঙ্গময়ী হেসে বলে, মানে কি ছাই আমিই জানি। মেয়েমানুষের লেখাপড়া নেই, চিন্তাভাবনা নেই, তাদের মন আর চোখ সবসময়েই সংসারের আস্তাকুঁড় ঝুঁটেছে। তাই তারা খবর রাখে।

তুমি কি সেইরকম মেয়েমানুষ?

তবে আর কীরকম?

হেমকান্তর একবার ইচ্ছে হল সচ্চিদানন্দর চিঠিটা রঙ্গময়ীকে দেখান। কিন্তু সেই চিঠিতে তো শুধু রঙ্গময়ীর প্রশংসাই নেই, তাঁকে এবং রঙ্গময়ীকে জড়িয়ে এমন সব ইঙ্গিত আছে যা পড়লে রঙ্গময়ী হয়তো বা গলায় দড়ি দেবে। হেমকান্ত রঙ্গময়ীর দিকে এই সকালের আলোয় চেয়ে দেখলেন ভাল করে।

সচ্চিদানন্দ মিছে বলেনি। ধারালো এক ব্যক্তিত্ব রঙ্গময়ীকে এই ভরা যৌবনে ভারী বিশিষ্ট করে তুলেছে। ব্যক্তিত্বটা কী ধরনের তা অবশ্য জানেন না হেমকান্ত। কারণ রঙ্গময়ী তাঁর প্রতিদিনকার দেখা ও জানা একটি মানুষ। এত কাছের মানুষের মধ্যে ধরাছোঁয়ার বাইরের কোনো গুণ আছে কিনা তা টের পাওয়া কঠিন। তবু সচ্চিদানন্দর চিঠিটা পাওয়ায় পর থেকে রঙ্গময়ীকে নতুন দৃষ্টিতে

দেখার চেষ্টা করছেন হেমকান্ত । কিন্তু পুরোনো চোখ সব গন্ডগোল করে দিচ্ছে । হেমকান্ত বললেন, নিজের সম্পর্কে তুমি যাই বলো, লোকে কিন্তু অন্য কথা বলে ।

লোকে কী বলে ?

বলে, তুমি নাকি অসাধারণ ।

লোকের আর খেয়ে দেয়ে কাজ নেই । কে তোমাকে আবার এসব বলল ?

সচ্চিদানন্দকে তোমার মনে আছে নিশ্চয়ই

থাকবে না কেন ? পাঁজি লোকদের আমার মনে থাকে ।

পাঁজি লোক হেমকান্ত চোখ বড় বড় করে বলেন, কে পাঁজি ? আমার বন্ধু সচ্চিদানন্দ ?

তার কথাই তো হচ্ছে ।

সে পাঁজি হবে কেন ?

কেন হবে তা অত বলতে পারি না । তবে লোক চিনি ।

কীরকম চেনো ?

ভালই চিনি । ললিতার বিয়ের সময় যা একখানা কান্ড করেছিল ।

কী কান্ড ?

সবই কি তোমাকে শুনতে হবে ?

হবে ।

শুনে তোমার ভাল লাগবে না ।

তুমি সবসময়ে আমার মন রেখে কথা বলো ?

তা অবশ্য বলি না । কিন্তু শুনলে যদি তোমার বন্ধুপ্রীতি চটে যায় ?

হেমকান্ত মৃদু ও ম্লান একটু হেসে বললেন, তবু শোনা যাক । একটা মানুষকে নানাভাবেই জানতে হয় ।

মিষ্ণু ও স্নিগ্ধ মুখে রঙ্গময়ী কিছুক্ষণ হেমকান্তের মুখের দিকে চেয়ে থেকে বলে, ললিতার বিয়ের সময় সচ্চিদানন্দবাবু আমাকে ছাদে ডেকে নিয়ে গিয়ে বলেছিল, রঙ্গময়ী, আমি তোমাকে বিয়ে করতে চাই ।

বলো কী ? হেমকান্ত ভারী বিব্রত বোধ করতে থাকেন ।

অবশ্য উনি আমার অবস্থা দেখে দুঃখিত হয়েই প্রস্তাবটা করেন । বলেছিলেন, তোমার তো গতি হচ্ছে না । ভবিষ্যৎ বলতে তো একটা কথা আছে ।

তুমি কী বললে ?

আমি কী বলতে পারি বলে তোমার মনে হয় ?

হেমকান্ত হাঁ করে চেয়ে থেকে বলেন, কী জানি ।

আমি বললাম, আপনার স্ত্রী তো একজন আছেন । উনি বললেন, থাক না । পুরুষমানুষের কি একজনকে নিয়ে থাকলে হয় ?

তুমি তখন কী করলে ?

একটা কথা বলেছিলাম । তাইন্টে উনি খুব ঘাবড়ে গিয়ে প্রস্তাবটা ফিরিয়ে নিলেন ।

কথাটা কী ?

সেটা বলতে পারব না ।

কিছুতেই না ?

কিছুতেই না ।

হেমকান্ত আবার একটা দীর্ঘশ্বাস ছেড়ে বলেন, থাকগে, শুনতে চাই না ।

রঙ্গময়ী কিছুক্ষণ চুপচাপ দাঁড়িয়ে থেকে বলে, যে ছেলেটাকে কাছারি বাড়িতে থাকতে দিয়েছে

তার খুব জ্বর। জানো ?

শুনেছিলাম।

তার বাড়িতে একটা খবর দেওয়া দরকার।

ঠিকানাটা জেনে নিয়ে একটা চিঠি দিয়ে দাও।

রঙ্গময়ী মৃদু হেসে বলে, তোমার যা বুদ্ধি !

কেন, বুদ্ধির আবার কী দোষ হল ?

ছেলেটা পুলিশের তাড়া খেয়ে পালিয়ে এসেছে তা তো জানো।

হ্যাঁ, বলছিল বটে।

তাহলে চিঠি লেখাটা কি ঠিক হবে ? পুলিশ হয়তো চিঠির খোঁজ করবে।

হেমকান্ত একটু বিরক্ত হয়ে বলেন, তাহলে কী করব ?

বরিশালে কাউকে পাঠাও। সে গিয়ে ওর বাবাকে খবরটা গোপনে দিয়ে আসবে।

ডাক্তার কী বলছে ? অবস্থা খুব খারাপ ?

বেশ খারাপ। মাঝে মাঝে জ্ঞান ফিরছে, আবার অজ্ঞান হয়ে যাচ্ছে। জ্বরটাও ছাড়ছে না।

হাসপাতালে দিলে কেমন হয় ?

ভাল হয় না। সেখানে ওর কথা সবাই জানতে পারবে। পুলিশের খাতায় নাম থাকলে হাস্যামা হবে।

সে তো এখানেও হতে পারে।

পারেই তো। মুহুরি গোমস্তারা দেখছে। তারাও বাইরে বলাবলি করবে। স্বদেশী-করা ছেলেদের দেখলেই চেনা যায়।

ছেলেটা কি স্বদেশী বলে তোমার মনে হয় ?

হয়। আমি লোক চিনি।

তাহলে তো বিপদ হল মনু।

একটু হল। কিন্তু তুমি ও নিয়ে ভেবো না। ছেলেটা যদি নাই বাঁচে তাহলে আর কী হবে ? বাঁচবে না ?

বাঁচতে পারে যদি ভাগ্যে থাকে। তেমন সেবায়ত্ন তো হচ্ছে না। দিনের মধ্যে পাঁচ সাতবার মাথায় জল দেবে কে ? আইসব্যাগ ধরে থাকবে কে ?

কেন, তুমি !

ছাই ফেলতে ভাঙা কুলো।

ছাইও তো কাউকে না কাউকে ফেলতে হবে মনু।

রঙ্গময়ী একটা কপট দীর্ঘশ্বাস ছেড়ে বলে, আমি যেটুকু পারি করছি। কিন্তু তবু ওর বাড়ির লোককে খবর দেওয়া দরকার। যদি শেষ পর্যন্ত না বাঁচে তাহলে তাঁরা চোখের দেখাটাও দেখতে পাবেন না।

ঠিক আছে। নগেন মুহুরীর বাড়ি বরিশালে। ওকে যেতে বোলো।

রঙ্গময়ী চলে গেলে হেমকান্ত অনেকক্ষণ চূপ করে বসে রইলেন নিজের জায়গাটিতে। সচ্চিদানন্দর চিঠিটার জবাব দেওয়া দরকার। কিন্তু লিখতে ইচ্ছে করছে না। আর দিন দশেক বাদে তাঁর বাবার বাৎসরিক শ্রাদ্ধ। যথেষ্ট টাকার জোগাড় নেই। তার ওপর দুটি ঘটনা তার মনটাকে আরো খারাপ করে দিল। এক হল, রঙ্গময়ীকে সচ্চিদানন্দ বিয়ের প্রস্তাব দিয়েছিল। দুই, শশিভূষণ ছেলেটির অসুস্থতা।

হেমকান্ত উঠে নিজের পড়ার ঘরে এসে ডেসকের দেওয়াল থেকে চাবি বের করলেন।

সুনয়নীর একটা আলাদা ঘর ছিল। সেটা এখন তালাবদ্ধ থাকে। ঝাড়পৌছও বড় একটা হয় না।

তালা খুলে হেমকান্ত ভিতরে ঢুকলেন। জানালা দরজা বন্ধ থাকায় ভিতরটায় প্রদোষের আলো-আঁধারি আর ভ্যাপসা গন্ধ।

ঘরের সোনা বিক্রি করার মতো দুরবস্থা হেমকান্তের নয়। ইচ্ছে করলেই তিনি ধার পেতে পারেন। কিন্তু ধার জিনিসটাকে বড়ই অপছন্দ তাঁর। বাজারে নগদ টাকার বেশ একটা অভাব চলছে। লোকের হাতে টাকা নেই। আদায় উশুলও কম।

হেমকান্ত দরজাটা বন্ধ করে দিলেন। তারপর গিয়ে সিন্দুকটায় চাবি ঢোকালেন।

জীবনে এই কাজ এই প্রথম করছেন হেমকান্ত। সুনয়নীর গয়নার খোঁজ তিনি কোনোকালে করেননি। কত গয়না বা সোনা আছে তা জানার আগ্রহও তাঁর ছিল না। কাজেই বুকটা কেমন দূর-দূর করছিল। মনে হচ্ছিল গন চুরি করছেন।

এটা চুরিই কিনা তা নিয়ে মনে একটু দ্বন্দ্বও এল হেমকান্তর। গয়নাগুলির বেশীর ভাগই সুনয়নী পেয়েছিল উপহার হিসেবে। তার বাপের বাড়ির যৌতুক আছে, হেমকান্তর মায়ের দেওয়া গয়না আর মোহর আছে, আত্মীয়-স্বজনরাও কিছু কম দেয়নি। হেমকান্তও দিয়েছেন। সুনয়নীর সেই সব সম্পদ হয়তো আইনের বলে তাঁতেই অশায়। তবু হেমকান্ত কিছুতেই সুনয়নীর সম্পদকে নিজের বলে মনে করতে পারছেন না।

আচমকাই একটা অনুভূতি হল তাঁর। তিনি চকিতে ফিরে তাকালেন। খাটের ওই বিছানায় জীবনের শেষ কয়েকটা বছর দূরারোগ্য ব্যাধিতে শুয়ে কাটিয়েছে সুনয়নী। প্রচন্ড কষ্ট পেত। ওখানে শুয়ে আজও যেন সুনয়নী চেয়ে দেখছে। দেখছে তার আদরের সব গয়নাগাটি আর মোহর চুরি করতে ঢুকেছেন হেমকান্ত।

হেমকান্তর সৌজন্যবোধ অসীম।

তিনি সিন্দুকের চাবি ঘুরিয়ে ফেলেও পাল্লাটা খুললেন না। ধীরে ধীরে এসে ফাঁকা খাটটার কাছে দাঁড়ালেন। তাঁর মনে হল সুনয়নী এখন না থাকলেও এক সময়ে সে এই ঘরে বাস করেছে। তার সন্তার, তার অস্তিত্বের স্পন্দন বা স্মৃতি কিংবা রেশ কিছু এখনো রয়েছে গেছে এইখানে। হয়তো সুনয়নী বাস্তবিকই তাঁকে দেখছে না, কিন্তু তিনি যে এ ঘরে ঢুকেছেন তার স্পন্দন সুনয়নীর সেই অদৃশ্য উপস্থিতিতে গিয়ে পৌঁছেছে।

হেমকান্ত মৃদু স্বরে বললেন, তুমি কী রেখে গেছ তা তো জানি না। একটু দেখছি, যদি অনুমতি দাও।

বলে কিছুক্ষণ অপেক্ষা করলেন হেমকান্ত। কোনো জবাব আশা করেননি। পেলেনও না। তবু হেমকান্ত একবার বিছানাটা স্পর্শ করলেন। সুনয়নী যখন অসুস্থ তখন হেমকান্ত খুব একটা তার কাছে আসতেন না। অসুস্থতা বা রোগ ভোগ জিনিসটা তিনি সহিতে পারেন না। সুনয়নীকে সেবা করার অবশ্য অনেক লোক ছিল, ফিরিস্তি একটি নার্স পর্যন্ত। অক্রেশে তার গু-মুত ঘাঁটত রঙ্গময়ী। হয়তো সেই সময়েই সুনয়নী রঙ্গময়ীকে গয়না দিয়েছিল।

হেমকান্ত বিছানাটায় বসলেন। এখান থেকে দেয়ালে গাঁথা সিন্দুকটা মুখোমুখি দেখা যায়। সুনয়নী কি নিজের গয়নাগাটির ওপর নজর রাখত শুয়ে শুয়ে? নইলে দক্ষিণে পা করে শুতো কেন?

ভেবে আবার চিন্তাশ্রিত হলেন হেমকান্ত। আস্তে আস্তে বিছানার জাজিমে হাতটা ঘষতে ঘষতে বললেন, কেন পার্থিব সম্পদের এত পিপাসা ছিল তোমার? কিছুই তো সঙ্গে যায় না। সব ফেলে যেতে হয়।

সুনয়নীর স্তিমিত কণ্ঠ নিজের অন্তরে শুনতে পেলেন হেমকান্ত, সবই জানি। তবু বড় মায়া।



তোমার মতো জাগ্রত বিবেক কজনের থাকে ? তার ওপর আমি মেয়েমানুষ ।

হেমকান্ত মাথা নেড়ে বললেন, সুনয়নী, তুমি মেয়েমানুষ ছিলে, কিন্তু আজ দেহ অবসানের পর আর তাও নও । আত্মা তো পুরুষ বা মেয়ে নয় । আজ বলো সুনয়নী, এই সম্পদ এই দেহ এই আত্মজন এ সবার দাম কী ?

দাম নেই ? তাহলে সব সৃষ্টি হল কেন ?

দাম মানুষ দেয়, সৃষ্টিকর্তা তো দেন না । সোনাকে মহার্ঘ্য বানাল কে ? দেহকে এত মূল্য দিল কে ? আত্মজনকে পৃথিবীর মানুষের থেকে আলাদা করে চেনাল কে ? মানুষই তো ? সভ্য মানুষ । নইলে সেই প্রাগৈতিহাসিক কালে মানুষ তো সোনার দাম কত তা জানত না । দেহের বিলাস সে শেখেনি তখনো । আত্মজন বলতে কেউ ছিল না তার । মানুষ তার পিতৃপরিচয় পর্যন্ত জানত না ।

সে সব জঙ্গলের কথা । মানুষ কি আর তখন মানুষ ছিল ? জন্তুর মতোই তো ছিল ।

এখনো কি তাই নেই সুনয়নী ? পৃথিবীকে তো আমার এখন আরো ভয়ংকর জঙ্গলের জায়গা বলে মনে হয় ।

তুমি চিরকালই একটু কেমন যেন ! না বৈরাগী, না সংসারী । এরকম কেন বলো তো ? তোমার কি বেঁচে থাকতে ভাল লাগে না ? একটু পরমায়ুর জন্য আমি কত ছটফট করেছি ।

বেঁচেও তো থাকতে চাই সুনয়নী । জীবন্মৃত হয়ে থাকতে চাই না । জরা আসছে, মৃত্যু আসছে, সেই সঙ্গে আসছে নানা প্রশ্ন ।

কিসের প্রশ্ন ?

তুমি কি জানো সুনয়নী, তুমি আর আমি মিলে যাদের জন্ম দিয়েছি, আমাদের সেইসব ছেলেমেয়েরা কেমন ?

ওরা খুব ভাল ।

ভাল ? তবে কেন তোমার মৃত্যুর পরই মেয়েরা এসে গয়না চুরি করে নিয়ে যায় ? কেন বউরা এসে তাতে ভাগ বসায় ? যেন ওরা তোমার মৃত্যুর অপেক্ষাতেই ছিল ।

ওসব তো ওদেরই ।

ওদেরই ? হেমকান্ত প্রেতের মতো একটু হাসলেন, মাথা নেড়ে বললেন, ওদের নয়, কারো নয় । পৃথিবীর ধ্বংসের দিনে পৃথিবী আবার সব ফিরিয়ে নেবে । সুনয়নী, এমন কি তোমার আমার ছেলেমেয়ে বলে যাদের জানি তারাও আমাদের নয় । আমরা নিমিস্তমাত্র । আমরা স্রষ্টা নই, জন্মের উপকরণ মাত্র । কাস্টোডিয়ান । কেন এত আমার-আমার বলে হয়রান হয় মানুষ ?

তোমার মতো জাগ্রত বিবেক তো সকলের নেই ।

হেমকান্ত মাথা নেড়ে বললেন, জাগ্রত বিবেক নয় সুনয়নী । যা জাগ্রত তা হল যন্ত্রণা । বড় যন্ত্রণা ।

তুমি মরতে ভয় পাও ?

না । মরতে ভয় পাই না । কিন্তু মৃত্যুর মধ্যে যে রহস্যময়তা আছে তা আমাকে উদ্ভিগ্ন করে তোলে । তোমার মৃত্যুর কথা আমাকে বলবে ?

সুনয়নী একটা দীর্ঘশ্বাস ফেলে । বলে, আমি কি অত সুন্দর করে বলতে পারবো ? লেখাপড়া শিখিনি, ভাষার ব্যবহারও ভাল জানি না ।

বোবাও তো ভাব প্রকাশ করে । তুমি পারবে না ?

পারব কিনা কে জানে । তবে মনে হয়েছিল, গড়িয়ে পড়ে যাচ্ছি । তারপর মনে হল, অনেক দূরে চলে এলাম । এত দূরে কখনো আসিনি । খুব কষ্ট হচ্ছিল ।

কিরকম কষ্ট ?

দোটানার কষ্ট । দুদিকেই টান । গাছ থেকে ফুল ছিঁড়ে নেওয়া হয় তখন ফুলের যেমন লাগে ।

বোঝা গেল না সুনয়নী ।

বোঝানো যায়ও না গো । অপেক্ষা করো, একদিন তোমারও তো ওরকম হবে ।

হ্যাঁ । তার বড় একটা দেবীও নেই ।

কেন ওকথা বলছ ? সেই বালতিটা হাত থেকে পড়ে গেল বলে ? ওটা কিছু নয় ।

কী করে বুঝলে কিছু নয় ?

কিছু নিশ্চয়ই । তবে ওটা বয়সের জন্য নয় ।

তবে কিসের জন্য ?

তোমার সব কাজই একটা নিয়ম শৃংখলায় বাঁধা । নিজেকে তুমি কতগুলি নিগড়ে বেঁধে রেখেছো । গভীর বাইরে কখনো যাও না । তুমি কখনো অস্বাভাবিক কোনো আচরণ করো না । কিন্তু তোমার ভিতরে, খুব গভীরে একটা নিয়ম ভাঙার ইচ্ছে জেগেছে ।

সেটা কীরকম ?

তুমি আর নিয়ম শৃংখলায় থাকতে চাইছো না । কিন্তু সেই পাগল ইচ্ছেকে জোর করে চাপা দিয়ে রেখেছো । তোমার হাত থেকে বালতি পড়ে যায়নি ।

তাহলে ?

তুমি ইচ্ছে করেই বালতিটাকে ছেড়ে দিয়েছিলে ।

॥ ১২ ॥

সারারাত পুলিশ হোটেল ঘিরে রইল বটে, কিন্তু সন্দের পর কিছু ছেলেছোকরা জুটে দূর থেকে ঢিল আর কিছু গালাগাল ছুঁড়তে লাগল । হোটেলের কয়েকটা কাচ ভাঙা ছাড়া তেমন গুরুতর ঘটনা নয় সেটা । তবু ভয়ে কাঁপুনি ধরে গেল রেমির । ভয়ে মুখে কথা আসছে না, বক্তৃহীন ফ্যাকাসে মুখে বিছানায় কন্ডল জড়িয়ে বসে রইল সে ।

ধুব একবার বলল, তুমি খুব ঘাবড়ে গেছ । একটু ব্র্যান্ডি খাবে ? খেয়ে শুয়ে পড়ো । গাও গরম হবে, ঘুমও চলে আসবে ।

রেমি মাথা নেড়ে জানাল, খাবে না ।

ধুব আর সাধল না । পাজামা চড়িয়ে, শাল চাপিয়ে ঘর থেকে বেরোনোর মুখে বলল, সমীর বোধহয় এখনো আছে । ওকে তোমার কাছে পাঠিয়ে দিচ্ছি । একটু কমপ্যানি দিতে পারবে ।

রেমি হঠাৎ উত্তেজিত গলায় জিজ্ঞেস করে, তুমি কোথায় যাচ্ছে ?

লাউনজে । পুলিশ থেকে আমার একটা স্টেটমেন্ট নিতে এসেছে ।

আমিও যাবো । বলে উঠতে গেল রেমি । কিন্তু পায়ে একরশ্মি জোর পেল না সে । শরীরে ঠকাঠক কাঁপুনি । পা দুটো অবশ । আবার বসে পড়ল ।

ধুব উদাস গলায় বলল, গিয়ে কী লাভ ? আমি আবার মদ খাই কিনা দেখতে চাও ? খেলেও তো ঠেকাতে পারবে না ।

ধুব বেরিয়ে যাওয়ার পর রেমি টেলিফোনে কলকাতার লাইন চাইল । লাইটনিং কল । মিনিট পনেরো সময় যেন অন্তহীনতায় প্রসারিত হতে লাগল । পনেরো মিনিটের মধ্যেই সে পি বি একস অপারেটরকে বার দুই তাগাদা দিল এবং কৃষ্ণকান্তর ফোন নম্বর মনে করিয়ে দিল ।

অবশেষে কৃষ্ণকান্ত লাইনে এলেন, বউমা, তোমরা ভাল আছো তো ?

না বাবা, আমাদের ভীষণ বিপদ । চারদিক ঘিরে ফেলেছে গুণ্ডারা, ঢিল মারছে । আমরা বোধহয় দার্জিলিং থেকে আর ফিরতে পারব না ।

কৃষ্ণকান্ত একটু চিন্তিত গলায় বলেন, কেন, এখনো পুলিশ পিকেট দেয়নি ?

দিয়েছে, কিন্তু তবু আমরা বোধহয় ফিরতে পারব না ।

দরকার হলে পুলিশ গুলি চালাবে । তুমি চিন্তা কোরো না ।

গুলি ! বলে আত্ননাদ করে ওঠে রেমি, গুলি চালাবে কেন ?

কৃষ্ণকান্ত একটু হাসলেন, গুলি চালাতে হয়তো হবে না, কিন্তু ছেলেগুলো যদি বাড়াবাড়ি করে তাহলে তো একটা কিছু করতে হবে । কী বলো ?

তা বলে গুলি ? আমি তাহলে ভয়েই মরে যাবো ।

কৃষ্ণকান্ত শান্ত স্বরেই বললেন, লামা নামে একজন লোক তোমার সঙ্গে দেখা করবে । তোমার কাছে বোধহয় হাজার তিন চারেক টাকা এখনো আছে । না ?

আছে, বাবা, আপনি যা দিয়েছিলেন তার কিছুই খরচ হয়নি । পুরো পাঁচ হাজারই আছে ।

ঠিক আছে ওটা থেকে লামাকে দু হাজার টাকা দিও ।

দেবো, কিন্তু, এই বিপদ থেকে কী করে বেরোবো বাবা ?

ওটা নিয়ে তো আমিই ভাবছি । তুমি কিছু খেয়েছো এখনো ?

না, খিদে নেই ।

খিদে নেই তো ভয়ে । ভাল করে মুগীর ঝোল দিয়ে ভাত খাও, তারপর শুয়ে পড়ো । আমি লামার সঙ্গে কনট্যাক্ট করেছি, তোমাকেও ফোন করতাম ওকে টাকাটা দেওয়ার জন্য ।

টাকা নিয়ে লামা কী করবে বাবা

ওই ছেলেগুলোকে দেবে । ওরা বেকার ছেলে, কাজকর্ম নেই, হজুগ পেলেই একটা কিছু করে বসতে চায় । টাকাটা হাতে পেলেই ফুটি করতে চলে যাবে । কিন্তু খবদার, নিজে গিয়ে আবার ওদের টাকা সেধো না । যা করবার লামা করবে । ও হচ্ছে আমার পলিটিক্যাল এজেন্ট ।

রেমি উদ্বেগের সঙ্গে বলল, আপনার ছেলেকে পুলিশ কী সব জিজ্ঞেস করছে । ওর সঙ্গে কথা বলবেন ?

কৃষ্ণকান্ত বললেন, না । কথা বলে লাভ নেই । ও কেন ও কাজ করেছে জানো ? ইলেকশনের মুখে আমাকে একটা স্কাণ্ডালে জড়ানোর জন্য । ওকে কিছু বলা বৃথা । তবে তুমি যদি পারো ওকে ইমিউন রেখো ।

কিন্তু আমি যে পারছি না বাবা !

চট করে তো পারবে না । সময় লাগবে । যদি মাথা ঠাণ্ডা রেখে চলো তাহলে হয়তো একদিন ওকে কনট্রোল করতে পারবে । তোমার ওপর আমার অনেক ভরসা ।

এমন সময়ে একটা ঢিল এসে ঝনঝন করে উত্তর দিককার শার্শি ভাঙল । চমকে উঠল রেমি । টেলিফোনে কৃষ্ণকান্তকে শুনিয়েই হাউমাউ করে কেঁদে ফেলল, আমি যে ভীষণ ভয় পাচ্ছি । আমার মাথা কেমন যেন গুলিয়ে যাচ্ছে । আমি কী করব ?

একসচেনজের তিন মিনিটের ওয়ার্ণিং পার হয়েও কান্নাটা গড়াল । কৃষ্ণকান্ত বাধা দিলেন না । রেমির রুদ্ধ আবেগটা একটু কমে এলে বললেন, শোনো বউমা, ধুব খুব বেশীদিন বেঁচে থাকবে বলে আমার মনে হয় না । হয় খুন হয়ে যাবে, নয় তো লিভার পচাবে, না হয় তো মাতাল অবস্থায় গাড়ি টাড়ি চাপা পড়বে । ওর আয়ু বেশীদিন নয় ।

রেমি শিউরে উঠে বলল, কী বলছেন ?

কথাটা শুনতে খারাপ, তবু যুক্তিসঙ্গত । কে ওকে সারাক্ষণ চোখে চোখে রাখবে বলো ? সব পরিস্থিতিতে তো আর আমি বাঁচাতে পারব না । বিয়ের সময় সুপাত্রের হাতে কন্যা সম্প্রদান করা হয় । আমি কিন্তু মা, ধুবকেই তোমার হাতে সম্প্রদান করেছি । এখন তুমি যা বুঝবে করবে । অপাত্রে পড়েছো বলে যদি সারাজীবন মনে মনে আমাকে গালমন্দ করো তো কোরো, তবু আমার ছেলেটাকে দেখো । ওর কেউ নেই । বাস্তবিকই কেউ নেই ।

শেষ দিকে কৃষ্ণকান্তর গলাটা ভারী শোনাল কিনা তা ভাল বুঝতে পারছিল না রেমি। পাথুরে কৃষ্ণকান্ত সহজে গলেন না। তবু যদি গলাটা ভারী শুনিতে থাকে তবে সেটা কৃষ্ণকান্তর অভিনয়ও হতে পারে। রেমিকে একটা পতিত উদ্ধারের সংকাজে উদ্বুদ্ধ করার জন্যই হয়তো অভিনয়টুকুর দরকার ছিল।

টেলিফোন রেখে রেমি হাঁটুতে মুখ গুঁজে কান্না চাপবার বৃথা চেষ্টা করতে করতে ফেঁপাচ্ছিল। এমন সময় দরজায় টোকা পড়ল। বাইরে থেকে সমীর ডাকল, বউদি।

সেই সময়ে রেমির মাথাটা হঠাৎ খরাপই হয়ে গিয়ে থাকবে। বিয়ের পর থেকে কাণ্ডজ্ঞানহীন, হিতাহিত জ্ঞানশূন্য একটা লোকের সঙ্গে তাকে তিলে তিলে পাগল করে তুলেছে। তার ওপর আছে দেহ ও মনের যৌবনোচিত চাহিদায় দিনের পর দিন বঞ্চনা। কৃষ্ণকান্ত সুকৌশলে যে গুরুভার তার ওপরে চাপাতে চাইছেন তাতেও তার মন বিদ্রোহী হয়ে থাকবে। ঠিক কী হয়েছিল তা বলা মুশকিল তবে এই সময়ে আর একটা মস্ত পাথর এসে উত্তর দিককার আর একটা শার্শি ভাঙল।

রেমি পাগলের মতো গিয়ে দরজা খুলেই আঁকড়ে ধরল সমীরকে, আমাকে এক্ষুণি নিয়ে চলুন এক্ষুণি! আমি আর এক মুহূর্তও এখানে থাকতে চাই না। প্লীজ—

অপ্রতিভ সমীর নীচু জরুরী গলায় বলল, মিষ্টার লামা আপনার সঙ্গে দেখা করতে এসেছেন। এই যে—

রেমি সামলে গেল। ঠিক সমীরের পিছনেই লোকটা দাঁড়ানো। দৃশ্যটা কৃৎকুতে দুই চোখে দেখছে। গায়ে ওভারকোট, মাথায় টুপি, মুখে তীব্র মদের গন্ধ। হাসতেই চোখদুটো মুখের খলখলে চর্বির মধ্যে অদৃশ্য হয়ে গেল।

রেমি লজ্জা পেয়ে সরে এল ঘরে। সমীরের সশ্রদ্ধ ভাব দেখে সে বুঝতে পারছিল, তার স্বশুরের পলিটিক্যাল এজেন্ট লামা দার্জিলিঙের কেওকেটা লোক। তার চেহারাতেও যথেষ্ট বুদ্ধি এবং আত্মবিশ্বাসের ছাপ আছে। তবে খুব হাসছিল লোকটা।

লজ্জা ঢাকতে রেমি তার স্টুকেস খুলে দুহাজার টাকা বের করে দিয়ে বলল, আমার স্বশুরমশাই টাকাটা আপনাকে দিতে বলেছেন।

লামা টাকাটা বুকপকেটে রেখে ভাঙা বাংলায় জিজ্ঞেস করল, খুব ভয় পাচ্ছেন তো।

আর একটা ঢিল এসে শার্শি ভাঙতেই কাচের টুকরো ছটকে, পড়ল চারদিকে। তবে ঘরখানা বড় এবং উত্তরের জানালায় ভারী পর্দা টানা দেওয়া থাকায় তাদের গায়ে এসে পড়ল না।

রেমিকে কিছু বলতে হল না, পরিস্থিতি বুঝে নিয়ে লামা নিজেই মাথা নাড়ল। মৃদুস্বরে বলল, সিচুয়েশন ইজ গ্রেভ অ্যাণ্ড স্যাড। লোকে এটার মধ্যে পলিটিক্যাল মোটিভেশন পেয়ে যাবে অ্যাণ্ড দেয়ার উইল বি স্ক্যাণ্ডাল। এনিওয়ে, আমি দেখছি। আপনারা আজ একটু বেশী রাতে কিংবা কাল খুব ভোরে দার্জিলিং কুইট করলে ভাল হয়।

লামা চলে গেল এবং ঠিক দশ মিনিটের মধ্যেই ভোজবাজিতে থেমে গেল বাইরের হাস্যাম।

শুকনো মুখে সমীর বলল, ম্যাডাম কী করবেন?

আমি চলে যাবো।

কিন্তু ধুবাবু যেতে চাইছেন না। আমি একটু আগেই লাউনজে গুঁর সঙ্গে কথা বলেছি।

ও না গেলে যাবে না, আমার কিছু করার নেই। আমি যাবো।

একা?

আপনি আমাকে শিলিগুড়ি পর্যন্ত নিয়ে চলুন। কাল আমি প্লেন ধরে কলকাতা ফিরে যাবো।

কাজটা কি ঠিক হবে?

অত চিন্তা করতে পারব না। আমি যাবো। আপনি গাড়ি রেডি রাখবেন।

গাড়ি রেডিই আছে। তবে শিলিগুড়ি থেকে কাকা আসছেন। তাঁর জন্য একটু ওয়েট করা ভাল।

রেমি জেদী মেয়ের মতো মাথা নেড়ে বলল, আমি অপেক্ষা করতে রাজি নই।

একটু রিস্ক নিচ্ছেন বউদি।

নিলে নিচ্ছি। অবশ্য যদি আপনার কোনো অসুবিধে না থাকে—

সমীর একটু হেসে বলল, অলওয়েজ অ্যাট ইওর সারভিস। আপনি জিনিসপত্র গুছিয়ে নিন। আমি ধুববাবুকে একটু জানিয়ে আসি। নইলে হয়তো ভাববেন তাঁর বউকে নিয়ে পালিয়ে গেছি।

রেমি স্পষ্ট করে সমীরের দিকে চেয়ে বলল, আমি কিন্তু সত্যিই পালাচ্ছি। আপনি ওকে জানালে জানাতে পারেন, কিন্তু আমি আর ওর সঙ্গে থাকছি না।

বলেন কি ?

আমি ডিসিশন নিয়ে ফেলেছি। কলকাতায় ফিরেই ডিভোর্সের দরখাস্ত করব।

সমীরের চোখেমুখে সত্যিকারের আতঙ্ক ফুটে উঠল। আমতা আমতা করে বলল, এটা তো একটা মেজর ডিসিশন। এত তাড়াতাড়ি নিলেন ?

ডিসিশনটা তাড়াতাড়ি নিলে জীবনটা আবার নতুন করে তাড়াতাড়ি শুরু করতে পারব। আমাদের সম্পর্কটা কেমন তা তো আপনাকে বলেছিও।

বলেছেন ঠিকই। কিন্তু আমি ভাবছিলাম ধুববাবুর এসব ব্যাপার বোধহয় খুব ডীপ সেট নয়। খানিকটা অভিনয়ও থাকতে পারে।

তার মানে ? প্রায় চৈতৈয়ে উঠল রেমি।

উনি হয়তো সকলকে বিপন্ন করে তুলে একধরনের আনন্দ পান। যাকগে, আপনি নিশ্চয়ই সেটা আমার চেয়ে ভাল বোঝেন। মার কাছে মাসির গল্প করে লাভ কি ?

কথাটা বিশ্বাস করতে ইচ্ছে হয়েছিল রেমির। কিন্তু সে তো জানে, তা নয়। রেমি ম্লান হেসে মাথা নেড়ে বলল, অভিনয়টয় নয়। আমি জানি। কখন বেরোবেন

রাত দশটার মধ্যে দার্জিলিং ঘুমিয়ে পড়ে। দশটায় স্টার্ট দিলে আমি আপনাকে সাড়ে বারোটায় শিলিগুড়ি পৌঁছে দিতে পারব।

বাড়ির লোক আমাকে অত রাতে দেখে কিছু বলবে না ?

বলতে পারে। তবে আমি একটা টেলিফোন করে আগেই জানিয়ে দেবোখান। তাহলে আর কোনো প্রশ্ন উঠবে না।

সমীর চলে গেলে রেমি নিশ্চিন্ত হয়ে একটা শ্বাস ফেলল

প্ল্যানটা ঠিকমতোই এগোচ্ছিল। রেমি বাস্তব গুছিয়ে নিয়েছে। অনিচ্ছের সঙ্গেও ঘরে খাবার আনিয়ে খানিকটা খেয়েছে। গরম পোশাক পরে অপেক্ষা করেছে সমীরের জন্য। আর তার পালানোর পথ বিঘ্নহীন করতে ধুব গিয়ে ঢুকেছে বার-এ। রাত নটার মধ্যে তার চেতনা সম্পূর্ণ বিলুপ্ত। তাকে একবার বলেছিল সমীর, বউদি শিলিগুড়ি চলে যাচ্ছেন ধুববাবু। আপনিও যাবেন তো ?

ধুব মাছি তাড়ানোর মতো হাত নেড়ে, এই তুচ্ছ প্রসঙ্গ উড়িয়ে দিয়েছে।

রাত দশটার কয়েক মিনিট আগে বেয়ারা এসে রেমির মালপত্র নিয়ে গাড়িতে তুলল। রেমি নেমে এল নীচে। যখন গাড়িতে উঠতে যাবে তখনই আকস্মিক ঘটনাটা ঘটল।

হোটেলের সামনের বাগানের গাছপালার আড়াল থেকে নিঃশব্দে এগিয়ে এল লামা। গায়ে ওভারকোট, মুখে মার্কারা হাসি। তবে হাসিটা তখন আর স্বতঃস্ফূর্ত নয়। রেমিকে জিজ্ঞেস করল, কোথায় যাচ্ছেন ? ভীষণ চমকে উঠেছিল রেমি। শীত বাতাসের একটা চাবুক যেন তাকে কাঁপিয়ে দিয়ে গেল। কষ্টে বলল, আমি চলে যাচ্ছি।

ধুববাবু কোথায় ?

ও যাচ্ছে না ।

কেন যাচ্ছে না ?

রেমি নিজেকে সামলে নিয়েছে । ভুকুটি করে বলল, সেটা তো ও জানবে, আমাকে জিজ্ঞেস করছেন কেন ?

সমীর সামনের সীটে উঠতে গিয়েও লামাকে দেখে স্থিরচিত্র হয়ে দাঁড়িয়েছিল । তার দিকে ফিরে লামা হাসিমুখে বলল, কৃষ্ণকান্তবাবুর সঙ্গে আমার টেলিফোনে কথা হয়েছে । উনি চান ধুববাবুকে ওঁর স্ত্রীর সঙ্গেই কলকাতায় পাঠিয়ে দেওয়া হোক । আপনি রেমি দেবীকে নিয়ে কোথায় যাচ্ছেন ?

লামাকে দেখে সমীর যে ভয় পেয়েছে তাতে সন্দেহ নেই । সে কাঁধটা উঁচু করে বলল, ধুববাবুর পারমিশন নিয়েই উনি যাচ্ছেন । আমি পৌছে দিতে যাচ্ছি ।

লামা একটু ক্ষুব্ধ গলায় বলল, কাজটা ঠিক হল কি ? ধুববাবু এখন সেনসে নেই, এ সময়ে ওঁর স্ত্রী চলে যাচ্ছেন !

আমার কিছু করার ছিল না মিষ্টার লামা ।

লামা রেমির দিকে ফিরে বলল, আপনি যেতে চাইছেন, কিন্তু এভাবে যেতে পারবেন না । হাঙ্গামা থেমেছে বটে কিন্তু রাস্তা এখনো পরিষ্কার নয় । দেখবেন ? আসুন আমার সঙ্গে ।

লামা গেট-এর দিকে হাঁটতে লাগল । সমীর নীচু স্বরে রেমিকে বলল, কিছু করার নেই । চলুন দেখা যাক ।

ফটকের কাছে এনে লামা তাদের দেখাল । হোটেলের সামনেই একটা ঢাল । রাস্তাটা মোড় নিয়ে পাইন গাছের একটু জড়ামড়ির মধ্যে ডুবে গেছে । সেখানে আবছা আলোয় কয়েকটা সিগারেটের আগুন ঠিকরে ঠিকরে উঠছে । অস্তুত দশ পনেরটা ছেলে অপেক্ষা করছে রাস্তা জুড়ে ।

রেমি আতঙ্কিত হয়ে বলল, ওরা কী চায় ?

লামা মৃদু হেসে বলে, নাথিং । শুধু আপনাদের বেরোনোর রাস্তাটা আটকে আছে । এখন যাওয়াটা সেফ নয় মিসেস চৌধুরি ।

তাহলে কখন ?

কাল সকালে ।

তখন সেফ হবে ?

হবে । ধুববাবু আপনাকে অ্যাকমপ্যানি করবেন । কোনো ট্রাবল হবে না । এখন ঘরে ফিরে যান ।

হতাশ রেমি ফিরে এল ঘরে । ধুবকে ধরাধরি করে এনে বিছানায় দিয়ে গেল কয়েকজন বেয়ারা ।

পরদিন প্রকাশ্য দিনের আলোয় তারা দার্জিলিং ছাড়ল । রেমি, ধুব আর সমীর । কাশ্মিয়ার-এ চা খেতে নেমে এক ফাঁকে সমীর চুপি চুপি রেমিকে বলল, বউদি, একটা বিপদ বাঁধিয়ে রেখে গেলেন কিন্তু ।

কী বিপদ ?

আপনি কাল একবার আমাকে জড়িয়ে ধরেছিলেন, মনে আছে ?

রেমি লজ্জা পেয়ে বলে, সে তো ভয়ে ।

সমীর বিকৃত মুখ করে বলে, ভালবাসায় নয় তা জানি । কিন্তু মিষ্টার লামা সেটাকে ওভাবেই ইনটারপ্রেট করেছে । লোকটার ওয়ান ট্র্যাক মাইণ্ড । একবার যা ভেবে নেবে তা থেকে আর সরানো যাবে না । খুব সম্ভব আপনার স্বশ্রবকেও ব্যাপারটা জানিয়েছে ।

সে কী ?

সেটাই বিপদের । কৃষ্ণকান্তবাবু যদি কাকাকে জানান তাহলে আমি খুব মুশকিলে পড়ে যাবো ।

কিসের মুশকিল ? বুঝিয়ে বললেই হবে । আমার স্বশ্রব অবুখ লোক নন ।

সমীর তবু নিশ্চিন্ত হ'ল না। কেমন স্রিয়মাণ হয়ে রইল।

আচমকই রেমি জিজ্ঞেস করল, আসল ভয়টা কাকে বলুন তো ? ছন্দাকে ? ওকে আমি চিঠি লিখে জানিয়ে দেবো যে, আপনি সত্যিই আমার প্রেমে পড়েননি।

এ কথায় কাগজের মতো সাদা হয়ে গেল সমীর। অবিশ্বাসভরা চোখে রেমির দিকে চেয়ে থাকল কিছুক্ষণ। কিন্তু প্রতিবাদ করল না। খুব বড় একটা শ্বাস ফেলে বলল, মেয়েদের চোখ বোধহয় সবই দেখতে পায়। কিন্তু ব্যাপারটা ভীষণ গোপন বউদি। ভীষণ গোপন।

ঘেন্নায় রেমির ঠোঁট বঁেকে গেল। ধুব, মাতাল ও মতিচ্ছন্ন ধুবর চোখ তাহলে ভুল করেনি।

আশ্চর্য, সেই মুহূর্তে তার ধুবকে আবার ভালবাসতে ইচ্ছে করল। আর অস্থির ব্যাকুল হৃদয়ে সে অপেক্ষা করতে লাগল ধুবকে একা পাওয়ার জন্য।

পেল ট্রেনে। আবার সেই কুপে কামরা। সে আর ধুব।

রেমি ঝাঁপিয়ে পড়ল ধুবর ওপর, বলো তোমার পাগলামি আর মাতলামি সব অভিনয় ! সব ভাঁড়ামি। বলো তুমি অস্বাভাবিক নও ! এত বুদ্ধি এত চোখ কখনো কোনো মাতালের থাকে ? বলো ! বলছ না কেন ?

সেই আক্রমণে ধুব যেমন অবাক তেমনি বিপন্ন। বলল, আরে কী করছ ? ডাকাত পড়েছে ভেবে লোকজন ছুটে আসবে যে !

আসুক। তবু তুমি বলো এসব তোমার অভিনয়, এগুলো কিছুই সত্যি নয় !

ধুব একটু বিচ্ছুর হাসি হেসে বলল, তাহলে খুশি হবে ?

হবো। তাহলে এমন খুশি হবো যে আনন্দে ট্রেন থেকে লাফিয়ে পড়ব নীচে। খুব জোরে হো-হো করে হাসব। কৈদেও ফেলতে পারি।

ধুব কিছুক্ষণ থম ধরে বসে রইল চুপচাপ। তারপর একটা দীর্ঘ শ্বাস মোচন করে বলল, রেমি, তোমার সমস্যা একটাই। আমি মদ এবং পাগলামি ছাড়লেই তোমার সেই সমস্যাটা বোধকরি মিটে যায়। কিন্তু আমার সমস্যাটা অত সরল নয়।

তোমার কাছে ভিক্ষে চাইছি। পায়ে পড়ছি।

ধুব একটু হেসে বলে, দার্জিলিং-এ আমাকে ফেলে চলে আসতে চেয়েছিলে, তবু কথটা বিশ্বাস করছি। আমি নিজেও লক্ষ্য করেছি তুমি আমাকে ভালবাসার চেষ্টা করছ।

চেষ্টা নয়। আমি তোমাকে ভালবাসি গো।

সেটাও মানলাম। বাট আই হ্যাভ টু সেটল মাই অ্যাকাউন্টস উইথ আদার পিপল। রেমি, আপাতত আমার কাছে কিছু প্রত্যাশা কোরোনা।

## ॥ ১৩ ॥

“ভাই সচ্চিদানন্দ, তোমার সহিত আর পারিলাম না। বহু দূরে অবস্থান করিয়াও তুমি আমার রোগ নির্ণয় করিয়া নিদান পাঠাইয়াছ। তোমার নাড়ীজ্ঞান প্রখর বলিতেই হইবে। তোমার নিদানটি গ্রহণ করিলে রোগীর ধাত ছাড়িয়া যাইবে কিনা তাহা অবশ্য ভাবিয়া দেখ নাই। উপরন্তু আমার নানা অক্ষমতা, অপদার্থতার নজির তুলিয়া আমি কোন শ্রেণীর মানুষ তাহাই প্রমাণ করিবার চেষ্টা করিয়াছি।

“বয়স্য সচ্চিদানন্দ, সুখের কথা হইল আমি কোন শ্রেণীর মানুষ তাহা আমার অজ্ঞাত নহে। শৈশবের কিছুই আমি ভুলি নাই। ঈশ্বরকৃপায় আমার স্মৃতিশক্তি ভালই। আপনমনে থাকি এবং স্মৃতি লইয়াই সময় কাটে বলিয়া সহজে কিছু ভুলিয়াও যাই না।

“দুইটি ভাইয়ের মাঝখানে আমি নিতান্তই খাপছাড়া। ভগ্নীদের কথা বাদ দিতেছি। কারণ

নারীদের বিচারের মাপকাঠি আলাদা। কিন্তু আমাদের তিন ভাইয়ের মধ্যে আমিই যে সব দিক দিয়া অযোগ্য ও অপদার্থ ছিলাম তাহা আমার পিতাঠাকুর হইতে শিক্ষকরা সকলেই আমাকে বারংবার বুঝাইয়াছেন এবং আমিও বুঝিয়াছি।

“আমার জ্যেষ্ঠ বরদাকান্ত বাল্যকালে অত্যধিক দুষ্ট ছিলেন। তাঁহার অনেক অভিযানে আমিও সঙ্গে গিয়াছি। একবার রহিম সাহেবের পাটবোঝাই নৌকায় তিনি রাত্রিবেলা অগ্নিসংযোগ করেন। নিতান্তই দুষ্টমী, অন্য উদ্দেশ্য ছিল না। কিন্তু সেই আগুনে একজন ঘুমন্ত মাল্লা, অর্ধদন্ধ হইয়া মরিতে বসিয়াছিল। ভোরবেলা নৌকা ছাড়িবে বলিয়া মাল্লারা পাটের গাঁটের খাঁজে ঢুকিয়া ঘুমাইয়া লইতেছিল। সেই হতভাগ্য মাল্লাটি সময়মতো জলে লাফাইয়া পড়িতে পারে নাই। আজ বরদাকান্ত সাধু হইয়াছেন। যদি এখন কেহ গিয়া তাঁহাকে সেই শৈশবের দুষ্কার্যটির কথা স্মরণ করাইয়া তিনি যে কত বড় অসাধু তাহা প্রমাণ করিবার চেষ্টা করেন তাহা হইলে কেমন হয়?

“এই যে আজ তুমি কংগ্রেসে নাম লিখাইয়া দেশভক্ত হইয়াছ ইহা তো গৌরবেরই কথা। কালক্রমে একদিন কংগ্রেসের নেতা হইয়া ওঠা তোমার পক্ষে বিচিত্র নহে। কিন্তু সেইদিন যদি কেহ গিয়া তোমাকে বলে যে মহাশয় চামেলী নান্নী মহিলাটির সঙ্গে একদা আপনার সম্পর্কটি কতদূর ঘনিষ্ঠ ছিল তাহা আমরা জানি। তখন কেমন হইবে?

“তোমাকে আঘাত করিবার জন্য প্রসঙ্গটি উত্থাপন করি নাই। আমি জানি মানুষকে বিচার করিতে হইলে তাহার অতীতেরও খানিকটা বিশ্লেষণ প্রয়োজন এবং তুমি আমার শুভাকাঙ্ক্ষী বলিয়াই সেই কাজ করিবার চেষ্টা করিয়াছ। কিন্তু আমার বর্তমান সমস্যাটি অত সরল ও লঘু নহে। আমি মানি, সুনয়নীর সহিত আমার সম্পর্ক কিছুটা শীতল ছিল। দোষ তাহার নহে, আমার। আমি নিজেই বরাবর কিছু শীতল স্বভাবের লোক। আমি সৌন্দর্য ভালবাসি, তাহা লইয়া ঘাটাছানা করিতে ইচ্ছা হয় না। সুনয়নীর সৌন্দর্য আমি দূর হইতে উপভোগ করিতে ভালবাসিতাম, যেমন লোকে ফুল বা চাঁদকে উপভোগ করে। তাহার সহিত আমার দূরত্ব ছিল তাহাও স্বীকার করি এবং বলি, জীবনটাকে উপভোগ্য করিয়া তুলিবার জন্য একটু দূরত্বেরও প্রয়োজন আছে। মুখের নিকটে আয়না ধরিলে কি মুখখানা ভাল দেখা যায়? একটু দূরে ধরিতে হয়। সুনয়নীর সহিত আমার সেই দূরত্বটুকু ছিল। কিন্তু তাহা যে তোমাদের কাছে প্রেমহীনতা বা ভালবাসার অভাব বলিয়া প্রতিভাত হইবে তাহা ভাবিয়া দেখি নাই। এখন অবশ্য ভাবিয়াও কিছু করা যাইবে না। যাহা ঘটিয়া গিয়াছে তাহার সবকিছুই আর সংশোধন করা তো সম্ভব নহে।

“তুমি বৌদ্ধ দর্শন অবশ্যই পড়িয়াছ। যে প্রদীপশিখাটি নিষ্কম্প ও স্থির হইয়া জ্বলিতেছে তাহাকে একটিই প্রদীপশিখা বলিয়া মনে হয় বটে, কিন্তু আসলে প্রতিটি নিমেষেই শিখাটি মরিয়া নূতন একটি শিখা জন্ম লইতেছে। কিন্তু তাহা এত দ্রুত ঘটিতেছে যে আমাদের চক্ষু তাহা ধরিতে পারিতেছে না। ভাই সচ্চিদানন্দ, আমার তো মনে হয় মানুষও তাহাই। ক্ষয় ও পূরণ প্রকৃতিরই নিয়ম। সেই নিয়ম অনুসারেই আমাদেরও নিত্য ক্ষয় ও পূরণ ঘটিতেছে। আর তাহারই ভিতর দিয়া চলিতেছে বলিয়া একটি মানুষও আসলে অনেকগুলি মানুষের সমষ্টিমাত্র। আমি যদি আজ বলি, খানু পাগলার তাড়া খাইয়া যে হেমকান্ত পলাইয়াছিল সে আমি নহি তাহা হইলে কি তদ্বগতভাবে ভুল হইবে?

“তোমাকে দর্শন বিষয়ে জ্ঞান দেওয়ার জন্য প্রসঙ্গটির অবতারণা করি নাই। বলিতেছিলাম, মানুষের পরিবর্তন ঘটে। আজিকার মানুষটি যাহা করিতেছে তাহা দিয়া পঁচিশ বছর পরের লোকটিকে বিচার করা সর্বাত্মক যথাযথ না হইতেও পারে। পাটের নৌকায় আগুন লাগাইয়াছিল বলিয়া বরদাকান্তের বৈরাগ্য বাতিল হইয়া যায় না। চামেলীভক্ত সচ্চিদানন্দেরও দেশভক্তিতে ভেজাল ঢোকে না।

“কিন্তু বিতর্ক থাকুক। ইহাতে আমাদের কাহারও লাভ নাই। উপরন্তু নানাবিধ ঝামেলায় আমারও মনটা বড় স্থির নাই। কিছুদিন আগে শশিভূষণ গঙ্গোপাধ্যায় নামে একটি ছোকরাকে আমার



বাসায় আশ্রয় দিয়াছিলাম । তাহাকে নাকি পুলিশ স্বদেশী মনে করিয়া তাড়া করিয়াছে । বেচারার দিন দুই আমাদের আমবাগানে অনাহারে লুকাইয়া ছিল । কিন্তু আশ্রয় দেওয়ার পরই ছেলোট সাঙ্ঘাতিক অসুস্থ হইয়া পড়িয়াছে । ডাক্তার তেমন ভরসা দিতেছে না । সে বলিয়াছিল তাহার বাড়ি বরিশালে, পিতা শিক্ষকতা করেন । কিন্তু পুলিশের ভয়ে তাহার বাড়িতেও খবর দিতে পারিতেছি না । সে বাঁচিবে কি মরিবে জানি না, কিন্তু আপাতত তাহার দায় যে আমার উপর বতহিয়াছে তাহাতে কোনো সন্দেহ নাই ।

“কথা হইল আমি এই অজ্ঞাতকুলশীল শশিভূষণের দায় স্বন্ধে নিলাম কেন । দু মুঠা খাইতে দিয়া তদুণেই তাহাকে বিদায় দিতে পারিতাম । বিশেষ করিয়া ইংরাজ রাজত্বে পুলিশের খাতায় নাম-লেখানো লোককে আশ্রয় দেওয়ার প্রশ্নই ওঠে না । তবু দিলাম । কেন দিলাম তাহা জানিলে তুমি হাসিবে । দিলাম তোমার কথা মনে করিয়া ।

“ভাই সচ্চিদানন্দ, দেশ কাল পরিস্থিতি সম্পর্কে আমি তোমার মতো সচেতন নই একথা ঠিক । দেশের কোথায় কী ঘটিতেছে, ইংরাজরা কত টাকার জিনিস বৎসরে এই দেশে রফতানি করিতেছে, স্বদেশীরা কয়টি ইংরাজ মারিল এত খবর বিস্তারিতভাবে আমি রাখি না । তবে মানুষ তাহার বিশেষ সমাজ ও পারিপার্শ্বিকের মধ্যেই বাঁচিয়া থাকে, তাই দেশ কাল পরিস্থিতিকে সম্পূর্ণ এড়াইতেও পারে না । আমার পরিবেশ সীমাবদ্ধ বটে, তবে এখানেও বহির্বিশ্বের তরঙ্গ আসিয়া লাগে । আজকাল আরও বিশেষ করিয়া লাগে, কারণ আদায় উসুল হ্রাস পাইয়াছে, জমিদারীর আয়ে বৃদ্ধি আর মর্যাদা রক্ষা হয় না । আয় কেন কমিল তাহা অনুসন্ধান করিতে গিয়া দেশ কাল পরিস্থিতির আঁচ পাইলাম । আমাদের মতো ঘরকুনো ও আত্মসুখী মানুষরাও তাই সর্বত্র পরিবেশকে এড়াইয়া চলিতে পারে না । তবে দেশ যতই সংঘাতসংকুল ও সমস্যা কণ্টকিত হউক না কেন কিছু লোক নিষ্পৃহ ও উদাসীন থাকিবেই । আমি এই দলের । ইহারা আন্দোলন করিতে পথে নামিবে না, বিদেশী দ্রব্যের বহুত্বসবে যোগদান করিবে না, ইংরাজ মারিবে না, পতিতোদ্ধার করিবে না, ইহারা কেবল বসিয়া ভাবিবে ।

“তোমার এই অপদার্থ বয়সটিকে ক্ষমা করিও । তবু শশিভূষণ যখন সামনে আসিয়া দাঁড়াইল তখন মনে হইল, এই তো সচ্চিদানন্দের দেশ কাল পরিস্থিতি আমার সম্মুখে আসিয়া হাজির হইয়াছে । ইহাকে একটু বাজাইয়া দেখিলেই তো স্বদেশীয়ানার প্রবণতাটা বুঝা যাইবে । সম্ভবত স্বদেশের প্রতি যে কর্তব্য আজও না করিয়া পাপ সঞ্চয় করিতেছি, এই ছোকরাকে আশ্রয় দিলে সেই পর্বতপ্রমাণ অপরাধের তিলপ্রমাণ ক্ষয়ও হইতে পারে । এখন সেই কর্মের ফলভোগ করিতেছি । শশিভূষণ বৃদ্ধি বাঁচে না ।

“আর এক সমস্যা আমার কনিষ্ঠ পুত্রটিকে লইয়া । সে তাহার মাকে দেখে নাই বলিলেই হয় । স্বভাবতই সে আমার কিছু প্রশ্রয় পাইয়াছে । এই সম্ভানটির প্রতি আমার দুর্বলতার কথাও সকলেই জানে । এখন তাহার জ্যেষ্ঠভ্রাতা তাহাকে কলিকাতায় লইয়া গিয়া লেখাপড়া শিখাইতে আগ্রহী । আমি মতামত দিই নাই । যে কোনো বিষয়েই মনস্থির করিতে আমার সময় লাগে । মনে হইতেছে, কৃষ্ণকান্ত চলিয়া গেলে আমার কিছু কষ্ট হইবে ।

“পুত্রকন্যারা আমার প্রতি স্নেহাসক্ত কিনা জানি না । তাহাদের সহিতও আমার সেই দূরত্ব । স্ত্রীরা কৃষ্ণকান্তের আমাকে ছাড়িয়া যাইতে কষ্ট হইবে কিনা জানি না, যদি জানিতে পারি যে হইবে না, তবে বোধহয় খুব খুশি হইব না । কিন্তু কথাটা হইল এই, এই পৃথিবীতে আমরা পরম্পরের কতটা আপনজন ?

“সচ্চিদানন্দ ভায়া, তোমাকে কোকোবাবুর গৃহে সংঘটিত একটি ঘটনার কথা লিখিয়াছিলাম । দাদু মরিতেছে আর নাতি পাখি শিকার করিয়া ফিরিয়াছে বলিয়া অন্যদিকে খুশির হিম্মোল বহিয়া যাইতেছে । সন্দেহ হইয়াছিল, আমাদের অধিকাংশ শোকই হয়তো কৃত্রিম । বৃদ্ধ পিতার জন্য তাহার পুত্রের তেমন কোনো স্নেহ থাকে না ।

“সেই কথা যতবার মনে হয় ততবার শীঘ্র মরিতে ইচ্ছা করে...”

হঠাৎ রঙ্গময়ীর কণ্ঠস্বর শিছন থেকে বলে উঠল, তোমার মরতে ইচ্ছে করে ?

হেমকান্ত চমকে উঠলেন। কিন্তু চিঠিটা চাপা দেওয়ার চেষ্টা করলেন না। বললেন, কখন এলে ?

অনেকক্ষণ। শিছনে দাঁড়িয়ে চিঠিটা পড়ছিলেন। আমার শ্বাসের শব্দও পাওনি ?

না। হয়তো শ্বাস বন্ধ করে পড়ছিলেন।

মরতে ইচ্ছে করে লিখেছো কেন ? সত্যিই করে ?

হেমকান্ত মৃদু একটু হাসলেন, বললেন, বোধহয় করে।

ছেলেমেয়েরা ভালবাসে না তোমাকে এ কথা কে বলল ?

কেউ বলেনি। আমি লিখেছি ভালবাসে কিনা জানি না।

জানোনা কেন ? খোঁজ নিলেই তো হয়।

খোঁজ নিলে, কী জানা যাবে বলো তো মনু। বাসে ?

আমি বলতে যাবো কোন্ দুঃখে ?

তুমি ছাড়া আর তো কেউ বলতে পারবে না।

কৃষ্ণকে ছেড়ে থাকতে যদি কষ্টই হয় তবে সে কথা কনককে জানিয়ে দিলেই তো পারো।

সচ্চিদানন্দবাবুকে জানানোর কী ?

হেমকান্ত মৃদু মৃদু হাসছিলেন। বিব্রতও বোধ করছিলেন। বললেন, সেটা জানানো ভাল হবে না।

পাছে ছেলের সম্পর্কে তোমার দুর্বলতা ধরা পড়ে যায় ? আচ্ছা লোক। বাবা ছেলেকে ভালবাসে এর মধ্যে কি লজ্জার কিছু আছে ?

হেমকান্ত একটু বিষণ্ণ হয়ে বললেন, মনু, লজ্জার কিছু আছে কিনা তা তুমি ঠিক বুঝবে না। যদি সত্যি কথা জানতে চাও, তাহলে বলি আছে।

এ রকম উদ্ভট কথা কখনো শুনিনি।

আমি চাই না কৃষ্ণ কথাটা জানতে পারে।

সে জানলে দোষটা কী ?

দোষের কিছু নয় তা জানি। তবে হয়তো ভাববে, বাবা এমনিতে ডাকখোঁজও করে না কিন্তু কলকাতায় যাওয়ার বেলায় বাগড়া দিচ্ছে।

শুধু এইটুকু ?

না। হেমকান্ত মাথা নেড়ে বললেন, আরও একটু কথা আছে।

সেটা কী ?

আমি মায়া কাটাতে চাই।

তাই বা কেন ?

তুমি বুঝবে না।

খুব বুঝবে, একটু বোঝানোর চেষ্টা করে দেখ।

তাহলে বোসো।

রঙ্গময়ী শীতের রোদে পিঠ দিয়ে কারপেটের আর এক অংশে বসল। তার মুখচোখে ক্লান্তির ছাপ, রাত্রিজাগরণের চিহ্ন

হেমকান্ত বললেন, আমি হঠাৎ বুঝতে পেরেছি পৃথিবীতে আত্মীয়তার বন্ধনগুলো ভারী পলকা।

এ কথা কেন বলছো ?

যা সত্যি বলে মনে হয়েছে তাই বলছি।

তুমি তো কখনো সংসারের ভিতরেই ভাল করে ঢুকলে না । ছেলেমেয়েদের কদিন কোলে পিঠে নিয়েছো তাও আঙুলে গোণা যায় । কাউকে তো কখনো আত্মীয় করে তোলার চেষ্টাই করলে না । । তাই তোমার ওসব মনে হয় ।

হেমকান্ত ব্যথিত হয়ে বললেন, কথটা ঠিক নয় মনু । সংসারকে যতই আপন করতে চাও না কেন সংসার তোমাকে ফাঁকি দেবেই ।

রক্তময়ী তার উড়োখুড়ো চুল হাত দিয়ে চেপে মাথায় বসানোর ব্যর্থ একটা চেষ্টা করতে করতে বলল, তোমার মতো করে ভাবলে দুনিয়ার সব নিয়মই উলটে দেওয়া যায় । কিন্তু ওটা হল ভাবের কথা । এখন কাজের কথা শোনো । শশিভূষণের অবস্থা আজ সকালে আরো খারাপ হয়েছে ।

হেমকান্ত উদ্বিগ্ন হয়ে বললেন, কতটা খারাপ ?

টিম টিম করে প্রাণটা আছে এখনো । তবে বেশীক্ষণ নয় । কী করবে ?

হেমকান্ত হতাশ গলায় বললেন, কী করব ? আমার কী করার আছে ?

তোমার তো কখনোই কিছু করার থাকে না, শুধু ভাবার থাকে । আমি সারা রাত ছেলোটোর কাছে ছিলাম ।

সারা রাত ! ঘুমোওনি ?

একটা অল্প বয়সের ছেলে চোখের সামনে মরে যাচ্ছে তা দেখেও কি ঘুম আসে ? তা বটে ।

আজ সকালে মানুবাবু এসে দেখে ওষুধ দিয়ে গেছেন ।

মানুবাবুটা আবার কে ?

কদমতলায় যে হোমিওপ্যাথ ডাক্তার বসে ।

সে কী বলল ?

কিছু বলল না । ওষুধ দিয়ে গেল । কিন্তু সূর্যবাবু একরকম জবাব দিয়ে গেছেন ।

হেমকান্ত মৃদুস্বরে বললেন, কেন যে ছেলোটো মরতে এ বাড়িতে এল !

সে ভেবে এখন আর কী করবে ।

কোনো রকমেই কি বাঁচানো যায় না মনু ?

রক্তময়ী মৃদু হেসে বলল, তা জানি না । তবে বেঁচেও বোধহয় লাভ নেই ।

কেন, ওকথা বলছ কেন ?

বরিশালে এক পাত্রীকে খুন করার জন্য ওর ফাঁসি হবে ।

কে বলল ?

আমি জানি ।

কী করে জানলে ?

সারা রাত ছেলোটো জ্বরের ঘোরে ভুল ঝকেছে । সেইসব প্রলাপ থেকেই বুঝতে পেরেছি ।

কী বলছিল ?

অত খুলে বলার সময় নেই । এখন গিয়ে স্নান করব, চারটি খাবো, তারপর ফের এসে রুগীর কাছে বসতে হবে । খানিকক্ষণের জন্য পিসিকে বসিয়ে রেখে এসেছি । আর কৃষ্ণ আছে । কিন্তু রুগীর অবস্থা তো ওরা ভাল বুঝবে না ।

সর্বনাশ !

সর্বনাশের কি হল ?

পুলিশ যদি খবর পায় ?

খবর কি আর পায়নি !

পেয়েছে ?

এসব খবর কি আর গোপন থাকে ! পরশু থেকে পুলিশের চর ঘোরাফেরা করছে ।  
কে বলো তো ?

মহেশবাবু । সেই যে বাবরি চুল—

হেমকান্ত মাথা নেড়ে বললেন, জানি ।

তাই বলছিলাম ছেলেটার বেঁচেও লাভ নেই ।

হেমকান্ত গভীর দৃষ্টিতে রঙ্গময়ীর দিকে চেয়ে রইলেন । তারপর বললেন, তবু ছেলেটাকে  
বাঁচানোর জন্য তুমি প্রাণপণ করছ । কেন করছ রঙ্গময়ী ?

কেন আবার । বাঁচানোর চেষ্টা তো করতেই হবে । কোন মায়ের কোল খালি করে চলে এসেছে ।  
তাকে এমনি এমনি মরতে দেওয়া যায় ?

এই যে বললে রোগে না মরলেও ফাঁসিতে মরবে !

সেটা এখনো জানি না । তবে খুনটা বোধহয় ও করেছে ।

হেমকান্ত একটা দীর্ঘশ্বাস ছেড়ে বললেন, তাহলে রোগেই কেন ওকে যেতে দাও না ?

এ কথায় রঙ্গময়ী হঠাৎ একটু অদ্ভুত হাসল । সেই হাসিতে রোজকার দেখা রঙ্গময়ী বদলে গেল  
হঠাৎ । ধীর স্বরে বলল, তাহলে ওর কথা তো কেউ জানতে পারবে না । পত্রিকায় ওর নাম উঠবে  
না । ইতিহাসে নামটা লেখাও থাকবে না ।

নামটা চাউড় হওয়াটা কি ভাল ?

কে জানে ! তবে আমার মনে হয়, ওইটুকু ছেলে একটা সাহসের কাজ যখন করেছে তখন  
দেশের লোকের সেটা জানা উচিত । ফাঁসিতেই যদি মরে তাহলে হাজার হাজার ওর বয়সী ছেলে  
খবরটা জেনে এই কাজে নামবে ।

মনু ! হেমকান্ত আত্ননাদ করে ওঠেন ।

কী বলছ ! স্বপ্নাচ্ছন্নের মতো গলায় রঙ্গময়ী জবাব দেয় ।

তুমিও কি স্বদেশী করছ নাকি ?

আমার তো জমিদারি নেই, করলে দোষ কি ?

সর্বনাশ ।

সর্বনাশের কিছু নেই । ময়েরা আবার স্বদেশী করতে পারে নাকি ? হাতে পায়ে বেড়ি আছে না !  
বলে রঙ্গময়ী একটু হাসে ।

তা না হয় বুঝলাম, কিন্তু ছোকরা যদি ধরা পড়ে তাহলে আমরাও কি রেহাই পাবো ! বাঘে ছুঁলে  
আঠারো ঘা ।

তোমার যে কত রকমের ভয় ।

ভয়টা কি মিথ্যে ?

তা বলিনি । কিন্তু শশীর যা হবে তোমার তো আর তা হবে না । কেউ ধরে নিয়ে ফাঁসি দেবে না  
তোমাকে । তুমি তো আর স্বদেশী বলে ওকে আশ্রয় দাওনি ।

তুমি পুলিশকে জানো না ।

না জানলেই বা । অত ভয় পেও না ।

মহেশ কবে এসেছিল ?

পরশু থেকেই ঘুরঘুর করছে ।

কিছু বলেছে ?

আমাকে না । তবে কাছারি বাড়িতে অনেককে নানারকম জিজ্ঞাসাবাদ করেছে । তোমার  
কাছেও আজ আসার কথা ।

কে বলল ?

মহেশবাবু নিজেই বলে গেছেন ।

হেমকান্ত কিছুক্ষণ উদ্বিগ্ন মুখে ভাবলেন, তারপর জিজ্ঞেস করলেন, কী বলব বলো তো মনু !  
কী আবার বলবে । আমি হলে তো ঘাড় ধাক্কা দিয়ে বাড়ি থেকে বের করে দিতাম ।  
ওটা কাজের কথা হল না ।

তাহলে যা বলবার নিজেই বুদ্ধি করে বোলো । রাত জেগে আমার মাথাটা ঠিক নেই এখন ।  
একটু বোসো মনু । তোমার সঙ্গে আমার আর একটু কথা আছে ।

আবার কী কথা ?

আছে ।

কাজের কথা, না ভাবের কথা ?

হেমকান্ত হেসে বললেন, দূরকমই । যে ভাবে যে নেয় ।

রঙ্গময়ী বলল, ভাবের কথা হলে না হয় পরে শুনব ।

ভাবের কথাকে এত ভয় কেন মনু ?

আমি বাপু, ভাবের কথাকে বড় ভয় পাই । তাছাড়া এখন ভাবের কথা শোনার মতো মন নেই ।

তুমি কাজের লোক জানি । তবু আজ একটা কথা জিজ্ঞেস করি । জবাব দেবে ?

আগে তো শুনি ।

তোমার কি কোনো বিশেষ দুঃখ আছে মনু ?

এই কথা ! বলে রঙ্গময়ী বড় বড় চোখ করে তাকিয়ে রইল হেমকান্তর দিকে । বেশ দেখাল  
তাকে ।

হেমকান্ত এই চোখের সামনে বরাবর কঁকড়ে যান । কিন্তু আজ একটু সাহস করে চোখে চোখ  
রাখলেন । বললেন, কথাটাকে তুচ্ছ ভেবোনা । কারণ আছে বলেই জিজ্ঞেস করছি ।

রঙ্গময়ী একটা দীর্ঘশ্বাস ফেলে বলে, কারণ ছাড়া তুমি কিছু করবে না জানি । কিন্তু কারণটা কি ?  
আগে বলো ।

বলার কী আছে তাও তো ছাই বুঝছি না । আমি গরীব পুরুতের মেয়ে, আমার তো দুঃখ থাকারই  
কথা ।

সে দুঃখ তোমার নেই । থাকলেও আমি তার কথা বলছি না । আমি জিজ্ঞেস করছি বিশেষ  
কোনো দুঃখের কথা ।

রঙ্গময়ী শ্রান্তমুখেও হাসতে লাগল । বলল, আর একটু বুঝিয়ে না বললে বোকা মেয়েমানুষের  
মাথায় কি সৈঁধোয় ?

হেমকান্ত চোখ থেকে চোখ না সরিয়েই বললেন, ধরো যদি জিজ্ঞেস করি কোনো পুরুষের প্রতি  
তুমি আসক্ত কিনা যাকে মুখ ফুটে কখনো কথাটা বলতে পারারিনি ?

রঙ্গময়ীর কোনো ভাবান্তর বোঝা গেল না । তবে সে চোখ দুটো বুজে স্থির হয়ে বসে রইল  
কিছুক্ষণ । তারপর চোখ খুলে হেমকান্তর দিকে তাকাল । স্নিগ্ধ ও গভীর এক দৃষ্টি । আস্তে করে  
বলল, না তো ।

ঠিক বলছ মনু ?

রঙ্গময়ী হাসল । বলল, তুমি কি অন্য কিছু শুনতে চেয়েছিলে ?

হেমকান্ত মাথা নেড়ে বললেন, না । তবে কিছু লোক অন্য কথা বলে ।

তাদের চেয়ে আমাকে তোমার ভাল জানবার কথা ।

আমি তো তাই মনে করি । তবু কেন যে লোকের অদ্ভুত সব সন্দেহ ।

কী সন্দেহ ?

সচ্চিদানন্দ একটা চিঠি লিখেছিল । তাতে কিছু অদ্ভুত কথা ছিল তোমাকে নিয়ে ।

রঙ্গময়ী মৃদুস্বরে জিজ্ঞেস করে, কী কথা ?

সেটা তোমাকে বলা যায় না।

কেন বলা যায় না ? আমাকে নিয়েই যখন কথা তখন আমার জানা উচিত।

সচ্চিদানন্দটা পাগল।

রঙ্গময়ী হেসে বলল, সচ্চিদানন্দবাবুর মতো ঘড়েল লোক যদি পাগল হয় তবে দুনিয়ায় সবাই পাগল। কী লিখেছে বলো না ! কারো প্রতি আমার দুর্বলতা আছে বুঝি ?

সেকরমই।

লোকটা কে ?

হেমকান্ত বিরত হয়ে বলেন, সেটাও উদ্ভট। লোকটা নাকি আমিই।

বটে। রঙ্গময়ী চোখ পাকাল। তারপর হঠাৎ হেসে ফেলে বলল, চিঠিটা চুরি করে আমিও পড়েছি।

পড়েছো ! ওঃ। তাহলে—

রঙ্গময়ী ক্রান্ত, তবু শান্ত স্বরেই বলল, কথাটা উদ্ভট কেন হবে ? তোমার বিয়ের পর আমি কি তোমাকে কম জ্বালিয়েছি ?

হেমকান্ত হঠাৎ লজ্জায় রাঙা হয়ে উঠলেন বললেন, সেতো ছেলেমানুষী। কাফ লাভ।

রঙ্গময়ী একটা দীর্ঘশ্বাস ফেলে বলল, তাই হবে হয়তো। এই কথাটা বলতে তোমাকে এত ভনিতা করতে হল কেন বলো তো !

## ॥ ১৪ ॥

ভোটে জিতে কৃষ্ণকান্ত মন্ত্রী হয়েছেন। বাড়ির আবহাওয়াটা খুবই ভাল। ফুরফুরে একটা আনন্দের হাওয়া বয়ে যাচ্ছে সবসময়ে। সেই আনন্দটা রেমিকেও ছোঁয়। এমন এক বাড়ির সে বউ যে বাড়িটা সর্বসাধারণের কাছে যথেষ্ট গুরুত্বপূর্ণ। মানুষ এ বাড়ির লোককে সন্ত্রম এবং খাতির করে। কৃষ্ণকান্ত এলেবেলে মন্ত্রী নন। বহুদিন ধরেই এক নাগাড়ে তিনি বেশ কয়েকটা ভারী দফতর চালিয়েছেন। তাঁর সুনাম এবং প্রতিষ্ঠা নিখাদ। অতীতটাও স্বর্ণগর্ভ। স্বদেশী আমলে মার খেয়েছেন, জেল খেটেছেন, কৃষ্ণসাধনও কিছু কম করেননি। এখনও অত্যন্ত সাদামাটা জীবন যাপন করেন। মোটা খন্দের ধৃতি, সাধারণ পানজাবি পরেন, সামান্য অনাড়ম্বর খাবার খান, কম ঘুমোন। মোটামুটি একটা গান্ধীবাদী গন্ধ আছে তাঁকে ঘিরে। শুধু মেজাজটা কিছু চড়া, প্রতাপ সাজ্বাতিক।

একদিন রেমিকে ডেকে বললেন, রামছাগলটা আবার চাকরি ছেড়েছে জানো ?

রেমি জানত না। মাথা নীচু করে রইল।

কৃষ্ণকান্ত বললেন, আটশো টাকা মাইনের চাকরি। এ বাজারে কিছু কম নয়। কেন ছাড়ল তা তোমাকে বলেছে ?

উনি আমাকে কিছু বলেন না।

বলার পাত্র নয়। তোমাকে মানুষ বলে জ্ঞান করে না। আমাকেই করে না তো তুমি। ছাগলটাকে জিজ্ঞেস করো তো কেন ছাড়ল।

করব।

কৃষ্ণকান্ত একটু ভেবে বললেন, তোমাকে হয় তো বলবে না। তবে আমি খানিকটা আন্দাজ করতে পারি। চাকরিটা ছিল একটা প্রাইভেট ফার্মে। আমার চেনা ফার্ম। বোধহয় আমার সঙ্গে খাতির রাখতেই ওরা ছাগলটাকে ডেকে নিয়ে চাকরি দিয়েছিল। সেটাতে বোধহয় বাবুর অপমান হয়ে থাকবে। বাপের খাতিরে ওর মতো লাটসাহেব চাকরি করবে কেন। কিন্তু বউমা, আমি বুঝি না

ছাথলটার কোয়ালিফিকেশনটাই বা কী যে খতির ছাড়া আটশ টাকা মাইনের চাকরি জোগাড় করবে। ওকে একথাটাও জিজ্ঞেস করো।

রেমি মাথা নত করেই ছিল। জবাব দিল না। সে জানে, ধুবর চাকরি ছাড়াটা এমন কিছু দারুণ ঘটনা নয়। এর আগেও কয়েকবার ছেড়েছে। আবার চাকরি পেয়েও গেছে। না পেলেও তো ক্ষতি নেই। ধুবর রোজগারের পয়সা, এ বাড়ির কেউ ছোঁয়ওনি, এমন কি রেমি পর্যন্ত না। মাইনের টাকায় সে কী করে তা কেউ জানেও না, খবরও নেয় না।

কৃষ্ণকান্ত কিন্তু উত্তেজিত গলায় বললেন, চিরটাকাল এরকম যাবে না বুঝলে বউমা? আমরা যৌবনে ক্যারিয়ার তৈরির কথা ভাবতাম না ঠিকই। কিন্তু তখন আমাদের সামনে একটা পজিটিভ লক্ষ্যবস্তু ছিল। দেশকে স্বাধীন করতে হবে। কিন্তু এখনকার ইয়ংগার জেনারেশনের সামনে ওরকম কিছু তো নেই। ওই গর্ভস্রাবটার তো আরও নেই। সামনে একটা পলিটিক্যাল ক্রাইসিস আসছে। চিরকাল তো আমি ক্ষমতায় থাকব না। মরতেও একদিন হবে। তখন ওর গতিটা হবে কী?

রেমি একথারও জবাব দিল না। ইদানীং ধুবর সঙ্গে তার সম্পর্কটা ভালই যাচ্ছিল। ধুব অবশ্য বউ নিয়ে সিনেমায় যাওয়া বা রেস্টুরেন্টে খাওয়া ইত্যাদি হালকা পলকা ব্যাপারে নেই। প্রেমে গদ গদ ভাবেরও তার অভাব। উপরন্তু সে কমপ্লিমেন্ট দিতে জানে না। কোনোদিন রেমিকে সে বলেনি, বাঃ, তুমি তো খুব সুন্দর! কিন্তু রেমি অতটা আশাও করে না ধুবর কাছ থেকে। ধুব যে রোজ বাড়ি ফেরে, তার সঙ্গে স্বাভাবিক দু-চারটে কথাবার্তা কয় এবং এক বিছানায় শোয় সেইটাই যথেষ্ট বলে ধরে নিয়েছে রেমি। এর চেয়ে বেশী ভালবাসা প্রকাশের ক্ষমতাই ধুবর নেই। রেমি মনে মনে ভগবানকে বলে, এটুকু বজায় থাকলেই যথেষ্ট। আমি আর বেশী চাই না। সুতরাং ধুবর চাকরি ছেড়ে দেওয়ার ঘটনায় সে স্বামীর ওপর একটুও চটল না। সে জানে, কারও অধীনে কাজ করা ধুবর পক্ষে শক্ত। অন্য হুকুম করবে আর ধুব তা তামিল করে যাবে এমনটা তার সম্পর্কে যেন কল্পনাই করা যায় না।

কৃষ্ণকান্ত বললেন, শোনো মা, ওর সঙ্গে তোমারও ভবিষ্যৎ জড়ানো। ওর ক্যারিয়ারটা তৈরির ভার তুমিও একটু নাও। ওকে বোঝাও, শাসন করো।

রেমি বলল, আপনি ভাবছেন কেন? একটা কিছু ঠিকই করবে।

সেটা আর কবে হবে? চাকরি করতে যদি না চায়, ব্যবসা করুক। কিন্তু সেটাও কি করবে? টাকা হাতে পেলেই ফুঁকে দিয়ে বসে থাকবে। বাপের হোটেলে থাকে বলে টের পায় না কত ধানে কত চাল। কিন্তু দেশকালের অবস্থা তো সুবিধের নয়। ওকে একটু বুঝিয়ে বোলো।

একথাটা একটু বিধল রেমিকে। ধুব বাপের হোটেলে খায় বটে, কিন্তু সে আরও অনেকেই খায়। কথটা শ্বশুরমশাই রেমির সামনে না বললেও পারতেন।

ধুব কয়েকদিন যাবৎ মদ খাচ্ছে না। সেদিনও ধুবকে রাত্রিবেলা স্বাভাবিক অবস্থায় পেয়ে গেল রেমি। বিছানায় শুয়ে একটা অর্থনীতির বই পড়ছিল। কয়েকদিন যাবৎ-ই অখণ্ড মনোযোগে বইটা পড়ছে। থার্ড ওয়ারল্ড ইকনমি।

রেমি বইটা কেড়ে নিয়ে পাশে বসে বলল, তোমার সঙ্গে আমার কথা আছে

ধুব বিরক্ত হলেও সেটা প্রকাশ করল না। বলল, মেয়েদের অত কী বলার থাকে বোলে তো। আজকের কথাটা ইমপারট্যান্ট।

কোন কথাটা ইমপারট্যান্ট নয় তোমার?

বাবা আজ আমাকে ডেকে পাঠিয়েছিলেন।

ডেকে পাঠানোর কী? তুমি তো সবসময়েই শ্বশুরের আশেপাশে পোষা বেরালের মতো ঘুরঘুর করছ বাবা।

তা করছি। তবু আজ ডেকে কয়েকটা কথা বললেন, তোমার সম্পর্কে।

ওঃ হ্যাঁ, কথা একটা বলার আছে বটে। আমি চাকরিটা ছেড়ে দিয়েছি।

কিন্তু সেটা আমাকে জানাওনি। অথচ আমি তোমার স্ত্রী।

চাকরি ছাড়লে স্ত্রীকে বলার একটা সাংবিধানিক নিয়ম আছে বোধহয়!

আছে।

আমি জানতাম না।

তুমি অনেক কিছুই জানো না। কিন্তু আমার প্রশ্ন হল, আমাকে যখন বিয়ে করেছো, তখন আমারও ইচ্ছে করে স্বামীর রোজগারে খেতে পরতে। ইচ্ছেটা কি অন্যায়?

অন্যায় তো বটেই। তোমাকে আমি আজও বিয়ে করিনি। তোমার শ্বশুর আমার সঙ্গে তোমাকে জুটিয়ে দিয়েছেন। খাওয়া পরার ব্যাপারটা ঠুর সঙ্গেই ফয়সালা করে নাও গে।

তোমার মুড পাণ্টে যাচ্ছে।

ধুব হেসে বলল, না। আমি ভাল মুডে আছি। চাকরি না থাকলে আমি সব সময়েই ভাল মুডে থাকি।

চাকরি ছাড়লে কেন?

আমার ভাল লাগে না। আমাদের বংশে কেউ কখনও চাকরি করেনি। ওটা আমার ধাতে নেই।

তুমি যে বাপের হোটеле খাও তা নিয়ে শ্বশুরমশাই আজ একটু খোঁটা দিলেন। সেটা আমার ভাল লাগেনি।

সত্যকে সহ্য করাই তো ভাল।

কেন করব উপায় থাকতে?

উপায়টা কি?

তোমাকে রোজগার করতে হবে।

খামোকা রোজগার করে কী লাভ? বাবার মেলা টাকা। আমরা ক'তাই ছাড়া খাবে কে?

তবু সেটা বাবার টাকা, তোমার তো নয়।

বাবারও পুরোটাই নয়। বলা ভাল, পূর্বপুরুষদের টাকা। তাতে বাবারও যা অধিকার আমাদেরও তাই।

সেটা উনি যখন থাকবেন না তখন দেখা যাবে। আমার স্বামী যে অক্ষম নয় আমি সেটা প্রমাণ করতে চাই।

শ্বশুরের অপমানের শোধ নেবে নাকি?

যদি বলি তাই?

লোকটা ঝানু পলিটিসিয়ান। অপমান গায়ে মাখে না। তুমি যে শোধ নিয়েছো তা হয়তো বুঝতেই পারবে না।

বোঝাতে চাইও না। আমি ঠুকে আর অপমান করার সুযোগ দিতে চাই না।

আমি চাকরি বা রোজগার করলেই কি সমস্যার সমাধান হয়ে যাবে?

খানিকটা যাবে।

কী ভাবে?

আমরা আলাদা বাসা করে সংসার পাতব।

ধুব কথাটা শুনে হঠাৎ উঠে বসল। রেমিকে দু'হাতে ধরে স্থির দৃষ্টিতে মুখের দিকে কিছুক্ষণ চেয়ে মৃদু একটু হেসে বলল, আমি এ কথাটাই তোমার মুখে শুনব বলে আশা করছিলাম। কিন্তু একথা আর কখনও উচ্চারণ কোরো না।

ধুবর এই কথায় একটু ঘাবড়ে গেল রেমি। বলল, কেন?

আমাদের পরিবারে বাপ এবং ছেলের ভিন্ন হওয়ার প্রথা এখনও চালু হয়নি। হয়তো ভবিষ্যতে



একদিন হবে। কিন্তু তুমি সেটা শুরু কোরো না।

তাহলে কী করে প্রমাণ হবে যে, তুমি ঠুর ওপর নির্ভরশীল নও ?

কৃষ্ণকান্ত চৌধুরি প্রমাণ চাইছে না। তুমি ভুল করছ। বাপের হোটেলের খাওয়া নিয়ে খোঁটা দেওয়াটা একটা মৃদু প্রোভোকেশন মাত্র। আমি আত্মনির্ভরশীল হলেই কৃষ্ণকান্তবাবু খুশি হবেন তা নয়। বরং উনি চান যে, আমি ঠুরই হাত থেকে রোজ ল্যাজ নেড়ে নেড়ে ভুক্তাবশেষ গ্রহণ করি।

ছিঃ, ও কী বলছ ?

ঠিকই বলছি। তুমি লোকটাকে চেনো না।

রেমি একটু চুপ করে থেকে বলল, ঠিক আছে, তাহলে তুমি রোজগার করে ঠুর হাতে প্রতিমাসে টাকা দাও।

কত টাকা দেবো ?

যতই হোক। পাঁচশো সাতশো।

তোমার স্বস্তুর সেটা হাত পেতে নেবে ?

নেবেন না কেন ?

সেটা জিজ্ঞাসা করে এসো।

জিজ্ঞেস করতে হবে কেন ? বাপ কি ছেলের টাকা নেয় না ?

কৃষ্ণকান্ত কি তেমন বাপ ?

নেবেন না বলছ ?

হয়তো নেবে, তবে নিজে হাত পেতে নেবে না। হয়তো কোনও চাকরকে ডেকে বলবে, ওরে টাকাটা তোর কাছে রেখে দে তো।

যাঃ, স্বস্তুরমশাই মোটেই ওরকম নন।

হবে হয়তো। আমি ভদ্রলোক সম্পর্কে খুব ভাল জানি না।

ইয়ার্কি হচ্ছে ?

বাস্তবিকই জানি না, আমার লোকটা সম্পর্কে একটু ধাঁধা আছে।

কিরকম ধাঁধা ?

যরো, লোকটা একসময়ে স্বদেশী করত। তাই না ?

তা তো বটেই।

বেশ আদর্শবাদী লোক ছিল। তাই না ?

এখনও আছেন।

আহা, এখনকার কথা ছাড়ো।

ঠিক আছে, বলো।

লোকটার জ্যাঠা সম্মাসী হয়ে যায়। কাকা স্বদেশী করতে করতে খুন হয় বা দুর্ঘটনায় মারা যায়।

ঠিক তো ?

তাই তো শুনেছি।

সুতরাং লোকটার ভিতরে সম্মাস এবং স্বদেশীয়ানার একটা অ্যাডমিক্সচারও ঘটেছে। স্বীকার করো ?

না হয় করলাম।

কিন্তু লোকটা এখন এক নম্বরের ধান্নাবাজ, মিথ্যাবাদী এবং ক্যারিয়ারিস্ট।

আবার ?

খুব রেমির হাত নিয়ে খেলা করতে করতে বলল, তোমার বয়স কত ?

কেন, তুমি জানো না ?

মেয়েদের বয়স তারা নিজেরাই মনে রাখতে চায় না। সে যাক্গে। তুমি খুব কম বয়সী বোকা একটি মেয়ে।

না হয় হলাম।

এ বয়সে একজন দেশবিখ্যাত নেতার মুখোমুখি হলে মাথা ঠিক রাখা মুশকিল। চোখ ধাঁধিয়ে যায়।

আমার কি তাই হয়েছে?

হয়েছে। একটু বেশী মাত্রায় হয়েছে। যতক্ষণ ওই ধাঁধানো ভাবটা থাকবে ততক্ষণ লোকটার আসল চেহারা তোমার নজরে পড়বে না।

রেমি অভিমান ভরে বলল, তুমি ঠিক বলছ না গো। স্বশ্রমশাই কত সহজ সরলভাবে থাকেন, একটুও বাবুগিরি নেই, আরাম আয়েস নেই—

ঠিক কথা। লোকটার সপক্ষে পজিটিভ পয়েন্টও অনেক আছে। দেশ স্বাধীন হওয়ার আগে লোকটা সম্ভবত চরিত্রবানই ছিল। কিন্তু দেশ স্বাধীন হওয়ার পর থেকেই লোকটা চরিত্র হারাচ্ছে। খুব ধীরে ধীরে অবশ্য।

পলিটিকস করতে গেলে ওরকম একটু আধটু হয়।

ধুব নীরবে মাথা নাড়ল। তারপর অন্যমনস্ক চোখে ঘরের আলোটার দিকে চেয়ে রইল কিছুক্ষণ। তারপর বলল, তুমি কথাটা ভেবে বলোনি, কিন্তু খুব ঠিক কথা বলেছে।

কোন কথাটা?

এই যে বললে পলিটিকস করতে গেলে অমন একটা আধটু করতে হয়।

হয়ই তো।

আমি তো সেটা মেনেই নিয়েছি। কথাটা খুবই সত্যি। এদেশে পলিটিকস মানেই ওইসব। মিথ্যে কথা, ফেরেববাজি, ধাঙ্গা এবং ক্যারিয়ার। চলো, কাল তোমাকে বিধানসভায় নিয়ে যাবো। একটু দেখে আসবে, শ্রদ্ধেয় এম এল এ আর মন্ত্রীরা সেখানে বসে কেমন খেয়োখেয়ি করেন।

আমার দেখে দরকার নেই।

দরকার আছে। তোমার স্বশ্রম কিরকম দেশোদ্ধার করছেন তার একটা আঁচ পাওয়া তোমার দরকার।

আমার চোখে স্বশ্রমশাইকে ছোটো করে দিয়ে তোমার কী লাভ?

ধুব গভীর এক দৃষ্টিতে তার দিকে চেয়ে স্নেহভরে বলল, তুমি কি বিশ্বাস করো কৃষ্ণকান্তকে কালিমালেপন করায় আমার খুব সুখ?

রেমি ধুবর খুব ঘনিষ্ঠ হয়ে বলল, তবে সব সময় ওঁর সম্পর্কে ওরকম বলো কেন?

লাভ-হেট রিলেশন কাকে বলে জানো?

কথাটা শুনেছি। মানে জানি না।

মানে আমিও ভাল জানতাম না। কিন্তু কৃষ্ণকান্তর সঙ্গে আমার সম্পর্কটা এখন বোধহয় ওই লাভ-হেট।

তার মানে?

আমি যখন কৃষ্ণকান্ত চৌধুরিকে বাবা বলে ভাববার চেষ্টা করি তখন কিছুতেই মন্ত্রী কৃষ্ণকান্তর ছবি চোখের সামনে আসে না।

তবে কী ছবি আসে?

চল্লিশ দশকের গোড়ায় জেলখানায় বসে এক কৃষ্ণকান্ত খুব মলিন বিকেলের আলোয় লাল কাগজে পেনসিল দিয়ে তার বিরহিনী বউকে চিঠি লিখছে, এরকম একটা লোককে মনে পড়ে। কিংবা মনে পড়ে একটা লোক—যাক্গে, ওসব বলে লাভ নেই।

রেমির চোখ ছলছল করছিল। বলল, উনি খুব কষ্ট পেয়েছেন এককালে। না গো ?  
খুব হেসে মাথা নেড়ে বলল, কষ্ট কিসের ? স্কোপ পেলো আমিও ওরকম রোমান্টিক কষ্ট করতে  
রাজি। কিন্তু আমরা তো স্কোপই পেলাম না রেমি।

পেলে কী করতে ?

ওঃ, সে অনেক কিছু করতাম। বোমা মেরে ফাঁসির দড়িতে হাসতে হাসতে মরতাম। তার আগে  
গীতা পাঠ করতাম। গান গাইতাম, হাসি হাসি পরব ফাঁসি দেখবে ভারতবাসী। কিংবা দ্বীপান্তরে  
চলে যেতাম গোটা কয়েক ইংরেজকে নিকেশ করে।

খুব বুকনি সাহস জানা আছে।

কেন, আমি কি খুব ভেড়ুয়া ?

তা বলছি না।

তবে কী বলতে চাইছ ?

তুমি কোনো ব্যাপারেই সিরিয়াস নও।

আমি ভীষণ সিরিয়াস রেমি। আমি যদি স্বদেশী আমলে জন্ম নিতাম তাহলে কৃষ্ণকান্তর মতো  
স্বদেশী করতাম না।

কী করতে ?

অন্যরকম কিছু। ভারতবর্ষে স্বদেশী আমলটাই ছিল আবেগসর্বস্ব। আবেগ জিনিসটা ক্ষণস্থায়ী।  
চট করে কেটে যায়। কৃষ্ণকান্তর অবস্থা দেখছ না ? স্বদেশী জ্বর যেই ছেড়ে গেল, দেশ যেই স্বাধীন  
হল, অমনি কোমরে কাপড় ঝেঁবে স্বদেশী সারটিফিকেটখানা বুকে ষ্টটকে ক্যারিয়ার তৈরি করতে  
নেমে পড়েছে ! সেই কৃষ্ণকান্তর সঙ্গে যদি এই কৃষ্ণকান্তর আজ দেখা হয়ে যায় তাহলে দুজনের  
মধ্যে তুমুল মারপিট লেগে যাবে।

রেমি হেসে গাড়িয়ে পড়ল, কী যে বলো না !

সেইজন্যই বলছিলাম, মা যা ছিলেন এবং মা যা হইয়াছেন তা দেখতে চলো অ্যাসেমবলিতে  
যাই। গ্যালারি থেকে দেখবে নীচের এরেনায় দুদল লোক দুদিকে বসে কেমন গলা ছেড়ে ঝগড়া  
করছে। কলেজের ডিবেটিংও এর চেয়ে অনেক ভাল। ওই কুঁয়োর মধ্যে যে ঠুতোঠুতি, রেযারেযি  
ঠেলাঠেলি চলছে তাই থেকে দেশের ভবিষ্যৎ গড়ে উঠবে এমন কথা ভাবতেও গা শিউরে ওঠে।

তার জন্য তো স্বশুরমশাই দায়ী নন।

না। তবে তিনি যদি সং হতেন তবে ওই কুস্তীপাকে গিয়ে ঢুকতেন না। স্বাধীন ভারতের  
পলিটিকস সভয়ে পরিহার করে ভদ্রলোকের মতো জীবনযাপন করতে পারতেন।

যারা পলিটিকস করে তারা ভদ্রলোক নয় ?

কে বলল নয় ? তা বলিনি। ব্যক্তিমানুষ হিসেবে অনেকেই ভদ্রলোক। ভাল এবং সং লোকেরও  
অভাব নেই। কিন্তু সেটুকু তাদের নন-পলিটিক্যাল একজিসটেনস।

আমি আর এসব শুনতে চাই না। এখন আমাকে আদর করো।

আমার মেজাজটা চটকে দিয়ে এখন আদর চাইছো ?

মেজাজ কখন চটকালাম ? রেমি চোখ কপালে তুলল।

এই যে এতক্ষণ বকালে !

তুমিই বকলে।

না, তুমিই বকালে। কৃষ্ণকান্তর প্রসঙ্গ পারতপক্ষে আমার কাছে তুলো না।

আচ্ছা, ঘাট মানছি।

শোনো।

বলো।

তোমার শ্বশুরকে বলে দিও, আমি ক্যারিয়ারিস্ট নই । নিজের জীবন কিভাবে যাপন করব সেটাও চিন্তা করব আমিই । উনি যেন সেটা নিয়ে চিন্তা না করেন ।

ও বাবা, ওসব আমি বলতে পারব না ।

তাহলে আমিই বলব ।

দোহাই, পায়ে পড়ি । বোলো না । উনি রাগী মানুষ ।

আমিও রাগী ।

বেশ, রাগটা আমার ওপর দেখাও । ঠাঁর ওপর নয় ।

তোমার ভয়টা কিসের ?

তোমাদের যদি ঝগড়া হয় ?

হোক না ।

না গো । পায়ে পড়ি ।

তুমি খুব পায়ে পড়তে শিখেছো তো ! কার কাছ থেকে শিখলে ?

ঠেকে শিখেছি ।

ধুব মাথা নেড়ে বলল, এটাও পলিটিকস নয় তো ? এই পায়ে পড়াটা ?

তুমি এক নম্বরের—

কী ?

বলব না । আমাকে এবার একটু আদর করো । একটুখানি ।

ধুব সে কথায় কর্ণপাত করল না । উঠে পায়চারী করতে করতে বলল, আজ আমার ঘুম আসবে না । একদম, ঘুম আসবে না ।

পরদিন থেকেই ধুব আবার বেহেড । সকাল থেকে গভীর রাত অবধি পান্ডা নেই । কোনোদিন নিজেই ফেরে, কোনোদিন পুলিশ পৌঁছে দিয়ে যায় । প্রায় দিনই বেঁহঁশ অবস্থায় ফেরে ।

কৈঁদে ভাসাতে লাগল রেমি ।

সেই দুঃসহ দুদিনে হঠাৎ একদিন এসে হাজির হল সমীর ।

## ॥ ১৫ ॥

বাইরে ঝিমঝিম করে ভরা দুপুর । ভারী নির্জন, নিরিবিলি, অথচ রোদে ঝলমলে । কুয়াশা কেটে বহু দূর পর্যন্ত দেখা যায় । উত্তরে অতিকায় মহিষের মতো গারো পাহাড় পর্যন্ত । ব্রহ্মপুত্রের স্রোতে গলন্ত রূপো এসে মেশে । ঝিরঝির করে অবিরল কথা বলে মহানিম । মস্ত মস্ত ঘরের ঘুলঘুলি, বারান্দার ওপরের কড়ি বগায় নানান জাতের হাজারো পায়রা নড়াচড়া করে আর ডেকে ওঠে । ভরন্তু দুপুরে পায়রার গদগদ স্বরের ডাক এক অদ্ভুত মায়া তৈরি করে ।

শব্দের কি কোনো আকার আছে ? প্রশ্নটা মাথায় আসে, কিন্তু জবাবটা ভেবে পান না হেমকান্ত । শব্দ সম্ভবত নিরাকার । তবু হেমকান্তর মন বলে, ওই পায়রার বুকুম বুকুম শব্দ ওর আকার গোল । তুলোর বলের মতো । স্টিমারের বাঁশির শব্দকে কি কখনো তাঁর সরু ও দীর্ঘ আকারবিশিষ্ট বলে মনে হয়নি ? সেতারের বনৎকার যেন ফুলঝুরির বহুবর্ণ কেন্দ্রাতিগ অগ্নিবিন্দু । মাঝে মাঝে এই দুপুরবেলা তাঁর এসরাজ নিয়ে বসতে ইচ্ছা করে । কিন্তু বসেন না । লজ্জা করে । এসরাজের শব্দ শুনলে ছেলে মেয়ে অবাক হবে । হয়তো দৌড়ে আসবে মনু । লোকটার হল কী ? কিন্তু এসরাজের ছড় টানলেই তাঁর চোখে ভেসে ওঠে তন্তুজালের মতো একটা আকৃতি । অদৃশ্য এক মাকড়সা অদ্ভুত দ্রুততায় বুনে চলেছে । জ্যোৎস্নারাত্রি বিরহী হরিপদ মাঝে মাঝে পুকুরের ঘাটলায় বসে আড়বাঁশি বাজায় । তখন দীঘল চিত্রময় এক সাপের আকার খেলা করে হেমকান্তর চোখের সামনে । এসবই ব্রহ্ম হয়তো । শব্দের বাস্তবিক কোনো আকার নেই । কিন্তু হেমকান্তর ভিতরে তারা আকার পায় ।

পায়রারা গদগদ স্বরে কী বলে ? ভালবাসার কথা ? কিন্তু পশু-পাখির আত্মজন নেই, সংসার নেই । নিতান্ত সংস্কারবশে তারা কখনও কখনও দলবদ্ধভাবে বাস করে বটে, কিন্তু সমাজ গড়তে জানে না । ভালবাসা তারা কোথায় পায় ? তুলোর বলের মতো অবিরল তাদের বুকুম বুকুম ডাক এই নির্জন দুপুরে হেমকান্তর চারদিকে নেমে আসে । উড়ে উড়ে বেড়ায় । ভালবাসার কথা বলে ।

দক্ষিণের সূর্য একফালি সাদা কারপেট বিছিয়ে দেয় বারান্দায় । তাতে রেলিঙের নকশাদার পুষ্পিত ছায়া । ভারী ভাল লাগে হেমকান্তর । ঘুলঘুলির রঙিন কাচ দিয়ে রঙের বিচ্ছুরণ ঘটে যায় দেয়ালে । পায়রার ময়ূরকণ্ঠী গায়ে খেলা করে রোদের বর্ণালী । চিকের ভিতর দিয়ে চেয়ে দেখেন, শতভাগে ভাগ হয়ে গেছে বাইরের দৃশ্যাবলী । কী চমৎকার !

এইসব শব্দ ও দৃশ্য, তুচ্ছাতিতুচ্ছ সব ঘটনা হেমকান্তকে বার বার অবাক করে দেয় । বেঁচে থাকতে আজকাল তাঁর দ্বিগুণ ভাল লাগে কেন ? এই আলো ও ছায়া, এইসব অর্থহীন শব্দ, এসব মৃত্যুর পর কি পৌছাবে তাঁর কাছে কোনো দিন ? কে জানে কেমন সেই চির প্রদোষের জগৎ কিংবা কে জানে মৃত্যুর পর হয়তো কোনো অস্তিত্বই থাকে না কারো । সে এক স্বপ্নহীন অনস্তিত্বের অন্তহীন ঘুম ।

কখন নিজের অজান্তে চলে আসেন দোতলার বারান্দা ঘুরে ছেলে-মেয়েদের মহলে । এমনিতে আসেন না । স্নেহশীলা দাসী ও বিশ্বাসী যত্নশীল চাকরদের পরিচয়ই ছেলে-মেয়েরা ভালই আছে, তিনি জানেন । নিজের উপস্থিতির গুরুভার কখনো ওদের ওপর চাপিয়ে দিতে তাঁর ইচ্ছে হয় না ।

একটু চমকে উঠে শোনেন, কৃষ্ণকান্ত বিশাখাকে বলছে, দেখ দিদি, আজ যদি দুপুরে ঘুমোই তো গরু খাই ।

গরুই তো খাস । কালও ঘুমিয়েছিস । টাস্ক করেছিলি মান্টারমশাইয়ের ?

কাল ? ওঃ, রাত জাগতে হয়েছিল না ?

তোকে কে রাত জাগতে বলেছে ?

কে আবার বলবে ?

তবে জাগিস কেন ?

মনুপিসি যে বলে শশীদা বাঁচবে না !

তাতে তোর কী ?

আমি সেইজন্যই তো বসে থাকি ।

কেন বসে থাকিস ?

কমপাউন্ডার কাকা বলে, মরার সময় আত্মাটা শরীরের কোন ফুটো দিয়ে বেরোবে তার ঠিক নেই । কারো নাক দিয়ে, কারো কান দিয়ে, কারো মুখ দিয়ে, কারো নাভি দিয়ে, আবার গুহ্যদ্বার দিয়েও বেরোয় ।

কী অসভ্য রে ! ছিঃ ছিঃ ভাই, দাঁড়া মনুপিসিকে বলব ।

বাঃ, কমপাউন্ডার কাকা বলে যে আত্মাটা ধোঁয়ার মতো জিনিস । এক বিষৎ লম্বা । সুট করে বেরিয়ে আসে । আমি সেইটে দেখার জন্য বসে থাকি । শশীদার আত্মা কোথা দিয়ে বেরোবে জানিস ?

আমি জানব কী করে ?

ব্রহ্মরজ্জ দিয়ে । মহাপুরুষদের আত্মা ব্রহ্মরজ্জ দিয়ে বেরোয় ।

তোর শশীদা কি মহাপুরুষ নাকি ?

শশীদা স্বদেশী না !

তাতে কি ?

স্বদেশীরা তো আর যা তা লোক নয় । ইংরেজ মারে । শশীদা এক পাত্রীকে মেরেছে জানিস ?

বোমা দিয়ে ।

খুব বীরত্বের কাজ করেছে, না । বাবা শুনলে দেবেখন তোমাকে । স্বদেশীদের ছায়া পর্যন্ত মাড়াতে নেই ।

কৃষ্ণকান্ত। একটু যেন অবাক হয়ে বলে, বাবা স্বদেশীদের পছন্দ করে না ?

একদম না । আমরা ইংরেজদের পক্ষে ।

তবে বাবা শশীদাকে বাড়িতে থাকতে দিল কেন ?

মোটাই থাকতে দেয়নি । আটক রেখেছিল । পুলিশে ধরিয়ে দেবে বলে ।

তবে এখনো দেয়নি কেন ?

লোকটার অসুখ করল বলে ।

যদি শশীদা সেরে যায় তাহলে দেবে ?

নিশ্চয়ই দেবে দেওয়াই উচিত ।

কৃষ্ণকান্ত একটু চুপ করে থেকে বলল, তাহলে শশীদার মরাই ভাল ।

হেমকান্ত খুবই অবাক হলেন । তাঁকে ইংরেজের সমর্থক ও স্বদেশীদের বিরোধী বলে কবে চিহ্নিত করা হল, এবং কেন তা তিনি জানেন না । একটু কৌতুক বোধ করলেন তিনি । শশিভূষণকে ধরিয়ে দেবেন বলে আটক রাখা হয়েছে এ কথাই বা কে রটাল ? বিশাখাই বা এসব কথা জানল কোথা থেকে ? তিনি তো মেয়েকে এসব প্রসঙ্গে কখনো কিছু বলেননি । স্বদেশীদের প্রতি বিশাখার এই জাতক্রোধের কারণটাও তাঁর অজানা । বরং উন্টেটাই হওয়া উচিত ছিল । রঙ্গময়ীর শাসনে এবং ছায়ায় ওরা মানুষ রঙ্গময়ীর নিজের একটু স্বদেশীপ্রীতি আছে । কাজেই বিশাখার এরকম উন্টেট মত হওয়ার কারণ নেই । তবে ?

অনুচ্চ স্বরে তিনি ডাকলেন, কৃষ্ণ । বিশাখা ।

ভাইবোনের ঘর নিস্তব্ধ হয়ে গেল হঠাৎ ।

হেমকান্ত ঘরে ঢুকলেন ।

কৃষ্ণ ও বিশাখা উঠে দাঁড়ায় । তটস্থ, সন্ত্রস্ত । মুখচোখে বিহ্বল ভাব । হেমকান্তর সামনে ওদের কেন যে এরকম একটা রূপান্তর হয় ! তিনি তো শাসন তর্জন করেন না কখনো !

দু'দিকে দুটি প্রকান্ত খাট । জানালা ঘেঁষে মস্ত ডেস্ক । তার ওপর সাজানো বইখাতা, দোয়াতদান ও কলম । একটি বিলিতি মহার্ঘ টেবিল ল্যাম্প । দুই খাটের পাশেই শ্বেতপাথরের তেপায়া । দেয়াল আলমারি, আয়না বসানো বারমা সেগুনের আলমারি, কাচের বাস্কে সাজানো বিদেশী পুতুল আর খেলনা । দেয়ালে এয়ারগান ।

চারদিকে একবার তাকিয়ে দেখলেন হেমকান্ত । এ ঘরে তিনি কদাচিৎ আসেন ।

মেয়ের দিকে একটু সন্ধানী দৃষ্টি নিক্ষেপ করলেন তিনি । লোকচরিত্র অনুধাবনের অভ্যাস তাঁর নেই । মুখশ্রী দেখে চরিত্রের ঠিকানা পাওয়া তাঁর পক্ষে কঠিন । কিন্তু তাঁর মেয়েটি যে ভারী শ্রীময়ী তাতে সন্দেহ নেই । তাকালে চোখ জুড়িয়ে যায়, বুক ঠান্ডা হয় ।

কিন্তু মানুষের মুখশ্রীকে কি বিশ্বাস আছে ? তাঁর অন্য মেয়েরাও সুন্দরী । অপাপবিদ্ধ মুখশ্রী । কিন্তু তবু গোপনে মায়ের গয়না সরাতে তো তাদের বাধেনি । বিশাখা যে অন্য রকম হবে তা মনে করার কোনো কারণ নেই ।

হেমকান্ত মেয়ের দিকে চেয়ে সকৌতুকে প্রশ্ন করলেন, তুমি স্বদেশীদের পছন্দ করোনা ?

বিশাখা খুবই ঘাবড়ে গেছে । কী বলবে বুঝতে না পেরে হঠাৎ মাথা নত করে নখ দেখতে লাগল । ব্রীড়ার সেই ভঙ্গিটুকুও ভারী অপরাধ ।

মেয়েকে আর অস্বস্তির মধ্যে ফেলতে ইচ্ছে হল না তাঁর । মেয়ে মাত্রই কিছুটা নির্বোধ, কুচুটে, পরশ্রীকাতর, ঈর্ষাপরায়ণ । তাদের দোষও নেই । মেয়েদের ব্যক্তিত্ব গঠনে কোনো চেষ্টাও যে

সমাজে নেই। দেশে সম্প্রতি একটা নারীমুক্তি আন্দোলন শুরু হয়েছে। সেটা ভাল কি মন্দ এবং কাজ কতদূর এগিয়েছে তা হেমকান্ত জানেন না। তবে তাঁর বিশ্বাস স্ত্রীলোকদের উচ্চশিক্ষা দিয়ে কোনো লাভ নেই। তাদের মনের জানালা-কপাট খুলে বাইরের উদার মুক্ত আলো-হাওয়ার পথটুকু অবরিত করে দিলেই যথেষ্ট। সি এ টি ক্যাট শেখার চেয়ে থানকুনিপাতার আরোগ্য গুণ জানাটা অনেক বেশী কার্যকরী শিক্ষা। লোকে বলে, এদেশের মেয়েরা ভারী সহনশীল। কথাটা সত্যি বলে মনে হয় না হেমকান্তর। সহনশীলতা এক অনবদ্য গুণ, তা শিক্ষা করতে হয়। এদেশের মেয়েরা সয় বটে, কিন্তু সে দায়ে পড়ে। ভিতরে ভিতরে বিদ্রোহের আগুন ফুঁসতে থাকে, আর সে আগুন বেরোবার পথ পায় না বলেই অন্যবিধ রক্ত খোঁজে। হেমকান্ত আজ একটু একটু টের পান, সুনয়নার মধ্যেও সেই বিদ্রোহ ছিল। তাই আজ মেয়ের ওপর রাগ হল না হেমকান্তর। করুণা হল। ওকে তিনি কোনো শিক্ষাই দিতে পারেননি। শুধু জন্মসূত্রে পাওয়া সুন্দর মুখশ্রী ও ফর্সা রঙটুকুই ওর সম্বল।

বোধ হয়! হ্যাঁ, বোধ হয় কথাটা যোগ করে রাখা ভাল। কারণ বিশাখা তাঁর উরসজাত হলেও ওকে তো তিনি ভাল করে চেনেন না। সম্ভবত বিশাখা রঙ্গময়ীকে অপছন্দ করে। আর তাই রঙ্গময়ীর ঝোঁক যেদিকে, বিশাখার ঝোঁক ঠিক তার উল্টোদিকে। নইলে স্বদেশীদের প্রতি অত আক্রোশ থাকার কথা ওর না। কিন্তু রঙ্গময়ীর প্রতি ওর বিরাগের কারণটা কী? কারণ কি তিনি নিজেই?

ছেলের দিকে চেয়ে হেমকান্ত একটু স্বস্তি পেলেন। কৃষ্ণ তাঁকে দেখে তটস্থ বটে, কিন্তু ভীত নয়।

হেমকান্ত গাঢ়স্বরে প্রশ্ন করলেন, স্বদেশীদের তুমি পছন্দ করো?

কৃষ্ণ একটু ফ্যাকাসে হয়ে গেল।

হেমকান্ত বললেন, তুমি তোমার দিদির শাছে যা শুনেছো তা ঠিক নয়। আমি শশিভূষণকে ধরিয়ে দেব না। স্বদেশীদের প্রতিও আমার আক্রোশ নেই। ভয় পেও না। বলো।

কৃষ্ণকান্ত হেসে মাথা নোয়াল। বলল, হ্যাঁ বাবা। ওরা খুব সাহসী।

হেমকান্ত কেমন যেন একটু নিশ্চিন্ত বোধ করলেন। তাঁর আর কোনো ছেলেই স্বদেশীদের প্রতি আগ্রহ দেখায়নি। দেশে যে সব আন্দোলন হচ্ছে সে সম্পর্কে তারা নির্বিকার। তিনি নিজেও তাই। তাঁর এই ছেলেটি যদি স্বদেশ নিয়ে ভাবে তো ভাবুক।

হেমকান্ত বললেন, তোমার কাকা স্বদেশী করতেন। অবশ্য শশিভূষণের মতো ইংরেজ মারেননি। জানো বোধ হয়?

জানি। কাকাকে ইংরেজরা মেরেছিল।

বিস্মিত হেমকান্ত বললেন, একথা কে বলল?

মনুপিসি।

কথাটা সম্ভবত সত্য নয়। তবু প্রতিবাদ করলেন না হেমকান্ত। শুধু বললেন, হতে পারে। তবে কে মেরেছিল বা আদৌ মেরেছিল কিনা তা এখনও আমরা সঠিক জানি না। একটা নৌকোডুবি ঘটেছিল, এটাই জানা আছে।

মনুপিসি বলে, কাকাকে মারার পর প্রমাণ লোপ করতে নৌকোটা ডুবিয়ে দেওয়া হয়।

হেমকান্ত একটা দীর্ঘশ্বাস ফেললেন। এ ছেলের মনের মধ্যে কিছু জিনিস শিকড় গেড়ে বসেছে। তা সহজে ওপড়ানো যাবে না। বোধ হয় বীজটা ছড়াচ্ছে মনুই। তবু অসন্তুষ্ট হলেন না হেমকান্ত। আকস্মিক এক দুর্বলতাবশে ছেলের মাথায় একবার হাত রাখলেন। স্নেহের স্বরে বললেন, পড়াশোনা হচ্ছে তো ঠিকমতো?

আমি ফার্স্ট হই বাবা।

হও ? হেমকান্ত বিস্মিত । বলেন, কই, আমাকে কেউ বলেনি তো !

এবার বাৎসরিক পরীক্ষায় হয়েছি ।

বলোনি কেন ?

দিদি জানে ।

হেমকান্ত হাসলেন । ছেলের পরীক্ষার ফলটুকু পর্যন্ত তাঁর কানে কেউ পৌঁছে দেয় না । নির্বাসন কি একেই বলে না ? এই নির্বাসন দণ্ডের দাতা তিনিই, গ্রহীতাও তিনিই ।

কিন্তু আর নয় । বাইরে রোদ স্নান হয়ে এল । একটু বাদেই কুঞ্জবনে এক অদ্ভুত ছায়া নামবে । ফার্ন জাতীয় গাছগুলির ছায়া আলপনার মতো পড়ে থাকবে ঘাসে । ভাঙা গাড়িটার পাদানীতে বসে চারদিকে এক নিবিড় রূপের রাজ্যে ডুবে যাবেন তিনি । সময় নেই ।

হেমকান্ত ঘরে এসে পোশাক পরতে লাগলেন ।

কিন্তু বাধা এল । একজন কর্মচারী এসে খবর দিয়ে গেল, স্বয়ং দারোগা কাছারিঘরে অপেক্ষা করছেন । হেমকান্তর দর্শনপ্রার্থী ।

হেমকান্ত বিরক্ত হলেন । একটু উদ্বেগও বোধ করতে লাগলেন । দারোগার আগমন কেন তা অনুমান করতে কষ্ট নেই । শশিভূষণ ।

দারোগা রামকান্ত রায়েক সঙ্গে হেমকান্তর পরিচয় সামান্য । শুনেছেন লোকটা দুঁদে এবং প্রভুভক্ত ।

হেমকান্ত কাছারিঘরে ঢুকতেই রামকান্ত তাঁর হ্যাটটা বগলে করে উঠে দাঁড়ালেন । বিশাল ভুঁড়িদার চেহারা । কাছারির প্রাঙ্গণে দাঁড়িয়ে থাকা তাঁর ঘোড়াটিও বিশালদেহী এবং তেজী । দাঁড়িয়ে দাঁড়িয়ে পা ঠুকে নালের বিকট শব্দ করছে ।

রামকান্ত বললেন, একটু বিরক্ত করতে এলাম হেমবাবু । সরকারী কাজ ।

বসুন ।

রামকান্ত বললেন, বসা টসা পরে । অনেকক্ষণ বসে আছি । একবার সেই ছেলেটিকে দেখতে চাই ।

হেমকান্ত ন্যাকা নন । বুঝলেন । তবু একটু বিস্ময়ের ভান করে বললেন, কোন ছেলেটি ? শশিভূষণ । যে ছেলেটিকে আপনি আশ্রয় দিয়েছেন ।

কেন বলুন তো ।

একটু খবর আছে । এই ছেলেটিকে বরিশালের পুলিশ খুঁজছে । খুনের মামলা ।

হেমকান্তর উপস্থিতি বুদ্ধি ভাল খেলেনা । তিনি কী করবেন বুঝতে পারলেন না । শেষে হতাশার গলায় বললেন, তাকে আর দেখার কিছু নেই । ডাক্তার জবাব দিয়ে গেছে ।

তা জানি । তবু সরকারী কর্তব্য তো করতেই হবে । জানা দরকার এই ছেলেটিই সে কিনা ।

হলে কী করবেন ?

রিমুভ করার মতো অবস্থা দেখলে পুলিশ গার্ডে হাসপাতালে ট্রান্সফার করতে হবে ।

হেমকান্ত মৃদু স্বরে বললেন, বোধ হয় তা সম্ভব নয় ।

দেখা যাক । একটু অধৈর্যের ভাব প্রকাশ করলেন রামকান্ত । বললেন, আপনার বাড়ি-সার্চ করার ওয়ারেন্ট আমার সঙ্গেই আছে । তবু আমি তা করিনি । আপনি মান্যগণ্য লোক, যা করার আপনার অনুমতি নিয়েই করতে চাই ।

হেমকান্ত বললেন, চলুন ।

দীর্ঘ বারান্দা দিয়ে রামকান্তকে এগিয়ে নিয়ে যেতে যেতে আজ নিজের ওপর একটু ঘৃণা হচ্ছিল হেমকান্তর । চিরকাল সুখের জীবনই কাটিয়েছেন তিনি । নির্বিকার, আত্মসুখী । নিজস্ব জগতেই তাঁর বাস । বাইরে একটা অচেনা পৃথিবী আছে । সেখানে আছে অচেনা, অদ্ভুত চরিত্রের কিছু লোকজন ।



তাদের ভাল চেনেন না তিনি । এই শশিভূষণ সেই বাইরের দুনিয়ার লোক । কীই বা বয়স, তবু স্নেহের বন্ধন কেটে উধাও বেরিয়ে পড়েছে । খুনও করেছে হয়তো। কাজটা ভাল না মন্দ তার বিচার ইতিহাস করবে । কিন্তু নিজের অস্তিত্বের একটা জানান তো দিতে পেরেছে । হেমকান্ত তা পেরে ওঠেননি ।

বিছানায় শশিভূষণ শয়ান । অচেতন্য । গালে একদিনে দাড়ি আরও কিছু বেড়েছে । শরীরটা বড়ই বিবর্ণ, শীর্ণ । মাথায় জলপটি দিচ্ছিল রঙ্গময়ী । তাঁদের দেখে উঠে দাঁড়াল ।

রামকান্ত শশিভূষণের দিকে চেয়ে রইলেন কিছুক্ষণ । রঙ্গময়ীর দিকে চেয়ে বললেন, আপনি রুগীর কেউ হন ?

না । দেখাশোনা করছি ।

অবস্থা কেমন ?

ভাল নয় ।

একটু বাদে হাসপাতালের ডাক্তার এসে ওকে দেখবে । দুজন পুলিশ গার্ড থাকবে বাইরে ।

রঙ্গময়ী একটু ক্লান্ত ও কটু গলায় বলল, রুগী কি পালাবে ?

তা হয়তো নয় । তবু সাবধান হওয়া ভাল ।

ডাক্তার বলে গেছে, রুগী বেশীক্ষণ নয় ।

কোন ডাক্তার দেখছে ?

তিনজন দেখছে ।

তাদের স্টেটমেন্টও আমরা নেবো । রুগীর অবস্থা যদি সত্যিই খারাপ হয়ে থাকে তবে তার জন্য আপনারা কষ্ট পাবেন কেন ? সরকারই ওর ভার নেবে ।

সরকার ভার নেবে কেন ?

শশিভূষণ সাসপেকট ।

ক্লান্ত রঙ্গময়ী চুপ করে রইল ।

হেমকান্ত মৃদুস্বরে জিজ্ঞাস করলেন, এই কি সেই ?

রামকান্ত গম্ভীর গলায় বললেন, হ্যাঁ ।

হেমকান্ত একটা শ্বাস গোপন করলেন ।

রামকান্ত বারান্দায় বেরিয়ে এসে বললেন, কীভাবে ছেলেটি আপনার বাড়িতে আশ্রয় পেল সে সম্পর্কে আপনি একটা স্টেটমেন্ট লিখে রাখবেন । দরকার হবে ।

আমার স্টেটমেন্ট ? কেন ?

যাতে আপনাকে ঝামেলায় পড়তে না হয় ।

দারোগা রামকান্ত বারবাড়িতে এসে দুজন সিপাইকে ইশাঙ্গা করতেই তারা শশিভূষণের ঘরে থানা গাড়িতে রওনা হয়ে গেল । রামকান্ত ঘোড়ায় ওঠার আগে হেমকান্তের দিকে চেয়ে বললেন, শশিভূষণের অবস্থা আমার কাছে খুব খারাপ বলে মনে হল না ।

বলেন কি ? হেমকান্ত হতভম্ব হয়ে গেলেন । তারপর বললেন, ডাক্তারও যে জবাব দিয়ে গেছে !

সে তো শুনলাম । কিন্তু মুমূর্ষু রুগী আমি কিছু কম দেখিনি ।

আমরা কি মিথ্যে বলছি ? হেমকান্ত একটু রুষ্ট হয়ে বললেন ।

তা বলিনি । এমনও হতে পারে ডাক্তাররা ঠিক বলছে না । সে যাই হোক, হাসপাতালের ডাক্তার এসে দেখলেই সব বোঝা যাবে । আমাদের এই কাজই করতে হয় হেমবাবু, মনটাও তাই কেমন সন্দেহপ্রবণ হয়ে গেছে । কিছু মনে করবেন না । আচ্ছা ওই মহিলাটি কে ? আপনার আত্মীয়া ?

হ্যাঁ । ছেলেবেলা থেকেই এ বাড়িতে আছে ।

ওঁকে আমার কয়েকটা প্রশ্ন করার আছে, আপনি অনুমতি দিলে। তবে সে পরে হলেও হবে।  
হেমকান্তর কেমন বিভ্রান্ত লাগছিল। তাঁর সূরুচি ও সূক্ষ্ম অনুভূতির জীবনে এ যেন এক  
দৈত্যের হাত এসে মসীলেপন করতে লেগেছে। এ সব ওই বাইরের জগৎটা থেকে এসে হানা  
দেয়।

রামকান্ত রেকাবে পা রেখে ঘোড়ায় উঠলেন। তাঁর দেহের ভারে ঘোড়াটা কেঁতরে গিয়ে আবার  
সোজা হল। রামকান্ত বললেন, স্টেটমেন্টটার কথা কিন্তু ভুলবেন না। দরকার মনে করলে আপনার  
উকিলকে ডাকিয়ে তার পরামর্শ মতো লিখবেন। ফাঁকফোকর রাখবেন না।

রামকান্ত ঘোড়া ছুটিয়ে দিলেন। সেই অশ্বক্ষুরধ্বনি একটা বিপদ সংকেতের মতো বাজতে  
লাগল। ওঁর কথাগুলির মধ্যে যে প্রচ্ছন্ন হুমকি ছিল তাও টের পাচ্ছিলেন হেমকান্ত। কিন্তু কী  
করবেন? বরাবরই তিনি খানিকটা অসহায়। আজ আরও বেশী অসহায় লাগছিল। না, নিজের  
বিপদের কথা ভেবে নয়। আজ তিনি শশিভূষণের বিপদের কথা ভাবছিলেন। বোকা রঙ্গময়ী  
ওর অসুখটাকে ফাঁপিয়ে ফুলিয়ে রটনা করেছিল বটে, কিন্তু শেষরক্ষা হল না।

হেমকান্ত কাছারির খাটেই স্থাপুর মতো দাঁড়িয়ে ছিলেন। মাথার ওপর মশার পাল উড়ছে উস্‌স্‌  
একটা একটানা শব্দ করে। সন্ধ্যা ঘনিয়ে এল। ব্রহ্মপুত্রের জলে মিশে যাচ্ছে গারো পাহাড়ের মহিষ  
প্রতিম ছায়া।

একটা ঘোড়ার গাড়ি এসে থামল। সরকারী ডাক্তার তাড়াতাড়ি নেমে এলেন। কাছারির  
বারান্দায় চিত্রার্ণিতের মতো কর্মচারীরা দাঁড়িয়ে আছে। হেমকান্ত তাদের দিকে একটু ইশারা করে  
মুখ ফিরিয়ে কুঞ্জবনের দিকে এগোতে লাগলেন।

অনেকক্ষণ ভূতের মতো বসে রইলেন ভাঙা গাড়ির পাদানীতে। অঙ্ককার তাঁকে ছেঁকে ধরল।  
ছেঁকে ধরল মশা। শিশিরে ভিজতে লাগল পোশাক। জোনাকি পোকারা উড়তে লাগল চারদিকে  
পরীর চোখের মতো। কিছুই তেমন ভাবতে পারছেন না হেমকান্ত। মাথাটা অস্থির, এলোমেলো।

তীর একটা টর্চের আলো সেই একাকীভূত আর প্রস্তুতীভূত অঙ্ককারকে ছুরির ফলার মতো কেটে  
পায়ের কাছে এসে পড়ল।

আর্তনাদের মতো গলায় রঙ্গময়ী বলল, ওকে নিয়ে গেল।

একটা দীর্ঘশ্বাস ফেলে হেমকান্ত বললেন, তুমি বড় বোকা মনু। অথচ তোমাকে আমি বরাবর  
বুদ্ধিমতী ভাবতাম।

টর্চটা নিবিয়ে রঙ্গময়ী কাছে এসে দাঁড়াল। হঠাৎ আবার শাস্ত শোনাল তার গলা, ঘরে যাও।  
ঠাণ্ডা লাগবে।

লাগুক। সেটা বড় কথা নয়। শশীর ফাঁসি হবে, তার কথা ভাবো।

আমাকে সকলের কথাই ভাবতে হয়। ওঠো। ঘরে চলো।

ঘর ভাল লাগছে না।

রঙ্গময়ী একটু চূপ করে থেকে বলল, শশী তো মরতেই চায় বৈচে থেকে আর কী করবে  
বলো। ওকে মরতে দাও।

আর আমি মরলে?

তুমি? মরলে এখনও যে একজনকে বিধবা হতে হয়। তার বড় জ্বালা।

## ॥ ১৬ ॥

রেমি এক সকালে টেলিফোন পেল। অচেনা গলা।

বউদি, বলুন তো আমি কে?

রেমি হুঁচকে বলল, কী করে বলব।

গলাটা চেনা লাগছে না ?

টেলিফোনে গলা বোঝা যায় না ।

এবার ওপাশ থেকে অচেনা কণ্ঠ বলল, কিন্তু ভয় হচ্ছে, পরিচয় দিলেও কি চিনতে পারবেন !

চেষ্টা করে দেখতে পারেন । আমার স্মৃতিশক্তি খারাপ নয় ।

আমি সমীর । মনে পড়ছে ?

রেমি আবার হু কৌঁচকায় । মনে তার পড়েছে ঠিকই, কিন্তু খুশি হয়নি । এমনিতে সমীরকে তার খারাপ লাগেনি । বরং বেশীই ভাল লেগে গিয়েছিল । কিন্তু ছন্দার সঙ্গে সম্পর্কটার কথা টের পাওয়ার পর থেকেই মনটা কিছু বিরূপ হয়েছে ।

রেমি বলল, কী খবর ! কবে এলেন ?

আমি প্রায়ই আসি । গত মাসেও এসে গেছি ।

কই, যোগাযোগ করেননি তো !

সময় পাইনি । কলকাতায় আসি হাজারটা কাজ নিয়ে ।

তাই বুঝি !

টেলিফোনে আপনার গলাটা খুব নিকরুপ শোনাচ্ছে বউদি ।

কেন, উত্তপ্ত শোনানোর কথা ছিল নাকি !

সমীর একটু হাসল । তারপর বলল, কলকাতার লোকেরা একটু অদ্ভুত । বাইরে গিয়ে লোকের সঙ্গে খুব ভাব জমায়, কলকাতায় যাওয়ার নেমস্তম্ভ করে, কিন্তু তারপর কলকাতায় এলে আর চিনতে চায় না ।

তাই বুঝি ?

আপনি এখনও ছন্দা আর নন্দা কেমন আছে সেটুকুও জানতে চাননি ।

রেমি ঠোট কামড়ায় । কথাটা মিথ্যেও নয় । শিলিগুড়িতে গিয়ে ওদের কত সহজে আপন করে নিয়েছিল, অথচ আজকাল মনেই পড়ে না । সে লজ্জা পেয়ে বলল, ওদের চিঠি দেবো-দেবো করছিলাম । আমারও হাজারটা ঝামেলায় সময় হচ্ছে না ।

সময়ের অভাব হতেই পারে । মন্ত্রী পুত্রবধূ ।

যাঃ, স্বস্তর মন্ত্রী তো আমার কী ?

মন্ত্রীর বাড়ির বেড়ালটাও পায়াভারি হয় ।

পায়াভারি তো আপনিই, কলকাতায় এসেও খবর নেন না ।

নিই না ভয়ে । ভি আই পি লোক, পাস্তা দেন কি না দেন তার তো ঠিক নেই । টেলিফোনে গলা শুনেই তো বুঝতে পারছি খুব খুশি হননি ।

বাড়িতে এসে দেখুন পাস্তা দিই কি না !

সমীর ক্ষণকাল চুপ করে থেকে বলল, বাড়িতে যাবো না, তবে আপনার সঙ্গে আমার একটা দরকার আছে বউদি ।

রেমি ঠোট কামড়ে বলল, আচ্ছা, আপনি আমাকে তখন থেকে বউদি-বউদি করে যাচ্ছেন কেন বলুন তো ! দারজিলিঙে তো দিবিা নাম ধরে ডাকছিলেন !

ডেকেছিলাম নাকি ?

কেন, মনে নেই ?

সমীর হেসে বলে, আছে । কিন্তু তখন হয়তো নানা ঘটনায় লঘু-গুরু জ্ঞান নষ্ট হয়ে গিয়েছিল ।

জ্ঞানের নাড়ি তো বেশ টনটনে দেখছি । কী দরকার বলুন তো ! .

আছে । আজ বা কাল আপনার একটু সময় হবে ?

কখন ?

বিকেলের দিকে !

হতে পারে ।

আমি নিউ কেনিল ওয়ার্থ হোটেলে উঠেছি । জায়গাটা চেনেন ?

চিনি । কেন

আসতে পারবেন একা ?

একা

হ্যাঁ বউদি, কাউকে না জানিয়ে আসবেন ।

রেমি একটু ইতস্তত করে বলল, এ বাড়ির মেয়ে বউরা ছুটহাট বেরোতে পারে না । স্বশ্রমশাই পছন্দ করেন না ওসব ।

আমার দরকারটা খুব জরুরী ।

আপনি তো এ বাড়িতেই আসতে পারেন ।

না । পারি না ।

কেন বলুন তো

সমীর একটু চুপ থেকে বলল, আপনি আপনার স্বশ্রমকে কতটা চেনেন জানি না । উনি কিন্তু ভীষণ ডেনজারাস টাইপের লোক ।

তাই নাকি ? উনি কি আপনার ওপর চটে আছেন ?

ঘটনাটা আপনি বোধহয় ভুলে গেছেন

কোন ঘটনা ?

দারজিলিঙে আপনি একবার উত্তেজনার বশে আমাকে আঁকড়ে ধরেছিলেন । মনে আছে

রেমি লজ্জা পেয়ে বলে, ধরেছিলাম নাকি ?

ধরেছিলেন । এবং সেটা দেখতে পেয়েছিল লামা । তাকে ভোলেননি নিশ্চয়

না, ভুলিনি ।

আমি তখনই বলেছিলাম লামা ব্যাপারটা আপনার স্বশ্রমকে রিপোর্ট করতে পারে ।

হ্যাঁ, বলেছিলেন । লামা কি রিপোর্ট করেছে ?

করেছে । কাকা একদিন আমাকে ডেকে কয়েকটা অপ্রিয় প্রশ্নও করেন । কাস্তাবাবু ব্যাপারটা ঠুকে জানিয়েছেন ।

তাই আপনি এ বাড়িতে আসতে ভয় পাচ্ছেন ?

ঠিক ভয় নয় । সংকোচ । কৃষ্ণকাস্তাবাবু হয়তো আমাকে খুব সুনজরে দেখবেন না ।

রেমি একটু রাগের গলায় বলল, ওটা তো কাপুরুষতা আপনি না এলেই বরং সন্দেহটা বাড়ে ।

তা নয় । আমি তো কৃষ্ণকাস্তাবাবুর বাড়িতে বড় একটা যাই না । কাজেই এখন না গেলেও সন্দেহের কারণ নেই । গেলে বরং সন্দেহটাকে আরও খামোখা খুঁচিয়ে তোলা হবে ।

আপনি খুব হিসেবী লোক ।

কমপ্লিমেন্টটা ভাল নয় । কিন্তু আমাদের অ্যাপয়েন্টমেন্টটার কী হবে বলুন ।

কেনিলওয়ার্থহোটেলে আমি চিনি । কখন যেতে হবে বলুন ।

কাল বিকেল পাঁচটায় । আমি রিসেশনে থাকব । আপনি কি নিজেদের গাড়িতে আসবেন ?

আমাদের গাড়ি তো মোটে একটা । সেটা স্বশ্রমশাই ব্যবহার করেন । আমি যাবো ট্যাকসিতে ।

কেন বলুন তো !

যাক বাঁচা গেল । আমি গাড়িটা অ্যাভয়েড করতে চাইছিলাম ।

রেমি সন্দেহের গলায় বলে, এত গোপনীয়তা কিসের বলুন তো !

আপনি কি ভয় পাচ্ছেন বউদি ? তেমন কিছু নয় ।

ভয় তো আপনিই পাচ্ছেন মনে হচ্ছে ।

আমার ভয়ের একটু কারণ আছে । শ্রীজ, আমার সঙ্গে ফোনে আপনার কথা হল সেটা কাউকে বলবেন না ।

না বললাম ।

তাহলে কাল বিকেলে ?

আচ্ছা ।

পরদিন বিকেলে একা ট্যাকসি করে যেতে যেতে রেমির মনে হল, আমি কেন যাচ্ছি ? এই গোপনীয়তা, এই রহস্য সত্ত্বেও একটা হোটেলে একজন পরপুরুষের সঙ্গে দেখা করতে যাওয়াটা ঠিক নয় । তবু কেন যাচ্ছি ? তার একটু ভয়-ভয় করছিল । আবার আগ্রহও বোধ করছিল সে । তার ঘটনাহীন একঘেয়ে জীবনে একটা কিছু অন্যরকম ঘটুক না একদিন ।

হোটেলের রিসেপশনে সমীর অপেক্ষা করছিল । একটু কালো আর রোগা হয়ে গেছে মুখে উদ্বেগের সুস্পষ্ট চিহ্ন ।

বউদি । বলে এগিয়ে এল সে ।

রেমি খুব সেজে এসেছে । বিশুদ্ধ মুগার ওপর রেশমী বুটির দারুণ একখানা শাড়ি পরেছে সে । গায়ে রূপোর গয়নার একটা সেট । খুবই ভাল দেখাচ্ছে তাকে, সে জানে । কিন্তু সমীর তেমন মুগ্ধ হয়ে গেল না তো !

রেমি বলল, কী ব্যাপার বলুন তো !

ঘরে চলুন বলছি ।

দোতলায় একটা বেশ কেতাদুরস্ত ঘরে তাকে নিয়ে গেল সমীর । কিন্তু ঘরে ঢুকেই থমকে গেল রেমি ।

লণ্ডনও একটা মস্ত বিছানায় এলোচুলে, অবিন্যস্ত বদনে পড়ে আছে যে তাকে কষ্ট করে চিনতে হয় । সে ছন্দা । মুখ ফুলে আছে । চোখের কোলে জলের সুস্পষ্ট দাগ । কাজল আর লিপস্টিক লেপটে আছে মুখময় । এপাশ ওপাশ করতে করতে এক নাগাড়ে “উঃ বাবা উঃ বাবা” করে যাচ্ছে ভাঙা রেকর্ডের মতো ।

এ কী ? রেমি ঠেঁচিয়ে ওঠে ।

ছন্দা কয়েক সেকেন্ড স্থির হয়ে তাকে দেখল । তারপর হঠাৎ উঠে বসে কঁদে ফেলল । আঁচল তুলে মুখে চাপা দিয়ে বলল, আমি পারব না । আমি পারব না ।

কী পারবে না ? বলে রেমি গিয়ে তাড়াতাড়ি ছন্দার পাশে বসে । তার কাঁধে হাত রেখে বলে, কী হয়েছে ছন্দা ? তুমি এখানে কেন ?

ছন্দা কাঁদছে । জবাব দেওয়ার মতো অবস্থা নয় ।

সমীর একটু অপ্রতিভ মুখে বলল, আমরা একটা কাণ্ড করে ফেলেছি বউদি ।

রেমি খানিকটা আন্দাজ করতে পারছিল । হোটেলের ঘরে এভাবে ছন্দা আর সমীর, এর একটাই মানে হয় । তার আকস্মিক সংস্কার আর রুচিবোধে এমন অদ্ভুত আর ঘিনঘিনে লাগছিল ব্যাপারটা যে তা বলার নয় ।

রেমি বলল, কী কাণ্ড সমীরবাবু ? আপনি কি ওকে নিয়ে পালিয়ে এসেছেন ?

না । ঠিক তা নয় । ছন্দার কলকাতায় আসার কথা ছিল । আমার সঙ্গেই ।

তাহলে ?

হোটেলের ওঠার কথা ছিল না ।

উঠলেন কেন তবে ? ছিঃ ছিঃ ।

শ্রীজ বউদি, ওরকম করবেন না। তাতে ও আরও বিগড়ে যাবে।

বিগড়েবারই তো কথা।

দোষটা তো সবটাই আমার নয়। ওরও। ওকেই জিজ্ঞেস করুন। আমি আধ ঘণ্টার জন্য বাইরে যাচ্ছি।

সমীর বাইরে গিয়ে দরজা টেনে দিল।

সুত্ৰ ঘরে ছন্দার ফুঁপিয়ে ফুঁপিয়ে কান্নার শব্দ ক্রমে অসহ্য হয়ে উঠল রেমির কাছে। যান্ত্রিকভাবে সে ছন্দার মাথায় আর পিঠে হাত বুলিয়ে দিতে দিতে বলল, কৈদোনা ছন্দা। আমরা তো আছি। ভয় নেই।

ছন্দা মিনিট দশেক বাদে একটু শান্ত হল। মাথা নীচু করে বসে রইল চুপচাপ।

রেমি বলল, কী হয়েছে বলবে তো!

ওর দোষ নেই।

কী হয়েছে খুলে বলো।

একটা দীর্ঘশ্বাস ফেলে ছন্দা বলল, আমার বিয়ে ঠিক হয়েছে। সেই বিয়ের বাজার করতেই কলকাতায় আসা। সমীরদা ঠিক রাজি ছিল না। আমিই বললাম, চলো এই সুযোগ আর পাবো না। দুজনে হোটলে এসে উঠলাম।

তারপর?

তার পর থেকেই হঠাৎ কেমন ওলটপালট লাগছে। মনে হচ্ছে কাজটা ঠিক করিনি।

ঠোঁটকাটা রেমি বলেই ফেলল, কাজটা খুব খারাপ করেছে।

আমারও তাই মনে হচ্ছে। বাবা মা আত্মীয়রা কেউ আর আমার মুখদর্শন করবে না। আমি সেটা সহ্য করতে পারব না।

রেমি হঠাৎ জিজ্ঞেস করল, তোমরা কতদূর এগিয়েছিলে? এক ঘরে রাত কাটানো, এক বিছানায়...

আঃ, চুপ করো রেমি। আমার গা জ্বালা করছে। বোলো না। সবকিছুই হয়েছে। তবু আমি এসব থেকে আবার ফিরে যেতে চাই।

অত অস্থির হচ্ছে কেন? লোক জানাজানি তো হয়নি।

হয়েছে কি না জানি না। তবে আমাদের সন্ট লেকের বাড়িতে ওঠার কথা। সেখানে আমার এক বিধবা পিসি থাকে বাবা নিশ্চয়ই টেলিফোনে খবর নিয়েছে।

রেমি কয়েক মুহূর্ত ভাবল। তারপর বলল, দাঁড়াও। আমি ব্যবস্থা করছি। কিন্তু সমীরবাবুকে বোঝানোর দায়িত্ব তোমার।

আমি কাউকে বোঝানোর দায়িত্ব নিতে পারব না। মাথা পাগল-পাগল লাগছে।

এত প্রেম হঠাৎ নিবে গেল কেন তা বুঝতে পারছিল না রেমি। তবে তার মনে হচ্ছিল, ছন্দার এসব অনুভূতি সত্য ও সঠিক।

সে দরজা খুলে বাইরে বেরোলো। সমীর দাঁড়িয়ে আছে করিডোরে। মুখচোখ অপ্রসন্ন।

রেমি তার সামনে দাঁড়িয়ে বলল, কী করতে চান?

সমীরের চোখ জ্বলে উঠল হঠাৎ। বলল, ও এখন ন্যাকা সাজছে।

তার মানে?

তার মানে ও কি আপনাকে কিছু বলেনি?

একটু বলেছে।

আমার সমস্ত ক্যারিয়ার নষ্ট হয়ে গেল। কাকা এই ঘটনার পর অবশ্যই আমাকে আর প্রশ্রয় দেবে না। কিন্তু সে প্রবলেম ছন্দার নেই।

প্রবলেম আপনাদের দুজনেরই।

না। কাকা ছন্দাকে ফিরিয়ে নেবে। ক'দিন বাদে ওর বিয়ে হয়ে যাবে। মুশকিলে পড়ব আমি।  
অথচ আমি দুম করে রিস্কটা নিতে চাইনি।

এখন কী করা যায় সেটা তো বলবেন।

এখন রাস্তা একটাই। আমি ওকে বিয়ে করব।

ও রাজি হবে না। রেমি অত্যন্ত দৃঢ়তার সঙ্গে বলল।

আপনি ওকে রাজি করান বউদি। একটু ভাঙা গলায় সমীর বলে।

আপনি কেন এরকম একটা বিব্রী ঘটনা ঘটাতে চাইছেন?

মরিয়া হয়ে। আমাকে শেষ করে ও দিবি। আরামে থাকবে, তা হয় না।

এটা কি প্রতিশোধ নেওয়ার সময়?

আমি জানি না। কিন্তু এখন পিছানোর পথ নেই।

রেমি গলায় সামান্য দৃঢ়তা এনে বলল, তাহলে আমাকে ডেকেছেন কেন? আপনার কি ধারণা  
আমি এই অসামাজিক কাজ সমর্থন করব?

না। তবে আপনাকে আমার লেভেল হেডেড পারসন বলে মনে হয়েছিল। আপনি হয়তো  
সিচুয়েশনটা বুঝে ওকে বোঝাতে পারবেন বলে ভেবেছিলাম।

আমার সম্পর্কে আপনার ধারণা চমৎকার।

রাগ করবেন না। আমি আপনার হেলপ চাইছি।

আমি হেলপ করতে পারব না সমীর। ছন্দাকে আমি নিজের কাছে নিয়ে যেতে চাই।

আচমকাই সমীর একটু উঁচু গলায় বলল, শাট আপ। আমি ওকে খুন করব তবু ছাড়ব না।

আপনি যদি আমাকে হেলপ করতে না পারেন তবে চলে যান।

রেমি একটুও ভয় পেল না। কৃষ্ণকান্ত চৌধুরির অগাধ ক্ষমতার ছায়ায় থাকতে থাকতে সে  
ভয় পাওয়া ভুলে গেছে। সে জানে, কৃষ্ণকান্ত সব হয়কে নয় করে দিতে পারেন।

সে বলল, ঠিক আছে, যাচ্ছি। ছন্দাকে একটা কথা বলে আসি।

ঘরে ফিরে সে ছন্দাকে বলল, ভেবে না। সমীর এখন একদম পাগল। ওকে ট্যাকল করতে হলে  
অন্য লোকের সাহায্য দরকার।

রেমি ঘর থেকে বাড়িতে টেলিফোন করল। বাড়িতে কৃষ্ণকান্ত নেই, তবে ধুব আছে। সে ধুবর  
সঙ্গেই কথা বলতে চাইল।

টেলিফোনে ধুব এলে রেমি বলল, একবার এঙ্কুনি কেনিলওয়ার্থ হোটেলে আসবে?

কেন?

দরকার আছে।

তুমি ওখানে কী করছ?

এলেই দেখতে পাবে। এসো।

আমরা বউয়ের হুকুমে চলি না, কি হয়েছে বলো।

উঃ, বলছি আমার ভীষণ বিপদ।

কিরকম বিপদ?

এসো না। পায়ে পড়ি। সব কি টেলিফোনে বলা যায়?

আমি কিন্তু মাল খেয়ে আছি।

তবু এসো। কাউকে বোলো না।

আচ্ছা।

ধুব পনেরো মিনিটের বেশী সময় নিল না আসতে। রিসেপশানে টেলিফোন করে বলে রেখেছিল

রেমি। ধুব আসা মাত্রই ওপরে নিয়ে এল বেয়ারা।

কী হয়েছে ?

ছন্দা। চিনতে পারছ ? রেমি ছন্দাকে দেখিয়ে বলে।

পারছি। এরকম অবস্থা কেন ?

রেমি সংক্ষেপে বলল। জিজ্ঞেস করল, কী করা যায় বলো তো !

সমীর কোথায় ?

বাইরে কোথাও আছে।

ধুব গভীর হয়ে চারদিকটা তাকিয়ে দেখল একটু। তারপর এক অভূত কর্তৃত্বের গলায় ছন্দাকে আদেশ করল, তোমার জিনিস গুছিয়ে নাও। ট্যাকসি দাঁড়িয়ে আছে।

ছন্দা সেই গলার স্বরে বিদ্যুৎস্পৃষ্টের মতো উঠে পড়ল। বলল, গোছানোই আছে। ওই স্যুটকেসটা।

ধুব সেটা তুলে নিয়ে বলল, এসো। সমীর বোধ হয় পালিয়েছে।

তারা তিনজন নিরাপদে নেমে এল নীচে। ট্যাকসিতে উঠল। চলে এল কালীঘাটের বাড়িতে। ছন্দা তেমন গোলমালে পড়েনি। ধুব মাঝখানে পড়ে ব্যাপারটা মিটিয়ে নিয়েছে। কিন্তু সমীরের কোনো পাত্তা পাওয়া যাচ্ছিল না।

## ॥ ১৭ ॥

রঙ্গময়ীর আকস্মিক ওই তরল মন্তব্যে এত লজ্জা পেলেন হেমকান্ত যে, রাতে তাঁর ভাল ঘুম হলনা। শশিভূষণ এখন হাসপাতালে পুলিশের হেফাজতে, সেই চিন্তাও তাঁকে কুরে কুরে খাচ্ছে।

জীবনটাকে তিনি যতদূর সম্ভব নির্ঝঞ্ঝাট এবং সরল রাখতে চেষ্টা করেছিলেন। তার জন্যই সংসারের সঙ্গে বেশী মাথামাথি করেননি, পুত্রকন্যাদের সঙ্গে ঘনিষ্ঠ হননি, বিষয়ের প্রতি আসক্ত হননি। তিনি চেয়েছিলেন এমন একটা জীবন যাতে জটিলতা নেই, আবর্ত নেই, অতিশয় শোক বা অত্যধিক আনন্দ নেই। কিন্তু তা পেলেন কই ! জীবনের অনেকগুলি কপাট তিনি সভয়ে বন্ধ রেখেছিলেন। সেইসব কপাটের আড়ালে কী আছে তা জানার ইচ্ছাকে পর্যন্ত তিনি সভয়ে এড়িয়ে চলেছেন।

সেইরকম এক বন্ধ কপাট ছিল রঙ্গময়ী। আজ ওপাশ থেকে রঙ্গময়ী সেই কপাটে মৃদুমন্দ করাঘাত করতে শুরু করেছে। যদি অব্যাহত করে দেন দ্বার তবে হয়তো ভেসে যাবেন।

কাতর এক যন্ত্রণার শব্দ করে হেমকান্ত নিশুত রাতে পাশ ফিরলেন। এই শীতেও লেপের তলাকার উষ্ণতা তাঁর কাছে অসহ্য লাগছিল। উঠে আস্তে আস্তে এসে দাঁড়ালেন উস্তরের জানালার ধারে। জানালা খুলে দিলেন।

আজ কুয়াশা নেই। সামান্য জ্যোৎস্না আছে। গারো পাহাড়ের হিম বাতাস ব্রহ্মপুত্রের জল ছুঁয়ে আরো খরশান হয়ে আসছে। বালাপোশ ভেদ করে হাজারটা তীরের মতো বিদ্ধ করে যাচ্ছে শরীর। কিন্তু হৃদয় যখন উত্তপ্ত তখন বাইরের শীতলতা তেমন অনুভব করা যায় না।

ব্রহ্মপুত্রে সাদা বালির চর জেগে আছে। ওপারে জলা জমিতে মাঝে মাঝে ভূতের লষ্ঠনের মতো জ্বলে জ্বলে উঠছে নীলচে সবুজ শিখা। শূন্যে দোল খেয়ে হঠাৎ নিবে যাচ্ছে আবার। আলেয়া। রাত্রির কোন প্রহর ঘোষণা করছে শেয়ালের পাল ? চাঁদের মুখে ডানা মেলে উড়ে যাচ্ছে বাদুড়।

এই নিসর্গকে হেমকান্ত বুঝতে পারেন। তাঁর শরীরের সীমায় আবদ্ধ অস্তিত্ব এই রহস্যময় গভীর রাত্রির আলো আঁধারিতে নিজের দুকূল ছাপিয়ে যেন চারদিকে প্রবাহিত। নিজের মানুষী পরিচয়, নাম, গোত্র সব বিলুপ্ত হয়ে যেতে থাকে। যদি সমাজ, সংসার, রাষ্ট্র এসব না থাকত তাহলে এই



পৃথিবীতে হেমকান্তর মতো মানুষ বড় সুন্দর জীবন যাপন করতে পারত ।

ঘড়িতে রাত তিনটে বাজবার সংকেত শুনে সামান্য নড়লেন হেমকান্ত । আজ আর ঘুম আসবে না । জীবনের বন্ধ দুয়ারগুলিতে আজ বারবার কে কড়া নাড়ছে ! কড়া নাড়ছে রঙ্গময়ী, শশিভূষণ, সচ্চিদানন্দ ।

খুলে দেবেন দরজা ?

হেমকান্ত নিঃশব্দে নীচে নেমে এলেন । ভোর চারটে থেকে সাড়ে চারটের মধ্যে রোজ তাঁর ঘুম ভাঙে । প্রাতঃকৃত্য শুরু করেন । আজ একটু আগেই শুরু হল তাঁর দিন ।

কুয়োয় বালতি ফেললেন । হাত বেয়ে খড়খড়ে শুকনো দড়ি নেমে যাচ্ছিল নীচে । জল তলানীতে গিয়ে ঠেকেছে । বহু নীচে গোল চক্রাকার জলের স্থির আয়না । জ্যোৎস্নায় আলোকিত আকাশের একটুখানি প্রতিবিম্ব তার বুকে । স্থূল বালতির স্পর্শে শতখান হয়ে ভেঙে গেল জলের বৃত্তাকার কাচ ।

বালতিটা টেনে তুলতে ইচ্ছে হল না হেমকান্তর । দড়িটা ধরে রইলেন আলগা হাতে । তাঁর মনে হচ্ছিল, ঠিক পিছনেই অপরূপ এক সাতরঙা ময়ূর পেখম মেলে চালচিত্রের মতো দাঁড়িয়ে রয়েছে । পিছন ফিরলেই মুখোমুখি দেখা হয়ে যাবে । হয়তো সেই মৃত্যুর দূত ।

মুঠিটা হঠাৎ আলগা করে দিলেন হেমকান্ত । দড়িটা ছপাৎ করে গভীর কুয়োর মধ্যে পড়ে গেল । পার্থিব যা কিছু আকর্ষণ ছেড়ে হেমকান্ত তাঁর মৃত্যুর মুখোমুখি হলেন ।

কী চাও ?

তোমাকে । শুধু তোমাকেই । ময়ূর বলল ।

আমি প্রস্তুত নই ।

মৃত্যু তো কারো প্রস্তুতির ধার ধারে না । খেলার মাঝখানে খেলার ঘুঁটি তুলে নিয়ে যায় । প্রস্তুত নও সে তোমার দোষ ।

মৃত্যুর কি কোনো রচনা নেই ? সে কি চোর ?

না । তা কেন ? সে তো আসবেই, জানা কথ্য । বেঁচে থাকা মানেই তো প্রতিটি মুহূর্ত তার পদধ্বনির জন্য অপেক্ষা করা ।

আমি অন্যরকম জানতাম ।

সে কিরকম ?

আমার মনে হয়, জীবনেরই পরিণতি মৃত্যু । আগে পরিপূর্ণ জীবন । উৎস থেকে শুরু করে নানা ঘাত প্রতিঘাত ভেদ করে বয়ে যাওয়া । কত ঝাঁক, কত খাদ, কত উঁচুনিচু, গ্রাম ও শহর ছুঁয়ে নদী যেমন যায় । তারপর মোহনায় যখন গতি শ্লথ, বিস্তার অগাধ তখন মহাসমুদ্রের সঙ্গে দেখা ।

মৃত্যু উপমা মানে না, নিয়ম মানে না ।

কোনো নিয়মই নয় ?

তার নিয়ম আলাদা । তোমাদের সঙ্গে মিলবে না ।

কেন এরকম ? মৃত্যু কি স্বেচ্ছাচারী শাসক ?

তার স্বরূপ জীবন থেকে জানা অসম্ভব ।

সে কি এক স্থির ও ব্যাপ্ত অঙ্ককার ?

না । তাও নয় ।

সে কি ভিন্নতর এক অস্তিত্ব ?

তুমি আছো, এটা যদি সত্যি হয় তবে তুমি যে ছিলে এবং তুমি যে থাকবে তাও সত্য । কেউই তো অনস্তিত্ব থেকে অস্তিত্ব গ্রহণ করতে পারে না ।

সে কেমন অস্তিত্ব ?

সে এক গভীর আকাঙ্ক্ষা, আকুল পিপাসার ঘনবদ্ধ একটি বিন্দু।

কিসের আকাঙ্ক্ষা? পিপাসাই বা কিসের?

তুমি কি জানো না?

আমার আকাঙ্ক্ষার তীব্রতা নেই। আমার জীবন স্তিমিত, আমার আশা আকাঙ্ক্ষাও স্তিমিত।

তাহলে কিসের জন্য বেঁচে থাকতে চাও?

তা তো জানি না। স্বল্প পরিসরে আবদ্ধ আমার জীবন। কিন্তু তবু আমার বেঁচে থাকতে ভাল লাগে।

অন্ধকারে মিশে স্থির দাঁড়িয়ে আছেন হেমকান্ত। মুখ, পা, শরীরের অনাবৃত অংশগুলিতে হেঁকে ধরেছে মশা। তবু হেমকান্তের শরীরের চেতনা নেই। তাঁর নিজস্ব চেতনা যেন চরাচরের অদ্ভুত এই জ্যাংলামাথা ব্যাপ্তির মধ্যে হারিয়ে গেল।

ভোরের কিছু আগে লোকজনের সাড়া পাওয়া গেল। হেমকান্ত সন্ধিতে এলেন।

শ্যামকান্ত শরীরচর্চা করতেন। তাঁর কিছু কাঠ ও লোহার মুগুর নীচের একটা ঘরে আজও জড়ো করা আছে। প্রাতঃকৃত্য সেরে হেমকান্ত আজ গিয়ে সেই ঘরে ঢুকলেন। ফুটবল ছেড়েছেন অনেকদিন। তারপর আর শরীর নিয়ে মাথা ঘামাননি। আজ মনে হল, মানসিক এই বিহ্বল ও বিবশভাবটা শরীরের আলস্যের দরুনও হতে পারে। সম্ভবত শরীরটাকে চাঙ্গা করা গেলে মনও চাঙ্গা হবে।

ঘরের দরজা সাবধানে ঠেটে তিনি মাঝারি একটা মুগুর তুলে নিয়ে কিছুক্ষণ ঘোরালেন। কিন্তু অল্পেই হাঁফিয়ে উঠতে হল। একটু বিশ্রাম আবার কিছুক্ষণ ঘোরালেন। মন্দ লাগছিল না। বুড়ো বয়সের একটা খেলা।

যখন বেরিয়ে এলেন তখন মুখ লাল, গা ঘামে ভেজা। তবে মনটা একটু চনমনে লাগছিল। যেন বয়সটা এক দুই দশক পিছু হেঁটেছে। নির্দিষ্ট রুটিনের বাইরে তিনি বড় একটা চলেন না। অনিয়মের কপাটগুলো বন্ধ রাখেন। আজ নিয়ম ভাঙার একরকম আনন্দ পাচ্ছিলেন।

কৃষ্ণকান্ত তার ঘরের বারান্দায় মাদুর পেতে রোদে পিঠ দিয়ে পড়তে বসেছে। হেমকান্ত তার কাছে গিয়ে হাজির হলেন। মুখে একটু উদ্বেগ। জিজ্ঞেস করলেন, তুমি একটু আধটু শরীরচর্চা করো তো?

কৃষ্ণকান্তের মুখখানা আজ ভার এবং বিষণ্ণ। মুখ তুলে বাবাকে একটু বিস্ময়ভর্যে দেখে তাড়াতাড়ি উঠে দাঁড়িয়ে বলল, আমি ফুটবল খেলি।

ও। আচ্ছা, খুব ভাল।

আমি ভাল ঘোড়ায় চড়তে পারি।

বেশ। আর কী? সঁতার কাটতে শিখেছো?

হ্যাঁ।

নীচের ঘরে কয়েকটা মুগুর আছে। ভাঁজতে পারো। মুগুর ভাঁজা ভাল।

মুগুর কি ঘোরাতে হয়?

হ্যাঁ। ওপর নীচ ডাইনে ঝাঁয়ে। দরকার হলে বোলো, আমি দেখিয়ে দেবখন।

বলে হেমকান্ত চলে আসছিলেন।

পিছন থেকে কৃষ্ণকান্ত ডাকল, বাবা।

হেমকান্ত ফিরে চেয়ে বললেন, কী বলছ?

শশীদা কি ফিরে আসবে?

শশী! হেমকান্ত একটু বিপন্ন হয়ে বললেন, আসবে না কেন?

সবাই বলছে শশীদার ফাঁসি হবে।

হেমকান্ত নিস্তেজ গলায় বলেন, বিচারে দোষী প্রমাণিত হলে, হতে পারে।

যদি হয় ?

আগে তো হোক।

শশীদার তো অসুখ। অসুখ না সারলেও কি ফাঁসি দেবে ?

ফাঁসির কথা উঠছে কেন এখন ? সে কোনো অন্যায় করেছে বলে তো আমরা জানি না।

শশীদা এক সাহেবকে মেরেছে। বরিশালে।

তুমি জানলে কী করে ?

মনু পিসির মুখ থেকে শুনেছি।

মনু জানে না।

শশীদা জ্বরের ঘোরে নিজেও বলছিল।

তাই নাকি ? জ্বরের ঘোরে মানুষ ভুলই বকে।

যদি শশীদা দোষী হয়েই থাকে তাহলে ?

তাহলে ফাঁসি হতেও পারে।

যদি গায়ে জ্বর থাকে তবে ?

জ্বর সারিয়ে নেবে।

কমপাউনডারকাকাও আমাকে তাই বলছিল। গায়ে জ্বর থাকলে ফাঁসি দেবে না। জ্বর সারিয়ে নেবে।

হেমকান্ত একটু হাসলেন।

কৃষ্ণকান্ত ইঠাৎ বলল, কেন এরকম নিয়ম বাবা ? ফাঁসিই যখন দেবে তখন জ্বর সারানোর কী দরকার ?

কথাটা হেমকান্ত একটু ভেবে দেখলেন। বড় মানুষরা এমন অনেক হাস্যকর ও অযৌক্তিক আচরণ করে যা ছোটোদের চোখেও অসঙ্গত ঠেকে। সত্যিই তো, ফাঁসিই যদি দিবি তো জ্বর সারানোর কী দরকার ?

হেমকান্ত প্রশ্ন করলেন, তোমার কি শশীর জন্য মন কেমন করছে ?

এই প্রশ্নে কৃষ্ণকান্তের চোখ ছলছলে হয়ে এল। বলল, হ্যাঁ বাবা খুব মন কেমন করছে। শশীদার তো দোষ নেই।

খুন করা নিশ্চয়ই অপরাধ।

শশীদা তো ইংরেজ মেরেছে। তাতে তো দোষ হয় না।

ইংরেজ মারলে দোষ হয় না একথা তোমাকে কে বলল ?

সবাই বলে ওটা বীরত্বের কাজ।

হেমকান্ত মাথা নেড়ে বিষম গলায় বললেন, সবাই বলে না। সবাই কি অযৌক্তিক কথা বলতে পারে ? ইংরেজরাও মানুষ, মানুষ মারা বীরত্বের কাজ হতে যাবে কেন ?

ওরা যে আমাদের পরাধীন করে রেখেছে !

সেটা শুধু ওদের দোষ তো নয়। দোষ আমাদেরও আছে। ওরা আমাদের সেই দোষটুকুর সুযোগ নিয়েছে মাত্র। ইংরেজ যদি আমাদের পরাধীন না করত তাহলেও আমাদের রেহাই ছিল না। ফরাসী বা পর্তুগীজরা এসে আমাদের দেশ দখল করত। তুমি এসব কথা জানো না ?

একটু একটু জানি।

পরের মুখে কখনো ঝাল খেও না। নিজের বিচারবুদ্ধি কাজে লাগানোর চেষ্টা করো। যে অবস্থায় ভারতবর্ষকে ইংরেজরা দখল করেছিল সেই অবস্থায় ইংরেজের অধীনতাই ছিল আমাদের মন্দের ভাল।

কৃষ্ণকান্ত তদগতভাবে তার বাবার দিকে চেয়ে থাকে। কোনো কথা বলে না।

হেমকান্ত জানতেন না, তাঁর কনিষ্ঠ পুত্রটি তাঁকে কত উচ্চ আসনে বসিয়ে রেখেছে। বাবা যা বলেন তাই কৃষ্ণকান্তের কাছে দেববাক্য। বাবা বলেন অবশ্য খুব কম। আর কম বলেন বলেই বোধ হয় সেগুলির ওজন অনেক বেশী মনে হয় কৃষ্ণকান্তর।

হেমকান্ত একটা দীর্ঘশ্বাস ছেড়ে বললেন, একজন দুজন ইংরেজকে মেরে লাভ কী? ওরা সাত সমুদ্র পেরিয়ে অনেক বিপদের ঝুঁকি নিয়েই এদেশে এসেছিল। সারা পৃথিবীটা জয় করতেও তো কম সাহস লাগে না। তুমি কি ভাবো ওরা দুচারটে বোমা বন্দুককে ভয় পায়, না দুচারজন মরলেই ঘাবড়ে যায় ওরা অত ভীক্ জাত নয়।

তাহলে কি শশীদার ফাঁসি হওয়াই উচিত?

তা বলিনি। শশী কী অপরাধ করেছে তা আমরা এখনো জানি না। ওসব কথা থাক। তোমার মনটা বোধ হয় আজ ভাল নেই।

না। আমার মনটা আজ বড় কেমন করছে।

তাহলে চলো, ব্রহ্মপুত্রে একটু নৌকো করে বেড়িয়ে আসি।

এ কথায় কৃষ্ণকান্তর মুখ উজ্জ্বল হল, অবিশ্বাসের গলায় বলল, আপনার সঙ্গে বাবা?

হেমকান্ত বুঝতে পারছিলেন না, ছেলের কাছে তাঁর কোনো দুর্বলতা ধরা পড়ে গেল কিনা। পুত্রস্নেহের কোনো প্রকাশ ঘটুক এটা তিনি চাননা। বড়ই অস্বস্তিকর ব্যাপার হবে সেটা। তাই একটু লজ্জার সঙ্গে বললেন, আমারও মনটা ভাল নেই। শশিভূষণের জন্য আমি তো কিছু করতে পারলাম না। কিন্তু অতিথিকে রক্ষা করা গৃহস্থের কর্তব্য। চলো, একটু ঘুরেই আসি।

নদীর ঘাটে কয়েকটা নৌকো সর্বদাই থাকে। হেমকান্তের নিজস্ব একটা ছোটো বজরাও আছে। কিন্তু হেমকান্ত আজ নিজস্ব নৌকো নিলেন না। ছোটো একটা ডিঙি ভাড়া করলেন। মাঝির কাছ থেকে বেঁঠা নিজের হাতে নিলেন। ছেলেকে বললেন, হালটা তুমিই ধরো।

কৃষ্ণকান্তর মুখ উদ্ভাসিত হয়ে গেল আনন্দে। শীতের কবোষ রোদ, ব্রহ্মপুত্রের গৈরিক বিস্তার, রূপোলী জলের ওপর বাতাসের হিলিবিহি এবং প্রিয় পুত্রটির নিষ্পাপ মুখে উত্তেজিত আনন্দের প্রভা হেমকান্তের বড় ভাল লাগল। রাত্রির অনিদ্রার কথা ভুলে গেলেন। শরীরটা যেন যৌবনের গান গাইছে। তিনি সবল হাতে বেঁঠা বাইতে লাগলেন। অনভিজ্ঞ কৃষ্ণকান্তর হাল ধরার দোষে মাঝে মাঝে নৌকো দিগন্ত হচ্ছিল। একবার একপাক ঘুরেও গেল। মাঝি হালের জন্য হাত বাড়তেই হেমকান্ত ধমক দিলেন, তুই বসে থাক। ও ঠিক পারবে।

হেমকান্তর এরকম প্রগলভ আচরণ বহুকাল কেউ দেখেনি।

তিনি নৌকোটা ভেড়ালেন নদীর মাঝখানকার চরে। সে এক অপার্থিব সৌন্দর্যের জঠর যেন বা। মাথার ওপর ঘন নীল চাঁদোয়া। দুদিকেই ব্রহ্মপুত্রের গভীর স্রোত বয়ে যাচ্ছে। নদীর পরপারে বসতিহীন অবাধ প্রকৃতি। চরে কলুই শাকের বীজ ছড়িয়েছিল কে। হাঁটু সমান দুর্বোধ্যাসের মতো অতি সবুজ ও নরম ক্ষেত কী সুন্দর!

হেমকান্ত সামান্য জল ভেঙে কৃষ্ণকান্তকে নিয়ে চরে উঠে এলেন। কিছুক্ষণ বোবা হয়ে চেয়ে দেখলেন চারদিকে। তারপর ছেলের দিকে চেয়ে জিজ্ঞেস করলেন, তোমার ভাল লাগছে না? খুব ভাল লাগছে।

তিনি সন্নেহে কৃষ্ণকান্তের মাথার চূলে একটু হাত বুলিয়ে দিলেন। তারপর ক্ষেতের ভিতর দিয়ে হাঁটতে হাঁটতে চরের শেষপ্রান্ত পর্যন্ত চলে গেলেন। জল ও মাটির প্রগাঢ় গন্ধ রোদে আরো ঝাঁঝালো হয়ে উঠেছে এখন। এই গাছপালা, ওই আকাশ, আর চারদিকের এই যে অগাধ প্রসার এর মধ্যে কোথায় হারিয়ে যায় সমাজ ও সংসার, রাজনীতি বা রাষ্ট্র।

কৃষ্ণ

বলুন বাবা ।

এসো একটু বসি ।

দুজনে পাশাপাশি মাটির ওপর বসার পর হেমকান্ত প্রশ্ন করলেন, বড়দার কাছে কলকাতায় যেতে তোমার ইচ্ছে করে না

না ।

একটুও না ?

একটুও না ।

হেমকান্ত একটা দীর্ঘশ্বাস ছেড়ে বললেন, তবু তোমার বড়দা তোমাকে নিয়ে যেতে চায়। যাবে আপনি যা বলবেন ।

হেমকান্ত একটু চুপ করে থেকে বলেন, হয়তো ভালর জন্যই বলছে । তুমি একটু ভেবে দেখো আমার কলকাতায় যেতে ইচ্ছে করে না ।

কেন

আমার এ জায়গাই ভাল ।

কারও জন্য কষ্ট হবে ?

আপনাকে আর ছোড়দিকে ছেড়ে যেতে ইচ্ছে করে না । খুব কষ্ট হবে ।

হেমকান্তের বুকটা চলকে উঠল এক অনভিপ্রেত আনন্দে । যেন মায়ার একটি কলস ভরে গেল, উপচে গেল । তাঁকে ছেড়ে যেতে কৃষ্ণকান্তর তাহলে কষ্ট হবে ? তাহলে তিনি যদি মরে যান তবে কৃষ্ণকান্ত বুঝি খুব কাঁদবে, হাহাকার করবে !

হেমকান্ত মৃদুস্বরে বললেন, আমি তো তোমার জন্য কিছুই করিনি । তুমি মা-হারা ছেলে, তোমার জন্য বোধ হয় আমার আরো কিছু করা উচিত ছিল । নজরই দিতে পারলাম না তোমার দিকে কৃষ্ণকান্ত চুপ করে রইল ।

হেমকান্তর খুব ইচ্ছে করছিল ছেলের চোখ দুটির দিকে অনেকক্ষণ চেয়ে থাকতে । কিন্তু সংকোচবশে পারলেন না । নিজের দুর্বলতা কখনো ছেলেপুলেদের কাছে প্রকাশ করতে নেই ।

॥ ১৮ ॥

ছন্দাকে নিয়ে আসা হল বটে, কিন্তু সে যেন সাপের মুখ থেকে ব্যাঙকে ছাড়িয়ে আনা শেষ অবধি সপদষ্ট ব্যাং বাঁচে না । যে দু তিন দিন ছন্দা রেমির কাছে ছিল সেই কয়দিন সে কথাই বলত না । চোখে সর্বদা এক ঘোর-ঘোর চাউনি । ফাঁক পেলেই কাঁদতে বসত । রেমির সে এক জ্বালা । একদিন ছন্দা হঠাৎ বলল, সমীরদা কোথায় গেল খোঁজ নেবে না রেমি ?

রেমি বিরক্ত হয়ে বলল, আবার তার খোঁজ কেন ?

কোথায় আছে কী করছে জানি না তো, তাই ভয় হচ্ছে । যদি সুইসাইড করে !

সমীর কি থোকা ? আজকালকার ছেলেরা অত হট করে মরে না ।

তবু একটু খোঁজ নাও । ধুবদাকে বলো, ঠিক খোঁজ এনে দেবে ।

তোমার কি সমীরের জন্য মন কেমন করছে ?

করছে । ওর তো দোষ নেই । আমারই কেমন পাগলামি এল । নিজেও ডুবলাম, ওকেও ডোবলাম ।

রেমি বিরক্ত হল । বলল, দু নৌকায় পা দিও না ছন্দা । একটা পথ বেছে নাও । এখনো যদি সমীরের প্রতি তোমার উইকেনেস থেকে থাকে তাহলে কিন্তু খুব বিপদে পড়বে ।

ছন্দা অসহায়ভাবে বলল, আমি যে ওকে ভীষণ অপমান করলাম । এটা তো ওর পাওনা ছিল

না। প্রীজ ওর একটু খবর এনে দাও আমাদের, তোমাদের পায়ে পড়ি।

কিন্তু সমীরের খোঁজ করা তো রেমির পক্ষে সম্ভব নয়। ছন্দা আসায় ধুব একটু সংযত থাকে বটে, কিন্তু যেন একটা আনমনা উড়ু-উড়ু ভাব। মুখ সর্বদা গম্ভীর। বেশীর ভাগ সময়ে বাইরেই থাকে। তাছাড়া ধুবকে সমীরের খবর আনার কথা বলতে একটু লজ্জা পায় রেমি। কেন পায় তা স্পষ্ট করে ভাবতে চায় না। তবে তার ধারণা, দারজিলিং-এর সেই ঘটনার কথা ধুব জানে। শ্বশুর মশাইকে বললে অবশ্য কয়েক ঘণ্টার মধ্যে শুধু খবর নয়, সমীরকে সুদ্ধ এনে হাজির করবে পুলিশ। কিন্তু শ্বশুরমশাইকে এসব তো বলা যাবে না। কৃষ্ণকান্ত ভিতরকার ঘটনা কিছুই জানেন না। বন্ধুর মেয়ে বেড়াতে এসেছে বলেই ধরে নিয়েছেন তিনি। কিন্তু সমীরকে খোঁজার কথা বললেই জেরা শুরু করবেন, আর সে জেরার মুখে রেমির ভিতর থেকে সব কথা টেনে বের করে নেবেন।

অগত্যা রেমি ধুবকেই ধরল, ওগো, ছন্দা সমীরবাবুর জন্য খুব চিন্তা করছে। একটু খবর আনতে পারো না?

ধুব অবাক হয়ে বলল, খবর কিসের?

লোকটা আত্মহত্যা-ট্যা করা নাকি, খুব ভাবছে ছন্দা।

ধুব একটু হেসে বলল, সে মাল সমীর নয়। ছন্দাকে ভাবতে হবে না।

বলব, কিন্তু তাতে কাজ হবে না।

ধুব একটু দোনোমোনো করে বলল, সমীর টাওয়ার হোটেলে আছে। বেশ মেজাজেই আছে। রোজই আমাদের দেখা হয়।

রেমি আকাশ থেকে পড়ল, দেখা হয়! তোমাদের দেখা হয়?

হবে না কেন? একই জায়গায় বসে আমরা মাল খাই। সমীর বেশ ভাল টানে।

রেমি কী বলবে ভেবে পেলো না অনেকক্ষণ। তারপর বলল, এ কথাটা আমাকে বলোনি! বলার কী! বলে ধুব নির্বিকার মুখ করে বেরিয়ে গেল।

রাগে দাঁত কিড়মিড় করল রেমি। তার রাগের কারণ সমীরের সঙ্গে ধুব সম্পর্ক রাখবে কেন? ফুঁসতে ফুঁসতে সে গিয়ে ছন্দাকে বলল, তোমাকে ভাবতে হবে না। সমীরের সঙ্গে তোমার ধুবদার রোজ দেখা হয়। দুজনে একসঙ্গে বসে মদ খায়।

ছন্দা যে খুব খুশি আর নিশ্চিন্ত হ'ল তা নয়। স্তিমিত চোখে চেয়ে রইল কিছুক্ষণ। যেন সমীর ভাল আছে এটা প্রত্যাশিত খবর নয়। খুব নিক্রংসুক গলায় বলল, ও, আচ্ছা।

এতে রেমির রাগ বাড়ল বৈ কমল না।

ছন্দার ফিরে যাওয়ার জন্য প্লেনের টিকিট কাটা হল। ধুব সংসারের কোনো কাজেই নিজে কে জড়ায় না। কিন্তু ছন্দার প্লেনের টিকিট সে নিজেই কেটে আনল। একটা নয়, দুটো, টিকিট দুটো রেমির হাতে দিয়ে বলল, তুমিও ছন্দার সঙ্গে যাও। দিন দুই থেকে ফিরে এসো।

রেমি অবাক, আমি! আমি কেন যাবো?

যদি কোনো কথা ওঠে তবে তুমি সামাল দিতে পারবে।

অসম্ভব! আমি যেতে পারব না। ছন্দাও তো আমাকে যেতে বলেনি ওর সঙ্গে।

ওর মাথার ঠিক নেই। আমি বলছি, তোমার যাওয়া দরকার। সুদর্শন কাকা কিছুই জানেন না, কিন্তু ছন্দার হাবভাব দেখে ওঁর সন্দেহ হতে পারে। আর ছন্দার এখন ব্যালান্স নেই। এ অবস্থায় ঠাণ্ডা মাথার একজন কারো ওর সঙ্গে থাকা উচিত।

রেমি প্রস্তাবটা খুশি হয়নি, তবে যৌক্তিকতাটা বুঝল। সে বলল, গেলে আমি একা কেন? তুমিও চলো।

যেতাম। কিন্তু আমার আবার একটা চাকরি হয়েছে। কালই জয়েন করতে হবে।

রেমিকে যেতে হল। কিন্তু বাগডোগরায় নেমেই সে অবাক। সমীর এবং একজন নেপালী

ড্রাইভার গাড়ি নিয়ে হাজির। সমীরের মুখ গম্ভীর।

মেজাজী একজন ডাকাবুকো শ্বশুরের সঙ্গ করে আজকাল রেমিরও কিছু মেজাজ হয়েছে। কর্তৃত্বের ভাবও এসেছে খানিকটা। সে রাগের গলায় বলল, আপনি ?

সমীর খুব মদু স্বরে বলল, প্ল্যানটা আমার নয়। ধুবর। সে আমাকে যেমন বলেছে, করেছে।  
উনি তো আমাকে কিছু বলেননি।

সেটা আমি জানি না। যা সত্যি তাই বললাম। বিশ্বাস করা না-করা আপনার মর্জি।

বেশ চ্যাটাং চ্যাটাং কথা। রেমির মেজাজ আরো চড়ে যাওয়ার কথা। কিন্তু এয়ারপোর্টে একটা সিন তৈরি করা উচিত হবে না বলে চেষ্টা গেল। ছন্দা সমীরকে দেখেই সেই যে এক ধরনের অপরাধী ভাব করে নতমস্তক হল, আর ঘাড় তুললই না।

সুদর্শনবাবুর বাড়িতে পৌঁছে কিছুক্ষণের মধ্যেই রেমি বুঝতে পারল ছন্দার কোনো ভয় নেই। কেউ কিছু টের পায়নি। এদের যা বোঝানো হয়েছে তা হল, ছন্দা কলকাতায় গিয়ে রেমির কাছে কয়েকদিন থেকে যায়। তার দেবী হবে বলে সমীর আগেই ফিরে এসেছে। সহজ সরল বিশ্বাসযোগ্য গল্প। সুতরাং রেমির কাজ ফুরিয়ে গেল।

সে সুদর্শনবাবুকে বলল, কাকু, আমি কালই ফিরে যাবো।

সুদর্শনবাবু অবাক হয়ে বললেন, সে কী ? আমাকে যে ধুব ট্রাংক কল করে জানিয়েছে যে, তুমি ছন্দার বিয়ে পার করে যাবে !

রেমির এক গাল মাছি। সর্বনাশ অতদিন থাকতে হবে ! এটা কি ধুবর ষড়যন্ত্র ?

রঞ্জে রঞ্জে তার রাগের হলকা বেরোচ্ছিল। তবে সুদর্শনবাবুকে কিছু বলে লাভ নেই। ছাদে গিয়ে কিছুক্ষণ যে তার উত্তপ্ত মাথাটিকে ঠাণ্ডা করল। তারপর স্থির মাথায় ভাবতে বসল।

অনেক ভেবে তার মনে হল, ধুব হয়তো খুব ভুল সিদ্ধান্ত নেয়নি। অবশ্য সিদ্ধান্তটার কথা তার রেমিকে জানানো উচিত ছিল। কিন্তু জানালে হয়তো রেমি আসত না। তবে ছন্দার বিয়ে পর্যন্ত এ বাড়িতে থাকাটা হয়তো দরকার। ছন্দা আর সমীরের মধ্যে সে একটা ব্যারিকেডের কাজ করতে পারবে। ওদের দুজনের কারোই মনের ভারসাম্য নেই। কখন কী করে বসে ! আবার হয়তো পালাবে বা আরো খারাপ কিছু করে বসবে।

রেমি থেকে গেল।

তবে থাকাটা আগের বারের মতো সুখকর হল না। ছন্দা হাসে না, কথা বলেনা, দূরে দূরে থাকে। নন্দার একটা পরীক্ষা সামনে। সমীর লজ্জায় কাছে আসে না। অদ্ভুত এক পরিস্থিতি। তবু রেমি দাঁত মুখ টিপে রইল। ধুবকে একটাও চিঠি দিল না বা টেলিফোনেও কথা বলল না। শুধু শ্বশুরমশাইকে টেলিফোন করে ব্যাপারটা জানাল। কৃষ্ণকান্ত বললেন, ভালই হয়েছে। ধুবও বলছিল আমাকে। সুদর্শনের মেয়ের বিয়েতে আমি তো যেতে পারছি না, আমাকে দিন সাতকের জন্য ওয়েস্ট জারমানি যেতে হচ্ছে। তুমিই আমাদের রিপ্রেজেন্টেটিভ হয়ে থাকো।

কিন্তু সারাটা দিন চূপচাপ কাঁহাতক থাকা যায় ? একা একা বেড়াতে তার ভাল লাগে না। মেয়েদের একা বাইরে বেরোনো শ্বশুরমশাই পছন্দ করেন না বলে রেমি পারতপক্ষে একা কোথাও যায় না।

সময়টা খুবই খারাপ কাটবার কথা ছিল রেমির। কিন্তু সে শিলিগুড়িতে আসার দিন দুয়েকের মধ্যেই একটা ঘটনা ঘটল। বিকেলে ছাদে একা বসেছিল রেমি। ছন্দা নিজের ঘরে স্বেচ্ছাবন্দী। নন্দা কলেজ থেকে ফেরেনি। হঠাৎ সমীর রাঙা মুখে ছাদে এসে হাজির।

রেমি, আপনাকে একটা খবর দিতে এলাম।

খবর ! রেমির বুক ধড়ফড় করতে লাগল। খারাপ খবর নয় তো !

সমীর বলল, খবরটা খুব উপাদেয় নয়। কৃষ্ণকান্ত বাবুর লুকুম হয়েছে আমাকে কালকের

ফ্লাইটেই কলকাতা যেতে হবে। কী যেন জরুরী দরকার।

রেমি ব্যাপারটা বুঝল না। বলল, তাই নাকি ?

সমীর একটু হাসল। খুব শ্লেষের হাসি। বলল, আপনি হয়তো ব্যাপারটা তলিয়ে বোঝেননি।

রেমি সরলভাবে বলল, না।

কৃষ্ণকান্তবাবুর সঙ্গে আমার যোগাযোগ খুবই ক্ষীণ। আমাকে তাঁর কোন কারণেই খুব জরুরী কাজে ডেকে পাঠানোর মানেই হয় না। আগে কোনোদিন তেমন প্রয়োজন দেখাও দেয়নি।

রেমি বোকার মতো বলল, ডেকেছেন যখন নিশ্চয়ই কোনো কাজ আছে। আপনি রেগে যাচ্ছেন কেন ?

রেগে যাওয়ার কারণ আছে বলেই। উনি আমাকে এখান থেকে সরিয়ে নিতে চাইছেন, আপনি এখানে আছেন বলে।

তার মানে ?

আপনার স্বশ্রমশাই চান না আপনার সঙ্গে ঘনিষ্ঠ হওয়ার কোনো চানস আমি পাই।

যাঃ, কী যে সব আবোল তাবোল বলছেন !

একটু ভেবে দেখলে আপনিও বুঝবেন। কাকা এখন আমাকে ছাড়তে রাজি নন। সামনে ছন্দার বিয়ে। আমাকে তাঁর এ সময়ে দরকার। তবু কৃষ্ণকান্তবাবু ইনসিস্ট করছেন, যেন অবশ্যই আমাকে কলকাতা পাঠানো হয়। কোনো যুক্তিই তিনি মানতে রাজি নন।

রেমি স্বশ্রমের পক্ষ নিয়ে বেশ রাগের গলায় বলল, তাতে কী প্রমাণ হয় ?

সমীরকে খুবই উত্তেজিত দেখাচ্ছিল। প্রায় রুদ্ধস্বরে সে বলল, তাতে একটাই জিনিস প্রমাণ হয় রেমি। ক্ষমতাবান লোকেরা যা খুশি করতে পারে। তারা ডুগডুগি বাজালেই আমাদের নাচতে হবে।

রেমি রেগে যেতে গিয়েও পারল না। সমীরের কথার ভিতরকার সত্যটুকু তাকে স্পর্শ করে থাকবে। স্বশ্রমকে সে ভীষণ ভালবাসে, ভক্তি শ্রদ্ধাও করে। কিন্তু এও ঠিক, লোকটি অসম্ভব প্রভুত্ব করতে ভালবাসে, ভীষণ জেদী, অতিশয় কঠোর মনোভাব সম্পন্ন।

রেমি কোমল স্বরে বলল, ঠিক আছে। আপনি না হয় যাবেন না।

সে ক্ষেত্রে রিস্কটা কে নেবে ? আপনি ?

কিসের রিস্ক ? রেমি অবাক হওয়ার চেষ্টা করে বলে।

রিস্ক অনেক। আমার কাকা সেটা হাড়ে হাড়ে জানে। কৃষ্ণকান্তকে চটালে কাকাকে এই উত্তরবঙ্গেও ব্যবসা করে খেতে হবে না।

আপনি ব্যাপারটাকে ভীষণ জটিল করে তুলছেন।

সমীর সে কথায় কান না দিয়ে বলল, ইন ফ্যাক্ট কাকাও ভয় পাচ্ছেন। তাঁর যদিও মত ছিল না, তবু বলছেন, কৃষ্ণকান্তের কথা ফেলা ঠিক হবে না, তুই গিয়ে ঘুরে আয়।

তাই আপনি আমার কাছে এসেছেন ?

আমি যে জানি, এর পিছনের কারণটা হলেন আপনি।

এবার রেমি লজ্জায় এবং রাগে লাল হয়ে উঠল। স্বশ্রমশাই কাজটা ঠিক করেননি। রেমিকে তাঁর বিশ্বাস করা উচিত ছিল। তাছাড়া খুব তো এসব গ্রাহ্যও করে না, স্বশ্রম হয়ে ওঁর তাহলে এত মাথাব্যথা কেন ?

রেমি হঠাৎ অত্যন্ত দৃঢ় স্বরে বলল, রিস্ক আমারই। আপনাকে যেতে হবে না।

সমীর বোধহয় একটু অবাক হল। বলল, সত্যিই রিস্ক নেবেন ?

নেবো। আপনার সন্দেহটা দূর করা দরকার। আমার স্বশ্রমশাই অতটা মীন নন।

মীন কথাটা আমি কিন্তু উচ্চারণ করিনি।



আপনি সেটাই বোঝাতে চাইছেন।

না। সমীর মাথা নেড়ে একটু শ্লেষের গলায় বলল, বরং আমি বলতে চাইছিলাম কৃষ্ণকান্তবাবু বড় বেশী পিউরিটান। বস্কিমের একটা লাইন আছে জানেন! ইহার কুকুর মারে, কিন্তু হাঁড়ি ফেলে না।

তার মানে!

কৃষ্ণকান্ত তাঁর পুত্রবধূকে কিছুই বলবেন না, কিন্তু দরকার হলে আমাকে কান ধরে কলকাতা পর্যন্ত দৌড় করাবেন। ওর পিউরিটানিজমও একপেশে।

রেমি তর্ক করল না। কারণ ভিতরে ভিতরে তারও কিছু ভূমিক্ষয় হয়ে থাকবে। স্বশ্রের ওপর অনেক কারণে অনেকবারই ক্ষুব্ধ হয়েছে সে তবে কোনোবারই স্বশ্রের ব্যবহার তাকে মারাত্মক আঘাত করেনি, এটা করল।

সারা রাত ঘুমোলো না রেমি। মাথা গরম। কখনো চোখে জল আসে, কখনো শরীর দিয়ে রাগের হলকা বেরোয়।

সকালে উঠেই স্নান করে পোশাক পরল সে। সমীরকে ডেকে বলল, চলুন কোথাও একটু বেড়াতে যাই।

সমীর বিস্মিত হয়ে বলে, তাহলে কলকাতা যাবো না বলছেন!

না, কিছুতেই না।

দেখবেন গরীবকে ধনেপ্রাণে মারবেন না।

রেমি বলল, মরলে আমিই মরব। আপনার ভয় নেই।

সেদিন একটা অ্যামবাসাডার গাড়িতে তারা গেল জলঢাকা অবধি। সাইটে সমীরের একটু কাজও ছিল।

পথে প্রথম দিকটায় দুজনের কেউই কথা বলেনি। অনেকক্ষণ বাদে সমীর বলল, ছন্দার ব্যাপারে আপনি এবং খুব আমাকে বাঁচিয়ে দিয়েছেন।

রেমি অবাক হয়ে বলল, সে কী! আমি তো উল্টো ভেবেছিলাম।

সমীর মাথা নেড়ে বলল, না। আমি প্রায় ছেলেবেলা থেকে ওকে ভালবাসি ঠিকই, কিন্তু বরাবর আমার একটা দ্বিধাও ছিল। ছন্দা পাগলামি না করলে আমি ওই কাণ্ড করতাম না।

রেমি বলল, জানি। ছেলেরা রিস্ক নিতে ভয় পায়।

হ্যাঁ। কারণ ছেলেরা অগ্র পশ্চাৎ বিবেচনা করে। মেয়েরা করে না। আমি ছন্দাকে বিয়ে করলে কাকা আমার মুখদর্শন করতেন না। ছন্দা আর এবাড়িতে ঢুকতে পেত না। আমরা অসামাজিক হয়ে যেতাম।

আপনি কি আর ছন্দাকে ভালবাসেন না?

সে কথা বলা কঠিন। হয়তো বাসি। আর বাসি বলেই চাই, ওর ভাল হোক।

ভালই কি হচ্ছে?

মনে তো হয়। অন্য ছেলের সঙ্গে বিয়ে হলে ও প্রথমটায় খুব অসুখী থাকবে ঠিকই, কিন্তু ক্রমে ক্রমে সেটা কেটে যাবে।

আপনার মনের অবস্থা কী?

কাকাকে খুব বড় একটা আঘাত দিতে হচ্ছে না এটা ভেবে আমি স্বস্তি পাচ্ছি। আপনি জানেন না, আমি আমার কাকাকে ভীষণ ভালবাসি। নিজের বাবার চেয়েও বেশী। আমি কাকার কাছেই মানুষ বলতে গেলে।

রেমি বহুদিন পর একটা তৃপ্তি বোধ করতে লাগল।

সমীরের সঙ্গে সেই যে ভাব হয়ে গেল তা আরও প্রগাঢ় হল কয়েক দিনে।

কতটা প্রগাঢ় ? তা রেমি জানে না । তবে সে একটা কথা নিজের বুক ছুঁয়ে বলতে পারে, সেটা প্রেম নয় । যৌন আবেগ নয় । তখন তাদের কারো মনের অবস্থাই তেমন স্তরে নেই ।

ছন্দার বিয়ে হয়ে যাওয়ার পর যখন রেমি ফিরে এল তখনও কৃষ্ণকান্ত জারমানি থেকে ফেরেননি । ধুব তার নতুন চাকরির কাজে পুনা গেছে ।

নিজের গর্ভ সঞ্চারের ব্যাপারটি এখনই সহসা টের পেল রেমি ।

ধুব ফিরে আসতেই বলল, কী কাণ্ড জানো ?

না, কী কাণ্ড ?

বলব না ।

বোলো না ।

শুনতে চাও না ?

চাই তো । কিন্তু বলতে না চাইলে কী করব ?

কোনো ব্যাপারেই তোমার আগ্রহ নেই কেন বলো তো ?

ওঃ রেমি !

বিরক্ত হলে ?

বিরক্ত করছ যে !

তুমি যে বাবা হতে চলেছো !

আমি ? আমি কেন বাবা হতে যাবো ?

তবে কে হবে ? ভূতে ?

কী ব্যাপার বলো তো !

এখনও বোঝানি ?

ওঃ ! তুমি কি প্রেগন্যান্ট ?

মনে তো হচ্ছে ।

হঠাৎ ধুবর মুখটা কেমন সাদা দেখাতে লাগল ।

## ॥ ১৯ ॥

নতুন এক আনন্দকে আবিষ্কার করলেন হেমকান্ত । শান্ত নদী, চর, নীল ও গভীর আকাশ, দিগন্তে গারো পাহাড়, এই অপরূপ প্রাকৃতিক পরিবেশে কোমল সূর্যের আলোয় নৌকো করে খানিকটা ঘুরে বেড়ানো । কতকাল জলে বৈঠা মারেননি তিনি ।

রোজ সকালে কৃষ্ণকান্তর পড়াশুনো শেষ হওয়ার অপেক্ষায় থাকেন তিনি । ছেলের যে ইন্স্কুল আছে তা তাঁর খেয়াল থাকে না । পরীক্ষার পর সবে ইন্স্কুল খুলেছে, তাই কৃষ্ণকান্তরও বড় একটা গরজ নেই ক্লাস করার । বরং বাবার সঙ্গে এই দুর্লভ জলযাত্রা তার কাছে অনেক বেশী আকর্ষণীয় ।

পড়া শেষ করে কৃষ্ণকান্ত ছুটে আসে বাবার ঘরে ।

হেমকান্ত প্রসন্ন মুখে উঠে পড়েন । বলেন, চলো ।

সোৎসাহে কৃষ্ণকান্ত বলে, আজ সেই জায়গাটায় যাবেন বাবা ?

কোন জায়গাটায় ?

যেখানে কাকা ডুবে গিয়েছিল ।

হেমকান্ত মৃদু হেসে বলেন, সেই জায়গাটা দেখে কী করবে ?

এমনি । দেখব ।

কাকার কথা তুমি খুব ভাবো নাকি ?

খুব ভাবি ।

হেমকান্ত খুশিই হন । বলেন, মহৎ মানুষদের কথা চিন্তা করাও ভাল । তাতে নিজের ভিতরেও মহত্ত্ব জেগে ওঠে ।

কয়েকদিন অভ্যাসে হেমকান্ত নৌকো বাওয়ার বিমুত কলাকৌশল আবার আয়ত্ত্ব করলেন । মাঝি বসে থাকে, তিনি এবং কৃষ্ণকান্ত নৌকো চালান । বয়সের তুলনায় কৃষ্ণকান্ত বেশ দীর্ঘকায় এবং সবল । এটা অবশ্য এই বংশেরই ধারা । হেমকান্ত নিজেও বেশ দীর্ঘকায় । তবে শরীরের চর্চা করেন না বলে এখন আর ততটা সবলদেহী নন । কিন্তু তাঁর শরীরে এখনো তেমন মেদ সঞ্চার হয়নি । সংযম এবং মিটাচারের ফলে অল্প শ্রমে ক্লান্তও হন না । স্বাস্থ্য তাঁর ভালই । নৌকো বাইতে বাইতে তাঁর শরীরের জরার ভাবটাও ঝরে গেছে । এখন আর বার্ধক্যের পদধ্বনি নিজের শরীরে তেমন টের পান না । যখন দীঘল চেহারার কৃষ্ণকান্ত দুটি কচি হাতে বৈঠা টানে তখন তার অপরূপ দেহ ভঙ্গিমার ভিতর যেন নিজেকেই খুঁজে পান হেমকান্ত ।

শীতের সকালে ছোটো খেয়া নৌকোটি মৃদুমন্দ চালে ভেসে চলেছে । বৈঠা তুলে নিয়েছেন হেমকান্ত । তাঁর ইশারায় কৃষ্ণকান্তও তাই করেছে । মৃদু স্রোতে নৌকো বয়ে চলেছে ভাঁটিতে । নদীর মাঝ বরাবর অদ্ভুত এক নিস্তব্ধতা আছে । মুগ্ধ বিভোর হেমকান্ত সেই নিস্তব্ধতাকে অনুভব করছেন । মাঝে মধ্যে গাংচিল বা কোনো পাখির ডাক ভেসে আসে । আর আছে জলের মৃদুমন্দ শব্দ । যেন তা এই নিস্তব্ধতাকেই গভীরতর করে তোলে । কৃষ্ণকান্ত তার বাবার এই তদগত ভাব লক্ষ্য করে সতর্কভাবে চুপ করে থাকে । নৌকো যাতে দিকপ্রস্থ না হয় তার জন্য হেমকান্ত অভ্যস্ত হাতে একটি বৈঠা জলে ডুবিয়ে রাখেন কিছুক্ষণ । আবার তুলে ফেলেন । এছাড়া অনেকক্ষণ আর তাঁর বাহ্যিক কোনো নড়াচড়া থাকে না ।

অনেকটা ভাঁটিয়ে গিয়ে যেখানে নদী একটা বাঁক নিয়েছে সেইখানে নৌকোকে ধীরে ধীরে তীরের দিকে চালনা করেন হেমকান্ত । ভারী নির্জন জায়গা । ধারে কাছে গাঁ গঞ্জ নেই । নদীর ধারে বেঁটে কাঁটা ঝোপ আর বেতবন । তটস্থ মাঝি জিজ্ঞেস করে, নৌকো বাঁধব কতী ?

বাঁধ । হেমকান্ত উদাস স্বরে বলেন ।

বুড়ো মাঝি একটা লগী পুঁতে নৌকোটা বাঁধে । হেমকান্ত হাটুজলে নেমে দাঁড়িয়ে কৃষ্ণকান্তর দিকে চেয়ে বলেন, নামো ।

মস্তমুগ্ধের মতো কৃষ্ণকান্ত জলে নেমে দাঁড়ায় । শীতের হাড় কাঁপানো ঠাণ্ডা জল তার কোমর অবধি ওঠে । হেমকান্ত সেদিকে খেয়াল করেন না । ধীরে ধীরে তীরভূমির দিকে এগিয়ে যেতে যেতে বলেন, এই সেই জায়গা । এই সেই জায়গা ।

বেতবন উত্তুরে বাতাসের শব্দ ছহু করে শোকাবহ শব্দ তুলে বয়ে যাচ্ছে । ঝিমঝিম করছে রোদ । আস্তে আস্তে হেমকান্ত ডাঙায় উঠে দাঁড়ালেন, সঙ্গে কৃষ্ণকান্ত ।

হেমকান্ত নদীর ধারে দাঁড়িয়ে উদাস দৃষ্টিতে ব্রহ্মপুত্রের বহমানতার দিকে চেয়ে থেকে বলেন, নৌকোটা ডুবেছিল আরো উজানের দিকে । অনেকটা দূরে, শহরের কাছাকাছি । নলিনী এত দূরে ভেসে এসেছিল । কেন কে জানে !

কৃষ্ণকান্ত বোবা বিস্ময়ে শান্ত সুন্দর জায়গাটির চারদিকে চেয়ে সেই ঘটনার বিষয় রেশটুকু খুঁজতে থাকল । তারপর বয়সোচিত ছেলেমানুষী একটা প্রশ্ন করল, কাকা কি সাঁতার জানত ?

হেমকান্ত তার দিকে ফিরে একটু হেসে বললেন, জানত । খুব ভাল সাঁতার দিতে পারত নলিনী । ভরা বর্ষাতেও ব্রহ্মপুত্র এপার ওপার করত ।

তাহলে ডুবে গেল কেন ?

কে জানে। ভবিষ্যৎ ।

মনু পিসি বলে, সাঁতার জানলে নাকি কেউ জলে ডুবে যেতে পারে না ।

হেমকান্ত একথার জবাব দিলেন না। আঘাটায় দাঁড়িয়ে চেয়ে রইলেন শ্রোতের দিকে। নদীর শ্রোত জিনিসটাই ভারী অদ্ভুত। এ যেন সময় ও জল একসঙ্গে মিশে চলেছে মোহনার দিকে। কৃষ্ণকান্ত বলল, মনু পিসি বলে, কাকাকে কেউ মেরে জলে ফেলে দিয়েছিল।

বলে নাকি? হেমকান্ত একটু হাসলেন।

কৃষ্ণকান্ত উৎসুক হয়ে জিজ্ঞেস করল, কাকার গায়ে কি খুব জোর ছিল বাবা?

তা মন্দ ছিল না। ব্রহ্মচারী মানুষ সে। সংযম ছিল, সর্বদা পরিশ্রম করত। জোর থাকারই কঁথা। ব্যায়াম করত না?

বোধহয় করত।

কাকা লাঠি চালাতে জানত?

শিখেছিল খানিকটা

তাহলে কাকাকে মারল কী করে?

হেমকান্ত একটু হেসে বললেন, সেটা তুমি তোমার মনু পিসিকেই জিজ্ঞেস কোরো।

কৃষ্ণকান্ত তার সরল চোখে অগাধ বিস্ময় নিয়ে বাবার দিকে চেয়ে বলে, মনু পিসি বলে, কাকার গায়ে নাকি ভীষণ জোর ছিল। একবার কাকা লাঠি নিয়ে একদল ডাকাতকে মেরেছিল।

হেমকান্ত হোঃ হোঃ করে হেসে ওঠেন। কৃষ্ণকান্তের মনের মধ্যে একটা বীরত্বের বীজ বপন করতে চাইছে রঙ্গময়ী। রঙ্গময়ী নয়, পুরোদস্তুর মিথ্যাময়ী। হাসলেও হেমকান্ত এ ব্যাপারটাকে প্রশ্রয় দিতে চাইলেন না। ছেলের পিঠে হাত রেখে বললেন, মনু একটু বাড়িয়ে বলেছে। অতটা নয়। নলিনী ডাকাত মারলে আমি ঠিকই জানতে পারতাম।

একথায় কৃষ্ণকান্ত একটু হতাশ হল। কাকার বীরত্বের কথা তার বিশ্বাস করতে ইচ্ছে হয় বটে, কিন্তু সে জানে, তার বাবা সর্বদাই ঠিক কথা বলেন। সরলভাবেই কৃষ্ণকান্ত বলে, তাহলে মনু পিসি কি মিথ্যে কথা বলেছে?

রঙ্গময়ীকে মিথ্যাবাদী বলতে বাধে হেমকান্তের। তিনি বললেন, রূপকথা বা ভূতের গল্পও তো বানানো জিনিস, তা বলে যাঁরা সেগুলো লিখেছেন তাঁরা কি মিথ্যাবাদী?

যুক্তিটা ঠিক বুঝল না কৃষ্ণকান্ত। হাঁ করে কিছুক্ষণ বাবার দিকে চেয়ে থেকে বলল, ভূতের গল্প কি সত্যি নয় বাবা?

না। ভূত বলে কিছু নেই।

কিন্তু কমপাউন্ডার কাকা যে মাকে মাঝে মাঝে দেখতে পায়!

ওটা তো পাগল। ও কী দেখে আর কী না দেখে তার কোনো মাথামুণ্ড আছে নাকি? পক্ষীরাজ ঘোড়া! তাও কি নেই?

না। ওসব মানুষের কল্পনা।

কৃষ্ণকান্ত একটু ব্যথিত হল বোধহয়। কিন্তু চুপ করে ভাবতে লাগল।

হেমকান্ত একবার ভাবলেন শিশুমনের কল্পনাস্রোতকে আঘাত করে হয়তো কাজটা ভাল করলেন না। কিন্তু পর মুহূর্তেই মনে হল, তিনি যেমন অতিশয় কল্পনাপ্রবণ ও বাস্তববুদ্ধি বর্জিত হয়েছেন তেমনটা না হওয়াই কৃষ্ণকান্তের পক্ষে ভাল। অন্তত এই একজন কঠোর বাস্তববুদ্ধিসম্পন্ন যুক্তিবাদী ও কর্মঠ হয়ে উঠুক।

হেমকান্ত ছেলের দিকে স্নেহভরে চাইলেন, বললেন, এসো, এখানে দাঁড়িয়ে কাকাকে একটা নমস্কার জানাও। শ্রদ্ধাবোধ বড় ভাল জিনিস।

কৃষ্ণকান্ত সঙ্গে সঙ্গে হাতজোড় করে চোখ বুজল।

হেমকান্তও কিছুক্ষণ চোখ বুজে নলিনীকান্তকে স্মরণ করলেন। কয়েক মুহূর্তের মধ্যেই কত কথা মনে পড়ে গেল। তাঁদের তিন ভাইতে খুব সম্ভাব ছিল, কিন্তু বাক্য বিনিময় বিশেষ হত না। তিন

জনের প্রকৃতিই কিছু গম্ভীর। তাছাড়া নলিনী নিজেকে সংসারের বাইরে নিবাসিত করেছিল বলে তার সঙ্গে যোগাযোগ ছিল আরো কম। বেঁচে থাকলে আজ নলিনীর বয়স চল্লিশ বিয়াল্লিশ হত। একটি সাইকেল ছিল তার অচ্ছেদ্য বাহন। কোথায় কোথায় চলে যেত সাইকেলে চেপে। বেলা অবেলা মানত না, নিয়মিত স্নান খাওয়া ছিল না। তেলের অভাবে মাথার চুল পিঙ্গল বর্ণ ধারণ করেছিল। গালে অযত্নের দাড়ি বেড়ে উঠত। সাধারণ টুইলের শার্ট আর ধুতিই ছিল তার পরিধান। পায়ে তালতলার চটি আর কাঁধে উড়ুনি। পাবনার এক আশ্রমের সঙ্গে ছিল তার গভীর যোগাযোগ। মাঝে মাঝে বাড়ি থেকে উধাও হয়ে সে আশ্রমে গিয়ে বেশ কিছুদিন করে থেকে আসত। পাকাপাকি আশ্রমবাসী হওয়ার তীব্র আকাঙ্ক্ষা ছিল তার। কিন্তু মা বেঁচে থাকতে সেটা আর পেরে ওঠেনি। বড় ছেলে সন্ন্যাস নিয়েছে, ছোটোটিও আশ্রমবাসী হলে মা শোকে মারা পড়তেন। কিন্তু আজ হেমকান্ত ভাবেন, নলিনী আশ্রমবাসী হলেই বোধহয় ভাল হত। বেঁচে তো থাকত।

বুড়ো মাঝি হারান এতক্ষণ সশঙ্কভাবে চুপ করে ছিল। এখন হঠাৎ হাত জোড় করে বলে উঠল, কত্যা, কয়েকখানি কচি বেত কেটে নেবো? বেতাইক খেতে বড় ভাল।

হেমকান্ত ঘাড় নেড়ে বললেন, আন।

কৃষ্ণকান্ত বলে, আমিও যাবো বাবা?

হেমকান্ত বলেন, ভীষণ কাঁটা। সাবধানে যেও।

হেমকান্ত শুষ্ক বালুকাময় তীরে বসলেন। হারান নৌকোর খোল থেকে একটা চকচকে দা বের করে বেতবনে চলল। সঙ্গে কৃষ্ণকান্ত। হেমকান্ত আনমনা চোখে দেখতে লাগলেন। হুহু করে হাওয়া কত জায়গা, কত গাঁ গগ্গু ছুঁয়ে এসে তাঁর কানে কত কী বলে যাচ্ছে ফিসফিস করে। বেলা দুপুরের খাড়া ও চড়া রোদে বড় তেতে আছে বালি। হেমকান্ত রোদকে অগ্রাহ্য করে বাতাসের কথা শুনতে লাগলেন।

বাতাস বলে, বহুদূর এসে গেছো তুমি, বহু দূর। আর কি ফিরে যাওয়ার দরকার আছে। তোমার ছেলেকে নিয়ে মাঝি ফিরে যাক। তুমি বেরিয়ে পড়ো মহাপৃথিবীর দিকে।

হাঁ, বাতাসের কথা তো এ নয়। এ হয়তো তাঁরই গভীর অভ্যন্তরের কথা। বাতাসে সেই কথাই ছড়িয়ে যাচ্ছে। একটা দীর্ঘশ্বাস মোচন করলেন তিনি। বেরিয়ে পড়া তাঁর কাছে সহজ নয় ঠিকই, আবার অসম্ভব কিছুও নয়। কিন্তু তিনটি ভাইয়ের মধ্যে বংশের সলতে জ্বলছে মাত্র একটি। তিনি চলে গেলে কৃষ্ণকান্তকে স্থানান্তরিত করা হবে। বিশাখার বিয়ে দিতে দেবী হবে না। ছেলেরা জমিদারীতে উৎসাহী নয়। আয় কমে যাচ্ছে, ঋণ বাড়ছে। তারা হয়তো গোটা সম্পত্তিই বিক্রী করে দেবে। বাড়ি অঙ্ককার হয়ে যাবে।

না, আরো কিছুদিন অপেক্ষা করতেই হবে তাঁকে।

বাতাস ফিসফিস করে বলল, আর কোনো কারণ নেই? রঙ্গময়ী! রঙ্গময়ীর কথা ভুলে গেলে! তোমার সবচেয়ে শক্ত বন্ধন!

বুকের বাঁ ধারে আবার সেই ব্যথা। অবোধ যন্ত্রণা। হেমকান্ত ফিসফিস করে বললেন, মনু সুখী হোক।

সুখ কি সোজা! জানো না, প্রিয় মানুষ ছাড়া মানুষের কোনো সুখই নয়! তুমি ছাড়া রঙ্গময়ীর এই বিশ্ব দুনিয়ায় সুখের আর কে ভাগীদার আছে?

শুধু আমি! তা কেন? রঙ্গময়ীর আছে সেবা, আছে দেশোদ্ধার, আছে স্বদেশপ্ৰীতি। আমি তো অপদার্থ।

সে সব যুক্তি কি বোঝে হৃদয়? বাল্যাবধি রঙ্গময়ী কাকে নিয়ে স্বপ্ন দেখেছে সে কি জানো না?

যদি এতদিনে রঙ্গময়ীর বিয়ে হয়ে যেত তাহলে? তখন কোথায় থাকত সেই বাল্যপ্রেম, কোথায় থাকতাম আমি?

তুমি ঠিকই থাকতে । তার হৃদয়ের সংগোপনে এক কোণে । রঙ্গময়ীর বিদ্রোহ ছিল অনারকম ।  
বিয়ে ভাঙার জন্য নিজের নামে কলঙ্ক রটনাকে সে কি প্রশ্রয় দিত না ! না দিলে সে অন্তত একবার  
তার নিন্দুকদের বিরুদ্ধে প্রতিবাদ করত । তা না করে সে এসে ঝগড়া করত তোমার সঙ্গে ।

তা ঠিক । কিন্তু আমি কী করব ? আমার কী করার আছে ।

রঙ্গময়ী তোমার সবচেয়ে বড় বন্ধন মহাপৃথিবীর দিকে যে অব্যাহত পথ তাতে সবচেয়ে বড়  
বাধা রঙ্গময়ী ।

না । নিঃশব্দে এক আত্ননাদ বুক থেকে উঠে এল হেমকান্তর ।

শোনো, তুমিও রঙ্গময়ীর জীবনে এক অভিষাপ । তোমাদের ওই বাড়ি, ওই সংসারে আজও সে  
দাসীর মতো পড়ে আছে এক অদ্ভুত মোহের জন্য । তা কি জানো ? নইলে রঙ্গময়ীর জন্যও ছিল  
অন্য এক পৃথিবী । সে তোমাকে ত্যাগ করতে পারে না ।

হেমকান্ত মাথা নত করে বসে রইলেন ।

বাবা, বাড়ি যাবেন না ? কৃষ্ণকান্তের আচমকা ডাকে চমকে ওঠেন তিনি ।

চলো যাই । বলে উঠলেন তিনি ।

কৃষ্ণকান্ত এক গোছা বেত বয়ে এনেছে । কাঁটায় হাত রক্তাক্ত কিন্তু তার মুখে তৃপ্তির হাসি ।

নৌকোয় ওঠার পর হেমকান্ত বললেন, হাত দুটো নদীর জলে ধুয়ে নাও ।

কৃষ্ণকান্ত নৌকোর বাইরে ঝুকতেই হেমকান্ত বললেন, সাবধান । নদীতে কুমীর আর কামট  
আছে । দেখে নাও ।

কৃষ্ণকান্ত মাথা নাড়ল । শীতের জল স্বচ্ছ । দুপুরের রোদ বহুদূর জলের মধ্যে প্রবেশ করেছে ।  
দেখে শুনে জলে হাত দিল কৃষ্ণকান্ত । কাঁটায় হাত ছড়ে যাওয়াতেও যে বাবা তাকে বকেননি এর  
জন্য সে কৃতজ্ঞ বোধ করে ।

উজানে নৌকো বাইতে বেশ কষ্ট । এক জোড়া বৈঠা হারানোর হাতে । দ্বিতীয় জোড়া হেমকান্তর  
হাতে । তিনি গলদঘর্ম হচ্চেন ।

কৃষ্ণকান্ত হাত বাড়িয়ে বলল, আমি কিছুক্ষণ বাই বাবা ?

পারবে ? হাত তো কেটে ফেলেছো !

ওটা কিছু নয় । পারব ।

নাও । ছেলের হাতে বৈঠা দিয়ে হেমকান্ত ধূতির খোঁটায় মুখের ঘাম মুছলেন ।

বাড়ি ফিরে আসার পর রঙ্গময়ী একটু রাগারাগি করল, এত বেলা পর্যন্ত একটা দুধের বাচ্চাকে  
নিয়ে টো-টো করে ঘুরে বেড়াও, তোমার হল কী বল তো ! বেত কাটতে গিয়ে ছেলেটার হাত দুটো  
কী পরিমাণ কেটেকুটে গেছে ! আচ্ছা বাপ যাহোক ।

হেমকান্ত রঙ্গময়ীর দিকে ভাল করে তাকাতে পারেন না । কেমন এক পাপবোধ তাঁকে ছেঁকে  
ধরেছে ভূতের মতো । শুধু বললেন, কষ্ট করতে শিখুক, আঘাত সহ্য করতে অভ্যাস করুক । না  
হলে তোমার স্বদেশী দলে ভিড়বে কী করে ?

স্বদেশী দলে ও কেন ভিড়বে ? ও হচ্ছে জমিদারের ছেলে, ইংরেজ কর্তাদের পেয়ারের লোক ।

ও তো জমিদারী চায় না । ও চায় স্বদেশী হতে ।

তাই নাকি ? তোমাকে বলেছে ?

সরাসরি বলেনি । হাবে ভাবে বলছে ।

তাহলে এখন থেকে সাবধান হও ।

কী করে সাবধান হবো ? ও হচ্ছে একটা হাওয়া । যার গায়ে লাগে সেই বিগড়ে যায় ।  
ওঝা-বদীর কাজ নয় যে সারিয়ে দেবে ।

অতই যদি ভয় তবে কনক কলকাতায় নিয়ে যেতে চাইছে, পাঠিয়ে দাও না কেন ?

পাঠালেই বা কী হবে ? ওর মনু পিসি যে ওর বারোটা বাজিয়ে রেখেছে ।  
রঙ্গময়ী এ কথায় হেসে ফেলল । বলল, তাহলে আমাকেই না হয় তাড়াও । ছেলের চেয়ে তো  
আমি বড় নই ।

তাড়াবো ! ওরে বাবা ।

কেন, আমাকে তাড়ানো কি খুব কঠিন ?

তোমাকে তাড়াতে গেলে নিজেকেই না ভিটে থেকে উচ্ছেদ হতে হয় ।

ওসব কথার কোনো মানে হয় না । আমি ভেবে দেখেছি, আমি গেলেই তোমাদের মঙ্গল ।  
কিসের মঙ্গল ?

সব দিক দিয়েই মঙ্গল ।

এটা রাগের কথা । হেমকান্ত একটা দীর্ঘশ্বাস ছেড়ে বললেন, মনু, বিশাখা কেমন মেয়ে ?  
রঙ্গময়ী অবাক হয়ে বলল, তার মানে ? বাপ হয়ে নিজের মেয়ের কথা আমার কাছে জানতে  
চাইছে কেন ?

বাপ হলেই যে নিজের মেয়েকে ভাল চেনা যাবে একথা তোমাকে কে বলল ? বরং তুমি নিজে  
মেয়ে বলেই বিশাখাকে ভাল বুঝতে পারবে ।

রঙ্গময়ী একটু বিরক্ত হল যেন । বলল, মেয়ে তো ভালই । কিন্তু কথটা উঠল কেন হঠাৎ ?  
এমনি ।

এমনি নয় । তোমার প্রশ্নের পিছনে কারণ আছে । বলো ।

সেদিন হঠাৎ বিশাখার সঙ্গে কথা হচ্ছিল । মনে হল, ও স্বদেশীদের তেমন পছন্দ করে না  
রঙ্গময়ী হাঁ করে কিছুক্ষণ চেয়ে থেকে বলল, ও আবার কোনদেশী কথা ! বিশাখা স্বদেশীদের  
পছন্দ করতে যাবেই বা কেন ?

হেমকান্ত মৃদু হেসে বলেন, কথা সেটা নয় ।

তবে আবার কী কথা ?

কথা হল, তুমি বিশাখাকে প্রভাবিত করতে পারোনি । কেন পারোনি মনু ? অথচ কৃষ্ণকে  
পেরেছে ।

রঙ্গময়ী একথায় হঠাৎ একটু দিশাহারা বোধ করে চুপ করে থাকে । তারপর ধীর স্বরে বলে,  
তোমাকে যতটা ন্যালাক্ষ্যাপা আর উদাসীন দেখায় তুমি ততটা নও তাহলে ?

আমি অপদার্থ মনু, সে তো জানোই ।

না, আমি তা জানি না । কিন্তু তুমি এত লক্ষ করতে শিখলে কবে ?

তাহলে ধরেছি ঠিক !

রঙ্গময়ী একটা দীর্ঘশ্বাস ছেড়ে বলল, বিশাখা আমাকে ভালবাসে, কিন্তু তবু ও একটু অন্যরকম ।  
একটু নিজের মতো ।

ও কি স্বার্থপর ?

তা তো বলিনি ।

তবে কী ?

সাবধানী বলা যায় । মেয়েদের পক্ষে সাবধানী হওয়া ভাল ।

ওর ধারণা আমি শশীকে পুলিশে ধরিয়ে দেওয়ার জন্য বাড়িতে আশ্রয় দিয়েছিলাম । কোথা  
থেকে যে ধারণাটা হল ।

রঙ্গময়ী বলে, শশীর ব্যাপারটা ওর ভাল লাগেনি । কে জানে, সেইজন্যই হয়তো—  
কথটা শেষ করল না রঙ্গময়ী ।

হেমকান্ত চোখ তুলে প্রশ্ন করেন, সেইজন্যই কী ?

আমি ভাল জানি না ।  
কী জানো না ?  
সে তুমি অন্যের কাছ থেকেই শুনতে পাবে । আমি যাই ।  
রঙ্গময়ী চলে গেলে হেমকান্ত ত্রুটি করে বসে থাকেন । কথাটা হয়তো ভাল নয় । তবু জানা  
দরকার ।

॥ ২০ ॥

রেমি কিছুতেই বুঝতে পারছিল না ব্যাপারটা কী । তাদের বাচ্চা হবে, তাতে দৃষ্টিস্তা বা ভয়ের  
কী ? সে অবাক হয়ে ধুবকে বললে, ওরকম করছ কেন ?

ধুব একটু হাসবার ব্যর্থ চেষ্টা করে বলল, খবরটা এখন চেপে যাও ।

তার মানে ?

কাউকে কিছু বোলো না ।

কেন বলব না ?

কারণ আছে, তাই ।

রেমি রেগে গিয়ে বলল, কী কারণ তা আমার জানা দরকার ।

ধুব বিব্রত মুখে বলে, কারণটা এখনই বলতে পারছি না ।

জীবনে প্রথম মা হতে চলেছে রেমি, এই সংবাদ তার ভিতরে যে রোমহর্ষ, যে রহস্যময় আনন্দের  
এক অদ্ভুত অনুভূতি সৃষ্টি করেছিল তা এক ফুৎকারে উড়ে গেল । তীব্র অপমানে ঝাঁ ঝাঁ করতে  
লাগল মুখচোখ । সে ধুবর জামা থিমচে ধরে বলল, তোমাকে বলতেই হবে ! তোমাকে বলতেই  
হবে ! কী দোষ করেছে আমি ?

ধুব নিজেকে ছাড়িয়ে নিল না । শুকনো ঠোঁট জিব দিয়ে ভিজিয়ে নিয়ে বলল, আসলে কী  
জানো ? আমাদের পরিবারের প্রথম সম্ভান বাঁচত না । লোকে বলে, কে বা কারা যেন বিষ নজর  
দিয়ে এই অপকর্মটি করে । আমি অবশ্য এই সব কুসংস্কার বিশ্বাস করি না । কিন্তু এই পরিবারের বউ  
পোয়াতি হলে খবরটা গোপন রাখাই নিয়ম । না হলে নাকি নজর লাগে ।

একথায় রেমির রাগটা একটু ধাক্কা খেল । খানিকক্ষণ সময় নিয়ে নিজেকে সামলে সে বলল,  
কিন্তু এ খবর কি গোপন রাখা যায় ?

যায় । ধুব মৃদু গলায় বলল, লোকের সামনে না বেরোলেই হয় ।

সেটাও কি এই পরিবারের নিয়ম ?

তাই তো জানি ।

তোমরা শহরে বাস না করে আফরিকার জঙ্গলে গিয়ে থাকলে ভাল হত । সেখানে মানাত  
তোমাদের ।

ধুব কাতর গলায় বলল, মানছি । কিন্তু তবু যে পরিবারে এসেছো সেই পরিবারের প্রচলিত  
নিয়মগুলো খামোখা ভাঙতে যেও না ।

তা বলে দশ মাস ঘরবন্দী থাকতে হবে ?

তা নয় । বেরোবে মাঝে মাঝে । কিন্তু নিজের মুখে এখনই খবরটা কাউকে দিতে যেও না ।

রেমি ফুঁসতে লাগল, কিন্তু আর ঝগড়া করল না ধুবর সঙ্গে । তবে তার মনে একটা সন্দেহ ওত  
পেতে রইল । ধুব বোধ হয় কথাটা বানিয়ে বলেছে । নজর লাগার ব্যাপারটা একদম বাজে । সম্ভবত  
এই অযৌক্তিক অনুরোধের পিছনে অন্য কোনো গঢ় কারণ আছে ।

পরদিনই ধুব তাকে নিয়ে গেল একজন গায়নোকোলজিস্টের কাছে । ডাক্তারটি গোমড়ামুখো



এবং কম কথার লোক । তবে ডাক্তারের অ্যাসিস্ট্যান্ট মেয়েটি ভারী হাসিখুশি এবং ছলবলে ।  
রেমিকে নানারকম পরীক্ষা-নিরীক্ষা সে-ই করল । তারপর বলল, আপনি প্রেগন্যান্ট একথা কী করে  
জানলেন ?

রেমি অবাক হয়ে বলল, কেন বলুন তো ! নই নাকি ?

মনে তো হচ্ছে না ।

কিন্তু আমি সব লক্ষণই টের পাচ্ছি ।

মেয়েটি হেসে বলল, ওরকম কত ফিলিং হয় মেয়েদের !

তবে আমার কী হয়েছে ?

মনে হচ্ছে ভিতরে একটা ব্লাড ক্লট প্যাসেজে আটকে আছে । ওটাকে রিমুভ করা দরকার ।  
কেন ?

ওটা থাকলে নানা উপসর্গ দেখা দিতে পারে । বেশীদিন থাকলে ক্যানসার অবধি হয়ে যাওয়াও  
বিচিত্র নয় ।

আপনি সেন্ট পারসেন্ট শিওর ?

তা অবশ্য নই । তবে কাল আপনাকে একটা ক্লিনিকে ভর্তি হতে হবে । আরো পরীক্ষা আছে ।  
তারপর হয়তো একটা মাইনর অপারেশন করতে হবে ।

রেমির মনটা আবার ঝাঁক করে ওঠে । কেমন একটা সন্দেহ ঘুলিয়ে ওঠে মনে । কিন্তু ডাক্তারের  
যা-চকচকে চেমবার, নানারকম গ্যাজেট, অ্যাসিস্ট্যান্টের হাবভাবের মধ্যে উঁচুদের পেশাদারী দক্ষতা  
এসব দেখে সে উচ্চবাচ্য করল না । সে ডাক্তার নয়, বিশেষজ্ঞ নয়, সে কী করে সব কিছু জানবে ?

কিন্তু সন্দেহ ছিল । বারবার উশখুশ করে উঠছে একটা অস্বস্তি, অজানা ভয় । ফেরার পথে  
গাড়িতে সে ধুবকে জিজ্ঞেস করল, এরা কারা ?

কারা মানে ?

উনি কি খুব ভাল ডাক্তার ?

খুব ভাল । যে-কাউকে জিজ্ঞেস করতে পারো ।

জিজ্ঞেস করতে হবে না, রেমি জানে । খুব উঁচুদের ডাক্তার ছাড়া কৃষ্ণকান্তর পুত্রবধূর  
চিকিৎসা আর কেউ করবে না ।

রেমি মৃদুস্বরে বলল, ব্লাড ক্লট না কী যেন বলছিল মেয়েটা । ওরকম কি হয় ?

না হলে বলছে কেন ?

মা-মাসীদের কারো এরকম হয়েছে বলে শুনিনি ।

শোনোনি বলেই কি হতে নেই ?

আমার কেমন ভয় করছে । অন্য কোনো ডাক্তারকে দেখালে হয় না ?

কাকে দেখাতে চাও ?

আমার বাপের বাড়ির ডাক্তার হলেন অমিত গুপ্ত । ভাল গাইনি ।

ধুব একটু অবাক হয়ে রেমির দিকে চেয়ে বলল, বাপের বাড়ি ?

রেমি সন্তুষ্ট হয়ে ওঠে । তার খেয়াল ছিল না, ধুবদের পরিবারে যারা বউ হয়ে আসে তাদের  
অতীত মুছে ফেলেই আসতে হয় । কোনো সূত্রেই বাপের বাড়ির সঙ্গে তাদের যোগাযোগ বিশেষ  
থাকে না । কথায় কথায় বাপের বাড়ির রেফারেনস দেওয়া বারণ, বাপের বাড়ির কোনোরকম  
সাহায্য নেওয়া বারণ, এমন কি ছোটখাটো নিমন্ত্রণেও সেখানে যাওয়া নিষেধ । রেমির অবশ্য এই  
নিয়ম মেনে নিতে খুব একটা অসুবিধে হয়নি । কৃষ্ণকান্ত তাকে অগাধ স্নেহ দিয়ে ঘিরে রেখেছেন,  
দেওর ননদদের কাছ থেকেও সে যথেষ্ট আদর আর সহানুভূতি পায় । একমাত্র স্বামীটিই যা  
অন্যরকম । তবু এই সুদর্শন ও অদ্ভুত মানুষটির প্রতি এক রহস্যময় আকর্ষণ এবং একে আবিষ্কার

করার এক নাছোড় নেশা রেমির শূন্য স্থানটি ভরিয়ে রেখেছে। বাপের বাড়িকে সে প্রায় ভুলেই গিয়েছিল, কিন্তু ধুবর ওই “বাপের বাড়ি ?” প্রশ্নটি উচ্চারণে যে প্রচ্ছন্ন বিদ্রূপ টের পেল সে তাতে মন ফুঁসে উঠল হঠাৎ।

রেমি শান্ত গলায় বলল, হ্যাঁ। আমার বাপের বাড়ির রুগী দেখেন বলে তো আর অমিত গুপ্ত পাচে যাননি।

রেমির কথার ঝাঁঝে ওর মনের অবস্থাটা টের পেয়েই বোধ হয় ধুবর কথাটা ঘুরিয়ে নিল। বলল, ভয় পেও না রেমি, তোমাকে যিনি দেখছেন তিনি দেশের সবচেয়ে ভাল ডাক্তারদের একজন।

জানি। তবু বড় ডাক্তারদেরও ভুল হয়। আমি আর একজন ডাক্তারকে দেখাতে চাই। বেশ। দেখাবে।

কথা রেখেছিল ধুবর। পরদিন আরও একজন বড় ডাক্তার রেমিকে দেখল এবং অনেক রকম প্রশ্ন করল। কিন্তু রেমির প্রশ্নের জবাব দিল না। একটু স্নেহসিক্ত হাসিমুখে এড়িয়ে গেল বারবার।

রেমি কিছুতেই বুঝতে পারল না, তার গোলমালটা কী।

ফেরার সময় গাড়িতে ধুবর একটু হেসে জিজ্ঞেস করল, আরো ডাক্তার দেখাবে ? আরো আছে কিন্তু !

রেমি স্থির চোখে সামনের দিকে চেয়ে উইনডস্ক্রিনের আয়ত চতুষ্কোণে দ্রুত গুটিয়ে আসা রাস্তা দেখছিল শূন্য চোখে। একটা চক্রান্ত ! একটা গণ্ডগোল ! একটা অদ্ভুত ও অর্থহীন যড়যন্ত্র ! নইলে তার বাচ্চা হবে শুনে প্রথম দিনই ধুবর অমন সাদা হয়ে গেল কেন ?

রেমি ধুবর কথার জবাব দিল না। বাড়ি ফিরে এসে শুধু বালিশে মুখ ঠেসে ধরে গোপনে কাঁদল কিছুক্ষণ।

পরদিন একটা চমৎকার ক্লিনিকে ভর্তি হল সে। প্রথমবারের গোমড়ামুখো ডাক্তারটি এত নিপুণভাবে সেই রহস্যময় জন্মট রক্তটি বের করে নিল যে রেমি কোনো শারীরিক যন্ত্রণা প্রায় টেরই পেল না। কিংবা পেলেও তা প্রকাশ করল না একটুও। দুটো দৃঢ়বদ্ধ ঠোঁট বজ্রের মতো ঠঁটে থেকে ভিতরকার সব যন্ত্রণার শব্দকে আটকে রাখল। পরদিন একটু সাদা, একটু ক্লান্ত এবং একটু বিষন্ন চেহারা নিয়ে সে ফিরে এল বাড়িতে। ধুবর সঙ্গেই।

ধুবর সেদিন কোনো কথা বলল না। ঠাট্টা নয়, সাস্তুনা নয়, কিছুছা না। সেই রাতেই সে অফিসের কাজে চলে গেল বোমবাই। সাত দিন আর তার কোনো খবর নেই।

সেই সাত দিনের মধ্যেই অবশ্য কৃষ্ণকান্ত বিদেশ থেকে ফিরলেন। প্রচুর জিনিসপত্র এনেছেন। সেগুলো আত্মীয়স্বজনদের মধ্যে হই হই করে বিলোলেন। রেমির জন্য এনেছিলেন ফরাসী ও জারমান কয়েক রকম সুগন্ধ, বিখ্যাত সব শিল্পের দামী প্রিন্ট, সোনার বালার সেট করা ঘড়ি, কাট গ্লাসের কিছু জিনিস।

এত দামী সব উপহার পেয়েও যে রেমির মুখে সন্তোষের খুশি উপচে পড়ল না এটা লক্ষ্য করেছিলেন কৃষ্ণকান্ত। বুদ্ধিমান মানুষ তাই প্রথমই জেরা করেননি। পরদিন রাতে খাওয়ার টেবিলে বসে উচ্চকিত হয়ে উঠলেন, সেই দামড়াটা কই ? সেটা আবার কোথায় গেল ?

দামড়াটা যে কোনোকালেই কৃষ্ণকান্তের সঙ্গে বসে খায় না এটা সবাই জানে। তবু অভিনয়টা দেখালেন ভালই। রেমির দিকে চেয়ে বললেন, এই তল্লাটে আছে, না হিল্লিদিম্লি কোথাও গেছে ?

নতমুখে রেমি বলল, বোমবাই। অফিসের কাজে।

অফিস ! কৃষ্ণকান্ত চোখ বড় বড় করে বললো, আবার চাকরিতে ঢুকেছে নাকি ? কোন্ কোম্পানির সর্বনাশ করছে এবার ?

খাওয়ার পর রেমিকে স্টাডিতে ডেকে নিয়ে সুদর্শনের মেয়ের বিয়ে সম্পর্কে সব খুঁটিয়ে শুনলেন। সুদর্শনের সঙ্গে তাঁর কতকালের ও কেমন বন্ধুত্ব তারও অনেক মজার ঘটনা বললেন। তারপর খুব

নিরীহভাবে জিঞ্জেস করলেন, তোমাকে কেন এত রোগা দেখছি মা ? দামড়াটার সঙ্গে কিছু আবার হয়নি তো !

না। মৃদুস্বরে রেমি বলে।

কৃষ্ণকান্ত খুব উদার গলায় বলেন, আমি তো তোমাকে বলেই দিয়েছি, লোকে কন্যা সম্প্রদান করে, আমি করেছি পুত্র সম্প্রদান। কী করলে ওর ভাল হয় তুমি বুঝে দেখ। লাঠৌষধিতেও আমার আপত্তি নেই।

রেমি জবাব দিল না।

কৃষ্ণকান্ত একটা কৃত্রিম দীর্ঘশ্বাস ছেড়ে বললেন, আসলে রক্তটা তো খারাপ নয়। কুসঙ্গে পড়েছে বলে ওরকম। আদর্শ নেই, লক্ষ নেই, আত্মনিয়ন্ত্রণ নেই। এই যুগের ছেলেরা যেমন হয় আর কি। সবচেয়ে বড় কথা, দেশাচার লোকাচার বা ট্যাডিশনের প্রতিও শ্রদ্ধা নেই। আমি একটু প্রাচীনপন্থী ঠিকই। কিন্তু এটাও ঠিক যে, একটা দেশের প্রথা, লোকাচার, অভ্যাসের মধ্যেই একটা জাতির ব্যক্তিত্ব। মাঝেমধ্যে সেইসব প্রথা প্রকরণের সংশোধন পরিমার্জন করতে হয়, কিন্তু বিনাশ করা ভাল নয়। কিন্তু এই দামড়াটা যে যুগে জন্মেছে এটা হল ব্যক্তিত্বহীনতার যুগ। কী মানে, কী মানে না সেটাও বোঝে না ভাল করে। ওকে কেউ যদি স্বক্ষেত্রে ফেরাতে পারে তো সে তুমি। বলেছি তো, রক্তটা খারাপ নয়, একটু শুধু গোড় করা দরকার।

রেমি অনেকক্ষণ শুনল। তারপর খুব মৃদু স্বরে বলল, আপনি চিন্তা করছেন কেন ? আমার সঙ্গে কোনো গুণগোল হয়নি। অফিসের কাজেই বোমবাই গেছে।

কৃষ্ণকান্ত একটু অবাক হয়ে বললেন, তাহলে তোমার এ চেহারা কেন ? শরীর ভাল তো ?

রেমি একটু দ্বিধা করল। তারপর বলল, একটু খারাপ হয়েছিল। এখন সেরে গেছে।

কৃষ্ণকান্ত একটা নিশ্চিত্তের শ্বাস ফেলে বললেন, তাহলেই ভাল। তোমার জন্য আমি খুব ভাবি। একটু বেশীই ভাবি।

রেমি সেটা জানে। তার কথা কৃষ্ণকান্ত ভাবেন। দুনিয়ার আর কেউ যদি নাও ভাবে তবু কৃষ্ণকান্ত ভাবেন। রেমির সামান্য গাঙ্গীর্ষ বা ক্ষণিক বিষণ্ণতাও তাঁর নজর এড়ায় না। একজন ব্যস্ত মন্ত্রী এবং রাজনীতিবিদের পক্ষে সেটা এক মন্ত স্নেহের প্রকাশ। আর এই জনাই এই লোকটির প্রতি রেমিরও আছে এক অন্ধ ভক্তি ও শ্রদ্ধা। অন্ধই। কারণ রেমি জানে, লোকটি স্বৈচ্ছাচারী, আত্মমুগ্ধী, পরিবার সচেতন এবং ক্ষমতাপ্রিয়।

কৃষ্ণকান্ত সেদিন ভারী পরম হয়ে পড়লেন। আস্তে আস্তে নিজের জীবনের কিছু কথা বললেন রেমিকে। বললেন, মাতৃস্নেহ কাকে বলে আমি জানি না। তোমার শাশুড়ির সঙ্গেও আমার সম্পর্ক ছিল সামান্য। আমি হয় জেল খাটতাম, না হয় আন্দোলন করে দেশোদ্ধারে মেতে থাকতাম। ছেলেবেলায় একমাত্র ছিল আমার ছোড়দিদি আর বাবার সঙ্গ। সেও বড় একটা পাওয়া যেত না। বাবা ছিলেন গম্ভীর ও অন্যমনস্ক মানুষ। ছেলের দিকে নজর দেওয়ার রীতিও ছিল না তখন। তবু ছিটেফোঁটা যা ভালবাসা পেয়েছিলাম তা তাঁর কাছ থেকেই। সেটুকুই সম্পদ।

কৃষ্ণকান্ত খানিকক্ষণ চুপ করে থেকে নীচু ও অদ্ভুত কন্ঠ্য গলায় বললেন, মা গো, নিজের জনেরা কেউ আমাকে মানুষ বলেই ভাবল না। তারা ভাবে আমি বৃষ্টি নরদেহে এক পাথরের মূর্তি। আমার বৃষ্টিবা হৃৎপিণ্ড নেই, মগজ নেই, বোধশক্তি নেই, সুখদুঃখ নেই। বাইরের লোকেরা আমাকে যে চোখে দেখে, ঘরের লোকেরাও সেই চোখে দেখে। একজন নেতা। আর কিছু নয়।

তা কেন বাবা ?

কৃষ্ণকান্ত খুব মলিন একটু হেসে বললেন, তোমার কথা বলিনি। একমাত্র তুমিই বোধহয় একটু আলাদা। একটু অন্যরকম। কিন্তু বেশীর ভাগ সংসারই মানুষের সদগুণগুলি নষ্ট করে দেয়। ছাড়ান-কাটান নেই। ভাবি ওই দামড়াটার সঙ্গ করে করে তুমিও বৃষ্টি একদিন আমাকে ঘেরা করবে

শিখে যাবে।

রেমি প্রায় কঁদে ফেলেছিল। ধরা গলায় বলল, না বাবা, কক্ষনো নয়।

কিন্তু প্রতিজ্ঞাটা টেকেনি রেমির। টুকল না ধুবর জন্যই।

বোমবাই থেকে ধুব ফিরলই মাতাল অবস্থায়। কিংবা এও হতে পারে, এয়ারপোর্ট থেকে বাড়ি আসার পথে কোথাও নেমে গলা অবধি খেয়ে এসেছিল। এসেই সদর দরজায় দাঁড়িয়ে চোঁচাতে লাগল, ভাঙো, ভাঙো, ভেঙে ফেল বাড়ি ঘর। রোলার চালিয়ে দাও। বদমাশ, খুনিয়া, শয়তান, ভণ্ড এই সব মানুষের মুখোশ খোলো। শালারা পলিটিকস করে! অ্যা! পলিটিকস! খোঁয়াড়ে ছাগলগুলো পর্যন্ত এদের চেয়ে অনেক বেশী ওয়েল বিহেভড।

লোকজন গিয়ে ধরে আনল ধুবকে। ঘরে ঢুকিয়ে দিয়ে গেল।

কিন্তু তারপর দিন থেকেই ধুব ফিরে গেল তার পুরনো চরিত্রে। সারাদিন মদ খায়, হল্পা করে। কখনো বাড়ি ফেরে, কখনো ফেরে না। বোমবাই থেকে ফেরার পর প্রায় মাসখানেক ধুবকে স্বাভাবিক অবস্থায় দেখল না রেমি।

কৃষ্ণকান্ত দোতলায় আলাদা একটা ঘর ঠিক করে দিয়ে বললেন, ওঘরে তোমার অসুবিধে হলে এখানে এসে থেকো। দামড়াটা কখন কী কাণ্ড করে বসে তার তো ঠিক নেই।

রেমি সেইটেই সঙ্গত প্রস্তাব বলে মেনে নিয়েছিল। ধুবর ঘরে রাত্রিবাস সে প্রায় ছেড়েই দিল। তা বলে যে ধুব তাকে কোনোদিন প্রশ্ন করেছে তাও নয়। প্রশ্ন করলে বা জোর করে রেমিকে ধরে নিয়ে গেলেই বোধ হয় রেমি খুশি হত। কিন্তু ধুব সেই ধাতুতে গড়া নয়।

রেমি একদিন টের পেল, ধুব সন্ধ্যাবেলায় তার ঘরে আছে এবং খুব একটা হল্পা করছে না। চোঁচিয়ে কার কাছে যেন জল চাইল এবং ঘরের টেবিল ল্যাম্পের বালবটা ফিউজ হয়ে গেছে বলে কিছুক্ষণ রাগারাগি করল। তারপর চুপচাপ।

রেমিকে ভূতে পেল সেদিন। ধুবকে ধরতেই হবে আজ। ওর মুখ থেকে শুনতে হবে, কেন ও এরকম।

পা টিপে টিপে রেমি নেমে গেল নীচে। ভেজানো দরজা ফাঁক করে দেখল, ধুব বিছানায় আধশোয়া হয়ে বই পড়ছে। এই একটা কাজ ধুব করে। খুব বই পড়ে। প্রায়ই সেগুলো অর্থনীতি বা সমাজদর্শন বা অনুরূপ কঠিন বিষয়ের বই।

রেমি ঘরে ঢুকে বইটা বিনা ভূমিকায় কেড়ে নিয়ে বলল, তোমার সঙ্গে কথা আছে।

ধুব বিরক্ত হয়ে বলল, তোমার অত কথা কিসের?

থাকলে কী করব?

আমার বেশী কথা ভাল লাগে না।

আমি কি বেশী কথা বলি?

তা একটু বলো। মেয়েরা বড্ড বাজে বকে।

আমি জানতে চাই, তুমি এরকম করছ কেন?

কী রকম করছি।

আবার মদ খাচ্ছ!

আমি তো বরাবর খাই। যোলো সতেরো বছর বয়স থেকে।

মাঝখানে খেতে না তো!

ধুব বিরক্ত হয়ে বলল, খাই তো নিজের পয়সায় খাই। তোমার বাপের পয়সায় খাই না, তোমার স্বশ্রমের পয়সাতেও খাই না।

পয়সার কথা উঠছে না। খাও কেন? কী হয়েছে?

কিছু একটা হয়েছে।

আজ খেয়েছো ?

খেয়েছি ।

কতটা ?

বেশী নয় । তিন পেগ । নেশা হয়নি । এখন আবার খাবো । তুমি সেফলি কেটে পড়ে ওপরের ঘরে গিয়ে দরজা দাও । পারলে শ্বশুরকে দরজায় পাহারা বসিয়ে রেখো । লাঠি হাতে গোঁফে তা দিতে দিতে বউমাকে পাহারা দেবে, যেন ছেলে গিয়ে তার সতীত্ব নষ্ট না করে ।

তুমি গেলে কি আমার সতীত্ব নষ্ট হয় ? যাও না কেন ? গেলেই তো পারো । গিয়ে দেখ, কেউ তোমাকে আটকায় কিনা ।

ইজ ইট অ্যান ইনভিটেশন ?

ধরো তাই ।

আমি দোতলায় উঠি না । ওটা একজন নখদস্তহীন অথর্ব ও কৃষ্ণাণ্ড মন্ত্রীর এলাকা ।

উনি তোমার বাবা ।

হ্যাঁ, দুর্ভাগ্যক্রমে ।

ঠিক আছে, ওপরে যেতে না চাও না যাবে । আমি কি আসব

না । তোমাকে আমার দরকার তো নেই ।

তোমাকে আমার আছে ।

না, আমাকেও তোমার দরকার নেই ।

আমার ওপর রাগ করেছে ?

না । আলমারি থেকে ছইস্কির বোতলটা বের করে আনো । খেতে খেতে একটু কথা কই ।

রেমি দাঁতে দাঁত পিষে তাই করল । ধুবর মুখ থেকে তার কথা বের করাটা দরকার ।

অনেকটা ছইস্কি খাওয়ার পর ধুব বলল, কী বলতে এসেছো ?

তুমি আবার মদ খাচ্ছে কেন ?

আমার খুব দুঃখ হয়েছিল, তাই ।

কিসের দুঃখ ?

বাচ্চাটার জন্য ।

কোন্ বাচ্চা ?

আমার বাচ্চা ।

রেমি কেঁপে উঠল । বলল, কী বলছ ?

ধুব মাথা নাড়ল, ওটা ব্লাড ক্লট নয় । বাচ্চা ।

## ॥ ২১ ॥

রাজেন মোস্তারের ছেলে শচীন ল পাস করে ওকালতি শুরু করেছে সবে । শোনা যাচ্ছে কাছারিতে সে আরগুমেন্ট ভালই করে । হেমকান্তর পুরোনো উকিল গগন তালুকদার বড়ই বৃদ্ধ হয়ে পড়েছেন । কোর্ট কাছারি বড় একটা যান/না। নতুন একজন উকিল নিয়োগের কথা বহুদিন ধরেই ভাবছেন হেমকান্ত ! কিন্তু অলস লোকের যা স্বভাব । ভাবেন তো কাজে আর হয়ে ওঠে না । কাকে রাখবেন সেটাও ভেবে দেখা দরকার ।

শচীনের কথা তাঁকে বলল রঙ্গময়ী, এসব খবর রঙ্গময়ীর খুব ভাল রাখার কথা নয় । কিন্তু একদিন সে সকালে এসে সোজা বলল, গগন বাবুর তো নখদস্ত বলে আর কিছু নেই । কথা বলতে গেলে নালে-ঝোলে একাকার হয় । এই বুড়োকে দিয়ে তোমার মামলা টামলা চলবে ?

হেমকান্ত অবাক হয়ে বলে মামলা কিসের ?

মামলা লাগতে কতক্ষণ ? রামকান্ত দারোগা যে তোমাকে কী একটা লিখে দিতে বলেছিল, লিখেছে ?

না, হয়ে ওঠেনি

তোমার তো আজকাল কিছুই হয়ে উঠছে না। শুধু ছেলে নিয়ে নৌকো চালালেই হবে ? ওটাও তো গোপলায় যাচ্ছে। বইপত্র ছোঁয় না।

হেমকান্ত মৃদু হেসে বলেন, অন্য প্রসঙ্গে যাওয়ার দরকার কী? উকিলের কথাটা হঠাৎ তুললে কেন ?

রামকান্ত দারোগা রোজ লোক পাঠাচ্ছে তোমাকে কী সব লিখে দেওয়ার জন্য।

কেন ?

বাঃ, পুলিশ এখন শশিভূষণের নামে মামলা আনবে না ? তুমি তাদের সাক্ষী যে !

ওঃ, এই কথা কিন্তু স্টেটমেন্ট লেখাও ঝকঝক, কাকে উকিল রাখা যায় বলো তো !

আমি তো শটীনের কথা বলি, অল্প বয়স, বুদ্ধি-সুদৃষ্টি খুব।

শটীনকে ভালই চেনেন হেমকান্ত, রাজেনবাবুর বাড়ির সঙ্গে তাঁর ঘনিষ্ঠতাও অনেক দিনের। রাজেনবাবু ঢাকার লোক। ময়মনসিংহে আসেন ফৌজদারি মামলার ছড়াছড়ি দেখে। খুবই সামান্য আয়ে আইনের ব্যবসা শুরু করেন। মুক্তাগাছার এক জমিদার নলিনীরঞ্জন। তাঁর ছেলেকে পড়াতে। সেই সূত্রে শহরে একটু বসতির জমি পান। আস্তে আস্তে অবস্থা ফিরিয়ে ফেলেছেন এখন। দুর্গাবাড়িতে একখানা বাড়ি করেছেন। সেখানে দুর্গাৎসব পর্যন্ত হয়। শটীন তাঁর ছোটো ছেলে। বেশ সুপুরুষ, লম্বা ছিপছিপে চেহারা, গানটানও গায়।

শটীনের নিয়োগে আপত্তির কিছু নেই। হেমকান্ত বললেন, তাহলে ওকে একটু ডেকে পাঠাও।

রঙ্গময়ী একটু কুটিল চোখে হেমকান্তের দিকে চেয়ে ছিল। তারপর বলল, একটু বুঝেসুঝে কথাবার্তা বোলো, আর ছেলেটিকে ভাল করে লক্ষ্যও কোরো।

হেমকান্ত অবাক হয়ে বলেন, শটীনকে আর লক্ষ্য করার কী আছে ? ছোটো থেকে দেখছি।

তোমার মতো ক্যাবলা দুটি নেই। শটীন শুধু উকিলই নয়, একজন সং পাত্রও বটে। তোমাদের পাশ্টি ঘর।

হেমকান্ত থতমত খেয়ে বলেন, ও বাবা, তুমি অনেকদূর ভেবে ফেলেছো দেখছি।

ভাবতেই হয়। মেয়ে বড় হচ্ছে, কিন্তু বাপের কোনো দৃষ্টিস্তা নেই, কাজেই পাড়া পড়শীকেই ভাবতে হয়।

হেমকান্ত খুব হাসলেন, তারপর বললেন, আচ্ছা দেখা যাবে।

আর একটা কথা।

বলো।

শশীর হয়ে মামলা লড়ার কেউ নেই।

বরিশালে ওর বাবা আছে।

তা আছে। কিন্তু ভদ্রলোক খুব গা করছেন না বলে শুনেছি।

কেন, গা করছে না কেন ?

বাপ হচ্ছে সেই সং মায়ের পোষা ভেড়ার মতো। শশীকে নাকি ত্যাজ্য পুত্রও করেছে। আমার মনে হয় না, শশীর বাপ উকিল-টুকিল লাগাবে।

হেমকান্ত গম্ভীর হয়ে বলেন, লোকটাকে তো চাবকাতে হয়।

সে যখন হাতের কাছে পাবে তখন চাবকিও। কিন্তু এখন তো অবস্থাটা সামাল দেওয়া দরকার।

আমার কী করার আছে ?

শটীনকে একটু বোলো ।

শটীন !

ছেলেটা ভাল । বুদ্ধি রাখে । পয়সার পিশাচও নয় । তুমি বললে হয়তো শশীর পক্ষে দাঁড়িয়ে লড়াই করবে । তোমাকে কোনো বিপদের ঝুঁকি নিতে হবে না । ভয় পেও না ।

হেমকান্ত রঙ্গময়ীর চোখের দিকে তাকিয়ে রইলেন । তাঁর মুখের হাসি ধীরে ধীরে মুছে গিয়ে একটা কঠোরতা ফুটল । ধীর স্বরে বললেন, মনু, তোমরা আমাকে সবাই একটু ভুল বুঝলে ।

রঙ্গময়ী বুঝি একটু লজ্জা পেল । বলল, আমাদের মেয়েমানুষে বুদ্ধি, ওগো রাগ কোরো না । তুমি গম্ভীর হলে আমার পৃথিবী অন্ধকার হয়ে যায় ।

হেমকান্ত খুব ম্লান একটু হেসে বললেন, থাক, আর মন-রাখা কথা বলতে হবে না মনু । শটীনকে খবর পাঠাও । যা বলবার আমিই বলব ।

বিকলে কাছারির কাজ শেষ করে শটীন এল । রুচিবান ছেলে । বাড়ি গিয়ে উকিলের পোশাক ছেড়ে ধুতি পানজাবি শাল চাপিয়ে এসেছে । ভারী সুন্দর চেহারাটি । কমনীয় মুখশ্রীতে বুদ্ধির দীপ্তি ঝলমল করছে । হেমকান্তকে প্রণাম করে সামনে বসল ।

রঙ্গময়ীর পরামর্শমতো ছেলেটিকে ভাল করেই লক্ষ্য করলেন হেমকান্ত । চমৎকার ছেলে, সন্দেহ নেই । এই ছেলে এ বাজারে এখনো পড়ে আছে সেটাই বিস্ময়ের ।

হেমকান্ত বললেন, ঘটনাটা কি শুনেছো ? শশিভূষণ নামে একটি ছেলে যে আমার বাড়িতে আশ্রয় নিয়েছিল !

আজ্ঞে হ্যাঁ ।

সেটা নিয়েই গোলমাল । দারোগা রামকান্তবাবু আমার একটা বিবৃতি চাইছেন । সেটা কি দেওয়া উচিত বলে মনে করো ?

শটীন বলল, স্টেটমেন্ট এখনই দেওয়ার দরকার নেই । মামলা উঠুক, তখন দিলেও চলবে ।

দারোগা আমার কাছে কিরকম স্টেটমেন্ট চাইছে তা আন্দাজ করতে পারো ?

শটীন মৃদু একটু হেসে বলল, তা বোধহয় পারি । উনি সম্ভবত আপনার কাছ থেকে একটা মুচলেকা আদায় করতে চাইছেন ।

উদ্দেশ্যটা কী ?

উদ্দেশ্য, শশিভূষণকে ফাঁসানো, তার বিনিময়ে আপনি আপনার নিরাপত্তা কিনে নিতে পারবেন ।

হেমকান্ত গম্ভীর হয়ে বলেন, আর যদি সেরকম মুচলেকা না দিই ?

তাহলে পুলিশ আপনাকেও ফাঁসানোর চেষ্টা করবে ।

মামলাটা তুমি নেবে ?

শটীন বিনীতভাবে ঘাড়হেঁট করে বলে, নিতে পারি ।

আমাদের পুরোনো উকিল গগনবাবু বুড়ো হয়েছেন । আমি সেই জায়গাতেও তোমাকে অ্যাপয়েন্ট করতে চাই ।

যে আজ্ঞে ।

তাহলে কাল থেকেই গগনবাবুর সঙ্গে বসে সব কাগজপত্র বুঝে নাও ।

যে আজ্ঞে ।

আমার এসটেটের অবস্থা বিশেষ ভাল নয় । খাজনা আসে খুব সামান্য । আদায় উসুল করার লোক নেই । প্রজাদের হাতে নাকি নগদ টাকারও খুব অভাব ।

শটীন মৃদু স্বরে বলে, একটা ডিপ্রেসন চলছে ঠিকই ।

ছেলেরা চায় জমিদারী বেচে দিই, তুমিও কি তাই বোলো ?

শটীন একটু ভেবে নিয়ে বলল, দেখাশোনার লোক না থাকলে অবশ্য জমিদারীটা একটা

লায়াবিলিটি হয়ে দাঁড়ায়, কিন্তু এখনই বেচার কথা ভাবছেন কেন ? আমি আগে কাগজপত্র দেখি ।  
তুমি তো দেখবে আইনের দিক্টো, হিসেবপত্র দেখবে কে ? আমি নতুন করে গোটা এসটেটের  
একটা অ্যাসেসমেন্ট করতে চাই ।

শচীন বলে, সেটাও খুব শক্ত হবে না । দলিল-টলিলগুলো আমাকে দেবেন । দেখে দেবো ।  
আপনার ম্যানেজার মশাইয়ের সঙ্গেও একটু বসা দরকার ।

বেশ, সে ব্যবস্থাও হবে । তাহলে আমি নিশ্চিত ?

আগে সব দেখি ।

শশিভূষণের বিরুদ্ধে পুলিশ মামলা সাজিয়েছে বলে কিছু জানো ?

শচীন মাথা নেড়ে বলে, এখনো দেয়নি । তবে হাসপাতাল থেকে আজই তাকে হাজতে নেওয়া  
হয়েছে ।

হেমকান্ত দীর্ঘশ্বাস ছেড়ে বললেন, তাহলে ছেলেটা ফাঁসিতে মরার জন্যই বেঁচে উঠল !

ফাঁসি যে হবেই তা বলা যায় না ।

শশীকে তুমি বাঁচাতে পারবে ?

শচীন চিন্তিত মুখে বলে, পুলিশের কাছে সে কী বলেছে তা তো জানি না । পুলিশই বা কী পয়েন্ট  
দিয়েছে তাও দেখা দরকার । আপনি বললে আমি শশীর সঙ্গে দেখা করতে পারি ।

করো ।

কিন্তু একটা কথা আছে ।

কী কথা ?

আমি একা গেলে সে হয়তো আমাকে ঠিক বিশ্বাস করতে পারবে না ।

আমি যদি তোমার সঙ্গে যাই ?

শচীন একটু দ্বিধা করল । কী যেন বলি-বলি করেও সামলে নিয়ে বলল, তার হয়তো দরকার হবে  
না । শশীকে আমি কনভিনস করতে পারবো ।

আমি যাবো না বলছ ?

দরকার হলে বলবখন । তখন যাবেন ।

হেমকান্ত উদাস হয়ে গেলেন । বললেন, ছেলেটাকে আমার একটু দেখতেও ইচ্ছে করছে ।  
আমার বাড়িতে কয়েকদিন ছিল, কিন্তু অসুস্থ অবস্থায় । ভাল করে কথাও হয়নি । না, চলো, কাল  
আমিও তোমার সঙ্গে যাবো ।

শচীনের মুখে আবার সেই দ্বিধার ভাবটা দেখা গেল । মৃদুস্বরে বলল, আপনার এখন না যাওয়াই  
বোধহয় ভাল ।

কেন বলো তো ?

শচীন মৃদু একটু হেসে বলল, শহরে একটা গুজব রটেছে । লোকের ধারণা এ বাড়ি থেকে  
শশীকে ধরিয়ে দেওয়া হয়েছে ।

হেমকান্ত চমকে উঠে বলেন, সে কী ? কে রটাল ?

গুজব রটানোই তো কিছু লোকের কাজ । আমার মনে হয় শশীরও সেরকমই ধারণা ।

কেন, শশীর এরকম ধারণা হওয়ার কারণ কি ?

কোনো কারণ নেই । তবে শহরের গুজবটা তার কানে পৌঁছানোই সম্ভব ।

হেমকান্তকে ভারী ক্লান্ত দেখাল । বললেন, লোকে একথা বিশ্বাস করে ?

হয়তো সবাই করে না ।

তুমি করো ?

না । আপনাকে আমি শিশু বয়স থেকে দেখে আসছি । এই পরিবারের কোনো লোক কখনো



ছোটো কাজ করেনি।

হেমকান্ত একটু স্বস্তির শ্বাস ফেলে বললেন, না, আমরা ছোটো কাজ সহজে করি না। শশীকে ধরিয়ে দেওয়ার প্রশ্নই ওঠে না।

আমি জানি। বরিশাল মারডার কেস নিয়ে খুব তোলপাড় হচ্ছে। শশীর পক্ষে দলছুট হয়ে লুকিয়ে থাকা এমনতেই সম্ভব ছিল না।

তুমি অনেক জানো দেখছি।

কিছু খবর রাখি। ওকে যারা প্রোটেকশন দিতে পারত তাদের সঙ্গে ও যোগাযোগ করতে পারেনি। তাছাড়া আর একটা নির্দেশ ছিল ওর ওপর। সেটাও ও মানেনি।

কী সেটা?

কথা ছিল, মারডারের পর সুইসাইড করবে।

হেমকান্ত শিউরে ওঠেন, তাই নাকি?

হ্যাঁ।

তুমি কী করে জানলে?

মনুদিদির কাছে ও নিজেই বলেছে।

কই, মনু তো আমাকে বলেনি!

আপনাকে খামোখা বিরক্ত করতে চান নি।

তোমাকে কবে বলল?

পরশু মনুদিদি আমাদের বাড়িতে গিয়েছিলেন। তখনই বলেন।

শশী সুইসাইড করল না কেন?

সেটা বোঝা মুশকিল। হয়তো শেষ সময়ে দুর্বলতা এসে গিয়েছিল। পিস্তলের গুলিও ফুরিয়ে গিয়ে থাকতে পারে। বাচ্চা ছেলে তো।

হেমকান্ত কিছুক্ষণ চুপ করে থেকে বললেন, কিন্তু আমার সম্পর্কে ওর ভুল ধারণাটা যে ভাঙা দরকার। কী করব বলতে পারো?

এখন কিছু করার দরকার নেই। আগে আমি ওর সঙ্গে কথা বলে দেখি।

মনু কি ছেলোটোর সঙ্গে দেখা করেছে?

না, উনি চেষ্টা করেছিলেন। পুলিশ দেখা করতে দেয়নি।

ঠিক আছে। আগে তুমিই দেখা করো।

যে আশ্বে।

মামলা কবে নাগাদ উঠবে?

তা বলতে পারি না। তাছাড়া মামলা তো এখানে হবে না। শশীকে বরিশালে চালান দেওয়া হবে। মামলা উঠবে সেখানে।

এখানে হয় না?

সেটা নরমাল প্রসিডিওর নয়।

তুমি কি বরিশালে গিয়ে মামলা লড়তে পারবে?

তা পারা যাবে না কেন? ও নিয়ে আপনি ভাববেন না।

আচ্ছা, তোমার ওপর অনেক দায় দায়িত্ব চাপিয়ে দিলাম।

তাতে কি?

পারবে তো সব সামলাতে?

চেষ্টা করব।

শচীন চলে যাওয়ার পর হেমকান্ত অনেকক্ষণ শচীনের কথাই ভাবলেন। ছেলেটি অতি

চমৎকার । এই ছেলেটিকে যদি জামাই করেন তবে সব দিক দিয়েই তাঁর ভাল হয় । বিষয় আশয় এবং মামলা মোকদ্দমা নিয়ে ভাববার মতো একজন লোক পেলে জীবনটা তিনি নিশ্চিন্তে কাটাতে পারেন ।

হেমকান্তর ঘরের বাইরেই ওত পেতে ছিল কৃষ্ণকান্ত । শচীন বেরিয়ে আসতেই ধরল, শচীনদা, কী কথা হল ?

শচীন একটু হেসে বলে, তা দিয়ে তোর কী দরকার ?

আমার দরকার আছে । তুমি শশীদাকে বাঁচাবে ?

আমি বাঁচাতে যাবো কোন দুঃখে ?

বাবা তোমাকে শশীদার উকিল ঠিক করেনি ?

করলেই বা । উকিল কি ভগবান ?

সি আর দাশ কিরকম আরগুমেন্ট করেছিল জানো ?

খুব পেকেছিস দেখছি ।

শচীন নাচে এসে বারবাড়িতে রাখা তার সাইকেলটা টেনে নিয়ে বলে, শশীকে নিয়ে তোকে অত ভাবতে হবে না । লেখাপড়া কর ।

করছি । আমি উকিল হবো ।

তাই নাকি ?

উকিল হয়ে শুধু স্বদেশীদের হয়ে মামলা লড়ব ।

বলিস কি ? শুধু স্বদেশীদের মামলা লড়লে যে পেট চলবে না ।

আমি তোমার সাইকেলের রডে একটু উঠি শচীনদা ?

ওঠ । কিন্তু তোর মতলবখানা কী ?

চলোই না, বলছি ।

শচীন সাইকেলের রডে কৃষ্ণকান্তকে নিয়ে বড় রাস্তায় উঠে এল । রাস্তা মোটেই ভাল নয় । ইটের রাস্তায় গর্ত, উঁচু নীচু ।

সাইকেল চালাতে চালাতে শচীন বলল, এবার বল ।

ছোড়দিকে তোমার পছন্দ হয় ?

শচীন একটু থতমত খেয়ে হেসে ওঠে । বলে, আমার পছন্দ হলে তোর কী লাভ ?

তোমার সঙ্গে ছোড়দির বিয়ের কথা চলছে, জানো ?

শচীন একটু গম্ভীর হয়ে বলে, না তো ! তোকে কে বলল ?

মনুপিসি । বলেনি ঠিক । বাবাকে বলছিল, আমি শুনেছি ।

তাই নাকি ?

তুমি ছোড়দিকে বিয়ে করবে ?

দূর ফাজিল !

ছোড়দি সুন্দর না ?

কে জানে !

লোকে বলে, ছোড়দি নাকি খুব সুন্দর ।

তা হবে ।

কিন্তু ছোড়দির একটা দোষের কথা তোমাকে বলে দিই । রেগে গেলে কিন্তু ছোড়দির নাকের ডগা নড়ে ।

শচীন এত জোরে হেসে ফেলল যে, সাইকেল বেসামাল হয়ে গেল কিছুক্ষণের জন্য । ফের সামলে নিয়ে সে বলল, আর কী দোষ আছে রে তোর ছোড়দির ?

ভীষণ হিংসুটে। খুব মিথ্যে কথা বলে।

তাই নাকি? তাহলে ওকে তো বিয়ে করা উচিত নয়।

না না। করো। ছোড়দি এমনিতে ভালই। তোমার সঙ্গে বিয়ে হলে ছোড়দি তো কাছাকাছিই থাকবে, তাই না?

ও, সেইজন্যই আমাকে বিয়ে করতে বলছিস?

শচীন আবার হাসতে থাকে।

রঙ্গময়ী বিশাখার চুল বেঁধে দিল সেদিন বিকেলে। তারপর বলল, বাপ তো বোম ভোলানাথ, মেয়ের বয়সের দিকে লক্ষ্যই নেই। কিন্তু এই বয়সে কি ঘরে রাখা যায়!

কথাটা শুনল বিশাখা। কোনো মন্তব্য করল না।

রঙ্গময়ী হঠাৎ জিজ্ঞেস করল, রাজেন মোক্তারের ছেলে শচীনকে তো দেখেছিস!

বিশাখা একটু বিস্ময়ভরে চেয়ে বলে, দেখব না কেন? সুফলার দাদা তো!

তার কথাই বলছি।

তার কথা কেন?

তোর বাবার খুব ইচ্ছে, ওর সঙ্গে তোর সম্বন্ধ করে।

ওর সঙ্গে? বলে বিশাখা যেন আকাশ থেকে পড়ে।

কেন, ছেলেটা খারাপ নাকি? কী চমৎকার রাজপুত্রের মতো চেহারা!

বিশাখা একটা ঝামটা মেরে বলে, হলেই বা মোক্তারের ছেলেকে বিয়ে করতে যাবো কেন?

আর পাত্র জুটল না?

রঙ্গময়ী বলে, মোক্তারের ছেলে তো কী! ও নিজে তো উকিল।

ওরকম উকিল গণ্ডায় গণ্ডায় আছে।

তোর পছন্দ নয়?

দূর বলে প্রস্তাবটা একদম উড়িয়ে দিল বিশাখা।

রঙ্গময়ী স্তব্ধ হয়ে গেল। অনেকক্ষণ বাদে একটা দীর্ঘশ্বাস ছেড়ে বলল, এমন পাত্র তোর পছন্দ নয়! সত্যিই পছন্দ নয়।

বিশাখা বিরক্ত হয়ে বলে, আমি কি তোমাদের পথের কাঁটা পিসি যে, ধরে বেঁধে জলে ফেলে দিতে চাও!

জলে ফেলে দেওয়া কি একে বলে?

তা ছাড়া আর কী? আমার কোনো দিদির কি এরকম ঘরে বিয়ে হয়েছে?

রাজেন মোক্তারও তো গরীব নয়।

একসময়ে তো ছিল। ওদের বাড়ি থেকে মার কাছে প্রায়ই লোক আসত চাল, টাকা, পুরোনো কাপড় চাইতে।

সে তো কবেকার কথা!

তা হোক। ওদের সংসারে বউ হয়ে আমি যেতে পারব না। বরং তোমাদের অসুবিধে হলে বোলো, পুকুরে ডুবে মরব।

আমাদের অসুবিধে আবার কী? বারবার ওকথা বলছিস কেন?

হচ্ছে বলেই বলছি।

কিসের অসুবিধে? কার অসুবিধে?

অত জানি না। মনে হল, তোমাদের দুজনের একটু অসুবিধে হচ্ছে আমি থাকাতে।

রঙ্গময়ী নিঃশব্দে পালিয়ে গেল।

কূট সন্দেহ যখন সত্য হয়ে দেখা দিল অবশেষে, তখন রেমির সত্যিকারের ঘেন্না এল ধুবর ওপর। আর রাগ। পারলে সে লোকটাকে খুন করে।

দুহাতে জামা খামচে ধরে ধুবকে এত জোরে নাড়া দিতে লাগল সে যে মাতাল ধুবর মাথাটা লটপট করতে লাগল ঘাড়ের ওপর। বুঝিবা ঝাঁকুনিতে খসে পড়ে। চিৎকার করে রেমি জিজ্ঞেস করতে লাগল, কী বললে? ঠিক করে বলো! স্পষ্ট করে বলো! বলো! নইলে তোমাকে আমি খুন করে ফেলব।

ঝাঁকুনির চোটে ধুব কেনন ভাবল। হয়ে গিয়েছিল। কথা বলতে পারছিল না। হাঁফাতে হাঁফাতে শুধু একবার অতি কষ্টে বলল, মাইরি! তোমার গায়ে তো সাজঘাতিক জোর!

রেমির রাগ তাতে আরো চড়ল। উত্তপ্ত সেই পিশাচ রাগ লুপ্ত করে দিল তার কাণ্ডাকাণ্ড জ্ঞান। দুহাতে সে ধুবর গলা টিপে ধরে বলল, বলো! স্পষ্ট করে বলো! কী করেছে তুমি? আমার পেটে সত্যিকারের বাচ্চা এসেছিল! তুমি আমাকে মিথ্যে করে বুঝিয়ে সেটা নষ্ট করেছে! বলো, ঠিক কি না!

ধুব সভয়ে রেমির দিকে চেয়ে বলে, ঠিক।

ঠিক? আত্ননাদ করে উঠে রেমি চেপে ধরল ধুবর গলা। প্রাণপণে তার শ্বাসনালী অবরোধ করে বলল, তাহলে তুমিই বা কেন বেঁচে থাকবে? খুনী! ছোটলোক! চণ্ডাল! তুমিই বা কেন বেঁচে থাকবে? মরো! মরো! মরো!

আশ্চর্য এই, ধুব নিজেকে বাঁচানোর জন্য একটা হাতও তুলল না। একটুও বাধা দিল না রেমিকে। রেমির প্রচণ্ড মুঠোর চাপে দম আটকে আসছিল তার। চোখ দুটো বড় বড়। কপালে রক্তোচ্ছ্বাস। মুখটা হাঁ করা।

রেমি সম্ভবত মেরেই ফেলত ধুবকে। যদি সে ধুবর মুখের দিকে না তাকাত। যদি চোখ বুজে থাকত রেমি, তাহলে হয়তো পারত। কারণ সেই মুহূর্তে খুন করার মতোই একটা রাগ ভর করেছিল তার শরীরে। কিন্তু ধুবর অসামান্য মুখশ্রীতে যে কষ্টের ছাপ ও মৃত্যুযন্ত্রণার ভয়াবহতা ফুটে উঠেছিল তার দিকে চেয়ে শিথিল হয়ে গেল রেমি। নিজের কাছে এক রহস্যময় অদ্ভুত প্রশ্ন রয়ে গেল তার। কেন কেন আমি এই খুনী এই পিশাচকে ভালবাসি? কেন ভালবাসি?

রেমির হাত থেকে মুক্ত ধুব গড়িয়ে পড়ে গেল বিছানায়। একটা বীভৎস হেঁচকির শব্দ উঠতে লাগল তার গলা দিয়ে। ঠোঁটের কোণা বেয়ে কষ ও ফেনা গড়াতে থাকে।

রেমি প্রথমটায় অবাক হয়ে চেয়ে থাকে ধুবর দিকে। তারপর তার বুক জুড়ে দেখা দেয় ভয়। ও কি মরে যাবে? ও কি মরে যাচ্ছে? হায় হায় হায়। ওকে ছাড়া আমি বাঁচব কী করে?

পাগলের মতো রেমি তখন ঝাঁপিয়ে পড়ে ধুবর ওপর, ওগো! তোমার কী হল? বলো না! পায়ে পড়ি, ওরকম কোরো না। কী হয়েছে তোমার? ওগো!

ধুবর শ্বাস চলছিল, জ্ঞান কিছুটা লুপ্ত হয়ে গিয়ে থাকবে। তবে তার শরীর অত্যন্ত মজবুত। ভাল ভিতের ওপর তৈরি বাড়ি ভাঙতে সময় লাগে। অস্পষ্ট আধো চেতনার মধ্যেও সে বুঝল আতঙ্কিত রেমি যদি ঠেঁচায় তাহলে লোক জানাজানি হবে। বিস্ত্রী এক পরিস্থিতির মুখে পড়ে যাবে রেমি। ধুব অতি কষ্টে একখানা হাত একটু তুলে রেমির একখানা হাত ঝুল। একটু মাথা নাড়ল। বোধহয় বোঝাতে চাইল, তার তেমন কিছু হয়নি।

হতবুদ্ধি রেমি এইটুকু দেখেই বুঝতে পারল, ধুব হয়তো মরে যাচ্ছে না। সে দৌড়ে গেল বাথরুমে। জল এনে ছিটে দিতে লাগল ধুবর মুখে চোখে। ফ্যান খুলে দিল মাথার ওপর। খুলে দিল বুকের বোতাম।

অনেকক্ষন ধরে কাশল ধুব। গভীর শ্বাস টেনে ধীরে ধীরে স্বাভাবিক অবস্থায় ফিরে এল। গলার ফর্সা চামড়ায় তখনো লাল দগদগে হয়ে বসে আছে রেমির আঙুলের ছাপ।

ওঠার মতো অবস্থা তখনো তার নয়। বালিশে ক্লান্ত মাথা এলানো। স্নান একটু হেসে বলল, পারলে না ?

রেমি অবিশ্বাসের চোখে চেয়ে ছিল ওর মুখের দিকে। বলল, কী পারলাম না আর একটুক্ষণ চেপে রাখলেই তো হত। পারলে না কেন ?

রেমি উপুড় হয়ে পড়ল ধুবর বুকে। দুহাতে আঁকড়ে ধরে পাগলের মতো কাঁদতে লাগল, বোলো না বোলো না ! আমি রাঙ্কুসী।

ধুব সেই কান্নায় বাধা দিল না। চুপচাপ শুয়ে রইল। কিছুক্ষণ। তারপর ফাঁসফেঁসে গলায় বলল, একটু ব্র্যাণ্ডি দাও।

একটুও প্রতিবাদ করল না রেমি। উঠে কাঁদতে কাঁদতে, ফোঁপাতে ফোঁপাতেই আলমারি থেকে ব্র্যাণ্ডির বোতল বের করে গলাসে ঢেলে জল মিশিয়ে ধুবর হাঁ করা মুখে একটু একটু করে ঢেলে দিতে লাগল যত্ন করে। জীবনে এই প্রথম স্বামীকে মদ খাওয়াচ্ছে সে। তবে মদ হিসেবে নয়।

ধুব গিলতে পারছিল না। গিলতে গিয়ে একবার বিষম খেল। পরের বার কম বেয়ে গড়িয়ে পড়ে গেল অনেকটা। ফিসফিস করে বলল, পারছি না

রেমি ওর বুকে হাত বুলিয়ে দিতে লাগল সম্মেহে। জিজ্ঞেস করল, কষ্ট হচ্ছে ?

ধুব মাথা নেড়ে সেইরকম ফিসফিসে গলায় বলে, না। তেমন কিছু নয়।

আমি ডাক্তারকে খবর দেবো।

না রেমি। ওসব কোরো না। কেউ যেন জানতে না পারে। একটা মাফলার বের করে আনো।

রেমি আনল।

ধুব বলল, গলাটা ঢেকে দাও।

কেন গো ?

দাও না।

তোমার কেমন লাগছে সত্যি করে বলো।

ভাল গলাটায় একটু অস্বস্তি। ওটা কেটে যাবে।

ঠিক করে বলো।

ঠিকই বলছি রেমি। শোনো, কাউকে কিছু বোলো না। ডাক্তার ডেকো না।

রেমি বুঝল, ধুব তাকেই বাঁচাতে চাইছে। আর কিছু নয়।

সেই রাতটা ধুব খুব কাশল। গলাটা একটু ফুলে উঠেছিল লাল হয়ে। আর তেমন কিছু হল না। পরদিন ধুবকে খুবই স্বাভাবিক দেখাচ্ছিল। সারা রাত রেমি এক সেকেণ্ডও ঘুমোয়নি। চিত্রাপিতের মতো বসে ধুবর মুখখানার দিকে চেয়ে থেকেছে অপলকে। সারা রাত ধরে সে নিজেকে প্রসন্ন করেছে, কেন এই লোকটিকে ছাড়া আমি আর কিছু ভাবতে পারি না ? কেন এই মানুষটিকে আমি কিছুতেই অস্বীকার করতে পারি না ! এই মাতাল খুনী নিষ্ঠুর, উদাসীন ও অপ্রকৃতিস্থ লোকটা কোন যাদু বলে আমাকে দখল করে আছে ?

এ এক রহস্য। এক অদ্ভুত জটিল রহস্য। ধুবর ওপর যেরকম প্রচণ্ড রাগ ও ঘৃণা ক্ষণিকের জন্য পাগল করে তুলেছিল তাকে, তেমন ঘটনাটা ঘটে যাওয়ার পর বুক ভাসিয়ে এল করুণা মায়া গভীর এক ভালবাসা। সেই দুকূল ছাপানো ভালবাসায় বয়ঃসন্ধির প্রথম প্রেমের মতো উন্মন চঞ্চল হল রেমি। কিন্তু হায় ! যাকে নিয়ে তার এই ভালবাসা সেই অপ্রকৃতিস্থ পুরুষ আবার ঐটে দিল তার অভ্যস্তরের কপাট। রেমিকে যেন চেনেই না।

পরদিন গলায় মাফলার জড়িয়েই অফিসে বেরোলো ধুব। গভীর রাতে ফিরল মাতাল হয়ে।

দুদিন পর চলে গেল ব্যাঙ্গালোর অফিসের কাজে । রওনা হওয়ার আগে রেমি বলল, আমাকে নিয়ে যাও । কলকাতা বড় একঘেয়ে লাগছে ।

আরে দূর ! আমি যাচ্ছি হারিকেন টুরে । কাজ নিয়ে ব্যস্ত থাকব । তোমার কি আর হোটেলের একা একা বসে থাকতে ভাল লাগবে ?

তবু তো চেঞ্জ !

আচ্ছা, পরের বার হবে ।

আমাকে অ্যাভয়েড করছ ।

ধুব একটু কাঁচুমাচু হয়ে বলে, ঠিক তা নয় । তবে অনেক ঝামেলা আছে । আমরা ইচ্ছেমতো বউ নিয়ে বেড়াতে যেতে পারি না । স্বশ্রমের পারমিশন নিতে হবে তোমাকে ।

নিতে হলে নেবো ।

উনি দেবেন না ।

কেন দেবেন না ?

উনি আমাকে বিশ্বাস করেন না । দারজিলিং-এ আমি কী কাণ্ড করেছিলাম মনে নেই ?

মদ খাবে, এই তো ? সে আমার অভ্যাস হয়ে গেছে ।

আর যদি ফের মারপিট লাগে ?

তাহলেও তো আমার সঙ্গে থাকা দরকার । তোমাকে দেখবে কে ?

প্লীজ রেমি, চাপাচাপি কোরো না ।

আমার সঙ্গ তোমার ভাল লাগে না ?

ধুব একটু হেসে বলল, কথাটা মিথোও নয় । তোমার সঙ্গ বলে কথা নেই, আসলে আমি মেয়েদের বেশীক্ষণ সহ্য করতে পারি না ।

কেন পারো না ?

রেগে যেও না । গার্লস আর এ অফুল লট । তাদের এতরকম প্রবলেম থাকে ।

আমি তোমাকে কখনো কোনো প্রবলেমের কথা বলি ?

না । তবে তুমি নিজেকেই একটি জ্যান্ত প্রবলেম ।

কিরকম ?

ধুব হাতঘড়ি দেখে বলল, অত সময় নেই রেমি । এ নিয়ে পরে কথা হবে ।

রেমি দৃঢ়তার সঙ্গে বলে, তুমি অনেক কথাই শুরু করো, কিন্তু শেষ করো না । মেয়েদের যদি তুমি অতই অপছন্দ করো তাহলে বিয়ে করেছিলে কেন ?

এ কথার একটা পেটেন্ট জবাব আছে ধুবর । সে বলে, বিয়ে আমি করিনি, বিয়ে আমাকে করানো হয়েছে । আমি মস্ত্রও উচ্চারণ করিনি বিয়ের সময় । কিন্তু আজ ধুব সে জবাব দিল না । বরং মুখে একটা অবাক ভাব ফুটিয়ে বলল, আমি বিয়ে না করলে তোমার বিয়ে হত কার সঙ্গে ?

রেমি বলল, অনেক ভাল ছেলে ছিল । অনেক ব্রাইট, লাভিং, ব্রডহারটেড পাত্র জুটতে পারত ।

তাই নাকি ? তাহলে ম্যারেজেস আর মেড ইন হেভেন কথাটা সত্যি নয় বলছো ?

মোটাই নয় ।

আমার তো মনে হয় বিয়েটা বাস্তবিকই ভবিতব্য । আমি ছাড়া তোমার গতি ছিল না ।

না, মোটেই না । আমি এ বিয়ে মানি না ।

ধুব বড় বড় চোখে রেমির বিদ্রোহী চেহারাটার দিকে চেয়ে রইল । তারপর বলল, সাব্বাস ! এই তো চাই ।

তার মানে ? ইয়ার্কি করছো নাকি ?

ধুব দুহাত রেমির কাঁধে রেখে বলে, না রেমি, একটুও ইয়ার্কি নয় । শোনো, আমি বাস্তবিকই

তোমাকে বিয়ে করিনি। অন্তত স্বেচ্ছায় নয়। তুমি কি আমাকে স্বেচ্ছায় বিয়ে করেছো ?  
রেমির চোখ ফেটে জল আসছিল। ফুঁসে উঠে বলল, তোমাকে চিনলে কখনো স্বেচ্ছায় বিয়ে করতাম না।

তোমার কোনো লাভার ছিল না ?

না। কিন্তু তাতে কী ?

ছিল। বলবে না। ঠিক আছে, শুনতে চাই না। তবে আমার মনে হয়, তোমার মতো সুন্দরী মেয়েদের লাভার না থাকাটাই অস্বাভাবিক।

রেমি ছটিকে সরে গিয়ে বলল, ছোটোলোক ! ছুঁয়ো না আমাকে। তুমি ছুঁলে আমার ঘেন্না করে।

ধুব হাসল, উদার গলায় বলল, আরে সিস্টার খুব রেগে যাচ্ছে। সেন্টুতে সুড়সুড়ি দেওয়ার জন্য কথাটা বলিনি মাইরি। আমি বলতে চাই, সত্যিই যদি কোনো লাভার থেকে থাকে তবে তার কাছেই তোমার ফিরে যাওয়া উচিত।

মুখে এল কথাটা তোমার ? বলতে জিব সরল ? ছিঃ

আঃ, মাইরি ! ফের তুমি সেন্টু হয়ে যাচ্ছে। কিন্তু আদত কথাটা যদি বুঝতে ! তুমি কি জানো না বা এতদিনেও টের পাওনি যে, কৃষ্ণকান্তর বখে যাওয়া এক ছেলেকে আবার লাইনে আনার জন্য তোমার মতো একটি সুন্দরী মেয়েকে ভারচুয়ালি উৎসর্গ করা হয়েছে ! ঠিক যেভাবে পাঁঠা বলি দেয় পারছো বুঝতে ?

রেমির নাকের পাটা ফুলে ফুলে উঠছিল রাগে বলল, হ্যাঁ। এখন আমার তাই মনে হয়। তোমার মতো একজন লম্পট মাতালের সঙ্গে আমার বিয়ে দেওয়ার পিছনে হয়তো ওইটাই কারণ।

তাহলে ? বলে ধুব খুব বিস্তারিত মতো হাসল, এই বিয়ের বিরুদ্ধে কি তোমার বিদ্রোহ করা উচিত নয় রেমি ? উচিত নয় কি আদালতে গিয়ে আইনের আশ্রয় নেওয়া ! বলো !

উচিত। নিশ্চয়ই উচিত।

তাহলে তাই করো রেমি। ভাঙো, ভাঙো এই পরিবারের ভিত। কুসংস্কারাচ্ছন্ন প্রাচীনপন্থী, প্রগতিবিরোধী, সংকীর্ণমনা, মতলববাজ ও কায়েমী স্বার্থের এই বাস্তবঘূষুর প্রতিষ্ঠানটিকে উড়িয়ে দাও। পাবলিকলি অপমান করো কৃষ্ণকান্ত চৌধুরিকে। লম্পট ধুব চৌধুরির মুখোশ খুলে দাও। কেন চুপ করে মেনে নিচ্ছে সব কিছু ? এই পারিবারিক প্রতিষ্ঠানটির ভিত ভেঙে স্বাধীন ও মুক্ত হয়ে চলে যাও নিজের সত্যিকারের প্রেমিকের কাছে। জয়ী হও, মুক্ত হও, ঘৃণা করো আমাদের।

অভিনয় ! পুরোটাই অভিনয় ! কিন্তু তবু কী চমৎকার অভিনয় ! ধুব রওনা হয়ে যাওয়ার একঘণ্টা বাদে রেমি বিছানায় বসে আনমনে আঙুল দিয়ে বিছানায় আঁকিবুকি করতে করতে আপনমনে হাসছিল, পাগল ! একটা পাগল !

ফুল ফুটলে পতঙ্গ আসেই। সেই অর্থে রেমিরও কি প্রেমিক ছিল না দু একজন ? ছিল। দাদার বন্ধু মানিকদা। দারুণ চেহারা, ইনজিনিয়ার। সন্তু নামে পাড়ার একটি বেকার ছেলে। দায়ে দফায় এসে সব সময় হাজির হত। একজন অধ্যাপক ছিলেন চিন্ময় সান্যাল নামে। চমৎকার মানুষ। একটু নরম হয়ে পড়েছিলেন তার প্রতি। রাস্তায় ঘাটে কতবার সপ্রশংস বা লোভী চোখ তাকে অনুসরণ করেছে। কিন্তু প্রেম করার অবকাশ ঠিক পায়নি সে। বড্ড অল্প বয়সে বিয়ে হয়ে গেল। তবে আজ তার মনে হয়, পৃথিবীর আর কোনো পুরুষ নয়, আর কেউ নয়, একজনকেই তার চাই। পুরোপুরি চাই। যে লোকটা তাকে এত অপমান করে নাকের ডগা দিয়ে ব্যাঙ্গালোর চলে গেল। তার প্রতি যার এত উপেক্ষা। এত উদাসীনতা। ওই পাগলকে সে একদিন বলবে, এসো, বিয়ে ভেঙে দিই। আমি কুমারী হয়ে যাই, তুমিও কৌমার্যে ফিরে যাও। তারপর আমার স্বয়ংবর হোক। কাকে মালা দেবো জানো ? আহাম্মক কোথাকার ? বোঝো না ?

বউমার উড়ু উড়ু ভাবটা ব্যস্ততার মধ্যেও একদিন লক্ষ করেন কৃষ্ণকান্ত। ডেকে বলেন,

দামড়াটা ব্যাঙ্গালোর না কোথায় গেছে যেন !

হ্যাঁ।

তোমাকে চিঠি পত্র দিয়েছে ?

না।

ফোনটোনও করে না ?

না।

চমৎকার। হীরের টুকরো আর কাকে বলে। কোন হোটেলে আছে তাও বোধহয় জানো না ?

রেমি মাথা নেড়ে বলে, না। বলে যায়নি।

দিন সাতেক হল বোধহয় !

তা হয়েছে।

কৃষ্ণকান্ত একটা দীর্ঘশ্বাস ছেড়ে বলেন, এবার থেকে যখন বাইরে যাবে তখন ওর হোটেলের নামটা অন্তত জেনে নিও। তোমার মুখ দেখেই মনে হচ্ছে, দামড়াটার জন্য দুশ্চিন্তা করছ। কিন্তু তাতে লাভ নেই। কাল বোধহয় লতু দক্ষিণেশ্বর যাবে। সঙ্গে জগা থাকবে। গাড়ি যাচ্ছে। ওই সঙ্গে তুমিও ঘুরে এসো গে যাও। লতুটা তোমার সঙ্গে মেশেটেশে, না কি নিজের বন্ধুটুকু নিয়েই মত্ত থাকে ?

প্রশ্নটা খুবই প্রাসঙ্গিক। রেমির ননদ লতু বউদিকে প্রচণ্ড ভালবাসে বটে, কিন্তু তার কলেজ এবং বাইরের জগৎটা বড্ড বেশী বড়। তাছাড়া এই বয়সেই সে নানারকম সোশ্যাল ওয়ার্ক করে বেড়ায়। ফলে বউদির জন্য তার দেওয়ার মতো সময় থাকে না। একজন ভাসুর ও একটি দেওর আছে রেমির। তারা প্রায় না থাকার মতোই। ভাসুর দেবাদুন মিলিটারি স্কুল থেকে পাশ করে এখন সামরিক বাহিনীর উঁচু পোস্টে বসে আছে পুনায়ে। বিয়ের পর তাকে এক আধবার দেখেছে রেমি। অবাঙালীর মতো চেহারা। লম্বা চওড়া। একজন ডিভোর্সী মারাঠী ভদ্রমহিলাকে বিয়ে করার পর থেকেই এ বাড়ির সঙ্গে তার সম্পর্ক একরকম চুকে গেছে। তার নামও কেউ উচ্চারণ করে না। দেওর ইনজিনিয়ারিং পড়ছে কলিকতে। বড় একটা আসে না। এলেও বউদির সঙ্গে খুব একটা কথা টথা বলে না। লজ্জা পায় বোধ হয়। সুতরাং এ বাড়িতে রেমি একরকম একা।

একা যেমন, তেমনি আবার একচ্ছত্র আধিপত্যও তার। কৃষ্ণকান্ত ইদানীং তার হাতেই সংসার খরচের টাকা পয়সা দিচ্ছেন। ক্ষমতায় অধিষ্ঠিত করছেন তাকে। স্বামীর কাছ থেকে যা সে পায় না তার সেই শূন্যতাকে পূরণ করার এ এক অক্ষম চেষ্টা।

রেমি পরদিন দক্ষিণেশ্বর গেল না। কেন যাবে ? তার তো বেড়াতে ইচ্ছে করে না একা একা। একা ছাড়া কী ? লতু, জগাদা এরা থাকলেও তার একাকিত্ব ঘোচে না কিছুতেই।

পেটের বাচ্চাটা যদি থাকত তাহলে হয়ত এত একা লাগত না। শরীরের মধ্যে আর একটা শরীর। তার প্রাণস্পন্দন টের পেত রেমি। তাকে নিয়ে স্বপ্ন দেখত। ধুবর অভাব তাতেই পূরণ হয়ে যেত অনেকটা।

কেন মারল ধুব ? কেন ? ধুবর কাছ থেকে সত্যিকারের জবাবটা আজও পায়নি রেমি। কেন বাচ্চা হবে শুনে সাদা হয়ে গিয়েছিল ওর মুখ ? কোথায় বাধা ছিল ?

দশদিন বাদে ধুব ফিরল। হাল্কাশু চিমসে চেহারা হয়ে গেছে। ট্যাকসি থেকে নেমেই রেমিকে বলল, শীগগীর ভাত খাওয়াও। দশদিন প্রায় আধপেটা খেয়ে ছিলাম।

তখন অবেলা। বিকেলের ফ্লাইটে ধুব ফিরেছে। তবু প্রশ্ন না করে আগে খাওয়ার ব্যবস্থা করে দিল রেমি। পুরুষমানুষ বড় একটা খিদে সহ্য করতে পারে না।

খাওয়ার টেবিলে মুখোমুখি বসে রেমি জিজ্ঞেস করল, রোগা হয়ে গেছ কেন ?

ধুব ফিচেল হেসে বলল, বিরহে।



বিরহ কেমন তা তুমি জানো ?

আহা তোমার বিরহে নয় ।

তবে কার বিরহে ?

বিরহ ফর ফুড । দক্ষিণ ভারতের খাবার সহ্য হচ্ছিল না ।

রেমি একটা দীর্ঘশ্বাস ফেলে বলল, তাই বলো ।

ধুব চোখের কোণা দিয়ে তাকে একবার দেখে নিয়ে বলল, তোমার শরীরটা তো তেমন কৃশ দেখছি না ।

দেখবে কেন ? কৃশ তো হইনি ।

অথচ হওয়ার কথা

কেন, হওয়ার কথা কেন ?

রওনা হওয়ার সময় মনে হচ্ছিল তুমি খুব বিরহ ফিল করছ ।

মোটাই নয় ।

একদম করো নি ?

না । বিরহটা একতরফা তো হয় না ।

দূর মাইরি ! তুমি একদম উলটপুরাণ । বিরহ চিরকালই একতরফা ।

তাই নাকি ?

কেষ্টর জন্য রাধা যত কঁদেছিল তার টুয়েন্টিফাইভ পারসেন্টও কেষ্ট কঁাদেনি ।

তোমার সেই টুয়েন্টিফাইভ পারসেন্টও বোধহয় নেই ।

না । তবে তোমার জন্য আমি ফিল করি ।

সেটা কিরকম ?

একটা বাজে লোকের জন্য তোমাকে অনেক স্যাক্রিফাইস করতে হচ্ছে ।

তা হচ্ছে ।

আমি সেটা ফিল করি ।

শুধু ফিল করলেই হবে ? তোমার কিছু করার নেই ?

ধুব মাথা নেড়ে বলে, আমার নেই । কিন্তু তোমার আছে ।

কী করব ?

ওই যে বলেছিলাম, এ বাড়ির ভিত নাড়িয়ে দাও । ভাঙো আগুন জ্বালো ।

এ বাড়ির ওপর তোমার এত রাগ কেন ?

রাগ তোমারও হওয়ার কথা ম্যাডাম ।

কেন তা আগে বলো ।

এরা ভণ্ড, অহংকারী, রক্তের বিশুদ্ধতায় বিশ্বাসী ।

তাই নাকি ?

ধুব মাথা নেড়ে বলে, কেন, তুমি কি জানো না ?

কী জানবো ?

বুদ্ধি থাকলে বুঝতে পারতে ।

আমার বুদ্ধি নেই । বুঝিয়ে দাও ।

নির্বোধদের মাথায় কোনো ফ্যানটাস্টিক আইডিয়া ঢোকাতে নেই রেমি । তাতে সে স্কেপে উঠে যাচ্ছেতাই কাণ্ড করে বসতে পারে ।

আমি কি ততটাই নির্বোধ ?

তা কে জানে ! তুমি নিজেই তো নিজেকে নির্বোধ বললে ।

তুমি আমাকে একটা কিছু বলতে চাইছো। কিন্তু পারছো না। কেন বলো তো ?  
 আমার কিছু বলার নেই।  
 আছে। আমি জানি।  
 ওসব এখন বাদ দাও। আমি টায়ার্ড অ্যাণ্ড হাংরি।  
 ঠিক আছে। পরে বোলো। আমি অপেক্ষা করব।  
 ধুব অবাক হয়ে বলল, মনে হচ্ছে, তোমারও কিছু বলার আছে !  
 আছে। আমি তোমাদের রক্তের বিশুদ্ধতা সম্পর্কে কিছু জানতে চাই।  
 ধুব একটু স্নান হেসে বলল, ব্লাড ইজ এ স্টেজ থিং।

॥ ২৩ ॥

গভীর রাত্রি পর্যন্ত হেমকান্তের ঘুম হল না। মাথায় খিকি খিকি অঙ্গার জ্বলছে। আত্মধিকার ও চারিদিককার কলুষিত পরিবেশের ওপর ঘৃণা তাঁকে আজ পাগলের মত করে তুলেছে।

কোন রক্ত দিয়ে নিয়তি আসে তা মানুষের অনুমান করা অসাধ্য। তাঁর ক্ষেত্রে সেই নিয়তি এল শশিভূষণের রূপ ধরে অনুকম্পার রক্ত দিয়ে। তিনি শশিভূষণকে ধরিয়ে দিতে পারতেন বটে, কিন্তু ও কথাটাই তাঁর মনে কখনো উদয় হয়নি। নিজের গাঁটের কড়ি দিয়ে তার চিকিৎসা করিয়েছিলেন। এখন তার ফল ভোগ করতে হবে। লোকে কারও সম্পর্কে ভাল কথা শুনলে গা করে না, কিন্তু মন্দ কথা শুনলে তৎক্ষণাৎ তা বিশ্বাস করে। লোকচরিত্র সম্পর্কে হেমকান্তের জ্ঞান সীমাবদ্ধ বটে, কিন্তু তিনি যেটুকু জানেন সেটুকুই বিস্ময়।

শীতের প্রকোপ অনেকটাই কমে গেছে। আজকাল কোকিল ডাকে। শিমূলের গাছে ফুল এল।

উত্তরের ব্যালকনিতে এসে দাঁড়ান হেমকান্ত। প্রকৃতি শান্ত, ও সীমাহীন। নির্মেষ আকাশ থেকে দেবতাদের লক্ষ লক্ষ চোখ নক্ষত্রের আলেয় তাঁকে নিরীক্ষণ করে। হতোদ্যম হেমকান্ত উর্ধ্বমুখে কিছুক্ষণ চেয়ে থাকেন আকাশের দিকে। তাঁর বুক থেকে উর্ধ্বধাবিত হয় পৃথ্বীভূত অভিমান, আমি কী করেছি ? কেন এই কলঙ্ক ? ভগবান !

অনেকক্ষণ নীরবে দাঁড়িয়ে থাকেন তিনি। মাথার চুলে এলোমেলো হাওয়া এসে লাগে। চোখ জ্বালা করে এবং জল আসে।

ঘর থেকে একটা ভারী চেয়ার টেনে আনেন তিনি। বসেন এবং বসেই থাকেন। মানুষের সমাজকে তিনি কোনোদিন ভাল চোখে দেখেননি। কিন্তু এতদিন সেই সমাজ তাঁকে নিয়ে তেমন কথাও বলেনি। তিনি একাচোরা মানুষ, ঘটনাবিহীন। রঙ্গময়ীর সঙ্গে তাঁকে জড়িয়ে একটা রটনা আছে বটে, কিন্তু সেটা তাকে ততটা স্পর্শ করেনি। ইচ্ছে করলে রঙ্গময়ীকে বিয়ে করে আজও তিনি সেই রটনা বন্ধ করতে পারেন। কাজটা এমনিতে শক্ত হলেও অসম্ভব নয়। কিন্তু শশিভূষণকে নিয়ে যে রটনা তা অন্যরকম। তা দেশদ্রোহিতা, বিশ্বাসঘাতকতা, মিরজাফরের কত দয়িতা বা শয্যাসঙ্গিনী ছিল তা নিয়ে ইতিহাস মাথা ঘামায় না, কিন্তু দেশদ্রোহিতার কথা আগুনের অক্ষরে লেখা থাকে।

হেমকান্ত চেয়ারে মাথা হেলিয়ে চোখ বুজলেন।

সকালে তাঁকে জাগাল সূর্যের আলো আর পাখির ডাক। হু হু শব্দে কোকিল ডাকছে আজ। হেমকান্ত টের পেলেন, খোলা আকাশের নীচে রাত কাটানোর ফলে তাঁর গলা খুশখুশ করছে। মাথায় কিছু যন্ত্রণাও টের পান তিনি। একটু শ্বাসকষ্ট হচ্ছে।

নিস্তেজ শরীরে উঠে তিনি প্রাতঃকৃত্য সারলেন। তারপর কাউকে কিছু না জানিয়ে কোচোয়ানকে গাড়ি ঠিক করতে হুকুম পাঠালেন। পোশাক পরে গাড়িতে উঠে বললেন, সোজা থানায় চল। রামকান্ত রায় থানার হাতার মধ্যেই থাকেন। খবর পেয়ে বেরিয়ে এসে বললেন, আরে আসুন ! আসুন !

হেমকান্তকে প্রায় হাত ধরেই নিয়ে গিয়ে বসালেন বাইরের ঘরে ।

হেমকান্ত বিনা ভূমিকায় বললেন, আমি একটু শশিভূষণের সঙ্গে দেখা করতে চাই ।

রামকান্ত রায় হুঁ কঁচাকে বললেন, কেন বলুন তো ।

তাকে আমার একটা কথা জিজ্ঞেস করার আছে ।

কী কথা ?

সেটা তাকে ছাড়া অন্য কাউকে বলা যাবে না ।

আপনি খুব উত্তেজিত মনে হচ্ছে ।

তা ঠিক । আমার মনটা ভারী অস্থির ।

রামকান্ত রায় একটা শ্বাস ফেলে বলেন, হওয়ারই কথা । শশিভূষণ ধরা পড়ুক এটা তো আপনি চাননি !

হেমকান্ত সরল ভাবেই বলেন, না, চাইনি ।

কেন ? হঠাৎ ধমকের মতো শোনায় রামকান্তের গলা ।

হেমকান্ত তটস্থ হয়ে বলেন, কেনই বা চাইব ?

আপনি কি স্বদেশীদের প্রতি সিমপ্যাথী পোষণ করেন ?

না তো ! তা কেন ?

আপনার অস্থিরতা দেখে তো তাই মনে হয় হেমকান্তবাবু ।

হেমকান্ত ভাবাচাচাকা খেয়ে বলেন, বিশ্বাস করুন, আমি কিছুই জানতাম না ।

রামকান্তের মুখের কুটিলতা তবু সরল হল না । ধমকের স্বরটা বজায় রেখেই বললেন, ঘটনাটা আপনি যেভাবে চাপা দেওয়ার চেষ্টা করছেন সেটা ছেলেমানুষী । আমাদের চোখ কান মগজ তো আর কারও কাছে বাঁধা দিইনি । একজন মারাত্মক অপরাধীকে আপনি যেভাবে আড়াল করে রেখেছিলেন তা মোটেই ভাল ব্যাপার নয় । তবু আমি আপনাকে বাঁচানোর একটা চেষ্টা করেছিলাম । কিন্তু আপনি আজও সেই স্টেটমেন্টটা দেননি ।

হেমকান্তকে আজ যেন জুজুবুড়ির ভয় পেয়ে বসেছে । একজন তিন পয়সার দারোগা তাঁকে চোখ রাঙাচ্ছে তবু তিনি কেমন যেন আঁকুপাকু করছেন ভিতরে ভিতরে । তেতে উঠছেন না, ফেটে পড়ছেন না । মিন মিন করেই বললেন, স্টেটমেন্ট তৈরি হচ্ছে । কিন্তু বিশ্বাস করুন, আমি কিছু জানতাম না ।

আপনি না জানলেও কেউ তো জানত ! কারও মাথা থেকে তো প্ল্যানটা বেরিয়েছিল !

হতভঙ্গের মতো চেয়ে থাকেন হেমকান্ত ।

রামকান্ত নিজের হাতের প্রকাণ্ড চেটেটোর দিকে চেয়ে ভুকুটি করে বললেন, আপনি নিশ্চিত থাকুন, গর্তের সব সাপ আমি টেনে বার করবই । ওই মেয়েটা, রঙ্গময়ী, ও কেমন মেয়ে ?

ভাল ! খুব ভাল ।

আপনার কাছে ভাল হলেই তো হবে না । সে যে ভাল এমন কোনো প্রমাণ নেই । শশিভূষণকে সে যে বাঁচানোর চেষ্টা করেছিল তার যথেষ্ট প্রমাণ আছে ।

রঙ্গময়ী জানত না ।

রামকান্তের গলায় বাজ ডাকল, আলবাৎ জানত । তাকে অ্যারেস্ট করে থানায় আনলেই সব কথা কবুল করবে ।

হেমকান্ত নিজের শরীরে একটা শীতলতা টের পান । একটা কাঁপুনি ধরেছে তাঁকে । দাঁতে দাঁতে ঠকঠক শব্দ হল একটু । জ্বর আসছে ? হবে ? শরীরটা আজ বশে নেই । বললেন, ওকে ধরে আনবেন ?

আনাই তো উচিত ।

রঙ্গময়ীকে ? যেন বুঝতে পারছেন না এমন ভাবলার মতো বলেন হেমকান্ত ।

রামকান্তর গলা কিছু নরম হল । বললেন, অন্য কোনো উপায় নেই । তবে আপনি যাতে নিজেকে বাঁচাতে পারেন আমি সেই পথ খোলা রেখেছি । এখনো রেখেছি । আপনি যদি সুযোগটা না নেন তবে বাধ্য হয়ে আমাকে আইনমতো ব্যবস্থা নিতে হবে ।

হেমকান্ত নিশ্চুপ বসে রইলেন । লোকে জানে, তিনি শশিভূষণকে ধরিয়ে দিয়েছেন । পুলিশের বিশ্বাস, তিনি শশিভূষণকে বাঁচানোর চেষ্টা করেছিলেন । বড় অদ্ভুত অবস্থা ।

হেমকান্ত একটা দীর্ঘশ্বাস ফেললেন । লোকের সঙ্গে তিনি কখনো ঝগড়া বা তর্ক করেননি । কী করে যুক্তি প্রয়োগ করতে হয় তাও তাঁর অজানা । তার ওপর এক আতঙ্কে তাঁর মন ও মাথা ছেয়ে আছে ।

রামকান্ত বললেন, শশিভূষণের সঙ্গে দেখা করতে চান কেন ?

একটু দরকার ছিল । কোনো অসুবিধে আছে ?

হাসপাতাল থেকে এনে তাকে এখনো থানার হাজতেই রাখা হয়েছে । অসুবিধে আছে বৈকি । তবে আপনার জন্য ব্যবস্থা করে দিতে পারি ।

খুব ভাল হয় তাহলে ।

আসুন, বলে রামকান্ত উঠলেন । থানার দিকে হাঁটতে হাঁটতে বললেন, রঙ্গময়ী আপনার কে হন ? কোনো আত্মীয়া নয় তো ?

ঠিক তা নয় ।

মেয়েটির প্রতি লক্ষ রাখবেন । ওর আকর্ষণিভিটি যথেষ্ট সন্দেহজনক ।

রঙ্গময়ী কী করেছে

সে আপনিও নিশ্চয়ই জানেন ।

হেমকান্ত ভয় খেয়ে চুপ করে গেলেন । বেফাঁস কোনো কথা যদি বেরিয়ে যায় !

প্রথম দর্শনেই বোঝা গেল যে, শশিভূষণ বড় একটা যত্নে নেই । খুব রোগা হয়ে গেছে । সুকুমার মুখশ্রীতে একটা হাড় উঁচু লাভগ্যহীনতা । গালের কোমল দাড়ি রুক্ষ । চুল পিঙ্গল । মোটা কন্ডলে গা ঢেকে বিছানায় বসে ছিল ।

হেমকান্তকে দেখে হঠাৎ চিনতে পারল না । না চেনারই কথা । মাত্র একবারই পরস্পর দেখা হয়েছিল । তারপর জল ঘোলা হয়েছে কিছু কম নয় ।

হেমকান্ত আত্মপরিচয় দিতেই কিন্তু শশিভূষণের মুখ ভীষণ খুশিতে উজ্জ্বল হয়ে উঠল । তাড়াতাড়ি উঠে এল বিছানা থেকে । আশ্চর্যের কথা, নীচু হয়ে গরাদের ফাঁক দিয়ে হাত বাড়িয়ে সে হেমকান্তর পায়ের খুলো নেওয়ারও চেষ্টা করল ।

হেমকান্ত পিছিয়ে গিয়ে বললেন, থাক থাক । তাঁর মনে হল, এরকম তেজী ও প্রাণভয়হীন যুবকের প্রণাম নেওয়াটা তাঁর পক্ষে পাপ হবে ।

সাগ্রহে শশিভূষণ জিজ্ঞেস করল, বাড়ির সবাই কেমন আছেন ?

ভাল ।

রঙ্গমাসী ভাল ?

হ্যাঁ । তোমার জন্য খুব দুশ্চিন্তা করছে ।

ওঁকে বলবেন, আমি ভাল আছি ।

বলব । কিন্তু তুমি সত্যিই কেমন আছো ?

শশিভূষণ হাসল । বলল, এখনো খারাপ কিছু লাগছে না ।

এখানকার খাওয়া দাওয়া ?

জঘন্য, তবে আমার ওসব অভ্যাস আছে ।

মারধোর করে না তো !

না না । এখনো ওগুলো শুরু হয়নি । শুনছি বরিশালে চালান দেবে । তখন কী হয় বলতে পারি না ।

তোমার বাড়িতে একটা খবর দেবো ?

শশিভূষণ আবার শুকনো ঠোঁটে হাসে । ঠোঁট দুটো চড়চড়ে শুকনো । মামড়ি এবং রক্ত শুকিয়ে আছে । কষ্টেই হাসতে হয় । বলল, ওসব পুলিশ নিজের গরজেই করবে । আপনি ভাববেন না ।

শোনো শশী, আমি তোমার জন্য উকিল লাগিয়েছি । তুমি তাকে যথাসাধ্য সাহায্য করো ।

শশিভূষণ অবাক হয়ে বলে, আপনি উকিল লাগালেন কেন ?

এমনি । তুমি আমার অতিথি ছিলে । পুলিশ তোমাকে সেই অবস্থায় ধরে এনেছে । আমার মনে হল তোমার জন্য কিছু করা আমার আতিথেয়তা হিসেবেই কর্তব্য ।

শশী স্নান হেসে বলল, যথেষ্টই করেছেন । রঙ্গমাসী দিনরাত আমার সেবা করেছেন । কয়েকদিন আরামের আশ্রয় জুটেছিল । আর কী চাই ?

ওটুকু কিছুই নয় । তুমি তার চেয়ে ঢের বেশী কষ্ট করেছো । দেশের লোকের জনাই করেছে । তোমার জন্য কিছু করতে পারলে আমার নিজেরই ভাল লাগবে ।

শশী বলল, উকিল আমার বাবাও নিশ্চয়ই দেবেন ।

তা তো জানি । তবে অধিকন্তু ন দোষায় । ভাল কথা, তুমি তোমার বাড়ির যে ঠিকানাটা দিয়েছিলে সেটা কি যথার্থ ?

শশিভূষণ লজ্জার হাসি হেসে বলে, না । সত্যি ঠিকানা দেওয়ার নিয়ম নেই

তোমার বাবা কী করেন ?

ব্যবসা ।

তোমরা কি ধনী ?

ধনী না হলেও বাবার অবস্থা খারাপ নয় ।

তাহলে তুমি আদরেই মানুষ হয়েছো !

তা হয়েছি ।

এখন যে এত কষ্ট তা সইছো কী করে ?

মনটাকে শক্ত করে ফেললে আর কষ্ট থাকে না ।

মনকে শক্ত করা কি সহজ কাজ শশী ?

তা নয় । খুব শক্ত কাজ । তবে অভ্যাস করে নিতে হয়েছিল ।

তোমার এত কম বয়স, এত অভ্যাস করার সময় পেলে কবে ?

শশিভূষণ একটু হাসল মাত্র ।

হেমকান্ত গলা খাঁকারি দিলেন । শরীরটা ভাল নেই । মাথা ঝিমঝিম করছে । গায়ে জ্বরের সঞ্চার টের পাচ্ছেন । প্রবল শীত করছে । গরাদটা শক্ত করে চেপে ধরে বললেন, একটা কথা বলুন । সসন্ত্রমে শশী বলে ।

লোকে বলছে আমিই নাকি তোমাকে পুলিশে ধরিয়ে দিয়েছি ।

আপনি ! শশী আকাশ থেকে পড়ে ।

লোকে তাই ভাবছে । একটা প্রচারও হচ্ছে ।

কে একথা রটাল ?

তা বলা শক্ত । তবে রটেছে । কথাটা কি তুমি বিশ্বাস করো ?

শশী হতভম্বের মতো চেয়ে থেকে বলে, আপনি আমাকে ধরিয়ে দেবেন একথা কি বিশ্বাসযোগ্য ?

তুমি বিশ্বাস করো না তো !

ওরকম কথা আমি স্বপ্নেও ভাবতে পারি না । রঙ্গমাসীর কাছে আপনার কথা কত শুনেছি !

আমার কথা ! মনু মানে রঙ্গময়ী তোমাকে আমার কথা বলত নাকি ?

বলত মানে ! রঙ্গমাসী শুধু আপনার কথাই তো বলতেন ।

আমার সম্পর্কে এত কী বলার থাকতে পারে তার ?

ও বাবা, সে অনেক আছে । ওঁর কাছে বোধহয় আপনিই ভগবান ।

হেমকান্ত ভীষণ অবাক হয়ে যান । রঙ্গময়ী তাঁর সম্পর্কে ভাল কথা বলে বেড়ায় তাহলে ? কিন্তু কী কথা ?

একবার ইচ্ছে হল জিজ্ঞেস করেন । কিন্তু লজ্জা করতে লাগল । নিজের প্রশংসা অন্যের মুখ থেকে টেনে বের করার প্রবণতা ভাল না ।

হেমকান্ত একটা নিশ্চিন্তের শ্বাস ছেড়ে বলেন, তাহলে তুমি বিশ্বাস করো না ? আমি স্বস্তির শ্বাস ফেললাম ।

কারা এসব বলছে বলুন তো । তাদের চাবকানো দরকার ।

লোকে নিন্দা করতে এবং শুনতে ভালবাসে । প্রায় সকলেই । কজনকে চাবকাবে ? লাভ নেই ।

শশী বলে, বরং পুলিশের ধারণা তো উল্টোই । তারা বলে যে, আপনি আমাকে লুকিয়ে রেখেছিলেন ।

বলে নাকি ?

বলে । রঙ্গমাসীর ওপরে দারোগাবাবুর খুব রাগ ।

জানি হেমকান্ত বিষণ্ণ গলায় বলেন, ওকেও ধরে আনতে চাইছে ।

কথাটা শুনে শশী অবাক হল না । খানিকটা উদাস গলায় বলল, ধরতেই পারে । একদিন রঙ্গমাসী ধরা পড়বেনই উনি ভীষণ বেরোয়া ।

তাই নাকি ? দেখ শশী, ওকে ছেলেবেলা থেকে চিনি বটে, কিন্তু কী যে ওর চরিত্র তা আজও ভাল বুঝলাম না অদ্ভুত মেয়ে ।

শশী মাথা নাড়ল তারপর বলল, কৃষ্ণ কেমন আছে ?

ভালই । তোমার খুব ভক্ত হয়ে উঠেছিল কয়দিনে ! তাই না ?

হ্যাঁ খুব স্পিরিটেড ছেলে আপনার ।

হেমকান্ত আবার দীর্ঘশ্বাস ছাড়েন ! ছেলেকে তিনি ইদানীং একটু কাছে ভিড়তে দিয়েছেন বটে । কিন্তু প্রকৃতপক্ষে কৃষ্ণকান্ত কেমন ছেলে তা তিনি খুব ভাল জানেন না ।

শশী বলল, আপনার বাড়িতে আমার খুব ভাল কেটেছিল । জ্বরটা না হলে আরো ভাল কাটত ।

সব ভাল যার শেষ ভাল । শেষ অবধি আর ভাল কাটল কই তোমার ! ধরা পড়ে গেলে ।

শশী মাথা নেড়ে বলে, ধরা পড়তেই হত । উপায় ছিল না । আমার ওপর কমান্ডারের অরডার ছিল সুইসাইড করার । তা আমি করিনি ।

হেমকান্ত শিউরে উঠলেন ।

শশী আপনমনেই বলল, মার মুখ মনে পড়ায় ভেবেছিলাম, একবার মাকে দেখে নিয়ে তারপর দূরে কোনো নির্জন জায়গায় গিয়ে সুইসাইড করব । যাতে আমার লাশ কেউ খুঁজে না পায় । মা যাতে ধরে নেয়, আমি নিরুদ্দেশ কিন্তু হল না ।

যেতে পারলে না মার কাছে ?

না । অসুবিধে ছিল । কিন্তু সুইসাইডও করা হল না । প্রথম চোটে না করতে পারলে পরে নানারকম দুর্বলতা দেখা দেয় ।

ওসব কথা ভেবো না শশী । আমি ভাল উকিল দিয়েছি । সে তোমাকে খালাস করে আনবে ।

পারবে ? শশী ব্যগ্রভাবে জিজ্ঞেস করে ।

কেন পারবে না ? তাকে সব বোলো ।

শশী ঘাড় নাড়ল । কেমন অন্যমনস্ক দেখাচ্ছিল তাকে । জিব দিয়ে ঠোঁট ভিজিয়ে সে বলল, আপনাদের অনেক কষ্ট দিয়েছি । কিছু মনে করবেন না ।

হেমকান্ত ধীর স্বরে বলেন, তোমার বয়সী এবং তোমার চেয়ে বড় ছেলে আমার আছে । কেউ স্বদেশী করেনি কখনো । কিন্তু এক আধজন যদি করত তবে খুশি হতাম ।

শশী বলল, আপনাদের বংশে তো স্বদেশীর রক্ত আছেই ।

হ্যাঁ । আমার ভাই ছিল ।

শুনেছি । রঙ্গমাসী সব বলেছে ।

হেমকান্ত জ্বরের ঘোরে কাঁপছিলেন । উঠলেন । অশ্রুট স্বরে বললেন, আসি ।

ফেব্রার পথে সারা রাত্তায় হেমকান্ত আচ্ছন্নের মতো এলিয়ে রইলেন । বাড়িতে ফিরে নামতে যাবেন, একটা হাত তাঁকে ধরল ।

মনু ! আমার বড় জ্বর আসছে মনু !

জানি । খারাপ শরীর নিয়ে কোন রাজকার্যে গিয়েছিলে ?

শশীর কাছে ।

কেন ? চলো, ওপরে চলো, এখন আর কথা নয় ।

হেমকান্ত ওপরে উঠতে উঠতে হাঁফিয়ে গেলেন । বড় বড় শ্বাস পড়তে লাগল । বিছানায় শুয়ে এক আচ্ছন্নতার সঙ্গে প্রাণপণ লড়াই করতে করতে বললেন, ও বিশ্বাস করে না ।

কী বিশ্বাস করে না ?

ও গুজবটায় বিশ্বাস করে না ।

কোন গুজব ?

আমি যে ওকে ধরিয়ে দিয়েছি তা ও বিশ্বাস করে না ।

ঠিক আছে । এখন চুপ করে শুয়ে থাকো ।

তুমি ওকে আমার কথা কী লেছো মনু ?

তোমার কথা ! তোমার কথা বলতে যাবো কেন ?

বলেছো ।

রঙ্গময়ী লেপ দিয়ে হেমকান্তকে ঠেসে চেপে ঢাকা দিয়ে বলে, বেশ করেছি বলেছি । বলেছি আমার মাথা আর মুণ্ডু ।

কই আমাকে তো আমার কথা বোলো না !

বলার কিছু নেই বলে ।

আমাকে তো কেবল বকো, ধমকাও ।

বেশ করি ।

মনু, আমি মরে যাবো এবার ? কত জ্বর বোলো তো !

যত জ্বরই হোক, মরণ তোমার কাছে ঘেঁষুক তো একবার ! চুপ করে থাকো । তোমার মনুর শরীরে এখনো প্রাণ আছে ।

॥ ২৪ ॥

রেমি মাথা ঠাণ্ডা রেখে শান্ত গলায় প্রশ্ন করল, বাচ্চাটা যে তোমার নয় এরকম একটা কথা তুমি কি মনে করো ?

ধুব মাথা নাড়ল, কি জানি । হতে পারে ।

আমি জানতে চাই এরকম ধারণা তোমার কেন হল !

ধারণা আমার নয়। আমি আজকাল তলিয়ে কিছু ভাবতেই পারি না।

তাহলে ধারণাটা কার ?

ধুব খাওয়া থামিয়ে পিছনে হেলান দিয়ে খুব অপ্রতিভ মুখে একটু হেসে বলল, এসব নিয়ে আকচাক্যকি কি এখনই করতে হবে ? আমি ড্যাম টায়ার্ড।

টায়ার্ড আমিও। তোমাকে নিয়ে।

আমাকে ছেড়ে দাও না কেন ? তোমার কি কোনো প্রেমিক নেই, আমাকে ছেড়ে দিয়ে যার কাছে ফিরে যেতে পারো ?

না। আমরা সেরকম মানুষ নই।

তোমরা কিরকম মানুষ তাহলে ? সর্বসহা সতী সাধ্বী ? মাইরি, এই সব টাইপ নিয়েই পুরুষদের যত ঝামেলা।

আমি এখনো তেমন ঝামেলা করিনি, কিন্তু করব। কথাটার জবাব দেবে ?

ধুব উঠে বেসিনে আঁচিয়ে এসে বলল, ঘরে চলো।

ঘরে এসে দরজা বন্ধ করে দিল ধুব। তারপর সিগারেট ধরিয়ে বলল, কথাটা বৈফাস বেরিয়ে গিয়েছিল সেদিন। যেতে দাও। আর হবে না।

ওটা কোনো একসপ্লানেশন নয়। কথাটা বেক্সস বেরোয়ওনি। যদি কথাটাই বড় হত তাহলে তুমি আমাকে মিথ্যে বুলিয়ে পেটের বাচ্চাটা নষ্ট করতে না। আরও কিছু আছে।

ধরো, ঠিক এই সময়ে আমি বাচ্চা চাইছিলাম না।

সেটা আমাকে বলতে পারতে। ডিশিশনটা আমরা দুজনে মিলেই নিতাম।

তুমি নিতে পারতে না রেমি। তুমি একটু সেকেন্ড টাইপের।

দেখ, আমার সঙ্গে এখন চালাকি করো না। আমার মন ভাল নেই। আমাকে নিয়ে খেলার পুতুলের মতো যা খুশি অনেক করেছে। ব্যাপারটা শেষ হওয়া দরকার।

ধুব কি একটু ভয় পেল ? হবেওবা। তার মুখচোখে কিছু জলে-পড়া ভাব ফুটে উঠছিল।

ধুব খানিকক্ষণ নীরবে সিগারেট টেনে গেল। তারপর হঠাৎ বলল, ওরকম ধারণার কথা কেউ মুখ ফুটে বলেনি। কিন্তু তবু এবাড়ির বাতাস শুঁকলে কখনো কখনো তুমি মানুষের মনোভাব টের পাবে। অবশ্য খুব সেনসিটিভ নার্ভ থাকা দরকার।

তাই নাকি ? কিন্তু আমি ওসব বুজরুকি শুনেই চাই না। আসল কথাটা বলো।

সেটাই বলার চেষ্টা করছি। ধারণাটা আমার নয়। অন্য কারো। কিন্তু ধারণাটা আমাদের ভিতরে ঠিকই ঢুকিয়ে দেওয়া হয়েছিল। তুমি শিলিগুড়ি গেছ। সমীরও সেখানেই আছে। সমীর এবং তুমি তোমাদের দুজনের মধ্যে কী রিলেশন তা আমি জানি না। ইনটারেসটেডও নই। কিন্তু দেয়ার ইজ এ হামিং অ্যাবাউট ইউ।

ছিঃ ছিঃ !

ব্যাপারটা হয়তো নিতান্তই ছিঃ ছিঃ। কিন্তু আমার কিছু করার ছিল না। শুনেছি তোমার স্বশ্বর সমীরকে কলকাতায় ডেকে পাঠিয়েছিল। জরুরী কাজে। সে আসেনি।

তোমরা এত হীন ?

তুমি আর কতটাই বা জানো ? আমরা তার চেয়েও হীন। সেইজন্যই তোমাকে বলি, এ বাড়ির বনিয়াদ ভাঙতে থাকো। সব মুখোশ খুলে দাও।

আমার বাচ্চাটা যে তোমার নয় এ কথাটা কে প্রথম তোমাকে বলে ?

ধুব অবাক হয়। বলে, কেউ তো বলেনি !

তাহলে ?



বললাম তো, কেউ মুখ ফুটে বলে না। কিন্তু সন্দেহের বীজ বাতাসে ছড়িয়ে দেয়। আর বাতাসেই সব বার্তা সবাই জানতে পেরে যায়।

আমি ওসব বিশ্বাস করি না। কিন্তু শুধু সন্দেহের বশে একটা বাচ্চাকে খুন করা কি মানুষের কাজ না পিশাচের?

পিশাচের। এ ব্যাপারে আমি তোমার সঙ্গে একমত।

যাতে কিছুতেই, কোনো রক্ত পথেই এ পরিবারের রক্তে কোনো কলুষিত রক্ত ঢুকতে না পারে, সেই জন্য?

অবিকল তাই।

রেমির চোখ মুখ অস্বাভাবিক তীক্ষ্ণ আর গনগনে হয়ে উঠছিল। তবে সে ধুবকে আক্রমণ করল না। নিজেকে সামলে নিয়ে বলল, কিন্তু এ ঘটনা আমি ঘটাবো।

কী ঘটাবে?

তোমাদের রক্তের বিশুদ্ধতার শুচিবাই আমাকে ভাঙতেই হবে।

ধুব উদাস গলায় বলে, ভাঙাই উচিত। ভাঙো।

আমি তোমার পারমিশান চাইনি।

চাওনি, তবু আমি দিলাম। এমন কি এ ব্যাপারে আমি তোমার সঙ্গে কো-অপারেটও করতে পারি।

তার মানে?

আমি বলছি, তোমার এই ভেনচারে আমার সায় আছে। আমি হেলপও করতে পারি।

রেমি এই অদ্ভুত ও কিছুত লোকটার দিকে হতবুদ্ধির মতো চেয়ে রইল। তারপর হঠাৎ জিজ্ঞেস করল, তুমি কি বিশ্বাস করো যে, সমীরের সঙ্গে আমার সত্যিই কিছু হতে পারে? এটা কি সম্ভব?

ধুব মৃদুস্বরে বলে, আমার মতামত চাইছো কেন?

তুমি আমার স্বামী, তোমার মতই আমার কাছে সবচেয়ে ইমপোর্ট্যান্ট।

আমি নামকোবাস্তে স্বামী।

সে তো ঠিকই। তবু আমার জানা দরকার, কথটা তুমি বিশ্বাস করো কি না।

ধুব একটু সময় নিল। নিজের নখগুলোর দিকে চেয়ে রইল অনেকক্ষণ। তারপর একটা শ্বাস ফেলে বলল, অনেকক্ষণ ভ্যাজরং ভ্যাজরং করছি। আর ভাল লাগছে না।

বলবে না? কথটা আমার যে জানা জীষণ দরকার।

কেন, আত্মহত্যা-ফত্যা করবে নাকি?

সেটা জানার পর ঠিক করব।

আজকাল এসব আকছার হয়। আত্মহত্যা-ফত্যা করে বোসো না। তাহলে তোমার স্বপ্তরের পলিটিক্যাল ক্যারিয়ার ফিনিশ হয়ে যাবে।

রেমি ঠাণ্ডা মাথাতেই বলে, বেলো।

ধুব মাথা নাড়ল, না করি না।

সত্যি বলছ'?

বলছি।

তাহলে? তাহলে বাচ্চাটা নষ্ট করলে কেন?

বহুৎ জেরা করছ ভাই।

একথাটার জবাব দাও।

শুধু একথার জবাব দিলেই হবে?

হবে।

আমার ধারণা তোমার প্রেগন্যানসি সম্পর্কে ক্লয়ও সন্দেহ হয়েছিল। সে চায় এই বংশের ধারায় কোনো বদরক্ত এসে যেন না মেশে। এবং তার সেই সন্দেহের সম্মান রাখতেই ঝামেলাটা করতে হয়েছিল।

তিনি কি স্বশুরমশাই ?

হতে পারে। তবে আমাকে কৃষ্ণকান্তবাবু এম এল এ এবং মাননীয় মন্ত্রী নিজের মুখে কিছু বলেননি। তবে সন্দেহটা এ বাড়ির বাতাসে জীবাণুর মতো সংক্রামিত হয়েছিল।

তোমাকে তো কেউ নিশ্চয়ই বলেছিল !

না। আমি টের পেয়েছিলাম।

এটা কি আমাকে বিশ্বাস করতে বলো ?

বলি। আমি প্রয়োজনে মিথ্যে কথা বলি। অপ্রয়োজনে নয়।

আমি আজই তোমাদের বাড়ি থেকে চলে যাচ্ছি।

উইশ ইউ গুড লাক। তৈরি হয়ে নাও।

রেমি উঠল এবং বাস্তবিকই একটা ছোটো ব্যাগ গোছাতে লাগল।

ধুব অলস চোখে ব্যাপারটা দেখতে দেখতে কয়েকবার হাই তুলল।

তারপর উঠে পোশাক পরে বেরিয়ে গেল।

কাউকেই কিছু বলল না রেমি। কারো অনুমতি নিল না। তার মাথা আর বুক জুড়ে একটা ঘণা রাগ আর ধিক্বারের ঝড় বয়ে যাচ্ছে। সে কিছু সঠিক ভাবে চিন্তা করতে পারছে না। উচিত অনুচিতের বোধ লুপ্ত হয়ে যাচ্ছে।

বাপের বাড়িতে এসে দুদিন প্রায় নির্বাক রইল রেমি। কারও প্রশ্নের জবাব দেয় না। কারও দিকে তাকায় না। শুধু গভীর রাতে বালিশে মুখ ঠেসে ধরে কেঁপে কেঁপে কাঁদে।

আশ্চর্য এই, তিন দিনের মধ্যেও তার স্বশুরবাড়ি থেকে কেউ খোঁজ করতে এল না। ব্যাপারটা অস্বাভাবিক। রেমির বাপের বাড়ির সকলেই খানিকটা চিন্তিত উদ্ভিগ্ন। কিন্তু রেমির মুখে কিছু না শুনে তারাও কৃষ্ণকান্ত বা ধুবকে কিছু জিজ্ঞেস করতে ভরসা পায় না। রেমির বাপের বাড়িতে ফোন নেই, থাকলেও ওবাড়ি থেকে কেউ খোঁজ করতে কিনা কে জানে।

চতুর্থ দিন অফিস থেকে ফিরে রেমির বাবা নিশ্চিত গলায় বললেন, আজ কৃষ্ণকান্তবাবুর সেকরেটারি আমার অফিসে ফোন করেছিলেন।

উদ্ভিগ্ন রেমির মা বললেন, কী কথা হল ?

এমনি রেমি কেমন আছে জানতে চাইল।

আর কিছু বলল না ?

না।

আমি তো মেয়ের ভাবগতিক ভাল বুঝছি না। ওরা বাঙাল মানুষ, মেয়ে বোধহয় মানিয়ে নিতে পারছে না।

শুধু বাঙাল নয়, জামাই বাবাজীও সুবিধের লোক তো নয়। এখন বুঝতে পারছি না বিয়েটা দিয়ে ঠিক কাজ করেছে কিনা।

ছোটো বাড়ি। পরিসর কম। সব কথাই রেমির কানে যায়। আর সঙ্গে সঙ্গে ভিতরে বিস্ফোরণ ঘটে। সে আর সব সহ্য করতে পারে, শুধু ধুবর প্রসঙ্গটা বাদে। ওই একটা বিষয় নিয়ে কেউ কিছু বলুক তা সে সহ্যেতে পারে না।

রেমি কাউকে কিছু বলার প্রয়োজন বোধ করল না। এমন কি জিনিসপত্র পর্যন্ত গোছাল না। হাতব্যাগটা নিয়ে বেরিয়ে ট্যাকসি ধরল। সোজা স্বশুরবাড়ি কালীঘাট।

ঘরে ঢুকে দরজা বন্ধ করে অপেক্ষা করতে লাগল সে।

খুব খুব রাত করল না । এমন কি মদ খেয়েও আসেনি । বেশ ক্লান্ত চেহারা । বোধহয় অফিসে খাটতে হয়েছে ।

ঘরে ঢুকে থমকে গিয়ে বলল, আরে ! আমি ভাবছি ওদিকে তুমি এ বাড়ির তলায় ডিনামাইট ফিট করার জন্য গর্ত খুঁড়তে লেগেছো ! আর তুমি নিজেই রিটার্ন পোস্টে ব্যাক করলে !

করলাম । তোমার কি একটু অসুবিধে হল ?

আরে না । তুমি থাকলে একটু ঘেঁষাঘেঁষি হয় বটে, স্পেস কমে যায়, কিন্তু তাতে কি ?

আমি থাকলে তোমার স্পেস কমে যায় ?

তা একটু কমবারই তো কথা । এক ঘরে দুজন থাকলে ।

স্বশ্রমশাই দোতলায় আমার ঘর ঠিক করে রেখেছেন, তা তো জানোই ।

জানব না কেন ! আমি বেশী মাতলামি করলে তুমি গিয়ে সেই ঘরে কত দিন থেকেও ছিলে ।

এখন যদি পাকাপাকিভাবে ওপরেই থাকি ?

থাকো । এ গুড ডিসিশন । ওয়াইজ ।

তোমার সুবিধে হবে ? সত্যিই হবে ?

আঃ মাইরি ! তুমি বহুৎ বকাবাজ আছো ।

আজ তো মদ খাওনি, তবু ওরকম রকবাজের মতো কথা বলছ কেন ?

একটু দিল্লাগি করছি ।

তোমার ইয়ার্কি আমার ভাল লাগছে না । তুমি আমাকে সহ্য করতে পারো না কেন ?

পারি না কে বলল ? খুব পারি ।

না পারো না ।

বাপের বাড়িতে কী হল ? ওখানেও খিচ লেগেছিল নাকি ?

না । আমি নিজেই থাকতে পারিনি ।

বিরহ নাকি !

হতে পারে ।

তুমি খুব অদ্ভুত আছ । সেলফ রেসপেকট নেই ।

না নেই । তুমি আমার খোঁজ নাওনি কেন ?

নেওয়ার কথা ছিল বুঝি ?

কথা ছিল না । তবু নিতে পারতে !

আমি ভাবলাম তুমি ওখানে গিয়ে বেশ আছো । খামোখা কামেলা মাচিয়ে লাভ কী ?

না, তা ভাবোনি ।

তবে কী ভেবেছি বলো তো অন্তর্যামী ?

তুমি আমার কথা মোটেই ভাবোনি ।

খুব খুব চিন্তিতভাবে নিজের মাথায় দুটো টোকা মেরে বলল, ভাবিনি ? সত্যিই ভাবিনি নাকি ? ঠিক জানো ! না, এক আধবার নিশ্চয়ই ভেবেছি ।

ইয়ার্কি কোরো না । তুমি জানো, বাপের বাড়িতে মেয়েদের স্বামীর জন্য কতটা অপমান সহ্যে হয় ?

কে অপমান করেছে তোমাকে ?

তা শুনে আর কী হবে ?

তবু বলো । ভবিষ্যতে কাজে লাগতে পারে ।

কেউ আমাকে অপমান করেনি । করেছে তুমি ।

আমি ? আমি কী করলাম ।

খোঁজ নাওনি । একবার যাওনি । শুধু তুমিই নও । এ বাড়ির কেউ খোঁজ করেনি ।

তুমি ক'দিন হল গেছ ? -

তাও মনে নেই ? চার দিন ।

ওঃ চার দিন ! আমি ভাবছিলাম, কাল পরশুই একবার যাবো ।

উঃ মুখে আসেও সব মিথ্যে কথা !

না, সত্যিই একবার ভেবেছিলাম কিন্তু ।

রেমি একটু হাসল । স্নান হলেও হাসিটা তার বুক থেকেই উঠে এল । সাজানো নয় । মাথা নেড়ে সে বলল, জানি সব জানি ।

ধুব তার মুখোমুখি বসে বলল, তবু আমার ওপর সত্যিকারের রাগ করতে পারছ না ?

রেমি একটা দীর্ঘশ্বাস ফেলে বলে, পারছি । আমার সব রাগ এখন তো তোমারই ওপর । কিন্তু সে রাগের তো কোনো দাম নেই ।

কেন বলো তো ?

যে রাগের দাম দেয় তার ওপরেই রাগ করা যায় ।

ধুব মাথা নেড়ে বলল, মেয়েমানুষকে আমি ভাল চিনি না, বুঝলে ! মাকে যদি পেতাম বুঝতাম ।

ওটা কোনো কথা হল না ।

ওটাই কথা । তুমি বুঝবে না । ওটাই কথা ।

ওটা তো অতীত । বহু দিন পার হয়ে গেছে ।

ধুব মাথা নাড়ে, অতীত হলে বেঁচে যেতাম । মা এখনো রোজ আমার মনে এসে হানা দেয় । না, কথাটা ঠিক হল না । মার সবটুকু নয় । শুধু একটা দৃশ্য । সারা গায়ে আগুন তার মধ্যে মা—আমার ভীষণ ফর্সা মা কালো থেকে আরো কালো হয়ে যাচ্ছে । বীভৎস ।

রেমি সম্মোহিতের মতো চেয়ে থাকে । কতদিন নিজেকে নিয়েও এরকম দৃশ্য কল্পনা করেছে সে । কেরোসিন ঢেলে গায়ে আগুন দেবে, নয়তো গলায় ফাঁস আটকে ঝুলবে, বিষ খাবে ।

ধুবর মায়ের কথা খানিকটা শুনেছে রেমি । বেশী শুনতে চায়নি সে । তার মনে হয়েছে মায়ের ঘটনাটাকে ধুব সুকৌশলে বাপের বিরুদ্ধে অপপ্রচারে কাজে লাগাচ্ছে । শোক এত দীর্ঘস্থায়ী হয় না কখনো ।

রেমি বলল, ওরকম একটা দৃশ্য এখন দেখতে তোমার কেমন লাগবে ?

তার মানে ? ধুব একটা কল্পনার স্তর থেকে নেমে এল ।

যারা গেছে তারা তো গেছেই, যারা আছে তাদের ধরে রাখতে হবে তো !

ধুব গম্ভীর হল । বলল, হুঁ ।

আমি তোমাকে ভয় দেখাচ্ছিলাম না ।

ধুব জামাকাপড় পাণ্টাতে লাগল । তারপর বলল, স্বশরীর সঙ্গে দেখা করেছো ? না ।

উনি ক'দিন খুব দুশ্চিন্তা করছেন তোমার জন্য ।

তাই বুঝি খোঁজ নেননি ।

খোঁজ নিতে ওঁর সম্মানে লাগে হয়তো । বিশেষ করে পুত্রবধূর বাপের বাড়িতে । কিন্তু কথাটা বিশ্বাস করতে পারো । এ কয়দিন উনি ভাল করে খাননি, ভাল ঘুমোননি । শুনেছি আমার উদ্দেশ্যে অজস্র কটুকাটব্যও করেছেন ।

রেমি খুশি হয়ে বলল, তোমার দোষ কী ?

ওঁর ধারণা আমার জনাই তুমি রাগ করে বাপের বাড়ি গেছ । অথচ প্রকৃত ব্যাপারটা জানার কোনো উপায় নেই । অশ্রদ্ধ আক্রোশে এই চারদিন উনি কনটিনিউয়াস ফুঁসেছেন ।

রেমি উঠে পড়ল। বলল, যাই গিয়ে বলে আসি যে, আমি এসেছি।

ধ্রুব গভীর হয়ে বলল, যাও। কিন্তু একটা কথা মনে রেখো। উনিই সেই ভিলেন যিনি রক্তের বিশুদ্ধতায় বিশ্বাসী। উনিই সেই খলচরিত্র যিনি তোমার চরিত্রের ইন্টিগ্রিটিতে বিশ্বাস স্থাপন করতে না পেরে সমীরকে কলকাতায় ডেকে পাঠিয়েছিলেন। উনিই সেই—

রেমি হাতজোড় করে বলল, দয়া করে চুপ করবে ?

কেন বলো তো !

আমি সব জানি।

তবু মনে করিয়ে দিলাম। লোকটাকে যতটা শ্রদ্ধা করা উচিত নয় ততটা কোরো না।

আমি অত হিসেব জানি না। শুধু এটুকু জানি, সব সত্ত্বেও উনি আমাকে স্নেহ করেন।

স্নেহ নয় ভাই গাড্ডা। গভীর গাড্ডা।

হোক গে। আমি তো গাড্ডাই চাই। তুমি তো তাও দিতে পারোনি।

আমি আর উনি ! মন্ত্রীরা ভালবাসার দাম কত বেশী।

রেমি রাগ করে চলে গেল।

কিন্তু কৃষ্ণকান্ত তখনো ফেরেননি। কোথায় একটা সেতু উদ্বোধন করতে গেছেন। ফিরতে রাত হবে। নাও ফিরতে পারেন।

তবে কিছুক্ষণ রাইটার্সে ফোনে চেষ্টা করে জেলা শহরের সারকিট হাউসের নম্বর জোগাড় করল রেমি।

কৃষ্ণকান্ত তার গলা শুনেই সোল্লাসে টেলিফোনে চেঁচিয়ে উঠলেন, ফিরেছো মা, ফিরেছো ! বাঁচালে !

আপনি ফিরবেন না বাবা !

ঠিক ছিল, আজ আর ফিরব না। কিন্তু তুমি যখন ফিরেছো তখন আর কথা কী ! এঙ্কুনি রওনা হচ্ছে

দু ঘন্টার মধ্যেই কৃষ্ণকান্ত ফিরলেন। দু তিন ঘন্টার মোটর দৌড়ের পরও তাঁর মুখে হাসি উপচে পড়েছে। চোখ চিকমিক করছে আনন্দে।

রেমি বুঝল এই আত্মন্তরী কুসংস্কারাচ্ছন্ন নিষ্ঠুর ও আত্মকেন্দ্রিক লোকটার কাছ থেকেও তার মুক্তি নেই। স্নেহের মতো শক্ত বান্ধন আর কী আছে ? খুনী ডাকাত বাপকেও তার মেয়েটা সর্বস্ব দিয়ে ভালবাসে। রাত্রে রেমি যখন ফিরল তখন ধ্রুব বই পড়ছে। অদ্ভুত সব বই পড়ে সে। শক্ত বিষয়। খটোমটো।

বইটা একটানে নিয়ে রেখে দেয় রেমি। বলে এবার তোমার সঙ্গে বোঝাপড়া।

ধ্রুব একটু হাসল। কী অদ্ভুত মাদক হাসি। রেমির পায়ের তলায় ভূমিকম্প হতে লাগল। বুক উথাল-পাথাল।

## ॥ ২৫ ॥

তোমার মুখখানা অমন শুকনো দেখাচ্ছে কেন ?

কোথায় শুকনো ? বলে নিজের অজান্তে গালে একটু আঙুল বোলায় বিশাখা।

দেখাচ্ছে শুকনো-শুকনো। বলে একটু ইঙ্গিতময় হাসি হাসে চুনী, তোমার কিছু হল নাকি ? বিশাখা একটু লাল হয়। বলে, যাঃ।

আজ চলো, গাঙে গিয়ে খুব ডুবিয়ে স্নান করে আসি। কী সুন্দর টলটলে জল !

যেতে দেবে না। মনুপিসিকে তো চিনিস না।

কত মেয়ে তো করছে ।

সকলের মতো কি আমরা ? বললেই বলবে, খিঙ্গি মেয়ে ড্যাং ড্যাং করে সকলের নাকের ওপর দিয়ে নাইতে যায় নাকি ? এ বাড়ির মান-সম্মান নেই ?

তাহলে ঝিয়েরা কাপড় আড়াল করে নিয়ে যাক ।

দূর সে আমার লজ্জা করে । দুধারে চারজন কাপড় টান করে আড়াল করবে আর মাঝখান দিয়ে চোরের মতো লুকিয়ে লুকিয়ে যাওয়া, ও আমার ভাল লাগে না ।

চুনী একটু মন-খারাপ গলায় বলে, তোমাদের অনেক ঝঞ্জাট । এটা বারণ, সেটা বারণ ।

বিশাখা রাগ করে বলে, বারণ তো বেশ । আমরা কি আর সকলের মতো সস্তা নাকি ?

কুলতলার নিবিড় ছায়ায় ঘাসের ওপর দুজন বসে । কিছু কড়ি চিৎ উপুড় হয়ে পড়ে আছে ঘাসে ।

চুনী সেগুলো গুছিয়ে তুলছে একটা পুঁতির কাজ করা থলিতে । কত খেলনা আর কত সুন্দর সুন্দর জিনিস এদের । মাঝে মাঝে চুনীর ইচ্ছে করে এক-আধটা জিনিস কাপড়ের আড়ালে নিয়ে চলে যায় । এরা টেরও পাবে না । কিন্তু টের পায় আর একজন । সে হরি । হরিখুড়োর যেন একশ জোড়া চোখ । চতুর্দিকে ঘুরছে আর হিসেব নিচ্ছে । একটা পানের বোঁটা পর্যন্ত ভাঙার উপায় নেই । চুনীর রাগ হয় । হরি এ বাড়ির চাকর ছাড়া আর কিছু তো নয় । তফাত শুধু এই যে, সে কতাবাবুর চাকর । তার জোরেই সে এ বাড়ির আর সব ঝি-চাকরকে দাবড়ায় । এমন কি জুতো মারে, ঘাড় ধাক্কা দিয়ে বের করেও দেয় । তার ওপর কথা বলার লোক নেই । নতুন ঝি-চাকর রাখেও সেই । তার পছন্দ না হলে এ বাড়িতে কাজ পাওয়ার উপায় নেই ।

চুনী কড়িগুলো তুলে থলির মুখে লাল টুকটুকে দড়ির ফাঁস টেনে বন্ধ করে বলে, তোমার বিয়ের সম্বন্ধ হচ্ছে জানো ?

বিশাখা দুখানা বড় বড় চোখ চুনীর মুখে স্থিরভাবে স্থাপন করে বলে, তোকে কে বলল ?

চুনী একটু ভয় খেয়ে বলে, শুনেছি । কেন, তুমি জানো না ? রাজেনবাবুর ছেলে শচীনবাবু—সেই যে ভারী সুন্দর চেহারা

সুন্দর না হাতি !

তোমার পছন্দ নয় ?

ওকে পছন্দ হবে কেন ?

তবে তোমার কাকে পছন্দ ?

তা জেনে তোর কী হবে ? তোর কাকে পছন্দ ?

আমার ! আমার আবার পছন্দের কী ?

তবে আমার কথা তোকে বলব কেন ?

চুনী হিহি করে হাসে । তারপর উঠে বলে, চলো, চান করি গে । আজ তোমার পায়ে ঝামা ঘষতে হবে । মনু ঠাকরুণ বলে দিয়েছে ।

বিশাখা নড়ল না । অলস আনমনে বসে চারদিককার ঝুরো ছায়ার দিকে চেয়ে কিরকম বিভোর হয়ে থাকে ।

চুনী জানে সে বিশাখার সখি নয়, বন্ধুও নয় । সঙ্গী বটে, কিন্তু আসলে সে বিশাখার ঝি । কাজেই বেশী ঘাঁটাতে সাহস পায় না সে । বিশাখা এমনিতে ঠাণ্ডা সৃষ্টির হলে কি হয়, রেগে গেলে কুরুক্ষেত্র বাধিয়ে ছাড়ে । রাগ পুষে রাখে । তবু চুনী নিজের মতো করে বিশাখাকে ভালওবাসে । অত রূপ, ভাল না বেসে পারা যায় ?

এই যে ঘন দুপুর, শেষ শীতের কবোষ রোদে এক ঝিমঝিম নেশার মাদকতা ছড়িয়ে রেখেছে চারধারে তা বিশাখাকে টেনে নেয় বৃকের মধ্যে । কুলতলার ঝুরো ছায়া আর চারদিককার গাছগাছালির ফাঁকে ফাঁকে ফর্সা চাদরের মতো টানটান রোদ তাকে এক অদ্ভুত পুরুষের স্বপ্ন দেখায় ।

সে পুরুষ সাধারণ নয় । অপাপবিন্দু, দুর্মর সাহসী, বিশ্বজয়ী সেই মানুষ বোধ হয় স্বপ্নেই বাস করে ।  
তবু তার জন্য অপেক্ষা করা ছাড়া বিশাখার উপায় কী ?

অনেকক্ষণ আনমনে বসে থাকে বিশাখা । চুনী উসখুস করে । তার মাথায় উকুন কুটকুট করছে ।  
পেটের মধ্যে নাচছে খিদের বাঁদর । বিশাখার মুখের থমথমে ভাব লক্ষ করে সে কিছু বলতে সাহস  
পায় না ।

কিছুক্ষণ বাদে অবশ্য বিশাখা নড়ল । উঠল । একটা হাই তুলে বলল, চল যাই ।

পুকুরঘাটে দাসী সব সাজিয়ে রেখে দাঁড়িয়ে আছে । তেলের বাটি, ঝামা, গামছা, কাপড়, সাবান ।  
বিশাখা পৈঠায় বসে । চুনী সযত্নে তার পায়ে ঝামা ঘষতে থাকে । ঘষতে ঘষতে তারও রূপমুগ্ধতার  
বিভ্রম ঘটে । এত সুন্দর নিটোল পা, ঝামা ঘষার কোনো দরকার নেই । একটুও ফাঁটা নয়, ময়লা  
নয় । শুণ্ড পুরোনো আলতার দাগ । সেটা উঠে যাওয়ার পরও টুকটুকে লাল দুখানি পাকে যেন মা  
দুগারি পা বলে মনে হয় । কী সুন্দর ! ইচ্ছে করে পা দুখানায় ঠোট ঘষে, কপালে চেপে রাখে  
কিছুক্ষণ ।

চুনী !

বলো ।

সুফলা তোকে কিছু বলেছে ?

হঁ ।

কী বলেছে ?

এর মধ্যে কবে যেন নায়েবমশাই গিয়েছিলেন ওদের বাড়ি ।

কথা পেড়ে এসেছে, না ?

তাই তো বলল । কতাবাবু রাজেন মোক্তারকে ডেকে পাঠিয়েছে ।

কবে আসবে বুড়োটা ?

তা অত জানি না ।

এ বিয়ে হবে না ।

ইস !

ইস আবার কিসের ?

আমার যদি ওরকম বর জুটত তাহলে আনন্দে নাচতাম ।

আমি আর তুই কি সমান ?

তা বলিনি । কিন্তু শচীনবাবু কী ভাল দেখতে বলো !

তেমন কিছু নয় ।

এ শহরে ওর মতো সুন্দর আর কেউ নেই ।

আছে । ভুই গগনবাবুর ছেলেকে দেখেছিস ?

কোকাবাবুর নাতি ? দেখব না কেন ? সেও অবশ্য সুন্দর ।

শচীনের চেয়ে ঢের সুন্দর ।

চুনী একটু দ্বিধার গলায় বলে, কেমন যেন একটু গোঁয়ার মতো আছে !

তার মানে ?

একটু বেশী লম্বা-চওড়া ।

পুরুষ মানুষ তো ওরকমই ভাল ।

চুনী ফের একটু দ্বিধায় পড়ে । খুব ভয়ে ভয়ে বলে, শরৎ কিছু লোক ভাল নয় ।

শরৎ কী রে ! শরৎবাবু বল ।

ওই হল । শরৎবাবু নাকি—হি হি—

হাসছিস কেন ?

মদটদ খায়, জানো ?

তোকে কে বলল ?

সবাই জানে।

আর কী করে ?

বন্দুক নিয়ে ঘুরে বেড়ায় জঙ্গলে।

সেটা কি খারাপ ?

তা নয়। মেয়েমানুষের দোষ আছে।

বাজে কথা।

তোমার কি শরৎকে পছন্দ ?

তাতে তোর কি ?

না, কিছু না। আমার কাছে শচীনবাবুকে বেশী ভাল লাগে। বেশ নরম সরম মানুষ। খেটে খায়।

খেটে খাওয়াটা কি খুব বড় কথা নাকি ? ভীষণ গরীব ছিল ওরা।

জানি।

মনু পিসিই সব নষ্টের গোড়া। আপদ বিদেয় করার জন্য যা তা একটা ছেলেকে ধরে গলায় ঝুলিয়ে দিচ্ছে।

চুনী বিশাখার ভিতরকার গনগনে রাগের আঁচ টের পেয়ে ভয়ে চূপ করে গেল। এখন মতামত করতে যাওয়াটা ঠিক হবে না। পা ঘষা শেষ করে ঝাঁঝালো সরষের তেল হাতের তেলোয় নিয়ে বিশাখার কোমল সুন্দর হাত আর পায়ে মাখাতে লাগল সে। মহেন্দ্রর ঘানিতে রাই সর্ষে পিষে তৈরি করা তেল। কী মিষ্টি গন্ধ। যে তেলটি চূলে দেয় বিশাখা, যে সাবানটি মাখে তাদের গন্ধ চুনীকে পাগল করে দেয়। এই রাজকন্যার মতো সুন্দরী মেয়েটিকে সে রোজ ছোঁয়, এর দামী সাবান আর তেল তার হাতে লেগে থাকে, এ সবই নিজের সৌভাগ্য বলে মনে করে চুনী। ভারী গৌরব বোধ করে। কিন্তু বিশাখার পছন্দ কি ভাল ? শরৎকে সে চেনে। চেহারাটা খারাপ নয়, কিন্তু ভীষণ রাগী, বুনো লোক। আর শচীনবাবুর চেহারাটা কী মিষ্টি ! কত লেখাপড়া জানে !

বিয়ের কথা ওঠার ফলেই বোধ হয় ইদানীং সুফলা খুব একটা আসে না।

বিশাখা জলে নামতে নামতে বলল, সুফলাকে একটা খবর দিস তো। ওর সঙ্গে কথা আছে।

চুনী বলল, দেব।

আজই কিন্তু। বলিস জরুরী দরকার।

বিকেলে সুফলা এল। জমিদারবাড়ির মেয়ের সঙ্গে দাদার বিয়ের সম্বন্ধ হচ্ছে, এটা তাদের কাছেও খবরের মতো খবর। তার ওপর পাত্রী তার প্রাণের বন্ধু। সুফলার মুখেচোখে একটা চাপা আনন্দ ডগমগ করছিল। চোখের দৃষ্টিতে একটু লজ্জা লজ্জা ভাবও। এসেই বিশাখাকে জড়িয়ে ধরে বলল, কেমন আছিস ? কদিনে রোগা হয়ে গেছিস কেন ?

বিশাখার মুখটা খুব খুশি দেখাল না। গম্ভীর মুখে বলল, ছাদে চল, কথা আছে।

তাদের ছাদটি বিশাল। মাঠের মতো বড় সেই ছাদে অনেক রকম বসার জায়গা আছে। শ্বেতপাথরের আরামকেন্দ্রা, পাথরের বেদী। বড় বড় ফুলের টব আছে অনেকগুলো। আছে বড়ি আর আমসত্ত্ব রোদে দেওয়ার জন্য জালের ঘর, যাতে পাখি এসে না ঠোঁকরাতে পারে।

সাদা বেদীটার ওপর দুজন পা তুলে বসে।

মানুষের মুখের ওপর স্পষ্ট কথা বলতে বিশাখা কখনোই সংকোচ বোধ করে না। এমন কি



দাদা-দিদিদের মুখের ওপরেও সে অনেক কথা বলে দেয় । শুধু বাবার প্রতি তার এক ধরনের সমীহ আছে ।

বিশাখা সুফলার দিকে তাকিয়ে বলল, তোদের এখন অবস্থা বেশ ভাল হয়েছে, তাই না ? সুফলা একটু থতমত খেয়ে বলে, কীসের অবস্থা ?

সংসারের অবস্থার কথা বলছি । ন্যাকা, বুঝিস না কিছু ?

সুফলা একটু গভীর হয়ে বলে, সংসারের খবর অত জানি না ।

খুব জানিস । কদিন আগেও তো খেতে পেতিস না ভাল করে । চেয়েচিন্তে চলত ।

সুফলা চঞ্চল হয়ে ওঠে । মুখে থমথমিয়ে ওঠে কান্না । বলে, এসব কথা কেন বলছি ?

বিশাখার খুব ভাল লাগতে থাকে । নিষ্ঠুরতার মধ্যে সে এক রকম তীব্র আনন্দ বোধ করে । বলে, আমার মার কাছ থেকেও কতদিন চাল পয়সা নিয়ে তবে তোদের চলত, মনে নেই ?

সুফলা ফোঁস করে ওঠে, সে সব মা শোধ দিয়েছে ।

তা দিতে পারে । তোরা এখন বেশ পয়সার মুখ দেখেছিস, না ?

তা জেনে তোর কী হবে ?

আমার জানা দরকার বলেই জিজ্ঞেস করছি । তোর বাবা আর দাদা কত টাকা রোজগার করে রে ?

সুফলার চোখে জল চিকচিক করতে থাকে । আকস্মিক এই অপ্রিয় প্রশ্নে সে কথার খেই হারিয়ে ফেলে । জবাব দিতে পারে না । শুধু অস্থিরভাবে এদিক ওদিক চাইতে থাকে ।

বিশাখা বলে, উকিল মোক্তারদের খুব কাঁচা পয়সা হয় বলে শুনেছি । আমাদের জমিদারীটা কিনে নিতে পারিস তোরা ? স্নেহমতী আছে ?

সুফলার চোখে জল, ফোঁপানিতে কেঁপে কেঁপে উঠছে বুক । তবু খুব তেজের সঙ্গে বলল, অত দেমাক করিস না । তোদের জমিদারীর অবস্থাও জানি ।

কী জানিস ?

অনেক জানি । আমার দাদা সব কাগজপত্র দেখেছে ।

তাই নাকি ? কী দেখেছে ?

আমাদের জমিদারী নেই বলে তো আর না খেয়ে থাকি না । তোদের ক'দিন পরেই হাঁড়ির হাল হবে ।

বিশাখার সুন্দর মুখটায় আক্রোশের হিংস্রতা দেখা দেয় । জমিদারীর অবস্থা যে ভাল নয় এটা সেও শুনেছে । সে বলল, তোর দাদাকে মাইনে দিয়ে রাখছি তো আমরা, সেই স্নেহমতী তো এখনো আছে ।

আমার দাদা কি তোদের চাকর ?

তাছাড়া আর কী ?

দাদাকে তো তোর বাবা হাতে-পায়ে ধরে সেধে জমিদারী দেখার কাজ দিয়েছে । অতই যদি দেমাক তবে দাদার সঙ্গে বিয়ের সম্বন্ধ করার দরকার কী ছিল ?

বিশাখা একটু হাসল, বাবার মতিচ্ছন্ন হয়েছে বলে করেছে ।

তাহলে আমাকে বলতে আসিস কেন ? আমরা অত ল্যালা না । তোরাই ল্যালা । আজই আমি বাড়ি গিয়ে সব বলছি ।

বলিস আমি তাই চাই । কুঁজোর আবার চিত হয়ে শোবার সাধ ! ইং !

ভারী তো তিন পয়সার জমিদারী, তাও খাজনা আদায় হয় না, ঠাটবাটই সার ।

এ কথাও কি তোর দাদা বলেছে ?

বলেছেই তো । জমিদারী রাখতে হলে তোর বাবাকেও ভিক্ষের ঝুলি নিয়ে ধার করতে বেরোতে হবে ।

বিশাখা বিভীষণ মুখে চূপ করে বসে রইল ।

সুফলা কঁদতে কঁদতে এক ছুটে সিঁড়ি দিয়ে নেমে গেল নীচে ।

আপনমনে বিশাখা একটু হাসে । বিয়েটা শেষ অবধি হবে না হয়তো । সুফলা গিয়ে বলবে । কুরুক্ষেত্র বেধে যাবে ।

ছাদ থেকে নেমে সে মুখে ভালমানুষী মাখিয়ে মনুপিসির কাছে চুল বাঁধতে বসল ।

রঙ্গময়ী জিজ্ঞেস করে, সুফলা এসেছিল নাকি ?

হঁ ।

রঙ্গময়ী চূপ করে থাকে । বোধ হয় ভয়ে ।

বিশাখার বিষদাঁত একটু সুলসুল করে । বিষ ঢালার একটা জায়গা চাই তো ! চুলের জট ছাড়ানোর ঝাঁকুনিতে মাথাটা পিছন দিকে হেলে যাচ্ছিল । মুখটা সামান্য বিব্রত । বলল, মোস্তারের মেয়ের খুব তেজ ।

রঙ্গময়ী মন্তব্য করে না ।

বিশাখা খানিকক্ষণ চূপ করে থেকে বলে, বলে কী জানো ! বাবাকে নাকি খাজনার দায় মেটাতে ভিক্ষের ঝুলি নিয়ে বেরোতে হবে ।

ও কথা বলল কেন ?

কাঁচা পয়সা পাচ্ছে তো । ধরাকে সরা দেখছে ।

কী থেকে কথাটা উঠল ?

কী আবার ! কথার পিঠে কথা ।

মেয়েটার মুখ তো ভাল নয় ।

সেই কথাই তো আমি তোমাকে বলি ।

কী বলিস ?

ওরা ভাল নয় ।

রঙ্গময়ী মৃদু একটু হাসল । বলল, কী করে বুঝলি ? শুধু সুফলার সঙ্গে ঝগড়া করলেই কি সব বোঝা যায় ?

ঝগড়া আবার কিসের ? ঝগড়া হয় সমানে সমানে ।

মানুষকে ছোটো মনে করিস কেন ? এই যে আমাকে পিসি বলে ডাকিস, আমিও তো তাদের সমান নই । গরীব পুরুতের মেয়ে, পিসি না বলে নাম ধরে ডাকলেই তো পারিস তাহলে ।

তোমার কথা আলাদা ।

কিছুই আলাদা নয় রে । মানুষকে অত পর ভাবতে নেই ।

তুমি একটু অদ্ভুত আছো পিসি । ওরা আমাদের সমান নয় সে কথাই বলেছি । নইলে সুফলা তো আমার বন্ধুই ।

তুই সুফলার সঙ্গে কেন ঝগড়া করেছিস তা আমি জানি ।

বিশাখা ঝামড়ে উঠে বলে, আমি মোটেই ঝগড়া করিনি । কেন করতে যাবো ? ওদের আমি মানুষ বলেই মনে করি না । ঝগড়া ও করেছে ।

বিয়ের ব্যাপারে তোর মত নেই, সে কথা তোর বাবাকে না হয় আমি জানিয়ে দেবো । তুই আর কিছু করতে যাস না ।

বিশাখা চূপ করে রইল । কিন্তু তার মুখচোখ ফেটে পড়ছে অভ্যন্তরীণ রাগ ও উত্তেজনায় ।

চমৎকার একটা খোঁপা করে চিকনি ঝুঞ্জে দিল তাতে রঙ্গময়ী । আঙুলের নিপুণ চাপে খোঁপাটা

ঠিকঠাক করে বসিয়ে দিল। তারপর বলল, এই তোর শেষ কথা তো!

কোনটা আবার শেষ কথা?

শতীনকে বিয়ে করবি না, এই তো?

ওকে করব কেন?

সেটাই ভাল করে জেনে গেলাম। তোর বাবাকে আজই বলব।

বিশাখার মুখ একটু বিবর্ণ হয়ে গেল। বলল, আমার কথা বলে বলবে নাকি পিসি?

তাহলে কার কথা বলব?

বাবা যে আমার ওপর খুব রাগ করবে।

রাগ করবে কেন? তবে প্রস্তাবটা এক রকম দেওয়া হয়ে গেছে, সেটা ফিরিয়ে নিতে সম্মানে লাগবে। তবু আমি বলি মেয়েদের অমতে বিয়ে দেওয়া ভাল নয়।

বিশাখার সুর অনেক নরম হয়ে গেল। বলল, বাবাকে আমার কথা বোলো না।

তবে কী বলব?

বোলো তোমার পছন্দ নয়। তোমার কথা তো বাবা খুব শোনে।

রঙ্গময়ী একটা দীর্ঘশ্বাস ফেলে বলে, আমাকে কেন নিমিত্তের ভাগী করতে চাস? এসবের মধ্যে আমি থাকতে চাই না। শতীনকে পছন্দ করেছিলাম আমিই।

শতীনকে তোমার কিসে পছন্দ বলো তো?

কী জানি, আমার হয়তো চোখ নেই।

নেইই তো পিসি। ও এমন একটা কী পাত্র?

ওকে তোর এত অপছন্দের কারণ কী বল দেখি! বলবি?

ওদের বাড়ি ভাল নয়। কেমন সব গরীব গরীব স্বভাব।

রঙ্গময়ী হেসে ফেলল। আবার গম্ভীর হয়ে গেল।

বিশাখা হঠাৎ রঙ্গময়ীর গলা জড়িয়ে ধরে বয়সোচিত অদুরে গলায় বলল, তুমি আমার ওপর রাগ করেছে পিসি?

রঙ্গময়ী মা-মরা এই বাচ্চাদের নিজের ছায়া দিয়ে তাপ দিয়ে বড় করেছে এতটা। তাই এই আদরে তার বৃকের মধ্যে অভিমানের একটা তুফান উঠতে চাইছিল। কিন্তু রঙ্গময়ী জোর করে চাপা দিল সেটা।

বিশাখার থুতনিটা একটু নেড়ে দিয়ে বলল, না, আমার রাগ করতে নেই। আমি রাগ করলে যে ভূমিকম্প হয়ে যাবে। যা, খেলা কর গে।

বিশাখা আস্তে আস্তে উঠে বারবাড়ির দিকে বারান্দায় এসে দাঁড়াল। জড়োসড়ো ভাব। শীত এখন যাই-যাই। বেলা চট করে পড়ে না। এখনো রোদ আছে।

ব্রহ্মপুত্রের দিকে অনেকগুলো কদম গাছ। মলিন চেহারা। তার ওপর পিঙ্গল আকাশ। চেয়ে ছিল বিশাখা।

একটা সাইকেল বড় রাস্তা থেকে বাঁক নিয়ে বাড়িতে ঢুকল।

বিশাখা ডুড়িৎপদে একটা থামের আড়ালে সরে যায়।

শতীন এল। রোজ্ঞ এ সময়ে আসে। কাছারিবাড়িতে বসে কাগজপত্র দেখে। পরণে উকিলের পোশাক।

থামের আড়াল থেকে বিষাক্ত দৃষ্টিতে তাকে দেখতে লাগল বিশাখা।

আচমকা একদিন দুপুরে জয়ন্ত এসে হাজির।

রেমি একটু অবাক হল জয়ন্ত তার ছোটো ভাই। কিন্তু তার বিয়ের পর থেকে এ বাড়িতে বাপের বাড়ির কেউ বড় একটা আসে না। কৃষ্ণকান্ত ঠাণ্ডাঠাণ্ডা এটা জানিয়ে দিয়েছেন; বিয়ের পর মেয়েদের বাপের বাড়ির সঙ্গে সম্পর্ক যতটা ক্ষীণ হয় ততই ভাল। পালে-পার্বণে বা পারিবারিক বিয়ে উৎসবে একটু আধটু দেখা হোক। ব্যস, তার বেশী নয়। মেয়েদের যতক্ষণ বাপের বাড়ির পিছুটান থাকে ততদিন স্বশ্বুরবাড়ির সঙ্গে তার সম্পর্ক গাঢ় হয় না। আর সেই থেকেই আসে সংসারের অশান্তি। এ ব্যাপারটা রেমি মেনে নিয়েছে। তার বয়স অল্প হলেও বুদ্ধি বিবেচনা অপরিশ্রুত নয়। বাপের বাড়ির সঙ্গে এই আলগা সম্পর্কের যৌক্তিকতা সে বোঝে। আপাতনিষ্ঠুর হলেও আত্মে এতে ভালই হয়।

কৃষ্ণকান্তর এইসব অনুশাসনকে তার বাপের বাড়ির লোক ভাল চোখে দেখেনি। অপমান হিসেবেও গায়ে মেখেছে। তাই এমনিতেই কেউ বড় একটা আসে না। তারা গরীব না হলেও টাকা পয়সা বা ক্ষমতায় কৃষ্ণকান্তর ধারেকাছেও নয়। সেই সংকোচ এবং ভয়ও কিছু দূরত্ব রচনা করে থাকবে। রাগ করে যে কয়েকদিন রেমি গিয়ে বাপের বাড়িতে ছিল তাইতেই বাবা মা বেশ চিন্তিত হয়ে উঠেছিল।

জয়ন্তকে দেখে রেমির বুক কঁপেও উঠল একটু। কোনো দুঃসংবাদ নয়তো কী রে? তুই

জয়ন্ত ঠিক কিশোর ছেলেটি নেই। অল্প কয়দিনেই ধাঁ করে একটু লম্বা হয়ে গেছে। গালে সামান্য দাড়ি। গলার স্বর ভেঙে মোটা হয়ে গেছে। চোখে এসেছে তীক্ষ্ণ ও স্থির দৃষ্টি। পোশাকে আশাকে তেমন মনোযোগী নয়। একরাশ তেলহীন রুক্ষ চুল ঘাড় অবধি নেমেছে।

জয়ন্ত দিদির দিকে চেয়ে বলল, তোর সঙ্গে কথা ছিল।

আয়। বোস এসে। কী খাবি?

তোর বাড়িতে খাবো! ও বাবা, তোর স্বশ্বুর টের পেলে—

যাঃ আমার স্বশ্বুর কি হিরণ্যকশিপু নাকি? লোকেরা বড্ড বাড়িয়ে বলে ঠুর সম্পর্কে।

তুই একেবারে গেছিস।

তার মানে?

ওই বুড়ো তোকে হিপনোটাইজ করে ফেলেছে। পারসোনিয়ালিটি বলে তোর আর কিছু নেই।

রেমি লজ্জা পেয়ে বলে, মোটেই নয়। বাইরে থেকে লোকটাকে ওরকম মনে হয়। আদর্শবাদীরা একটু হো কঠোর হবেই। কিন্তু মনটা ভীষণ ভাল।

কৃষ্ণকান্ত চৌধুরী কেমন লোক তা পাবলিক জানে। তোকে অত ওকালতি করতে হবে না। পাবলিক ছাই জানে।

জয়ন্ত একটু হেসে বলে, তোর স্বশ্বুর আদর্শবাদী ছিল আজ থেকে তিন যুগ আগে। এখন ঠুঁকে আদর্শবাদী বললে কথাটাকেই অপমান করা হয়।

রেমি একটু উদ্ধার সঙ্গে বলে, আচ্ছা না হয় তাই হল। এবার কী খবর বল!

কোনো খবর টবর নেই। আমি বাড়ির রিপ্রেজেন্টেটিভ হয়ে আসিনি।

কোনো খারাপ খবর নেই তো!

আরে না। আমাদের নিয়ে তোকে অত দুশ্চিন্তা করতে হবে না। বরং তুই নিজেকে নিয়ে একটু ভাবলে আমাদের দুশ্চিন্তা যায়।

নিজেকে নিয়ে কী আবার ভাবব?

জয়ন্ত একটু চুপচাপ তার দিদির দিকে চেয়ে থেকে বলে, আমি বুঝতে পারছি না তুই তোর নিজের সিচুয়েশনটা সম্পর্কে কনশাস কিনা।

কনশাস না হওয়ার কি ?

আর ইউ হ্যাপি ইন দিস সেট আপ ?

চলে তো যাচ্ছে।

আর ইউ হ্যাপি উইথ ধুব চৌধুরী ?

রেমি এবার রেগে গিয়ে বলে, তোর এত পাকা পাকা কথার দরকার কী বল তো ! আমি হ্যাপি কিনা সে আমি বুঝব।

দ্যাখ ছোড়ি, তোর যখন বিয়ে হয় তখন আমি মাইনর ছিলাম। মতামতের দাম ছিল না। তাছাড়া আমরা তত খোঁজ খবরও নিইনি। কিন্তু এখন মনে হচ্ছে তোর জন্য আমাদের একটু চিন্তা করা দরকার।

কেন, এতদিন বাদে চিন্তা করার মতো কি হল ?

তুই আমাদের কাছে কিছুই বলিস না। কিন্তু আমাদের কানে অনেক কথা আসে।

কী এমন কথা ! তোর জামাইবাবু মদ খায়, এই তো !

সেটাও একটা পয়েন্ট।

মদ খাওয়া এই পরিবারের ট্র্যাডিশন নয়। তোর জামাইবাবু খায় বটে, তবে আমার মনে হয় সেটা শুধু নেশা করার জন্য নয়।

তবে কিসের জন্য

অন্য কারণ আছে। অত কথা তোর মতো পুঁচকের সঙ্গে বলতে পারি না।

আমি এখন আর তত পুঁচকে নই।

আমার কাছে পুঁচকেই। না হয় একটু দাড়ি গোঁফই উঠেছে, তাই বলে কি জ্যাঠামশাই হয়ে গেছিস নাকি ?

উই আর অ্যাংশাস অ্যাবাউট যুওর ওয়েলফেয়ার।

কেন হঠাৎ কী হয়েছে ?

জামাইবাবুর বন্ধুবান্ধবদের তুই চিনিস ?

রেমি একটু ভেবে নিয়ে বলল, না। দু একজনের সঙ্গে এক আধবার পরিচয় হয়েছিল এবাড়িতে বাইরের পুকুরটা চট করে ভিতরবাড়িতে আসতে পারে না। মেয়েদের স্বামীর বন্ধুর সঙ্গে হাঃ হাঃ হিঃ হিঃ করার নিয়মও নেই।

তার মানে জামাইবাবুর বন্ধুরা এবাড়িতে আসে না !

না। কেন বল তো !

জয়ন্ত একটু হেসে বলে, জামাইবাবু তার বন্ধুদের এবাড়িতে আনে না কেন তা জানিস ? বন্ধুদের অধিকাংশই ভদ্রলোক নয়।

রেমি একটু খতিয়ে গেল। ধুবর বন্ধুদের সে চেনে না। কাজেই জোর গলায় বলার মতো কিছু নেই। মিনমিন করে বলল, ভদ্রলোক নয় কী করে বুঝলি তুই চিনিস তাদের ?

চিনি। পাণ্ডা নামে জামাইবাবুর এক বন্ধু আছে। অধীর পাণ্ডা। নাম শুনেছিস ?

বললাম তো, আমি ওর বন্ধুদের চিনি না।

অধীর পাণ্ডার এক বোন আছে। দুর্গা। খুব খারাপ মেয়ে স্কুলে থাকতেই দুবার পালিয়ে গিয়েছিল।

রেমির বুক কাঁপতে থাকে। তার একবার ইচ্ছে করে জয়ন্তকে থামিয়ে দেয়। সে আর শুনতে চায় না। কিন্তু কৌতূহল এক অদ্ভুত জিনিস। নিজের সর্বনাশের ভয়কেও মানে না। রেমি অশ্রুট

গলায় বলল, তার সঙ্গে কী ?

সেই দুর্গার সঙ্গে জামাইবাবু ইদানীং ইনভলভড ।

যাঃ হতেই পারে না ।

সত্যি মিথ্যে জানি না । আমি নিজের চোখে কিছু দেখিনি । কিন্তু খুব রিলায়েবল সোর্স থেকে খবরটা পেয়েছি ।

কে বলেছে তার নাম বল ।

নাম বললে তুই গিয়ে তোর শ্বশুরকে লাগাবি । তোর শ্বশুর কুরুক্ষেত্র করে ছাড়বে । পারিবারিক অশান্তি হবে ।

আমি ঠুকে বলব না । কথা দিচ্ছি ।

জয়ন্ত মাথা নেড়ে বলে, তোর কথার দাম নেই ছোড়দি । কৃষ্ণকান্তর হিপনোটিজম তোকে আচ্ছন্ন করে রেখেছে । উনি কথাটা যেই শুনবেন সেই কথাটার সোর্স বের করার জন্য উঠে পড়ে লাগবেন ।

আমি তোর নাম বলব না ।

জয়ন্ত মৃদু হেসে বলে, আমার নাম বলতে পারিস । আমি ওকে ভয় পাই না । কিন্তু ইনফরমেশনটার সোর্স তো আমি নই । অন্য লোক । আর কে, তোদের আত্মীয় ।

আমাদের আত্মীয় ? কে রে ?

বলেছি তো, নাম বলব না ।

আমাকে কী করতে বলিস ।

চোখ কান খোলা রাখ । অত মজে থাকিস না । ধুব চৌধুরী খুব চরিত্রবান লোক নয় ।

রেমি এই দুঃসময়েও রেগে গেল । বলল, সে আমি বুঝব । কে কী বলেছে তা দিয়ে তো আর বিচার হবে না । মিথ্যে করেও তো রটতে পারে ।

জয়ন্ত মাথা নেড়ে বলে, তুই ইনকিওরেবল । কিছুতেই তোকে তোর মোহ থেকে বের করে আনা যাবে না । আমি এটা জানতাম । তবু তোর কাছে এসেছি কেন তা জানিস ! জামাইবাবুর নামে কিছু রটলে সেটা আমাদেরও গায়ে লাগে । সেটা জামাইবাবুর জন্য নয়, তোর জন্য ।

আমার কথা তোদের ভাবতে হবে না ।

তুই আমাদের কথা ভাবিস না বলে কি আমরাও তোকে ভুলে যাবো ?

ভুলতে বলিনি । আমার মাথাটা এখন ঝাঝা করছে । কী পাণ্ডা নামটা বললি ?

অধীর পাণ্ডার বোন দুর্গা পাণ্ডা । অধীর ইজ এ পলিটিক্যাল লিডার । লেফটিস্ট ।

তার সঙ্গে তোর জামাইবাবুর সম্পর্ক কী ?

জামাইবাবুর কোনো পলিটিক্যাল কালার আছে বলে আমি জানি না । থাকলে লোকটা হয়তো মানুষ হত । অধীরের সঙ্গে জামাইবাবুর বন্ধুত্ব কলেজ থেকে । তবে এখন বন্ধুত্ব নেই । পারলে অধীর ধুব চৌধুরীর গলা নামিয়ে দেয় । দুর্গাকে নিয়ে জামাইবাবু ব্যাঙ্গালোরে গিয়েছিল, জানিস ?

রেমির পায়ে জোর ছিল না । থরথর করে কঁপে বসে পড়ল বিছানায় । মুখ কেমন সাদা । চোখে বোবা শূন্যতা ।

কী বলছিস ?

ঠিকই বলছি । খবরটা শুনে তুই আপসেট হয়ে যাবি জানতাম । তবু তোর ভবিষ্যতের কথা ভেবে বলতে বাধ্য হলাম ।

ওর আর যে দোষই থাক, মেয়েমানুষের দোষ তো ছিল না ।

ছিল না আবার কী। জমিদারদের রক্তেই ওসব বিষ থাকে। ফিউডালিজম যাবে কোথায় ! চূপ কর। তুই সব জেনে বসে আছিস, না ?

আমরা কিছু জানার চেষ্টা করিনি। খবরটা আমাদের কানে অন্য লোকই পৌঁছে দিচ্ছে। রেমি আনমনে অন্য দিকে চেয়ে বলল, তাই নাকি ?

তুই সব ঘটনার একদম মাঝখানে থেকেও কোনো খোঁজ রাখিস না। বড্ড বোকা তুই। নিজের স্বার্থ সম্পর্কে তোর আর একটু কনশাস হওয়া দরকার।

রেমি একটা দীর্ঘশ্বাস ফেলল। চোখে অবশ্যস্তাবী জলটুকু মুছে নিল আঁচলে। জয়ন্তুর কথা তার যে খুব বিশ্বাস হচ্ছিল তা নয়। ধুব মেয়েদের তেমন পাতা দেয় না কোনোদিনই। তবু যদি এই গুণ তার দেখা দিয়ে থাকে তবে আজ রেমির পায়ের নীচে সত্যিই জায়গা নেই।

জয়ন্ত বলল, সেকলে মেয়েমানুষের মতো কাঁদছিস কেন ? রুখে দাঁড়াতে পারিস না ! রুখে দাঁড়াবো ! কীভাবে ?

লোকটার মুখের ওপর বলে দে, তোমার নামে এই সব রটেছে। সত্যি কিনা বলো।

রেমি জবাব দিল না।

জয়ন্ত বলল, ব্যাপারটা শুধু লাম্পটেই শেষ হবে না। তোর স্বস্তুর পলিটিকস করে, অধীরও পলিটিকস করে। অধীর স্মল ফ্রাই, কিন্তু একটা এলাকায় তার অনেক ফলোয়ার আছে। দু চারটে মারডার ওদের কাছে কিছুই না। তোর স্বস্তুর মন্ত্রী এবং পুলিশ তার হাতের মুঠোয় বলে এখনো জামাইবাবুর গায়ে হাত পড়েনি। কিন্তু এবার পড়বে।

ওকে ওরা মারবে ?

মারাই তো স্বাভাবিক। দুর্গার মতো মেয়ের সঙ্গে সম্পর্ক রাখা মানেই তো বিপদ ডেকে আনা।

দুর্গা যদি বাজে মেয়েই হয়ে থাকে তবে তোর জামাইবাবুকেই শুধু দায়ী করবে কেন ?

দুর্গা বাজে মেয়ে বটে, কিন্তু ওর রিসেন্টলি বিয়ে ঠিক হয়েছে। ঠিক এসময়ে ওকে নিয়ে ব্যাঙ্গালোর যাওয়ায় সব ব্যাপারটাই গুলেট হয়ে গেছে।

তাকে এত কথা কে বলল ?

বললাম তো, নাম বলব না।

কেন বলবি না ?

জয়ন্ত মাথা নেড়ে বলে, তোকে জানি ছোড়ি। তুই আর আমাদের লোক নোস, তুই এবাড়িতে মাথা বিকিয়ে দিয়ে বসে আছিস। তোকে বলা যাবে না। তোর ভিতরে ফিউডাল সিস্টেম ঢুকিয়ে দিয়েছে এরা। এ বাড়ির ইজ্জত ঝাঁচাতে তুই সবাইকে ফাঁসিয়ে দিতে পারিস।

রেমি অবাক হয়ে বলে, কী সব যা তা বলছিস তখন থেকে ?

বলছি তোর দুর্দশা দেখে। শো কেসের পুতুল হয়ে রইলি। যা বোঝাচ্ছে তাই বুঝছিস। তোর ব্যক্তিত্ব নেই।

রেমি হঠাৎ স্বলে উঠে বলল, ভাবিস না। যদি ঘটনাটা সত্যি হয় তবে তোর জামাইবাবুকে আমি ছেড়ে দেবো না। আর যদি সত্যি না হয় তবে তোকেও ছেড়ে দেবো না।

জয়ন্ত স্নান একটু হাসল, জানি। পারলে আমাকে বোধহয় এখনি কোতল করতিস। তবে বলছি শোন, কথাটা উড়ো কথা হলে তোকে বলতাম না।

জয়ন্ত চলে যাওয়ার পর অস্থির রেমি কতবার যে ঘর বার করল তার সংখ্যা নেই। বাথরুমে ঢুকে স্নান করল। বালিশে মুখ গুঁজে শুয়ে রইল কিছুক্ষণ। ছাদে গিয়ে পায়চারি করল। তারপর অনেক ভেবেচিন্তে টেলিফোন করল ধুবর অফিসে।

আমি রেমি বলছি।

বলো। কী খবর ?

তুমি একটু তাড়াতাড়ি বাড়ি ফিরবে আজ ? জরুরী দরকার ।

আজ যে পারটি আছে সিস্টার ।

দরকারটা ভীষণ জরুরী ।

তা বুঝতে পারছি । একটু ঝেড়ে কাশো না । কী হয়েছে ?

ফোনে বলা যায় না ।

যায় না ? সে কী ? আমাকে তো কেউই কিছু বলতে বাকি রাখে না । প্রকাশ্যেই বলে ।  
টেলিফোনে বলতে পারবে না কেন ?

বলছি তো, বলা যাবে না । তুমি তাড়াতাড়ি এসো ।

জয়ন্ত তোমাকে কিছু বলে গেছে নাকি ? খুব সিরিয়াস কিছু ? এবং আমাকে নিয়ে ?

রেমি স্তম্ভিত হয়ে গেল । জয়ন্ত দুপুরে এসেছিল, খবরটা ওর জানার কথাই নয় । বিশ্বয়টাকে  
নিজের ভিতরে ছিপি এঁটে রেখে রেমি বলল, সব খবরই রাখো তাহলে !

আরে ভাই, আমি রাখি না । তবে সিস্টেমটা চালু আছে । শালাবাবু কী বলে গেছে বলো তো ?

অনেক কিছু । কথাগুলো সত্যি কিনা জানতে চাই ।

না শুনলে কী করে বলব সত্যি কিনা ।

অধীর পাণ্ডা নামে তোমার এক বন্ধু আছে ?

আছে । আগে বন্ধু ছিল, এখন ঘোর শত্রু । আর কী জানতে চাও ?

সে তোমার শত্রু হল কেন ?

তা কি শালাবাবু বলে যায়নি ?

বলেছে । তবু তোমার মুখ থেকে শুনতে চাই ।

জ্বালালে সিস্টার । শুনে তোমার লাভ কী বলো তো !

তুমি কার সঙ্গে ব্যাঙ্গালোরে গিয়েছিলে ?

কারো সঙ্গে নয় । হিজ হিজ হজ হজ ।

তার মানে ?

তার মানে দুর্গার স্নেনের টিকিট সে নিজেই কেটেছিল । আমারটা কেটেছিল অফিস ।

তোমরা একসঙ্গে গিয়েছিলে তো !

হ্যাঁ, তবে এয়ারপোর্ট অবধি ।

তার মানে কী ?

তার মানে দুর্গাকে এক জায়গায় পৌঁছে দেওয়ার কথা ছিল । দিয়েছি । শালাবাবু অন্যরকম  
ব্যাখ্যা দিয়েছে তো !

দিয়েছে । কিন্তু সেটা কি মিথ্যে ?

না, না । আমি বরং বলি, ওটার বেসিসে তুমি একটা ডিভোর্সের মামলা আনো । আমি লড়ব না ।

রেমি রেগে যেতে পারছিল না । তার উদ্বিগ্ন বৃকে ধ্রুবর এইসব ইয়ার্কি এক ধরনের প্রলেপ  
দিচ্ছিল । সে বলল, ঠিক করে বলো ।

আমি তো ঠিক করেই বলছি ।

তোমরা একসঙ্গে ছিলে না ?

দুর্গাকে তো তুমি চোখেও দেখনি সিস্টার ।

তাতে কি ?

দেখলে বুঝতে ওর সঙ্গে থাকার চেয়ে একটা রয়্যাল বেঙ্গল টাইগারের সঙ্গে থাকাও ভাল ।

তুমি ওকে কার কাছে পৌঁছে দিয়েছো ?

ভেল-এর একজন ইনজিনিয়ারের ডেরায় । ভাল ছেলে । ব্রাহ্মণ ।



সে ওর কে হয় ?

আমি তোমার কে হই ?

স্বামী আবার কে ?

স্বামী কথাটা বড্ড ভারী । ফিউডালিজমের গন্ধ আছে । বর বরং বেটার ।

ঠিক আছে । বর ।

ওই ছেলেটাও দুর্গার তাই ।

কী করে হল ?

হয়ে গেল । প্রেমের ফাঁদ পাতা ভুবনে ।

ইয়ার্কি কোরো না ।

তুমি যে আমার গুরুজন তা মাঝে মধ্যে ভুলে যাই ।

গুরুজন নই, তবে এখন ব্যাপারটা সিরিয়াস । এ সময়ে ইয়ার্কি ভাল লাগে না ।

গোটা জীবনটাই ইয়ার্কি সিস্টার । এ গ্রেট ইয়ার্কি অফ দি ক্রিয়েটর ।

আমি ফিলজফি শুনতে চাই না । দুর্গার ব্যাপারটা বলো ।

বললাম তো ।

ওর বর ব্যাঙ্গালোরে কী করছিল ?

বললাম তো চাকরি ।

আহা তা জানতে চাইছি না । ওখানে ওর তো বিয়ে ঠিক ছিল না !

বিয়ে ঠিক না থাক, হৃদয়টা ছিল ।

কী করে ?

তুমি মাইরি একদম মগজ খেলাও না আজকাল । মরচে পড়ে যাচ্ছে । ছেলেটার সঙ্গে দুর্গার আগারস্ট্যাণ্ডিং ছিল । এখানে বিয়ে ঠিক করেছিল অধীর । জোর করে । ছোঁড়াটাও ভাল নয় । তাই আমাকে ধরেছিল দুর্গা । আমি বেরাল পার করে দিয়েছি ।

দুর্গা তোমার সঙ্গে ফেরেনি তাহলে ?

কোন দুঃখে ? দিব্যি জমিয়ে বসে গেছে ব্যাঙ্গালোর ।

সিঁদুর পরছে ?

পরবে না কেন ?

ঠিক আছে । ছাড়ছি । পরে কথা হবে ।

শোনো সিস্টার ।

বলো ।

আমার কথা ফেস ভ্যালুতে বিশ্বাস করে নিও না । ভাল করে তদন্ত করো ।

করার দরকার আছে কি ?

ডিভোর্সের চানসটা ফসকাবে কেন ভাই ?

আমি কি খুব ডিভোর্স চাই নাকি ?

তুমি না চাও তোমার ভাই চাইতে পারে ।

মোটাই নয় ।

বোকা মেয়ে । ভাইটিকে তো চেনো না ।

কেন সে আবার কী করেছে ?

কিছু করেনি এখনো । তবে করতে চাইছে ।

কী করতে চাইছে ?

লঙ্কাপুরী থেকে বন্দিনী সীতাকে উদ্ধার করতে চাইছে বোধহয় ।

সীতা কি আমি ?

আলবৎ । কৃষ্ণকান্তবাবু রাবণ ।

আর তুমি ?

আমি বোধহয় বিভীষণ । রামকে হেলপ করতে চাইছি ।

তার দরকার নেই । আমি তোমার কথা বিশ্বাস করেছি ।

একটা দীর্ঘশ্বাস ফেলে ধুব বলে, ভুল করছ সিষ্টার ।

করলে বেশ করছি । তুমি বার বার সিষ্টার বলবে না ।

কেন, সম্পর্কটা তো প্রায় তাই ।

মোটাই নয় । এসো আগে, তার পর দেখাবো সম্পর্কটা কী !

॥ ২৭ ॥

শচীন অনেকক্ষণ কাজ করল । কাছারিঘরে মস্ত আলো জ্বেলে দিয়ে গেছে চাকর । কর্মচারীরা তটস্থ হয়ে অপেক্ষা করছে । একটা কারুকাজ করা তেপায়ায় ভারী রূপোর থালায় ঢাকা দেওয়া খাবার আর রূপোর গেলাসে জল অপেক্ষা করছে অনেকক্ষণ ।

শচীন বুঝতে পারছে, জমিদারীর অবস্থা খুব খারাপ নয় । কিন্তু ঠিকমতো তদারকী হয়নি বলে আদায়পত্র ভীষণ কম হচ্ছে কয়েকবছর । একটু চেষ্টা করলে এবং সতর্ক থাকলে সংকট কাটিয়ে ওঠা যাবে । কিন্তু কাজটা করবে কে ? শচীন জানে, হেমকান্ত আপনভোলা লোক । বিষয় আশয়ে মন নেই । তাঁর ছেলেরা জমিদারীতে আগ্রহী নয় । জমিদারী হল ভাগের মা । হেমকান্তর সম্পত্তি ভাগ বাঁটোয়ারা হয়ে যে হিস্যা তারা পাবে তা লাভজনক হওয়ার সম্ভাবনা কম । তাই তারা অন্যান্য কাজ করারারে নেমে পড়েছে ।

শচীন আর একটা ব্যাপারও বুঝতে পারছে । হেমকান্ত তাকে জামাই করতে চান সম্ভবত এই জমিদারী দেখাশোনা করার জন্যই । এ বাড়ির জামাই হয়ে বিষয়-সম্পত্তি দেখাশোনা করতে শচীনের আপত্তি নেই । বিশাখাকে সে বাল্যকাল থেকে দেখে আসছে । ভারী সুন্দর ফুলের মতো মেয়ে । মুখখানা মনে পড়লেই বুক তোলপাড় করে । শচীন অবশ্য খুব ভাবালু নয় । বরং বাস্তববাদী । কিন্তু পুরুষ তো । সুন্দরী মেয়ে দেখে কোন পুরুষের না বুক তোলপাড় হয় ?

শচীন তাই খুব আগ্রহ আর নিষ্ঠার সঙ্গে হেমকান্তর জমিদারী জরীপ করছে । টাকার জন্য নয়, বিশাখার মুখ চেয়েই । এ বাড়ির মান সম্মান রাখা তারও কর্তব্য ।

বিশ্বযুদ্ধের পর গোটা দুনিয়াতেই একটা মন্দা চলছে । এ দেশের লোকের হাতে বিশেষ টাকা নেই । নগদ টাকার টানটানি থেকেই বোধহয় খাজনা আদায়েও মন্দা চলছে । উপরন্তু হেমকান্ত পাওনা আদায়ে পট্ট নন । গত বছর দুয়েকের মধ্যে কম করেও তিনটে মহাল হেমকান্ত প্রায় জলের দরে ছেড়ে দিয়েছেন । নতুন কোনও বন্দোবস্তও হয়নি । কয়েকটা মোকদ্দমা হেরে গেছেন তদবিরের অভাবে ।

শচীন একটা দীর্ঘশ্বাস ফেলল ।

মুহুরি রাখাল বলল, শচীনবাবু, এখনও কিছু মুখে দিলেন না ।

দিচ্ছি । শচীন হাসিমুখেই বলে । তারপর আবার কাগজপত্রে ডুব দেয় । হেমকান্তর নায়েবমশাই বুড়ো মানুষ । রাতে চোখে ভাল দেখেন না বলে এসময়টায় আসেনও না । একটা ছুটির দিনে এসে তাঁর সঙ্গে সকালের দিকে বসে দরকার ।

শচীন কাজ রেখে খাবারের ঢাকনা খুলল । বিশাল আকারের গোটা আষ্টেক মিষ্টি, কমলা লেবু,

ক্ষীর, নাড়ু, এক বাটি পায়েরস। এত খেতে পারে নাকি কেউ ! রোজই সে অর্ধেকের ওপর পাতে ফেলে রেখে যায়। কমিয়ে আনতে বললে কেউ গা করে না। অপচয় এদের গায়ে লাগে না বোধহয়। কিন্তু সে গরীব ঘরের ছেলে, তার লাগে।

বড় কষ্টে মানুষ হয়েছে তারা। শতীনের বাবার আইনের ব্যবসা জম্মতে সময় লেগেছিল অনেক। সে যে-বাড়ির জামাই হতে চলেছে সেই বাড়ির অনেক দাক্ষিণ্য তাদের এক সময় হাত পেতে নিতে হয়েছে।

শতীন সেসব ভোলেনি।

খাওয়া শেষ করে কাগজপত্র গুছিয়ে রাখতে বলে শতীন ওঠে।

রাখাল বলে, একবার মনুদিদির সঙ্গে দেখা করে যাবেন। ঠাকুরবাড়িতে আপনার জনাই বসে আছেন।

শতীন অবাক হল না। মনুদিদি অর্থাৎ রঙ্গময়ীর সঙ্গে তার বেশ সহজ সম্পর্ক। ইদানীং বিয়ের সম্বন্ধ হওয়াতে মনুদিদি প্রায়ই যায় তাদের বাড়িতে। বয়সে তার চেয়ে বেশী বড় নয়, তাই তাদের মধ্যে কিছু ঠাট্টা ইয়ার্কিও হয়।

শতীন ঠাকুরমণ্ডপের দিকে হাঁটতে হাঁটতে একবার বাড়ির দিকে চাইল। মস্ত বাড়ি। অনেক জানালা দরজা, বহু ঘর। কোথায় বিশাখা আছে কে জানে। বৃকের মধ্যে একটা উদ্বেল রহস্যময় আনন্দ সে টের পায়। বিশাখা কি তাকে লক্ষ্য করে?

আরতি হয়ে গেছে। ঠাকুর মণ্ডপ জনশূন্য। সামনের বিশাল বারান্দায় একা রঙ্গময়ী বসে আছে। মুখখানা গম্ভীর। শতীনকে দেখে অবশ্য মুখে হাসি ফুটল। বলল, এসো।

শতীন জুতো খুলে বারান্দায় উঠে সিঁড়িতে পা রেখে বসল।

দু চারজন এসময়ে চরণামৃত আর ঠাকুরের আশীর্বাদী ফুল নিতে আসে। রঙ্গময়ী পাশে তামার কোষাকুশি আর পরাত নিয়ে বসে। অভ্যাসবশে একটু চরণামৃত দিল শতীনকে। তারপর বলল, এস্টেটের অবস্থা কি খুব খারাপ?

খুব নয়। তবে খারাপই। ঠিকমতো দেখাশোনা হচ্ছে না।

রঙ্গময়ী একটা দীর্ঘশ্বাস ফেলে বলল, এরকমই তো হওয়ার কথা। কৃষ্ণর বাপের তো বিষয়ে মন নেই।

তা জানি।

এখন তুমি ভরসা। যদি একটু সামলে দিতে পারো।

শতীন হেসে বলল, আমি উকিল মানুষ। জমিদারীর কী বুঝি? এসব সামলানোর জন্য পাকা লোক দরকার।

সে আর কোথায় পাওয়া যাবে? কৃষ্ণর বাপ তোমার ওপরেই নির্ভর করে আছে।

শতীন মাথা নীচু করে বলে, আমি যতটুকু সাধ্য করব।

কোরো। কৃষ্ণর বাপের পক্ষে কিছুই সামাল দেওয়া সম্ভব নয়। এমন মানুষ কাছা দিতে কোঁচা খুলে পড়ে। দায়-দায়িত্বও কিছু কম নয় মাথার ওপর। মেয়ের বিয়ে বাকি, একটা ছেলে এখনো মানুষ হয়নি। ঠাট্টাবাট্টো তো রাখতে হয়।

তা তো ঠিকই। তবে এখনই খুব একটা দুশ্চিন্তার কারণ নেই। আদায়টা ঠিকমতো করতে হবে। মাঝে মাঝে ওঁর একটু মহালে যাওয়া উচিত। প্রজারা এতে খুশি হয়।

সে কি আর উনি যাবেন?

যেতে পারলে ভাল।

তুমি বুঝিয়ে বোলো। উনি তোমার জন্য অপেক্ষা করছেন।

শতীন পকেট থেকে ঘড়িটা বের করে দেখে নিল। রাত হয়েছে।

রঙ্গময়ী বলল, একটু বোসো । তোমার সঙ্গে আমার দু' একটা কথা আছে ।

বলুন ।

এখানে যদি তোমার বিয়ে হয় তাহলে কি রাজেনবাবু খুব বেশী দাবী-দাওয়া করবেন ?

শচীন একটু অবাক হয় । এ প্রশ্নের জবাব দেওয়ার কথা তার নয় । মাথাটা নামিয়ে বলল, বাবার সঙ্গেই এ নিয়ে কথা বলবেন ।

সে তো বলবই । তবে তুমি নিজে তো এস্টেটের অবস্থা দেখতেই পাচ্ছে । উনি কতটা খরচ করতে পারবেন তার একটা আন্দাজও নিশ্চয়ই হয়েছে ।

শচীন একটু হেসে মাথা নেড়ে বলে, মনুদি, এসব নিয়ে কথা বলতে আমি পারব না ।

রঙ্গময়ী একটু চুপ করে থেকে বলে, আমার ভয় কী জানো ? দাবী-দাওয়া বেশী হলে না আবার বিয়েটাই ভেঙে যায় ।

শচীন খুব গভীর মুখে নিজের হাতের তেলো দেখতে লাগল ।

রঙ্গময়ী হঠাৎ বলে, কোকাবাবুর এক নাতি আছে । শরৎ । তাকে চেনো ?

শরৎকে চিনব না কেন ? আমার চেয়ে বয়সে কিছু ছোটো । খুব চিনি ।

কেমন ছেলে ?

ভালই তো ।

শুনি, ছেলেটার স্বভাব তেমন ভাল নয় ।

কেন, খারাপ কিসের ?

শুনেছি, মদ-টদ খায় ।

সে জমিদারের ছেলেদের একটু ওসব দোষ থাকেই ।

কই, এই বংশের কেউ তো খায়নি ।

শচীন বলে, এ বাড়ি হয়তো অন্যরকম । হঠাৎ শরতের কথা উঠছে কেন ?

রঙ্গময়ী কথাটার জবাব চট করে দিল না । সময় নিল । তারপর আস্তে করে বলল, শরতের সঙ্গে কি তোমার ঘনিষ্ঠতা আছে ?

না । ওর দাদা আমার সঙ্গে পড়ত । কখনো কখনো ওদের বাড়িতে গেছি ।

রঙ্গময়ী একটা শ্বাস ফেলে বলে, ও তরফ থেকেও বিশাখার সম্বন্ধ এসেছে । আমাদের কারো ইচ্ছে নেই অবশ্য ।

শচীনের বুকের মধ্যে একটু দূরদূর করে উঠল । শরতের সঙ্গে বিশাখার বিয়ে ? এ কি ভাবা যায় ?

শচীনের মুখখানা স্নান হয়ে গেল । শুধু বলল, ও ।

তুমি কর্তার সঙ্গে দেখা করে যাও ।

শচীন উঠে দাঁড়াল । অপমানে তার মুখচোখ গরম । গায়ে জ্বালা । যদিও সে জানে, রঙ্গময়ী তাকে অপমান করার জন্য কথাটা বলেনি । কিন্তু পণের কথাটাই বা উঠছে কেন ! এরা কি শরতের কথাই ভাবছে তাহলে ?

শচীন অঙ্ককার বারবাড়ির মাঠটা পেরোতে পেরোতে খুব অনামনস্ক হয়ে গেল । বিয়ে তার অনেক আগেই হয়ে যাওয়ার কথা ছিল । কিন্তু নিজের পায়ে না দাঁড়িয়ে বিয়ে করবে না বলে জিদ ধরায় হয়নি । এতদিন বাদে সে তৈরি হয়েছিল সংসারী হতে । বিশাখার সঙ্গে প্রস্তাব আসায় খুশি হয়েছিল সে । বড় সুন্দরী মেয়ে । সেই প্রস্তুত মনটাকে কি ভেঙে দেবে এরা ?

ভারী দোলাচল তার মনের মধ্যে ।

হেমকান্ত নীচের মস্ত বৈঠকখানায় বসে আছেন । নিকর্মা পুরুষদের শচীন সহ্য করতে পারে না । কিন্তু হেমকান্ত সম্পর্কে তার একটু দুর্বলতা আছে । এ লোকটাও নিকর্মা বটে, কিন্তু ঐর হৃদয়ের রংটি

শুভ রঙ্গময়ীর সঙ্গে এর প্রেম নিয়ে কিছু মুখরোচক গুজব বাজারে চালু আছে বটে, কিন্তু সেই গুজবও বুড়ো হয়ে মরতে চলল। এখন আর ও নিয়ে কেউ মাথা ঘামায় না।

হেমকান্ত একটা মস্ত ডেক চেয়ারে আধশোয়া হয়ে বসে আছেন। অবসর সময়ে বসে বইটাইও বড় একটা পড়েন না। চুপচাপ বসে থাকেন। কাজ ছাড়া একটা লোক কী করে আয়ুর বিপুল সময় কাটায় তা শচীন ভেবেই পায় না।

হেমকান্ত একটু নড়ে বসে বললেন, এসো।

শচীন বসার পর হেমকান্ত জিজ্ঞেস করেন, কাগজপত্র সব দেখেছো?

সব দেখা হয়নি। তবে কাজ অনেকদূর এগিয়েছে।

কেমন বুঝছে?

শচীন বলল, আপনার দুই ভাই না থাকায় জমিদারীটা ভাগ হয়নি। তা সত্ত্বেও অবস্থা কেন এত খারাপ হল সেটাই প্রশ্ন।

হেমকান্ত বললেন, আমি আমার বউদিকে কিছু দিতে চেয়েছিলাম। সেটা কি সম্ভব? দিতে চাইলে দেবেন। তাতে এমন কিছু ক্ষতি হবে না। তবে তদারকি দরকার।

হেমকান্ত মাথা নেড়ে বলেন, কে করবে? ছেলেরা কাছে থাকে না। আমার ওসব ভাল লাগে না। বেচে দিলে কিরকম দাম পাওয়া যাবে বলতে পারো?

বেচে দিতে চাইছেন?

রেখে কী হবে? নগদ টাকাটা ছেলদের মধ্যে ভাগ করে দিয়ে কাশী-টাশী কোথাও চলে যাওয়ার কথা ভাবছি।

শচীন চুপ করে রইল।

হেমকান্ত আবার জিজ্ঞেস করেন, কত দাম উঠবে বলে মনে হয়?

ঠিক এখনই বলা যাবে না। অ্যাসেসমেন্ট করাতে হবে। তবে যা মনে হয় দাম খুব খারাপ হবে না।

হেমকান্ত চুপ করে রইলেন। কিছুক্ষণ বাদে বললেন, সংসার বড় খারাপ জায়গা। বুঝলে; আমি যে এত গা বাঁচিয়ে চলি তবু সংসারের ধূলা-কাদা নিত্যদিন আমার গায়ে এসে লাগে।

শচীন একথার কী জবাব দেবে। এ তো বিস্কন্ধ মনের স্বভাবোক্তি। সে বড় জোর প্রতিধ্বনি করতে পারে। কিন্তু সেটা মিথ্যাচার হবে। সংসার সম্পর্কে অতটা তিক্ততা তার এখনো আসেনি।

হেমকান্ত শচীনের মুখের দিকে কিছুক্ষণ তাকিয়ে থেকে বললেন, তোমার বাবাকে আমি একবার আসতে বলে পাঠিয়েছি। আমার খুব ইচ্ছে, তোমার সঙ্গে বিশাখার বিয়ে হোক। এ বিয়েতে তুমি রাজি?

শচীন মাথা হেঁট করে রইল। ভিতরটা নুলছে। বিশাখা যদি তার বউ হয় তবে খুবই খুশি হয় সে। কিন্তু কথাটা তো মুখ ফুটে বলা যায় না। উপরন্তু রঙ্গময়ীর কথার মধ্যে একটু অনারকম আভাস পাওয়ায় কাজটা আরও শক্ত হয়েছে। কী জবাব সে দেবে।

হেমকান্ত বললেন, লজ্জা পেও না। আমি সনাতনপন্থী বটে, কিন্তু অভিজ্ঞতা থেকেই জানি পাত্র পাত্রীর অমতে তাদের বিয়ে হওয়া উচিত নয়।

শচীন বুদ্ধিমান ছেলে। জবাবটা ঘুরিয়ে দিল। বলল, আপনি বাবার সঙ্গে কথা বলুন।

তোমার তাহলে অমত নেই?

না।

আমার মেয়েটি বোধ হয় দেখতে খারাপ নয়। তুমিও তাকে দেখে থাকবে। কিন্তু চেহারাই তো সব নয়। লেখাপড়া শেখেনি, ঘরবন্দী জীবন কাটিয়েছে। কাজেই মনটাও হয়তো একটু সঙ্কীর্ণ হয়ে গেছে। কিন্তু আমি মনে করি, উদারচেতা, চরিত্রবান পাত্রের হাতে পড়লে তার মনের পরিবর্তন

ঘটতে দেবী! হবে না।

শচীন এ বিষয়ে কী আর বলবে চুপ করে রইল।

হেমকান্ত নিজেই আবার বলেন, আমার রক্ত তো ওর গায়ে আছে। তুমি অনেকক্ষণ পরিশ্রম করেছে। এবার এসো। গাড়িটা বরং তোমাকে পৌঁছে দিয়ে আসুক।

তার দরকার নেই। আমার সাইকেল আছে

বিষয় সম্পত্তি বিক্রি করে দেবো না রাখব তা নির্ভর করছে তোমার মতামতের ওপর। আমার খুব ইচ্ছে, বিশাখার সঙ্গে তোমার বিয়ে হওয়ার পর এই এস্টেটের সবরকম ভার তুমিই নাও। ছেলেরা যদি কখনো আগ্রহী হয় ভাল। না হলে বরাবর তুমিই সব দেখবে, ভোগ করবে।

শচীন নিজের ভিতরে খানিকটা রক্তোচ্ছ্বাস টের পেয়ে ধীরে ধীরে উঠল। একটু মাতাল-মাতাল লাগছিল তার।

বার বাড়িতে এসে সে অন্ধকারে তার সাইকেলে উঠে পড়ল।

শচীন লক্ষ্য করল না দোতলার বারান্দা থেকে এক জোড়া চোখ খুব সর্পিলা দৃষ্টিতে লক্ষ্য করছিল তাকে। বিশাখা।

বিশাখা জানে, আজ শচীন বাড়ি ফিরেই সুফলার কাছে বিকেলের বৃত্তান্ত শুনবে। বিয়েটা হয় তো তবু ভেঙে যাবে না। কিন্তু ধাক্কা খাবে। দ্বিধা দেখা দেবে, সন্দেহ আসবে।

একজন দাসী এসে খবর দিল, কর্তাবাবু ডাকছেন।

বিশাখার মুখটা শুকিয়ে গেল। কিন্তু বুক দূর দূর করল না। প্রকৃত পক্ষে ইদানীং তার ভয়টয় কমে যাচ্ছে। বাবার প্রতি তার কিছু সমীহ ছিল। কিন্তু আজ কাল আর ততটা নেই। বাবার কাণ্ডজ্ঞান সম্পর্কে তার সন্দেহ দেখা দিয়েছে। তার দিদিদের দুজনেরই জমিদার বাড়িতে বিয়ে হয়নি বটে, কিন্তু যোগ্য ঘরে হয়েছে। শুধু তার বেলাতেই বাবা কেন যে হাঘরে একটা পরিবারকে বেছে বের করলেন তা কে জানে।

বিশাখা নীচের বৈঠকখানায় কুণ্ঠিত পায়ে ঢুকে বলল, আমাকে ডেকেছেন?

হেমকান্ত স্নেহের স্বরে বললেন, এসো বোসো আমার কাছে।

বিশাখা ডেকচেয়ারের পাশে একটা টুল টেনে এনে বসে।

হেমকান্ত হেসে বললেন, আর একটু কাছে এসো। আমার মাথাটা একটু চুলকে দাও।

বিশাখা একটু অবাক হয়। জীবনেও বাবা তাকে বা আর কাউকে নিজের কোনো রকম সেবা করতে ডাকেননি। এই প্রথম।

বিশাখা একটু হাসল। বাবা খুব দূরের মানুষ। অচেনার এক অস্পষ্ট ঘেরাটোপে আবৃত। কখনো কখনো বাবাকে তার রক্তমাংসের মানুষ বলেই মনে হয় না। ব্যথা, বেদনা, ক্রৈব্যা, আকাঙ্ক্ষা কিছুই যেন নেই। এ কেমন পাথরের মানুষ!

আজ সে বাবার মাথায় ঘন চুলের মধ্যে হাত ডুবিয়ে এক অদ্ভুত আনন্দ পেল। রক্ত যেন কথা বলে উঠল রক্তের সঙ্গে। সে যে এই মানুষেরই অভ্যস্তর থেকে জন্মলাভ করেছে সেই সত্য সামান্য এই স্পর্শে যেন উন্মোচিত হয়ে গেল।

সযত্নে সে বাবার চুলের গোড়ায় নরম আঙুলে চুলকে দিতে লাগল। হেমকান্ত আরামে চোখ বুজলেন। তার পর বললেন, পাকা চুল হয়েছে নাকি? মাথাটা খুব চুলকোয় আজকাল।

বিশাখা মাথা নেড়ে বলে, না তো! আপনার মাথায় একটাও পাকা চুল নেই

কী করে বুঝলে? ঝুঁজে তো আর দেখনি!

কাল দেখে দেবো। দুপুরে। কিন্তু অমনিও মাঝে মাঝে চুলের গোড়া চুলকোয়। খুসকি হয়েছে বোধ হয়।

তাও হতে পারে। তবে বয়সও হল, চুল পাকলেও বলার কিছু নেই।

হেমকান্ত কথাটা বলে একটু প্রশ্নের হাসি হাসলেন। বিশাখার হাতের চুড়ির মৃদু শব্দ হচ্ছে। হেমকান্ত বললেন, এবার তোমাদের একটা ব্যবস্থা করে ফেলতে পারলেই আমি নিশ্চিত হই। বুঝলে, তোমার মা নেই, তার কর্তব্য তো আমাকেই করতে হবে।

বিশাখা কী বুঝল কে জানে। তবে তার চুড়ির শব্দ বেড়ে গেল।

হেমকান্ত বললেন, বয়সকালে মেয়েদের পাত্রস্থ করা অবশ্যই কর্তব্য। সে কাজে আর দেরী হওয়া উচিত নয়।

বিশাখা চুপ।

হেমকান্ত মাথাটা এলিয়ে দিয়ে চোখ বুজে রেখে বললেন, বিয়েতে আমি পাত্র ও পাত্রী দুজনেরই মতামতে বিশ্বাস করি। তবে মত দেবে খুব ভেবে চিন্তে, সব দিক বিবেচনা করে। বর্ণ, বংশ, বিদ্যা, চরিত্র, স্বাস্থ্য সব দিক দিয়েই বিচার করা দরকার। তোমার কোষ্টী আমি বিচার করতে পাঠিয়েছি। সেটার ফলাফলও জানতে হবে। যোটক বিচার সবার আগে।

বিশাখার ভ্রু কঁচকে যাচ্ছে। মুখে রক্তোচ্ছ্বাস। বাবা কি এবার পাত্রের কথা তুলবেন?

হেমকান্ত তুললেন। আশ্তে করে বললেন, পাত্রের জন্য আমি বেশী খোঁজাখুঁজি করিনি। শেষ অবধি সর্বত্রই ভাগ্য জয়ী হয়। মানুষ তার সাধ্যমতো বিচার বিবেচনা করে বটে, তবু ভাগ্যের হাতেই পরিণতি। তুমি অবশ্য প্রশ্ন তুলতে পারো, আমি কেন কোনো জমিদার বাড়িতেই তোমার বিয়ের সম্বন্ধ করলাম না। তার কারণ, আমি নিজে জমিদার। আমি জানি, জমিদারীর আয় সম্পর্কে এখন আর নিশ্চিত হওয়া যাচ্ছে না। একটা সংকট চলছে। আমাদেরও চলছে। সেদিন কোকোবাবুদের নায়েবের কাছে শুনলাম, ওদেরও মহাল বিক্রি হবে। কারোই অবস্থা খুব ভাল যাচ্ছে না।

বিশাখা চুপ করে রইল। হাত কিছু স্নর্থ।

হেমকান্ত বললেন, তাই আমি নিউ জেনারেশনের মধ্যে পাত্র খুঁজছিলাম। এমন পাত্র যে স্বনির্ভর, লড়াই করতে জানে, দুনিয়াটাকে চেনে। বুঝেছো?

বিশাখা 'হঁ' দিল।

হেমকান্ত খুশি হয়ে বললেন, আমি আর একটা জিনিসকেও খুব মূল্য দিই। চরিত্র। পুরুষ মানুষের ওটা বড়ই দরকার।

বিশাখা চুপ করে রইল। তবে মনে মনে খুশি হল না। সে তার বাবাকে জানে। চরিত্রবান হিসেবে একসময়ে তাঁর খ্যাতি ছিল। এখন নেই। পুরুষ মানুষের চরিত্রটা কোনো স্থায়ী সত্য নয়। তা বদলায়।

হেমকান্ত বললেন, আমি রাজেনবাবুর ছেলে শচীনকে পাত্র হিসেবে স্থির করেছি। এখনো কথা দিইনি। তুমি একটু ভেবে আমাকে মতামত দিও। আগেই বলেছি, আবার বলছি, অমত থাকলে আমার শত পছন্দ হলেও বিয়ে দেবো না। নিজের মুখে যদি জানাতে লজ্জা পাও তো মনুকে বোলে।

বিশাখা শ্বাসটুকু পর্যন্ত ভাল করে ছাড়ছিল না।

হেমকান্ত বললেন, ছেলেটি কতদূর ভাল তা হয়তো এখনই বোঝা যাবে না। ঘর করলে বুঝতে পারবে। এখন যাও মা, আমার মাথা আর চুলকোতে হবে না।

বিশাখা ধীর পায়ে ঘর থেকে বেরিয়ে ওপরে উঠে এল।

আজকাল কৃষ্ণকান্ত তাকে 'শচীরানী' বলে খ্যাপায়। সে রাগে। কৃষ্ণকান্ত মণ্ডারমশাইয়ের কাছে পড়া শেষ করে সদ্য ওপরে উঠে এসেছে। বইপত্র টেবিলে ঝড়াক করে ফেলে দিয়ে বলল, এই শচীরানী, গোছা তো! :

বিশাখা আচমকা ঠাস করে তার গালে একটা চড় কষাল।

একদিন সকালবেলায় বেলুন দিয়ে সাজানো একটা জীপগাড়ি ঘাঁস করে এসে থামল রেমির বাপের বাড়ির সামনে। হুডখোলা জীপ। চারদিকে কয়েক ডজন গ্যাস বেলুন মাথা তোলা দিয়ে আছে। গাড়িতে জনা কয়েক লোক ঠাসাঠাসি করে বসা। প্রত্যেকের চেহরাই খুনীর মতো। চোখ লাল, মুখ গম্ভীর। তবে তারা সব চূপচাপ বসে সিগারেট টেনে যেতে লাগল।

জীপ থেকে নামল খাটো মজবুত চেহারার একটা ছেলে। পা কিছু টলটলায়মান। নেমেই টাল্লা খেয়ে পড়তে গিয়েও জীপের কানা ধরে সামলে গেল। জামার বুকের চারটে বোতাম খোলা। কালো কারে বাঁধা একটা ধুকধুকি বুলছে গলায়।

নেমেই ছেলোটা চৈচিয়ে বলল, এই স্ফালা শুয়োরের বাচ্চা জয়ন্ত, বেরিয়ে আয় স্ফালা ! বেরিয়ে আয় ! বাপের বিয়ে দেখাবো আজ। বেরিয়ে আয় বাপ

গোটা পাড়াটা এই চৈচানিতে হতভম্ব হয়ে গেল। জানালা দরজা খুলে কয়েকটা মুখ উঁকি মেরেছিল। সভয়ে সরে গেল আবার। বাজারের যাত্রীরা সিটিয়ে রাস্তার ধার ঘেঁষে জোর কদমে পেরিয়ে যেতে লাগল জায়গাটা।

আ বেব জয়ন্ত ! এই স্ফালা হারামীর বাচ্চা ! বেরিয়ে আয় বাপের ছেলে হয়ে থাকিস তো ! ছেলোটা তার ভরাট গমগমে গলায় চৈচাতে থাকে।

রেমির বাবা সদর খুলে চৌকাটে দাঁড়িয়ে, অবাক হয়ে দৃশ্যটা দেখে বললেন, কী হয়েছে ? চৈচাচ্ছেন কেন ?

ছেলোটা বুক চিতিয়ে বলল, বেশ করব চৈচাব। আপনার ছেলেকে বের করে দিন।

কেন, ও কী করেছে ?

বহুৎ খারাপ কাজ করেছে। সে সব আমরা বুঝব। আগে বের করে দিন।

রেমির বাবার কেমন যেন ছেলোটাকে চেনা-চেনা লাগছিল। ধরতে পারছিলেন না। চৈচামেচি এবং ঘটনার আকস্মিকতায় তার শরীরে বশও নেই। হাঁ করে ঘটনাটার অর্থ ধরার চেষ্টা করে বললেন, জয়ন্ত বাড়ি নেই।

জয়ন্ত বাড়িতেই ছিল এবং সামনের ঘরে। ঘুমোচ্ছিল। সে রোজই দেবীতে ওঠে। ঘুম খুবই গাঢ়। চৈচামেচি শুনে উঠল এবং ব্যাপারটা বুঝতে একটু সময় নিল। তারপর দরজার দিকে এগোতে যেতেই কোথা থেকে তার মা এসে পথ আটকাল, সর্বনাশ ! কোথায় যাচ্ছিস ? ভিতরের ঘরে যা ! যা শীগগীর ? ওরা খুনে।

কেন কিছু লোক সকালে তাকে খুন করবে তা বুঝতে পারছিল না জয়ন্ত। মাথা এখনও ঘুমের ঘোঁয়াটে ভাবটা কামিয়ে ওঠেনি। তার বাবা দরজা জুড়ে দাঁড়িয়ে আছেন।

মা তাকে প্রায় হাত ধরে টেনে ভিতরের ঘরে নিয়ে এল, যা করার উনি করছেন। তাকে যেতে হবে না।

বাইরের ছেলোটা তখন মুখ ভেঙিয়ে বলছে, বাড়ি নেই, না ? বাড়ি নেই তো কোথায় রাত কাটাতে গেছে ? হাড়কাটা না সোনাগাছি ? বেরোতে বলুন হারামীকে। ওর সঙ্গে আমাদের হিসেব নিকেশ আছে।

রেমির বাবা তাঁর প্রশ্নের উর্ধ্বগতি টের পাচ্ছেন। হাত পা কাঁপছে। মাথাটা ঘুরতেও লেগেছে হঠাৎ। বললেন, ও তো কোনো অন্যায় করেনি। কেন ওকে খুঁজছেন আপনারা ?

অন্যায় করেনি মানে ? আমাদের দোস্তের নামে ওর দিদির কাছে গিয়ে চুকলি খায়নি স্ফালা ? ক্যারেকটারলেস বলেনি ? স্ফালাকে এমনি যদি বের না করেন তবে বহুৎ খারাপ হয়ে যাবে কিন্তু ! আমরা ঘরে ঢুকে টেনে বের করব। কোনো শুয়োরের বাচ্চা আটকাতে পারবে না।



রেমির বাবা এত মুখোমুখি এরকম ঝাঁঝ কখনো সহ্য করেননি। দরজাটা চেপে ধরে নিজেকে দাঁড় করিয়ে রেখে কাতর স্বরে বললেন, ঠিক আছে যদি কিছু বলে থাকে তবে আমি ওকে শাসন করব।

কিসের শাসন মশাই? আপনি বাপ না ভেড়া? আপনার মতো ধ্বজভঙ্গ বাপ পারবে ওসব ছেলেকে শাসন করতে? ওসব বড়কা বড়কা বাত ছাড়ুন, জয়ন্তকে ছেড়ে দিন আমাদের হাতে। টাইট দিয়ে দিচ্ছি।

পাড়াটা প্রথমে ভড়কে গেলেও একেবারে নাকের ডগায় এরকম ঘটনা বেশীক্ষণ চললে মাতব্বররা হস্তক্ষেপ করেই থাকেন। জয়ন্তর বন্ধুবান্ধবও আছে। তবে এদের সঙ্গে টক্কর দেওয়ার মতো কেউ নয়। তবু দুচারজন লোক এগিয়ে এল।

কী হয়েছে ভাই? জয়ন্ত কী করেছে ভাই? আরে অত চটছেন কেন, আমরাও তো পাড়ার পাঁচজন আছি।

রেমির বাবা হঠাৎ ছেলেটাকে চিনতে পেরেছেন। তাঁর গুণধর জামাই ধুবর বন্ধু। এইসব বন্ধুই এখন ধুবকে চালায়, আর ধুবও বোধহয় এই স্তরেই নেমে গেছে। বিয়ের দিন এই ছেলেটা দশটা ডেভিল চপ চেয়ে নিয়ে পাতে চটকে ফেলে গিয়েছিল, সব মনে পড়ছে তাঁর।

পাড়ার লোকদের উদ্দেশ্যে ছোকরা একটা ছোটো বক্তৃতা ঝাড়ল। সারমর্ম হল, তার দোস্ত অর্থাৎ এবাড়ির জামাই একজন অত্যন্ত কারেকটারওলা লোক। সবাই তাকে চেনে। আর তারই আপন শালা সেই ভগ্নীপতিকে ক্যারেকটারলেস বলেছে এবং ঘর ভাঙার জন্য চুকলি খেয়েছে। বলুন মশাইরা এটা কী ধরনের ভদ্রতা!

রেমির বাবা দরজাটা খোলা রেখেই ঘরের সোফায় এসে বসে পড়লেন। কানটান বড্ড গরম। বুকে একটা শ্বাসকষ্ট হচ্ছে। ঘাম দিচ্ছে শরীরে।

ভিতরের ঘরে জয়ন্ত রুখে রুখে উঠছে, আ! ছাড়ো না মা, এটা আমাদের পাড়া। মান্তানী করে চলে যাবে কাজটা অত সহজ নয়। আমাকে বেরোতে দাও।

মা অবশ্য তা দিল না। দড়াম করে একটা দরজা বন্ধ হয়ে গেল।

বাইরে ছোকরাটা তখনো বক্তৃতা চালিয়ে যাচ্ছে। জীপের অন্য লোকগুলো একদম পাথরের মতো চূপ। তারা বাকতাল্লা জানে না। কাজে নেমে পড়ার দরকার হলেই নেমে পড়বে।

পাড়ার মুকব্বিরা বিস্তর বিনয়-টিনয় দেখালেন, জয়ন্তর হয়ে ক্ষমা চাইলেন।

ছেলেটা বলল, সসালার মুগীর কলজে। বেরোলো না। কিন্তু মশাই, আমরা শেষ ওয়ারনিং দিয়ে যাচ্ছি, এরপর এরকম হলে লাশ ফেলে দিয়ে যাবো।

রেমির বাবা মাথায় হাত চেপে বসে রইলেন। জামাই যেমন ছিল ছিল, কিন্তু কেলিংকারির পর পাড়ার কারো জানতে আর বাকি রইল না তাঁর জামাইটি সত্যিই কেমন। মস্তীর ছেলে বলে তো আর লোকের মুখ চাপা থাকবে না।

জীপটা অবশেষে আবার স্টার্ট নিল এবং চলে গেল।

রেমির বাবা উঠে সদর দরজাটা বন্ধ করে দিলেন।

রেমি খবরটা পেল দুপুর নাগাদ। টেলিফোনে। বাপের বাড়ির পাড়ার একটা চেনা ছেলে টেলিফোনে বলল, রেমিদি, যদি পারেন তো একবার চলে আসুন। মেসোমশাই খুব অসুস্থ।

অসুখ! কী হয়েছে? রেমির বুক কঁপে ওঠে।

মনে হচ্ছে হার্ট অ্যাটাক।

কখন হয়েছে?

আজ সকালে একটা দারুন হান্সামা হয়ে গেছে বাড়িতে। তারপর থেকেই শরীর খারাপ। দুপুরে খাওয়ার সময় বুকে ব্যথা উঠে যায়।

এখন ! এখন কেমন ?

ব্যথা হচ্ছে খুব । ডাক্তার এসেছে । আপনাকে খুঁজছেন কেবল ।

এক্ষুণি যাচ্ছি । সকালে কিসের হাঙ্গামা হয়েছে ?

ওঃ সে এসে শুনবেন ।

মারামারি নাকি ?

না । জামাইবাবুর এক দল বন্ধু এসেছিল জয়ন্তদাকে খুন করতে ।

কী বলছিঁস যা তা ?

বিশ্বাস করুন । জীপ গাড়িতে জনা দশবারো গুণ্ডা । সে কি চেচাঁমেচি আর গালাগাল ? জয়ন্তকে মেরেছে ?

না, মাসীমা আটকে রেখেছিলেন ঘরে ।

কেন মারতে এসেছিল ?

তা জানি না । আপনি পারলে চলে আসুন ।

যাবো তো ঠিকই । কিন্তু ব্যাপারটা কিছুই বুঝতে পারছি না ।

এলেই সব শুনতে পাবেন ।

রেমি ফোন রাখল । তারপর আবার ফোন তুলে ধুবর অফিসে ডায়াল করল ।

শোনো, বাবার হার্ট অ্যাটাক !

হার্ট অ্যাটাক ! কখন হল ?

দুপুরে । তুমি একবার যাবে না ?

খুব সিরিয়াস কেস নাকি ?

তা জানি না । এইমাত্র পাড়ার একটা ছেলে ফোন করেছিল । তোমার কয়েকজন বন্ধু নাকি আজ আমাদের বাড়িতে গিয়ে হামলা করেছে । জয়ন্তকে নাকি খুন করতে গিয়েছিল ।

আমার বন্ধু ? ধুবর গলায় রাজ্যের বিশ্ময় ।

বলল তো ।

যাঃ, আবোল তাবোল কে কী বলে ।

সেই থেকেই নাকি বাবার হার্ট অ্যাটাক ।

আমার যাওয়া দরকার বলছ ?

যাওয়া উচিত ।

ঠিক আছে । তুমি চলে যাও । আমি জরুরী একটা কাজ সেরে যাচ্ছি ।

জয়ন্তকে কি তুমি পছন্দ করো না ?

সে কী ? কুটুম মানুষ, অপছন্দের কী আছে ? অ্যাকচুয়ালি ওকে তো আমি এক আধবারের বেশী দেখিওনি । পছন্দ বা অপছন্দ কোনোটাই করার প্রস্ন্ন ওঠে না ।

তবে ছেলেটা, ওকথা বলল কেন ? তোমার বন্ধুরা—

আরে দূর ! তুমিও যেমন । আমার বন্ধুরা তোমার বাড়ি গিয়ে হাঙ্গামা করবে কেন ? তারা কি জানে না যে ওটা আমার স্বশুরবাড়ি ?

রেমির তবু সন্দেহ থেকে যায় । বলে তুমিই ওদের পাঠাওনি তো ?

কী যে বলো রেমি !

রেমি ফোন রেখে উদভ্রান্তের মতো বাইরের পোশাক পরে নিল । ট্যাকসি ডেকে আনল চাকর ।

বাপের বাড়িতে ঢুকেই অল্পক্ষণের মধ্যে রেমি টের পেল, বাবার অসুস্থতা যতটা নয় তার চেয়ে ঢের বেশী আর একটা জিনিস এবাড়ির আবহাওয়াকে ভারী করে রেখেছে । তা হল ভয় । সকলের

চোখে মুখেই একটা আতঙ্ক দেখা যাচ্ছে। এবং আরো যেটা চিন্তার কথা, সবাই তাকে এড়িয়ে যাচ্ছে।

বাবাকে সেডেটিভ দেওয়া হয়েছে। ঘুমোচ্ছেন। ডাক্তার বলে গেছে অ্যাটাক মাইলড বটে, তবে হাট অ্যাটাক যে তাতে সন্দেহ নেই। খুব সাবধানে রাখা দরকার।

রেমি বোকার মতো কিছুক্ষণ তার বাবার বিছানার পাশে বসে রইল। কী করবে ভেবে পেল না।

জয়ন্ত বেরিয়েছিল ওষুধ আনতে। ফিরল। ওষুধগুলো বাবার বিছানার পাশে টেবিলে রাখল। রেমির দিকে তাকালও না। বেরিয়ে গেল ঘর থেকে।

পিছুপিছু এসে রেমি ডাকল, জয়, শোন।

জয়ন্ত বিরক্ত মুখে বলল, বল।

কী হয়েছে রে? তোকে নাকি কারা মারতে এসেছিল সকালে!

সে আর শুনে কী করবি কিছু করতে পারবি

আগে তো শুনি।

জামাইবাবুর কীর্তিমান বন্ধুরা এসেছিল। জীপে করে। পাড়ায় টি টি পড়ে গেছে।

ওরা এসেছিল কেন?

আমার লাশ ফেলবে বলে।

তুই ওদের কী করেছিস?

জয়ন্ত তেতো মুখে বলল, তোকে একটা কথা বলব? তুই আমাদের সঙ্গে আর সম্পর্ক রাখিস না। তাতে তোর ভাল হবে কিনা জানি না, কিন্তু আমরা স্বস্তি পাবো।

ও কথা বলছিস কেন? আমার কী দোষ?

তোর দোষ তুই বোকা। ভীষণ বোকা। ওই স্কাউন্ডেল ধুব চৌধুরিকে তুই অগাধ বিশ্বাস করিস। একটা ট্রেচারাস হামবাগ, লুজ ক্যারেকটার লোক। সেদিন তোকে ছোটো ভাই হিসেবে কয়েকটা কথা বলেছিলাম, সেগুলো তুই ওর কানে তুলেছিস।

তাতে কি? তুলব না?

তোল ক্ষতি নেই, কিন্তু ব্যাপারটাকে আমার বিরুদ্ধে দাঁড় করিয়েছিস।

তুই তো বললি ওকে তোর ভয় নেই।

জয়ন্ত মাথা নেড়ে বলে, ভয় নেই, কিন্তু ঘেরা আছে। আই হেট হিম।

রেমির চোখে জল আসার উপক্রম। সে ধরা গলায় বলল, সব দোষই আমার ঘাড়ে চাপিয়ে দিচ্ছিস কেন? আমি তো ওকে পছন্দ করে বিয়ে করিনি। বাবা নিজে দেখে শুনে বিয়ে দিয়েছে। ও ভাল না খারাপ তা কি জানতাম?

এখন তো জানিস!

রেমি চোখের জল ফেলতে ফেলতেই মাথা নেড়ে বলল, না, এখনো জানি না। তবে মেয়েটাকে নিয়ে ও পালায়নি, একজনের কাছে পৌছে দিতে গিয়েছিল।

হ্যাঁ, দারুণ মহৎ লোক তো। তোকে ও যা বোঝায় তাই জলের মতো বিশ্বাস করিস। তাই না? ঐটেই তোর দোষ। ধুব চৌধুরি আজ যে কাণ্ড করেছে তাতে ওর ফাঁসি হওয়া উচিত।

আমি ওকে এমন কিছু বলিনি যাতে তোকে ওর বন্ধুরা মারতে আসবে।

এল তো! আর বন্ধুদের সব স্ট্যাগার্ড কী! সাত সকালেও ভকভক করে মদের গন্ধ বেরছে মুখ থেকে। প্রত্যেকটার স্ট্যাম্প মারা খুনির চেহারা। জীপগাড়িতে আবার বেলুন লাগানো ছিল।

কাউকে চিনতে পেরেছিস?

না, আমি চিনব কী করে? ধুব চৌধুরি যে সারকেলে যোরে কোনো ভদ্রলোক সেই সারকেলে ঘুরতে পারে না।

রেমি চোখের জল মুছে থমথমে মুখে ভিতরের বারান্দায় দাঁড়িয়ে রইল। জয়ন্ত ঘর থেকে জামাটা ছেড়ে এসে বলল, আমাদের অপমানে তোরা আর কিছু যায় আসে না, জানি। মা বাবাও চাইছে তোরা সঙ্গে সম্পর্ক আর না রাখতে। কথাটা শুনতে ক্রুয়েল, কিন্তু প্র্যাকটিক্যাল টুথ।

তাকে কি ওরা মেরেছে ?

না, মা আমাকে আটকে রেখেছিল ঘরে। ওদের ফেস করেছিল বাবা। যা বলার বাবাকেই বলেছে। সেসব কথা আমার মুখে আসবে না। বস্তির চেয়েও খারাপ ল্যাংগুয়েজ। পাড়ার লোকেরা এসে না পড়লে ওরা ঘরেও ঢুকত।

রেমি তেজী চোখে চেয়ে বলল, তুই কি ভাবিস এর পরেও আমি তোরা জামাইবাবুর পক্ষ নেবো

নিবি কিনা সেটা তোরা পারসোনাল অ্যাফেয়ার। না নিলেই বা কী করবি ? হি ইজ এ হার্ড নাট টু ক্র্যাক। আর একটা কথা, ও লোকটাকে জামাইবাবুটাবু বলা আর পোষাবে না। আমি সব সম্পর্ক অস্বীকার করছি।

কর না। আমিও করছি।

জয়ন্ত এ কথায় একটু হাসল। বলল, অত সোজা নয় রে। তুই মুখে যাই বলিস ওই ধুব চৌধুরি বা তার মিনিষ্টার বাবা এসে সামনে দাঁড়ালেই তোরা সব প্রতিরোধ ভেসে যাবে। তোরা কাছে এখন ওদের ফলস গ্লামারটাই বড়।

আমাকে তুই কী করতে বলিস ?

কিছুই না। তুই ওবাড়িতে ফিরে যা। ধুব চৌধুরির ঘরই কর। আমাদের ভুলে যা।

রেমি একটা দীর্ঘ শ্বাস ফেলল।

জয়ন্ত বেরিয়ে গেলে সে গেল মার কাছে। তার মা খুব সাধারণ মানুষ, তবে রাগী। একসময়ে মায়ের কড়া শাসনে তারা মানুষ হয়েছে। আজও মাকে একটু ভয় পায় রেমি।

মা, আমি কী করব বলো তো ?

রেমির মা ভিতরের ঘরে মুসুন্দি রস করছিলেন। স্বামী জাগলে খাওয়াবেন। রেমির দিকে চেয়ে বললেন, তোকে ধুব কিছু বলেনি ?

না, কী বলবে ?

জয়ের ওপর ওর অত রাগ কেন তা কিছু বলেনি ?

রাগ যে আছে তাও তো জানি না।

মা মুখ নামিয়ে বলে, বড় ঘরের শখ মিটে গেছে বাবা। কী ছোটলোক ! এসব বন্ধু ও কোথা থেকে জোটালো ? ওরা তোরা বাড়িতেও তো যায় !

না, ওর কোনো বন্ধু বাড়িতে আসে না। আমি কি স্বশ্রমশাইকে ঘটনাটা বলব ?

বলে কী লাভ ? এক ঝাড়েরই তো বাঁশ।

রেমি মাথা নাড়ল, না মা, স্বশ্রমশাই অন্যরকম।

তাহলে যা ভাল বুঝিস কর। আমি কিছু জানি না। পাড়ার লোকের কাছে মুখ দেখানোর জো নেই। তার ওপর তোরা বাবার বৃকের দোষ হয়ে গেল।

রেমির চোখমুখ রাগে অপমানে অস্বাভাবিক জ্বলজ্বল করতে লাগল।

বিশাখা ফুঁসতে ফুঁসতে বলল, আর বলবি ?

চড় খেয়ে কৃষ্ণকান্ত হতভম্ব হয়ে গেছে । ছোড়দির সঙ্গে তার সারাদিন নানা কারণে বহুবাব ঝগড়া হয় বটে, কিন্তু মারে না কখনো । তার গাল জ্বালা করছিল । এমন সাঁটানো চড় সে বহুকাল খায়নি । তাকে কেউ মারে না ।

কৃষ্ণকান্ত অবাক গলায় বলে, মারলি ?

বিশাখা রাঙা মুখে বলে, একশবার মারব । মেরে মুখ ভেঙে দেবো ।

ছোড়দির এরকম চেহারা কখনো দেখিনি কৃষ্ণকান্ত । রূপসী রাজকন্যার ভিতর থেকে যেন এক বিষধর বেরিয়ে এসে ফণা তুলেছে । বাস্তবিক ঠিক এই উপমাটিই তার মনে পড়ল । এসব অবস্থায় সাধারণত কৃষ্ণকান্ত প্রতিপক্ষের ওপর ঝাঁপিয়ে পড়ে । আঁচড়ে, কামড়ে, ঘৃষি মেরে ছিন্নভিন্ন করে দেয় । ছোড়দিকে সে অবশ্য তেমন করে মারেনি কখনো । আজও মারল না । শুধু অবাক হয়ে চেয়ে রইল । এই ছোড়দি তার চেনা ছোড়দি নয় । এ এক অচেনা মেয়ে ।

কৃষ্ণকান্ত কয়েক পা পিছিয়ে গেল । বলল, বাবাকে বলে দেবো :

বিশাখা হিংস্র মুখে বলল, যা বলগে যা ।

কৃষ্ণকান্ত অবশ্য নালশেকুটি নয় । ছোড়দির এই রাগের কারণটাও তার জানা নেই । তবে কি “শচীনদা” শব্দটার মধ্যেই কোনো গুপ্ত রহস্য আছে ? ছোড়দির এত ঝাঁঝের অর্থ তার বয়ঃসন্ধির মাথায় ভাল ঢুকছিল না ।

সিঁড়ির মুখটায় দাঁড়িয়ে কৃষ্ণকান্ত বিশাখার চোখের দিকে চেয়ে বলল, তুই আমাকে মারলি কেন ?

তুই ও কথা বললি কেন ?

বললে কী হয়েছে ? শচীনদার সঙ্গে তো তোর বিয়ে হবে ।

কক্ষগো নয় ।

হবেই । আমি শুনেছি ।

হবে না । আমি বলছি

হবে না ? কৃষ্ণকান্ত খুব অবাক আর ব্যথিত হল । মনে মনে শচীনকে সে জামাইবাবু বলে স্থির করে ফেলেছে । ব্যাপারটা তার খারাপও লাগছে না । বড় দুই জামাইবাবুকে সে ভাল করে চেনে না । দেখাই হয় না তাদের সঙ্গে । কিন্তু শচীনদা তার চেনা লোক ।

কৃষ্ণকান্ত বলল, বিয়ে কি ভেঙে গেছে ?

ভেঙে যাবে ।

যাঃ শচীনদা দারুণ লোক ।

সে তোরা তাদের ভাল লোক নিয়ে থাক । আমি বিয়ে করব না । বলে বিশাখা তার ঘরে চলে গেল ।

সিঁড়ির মুখে কৃষ্ণকান্ত একটু ভাবিত হয়ে দাঁড়িয়ে রইল কিছুক্ষণ । ছোড়দি বোকা । খুব বোকা । তবে কৃষ্ণকান্ত বোকা নয় । তার মনে কয়েকটা সম্ভাবনা উঁকি মারল । হয়তো শচীনদার বাবা অনেক পণ আর দানসামগ্রী চেয়েছে । কৃষ্ণকান্ত জানে, তাদের জমিদারীর অবস্থা খুব ভাল নয় । সম্পত্তি আছে বটে, কিন্তু নগদ টাকার খুব অভাব চলছে । সেই কারণে বিয়েটা ভেঙে যেতে পারেও বা । আর একটা হল, হয়তো শচীনদার কোনো খুঁতটুত বেরিয়েছে । কিংবা হয়তো কোষ্ঠীতে মেলেনি । কিছু একটা এরকমই হবে ।

কৃষ্ণকান্ত ঘরে ঢুকল না । নীচের তলায় হেমকান্তের বৈঠকখানায় এসে ঢুকল । এখন হেমকান্ত

নেই। এ সময়টায় উনি ঠাকুরঘরে গিয়ে আস্থিক করেন। চুপচাপ তাঁর ডেক চেয়ারটায় বসে কৃষ্ণকান্ত তার গালে হাত বোলাতে লাগল। খুবই লেগেছে।

বসে থেকে সে অনেক কথা চিন্তা করতে লাগল। শশীদার ফাঁসি হবে। শচীনদা তাকে বাঁচাতে বরিশাল যাচ্ছে। লোকে বলছে, তার বাবাই শশীদাকে ধরিয়ে দিয়েছে। কথাটা কি ঠিক? ছোড়দি শচীনদাকে বিয়ে করতে চায় না কেন? পরশু কোকাবাবুর নাতি শরৎদা তাকে বলেছে, বন্দুক চালাতে শেখাবে। তাদের বাড়িতেও বন্দুক আছে, কিন্তু কেউ চালায় না। তাকে কেউ শেখাবেও না। শরৎদার কাছে শেখাই ভাল।

বন্দুক চালাতে শিখে কী করবে সে? পাখি মারবে, বাঘ মারবে, আর ইংরেজ।

কিন্তু বাবা বলে ইংরেজদের দোষ নেই। দোষ দেশবাসীর। আমরা দুর্বল বলেই ইংরেজ আমাদের ওপর প্রভুত্ব করছে। অকারণে ইংরেজ মারায় বাবার সায় নেই। তার স্কুলের বন্ধুরা বলে, বাবা ইংরেজের লোক। কথাটা কি ঠিক?

কৃষ্ণকান্ত আরামদায়ক ডেক চেয়ারটায় পা তুলে গুটিসুটি হয়ে বসেছিল। শ্রমক্লান্ত শরীরে ঘুমের ঢল নেমে এল আচমকা। ঘুমের মধ্যেই কে যেন—বোধহয় মনুপিসি নড়া ধরে তুলে নিয়ে গিয়ে কয়েক গ্রাস ভাত খাইয়ে দেয়। তারপর নিয়ে বিছানায় শোয়। আর কিছু মনে থাকে না।

সকালে উঠেই সে গেল আস্তাবলে ঘোড়াটায় জিন লাগানো ছিল না। শুধু লাগামটা পরিয়ে কৃষ্ণকান্ত তার পিঠে চেপে এক ছুটে চলে এল শচীনদের বাড়ি।

সামনের মাঠে দাঁড়িয়ে শচীন দাঁতন করছিল। তাকে দেখে বলল, কী রে?

কৃষ্ণকান্ত ঘোড়ার পিঠ থেকে নেমে বলে, তোমার সঙ্গে ছোড়দির বিয়ে হবে না শচীনদা? শচীন স্নান একটু হেসে বলে, তোকে কে বলল

ছোড়দি বলেছে।

বলেছে? তাহলে তো হয়েই গেল।

কেন বিয়ে হবে না বলো তো!

শচীন বলে, আমরা গরীব মানুষ বলেই বোধহয় তোর ছোড়দির পছন্দ নয়।

গরীব

শচীন একটু গম্ভীর হয়ে বলে, ওসব বাচ্চাদের শোনা উচিত নয়।

আমাকে ছোড়দি কাল মেরেছে ওকে শচীরাগী বলে ডেকেছিলাম, তাই।

শচীন আবার একটু হাসে, শচীরাগী মানে কী?

শচীনের বউ।

দূর পাগল! বিয়ের নামেই পাস্তা নেই।

তোমরা কি অনেক টাকা পণ চেয়েছো?

শচীন এবার একটু জোরে হাসে। মাথা নেড়ে বলে, তোকে নিয়ে পারা যায় না। যা একবার মাথায় ঢুকবে তা আর ছাড়তে চাস না।

বলো না।

না রে। পণ-টন চাইবার সুযোগই হয়নি। শুনছি ভাল জায়গা থেকে তোর ছোড়দির সম্বন্ধ এসেছে।

ভাল জায়গা?

কোকাবাবুর নাতি শরৎ। চিনিস তো!

কৃষ্ণকান্ত আরো ভাবাচাচা খেয়ে যায়। শরৎদা! শরৎদাকে তার যে খুব অপছন্দ তা নয়। বরং সে শরৎদার গুণে খুবই মুগ্ধ। পাঠানের মতো মস্ত চেহারা। হাতের টিপ দারুণ। শরৎদা খুব ভাল কৃষ্ণি লড়তে পারে। তার সম্পর্কে নানা ধরনের দুঃসাহসিকতার গল্প ছেলেদের মুখে মুখে

ফেরে। সেই শরৎদা ছোড়দিকে বিয়ে করবে কেন ? ওরা জমিদার হিসেবেও অনেক বড়। তবে কথাটা শুনে কৃষ্ণকান্তর বুকটা লাফিয়ে উঠল আনন্দে।

সে বলল, শরৎদার সঙ্গে সম্বন্ধ এসেছে ঠিক জানো ?

তাই তো শুনছি।

এঃ, শরৎদা কেন ছোড়দিকে বিয়ে করবে ?

করলে তোর আপত্তি আছে ?

শরৎদা তো কত বড়লোক। গায়ে কী জোর ! শরৎদা রাজিই হবে না।

শচীনদার মুখটা আরও গম্ভীর দেখাচ্ছিল। সে বলল, কে কাকে বিয়ে করবে কে জানে ! ওসব ভেবে কী হবে ?

খবরটা কৃষ্ণকান্তর কাছে নতুন এবং অবিশ্বাস্য। বিনা বাক্যব্যয়ে সে আবার তার ঘোড়ায় উঠল। এবার কোকোবাবুর বাড়ি।

শরৎ ভিতরের মহলে ছাদের ওপর পায়রা খাওয়াচ্ছে। গায়ে স্যাণ্ডো গেঞ্জী, পরনে ধুতি। বাবরি চুল। গলায় কার-এ বাঁধা ধুকধুকি। স্বাস্থ্য ফেটে পড়ছে।

কৃষ্ণকান্ত বিনা ভূমিকায় প্রশ্ন করে, শরৎদা, তুমি কি ছোড়দিকে বিয়ে করবে ?

শরৎ আকাশ থেকে পড়ে, কাকে বিয়ে করব ?

আমার ছোড়দিকে। চেনো না ? বিশাখা।

শরৎ হাঁ করে তাকে কিছুক্ষণ দেখে বলে, বিশাখাকে বিয়ে করব তোকে কে বলল ?

শুনেছি। শচীনদা বলেছে।

কোন শচীনদা ? উকিল ?

হ্যাঁ। শচীনদার সঙ্গেই ছোড়দির বিয়ের কথা চলছিল।

শরতের গলা খুব গমগমে। অট্টহাস্য করলে বহু দূর থেকে শোনা যায়। সে সেই রকমই একটা হাসি দিয়ে বলে, তোর মাথাটাথা খারাপ হয়ে গেছে।

বাঃ, আমাকে তো শচীনদা বলল।

তোর শচীনদারও মাথা খারাপ হয়ে গেছে।

তাহলে কি বাজে কথা ?

একদম বাজে কথা। আমি শীগগীরই বিলেত চলে যাচ্ছি।

বিলেত যাচ্ছে। বলোনি তো !

পড়তে যাচ্ছি। মাইনিং ইনজিনিয়ার হয়ে ফিরব।

সেটা কী ?

খনিজ বিদ্যা। কয়লাখনির ইনজিনিয়ারিং। শক্ত কাজ।

পারবে ?

দেখি তো গিয়ে। ওটা না পারলে অন্য কিছু পড়ব। আর কিছু না হলে আরমিতে ট্রেনিং নেবো। বিয়ে-ফিয়ে করবই না।

একদম না ?

না। তোর ছোড়দির সঙ্গে শচীনদার বিয়ে ঠিক হয়েছিল ?

হ্যাঁ। কিন্তু বিয়েটা হবে না।

তা আমার কথা কে বলল শচীনকে ?

তা জানি না।

তোর ছোড়দিকে আমি দেখিইনি, না ?

দেখেছে। আমার ছোড়দি দেখতে খুব সুন্দর।

শরৎ মৃদু মৃদু হেসে যাচ্ছিল। কিছু বলল না।

কৃষ্ণকান্ত একটু হতাশ হল। ছোড়দির সঙ্গে শরৎদারও যদি বিয়ে না হয় তবে কার সঙ্গে হবে ? খুব দূরের অচেনা একজন এসে নিয়ে চলে যাবে একদিন ছোড়দিকে ? কি রকম হবে সেটা ?

শরৎ বলল, শচীন তোকে বাজে কথা বলেছে। সবাই জানে, আমি বিয়ে করব না।

কৃষ্ণকান্ত লোভাতুর চোখে শরতের বিরাট স্বাস্থ্যটা দেখছিল। সকালের রোদে ঝলমল করছে ডাকাতে চেহারাটা। এরকম একখানা শরীর হলে সবাইকে মেরে ঠাণ্ডা করে দেওয়া যায়।

শরৎ জিজ্ঞেস করল, শচীনের সঙ্গে তোর ছোড়দির বিয়ে হচ্ছে না কেন ? পাত্র তো ভালই।

ছোড়দি ওকে বিয়ে করতে চায় না।

কেন রে ? শচীনের দোষ কী ?

কে জানে।

তবু ও কাকে বিয়ে করতে চায় ? আমাকে ? বলে খুব হেসে ওঠে শরৎ।

কৃষ্ণকান্ত লজ্জা পেয়ে বলে, না। ছোড়দি কাউকে বিয়ে করতে চায় না। তোমাদের বাড়ি থেকে নাকি সম্বন্ধ এসেছে।

বাজে কথা।

আমাকে বন্দুক চালাতে শেখাবে না ?

এখনই তো চরে পাখি মারতে যাবো। যাবি ?

যাবো। চলো।

বাড়িতে বলে এসেছিস ?

বলতে হবে না। কেউ কিছু বলবে না।

পরে আমার দোষ হবে না তো !

না। কেউ কিছু বলবে না। চলো।

চল তাহলে।

শরতের সঙ্গে কৃষ্ণকান্ত বেরিয়ে পড়ল। শরৎদের সহিস ঘোড়াটা পৌছে দেবে তাদের বাড়িতে। হেমকান্তের সঙ্গে নৌকোবিহার বা চরে বেড়ানো একরকম। শরতের সঙ্গে অন্য রকম। হেমকান্ত এক স্থবির মহাবৃক্ষের মতো। তাঁর স্নিগ্ধ ছায়া আছে। আছে সুনিশ্চিত আশ্রয়। তাঁর শান্ত ব্যক্তিত্বের সান্নিধ্যে যেন সমস্ত প্রকৃতিই হয়ে ওঠে স্নিগ্ধ ও রূপময়। তিনি উড়ন্ত পাখিকে নিরাপদে চলে যেতে দেন। তিনি প্রকৃতির কোথাও কোনো ব্যাঘাত সৃষ্টি করেন না।

কিন্তু শরৎ অন্যরকম। বন্য, দুরন্ত, টগবগে।

দুই নিপুণ মাঝি ছিপ নৌকোকে তীরের গতিতে চালিয়ে নিয়ে এল দূরবর্তী এক স্থায়ী চরে। এখানে জঙ্গল। নির্জনতা। পাখির ঝাঁক এসে পড়েছে। শরৎ নৌকো থেকে নেমেই বন্দুক চালাল। সে কী শব্দ ! কান চেপে মাটিতে বসে পড়ে কৃষ্ণকান্ত।

ভয় পেলি ?

উঃ, কী শব্দ !

দূর বোকা। পুরুষ মানুষ কি শব্দকে ভয় পায় ?

শরৎ তিনটে বন্দুক এনেছে। একনলা বন্দুকটা তাকে ধরিয়ে দিয়ে বলল, সাবধানে ধরে থাক। আমি দেখে আসি কটা পাখি পড়ল।

কিছুক্ষণের মধ্যেই ঘুরে এল শরৎ। একটা মাথা ভাঙা পাখির রক্তাক্ত শরীর ঝুলছে তার হাতে। মুখে হাসি।

একটা। এই চরের পাখি সব পালিয়েছে। চল।

আবার ছিপ নৌকো চলল তীরের মতো।



শরৎ বলল, এবার তুই চালাবি বন্দুক ।

পারব ?

খুব পারবি । কিছু শক্ত কাজ নয় ।

আশ্চর্য ! কৃষ্ণকান্ত পারলও । দ্বিতীয় চরে তারা নামল না । ছোটো চর । বেলে হাঁসের ঝাঁক নেমেছে । একনলা বন্দুকটায় একটা ছররা গুলি ভরে শরৎ তার হাতে দিয়ে বলল, চালা । আমি ধরে থাকব । একটা ঝাঁকুনি লাগবে । একটুখানি । কাঁধটা শক্ত করে থাকিস । আরো ভাল হয় কুঁদোটা বগলে চেপে ধরলে ।

প্রাথমিক প্রশিক্ষণ নিয়ে কৃষ্ণকান্ত টিপ করল । শরৎ ধরে রইল আলতো হাতে বন্দুকটা । একটা বজ্রগর্জন চরের নির্জনতাকে টুকরো টুকরো করে ফেলল । হাত থেকে খসে গিয়েছিল বিশাল বন্দুক । শরৎ ধরে ফেলল । বলল, এই তো পেরে গেছিস ।

পাখি মরেছে ?

শরৎ হাসল, না মরলেই কি ? প্রথমবারে মরে না । তবে এর পরে পারবি ।

দুপুর পর্যন্ত কৃষ্ণকান্ত বহুবীর বন্দুক চালাল । একটা পাখি মারলও সে । নিরীহ একটা ঘুঘু । ফেব্রার সময় পাখিটা তার হাতে দিয়ে শরৎ বলল, বাড়ি নিয়ে যা । দেখে সবাই অবাক হয়ে যাবে ।

উত্তেজনায় কৃষ্ণকান্ত তখন কাঁপছে ।

বাড়ি ফিরতেই তুমুল হট্টরোল । বারবাড়িতে চেয়ার পেতে স্বয়ং হেমকান্ত বসা । সারি সারি কর্মচারীরা দাঁড়িয়ে আছে । পাড়ার লোকজন, প্রজা, হর কমপাউনডার কে নেই ! এমন কি একজন সেপাই অবধি । তাকে দেখেই সবাই চৈঁচিয়ে উঠল, এসেছে ! এসেছে ! ফিরে এসেছে !

হেমকান্ত উঠতে গিয়েও টলে আবার বসে পড়লেন ।

কেউ কিছু বলার আগেই মনুপিসি এসে তার হাত ধরে প্রায় ছোঁ মেরে নিয়ে গেল ঘরে । কোথায় গিয়েছিলি ?

পাখি শিকার করতে । শরৎদার সঙ্গে ।

পাখি শিকারের বয়স তোর হয়েছে ?

এই দেখ না, ঘুঘু মেরে এনেছি । নিজের হাতে ।

শরৎকে পেলি কোথায় ?

ওদের বাড়িতে ।

ও ডাকল আর তুই চলে গেলি ?

শরৎদা ডাকেনি তো ! আমিই গিয়েছিলাম ।

কাল রাতে তোকে বিশাখা মেরেছিল ?

তোমাকে কে বলল ?

বিশাখা সকাল থেকে কেঁদে কেঁদে ঘর ভাসিয়ে ফেলল তোর জন্য । কেবল বলছে, ও তোকে মেরেছিল বলেই তুই চলে গেছিস । আর ফিরবি না ।

কৃষ্ণকান্ত মৃদু একটু হেসে বলল, আর বাবা ?

বাবার কথা কি তুই ভাবিস ?

খুব ভাবি ।

তোর বাবা সকাল থেকে জলস্পর্শ করেননি । পরে সব শুনব । যা, স্নান করে আয় । ভাত খেয়ে একটু ঘুমো ।

বাবা রাগ করেনি তো পিসি ?

রক্তময়ী মাথা নেড়ে ধরা গলায় বলে, রাগ করার মতো অবস্থা ছিল নাকি কারো ? তোর খোঁজই

নেই সকাল থেকে । সকলেরই বুকে ধুকধুকনি ।

কেন, শরৎদাদের সহিস আমার ঘোড়া দিয়ে যায়নি ?

না, তাহলে তো নিশ্চিত হওয়া যেত ।

কৃষ্ণকান্ত জামা কাপড় ছাড়তে ছাড়তে বলল, পিসি, দিদি কেন শটীনদাকে বিয়ে করতে চায় না বলো তো !

তা কে জানে !

শটীনদা বলল, ছোড়দির সঙ্গে নাকি শরৎদার বিয়ে হবে । কিন্তু শরৎদা তো বিয়েই করবে না ।

তাই নাকি ?

হ্যাঁ, শরৎদা খনিজ বিদ্যা শিখতে বিলেত যাচ্ছে । তারপর সোলজার হবে ।

রঙ্গময়ী চোখ কপালে তুলে বলে, তাই নাকি ? তাকে বলল ?

বলল । আমি তো শরৎদার কাছে সব শুনতে গিয়েছিলাম ।

রঙ্গময়ী গালে হাত দিয়ে বলে, কী ছেলে রে বাবা ! তা বিশাখার বিয়ে নিয়ে তোর এত মাথাব্যথা কেন ?

ছোড়দি খুব দূরে কোথাও চলে যাবে না তো পিসি ?

বিয়ে হলে দূরে যাওয়াই ভাল । বড় হলে বুঝবি ।

না পিসি । ছোড়দির বিয়ে কাছাকাছিই দাও ।

রঙ্গময়ী একটা দীর্ঘশ্বাস ফেলে বলে, আচ্ছা, বিয়ের কথা পরে ভাবা যাবে । এখন স্নানে যা । তোর বাবা বসে আছেন ।

স্নান করে এসে ভিতরের বারান্দায় বাবার পাশাপাশি খেতে বসার সময় একটু ভয় ভয় করছিল কৃষ্ণকান্তর । ঠিক বটে, বাবা তাকে কখনো শাসন করেন না । কিন্তু বাবার থমথমে মুখটাই শাসনের চেয়ে অনেক বেশী ।

হেমকান্ত কোনো কথা জিজ্ঞেস করলেন না । নিঃশব্দে সামান্য একটু খেয়ে উঠে গেলেন ।

কৃষ্ণকান্ত চোরচোখে লক্ষ্য করল ।

রঙ্গময়ী বলল, খেয়ে উঠে যা, বাবার পায়ের কাছে বসে থাক একটু । লোকটা ছেলে ছেলে করে পাগল, আর ছেলে বাউণ্ডুলে তৈরি হচ্ছে একটা ।

কৃষ্ণকান্ত খাওয়ার পর সসঙ্কোচে বাবার কাছে আসে । ঘরে ইজিচেয়ারে বসে আছেন হেমকান্ত । মুখখানা চিন্তিত, ভ্রুকুটিকুটিল ।

পায়ের কাছে বসে কৃষ্ণকান্ত তার সরল সুন্দর মুখখানা তুলে ডাকল, বাবা ।

হেমকান্তর একখানা হাত এগিয়ে এসে তার মাথা স্পর্শ করল । ভারী কোমল, ভারী স্নেহময় স্পর্শ ।

অনেকক্ষণ বাদে হেমকান্ত বললেন, এই বংশের রক্তটা অন্যরকম, জানো ?

কিরকম ?

তোমার এক কাকা নিরুদ্দেশ, অন্য কাকার মৃত্যু হয়েছে অপঘাতে । তাই তোমার জন্য আমার খুব চিন্তা হয় ।

আর এরকম হবে না ।

যেখানেই যাও, বলে যেও । যতদিন আমি বেঁচে আছি, ততদিন ।

আচ্ছা ।

তারপর বিশাল পৃথিবী তোমাকে টেনে নেবে । কত দিকে কত কাজে ছড়িয়ে পড়বে তুমি । আমি তো তখন থাকব না ।

কৃষ্ণকান্তর চোখ ফেটে জল আসছে । এর চেয়ে শাসন যে ভাল ছিল ।

হেমকান্ত অনেকক্ষণ বাদে বললো, শরৎ কি তোমাকে বন্দুক চালাতে শেখাল ?

হ্যাঁ বাবা। আজ আমি একটু ঘুঘু মেরেছি।

হেমকান্ত একটা দীর্ঘশ্বাস ফেলে বললেন, শুনেছি।

আপনি খুশি হননি বাবা ?

হয়েছি। তবে পাখি বড় নিরস্ত্র প্রাণী। ওদের মারায় কোনো বীরত্ব নেই। যাও, বিশাখা তোমার জন্য খুব কৈঁদেছে আজ। ওর কাছে যাও।

ঘরে আসতেই বিশাখাকে দেখে কৃষ্ণকান্ত অবাক। কৈঁদে কৈঁদে মুখটা ফুলে রাবণের মা হয়েছে। তাকে পেয়েই দুহাতে আঁকড়ে ধরল বিশাখা তারপর ভেউ ভেউ করে কাঁদতে থাকল। অস্বস্তি বোধ করে কৃষ্ণকান্ত বলে, কাঁদছিস কেন?

তোমার খুব লেগেছিল কাল ?

আগে বল, শচীনদাকে বিয়ে করবি।

বিশাখা কান্না থামিয়ে চেয়ে রইল অবাক হয়ে। তারপর ফিক করে হেসে ফেলল হঠাৎ। কৃষ্ণকান্ত বলল, শচীরানী ! শচীরানী !

॥ ৩০ ॥

শ্বশুর আর জামাইয়ের সাক্ষাৎকারটি একটু আড়াল থেকেই লক্ষ্য করছিল সে। ধ্রুব শ্বশুরবাড়িতে এল দ্বিরাগমনের পর এই প্রথম। চৌধুরিবাড়ির ছেলেরা শ্বশুরবাড়ি যায় না। তেমন প্রথা নেই। শ্বশুরবাড়ির বিয়ে বা অন্যান্য অনুষ্ঠানে তারা উপহার বা আশীর্বাদ পাঠায়, কিন্তু নিজেরা আসে না। শুধু মৃত্যু সংবাদ পেলে আসে। নিতান্তই সৌজন্যের খাতিরে। ধ্রুব আজ সেই প্রথা ভেঙেছে।

রেমির বুক কাঁপছিল। ধ্রুব মদ খেয়ে এসেছে কিনা তা সে জানে না। ট্যান্সি থেকে নেমে সে খুব স্বাভাবিক পায়েই ঘরে ঢুকেছে বটে, কিন্তু সেটা কোনো কথা নয়। শ্বশুরবাড়ি আসছে বলে সে সতর্ক হবে এমন মানুষ কি ধ্রুব ?

ঘরে ঢুকে ধ্রুব বেশ গম্ভীর চোখে শ্বশুরকে দেখল। ঘরে রেমির মা ছিলেন। জামাইকে দেখে, বোধহয় আতঙ্কেই, পালিয়ে এলেন ভিতরের ঘরে। রেমিকে রুদ্ধশ্বাস উত্তেজনা বললেন, ওরে, ধ্রুব এসেছে ! যা, কাছে যা !

রেমি বলল, আমার কাছে যাওয়ার কী ? এসেছে তো এসেছে।

রেমির মা তাড়াতাড়ি গিয়ে ভিতরের ঘরে ছেলেকে ঘুম থেকে তুলে বললেন, ধ্রুব এসেছে ! খাবার দাবার কিছু নিয়ে আয়।

রেমি বিরক্ত হয়ে বলল, তুমি ও রকম কোরো না তো। আমি ওকে জানি। কিছু খাবে না।

না থাক, আমাদের ভদ্রতা তো করতে হবে।

লাভ নেই মা।

লাভ লোকসানের কথা নয়। দ্বিরাগমনের পর এই এল।

রেমি আর তর্ক করল না। অন্য একটা ঘর থেকে ভেজানো দরজার সামান্য ফাঁক দিয়ে দেখতে লাগল ধ্রুবকে। সামনে গেল না। তার কারণ সে সামনে গেলেই ধ্রুব হয়তো ইচ্ছে করেই অন্যরকম হয়তো বা অভদ্র ব্যবহার করতে শুরু করবে। আড়াল থেকে দেখাই ভাল।

ধ্রুব শ্বশুরের বিছানার পাশে একটা চেয়ারে দিবা গা ছেড়ে বসে বলছিল, আপনার আগে কখনো হার্ট অ্যাটাক হয়েছে ?

না তো ।

আপনার বয়স কত ?

বাহান্ন পেরিয়েছে ।

আপনার নরমাল স্বাস্থ্য তো ভালই ।

হ্যাঁ, এর আগে কখনো এ রকম হয়নি ।

আজ হল কেন ? শুনলাম সকালে নাকি কয়েকটা গুণ্ডা এসে আপনাকে শাসিয়ে গেছে ?

কী দুঃসাহস রেমি অবাক হয়ে গেল । কী স্বাভাবিক মুখ ! নিপাট ভালমানুষ যেন !

রেমির বাবা বললেন, আর বলো কেন । আমি সাথে নেই, পাঁচে নেই, হঠাৎ একদল লোক একটা জীপ গাড়িতে এসে—

শুনেছি । আপনার মেয়ে আমাকে টেলিফোন করে সব বলেছে । ইন ফ্যাক্ট ওই দলে আমার একজন বন্ধুও ছিল ।

রেমির বাবা একটু তটস্থ হয়ে বললেন, হ্যাঁ, ওরা তোমার বন্ধু বলেই বলছিল ।

ধুব মাথা নেড়ে বলে, সবাই নয় । একজন । বাদবাকীরা ঠিক বন্ধু নয় । তবে চেনা লোক । কী বলছিল বলুন তো !

সে আর তোমার শুনে কাজ নেই ।

ধুব একটু হেসে বলে, সব অ্যাকশনেরই একটা রি-অ্যাকশন আছে ।

তার মানে ?

ধুব উদাস গলায় বলল, এরকম ঘটনা যখন ঘটে তখন খোঁজ করে দেখা ভাল যে, এর রুটটা কোথায় । রুট একটা আছেই । কোনো কিছুই খামাখা ঘটে না ।

রেমির বাবা সকালের ঘটনায় প্রচণ্ড নারভাস হয়ে গিয়েছিলেন । জামাইয়ের এই উক্তি তে তিনি আর উচ্চবাচ্য করবার সাহস পেলেন না । সেডেটিভের ক্রিয়া চলছে । ঘুম-ঘুম চোখে জামাইয়ের দিকে একটু তাকিয়ে থেকে চোখ বুজলেন ।

রেমি শ্বাস বন্ধ করে দৃশ্যটা দেখতে লাগল ।

রেমির বাবা চোখ খুলে বললেন, কোথাও কিছু একটা গণ্ডগোল হয়েছে তা বুঝতে পারছি । কিন্তু ব্যাপারটা কী তা আমি আজও জানি না ।

ধুব মৃদু স্বরে বলল, আমিও জানি না ।

বোধহয় একটা মিস আনডারস্ট্যান্ডিং ! তাই না ?

হতে পারে ।

রেমির বাবা হাতটা বাড়িয়ে ধুবর একখানা হাত ধরলেন । বললেন, আমি কনফ্রনটেশন চাই না । জয়ন্ত আমার ছেলে, তুমিও আমার ছেলে । জয়ন্ত যদি কোনো অন্যায় করে থাকে তবে আমি ওর হয়ে মাপ চাইছি ।

ধুব মৃদু একটু হেসে বলে, বয়োজ্যেষ্ঠ হয়ে বয়ঃকনিষ্ঠের কাছে মাপ চাওয়াটা দৃষ্টিকটু । আর আপনিই বা অন্য কারো হয়ে মাপ চাইবেন কেন ? ওটা তো প্রোটোকল হয়ে গেল । যদি কেউ অপরাধ করেই থাকে তবে তারই উচিত মাপটাপ চাওয়া ।

জয়ন্তর ওপর তুমি রেগে আছো ধুব !

না, না । মিষ্টি হেসে সুন্দর শয়তানটী বলল, ওর ওপর আমি রাগ করব কেন ! প্রত্যেক মানুষেরই নিজস্ব বিচারবোধ অনুযায়ী চলার অধিকার আমি স্বীকার করি । তবে তার পিছনে মেকদণ্ড থাকা চাই । ও যদি কিছু বলতেই চায় তাহলে তা জোরের সঙ্গে বলুক । কুটকচালি কি পুরুষের কাজ ?

তুমি রেগে আছো । ও ছেলেমানুষ । মাপ করে দাও ।

ধুব খুব উদার গলায় বলে, মাপ করা শব্দ কী ? তবে কেসটাই তো আমি জানি না । ও কী

করেছে বলুন তো !

রেমির বাবা ফাঁপরে পড়ে বললেন, বোধহয় কূটকচালিই কিছু করে থাকবে। রেমি জানে।  
রেমিকে যদি একবার ডেকে জিজ্ঞেস করো।

যাক গে। পরে জেনে নেওয়া যাবে।

আমরা খুব ভয়ে ভয়ে আছি।

ভয়ে ভয়ে থাকবেন কেন ? ভয়ের কী আছে ?

তোমরা ভি আই পি মানুষ, তোমাদের ভয় নেই। আমাদের আছে।

আপনি এই অবস্থায় বড্ড বেশী দৃষ্টিস্তা করে ফেলছেন এটা কিন্তু ভাল নয়।

তাহলে কথা দাও জয়ন্তকে ওরা কিছু করবে না।

করলে তো করেই ফেলত। নিশ্চয়ই সে রকম ইচ্ছে ছিল না।

আবার যদি আসে-?

সেই সম্ভাবনা যাতে দেখা না দেয় তার জন্য জয়ন্তরই চেষ্টা করা উচিত।

রেমির বাবার চোখে জল টলটল করছিল। বললেন, আমি বুঝছি বাবা। জয়ন্তকে যা বলার  
আমি বলব। তুমি ভেবো না।

ধুব উদাস গলায় বলল, আমি কখনোই ভাবি না। ছেলেমানুষ, কত কী করে ফেলতে পারে।  
জয়ন্তর বয়স কত হল বলুন তো !

বোধহয় একুশ।

হাই টাইম টু বি অ্যাডাল্ট। যাকগে, বয়সটা কোনো কনসিডারেশন নয়।

তুমি রাগ করে আছো। আমি বরং রেমিকে ডাকি, ও তোমাকে ব্যাপারটা বুঝিয়ে বলতে পারবে।

ধুব মাথা নেড়ে বলে, না না তার দরকার নেই। কী হয়েছে না হয়েছে তা ডিটেলসে না জানাই  
ভাল। আমার শালা আমার সম্পর্কে আড়ালে কী বলে বেড়ায় তা জানার আগ্রহ আমার নেই।  
তাছাড়া আড়ালেই যখন বলছে তখন আড়ালটা রাখাই তো ভাল।

ও তোমাকে এমনিতে খুব পছন্দ করে।

কার কথা বলছেন ?

জয়ন্ত। দু একটা কথা বুদ্ধির দোষে বলে ফেলেছে হয়তো, কিন্তু তোমার সম্পর্কে ওর ধারণা  
খুবই উঁচু। ও বলে, জামাইবাবু ইচ্ছে করলেই সার্জিকাল কিছু করে ফেলতে পারে।

ধারণাটা বোধহয় ঠিক নয়।

না না, আমাদের ধারণা তাই। শুধু যদি—রেমির বাবা থামলেন। ধুব একটু ঝুঁকে মৃদু  
হাসিমাখে জিজ্ঞেস করে, শুধু যদি ?

আমি তোমার স্বস্তুর, পিতৃত্বা—তাই বলছি—কতগুলো অভ্যাস যদি ছাড়তে পারতে ধুব !

ধুব থমথমে মুখ করে কিছুক্ষণ সামনের দেয়ালের দিকে চেয়ে রইল। তারপর স্বস্তুরের দিকে মুখ  
ফিরিয়ে বলল, আপনারা রেমির ব্যাপারে বোধহয় খুব হ্যাপী নন, তাই না !

সে কথা বলিনি। আমার তো মনে হয় রেমি বেশ সুখী।

তাহলে অনর্থক দৃষ্টিস্তা করছেন কেন ? আপনাদের মেয়ে যদি অসুখী হত তাহলে না হয় কিছু  
বলার থাকতে পারত।

কিছু বলছি না। যা বলছি সেটাকে বলতে পারো থিংকিং লাউডলি। তুমি বিবেচক ছেলে,  
নিশ্চয়ই বুঝতে পারবে।

ধুব মাথা নেড়ে বলে, না, বুঝতে পারছি না।

আড়াল থেকে রেমির মনে হচ্ছিল, এবার তার হস্তক্ষেপ করা উচিত। যদি সে দেবী করে তাহলে  
দুজনের মধ্যে আবহাওয়াটা খারাপ হয়ে যেতে পারে। সে দেখতে শেল, মা বাইরের ঘরে ট্রে নিয়ে

ঢোকার মুখে দ্বিধায় পড়ে দাঁড়িয়ে আছেন।

এ বাড়ির সকলেই ধুবকে কী মারাত্মক ভয় পায় তা আজ ভাল করে বুঝতে পারে রেমি। ধুবর জন্য খাবার আনতে গিয়েছিল জয়ন্ত। সেও বাইরের ঘর দিয়ে যায়নি। মা সামনে যেতে ভয় পাচ্ছে। বাবা কথা গুলিয়ে ফেলছে। আর ওই সুন্দর শয়তানটা সবই টের পাচ্ছে মনে মনে এবং উপভোগও করছে হয়তো।

যাবে রেমি? দরজার দিকে হাত বাড়িয়ে রেমি ধেমে গেল। মজাটা শেষ অবধি দেখবে নাকি! দেখাই যাক না।

মা ঘোমটা টেনে খুব সন্তর্পণে ভিতরে ঢুকলেন। ধুব সসম্মানে উঠে দাঁড়াল বটে, কিন্তু প্রণাম-টনাম করল না। মা একটা টেবিলে সযত্নে খাবারের প্লেট আর চা সাজিয়ে সামনে টেবিলটা এগিয়ে দিয়ে বললেন, একটু মুখে দাও বাবা।

ধুব খাবারের প্লেটের দিকে অবাক হয়ে চেয়ে রইল একটু। তারপর বলল, আমি এ সব খাই না। একটু কিছু?

ধুব মাথা নাড়ে, না।

মুখে অত্যন্ত সরল হাসি তার। কিন্তু মতামত স্পষ্ট এবং চূড়ান্ত। তার ওপর কেউ চাপাচাপি করতে ভরসা পায় না।

মাও পেলেন না। একটু অপ্রতিভ হয়ে দাঁড়িয়ে বললেন, কত কাল পরে এলে!

ধুব একটু হাসল মাত্র। এ সব কথার জবাব দেওয়ার প্রয়োজনই সে বোধ করে না।

মা পালিয়ে বাঁচলেন। রেমির হাসি পাচ্ছিল।

ধুব আর একটুক্ষণ বসে উঠবার চেষ্টা করে বলল, আজ আসি। আপনি বরং একটু সাবধানে থাকবেন। শরীরের বিশ্রামটাই সব নয়। মনটারও বিশ্রাম দরকার। কোনো দৃষ্টিস্তা করবেন না। দৃষ্টিস্তাকে কি ঠেকানো যায় বাবা? জয়ন্তকে একবার ডাকি! সে বোধহয় বাড়িতেই আছে। ধুব হুঁচকে বলল, বাড়িতে থেকেও যখন সামনে আসছে না তখন বুঝতে হবে তার আসার ইচ্ছে নেই।

হয়তো লজ্জা পাচ্ছে।

পেতেই পারে। এখন তাকে জোর করা ঠিক নয়।

আমি চাই ও তোমার পায়ে ধরে ক্ষমা চাক।

ধুব খুব উদারভাবে হেসে বলে, আরে ওসব তো ফরমালিটি। ওর দরকার নেই।

তাহলে কী করব বলো তো?

একবার যেন সময় পেলে আমার কাছে যায়।

তোমাদের বাড়িতে?

ক্ষতি কি?

ঠিক আছে। যাবে।

ওকে বলবেন কোনো ভয় নেই। ধুব কথাটা বলে একটু অপেক্ষা করল। তারপর বলল, ওকে সম্ভব হলে এ কথাটাও বলবেন। লোকে স্ক্যানডাল পছন্দ করে, শুনতে চায় এবং বিশ্বাস করে। কিন্তু একজন লোক সম্পর্কে ভাল কথা বলা হলে লোকে তা শুনতে বেশী আগ্রহ বোধ করে না। খুব কমন সাইকোলজি। তাই একবার একটা স্ক্যানডাল ছড়িয়ে পড়লে সহজে সেটাকে গুটানো যায় না। কাজেই কারো সম্পর্কে খারাপ কিছু প্রচার করার আগে ভাল করে চিন্তা করা উচিত।

বলব বাবা। কথাটা খুবই সত্যি।

আমি আসি!!

যাবে? রেমি যে এখানে আছে। ও তোমার সঙ্গে যাবে না!

ধুব একটু গোমরামুখে বলে, আমি তো এখন বাড়ি ফিরব না।

ও, তাহলে এসো।

রেমি বাঘিনীর মতো বারান্দায় গিয়ে ওত পেতে রইল। ধুব বেরোতেই ধরল।

কোথায় যাচ্ছে?

আরে কী খবর?

এমনভাবে বলল কথাটা ধুব যেন বহুকাল পরে কোনো চেনা মেয়ের সঙ্গে দেখা হয়ে গেছে রাস্তায়।

খবর ভাল। কিন্তু তুমি কোথায় যাচ্ছে?

কেন বলো তো? অবাক হয়ে ধুব জিজ্ঞেস করে, আজকাল আমার চলাফেরার হিসেব রাখছ নাকি?

রাখাই তো উচিত?

ধুব হেসে বলে, ঠিক আছে বন্ধু, রাখো। আমি যাচ্ছি আড্ডায়। ফিরতে রাত হবে।

তোমার কোন বন্ধু এ বাড়িতে হামলা করেছে, তার নামটা বলবে?

কেন নাম দিয়ে কী হবে?

তুমি টেলিফোনে আমাকে বলেছিলে যারা হামলা করেছে তারা তোমার বন্ধু নয়।

বলেছিলাম। তখন জানতাম না।

এখন জানো তো। তার নাম বলো।

নাম জেনে কী করবে?

পুলিশে খবর দেবো।

তা তো দিতেই পারো। কিন্তু ব্যাপারটা ঘাঁটানো কি ঠিক হবে?

হবে। আমি ঘাঁটাতে চাই।

তুমি চাইলেও আমি আমার বন্ধুকে বিপদে ফেলতে চাই না।

তাহলে আমি তোমার নামেই পুলিশের কাছে ডায়েরী করব।

তাও ভাল। কেন, স্বশ্রমশাইকে জানাবে না?

জানাতে পারি, তবে উনি নিজের ছেলেকে কি আর জেল খাটাবেন?

তুমি নিজের স্বামীকে পারলে উনিও পারবেন।

তিনি যা খুশি করবেন। তবে আমি পুলিশকে ব্যাপারটা জানাতে চাই।

ধুব একটু গম্ভীর হয়ে বলে, রেমি ছেলেমানুষী কোরো না।

আমি সব শুনেছি।

শুনতেই পারো। আমি কিছু লুকোচ্ছি না। তোমার বাবাকেও বলেছি।

এটা কি খুব একটা বীরত্ব? তোমার লজ্জা করল না কতগুলো থার্ড ক্লাস গুণাকে নিজের স্বশ্রমবাড়িতে হামলা করতে পাঠাতে!

আমি পাঠিয়েছি কে বলল?

তাহলে কে পাঠিয়েছে?

কথাটা এখানে আলোচনা না হওয়াই ভাল।

বাড়ি ফিরে হবে?

হতে পারে।

তাহলে বাড়ি চলো। আমি শুনতে চাই।

পরে হলে হয় না?

না। ব্যাপারটা আমি জানতে চাই।

ধুব একটা শ্বাস ফেলে বলল, মাঝে মাঝে তুমি বড্ড কঠিন হয়ে যাও। আচ্ছা ঠিক আছে। চলো।

ধুব বড় রাস্তায় এসেই একজন ট্র্যাফিক পুলিশকে অত্যন্ত তাক্ষিলার সঙ্গে ট্যাকসি ধরে দিতে বলল। লোকটা পাঁচ মিনিটের মধ্যে ট্যাকসি দাঁড় করিয়ে দিল সামনে।

ধুব বাড়ির দিকে গেল না। সোজা ময়দানের দিকে চালাতে বলল। একটু পরেই মত পাল্টে হুকুম দিল, পার্ক স্ট্রিট। রেমি গুম হয়ে বসে ছিল। এসব গ্রাহ্য করল না। গম্ভ্য বড় কথা নয়, সে কথাটা শুনতে চায়।

শেষ অবধি পার্ক স্ট্রিটও নয়। গঙ্গার ধার।

বেশ রাত হয়ে গেছে। গঙ্গার ধার, এখন তেমন মনোরম কিছু নয়। একটা মোটামুটি নির্জন জায়গায় ট্যাকসি দাঁড় করাল ধুব তারপর ড্রাইভারকে হুকুম করল, যাও তো, একটু ঘুরে-টুরে এসো। আমরা কথা বলব।

ড্রাইভার একবারও গাঁইগুঁই না করে নেমে গেল।

ধুব আচমকাই জীবনে এই প্রথম, রেমিকে জড়িয়ে ধরে ঠোঁটে একটি তপ্ত চুমু খেল। অনেকক্ষণ ধরে। তারপর বলল, আমাকে তুমি একদম বিশ্বাস করো না, না ?

চুমুতে কেমন বিভ্রান্ত হয়ে গেল রেমি। ভিতরে যে শক্ত জমি তৈরি হয়েছিল তা আবার বেনোজলে হয়ে গেল কাদামাটি। পিছল, ভীষণ পিছল। রেমি দাঁড়াতে পারে না তার ওপর।

ধরা গলায় সে বলল, করি।

মস্তমুষ্কের মতো সে চেয়ে রইল অপরূপ পুরুষটির দিকে। এখনো এই পুরুষটির প্রায় সবটাই তার জানার বাইরে। এতদিন একসঙ্গে শুয়ে বসেও কেন এর রহস্য ভেদ করতে পারে না সে ?

ধুব বলল, যাবে পুলিশের কাছে ! ধরিয়ে দেবে আমাকে ?

রেমি দুহাতে আঁকড়ে ধরে ধুবকে বলে, তুমি আমাকে ভালবাসো না কেন ? কেন ? কেন ? কে বলল বাসি না ?

বাসো না, আমি জানি।

এটা কি কেউ তোমাকে বুঝিয়েছে ?

না। বর ভালবাসে কিনা তা বউ ছাড়া আর কে টের পাবে ?

কি জানি। ভাবলাম আজকাল তো অনেকেই আমার সম্পর্কে তোমার কান ভারী করছে, ভালবাসার ব্যাপারেও করে থাকতে পারে।

করেনি।

শোনো রেমি, আমি চরিত্রহীন বা লম্পট নই।

রেমি তার মুখে হাত চাপা দিয়ে বলে, ওসব শুনতে চাই না। জানি।

ধুব মুখটা সরিয়ে নিয়ে বলে, জানা উচিত। কিন্তু সবচেয়ে যেটা স্যাড সেটা হল আমাকে নিজের মুখে কথাটা বলতে হচ্ছে। আমি যে চরিত্রহীন বা লম্পট নই তা তুমি ছাড়া আর কে বেশী জানবে ?

জয়ন্ত ভুল করেছে।

ধুব দুঃখিতভাবে মাথা নেড়ে বলে, আমি একটা লড়াই লড়ছি। সেটা আমার ব্যক্তিগত লড়াই। খুব সামাজিকও। সেটা লড়তে আমাকে হবেই। সেটার জন্যই আমার ভিতরে কিছু অস্বাভাবিকতা আছে। কিন্তু অন্য কিছু নেই।

আর কেউ না জানুক আমি জানি।

জানো ? ঠিক তো !

বলছি তো। এখন ওসব কথা নয়।

ক্লান্ত স্বরে ধুব বলে, কিন্তু প্রেমের কথা যে আমি বেশীক্ষণ বলতে পারি না।



বলতে হবেও না। শুধু ধরে বসে থাকো।

চমৎকার কাটল দিনটা রেমির। বাড়ি ফিরেও প্রেমটা নিঃশেষ হয়ে গেল না। বিছানায় অনেকক্ষণ মাথামাখি হল তাদের। রাত জেগে গল্প।

কিন্তু সকাল হল অন্যরকম।

ভবানীপুর থানার ও সি বিনীতভাবে অপেক্ষা করছিলেন বাইরের ঘরে। কৃষ্ণকান্ত ধুবকে ডেকে পাঠালেন। রেমিও গেল পিছু পিছু।

কৃষ্ণকান্ত তাঁর গভীর গমগমে গলায় বললেন, ইনি এসেছেন তোমাকে কয়েকটা প্রশ্ন করতে। ধুব দারোগার দিকে দৃকপাতও করল না। শুধু অপলক চোখে কিছুক্ষণ কৃষ্ণকান্তের দিকে চেয়ে রইল।

কৃষ্ণকান্ত চোখ সরালেন। বললেন, কোথায় কার বাড়িতে একটা হামলা হয়েছে। সেই ব্যাপারে।

বলে উঠে গেলেন কৃষ্ণকান্ত।

ও সি বললেন, ব্যাপারটা খুব অস্বস্তিকর ধুববাবু। ঘটনাটা ঘটেছে আপনার স্বশুরবাড়িতে। তাতে আপনার বন্ধুরাও ইনভলভড।

তাই নাকি? ব্যাসের স্বরে প্রশ্ন করে ধুব।

## ॥ ৩১ ॥

হেমকান্ত জীবনে অনেক সৌন্দর্য দেখেছেন, কিন্তু চৈত্রের শুরুতেই এক বিকেলে যে কালবৈশাখী এল তার মতো সম্মোহনকারক আর কিছুই হয় না।

হেমকান্ত রবীন্দ্রনাথের একটি কবিতার বই পড়ছিলেন ছাদে বসে। রোদ পড়ে গেলে ছাদটি আজকাল মনোরম। একটু থম্ ধরা ভাব ছিল চারধারে। বাতাস ছিল না। ঠিক এই সময়ে আচমকা একটা কুচুটে বাতাস বইতে লাগল। সেই বাতাসে প্রেতের শ্বাসবায়ু মিশে আছে, টের পেলেন হেমকান্ত। বাল্যকাল থেকেই ঝড়ের অভিজ্ঞতা তাঁকে অনুভূতিশীল করেছে। ফর-ফর করে কোলে রাখা বইটির কয়েকটা পাতা উল্টে গেল। পাম গাছে হাহাকার বেজে উঠল। চোখ তুলে হেমকান্ত দূরে দিগন্তে এক অতিকায় কৃষ্ণবর্ণ মেঘস্তুম্বকে দেখতে পেলেন। ঘর্ণমান এক কালান্তক চেহারা সেই স্তুম্বের। আকাশে রোদ ছিল তখনো। সেই আলোয় দেখা গেল, বহু ওপরে ঘূড়ির মতো কী যেন সব ঘুরপাক খাচ্ছে। ঘুড়ি নয়, হেমকান্ত ভাল করে দেখার জন্য হরিকে ডেকে দূরবীনটা আনতে বললেন।

হরি দূরবীন নিয়ে এসে বলল, ঘরে যাবেন না কতামশাই? ভীষণ ঝড় আসছে।

হেমকান্ত শুধু বললেন, হুঁ।

দূরবীন লাগিয়ে দেখলেন, বহু দূরে আকাশের গায়ে টিনের চাল উড়ছে কয়েকটা। আরও কিছু জিনিষও আছে, ঠিক বোঝা যাচ্ছে না। অতিকায় সেই মেঘস্তুম্বের মাথার দিকটা হুড়িয়ে পড়েছে আকাশে। ডাইনীর চুলের মতো। বাতাসে একটা তীব্র চাপা গুমগুম শব্দ আসছে। কোথায় ঝলসাচ্ছে মেঘ! ব্রহ্মপুত্রের কালো জলে হঠাৎ তুমুল এক আলোড়ন ওঠে।

বাতাস শরীরী নয়। কিন্তু হেমকান্ত হঠাৎ টের পেলেন, বাতাস তাঁকে ধাক্কা দিচ্ছে। এক অদৃশ্য পালোয়ানের মতো শক্তিশালী বাতাসের ধাক্কা কয়েক হাত পিছিয়ে গেলেন হেমকান্ত। হড়-হড় করে তীব্র বাতাস ঢুকে যাচ্ছে ফুসফুসে। দম নিতে পারছেন তো ছাড়তে পারছেন না। শ্বাসকষ্ট হতে থাকে তাঁর।

হরি সিঁড়িঘরের কাছ থেকে দৌড়ে এসে তাঁকে ধরে।

কর্তামশাই, ঘরে চলুন।

এক ঝটকায় তার হাত ছাড়িয়ে দেন হেমকান্ত। ঘরে যাবেন কী? এই অপার্থিব দৃশ্য ছেড়ে কি কোথাও যাওয়ার উপায় আছে!

চোখের সামনেই মাঝ দরিয়ায় একটা বেসামাল নৌকাকে নিশ্চিত ভরাডুবির সঙ্গে লড়াই করতে দেখতে পান তিনি। মস্ত এক ঢেউয়ের মাথায় চড়ে নৌকোটা এক ঘূর্ণী বাতাসের ঝাপটায় পাক খেয়ে ঘুরে পড়ে গেল নীচে। আবার উঠল।

পগারের দিকে গোড়াশুদ্ধ পুরোনো কামরাঙা গাছটাকে উপড়ে ফেলল ঝড়। কলাঝাড়ের কয়েকটা গাছ শুয়ে পড়ল মাটিতে। হেমকান্ত তাঁর ইজিচেয়ারে বসে পড়লেন। চারদিক থেকে উন্মাদ ষাতাস ছুটে আসছে। লয় করে দিচ্ছে সত্তা। হারিয়ে যাচ্ছে চিন্তাশক্তি। এমন কি অহং বোধ পর্যন্ত।

হরি আবার দৌড়ে যায় সিঁড়িঘরের দিকে। তার নিসর্গপ্রীতি নেই। সে আত্মরক্ষা বোঝে। হেমকান্ত চোখ চেয়ে থাকতে পারলেন না। ধুলো আর কুটোকাঠি এসে এমন তীব্রভাবে ফুটছে গায়ে আর মুখে যে চোখ মেলে থাকা বিপজ্জনক। দু কান বধির করে ঝড়ের শব্দ বয়ে যাচ্ছে।

চোখে কিছু দেখছেন না, কানে শুধু ঝড়ের উন্মাদ শব্দ। তবু তিনি তাঁর পিপাসিত অনুভূতির প্রতিটি রক্ত দিয়ে গ্রহণ করছিলেন এই মহান ঝড়কে। সম্মোহিত, স্তব্ধ, বাক্যহারা। পৃথিবীর ক্ষীণপ্রাণ জীবজগৎ, তাদের খেলনার মতো ঘরবাড়ি ও পলকা অস্তিত্বকে নিয়ে কিছুক্ষণ ছেলেখেলা করে গেল ঝড়। তারপর একসময়ে থেমে গেল।

শেষ দিকটা হেমকান্তের চৈতন্য ছিল না। যখন সন্ধ্যা ফিরে পেলেন, তখন দেখেন, ইজিচেয়ারটা অনেকটা দূরে নিক্ষিপ্ত হয়েছে। তিনি পড়ে আছেন শানের ওপর। রবীন্দ্রনাথের বইটি ধারে কাছে কোথাও নেই। বড় বড় ফোঁটায় বৃষ্টি পড়ছে। ঠিক অশ্বক্ষুরের শব্দ।

হেমকান্ত ঘরে এলেন। অপ্রতিভ হরি জড়োসড়ো হয়ে সঙ্গে সঙ্গে এল। তার তো দায়িত্ব ছিল না। কর্তামশাই ওরকম পাগল হলে সে কী করবে?

হেমকান্ত তাকে হাতের ইশারায় বিদায় করে দিয়ে জানালার ধারে বসে বাইরে বৃষ্টি দেখতে লাগলেন। বড় একা লাগছিল তাঁর। এই বিপুল পৃথিবীতে একা। ঝড় তাঁর একাকিত্বের বোধটিকে আরো অসহনীয় করে দিয়ে গেল আজ।

হরিকে ডেকে হেমকান্ত জিজ্ঞেস করলেন, কৃষ্ণ কোথায়?

আজ্ঞে ঘরে।

বিশাখা?

ঘরেই আছেন।

যাক, নিশ্চিন্ত। হেমকান্ত বললেন, খোঁজ নে তো, নদীতে একটা নৌকা বিপদে পড়েছিল। সেটা পৌঁছেছে কি না।

যে আজ্ঞে। হরি চলে গেল।

হেমকান্ত আবার বৃষ্টি দেখতে লাগলেন। চারদিকে অকালসন্ধ্যা ঘনিয়ে এল। ঘরে বাতি জ্বলে দিয়ে গেল চাকর।

হেমকান্ত টেবিলের ধারে গিয়ে বসলেন। কারো সঙ্গে এখন কথা বলা দরকার। এমন কারও সঙ্গে, যে বোঝে, যে হৃদয়বান।

ভাই সচ্চিদানন্দ, আজ কবির মতো বলিতে ইচ্ছা করিতেছে “হৃদয় আমার নাচে রে আজিকে ময়ূরের মতো নাচে রে।” তবু তাহা বলিব না। কারণ বাস্তবিক হৃদয় নৃত্যপর নহে। নাচিতে গিয়া বারবার তাহার ঘুঙুর শ্বলিত হয়, গাঁটে আমবাতের ব্যথা প্রকট হইয়া ওঠে, মাথা ঘুরিতে থাকে। আজ নাচিবার ইচ্ছাটুকুই সম্বল, শক্তি নিঃশেষিত।

ভায়া হে, তুমি রবীন্দ্র ভক্ত নহ, তাহা আমি জানি। রবীন্দ্রনাথকে বুঝিবার মতো সময় ও চিন্তাশক্তি তোমার নাই। পলিটিকসের ঘষায় অনুভূতিগুলা ভৌতা হইয়া গিয়াছে। বেনাবনে মুক্তা ছড়াইয়া লাভ নাই জানি। তথাপি আজ তোমাকে আমার সেই অনুভূতির কথা বলিতে বসিয়াছি যাহা অন্য কেহ বুঝিবে না, তুমিও বুঝিবে না। তবে তোমার ধৈর্য আছে, আমাকে এখনও অসহ্য মনে কর না। পলিটিকসের ইহাই সবচেয়ে বড় গুণ। মানুষকে সহনশীল করিয়া তোলে।

একটু আগে এক রূপবান ঝড় আমার সমস্ত সত্তাকে আক্রমণ করিয়া ছিন্নভিন্ন করিয়া দিয়া গিয়াছে। মনে হইতেছে, আমি এখন দ্বিখণ্ডিত। এই ঝড়ের পূর্বে আমার যে জীবন ছিল তাহা প্রথম খণ্ড মাত্র। এই ঝড়ের পর আমি দ্বিতীয়বার জন্মগ্রহণ করিয়াছি। ইহা এক নূতন জীবনের সূচনা।

কেমন হইবে এই দ্বিতীয় খণ্ডের জীবনযাপন ?

জানি না। কিন্তু বলিব, আজ ছাদের উপর যখন সর্বগ্রাসী ঝড়ের আঘাত আসিয়া আমাকে সমূলে উৎপাটিত করিল তখন মনে হইতেছিল আমরা কী ছাই ঘর সংসার সাজাইয়া ছেলেখেলা করিতে বসিয়াছি ! একটি ফুৎকারেই যে সব উড়িয়া যায় ! অনিত্য ভাবনা নূতন কিছু নহে। কিন্তু ঝটিকার মুখে যে বার্তা বহিয়া আসিল তাহা অনিত্য চিন্তা নহে, তাহা এক বৃহত্তর জীবনযাপনের আহ্বান। মনে হইতেছিল, আমি নিজেকে যাহা ভাবি আমি বুঝি মাত্র সেটুকুই নহি। আমার বিশ্বব্যাপী অস্তিত্ব আকাশ পাতাল জুড়িয়া মুখব্যাদান করিয়াছে।

আবার বলি, ইহার সহিত বৈরাগ্য বা ব্রহ্মানুভূতিরও কোনো সম্পর্ক নাই। ইহা এক উপচানো আনন্দ, ইহা এক অসহনীয় সুখবোধ। তাহার সহিত এক নিঃসঙ্গতার বেদনাও মিশিয়া আছে।

তোমার ধারণা, আমার জীবনে কোনো দুঃখ নাই। কোনো সমস্যা নাই। তাহাই হইবে। তবু বলি ভায়া, কাহারও জীবনই সম্পূর্ণ নিষ্কটক নহে। যাহার বাহিরের সমস্যা নাই, তাহার মন নব নব সমস্যার জট পাকাইয়া তোলে। আমি বোধহয় সেইপ্রকারই একজন। নহিলে আমার অভ্যন্তরে সর্বদাই কেন এক প্রদোষের রহস্যময় আলো-আঁধারি ? আজিকার ঝড়ে সেই রহস্যের আবরণ উড়িয়া গিয়া এক অদ্ভুত স্বর্গীয় আলো আসিয়া পড়িল, ক্ষণিকের জন্য এক বৃহৎ জগতের ছবি মেলিয়া ধরিল। মিলাইয়া গেল।

কত লোকের সর্বনাশ হইয়াছে, কতগুলা নৌকা ডুবিয়াছে তাহা এখনো জানি না। কালবৈশাখীর দক্ষিণা তো কম নহে। কিন্তু আজ সে কথা ভাবিতেছি না। ঝড়ের একটু আগেই ছাদে বসিয়া নিবিষ্টমনে রবিবাবুর কবিতা পড়িতেছিলাম। মনটা সিন্ত ছিল। কিছু বিষণ্ণও। অকস্মাৎ ঝড় আসিয়া সেই কাবা পাঠেরই একটি সুসংগত উপসংহার টানিয়া দিয়া গেল। কবিতা আমাদের ভিন্ন জগতে লইয়া যায়। ঝড়ও আজ সেই কাজটুকুই করিয়াছে।

তুমি বাস্তববাদী। এইসব কথাকে বড় একটা মূল্য দাও না। তবু জানি, তুমি আমার কথাগুলিকে ওজন করিবে, সম্ভাব্যতা বিচার করিবে, তাহার পর হয়তো গালিই দিবে। তবু অস্বীকার করিবে না। তোমার এই বায়ুগ্রস্ত বয়সটির প্রতি তোমার যে এখনো একটু স্নেহ আছে তাহা কেন জানো ? ওই বায়ুটুকুর জন্যই। বায়ুগ্রস্ত লোকদের তুমি উপেক্ষা করিতে চেষ্টা কর বটে, কিন্তু তোমার যাহা নাই তাহা তাহাদের আছে, তুমি যাহা অনুভব কর না তাহা তাহারা করে, এই সত্যও তুমি কোনোদিন অস্বীকার করিতে পারিবে না। তোমার এই গুণটুকুই আমাকে তোমার সঙ্গে আঠার মতো জুড়িয়া রাখিয়াছে।

কৃষ্ণ আর বিশাখা ছাড়া আজ নিকটাত্মীয়েরা কেহই আমার নিকটে নাই। পুত্রেরা বিষয়কর্মে ব্যস্ত, কন্যারা ঘর-সংসারে ডুবিয়া আছে। আমি তাহাদের দোষ দিই না। মাঝে মধ্যে কর্তব্যবশে এক-আধখানা পত্র তাহারা লেখে, উহাই আমার কাছে যথেষ্ট। আমার এখনকার জীবনযাপনে এগুলি অভ্যস্ত হইয়া গিয়াছে। তথাপি ঝড় থামিবার পর আজ যেন মনে হইল, আমি বড় একা। আজ স্ত্রী বাঁচিয়া থাকিলেও বোধহয় একপই মনে হইত।

কেন বলো তো এই রহস্যময় একাকিত্বের উৎস কী ?

ঝড় যখন আসিল তখন আমার ভূতা আমাকে গৃহাভ্যন্তরে লইয়া যাওয়ার চেষ্টা করিয়াছিল । আমি যাই নাই । সেই অপরূপ ঝড়ের সঙ্গে তখন শুভদৃষ্টি হইতেছে, যাই কী করিয়া ?

যখন ঝড় থামিল তখন দেখি আমার আরাম কেদারা ছিটকাইয়া কোথায় সরিয়া গিয়াছে । রবিবাবুর গ্রন্থটির হদিশ নাই । আমি মুহাম্মান অবস্থায় পড়িয়া আছি । ভূতটি সিঁড়িঘরের নিরাপত্তায় আশ্রয় লইয়াছে । ভাগা ভাল, পলাইয়া যায় নাই ।

অভিমান নহে । ঝড়ের নিসর্গদৃশ্য যত সুন্দরই হোক, তাহার ভয়াবহতাও কম নহে । একটা বিপদ ঘটতে পারিত । তথাপি কেহ আমাকে জোর করিয়া ঘরে টানিয়া আনে নাই বা আমার বিপদের ভাগ লইবার জন্য আমার সহিত অবস্থান করে নাই ।

বোধহয় এই সামান্য ঘটনা হইতেই আজ বড় নিঃসঙ্গ অনুভব করিতেছি ।

এইবার কিছু কাজের কথা বলি । রাজেনবাবুর কথা নিশ্চয়ই ভুলিয়া যাও নাই । কর্মঠ, আত্মনির্ভরশীল মানুষ । ঢাকার বিক্রমপুরে ইহাদের বাড়ি । রাজেনবাবুর পুত্র শচীন ওকালতি পাস করিয়া আইন ব্যবসায় করিতেছে । তাহার সহিত বিশাখার বিবাহের একটি কথা চলিতেছে । সম্বন্ধটি কেমন হইল, তোমার মনোমত হইল কি না তাহা জানাইও ।

কিন্তু এই বিবাহের সম্বন্ধে অন্যরূপ একটা বিপদ দেখা দিয়াছে । লোক পরম্পরায় শুনিতেছি, আমার কন্যার না কি এই পাত্র বিশেষ পছন্দ নয় । বড়ই বিষয় বোধ করি সচ্চিদানন্দ । যুগের হাওয়া পাণ্ডাইতেছে বটে, তা বলিয়া পনেরো বৎসরের একটি মেয়ের নিজস্ব পছন্দ অপছন্দের সমস্যা দেখা দিবে তাহা ভাবি নাই । আমিই তাহার মত নিতে আগ্রহী ছিলাম । কিন্তু আশা ছিল, আমার মতের উপরে সে কথা কহিবে না । পনেরো বৎসর বয়সে কাহারও বিচারবুদ্ধি থাকে না । সুতরাং পিতামাতার বিচারবুদ্ধিই তাহাকে পথ নির্ধারণ করিতে সাহায্য করে । কিন্তু আমার হিসাব-নিকাশ কিছুই মিলিতেছে না ।

আমি কি তাহার উপর জোর খাটাইব ? না কি তাহার মতই মানিয়া লইব ? কিছু স্থির করিতে পারিতেছি না । তুমি কি এ বিষয়ে আমাকে সাহায্য করিতে পারো ?

এইসব সংকট সময়ে বড়ই মৃতা স্ত্রীর কথা মনে পড়ে ।—তোমার হেম ।

সকালবেলায় রঙ্গময়ী একবার করে নিয়মিত এসে হেমকান্তর সঙ্গে দেখা করে যায় । কাজের কথা থাকলে তাও বলে । হেমকান্ত সকালের দিকটায় রঙ্গময়ীর জন্য নিজের অজান্তেই কিছুটা প্রতীক্ষা করে থাকেন । আজও করছিলেন ।

চৈত্রের শুরুতেই এবার কালবৈশাখীর দাপট দেখা দিয়েছে । কাল সন্ধ্যাবেলায় তুমুল ঝড় বয়ে গেল । গোয়ালের চালের টিন উড়ে গেছে । বাগানে বহুকালের পুরোনো একটা কামরাঙা গাছ উপড়ে পড়েছে । ব্রহ্মপুত্রে দু' চারটে নৌকো ডুবেছে নিশ্চয়ই । এখনো অবশ্য খবর আসেনি, তবে ফি বছরই ডোবে । এছাড়া গাঁ গঞ্জে, শহরতলীতে কী ঘটেছে তাও এখনো অনুমানের বিষয় । প্রজাদের অবস্থাই বা কী ? অবস্থা যাই হোক, যে-কোনো প্রাকৃতিক বিপর্যয়কেই তারা খাজনা না দেওয়ার অজুহাত হিসেবে দাঁড় করায় । হেমকান্ত বিষয়চিন্তা করতে চান না, কিন্তু বিষয়চিন্তা তাঁর ঘাড়ে চাপবেই । সরকারের খাজনা শোধ করতে তাঁর দম বেরিয়ে যাচ্ছে । পুরো জমিদারী না হোক এক-আধটা মহল বিক্রি করে দিলে কেমন হয় ?

এইসব সাত পাঁচ ভাবছিলেন, এমন সময় রঙ্গময়ী এল ।

কী খবর মনু ? কালকের ঝড়ে কী হল খবর পেলে

আমি মেয়েমানুষ কী খবর পাবো ? তুমি একটু ঘুরে সব দেখে এলেই তো পারো ।

যাবো-যাবো ভাবছিলাম ।

ভেবেই তোমার দিন যাবে।

নৌকো-টৌকো ডুবেছে না কি ?

ডুবেছে। তবে ব্রহ্মপুত্রে নয়, তোমার সংসারে।

এটা আবার কেমন হৈয়ালী ?

হৈয়ালী হবে কেন ? তোমার আদরের মেয়ে বঁকে বসেছে, শতীনকে বিয়ে করবে না। তার কী করছ ?

হেমকান্ত কারপেটের ওপর মেরুদণ্ড সোজা করেই বসেছিলেন, আরো টান হয়ে বললেন, কী করব বলো তো ! ওর আপত্তি কিসের ?

শতীনরা না কি ভীষণ গরীব।

গরীব ! শতীন গরীব হতে যাবে কেন ? জমাট প্র্যাকটিস।

সে তোমার মেয়েকে বোঝাও গে।

আমি যে ওদের সঙ্গে কথা পেড়ে ফেলেছি।

বঙ্গময়ী বিরস মুখে বলে, বিয়ের কথা ওঠার পর থেকেই নানারকম আপত্তি তুলছিল। তোমাকে বলিনি, কারণ বললেই তুমি আকাশপাতাল ভাবতে শুরু করবে। কিন্তু এখন না বলেও তো উপায় নেই। মেয়েদের নিজস্ব মত থাকবে, তারা বিয়েতে আপত্তি তুলবে, এসব তো আমরা ভাবতেও পারি না।

হেমকান্ত মাথা নেড়ে বলেন, সেটা কথা নয় মনু। আমি মেয়েদের মতামতকে গুরুত্ব দিই। কিন্তু আপত্তি যদি থাকেই সেটা প্রথমেই বলেনি কেন ?

তোমাকে বলতে হয়তো লজ্জা পেয়েছে।

শুধু গরীব বলেই আপত্তি ?

ও তো তাই বলেছে। শতীনদের বাড়ি থেকে না কি চেয়েচিন্তে নিত এ বাড়ি থেকে। কথাটা মিথ্যেও নয়। কিন্তু তাতে বিয়ে আটকায় কেন তা বুঝছি না।

আর কোনো কারণ নেই ?

বঙ্গময়ী একটু দ্বিধায় পড়ে দোনোমনো করে বলে, আছে বোধহয়। ওর মনে হয় কোকাবাবুর নাতি শরৎকে পছন্দ।

শরৎ মানে যে পাখি মারে ?

হ্যাঁ। শরৎ তো একজনই।

হেমকান্তর মুখ একটু বিবর্ণ দেখাতে লাগল। কিছুক্ষণ চুপ করে থেকে বললেন, কোকাবাবুর পরিবারের অভিজাত্য আছে। কিন্তু পরিবারটার মধ্যে কেমন যেন মায়াদয়্য কম। কোকাবাবু যখন মারা যাচ্ছিলেন সেই সময় শরৎ পাখি মেরে বাড়ি ফিরল। সে কী উত্তেজনা !

বঙ্গময়ী বলল, ওটা নিয়ে তোমাকে ভাবতে হবে না। খবর পেয়েছি, শরৎ বিলেত যাচ্ছে। বিয়ে-টিয়ে করবে না।

কে বলল তোমাকে ?

কৃষ্ণ। শরতের সঙ্গে সেদিন পাখি শিকার করতে গিয়েছিল, মনে নেই ? সেদিনই কথা হয়েছে।

হেমকান্ত ভ্রু কঁচকে বললেন, কৃষ্ণের সঙ্গে শরতের এত ভাব কী করে হল বলো তো !

বন্দুক ! তোমার ছেলের দিনরাতের ধ্যান-জ্ঞান এখন বন্দুক।

বন্দুক ! ও বাবা !

ও বাবা আবার কী ? বন্দুক কি নতুন কিছু না কি ?

হেমকান্ত অবাক হয়ে তাকিয়ে থাকেন বঙ্গময়ীর দিকে। তারপর বলেন, বন্দুক ওকে ছুঁতে না দেওয়াই ভাল মনু। বাঘ যদি রক্তের স্বাদ পায়—

থানায় যাওয়ার আগে খুব কয়েক মিনিট সময় নিয়েছিল। রওনা হয়েও ফটকের ওপাশ থেকে ফিরে এল। পুলিশ অফিসারটিকে বাইরের ঘরে বসিয়ে খুব দ্রুত রেমির হাত ধরে টেনে আনল শোওয়ার ঘরে। চাপা জরুরী গলায় বলল, সোরাব-রুস্তম! বুঝলে? সোরাব-রুস্তম!

রেমি বুঝল না। দিশাহারা হয়ে খুব মুখের দিকে চেয়ে বলল, তোমাকে ধরে নিয়ে যাবে? তোমাকে

খুব একটু ফিচেল হাসি হেসে বলল, তুমিও তো এরকমই একটা কিছু করবে বলেছিলে! বলোনি, থানায় যাবে

বলেছি। কিন্তু সত্যিই তো আর যেতাম না

তুমি যাওনি, কিন্তু অন্য একজন গেছে। ফল একই।

কে গেছে?

বললাম যে, সোরাব-রুস্তম।

তার মানে কী?

বসে বসে ভাবো, ঠিক বুঝতে পারবে।

না পারব না। আমার মাথা গুলিয়ে গেছে।

মিনিস্টারের বাড়িতে পুলিশ তার ছেলেকে ধরতে আসে, ব্যাপারটা এদেশে একটু অস্বাভাবিক নয় কি?

রেমি মাথা নেড়ে বলল, হ্যাঁ। স্বশুরমশাই থাকতে—

স্বশুরমশাইয়ের মুখখানা ভাল করে লক্ষ্য করেছো?

খুব বিচলিত মনে হচ্ছিল।

বিচলিত ঠিক নয়, একটু নারভাস। তবে সেটা পুলিশের ভয়ে নয়।

তবে?

আমার ভয়ে।

তোমার ভয়ে? তোমাকে উনি ভয় পান নাকি?

এমনিতে পান না কিন্তু পচা শামুকেও তো পা কাটে।

বুঝলাম না।

তোমার আই কিউ অ্যাভারেজের চেয়ে কম।

বুঝিয়ে বলো, তোমাকে উনি ভয় পাবেন কেন?

খুব মাথা নেড়ে বলল, থাক না, সবটুকু আমি বুঝিয়ে নাই বা দিলাম। আমি থানায় যাচ্ছি, তুমি বসে বসে বরং ধাঁধাটার জবাব খুঁজে বের করো। ধাঁধাটার সূত্র ওই একটাই, সোরাব ভারসাস রুস্তম।

থানায় কি এখন তোমাকে আটকে রাখবে?

খুব মাথা নেড়ে বলে, আরে না। আটকানোর আইনই নেই। তবে রাতটা ইনটারোগেশনের নামে কাটিয়ে দিতে পারে চলি, গুডনাইট।

খুব ঘর থেকে বেরিয়ে গেল। পিছু পিছু রেমি।

খুব ঘর থেকে বেরিয়েই বাঁ দিকে বাইরের ঘরে যেতে দু পা এগিয়েই হঠাৎ থমকে গেল। তারপর আচমকা পিছু ফিরে রেমিকে বলল, ঘরে ঢুকে দরজা বন্ধ করে দাও। তুমি কিছু দেখনি, কিছু শোনোনি।

রেমি আঁতকে উঠে বলে, তার মানে? কী করবে তুমি?

ধুব চাপা গলায় বলল, ঘরে যাও রেমি। মজাটা আর একটু জমিয়ে দিই। যাও, কেউ জিজ্ঞেস করলে কিছু বোলো না। বোলো, তুমি জানো না।

রেমি কম্পিত বুকে দরজা বন্ধ করল।

পরমুহূর্তেই দরজায় টোকা পড়ল আবার।

রেমি রেমি!

রেমি দরজা খুলে বলে, কী গো?

হাতের কাছে একটা ব্যাগটাগ কিছু আছে?

আছে।

গোটাকয়েক শাড়ি আর যা পারো গুছিয়ে নাও। আমারও গোটাকয়েক জামাপ্যান্ট। কুইক! প্রপ্ন করো না। সময় নেই

রেমি উদ্ভ্রান্তের মতো পাগলের আদেশ পালন করল। দশ থেকে পনেরো মিনিটের মধ্যেই গোছানো হয়ে গেল। কারণ ধুবর টুর থাকে বলে একটা ফাইবারের সুটকেস গোছানোই থাকে। রেমি শুধু নিজেরটা গোছালো। দরজায় ধুব পাহারা দিচ্ছে।

রেমি বুঝতে পারছিল, ধুব তাকে নিয়ে কোথাও যাচ্ছে এবং সেটা খুব বিধিসঙ্গতভাবে যাচ্ছে না। সম্ভবত স্বশুরমশাই খবরটা জানবেন না এবং বাইরের ঘরের পুলিশ অফিসারও কিছু টের পাবেন না। সাধারণ অবস্থায় রেমি নিশ্চয়ই ধুবর এই প্রস্তাবে রাজি হত না। কিন্তু এখন তার মনের অবস্থা স্বাভাবিক নয়। সকাল থেকে তার চারদিকে এমন সব ঘটনা ঘটছে যে তার মাথা গুলিয়ে গেছে। এই অ্যাডভেনচার হয়তো সে মনে মনে চাইছিল।

সুটকেস আর ব্যাগটা হাতে নিয়ে ধুব পিছনের দরজার দিকে এগিয়ে গেল। পিছু পিছু রেমি। চাকরবাকররা দেখল, কিন্তু কেউ উচ্চবাচ্য করল না। তারা ধুবকে চেনে।

পিছন দিককার ছোট্ট বাগানের ফটক দিয়ে বেরোলে একটা গলি পাওয়া যায়। নোংরা গলি। কখনো রেমি এ গলিতে পা দেয়নি। গলিটা পেরিয়ে রাস্তায় উঠে ধুব চট করে একটা মিটার নামানো ট্যাকসিকে ধরল। এ তল্লাটের ট্যাকসিওয়ালারা ধুবকে মোটামুটি চিনে রেখেছে। তারা বেগরবাঁই করে না।

হাওড়া স্টেশনে এসে ধুব মাত্র আধ ঘণ্টার প্রয়াসে পুরীর দুটো বার্থ রিজার্ভ করে ফেলল।

ট্রেনে ওঠার পর রেমি দম নিচ্ছিল। এইরকম হটোপাটা করে কোথাও যাওয়া তার জীবনে এই প্রথম। বিবাহিত জীবনে স্বশুরমশাইয়ের অনুমতি না নিয়ে ঘর থেকে বেরোনোও এই প্রথম। কাজটা কেমন হল তা সে বুঝতে পারছে না।

ধুব ফার্স্ট ক্লাসের টিকিটই করেছে, কিন্তু কুপে নয়। আরো দুজন যাত্রী আছে। তারা প্রবীণ এক দম্পতি। তাদের তুলে দিয়ে যেতে ছেলেমেয়ে নাতিনাতিনীরা এসেছে। কামরায় বেশ ভীড়।

জড়োসড়ো হয়ে রেমি একধারে বসে ছিল। ধুব গেছে খাবার আনতে। বাইরে বেরোনোর পোশাক অবশ্য তার পরাই ছিল। বদলানোর সময় পায়নি। তাই একদিক দিয়ে রক্ষে।

নানারকম দুষ্টিক্তার মধ্যেও তার হঠাৎ একটু হাসি পেল। তাদের বাইরের ঘরে বসে পুলিশ অফিসার ভদ্রলোকটি এখন কী করছেন? হাই তুলছেন কি?

গাড়ি ছাড়ার মুখে ধুব খাবারের প্যাকেট হাতে নিয়ে এসে উঠল। তার মুখে বিশ্বজয়ীর হাসি।

গাড়ি ছাড়লে কামরাটি অপেক্ষাকৃত নির্জন হয়ে গেল।

ধুব রেমির কাছ ঘেঁষে বসে বলল, একটা জিনিস খুব মিস হয়ে গেল, বুঝলে কী মিস হল?

মাল। একটা বোতলও যদি সঙ্গে থাকত।

শ্রৌঢ় দম্পতি দুজনেই ওদের আড়চোখে লক্ষ্য করছিলেন। রেমি ছোট্ট একটা চিমটি দিয়ে বলল,

চুপ । শুনবে ।

ধুব কানে কানে বলল, বুড়োটা মালের পাটি । নাকটা দেখেছো ? লাল । এর কাছে জিনিস আছে ।

রেমি লজ্জায় সিটিয়ে গিয়ে বলল, চুপ করবে কিনা !

করছি । অ্যাডভেনচারটা কেমন লাগছে ?

কী করছি তা বুঝতেই পারছি না ।

তোমাকে বুঝতে হবে না । যা করেছি আমি করেছি । মিনিষ্টারের গুহা থেকে তোমাকে বের করে এনেছি । দুঃখ শুধু, তর্জন গর্জনটা শুনতে পাবো না ।

তোমার ভয় করছে না ?

কীসের ভয় ?

পুলিশ যদি ফ্লেপে যায় !

পাগল ! পুলিশের বড় দায় পড়েছে কিনা ।

যদি ছলিয়া বের করে !

করবে না ।

রেমি কাঁচুমাচু মুখে বলল, আমার বাবা আর জয়ন্ত মিলে এটা করেছে । কেন যে করল ! ওরা কি জানে না তোমাকে পুলিশে ধরলে ওদেরও অপমান !

নিশ্চয়ই জানে । তার চেয়েও বড় কথা আমাকে পুলিশে ধরিয়ে দিলে ওদের অন্যরকম বিপদও হতে পারে । সেই মিস্টিরিয়াস জীপগাড়ি আর সেই লোকগুলো তো খুব সোজা পাত্র নয় । তাই জয়ন্ত বা তোমার বাবা একাজ করেননি ।

রেমি বলে, তাহলে কে করল ?

বুঝতে পারোনি ? সোরাব-রুস্তম ।

সব সময়ে হেঁয়ালি ভাল লাগে না । তুমি বলতে চাইছো স্বশ্রমশাই নিজে তোমাকে ধরিয়ে দেওয়ার চেষ্টা করেছিলেন ?

এতক্ষণে মাথা খেলছে তোমার ।

যাঃ, কী যে বাজে কথা বকো না ।

লোকটাকে তুমি চেনো না রেমি ।

রেমি কিছুক্ষণ চুপচাপ বসে রইল । চিন্তা করল । তার ছোট্ট মাথায় এত চিন্তা ধরতে চায় না । কেমন ঝিম ঝিম করে ।

হঠাৎ চোখ চেয়ে বলল, তাই পালিয়ে এলে ! পুলিশের ভয়ে ?

ধুব মাথা নাড়ল, পুলিশকে আমার ভয় নেই । ওরা আমার বিরুদ্ধে কেস দিতে পারত না । দিলেও টিকত না । একটু হ্যারাস করত হয়তো ।

তাহলে ?

কৃষ্ণকান্ত চৌধুরীকে একটু পাপিট দিচ্ছি ।

কিন্তু তুমি যে পরিবারের কোনো প্রথা ভাঙতে চাও না । তবু স্বশ্রমশাইকে না বলে আমাকে নিয়ে এলে কেন ?

ওটাই তো হ্যারাসমেন্ট, আমি একা পালালে মন্ত্রীমশাই খুব একটা গা করতেন না, কিন্তু পুত্রবধূকে লোপাট করলে গা করবেন ।

তুমি একটা পাগল ।

সে কথা অনেকবার বলেছো ।

রেমি একটু চুপ করে থেকে বলল, আমার মনে হয়েছিল, বুঝি আমাকে নিয়ে আলাদা একটা



হানিমুন করার ইচ্ছে হয়েছে তোমার।

তাও হয়তো হয়েছে। ধরে নাও এটা হানিমুন দ্বিতীয় পর্ব।

ও বাবাঃ, প্রথম পর্ব যা গেছে, দ্বিতীয় পর্বে আর দরকার নেই।

কেন, প্রথমটা কি খুব খারাপ হয়েছিল? শুধু প্রেম তো একঘেয়ে ব্যাপার। তার সঙ্গে একটু রহস্য রোমাঞ্চ আর মারদাঙ্গা যোগ হওয়ায় ব্যাপারটা জমে গিয়েছিল না?

আমার আর জমার দরকার নেই।

আচ্ছা, এবার আর ওরকম হবে না।

কদিনের জন্য যাচ্ছি?

বেশীদিন নয়। টাকা ফুরোলেই ফিরে আসব।

আমি কি তোমার হোসটেজ?

এ কথায় আচমকা সবাইকে চমকে দিয়ে হোঃ হোঃ করে হেসে ওঠে ধুব। বলে, বাঃ, দারুণ বলেছো তো! হোসটেজ! মাইরি, তোমার মাথাটা তো তেমন নীরেট নয়!

রেমি শ্রৌট দম্পতির দিকে চেয়ে একটু সংকুচিত হয়ে বলল, এই, কী হচ্ছে!

ধুব নিজেকে সামলে নেয়।

আশ্চর্য এই যে, ধুবর অনুমান ঠিক। শ্রৌট লোকটি একটু পরেই তার স্টকেস থেকে একটা ছইশ্বির বোতল বের করে ফেলে। লোকটার চেহারায়ে বেশ অভিজাত্য আর অহংকারের ছাপ আছে। কর্তৃত্ব করতেই অভ্যস্ত বোঝা যায়। খানিকটা বোধ হয় কৃষ্ণকান্তের ছায়া।

ধুব চট করে ভদ্রলোকের সঙ্গে ভাব জমিয়ে ফেলল।

চূপচাপ বসে থাকা ছাড়া রেমির আর কিছুই করার ছিল না। তবে শ্রৌটা ভদ্রমহিলা রেমিকে খানিকক্ষণ সঙ্গ দিলেন। ধুব আর শ্রৌট ভদ্রলোক বোতলে জমে গেল।

ধুবর সঙ্গে বাস করে রেমির একটা জ্ঞানলাভ ঘটেছে। বোতল জিনিসটা মানুষে মানুষে ভেদাভেদ লুপ্ত করে দেয়।

পুরীতে রেমি নতুন নয়। আগে আরো বার দুই এসেছে। ধুবর সঙ্গে অবশ্য এই প্রথম। আর কী আশ্চর্য! ধুব সঙ্গে আছে বলেই বোধহয় তার কাছে পুরী এবার সবচেয়ে মনোরম মনে হল।

সমুদ্র কি এরকম উত্তাল ছিল আগের বার? এত বিপুল, বিশাল! আকাশ কি এরকম নীল ছিল! রেমি মুগ্ধ হয়ে গেল। সম্মোহিত হয়ে গেল। যেসব সমস্যা ও সংকট পিছনে রেখে তারা চলে এসেছে তা ভুলে গেল রেমি।

ধুব ঈশ্বর মানে কিনা তা রেমি আজও জানে না। তাকে কোনোদিন কোনো ঠাকুর দেবতা প্রণাম করতে দেখেনি সে। আবার নাস্তিকতার সপক্ষেও কোনোদিন কিছু বলেনি।

কিন্তু ধুবকে এসব বিষয়ে কিছু জিজ্ঞেস করতেও সাহস হয় না। রেমি সর্বদা যেন একটি অতি অনুভূতিশীল জ্যাস্ত বিস্ফোরক নিয়ে কারবার করছে। একচুল ভুলচুক হলেই সাংঘাতিক কাণ্ড ঘটবে। তাই আজকাল ধুবর সঙ্গে সে একটু হিসেব করে কথা বলতে শিখেছে। সে জেনে গেছে, তার স্বামীটির জন্ম যে রাশি বা লগ্নে সেই রাশি বা লগ্নের লোকেরা ইহজন্মে স্ত্রীর বশ্যতা স্বীকার করে না। তাই সেই চেষ্টাও আর করে না রেমি। ধীরে ধীরে সে ধুবর ব্যক্তিত্বহীন ছায়ায় পর্যবসিত হয়ে যাচ্ছে। বোধ হয় এছাড়া উপায়ও নেই।

দুটো দিন ধুব শুধু সমুদ্র স্নান ছাড়া আর তেমন কিছু করল না। ঘরে বসে খবরের কাগজ পড়ল। কয়েকটা বই কিনে আনল কোথা থেকে। তাও পড়ল। কোথাও বেড়াতে-টেড়াতে গেল না।

রেমি তৃতীয় দিন সকালবেলায় বলল, জগন্নাথের মন্দিরে যাবে?

তুমি যাও, ঘুরে এসো ।

তুমি চল না ।

একদম ইচ্ছে করছে না । তুমি যাও ।

একা ! যদি আমার কিছু হয় ?

কী হবে ?

ধরো কেউ যদি পিছুটিছু নেয় !

ধুব হেসে বলল, বদমাইশী হচ্ছে ! আমাকে বডিগার্ড বানিয়ে নিয়ে যেতে চাও ?

তুমি তো আমার বডিগার্ডই ।

তা বটে, কিন্তু আত্মিক উন্নতির ব্যাপারটায় সব মানুষই একা । একাই ভাল ।

আমি না তোমার সহধর্মিণী !

সেটা হলফ করে বলা মুশকিল ।

কেন ?

আমার ধর্ম অন্যরকম । সে ধর্ম তুমি মেনে নিতে পারবে ? ধরো যদি তোমাকে একটু মালটাল খেতে বলি, খাবে ?

কী যে বর্বর হয়েছেো না ।

তাই তো বলছি, বর্বরের ধর্ম আলাদা । তার সহধর্মিণী হতে নেই । জাস্ট বী মাই ওয়াইফ । নো রিলিজিয়াস কানেকশন । ভয় পেও না, আমাদের পরিবারের নিজস্ব পাণ্ডা আছে । তাকে খবর দিলেই আসবে । খুব গার্ড দিয়ে নিয়ে যাবে তোমাকে ।

রেমি একটি দীর্ঘশ্বাস ফেলল । তবে জগন্নাথের মন্দিরেও সে গেল না ।

তাদের হোটেলটা স্বর্গদ্বারের ওপর । বেশ বড়, পরিষ্কার পরিচ্ছন্ন । সামনেই সমুদ্র এবং তার অবিরাম শব্দ । রেমি সমুদ্রে নামে না । ভয় পায় । তবে জলের ধার ধরে ধরে বেড়াতে ভালবাসে । ঝিনুক কুড়িয়ে জড়ো করে অনেক । একা । ধুব প্রায় সময়েই তার সঙ্গে থাকে না ।

দুপুরে রেমি সমুদ্রের ধার থেকে বেড়িয়ে ফিরে আসতেই ধুব বলল, আরে, তুমি কখনো সমুদ্রে স্নান করো না কেন বলো তো !

আমার বাথরুমই ভাল ।

সে তো জানি । কিন্তু বাথরুমের সীমাবদ্ধতা থেকে সমুদ্রের অসীমে একটু অবগাহন করে নিলে আয়ুটা বাড়ত ।

আমার দরকার নেই ।

আমি সঙ্গে থাকলেও ভয় ?

ও বাবা ! আমি সীতার জানি না ।

হাঁটুজলে সীতার জানার কী দরকার ! চলো, আজ ধুব নুলিয়া তোমাকে স্নান করাবে । দুটো টাকা দিয়ে দিও বখশিশ ।

বখশিশ এখনই দিচ্ছি । স্নান করাতে হবে না ।

তাই কি হয় ! নুলিয়ারা কাজ না করে বখশিশ নেয় না, চলো ।

না না, আতঙ্কে রেমি তাড়াতাড়ি বাথরুমে ঢুকবার চেষ্টা করে ।

ধুব করাল যমের মতো রাস্তা আটকায় । তারপর জড়িয়ে ধরে কোলে তুলে নিয়ে দুটো ঘুরপাক খাইয়ে ছেড়ে দিয়ে বলে, ভয় পেও না । ডুবলে দুজনেই ডুববে । একই যাত্রার যাত্রী তো । চলো ।

ভয় পাই যে ।

ভয়টাই তো ভাঙা দরকার । ঢেউ যত বিরাট তত ভয়ংকর নয় । মানুষ বাইরেটা দেখে ভয় পায় । বুঝলে ! যেমন মন্ত্রীমশাই ।

তাকে আবার কেন ?

তাঁর সঙ্গে মিল আছে । বেশ করাল চেহারার একটি ডেউ, কিন্তু ভিতরে ঢুকে গেলে দেখা যায়, ফোঁপরা ।

মোটাই নয় ।

আচ্ছা, ওটা নিয়ে বরং পরে ডিবেটে বসা যাবে । এখন চলো । সমুদ্রে নামবার মতো পোশাক আছে ?

না । মোটে তো কয়েকটা শাড়ি নিয়ে এসেছি ।

শাড়িতেই হবে । একটু শক্ত করে গাছকোমর বেঁধে নাও ।

ভয় করছে যে !

বললাম তো ডুবলে দুজনেই ডুববো । তাছাড়া জানালা দিয়ে চেয়ে দেখ, তোমার মতো কত মহিলা স্নান করছে । কত ধুড়ি বুড়ি ছুঁড়ি । দেখছ ?

দেখেছি ।

চলো তাহলে ।

দুরু দুরু বুকে অগত্যা যেতেই হয় রেমিকে ।

ডেউ দেখে যত পা এগোয় তার দ্বিগুণ পিছিয়ে যায় রেমি । ও বাবা, সে বাঁচবে না নামলে । দুম দাম শব্দে জল এসে ফাটছে বালুর ওপর ।

কিন্তু ধুব ছাড়ার পাত্র নয় । শক্ত করে হাত চেপে ধরে বলল, যদি না নামো তাহলে আজই আমি ব্রেকিং পয়েন্ট পেরিয়ে চলে যাবো ।

তার মানে ?

আর ফিরব না । আমার জানের পরোয়া নেই, জানো তো ?

কী যে সব বলো না ।

রেমি প্রায় ডেউয়ের ধাক্কাতেই পড়ে যাচ্ছিল । কী প্রলয়ংকর ব্যাপার ! যেন এক পাহাড় এসে ভেঙে পড়ল মাথার ওপর । কান বন্ধ হয়ে গেলে । মুখে ঢুকে গেল নুন আর বালি মেশানো জল । হাঁপসে সে অস্থির ।

তবে ভেসে গেল না রেমি । ধুব ধরে ছিল তাকে ।

প্রথম ডেউটা সরে যাওয়ার পর দম নেওয়ার একটু অবকাশ পেতে না পেতেই দ্বিতীয় ডেউটা দোতলা বাড়ির সমান হয়ে ধেয়ে এল ।

রেমি চৈঁচাল, বাবা গো !

কিন্তু তার কোমর ধরে দুটো সবল হাত তাকে ওপরে তুলে দিল । ডেউয়ের ওপরে । চমৎকার এক নৃত্যপর দোলাচল । পড়ে গেল রেমি, কিন্তু ধুব তাকে ছাড়ল না । টেনে তুলে নিল । পায়ের নীচে সরষেদানার মতো বালি সরে যাচ্ছে । এক শিরশিরে অনুভব ।

ভয় ভেঙে গেল তৃতীয় ডেউটার পর ।

ধুব বলল, ডুব দিও না । মুখোমুখি ডেউটাকে কনফ্রন্ট করো না । কাত হয়ে দাঁড়াও । লাফাও ।

রেমি তাই করল । কয়েক মিনিটের মধ্যেই সে সমুদ্রের গভীর ভালবাসায় পড়ে গেল । বাঃ, এরকম তার জীবনে কিছুই তো ঘটেনি আগে !

ঘণ্টার পর ঘণ্টা কাটাল দুজন জলে । জীবনে যত ক্লোভ ছিল রেমির, যত অভাববোধ তা এক মহাসমুদ্রের ডেউ এসে ধুয়ে মুছে নিয়ে যেতে লাগল ।

পূজা আর আমকাঁঠালের সময় প্রবাসী ছেলে-মেয়েদের ঘরে আসার একটা রেওয়াজ ছিল এ বাড়িতে। আজকাল নেই। সুনয়নী বেঁচে থাকলে হয়তো আসত। মা-হীন এই লক্ষ্মীছাড়া বাড়ির প্রতি তারা বোধহয় আর কোনো আকর্ষণ বোধ করে না। বড় ছেলে কনক শীতকালে একবার আসবে বলে চিঠি দিয়েছিল। পরে মত পাল্টায়। মেজো জীমুতকান্তির শখ ছিল বিলেত গিয়ে আই সি এস হয়ে আসবে। সেটা হয়ে ওঠেনি বলে বাবার ওপর তার কিছু রাগ বা অভিমান থাকতেও পারে। সে প্রায় সম্পর্কই রাখে না। আসা দূরে থাক, চিঠি পর্যন্ত দেয় না। এই দুই ছেলের জন্য হেমকান্তর যে বিশেষ কোনো অভাববোধ আছে তা নয়। তবে মাঝে মাঝে ওদের একটু দেখতে ইচ্ছে করে, এইমাত্র।

কৃষ্ণকান্তরও তার দাদা দিদিদের প্রায় ভুলবার দশা। ওঁরা যে সব আছেন সেটুকুও তার বিশেষ মনে পড়ে না। শুধু বড়দাদা কলকাতায় নিয়ে যাবে বলে চিঠি দেওয়ায় বড়দাদা বলে যে কেউ ছিল বা আছে তা টের পেয়েছিল।

পিছনের আমবাগানে বউল ছেড়ে আমের গুটি ধরল। কালবৈশাখীই মুড়িয়ে দিয়েছিল গাছ। তবু আম বড় কম ধরল না। খুব যে ভাল জাতের আম হয় বাগানে তা নয়। তবে প্রচুর হয়। খাওয়া যায়। শ্যামকান্ত নানা দেশ থেকে ভাল জাতের আমের কলম আনিয়ে লাগিয়েছিলেন। মাটির দোষে অবশ্য তেমন ভাল জাতের আম হয় না। তবে দারুণ কাঁঠাল হয়। এবারও হবে। পূর্বের বাগানে গোটা বিশেক গাছে গলগণ্ডের মতো শেকড় থেকে মগডাল অবধি ঐচোড়ে ছেয়ে গেছে।

ঠিক এই সময়ে একদিন বিনা খবরে কনককান্তি সপরিবারে এসে হাজির।

তখন সকালবেলা। ঘোড়ার গাড়ির ওপর চাপানো বাস্ক বেডিং। গাড়িটা বারবাড়িতে এসে থামতেই চারদিকে একটা হৈ-চৈ পড়ে গেল।

নেই-নেই করেও এই বিশাল বাড়িতে, কাছারিঘরের পিছনের কুটুরি এবং আউট হাউসে গরিব আত্মীয় স্বজন এবং পরভূত স্বভাবের আশ্রিত লোকের অভাব নেই। কর্মচারীরাও আছে। সবাই দৌড়ঝাঁপ লাগিয়ে দিল। চাকর-বাকররা এগিয়ে এল।

কনককান্তির চেহারাটা রাজপুত্রসুলভ। খুব লম্বা, তন্তুকাক্ষনবর্ণ, চুলগুলো পর্যন্ত লালচে। তবে তার মুখশ্রীতে একটা রুক্ষ ভাব আছে। তার স্ত্রী চপলা প্রকৃত সুন্দরী বলতে যা বোঝায় তা নয়। তবে কলকাতার ফ্যাশনদুরন্ত মহিলা বলে চেহারাটা বেশ দেখার মতো করে তুলেছে। সামনে ফাঁপানো চুল, লেস লাগানো ব্লাউজ, পাছাপেড়ে শাড়ি। গয়নার বাছল্য নেই তার শরীরে। গাড়ি থেকে নেমে ঘোমটা টানল মাথায়। তাদের দুটি সন্তান। একটি ছেলে, অন্যটি মেয়ে। তারা ছোটো। দুটি শিশুই বেশ দেখতে।

খবর পেয়ে হেমকান্ত নিজের ঘরে সাগ্রহে অপেক্ষা করছিলেন। বুকটা একটু দুর্গদুর্গ। ছেলে তাঁরই বটে, তবু যেন একজন অচেনা অজানা মানুষ। কী ভাবে কথা বলবে, কেমন স্বভাব, কিছুই যেন জানেন না। কী খেতে ভালবাসে! এসব অবশ্য মনু ভাববে। তবু তাঁরও চিন্তা হয়।

কনককান্তি এসে প্রণাম করে দাঁড়াতে হেমকান্ত বললেন, একটা খবর দিয়ে আসোনি কেন?

খবর দিয়েছি। চিঠি বোধহয় পৌঁছোয়নি। সামান্য কিছু কুশলপ্রশ্নাদির পর হেমকান্তর কথা ফুরিয়ে গেল। এই অচেনা সুদর্শন যুবাপুরুষটির সঙ্গে ভাব বিনিময় করার মতো কিছু নেই আর।

কনককান্তি হঠাৎ বলল, ধন্যকাকা মাঝখানে কলকাতায় গিয়েছিলেন কংগ্রেসের মিটিঙে। তখন আমাদের বাড়িতে আসেন। তিনি বললেন, আপনার নাকি কী হয়েছে!

কী হয়েছে? হেমকান্ত অবাক।

কনককান্তি বুদ্ধিমান ছেলে । প্রসঙ্গটা একটু পাশ কাটিয়ে বলল, আপনি এখন ভারচুয়ালি এখানে একা । নানারকম দৃষ্টিস্তাও আছে । আমার ইচ্ছে এস্টেটের একটা বিলি বান্দোবস্ত করে সবাই মিলে কলকাতার বাড়িতে গিয়ে থাকলেই হয় । সেখানে লোকজনের মধ্যে থাকলে মনটা ভাল থাকবে ।

হেমকান্তও বোকা নন । তিনি বুঝলেন, খচ্চর এবং ঘড়েল সচ্চিদানন্দ সেই কুয়োয় বালতি পড়া এবং তজ্জনিত তাঁর বার্ষ্যচিন্তার কথাটা কনককে জানিয়ে গেছে । বন্ধু আর কাকে বলে

হেমকান্ত একটু হেসে বললেন, ধনা একটা গাড়ল । তোমাকে কী বলতে কী বুঝিয়েছে । মন কিছু খারাপ নেই । এখানেই বেশ থাকি আমি । চিন্তা কোরো না ।

কুস্তিত পায়ে চপলা এসে ঘোমটায় মুখ ঢেকে দূরে দাঁড়িয়ে আছে । দুপাশে দুই ছেলে মেয়ে । বেশ দেখাচ্ছিল দৃশ্যটা । এরা সব তাঁর আপনজন, আত্মীয়, উত্তরপুরুষ, বংশধর । হেমকান্তর মনে হল, তাঁর আরো আনন্দ হওয়া উচিত । যতটা আনন্দ হওয়া উচিত ততটা যেন ঠিক হচ্ছে না । ওরা হয়তো ভাবছে, বাবা আমাদের পেয়ে খুশি হয়নি ।

কনককান্তি বিনীতভাবে বলল, আমরা আপনার জন্য দৃষ্টিস্তায় থাকি ।

হেমকান্ত আচমকাই একটা অপ্রিয় প্রশ্ন করলেন, কেন বলো তো ! আমি কি খুব বুড়ো হয়ে গেছি নাকি ?

কনক নাথা নেড়ে একটু হেসে বলে, না । বুড়ো হবেন কেন ? কিন্তু মা চলে যাওয়ার পর দেখাশোনারও তো তেমন কেউ নেই ।

হেমকান্ত মাথা নেড়ে বললেন, সেটা কোনো কথা নয় । আমি সেলফমেড ম্যান । তোমরাও দেখেছো, চিরকাল আমি নিজের কাজ নিজেই করতে ভালবাসি । কোনো অসুবিধে হয় না ।

কনক তর্ক করল না । মৃদু গলায় শুধু বলল, এস্টেটের তো আর তেমন কিছু ভবিষ্যৎ নেই । এ পাট চুকিয়ে দিলে কেমন হয় ?

হেমকান্ত চমকালেন না । ছেলের এই মনোভাবের কথা তিনি তো জানেন । মাঝে মাঝে তার নিজেরও এরকম ইচ্ছে হয় । বিষয় সম্পত্তি মানেই উদ্বেগ অশান্তি মামলা মন কষাকষি । মানুষকে খণ্ডিত করে দেয়, ছোটো করে দেয় ।

হেমকান্ত ভাবিত মুখে বললেন, চুকিয়ে দিলেও হয় । তবে শিকড়ে টান পড়ে, বুঝলে । এখানেই জন্মাবধি রয়েছি ।

আমরাও তো এখানেই জন্মেছি । এ জায়গার জন্য আমাদেরও টান তো কম নয় । প্রয়োজন দেখা দিলে স্থানান্তরে যেতেই হয় ।

হেমকান্ত বললেন, ঠিক আছে । আমাকে কিছুদিন ভাবতে দাও । প্রয়োজন হলে তো যাবোই । শুধু কলকাতা কেন, কাশী আর পুরীতেও আমাদের বাড়ি পড়ে আছে । সেসব জায়গাতেও যাওয়া যায় ।

সেটা বিবেচনা করে দেখবেন । আসল কথা, এখন এস্টেট রাখা মানে একটা প্রচণ্ড লায়বিলিটি ।

হেমকান্ত তা জানেন । কিন্তু নিজের জ্যেষ্ঠপুত্রের মুখে কথাটা তার ভাল লাগল না । কনক কি চাইছে এস্টেট বিক্রি করে তিনি ছেলের নগদ টাকা ভাগাভাগি করে দেন ? কনকের কি এখন ব্যবসার জন্য নগদ টাকার দরকার ! সে জন্যই কি বিনা নোটিশে হঠাৎ এসে হাজির ! এসব প্রশ্নের নগদ জবাব তিনি নিজের মনের মধ্যে ঝুঁজে পেলেন না । শুধু সন্দেহটা দেখা দিয়ে রইল ।

চপলা এসে প্রণাম করতে তিনি তার মাথাটি স্নেহভরে স্পর্শ করলেন । নাতি আর নাতনীটির থুতনি নেড়ে দিলেন মাত্র । বাচ্চাদের কী করে আদর করতে হয় তা তাঁর জানা নেই । সব পরিস্থিতিতেই তিনি অপ্রতিভ বোধ করেন ।

দায়সারা গলায় বললেন, যাও বিশ্রাম করো । গাড়ির ধকল তো কম যায়নি ।

সামনে থেকে ওরা সরে যাওয়ার পর হেমকান্ত হাঁফ ছেড়ে বাঁচলেন ।

এই গৌরবান্বিত দীর্ঘকায় লোকটি যে তার বড়দাদা এটা বুঝতে কৃষ্ণকান্তের অনেক সময় লেগে গেল। ধারে কাছে ঘেঁষবার কোনো ইচ্ছে সে বোধ করল না।

পিছনে বিশাল এবং অগাধ আমবাগান। বিপ্লবী শশিভূষণ অভুক্ত অবস্থায় গত শীতে এখানে তিন দিন গা ঢাকা দিয়ে ছিল। সেই থেকে এই আমবাগানটা কৃষ্ণকান্তের কাছে একটা গুরুত্বপূর্ণ ও রহস্যময় জায়গা হয়ে উঠেছে। অবসর সময়ের অনেকটাই সে এই আমবাগানে কাটায়। সঙ্গে থাকে গুলতি, এয়ারগান, তীরধনুক বা পেনসিলকাটা ছুরি। আমবাগানের আলো আঁধারিতে সে হয়ে যায় পলাতক এক দেশপ্রেমিক। ইংরেজের শত্রু। কল্লনার বলগা ছাড়া পক্ষীরাজ তাকে কাঁহা কাঁহা মুহুরু নিয়ে যায়। গাছের একটি ডালে সে ফাঁসির দড়ি টাঙিয়েছে। কখনো কখনো একদৃষ্টে দড়ির ঝুলে থাকা ফাঁসটির দিকে সে সম্মোহিতের মতো চেয়ে থাকে।

কনককান্তি আসার পর সে এই আমবাগানেই গা-ঢাকা দিল। জানে, লাভ নেই। আমবাগানে তার এই গুপ্ত ঘাঁটির কথা অনেকেই জানে। দিদি বিশাখা, চাকর হরি, মনুপিসি, হর কমপাউণ্ডার। কেউ না কেউ ঠিক এসে ধরে নিয়ে যাবে।

আমবাগানে বসে সে সারা বেলা ধরে ভাল, বড়দাদা তাকে কলকাতায় নিয়ে যাওয়ার জন্যই এসেছে কিনা। কলকাতায় যেতে যে তার ইচ্ছে করেনা তা নয়, কিন্তু সে বেড়ানোর জন্য। কিন্তু এই ব্রহ্মপুত্র, চর, আমবাগান আর এই মায়াবী বাড়িটা দীর্ঘদিনের জন্য ছেড়ে যাওয়া তার পক্ষে অসম্ভব। সে মরে যাবে। বড়দাদাকে তো ভাল করে চেনেই না। বউদির সঙ্গে তার কোনোদিন তেমন করে ভাব হয়নি। ওদের ছেলেমেয়ে দুটিকে সে তো বলতে গেলে এই প্রথম দেখছে।

অনেকক্ষণ ধরে ভাবতে ভাবতে সে কয়েকটা কাঁচা আম খেয়ে ফেলল। তারপর হাঁটতে হাঁটতে বাগান পেরিয়ে একটা পগারের ধারে এসে দাঁড়িয়ে মুখের সামনে হাতের পাতা লম্বালম্বি ভাবে রেখে বিচিত্র একটু ঝুঁ-ঝুঁ শব্দ করল। এটা তার সংকেত।

পগারের ওপাশে কিছু গরিব প্রজার বাস। এদের বেশীর ভাগই নমশুদ্র। খুব তেজী টগবগে মানুষ। কৃষ্ণকান্তের বয়সী গোটা বিশেক ছেলে আছে ওইসব টিন আর বাঁশের ঘরের বসতিতে। তারা সবাই তার বশংবদ। প্রজা বলে নয়, এমনিতেই তারা কৃষ্ণকান্তকে ভালবাসে।

কৃষ্ণকান্তের ডাক শুনে ঝটপট পাঁচসাতজন বেরিয়ে এল। ওদের সর্দার হল ঝড়ু। সবচেয়ে দীর্ঘকায় সবচেয়ে বলিষ্ঠ তার গড়ন। পাথরে কৌদা চেহারা। যেমন ডানপিটে, তেমনি পরোপকারী।

কৃষ্ণকান্ত ঝড়ুকে বলল, স্নান করতে গাঙে যাবি ?

যাবো।

চল তাহলে।

দলবল নিয়ে কৃষ্ণকান্ত স্নানে চলল।

ঝড়ু জিজ্ঞেস করে, তুমি নাকি বন্দুক চালাতে শিখে গেছ !

হ্যাঁ। শরৎদা শিখিয়েছে।

পাখিও মেরেছো অনেক !

অনেক নয়। একটা।

বন্দুক চালাতে কিরকম লাগে ? শুনি নাকি এমন খাঙ্কা মারে যে উল্টে ফেলে দেয়।

খাঙ্কা মারেই তো। কায়দা জানা চাই।

তোমাদের তো বন্দুক আছে। একদিন চুরি করে চলো চরে যাই। আমাকে শিখিয়ে দেবে।

দেব। দাঁড়া, বড়দাদা চলে যাক। তারপর।

বড়দাদা কি তোমাকে নিয়ে যাবে ?

নিয়ে যেতে তো চাইছে। কিন্তু আমি যাবো না।

গেলেই তো ভাল। কলকাতায় কত মজা ! মনুমেন্ট, চিড়িয়াখানা, ট্রাম।

ধূস। আমার ওখানে থাকতে ভাল লাগে না।

তাহলে আমাকে পাঠিয়ে দাও না।

তোকে ! তুই গিয়ে কী করবি ?

আমি গিয়ে ওখানে কাজ কারবার শিখব। বড়লোক হব।

কী কাজ কারবার ?

সে কতরকম আছে। তোমার বড়দাদাকে বলবে ছোটোবাবু, আমাকে নিয়ে যেতে ?

কৃষ্ণকান্ত প্রস্তাবটা ভেবে দেখল। ঝড়ু চলে গেলে তার নিজের কিছু অসুবিধে আছে। তার দলে ঝড়ুই সবচেয়ে সাহসী। ওরকমটা আর কেউ নেই। সে বলল, আচ্ছা ভেবে দেখি।

ঝড়ু বলল, তোমার বড়দাদার নিজের তো বিরাট ব্যবসা। আমি তার মধ্যে ঢুকতে পারব না ? তা পারবি না কেন ?

অবশ্য দরকার হলে বাড়িতে চাকরের কাজও করতে পারি। ঘর ঝাঁটপাট দেওয়া, বাসন মাজা, খোকাখুকীদের হাওয়া খাওয়ানো।

কৃষ্ণকান্ত থমকে যায়, তারপর হঠাৎ রেগে উঠে বলে, কেন চাকরের কাজ করবি কেন ? তুই আমার বন্ধু না !

ঝড়ু অবাক হয়ে বলে, তাতে কী ? বড়দাদা তো নিজেদের লোক। ওর বাড়িতে কাজ করলে কী হয় ? বড় কর্তা বললে আমার বাবা গিয়ে কামলার কাজ করে আসে না ?

তা হোক। বাবার কথা আলাদা। বাবা কাউকে চাকর বলে মনে করে না। কিন্তু বড়দাদা কলকাতার বাবু, ওদের বাড়িতে কাজ করবি কেন ?

ঝড়ু একটু মিইয়ে গিয়ে বলে, এমনি বললাম কথাটা। আমরা প্রজা তো। তোমরা হলে রাজা লোক।

তারা যে রাজা তা খানিকটা মানে কৃষ্ণকান্ত। তবু তার মধ্যেও একটু কিস্তি আছে। সে আজকাল শুনতে পাচ্ছে, রাজ্যের অবস্থা ভাল নয়, সম্পত্তি বিক্রি হয়ে যেতে পারে। এই কথাটা ভাবলে কৃষ্ণকান্তের কেন যেন ভয় করে। রাজ্য যদি না থাকে তবে সে রাজা হবে কেমন করে ? রাজা হওয়ার জন্যই যে তার জন্ম !

কৃষ্ণকান্ত গাঙের ধারে এসে একটু আনমনা উদাস চোখে ব্রহ্মপুত্রের বিশাল বিস্তারের দিকে চেয়ে রইল। রাজ্য রাজা এসব শব্দ তার রক্তে এক ধরনের তরঙ্গ তোলে। রাজা কৃষ্ণকান্ত। রাজা কৃষ্ণকান্ত।

ঘন্টাখানেক জলে থাকার পর যখন শরীরের চামড়ায় সাদা রঙ ধরে গেছে, আর চোখ লাল তখন ছটকু দারোয়ান এসে তাকে জল থেকে তুলল, কর্তাবাবু কখন থেকে ডাকতেছেন। চলো।

খুব ভয়ে আর সংকোচে মাথা নীচু করে বাড়িতে ঢোকে কৃষ্ণকান্ত।

কনককান্তি সদ্য স্নান করে আফ্রিক সেরে এসে ওপরের বারান্দায় বসেছে। রংটা যেন চারদিকে আলো করে আছে।

কত বড় হয়ে গেছে, ঔয়া ! কনকের বিস্ময় নিখাদ।

কনক হাত বাড়িয়ে ভাইকে কাছে টেনে নিল। কৃষ্ণকান্তের রূপবান চেহারাটা বোধহয় খুবই পছন্দ হল তার। মুখের দিকে কয়েক পলক মুগ্ধ হয়ে চেয়ে থেকে বলল, বুঝলে চপলা, কৃষ্ণ আমাদের বংশে সবচেয়ে সুপুরুষ হবে।

বউদির অবস্থানটা চোখ তুলে দেখেনি কৃষ্ণকান্ত। লজ্জা করছিল। চপলা বারান্দার আর এক প্রান্তে রোদে চুল শুকোচ্ছিল দাঁড়িয়ে। পুঁচকে দেওরের দিকে চেয়ে একটু হেসে বলল, এই সেদিনও

তো আমার কোলে পেছাপ করে দিয়েছিল।

লজ্জায় মরে গেল কৃষ্ণকান্ত। অধোবদন।

বড়দাদা তাকে ছেড়ে দিয়ে বলে, অত লজ্জা পাচ্ছিস কেন আমাদের? শুনলাম সারা সকাল নাকি পালিয়ে ছিলি!

ছিল গো বড়দা। বিশাখা বউদির ছায়ায় দাঁড়ানো, সেই বলল।

লজ্জা সংকোচ সব কেটে গেল বিকেলের মধ্যেই। ভারী অদ্ভুত ভাল লাগতে লাগল কৃষ্ণকান্তর।

বড়দাদা একটু গভীর মানুষ। খুব বেশী কথা-টথা বলে না। প্রাথমিক কুশল প্রশ্নাদির পর বড়দাদা সকলের সঙ্গে খেতে বসল, দুপুরে ঘুমোলো, বিকেলে সাজগোজ করে গাড়ি নিয়ে বেরোলো পুরোনো বন্ধুদের খোঁজে। খুব নাকি তাস খেলার নেশা বড়দাদার। তাড়াতাড়ি ফিরবে না।

বউদি চপলাকে ভাল লাগল অন্য কারণে। বাড়িতে পা দিয়েই বউদি যেন এ বাড়িতে একটা অনারকম আবহাওয়া তৈরি করে দিয়েছে। ঘোমটা টানা বউ, সিঁথিতে সিঁদূর এ দৃশ্যটাই কৃষ্ণকান্তর কাছে একটু সুদূর। সে তো বাড়িতে এরকম কাউকে দেখে না।

সারাদিন ঘুরে ঘুরে বউদি অনেক কাজ করতে লাগল। এ বাড়িতে কাজের লোকের অভাব নেই, কিছু না করলেও চলে। কিন্তু বউদি বসে থাকল না। দুপুরে বাচ্চা দুটোকে ঘুম পাড়িয়ে গাছকোমর বেঁধে ঘর দোরের আসবাবপত্র চাকরদের দিয়ে এধার ওধার করাতে লাগল। সঙ্গে আঠার মতো কৃষ্ণকান্ত।

কিছুক্ষণ পরপরই বউদি তাকে জিজ্ঞেস করে, হ্যাঁ রে কৃষ্ণ, এই খাটটা দক্ষিণের জানালার ধারে পাতলে ভাল হবে না? টেবিলটাকে এই কোনায় আনলে কেমন হয় রে?

কৃষ্ণকান্ত এই যুবতীর মোহময় নৈকট্যে একধরনের সম্মোহনে আচ্ছন্ন হয়ে পড়ছিল। সব কথাতেই সায দেয়।

বউদি মানুষটা যে চমৎকার তা কৃষ্ণকান্ত আরো বুঝতে পারল ছোড়দির সঙ্গে তার ভাব দেখে। ছোড়দি অর্থাৎ বিশাখা বড় সহজে কাউকে সহ্য করতে পারে না। সেইজন্য ওর তেমন বন্ধুও নেই। কিন্তু বড় বউদির সঙ্গে তার বেশ ভাবসাব লক্ষ্য করে সে।

বিকেলে ছাদের ওপর মস্ত পাটি পেতে বসল বউদি। তাকে ডেকে বলল, আজ বিকেলে আর তোকে খেলাধুলো করতে হবে না। আমার সঙ্গে বসে গল্প করবি আয়।

কৃষ্ণকান্ত এক কথায় রাজি। ফুটবলের অমোঘ আকর্ষণ ত্যাগ করে সে বউদির কাছটিতে বসে পড়ল।

তুই নাকি ভাল ছাত্র হয়েছিস!

কৃষ্ণকান্ত লাজুক ভাবে বলে, না না।

শুনেছি। কই চিঠি লিখে তো জানাসনি যে ক্লাশে তুই ফাস্ট হোস।

আমি তো চিঠি লিখি না।

লেখ না কেন হনুমান?

এবার লিখব।

আর লিখতে হবে না। তোকে এবার আমি আঁচলে বেঁধে নিয়ে যাবো।

প্রস্তাবটা এবার আর তেমন খারাপ লাগল না কৃষ্ণকান্তর। লাজুক লাজুক হাসতে লাগল।

যাবি তো!

বাবা বললে যাবো।

আচ্ছা বাবাকে আমি রাজি করাবো। কী সুন্দর দেখতে হয়েছিস রে! কদিন বাদে তো মেয়েরা পাগল হবে তোকে দেখে।

কথাটা কৃষ্ণকান্ত ভাল বুঝল না। মেয়ে পুরুষের সম্পর্ক তার কাছে তেমন স্পষ্ট নয়। কিন্তু এসব



তো অভ্যস্ত সংস্কারের মধ্যেই থাকে । কাজেই সে রাঙা হয়ে উঠল ।

চপলা মুগ্ধ দৃষ্টিতে দেওরটিকে খানিকক্ষণ দেখে বলল, একমাথা চুল হয়েছে, কঠায় ময়লা কানে ময়লা কেউ নজর দেয় না তোর দিকে ।

মাঝে মাঝে মনুপিসি ঘষে দেয় ।

মনুপিসি ঘষে দিলে কী হবে ! তোমার নিজের দায়িত্ব নেই !

বউদি তুমি থেকে তুইতে নামতে দেবী করেনি একটুও ।

কী মিষ্টি যে লাগছিল বউদিকে তার ।

## ॥ ৩৪ ॥

টেউয়ের সঙ্গে ভাব হয়ে গেল রেমির । ভয় ভেঙে গেল ।

এর আগেও সে কয়েকবার পুরী এসেছে । কিন্তু সীতার জানে না বলে কোনোদিন সমুদ্রে নামেনি । কেউ তাকে জোর করে নামায়ওনি । টেউয়ের করাল চেহারা দেখে বুক দূরদূর করত । কোনোদিন টেউয়ের মুখোমুখি হবে না, ভেবে রেখেছিল । দৈত্যের মতো সেইসব অচেনা টেউয়ের সঙ্গে চেনা করিয়ে দিল ধুব । ভয় ভাঙল । নেশা এসে গেল ।

আকাশ আড়াল করা উঁচু, রেলগাড়ির মতো গতিময় ও পাহাড়ের মতো বিশাল এক একটা টেউ যখন আসে তখন মনে হয় তাকে বুঝি নিষ্পিষ্ট করে দিয়ে যাবে । বেলাভূমি ছাড়িয়ে ভাসিয়ে নেবে শহরের ঘরবাড়ি । লাফিয়ে বা ডুব দিয়ে টেউয়ের সঙ্গে খানিকটা বেলাভূমির দিকে ভেসে যাওয়ার পর পায়ের নীচে সর্ষেদানার মতো চলন্ত বালির ওপর দাঁড়িয়ে টালমাটাল রেমির এখন মনে হয়, সব দুঃখ শোক বুঝি ভেসে গেল । প্রথম প্রথম ধরে থাকত ধুব, আজকাল ধরে না, তবে কাছাকাছি থাকে । টেউ কাটিয়ে দিয়ে দুজনে দুজনের দিকে চেয়ে হাসে ।

স্কুল ম্যাগাজিনে রেমি এক সময়ে কয়েকটা কবিতা লিখেছিল । সমুদ্রের সঙ্গে এই চেনাজানার পর সে এক দুপুরে সংগোপনে বহুকাল বাদে আর একটা কবিতা লিখে ফেলল । নাম দিল 'তুমি' । টেউ নিয়ে লেখা । অর্থাৎ দাঁড়াল অনেকটা এরকম 'তুমি ঠিক এক রাগী ও অভিমানী পুরুষের মতো । ধেয়ে আসা পাহাড় । কালো ও গভীর । মনে হয় বুঝি চুরমার করে দেবে আমাকে । কিন্তু যখন এলে, যখন ভাসিয়ে নিলে আমাকে দম বন্ধ করা উচ্ছ্বাস ও আবেগে, পায়ের তলা থেকে কেড়ে নিলে মাটি, তখন ঠিক ভয় করল না, রোমহর্ষ হল । এতকাল যা ঘটেছে আমার জীবনে, কিছুই ঠিক এরকম নয় । কত কোমল তুমি, ফের সযত্নে স্থাপন করলে আমায় চলন্ত বালির ওপর । ভাল করে ভারসাম্য ফিরে পাওয়ার আগেই আবার ভাসিয়ে নাও তুমি, আবার স্থাপন করো । আমি তোমাকে বুঝি না, একটুও না, সেই ভাল । ওরকমই রহস্যময় থাক তুমি আদিগন্তের টেউ । কত দেশ ছুঁয়ে আসা জল । বারবার দোলাও আমাকে, বারবার ভাসাও আমাকে । কে চায় স্থির মাটি, স্থায়ী ভিত, সংসারে সোনার বিগ্রহ হয়ে থাকা !

ছেলেমানুষীতে ভরা ও কাঁচা এই কবিতা পড়ে রেমি নিজেই লজ্জায় রাঙা হল, হাসল আপন মনে । বারকয়েক পড়ে তার মনে হল, এ ঠিক টেউকে নিয়ে লেখা নয় । এসব টেউয়ের মধ্যে লুকিয়ে আছে একজন মানুষও ।

রাত্রে সে খুব সংকোচের সঙ্গে ধুবকে বলল, আমি একটা কবিতা লিখেছি, পড়বে ?

ধুব যথারীতি একখানা শব্দ বই পড়ছিল । এম এন রায়ের লেখা 'দি রাশিয়ান রিভোলিউশন' । খাটের বাজুতে বালিশের ঠেকা দিয়ে খুব আয়েস করে আধশোয়া ধুব বিস্মিত চোখে রেমির দিকে চেয়ে বলল, তুমি আবার কবিতাও লেখো নাকি ! এত গুণ তো জানতাম না ।

ইয়ার্কি করো না । একেই তো আমার মন খরাপ ।

কেন, মন খারাপের কী ?

কবিতাটা ভাল হয়নি।

ওঃ তাই বলো। দেখি—বলে হাত বাড়ায় ধুব।

রেমি একসারসাইজ বুকটা আঁকড়ে ধরে থেকে বলে, হাসবে না বলো।

আরে না। কবিতা খুব সিরিয়াস জিনিস। ও নিয়ে হাসিঠাট্টা চলে!

এই তো ইয়ার্কি করছে।

মাইরি না। যে জিনিস বুঝি না তা নিয়ে ইয়ার্কি চলে না।

কবিতা তোমার ভাল লাগে না জানি।

ঠিকই জানো। আসলে বুঝি না বলেই তেমন করে ভালবাসি না।

সব কিছুই কি স্পষ্ট করে বোঝা যায় ?

ধুব একটা দীর্ঘশ্বাস ফেলে বলল, তা বটে। তবে আমি যে সব বিষয় ভালবাসি অর্থনীতি রাজনীতি বা বিজ্ঞান তাদের মধ্যে কোনো অস্পষ্টতা নেই। সলিড যুক্তি এবং নির্ভুল অংকের ওপর দাঁড় করানো জিনিস। দাও দেখি আমার নীরেট মগজে তোমার কবিতার কোনো এফেক্ট হয় কিনা।

খুব কাঁচু-মাচু হয়ে খাতাটা এগিয়ে দিল রেমি। তারপর তার ভীষণ লজ্জা করতে লাগল। বুক কাঁপছে। আশ্চর্য, এই মানুষটার সঙ্গে তার শরীরের ব্যবধান নেই। লজ্জা নেই। সারা রাত প্রায় এর বুকের মধ্যে লেপটে সে শুয়ে থাকতে ভালবাসে। তবে একটা কবিতা দেখাতে এত লজ্জা কেন!

ধুব তাচ্ছিল্যের সঙ্গেই কবিতাটা পড়ে গেল। মুখে একটু গা জ্বালানো হাসির ছিটে। চোখের পলকে পড়া হয়ে গেল। খাতাটা বিছানায় রেখে বলল, বেশ হয়েছে। চালিয়ে যাও।

একথায় রেমি একদম নিভে গেল। মনটা ভারী খারাপ লাগতে লাগল। অপমান বোধ করল সে।

অনেকক্ষণ বারান্দায় দাঁড়িয়ে অন্ধকার সমুদ্রের দিকে চেয়ে রইল সে। অবিরল জল ভাঙার শব্দ কানে তাল দ্বারা ধরিয়ে দেয়। আশ্চর্য, ধুব কি বুঝতে পারল না যে, ওই ডেউয়ের বিবরণ আসলে সমুদ্রের ঢেউ নয়। ধুব নিজেই!

অনেকক্ষণ দাঁড়িয়ে অপেক্ষা করল রেমি। আশা করল, সে যে রাগ করেছে তা ধুব বুঝতে পারবে এবং রাগ ভাঙতে আসবে। কিন্তু এই পুরুষটির কাছে কোনো কিছু আশা করাই অন্যায়। যাকে বলে আনথ্রেডিকটেবল ধুব হচ্ছে তাই। ক্রশ বিপ্লব তার কাছে বউ বা বউয়ের ছঁদো রাগের চেয়ে অনেক বেশী বাস্তব জিনিস।

খাওয়ার সময়েও দুজনেই চুপচাপ। ধুব অন্যমনস্ক। রেমি অন্যমনস্কতার ভান বজায় রাখতে সতর্ক।

রাত্রে ঘরের দরজা বন্ধ করার পরই ধুব তাকে বলল, রেমি, ওটার নাম বদলে দাও।

কোনটার ?

কবিতার।

তার মানে ?

ওই তুমিটা কে ? ঢেউ ?

তাছাড়া আবার কে ?

ধুব একটু হেসে বলল, তাহলে অবশ্য আলাদা কথা। আমি ভেবেছিলাম ঢেউটা বোধহয় বকলমে আমিই।

রেমি রাগ করে বলল, না, তুমি কেন হতে যাবে!

খুব রেগেছো ডারলিং। কবিতা খুব টাচি হয় শুনেছি।

আমি মোটেই কবি নই।

তা অবশ্য ঠিক । তবে এতদিন পরে আমি বুঝতে পারছি তোমার মধ্যে একটা কবিসুলভ ব্যাপার আছে । নইলে এত টাচি হবে কেন !

আমি মোটেই টাচি নই ।

রাগছো কেন ? টাচি হওয়া তো ভাল । আমার মতো গাছ হওয়াটা একদম কাজের কথা নয় । রেমির গনগনে অভিমান আরও ফুঁসে উঠল এইসব ইঙ্গন পেয়ে সে জবাব দেওয়া বন্ধ করল । ধুব দিবি পাশে শুয়ে চটপট ঘুমিয়ে পড়ল ।

পরদিন মেঘলা আকাশ নিয়ে ভোর হল । একটা ঝোড়ো হাওয়া বইছে । সমুদ্রকে দেখাচ্ছিল নিকষ কালো । ঢেউগুলো আগের দিনের তুলনায় দ্বিগুণ, তিনগুণ । একজনও সমুদ্রে নামেনি আজ । এমন কি বিস্তীর্ণ বেলাভূমিতেও লোক নেই । ঝোড়ো দামালো দিন । আজ বোধহয় আর ঢেউয়ের সঙ্গে ভাব ভালবাসা হবে না রেমির ।

ধুব বেলা অবধি ঘুমোচ্ছিল । রোজ তাকে রেমি ডেকে তোলে । কিন্তু কাল থেকে রাগ করে আছে বলে আজ আর রেমি ডাকেনি । খানিকক্ষণ বারান্দায় দাঁড়িয়ে সমুদ্রের ভয়ংকর চেহারাটা দেখতে দেখতে কয়েকবার শিউরে উঠল সে । ঢেউ আজ অনেকটা ওপর অবধি ধেয়ে আসছে । উত্তাল কালো জল । রেমির একটু শীত করছিল । গায়ে আঁচলটা ভাল করে জড়িয়ে নিয়ে সে নীচে খাবার ঘরে এসে একা একা চা খেল । কারো সঙ্গেই কথা বলার নেই । কিছু করারও নেই আজ । কেমন যেন কলকাতার জন্য মন কেমন করছে । শ্বশুরমশাই নিশ্চয়ই তাদের কথা ভাবছেন । তার বাবার শরীরও ভাল ছিল না ।

ঘণ্টা খানেক বাদে রেমি ঘরে এসে দেখল, ধুব নেই ।

নেই তো নেই-ই । বাথরুমে নেই, খাওয়ার ঘরে নেই । কোথাও নেই । এরকম মাঝে মাঝে বেপাতা হয়ে যায় বটে ধুব । কোথাও এই এক বেলা কাটিয়ে ফিরে আসে । চিন্তার কিছু নেই । কিন্তু আজ এই মেঘলা ঝোড়ো দামাল দিনে রেমির বড় একা লাগছে । মনটা বিস্বাদ । তেতো । একসারসাইজ বুকটা বের করে সে কবিতাটা পড়ল । বাজে, অখাদ্য । কিন্তু তার আজ সকালে আর একটা কবিতা লিখতে ইচ্ছে করছে । একটা ডট পেন নিয়ে সে বসে গেল । কবিতার নাম দিল “একা” ।

দুপুর হয়ে এল । সকাল থেকে কিছু খায়নি রেমি । চনচনে খিদে পেয়ে গেছে । ধুবর জন্য বসে থেকে লাভ নেই । সে উঠল । বাথরুমে যাবে-যাবে করেও একটু থমকাল সে । বাথরুমে স্নান করতে ভাল লাগবে কি ?

বন্ধ জানালার কাচের শার্শি দিয়ে সে সমুদ্রের দিকে তাকাল । কালো, বিশাল ঢেউ এসে আছড়ে পড়ছে বেলাভূমিতে । ভয়ংকর । একজনও লোক দেখা যাচ্ছে না কোথাও ।

রেমি একবার ঢোক গিলল । তারপর দাঁতে দাঁত চাপল সে । ক্ষতি কি ? সমুদ্র যদি তাকে নেয় তো নিক । সে সুখী না অসুখী তা আজও ভাল বুঝতে পারেনি সে । মরতেও কোনোদিন ইচ্ছে করেনি তার । কিন্তু বেঁচে থাকাটাও তো বড্ড আলুনি ।

কবিতাটা সে আর একবার পড়ল । কবে থেকে আমি একা ? ঠিক বুঝতে পারিনি হে আমার প্রিয় । আজ বুঝি, যেদিন তোমার সঙ্গে বেঁধেছি আমাকে সেদিন থেকেই তুমি আমার চারধারে তুলে দিয়েছো প্রতিরোধ । আমাকে কেড়ে নিলে পৃথিবীর সব কিছু থেকে, নিজেকেও দিলে না ।

কবিতার পাতাটা বিছানার ওপর খুলে রাখল রেমি ।

তারপর তোয়ালে নিয়ে নিঃশব্দে নেমে গেল নীচে ।

সমুদ্রের ধারে প্রবল বাতাসের মধ্যে দাঁড়িয়ে সে অকপট ভয়ে এবং বিস্ময়ে ঢেউ দেখছিল । নামবে ?

ক্ষণিক একটু দ্বিধা আর জড়তা । তারপর আচমকা গাছকোমর বেঁধে রেমি তরতর করে নেমে

গেল। যেতে হল না বেশীদূর। মাঝপথেই আকাশ-পাতাল জোড়া একটা কালো ডেউ কয়েক হাজার টন জল নিয়ে ঝাঁপিয়ে পড়ল তার ওপর।

চেতনা হারানোর আগে রেমির মনে হল, সে একটা রেলগাড়ির চাকার তলায় নিষ্পেষিত হয়ে যাচ্ছে। প্রবল এক চোরাশ্বোত তাকে টেনে নিচ্ছে গভীর সমুদ্রের দিকে।

আসলে তা নয়। রেমিকে কয়েকবার জলের কুস্তীপাকে চক্কর দিয়ে মহাকায় ডেউ তাকে ছুঁড়ে ফেলে দিয়েছিল তীরে।

আর একটা ডেউ নিশ্চিত নিয়ে যেত তাকে। কিন্তু তার আগেই একজন দুঃসাহসী ছুটে এসে রেমিকে হিড়হিড় করে টেনে অনেকটা ওপরে তুলে নিয়ে শুইয়ে দিল।

রেমি জল খায়নি, তেমন চোটও লাগেনি তার। কয়েক মুহূর্তের সংজ্ঞাহীনতা কাটিয়ে সে চোখ মেলে লোকটাকে দেখল।

লোক নয়। অল্পবয়সী একটা ছেলে।

ছেলেটা বলল, আপনার তো দারুণ সাহস! আজ কেউ নামে? উঠুন! উঠুন!

রেমি উঠল। একটা ডেউ এইমাত্র তার কোমর অবধি ডুবিয়ে দিয়ে ফিরে গেল। পরেরটা হয়তো তাকে ভাসিয়ে নেবে।

ছেলেটা রেমির কনুই ধরে তুলে নিরাপদ দূরত্বে নিয়ে যেতে যেতে বলল, আমি দূর থেকে খুব টেঁচিয়ে আপনাকে সাবধান করছিলাম। শুনতে পাননি?

হতভম্ব রেমি মাথা নেড়ে বলল, না।

হাওয়ার জন্য।

রেমি একটা দীর্ঘশ্বাস ছাড়ল।

ছেলেটা বলল, পুরীর সমুদ্র এমনিতে সেফ, কিন্তু এসব দিনে ভীষণ ডেঞ্জারাস। আর স্নান করতে হবে না, হোটেলে ফিরে যান।

রেমির মাথার মধ্যে অদ্ভুত একটা বোবা ভাব। সব ভাবনা-চিন্তা থেমে গেছে। কথা খেলছে না।

সে উঠল এবং নীরবে হোটেলের দিকে হাঁটতে লাগল।

আশ্চর্যের বিষয়, দোতলার বারান্দার দিকে চেয়ে সে দেখতে পেল খুব নিষ্পন্দ হয়ে দাঁড়িয়ে আছে। হাওয়ায় তার লম্বা চুল উড়ছে। সে দেখছে তাকে। কিন্তু অনুভূজিত, উদ্বেগশূন্য।

ধুবকে দেখে একটু থমকাল রেমি। আজ হঠাৎ সন্দেহ হল তার। তাকে সমুদ্রে বিপন্ন হতে দেখেও ধুবর উদ্বেগ নেই কেন! তবে কি ধুবর কাছে তার মৃত্যু খুব একটা শোকের হবে না? ধুব কি মনে মনে এই বন্ধন থেকে ছাড়া পেতে চায়?

ঘরে আসতে খুব শীত করছিল রেমির। খুব শীত। নিঃসঙ্গতা তো ভীষণ শীতল।

ধুব তাকে ঘরে ঢুকতে দিয়ে নিজেও পিছু পিছু ঢুকল। দরজাটা ঠাস করে বন্ধ করে দিয়ে বলল, কী সিস্টার মরতে পারলে না?

রেমি স্থির হয়ে দাঁড়িয়ে বলল, তুমি তাই চাও?

আমার চাওয়াটা কোনো ব্যাপার নয়। তুমি কি চেয়েছিলে?

রেমি বাথরুমে গিয়ে গা থেকে নোনা জল ধুয়ে কাপড় পাল্টে বেরিয়ে এল। শরীরটা দুর্বল। মনটা ফাঁকা।

ধুব বিছানায় বসে বাথরুমের দরজার দিকেই চেয়েছিল। সে বেরিয়ে আসতেই বলল, ওই হীরোটি কে?

কোন হীরো'?

যে তোমাকে মৃত্যুর কবল থেকে এইমাত্র বাঁচাল!

জানি না ।

ধুব মাথা নেড়ে বলল, নাম জেনে নাওনি ? ঠিকানা ?

কেন বলো তো ?

এই রকম পরিস্থিতি হৃদয়চর্চার পক্ষে দারুণ ফেবারেবল ।

তার মানে ?

ঘরে এসে তোমার “একা” কবিতাটা আমি পড়ে ফেলেছি । তারপর বারান্দায় দাঁড়িয়ে দেখেছি তোমার সুইসাইডাল অ্যাটেমপট ।

তবু এগিয়ে যাওনি ?

স্পিডে পেরে উঠতাম না । তবে দু-একবার চেষ্টায়ে ছিলাম । বৃথা । এই ঝোড়ো বাতাসে সে ডাক তোমার শোনার কথা নয় । তাছাড়া হয়তো শুনলেও ফিরতে না ।

তাই বুঝি ?

তাই তো । তুমি যে বড় একা । হঠাৎ দেখলাম এক ছোকরা তোমাকে জল থেকে টেনে তুলছে বেশ লালটু দেখতে ।

হবে । আমি ভাল করে দেখিনি ।

আমি দেখেছি । পাশের হোটেলটার দিক থেকে বেরোলো ।

তাই নাকি ?

চালিয়ে যাও ।

তার মানে ?

ছোকরা তোমাকে বাঁচিয়েছে, সুতরাং তোমার ওপর ওর খানিকটা হক বা দাবীও জন্মায় ।

ইতরের মতো কথা বোলো না ।

মাইরি সিস্টার, তোমার সঙ্গে ঠাট্টা করাও মুশকিল ।

ঠাট্টা নয় । ওটা তোমার মনের নোংরামি ।

ধুব মাথা নেড়ে বলল, মাইরি না । আমি কি রকম তা আমি জানি । আমি ঢেউ, আমি চেস্টিস খা । সব ঠিক । কিন্তু ভাই, আমি এও বলি, বি এ গুড গার্ল, গো অ্যান্ড লাভ সামওয়ান এগেন ।

আমি তাতে খুব খুশি হবো ।

ঠিক আছে । চেষ্টা করব ।

এই পাত্রটা আমার বেশ পছন্দ । ছোকরা দারুণ লালটু ।

রেমি রাগে ফেটে যাচ্ছিল । প্রাণপণে মুখ টিপে রইল শুধু ।

খাওয়ার পর রেমি আজ একটু ঘুমোলো । রাত্রে ভাল ঘুম হয়নি ।

বিকেলে ধুব তাকে ডেকে তুলল, আরে দেখ, কাকে ধরে এনেছি ।

রেমি অবাক হয়ে দেখল, সেই ছেলেরটা ।

॥ ৩৫ ॥

চপলার বাবা মস্ত শিকারী এবং উয়ংকর সাহেব । চপলা নিজে থাকে কলকাতায় । তার মধ্যে শহরের ছোঁয়া আছে, আর আছে বাপের বাড়ির সাহেবিয়ানা । সে চমৎকার অগনি বাজায়, ফুটন্ত ইংরিজি বলে, সাহেবদের সঙ্গে বসে নির্দেশ ম্যানারসে ডিনার খেতে পারে । আবার কলকাতাও তার মধ্যে সঞ্চার করেছে কিছু আধুনিকতা । দুয়ে মিলে চপলা খুবই সমস্যা হয়ে দাঁড়াতে পারত এই পরিবারের পক্ষে । কিন্তু সেটা হয়নি । হয়নি চপলা বুদ্ধিমতী বলেই । এই সেকলে, রক্ষণশীল এবং পুরোনো মূল্যবোধের ভিত্তিতে স্থাপিত পরিবারের আবহাটা সে প্রথম থেকেই বুঝে গিয়েছিল ।

কনককান্তিকে তার স্বশুর কলকাতায় নিয়ে আবার রোপণ করেছেন বটে, কিন্তু সত্যিকারের বিচ্ছিন্ন করতে পারেননি। চপলা সেতুবন্ধ রচনা করে রেখেছিল। ইচ্ছে করলেই কনককান্তিকে মেনীমুখো স্ত্রৈণ ও ব্যক্তিত্বহীন এক পুরুষে রূপান্তরিত করতে পারত সে। করেনি। কারণ, ওরকম পুরুষকে স্বামী বলে ভাবতে তার কষ্ট হয়। নিজের স্বার্থেই কনকের ওপর খোদকারী করা থেকে বিরত থেকেছে।

বুদ্ধিমতী এই মেয়েটিকে হেমকান্তও শ্রদ্ধা করেন। তবে সেটা তাঁর খুব অভ্যস্তরের ব্যাপার। বাইরের লোক তা টের পায় না।

হেমকান্ত বউমাকে সঙ্গেবেলা ডাকিয়ে আনলেন নীচের বৈঠকখানায়। ঘরটা খালিই থাকে। নিরালাও।

বোসো বউমা। একটু কথা আছে।

চপলা সশ্রদ্ধ দূরত্ব রেখে সংকোচের সঙ্গে বসল। মাথায় অনভ্যস্ত ঘোমটা।

হেমকান্ত বললেন, সংসারটা আমার কাছে বড় জটিল। তোমার শাশুড়ি বেঁচে থাকলে ততটা বিপন্ন বোধ করতাম না। পরামর্শ দেওয়ারও কেউ নেই। মুশকিলটা বিশাখাকে নিয়ে।

চপলা মৃদু একটু হাসল। তারপর হাসি গোপন করতে মুখ নামিয়ে নিল।

হেমকান্ত অতটা লক্ষ্য করলেন না। বললেন, রাজেন মোক্তারের ছেলের সঙ্গে ওর সম্বন্ধ করেছে। আমাকে তো সরাসরি কিছু বলে না। কিন্তু শুনেছি, এ বিয়েতে ও রাজি নয়।

কেন তা কিছু বলেছে?

আমাকে বলেনি। শুনেছি ওর নাকি কোকাবাবুর নাতি শরৎকে পছন্দ।

পছন্দ?

হ্যাঁ, ব্যাপারটা অদ্ভুত। শরৎকে ও কোথায় দেখেছে কে জানে। আজকাল যা সব হচ্ছে আমাদের আর কোনো ভূমিকাই নেই।

চপলা বলল, রাজেনবাবুর ছেলেটি কেমন?

খুব ভাল সেলফ মেড ম্যান। স্বাবলম্বী। এরা কখনো খারাপ হয় না। সম্ভিত সম্পদের অভিশাপ থেকে মুক্ত

আপনার যদি পছন্দ হয়ে থাকে তবে বিশাখার আপত্তি কানে তুলছেন কেন?

জোর করতে বলছ?

জোর নয়। বিশাখা তো আর বাধা দেবে না।

তা দেবে না তবে মা-মরা মেয়ে, হিতে বিপরীত হয় যদি! সেই জন্যই তো পরামর্শ করার লোক খুঁজছিলাম।

আমাকে একটু ভাবতে দিন।

ভাবো। তবে আমার মনে হয় শচীনই বরণীয় পাত্র। শরৎ খারাপ বলছি না। তবে একটু উগ্র প্রকৃতির। তাছাড়া সে বিয়ে করতে রাজি নয়। বিলেত যাবে।

তাহলে? সমস্যা তো মিটেই গেল।

হেমকান্ত মাথা নাড়লেন, না বউমা, মিটল না। শচীনকে যদি বিশাখা পছন্দ না করেই থাকে তবে শরতের বিলেত যাওয়াতে কিছু যায় আসে না। মেয়েদের মনে কোনো পুরুষের ছাপ পড়ে গেলে সেটা একেবারে উৎখাত না করে বিয়ে দিলে খারাপ হয়। আমি চাই শচীনকে ও বরণ করুক। তুমি কি সে কাজটুকু করতে পারবে?

তাহলে আমি বিশাখার সঙ্গে কথা বলে দেখি।

হেমকান্ত মাথা নেড়ে বললেন, সেটা বড় কথা নয়। তুমি আগে নিজে বুঝে দেখ শচীন কেমন পাত্র। তোমার যদি এ সম্বন্ধ করণীয় মনে হয় তবেই পরবর্তী কাজের কথা ভাববে।

শটীনকে কোথায় পাবো ?

হেমকান্ত হেসে বললেন, বেশী কষ্ট করতে হবে না। কাছারি ঘরে বসে এ সময়ে সে রোজ কাগজপত্র দেখে। তাকে আমি এস্টেটের উকিল ঠিক করেছি। যদি সংকোচ বোধ না কর তবে তাকে ডেকে পাঠাতে পারি। এ ঘরে বসেই কথা বলবে।

চপলা বলল, তার দরকার নেই বাবা। আমি দেখা করে নেবোখন। আপনি ভাববেন না।

হেমকান্ত একটা দীর্ঘশ্বাস ছেড়ে বললেন, তোমরা দূরে থাকো বলেই আমি বড় অসহায় বোধ করি। সমস্যাটা হয়তো তেমন জটিল কিছু নয়। কিন্তু একা একা বসে ভাবতে ভাবতে ক্রমশ সবটা জটিল হয়ে ওঠে।

চপলা আবার একটু হাসল। বলল, আপনি ভাববেন না। সবদিক যাতে বজায় থাকে আমি দেখব। একটা কথা বলব বাবা ?

বলো।

বন্দুকের ঘরের চাবিটা আমাকে একটু দেবেন ?

হেমকান্ত অবাক হয়ে বলেন, কেন মা, হঠাৎ বন্দুকের ঘরের চাবি কেন ?

মাথা নীচু করে চপলা খুব লজ্জা আর সংকোচের সঙ্গে বলে, এমনি, আমি শিকারীর মেয়ে তো। বন্দুকগুলো একটু পরিষ্কার করে তেল টেল দিয়ে রেখে দেবো।

হেমকান্ত হো হো করে কখনো উচ্চস্বরে হাসেন না। এখন হাসলেন। বললেন, তা বটে। বন্দুকের অযত্ন তোমার সহ্য না হওয়ারই কথা। ঠিক আছে। আমার খাটের পায়ের দিকে আলমারিতে যে হাতবাক্স আছে তার মধ্যে রেখেছি। যখন খুশি নিয়ে নিও। তুমি তো বোধহয় বন্দুক চালাতেও পারো, না ?

চপলা মৃদু হাসল।

হেমকান্ত দৃষ্টিস্তার গলায় বললেন, কৃষ্ণটাও নাকি বন্দুকের জন্য পাগল। বাচ্চাদের বন্দুক নিয়ে খেলা আমার পছন্দ নয়। ওকে একটু সামলে রেখো।

কোনো ভয় নেই বাবা। কৃষ্ণ খুব বাধ্য ছেলে।

তা হবে। আমি আর ওকে কতটুকু জানি।

আমি জানি।

তুমি যদি এখানে থাকতে পারতে তবে বোধহয় কৃষ্ণটা মানুষ হত।

তার চেয়ে আমাদের কাছে কলকাতায় গিয়ে থাক না।

সে প্রস্তাবটাও ভাবছি। কিন্তু মুশকিল, ও যেতে চায় না।

আপনারও কষ্ট হয় বোধহয়।

হয়। বিশাখার বিয়ে হয়ে গেলে আমি কতটা একা হয়ে পড়ব সে তো আন্দাজ করতেই পারো।

পারি বাবা। আর সেইজন্যই চাপাচাপি করি না।

হেমকান্ত একটা দীর্ঘশ্বাস ফেললেন।

হেমকান্তর কাছ থেকে উঠে বৈঠকখানা থেকে বেরিয়ে চপলা সোজা কাছারিঘরে এসে উঠল। বাড়ির বউ সচরাচর বারবাড়িতে আসে না, কাছারিঘরে তো নয়ই। চাকর, বাকর, দারোয়ান, মুন্সি খাজাঞ্চিরা তটস্থ হয়ে উঠল।

চপলা দরজা দিয়ে উঁকি মেরে শটীনকে অপলক চোখে কয়েক সেকেন্ডে দেখল। লম্বা গড়নের চমৎকার চেহারা। মাথায় একরাশ মিশমিশে চুল। উকিলের পোশাক ছেড়ে সাহেবী বা বাবু পোশাক পরলে রূপ অনেক বেড়ে যাবে।

কাজটা ঠিক হবে কিনা তা নিয়ে মাথা ঘামাল না সে! নিঃশব্দে ঘরে ঢুকল এবং শটীনের মুখোমুখি মস্ত নীচু চৌকিটার এক ধারে বসে বলল, নমস্কার।

শচীন আকণ্ঠ ডুবে ছিল কাজের মধ্যে । বাহ্যজ্ঞান ছিল না । আচমকা মহিলার কণ্ঠস্বরে একটু অবাক হয়ে তাকাল ।

চিনতে পারছেন ?

শচীন চিনল না । তবে আন্দাজ করল । একটুও ব্যতিব্যস্ত না হয়ে এক গাল হেসে বলল, বড় বউদি নিশ্চয়ই !

ঠিক ধরেছেন । আমরা এসেছি শুনে দেখা করতে যাননি তো !

শচীন এবার একটু তটস্থ হল । হবু জামাই-এর স্ট্যাটাস আর তার নেই । সুতরাং এ বাড়ির অন্দরমহলের খবর নেওয়ারও প্রয়োজন পড়ে না ।

শচীন মৃদুস্বরে বলল, সদ্য তো এলেন ।

তা বটে, শুনেছি, আপনি এখন একজন সাজঘাতিক উকিল ।

শচীন আবার হাসল । বেশ হাসিটি । চপলার একটু মায়া পড়ে গেল, সরল ও সহজ হাসিটি দেখে । শচীন বলল, সবে তো পাস করে প্র্যাকটিস শুরু করেছি । এখনো বাঘ ভালুক মারিনি ।

একটু তরল স্বরে চপলা বলে, ভাল উকিল হতে গেলে প্যাঁচালো বুদ্ধি চাই । আপনাকে দেখে তো মনে হয় প্যাঁচঘোচ জানেন না ।

শচীন একথার কী জবাব দেবে । চুপ করে রইল ।

চপলা বলল, আপনার সঙ্গে একটু আলাপ করার ইচ্ছে । কিছু মনে করবেন না তো !

আরে না, না, কী যে বলেন !

শুনেছি আপনি গান জানেন ।

ও কিছু নয় ।

একদিন গান শোনাবেন ?

শচীন লাজুক মুখে বলল, সে সামান্য একটু শিখেছিলাম । তেমন চর্চাও করা হয় না ।

কী শিখেছেন ?

টপ্পা, গজল, ঠুংরি ।

বাঃ । কবে শোনাবেন বলুন ।

যেদিন হুকুম করবেন ।

হুকুম টুকুম নয় । কালই আসর বসাবো । রাজি ?

কাল ? বেশ তো । আর কে গাইবে ?

অতি সন্ধ্যাসীতে গাজন নষ্ট । কেবল আপনি ।

শচীন মাথা নাড়ল, ঠিক আছে ।

রবীন্দ্রসঙ্গীত জানেন না ?

শচীন মাথা নেড়ে বলে, জানি । দু-চারটে ।

ওতেই হবে ।

শচীন হঠাৎ একটু গম্ভীর ও ভ্রান হয়ে গেল । হাতের পার্কার কলমটা বন্ধ করে বলল, একটা কথা বউদি ।

বলুন ।

এই গান শোনার পেছনে কোনো প্ল্যান নেই তো ।

কী প্ল্যান ?

শচীন বিব্রত হয়ে বলে, হয়তো স্পষ্ট করে বলতে পারব না, যদি দয়া করে বুঝে নেন তাহলে ভাল হয় ।

ছেলেটা বুদ্ধিমান তা বুঝল চপলা । বলল, প্ল্যান যাই থাক আপনার সম্মানের কোনো হানি হবে



না। কথা দিচ্ছি।

দয়া করে সেটা দেখবেন। আমি গরীবের ছেলে, বামন হয়ে চাঁদে হাত বাড়াতে চাই না।

চপলা হঠাৎ থমকায়। তুরপর কিছু তীব্র গলায় বলে, নিজেকে ছোটো ভাববার কোনো কারণ তো আপনার নেই। কে বামন, কে চাঁদ তা আমি জানি।

চপলা বেরিয়ে এল। বস্তৃত এবার স্বস্তরবাড়িতে আসার আগে সে ভয় করেছিল, সময়টা খুব একঘেয়ে কাটবে। কিন্তু কপাল ভালই। স্বস্তরবাড়িতে পা দেওয়ার সঙ্গে সঙ্গেই উত্তেজক ঘটনাবলী ঘটতে চলেছে। বেশ চনমনে লাগছিল তার।

বিশাখাকে ছাদে ডেকে নিয়ে গেল সে।

কী রে মুখপুড়ি, শটীনকে পছন্দ করছিস না কেন?

পছন্দ করতেই বা হবে কেন?

খুব মুখ হয়েছে, না।

মোটাই না। মুখ কখন করলাম? বা রে!

এই তো করলি। আগে বল, ওর দোষ কোথায়।

ওর দোষ তো বলিনি।

তবে কার দোষ?

ওদের বাড়িটা ভারী গরীব-গরীব।

তুই কবে ওদের বাড়িতে গেছিস?

বিয়ের কথা ওঠার আগেও গেছি।

ঠিক আছে, আমি গিয়ে দেখে আসব।

দেখো।

শরৎকে তোর পছন্দ কেন?

শরৎকে পছন্দ কে বলল?

শুনছি।

খুব রটে গেছে তো ব্যাপারটা।

রটবেই। আগে কথার জবাব দে।

বিশাখা কিছুক্ষণ নতমুখে থেকে বলল, শরৎকে আমার পছন্দ নয়। তবে ওদের অবস্থা ভাল।

তুই এত হিসেবী হলি কবে থেকে?

আমার বউদি, কেন জানি না, জমিদার ছাড়া অন্য ঘরে যাওয়ার কথা ভাবতেই ভাল লাগে না।

সে তো না লাগতেই পারে। কিন্তু জমিদারদের সবাইকার অবস্থা ই তো আর ভাল নয়।

সে তো জানি।

ছাই জানিস। কোকাবাবু মরার পর থেকে ভাই ভাইতে কী গুণগোল লেগেছে তা জানিস? না।

কোকাবাবুর এক ছেলে তোর দাদার বন্ধু। আমি কলকাতায় থেকেই শুনেছি। কোকাবাবুর সেই ছেলে একজন ব্যারিস্টারের সঙ্গে পরামর্শ করতে কলকাতায় গিয়েছিল। মামলা লাগল বলে।

বিশাখা চূপ করে রইল।

জমিদারী ভাগ হয়ে যাবে। যা ভাগে পড়বে এক একজনের তাতে ঠাট বজায় রাখাও সম্ভব নয়। বুঝলি?

বিশাখা মৃদুস্বরে বলল, অত খবর তো রাখি না।

শরৎ দেখতে কেমন?

তা কি জানি! লাজুক গলায় বিশাখা বলে।

জানিস না ? চপলা অবাক হয়ে বলে, তাহলে পছন্দ করলি কি করে ?

বিশাখা মাথা নেড়ে বলে, সেরকম পছন্দ নয় ।

তাহলে ?

একদিন আমাদের আমবাগানে একটা পাগলা কুকুরকে গুলি করে মেরেছিল । সেদিন দেখেছি ।

মোটো একদিন ?

হঁ ।

কিরকম দেখতে ?

জানি না যাও ।

ও বাবা, মনে মনে বহুদূর এগিয়েছো দেখছি ।

মোটোই না । শটীনকে কাটানোর জন্য এমনি শরতের কথা তুলে দিয়ে মজা দেখছিলাম ।

শরৎ রাজি হলে কি করতি ?

ওঃ, তোমার সঙ্গে পারা যায় না ।

আমি শটীনের সঙ্গে দেখা করেছি ।

তুমি ?

কেন, আমি দেখা করলে দোষ হয় নাকি ?

তা বলিনি ।

আমার বেশ লাগল ।

সকলেরই লাগে । শুধু আমারই পোড়া চোখ ।

কেমন দেখতে, কেমন স্তাব তঁ আন্দাজ করার জন্য গেলাম ।

কেমন লাগল তা তো জানি । সবাই বলে ভাল । কিন্তু আমার তো লোকটাকে নিয়ে আপত্তি নয় । আপত্তি বাড়ি নিয়ে ।

তুই একটা বোকা ।

সবাই তাই বলে ।

যদি বিয়ে না করতে চাস তো তাই হবে । অত ভাবছিস কেন ? স্বশুরমশাই জোর-জবরদস্তি করবেন না

বিশাখা একটা দীর্ঘশ্বাস ফেলে বলে, এমন কি কৃষ্ণ পর্যন্ত ওর পক্ষ নিয়ে কথা বলে ।

বলে ? তাহলে তো তোর খুব বিপদ যাচ্ছে ।

বিশাখা একটু হেসে বলে, তা যাচ্ছে । এখন তুমি এসে আবার কী প্যাঁচ কষো তা কে জানে ।

প্যাঁচ কষব না । তবে একটা কাণ্ড করব ।

কী কাণ্ড ?

যা জন্মেও তুই ভাবিসনি শটীনের সঙ্গে তোর আলাপ করিয়ে দেবো ।

যাঃ ! তাই হয় নাকি !

॥ ৩৬ ॥

বিশ্ময়টাকে চট করে লুকিয়ে রেমি হাসিমুখে ছেলেটিকে বলল, আরে ! আসুন, আসুন ।

ধুব যে পাগল সে বিষয়ে রেমির বিন্দুমাত্র সন্দেহ নেই । সেই পাগলামিকে সে নিজেও খানিকটা প্রশ্রয় দেয় । তবে সে এ-ও জানে যে, ধুব পাগল হলেও সন্দেহ-পিশাচ নয় । রেমি যদি অন্য

কোনো পুরুষের সঙ্গে প্রেম করে তাতে ধুব উত্তেজিত হবে বা রেগে যাবে বলে রেমির মনে হয় না । ততটা ভালবাসে কি তাকে ধুব ? ততটা নিজের জিনিস বলে মনে করে কি তাকে ?

এই ছোকরাকে ঘরে ডেকে এনে তার সঙ্গে ভিড়িয়ে দেওয়ার যে ছেলেমানুষী চেষ্টা ধুব করছে সেটা রেমির কাছে আরো অপমানকর । ধুব চায় রেমি তাকে ছেড়ে অন্য দিকে কিছুক্ষণ মন দিক । নইলে সত্যি বলতে কি, এই ছেলেটার কাছে ঘটা করে কৃতজ্ঞতা জানানোর কিছু নেই । রেমিকে তো এ সমুদ্রের ভিতর থেকে উদ্ধার করেনি, আসন্ন মৃত্যুর হাত থেকেও বাঁচায়নি । শুধু ডেউ যেখানে তাকে ছুঁড়ে ফেলেছিল সেখান থেকে নিরাপদ দূরত্বে টেনে এনেছে । না আনলে বিপদ হতে পারত, নাও হতে পারত ।

ছেলেটা কিছু অপ্রতিভ ভঙ্গিতে ঘরে ঢুকল । মুখে হাসি । হেঁ হেঁ ভাব । তার অলক্ষ্যে রেমি কিছু কঠোর চোখে ধুবর দিকে চাইল ।

ধুব ভ্রূক্ষেপ না করে বলল, এ হচ্ছে মনো বিশ্বাস । নাগপুরের বাঙালি । বুঝলে ! ব্রিলিয়ান্ট বয় । ইন ফ্যাক্ট আমি প্রবাসী বাঙালিদেরই বেশী প্রেফার করি । বাঙালিদের ইনহেরেন্ট কতগুলো দোষ এদের থাকে না ।

প্রগলভ ধুবর মতলবটা আন্দাজ করার অক্ষম একটা চেষ্টা করছিল রেমি । মনো বিশ্বাসকে খুব মন দিয়ে লক্ষ্য করছিল না । ছেলেটা বেশ সুপুরুষ সন্দেহ নেই । লম্বা চওড়া চেহারা । তবে চোখের দৃষ্টি নিরীহ এবং মুখের ভাব অতিশয় বিনয়ী ।

বসুন । রেমি বলল ।

মনো বিশ্বাস বসল এবং বিনয়ের সঙ্গে মৃদু মৃদু হাসতে লাগল ।

ধুব রেমিকে বলল, ওর সঙ্গে আমার খুব জমে গেছে ।

তুমি তো জমানোর ব্যাপারে খুব ওস্তাদ । তুমি বোসো, আমি মনোবাবুকে একটু চা খাওয়ানোর ব্যবস্থা করে আসি ।

শুনে ধুব হাঁ-হাঁ করে উঠে বলল, এই অবেলায় চা খাবে কি ! চা-ফা বিকেল চারটের মধ্যে ! এখন অন্য জিনিস ।

রেমি ভূঁ কুঁচকে যতদূর সম্ভব কঠোর মুখভঙ্গি করে বলল, কেন বোচারাকে স্পয়েল করবে ? স্পয়েল করব কি ? ও তো কুমীরের মতো খায় ।

তুমি জানলে কী করে ?

ওসব জানা যায় হে, তুমি বুঝবে না ।

তোমরা দুজন যদি ও সবই খাও তাহলে আমার থেকে লাভ কি ? আমি বরং সী-বিচ থেকে ঘুরে আসি ।

মনো এতক্ষণ কথা বলেনি । স্বামী-স্ত্রীর চাপান-ওতার শুনছিল । এবার খুব বিনয়ের সঙ্গে বলল, আমার ড্রিংক না হলেও চলবে । আমি মাঝেমধ্যে খাই বটে, কিন্তু নেশা নেই ।

তখন লক্ষ করেনি রেমি, এখন করল, ছেলেটার কথায় পশ্চিমা টান আছে । রেমি ধুবর ওপর চটেই ছিল । বলল, ও আপনাকে বোধহয় শেষ অবধি ছাড়বে না ।

মনো নিরীহভাবে ধুবকে বলে, আজ থাক না হয় দাদা । আমরা দুজন ড্রিংক করলে বউদি তো লোনলি ফিল করতেই পারেন । আজ প্রথম দিন বরং একটু গল্পই করা যাক ।

ধুব ঠোঁটটা উন্টে বলল, গল্পটান্ন ভাই, আমি বেশীক্ষণ শুকনো মুখে চালাতে পারি না । তোমরা করো, আমি বরং ঘুরে আসি একটু ।

সিদ্ধান্তটা বড় সহজ হল না । তিনজনে কিছুক্ষণ টানা-হ্যাঁচড়া চলল । তবে মদের ব্যাপারে একটুও কথা আর বলল না ধুব । রেমি লক্ষ্য করছে, ইদানীং মদ প্রায় ছুঁচ্ছেই না ধুব । বাস্তবিক যাদের নেশা থাকে তারা একদম না খেয়ে পারে না । ধুব একদম না খেয়েও পারে । দিনের পর দিন

পারে। হয়তো ওর সত্যিকারের নেশা নেই। কিংবা কে জানে কী!

খুব শেষ অবধি থাকল না। দুজনকে রেখে বেরিয়ে গেল।

রেমি অচেনা পুরুষের সামনে আগে অস্বস্তি বোধ করত না। আজকাল করে। তার শ্বশুরবাড়িতে বাড়ির বউরা বাইরের লোকের সামনে ছটফট বেয়ে না। সেই অভ্যাসই তাকে সংকুচিত করে রেখেছে খানিকটা।

সে জিজ্ঞেস করল, আপনারা কি বরাবর নাগপুরে? কলকাতায় কেউ নেই?

মনো বলে, কলকাতা নয়। আমাদের বাড়ি ছিল মুর্শিদাবাদ শুনেছি। কিন্তু আমরা কখনো যাইনি। নাগপুরে আমাদের চারপুরুষ হয়ে গেল। কলকাতায় একবার গিয়েছিলাম ইন্টারভিউ দিতে।

কেমন লাগল কলকাতা?

আরি বাপ! লাখ গাড়ি, কোটি লোক।

রেমি হেসে ফেলল। বলল, সে তো বোমবাইতেও লাখ গাড়ি, কোটি লোক।

সে ঠিক, কিন্তু কলকাতার মতো—যাগগে—কলকাতার নামে কিছু বললে বাঙালিরা চটে যায়।

কিন্তু বাঙালি বললে চটে না। আপনি তো বাঙালি!

সে বটে, তবে কলকাতার বাঙালিদের আমরা একটু সমঝে চলি।

কেন? তারা কি খারাপ?

না, না। খারাপ কেন হবে! তবে আমাদের মতো অন্য প্রভিন্সের বাঙালিদের তারা পছন্দ করে না। ধরুন কয়েক পুরুষ অন্য স্টেটে থাকলে তো মাদার ল্যাংগোয়েজ একটু ভুল হবেই, কালচারটাও ভাল মেনটেন করা যাবে না, হ্যাঁবিটস পাস্টে যাবে। হবে না এসব বলুন?

তা তো হতেই পারে।

কিন্তু আপনারা—অর্থাৎ ওরিজিন্যাল বাঙালিরা এসব ভাল চোখে দেখেন না। বিভূতিভূষণের লেখা পড়িনি বলাতে একজন বাঙালি আমার ওপর দারুণ চটে গিয়েছিলেন। উনি আমাকে মেরেই বসতেন যদি জানতেন যে আমি বাংলায় রবীন্দ্রনাথও কিছু পড়িনি। বাংলা লেখা বা পড়ার পাটাই নেই আমাদের।

কিন্তু আপনি তো বলেন।

সে বলি। বলাটার একটু চল আছে এখনো বাড়িতে।

তারপর কী হবে?

মনো মৃদু হেসে বলে, হয়তো এরকমই থেকে যাবে। খুব খারাপ হলে একটা বাঙালি পরিবার বড় জোর নন-বেঙ্গলি হয়ে যাবে। তার বেশী কিছু না। প্রবাসী বাঙালিকে আজকাল বাঙালি বলে ধরেই না অনেকে।

কথাটা শুনে রেমির একটু দুঃখ লাগছিল। মাথা নেড়ে বলল, অনেক প্রবলেম আপনাদের, না?

মনো মাথা নেড়ে হেসে উঠে বলল, আরে না, প্রবলেম আমাদের হবে কেন? প্রবলেম আপনাদের, যারা বাঙালি-বাঙালি করে কেবল গলা শুকোয়। আমরা যারা বাইরে জন্মেছি তাদের মধ্যে অত প্রভিনশিয়ালিজম নেই। আমার দুই দিদির বিয়ে হয়েছে মধ্যপ্রদেশ আর মহারাষ্ট্রের পাত্রের সঙ্গে। আমার দাদা বিয়ে করেছে এক দিল্লিওয়ালি সরদারনিকে। উই হ্যাভ নো প্রবলেম।

তার মানে কি? হ্যাং উইথ বেংগলিজ?

মনো বিশ্বাস খুব হাসল। বলল, অতটা নয়। নো বিটার ফিলিং। একজন বাঙালি যদি এখনো নোবেল প্রাইজ পায় বা ওলিম্পিক থেকে সোনার মেডেল নিয়ে আসে তাহলে অ্যাজ এ বেঙ্গলি আমি প্রাইড ফিল করব। তা বলে প্রভিনশিয়ালিজম আমাদের নেই।

বাঙালিদের খুব প্রভিনশিয়ালিজম আছে বুঝি?

মনো বিশ্বাস ঠোট উটে বলে, কে জানে কী বউদি। তবে আমার সঙ্গে কয়েকজন ওরজিন্যাল বাঙালির পরিচয় হয়েছে, একসপেরিয়েনসটা খুব সুখের হয়নি।

রেমি মৃদুস্বরে বলল, সেটা আপনার অভিজ্ঞতা। কিন্তু আমার অভিজ্ঞতা অন্যরকম।

সেটা কিরকম বৌদি? মনো নড়েচড়ে বসল। সকৌতুকে তাকাল রেমির দিকে।

রেমি তার শ্বশুরমশাইয়ের সঙ্গে করে রাজনীতি একটু বুঝতে শিখেছে। সে বলল, কলকাতা বাঙালির শহর নয়। সেখানে কোনো বাঙালি-অবাঙালি ফিলিং নেই। তাছাড়া বাঙালি-অবাঙালিতে মারপিটও পশ্চিমবঙ্গে হয় না।

মনো মাথা নেড়ে বলে, আরে মারপিটের কথা বলিনি। আমি বলছি যেটা তা অন্য জিনিস। বাঙালিরা আর ভেরি মাচ প্রাউড অফ দেমসেলভস।

রেমি মাথা নেড়ে বলে, সেটা স্বাভাৱ্যভিমান।

ওই হল।

রেমি বলল, না, হল না। আপনার রিডিং ঠিক নয়। আমাদের অনেক দোষ আছে ঠিকই, কিন্তু আমাদের প্রবলেম অনেক। আফটার পারটিশন দেশটার অবস্থা কী তা কখনো গৌজ করেছেন আপনি কি জানেন আমাদের স্টেটের বিগ বিজনেস আর বিগ ইনডাসট্রি কোনোটাই বাঙালিদের হাতে নেই? কলকাতায় যে ক'টা স্কাইস্কাপার আছে তার ওনারশিপ বেশিরভাগই নন-বেঙ্গলির।

দোষটা কার বৌদি

আমাদেরই। বলছিই তো, এসব আমাদের দোষ। শুধু ভাষা আর কালচার নিয়ে আমাদের একটু অহংকার আছে। কোনো বাঙালি যদি সেটুকুও হারিয়ে বসে থাকে তবে আমরা দুঃখ পাই। সেটা প্রভিনশিয়ালিজম হতে যাবে কেন?

না, আপনি ওরজিন্যাল বাঙালিদের মতোই কথা বলছেন তবে 'অ্যাগ্রেসিভ নন'।

রেমি একটু হাসল।

মনো বিশ্বাস হঠাৎ প্রসঙ্গ পাল্টাল। গলাটা খাটো করে বলল, একটা কথার ঠিকঠাক জবাব দেবেন?

বলুন না।

আজ আপনি যখন জলে নামলেন, আমি আমার হোটেলের বারান্দা থেকে দেখছিলাম। মনে হল, ইট ইজ অ্যান অ্যাটেমপট ফর সুসাইড। অ্যাম আই কারেক্ট?

রেমির বুকের মধ্যে একটা তোলপাড় দেখা দিল। কিছুক্ষণ কথাই বলতে পারল না। তারপর বলল, যাঃ।

আমি একটু বোকা আছি বউদি। যা মনে আসে বলে ফেলি। কিছু মনে করবেন না। কথাটা এখনও বলতাম না। কিন্তু আপনাকে দেখে কেন যেন আনহ্যাপী মনে হচ্ছে।

রেমি রাগ করতে পারত। কিন্তু এ ছেলটি একদমই সরল এবং বোধহয় একটু বোকাও। মনের কথা চেপে রাখতে জানে না। তাই রেমি একটু হেসে বলল, মেয়েদের মনের খবর পাওয়া অত সহজ নয় ভাই। সমুদ্রে আমি নেমেছিলাম অ্যাডভেনচারের জন্য।

তাহলে বলতে হয় আপনি দারুণ সাহসী।

তাও নয়। হঠাৎ মাথায় ভূত চাপে না মাঝে মাঝে? সেরকমই।

যাক, ব্যাপারটা পরিষ্কার হয়ে গেল।

রেমি টুক করে অন্য একটা প্রসঙ্গে চলে গেল, আপনি কি পুরীতে একা এসেছেন?

ঠিক একা নয়। সঙ্গে একজন বন্ধু আছে। তবে সে পাগল।

পাগল! রেমি অবাক হয়ে বলে, সত্যি পাগল?

হ্যাঁ। আগে ছিল না। এখন হয়েছে। তাকে সঙ্গে দিতেই আসা।

সেও কি বাঙালি ?

না । মধ্যপ্রদেশের ছেলে ।

পাগল হল কী করে

সে অনেক ব্যাপার বউদি আর একদিন শুনবেন । আজ বরং আমি উঠি ।

আরে চা খাবেন না ?

চা ? থাকগে । ও আমার না হলেও চলবে ।

আরে বসুন, আপনি গেলেই আমি একা হয়ে পড়ব । চা খেতে খেতে সেই বন্ধুর কথা বলুন ।  
আমি পাগলদের গল্প শুনতে খুব ভালবাসি ।

মনো বিশ্বাস একটু হাসল, বলল, শোনার মতো গল্প নয় । বাজে ব্যাপার ।

অশ্লীল কিছু নয় তো

না, তা নয় ।

তাহলে বসুন, চা বলে আসি ।

রেমি খুব দ্রুত ঘর থেকে বেরিয়ে তড় তড় করে নীচে নেমে এল । সিঁড়ির গোড়ায় সে একটু থমকে দাঁড়ায় । বস্তুত মনো বিশ্বাসের সঙ্গে বকবক করা বা ওর বকবকানি শোনার কোনো ইচ্ছেই তার হচ্ছিল না । বরং এ সময়ে একা বসে নিজের অভ্যন্তরের ক্ষতগুলির কথা ভাবতে তার ইচ্ছে হচ্ছে । কিন্তু ধ্রুবর সঙ্গে তাকে তো কোনো না কোনোভাবে পাল্লা দিতে হবে ! এই ছেলেটিকে বসিয়ে রেখে অত্যন্ত অভদ্রভাবে ধ্রুব বেরিয়ে গেছে । তাকে বুঝিয়ে দিয়ে গেছে যে, সে পরোয়া করে না । বেশ, ধ্রুবর সেই ছুঁড়ে দেওয়া চ্যালেঞ্জ সে লুফে নেবে । সম্ভব হলে এই ছেলেটির সঙ্গে অনেক রাত অবধি সে গল্প করবে, সমুদ্রের ধারে বেড়াবে । আজ, কাল, পরশু, রোজ । দেখা যাক কী হয় ।

বেয়ারার পিছু পিছুই উঠে এল রেমি । তারপর মুখোমুখি বসে মনোকে বলল, এবার বলুন ।

কী বলব ? আমার পাগল বন্ধুর কথা ?

হ্যাঁ ।

বউদি, কিছু মনে করবেন না, আপনিও একটু পাগলী আছেন কিছু ।

রেমি ঝুঁকুচকে চেয়ে বলল, নিজের ঘরের লোকের কাছে দিনরাত ওই কথা শুনছি ।

তাহলে কথাটা ঠিক ?

পাগল তো সবাই । বলে রেমি মুচকি হাসল ।

আমাকে কি আপনার তাই মনে হয় ?

একটু একটু হচ্ছে । এবার গল্পটা বলুন ।

গল্প কিছু নেই । একদম বাজে ব্যাপার । অরুণ ছিল খুব সিনেমার পোকা । সিনেমা দেখতে দেখতে ওর কাছে লাইফটা একটা স্বপ্নের মতো হয়ে গেল । ও ভাবত সিনেমায় যেমন হয় জীবনটাও সেরকমই । রিয়াল লাইফেও ওরকমই সব ঘটনা ঘটে । হিন্দি সিনেমা তো জানান, সাধারণ মানুষকে খুশি রাখার একটা কৌশল । ও সেইসব ছবি দেখে সেরকমই সব কাণ্ড ঘটাতে লাগল ।

সেটা কি রকম ?

যেমন ধরুন ডুয়েট গান । নায়ক নায়িকাকে দেখে গান ধরে ফেলল, নায়িকাও গলা মিলিয়ে দিল । অরুণ সেরকমই সব করতে লাগল । রাস্তায় একটা সুন্দরী মেয়ে যাচ্ছে, ও তার পিছু নিয়ে গান ধরল । বা হিন্দি সিনেমার নায়কের মতো যেখানে সেখানে মারপিট লাগল । এইরকম সব আর কি ! হিন্দি সিনেমা ওকে একদম হিপনোটাইজ করে ফেলেছিল । মনে মনে নিজেকে সেইসব ছবির নায়ক ভেবে নিয়ে সব পোশাক করতে থাকে, চুলের কায়দা পাল্টে ফেলে । সব সময়ে হিন্দি ছবির মুখস্থ করা ডায়ালগ দিয়ে আমাদের সঙ্গে কথাবার্তা চালাত । এইরকম হতে হতে মাথা খারাপ হয়ে গেল একদম ।

এখন কীরকম

ভাল নয়। এখনো ঘোরটা কাটেনি ইন ফ্যাকট আজ আপনাকে সমুদ্রে নামতে ওই প্রথম দেখে। জানালার ধারে চুপচাপ দাঁড়িয়েছিল। হঠাৎ চোঁচিয়ে উঠে বলল, মনো, একটা মেয়ে ডুবে যাচ্ছে! শী ইজ ট্রায়াং টু কমিট স্যুসাইড এই বলে দরজা খুলে দৌড়ে আসার চেষ্টা করে। আমি জোর করে ওকে ঘরে ভরে দিয়ে দরজায় তালা লাগিয়ে ছুটে যাই আপনার কাছে।

রেমি একটু শিউরে উঠল। তবে মুখে বলল, ওকেই কাজটা করতে দিলেন না কেন?

কেন? বলে মনো একটু হাসল। তারপর মাথা নেড়ে বলল, কাজটা ঠিক হত না বউদি। ও তো সুস্থ নয়, হয়তো হিরো বনবার জন্য জলে নেমে আর উঠতে পারত না। দ্বিতীয় আর একটা কারণ হল, আপনাকে যদি উদ্ধার করতে পারত তাহলে নির্ঘাৎ একটা প্রেমের সিচুয়েশন ক্রিয়েট করত।

রেমি হেসে ফেলল, তাই নাকি?

মনো স্নান মুখে বলল, হাসছেন! জানেন না! তো, কতবার ও এইসব কাণ্ড করে মারধর খেয়েছে, অপমানিত হয়েছে। লোকে তো সবসময়ে পাগল বলে ছেড়ে দেয় না! তাই সব সময় গার্ড দিয়ে রাখতে হয়। কখন যে কী করে বসবে তার ঠিক নেই। ইমাজিনেশন আর রিয়ালিটি একদম গুলিয়ে ফেলেছে।

তাহলে আপনি ওর সঙ্গে এক ঘরে আছেন কী করে?

মনো স্নান মুখে বলল, খুব রিসক নিয়েই আছি। পরশু গভীর রাতে আমার বুকের ওপর উঠে বসেছিল মারবে বলে। ওর ধারণা হয়েছিল, আমি একজন ভিলেন।

ও বাবা! তারপর?

অনেকক্ষণ বুঝিয়ে সুঝিয়ে ঠাণ্ডা করতে হয়েছিল।

আপনার ভয় করে না?

না। খুব বন্ধু ছিলাম আমরা। তাই তেমন ভয়ের কিছু নেই। অরুণ ছেলেটা তো খারাপ ছিল না। আমরা সবাই অল্পবিস্তর ওই ধরনের স্বপ্নরোগে ভুগি।

তাই নাকি? আপনিও খুব সিনেমা দেখেন বুঝি?

না। তবে শুধু সিনেমা কেন বউদি। আমাদের চারদিকে একটা দৈন্যের চেহারা যেমন আছে, তেমনই ঐশ্বর্যেরও তো স্রোত বইছে। আমরা যারা বড়লোক নই তাদের তো স্বপ্ন দেখা ছাড়া আর কোনো গতি নেই। আর এ ব্যাপারে বাঙালিরা তো চ্যাম্পিয়ন।

রেমি একটু হাসল। কিন্তু একটু ভাবলও। স্বপ্ন! স্বপ্ন ছাড়া মানুষের আর কীই বা আছে!

মনো বিশ্বাস চা শেষ করে যখন উঠল এবং বিদায় চাইল তখন অন্যমনস্ক রেমি তাকে বাধা দিল না। তার একটা কবিতা লিখতে ইচ্ছে করছিল। কবিতাটার নাম হবে স্বপ্নের পাগল।

কবিতাটা শেষ হল রাত দশটা নাগাদ। আশ্চর্য! ধুব ফেরেনি।

রেমি ঘড়ির দিকে চেয়ে থেকে উঠল। এত দেরী তো পুরীতে এসে কখনো করেনি ধুব!

॥ ৩৭ ॥

চপলা বাড়িতে পা দেওয়ার পর থেকে রঙ্গময়ী পারতপক্ষে ভিতর বাড়িতে আসে না। রোজ সকালে হেমকান্তকে একবার দেখা দিয়ে যেত, তাও এখন বন্ধ। কলঙ্কের আর কোনো ভয় নেই রঙ্গময়ীর। এ জীবনে সেটা যথেষ্ট হয়েছে এমনও নয় যে, চপলা তাকে দেখলে অসন্তুষ্ট হবে বা অপমান করবে, তবু যে আসে না, তার কারণ কনককান্তি।

কনক তার চেয়ে বয়সে খুব একটা ছোটো নয়। মেরে কেটে দু-এক বছর। এক সময়ে কনককে সে কোলেপিঠে করেছে। বড় হয়ে একসঙ্গে খেলেছেও। কিন্তু একটু বড় হওয়ার পর যখন বুঝসমঝ হল তখন থেকেই কনককান্তি তাকে একদম পছন্দ করে না। সম্ভবত নলিনীকান্ত এবং

পরবর্তীকালে হেমকান্তর সঙ্গে তাকে জড়িয়ে যেসব কথা রটেছে তার জন্যই। কনককান্তি কলেজে পড়ার সময় রঙ্গময়ীকে তার পুরো পরিবার সমেত এ বাড়ি থেকে উচ্ছেদের জন্য চেষ্টা করেছিল খুব। তাতে কাজ হয়নি বটে, কিন্তু কনককান্তি সেই থেকে তাদের প্রতি এক তীব্র ঘৃণা ও রাগ পোষণ করে আসছে। এটা রঙ্গময়ী টের পায়।

কনককান্তিকে ভয় পাবে রঙ্গময়ী তেমন মেয়ে নয়। সে শুধু হেমকান্তকে কোনো অপ্রতিভ অবস্থায় ফেলতে চায় না। হেমকান্ত দুর্বল প্রকৃতির মানুষ, তার মন নরম ও ভরা, অবাস্তবতায় কোনো সংকট, বিবাদ, বিতর্ক বাঁধলে হেমকান্ত ভারী মুশকিলে পড়ে যান। রঙ্গময়ী মানুষটাকে সেই অবস্থায় ফেলতে চায় না।

অনেকদিন আগে নলিনীকান্ত তাকে একটা ইঙ্গিতপূর্ণ কথা বলেছিল। বলেছিল, যে দুর্বল প্রকৃতির মানুষটি তার প্রিয় তাকে যেন সর্বদা বিপদ-আপদ থেকে সে বাঁচিয়ে চলে। অনেকটা এ ধরনেরই কথা। তখন ঠিক বুঝতে পারেনি রঙ্গময়ী। সেই ভয়াবহ রাত্রে তার মাথার ঠিক ছিল না। পরে ধীরে ধীরে অনেক দিন ধরে চিন্তা করে সে বুঝেছে, কথটা তাকে আর হেমকান্তকে জড়িয়েই বলা। অথচ নলিনীকান্তর জানার কথাই নয়, তার হৃদয়ের গভীর প্রদেশে কোন গাছে সে জলসিঞ্চন করছে। বাইরে কোনো প্রকাশ তো ছিল না রঙ্গময়ীর!

তিন দিন হেমকান্তর সঙ্গে রঙ্গময়ীর দেখা হয়নি। মানুষটা কেমন আছে কে জানে! লোকজনের কাছে অবশ্য সে সব খবরই পায়। কৃষ্ণ আসে, চাকর-বাকররা আসে। শরীর নিশ্চয়ই ভাল। কিন্তু হেমকান্তর শরীর ভাল থাকলেই যে রঙ্গময়ীর চিন্তা ঘুচল তা তো নয়। হেমকান্তর অতি স্পর্শকাতর মনটিই তাঁকে সবচেয়ে বেশী কষ্ট দেয়। সে কথা হেমকান্ত পাঁচজনকে বলতেও পারেন না। একা একা এক অঙ্ককূপের মধ্যে তলিয়ে যান। তখন হয়তো পৃথিবীর আর কোনো আত্মজন বা সুহৃদকে নয়, রঙ্গময়ীকেই মনে পড়ে তাঁর। সব কথা নয়, কিন্তু মাঝে মাঝে কোনো কোনো হৃদয়বেদনার কথা হেমকান্ত বলেন মাত্র রঙ্গময়ীকেই।

দাদা লক্ষীকান্ত সকালে পূজো করে যাওয়ার পর রঙ্গময়ী এসে চূপ করে ঠাকুর বাড়ির দালানের সিঁড়িতে বসে ছিল। এখান থেকে হেমকান্তদের বাড়িটা গাছপালা সমেত অনেকটাই দেখা যায়। কারা এল আর কারা গেল তা সবটাই নজরে পড়ে। ঠাকুরবাড়ির এই দরদালানে বসেই কনকপ্রভা এককালে কুটিল চক্ষুতে এ বাড়িতে লোকের গতায়াত নজরে রাখত, আর জটিল মন দিয়ে তার নানারকম বিশ্লেষণ করত। বালবিধবাদের মানসিকতা যে জটিল ও কুটিল হয় তা অভিজ্ঞতা বলে জানে রঙ্গময়ী। বিশেষ করে যারা বাপের বাড়িতে অনাদর আশ্রয়ে জীবন কাটায়। কনকপ্রভা সেইরকমই একজন। তবে আজকাল হেমকান্তদের পরিবারের লোক কমে যাওয়ায় তেমন ঘটনা কিছুই ঘটে না। কনকপ্রভা তাই তার ক্ষেত্র বিস্তার করেছে বাইরের সমাজ সংসারে। রঙ্গময়ী ভাবে, বালবিধবা আর চিরকুমারীদের মানসিকতা একইরকম নয় তো! সেও কি আরো বুড়ো বয়সে ওরকম হয়ে উঠবে? বড় ভয় করে।

দালানের সিঁড়িতে বসে জমিদার বাড়িতে নানা মানুষের যাতায়াত লক্ষ্য করতে করতে রঙ্গময়ী নিজের মনেই একটু হাসল। না, সে বিশেষ কাউকে লক্ষ্য করে না। কোনো ঘটনা আঁচ করার চেষ্টা করে না। সে চাতকিনীর মতো বসে আছে বটে, এক বুক পিপাসাও তার আছে। কিন্তু সে শুধু হেমকান্তর জন্য। লোকটা কেমন আছে? তার মন!

কারো ভালমন্দের জন্য এত গভীর পিপাসা হেমকান্তর নেই, জানে রঙ্গময়ী। সে জানে হেমকান্তর সাথ্যই নেই রঙ্গময়ীর ভালবাসার ঋণ শোধ করে। কিন্তু রঙ্গময়ী তো অতটা আশাই করতে পারে না। তাই চায়ওনি কোনোদিন।

আজ ঠাকুরবাড়ির দালানে বসে থেকে রঙ্গময়ী বুঝতে পারে, দুটো দিনও মানুষটাকে একবার চোখের দেখা দেখতে না পাওয়ার শূন্যতা কতখানি। ভালই আছে, ছেলে এসেছে, বউ এসেছে,



নাতি-নাতনী নিয়ে জমজমাট বাড়ি। ভাল না থাকার কথা তো নয়। তবু সামনে পেলো রঙ্গময়ী শুধু একবার জিঞ্জেস করবে, কেমন আছে? সে বলবে, ভাল। রঙ্গময়ী শুধু তার মুখের ডৌল ও রেখাগুলি লক্ষ্য করবে, চোখের দৃষ্টি কেমন তা পরখ করবে। তার যদি মনে হয় ভাল, তবে ভাল। যদি মনে হয়, না ভাল নয়, তবে প্রশ্ন করবে, লুকোচ্ছে না তো!

রঙ্গময়ীকে কোনোদিনই ফাঁকি দিতে পারেননি হেমকান্ত। যে এত ভালবাসে তাকে কি ফাঁকি দেওয়া যায়?

কৃষ্ণর এখন গরমের ছুটি। একটু আগে মাষ্টার পড়িয়ে গেল। রঙ্গময়ী অপেক্ষা করছে। এ সময়টায় কৃষ্ণ তার ছোট্ট ঘোড়ায় চেপে এক-আধদিন বেরোয়। দেখা পেলো কৃষ্ণকে তার বাবার কথা জিঞ্জেস করত একটু।

কিন্তু কৃষ্ণ বেরোলো না, রঙ্গময়ী শুনেছে, বউদি চপলার সঙ্গে তার ভারী ভাব হয়েছে। সারাদিন বউদির সঙ্গে সঙ্গে ঘুরঘুর করে। ভাল। খুব ভাল। কৃষ্ণর মা নেই, বউদির মধ্যে যদি মাকে খুঁজে পায়

রঙ্গময়ীদের বাসস্থান মন্দিরের উত্তর দিকটায়। কয়েকটা কামরাঙা আর করমচা গাছের ছায়ায় শ্যাওলায় সবুজ খানিকটা মাটি। অল্প ঘাস। পুরোনো পচা দরমার বেড়া ভেঙে পড়ছে। তার আড়ালে গোটা তিনেক কুঠুরি। অঙ্ককার, ঘুপসি, হতশ্রী চেহারা। সেইদিক থেকে বিনোদচন্দ্র লাঠি ঠুকঠুক করতে করতে বেরিয়ে আসেন। এই গরমেও গায়ে একটা চাদর জড়ানো। রোগে ভুগে ইদানীং বিনোদচন্দ্র বড্ড রোগা হয়ে গেছেন। স্থায়ী কফের দোষ। হাঁপানির টানও আছে। রোগা শরীর বলেই বোধহয় হাওয়া বাতাস, ঠাণ্ডা জল কিছুই সহ্য হয় না। পায়ে বৌলওলা খড়ম। একবার রঙ্গময়ীর দিকে তাকালেন, অক্ষম বাপের যেভাবে অনুঢ়া বয়স্কা কন্যার দিকে তাকানো উচিত সেইরকম অপরাধী চোখে।

বাপের জন্য রঙ্গময়ীর তেমন কোনো মমতা নেই। লোকটা লোভী, কিছু পরিমাণে অসৎ, ধর্মের ব্যবসা এবং দারিদ্র্য এই দুই-ই তাঁর চরিত্রকে নষ্ট করেছে।

রঙ্গময়ী চোখ ফিরিয়ে নিল।

বিনোদচন্দ্র কাছাকাছি এসে দাঁড়ালেন, লাঠির ডগা দিয়ে রাস্তা থেকে কিছু একটা সরিয়ে ধীরে ধীরে এগিয়ে গেলেন। এ বাড়িতে আর পুরোহিতের তেমন দরকার নেই। হেমকান্ত ঠাকুরবাড়িতে আসেন না। তেমন জাঁকজমকের পূজো পার্বণও কিছু হয় না। বিনোদচন্দ্র এখন খুবই অবহেলিত এক ব্যক্তি। তাঁকে কোনো প্রয়োজন নেই এ-বাড়ির, তবু পুষতে হচ্ছে।

রঙ্গময়ী উঠল। তাদের গরুটাকে কাছারির পিছনের মাঠে খেঁটায় বেঁধে রাখা হয়েছে। এই গরমে রোদে চরতে চরতে জলতেষ্টা পেয়েছে বোধহয়। ডাকছে।

রঙ্গময়ী একটা আধলা হুঁট দিয়ে খেঁটাটা নড়িয়ে টেনে তুলল। গরুটা টেনে নিয়ে যাওয়ার দরকার নেই। ছেড়ে দিলেই সোজা গোয়ালে গিয়ে গামলায় মুখ দেবে। রঙ্গময়ী গরুটাকে ছেড়ে পায়ে পায়ে হেমকান্তের কুঞ্জবনে ঢুকল।

ভাঙা ঘোড়ার গাড়িটা পড়ে আছে আগাছার জঙ্গলে। এই গরমে সাপখোপ বেরিয়ে এসে বাসা বাঁধতে পারে ভিতরে। হেমকান্তকে বলবে একটু দেখে শুনে যেন বসে এসে।

অবশ্য আজকাল হেমকান্ত কুঞ্জবনে আসছেন না, সময় পান না বোধহয়। রঙ্গময়ী তার আঁচল দিয়ে পা-দানীটা ঝেড়ে দিল। এখানেই তো বসে এসে লোকটা।

কালীবৈশাখীর কয়েকটা ঝাপটায় বাগানটা অনেক সতেজ হয়েছে। ফন ফন করছে ঢেঁকী শাকের জঙ্গল। লজ্জাবতী লতা বিছিয়ে আছে বিস্তীর্ণ অঞ্চল জুড়ে।

রঙ্গময়ী ঘোড়ার গাড়ির পাদানীতে একটু বসল। চারদিকে গাছগাছালির ঘেরাটোপ। এখানে বসে থাকলে বাইরে থেকে কারো বোঝার উপায় নেই। চারদিকে কাকের উত্তাল কা-কা রব। বহু কাক।

রঙ্গময়ী কৌতূহলী হয়ে একবার আকাশের দিকে তাকাল। কাক উড়ছে। কোনো কাক মরলে বা চোট পেলে কাকেরা কোমর বেঁধে এসে বিলাপ করতে থাকে বটে। একটু তাকিয়ে থেকে রঙ্গময়ী ফের নিজের মধ্যে ডুবে গেল। শশিভূষণের কথা তার খুব মনে পড়ে। খুব। ঠিক ছোটো ভাইটি। এরকম যদি কোনো ভাই থাকত তার তবে কত না ভাল হত। চারদিকে ছোটো মনের, ছোট স্বার্থের মানুষজনের মধ্যে অহরহ বাস করতে করতে আচমকা এরকম হাওয়ায় ভেসে আসা বনফুলের গন্ধের মতো আশ্চর্য সৌরভযুক্ত মানুষকে পেলে জীবনটা অন্য রকম হয়ে যেতে চায়।

ওর ফাঁসী হবে

রঙ্গময়ী একটা দীর্ঘশ্বাস ফেলল। শশিভূষণকে বরিশাল জেল-এ চালান দেওয়া হয়েছে। মামলা উঠল বলে। সেই মামলায় শশিভূষণের পক্ষ নিতে শচীন যাচ্ছে। কী হবে কে জানে!

আনমনা রঙ্গময়ী চেয়ে ছিল এক দিকে। বাসক পাতার একটা ঝোপের আড়াল থেকে একটা বন্দুকের নল খুব ধীরে ধীরে একটা জামরুল গাছের দিকে উঁচু হয়ে উঠছিল।

রঙ্গময়ী চৈঁচিয়ে উঠল, কে রে?

বন্দুকের নলটা চট করে নেমে গেল।

রঙ্গময়ী টপ করে উঠে এগিয়ে যেতেই ঝোপের ভিতর থেকে বেরিয়ে আসে কৃষ্ণ, পিসি রঙ্গময়ী অবাক হয়ে বলে, কী করছিস ওখানে?

হি হি, কাক মারছি।

কাক এ মা

কৃষ্ণ তার হাতের এয়ার গানটা দেখিয়ে বলে, এটা দিয়ে কিছু মারা যায় না কাক ছাড়া একটা মেরেছি।

দে ওটা! দে রঙ্গময়ী হাত বাড়িয়ে চোখ পাকিয়ে বলে।

কেন?

কাক মারতে হবে না।

কৃষ্ণ কাঁচুমাচু মুখ করে বলে, কী করব তাহলে? প্র্যাকটিস করতে হবে না?

কিসের প্র্যাকটিস?

চাঁদমারি, হাত সেট করতে হবে। বউদির সঙ্গে কমপিটিশন।

বউদির সঙ্গে! বলিস কী রে?

আসল বন্দুক দিয়ে।

কিসের কমপিটিশন?

কাল আমরা বয়রায় শিকার করতে যাচ্ছি।

আমরা বলতে কে কে?

আমি, বউদা, বউদি। বউদি সব বন্দুক তেল দিয়ে পরিষ্কার করেছে।

রঙ্গময়ী গভীর হতে গিয়েও হেসে ফেলল। বলল, কঁটা বন্দুক আছে তোদের?

এগারোটা। চারটে দোনলা। দুটো রাইফেল। তিনটে এক নলা, দুটো গাদা বন্দুক।

এত?

পড়ে থেকে নষ্ট হয়ে যাচ্ছিল।

রঙ্গময়ী অবিশ্বাস ভরে মাথা নেড়ে বলল, এতগুলো বন্দুক ছিল আমি তো জানতামই না আমিও না।

জানলে কবে স্বদেশীদের দিয়ে দেওয়া যেত।

স্বদেশীদের?

তারা ছাড়া আর কার বন্দুক দরকার? তোরা তো পাখি মারবি ফুর্তি করতে।

আর ওরা ?

ওরা পেলে কাজের কাজ করত । আর কাক মারিস না । মারতে নেই ।

কৃষ্ণ কাছে এসে বন্দুকটা ঘোড়ার গাড়ির গায়ে ঠেস দিয়ে রেখে বলল, বউদির হাতে দারুণ টিপ, জানো ?

গেছো মেয়ে বাবা । মেয়েছেলেরা বন্দুক চালায় জন্মে শুনিনি ।

বউদির বাবা যে শিকারী ।

সে আর জানি না !

বউদিকে গেছো মেয়ে বলবে না ।

কৃষ্ণর গম্ভীর মুখচোখ দেখে হেসে ফেলে রঙ্গময়ী বলে, ঘাট হয়েছে বাপধন, আর বলব না ।  
হ্যাঁরে, বউদিকে পেয়ে কি আমাদের ভুলে গেলি ?

কৃষ্ণ একটু লাজুক হেসে বলে, না পিসি । তোমার কাছে আসার সময় পাচ্ছি না, বউদির সঙ্গে সারাদিন নানারকম প্ল্যান হচ্ছে তো !

কিসের প্ল্যান ?

সে অনেকরকম বেড়ানো, চডুইভাতি, জলসা, শিকার ।

কোথায় বেড়াতে যাবি ?

চাটগাঁ আর ঢাকা ।

ও বাবা !

চাটগাঁ থেকে সমুদ্র দেখা যায়, জানো ?

জানি । জলসা আবার কিসের রে ?

জলসা কাকে বলে জানো না ?

সে খুব জানি । গান-বাজনা হয় । কিন্তু তাদের বাড়িতে তো এসবের চল ছিল না ।

এবার চল হবে । বউদি বলেছে, জলসায় বাবাও এসরাজ বাজাবে ।

রঙ্গময়ী চোখ গোল গোল করে বলে, তোর বাবা বাজাবে ? রাজি হয়েছে ?

না । বউদি বলেছে তোমাকে দিয়ে বাবাকে বলাবে ।

আমি ? আমি কেন ? রঙ্গময়ীর গলায় অকপট বিস্ময় ।

তোমার কথা বাবা শোনে যে ।

বউদি তাই বলল বুঝি ?

তুমি বলবে না বাবাকে ?

রঙ্গময়ী কৃষ্ণর দিকে চেয়ে আবার হেসে ফেলে । তারপর বলে তোর বাবা সকলের সামনে বসে এসরাজ বাজাচ্ছে এ তো ভাবাই যায় না । তোরাই বলিস । আমি ওসব বলতে পারব না, তাহলে বাড়ি থেকে তাড়াবে ।

ইস, তোমাকে তাড়ালেই হবে, বউদি বলে, এ বাড়ির আসল কত্ৰী হলে তুমি ।

বলে ? কেমন বিবশ-অবশ লাগছিল রঙ্গময়ীর । তার আড়ালে তাকে নিয়ে কথা হচ্ছে । না, কলঙ্কে আর ভয় নেই রঙ্গময়ীর । তবে তার অন্য আর এক ধরনের ভয় দেখা দিচ্ছে । হেমকান্ত যতদিন বেঁচে থাকবেন ততদিন কিছু হবে না, কিন্তু হেমকান্ত যখন ইহলোকে থাকবেন না তখন বোধহয় এবাড়ি থেকে সপরিবারে বিনোদচন্দ্রের উচ্ছেদ আটকানো যাবে না ।

রঙ্গময়ী ধরা গলায় বলল, না, আমি কত্ৰী হতে যাব কেন ? পরগাছারা কখনো কি কত্ৰী হয় ?

কৃষ্ণকান্ত রঙ্গময়ীর এই ভাবান্তর লক্ষ করে । খুবই বুদ্ধিমান ছেলে । পিসির সঙ্গে যে তার রক্তের সম্পর্ক নেই এবং এরা যে এ বাড়ির কর্মচারী মাত্র তা বড় হয়ে সে বুঝেছে । কিন্তু কোনো মানুষকেই তার খুব পর বলে মনে হয় না । তবে দাদা বা বউদি কেউই এদের খুব পছন্দ করে না । এ সম্পর্কে

দাদা আর বউদির কিছু কথা তার কানে এসেছে। কথাগুলো ভাল নয়। বউদির ধারণা, মনুপিসি তার মায়ের অনেক গয়নাগাঁটি চুরি করেছে। দাদার সন্দেহ, তার বাবাই মনুপিসিকে গয়না বা টাকা পয়সা দেন।

কৃষ্ণকান্ত জানে এসব সত্য নয়। মনুপিসি এ বাড়ির আয়পয় দেখে, কখনো কোনো জিনিস জায়গা থেকে নড়চড় হয় না। তবু সে দাদা বউদিকে কিছু বলেনি। কিন্তু দরকার হলে সে বলবে, যা সে শুনেছে তা আড়াল থেকে, তার সামনে কেউ কিছু বলেনি।

কৃষ্ণকান্ত রঙ্গময়ীর কাছ ঘেঁষে দাঁড়িয়ে বলে, তোমার গায়ে সবসময় একটা শশা শশা গন্ধ কেন, বলো তো।

শশার গন্ধ ! দূর ! বলে রঙ্গময়ী তাড়াতাড়ি নিজের হাত আর শাড়িটা ঠুঁকে দেখে বলে, যাঃ, কী যে সব অদ্ভুত কথা বলিস।

কৃষ্ণকান্ত মাথা নেড়ে বলে, শশা বাতাসা এই সবেবর গন্ধ। আর চন্দনবাটা।

রঙ্গময়ী চোখ পাকিয়ে বলে, আজকাল খুব গন্ধের বাতিক হয়েছে, না ?

বউদির গায়ে কিরকম গন্ধ জানো ?

তোর বউদি বড়লোকের মেয়ে, বড়লোকের বউ, তার গায়ে আতরের গন্ধই হবে।

মোটাই না, বউদির গায়েও তোমার মতো শশা-শশা গন্ধ। সব মেয়ের গায়ের গন্ধই কি এরকম !

রঙ্গময়ী শ্বাস ফেলে বলে, পাগলা।

পরদিন সবাই বয়রায় শিকার করতে চলে গেল। সঙ্গে গেল জনা দুই চাকর আর একজন দাসী।

বজরাটা নিশ্চিত ঘাট ছেড়ে মাঝ দরিয়া ধরে অনেকটা এগিয়ে যাওয়ার পর রঙ্গময়ী ঠাকুরবাড়ির দালান থেকে নেমে এল। বয়ঃসন্ধির মেয়ের মতো তার বুক কাঁপছে। ঠোঁট গলা শুকিয়ে যাচ্ছে।

তাড়াতাড়ি সে অন্দরমহলে ঢুকে সিঁড়ি বেয়ে ওপরে এল।

দক্ষিণের বারান্দায় হেমকান্ত চোখে চশমা ঐটে একটা বেতের টেবিলে বিস্তর কাগজপত্র বিছিয়ে বসে নিবিষ্টমনে কী দেখছেন।

রঙ্গময়ী সিঁড়ির মাথায় দাঁড়িয়ে অপলক চোখে নীরবে দৃশ্যটা খানিকক্ষণ দেখল। কত দূরের মানুষ। দীর্ঘ বিরহের পর এখন একটৌস্বক আকর্ষণ রঙ্গময়ীকে ওই মানুষটির দিকে টানছে। কিন্তু সে জানে, বৃথা। মাঝখানে অসংখ্য অদৃশ্য বাধা।

রোজকার মতো নয়, আজ দীন ভিখারিণীর মতো সংকুচিত পদক্ষেপে এগিয়ে গেল রঙ্গময়ী। চক্ষু নত। আঁচলে গা ভাল করে ঢাকা।

আচমকা রঙ্গময়ীকে দেখে একটু যেন অপ্রতিভ হন হেমকান্ত। সহাস্যে বলেন, আরে মনু ! এসো !

কেমন আছো ?

ভালই। কয়েকদিন তোমাকে দেখিনি।

তাতে কী ! কোনো অসুবিধে তো হয়নি।

না, তা নয়। হেমকান্ত একটু দ্বিধাজড়িত কণ্ঠে বলেন, ব্যাপার কী জানো ! আমার বেশী লোক সহ্য হয় না।

ওমা ! ও কী অলুক্ষণে কথা ! লোক আবার কি ? তোমারই ছেলে, বউ, নাতি-নাতনী।

হেমকান্ত হাসলেন, তোমাকেও কি সব ব্যাখ্যা করে বলতে হবে ? তুমি কি জানো না, পৃথিবীতে আমার আপনার লোক খুব কমই আছে !

সে হিসেবে ধরলে কম কেন, আপনার লোক তোমার কেউ নেই।

হেমকান্ত কথাটা একটু ভাবলেন। তারপর মাথা নেড়ে বললেন, তাই বোধহয়।

এত কাগজপত্র নিয়ে বসেছো যে ! কী ব্যাপার ?

হেমকান্ত একটি দীর্ঘশ্বাস ফেলে বললেন, সেটাই তো সমস্যা মনু। এক সময়ে কাগজপত্র দেখতাম। তারপর সব ছেড়েছুড়ে দিয়ে নিশ্চিন্ত ছিলাম। জমিদারী লাটে উঠলে উঠুক, আমার একটা জীবন কেটে যাবে। ছেলেরা যদি বুঝে নিতে চায় তো নিজেদের গরজেই নেবে। কিন্তু তা আর এরা হতে দিচ্ছে কই ?

কনক কিছু বলেছে বুঝি ?

হ্যাঁ, ওরা ভাগ বুঝতে চায়।

ভাগ করে দেবে সম্পত্তি ?

উপায় কী ? এস্টেটের একটা এস্টিমেট করে দিয়েছে শচীন। দলিল-টলিল সব দেখছি। ভাল। দেখ।

প্রস্তাবটা কি তোমার পছন্দ হল না ?

আমার পছন্দ অপছন্দ কী আসে যায় !

তোমার যায় আসে না জানি, কিন্তু আমার যায় আসে।

কেন ? আমি তোমার কে ?

হেমকান্ত হঠাৎ ভারী গভীর ও মায়াবী দৃষ্টিতে চেয়ে রইলেন রঙ্গময়ীর দিকে।

রঙ্গময়ীর পা থেকে মাথা অবধি বিদ্যুৎ খেলে যেতে লাগল। থরথর করে কাঁপছে তার অভ্যন্তর। মাথা আবছা হয়ে যাচ্ছে। সে যে মরে যাবে আবেগে

## ॥ ৩৮ ॥

ঘরবার করতে করতে কেমন পাগলের মতো হয়ে যাচ্ছিল রেমি। ধুবর রাত করে বাড়ি ফেরা এমন কিছু নতুন ব্যাপার নয়। কিন্তু আজকাল, এবং বিশেষ করে পুরীর এই অদ্ভুত অ্যাডভেনচারে আসার পর থেকেই রেমির ধৈর্য কমে গেছে। সে স্পষ্ট বুঝতে পারছে ধুব তার সঙ্গে ঘর করতে চায় না। ধুবর কাছে তার কোনো মূল্য নেই। অথচ পালিয়ে আসার সময় ধুব যখন তাকেও সঙ্গে এনেছিল তখন রেমি এক রোমহর্ষক আনন্দ বোধ করেছিল। মনে হল, ধুবর বুঝি বরফ গলল না। তা তো নয়।

সমুদ্রের অচেনা ডেউয়ের সঙ্গে যখন তার প্রথম চেনাজানা করিয়ে দিয়েছিল ধুব তখনো রেমি এক অদ্ভুত নৈকট্যের স্বাদ পেয়েছিল। মাঝে মাঝে এত আপন, এত নিজের জন মনে হয় ধুবকে, পরমুহূর্তেই ভাঙা পুতুলের মতো রেমিকে ছুঁড়ে ফেলে সে খেলা ভেঙে উঠে যায়। কিন্তু কোথায় যায় ?

এত কাছে থেকে, এত ঘনিষ্ঠ মেলামেশার পরও কি করে একজন এত দূরের মানুষ থেকে যায় তা রেমির অল্পবুদ্ধির মাথায় ঢোকে না।

বারান্দায় দাঁড়িয়ে রেমি দেখল, হোটেলের সদর ফটক বন্ধ হয়ে গেল রাতের মতো ! বন্ধ হয়ে গেল দরজা। ক্রমশ নিঃশব্দ হয়ে এল চারদার। রেমি জানে হোটেলের ম্যানেজারকে খবরটা জানানোর কোনো মানেই হয় না। কেউ কিছু করতে পারবে না।

অনেকক্ষণ অন্ধকার বালিয়াড়ির দিকে তীক্ষ্ণ চোখে চেয়ে রইল রেমি। দুর্যোগের দিন বলে কেউ কোথাও নেই। ধুবরও থাকার কথা নয় ওখানে। একটা দীর্ঘশ্বাস ছেড়ে পাগল-পাগল মাথা নিয়ে ঘরে এসে দোর দিল রেমি। তারপর কাঁদতে বসল।

একা হোটেলের ঘরে যুবতী বউকে ফেলে রেখে যে চলে যেতে পারে তাকে স্বামী হিসেবে স্বীকার করা উচিত নয় রেমির। তার উচিত জীবনের সবচেয়ে গুরুত্বপূর্ণ সিদ্ধান্তটি নিয়ে ফেলা। ধুব তাকে চায় না, তারও উচিত ধুবকে না-চাওয়া।

কাঁদতে কাঁদতেই রেমি উঠল। তার ব্যাগে কিছু টাকা আছে। ধুবর স্যুটকেস খুলে একটু হাঁটকাতেই সে পেয়ে গেল বাহান্ন খানা একশ টাকার নোটের একটা নতুন তাড়া।

চোখের জল মুছে রেমি নিঃশব্দে তার শাড়িটাড়ি গুছিয়ে নিল ব্যাগে। কাজ শেষ করে ঘড়িতে দেখল, রাত দুটো।

ঘুম আসবে না। বাইরে ঝোড়ো বাতাসের আক্রোশ এখন অনেকটা কম। তবে অবিরল ঢেউ ভাঙার শব্দ আসছে। বাতি নেভাল না রেমি। ভয় করে। বাতি জ্বলেই শুয়ে রইল বিছানায়।

ঘুমহীন দুচোখ ভরে ফের জল এল। এখন আর রাগ নেই। বুক জুড়ে এক অভিমানের সমুদ্র।

তোমাকে ছেড়ে আমি থাকতে পারি না। তবু তোমার জনাই তোমাকে ছেড়ে থাকতে হবে। চললাম।

অনুপস্থিত ধুবর একটা অট্টহাসি শুনতে পায় রেমি। ধুব যেন বলে, যাও। পৃথিবীতে কাউকেই আমার খুব একটা প্রয়োজন নেই।

রাগে দুঃখে দুহাত মুঠো করে রেমি বলে, কেন প্রয়োজন নেই? কেন?

মানুষে মানুষে কোনো স্থায়ী সম্পর্ক নেই, আত্মীয়তা একটা সংস্কার মাত্র। আমি এই জীবনে তা বহুবার প্রত্যক্ষ করেছি। ওই যে আমার জন্মদাতা, উনি ঠিক কে বলো তো! বাবা বলে ভাবলে বাবা, কিন্তু যদি না ভাবি!

শুধু বাবার ওপর রাগ বলেই কি তোমার মনটা ওরকম হয়ে গেছে

রাগ হলে তো বাঁচতাম। শুধু রাগ তো নয়।

তাহলে কী?

কী করে বলি! তবে ব্যাপারটা বুঝবার চেষ্টা করছি। আমার মা যখন মারা যায় রেমি, সেটা আমার চোখের সামনেই ঘটেছিল। আমার সবচেয়ে প্রিয় মানুষ, সবচেয়ে আপন, যার গায়ের গন্ধ, নাকের বাঁ পাশের আঁচিলটা সবই ছিল যেন আমার নিজস্ব ঐশ্বর্য, তাকে চোখের সামনে অঙ্গার হয়ে যেতে দেখে আমার সেই যে মোহভঙ্গ ঘটেছিল তা আর মন থেকে গেল না। হঠাৎ ঘরের ছাদ উড়ে গেলে মানুষের যেমন অসহায় লাগে, কিংবা কোনো অঙ্গ হঠাৎ দেহ থেকে বিচ্ছিন্ন হয়ে গেলে মানুষ যেরকম হতভম্ব হয়ে যায় ঠিক তেমনই একটা বিস্ময়বোধ আমাকে আজও আচ্ছন্ন করে আছে। বাবা দেশোদ্ধার করে বেড়াচ্ছেন, ভাল কথা, কিন্তু আমার মায়ের অপরাধ কী তা আজও আমি জানি না। কেন তাকে আত্মহত্যার দিকে ঠেলে দেওয়া হল? কেন তার নীরব ও নিরবচ্ছিন্ন ভারাক্রান্ত মনের দিকে কেউ তাকাল না?

শোক কি এত দীর্ঘস্থায়ী হয়?

না। প্রথমে শোক ছিল। কিন্তু বড় হতে হতে আমি বারবার ঘটনাটির বিচার ও বিশ্লেষণ করে দেখেছি। শোক থেকে উৎপন্ন হয়েছে এক ক্রোধ। কৃষ্ণকান্ত চৌধুরীর সঙ্গে আমার বোঝাপড়াটা যতদিন না শেষ হয় ততদিন পৃথিবীর অন্যান্য ঘটনাবলী এবং মানুষ আমার কাছে অর্থহীন।

কিসের বোঝাপড়া? মানুষ তো ত্রুটিহীন নয়। সকলেরই কিছু না কিছু দোষ থাকেই। স্বশুরমশাইকে তুমি কী করতে চাও?

ভয় পেও না রেমি। আমি ঠুকে খুন করতে চাই না।

তাহলে?

আমি ঠুর দৃষ্টিভঙ্গীটা পাল্টে দিতে চাই।

সেটা আবার কিরকম?

লোকটা জীবনে সবই পেয়েছে। সামন্ততান্ত্রিক ব্যাকগ্রাউণ্ড, স্বদেশীয়ানার ছাপ, সততা ও নিষ্ঠার খ্যাতি। হি ইজ এ বিগ ম্যান। আমাদের ধরাছোঁয়ার বাইরে। আমি লোকটাকে বিগ্রহের আসন থেকে টেনে ধুলোমাটির মধ্যে নামাতে চাই। যে উচ্চাকাঙ্ক্ষার নেশায় লোকটা চিরকাল কাছের

লোকজনকে অবহেলা করেছে, তাদের সুখ দুঃখ মনোবেদনার দিকে তাকায়নি, সেই উচ্চাকাঙ্ক্ষা আমি একেবারে শেষ করে দিতে চাই। কিন্তু মুশকিল কী জানো ? লোকটার অস্তিত্বটাই জড়িয়ে আছে ওই ভুল পলিটিকস আর ভুল দেশপ্রেমের সঙ্গে। ওগুলো কেড়ে নিলে লোকটা হয়তো বাঁচবেই না। সেদিক দিয়ে দেখতে গেলে লোকটাকে শোধরানোর মানে আসলে দাঁড়াবে লোকটাকে খুন করা। কিন্তু আমি নাচার।

তুমি স্বশ্রমশাইকে ভুলে যেতে পারো না ?

কী করে সেটা সম্ভব ?

ওঁর কথা ভেবো না। অন্য সব কিছু নিয়ে ব্যস্ত রাখো নিজেকে।

ভোলা সহজ নয় রেমি।

চলো আমরা অন্য কোথাও গিয়ে ঘর বাঁধি।

লোকটার কাছ থেকে দূরে সরে গেলেই কি সব সমস্যার সমাধান হবে ?

তাহলে কী করবে ? একটা কিছু তো করতে হবে।

আমার ক্ষমতা কতটুকু রেমি ? কৃষ্ণকান্ত চৌধুরি আমাদের তিন ভাইয়ের দিকে কখনো মনোযোগ দেয়নি। স্বার্থপর লোকটা চিরকাল নিজের ক্যারিয়ার তৈরিতে ব্যস্ত ছিল। আমাদের মানুষ করে তোলার জন্য যতটুকু করার ছিল তার কিছুই করেনি। দাদার মিলিটারিতে যাওয়ার কোনো ইচ্ছে ছিল না। কেবলমাত্র একটি ডানপিটে দুষ্ক ছেলেকে দূরে রাখার জন্যই তাকে দেহাদুন মিলিটারি অ্যাকাডেমিতে পাঠিয়ে দিয়েছিল তোমার স্বশ্রম। ছেলে যে সেই পর হয়ে গেল আর তাকে কোনোদিন কাছে ডাকল না। আমার তো মনে হয় কৃষ্ণকান্তকে জন্ম করতেই দাদা একজন মারাত্মক ডিভোয়াস মেয়েকে বিয়ে করে বসেছে। প্রচণ্ড মদ খায়, র্যাশ লাইফ লিড করে। আমার ছোটো ভাইকে তো দেখেছো ? কোনোদিন মনে হয়েছে যে, এ বাড়ির ওপর তার টান আছে ? নেই। কারণ তাকে ছোটোবেলা থেকেই ঠিক ওরকম ভাবে বাধা করা হয়েছে। দাদার মতো সেও একদিন এ বাড়ির সঙ্গে সম্পর্কের শেষ সূতোর বাঁধনটাও ছিঁড়ে ফেলবে। শুধু আমি। আমার জন্যই কৃষ্ণকান্ত এখনো নিষ্কণ্টক নয়। সূত্রাং ওই একটা কাঁটা তার জীবনে থাক রেমি।

এসব কাল্পনিক সংলাপ অবশ্য পুরোটাই রেমির কল্পনা নয়। বিভিন্ন সময়ে ধ্রুবর সঙ্গে তার এসব কথাবার্তা হয়েছে।

ভোর পর্যন্ত রেমি আধো-ঘুম ও আধো-জাগরণে বহুবার ধ্রুবর কথা, শুধু ধ্রুবর কথাই ভাবল। কোনো দুর্ঘটনা ঘটে থাকতে পারে। তবু সেটাকে সম্ভব বলে মনে হল না তার। মদ খেয়ে কোথাও পড়ে আছে ? অসম্ভব নয়। তবে মদ খেয়ে ঘরে ফিরতেও যখন বাধা ছিল না তখন না ফেরারই বা কী অর্থ ? রেমির যেটা সম্ভব বলে মনে হয়, ধ্রুব ইচ্ছে করেই ফেরেনি। দুপুরে ধ্রুব বারান্দায় দাঁড়িয়ে দেখেছে, রেমি দুরন্ত সমুদ্রের জলে নামছে একা। বোধহয় সে ভেবেছে, রেমি আত্মহত্যার চেষ্টা করছে। এতে বোধহয় একটু আশাশ্রিত্যই হয়েছে ধ্রুব। আত্মহত্যার দিকে রেমিকে আর একটু ঠেলেই দেওয়া যাক তাহলে ! সেই কারণেই কি সারারাত নিজের ইচ্ছাশক্তির সঙ্গে, নিজের ভূতের সঙ্গে লড়াই করতে তাকে ফেলে গেল ধ্রুব ? একটানা সারা রাত সে এই ঘরে একা। নানারকম দৃষ্টিভঙ্গি, অদ্ভুত সব বিকার, বিকট সব ভয় তাকে ছেঁকে ধরছে। কিছু করার নেই। সে মেয়েমানুষ, যুবতী, চাঁচালে কেলেংকারি হবে।

ভোরের আলো ভাল করে ফুটবার আগেই রেমি উঠে পড়ে। ধ্রুব আজ ফিরবে কিনা তা সে জানে না। ভাববার মানোও হয় না কোনো। রেমি সকালের জলখাবার খেয়ে নিল অনিচ্ছা সত্ত্বেও। সকাল ন'টা নাগাদ একটা রিক্সা ডেকে ব্যাগ নিয়ে রওনা হয়ে পড়ল স্টেশনের দিকে। সিদ্ধান্তটা খুবই দুঃসাহসী। কিন্তু আপাতত এই সিদ্ধান্ত নেওয়া ছাড়া গতানুগতিক নেই।

কিন্তু বিকেলের আগে কলকাতার ভাল ট্রেন নেই। রেমি অনেকক্ষণ চেষ্টাচরিত্র এবং খানিকটা

ছোট্টাছুটি করে ও অবশেষে এক দালালকে বেশী টাকা কবুল করে একটা স্লিপার বারথের ব্যবস্থা করে ফেলল। একা মেয়েমানুষের পক্ষে ফার্স্ট ক্লাস খুব ভাল নয়। সে সেকেণ্ড ক্লাসেই যাবে।

সারাটা দিন রেমি ফার্স্টক্লাস ওয়েটিং রুমে বসে বসে স্টেশন থেকে কেনা পত্রপত্রিকা আর বই পড়ল। খিদে পেলে খেয়ে এল রেষ্টুরেন্ট থেকে। খুবই স্বাভাবিক আচরণ করে যাচ্ছিল সে। কিন্তু মনের মধ্যে সর্বদা এক উচাটন ভাব। তার দৃঢ় বিশ্বাস ছিল, খুব সকালে হোটেল ফিরবে এবং তাকে না পেয়ে ছুটে আসবে স্টেশনে। আসেনি।

বিকেল চারটে পর্যন্ত শক্ত ছিল রেমি। তারপর আর পারল না। কে জানে, খুব আদৌ ফিরেছে কিনা! যদি কোনো বিপদ ঘটে থাকে তার?

স্টেশন থেকেই ডিরেক্টরী দেখে হোটেল ফোন করে রেমি।

দোতলার চোদ্দ নম্বর ঘরের মিস্টার চৌধুরি কি ফিরেছেন?

হ্যাঁ। অনেকক্ষণ। আপনি কি মিসেস চৌধুরি?

হ্যাঁ।

উনি কয়েকবার আপনার খোঁজ করেছিলেন। কোথায় গেছেন বলে যাননি তো।

না। হঠাৎ একটু বেরিয়ে পড়লাম।

কোথায় গিয়েছিলেন?

রেমি একটু ভেবে বলল, বেড়াতে। ঠুকে বলবেন, আমি—আমার ফিরতে একটু দেরী হবে। চিন্তার কিছু নেই।

আচ্ছা।

রেমি নিশ্চিত মনে বসতে পারল এসে ওয়েটিং রুমে। একটু ঘুমিয়েও নিল। সবচেয়ে গাঢ় ঘুম হল তার গাড়িতে। এক ঘুমে কলকাতা। ট্যাকসিতে উঠে সোজা চলে এল বাপের বাড়িতে।

সে এবং খুব যে কোথাও গিয়েছিল এবং কলকাতায় যে বেশ কয়েকদিন তারা ছিল না এখনও তার পৃথক তার বাপের বাড়িতে পৌঁছোয়নি। ব্যাপারটা বিস্ময়কর। তবে তার স্বশুর কৃষ্ণকান্ত বোধহয় পুত্র আর পুত্রবধূর এই আকস্মিক গৃহত্যাগের ঘটনাটা চাউড় করতে চাননি। দ্বিতীয় যে ঘটনাটা আরও চমকপ্রদ এবং দূরপ্রসারী সেটা বাপের বাড়িতে পা দিয়েই শুনল সে, কৃষ্ণকান্তর দফতর বদল হয়েছে। মোটামুটি গুরুত্বপূর্ণ এক দফতর থেকে তাঁকে সরিয়ে নিতান্তই একটা এলেবেলে দফতরে বসিয়ে দেওয়া হয়েছে। তা নিয়ে খুব একটা হৈ-চৈ হয়নি, অবশ্য। কিন্তু গুজব হল, কৃষ্ণকান্তর দলের মধ্যে ফাটল দেখা দিয়েছে। ঠুকে হয়তো মস্তিষ্কই ছাড়তে হতে পারে।

খবরটা ভাল না মন্দ তা বুঝতে পারল না রেমি। আসলে খবরটা তাকে তেমন স্পর্শই করল না। তার নিজের জীবনে অনেক গুরুতর আর একটা ঘটনা ঘটতে চলেছে। খুবর সঙ্গে তার সম্পর্কের ইতি ঘটছে। সে তুলনায় কৃষ্ণকান্তর মস্তিষ্ক নিয়ে গণ্ডগোল তেমন কোনো ঘটনাই নয়।

বিকেলের দিকে সে কয়েকবার ফোন করার পর স্বশুরমশাইকে ধরতে পারল তাঁর দফতরে।

আমি রেমি বলছি।

কৃষ্ণকান্তর গলাটা একটু দুর্বল শোনাল, কে বউমা! তোমাদের জন্য ভেবে ভেবে আমি—কোথায় গিয়েছিলে মা?

পুরী। আপনার ছেলে এখনো ওখানেই আছে।

তুমি কি একা কলকাতায় চলে এসেছো?

হ্যাঁ।

একদম একা?

একদম একা কেন হবে আমি সেকেণ্ড ক্লাসে এসেছি, গাড়িতে অনেক লোক ছিল।

কৃষ্ণকান্ত একটু হাসলেন, তা তো থাকারই কথা। তবু মেয়েদের একা চলাফেরা করতে নেই। এ



দেশটা এখনো ততদূর সভ্য নয়, বুঝলে ! এখনো জঙ্গলের শাসন কায়েম আছে । তা একা আসতে হল কেন ? সেই দামড়াটার সঙ্গে বুঝি ফের ঝগড়া !

না, ঠিক ঝগড়া নয় ।

ঠিক আছে । পরে শুনবো । আজ ফিরতে একটু রাত হবে হয়তো । জেগে থেকে । আমি আজই সব শুনবো ।

কিন্তু আমি তো কালীঘাটের বাড়িতে উঠিনি ।

তবে কোথায় আছো ? বাপের বাড়িতে নাকি ?

হ্যাঁ ।

গওগোলটা তাহলে বেশ গুরুচরণ, কী বলো ?

আমি অন্য একটা অ্যারেনজমেন্টের কথা ভাবছি ।

কী অ্যারেনজমেন্ট মা ?

ভাবছি কিছুদিন দূরে সরে থাকাটা দরকার ।

তাতে কিছু লাভ হবে মনে করো ?

কাছে থেকেও তো হচ্ছে না ।

হচ্ছে না কে বলল ? আমি তো দেখছি হচ্ছে । এই যে আমাকে অপদস্থ করতে বাড়ি থেকে দূর করে পালিয়ে গেল, কিন্তু তোমাকেও নিয়ে গেল সঙ্গে । এটা কি ওর উন্নতির লক্ষণ নয় ?

আমরা ওভাবে চলে যাওয়াতে আপনি অসন্তুষ্ট হয়েছেন নিশ্চয়ই !

তা হয়েছিলাম । তবে পরে হাসিই পেয়েছিল । পুলিশ ওকে নিয়ে গিয়ে কিছু ইনটেরোগেশনের পর ছেড়ে দিত । সেটাই নিয়ম । কেন যে খামোখা নাটক করতে গেল !, তবে তোমাকে সঙ্গে নিয়ে যাওয়ায় দামড়াটা সম্পর্কে আমার একটু শ্রদ্ধাও হয়েছিল । এটা বুদ্ধির কাজ । কিন্তু তারপর কী হল মা ?

সব তো ফোনে বলা যায় না ।

সে তো ঠিকই । দামড়াটা কি এখনো পুরীতেই আছে ?

হ্যাঁ ।

হোটেলের নামটা বলবে ?

সী ভিউ ।

ঠিক আছে । আমি দেখছি । তুমি তাহলে এখন বাপের বাড়িতেই থাকবে বলছ !

আপনি যদি অনুমতি দেন এবং রাগ না করেন ।

ধুবর জনা তুমি যা করছ তা হয়তো ঠিকই করছ । কিন্তু মা শুধু ধুবই তো নয়, তোমার তো আমরাও আছি । দামড়াটাকে জব্দ করতে গিয়ে আমাদেরও জব্দ করা কি ঠিক ?

রেমি বার দুই টোক গিলল । একটা আবেগ তাকে দুর্বল করে দিচ্ছে । কান্না আসছে । স্বশুর কেমন মানুষ তা সে জানে না, কিন্তু এই লোকটার মধ্যে সে এক গভীর স্নেহ ও অগাধ প্রশ্রয় পেয়েছে । কিছুতেই এই মানুষটাকে সে নিজের জীবন থেকে বিচ্ছিন্ন করে দিতে পারে না ।

রেমি ধরা-ধরা গলায় বলল, আমি কী করব তা বুঝতে পারছি না ।

কৃষ্ণকান্ত একটু গভীর গলায় বললেন, শোনো মা, ধুবর বন্ধুরা তোমার বাপের বাড়িতে একটা অনায়া হামলা চালিয়েছিল । তাতে বেয়াই বাড়িতে আমার মানসম্মান নষ্ট হয়েছে, বেয়াইমশাইয়েরও চূড়ান্ত অপমান হয়েছে । এটা তুমি নিশ্চয়ই বোঝো যে, ধুব একাজ করেছে আমাকে আর বেয়াইমশাইকে অপ্রস্তুত করার জন্যই । অন্য কেউ হলে আমি আরো কঠিন ব্যবস্থা করতাম । কিন্তু সে আমার ছেলে বলেই বিচারের ভার নিজের হাতে না নিয়ে পুলিশের হাতে ছেড়ে দিয়েছি । সেটা কি অনায়া করেছে, বলো !

না, অন্যায় কেন হবে ! ঠিকই করেছেন ।

আমি জানি তুমি ওই দামড়াটাকে অসম্ভব ভালবাসো । অত ভালবাসা পাওয়ার যোগ্যতা ওর নেই । তাই ভাবছিলাম, বাপ হয়ে ছেলেকে পুলিশের হাতে দিচ্ছি বলে তুমি আমার ওপর আবার অসন্তুষ্ট না হও

অসন্তুষ্ট হইনি তো

হয়েছে মা, নইলে এতক্ষণ কথা বলছ অথচ একবারও আমাকে বাবা বলে ডাকনি ।

রেমি শুরু হয়ে রইল কিছুক্ষণ । কৃষ্ণকান্তকে ইচ্ছে করেই আজ সে বাবা বলে ডাকছিল না । সম্পর্ক তো সে শেষ করতেই চলেছে । এখন কী বলবে ! তার মাথা ঝিমঝিম করতে লাগল । মানুষের কাছে সবচেয়ে বড় বেদনা বোধহয় প্রিয়জনকে অকারণ আঘাত করার বেদনা ।

রেমি স্তব্ধতা ভেঙে বলল, ঠিক তা নয় বাবা ।

কৃষ্ণকান্ত একটা দীর্ঘশ্বাস ছেড়ে বললেন, অত কঠিন হয়ো না মা । আমি নানা কারণে বড় জর্জরিত । কিছুটা বোধহয় শুনেও থাকবে । এর মধ্যে তুমিও যদি ওরকম কঠিন হও তাহলে আমি কোথায় দাঁড়াই বেলো তো !

রেমি জানে, কৃষ্ণকান্ত এত দুর্বল প্রকৃতির মানুষ নন । তবে তিনি মানুষকে পটাতে ওস্তাদ । তবু এই চিনি মাখান কথায় রেমি জেনেশুনেও ভিজল । একটু হেসে বলল, আমি তো এখনো পাকাপাকিভাবে কিছু ঠিক করিনি, আপনি ওরকম ভাবছেন কেন ?

না বলে ধ্রুবর সঙ্গে পুরী গেলে মা, তাতে কিছু মনে করিনি । কিন্তু এখন যেসব কথা বলছ তাতে ভয় পাচ্ছি ।

আমি কি কালীঘাটের বাড়িতে চলে যাবো বাবা ?

কৃষ্ণকান্ত একটু ভাবলেন । তারপর বললেন, না, আজ থাক । কাল আমি গাড়ি পাঠিয়ে দেবো । যদি তোমার মা বাবা অনুমতি করেন তাহলে চলে এসো । আজ বরং বিশ্রাম নাও ।

আপনি যা বলবেন তাই করব বাবা ।

কোরো মা । আমি কাউকে খুব খারাপ পরামর্শ দিই না । তোমার স্বামী যদি আমার কথা ছিটেফোঁটাও শুনত তাহলে মানুষ হয়ে যেত ।

রেমি আচমকাই বলে বসে, আপনি কেন ওর মুখোমুখি হয়ে জবাবদিহি করতে বলেননা !

আমি ! কৃষ্ণকান্ত যেন চমকে ওঠেন । তারপর স্তিমিত কণ্ঠে বলেন, আমি মাত্র একজনকেই দুনিয়ায় ভয় পাই মা । তোমার স্বামীকে ।

## ॥ ৩৯ ॥

এত কলকল্লা কখনো দেখিনি সুবলভাই । তার ছেলেবেলায় রেল পাতা হয়নি এদিকটায় । মোটরগাড়ি চলত না । স্টিমার ছিল না । কলের কাপড় বিলেত থেকে তখনো এত দূর এসে পৌঁছোয়নি । দিনেকালে এসব হল কী ? তাজ্জব কাণ্ড সব । সুবলভাই যতবার খোকাবাবুদের সেডান গাড়িখানাকে লাল ধুলো উড়িয়ে রাস্তায় যাতায়াত করতে দেখে, ততবার সব কাজ ফেলে ছুটে আসে রাস্তায় । এই প্রায় নব্বই বছর বয়সে তার ভেতরটা আবার ছোট্ট ছেলের মতো আকুপাকু করে । তাজ্জব ! তাজ্জব !

চৌধুরিবাড়ির এগারোজন মালীর মধ্যে সুবলভাই একজন । ঠিক একজন তাকে বলা যায় না । বলতে গেলে সে হল হেড মালী । মাইনে পনেরো টাকা, খোরপোশ । শুরু করেছিল তিন টাকায় । তার চোখে ছানি পড়েনি । শরীরটা পুরোনো গাছের মতোই শক্ত পোক্ত এবং গাঁটবহুল । চামড়ায় কিছু কুঞ্জন এবং পুরুভাব এলেও কাঠামোটা সোজা এবং সহজ । সুবলভাই এখনো চমৎকার মাটি

কোপাতে পারে, আগাছা নিড়ায়। তার হাতে গাছ বাড়েও চমৎকার।

শ্যামকান্ত বলতেন, তুই বেটা, গাছের সঙ্গে কথা বলিস। গাছের কথাও তুই বুঝতে পারিস।  
পারিস না ?

সুবলভাইয়ের এটাও তাজ্জব লাগত। কথাটা ঠিকই। সে গাছের কথা বুঝতে পারে। গাছও তার কথা বোঝে। কিন্তু সেটা আর কারো জানার কথাই নয়। শ্যামকান্ত সেটা টের পেয়েছিলেন কেমন করে ?

আজকাল হর কমপাউনডারের সঙ্গে প্রায়ই তার প্রাণের কথা হয়। হর কমপাউনডার আজকাল জিন-পরী, ভূত-প্রেত নিয়ে কারবার করে। তার ওপর সুবলভাইয়ের অগাধ আস্থা। এই একটা জ্ঞানী লোক। যতদিন কমপাউনডারি করত ততদিন খুব চূপচাপ মানুষ ছিল হর। আজকাল তেমনি একটু বকবক করে। তবে কাউকে শোনানোর জন্য নয়। নিজেই বকে, নিজেই শোনে। সুবলভাইয়ের বিশ্বাস, হরনাথ আসলে একা একা ভূতপ্রেতের সঙ্গেই কথাবার্তা বলে। যেমন সে-সারাদিন বলে গাছপালার সঙ্গে।

ওই যে হরনাথ একটা কাঠচাঁপা গাছের ছায়ায় বসে একা বকবক করছে, সুবলভাই জানে হরনাথের এখন কথা চলছে কোনো আত্মার সঙ্গে। কোনো কূট বিষয় নিয়েই আলোচনা চলছে বোধহয়। হরনাথের কপালে তিনটে ভাঁজ।

দোলনচাঁপার গোড়া উসকে দিতে দিতে সুবলভাইয়ের একটু তামাক খেতে ইচ্ছে হল। এবারে গরমটা পড়েছে জব্বর।

কলকে সেজে নিয়ে সে এসে হরনাথের পাশে বসল জুং করে।

হর, কেমন বোঝো

ভাল বুঝছি না।

হলটা কী ?

দিনকাল ভাল যাচ্ছে না। এসটেট লাটে উঠল বলে।

কিছু শুনছো নাকি ?

শুনেছি।

কী শুনছো ?

রাজেন মোক্তারের ছেলে কতাকে কী বলেছে জানো ?

না। কী করে জানবো ?

বলেছে খরচ কমাতে।

তা কমাক না।

খরচ কমানোর জন্য কী করতে বলেছে জানো ?

বলো শুনি।

বলেছে, যে সব অপোগণ্ডকে বসিয়ে খাওয়াচ্ছেন সেগুলোকে ঝেঁটিয়ে তাড়ান।

বসে আর খায় কে ?

কেন, আমি ! নতুন মহুরী পরেশ ঘোষ আমাকে কাল আড়ালে ডেকে বলল, এবার ডেরিডাণ্ডা তোলো হে। নোটিশ পড়ে গেছে।

চোখ কপালে তুলে সুবলভাই বলে, তোমাকে তাড়াবে ?

তা নয়তো কি ? এতকাল এসটেটের কাজ করে শেষে বুড়ো বয়সে বিদেয় হতে হচ্ছে। তোমাদেরও দিন ফুরিয়েছে। নিশ্চিন্তে থেকো না।

বলো কী ?

শচীন বলেছে, কর্মচারী এত বেশী রাখা চলবে না। মরা-হাজা বাগানের জন্য এগারোজন মালী,

এ হল বারো হাত কাঁকুড়ের তেরো হাত বিচি ।

সুবলভাই খুবই আশ্চর্য হয়ে যায় । তাড়াবে ! তার মানেরটা কী ? সেই কবে শিশু বয়সে এক জ্ঞাতি কাকার হাত ধরে খুব ভয়ে ভয়ে দেউড়ি পেরিয়ে এ বাড়িতে ঢুকেছিল । বগলে একটি পুঁটুলিতে দু-একটা জামাকাপড় । সেই থেকে টানা এই বাড়ির চৌহদ্দিতে রয়ে গেছে সে । সন্তর আশি বছর ধরে । শ্যামকান্তর চেয়েও সে বয়সে বড় ছিল । এ বাড়ি ছাড়া তার যে আর কোথাও কোনো আশ্রয় ছিল তা আজ আর মনেও পড়ে না ।

সুবলভাইয়ের কথাটা বিশ্বাস হল না । জিজ্ঞেস করল, কতাবাবা কী বলে ?

কতাবাবারও তাই মত । খরচ কমাতে হবে । মেয়ের বিয়ে এসে যাচ্ছে । তার খরচ আছে । কিছু মামলা মোকদ্দমা লাগবে, তারও খরচ আছে ।

কথাটা মাথায় সঁধেয় না সুবলভাইয়ের । নব্বুই বছর ধরে তার মগজ কেবল গাছপালা আর মাটির গুণাগুণ নিয়ে ভেবেছে । আজকাল মাথায় একটু কুয়াশার মতো কী যেন জমে থাকে । বুদ্ধি খেলতে চায় না । পুরোনো কথা মনে পড়তে চায় না । কুলে নিজের ছেলের নাম পর্যন্ত ভুলে যায় ।

হঁকোয় একটা আলগা টান দিয়ে সে বলে, জমিদারের মেয়ের বিয়ে কি ঝি-চাকরের মাইনের জন্য আটকায় ? কতাবাবুর আর সব মেয়েদের বিয়ে হয়নি ? তার জন্য ক'টা কর্মচারীর চাকরি গেছে ?

সে তো তুমি বললে । শচীনকে সে কথা কে বোঝাবে ! সে হল হা-ঘরে ছোটো নজরের লোক । জমিদারের উঁচু নজর সে পাবে কোথায় ? যত সব ছোটোলোকী কারবার ।

চিন্তিত সুবলভাই হঁকোয় ঘনঘন টান মারে । তারপর একটু কেশে নিয়ে বলে, গত মাসেও কাছারি থেকে জনা দুইকে বিদেয় দেওয়া হল । এরকম চললে এ তো ভূতের বাড়ি হয়ে যাবে ।

হরনাথ একটু রাগত স্বরে বলে, তাতে শালা শচীনের কী ? সে মাসের শেষে পুরো তনখা টানবে । কতাবাবার মেয়েকে বিয়ে করে নিয়ে যাবে টোপের মাথায় দিয়ে ।

সুবলভাই উদাস দৃষ্টিতে পুকুরের ধারে বাঁধা হরিণটার দিকে চেয়ে থেকে বলল, কতাবাবার নজর ছোটো হয়ে যাচ্ছে । শচীনের সঙ্গে বিয়ে দেওয়া মানে মেয়েটাকে একদম জলে ফেলে দেওয়া ।

কতাবাবা যদি নিজের বুদ্ধিতে চলত তাহলে সে একরকম ছিল । এ হল আমাদের মনু ঠাকরোনের বুদ্ধি । শচীন একটা পাত্র ! ছিঃ ছিঃ !

আমি যাবো কোথায় বলা তো !

কেন, যাবে কেন ? ব্রহ্মপুত্রের জলে ডুবে মরবে । আমিও তাই করব ঠিক করেছি । তিন কুলে কেউ নেই, দেশ গাঁ কবে হেজেমেজে গেছে । বুড়ো বয়সে তো ভিক্ষে করতে পারব না ।

সুবলভাই হাঁ করে দম নেয় একটু । থেলো হঁকোর আঙুন মিইয়ে গেছে ।

কর্মচারীদের মধ্যে অসন্তোষটা বিশেষ চাপা থাকছে না ।

কয়েকদিন আগে শচীন একটা লিস্ট করে হেমকান্তর হাতে দিয়ে গেছে ।

সেই লিস্টে জনা পনেরো কর্মচারীর নাম আছে । শচীন পরিষ্কার জানিয়ে দিয়েছে, এই জনা পনেরো লোক এসটেটের লায়াবিলিটি । অকর্মণ্য, বয়স্ক, ফাঁকিবাজ বা রোগগ্রস্ত বলে এদের দিয়ে তেমন কাজ আদায় হচ্ছে না বা হওয়ার আশাও নেই । হেমকান্তর বৈষয়িক অবস্থা যা তাতে এইসব অপোগণ্ডকে পোষা একটা বিরাট ক্ষতি । এই দয়ালু বিলাসিতার ভার বইবার মতো জোর হেমকান্তর এসটেটের নেই ।

হেমকান্ত লিস্টটা দেখেছেন । যে পনেরোজনের নাম আছে তাদের মধ্যে কয়েকজন খুব প্রাচীন আমলের লোক । তাঁর বাবা শ্যামকান্ত এদের চাকরি দিয়েছিলেন । এছাড়া বেতনভুক্ত সকলকেই হেমকান্ত বহুদিন ধরে চেনেন জানেন । এদের ঠিক কর্মচারী বলে মনে হত না তাঁর । যেন এক যৌথ পরিবারেরই লোক । কিন্তু শচীন বাজে কথা বলেনি । এত সব কর্মচারীকে পুষে তাঁর আর লাভ নেই ।

তবু ছেলে কনককান্তিকে ডেকে এক সন্ধ্যায় লিস্টটা তার হাতে দিয়ে বললেন, দেখ তো, শচীন এই সব কর্মচারীকে বরখাস্ত করতে বলেছে। কাজটা ঠিক হবে কিনা বুঝতে পারছি না। কনককান্তি লিস্টটা এক ঝলক দেখেই বাপের হাতে ফেরৎ দিয়ে ভ্রু কঁচকে বলল, কাজটা ঠিক হবে না কেন? জমিদারী মানে তো খয়রাতি কারবার নয়। শচীন বুদ্ধিমান ছেলে, ঠিক পরামর্শই দিয়েছে।

হেমকান্ত দুর্বল গলায় বলেন, সেটা মানছি। কিন্তু এদের গতিটা কী হবে ভেবে দেখেছো সেটা কি আমাদের ভাববার কথা?

বাবার আমল থেকে আছে কয়েকজন। এদের অনেকেই এখানে সপরিবারে বাস করে। যাওয়ার জায়গা পর্যন্ত নেই

সে দায় তো আমাদের নয়।

কয়েকজনের যথেষ্ট বয়সও হয়েছে। শুনছি এখন সব এসটেট থেকেই কর্মচারী ছাঁটাই হচ্ছে নতুন কাজ কেউ পাচ্ছে না। এরা সব যে না খেতে পেয়ে মরবে।

কনককান্তি বিনীত গলায় বলল, জমিদারীর আয় চিরকাল এইসব পোষার জন্য বারো আনা উড়ে যায়। আপনাকে এখন তো আয়ের দিকটা দেখতেই হবে। গত দুদিন আমিও শচীনের সঙ্গে বসে কাগজপত্র দেখেছি। অবস্থা ভাল ঠেকছে না। সে গেল একটা দিক। এদিকে কর্মচারীরা তো প্রায় বসে বসে মাইনে নিচ্ছে। এসটেট দেখার লোক নেই, আদায় উসূল নেই, ওদের কাজটাই বা কী

এ কথায় হেমকান্ত একটু লজ্জা পেলেন। প্রকরাস্তুরে এ তাঁর অপারগতার প্রতি ইঙ্গিত। তিনি একটু চুপ করে থেকে বললেন, সে অবশ্য ঠিক কথা। তবু প্রথা বলেও একটা জিনিস আছে।

প্রথা আঁকড়ে থাকতে গেলে যে নীলামে চড়াতে হবে সব কিছু। দিনকাল বদলে যাচ্ছে, পুরোনো প্রথা আঁকড়ে থাকলে চলবে কেন? আমি তো জমিদার বাড়ির ছেলে। ব্রাহ্মণ সন্তান, তবু আমি তো ব্যবসা করতে নেমেছি।

হেমকান্তের মনটা সায় দিচ্ছে না। তবে তিনি কনকের সঙ্গে আর কথা বাড়ালেন না। ওরা সব সময়ে ঠিক কথাই বলে। ওদের কথায় যুক্তির কোনো অভাব নেই। তিনি বললেন, আচ্ছা। ঠিক আছে।

কনককান্তি তবু চলে গেল না। একটু অপেক্ষা করে হঠাৎ বলল, একটা কথা বাবা। বলো।

শচীনের লিস্টে আমাদের পুরুতমশাইয়ের নাম নেই। কিন্তু আমি মনে করি ওঁর নামটা সবার আগে লেখা উচিত ছিল।

পুরুত মশাই হেমকান্ত শশবাস্তে বললেন, তার আবার কী হল?

কনককান্তি মৃদু হেসে বলল, সকাল সন্ধ্যায় দুবার ঘণ্টা নাড়ার জন্য একটা লোককে তার বিশাল পরিবারসুদ্ধ দিনের পর দিন প্রতিপালনের কোনো অর্থই হয় না।

হেমকান্ত কথা বললেন না। চেয়ে রইলেন।

কনককান্তি বলল, ওদের খানিকটা জমি দেওয়া আছে বয়রায়। চাষবাসও করান জানি। এখানকার চাকরি গেলে একেবারে না খেয়ে মরবেন না। আমার পরামর্শ হল, নগদ কিছু টাকা দিয়ে ওঁদেরও উচ্ছেদ করে দিন। মাস মাইনের পুরুত ঠিক করুন। তাতে ঝামেলা আর খরচ দুই-ই কমে যাবে।

হেমকান্ত কথা খুঁজে পাচ্ছিলেন না। প্রস্তাবটা এমন কিছু সাংঘাতিক নয়। কিন্তু মনু – মনু কোথায় যাবে?

কনককান্তি যেন হেমকান্তের মনের কথা শুনতে পেল। একটু ইতস্তত করে বলল, মনুপিসির কথা অবশ্য আমাদের আলাদা করে ভাবতে হবে। উনি আমাদের যথেষ্ট সেবা করেছেন। ওঁর জন্য বরং

পাঁচ টাকা মাসোহারার ব্যবস্থা করে দিন।

হেমকান্ত ভারী অস্বস্তি বোধ করতে লাগলেন। নতুন একটা যুগের পাগলা হাওয়া এসে তাঁর ঘরের সব কিছু ওলট-পালট করে দিতে চাইছে। সম্ভবত এ থেকে তাঁর নিস্তার নেই। অলস অকর্মার যে জীবন তিনি কাটিয়েছেন তার জন্য কিছু গুনোগার তো তাঁর দেওয়ারই কথা। সবচেয়ে বড় গুনোগার কি মনুকে হারানো?

কনককান্তি মৃদুস্বরে বলল, এসেটের অবস্থার জন্য আপনি নিজেকে অপরাধী ভাবেন বলে শুনেছি। কিন্তু দোষ আপনার নয়। ওয়ারলড ওয়ারের পর যে ডিপ্রেসনটা এসেছে সেটাকে কাটানো খুব মুশকিল। আদায় উসূল ঠিকমতো হলে ততটা চিন্তার কিছু ছিল না। কিন্তু আপনি অনেক খাজনা মাপ করে দিয়েছেন। আমি বলি কি, শতীনকে শুধু উকিল হিসেবে নয়, ম্যানেজার হিসেবেই রাখুন। শক্ত লোক। আদায় উসূল ঠিকমতো করতে পারবে। ওকালতিও করুক

আমিও তো তাই চাই। সবচেয়ে ভাল হত তোমাদের দুই ভাইয়ের কেউ এসে আমার কাছে থাকলে।

সেটা তো সম্ভব নয়।

দেখি, শতীনের সঙ্গে কথা বলব। এ লোকগুলোকে তাহলে বিদেয় দেওয়াই সাব্যস্ত হল? আমি তাই বলি। তবে আপনি যা ভাল বুঝবেন করবেন।

কনক চলে যাওয়ার পর হেমকান্ত খানিকটা অস্থির সময় কাটালেন। রাতে ভাল ঘুম হল না।

বাহুল্য কর্মচারীদের বিদায় দেওয়াই যদি সিদ্ধান্ত হয় তবে মনুর বাবাকেও রাখা চলে না পাকে-প্রকারে একথাটাই তাঁকে বুঝিয়ে দিয়েছে কনক। হেমকান্ত যদি শক্ত মানুষ হতেন তবে এ ব্যাপারে সিদ্ধান্ত নেওয়ার জন্য ছেলের পরামর্শ চাইতেন না। কিংবা ছেলের পরামর্শ যাই হোক সেটাকে গ্রাহ্য করতেন না। কিন্তু সেই দৃঢ়তা হেমকান্ত নিজের ভিতর খুঁজে পান না।

পরদিন বিকেলে হেমকান্ত নিঃশব্দে নিজের একটেরে কুঞ্জবনটিতে এসে বসলেন। মনুর সঙ্গে একটু পরামর্শ করা দরকার। কিন্তু কনককান্তি আসায় তিনি আড়ালেও মনুর সঙ্গে দেখা করার সাহস পাচ্ছেন না।

ভাঙা গাড়ির পাদানিতে বসে হেমকান্ত শতীনের লিস্টটা বের করে আর একবার দেখলেন। এক একটা নাম, এক একটা মানুষ। এক একটা মানুষকে ঘিরে কত স্মৃতি। এই যে নব্বই বছর বয়সের সুবলভাই। এই বাগানের কাজ করতে করতে হাড়ে ঘুণ ধরিয়ে ফেলল। ওর দুটো ছেলেকেও ঢুকিয়েছিল কাজে। পশ্চিমে একটা কেয়াঝোপ ছিল। তার নীচে আগাছা পরিষ্কার করতে গিয়ে সুবলের এক ছেলেকে সাপে কামড়ায়। বাঁচেনি। কতকাল আগেকার কথা।

কিংবা হর কমপাউন্ডার। মেয়ের শোকে মাথাটা কেমন হয়ে গেল। আর কাজকর্ম করতে পারল না। কিন্তু নীরবে এক বন্ধ খুপির মধ্যে বসে বছরের পর বছর ওষুধ তৈরি করে গেছে। কখনো নালিশ জানায়নি। আর্জি জানায়নি।

এদের তো কনক ঠিক চিনবে না। শতীন তো আরো নয়। এদের কাছে এসেট মানেই আয়পয়। কিন্তু হেমকান্ত ঠিক সে-রকম শিক্ষা লাভ করেননি। তাঁর কাছে একটা এসেট মানেই অনেকগুলি মানুষের ভাগ্য। অনেকগুলি মানুষের হৃদয়তা, আত্মীয়তা। এক মস্ত যৌথ পরিবার। তিনি মহালে যাওয়া প্রায় ছেড়েই দিয়েছেন। কিন্তু জানেন, আজও কোনো মহালে গিয়ে হাজির হলে মানুষ কত খুশি হয়, ছুটে আসে। বউবাচ্চা সমেত এসে প্রণাম করে, দক্ষিণা দেয়। ইদানীং তারা পেরে উঠছে না, কী করবে?

একটা দীর্ঘশ্বাস ফেলে লিস্টটা পকেটে ঢুকিয়ে চোখ তুলতেই চমকে উঠলেন হেমকান্ত। পা থেকে মাথা অবধি শিউরে উঠল তাঁর।

অদূরে এক মহানিমের ছায়ায় দাঁড়িয়ে তাঁকে তীক্ষ্ণ চোখে লক্ষ করছে মনু।

হেমকান্ত মৃদু হেসে বললেন, এসো ।

রঙ্গময়ী এগিয়ে এসে বলে, তুমি এখানে যে হঠাৎ

কয়েকদিন আসিনি । বাড়িতে ওরা সব এসেছে ।

আজ কী মনে করে ?

এমনি । মনটা ভাল নেই । এসো মনু, দুটো কথা বলি ।

রঙ্গময়ী মাথা নেড়ে বলে, আজ এখানে এসে ভাল কাজ করেনি ।

কেন বলো তো !

এখানে আজ একটা নাটক হওয়ার কথা আছে ।

নাটক ? হেমকান্ত আকাশ থেকে পড়েন, কিসের নাটক ?

নাটকটি ব্যবস্থা করেছে তোমার বড় বউমা চপলা ।

তাই নাকি ? কী ব্যাপারটা খুলে বলো তো ?

শুনছি তোমার মেয়ের সঙ্গে নাকি আজ শচীনকে মুখোমুখি হবে ।

তার মানে ?

তুমি সেকলে মানুষ, তায় ঘরকুনো । সব বুঝবে না ।

আমাকে তুমি নির্বোধ বলে ভাবলেও আমি ততটা নই । কী ব্যাপার বলো তো ?

বিশাখা শচীনকে বিয়ে করতে চায় না, সে তো জানোই ।

জানি বইকি । মেয়েটা বোকা ।

চপলা ঠিক করেছে দুজনকে মুখোমুখি দাঁড় করিয়ে দেবে । দুজনেই কথাটাকা কইবে । যদি তাতে মেয়ের মন গলে ।

হেমকান্ত একটু রাগের স্বরে বলেন, এসবের কী দরকার ছিল ?

শহুরে কায়দা । আমি তো খারাপ কিছু দেখি না ।

আমি দেখি । এ পরিবারে এখনো পাত্রী পাত্রী দেখে না । আর এ তো আরো নির্লজ্জ ঘটনা ।

রঙ্গময়ী মৃদু স্বরে বলে, তোমার সব তাতে মাথা ঘামানোর কী দরকার ? শচীনকে বিয়ে করার ব্যাপারে মেয়েকে কি রাজি করাতে পেরেছো ?

ধৈর্য ধরলে রাজি হত ।

সেটা অনিশ্চিত ব্যাপার । তুমি পারোনি ।

চপলা পারবে ?

পারবে কিনা জানি না । কিন্তু এটাও একটা চেষ্টা তোমার তো চেষ্টাই নেই ।

তবু ঘটনাটা আমার ভাল লাগছে না মনু ।

তোমার মুখে কথাটা মানায় না ।

কেন মানায় না মনু ?

আমার সঙ্গে তুমি কথা বলো কোন লজ্জায় ?

॥ ৪০ ॥

অপারেশন থিয়েটারের চোখ-ধাঁধানো আলো রেমির নিশ্চল চোখে স্নান ও একাকার । নিজের শরীরের মধ্যে এক নদীর কলধ্বনি শুনতে পাচ্ছে সে । রক্তপাত বন্ধ হচ্ছে না, ডাক্তাররা উদ্বিগ্ন । একটি সদ্যোজাত শিশু মাতৃহারা হবে ।

কিন্তু রেমির কোনো উদ্বেগ নেই । এই মধ্য যৌবনে জীবনের খেলা মাঝপথে থামিয়ে চলে যেতে

কারই বা ভাল লাগে ! কিন্তু আশ্চর্য এই, রেমি কোনো শোক অনুভব করে না । তার আঘাতেনায় অবশ্য চারদিককার এই উদ্বেগ ও ভয় গিয়ে আঘাত করছে না । সে দেখতে পাচ্ছে না তার স্বশ্বরের স্তম্ভিত ক্ষুদ্র মুখ । সে দেখতে পাচ্ছে না হতভম্ব ধ্রুবর কিংকর্তব্যবিমূঢ়তা, কিন্তু নিজের নিঃশ্বাস শরীরে এক ধরনের কঠিন শীতলতা টের পাচ্ছে সে । শীত নয়, কেমন জমাট, শক্ত পাথরের মতো অমোঘ এক শীতলতা তার দুই পা অনড় এবং অবশ করে রেখেছে । মাথাটা গুলিয়ে যাচ্ছে বারে বারে । চোখের সামনে নানারকম দৃশ্যাবলী ভেসে যাচ্ছে । তার সবটারই কোনো অর্থ নেই কিছু । মাঝে মাঝে সে টের পাচ্ছে যে, সে রেমি । সে রেমিই, আর কেউ নয় । আবার মাঝে মাঝে হারিয়ে যাচ্ছে তার সত্তা ।

তার চারদিকে নানান টুকটাক শব্দ হচ্ছে । চাপা কথাবার্তা । বারবার মুখোশ পরা ডাক্তারের মুখ এসে ঝুঁকে পড়ছে মুখের ওপর । ড্রিপ চলছে । কিন্তু রক্তের কলধ্বনি বড় উতরোল । একটু আগে অসহনীয় গর্ভযন্ত্রণা সহ্য করেছে সে দাঁত টিপে । জন্ম দিয়েছে ধ্রুবর সন্তানকে । নিষ্কলঙ্ক খাঁটি, চৌধুরিবাড়ির রক্তবাহী শিশুটি নিরাপদে নেমে গেছে মায়ের খোলস ছেড়ে । রেমির এর চেয়ে বেশী আর কী দেওয়ার ছিল এদের ?

এবার ছুটি, এবার সে ঘুমিয়ে পড়বে ।

মিসেস চৌধুরী !

উঁ, রেমি ক্ষীণ জবাব দেয় ।

জিবটা বের করুন তো ! প্লীজ !

বড় ক্ষীণ এই আদেশ বহু দূর থেকে ভেসে আসে যেন । রেমি চিরকাল আদেশ পালন করে । কারও অবাধ্য সে কোনোকালে ছিল না ।

কষ্টে রেমি জিবটাকে ঠেলে দেয় বাইরে । মনে হল, যেন পাহাড় ঠেলার পরিশ্রম ।

কে যেন বলল, শী ইজ রেসপন্সিং, সেন্স আছে ।

আছে । তবে ইটস এ হেভি ব্রিডিং, শী উইল বি সিংকিং ফাস্ট ।

কে একজন হেঁকে বলল, ব্লাড, কুইক ।

রেমিকে কিছুই স্পর্শ করে না, চোখের পাতা সামান্য একটু খুলে সে চেয়ে থাকে । গোধূলি ! কনে-সেখা রং চারদিকে, এ সময়ে পাখিরা ঘরে ফেরে । দিন যায় । রাত আসে ।

তার আর কী দেওয়ার ছিল নারীজন্ম সার্থক করতে ? কোন্ কাজ বাকী রয়েছে ? কোন্ ঋণ ? কোন দোষত্রুটি ! ঘাট মানি বাবা, ক্ষমা করো । আর আসব না কখনো তোমাদের কাছে । কে আমাকে এনেছিলে পৃথিবীতে ? এবার ফিরিয়ে নাও ।

পুরী থেকে অত শপথ করে ফিরেছিল রেমি, রাখতে পারল না রাখ । ঠিক করে এসেছিল, ধ্রুবর সঙ্গে আর বসবাস নয় । দূরে থাকবে, যদি তাতে কোনোদিন ওর কাছে মূল্য হয় ।

স্বশ্বরমশাইয়ের জন্য সেই শপথ ভাঙতে হল ।

পরদিন সে হাজির হল কালীঘাটের বাড়িতে ।

রাত্রিবেলা ক্রান্ত কৃষ্ণকান্ত ফিরলেন । মুখে দুশ্চিন্তার গভীর রেখা । চোখের নীচে কাজলের মতো কালিমা ।

রেমিকে দেখে সেই গহন বিষমতার মধ্যেও সত্যিকারের একটু আনন্দ অশ্রুট হয়ে ফুটল ।

এলে মা ?

আপনার কী হয়েছে ?

তেমন কিছু নয় ।

আপনি রোগা হয়ে গেছেন ।

এ বয়সে একটু রোগা হওয়া ভাল, বুঝলে !



না, বুঝলাম না, টপ করে রোগা হওয়া ভাল লক্ষণ নয়।

কৃষ্ণকান্ত কোনো জবাব না দিয়ে হাসলেন। সম্মুখে রেমির দিকে চেয়ে রইলেন কিছুক্ষণ, একটু মাথা নাড়লেন।

খাওয়ার টেবিলে যখন বসলেন তখন কৃষ্ণকান্তকে কিছুটা সজীব দেখাচ্ছিল, রাত্রে তাঁর খাওয়া দাওয়া যৎসামান্য, খই দুধ বা একটু ছানা। কখনো-সখনো এক-আধখানা হাতে গড়া কুটি।

সেই সামান্য খাবার সেদিন অনেকক্ষণ ধরে খেলেন কৃষ্ণকান্ত। খেতে খেতে বললেন, তুমি কি একথা বিশ্বাস করবে বউমা যে, আমি কখনো চুরি করিনি, দুর্নীতির আশ্রয় নিইনি, অকারণে মিথ্যে কথা বলিনি? বিশ্বাস করবে?

কেন করব না? আমি তো জানি ওসব।

কৃষ্ণকান্ত মাথা নেড়ে বলেন, কিছুই জানো না মা, পলিটিকস করলে বুঝতে, চুরি না করা এক কথা, আর অন্যের চুরি দেখেও চোখ বুজে থাকা অন্য কথা। এমন অনেক সময়েই হয়, তুমি চাও বা না চাও অনেক অন্যায্যকে তোমার প্রশ্রয় দিতেই হয়।

সেও জানি।

অনেক সময়ে এইসব অন্যের করা দোষের ভাগ নিতে হয় নিজের ঘাড়ে।

আপনার কী হয়েছে বাবা?

সব তোমাকে বলা যায় না। তবে আমাকে একটা মাইনর পোর্টফলিও দেওয়া হয়েছে। সম্ভবত সম্পূর্ণ সরিয়ে দেওয়ারই প্রস্তুতি। সেটা ঘটবার আগেই অবশ্য আমাকে নিজে থেকেই সরে আসতে হবে।

রেমি ছেলেমানুষের মতো বলে, তাতে ভালই তো হবে। আপনার বিশ্রাম দরকার। কিছুদিন রেস্ট নিন।

কৃষ্ণকান্ত মাথা নেড়ে বলেন, দূর বোকা, পুরুষ মানুষের বিশ্রাম কি শুয়ে বসে হয় মা? কাজই তার বিশ্রাম, কাজ না থাকলে আমি কতদিন বাঁচবো?

কাজ করবেন। মন্ত্রী যারা না হয় তারা কি কাজ করে না?

কৃষ্ণকান্ত মৃদু একটু হেসে বলেন, তোমার কথাগুলো এত সহজ মা, ভিতরে টনটন করে গিয়ে লাগে। বাস্তবিকই তাই, তবে যে বাঘ একবার মানুষ খেয়েছে তার অন্য মাংস আলুনি লাগে। এও হল সেই বৃত্তান্ত।

আপনি কি রেজিগনেশন দিচ্ছেন?

ঠিক বলতে পারি না। কয়েকদিনের মধ্যেই একটু দিল্লি যাবো। হাই কম্যান্ডের সঙ্গে কথা আছে। ফিরে এসে ডিসিশন নেবো। আমি তো রাতারাতি পলিটিশিয়ান হইনি মা, আমার পিছনে একটা উজ্জ্বল ইতিহাস আছে।

জানি বাবা।

তাই আমাকে টক করে সরিয়ে দেওয়া সহজ নয়। কিন্তু এসব কথা থাক। আমার হেনস্থা দেখে যে লোক সবচেয়ে খুশি হতে পারত তার খবর বলো তো। সে ব্যাটা করছে কি?

জানি না, উনি আমাকে হোটেলে ফেলে কোথাও চলে গিয়েছিলেন।

ক'দিনের জন্য? হেমকান্ত আঁতকে উঠে জিজ্ঞেস করেন।

এক রাত উনি ছিলেন না।

তোমাকে বলেও যায়নি।

না।

হোটেলের ঘরে তুমি একা ছিলে! সর্বনাশ!

সেইজন্যই ডিসিশনটা নিতে হল। আমি চলে এলাম।

দামড়াটা তখনো ফেরেনি ?

ফিরেছে। স্টেশন থেকে ফোন করে জানতে পারি।

তুমি দারুণ বুদ্ধিমতী।

আমি এখন কী করব বাবা ?

কী করবে ? তোমার কিছু করার নেই। যা করার আমি করছি।

কী করবেন ? ঠুকে ফিরিয়ে আনবেন ?

কৃষ্ণকান্ত একটু হাসলেন। মাথা নেড়ে বললেন, সে কাজ খুব সহজ নয়। ভুবনেশ্বরে আমার এক প্রভাবশালী বন্ধু আছে। ক্যাবিনেট মিনিস্টার। তাকে জানিয়েছিলাম। পুরীতে খোঁজ নিয়ে দেখা গেছে, ওই হোটেলে ছেড়ে দামড়াটা চলে গেছে। বুদ্ধি রাখে। যেই দেখেছে তুমি নেই, সঙ্গে সঙ্গে আঁচ করে নিয়েছে কলকাতায় এসে তুমি আমাকে খবর দেবে। সময় নষ্ট না করে পালিয়েছে।

কিন্তু উনি পালাচ্ছেন কেন ?

সেটা ওই জানে। খুব কিছুদিন আইন পড়েছিল। পাশ করেছে কিনা তা আমি জানি না, কোনোদিন বলেনি আমাকে। কিন্তু আইন পড়ে না হোক, আইন বারবার ভাঙলেও বেশ ভাল আইনের জ্ঞান হতে পারে। কাজেই ধুব আইন ভালই জানে। পুলিশ যে ওর কিছু করতে পারবে না সেটা ওর না জানার কথা নয়। হয়তো এই কাণ্ড করে আমাকে অপদস্থ করার একটা পন্থা বের করছে।

রেমি একটু দুঃসাহসী হল। মাথা নীচু করে আচমকাই বলে বসল, আমাকে একটা কথা বলবেন আজ ?

কী কথা মা ?

আমার শাশুড়ি কি ভাবে মারা যান ?

কৃষ্ণকান্ত একটুও দ্বিধা করলেন না। খুব সহজ কণ্ঠে বললেন, ধুব তোমাকে কী বলেছে জানি না, কিন্তু একথা সবাই জানে তোমার শাশুড়ি আত্মহত্যা করেন গায়ে আগুন দিয়ে। অনেকে এতে আমার দোষ খুঁজে পায়। হতেও পারে। তোমার শাশুড়ির মানসিক জগতের খবর আমি বিশেষ রাখিনি। আমরা আগের দিনের মানুষ, স্ত্রীলোককে নিয়ে ভাবতে অভ্যস্ত নই। তবে উনি আমার কাছে তেমন কোনো অনুযোগ অভিযোগ করতেন না। কী করে বুঝব বল, ঠুর আসল প্রবলেমটা কী ছিল ?

আপনার ছেলে কিন্তু খুব তাঁর মায়ের কথা বলেন।

বলতেই পারে। হি ওয়াজ এ উইটনেস অফ দি ইভেন্ট। ছেলে নিজের চোখের সামনে যদি নিজের মাকে পুড়ে যেতে দেখে তবে তার একটা পারমানেন্ট এফেক্ট তার মনে থাকবেই।

আপনার ছেলে ওই ঘটনার জন্য আপনাকেই দায়ী করতে চায়।

কৃষ্ণকান্ত ম্লান একটু হেসে বলেন, আমি জানি মা। আমার ফাঁসি হলে ধুব হরির লুট দেবে। কিন্তু আগেই বলেছি, স্ত্রী কেন আত্মহত্যা করলেন তা বলা আমার পক্ষে সহজ নয়। ঘটনাটা যখন ঘটে তখন আমি কলকাতার বাইরে। প্রত্যক্ষ হাত তো থাকতে পারে না, তবে পরোক্ষ কারণের কথা যদি বলো তবে স্বীকার করতে বাধ্য নেই, আমার অমনোযোগ এবং খানিকটা অবহেলা তো ছিলই।

আর কোনো কারণ নয় ?

কী করে বলি ! উনি তো একটা চিরকুটও রেখে যাননি যা থেকে বোঝা যাবে।

তাহলে আপনার ছেলে আপনাকেই দায়ী করে কেন ?

ধুব তার মাকে খুব ভালবাসত। আসলে শিশু অবস্থা থেকে ভাইবোনেরা পেয়েছিল মাকেই। বাবাকে তো পায়নি, জেল খাটা, পলিটিকস করে বেড়ানো, হিম্মি-দিল্লি ঘুরে আমার সময় হত না সংসারের দিকে তাকানোর। কাজেই ওরা মাকে ঘিরেই বড় হয়েছে। মা ওদের দ্বিতীয় সন্তা।

তোমার শাশুড়ি মানুষটাও ছিলেন নরম-সরম এবং স্নেহপ্রবণ, তবে বড় দুর্বল প্রকৃতির। একটু কঠোর কথা বা কোন দুঃসংবাদ সহিতে পারতেন না। সহজেই ভয় পেতেন। তাঁকে ভালবাসাও সহজ ছিল, তাই তিনি যখন মারা গেলেন এবং ওরকম ভয়ংকরভাবে তখন আক্রোশে পাগল ধুব একটা স্কেপগোট ঝুজতে লাগল।

স্কেপগোট মানে ?

এমন একজন যার ওপর মায়ের ওই ভয়ংকর মৃত্যুর দায়ভাগ চাপানো যায়।

এটা তো ঠাণ্ডা অন্যায়া। ভীষণ অন্যায়া।

অন্যায় তো বটেই। কিন্তু আমি প্রতিবাদ করিনি কখনো।

কেন করেননি ?

স্ত্রীর প্রতি তেমন কর্তব্য করিনি মা, ভিতরে ভিতরে নিজেকে দোষী মনে হয়। মা-মরা ছেলোটা আর কোথায় সাঙ্ক্কা পাবে ? যদি আমাকে দোষী ভেবে খানিকটা স্বস্তি পায় তো পাক না। ঠিক এরকম ভেবেই আমি ধুবকে একরকম প্রশ্রয় দিতাম। সেটা যে ওর মনে এতদূর ডালপালা ছড়াবে তা ভেবে দেখিনি। আমার আরো দুই ছেলে আছে। তারা কিন্তু ওর মতো করে ভাবে না।

রেমি একটা দীর্ঘশ্বাস ফেলল। কৃষ্ণকান্ত সেদিন ভারী অনামনস্ক মুখে উঠে গেলেন টেবিল থেকে।

ধুব ফিরল না। তবে তার এই ফেরার হওয়ার ঘটনাটা বেশ চাউর হয়েছে এটা বোঝা গেল।

একদিন সকালে টেলিফোন করল রাজা, ধুবর পিসতুতো ভাই। বয়স ধুবর মতোই। ভারী সুন্দর দেখতে। দারুণ গান গায়। রেডিওতে আজকাল প্রায়ই তার প্রোগ্রাম থাকে। তাছাড়া ফুটবলারের মতো ইংরিজি বলে, ভাল ছাত্র ছিল, ইনডাসট্রিয়াল ইনজিনিয়ারিং পাস করে একটা বিদেশী ফারমে দুর্দান্ত একটা চাকরিও পেয়ে গেছে।

রাজা বলল, বউদি, ধুবদা কলকাতায় ফিরেছে জানো ?

না তো।

ফিরেছে কিন্তু।

তোমার সঙ্গে দেখা হয়েছে ?

ঠিক দেখা হয়নি। তবে আমি খবর পেয়েছি।

তাই নাকি ?

আমার সঙ্গে যদি যাও তবে তোমাকে ধুবদার ডেরায় নিয়ে যেতে পারি।

ডেরাটা কোথায় ?

জায়গাটা খুব ভাল নয়।

ভাল নয় মানে কতটা খারাপ ?

আরে না না, বার-টার নয়। বরং উল্টো, একটা রিলিজিয়াস বাড়িতে ঢুকে পড়েছে।

সে কী ?

ভয় পেও না। সম্যাসী হয়নি, ইটস এ ক্যামোফ্লেজ।

জায়গাটা কোথায় ?

নর্থ ক্যালকাটায়।

আমাকে নিয়ে গিয়ে কী হবে ?

যদি যেতে চাও তো নিয়ে যেতে পারি।

আমি গিয়ে তো কিছু করতে পারব না, বরং স্বশ্রমশাইকে বলো।

ওরে বাবা ! ছোটো মামা শুনলে হেভি ফায়ার হয়ে যাবে। পুলিশ কেসও হয়ে যেতে পারে।

তাহলে আর কী করা ?

আমি বলছিলাম কি, তুমিই চলে। আমার মনে হচ্ছে ধুবদার অবস্থা এখন আবার সাধিলেই খাইব। তুমি গিয়ে বললেই স্টুট করে ফিরে আসবে।

না রাজা, নিজের ইচ্ছেয় যদি ফেরে তো ফিরুক, আমি ঠাঁর বাবাকে না বলে ঠাঁকে ফেরাতে যেতে পারি না।

তুমি ধুবদার ওপর রেগে আছো বউদি, লোকটাকে তোমরা সবাই একটু ভুল বুঝে যাচ্ছে। কিন্তু কিসেরকম

যতটা খারাপ লোকটাকে মনে হয় ততটা খারাপ নয়।

জানলাম।

কাল চলে।

অত তাড়া কিসের

তাড়া আছে বউদি। কেসটা সিরিয়াস।

খুব সিরিয়াস বলে তো মনে হচ্ছে না।

তুমি সবটা জানো না।

তাহলে সবটা বলো।

ঠিক আছে। আমি কাল যাচ্ছি।

পরদিন রাজা এল। তার স্বভাবসুলভ ফিচেল হাসিটা ঠোঁটে নেই। বরং একটু উদ্বেগ মাথা মুখ।

কী হল, তোমাকে গম্ভীর দেখাচ্ছে কেন? রেমি শঙ্কিত হয়ে জিজ্ঞেস করে।

যে খবরটা তোমাকে কাল টেলিফোনে দিয়েছিলাম সেটা ঠিক নয়। ধুবদা ওখানে নেই।

রেমি ধুবকে চেনে, তাই হেসে বলল, তাতেই বা কী? অত অ্যাংজাইটির কিছু ব্যাপার নয়।

কোথাও আছে। এসে যাবে।

রাজা হঠাৎ হাত বাড়িয়ে রেমির একটা হাত চেপে ধরল, না বউদি, তুমি বুঝতে পারছ না, ধুবদাকে রেসকিউ করতে হবে। হি ইজ ইন এ ট্র্যাপ।

ট্র্যাপ! হাতটা ছাড়িয়ে নিল না রেমি। উঠল। বলল, আচ্ছা যাচ্ছি। কিন্তু এটাও কোনো ট্র্যাপ নয় তো! তোমার ধুবদাই হয়তো তোমাকে পাঠিয়েছে?

না বউদি। আপন গড।

॥ ৪১ ॥

বৈশাখ মাসে কোকাবাবুদের একটা মহাল কিনে নিলেন রাজেন মোস্তার। তাঁর বৈষয়িক অবস্থাটা বেশ ভালর দিকে। শতীন এখন বেশ পসার জমিয়ে ফেলেছে। সেজো ছেলে রথীন মৃত্যুঞ্জয় স্কুলের খুবই মেধাবী ছাত্র। মাস্টারমশাইদের ধারণা সে ম্যাট্রিকে স্ট্যাণ্ড করবেই। মেজো ছেলে সতীন বা সত্যিন্দ্র লেখাপড়ায় সুবিধে করতে না পারলেও সে কাটা কাপড়ের একটা কারবার খুলেছে। দোকানটা বেশ চলছে এখন। রাজেনবাবু সুতরাং তাঁর দারিদ্র্যের গ্লানি সম্পূর্ণ কাটিয়ে উঠে এখন বিশিষ্ট একজন নাগরিক হিসেবে প্রতিষ্ঠিত হতে চলেছেন। সুখের বিষয়, তাঁর নিজের পসারও এখন যথেষ্ট। তবু তিনি কানাঘুষো শুনেছেন যে, হেমবাবুর ছোটো মেয়েটি নাকি গরীব বলেই তাঁর পরিবারে বউ হয়ে আসতে স্বীকার হচ্ছে না।

রাজেনবাবু জেদী লোক। বৈষয়িক উন্নতির সঙ্গে সঙ্গে তাঁর আত্মমর্যাদাবোধটিও বেড়েছে। এই জেলার কোন জমিদারের অবস্থা কেমন তা তিনি ভালই জানেন। হেমকান্ত চৌধুরির অবস্থাও তাঁর অজানা নয়। তবু এই পরিবারটির প্রতি তাঁর কৃতজ্ঞতাবোধ খুবই গভীর। এক সময়ে এঁরা তাঁর

দুঃখের দিনে অযাচিত সাহায্য বড় কম করেননি। তাই হেমবাবুর মেয়েটিকে বউ করে আনতে তিনি এক কথাতেই রাজি হয়ে যান। মেয়েটিও সুন্দরী।

কিন্তু তাঁর মেজো মেয়ে সুফলার কাছে তিনি বিশাখার স্বভাবের যে পরিচয় পেয়েছেন তা মোটেই ভাল নয়। তাঁর স্ত্রী স্বর্ণপ্রভাও এই বিয়েতে বৈকে বসেছেন। তবু এখনো যে বিয়েটি ভেঙে যায়নি তার কারণ, রাজেনবাবু নিজে থেকে বিয়েটা ভাঙতে চান না। তাতে হেমবাবুকে অপমান করা হবে। তবে তিনি ছেলের জন্য ভাল পাত্রীর সন্ধানে আছেন। দু-একটা ভাল সম্বন্ধ এসেছেও। তার মধ্যে দুটি জমিদারকন্যা। শ্রীকান্ত রায়ের মেজো মেয়েটিকে তাঁরা একরকম পছন্দ করেই ফেলেছেন। বিশাখার মতো অতটা না হলেও মেয়েটি সুন্দরীই। উপরন্তু শ্রীকান্ত রায় মুখ ফুটে নিজেই বলেছেন, আমার ছেলে জ্যোতিপ্রকাশের সঙ্গে আপনার মেজো মেয়েটিরও বিয়ে হতে পারে।

পাণ্ডি বিয়েতে একটু আপত্তি আছে স্বর্ণপ্রভার। তবে তিনি এখনো পরিষ্কার মতামত জানাননি। যদি আপত্তিকু শেষ অবধি না থাকে তবে আষাঢ়েই জোড়া বিয়ে লেগে যেতে পারে। শ্রীকান্ত রায় একটু কৃপণ মানুষ। তার ওপর নিজে ল পাশ। বিষয়বুদ্ধিও চমৎকার। তাই জমিদারদের মধ্যে তাঁর অবস্থাই সবচেয়ে স্থিতিশীল।

সবদিক বিবেচনা করে দেখেছেন রাজেনবাবু। শ্রীকান্ত রায়ের প্রস্তাবটিই সবচেয়ে গ্রহণযোগ্য মনে হয়েছে। এখন অপেক্ষা শুধু হেমকান্তর দিক থেকে একটি অস্তিবাচক বা নেতিবাচক কথা শোনবার। যদি শেষ পর্যন্ত হেমবাবুর মেয়েটি বিয়েতে রাজিও হয় তবে দেনা-পাওনার প্রশ্ন তুলে প্রস্তাবটি কাটিয়ে দেওয়া যাবে। হেমকান্তর সাধ্য নেই মেয়ের বিয়েতে খুব বেশী নগদ টাকা খরচ করার। শচীনোর কাছ থেকে হেমবাবুর এসটেটের অবস্থা তিনি মোটামুটি জেনে নিয়েছেন।

নতুন কেনা মহালটা দেখতে গিয়েছিলেন রাজেনবাবু। ফিরলেন দুপুরে। ঘেমেচুমে একশেষ। নৌকো থেকে নেমে একটা ছাকরা গাড়িতে বাড়ি ফিরে স্নান করে যখন খেতে বসেছেন তখন স্বর্ণপ্রভা বললেন, হেমবাবু লোক পাঠিয়েছিলেন।

হু তুলে রাজেনবাবু একটু বিরক্তির সঙ্গেই বললেন, কেন ?

বিয়ের ব্যাপারে এগোতে আরো মাস দুই সময় চেয়েছেন।

কে এসেছিল ?

মনু। আমার যেন কেমন-কেমন মনে হচ্ছে।

কেমন-কেমন মানে ?

ওরা শচীনোর মাথাটা খাওয়ার মতলব করছে। ভাল চাও তো শচীনকে বলো, যেন হেমবাবুর এসটেটের কাজ ছেড়ে দেয়।

মাথাটা কী করে চিবিয়ে খাবে ?

মেয়েরা সব পারে।

এই তো শুনি মেয়েটি নাকি এ বিয়েতে রাজি নয়। তারপর আবার মাথা চিবানোর প্রশ্ন উঠছে কী করে ?

কী জানি। শচীনোর জন্য আমরা অন্য পাত্রী দেখছি সেটা বোধহয় ওদের কানে গেছে। তাছাড়া আরো কথা আছে।

আবার কী কথা ?

কোকাবাবুর নাতি শরৎ সেই যে ডাকাতিয়া ছেলেটা, বিশাখা নাকি তাকে বিয়ে করার জন্য পাগল।

রাজেনবাবু এবার গম্ভীর হলেন। গলা খাঁকারি দিয়ে বললেন, তাই নাকি ? এতদূর !

সেই জনাই বলছি ছেলেকে এখন থেকেই একটু সাবধান করে দিও । যদি এ মেয়ের ফাঁদে পড়ে যায় তবে সারা জীবন নানা জ্বালা পোহাতে হবে ।

একটা অতৃপ্ত উদগার তুলে রাজেনবাবু উঠে পড়লেন ।

স্বর্ণপ্রভা পিছন থেকে বললেন, সময় চাইবেই বা কেন ! খিঙ্গি মেয়েকে ঘরে বসিয়ে রেখে নষ্ট করছে, তার জন্য আমরা কেন সময় দেবো ? তুমি সোজা গিয়ে না করে দিয়ে এসো ।

রাজেনবাবু মাথা নেড়ে বলেন, কাজটা ওভাবে করতে চাই না । হেমবাবু লোক খারাপ নন ।

লোক ভালই বা কিসের ? কানায়ুষো তো কিছু কম শুনিনি । মনু আজও বিয়ে বসেনি । লোকের কথা কি আর সব মিথ্যে হয় ! এ বিয়ে ভেঙে দেওয়াই তো উচিত । আমি বলি দু-চারটে স্পষ্ট কথা মুখের ওপর বলে ভেঙে দেওয়াই ভাল । আমরা পাত্রপক্ষ, অত যো-হুজুর হয়ে থাকব কেন ?

রাজেনবাবু টের পান, স্বর্ণপ্রভা ঠিক আগের মতো নেই । এক সময়ে সংসার চালানোর জন্য কিশোরী বয়স থেকে এই স্বর্ণপ্রভা কাঁথা সেলাই ইত্যাদি কত কী করেছেন । হেমবাবুর স্ত্রীর আঁতুর ঘরে কাজ পর্যন্ত করেছেন । তার বদলে ধারকর্জ সাহায্য অনেক কিছু পাওয়া গেছে । সুনয়নীর সঙ্গে স্বর্ণপ্রভার একটা সখিত্বও গড়ে উঠেছিল । তবে সেটা সমানে সমানে নয় । বড়লোকের যেমন পারিষদ থাকে স্বর্ণপ্রভাও তাই ছিলেন সুনয়নীর । প্রায়ই এসে বলতেন, বাবা গো, একগলা মিথ্যে কথা বলে এলাম কস্তুর মন রাখতে ।

সে সব দুঃখের দিন গিয়ে আজ স্বর্ণপ্রভার জীবনে এক স্বর্ণযুগ এসেছে । স্বামী আর ছেলেরা দু হাতে রোজগার করছে । তিনি নিজে গোপনে বন্ধকী কারবার করছেন । তাঁর মনোভাব বুঝতে রাজেনবাবুর দেৱী হয় না ।

কিন্তু রাজেনবাবু এখনো সুনয়নীর মানসিকতা অর্জন করতে পারেননি অবস্থার পরিবর্তনে মানুষের মনের পরিবর্তন হওয়াটা স্বাভাবিক । কিন্তু তার মধ্যে একটা বিকৃতিও আছে । অতীতকে বিস্মৃত হওয়া বা ভবিষ্যতের চিন্তা না করাটাই মানুষের স্বভাব । তার চিন্তা শুধু বর্তমান নিয়ে । কিন্তু রাজেনবাবু সব সময়েই এরকম অবিমূঢ়াকারিতা থেকে নিজেকে সরিয়ে রাখতে চান । অকৃতজ্ঞতা তাঁর স্বভাবে নেই । তিনি জেদী, আত্মমর্যাদাসম্পন্ন মানুষ বলেই আজ ছুটকো বড়লোকের মতো ভাবভঙ্গি করতে লজ্জা পান ।

স্বর্ণপ্রভার প্রস্তাবে রাজেনবাবু সায় দিলেন না । গস্তীর মুখ করে বললেন, যা স্থির করার আমিই করব । তোমার আর এ নিয়ে মাথা ঘামানোর দরকার নেই । সম্বন্ধটা ভেঙে যাচ্ছেই । কিন্তু সেটা আমাদের তরফ থেকে হওয়া উচিত নয় । কেন নয় সেটা তুমি বুঝবে না ।

ছেলেকে তো কিছু বলবে সে ও-বাড়িতে যায়-আসে এটা আমার পছন্দ নয় । আবার একটা কানাকানি শুরু হবে ।

আচ্ছা, সেটা ভেবে দেখছি ।

রাজেনবাবু তাঁর ঘরে এসে ইজিচেয়ারে বসে নিঃশব্দে তামাক খেতে লাগলেন । বাইরে গ্রীষ্মের খাঁ খাঁ দুপুরে একটা ঘুমু ডাকছিল । চালের টিনে পাতা খসার শব্দ । পায়রার গাঢ় বকবকম স্বর এক-আধবার শোনা গেল । রাজেনবাবু নিজের বর্তমান বৈষয়িক সম্পন্নতাটা খুব টের পান । কিন্তু ভাবেন, আমার মনে কোনো হীনতা জন্ম নিচ্ছে না ! কোনো দেমাকী ভাব ! আমি মানুষকে যথাযথ মূল্য দিতে পারছি তো ! যথেষ্ট বিনয়ী আছি কি এখনো ?

ভাবতে ভাবতে তিনি চোখ বুজলেন । একটু তন্দ্রা এল ।

কুঞ্জবনে আজ ধানীরঙের রোদ এক সুন্দর আবহ রচনা করেছে । ভারী নির্জন । ভারী

নিরিবিলা । রোদের আলপনা আর আঁকিঁঝুকি ছড়িয়ে আছে সবুজ ঘাসে । গ্রীষ্মের প্রখরতায় বিবর্ণ গাছপালা কালবৈশাখীর ঝাপটায় আবার সতেজ ।

কাছারি ঘরের আড়াল থেকে লতানে গাছে আচ্ছন্ন একটি ঝুঁড়িপথ বেয়ে কুঞ্জবনে ঢুকল চপলা । তার হাতে ধরা বিশাখার লাজুক হাত ।

বিশাখা একটা ঝাপটা দিয়ে বলল, আঃ, ছাড়ো না ।

না, তুই পালাবি ।

পালাবো কেন ? বাঘ না ভালুক

তার চেয়েও সাজ্জাতিক । বিয়ে হলে বুঝবি বরের চেয়ে সাজ্জাতিক জন্তু আর নেই । হলে তো !

হওয়াচ্ছি, পালাবি কোথায় !

ছাড়ো বউদি, পায়ে পড়ি ।

তেমন গরজ তো দেখছি না ছাড়া পাওয়ার । আয় বলছি ।

তোমার মাথায় কেন্দ্রো আছে বউদি । আজ সন্ধেবেলায় তো জলসা হচ্ছেই ।

জলসায় কী কথা হয় রে বোকা কথার জন্য জলসা নয় ।

দেখা করে লাভ কি

যদি এল ও ভি ই হয়ে যায় ?

যাঃ ।

দুজনে কুঞ্জবনে এসে চারদিকটা তাকিয়ে দেখল । চপলা একটা বেগুনী রঙের ছোটো ফুল ছিড়ে খোঁপায় গুঁজে ঘোমটাটা আবার তুলে দিয়ে বলল, এ জায়গাটা যে এত সুন্দর জানা ছিল না ! কেন সুন্দর বল তো !

এটা তো বাজে জায়গা । সুন্দর আবার কী ? জঙ্গল, আগাছা, বিছুটিবন ।

তোর চোখ নেই ।

তা হয়তো নেই ।

ঠিকই নেই তোর জন্য আমার ভাবনা হয় । এ জায়গাটা সুন্দর কেন জানিস ! সাজানো নয় বলে ।

তুমি কলকাতায় থাকো বলে গাছপালা দেখলেই ভাল লাগে ! আমাদের তো তা নয় । গাছপালা দেখতে দেখতে চোখ পচে গেছে ।

তোর চোখ পচে গেছে, মন পচে গেছে, হৃদয় বলে কিছু নেই ।

বেশ তো বেশ । পচে গেছে তো গেছে ।

আয় এখানে বসি ।

ওমা ! ওই ভাঙা গাড়ির পাদনীতে !

তাতে কী ! বেশ পরিষ্কার তো !

বিশাখা একটু হাসল । ভারী সুন্দর দেখাল তাকে । আজ তাকে একটু সাজিয়েছে চপলা । চমৎকার একটা বুটদার নীল বেনারসী তার পরনে । বাজুতে অনন্ত, কজিতে বালা আর চুড়ি, গলায় মোটা একটা মটরদানা হার । চুল ফাঁপিয়ে আঁচড়ানো । কিন্তু সাজগোজ বড় কথা নয় । বিশাখা সাজগোজকে উপেক্ষা করেই তার স্বাভাবিক সৌন্দর্য বিকিরণ করছে ।

দুজনে ভাঙা গাড়ির পাদনীতে বসে নিচুস্বরে কথা বলতে লাগল ।

চপলা জিজ্ঞেস করল, ভয় করছে না তো রে ?

বিশাখা মাথা নেড়ে বলল, না । তবে তোমার এতটা করার দরকার ছিল না । বাবা শুনলে

তোমার ওপর চটে যাবে।

সে আমি বুঝব। তোর কেমন লাগছে বল!

কিছুই লাগছে না।

বুক কাঁপছে না

না তো

ঠোঁট শুকিয়ে যাচ্ছে না?

একটুও না, এই দেখ না ঠোঁট।

উঃ, তুই পাষণী বটে। তোর কিছু হচ্ছে না, কিন্তু আমারই তো বুক কাঁপছে।

দেখো আবার, তুমিই শচীনকে প্রেমে মজে যেও না।

দূর মুখপুড়ী, বলে একটা চিমটি কাটে চপলা।

উঃ! ভীষণ লেগেছে কিন্তু।

তোর কিছু হচ্ছে না কেন?

হবেই বা কেন

পুরুষমানুষকে লজ্জা হয় না তোর

তা হয়। কিন্তু পুরুষমানুষকেই হয়। শচীনকে নয়।

তার মানে কি শচীন পুরুষ নয়?

তা বলিনি।

তাই বলেছিস। কেন রে, সে কি মেয়েমানুষের মতো?

বিশাখা মাথা নীচু করে একটা ভাবল। তারপর বলল, বড্ড হিসেবী, নরমসরম।

সেটা কি খারাপ?

পুরুষের স্বভাব হবে দামাল।

তুই কাউকে দেখেছিস ওরকম? সত্যি কথা বল তো, কাউকে পছন্দ?

না, তা নয়।

আমার মনে হয়, তুই একটা গুগোল পাকিয়ে রেখেছিস মনে মনে। ভয়ে বা লজ্জায় বলছিস না।

বিশাখা তার জেদী মুখ নত করে রইলো।

চপলা নীচু হয়ে উঁকি মেরে মুখটা দেখার চেষ্টা করে বলল, লুকোচ্ছিস না তো!

বিশাখা মাথা নেড়ে বলল, না।

ঠিক সেই সময় গরম দু ফোঁটা জল পড়ল বিশাখার হাঁটুতে রাখা চপলার হাতে। চপলা চমকে উঠে বলল, কাঁদছিস? ওমা! কেন রে!

বিশাখা জবাব দিল না। গোঁজ হয়ে রইল।

চপলা বিশাখার কাঁধে হাত রেখে একটু কাছে টেনে নিয়ে বলল, চোখ মুছে নে। শচীন দেখলে কী ভাবে?

আমি চলে যাই বউদি? বড় কাতর শোনাল বিশাখার গলার স্বর।

চলে যাবি? আমি শচীনকে তাহলে কী বলব?

যা হয় একটা কিছু বলো।

তা হয় না। বোস তুই তো বললি বাঘ ভালুক নয়, তবে যাবি কেন?

সব কথা বোঝানো যায় না। আমি অত কথা জানি না।

আচমকই শচীনকে দেখতে পেল চপলা। মন্দিরের দিকটায় একটা ভাঙা বাড়ির স্তূপ আর আগাছার হাঁটুভর জঙ্গল পার হয়ে আসছে। পরনে কাঁচি ধুতি, গরদের পাঞ্জাবি। ভারী সুন্দর



দেখাচ্ছে ।

আসুন । বলে চপলা উঠে দাঁড়ায় ।

শচীন এক বলক বিশাখার দিকে চেয়ে চোখ ফিরিয়ে নিয়ে থমথমে মুখে বলে, আপনি খুবই দুঃসাহসী ।

চপলা মৃদু স্বরে বলে, আপনিও কম নন ।

শচীন মাথা নেড়ে বলে, এ জায়গায় ডেকে আপনি ঠিক কাজ করেননি । ঘটনাটা জানাজানি হয়ে যাবে ।

হোক না ।

না বউঠান, এটা কলকাতা নয় । জানাজানি হলে সকলেরই অসুবিধে, বিশেষ করে বিশাখার ।

নিজের নাম শচীনের মুখে শুনে বিশাখা একবার চোখ তুলেই নামিয়ে নিল ।

চপলা মুখ টিপে একটু হেসে বলল, কিন্তু আপনি তো এসেছেন । না এসে তো পারেননি ।

এলাম । বলে শচীন একটু উদাসভাবে ওপরের দিকে চেয়ে থাকে । তারপর হতাশার ভঙ্গিতে মাথাটা একটু নেড়ে বলে, কয়েকটা কথা বলতে আসা ।

কী কথা ?

এ বিয়ে যে হবে না সেটা আপনি ধরে নিতে পারেন ।

হবে না ?

না । কিছুতেই না ।

আপনার বাড়ির কোনো অমত আছে ?

অমত ছিল না । কিন্তু বিশাখার মনোভাব জানাজানি হওয়ার পর অমত হয়েছে ।

চপলা হঠাৎ ভারী বিষম হয়ে গেল । বলল, ইস ? আমাদের দুর্ভাগ্য ।

না । দুর্ভাগ্য কেন বিশাখা তো এই বিয়ে চায়নি ।

ও কী চায় তা ও নিজেই জানে না । বলে চপলা বিশাখার দিকে তাকাল ।

বিশাখা অনড় এক পুতুলের মতো যেমন বসে ছিল তেমনি বসে রইল ।

শচীন বলল, সেটা আপনি আর বিশাখা বুঝবেন ।

শুনুন শচীনবাবু, আপনি নিজে যদি বিশাখার সঙ্গে একটু কথা বলেন, তাহলে বোধহয় ওর একটা ভুল ধারণা কেটে যাবে ।

শচীন একটু হাসল । তারপর ধীর স্বরে বলল, ওকে তো আমি এইটুকু বেলা থেকে দেখছি ।

কথাও বলেছি অনেক । নতুন করে কী আর বলার আছে বলুন । ও বড় হওয়ার পর

তো বলেননি !

বলার দরকারও দেখছি না ।

চপলা হঠাৎ একটু ঝাঁঝের সঙ্গে বলল, আপনার কিন্তু বেশ অহংকার ।

শচীন বিষম মুখে মাথা নেড়ে বলল, তা নয় । অহংকার থাকলে একটি মেয়ে প্রত্যাখ্যান করেছে জেনেও আজ এখানে আসতাম না । অহংকার নয় বউঠান । বরং আত্মপ্লানি ।

ওর বয়স কম । একটু তো বিবেচনা করবেন ।

আপনারা ধরে বেঁধে ওপর ওপর অযথা একটা অত্যাচার করে যাচ্ছেন বউঠান । হেমবাবু করেছেন, মনুদি করেছেন, এখন আপনিও করছেন । আমি বলি কি, বেচারাকে ছেড়ে দিন । বেচারী এত লোকের মতামতের চাপে পড়ে দিশাহারা হয়ে যাচ্ছে ।

চপলার মুখে কথা জোগাল না । সে একটা দীর্ঘশ্বাস ফেলল । তারপর বলল, চলুন, তাহলে ঘরে গিয়ে বসি ।

চলুন। ঘর বরং ভাল। অনেক সেফ। এই সব বাগান-টাগানে দেখা সাক্ষাৎ করা ঠিক নয়।  
বিশাখা উঠল না। বসে রইল।

চপলা বলল, আয়।

তোমরা যাও। আমি একটু পরে আসছি।

ওমা? জলসা আছে যে একটু পরেই।

যাও না। বিশাখা বিরক্তির গলায় বলে, আমি ঠিক আসব।

চপলা আর শচীন পাশাপাশি হেঁটে ভিতর বাড়ির দিকে চলে গেল। বিশাখা বিষাক্ত দৃষ্টিতে চেয়ে  
রইল তাদের গমনপথের দিকে।

বিশাখার শ্বাস ক্রমশ প্রলয়ংকর এবং উষ্ণ হয়ে উঠল। ভিতরে এক তীব্র জ্বালা। সে টের পায়।  
সে অনেক কিছু টের পায়।

দাঁতে দাঁত পিষে বিশাখা বলল, তলে তলে মকরধ্বজ! দাঁড়াও, দেখাচ্ছি মজা।

॥ ৪২ ॥

রেমি যে মারা যাচ্ছে সে বিষয়ে বোধহয় কোনো সন্দেহই নেই। ধুবর সমস্ত শরীরটা ভয়ে ঠাণ্ডা  
মেরে আসছিল।

একটু দূরে একা এবং আলাদা হয়ে জয়ন্ত নারসিং হোমের দেয়ালে ঠেস দিয়ে দাঁড়িয়ে ছিল।  
ছেলেটার প্রতি একসময়ে যে রাগ আর বিদ্বেষ ছিল ধুবর এখন তা নেই। এখন সে কারো ওপরেই  
তেমন রাগ করতে পারে না। দিন দিন সে কি অবোধ হয়ে যাচ্ছে? ক্যালাস? হারিয়ে যাচ্ছে  
আত্মমর্যাদাজ্ঞান?

নিজের সম্পর্কে কোনো স্থির সিদ্ধান্তে আসা সম্ভব হচ্ছিল না তার পক্ষে। শোক নয়, বিরহ নয়,  
রেমির আসন্ন মৃত্যুর কথা ভেবে তার বড় ভয় করছে। রেমি বেঁচে থাকলে কি ভাল? সে ঠিক  
করতে পারছে না।

সে গিয়ে জয়ন্তর পাশে দাঁড়ায়। জয়ন্ত সিগারেট খাচ্ছে, প্রকাশ্যেই। ধুব যতদূর জানে, জয়ন্ত  
সিগারেট খায় না। এখন খাচ্ছে সম্ভবত ভিতরকার উদ্বেগ উৎকর্ষাকে সামাল দেওয়ার জন্যই।  
একবার ধুবর দিকে একটু তাকিয়ে চোখ সরিয়ে নিল। ঘৃণায়? ভয়ে? কে জানে! কিন্তু ওই  
তাকানোটা বুলেটের মতো বিধল ধুবর শরীরে।

ধুব খুব বোকার মতো প্রশ্ন করল, রেমির কোনো খবর আছে।

খুব খারাপ।

কতটা খারাপ?

যতটা খারাপ হওয়া যায়।

একেবারেই হোপলেস?

ডাক্তাররা সেরকম বলে না। কিন্তু আমি জানি।

ধুব তার লম্বা চুলে একবার হাত বুলিয়ে নিয়ে বলল, অপারেশন তো এখনো হয়নি। হলে যদি  
বেঁচে যায়!

দিদির বেঁচে থাকা কি আপনি চান?

ধুব একথায় রাগ করল না। মাথাটা বড্ড গোলমেলে। বলল, বাঃ, চাইব না, কী বলছ!  
দিদি চায় না।

কি চায় না?

দিদি বেঁচে থাকতে চায় না।

বাজে কথা । বেঁচে থাকতে চাইবে না কেন

আমি জানি । আপনিও চান না ।

ধুব এবার একটু গরম হল । বলল, জয়, এটা ঠিক তর্ক করার সময় নয়

জয়ন্ত বিষাদ-মলিন একটু হেসে বলে, আপনার মুখ থেকে এখনো ভকভক করে মদের গন্ধ বেরোচ্ছে । আপনি খুব দৃষ্টিস্তা করছেন বলে মনে হচ্ছে না ।

ধুব তেমন স্মার্টনেস বোধ করছে না । একথায় মিইয়ে গিয়ে বলল, বিকেলে একটু খেয়েছিলাম । জাস্ট টু সেলিব্রেট । তখন রেমির অবস্থা খারাপ ছিল না ।

জয়ন্ত ঠাণ্ডা অথচ বিষাক্ত একরকম গলায় বলল, আপনি কি এ খবর রাখেন যে, দিদির লেবার পেন উঠেছিল তিন দিন আগে ? মেমব্রেন ধারস্ট করায় সমস্ত ফ্লুইড বেরিয়ে যায় তিনদিন আগেই । ট্র্যাক শুকিয়ে যাওয়ায় ডাক্তার ফরসেপ দিয়ে টেনে বাচ্চাটাকে বের করেছে । দিদির শরীরে কীরকম ইনজুরি হয়েছে আমরা জানি না । কিন্তু এটুকু জানি, বাচ্চাটাকে জন্ম দেওয়ার পর থেকেই দিদি বেঁচে থাকার লড়াইটা আর লড়াই না । ডেলিভারির পর দিদি ডাক্তারকে বলেছিল, আমার যা হয়হোক, বাচ্চাটাকে আপনারা বাঁচিয়ে রাখবেন । বাচ্চাটার বেঁচে থাকা ভীষণ দরকার ।

না, আমি অত সব জানি না ।

সেইরকম বিষাক্ত হেসেই জয়ন্ত বলে, তা জানার কথাও আপনার নয় । আপনি কোনোদিনই দিদির জন্য পরোয়া করেননি । আমরা শুনেছি, কিছুকাল আগে আপনি দিদির একটা অ্যাবোরশনও করিয়েছিলেন, যেটার কোনো দরকার ছিল না । এইসব করে আপনি দিদির শরীর নষ্ট করেছেন, মন ভেঙে দিয়েছেন । অথচ সে খবরটা আপনার জানা ছিল না ।

বিরক্ত ধুব বলল, এসব কথা বলার অনেক সময় পাবে জয় । আমি তো পালিয়ে যাচ্ছি না । কিন্তু এখন—

এখনটা তো তখনকারই পরিণতি । আমার দিদি বিয়ের পরই মরে গিয়েছিল কিংবা তখন থেকেই তার মৃত্যু শুরু হয়েছিল । আজ শুধু শী উইল বি টারমিনেটেড । তার বেশী কিছু নয় । ভাবছেন কেন ? খুব বেশী উতলা বোধ করলে আরো কয়েক পেগ চাপিয়ে নেবেন । খুব নরমাল হয়ে যাবেন তাহলে ।

ধুব টের পাচ্ছে তার ভিতরে একটা আগুন নিবে গেছে । কিছুতেই সে উত্তপ্ত হতে পারছে না । হাজির জবাবের জন্য তার যথেষ্ট খ্যাতি ছিল, সে ঠোটকাটাও বটে কিন্তু কিছুতেই মুখে কথা আসছে না । কিন্তু কী নিবে গেল ? কিসের আগুন ? এমন সৈতিয়ে আছে কেন ভিতরটা ?

একথা ঠিক যে, সে দায়িত্বশীল স্বামী নয়, বাপের সুযোগ্য পুত্র নয়, তার স্বশ্রবাবাড়ির লোকেরা তাকে জামাই হিসেবে পেয়ে খুব গৌরবান্বিত বোধ করে না । এ সবই ঠিক কথা । কিন্তু ধুবও তো দুনিয়ার মানুষকে একটা কিছু বোঝাতে চাইছে । তারও তো একটা বার্তা আছে দুনিয়াভর গাড়লদের প্রতি । গিদধড়রা সেটা বুঝতে চাইছে না কেন ?

ধুব হঠাৎ টান টান সোজা হয়ে ভিতরকার নিবস্ত আগুনে কিছু রাগের বাতাস লাগিয়ে জয়ন্তকে জিজ্ঞেস করল, তোমরা আমার কাছে কী একসপেকট করেছিলে ?

সেটা জেনে আপনার কী হবে ? আপনার ভিতর সেটা নেই ।

আমার মধ্যে অনেক কিছুই নেই । কিন্তু তোমরা কোনটা চেয়েছিলে সেটা একটু জেনে রাখি ।

যেটা নেই সেটার কথা বলে লাভ কী ? যেটা আছে সেটার কথা বরং বলুন ।

সেটা কী ?

আপনারা এত অহংকারী কেন ?

আমি অহংকারী ? কে বলল ?

বলার দরকার হয় না । আপনাদের চালচলনে সেটা অত্যন্ত প্রকট ।

বাজে কথা ।

আপনার বাবা একটু আগে বলেছেন, নিজেদের লোক ছাড়া আর কারো রক্ত দিদিকে দেওয়া চলবে না কেন আমি জিজ্ঞেস করিনি । উনি মনে করেন তাতে ঠন্দের বংশের রক্তের বিশুদ্ধতা নষ্ট হবে

ধুব একটু ফাঁকা আওয়াজ করে হাসল, ওঃ, বাবার কথা ছেড়ে দাও ।

আপনার পক্ষে কথাটা বলা সোজা, কিন্তু আমার পক্ষে ব্যাপারটা হজম করা শক্ত । আমি দিদির ভাই হয়েও তাকে রক্ত দিতে পারব না জাস্ট একটা প্রিমিটিভ ক্ল্যানিশ হলিগানের সেটা পছন্দ নয় বলে । এটা অহংকার নয় ?

ধুব চোখ গোল করে সপ্রশংস চোখে জয়ন্তর দিকে চেয়ে বলল, বাঃ, দিবি বলেছো তো ! এ কথাগুলো এতকাল আমার মাথায় আসেনি কেন সেটাই ভাবছি । কী কী বললে যেন ! প্রিমিটিভ, ক্ল্যানিশ হলিগান ? না বাঃ

কথাগুলো আমি আপনাদের পুরো পরিবারের সামনেই বলতে পারি, এমন কি আপনার বাবার মুখের ওপরেও ।

আমি জানি, ইউ আর এ কারেজিয়াস বয় । বুদ্ধিমানও ।

আমি কিন্তু ইয়ার্কি করছি না ।

আমিও করছি না । কিন্তু একটু একটু ঝগড়া হয়ে যাচ্ছে ।

হলে হচ্ছে ।

কিন্তু ভাল হচ্ছে না জয় । তোমার দিদির এই অবস্থায় আমরা ঝগড়া করতে পারি কি ? দিদির এই অবস্থা বলেই আমি চূপ করে থাকতে পারছি না ।

এস্কুনি একটা শো-ডাউন চাও

যদি বলি চাই ?

তাহলে তোমার কাজটা সহজ করে দিতে পারি ।

কী ভাবে ?

তোমার কাছে কোনো অস্ত্রশস্ত্র আছে ? পেনসিলকাটা ছুরি হলেও চলবে ।

নেই ।

ঠিক আছে । ওই যে সামনে একটা মস্ত অ্যাপার্টমেন্ট হাউস তৈরি হচ্ছে, দেখতে পাচ্ছো ? পাচ্ছি । তাতে কি ?

চলো দুজনে ওখানে যাই ।

তারপর ?

ওখানে আমি তোমার দিকে পিছন ফিরে দাঁড়িয়ে থাকব আর তুমি একটা পাথর বা আস্ত ইঁট যা পাবে ঝুঁজে নিয়ে আমার মাথায় মারো । কোনো সাস্কী থাকবে না ।

হঠাৎ আপনি এত উদার হয়ে গেলেন যে !

আমি আজকাল শুধু একটা কথাই ভাবি, যুদ্ধ নয়, শান্তি ।

মাতাল অবস্থায় না হলে প্রস্তাবটা ভেবে দেখতাম । কিন্তু আপনি তো নরমাল নন ।

সুতরাং আবার ঝগড়া ?

ঝগড়া করতে চাইছি না । আপনি আপনার পরিবারের কাছে যান । আমাকে একটু একা থাকতে দিন ।

আমিও একা । ওরা আমার তেমন কেউ নয় ।

পেটরোল পামপের দিক থেকে একজন অতি সুপুরুষ যুবা এগিয়ে এল । তাকে কলকাতার

অর্ধেক লোক চেনে। রাজা ব্যানারজি। দুর্দান্ত রবীন্দ্রসংগীত গায়ক। তাছাড়া কয়েকটা ফিল্মেও নেমেছে।

কখন এলে ধুবদা

এই তো। কি খবর রে

রাজার মুখে গভীর বিষাদ ও শোক থমকে আছে। ছাইরঙা প্যান্ট, দুধসাদা হাওয়াই শাট ছাড়া গায়ে কিছু নেই। এই পোশাক এবং শোকের ছাপ সত্ত্বেও তাকে অসম্ভব সুন্দর দেখাচ্ছিল। খুব স্বাভাবিক কারণেই তাকে জড়িয়ে রেমির নামে একটা রটনা শুরু হয়েছিল। তা বলে রাজার ওপর কোনো রাগ বা অভিমান নেই ধুবর। জীবনের খেলায় নিয়মকানুন অন্যরকম। কত ফাউল, কত সেমসাইড হয়, রেফারি চোখ বুজে থাকে।

রাজা তাদের কাছাকাছি এসে চুপটি করে দাঁড়িয়ে রইল, যেন কী করবে তা ভেবে স্থির করতে পারছিল না। ধুবর প্রশ্নের কোনো জবাব দিল না।

রাজার দিকে সাপের চোখের মতো একজোড়া কুটিল ও হিংস্র চোখ চেয়ে ছিল। সে চোখ জয়ন্তর। কিন্তু রাজা ওকে লক্ষ্য করল না।

অনেকক্ষণ বাদে রাজা হঠাৎ জিজ্ঞেস করল, কী হবে? আঁ!

কাকে জিজ্ঞেস করল তা ঠিক বোঝা গেল না। বোধহয় কাউকেই নয়। তার বৃকের ভিতর থেকে প্রশ্নটা শ্বাসবায়ুর সঙ্গে বেরিয়ে এসে বিপুল পৃথিবীর আরো নানা শব্দের সঙ্গে মিশে গেল।

লবিতে তখন প্রাক্তন মন্ত্রীকে ঘিরে অনেক লোক। কৃষ্ণকান্ত একটা বড়ি খেয়েছেন। বৃকে একটা ব্যথা হচ্ছেই।

কে যেন আবার একবার মোলায়েম গলায় বলল, আপনি চলে যান না। গিয়ে বিশ্রাম নিন। আমরা তো রয়েছি।

কৃষ্ণকান্ত গর্জে উঠলেন না। তবে সেই অবিমুখ্যকারীর দিকে চেয়ে বললেন, তুমি কি জানো যে, আমি দ্বিতীয়বার মাতৃহারা হতে চলেছি? এ সময়ে কোনো ছেলে বাড়ি ফিরে গিয়ে বিশ্রাম নিতে পারে? বিশ্রাম জিনিসটা কি শুধু শরীরের ব্যাপার? মন যেখানে চঞ্চল অস্থির সেখানে শরীরের কি কোনো বিশ্রাম আছে?

অবিমুখ্যকারীটি গা-ঢাকা দিল।

প্রতি দশ পনেরো মিনিট অন্তর ও টি থেকে কেউ না কেউ এসে খবর দিয়ে যাচ্ছে।

খুব আশাপ্রদ খবর নয়। রক্তচাপ ক্ষীণ, শ্রাব সাংঘাতিক, চেতনা প্রায় নেই। তবে আশা তো ছাড়া যায় না।

সাত আটজন ইতিমধ্যেই রক্ত দিতে তৈরি হয়েছে। কৃষ্ণকান্ত বলেছেন তিনিও দেবেন। ডাক্তার বলেছে অত রক্তের দরকার নেই। গ্রুপ মিলিয়ে তিনজনের কাছ থেকে রক্ত নিয়ে যাওয়া হয়েছে। আপাতত যথেষ্ট।

ও টি-র দরজা কিছুক্ষণের জন্য আঁট করে বন্ধ করা হবে। সারজেন তৈরি, অজ্ঞান করার বিশেষজ্ঞ তৈরি, নার্সরা তৈরি।

কৃষ্ণকান্ত হাহাকারের মতো একটা দীর্ঘশ্বাস ছেড়ে বললেন, ওই হনুমানটা আসেনি? সেটা কই? জগা বলল, এসেছে। বাইরে আছে।

এখানে ডেকে আন। আমি ওকে কয়েকটা কথা জিজ্ঞেস করব।

জগা একটু দ্বিধা করল। কতাবাবুর কথার অমান্য চলে না। তবু সে একটু অপেক্ষা করে কৃষ্ণকান্তের কানের কাছে মুখ নামিয়ে ফিসফিস করে কিছু বলল।

কৃষ্ণকান্ত বিবশ হয়ে শুধু সামনের দিকে চেয়ে রইলেন।

না, এরা কেউ চায় না তো তাকে।

চাইলে সে এই পৃথিবীতে থেকে যেতে পারত আরো বহুদিন । ওই যে রক্তমাংসের ছোট্ট একটা পুঁটুলি পড়ল তার শেট থেকে পড়েই প্রাণ পেয়ে জানান দিল, পৃথিবীতে এসেছে এক দামাল শিশু, ওকে বড় করত রেমি । বুকের ওম দিয়ে, চুমু দিয়ে, চোখের দৃষ্টিতে বার বার লেহন করে, দশ হাতে ঘিরে ধরে বড় করে তুলত আস্তে আস্তে । নিজের সবটুকু আয়ু কি শেষ হয়ে গেল ওকে পৃথিবীতে আনতে ?

না তা নয় । তার বাচ্চাটাকে যেন অপয়া না ভাবে কেউ । বড় নিষ্পাপ, কুসুমকোমল ও জানেনা তো পৃথিবীর পাপ-পুণ্য ভালমন্দের কথা । ও ওর মাকে মারেনি । যারা মেরেছে তারা মুখোশ ঐটে চিরকাল বহাল থাকবে পৃথিবীতে ।

না, কেউ চায়নি রেমি বেঁচে থাক । রেমির এই মুহূর্তে চাঁচিয়ে সবাইকে বলতে ইচ্ছে করছে, ওগো তোমরা শোনো । ডাক্তার বন্দি নয়, ওষুধ নয়, অপারেশন নয়, রক্ত নয়, শুধু কেউ একটু চাইলেই আমি বেঁচে থাকতে পারতাম । শুধু মনপ্রাণ দিয়ে, ভালবাসা দিয়ে যদি কেউ চাইত, রেমি বেঁচে থাক ।

না, ভুল হচ্ছে রেমির । একথা তো ঠিক নয় যে, কেউই তার বেঁচে থাকা চায়নি । চেয়েছিল কেউ কেউ । তবে তাদের চাওয়ার ভাব ছিল অন্য রকম । রেমি চেয়েছিল একজন, মাত্র একজন তাকে চাক ।

হায়, সে না চাইলে রেমি বেঁচে থাকে কী করে ?

রেমির চোখ থেকে মাঝে মাঝে আলো মুছে যাচ্ছে । আবার অন্ধকার কেটে ফুটে উঠছে থোপা থোপা আলো । মৃত্যু কী রকম গো ? খুব অন্ধকার ! না কি আলোয় আলো

রাজা এসেছিল না এক দুপুরে ! ধুবর কী সব খবর নিয়ে !

তারপর তারা বেরোলো ধুবকে খুঁজতে ।

ধুবর জন্য কোনো দুশ্চিন্তা বোধ করছিল না রেমি । তবু রাজার সঙ্গে যে বেরোলো তার কারণ বেশ কয়েকদিন সে ঘর থেকে আদপেই বেরায়নি নি ।

কৃষ্ণকান্ত দিল্লি থেকে জরুরি ডাক পেয়ে চলে গেছেন । কাজেই কাউকে কিছু না জানালেও চলে । তবু লতুর জন্য একটা চিরকুট রেখে গেল । লতু কোথায় গেছে, কখন ফিরবে তার কোনো ঠিক নেই । মেয়েটা বাড়িতে খুব কম সময়ই থাকে । যদি ফেরে এর মধ্যে তবে চিরকুট পাবে । বাড়ি আগলানোর কোনো লোক রইল না । তার অবশ্য দরকারও নেই । বনমালী আছে, জগার ছেলে আছে, তারা বুক দিয়ে আগলে রাখবে বাড়ি । এরা মাইনে করা কাজের লোক বটে কিন্তু আত্মীয়ের বেশী । দেখে মনে হয়, কৃষ্ণকান্ত কিছু লোককে স্থায়ীভাবে সম্মোহিত করে রেখেছেন । কৃষ্ণকান্ত এই কাজটা খুব ভালই পাবেন । তাঁর সম্মোহন যে কত সাজঘাতিক তা কি রেমিও হাড়ে হাড়ে টের পায় না ! আর এই সম্মোহনের জাল কেটে বেরিয়ে যাওয়ারই কি প্রাণপাত চেষ্টা করছে না দুর্বল ধুব ?

রাজা হনহন করে ট্রামরাস্তার দিকে হাঁটছে দেখে রেমি বলল, কোথায় এলোপাখারি হাঁটছ ? ট্যাকসি ধরো না ! ওই তো ট্যাকসি ।

আরে দূর । বড়লোকি ব্যাপারে আমি নেই ।

বেশ তো ছেলে তুমি ! বড়লোকি ব্যাপার আবার কী ! আমি বাপু ঢাকের ঢাকের করে ট্রামে বাসে যেতে পারব না ।

বউদি, খুব কিন্তু রেলা হয়েছে তোমার !

ওমা ! সে আবার কী !

ক'দিন আগেও মিডলক্লাস ছিলে । বিয়ের পর আপার ক্লাস মেনটালিটি এসে গেছে । অত ট্যাকসি ট্যাকসি কর কেন ? কলকাতার বাস-ট্রামে মানুষই যায়, গরু ভেড়া নয় । চলো ।

আহা, এখন অত ঝামেলা ভাল লাগে । তোমার দাদার খবর এনেছো, এসময়ে টাইম ওয়েস্ট

করতে আছে ?

কে বলল খবর এনেছি ?

তুমিই তো বললে !

পাকা খবর নয় । উড়ো খবর ।

তাই না হয় হল । ট্যাকসি ধরো তো, ভাড়া আমি দেবো ।

রাজা মাথা নেড়ে বলল, মেয়েরা ভাড়া দেয় নাকি ? আমি রোজগার কিছু কম করি ভেবেছো ? ভাড়া দেওয়ার ভয়ে বুঝি ট্যাকসি করছি না ! তুমি একটা যাচ্ছেতাই ।

আচ্ছা বাবা, ভাড়া তুমিই দিও । কিন্তু পায়ে পড়ি, ট্যাকসি নাও । না হয় চলো বাড়ি ফিরে গিয়ে গাড়িটা নিয়ে আসি ।

দরকার নেই । ট্যাকসি নিচ্ছি । নাহলে তো কৃপণ ভাববে ।

ভাবতাম । বাঁচালে ।

ট্যাকসিতে উঠে রাজা কিছুক্ষণ কথা বলেনি । তারপর হঠাৎ বলল, ধুবদার ব্যাপারে তুমি খুব ফ্রান্টেটেড জানি । কিন্তু এতটা নির্বিকার হয়ে গেছ তা জানতাম না ।

নির্বিকার ! কই, না তো ! এই তো তোমার সঙ্গে তাকে ঝুঁজতে যাচ্ছি ।

কিন্তু প্রথমে যেতে চাওনি । আমি জোর করায় যাচ্ছো ।

তা খানিকটা বটে আসলে আমি ওকে তোমার চেয়ে বেশী চিনি কিনা ।

রাজা একটু চুপ করে থেকে বলল, কতটা চেনো তা জানি । কিন্তু ধুবদা আমাদের সকলের চেয়ে অনেক বেশী ব্রিলিয়ান্ট । লেখাপড়ায় ভাল ছিল সেটা কোনো ফ্যাকটর নয় । কিন্তু মানুষ হিসেবেও ধুবদা নামবার ওয়ান । কেন এরকম হল বলো তো !

॥ ৪৩ ॥

অনাথ ডাক্তারের মেলা টাকা । ডাক্তারী করেও টাকা করেছে, পাটের চালান দিয়েও করেছে । টাকা রাখার জায়গা নেই । লক্ষ্মী যাকে বর দেন তাঁর দরজা দিয়ে পারতপক্ষে মা সরস্বতী হাঁটতে চান না । অনাথের ছেলেগুলো মানুষ হল না । তবে শহরের একজন মানাগণ্য লোক হিসেবে অনাথের একটা পরিচিতি আছে । বাড়ি, গাড়ি, টাকা তার কিছুই অভাব নেই ।

হেমকান্তর ঘোড়ার গাড়িটা কালীবাড়ির সামনে এসে থামল । নাতি-নাতনীরা এখানকার পৈঁড়া আর বালুসাই ভালবাসে । রোজই কিনে নেন হেমকান্ত । আজও চাকর পৈঁড়া আর বালুসাই কিনতে গেছে । হেমকান্ত গাড়ির জানালা দিয়ে বাইরে তাকিয়ে দেখলেন, অনাথ ডাক্তারের গাড়িটা উল্টোদিকে দাঁড়িয়ে । অনাথের ড্রাইভার বনেট খুলে খুঁখাট কী যেন করছে ।

এ শহরে খুব বেশি লোকের মোটর গাড়ি নেই । যাদের আছে তাঁরা বেশ খাতির পায় । অনাথের গাড়িটার রঙ কালো । চার দরজার সেভানবডি । কয়েক বছর আগে দু' হাজার টাকায় কিনেছিল । মোরগের ডাক দিয়ে হর্ণ বাজে, ধুলো উড়িয়ে ঘরঘর করে চলে । বেশ লাগে জিনিসটা । মোটরগাড়ি এখনো হেমকান্তর কাছে একটা বিস্ময়, একটা রহস্য ।

হেমকান্ত দরজা খুলে নেমে পড়লেন । পায়ে পায়ে গাড়িটার কাছে গিয়ে দাঁড়াতেই তাঁকে দেখে ড্রাইভার লোকটি তটস্থ হয়ে উঠল ।

সাধারণ মানুষেরা রাজা-জমিদার, উকিল-দারোগা দেখে ভয় পাবে, এটা স্বাভাবিক । হেমকান্ত এর মধ্যে কোনো অসঙ্গতি দেখতে পান না । কিন্তু আজ এই মুহূর্তে তাঁর মনে হল, এ লোকটা সামাজিক স্তরে তাঁর চেয়ে ক্ষুদ্র বটে, কিন্তু এ মোটরগাড়ির বিজ্ঞান জানে । তিনি তা জানেন না । সূতরাং অন্তত এ ব্যাপারে এ লোকটি তাঁর চেয়ে শ্রেষ্ঠ ।

হেমকান্ত গাড়ির দিকে মোহমুগ্ধ চোখে একটু চেয়ে ড্রাইভারকে বললেন, এ গাড়ি কিসের জোরে চলে বলো তো !

আজ্ঞে, পেটরল । লোকটা শশব্যস্তে জবাব দেয় । ভারী বিনয়ের সঙ্গে হাত কচলাতে থাকে । শুধু পেটরল ?

আজ্ঞে আরো জিনিসপত্র লাগে ।

আমাকে একটু বুঝিয়ে দেবে ?

লোকটা বিগলিত হয়ে হেসে বলে, আজ্ঞে, দেখবেন ?

হেমকান্ত স্মিতহাস্যে বাচ্চা ছেলের মতো মুখ করে বনেট খোলা মোটরগাড়ির যন্ত্রপাতি দেখতে থাকেন ।

অনেকক্ষণ ধরে সাগ্রহে তিনি পাঠ নেন । কোনোদিন যন্ত্র সম্পর্কে কিছুই শেখেননি তিনি । বুঝতে একটু অসুবিধা হয় । খুব যে ঠিকঠাক বুঝতে পারেন তাও নয় ।

অনেকক্ষণ পর তিনি প্রশ্ন করেন, সবই বুঝতে পারছি, কিন্তু এর প্রাণটা কোথায় তা রহস্য রয়েছে ।

আজ্ঞে কত্যা, গাড়ির কি প্রাণ থাকে ?

থাকে না ! এই যে এত যন্ত্রপাতি, কলকজা, চাকা, হুইল, আরো কত কী এ সবই তো জড়বস্তু । একটা কিছু ভিতরে স্পন্দন তোলে, জ্বলে, তবে নড়তে পারে গাড়ি, তাই নয় কি ?

লোকটা অত-শত জানে না । বিনয়ের সঙ্গে অবশ্য কথটা মেনে নিয়ে বলল, সে তো ঠিক কথাই ।

হেমকান্ত বললেন, একটা কিছু আছে । সেটা হয়তো আমাদের চোখে ধরা পড়ে না । এই যে আমাদের শরীর, এত শিরা-উপশিরা, এত স্নায়ু, পেশী, অস্থি, এসব তো কিছু নয় । একটা স্থূল প্রকাশ মাত্র । এর ভিতরে এক দাহিকাশক্তি যতক্ষণ আছে, ততক্ষণই এটা পচে না, জড়বস্তু হয়ে যায় না ।

আজ্ঞে ঠিক কথা । সেই প্রাণটাই তো আজ্ঞে পেটরল ।

হেমকান্ত মৃদু হেসে বলেন, পেটরল ইন্ধন । প্রাণ হবে কেন ! যাকগে বাপু, তোমার খানিকটা সময় খামোখা নষ্ট করলাম । কিছু মনে কোরো না ।

আজ্ঞে, কী যে বলেন । আমার সৌভাগ্য ।

হেমকান্ত গাড়িতে এসে উঠলেন । একটু অনামনস্ক । মুখে একটা স্মিত হাসি ।

বাড়ি ফিরতেই নাতি-নাতনী দু'জন এসে ধরল তাঁকে । আজকাল এদের সঙ্গে তার বড় ভাব হয়ে গেছে । শিশুদের পছন্দ করলেও, তেমন মাখামাখি পছন্দ ছিল না তাঁর । বাচ্চারা নানা অদ্ভুত কাণ্ড করে, কাঁদে, বায়না ধরে । বিরক্তিকর । কনককান্তির ছেলেমেয়ে দুটো তার বাইরে নয় । কিন্তু তবু এদের সঙ্গে কয়েকটা দিন কাটানোর পর হেমকান্তর ভিতরে একটা উষর ভূমিখণ্ড হঠাৎ উর্বর ও সেচ-নশ্ব হয়েছে । অবোধ শিশুও উর্বর ক্ষেত্র । ঠিকমতো কর্ষণ, সেচ ও বপন ঘটালে কী কাণ্ডই না করতে পারে বয়সকালে ।

আজকাল নাতি-নাতনীরা তাঁর কৌচানো ধূতির ভাঁজ নষ্ট করে, ময়লা হাতের ছাপ লাগায় পানজাবিতে । তার ওপর যখন তখন এসে হামলা করে, ধামসায় । হেমকান্ত রাগ করেন না । এক প্রাণ থেকে আর এক প্রাণের প্রদীপ জ্বলে ওঠাই তো বংশগতি । আমি রইলাম না, কিন্তু আমার প্রাণের অম্লান শিখা রয়ে গেল তো ! এইদিক দিয়ে ভেবে আজকাল তাঁর বিরক্তি কমে গেছে । নাতি-নাতনীদের হাতে পেঁড়া আর বালুসাইয়ের খাঁচাটা ধরিয়ে দিয়ে নিষ্কৃতি পেলেন হেমকান্ত । বাইরের ঘরে এসে নিশ্চিন্তে বসলেন ।

আজ প্রাণতত্ত্বের কথা ভাবা যেতে পারে ।

সন্ধে হয়ে গেছে । চাকর বাতি দিয়ে গেছে ঘরে । মশার পনপন শব্দ উঠছে চারধারে ।



মনের কথা বলতে গেলেই হেমকান্তের সচ্চিদানন্দর কথা মনে পড়ে। আজ যা ভাবলেন তা সচ্চিদানন্দকে জানানো দরকার। সচ্চিদানন্দ আর এক দফা গালাগাল দিয়ে চিঠি লিখবে। কিন্তু সচ্চিদানন্দ জানে না, এসব চিঠি তাকে লেখা হলেও তার বিচার-বিবেচনা বা পরামর্শের জন্যই লেখেন না হেমকান্ত। শুধু একটা জায়গায় মনের কথা উজাড় করে দেন। সচ্চিদানন্দ বুঝুক না বুঝুক হেমকান্ত খালাস হয়ে যান।

কালিতে কলম ডুবিয়ে একটু ভাবলেন হেমকান্ত।

ভাই সচ্চিদানন্দ, আশা করি আনন্দে আছো। তুমি আনন্দে থাকিবেই। কোনো কোনো লোক আছে, আনন্দের জন্য তাহাদের পরনির্ভরশীল হইতে হয় না, উপকরণেরও বিশেষ প্রয়োজন হয় না। তাহারা আনন্দের একটি অফুরান ভাণ্ডার লইয়াই জন্মায়। তাহারা যেখানে যায় সেই জায়গাটিই যেন হাসিয়া উঠে। পৃথিবীতে জ্ঞানী, গুণী, ধনী বা ত্যাগী যত মানুষ আছে তাহার মধ্যে আমি সর্বাপেক্ষা অধিক ঈর্ষা করি এই সব মানুষগুলিকে। ভাই সৎ চিং ও আনন্দ, তুমিও আমার ঈর্ষাভাজন। কী কৌশলে তুমি ওকালতি করিয়া, কংগ্রেস করিয়া এবং পরিবার সামাল দিয়া সুদূর প্রবাসেও অথগু আনন্দে ভাসিতেছ সে কৌশল আমার ইহজীবনে করায়ত্ত হইবে না। ঈশ্বর আমাকে অন্যরকম গড়িয়াছেন। বিমর্ষতা আমার যমজ ভাই। আর আনন্দ তোমার সহজাত কবচকুণ্ডল।

তবে আজ বিমর্ষতার কথা তোমাকে লিখিব না। আজ আনন্দের কথাই লিখিব। কালীবাড়ির সম্মুখে আজ অনাথ ডাক্তারের গাড়িটি বিকল হইয়া পড়িয়াছিল। অনাথকে বোধ করি ভুলিয়া যাও নাই। সহজে ভুলিবার কথাও নহে। তাহার ভগ্নী সুখদার প্রতি তোমার বিলক্ষণ দুর্বলতা ছিল। সেই পুরাতন ক্ষতে আজ একটু খোঁচা লাগিল কি? লাগিলেও ক্ষতি নাই। যে আনন্দের পাইকারি কারবার লইয়া আছে তাহাকে কী ছাই করিবে স্মৃতি! পৃথিবীতে যাহারা আনন্দ লইয়া থাকে তাহাদের স্মৃতিকে উপেক্ষা করিতেই হয়। স্মৃতি-প্রধান হইলে আনন্দ মাটি হইয়া যায়। সুখদার স্মৃতি মনে পড়িলে তোমার পীড়া উপস্থিত হইবে না জানি। তবু সুখদা নামটি যে তাহার কে রাখিয়াছিল তাহা বুঝিয়া পাই না। তুমি যেমন আনন্দময়, সুখদা বোধ করি তেমনই তমসাময়ী। এই কচি বয়সে বিধবা হইয়া ভাইয়ের বাড়িতে হাঁড়ি ঠেলিতেছে।

সে কথা যাক। আজ আনন্দের কথা লিখিব বলিয়া প্রতিজ্ঞা করিয়াছি। অনাথের গাড়িটা দেখিয়া আমি আজ লোভ সংবরণ করিতে পারি নাই। যে সব শকট আপনিই চলে তাহাদের সম্পর্কে আমার কৌতূহল সীমাহীন। আমি যন্ত্রবিদ নই বলিয়াই বোধহয় আগ্রহটা বেশি।

গাড়িটা খারাপ হইয়া গিয়াছিল। অনাথের ড্রাইভার তাহা মেরামত করিতেছে দেখিয়া আমি তাহার কাছে জানিতে চাহিলাম, গাড়ির প্রাণ কোনটা। কাহার জোরে গাড়ি চলে।

সে বেচারী সম্মুখে এক বিশিষ্ট মানুষ দেখিয়া ঘাবড়াইয়া গিয়াছে। তদুপরি সে চালক মাত্র। সে ইন্ধন জানে, যন্ত্রবিদ্যা জানে, কিন্তু প্রাণতত্ত্ব তাহার জানা নাই। গাড়ি কেমন করিয়া চলে তাহা সে জানে, কিন্তু কেন চলে তাহা জানিবে কী করিয়া?

কিছুক্ষণ তাহার সহিত কথা বলিয়া গাড়ির যন্ত্রপাতি ইন্ধন সবই বুঝিয়া লইলাম। একটা ধোঁয়াটে আন্দাজ মতো হইল। গাড়ি কেমন করিয়া চলে তাহা তো একপ্রকার বোঝা গেল, কিন্তু কেন চলে, এ প্রশ্নে আবার অগাধ জলে।

ভাই সচ্চিদানন্দ, নরনারীর মিলনে মানুষ জন্মায় ইহা সর্বজনবিদিত। কিন্তু তবু ইহাও মানিতে হইবে মানুষ কখনো একটি মানুষকে তৈয়ারি করে না। সে জন্ম দেয় বটে, কিন্তু কলাকৌশল তাহার হাতে নাই। সে মোটরগাড়ি বানাইতে পারে, মানুষ বানাইতে পারে না।

পারে না যে, তাহার কারণ আমাদের অনধিগম্য, আমাদের সাধ্যাতীত কিছু মানুষের মধ্যে আছে। এমন কি মোটরগাড়ি বানাইলেও সেই গাড়ির প্রকৃত চালক কে তাহা মানুষের পক্ষে ব্যাখ্যা করা বড় সহজ হইবে না। অনাথের ড্রাইভার বড়জোর পেটরলের কথা বলিয়াছে, পণ্ডিতেরা তাহার অপেক্ষা

আর একটু আগাইয়া বলিবেন, দাহিকাশক্তি । কিন্তু আমি তবু প্রশ্ন করিতে থাকিব, ওই দাহিকাশক্তি কোথায় নিহিত ছিল, কী করিয়া আসিল ? ইন্ধন না হইলে আগুন মরিয়া যায় । কিন্তু সেই আগুনই চকমকি, দেশলাই প্রভৃতি স্থূল বস্তুর মধ্যে নিহিত আছে কী করিয়া ? এই অগ্নি কোথা হইতে আসিল ? সেই রহস্যের সন্ধান যদি দিতে না পার তবে মোটরগাড়ি কী করিয়া চলে তাহার সঠিক উত্তর মোটরগাড়ির আবিষ্কারেরও অজ্ঞাত ।

এই শরীরের কোথাও প্রাণকে খুঁজিয়া পাই না । তাহা কোথায় আছে ? মস্তিষ্কে ? চক্ষুদ্বয়ে ? বক্ষদেশে ? খুঁজিয়া পাই না । কিন্তু সে আছেই । সে নহিলে এই শরীর জড়মাত্র ।

এই ভাবিয়া বড় আনন্দ হইল । আমার ভয়, মানুষ অচিরে একদিন পৃথিবীর সব রহস্যের সমাধান করিয়া ফেলিবে । সব জানিয়া ফেলিলে আর সে বাঁচিবে কী লইয়া । সে যে তখন স্রষ্টার সমকক্ষ ! এখনও তাহার অজ্ঞাত কিছু আছে, ইহাই ভরসা ।

কেন ভরসা জিজ্ঞাসা করিবে কি ? তবে বলি, এই যে চারিদিককার পৃথিবী, এই যে মানুষেরা নিত্য জন্মাইতেছে, হৃদমুদ হইয়া বিষয়কর্মে ছুটিতেছে, নানা সুখ দুঃখ ভোগ ত্যাগ শেষ করিয়া বয়ঃপ্রাপ্ত হইয়া মরিতেছে, ইহার কোনো অর্থ খুঁজিয়া পাও ? এই জীবনটা কি গোটাটাই অর্থহীন হইয়া যায় না, যদি না ইহার ভিতরে অন্তর্নিহিত প্রাণরহস্য থাকে ?

মোটরগাড়ি আজ আমাকে এই প্রাণরহস্যের সন্ধান দিল, এমন নহে । প্রশ্নটি আমার ভিতর ছিলই । অনাতের অচল মোটরগাড়ি তাহাকে খোঁচাইয়া তুলিল মাত্র ।

এদিককার অবস্থা তো সকলই জান । বিশাখা আমাকে বড়ই হতাশ করিয়াছে । শচীনের মতো পাত্রকে তাহার পছন্দ হইল না । ওদিকে শচীনের জন্য পাত্রী প্রায় স্থির । শ্রীকান্ত রায়ের মধ্যমা কন্যার সঙ্গে বিবাহের কথা প্রায় পাকা হইয়া গিয়াছে । শচীনের দিক দিয়া ভালই হইবে । রায় মহাশয় দিবেন অনেক । উপরন্তু শচীনের ভগ্নীটিকেও নিজ পুত্র জ্যোতিপ্রকাশের জন্য মনোনীত করিয়াছেন । পাল্টি বিবাহ । শচীন সুখী হইলেই আমার মনের ভার লাঘব হইবে । আমি ছেলেটিকে বড় স্নেহ করি । স্নেহ পাইবার যোগ্যতাও তাহার বিলক্ষণ আছে । অন্য যোগ্যতার কথা ছাড়িয়া দিই । বিশাখা তাহাকে প্রত্যাখ্যান করায় তাহার যে অপমান হইয়াছে তাহা গায়ে না মাখিয়া সে আজও প্রতিদিন আসিয়া আমার এসটেটের কাজকর্ম দেখিতেছে । নানা সুপারামর্শ দিতেছে । এই অহংকারহীনতা বড় কম কথা নহে ।

মেয়েটিই আপাতত আমার দুশ্চিন্তার প্রধান কারণ । বয়স কম তো হইল না । এখনো পাত্রস্থ করিতে পারিতেছি না । মা-মরা মেয়ে, মনে মনে হয়তো আমাকেই দোষারোপ করে । কিন্তু আমি কী করিব ? পৃথিবীর সকল ঘটনার হাল ধরিয়া তো আমি বসিয়া নাই ।

গভীর ভালবাসা গ্রহণ কর । ঈশ্বর তোমাকে নিত্য আনন্দে রাখুন । তোমারই হেম ।

চিঠিটা যখন মুড়ে রাখছেন তখনই রঙ্গময়ী ঘরে এল ।

একটু চমকে ওঠেন হেমকান্ত । রঙ্গময়ী আজকাল এত দূর তো আসে না ।

কী খবর মনু ?

রঙ্গময়ী একটু হাসল । কেমন দেখাল হাসিখানা ? কান্নার মতো ?

কী হয়েছে মনু ? উদ্বিগ্ন হেমকান্ত আবার জিজ্ঞেস করেন ।

কেন, তোমার কাছে কি এমনি আসতে নেই ?

তা তো বলিনি । হঠাৎ তো এরকম আসো না কখনো !

আজ এলাম একটা কথা বলতে ।

কী কথা ?

আমরা চলে গেলে কি তোমার এসটেটের উপকার হয় ? আয়পয় বাড়ে !

সে কী কথা ! এ কথা কে বলেছে ?

তোমাকে জিজ্ঞেস করছি । বলো না ।

আমি তো এরকম ভাবে কখনো ভাবিনি ।

রঙ্গময়ীর মুখটা আর একটু ভাল করে দেখলেন হেমকান্ত । মানুষ গভীরভাবে অপমানিত হলে ভিতরকার তাপে সে শুকিয়ে যায়, তাম্রভ্র হয়ে ওঠে । রঙ্গময়ীর মুখেচোখে সেইরকম একটা ভাব । চোখদুটোয় পাগলের চোখের মতো অস্বাভাবিক উজ্জ্বলতা ।

রঙ্গময়ী বলল, তুমি নিজে থেকে ভাবোনি, কিন্তু তোমার হয়ে অন্য কেউ হয়তো ভাবছে । তুমি তো সব খবর রাখো না ।

কী হয়েছে একটু খুলে বলবে ?

আজ বিকেলে বাবাকে কাছারিবাড়িতে কনক ডেকে পাঠিয়েছিল ।

কেন বলো তো ! হেমকান্তর বুক কাঁপতে থাকে । কনকের প্রস্তাব তিনি ভুলে যাননি । কিন্তু এখনো হেমকান্ত মতও দেননি । কনক কি তাহলে বিনোদচন্দ্রকে বিদায় হতে বলেছে ? বলাটাই স্বাভাবিক ।

হেমকান্ত বললেন, ডেকে কিছু বলেছে বুঝি ?

খুব বিনয়ের সঙ্গে বলেছে । কিন্তু বলেছে । অন্যত্র আমাদের বাসের ব্যবস্থা করলে অসুবিধে হবে কি না । সঙ্গে এও বলেছে, এসটেটের অবস্থা খুব খারাপ, বাড়তি কর্মচারী পোষার সামর্থ্য নেই । হেমকান্ত অভিনয় করতে জানেন না । চুপ করে বুকের কাঁপুনি ভোগ করতে লাগলেন । রঙ্গময়ী কিছুক্ষণ বিহ্বল দৃষ্টিতে চেয়ে রইল হেমকান্তর দিকে । তারপর বলল, কনক যা বলেছে তা অন্যায় বা অন্যায় নয় ।

হেমকান্ত একটা দীর্ঘশ্বাস ফেলে বললেন, কিন্তু আমি তো এই প্রস্তাবে মত দিইনি ।

তোমার কাছে তাহলে প্রস্তাব এসেছিল ?

হ্যাঁ । কনকই তুলেছিল কথাটা । ওরা তো আর তোমাদের আসল মূল্য বোঝে না । সবাইকেই ওরা কর্মচারী হিসেবে দেখে । যুগের দোষ মনু । ওকে ক্ষমা করে দিও ।

ক্ষমা করতে একটু আত্মপরাধ লাগে মেজাজে কতটা । সেটা আমার নেই ।

তোমার অধিকার কিছু কম নয় মনু । সুনয়নী বেঁচে থাকতে, আর তার মরার পর তুমি যা করেছো তা কি বিনোদচন্দ্রের বেতনে শোধ হয় ?

ওসব কথা তুলছ কেন ? যে কিছু করে সে সবসময়ে সব করার মূল্য খোঁজে না । তাছাড়া সে মূল্য দেবেই বা কেন কনক ?

কনককে তুমি খারাপ ভাবছ না তো মনু ?

রঙ্গময়ী একটু কষ্টের সঙ্গে হাসল । মাথা নেড়ে বলল, কেউ আমাকে অপমান করলেই তাকে খারাপ ভাবব আমি কি এত বোকা ? আমাকে তো এ বাড়িতে অনেক ঐটোকাঁটা খেয়ে বড় হতে হয়েছে, কই অপমান লাগেনি তো । তোমার ছেলে কনক যখন দুধভাত অর্ধেক ফেলে রেখে উঠে যেত তখন আমাকে ডেকে এনে খাওয়ানো হয়েছে কত দিন ।

আহা, আবার ওসব কথা কেন ? কনক কী বলল বলো তো !

বললাম তো ন্যায্য কথাই বলেছে । বাবা অবশ্য খুব ক্ষেপে গেছে । দিব্যি ঘণ্টা নেড়ে দিন কাটছিল, এখন নতুন করে কাজকর্ম দেখতে হবে । দাদা তো এ বাড়ির ভরসায় লেখাপড়াটা পর্যন্ত ভাল করে শেখেনি । ভরসা জমিটুকু, সেটাও তোমরা দিয়েছিলে । এতগুলো পেট চলবে কিসে সেই ভেবে সকলের মাথা গরম ।

বললাম তো, তোমাদের কোথাও যেতে হবে না ।

তুমি বলছ ?

হ্যাঁ। আমি।

কিন্তু তুমি কে ?

তার মানে ?

তুমি আজ যা বলছ তা ভাল ভেবে বলছ। কিন্তু রোজ যদি তোমার ছেলে আর আত্মীয়রা তোমাকে বোঝাতে থাকে যে, এই পুরুতটা নিতান্তই অকর্মার ধাড়ি, তাহলে তুমিও বুঝবে। বিশেষ করে কথাটা তো মিথ্যেও নয়। বাবা তোমাদের ঘাড়ে বসে একটা জন্ম খেয়ে গেল। কয়েকঘর যজমান আছে, কিন্তু তারাও হতদরিদ্র।

আর বোলো না মনু।

শুনলে চাও না ?

না। কনক যাই বলুক, ওটা আমার কথা নয়। আজও নয়, কোনোদিনই নয়।

কেন নয় ? যদি এসেটে থেকে অকর্মাদের বিদেয় করেই হয় তবে সবার আগে আমাদেরই বিদেয় করা উচিত। আর যদি আমাদের রাখা তবে সবাইকেই রাখতে হবে। পারবে ?

তুমি কী বলো ?

আমি কী বলব আমার মুখ দিয়ে এসব কথা বেরোনো অন্যায়। তবু বলে ফেললাম।

বেশ করেছে বলেছো। এখন বলো আমি কী করব ?

আমাদের জন্য তোমার আলাদা দরদ থাকা উচিত নয়।

সেটা আমি বুঝব।

রঙ্গময়ী একটু হাসল। তারপর হঠাৎ বলল, আমি আজও কেন আছি জানো ?

কেন থাকবে না ?

না থাকার অনেক কারণ ছিল। কিন্তু আছি কেন সেটা তোমার জানা দরকার।

## ॥ ৪৪ ॥

সেই একটা দিন কেটেছিল বটে রাজার সঙ্গে। কারণ তাদের কোনো উদ্দেশ্য ছিল না, লক্ষ্য ছিল না। ধুবর খোঁজে তারা বেরিয়েছিল বটে, কিন্তু রাজা স্বীকার করে নিল, সে ধুবর খোঁজ জানে না।

তাহলে ?

তাহলে কী ? রাজা বুক চিতিয়ে বলে।

আমাকে নিয়ে এলে কেন ?

ওই রাক্ষসপুত্রীর অঙ্ককারে দিনরাত মুখ গুঁজে পড়ে থাকো। তোমার জন্য কষ্ট হচ্ছিল।

রাক্ষসপুত্রী ! রেমি ভূঁ কুঁচকে বলল, রাক্ষসপুত্রী বলছ কেন ?

আহা, কথাটা অত শব্দার্থে ধরছ কেন ? বাড়িটাকে মোটেই রাক্ষসপুত্রীর মতো দেখায় না। যথেষ্ট আলোবাতাস খেলে। কলকাতার হালের বাজারদরে এ বাড়ির দাম লাখ সাতেক হলেও অবাক হওয়ার কিছু নেই। সেই হিসেবে বলিনি। কিন্তু ও-বাড়ি তোমার সব সত্তাটাকে গিলে বসে আছে। বাইরে বেরোও না, ঘোরো না, মুখ শুকনো করে থাকো, আড়ালে হয়তো কাঁদোও। কে জানে।

মোটেই মুখ শুকনো করে থাকি না। আর কান্না অত সস্তা নয়।

মেয়ে হয়ে জন্মেছো, আর কাঁদো না, একথা বিশ্বাস করতে বলো ?

আমি সহজে কাঁদি না। রাক্ষসপুত্রী বলতে কী মীন করছো বলো তো ! স্বশ্রমশাইকে ঠেস দিয়ে বলছ না তো !

রাজা শুনে খুব হোঃ হোঃ করে হাসল, তারপর বলল, ওঁর স্বভাব খানিকটা রাবণের মতোই বটে। দান্তিক, আত্মকেন্দ্রিক ক্ষমতালোভী। তার ওপর রাবণের যেরকম স্বজনপ্রীতি ছিল কৃষ্ণকান্ত

চৌধুরির স্বজনপ্রীতিও সেরকমই। খুব মিল আছে।

রেমি একটু বিরক্ত হয়ে বলল, তোমরা সবাই ঠর এত নিন্দে কেন করো তা জানি না, তবে এটুকু জেনো ওই রাফসপুরীতে যে আজও আমি আছি তা তোমাদের কুটিলার জন্য নয়, ঠর জনাই।

রাজা মৃদু মৃদু হাসছিল। বলল, রেগে যাচ্ছে কেন। রাবণের যেমন বিস্তর গুড সাইড ছিল ঠরও তেমনি বিস্তর প্লাস পয়েন্ট আছে। সেগুলো তো বলিনি।

থাক, আর বলতে হবে না। তোমাদের চেয়ে ঠর প্লাস পয়েন্টগুলো আমি অনেক বেশী জানি। ঠর সম্পর্কে এইসব অপপ্রচার কে করেছে বলো তো? তোমার কুটিলি নাকি?

রাজা মাথা নেড়ে বলে, না বউদি, আমরা অর্থাৎ কৃষ্ণকান্তর আত্মীয়রা প্রায় সকলেই ঠর গভীর প্রভাবে মানুষ হয়েছি। জন্ম থেকেই আমাদের শেখানো হয়েছে যে, ওই কৃষ্ণকান্তর ইচ্ছার বিরুদ্ধে চলা যাবে না। কে কোথায় মেয়ের বিয়ে দেবে, কে কার ছেলের পৈতে কোন বয়সে দেবে, কে কোথায় জমি কিনবে সবই ঠর অনুমোদনসাপেক্ষ। এখন অবধি বড় একটা কেউ ঠর বিরুদ্ধে চলেনি। তবে এও ঠিক লোকটি অসম্ভব ক্ল্যানিস। গোষ্ঠীপ্রবণ যাকে বলা যায় আর কি। আর সেই কারণেই ঠর নিজের জন কেউ বিপদে পড়লে উনি সঙ্গে সঙ্গে মুশকিল-আসান হয়ে হাজির হন।

তবে ঠর নিন্দে করো কেন?

রাজা মাথা নেড়ে বলল, তুমি ঠিক বুঝবে না। বিরল সৌভাগ্যবতীদের মধ্যে তুমি একজন যার সঙ্গে কৃষ্ণকান্ত চৌধুরির ক্ল্যাশ নেই। নইলে চৌধুরি বংশে এবং লতায়-পাতায় আত্মীয়দের মধ্যেও এমন লোক কমই আছে যে ঠকে যমের মতো ভয় খায় না। সেটা উনি মন্ত্রী বলে নয়। এমনিতাই। আমরা আজ অবধি ঠর ভয়ে প্রাণ খুলে প্রেম করতে পারি না, তা জানো? বংশে গোত্রে বর্ণে মিল না হলে বিয়ে উনি আটকে দেবেন। তার পরেও যদি সাহস করে এগোয় বা বিয়েটা করেই ফেলে তাহলে তাকে ভিটেমাটি ছাড়া করে ছাড়বেন।

এরকম হয়েছে নাকি?

বিস্তর। রিসেন্টলি কমলদা ওরকম একটা বিয়ে করতে চেয়েছিল, সে ঘটনা শোননি না তো! কমলদা কে? সেই হুগলি মহসিন কলেজের প্রফেসর? চশমা চোখে, মিষ্টি-মিষ্টি দেখতে?

সেই। একজন ছাত্রীর সঙ্গে লটফট হয়েছিল। একে ছাত্রী তার ওপর বর্ণ আলাদা। কৃষ্ণকান্ত কমলদাকে ডাকিয়ে এনে এমন যাচ্ছেতাই অপমান করলেন বলার নয়।

বিয়েটা হয়েছিল?

পাগল! কমলদা সাহস করলেও পাত্রীপক্ষ এগোয়নি ভয়ে। পাত্রীকে তার বাবা ভয়ের চোটে বিহারে পার করে দেয়। কমলদা চাকরি ছেড়ে কিছুদিন পাগলের মতো ঘুরে বেড়াল। এখন আবার শুনছি একটা ইংরিজি খবরের কাগজে কলাম লিখেছে। তাতে খুব ঝেড়েছে তোমার স্বশ্রবকে। প্রবন্ধটার নাম বোধহয় কাস্ট-ইজম অ্যান্ড ডাওরি সিস্টেম। বর্ণবিদ্বেষের ফলে বিয়েতে পণপ্রথা বৃদ্ধি পাচ্ছে, এরকমই একটা মত প্রচার করেছে সে। আমাদের বংশ এবং ঝাড়ে মুষ্টিমেয় কয়েকজন বিদ্রোহীদের মধ্যে কমলদা একজন।

আর তোমার কুটিলি

সেও একজন। কিন্তু তার বিদ্রোহটা এখন আত্মনিপীড়নে দাঁড়িয়ে গেছে।

সেটা কেমন

তুমি তার বউ, টের পাও না

না, তোমার ধ্রুবদাকে আমি ঠিক বুঝি না।

রাজা একটু হাসল আবার। মাথা নেড়ে বলল, আমিও বুঝি না। শুধু জানি, ধ্রুবদা হ্যাভ বিন এ ব্রাইট বয়। ঠিক পথে থাকলে আজ ওকে ঠেকানোর কেউ ছিল না। কিন্তু ধ্রুবদা ট্র্যাকে থাকতে

পারছে না । নিজের বাবাকে জন্ম করতে গিয়ে নিজেই জন্ম হচ্ছে বেশী । আসলে ধ্রুবদার পথটাই ভুল ।

ভীষণ ভুল । ওকে তোমরা বোঝাতে পারো না ?

রাজা হঠাৎ প্রসঙ্গটা ঝেড়ে ফেলে বলল, কোথায় তোমাকে নিয়ে যাচ্ছি জানো ?

না তো মিথ্যে কথা বলে তো ঘরের বার করেছে, এবার কী করবে ?

একটা নাটক দেখাতে নিয়ে যাবো ।

নাটক ওসব আমার এখন ভাল লাগে না ।

সে জানি । তোমার জীবনেই নানারকম নাটক ঘটে যাচ্ছে । স্টেজের নাটক তো তার কাছে নসি়া তবে এ নাটকটার আলাদা একটা চার্ম আছে । আমি এটার মিউজিক করেছি ।

মিউজিক করেছে মানে ? তুমিই কি মিউজিক ডিরেকটর নাকি ?

লাজুক মুখে রাজা বলে, ওরকমই ।

তাহলেই হয়েছে ।

কেন, আমি কি খারাপ মিউজিক করি ? দুটো সিনেমায় মিউজিক করছি তা জানো ?

শুনেছি । বাংলা সিনেমা এত ফ্লপ করে কেন তা তো বোঝাই যাচ্ছে ।

বাজে বোঝো না । ঘরের কোণে মুখ ভুঁজে একাকিনী শোকাकुলা রাঘব-রমণী হয়ে পড়ে থাকো, কালচারাল ফিল্ডের খবর জানবে কী করে ?

জানার দরকার নেই । আমি নাটক দেখব না ।

প্লীজ বউদি ।

আমার ভাল লাগছে না । তুমি মিথ্যে কথা বলে আমাকে যন্ত্রণা দিলে কেন বলো তো ! তোমার কুট্টিদার সত্যি কোনো খবর রাখো না ?

রাজা গম্ভীর হয়ে বলল, দুঃখিত বউদি । কী বললে যে তুমি বাড়ির বাইরে বেরোতে উৎসাহ পাবে তা বুঝতে পারছিলাম না । তবে কুট্টিদার খবর রাখি না, এটাও সত্যি কথা নয় ।

রাখো তাহলে ! বলছ না কেন ?

সত্যিই শুনতে চাও ?

চাই । কেন চাইব না ?

একটু আগে কিন্তু উৎসাহ দেখাওনি ।

এখন দেখাচ্ছি । শত হলেও সে আমার স্বামী ।

ঠিক আছে । কুট্টিদা তিন দিন আগে আমাদের বাড়িতে এসেছিল । একরাত্রি ছিল ।

এখন নেই ?

না । পরদিনই চলে গেছে । তবে কলকাতাতেই আছে এবং যতদূর জানি অফিসও করছে । আমাদের কী বলে গেছে জানো ?

কী করে জানব ?

বলে গেছে পুলিশের ভয়ে বাড়ি আসতে পারছে না ।

বাজে কথা ।

কৃষ্ণকান্ত চৌধুরি নাকি পুলিশকে অ্যালাট রেখেছেন, বাড়ি ফিরলেই কুট্টিদাকে অ্যারেস্ট করা হবে ।

মোটাই নয় ।

হলেও কুট্টিদা ভয় খাওয়ার ছেলে নয় । ইন ফ্যাকট পুলিশের অনেক বড়কর্তা কুট্টিদার হাতের মুঠোয় ।

তবে আসছে না কেন ?

জানোই তো কুট্টিদা কীরকম । ওর লাইন অফ কনফ্রনটেশন একটু আলাদা ধরনের । নিজের বাপের বিরুদ্ধে সে একটা সাইকোলজিক্যাল ওয়ারফেয়ার চালাচ্ছে । ফেরার হয়ে থাকলে নাকি মন্ত্রীমশাইয়ের বৈজ্ঞানিক হবে ।

কোথায় আছে জানো না ?

না । জানব কী করে ?

জানো । বলবে না ।

রাজা ঠোট একটু চেপে কী একটু ভেবে বলল, ধরো তাই ।

ওর কি ধারণা খবর পেলেই আমি সেখানে গিয়ে ওকে ধরে আনব ?

না । ওর ধারণা তুমি জানলে তোমার স্বশুরও জেনে যাবেন ।

কেন, আমি জানলে উনি জানবেন কেন ?

তুমি নাকি স্বশুরমশাইয়ের কাছে কিছুই গোপন রাখতে পারো না !

ভুল ধারণা । স্বশুরমশাইয়ের কাছে ওর সম্পর্কে অনেক কথাই আমাকে গোপন রাখতে হয় ।

সে আমি জানি না ।

জানো না তো বেশ বোলো না । তবে তোমার কুট্টিদা তো অফিসও করছে । আমি যদি সে খবরটা স্বশুরমশাইকে দিই !

সেটা তুমি দেবে না, কুট্টিদা জানে ।

কেন, এ খবরটা দেবো না কেন ?

পুলিশ গিয়ে অফিসে হামলা করলে তোমার বরের চাকরি যাবে ।

ওর আবার চাকরি বছরে দুটো করে ছাড়ছে, দুটো করে পাচ্ছে । আর একটা কথা তোমার কুট্টিদাকে বোলো । যদি স্বশুরমশাইকে অপমানই করতে চায় তবে ফেরার না থেকে পুলিশে সারেগুদার করলেই বরং স্বশুরমশাইয়ের বেশী অপমান হবে

কুট্টিদা অ্যারেস্টেড হলে তোমার স্বশুরমশাইয়ের বিরুদ্ধে লড়াইটা চালাবে কী করে ? তাই—

উঃ, কী যে পাগল না তোমরা ! সবাই পাগল । বাপের ওপর ছেলের এত আক্রোশ থাকতে পারে তা আমার কল্পনাতেও ছিল না ।

তুমি তো ফ্যামিলির ইতিহাস জানোই বউদি । কী আর বলব ! কুট্টিদা পাগল হলেও ন্যাচারাল পাগল নয় পরিস্থিতির চাপে ডিসব্যাল্যান্সড ।

ওসব বাজে কথা । বানানো সমস্যা নিয়ে একটা ভড়ং করে যাচ্ছে ।

আচ্ছা, প্রসঙ্গটা আজ থাক । তোমাকে একটু আনন্দ দেওয়ার জন্য আজ বের করে এনেছি ।

হঠাৎ আমাকে আনন্দ দেওয়ার কথাই বা তোমার মনে হল কেন ?

আমরা যে সবসময়ে তোমার কথা বলাবলি করি

আমার কথা ! আমি এমন একটা কে যে আমার কথা ভাবো তোমরা !

আমাদের পুরো বংশ এবং বাড়ি যেখানে যারা আছে সবাই তোমার জন্য খুব উদ্বিগ্ন । আমরা কুট্টিদা আর তার বাবার মধ্যে কনফ্রনটেশনটার কথা জানি । মাঝখানে কেটিকলে পড়ে তোমার অবস্থাটা কীরকম তাও অনুমান করতে পারি । সবাই বলে তুমি খুব ভালমানুষ টাইপের । আর সেজন্য সাফারও করছ ।

কথাটা ঠিক নয় রাজা । আমি কষ্ট পাচ্ছি না । আমার মন শক্ত হয়ে গেছে ।

রাজা মাথা নেড়ে বলে, সেটাও স্বাভাবিক । তোমার বাপের বাড়ির থেকে আমরা খবর পেয়েছি, কুট্টিদার সঙ্গে তোমার বিয়েটা ভেঙে দেওয়ার কথাও গুঁরা ভাবছেন ।

রেমির বুকটা হঠাৎ ভারী ঠেকল । ধীরে ধীরে তারা হাজরা অবধি হেঁটে এসে উত্তরদিকে আরও এগিয়ে যাচ্ছিল । রাজা ট্যাকসি নেয়নি, রেমি ট্রামে উঠতে রাজি হয়নি ।

চলো বউদি, ট্যাকসিই ধরি। তুমি বড্ড একণ্ডয়ে।

কেন, আমার তো হাঁটতে বেশ লাগছে।

সেটা তোমার লাগছে। আমার লাগছে না। তোমাকে নিয়ে গিয়ে কলকাতা শহরটা একটু ঘুরে দেখাই চলো। তারপর সঙ্গে সাড়ে ছ'টায় নাটক।

নাটকটা কি দেখতেই হবে?

তোমার ভাল লাগবে, দেখো।

কী করে বুঝলে যে ভাল লাগবে।

লাগবে। আমার কথা শুনেই দেখ না একদিন।

নাটক দেখা বা রেস্টুরেন্টে খাওয়া এগুলো আমার কাছে কোনো এন্টারটেনমেন্ট নয়। আমার ভাল লাগে না।

তাহলে কী করবে?

আমাকে একবার ওর অফিসে নিয়ে যাবে?

ও বাবা!

কেন, ওবাবা কেন?

পারব না বউদি। কুটুদা মেরে ফেলবে।

তুমি কি ওকে ভয় পাও?

ভীষণ।

কেন বলো তো! ওর মধ্যে ভয় পাওয়ার মতো কী আছে?

কুটুদা কতটা ভয়ংকর হতে পারে তুমি জানো না। এমনিতে রাগে না সহজে। কিন্তু রেগে গেলে লগুভগু কাণ্ড বাঁধিয়ে দেয়।

ঠিক আছে। চলো কোথায় যেতে হবে।

ট্যাকসি নিই?

রেমি থেমে গিয়ে বলল, নাও।

কি হয়েছিল তা আজ রেমির স্পষ্ট মনে নেই। কিছু একটা হয়েছিল নিশ্চয়ই। খুব ভাল কেটে গিয়েছিল দিনটা।

এখন অপারেশন টেবিলে শোওয়া রেমি তার অর্ধচেতনার মধ্যেও টের পায়, দিনটা ছিল তড়িৎগর্ভ। রাজার সঙ্গে সেই তার প্রথম ঘনিষ্ঠতা।

ডাক্তাররা চিন্তিত, উদ্বিগ্ন। রেমিকে একটি চেউ সংজ্ঞাহীনতার গভীর সমুদ্র থেকে কয়েক সেকেন্ডের জন্য চেতনার বেলাভূমিতে নিয়ে এল। রেমির মনে হল, ডাক্তার নার্স সবাই বড় অসহায়।

বাস্তবিকই তাই। রেমির রক্তচাপ দ্রুত কমে আসছে। এ অবস্থায় তার শরীরে অস্ত্র চালানো বিপজ্জনক।

লবিতে কৃষ্ণকান্ত চারদিকে চেয়ে তাঁর গোষ্ঠীভুক্ত মানুষদের দেখছিলেন। তাঁর জন্যই আজও এরা সম্পূর্ণ বিচ্ছিন্ন বা যোগাযোগহীন হয়ে যায়নি। দেশভাগের পর প্রত্যেকের জীবনেই উন্টোপান্টো শ্রোত বয়ে গেল। কে কোথায় যাবে, কোন ঠিকানায় গিয়ে ঠেকবে তার কোনো স্থিরতা নেই। সেই সময়ে কৃষ্ণকান্ত শত্রু হাতে হাল ধরলেন। রাজনীতিতে তিনি সুপরিচিত ব্যক্তিত্ব। রোখা-চোখা মানুষ। কালীঘাটের বাড়ি ছাড়াও কলকাতায় যত আত্মীয়স্বজনের বাড়ি বা বাসা ছিল সে সব জায়গায় নিজে গিয়ে ভিটেছাড়া আত্মীয়স্বজনদের সাময়িক থাকার বন্দোবস্ত করে দিয়েছিলেন তিনি। এমন কি দেশের বাড়ির চাকরবাকর, কর্মচারীরাও বাদ যায়নি। তারপর মাত্র কয়েক মাসের মধ্যে প্রত্যেকের জন্য নিজস্ব ভদ্রাসনের ব্যবস্থা করে দেন। অর্থসাহায্যে কোনো কার্পণ্য ছিল না।



যারা পাকিস্তানেই থেকে গেল তাদের মধ্যে কেউ কেউ অনেক পরে চলে আসে। তাদের ব্যবস্থাও তিনি বিনা প্রশ্নে করে দেন। তাঁর বাবা হেমকান্ত চৌধুরি খুব কাজের মানুষ ছিলেন না। কিন্তু স্নেহপ্রবণ ছিলেন। বড় বেশী স্নেহপ্রবণ। হেমকান্তর ওই সদৃশগুণটি উত্তরাধিকারসূত্রে কৃষ্ণকান্তর মধ্যেও এসেছে।

সবচেয়ে বড় কথা, উপকার যেমন করেছেন, তেমনি এদের টিকি বাঁধা পড়েছে তাঁর কাছে। আজও তাঁর বিরুদ্ধে কথা বলার সাহস এদের কারো নেই। এরা কি তাঁকে ঘৃণা করে? করুক, সেই সঙ্গে এরা এও জানে, কৃষ্ণকান্ত চৌধুরিকে অস্বীকারও করা যায় না, উপেক্ষাও সম্ভব নয়। কৃষ্ণকান্ত একজন নবাগতকে দেখে স্তিমিত কণ্ঠে বললেন, কমল, এসেছিস?

কমল ভীড় ঠেলে এগিয়ে এসে বলল, এইমাত্র মামা। খবর পেতে একটু দেরী হয়েছিল। দেখ, এখন আমার কপালে কী লেখা আছে।

রেমির অবস্থা কী?

ভাল নয় নিশ্চয়ই। ডাক্তার নার্স তো কেউ কিছু বলছে না স্পষ্ট করে। মুখচোখ দেখে বুঝতে পারছি কিছু ঘটতে চলেছে। তোরা দেখ কে কী করতে পারিস। ফুলু, তোর এক কে চেনাজানা তাত্ত্বিক আছে না?

ফুলু এগিয়ে এসে বলে, আছে মামা। বারাসতে।

কিছু করতে পারবে?

যাবো মামা?

যা না। দেখ আমার গাড়িটা না হয় তো মহেন্দ্রর গাড়ি নিয়ে চলে যা। পারিস তো তুলে নিয়ে চলে আয়।

যাচ্ছি। বলে ফুলু দৌড়ে বেরিয়ে গেল।

কৃষ্ণকান্ত সকলের দিকে চেয়ে বললেন, আর কারো এরকম কেউ আছে? তাত্ত্বিক, যোগী, হোমিওপ্যাথ যে কেউ।

চারদিকে একটা গুঞ্জন শুরু হল।

দুলাল—কৃষ্ণকান্তর এক নাত্তিক ভাইপো বলল, ওসবে কিছু হবে না কাকা। যা ডাক্তাররা করছে করুক।

কৃষ্ণকান্ত তার দিকে স্থির দৃষ্টিতে একটু চেয়ে থেকে মৃদু কঠিন সুরে বললেন, সব বুঝে গেছিস দেখছি।

দুলাল একটু লজ্জা পেয়ে সরে গেল।

জীবন—কৃষ্ণকান্তর এসটেটের প্রাক্তন নায়েবের ছেলে—বলল, যদি বলেন তো ডাক্তার গাঙ্গুলিকে নিয়ে আসি।

ডাক্তার গাঙ্গুলি কে?

মস্ত হোমিওপ্যাথ। এম আর সি পি, এফ আর সি এস।

হোমিওপ্যাথি করে কেন?

ওরকম অনেক অ্যালোপ্যাথি করে। তবে ঐকে আপনি চেনেন! অনুশীলন সমিতিতে ছিল। ব্রিটিশ আমলে সরকার সব ডিগ্রি কেড়ে নেয়।

কৃষ্ণকান্ত সোজা হয়ে বসে বলেন, খগেনের কথা বলছিস নাকি!

হ্যাঁ। সেই।

দূর! ও ডাক্তারির কী জানে। ধর্ম ছেড়ে একবার খ্রীষ্টান হয়েছিল মনে নেই?

সেটা দায়ে পড়ে।

ওসব জানি।

ডাক্তার কিন্তু খুব ভাল ।

কৃষ্ণকান্ত এক সেকেন্ড চিন্তা করে বললেন, তাহলে যা । ট্যাকসি পেলে ভাল, না হলে কারো গাড়ি নিয়ে যা ।

একজন অবাঙালি ব্যবসায়ী কৃষ্ণকান্তকে খুশি রাখতে এত রাতেও হাজির ছিলেন । তিনি বললেন, আমার গাড়ি আছে । বলুন, ড্রাইভারকে বলে দিচ্ছি ।

কৃষ্ণকান্ত দকপাতও করলেন না । জীবন সেই ভদ্রলোকের সঙ্গে বেরিয়ে গেল ।

কৃষ্ণকান্ত চোখ বুজলেন । তারপর টান শরীরটা শ্লথ করে আবার হেলান দিয়ে বসলেন । সকলেই এসেছে, সকলেই আসবে । কিন্তু এত মানুষের সদিচ্ছাও তাঁর বউমাকে বাঁচাতে পারবে কি ?

বউমাটির জন্য কৃষ্ণকান্তের বকের মধ্যে ক্রমশ ঘন হয়ে উঠছে ব্যথা । বড় ব্যথা । এই ব্যথাই একদা তাঁর মৃত্যুর কারণ হবে । হোক । আজ যদি কৃষ্ণকান্ত তাঁর নিজের জীবনের বিনিময়ে রেমির জীবন ফিরিয়ে দিতে পারতেন তো তাই দিতেন ।

জীবনে এত স্নেহ তাঁর কাছ থেকে কেউ কখনো পায়নি । অথচ রেমি ছেড়ে যাচ্ছে তাঁকে ।

কৃষ্ণকান্ত চোখ খুলে জিজ্ঞেস করলেন, রাজা এসেছে ?

কয়েকজন সমস্বরে জবাব দিল, এসেছে ।

একটা বিদ্যুৎ স্পর্শ করে গেল কৃষ্ণকান্তকে ।

বহুকাল আগে, ধুব যখন ফেরার, রেমি যখন বিবাহবিচ্ছেদের কথা ভাবছে, তখন এই রাজাকে তিনি ডেকে পাঠিয়েছিলেন নিজের চেম্বারে । খুব বিশ্বাসযোগ্য ছেলে । নির্ভর করা যায় ।

বললেন, ক’দিনের জন্য আমি দিল্লি যাবো, তুই ক’টা দিন বউমাকে একটু দেখাশোনা করবি ?

আমি ! রাজা অবাক হয়ে বলল, আমি কেন ?

তুই না কেন ?

বউদির সঙ্গে আমার তো তেমন—

তার দরকার নেই । তুই-ই দেখবি ।

রাজা দ্বিধা করে বলল, আচ্ছা, খোঁজ নেবো ।

খোঁজ নয় । গিভ হার রেগুলার কমপ্যানি ।

আচ্ছা ।

শোন গাড়ল, যেমন তেমন কমপ্যানি নয় । ধুবটা যা করেছে তা কহতব্য নয় । বউমা ডিভোর্সের কথা ভাবছে । আই ওয়ান্ট হার মোলডেড । তার জন্য যতদূর যা করতে হয় করবি ।

আমি ঠিক বুঝতে পারছি না ।

ঠিক আছে । বুঝিয়ে দিচ্ছি ।

কৃষ্ণকান্ত সেদিন রাজাকে গোটা প্ল্যানটাই বুঝিয়ে দিয়েছিলেন ।

॥ ৪৫ ॥

কয়েকদিন যাবত অনেক ভাবলেন হেমকান্ত । অবস্থা গতিক যা দাঁড়িয়েছে তাতে বিনোদচন্দ্রকে কিছুতেই আর চক্ষুলজ্জা বজায় রেখে এ বাড়িতে অধিষ্ঠান করতে দেওয়া যায় না । অথচ মনু চলে যাবে, একথা ভাবতেও পারেন না হেমকান্ত । মনু তো একটা মেয়েই মাত্র নয়, সে তাঁর অস্তিত্বেরই একটা অবিচ্ছেদ্য অংশ ।

হেমকান্ত দাপট দেখাতে জানেন না । কৌশল বা কূটবুদ্ধিও তাঁর নেই । তবু মাথা খাটিয়ে অনেক ফান্দি-ফিকির বের করার চেষ্টা করলেন । বলা বাহুল্য কোনোটাই তেমন গ্রহণযোগ্য মনে হল না ।

এর মধ্যেই একদিন কনককান্তি কলকাতায় রওনা হয়ে গেল। তবে বউ আর ছেলেমেয়েকে রেখে গেল কিছুদিনের জন্য। এখনো বাচ্চাদের স্কুল বন্ধ। চপলারও তেমন যাওয়ার ইচ্ছে নয়। ঠিক হল, পরে কেউ গিয়ে ওদের কলকাতায় পৌঁছে দেবে।

কনককান্তি চলে যাওয়ায় একটু হাঁফ ছাড়লেন হেমকান্ত। ছেলেদের সঙ্গে তাঁর একটা অপরিচয়ের ব্যবধান আছে। তার ওপর ওদের সামনে তিনি নিজের ইচ্ছা অনিচ্ছার কথা তেমন জোরের সঙ্গে প্রকাশ করতে পারেন না। কেমন যেন মিইয়ে যান, প্রতিরোধহীন হয়ে পড়েন। এটাই হয়তো ব্যক্তিত্বহীনতা। তাই কনককান্তি চলে যাওয়ায় তার মনের ওপর থেকে একটা চাপ সরে গেল। মাথায় সম্ভব অসম্ভব বুদ্ধিও খেলতে লাগল অজস্র।

একদিন সকালে তিনি বিনোদচন্দ্রকে ডেকে পাঠালেন বৈঠকখানায়। বিনোদচন্দ্র ভারী ভীত ও বিষণ্ণ মুখে এসে দাঁড়ালেন। উচ্ছেদের ভয় মানুষের এক মস্ত শত্রু। বিনোদচন্দ্র হাত কচলাচ্ছেন। ব্রাহ্মনোচিত তেজবীর্য তাঁর কোনোদিনই ছিল না। আজ বিরূপ পরিস্থিতিতে মেরুদণ্ড আরো নুয়ে গেছে।

হেমকান্ত আড়চোখে বিনোদচন্দ্রের অবস্থাটা লক্ষ করে বললেন, আপনি সংস্কৃত কীরকম জানেন ঠাকুরমশাই ?

কিছু কিছু জানি।

কিছু মানে কতটা ?

কাব্য পাশ করেছি।

সে তো বহু কাল আগে। চর্চা কি আছে ?

আছে একটু-আধটু।

যদি একটা চতুষ্পাঠী খুলি তাহলে পড়াতে পারবেন ?

পারব।

এমনিতে পারবেন না। একটু ঝালিয়ে নিতে হবে।

আজ্ঞে, তাও নেবো।

আপনার শরীর কেমন ?

বড় দুর্বল লাগে। মাথাটা ঘোরেও মাঝে মাঝে।

তাহলে কী করে পারবেন লক্ষ্মীকান্ত কি সংস্কৃত জানে ?

সামান্য জানে।

তাহলে সেও পারবে না।

যদি চেষ্টা করে তাহলে পারবে।

হেমকান্ত একটু বিরক্ত হয়ে বললেন, আপনাদের বৃত্তিই তো পৌরোহিত্য। তার ওপর মন্ত্ৰটন্ত্রও দেন। আপনারা সংস্কৃত চর্চা করেন না কেন ?

বিনোদচন্দ্র কাঁচুমাচু মুখ করে মেঝের দিকে চেয়ে রইলেন।

হেমকান্ত বললেন, সংস্কৃতজ্ঞান আপনার কুলকর্মের পক্ষেই একান্ত দরকার। সেটাও যদি না থাকে তবে কী করে কাজ হবে বলুন তো ! শুধু একটু নিতাপূজা আর পঞ্জিকা দেখে শুভকর্মের দিন স্থির করা এইতেই কি সব হয় ?

আজ্ঞে আমি তো কোষ্ঠীও করে থাকি।

হেমকান্ত ভূকুটি করে বললেন, তবেই তো হয়ে গেল। কোষ্ঠী করা কি একটা সামাজিক কাজ নাকি ?

বিনোদচন্দ্র ফের হাত কচলাতে থাকেন।

হেমকান্ত যথার্থ রূঢ় হতে পারেন না। তাঁর স্বভাবেই সেটা নেই। তাই একটু পরেই গলা নরম

করে বললেন, সে যাই হোক । কৃষ্ণকান্তকে আমি একটু সংস্কৃত শেখাতে চাই । ছেলোটো মেধাবী বলেই মনে হয় । আপনি কি কাজটা পারবেন ?

আজ্ঞে খুব পারব ।

ভেবেচিন্তে বলুন ।

পারব ।

লোভের বশবর্তী হলে মানুষ অনেকরকম সম্ভব অসম্ভব চিন্তা করে, পারগতার কথা ভাবে না । হেমকান্ত তা জানেন বলেই বিনোদচন্দ্রের মুখের দিকে কিছুক্ষণ চিন্তিত ভাবে চেয়ে রইলেন । তারপর বললেন, শিক্ষা যেটুকু দিতে পারেন সেটুকুই দেবেন । কিন্তু ভুল শেখাবেন না । এই বয়সে কোনো শিক্ষার মধ্যে ভুল থেকে গেলে তা আর পরে বড় একটা শোধরায় না ।

আজ্ঞে আমি খুব যত্ন করে শেখাবো ।

হেমকান্ত মুখ ফিরিয়ে নিয়ে বললেন, যদি ওর শিক্ষার ভার আপনাকে দেওয়া হয় তাহলে আপাতত আপনারা এ বাড়িতেই থাকবেন ।

বিনোদচন্দ্রের বিমর্ষ মুখ কিছু উজ্জ্বল হল । তবে ভয়টা একেবারে কাটল না । খুব স্তিমিত গলায় বললেন, আমার আর দিন বেশী বাকী নেই । যে কটা দিন আছি এবাড়িতেই যদি থাকতে দেন ।

হেমকান্ত মাথা নেড়ে বললেন, সেরকম কথা দিতে পারি না । এস্টেটের অবস্থা ভাল নয় । আদায় উসূল সামান্য । খাজনা বাকি পড়ছে । যুগও পাট্টাচ্ছে । এখন ছেলেদের সিদ্ধান্তও ভেবে দেখতে হবে । তাই সব অবস্থার জন্য নিজেকে প্রস্তুত রাখুন । সেটাই বুদ্ধিমানের কাজ হবে ।  
যে আজ্ঞে ।

কটা দিন বইপত্র নাড়াচাড়া করে নিন । চর্চার অভাবে অনেক কিছুই ভুলে যাওয়া স্বাভাবিক । বইটাই যদি কিছু লাগে তবে কাছারিতে বলে দেবেন, ওরা আনিয়ে দেবে ।

বিনোদচন্দ্র বিদায় নিলে হেমকান্ত ভাবতে লাগলেন, কাজটা ঠিক হল কিনা । মনুর প্রতি তাঁর দুর্বলতার কথা বোধহয় সর্বজনবিদিত । সেক্ষেত্রে যে কাজটা তিনি করলেন তা যে মনুকে কাছে রাখার জন্যই এটা সবাই টের পেয়ে যাবে । কিন্তু তিনি আর কীই বা করতে পারতেন !

উঠে আস্তে আস্তে কাছারি পেরিয়ে ঠাকুরদালানের দিকে এগিয়ে গেলেন হেমকান্ত । আজকাল কেন যেন তাঁর কিছুই তেমন ভাল লাগে না । কেন লাগে না তা টের পান মাঝে মাঝে । চমকে ওঠেন । বড় বউমা আসার পর মনু আর অনায়াসে তাঁর কাছে আসতে পারে না । আর মনুর সঙ্গে দেখা হয় না বলেই ক্রমে ক্রমে দিনক্ষয় তাঁর কাছে আলুনি লাগে ।

ঠাকুরদালানের দিকে বহুকাল আসেননি । দূর থেকে শীখ, ঘন্টা, কাঁসর শোনে । তবে নিজে আসেন না । ঠাকুর দেবতার প্রতি তেমন কোনো আকর্ষণ নেই তাঁর । তিনি অবশ্য নাস্তিকও নন । তাঁকে নির্বিকার বলা যায় ।

সিড়ির নিচে দাঁড়িয়ে তিনি চমৎকার একটা গন্ধ পেলেন । নানারকম ফুল, বেলপাতা, আশ্রপল্লব, চন্দন, ধূনোর বহুদিনকার সঞ্চিত গন্ধ । মনটাকে ভিজিয়ে দেয় । সিড়ি ভেঙে ওপরে উঠলেন । মন্দিরটার কিছু সংস্কার প্রয়োজন । স্বেতপাথরে বাঁধানো মেঝের পাথরগুলোর জোড় খুলে এসেছে । ধামে ফাটল । পলেস্তারা খসেছে । তবু বেশ পরিষ্কার পরিচ্ছন্ন । মন্দিরে মার্জনার কাজটুকু মনু করে, তিনি জানেন ।

হেমকান্ত অনুচ্চ স্বরে ডাকলেন, মনু ! মনু আছো নাকি ?

রঙ্গময়ী মন্দিরের ঘর থেকে বেরিয়ে এল । পরনে পাটের লালপেড়ে শাড়ি, কপালে তেলসিঁদূরের ফোঁটা, চোখে বিস্ময় ।

তুমি !

তোমার খোঁজে এলাম । আজকাল তো দেখা দাও না ।

রঙ্গময়ী মৃদু একটু হাসল, তবু ভাল। দেখা চাও তাহলে!

হেমকান্তর রসিকতাবোধ লুপ্ত হয়েছে। মন বড় অস্থির। আবেগকম্পিত। হঠাৎ বললেন  
আমরা কে কতদিন বেঁচে থাকব মনু?

তার মানে? আবার ওসব কথা কেন?

আমাদের আয়ু যে ফুরিয়ে আসছে তোমার আমার।

বালাই ষাট। আয়ু ফুরোবে কেন! কোন দুঃখে?

ঠাট্টা কোরো না। আমার মন ভাল নেই।

রঙ্গময়ী একটা আসন বের করে পেতে দিল বারান্দায়। বলল, বোসো।

হেমকান্ত বসলেন। বললেন, আমার মন বড় অস্থির মনু।

কেন অস্থির?

মনে হচ্ছে তোমাকে ছাড়া আমার পক্ষে বেঁচে থাকা অসম্ভব।

রঙ্গময়ী হেমকান্তর ঈষৎ স্থলিত ও সামান্য কম্পিত কণ্ঠস্বর লক্ষ্য করে। এতটা আবেগ হেমকান্তর মধ্যে সে কখনো দেখেনি। ঠাণ্ডা মেঝের ওপর হেমকান্তর মুখোমুখি বসে সে মেঝেতে আঙুলের দাগ দিতে লাগল। তারপর মৃদুস্বরে বলল, এটা তুমি এতদিনে বুঝলে। আমি তো জানিই, আমি চলে গেলে তুমি টিকতে পারবে না এখানে। তাই এত অপমান সয়েও পড়ে আছি। শুধু তোমার জন্যে।

কে তোমাকে অপমান করে মনু?

কে না করে বলো! তাদের নাম শুনলে কী করবে? মাথা কাটবে?

না। কিন্তু তোমাকে অপমান করে কেন?

করে সেটা নিয়ম বলেই। বামুনঘরের আইবুড়ো মেয়ে। তার ওপর অনেক রটনাও তো আছে।

তোমার অনেক কষ্ট, না মনু?

অনেক। কিন্তু সেগুলোর ভাগ নিতে যেও না। সইতে পারবে না।

কষ্টের ভাগ নিতে কে চায় বলো। কিন্তু তোমার জন্য আমার মন খারাপ লাগে।

সেটুকুই আমার যা কিছু ভরসা। বোঝো না?

হেমকান্ত খানিকক্ষণ বুম হয়ে বসে রইলেন। গ্রীষ্মের বেলা বাড়ছে। রোদের তাপে তেতে উঠছে মেঝে। হেমকান্ত ঘামছেন। কিন্তু এসব তেমন খেয়াল করছেন না। অনেকক্ষণ বাদে বললেন, তোমাকে আজ স্পষ্ট করে কথাটা বললাম। বলে একটু লজ্জাও করছে।

লজ্জার কী?

তুমি কী ভাববে!

সেই এইটুকু বয়স থেকে যা ভেবে আসছি তা কি আর পাল্টায়?

শোনো, তোমাদের এ বাড়িতে রেখে দেওয়ার একটা ব্যবস্থা বোধহয় হয়ে যাবে। আমি তোমার বাবাকে বলেছি কৃষ্ণকান্তকে সংস্কৃত পড়াতে।

রঙ্গময়ী চোখ কপালে তুলে বলে, কবে বললে?

আজই। একটু আগে।

সর্বনাশ। বাবা কি সংস্কৃত জানে নাকি?

জানে না? একটু-আধটু নয়?

রঙ্গময়ী হেসে ফেলে বলে, সে যা জানে তা না জানার মতোই। তুমিও একটা পাগল। বলার আগে আমার সঙ্গে পরামর্শ করে নাওনি কেন?

হয়তো করা উচিত ছিল। কিন্তু ভাবলাম তোমাদের নিয়েই যখন সমস্যা তখন তুমি হয়তো এ ব্যাপারে কিছু বলতে চাইবে না। লজ্জা পাবে। তোমার আত্মসম্মানবোধও তো সাজঘাতিক।

রঙ্গময়ী স্নিগ্ধ চোখে হেমকান্তর দিকে চেয়ে স্নিগ্ধমুখে বলে, আশ্বাসমানজ্ঞান ? ওকথা বোলো না । সব ভাসিয়ে দিয়েছি জলে । নিজের মধ্যেই তো আমি নিজে থাকি না । সবসময়ে শুধু ভাবি আর তো কেউ তোমাকে বোঝে না । আমি চলে গেলে তোমার কী হবে !

হেমকান্ত কয়েকবার গলা খাঁকারি দিলেন । ব্রহ্মপুত্রের দিকে তাকিয়ে থেকে বললেন, কাজটা কি তাহলে ঠিক হয়নি ?

কৃষ্ণকে সংস্কৃত পড়ানোর কাজটা তো ! না, ঠিক হয়নি ।

তাহলে কী হবে ?

বাবা সংস্কৃতের চর্চা কোনোকালেই তেমন করেননি । দাদা তো আরো অগামার্ক । কৃষ্ণ মাথাওয়ালা ছেলে, ওকে পড়ানো কি যার-তার কাজ ।

তাহলে একটা উপায় তো কিছু করতে হবে ।

সেজন্য তুমি ভেবো না । ওকে আমিই পড়াতে পারব ।

তুমি সংস্কৃত জানো ?

টোলে চতুষ্পাঠীতে শিখিনি । তবে হাতে কাজ নেই বলে বসে বসে উপক্রমণিকা নাড়াচাড়া করতাম । তারপর একটু একটু করে খানিকটা শিখেছি । নিজে নিজেই ।

বলো কী ? হেমকান্তর গলায় সত্যিকারের বিস্ময় ।

এমন কিছু হাতিঘোড়া কাজ নয় । তোমার তো মনে নেই, কৃষ্ণকে আমি প্রথম থেকেই অ আ ক খ শেখাতাম । এখনো ওর সব বইপত্র আমি নাড়াচাড়া করি । একটু একটু বুঝিও । ওকে পড়ানো শক্ত হবে না ।

তোমার বাবাকে তাহলে কী বলব ?

তোমাকে কিছু বলতে হবে না । আমিই বলব ।

বাঁচালে ।

রঙ্গময়ী একটু হাসল । তার চোখেমুখে এক আশ্চর্য দীপ্তি দেখা যাচ্ছে । এমনটি আর কখনো দেখেননি হেমকান্ত । মুগ্ধ হয়ে চেয়ে রইলেন । রঙ্গময়ী চোখ নামিয়ে নিল । মৃদুস্বরে জিজ্ঞেস করল, কেমন আছে নাতি-নাতনী নিয়ে ?

ভালই তো । শুধু তোমার অভাব ।

সব কি একসঙ্গে পাওয়া যায় ?

বউমার সঙ্গে কি তোমার ভাব নেই মনু ? তাহলে যাওনা কেন ?

ভাব আছে । আর সেটাকে রাখতে চাই বলেই যাই না ।

সে তোমার যা বিবেচনা । তবে আজকাল বউমা সবসময়ে তো বাড়িতে থাকে না । বেড়াতে টেড়াতে যায় বোধহয় । তখন ফাঁকমতো যেও ।

রঙ্গময়ী এ কথায় একটু গম্ভীর হল । বলল, চোরের মতো যাবো কেন ?

হেমকান্ত রহস্য করে বললেন, কিন্তু তুমি তো চোরই । বরাবর পরের ধনে তোমার পোন্দারী ।

সেটা আবার কী ? কার ধনে— ? বলে রঙ্গময়ীও হেসে ফেলে ।

ঠিক বলিনি ?

রঙ্গময়ী মাথা নেড়ে বলে, না, ঠিক বলোনি । তুমি কখনো পরের ধন ছিলে না ।

তাই নাকি ?

তা ছাড়া আবার কী ? সুনয়নী তোমাকে স্বামী হিসেবে পেয়েছিল সে তার ভাগ্য । আমি তো সেভাবে পাইনি । কিন্তু পাই বা না-পাই জিনিসটা যে আমার তা আমি মনে মনে জানি ।

হেমকান্ত ভেবেছিলেন, তিনি এই ঐতাল্লিশ বছর বয়সে যথেষ্ট বুড়া হয়ে পড়েছেন । কিন্তু লজ্জারক্তিম মুখশ্রী, স্মুরিতাধর এবং নতচক্ষু নিয়ে অকপট গভীর গলায় রঙ্গময়ী যা উচ্চারণ করল

তা শুনে তাঁর ভিতরে যৌবনোচিত এক শক্তি জেগে উঠল যেন । তিনি ইচ্ছে করলে এখন সেই যুবা বয়সের মতোই এক সাঁতারে ব্রহ্মপুত্র এপার ওপার করতে পারেন, হাজারবার মুণ্ডর ঘোরাতে পারেন, মাইলের পর মাইল নৌকো বেয়ে চলে যেতে পারেন ।

হালকা শরীর ও ফুরফুরে মন নিয়ে হেমকান্ত উঠলেন । বললেন, ঠাকুরদালানকে অনেকক্ষণ অপবিত্র করেছি । আমি অভক্ত মানুষ ।

রঙ্গময়ী মৃদুস্বরে বলল, তার চেয়েও বড় কথা, এতক্ষণ ধরে অনেক জোড়া চোখ আড়াল আবড়াল থেকে উঁকি দিয়ে তোমাকে আর আমাকে দেখেছে । এসো গিয়ে এখন । ভয় পেও না, আমাকে মেরে না ভাড়া লে আমি এ বাড়ি ছেড়ে যাবো না ।

হেমকান্ত একটা স্বস্তির বড় শ্বাস ছাড়লেন ।

যখন নামছেন তখন রঙ্গময়ীও কয়েক ধাপ সিঁড়ি সঙ্গে নামল । হঠাৎ মৃদুস্বরে বলল, একটা কথা । বলো ।

বড় বউমার ওপর একটু নজর রেখো ।

তার মানে ?

সব কথার কি মানে হয় ?

হেমকান্ত ভ্রুকুটি করে বললেন, তুমি কোনো কথাই খামোখা বলো না । নজর রাখার প্রয়োজন কী ? চপলা কি ছেলেমানুষ ?

ছেলেমানুষ ছাড়া আর কী ? কতই বা বয়স ?

কি ভাবে নজর রাখা সম্ভব ? আর ও কীই বা করছে ?

রঙ্গময়ী চুপচাপ একটু দাঁড়িয়ে রইল । ভাবল । তারপর বলল, আচ্ছা সেটা পরে বলা যাবে । সুযোগমতো ।

রহস্য রাখছো ? জানো তো, এসব ইংগিতপূর্ণ কথা শোনার পর আমি কিরকম উদ্বেগে থাকব !

জানি । তাই কথাটা বলেই মনে হল ভুল করলাম ।

আসল কথাটা কী ?

তুমি বরং ওকে তাড়াতাড়ি কলকাতায় পাঠানোর ব্যবস্থা করে দাও ।

আমি ব্যবস্থা করলে কী হবে ? বউমা নিজেই তো যেতে চাইছে না বলে শুনেছি ।

ঠিকই শুনেছো । আর সেজন্য কনকের সঙ্গে বউমার কিছু কথা কাটাকাটিও হয় । সে খবর রাখো !

আমি কোনো খবরই রাখি না মনু । কেউ আমাকে কিছু বলে না । ওদের কথা কাটাকাটি হল কেন ?

কনকের ইচ্ছে ছিল না চপলাকে রেখে যেতে ।

তবে গেল কেন ?

সেইটেই তো কারণ । চপলা যায়নি । এদিকে বিশাখার সঙ্গেও চপলার বনিবনা হচ্ছে না । তুমি বোধহয় সে খবরও রাখো না ।

না । বলেছি তো, খবর আমি পাই না । বনিবনা হচ্ছে না কেন ?

কারণটা শুনতে চাও ?

বড্ড কথা ঘোরাও তুমি । হেমকান্ত বিরক্ত হলেন ।

বলছি । রাগ কোরো না কিন্তু । যা বলছি তা চুপ করে শুনবে । তারপর ঘরে গিয়ে বসে ব্যাপারটা ভাববে ।

ঠিক আছে । বলো ।

বড় বউমা শচীনের সঙ্গে বড্ড বেশী মাখামাখি করছে ।

হেমকান্ত হতভম্ব হয়ে যান। তারপর বলেন, কী করছে ?

আঃ অত জোরে নয়। বলেছি না চুপ করে শুনবে।

হেমকান্ত রঙ্গময়ীর মুখের দিকে পলকহীন চেয়ে থেকে বললেন, আমি যে কথাটা ভাল বুঝতেই পারছি না।

এখন বুঝবেও না। ঘরে গিয়ে ভাবো একটু। আর বড় বউমার ওপর একটু নজর রাখো। দাসীর কথা বাসী হলে মিষ্টি হয়।

বজ্রাহত হেমকান্ত ঘরে ফিরে এলেন। এরকম সুন্দর একটি সকালের যে এমন পরিণতি হবে তা তিনি আশা করেননি। ঘরে বসে অনেকক্ষণ রঙ্গময়ীর কথাটা ভাবলেন। ভেবে মাথামুণ্ড কিছু বুঝতে পারলেন না। ইংগিতটা অবশ্য স্পষ্ট ও প্রাঞ্জল। কিন্তু সেই ইংগিত তাঁর মন গ্রহণ বা অনুবাদ করতে চাইছিল না।

খাওয়ার সময় চপলা সামনে ছিল আজ। বারবার তার মুখের দিকে চেয়ে দেখলেন হেমকান্ত। মানুষ, বিশেষ করে মেয়েমানুষ সম্পর্কে তাঁর অভিজ্ঞতা এত কম যে, মুখ দেখে কিছু অনুমান করা খুবই কঠিন।

চপলা বলল, বাবা আজ কিছুই খাচ্ছেন না।

খিদে নেই।

শরীরটা কি খারাপ ?

না মা, এই বয়সে একটু কম খাওয়াই ভাল।

আপনার বয়স তো তেমন কিছু নয় বাবা। আমার বাবারও তো একই বয়স। বাবা এখনো যা খেতে পারেন !

ওঁর কথা আলাদা। উনি শিকারী মানুষ। মজবুত স্বাস্থ্য।

তা অবশ্য ঠিক।

ছেলের বউ স্বশরীর সঙ্গে এত কথা বলে এটা সুনয়নীর পছন্দ ছিল না। কিন্তু সুনয়নী নেই। তাই পর্দা সরে গেছে। হেমকান্ত আজ চপলার সঙ্গে কথা বলতে কেমন যেন বিব্রত হচ্ছেন বারবার। মনে হচ্ছে, স্ত্রীর মতো কেউ একজন থাকা দরকার ছিল। স্ত্রী অনেক কিছু সামাল দেয়।

হেমকান্ত হঠাৎ বললেন, বিশাখাকে দেখছি না !

সে তো নিজের ঘরে।

ভাল আছে তো !

আছে। ডাকবো ?

না। দরকার কী ? হয়তো কাজটাজ কিছু করছে।

চপলা আর কিছু বলল না এ প্রসঙ্গে। পরিবেশন করতে করতে বলল, সেদিন আপনি এসরাজ বাজালেন না বাবা, আপনার এসরাজ আর শোনাই হল না।

ও আমি ভুলে গেছি।

এসব কি মানুষ ভোলে ! আমাদের খুব ইচ্ছে একদিন শুনি।

আচ্ছা, দেখা যাবে।

একদিন জলসা বসাবো বাবা ?

জলসা ! না, তার দরকার নেই। হেমকান্ত আবার এই প্রগল্ভতার সামনে অস্বস্তি বোধ করতে থাকেন।

আপনি এসরাজ বাজাবেন। শচীনবাবু গান গাইবেন। বেশ জমবে।



ভীড়ের ভিতর দাঁড়িয়ে একটু আড়াল থেকে রাজা কয়েক পলক কৃষ্ণকান্তকে দেখল। লোকটাকে কি সে ঘেন্না করে? না পছন্দ করে? তাও না। লোকটার ওপর কি তার রাগ আছে? থাকারই কথা। কিন্তু বাস্তবিক কোনো রাগও রাজা অনুভব করে না। সে খুব ভাল করে জানে, কৃষ্ণকান্তের চারপাশে যে দেশ কাল পরিস্থিতি তা তাঁর কাছে একটা দাবার ছক এবং তাঁরা সবাই ঘুঁটি মাত্র। ওই অতিশয় সুপুরুষ, কান্তিমান মানুষটির আর সব কিছুই আছে, কিন্তু হৃদয়বস্তা নেই। মানুষকে তিনি ব্যবহার করেন নিজের প্রয়োজনে। ওঁর জীবনটাই কিছু উদ্দেশ্য সাধনের সমন্বয় মাত্র। আর কিছু নয়।

শুধু একটা মাত্র জায়গায় তাঁকে দ্রব হতে দেখা গেছে। সে ওই রেমি। রেমির জন্য তিনি অনেক কিছু করেছেন। এমন কি তার নিঃসঙ্গতায় রাজাকে লেলিয়ে দেওয়ার মতো নীতিবোধহীন ষড়যন্ত্রেও তাঁর অরুচি হয়নি।

ব্যাপারটা বুঝতে রাজার একটু সময় লেগেছিল। ধুব বা কুট্রিলা বাড়ি-ছাড়া রেমি অর্থাৎ কুট্রিবউদি একা। সুতরাং তাকে সঙ্গ দিতে গিয়ে রাজা একটা সূক্ষ্ম তন্তুর মায়াজালে জড়িয়ে পড়েছিল।

সেই প্রথম দিন রেমি তেমন স্বচ্ছন্দ ছিল না। বার বার উচাটন হয়ে ধুবর খোঁজ করছিল। বলছিল, আমাকে ওর অফিসে একবার নিয়ে চল।

কিন্তু তা সম্ভব ছিল না। ধুব কতটা বিপজ্জনক সে ধারণা বোধহয় কচি মেয়েটার নেই। কিন্তু তারা, অর্থাৎ ধুবর আত্মীয়-পরিজন ও বন্ধুরা জানে অস্থিরচিত্ত ধুবর পক্ষে সব রকম কাজই সম্ভব। রেগে গেলে খুব স্থির বুদ্ধিতে মানুষকে খুন করা তার কাছে কিছুই নয়। তার বন্ধুদের মধ্যে লোচ্চা, বদমাস, গুন্ডা, মস্তানদেরও অভাব নেই। বরং তাদের সংখ্যাই বেশী। এক দুর্বোধ্য কারণে এইসব বদখত লোকেরা ধুবর জন্য জান কবুল করতে পারে। উপরন্তু ধুব যখন খুশি যার-তার সঙ্গে যেমন তেমন ব্যবহার করতে অভ্যস্ত। এক দূর সম্পর্কের কাকা আসতেন তাদের বাড়িতে। প্রীতিনাথ। ওরকম মানুষ বড় একটা দেখা যায় না। ব্রিটিশ আমলের সন্ত্রাসবাদী। জেল তো খেটেছেনই, অত্যাচার নিপীড়নও বড় কম সহ্য করেননি। শোনা যায়, তাঁর সহ্যশক্তি ছিল প্রায় অবিশ্বাস্য। প্রীতিনাথ কার্যত ছিলেন ধুবর গুরু। তাঁকে যত শ্রদ্ধা করত ধুব এমনটা আর কাউকে করত না। নিলেভি, উদাসীন, পরোপকারী ও ব্যক্তিত্বশালী এই মানুষটি বেঁচে থাকলে আজ কৃষ্ণকান্তের চেয়ে অনেক বড় নেতা হতে পারতেন। ধুব তাঁর এমনই ভক্ত হয়ে পড়ে যে, একসময়ে প্রীতিনাথের খড়্গপুরের আস্তানাতেই সে মাসের মধ্যে বিশ পঁচিশ দিন পড়ে থাকত। প্রীতিনাথ রাজনীতি করতেন, ধুব তাঁর সঙ্গে ছায়ার মতো ঘুরত। কৃষ্ণকান্তের চেয়ে বয়সে অনেক ছোট ছিলেন প্রীতিনাথ। তাঁর একটা দোষ ছিল, শরীর সম্পর্কে অবহেলা। একবার গ্রামের রাস্তায় বর্ষাকালে পড়ে গিয়ে তাঁর পা মচকায়। সেই মচকানো পায়ের ব্যথায় শয্যা নিলেন। অনেক ডাক্তার দেখল, কিছু করতে পারল না। অবশেষে প্রীতিনাথের ভক্তরা কলকাতা থেকে এক বড় ডাক্তারকে ধরে নিয়ে গেল। তিনি দেখে শুনে গাদাগুচ্ছের অত্যন্ত কড়া জাতের ব্যথার ওষুধ খাওয়ালেন। এমনিতেই ব্যথাহারা বড়ি খেতে গেলে কিছু বেছেগুছে এবং ভালরকম প্রতিষেধক নিয়ে খাওয়া উচিত, তার ওপর অতগুলো বড়ি। প্রীতিনাথ অম্লানবদনে খেয়ে গেলেন। একশো পঁচিশটা বড়ির একটা কোর্স শেষ হওয়ার পর পায়ের ব্যথা কমে গেল। কিন্তু তখন পেটে একটা চিনচিনে ব্যথা শুরু হয়েছে। কলকাতায় এসে সেই ডাক্তারের সঙ্গে দেখা করলেন প্রীতিনাথ। ডাক্তার পেটের ব্যথা শুনে অভয় দিয়ে এক শিশি অ্যান্টিসিড খেতে বলে দিল। কিন্তু তাতে কাজ হল না। বড় দেরী হয়ে গেছে তখন। পেটের রহস্যময় সেই ব্যথাটা বাড়তে লাগল ক্রমে ক্রমে। অসহ্য হয়ে উঠল। পাক্সা দুবছর প্রীতিনাথ অমানুষিক যন্ত্রণা ভোগ করলেন। অসুখ ধরা পড়ল একেবারে শেষ অবস্থায়। ক্যানসার।

সেই বাথার সময় ধুব প্রায় একটানা তাঁর কাছে থেকেছিল। কিন্তু তার মুখচোখে কোনো বিষণ্ণতা বা উদ্বেগের কোনো ভাব দেখিনি রাজা। ধুবের চোখদুটো নিবিষ্টভাবে লক্ষ্য করত প্রীতিনাথকে। একবার সে মৃত্যুপথযাত্রী প্রীতিনাথকে বলে বসল, আপনার ওপর আমার আর শ্রদ্ধা নেই। আমি ভাবতাম আপনি পৃথিবীর সব ব্যথা সহ্য করতে পারেন। কিন্তু এখন বুঝেছি, আপনি আমাদের মতোই সাধারণ।

প্রচণ্ড যন্ত্রণা ভুলে প্রীতিনাথ তাঁর একনিষ্ঠ ভক্তটির দিকে অনেকক্ষণ অবিশ্বাসের চোখে চেয়ে থেকে বলেছিলেন, এমন ব্যথা যেন আমার শত্রুরও না হয়। তুমি বুঝবে না, কী সাজঘাতিক...! ওঃ

কিন্তু ধুব তার যা বোঝার তা বুঝে নিয়েছিল। প্রীতিনাথকে কাতর অবস্থায় সে লক্ষ্য করত। টেপ রেকর্ডারে তুলে নিত তাঁর নানারকম যন্ত্রণার শব্দ। সেই ক্যাসেট বোধহয় আজও সযত্নে রেখে দিয়েছে ধুব। প্রীতিনাথ মারা যাওয়ার পর কলকাতায় ফিরে এসে সবাইকে শুনিয়েছিল সেই ক্যাসেট। বলেছিল, আমি জানতাম, এইসব বিপ্লবীরা অল বোগাস। এরা কেউ ব্যথা যন্ত্রণা সহ্য করতে পারে না। মোস্ট অর্ডিনারি পিপল। প্রীতিকাকাকে আমার একসময় মনে হয়েছিল সুপারম্যান। দেখলাম, দূর! কিছু না। লোকটা মোস্ট এক্সপেণ্ডেবল।

এইসব সিদ্ধান্তে আসার পর ধুবকে বেশ সুখীই দেখিয়েছিল। প্রীতিনাথের মধ্যে অতিমানবকে খুঁজে না পেয়ে যেন সে নিশ্চিন্তই হয়েছে।

অনাদিক থেকে দেখতে গেলে এই ঘটনার মধ্যে যে বিকট নিষ্ঠুরতা আছে তা ধুব খেয়ালই করল না। শোনা যায়, প্রীতিনাথের মৃত্যুর কিছু আগে ধুব তাঁকে আত্মহত্যা করার পরামর্শ দেয়। সে নাকি বলেছিল, আপনার উচিত কাপুরুষদের পন্থা গ্রহণ করা। যন্ত্রণা যদি না-ই সহ্যেতে পারেন, দেন হোয়াই ডোন্ট ইউ কমিট সুইসাইড?

রাজা এরকম কিছু কিছু ঘটনার ভিতর দিয়ে ধুবকে চিনেছে। তাই সে সহজে তাকে ঘাঁটাতে চায় না।

রেমি বউদি এত ঘটনার কথা জানে না। ধুবকে চিনতে তার সময় লাগবে। বেচারী! বড় মানসিক কষ্টের মধ্যে এখন দিন কাটছে ওর।

বিকলে নাটকটা চুপ করে বসেই দেখেছিল রেমি। একটু খুশিই হয়েছিল। ফেরার পথে বলল, নাটকটা তো খুব খারাপ নয়, কিন্তু তোমার মিউজিক তো তেমন কিছু শুনলাম না।

মিউজিক মানেই কি গান বা কনসার্ট?

তবে কী?

আধুনিক নাটকে বা সিনেমায় ওরকম মিউজিক কম থাকে। ব্যাকগ্রাউন্ডে নানারকম সাউন্ড তৈরি করাও মিউজিক ডিরেক্টরের কাজ।

ছাই কাজ।

মুখে যাই বলুক রেমি, রাজা সম্পর্কে তার সেদিন একটু মনোযোগও এসে থাকবে।

সেই শুরু একটা অদ্ভুত, ঘন, প্রগল্ভ সম্পর্কের।

রাজার রেকর্ডিং-এ রেমি রেডিও স্টেশনে যেত। রাজার প্রোগ্রাম থাকলে গিয়ে শুনে আসত।

আরো মাসখানেক নিরুদ্দেশ থাকার পর কৃষ্ণকান্ত কলকাঠি নাড়তে লাগলেন। পুলিশকে সংবরণ করলেন। ধুব ফিরে এল।

সেই সময়টা কৃষ্ণকান্তর ভাল যাচ্ছিল না। একটা ফালতু কেলেকারিতে জড়িয়ে পড়ায় তাঁকে মস্তিষ্ক ছাড়তে হয়। প্রভাব প্রতিপত্তি কিছুই কমেনি, কিন্তু একটা ধাক্কা খেতে হল। একটানা দীর্ঘদিন তিনি মস্তিষ্ক করতে পারেননি। কখনো মস্তী হয়েছেন, কখনো বাদ গেছেন। কিন্তু মস্তীর পদ থেকে এভাবে কখনো সরে দাঁড়াতে হয়নি।

সেই দুঃসময়ে ধুব ফিরল। কৃষ্ণকান্ত মস্তিষ্ক হারানোর যখন সমস্ত পরিবারটাই কিছু বিষণ্ণ, তখন একমাত্র ধুবই আনন্দে ঝলমল।

বাড়িতে ফিরেই রেমিকে জিঞ্জেস করেছিল, তোমাকে মাঝে মাঝে এখানে সেখানে একটা ছোকরার সঙ্গে ঘোরাঘুরি করতে দেখা যায়। কে বলো তো ?

রেমি ঘাবড়ে গিয়েছিল একটু। চোখমুখ লাল করে বলল, ছোকরা আবার কে ? ও তো রাজা। খুব জবাবটা শুনল, তবু কিছুক্ষণ একদৃষ্টে চেয়ে বইল রেমির দিকে। কোনো অভিযোগ করল না, সন্দেহ প্রকাশ করল না, এমন কি তার তাকানোর মধ্যেও কোনো কুটিলতা ছিল না। বরং সহজ সরল এক তাকিয়ে থাকা যার কোনো মানে নেই।

কিন্তু সেই দৃষ্টির সামনে রেমি ঘামতে লাগল, লাল হয়ে যেতে লাগল লজ্জায়।

খুব রেমির প্রতিক্রিয়া লক্ষ্য করতে করতে মৃদু স্বরে বলল, তোমাকে আমি অনেকবারই বলেছি তোমার একজন সঙ্গী দরকার। যাকে প্রকৃত সঙ্গী বলা যায়। আমি তো তোমাকে কিছুই দিতে পারি না। না সঙ্গ, না হৃদয়।

রেমি হঠাৎ রেগে গিয়ে বলে, কী যা তা বলছ ?

খুব উদাস গলায় বলে, রাজা বড় ভাল ছেলে।

রেমি দাঁতে দাঁত পিষে বলল, ভাল ছেলেই তো। ওরকম ভাল তুমিও হতে পারো না ? না। খুব খুব গম্ভীর মুখে মাথা নেড়ে বলে, আমি তা হতে পারি না। এ জীবনে আর তা হবেও না। কিন্তু আমার রিফর্মেশন নিয়ে অত ভেবো না। খুব যদি রাজার মতোই হয় তবে খুবের মতো কেউ যে থাকবে না। খুব রাজা সবাইকে নিয়েই তো দুনিয়া।

রেমি আর কোনো কথা বলেনি।

খুব নিজেই জিঞ্জেস করল, রুস্তম কী বলছে ?

কে রুস্তম ? রেমি হুঁ কুঁচকে পাণ্টা প্রশ্ন করে।

আরে রুস্তম—মহান রুস্তম। তোমার স্বশুর এবং প্রাক্তন মন্ত্রী।

উনি রুস্তম হতে যাবেন কেন ?

বীরদেরই রকের ছেলেরা রুস্তম বলে। খারাপ কথা কিছু নয়। তোমার স্বশুরের প্রশংসাই করছি।

ওরকম রকবাজদের ভাষায় কথা বলছ কেন ?

খুব একটু হাসল। বিষঃ হাসি। তার চেহারাটা সেবার একটু খারাপ হয়ে গিয়েছিল। তবু শীর্ণ চেহারার ভিতর দিয়েও একটা ক্ষুরধার বুদ্ধির আলো ঠিকরে বেরিয়ে আসছিল।

খুবের সঙ্গে সেই সাক্ষাৎকাবের বিবরণ বিস্তারিতভাবে রেমি শুনিয়েছিল রাজাকে।

রাজা বলল, বউদি, খুবদার স্পাই সর্বত্র। আমাদের সব চলাফেরা কুট্রিদা লক্ষ্য রেখেছে।

রাখুক না। খারাপ কিছু তো নয়।

খারাপ নয়। খুবদা যদি সন্দেহ করে যে, আমি তোমার সঙ্গে প্রেম করছি ?

রেমি খুব অবাক হয়ে সরল দৃষ্টিতে তাকিয়েছিল রাজার দিকে। তারপর বলল, সন্দেহ করবে ! ওমা ! সন্দেহের কী ? আমরা প্রেমই তো করছি রাজা ! আরো করব। ইচ্ছামতো ঘুরব তোমার সঙ্গে, সিনেমায়, থিয়েটারে, গানের জলসায় যাবো দুজনে।

সর্বনাশ বউদি ! কুট্রিদা যখন ভাল তখন ভাল। কিন্তু যখন খারাপ—

রেমি সেই কথাটায় কান না দিয়ে বলল, তুমি অত ভেবো না। আমরা এমন বিহেভ করব যাতে ও সঁতাই ভেবে নেয় যে, আমি তোমার সঙ্গে প্রেম করছি। তখন ও এত জেলাস হয়ে উঠবে যে, জ্বলতে জ্বলতে এসে একদিন সারেগুড় করবে !

রেমির এই কথায় রাজার চোখ থেকে একটা পর্দা সরে গেল। একথা ঠিকই যে, রেমির সঙ্গে তার একটা দেওর-বউদির ঘনিষ্ঠ সম্পর্ক তৈরি হয়েছে। বরং আরো কিছু ঘনিষ্ঠতার ভালবাসা। প্রায় সর্বত্রই রাজার সহচরী রেমি বউদি এবং রেমি বউদির সহচর রাজা। এটা নিয়ে লোকে কিছু বলাবলি করলেও অবাক হওয়ার নেই। রাজাও এরকমই ভাবত। কিন্তু হঠাৎ বুঝতে পারল, রেমি হাজার

বছর ধরে তার ছায়া হয়ে ঘুরে বেড়ালেও কোনদিন কুট্টিদার দিক থেকে মন ফেরাতে পারবে না ।  
রেমিও তাকে ঘুঁটি বানিয়ে একটা প্রেম-প্রেম ভাব গড়ে তুলতে চাইছে, শ্রেফ ধুবর জনাই ।  
একবার তাকে ঘুঁটি বানিয়েছেন কৃষ্ণকান্ত । দ্বিতীয়বার বানাল রেমি । অথচ কেবলমাত্র ঘুঁটি  
হওয়ার কথা তো নয় তার । সে অতীব সুপুরুষ, উঁচু দরের গায়ক । নামকরা সঙ্গীত পরিচালকও ।  
যে কোনো মেয়ের পক্ষেই তাঁর প্রেমে পড়ে যাওয়া স্বাভাবিক ।

রাজা সেই প্রথম পরাজয়ের স্বাদ টের পেল । বার্থতা আর তেতো বোধে ভরে গেল তার  
অভ্যন্তর । সে বলল, আমি ওসব খেলার মধ্যে নেই বউদি । আমাকে রেহাই দাও ।

রেহাই চাইছো কেন, আমি কী করলাম বড় অভিমান ভরে রেমি বলল ।

বউদি, তুমি ছেলেমানুষ, সব বুঝবে না

আমার জন্য তোমার মায়া নেই

ভীষণ মায়া বউদি ।

তাহলে আমার জন্য এটুকু করো । পায়ে পড়ি ।

কোনটুকু বউদি ধুবরাকে তোমার অনুগত করে তোলা ?

হ্যাঁ রাজা । ও কেন আমাকে একটুও পাত্রা দেয় না ?

দেবে বউদি । কুট্টিদার জন্ম নভেম্বর মাসে । সায়ন মতে বৃশ্চিক রাশি । বড় সাজঘাতিক লোক ।

এ রাশির লোকেরা কোনো কালে মেয়েদের বশ হয় না ।

তুমি জ্যোতিষ জানো নাকি

ঠিক জানা একে বলে না । একটু-আধটু বইপত্র ঘেঁটেছি । কুট্টিদা আমার কাছে চিরকালই এক  
রহস্যময় মানুষ ।

আমার কাছেও । কী করবে বলো তো

কী বলব ? শুধু বলি, মেনে নাও ।

তুমি ওকে অত ভয় করো কেন

শুধু ভয় নয় বউদি, কুট্টিদাকে ভালোওবাসি ।

রেমি ভারী অসহায় ভাবে মুখখানা একটু হাঁ করে চেয়ে থেকে বাচ্চা বয়ঃসন্ধির মেয়ের মতো  
বলল, আমিও বাসি । কিন্তু কেন যে বাসি তা বুঝতে পারি না ।

সেটাই তো বৃশ্চিকের রহস্য । ও রহস্য ভেদ হওয়ার নয় ।

তা হোক । তুমি আমাকে ছেড়ে দিও না । তোমাকে আমার যে ভীষণ দরকার ।

আচ্ছা, আসব । কিন্তু আগের মতো যখন তখন ঘর থেকে বের করে নিয়ে যেতে পারব না ।

কুট্টিদা ব্যাপারটা পছন্দ না করতে পারে ।

কাঁদো কাঁদো হয়ে রেমি বলল, তাহলে তো বাঁচতাম রাজা । কিন্তু ও নিজেই আমাকে অন্যের  
সঙ্গে প্রেম করার পরামর্শ দেয় ।

ঠাট্টা করে ।

মোটাই নয় । আমি কি এতই বোকা যে ওর ঠাট্টাটাও বুঝতে পারব না ?

রাজা একটু হেসেছিল মাত্র ।

সেইসময় একদিন কৃষ্ণকান্ত ডেকে পাঠালেন রাজাকে । গভর্নমেন্ট প্লেস-এ কৃষ্ণকান্তর একটা  
পুরোনো চেমবার আছে । যখন রাজনীতি করেন না তখন মাঝে মাঝে তাঁর ল' প্র্যাকটিস করার কথা  
মনে হয় । ওকালতি করলে তাঁর আয় ভালই হত । একসময়ে একটা এটরনি ফার্মও খুলেছিলেন ।  
সেগুলো সব লাটে উঠেছে । তবে গভর্নমেন্ট প্লেস-এর চেমবারটা তাঁর এখনো আছে । সেখানেই  
দেখা হল ।

রাজা, কী খবর রে ?

ভাল ।

বউমাকে গানটান কিছু শেখালি ?

গান ! কই গান শেখানোর কথা কিছু বলেননি তো !

বলিনি ! তবে কী বলেছিলাম ?

জাস্ট কমপ্যানি দেওয়ার কথা বলেছিলেন ।

এমনি এমনি আবার কমপ্যানি কী রে কিছু একটা কাজ নিয়ে থাকবি তো

বউদিও গানের কথা কিছু বলেনি ।

বউমাব কি এখন সেরকম মন আছে ? দামড়াটার পাল্লায় পড়ে ওর হাড়মাস কালি হয়ে গেল  
বড় দুঃখী মেয়ে । একটু গানটান করলে মনটা ভাল থাকত । ওর গলা কেমন

একটু ভেবে রাজা বলল, বোধহয় খারাপ হবে না ।

তাহলে একটু শেখাস ।

যদি শিখতে না চায়

এমনিতে চাইবে না । গরজটা তুই-ই দেখাবি ।

ঠিক আছে, আপনি যখন বলছেন, দেখব ।

কৃষ্ণকান্ত একটু গম্ভীর হয়ে খানিকক্ষণ চুপ করে থেকে বললেন, তবে অনারেবল ডিসট্যানস  
বজায় রেখে যা করার করবে ।

অনারেবল ডিসট্যানস ! তার মানে ?

মেয়েদের সঙ্গে, বিশেষ করে গেরস্ত বউদের সঙ্গে একটা সম্মানজনক দূরত্ব থাকা ভাল ।

রাজা রেগে উঠতে যাচ্ছিল

কৃষ্ণকান্ত মৃদু হেসে বললেন, এগুলো ভাল কাস্টম । কাজ হয় ।

রাজা মনে মনে ভাবল, খচর বুড়ো, এই অনারেবল ডিসট্যানসের কথা এখন কেন ? আগে তো  
বলোনি কখনো ঘুষ !

গান শিখতে রেমি অবশ্য একটুও আপত্তি করল না । কারণ সে তখন যেমন করেই হোক  
রাজাকে হাতে রাখতে চায় ।

সপ্তাহে দু' দিন তিন দিন গিয়ে রেমিকে তালিম দিত রাজা । রেমির গলা ভাল । অনভ্যাসে বসে  
গিয়েছিল । তালিম পেয়ে গলা খুলল । তবে এমন কিছু উঁচুদরের গায়িকা রেমি নয় । শোনা যায় ।

সেই সঙ্গীত শিক্ষার আসরে মাঝে মাঝে ধুবও থাকত । ধুবর গান বা অন্য কিছুতেই আসক্তি  
নেই । সে শুধু লক্ষ্য করত দুজনকে ।

একদিন গান শিখিয়ে বেরিয়ে আসছে রাজা, ধুব তার সঙ্গ ধরল ।

রাজা ! একটা কথা বলবি ?

বলো কুড়িদা ।

কেসটা কী ?

কিসের কেস ?

এই তোমার আর রেমির ।

তা আমি কী করে বলব ?

তোকে ওর সঙ্গে ভেড়াল কে ?

হ্যাঁ । সবই তো জানো ।

না, জানি না । ভেড়ানোর ব্যাপারটায় একটু খটকা ছিল । মন্ত্রীমশাই তোকে কী বলেছিল ?

কমপ্যানি দিতে । তুমি নেই, বউদি একা । তাই ।

মতলবটা কী ?

তা জানি না কুড়িদা ।

মন্ত্রীমশাই আর একটা চাল চলেছে । কিন্তু চালটা বুঝতে পারছি না রে রাজা ।

আমিও বুঝতে পারছি না ।

তবে ভেড়ার মতো যা বলছে তাই করছিস কেন ?

কিছু ক্ষতি তো নেই

তোর নেই, কিন্তু রেমির আছে।

তার মানে ?

তোর অনেক গার্ল ফ্রেন্ড, আমি জানি একে রবীন্দ্রসঙ্গীত গেয়ে বেড়াস, তার ওপর লালটুমার্ক চেহারা। তোর ফ্যান অনেক। কিন্তু রেমি বোকা মেয়েমানুষ। ওর বয় ফ্রেন্ড কেউ নেই। ওসব বলছ কেন ?

বলছি, তোর আর রেমির মধ্যে যদি কোনো সফটনেস দেখা দেয় তাহলে সেটা কোনো পরিণতিতে যাবে না রেমির সঙ্গে তুই লাইফটা কাটাতে চাইলেও পারবি না। কৃষ্ণকান্ত তোকে কেটে ফেলবে। সুতরাং—

রাজা প্রতিবাদ করতে যাচ্ছিল।

কিন্তু ধুব বাধা দিয়ে বলল, আগে শোন। কেস যদি বিলা হয়ে যায় তবে তুই সইতে পারবি। কারণ তোর মেয়েছেলে অনেক দেখা আছে রেমি পারবে না। কারণ ও সিরিয়াস টাইপের মেয়ে।

তুমি কি আমাদের সন্দেহ করো কুট্রিদা ?

করি। কারণ কেসটা খারাপ হয়ে যাচ্ছে।

তবে আমাকে ছুটি দাও।

দূর পাগলা ! তুই ভাবছিস আমি রাগ করেছি মোটেই না। আমি চাই রেমি আমাকে ছেড়ে অন্য দিকে একটু ইন্টারেস্ট নিক। কিন্তু আমি চাইলেই তো হবে না। কেট্ট চৌধুরি রেমির চামচা। তাই বলছি খুব সাবধান।

উনিহ তো আমাকে বলেছেন।

কেন বলেছেন সেইটেই তো বুঝতে পারছি না রে গাড়ল। তাই ভাবছি রেমির জন্য উনি একটা নরবলির ব্যবস্থা করেছেন কিনা।

কী বলি ?

নরবলি। আমার মনে হচ্ছে তোকে উৎসর্গ করা হচ্ছে।

রাজা হেসে ফেলেছিল, ঠাট্টা করছ কুট্রিদা ?

না রে। ঠাট্টা নয়। কিন্তু তোকে নাভার্স দেখাচ্ছে কেন ?

কই নাভার্স ?

তোর ভয় নেই। আমি কিছু বলব না। ক্যারি অন। শুধু কেট্ট চৌধুরির দিকে নজর রাখিস।

## ॥ ৪৭ ॥

সকালবেলাতেই মামুদ সাহেব এসে হাজির। ছোটোখাটো মানুষ। মাকুন্দ। খুব ফটফটে সাদা পাজামা আর পানজাবি পরনে। মাথায় জালি কাজ করা ফেজ। গা থেকে মৃদু গোলাপী আতরের সুবাস ছড়াচ্ছে। মুখে একখান্না লবঙ্গ। চোখের দৃষ্টিতে খর বুদ্ধির চিকিমিকি।

হেমকান্ত মামুদকে আবাল্য চেনেন। তাঁর সমবয়সী। স্কুলে এক ক্লাস উঁচুতে পড়ত। বরাবরই দারুণ ভাল ছাত্র। কলকাতা থেকে ডাক্তারি পাশ করে এসে কিছুকাল প্র্যাকটিস করার চেষ্টা করে। কিন্তু পসার তেমন হয়নি। গোড়া হিন্দু পরিবারে মুসলমান ডাক্তার কল পায় না। ফলে মামুদকে একটা সীমাবদ্ধ গণ্ডীর মধ্যে প্র্যাকটিস করতে হয়। হেমকান্ত শুনেছেন, মামুদ বিলেতে যাওয়ার চেষ্টা করেছিল। বড় ডাক্তার হয়ে এলে হয়তো পসার জমত। কিন্তু সেটাও হয়ে ওঠেনি টাকার অভাবে।

অনেককাল মামুদের সঙ্গে দেখা হয়নি।

হেমকান্ত তাকে দেখে খুশি হয়ে বললেন, কেমন রে মামুদ, ভাল আছিস ?

মামুদ বললেন, তুই কেমন ?

বহুকাল তোর দেখা নেই। কী করছিস ?

কী আর করব ! হজটা সেরে এলাম।

হজ ! সে তো মক্কায় ! হেমকান্ত খুব বিস্মিত হয়ে চেয়ে থাকেন।

মামুদ সাহেব মদু হেসে বলেন, কাবা তো মক্কাতেই। সেটা কোন আহাম্মক না জানে ?  
অত দূরে গিয়েছিলি !

হ্যাঁ। এদিক ওদিক একটু ঘুরেও এলাম।

যাওয়ার আগে বলে যাসনি তো !

মেলা লোকের মেলা ফরমাস ছিল। মাথা গড়বড় হয়ে গিয়েছিল তখন। দেখা করার ফুরসৎ ছিল না।

হেমকান্ত একটা বিক্ষুব্ধ শ্বাস ছাড়লেন। মক্কা কতদূর ! তিনি নিজে কখনো অত দূরে যাবেন না।

মামুদ সাহেব গলাটা সাফ করে নিলেন। তারপর বললেন, কাবুলে খুব গভুগোল।

হেমকান্ত মাথা নাড়লেন। কাবুলের গভুগোলের কথা তিনি জানেন। আর একটা বিশ্বযুদ্ধ লেগে যেতে পারে। তবে সম্ভাব্য বিশ্বযুদ্ধ তাঁকে উদ্বিগ্ন করে না। বাইরের বড় বড় ঘটনা তাঁকে স্পর্শ করে কমই। তিনি শুধু মুখে একটা দুশ্চিন্তার ভাব ফুটিয়ে তুলতে চেষ্টা করলেন। হেমকান্ত জিজ্ঞেস করলেন, মক্কায় কিসে গেলি ? জাহাজে ?

মামুদ সাহেব এইসব আহাম্মকী প্রশ্নে মদু হাসলেন। বললেন, জাহাজ ছাড়া আর কিসে ? তবে কষ্ট হয়েছে খুব। বিমটিমি করে একদম শয্যা নিতে হয়েছিল।

জাহাজ ! হেমকান্তের মাঝে মাঝে জাহাজের কথা মনে হয়। স্টিমারে কয়েকবার চেপেছেন বটে, কিন্তু অকূল সমুদ্রে বিশাল জাহাজে নিকরদেশযাত্রা খুবই অন্যরকম ব্যাপার। এই জীবনে জাহাজে চড়াও হল না হেমকান্তের।

হেমকান্ত নড়েচড়ে বসে বললেন, বল তোর মক্কার গল্প। শুন।

মামুদ সাহেব পকেট থেকে একটা দস্তার কৌটো বের করে আর একটা লবঙ্গ মুখে ফেলে কৌটোটা বাড়িয়ে দিলেন হেমকান্তের দিকে, নিবি একটা ?

হেমকান্ত নিলেন।

কৌটোটা পকেটে পুরে মামুদ সাহেব তাঁর ভ্রমণকাহিনী বলতে লাগলেন। কলকাতা হয়ে বোমবাই যাত্রা। তারপর জাহাজে। মক্কা ও মদিনার রুক্ষ ভূ-প্রকৃতি ও জলবায়ু। তীর্থযাত্রীদের জন্য ব্যবস্থা ইত্যাদি। মামুদ সাহেব কম কথার মানুষ, বিশেষ রসিক-প্রকৃতিরও নন। সেইজন্য মিনিট দশ পনেরোর মধ্যেই তাঁর ভ্রমণবৃত্তান্ত শেষ হয়ে গেল।

হেমকান্ত সব শুনেটুনে বললেন, তোর তো ধর্মে এত মতি ছিল না।

মামুদ সাহেব একটু সঙ্কুচিত হয়ে বললেন, হজটা সেরে রাখা নাকি ভাল, সবাই বলে।

আমাকেও তীর্থে যাওয়ার কথা বলে অনেকে।

মামুদ সাহেব হেসে বললেন, গেলেই পারিস। তোদের তো কষ্ট নেই, খরচও কম। গয়া কাশী বৃন্দাবন সবই ঘরের কাছে।

হেমকান্ত মাথা নেড়ে রসিকতা করে বললেন, অলস লোকদের কাছে এ ঘর থেকে ও ঘরটাও দূর বলে মনে হয়।

মামুদ সাহেব চুপ করে রইলেন।

হেমকান্ত কথা খুঁজে না পেয়ে প্রশ্ন করলেন, তোর প্র্যাকটিস কেমন ?

কোথায় প্র্যাকটিস ? হিন্দুরা তো আর ডাকবে না আমাকে । তা আমি এখন ডাক্তারি প্রায় ভুলেই যাচ্ছি ।

মামুদের সমস্যা হেমকান্ত জানেন । কী বলবেন, চূপ করে রইলেন ।

মামুদ সাহেব বললেন, হেমভাই, দিনকালটা বড় ভাল নয় । হিন্দু-মুসলমানে হুট বলতেই দাঙ্গা লেগে যাচ্ছে । বিহিত কিছু ভাবছো ?

হেমকান্ত কাঁচুমাচু হয়ে পড়েন । বাস্তবিকই তিনি সমাজ-সংসারের তেমন খোঁজ রাখেন না । বললেন, আমি তো ভাই রাজনীতি করি না, কী ভাবব ?

তোমাকেই ভাবতে হবে । রাজনীতি না কর, তোমার হাজারের ওপর মুসলমান প্রজা আছে । তাদের ভালমন্দ তুমি ছাড়া কে দেখবে ?

ভালমন্দ দেখার জন্য লোক লঙ্কর পেয়াদা লাঠিয়াল লাগে । সেসব তো আমার নেই ।

মামুদ সাহেব বললেন, আমি শুধু মুসলমানদের পক্ষ হয়ে বলতে আসিনি । হিন্দুদের হয়েও বলছি । দাঙ্গা লাগলে দু'পক্ষেরই নিরীহ লোকের বিপদ ।

সে তো বুঝি । ভাবিও । কিন্তু কী করব বল ।

সেটা বলতেই আসা । আমি হিন্দু মুসলমান সব বিশিষ্ট লোককে নিয়ে একটা কমিটি করতে চাই ।

কমিটি ! তা বেশ তো, কর না ।

ওভাবে বললে হবে না । কমিটি-টিমিটি মেলা তৈরি হচ্ছে আজকাল । তাতে তেমন কাজ হয় না । আমি ভাবছি যা যা করলে দাঙ্গা হবে না এই কমিটি তা তা করবে ।

কিছু ভেবেছো ?

ভেবেছি । মৌলবি লিয়াকত হোসেন কিছুদিন আগে খবরের কাগজে এক বিবৃতি দিয়ে মুসলমানদের গো-হত্যা বন্ধ রাখার অনুরোধ জানিয়েছিলেন । কিন্তু খবরের কাগজ আর কজন পড়ে বোলা ! তাই আমাদের কমিটির লোকেরা এসব কথা গ্রামে গ্রামে গিয়ে সকলকে বুঝিয়ে বলতে পারে । তাতে কাজ হবে । এরকম আরো অনেক কিছুই করা যায় । হিন্দুরাও করবে, মুসলমানরাও করবে । তাদের দিয়ে করাতে হবে ।

হেমকান্ত অসহায়ভাবে বলেন, আমি যত মানুষকে রোজ দেখি তারা তো তেমন খারাপ লোক নয় । তবে দাঙ্গা খুনোখুনী কারা করে বল তো !

গেরস্থ সাধারণ মানুষেরা করে না । করে কিছু গুণ্ডা বদমাশ । তারা হিন্দু মুসলমান কিছু নয় । তাদের জাতই ওই । এদের ঠেকানোই বড় কাজ ।

হেমকান্ত মাথা নেড়ে বলেন, শুধু এদের ঠেকালে হবে কেন । উসকে দিচ্ছে কারা তাও তো দেখতে হবে ।

সে আমরা জানি । উসকে দেয় ইংরেজ, উসকে দেয় রাজনীতির লোকেরা । সে কথাটাই যদি মানুষকে বুঝিয়ে বলা যায় তাহলে কেমন হয় ?

হেমকান্ত বললেন, ক'দিন আগেই বোমবাইয়ে কী কাণ্ড হয়ে গেল ! আমার মনে হয় কমিটি করে এ জিনিস বন্ধ করা যাবে না ।

তাহলে তুই কী করতে বলিস ?

হেমকান্ত হাসলেন, আমার কি জানিস ? আমার হল নেগোটিভ প্রমিনেন্ট । সর্বদা “হবে না” কথাটাই জপ করি । আমার কথা ছেড়ে দে । কমিটিই কর বরং ।

মামুদ সাহেব হেসে বললেন, আমরা কমিটি করব আর তুমি আলগোছে বসে থাকবে তা হবে না ।

আমাকে আবার কেন ?



তোমাকে প্রেসিডেন্ট করব হবে।

ও বাবা !

মামুদ সাহেব গভীর ও আন্তরিক গলায় বললেন, আমি তোমাকে জানি হেম। তুমি সব কিছু থেকে দূরে থাকতে চাও। কিন্তু কত আর দূরে থাকবে বলা। ঘরের কাছে আশুন লাগলে মানুষ কি আর বসে থাকতে পারে। দেখছি না, দেশে যে-কোনরকম গণ্ডগোল লাগলেই সেটা গিয়ে হিন্দু-মুসলমানের দাঙ্গায় দাঁড়ায়। বোমবাইয়ে কী হয়েছিল মনে নেই ? কাপড়কলে শ্রমিকরা ধর্মঘট করেছিল। ধর্মঘটের বিরুদ্ধেও ছিল কিছু লোক। কপাল এমন যে, ধর্মঘটীরা হিন্দু আর বিরোধীরা মুসলমান। ফলং রায়ট। দুমদাম কিছু লোক মরে গেল। এরকমটা এদিকেও হতে পারে।

হেমকান্ত খুব বেশী খবর রাখেন না। বললেন, তা তো পারেই। হয়েছেও।

হয়েছে সে জানি। কিন্তু আর হতে দিতে চাই না। পানজাবের এক গবরনর ছিল মাইকেল ও'ডায়ার। সে বিলেতের এক কাগজে লিখেছে, ১৯১৯ সালের সেই রাউলট আইনের বিরুদ্ধতা থেকেই এসব দাঙ্গাহাঙ্গামার শুরু। আরো বলেছে এসবের পিছনে জারমানির উস্কানি আছে। কংগ্রেস প্রেসিডেন্ট মতিলাল নেহরু আর সেকরেটারি জহরলাল নেহরু নাকি রীতিমত জারমানির সঙ্গে ফন্দি আঁটছেন। ১৯৩২ সালে রাশিয়া নাকি ব্রিটিশের বিরুদ্ধে লড়াইতে নামবে, আর তখন ভারতেও বিদ্রোহ ঘটবে। এই বিদ্রোহ ঘটানোর জন্য বলশেভিকরা কংগ্রেসের মাধ্যমে বাঙালী আর মাদ্রাজী ছেলদের তৈরি করেছে। জানিস এতসব কথা ?

না। এসব কি খবরের কাগজে বেরিয়েছে ?

হ্যাঁ, তবে খবরের কাগজে খবরটাকে বেশী পাত্তা দেয়নি। তারা না দিক আমি দিই। ও'ডায়ারের ওসব কথা বিশ্বাস করার মতো লোকও কিন্তু অনেক আছে।

তা অবশ্য আছে।

আমাদের কাজ হবে এই ভুল ধারণাগুলোকে ভেঙে দেওয়া। মহাত্মাজী তাঁর আন্দোলন করছেন করুন, নেতারা স্বরাজ আনুন, কিন্তু হিন্দু-মুসলমানের ব্যাপারটা আমাদের ঘাড়ের ওপর এসে পড়েছে। এটাকে এক্ষুনি ফাইট-টাইট করা দরকার।

হেমকান্ত করণ নয়নে মামুদের দিকে চেয়ে বললেন, তা বেশ ভারী কাউকে প্রেসিডেন্ট করলে হয় না

হয়। কিন্তু আমি তোকে দিয়ে একটু কাজ করাতে চাই।

আমি কি কাজের লোক ?

না। সেইজন্যই তোকে কাজের লোক করে তুলতে চাই।

মামুদ সাহেব উঠলেন। পকেট থেকে কৌটো বের করে একটা লবঙ্গ মুখে ফেলে বললেন, বাগদাদে কিনেছিলাম। ভারী সস্তা। নিবি ?

হেমকান্ত মাথা নাড়লেন, না। লবঙ্গ কে খাবে ?

তাহলে আসি।

মামুদ সাহেব চলে যাওয়ার পর বেশ অস্বস্তি বোধ করতে লাগলেন হেমকান্ত। হিন্দু-মুসলমানে দাঙ্গা এ দেশের কালব্যাধি হয়ে দাঁড়িয়েছে। রক্তপাত হেমকান্ত একদম সইতে পারেন না। তাই খবরের কাগজে এসব ঘটনা তিনি ভাল করে পড়েনও না। তবু এই যে মামুদ এসে তাঁকে একটা কমিটির সঙ্গে জড়িয়ে দিয়ে গেল এতে কাজটা ভাল হল না মন্দ হল তা তিনি বুঝতে পারছেন না।

সমস্যা তাঁর একরকম নয়। একটা বিষাক্ত সন্দেহ ইতিমধ্যেই তাঁর ভিতরে সঞ্চার করেছে মনু। কী করবেন তা বুঝতে পারছেন না।

হেমকান্ত ঝুম হয়ে বসে রইলেন।

বিকলে শতীন কখন কাছারিঘরে আসে তা আজকাল লক্ষ রাখে বিশাখা। ছদ্মটা আজকাল

চপলার দখলে। তাই সে ছাদে ওঠে না। বাইরের দিককার দোতলা একটা ঘরের জানালা একটু ফাঁক করে দেখে।

শটীন সাইকেলটা বারান্দার গায়ে ঠেস দিয়ে রেখে ভিতরে ঢোকে। ঢোকবার আগে একবার ছাদের দিকে তাকায়। মুচকি একটু হাসে। ওই হাসিটাই গায়ে জ্বালা ধরিয়ে দেয় বিশাখার। কাকে দেখে শটীন হাসে এবং কেন হাসে তা সে জানে।

চপলার সঙ্গে আজকাল সে প্রয়োজন ছাড়া কথা বলে না। মুখ দেখাদেখিও প্রায় বন্ধ। কৃষ্ণকেও বউদির সঙ্গে মেলামেশা করতে বারণ করেছে সে। কিন্তু বোকা এবং জেদী কৃষ্ণকান্ত কারো কথা শোনার পাত্রই নয়।

একা একা জ্বলে মরছে বিশাখা।

আজ বিকেলে সে আর পারল না। চিকন নামে একটা নতুন বাচ্চা ঝি বহাল হয়েছে সবে। চালাকচতুর। তাকে ডেকে একটা চিঠি পাঠাল শটীনকে। লিখল, কাছারির পিছনের বাগানে একবার আসবেন এফুনি? বড় দরকার।

বিকেলের আলো আজকাল সহজে মরতে চায় না বলে বিশাখা চিঠিটা পাঠাল সন্দের মুখটায়। আলো-আঁধারি ভাবটা যখন ঘনিয়ে এসেছে, শব্ধে ফুঁ পড়েছে, জ্বলে উঠছে দু-একটা ঘরের আলো, ঠিক তখন।

একটু সাজল বিশাখা। বেশী নয়। চোখের নীচে কাজল টানল। তারপর চুপিসাড়ে নেমে এল সিঁড়ি দিয়ে।

কুঞ্জবনটা হেমকান্তর সম্পত্তি। তবে সব দিন তিনি থাকেন না। আজকাল অনেক বিকেল তিনি ঘরে বসেই কাটিয়ে দেন। কখনো বা বড় বউমার তাগাদায় গাড়ি নিয়ে হাওয়া খেতে বেরোন। আজও তাঁকে ঘোড়ার গাড়িতে বেরিয়ে যেতে দেখেছে বিশাখা।

সেদিন যেখানে বসেছিল, সেই ভাঙা গাড়ির পাদানীতে আজও এসে বসল বিশাখা।

বেশীক্ষণ অপেক্ষা করতে হল না। কাছারিঘর থেকে বেরিয়ে দীর্ঘকায় শটীন লতাপাতায় আচ্ছন্ন ঝুঁড়িপথটা দিয়ে মাথা নীচু করে এসে কুঞ্জবনে ঢুকল।

বিশাখার বুক কাঁপছিল। আগেরবার তার সঙ্গে শটীনের সাক্ষাৎকার ঘটিয়েছিল চপলা। তার নিজের কোনো দায় ছিল না। কিন্তু এবার শটীনকে ডেকেছে সে নিজেই।

শটীনের হাবভাবে লজ্জা সংকোচের বলাই নেই। সামনে এসে বুঝিবা একটু ভ্রু কঁচকেই দেখল তাকে। বিশাখা মাথা নত করে উঠে দাঁড়াল।

শটীন বলল, তুমি ডেকেছো? কী ব্যাপার?

বিশাখা কিছু ভেবে আসেনি। কী যে বলবে তা তার মাথায় আসছিল না। পায়ের আঙুলে মাটি খুঁটতে খুঁটতে সে বলল, আমার কয়েকটা কথা ছিল।

বলো।

আপনি রাগ করবেন না?

তুমি তো অনেক কথাই আড়ালে বলেছো। তাতে কি আর তেমন রাগ করেছে? আজ কী বলবে?

আমার দোষ হয়েছে।

কিসের দোষ?

ওসব কথা বলা ঠিক হয়নি সুফলাকে।

যা বলেছো তা আমি মনে রাখিনি। কিন্তু তোমার মনোভাবটা ভাল নয়। ওরকম মন থাকলে জীবনে সুখী হওয়া মুশকিল।

আমি শুনেছি আপনার বিয়ে ঠিক হয়ে গেছে!

তা একরকম বলতে পারো। কেন বলো তো !

আমি বলছিলাম কি... বিশাখা থেমে যায়।

বলো না, লজ্জা কিসের ?

আমি বলছিলাম, বউদি খুব ভাল লোক নয়।

কোন বউদি ? চপলা ?

বিশাখা এবার তীক্ষ্ণ একটা কটাক্ষে এক পলক দেখে নিল শচীনকে মুখ। কিছু বুঝতে পারল না।  
বলল, হ্যাঁ। বউদি আমার নামে হয়তো আপনার কাছে অনেক কিছু বলেছে।

কী বলেছে ?

জানি না। কিন্তু বউদির ওরকম স্বভাব।

তোমার বউদির সঙ্গে আমার তোমাকে নিয়ে তেমন কথা হয়নি।

তাহলে কী নিয়ে আপনাদের কথা হয় ?

কেন, জেনে কী করবে ?

বলুন না।

অনেক কিছু নিয়ে। সে সব তুমি বুঝবে না।

বউদি কলকাতায় গেল না কেন জানেন ?

জানি।

কেন বলুন তো !

শচীন একটু অস্বস্তি বোধ করল নাকি ! খানিকটা সময় নিয়ে বলল, জেরা করছ ?

না। জেরা করব কেন ?

তোমার বউদি কেন যায় নি সেটা তোমাদেরই ভাল জানার কথা।

বউদি লোককে যা বলছে তা নয়।

কী বলছে ?

বলছে এখানকার স্বাস্থ্য ভাল, হাওয়া ভাল। একদম বাজে কথা।

তবে আসল কথাটা কী ?

বউদি যাচ্ছে না আপনার জন্য।

আমার জন্য ? শচীন যেন একটু উদ্বিগ্ন গলায় বলে, আমার জন্য উনি কলকাতায় যাবেন না  
কেন ?

সেই কথা বলার জন্যই আমি আপনাকে ডেকেছি।

কথা না হৈয়ালি ! এ সব কী বলছ ?

ঠিকই বলছি। আপনি তো পুরুষ মানুষ। তার ওপর কাজের লোক। সব কিছু বোঝেন না।

ঠিক আছে। তুমিই বোঝাও।

বউদি ভাল মেয়ে নয়। ওর বাপের বাড়ির সবাই ভীষণ সাহেব। ওরা কোনো নিয়মকানুন মানে  
না।

তা জেনে আমার কী হবে ?

ওর সঙ্গে আপনি একটু সাবধানে মিশবেন।

শচীন একটু হাসল। তারপর বলল, সাবধানে না মিশলে কী পরিণাম হতে পারে বলো তো !

বিশাখা আবার নতমুখী হয়। খুব দ্রুত ভাববার চেষ্টা করে সে। আর যত ভাবে ততই তার মাথা  
গুলিয়ে যায়।

খুব মৃদুস্বরে বিশাখা বলে, আপনি কি জানেন না ?

কী জানব বিশাখা ?

বিশাখার বুক কাঁপল। সে লড়াইটা হেরে যাচ্ছে।

শচীন হঠাৎ গলাটা খুব নামিয়ে বলল, তুমি কি চপলাকে সন্দেহ কর? করলেও লাভ নেই।  
ও কথা কেন বলছেন?

চপলাকে নিয়ে যদি আমি পালিয়ে যাই তোমরা কেউ কিছু করতে পারবে না। পারবে?  
পালাবেন

সে কথা বলিনি। যদিও কথা বলছি। তুমি কথাটা তোমার বাবাকেও বলতে পারো।

বাবাকে? বিশাখা কেমন দিশাহারা হয়ে গেল। শচীন যে তার মনের একটুখানি সন্দেহের এত  
স্পষ্ট জবাব দেবে তা সে স্বপ্নেও ভাবেনি।

শচীন মৃদু একটু হেসে বলল, তোমাদের পরিবারে কত কী ঘটে বিশাখা। বড় বড় বাড়ির বড় বড়  
কেছা। সে সব যদি ভাবে তাহলে দেখবে আমরা কিছুই পাপ-টাপ করছি না। তোমার বউদি  
চালাক চতুর মেয়ে, লেখাপড়া জানে, কলকাতায় থাকে, ঠাঁর সঙ্গে কথা বলে আরাম পাই। তার  
বেশী কিছু না। আর সব মেয়েই কি আর সস্তা হয়? যাও, বাড়ি গিয়ে মাথায় জল ঢেলে মাথাটা  
ঠাণ্ডা করো। এ সব ভেবো না।

শচীন যেমন এসেছিল তেমন চলে গেল হঠাৎ।

বিশাখা খানিকক্ষণ থম ধরে বসে রইল। তারপর স্বাভাবিক নারীধর্ম অনুসারে হাতে মুখ ঢেকে  
কান্দতে লাগল।

শচীন আজ আর কাজে মন দিতে পারল না। উঠে পড়ল তাড়াতাড়ি। সাইকেলটা আশে  
চালিয়ে বারবাড়ি পার হয়ে ব্রহ্মপুত্রের ধার ঘেঁষে যেতে যেতে তার মনে হল, সে চমৎকারভাবে  
একটা পরিস্থিতি আজ সামাল দিয়েছে। কিন্তু শেষ অবধি পারবে কি?

চপলা, চপলা যে তার ধ্যান জ্ঞান!

## ॥ ৪৮ ॥

পৃথিবীর মানুষকে কিছুতেই সব কথা বোঝাতে পারবে না রেমি। মানুষেরা ভীষণ অবুঝ।

পদ্মপাতায় এক ফোঁটা জল গড়িয়ে যাচ্ছে এখার ওখার। কখন চলকে পড়ে কে জানে! ওই  
ফোঁটাটুকু রেমির প্রাণ। নিঃশেষিত চেতনার একটু তলানী অবশিষ্ট আছে মাত্র। সেই চেতনাটুকুও  
নানারকম আজগুবি দৃশ্যে আবিল। রেমি এখন অনেক কিছুই মনে করতে পারছে না। এমন কি  
নিজেকেও তার সবটুকু মনে পড়ে না। কিন্তু তার আবছায়া চেতনার গভীর কুয়ার মধ্যে ঘোলা জলে  
বারবার যে মুখটা ছায়া ফেলছে সে মুখ সে অনেক দুঃখের মূল্যে চিনেছে। সহজে ভোলা যাবে না।  
সে মুখ ধুবর।

তুমি কি নারী স্বাধীনতায় বিশ্বাসী নও রেমি?

হ্যাঁ, ভীষণ বিশ্বাসী।

তুমি কি ডিভোর্সের পক্ষপাতী নও?

নিশ্চয়ই পক্ষপাতী। অত্যাচারী স্বামীর হাত থেকে মুক্তি পাওয়ার অধিকার কোন মেয়ে না চায়?

তুমি মদ্যপ, চরিত্রহীন, নিষ্ঠুর বা উদাসীন স্বামীদের সমর্থন করো না তো!

না। কক্ষনো নয়।

তাহলে ধুবর ব্যাপারে তোমার সিদ্ধান্ত কী?

আমি ওকে জানতে চাই। জানতে চাই বলেই ওকে ছেড়ে যাইনি।

জানার কি কিছু বাকি ছিল আর?

ছিল। তোমরা বুঝবে না। ছিল আমি বহুব্যবহার টের পেয়েছি, ওর মদের কোনও নেশা নেই

সত্যিকারের। ওর মধ্যে সত্য কোনো নিষ্ঠুরতাও নেই।

তোমাকে কি ও কখনো ভালবেসেছে ?

কি জানি। হয়তো বাসেনি। আমাকে কতবার অরক্ষিত অবস্থায় ফেলে রেখে কোথায় চলে গেছে। এমন কি অন্য পুরুষের সঙ্গে প্রেম করার জন্য উৎসাহ পর্যন্ত দিয়েছে।

এই কি স্বামীর কাজ ? এটা কি ভালবাসা

না। স্বীকার করছি। না।

তাহলে আর জানার বাকি ছিল কী ? ও তোমার স্বামী হতে পারেনি কোনোদিন।

বলছি তো এসবই ঠিক। তবু ওর মধ্যে কী ছিল বলো তো, আমি যতক্ষণ ওর কাছে থাকতাম, মানে ও যতক্ষণ আমার কাছে থাকত ততক্ষণ আমি ভারী নিরাপদ বোধ করতাম। মনে হত, এবার আমি নিশ্চিত।

ভুল রেমি। ওটা তোমার মনে হওয়া মাত্র। সত্যি নয়। ধ্রুব কোনোদিন তোমার নিরাপত্তার কথা ভাবেনি।

তাহলে আমার মনে হত কেন ? ভুল ? তা হোক না। এরকম কিছু ভুলই যদি আমার সারা জীবন অটুট থাকত তাহলেই আমার ছোট জীবনটা কেটে যেত কোন রকমে।

কাটল না তো !

না, ঠিক তা নয়। কেটে গেল। এই তো আমার বুক জুড়িয়ে যাবে একটু পরেই। কতই বা বয়স আমার ! কেটে গেল তো

মৃত্যুর আগে একবারও সত্যকে জানতে চাও না ?

না। আমি কোনোদিন খুব বেশী জানতে চাইনি। না জানলেও চলে যায়।

তোমার সম্পর্কেও কিছু অপপ্রচার রয়ে গেল যে রেমি। রাজার সঙ্গে তোমার সেই প্রেম !

উঃ কী যে বলো না তোমরা !

কে বিশ্বাস করবে রেমি যে, নিতান্তই ধ্রুবকে আকর্ষণ করার জন্য তুমি রাজাকে অত প্রশংসা দিয়েছিলে !

কেউ করবে না। আমি মস্ত একটা ঝুঁকি নিয়েছিলাম।

তার ফল কী হল ?

সবাই বিশ্বাস করল, রাজা আর আমি প্রেমে পড়েছি। কিন্তু যার বিশ্বাস হওয়ার কথা তারই হল না।

কে বলো তো ! ধ্রুব ?

হ্যাঁ। সারা জীবন সে আমাকে অনেক কষ্ট দিয়েছে। সবচেয়ে বড় কষ্ট কী জানো ?

অবহেলা ?

ঠিক। অবহেলা। সে বিশ্বাসই করল না যে, আমি রাজার প্রেমে পড়েছি। কিংবা বিশ্বাস করলেও পাত্তা দিল না তেমন। পুরুষ মানুষের দখলদার মন থাকে, দখলের জায়গায় অন্য কেউ হাত বাড়ালে সে গর্জে ওঠে। তবু ও গর্জাল না। আমাকে দখল করতে চায়নি তো কখনো, তাই। একেই তো অবহেলা বলে, না ?

তুমি বড় নির্লজ্জ রেমি। এই নারী স্বাধীনতার যুগে ওই মদ্যপ, দুশ্চরিত্র, নিষ্ঠুর ও অপ্রকৃতিস্থ ধ্রুবর সম্মোহন কাটাতে পারলে না। অবোধ মুঞ্চ হয়ে রইলে।

তা নয়। তা নয় গো। আমি জানতে চেয়েছিলাম, ওর মধ্যে কোনো রহস্য আছে কিনা। ছেড়ে গেলে তো জানা হত না।

ছেড়ে তো যাওনি। জানতে পারলে কি ?

না। ধরাছোঁয়ার বাইরে রয়ে গেল। ছদ্মবেশ কিছুতেই খুলতে পারলাম না।

ছদ্মবেশ নয় রেমি। ধুবকে সবাই জানে। ও যা ও তাই। তুমি খামোখা ধানক্ষেতে বেগুন খুঁজতে নেমেছিলে। ওর মধ্যে কোনো রহস্য নেই। ছদ্মবেশও নেই।

তবে কেন ওর চোখের মধ্যে আমি এক এক সময়ে খুব গভীর একটা কিছু লক্ষ্য করতাম ! তোমার মনের ভুল রেমি। যার প্রতি আমাদের দুর্বলতা থাকে তার মধ্যে আমরা নানা কাল্পনিক গুণ আরোপ করে নিই।

না, আমি মানি না। আমি যত বেশী ওকে টের পেতাম তেমন তো কেউ টের পেত না ওকে। তোমরা বুঝবে না গো।

অপাত্রে তোমার সব ভালবাসা গেল রেমি, তার চেয়ে রাজাকে একটু ভালবাসলে পারতে। রাজাকে তো বহু মেয়ে ভালবাসত। কত রূপ, কত গুণ।

তুমি কেন পারলে না ?

আমিও বাসতাম। তবে প্রেমিকের মতো নয়।

তবে কেমন ?

যেমন ভাইয়ের ওপর বোনের ভালবাসা।

রাজা কিন্তু—

জানি। বোলো না গো।

তুমি টের পেতে রেমি ?

পেতাম। প্রথম দিন থেকেই।

আর ধুব তোমাকে পরপুরুষের সঙ্গে প্রেম করার উদার অনুমতি দিয়েছিল। তবু পারলে না ? বোকার মতো কথা বোলো না। মেয়েমানুষ কোনোদিন কখনো একজন ছাড়া দ্বিতীয় পুরুষকে ভালবাসতে পারে না। এমন কি এই নারী স্বাধীনতার যুগেও। যাদের দেখ অনেক পুরুষের সঙ্গে ঢলাঢলি করে বা একটা ছেড়ে তিনটে চারটে বিয়ে করে তারা কাউকেই ভালবাসতে পারেনি কখনো। ওরকম হয় না।

বলছ একথা বিশ্বাস করতে ?

বলছি। ভালবাসলে দোষঘাট অত ধরতে চায় না মানুষ। তুমিই না একটু আগে বললে যার ওপর দুর্বলতা থাকে তার ওপর মানুষ কাল্পনিক গুণ আরোপ করতে থাকে !

বলেছি।

তাহলে ? স্বামীর শতক দোষ থাক। বিবাহ মানে তো বহন। ঠিক সওয়া যায়, বয়ে নেওয়া যায়।

তুমি তো পারলে না।

কে বলল পারিনি ! মরে যাচ্ছি বলে বলছ ? সে তো মরতে হতই একদিন।

ধুবকে তাহলে তুমি ভালবাসতে রেমি ?

কী জানি ! অত গর্ব করে বলতে পারব না যে, বাসতাম। তবে চেষ্টা করেছি। অন্য কোনো পুরুষকে ভাববার সময় ঘখন হল না, তখন বুঝে নাও বাসতাম।

আর তার জন্য আর একটা পুরুষকে ডোবালে ?

না তো। রাজা ডুববে কেন ? ভালবাসলেই কি ডোবে ?

তুমি যে ডুবেছো !

আমি ! সে ঠিক ডোবা নয়। তুমি বুঝবে না গো। আর যদি ডুবেই থাকি তাহলে বুঝে নিও আমি ডুবতেই চেয়েছিলাম।

নানা তরঙ্গ আজ রেমিকে ওলটপালট করে দিয়ে যাচ্ছে। পৃথিবীতে তার শেষ কয়েকটি মুহূর্ত বয়ে যাচ্ছে। কৃপণের ধন। আর একবার চেতনা ফিরল রেমির। মুখোশ পরা একটা লোক নির্বিড়

দৃষ্টিতে চেয়ে আছে তার দিকে ।

রেমি ভয়ে চৈচিয়ে উঠতে গেল । গলার স্বর ফুটল না । অস্পষ্ট গোঙানির শব্দ হল শুধু । তারপর অঙ্গকার হয়ে গেল চেতনা ।

কেউ বাধা দিল না রাজা আর রেমিকে । ঠিক সদ্য প্রেমে পড়া উদ্দাম দুটি তরুণ তরুণীর মতো তারা বেরিয়ে পড়েছিল আনন্দের হাট লুট করতে । ছিল নৈকট্যের শিহরন, ছিল নারী ও পুরুষের মধ্যে প্রাকৃত আকর্ষণ, ছিল সুন্দরের প্রতি মুগ্ধতা । সব ছিল । ধ্রুবও ছিল নিষ্ক্রিয় ও উদার প্রশয়দাতা ।

তবু একদিন রাজা বলেছিল, বউদি, এক কোটি বছর তোমার সঙ্গে সঙ্গে ঘুরলেও বোধহয় কেউ তোমার মন পাবে না ।

রেমি অবাক হয়ে বলল, একথার মানে ?

তুমি রিমোট কন্ট্রোলড এক রোবট মাত্র । তোমার নিজস্ব সত্তা নেই ।

ও বাবা ! কী সব ইংরিজিতে গালাগাল দিচ্ছ গো !

গালাগালই বটে । তোমার গায়ে লাগে ?

গালাগাল দিলে লাগারই তো কথা ।

না, লাগার কথা নয় । চৌধুরীবাড়ির বউদের চামড়া মোটা হয়ে যায় । তোমারও হয়েছে ।

কেন বলো তো

কী করে যে এত সহ্য করো জানি না ।

রেমি মুখ টিপে হাসল একটু ।

ব্যাঙেলে বেড়াতে গিয়েছিল তারা । রাজার ফাংশন ছিল । একটু আগেই পৌঁছে তারা বিখ্যাত চার্চ দেখে গঙ্গার ধারে বসেছিল একটু । শীতকালের মন্দস্রোত নদী । আকাশে সাদা রোদ । ফাংশনের কিছু ছেলে পিছু পিছু ঘুরঘুর করছিল প্রথম থেকেই । রাজা তাদের অনেক করে বুঝিয়ে ভাগাল । তারপর হঠাৎ রেমির কাছে ঘন হয়ে বসে বলল, কেন বুঝতে চাইছে না রেমি ?

কী বুঝতে চাইছি না

এরকম ভাবে চলে না ।

কীরকম হলে চলবে ?

তোমার জীবনটা নষ্ট হয়ে যাচ্ছে ।

কী করে বুঝলে ?

ধ্রুবদা তোমাকে ভালবাসে না ।

তবে কাকে বাসে ?

তা জানি না । তবে তোমাকে বাসে না ।

আমার তা মনে হয় না ।

তার মানে ! তোমার কী মনে হয় ?

রেমি একটু লাল হয়ে বলে, তোমার কুট্রিদা যদি আমাকে নাই ভালবাসে তবে অন্য কাউকেও বাসে না । কিন্তু যদি কোনোদিন কাউকে তার ভালবাসবার ইচ্ছে হয় তবে আমাকেই বাসবে ।

এটা কি তোমার অঙ্ক বিশ্বাস নয় ?

না ।

এই যে আমার সঙ্গে এত মিশেছে ধ্রুবদার জেলাসি লক্ষ করেছে কখনো ?

না । ও আমাকে লক্ষ্যই করে না । অন্য কী যেন ভাবে ।

তাহলে আমাকে স্কেপগোট বানিয়ে যে প্ল্যানটা তুমি করেছিলে সেটা ফেল করল তো

মনে তো তাই হচ্ছে ।

তাহলে এসো একটা কাজ করি ।

কী কাজ ?

কুট্টিদার একেবারে মূলে একটা নাড়া দিই ।

কী ভাবে ?

আজ বাড়ি ফিরে তুমি অগ্নাউনস করো যে, কুট্টিদাকে ডিভোর্স করবে । তারপর আমাকে বিয়ে করতে চাও ।

উদাসীন রেমি কিছুক্ষণ নদী দেখল ।

তারপর মাথা নীচু করে বলল, বলব ।

বলবে ?

বলব । দেখো, ঠিক বলব । তবে তাতে কাজ হবে না ।

তবু বোলো ।

রাত্রে যখন রেমি ফিরল তখন ধ্রুব নীচের ঘরের বিছানায় আধশোয়া । এক পলক তাকিয়ে দেখল ।

বলল, হঠাৎ এ ঘরে যে ।

রেমি বলল, কেন, আসতে নেই ?

তা আছে । তবে তোমার মান্যবর শ্বশুর দোতলায় যখন তোমার ঘর ঠিক করে রেখেছেন তখন সেখানেই তোমার থাকা ভাল ।

আমি তোমাকে একটা কথা বলেই চলে যাবো ।

বলে ফেল ।

আমি ডিভোর্স চাইলে দেবে ?

এক্ষুনি । কিন্তু হঠাৎ চাইছো কেন ?

তুমিও তো চাও

আমি ! ধ্রুব অবাক হয়ে বলে, কখনো চাইনি তো ! তোমাকে বলেছি, ডিভোর্স নাও । নিজে চাইনি ।

রহস্যময় এক আনন্দে শিহরিত রেমি তবু ঘাড় শক্ত করে বলল, এবার আমি চাইছি ।

ধ্রুব একটু ঘরের বাতাসটা ঝুঁকল যেন । তারপর রেমির দিকে অপলক চোখে চেয়ে বলল, কথাটা কে শিখিয়ে দিয়েছে ?

কে শেখাবে ! আমিই তো বলছি !

বলছ, কিন্তু আন্তরিকতা নেই, ইচ্ছা নেই, আগ্রহ নেই । মুখস্থ করা বুলি ।

রেমি খুব অবাক হল । ঠিক, ডিভোর্সের কোনো তাগিদ বা আগ্রহ তার ভিতরে নেই । সে মোটেই ধ্রুবকে ছেড়ে যেতে চায় না । রাজা কৌশলটা শিখিয়েছিল, সে সেইমতো আচরণ করে গেছে, কিন্তু সেটা ধ্রুবর বুঝবার কথা নয় । তাহলে বুঝল কী করে ?

রেমি বলল, বুঝলে কী করে ? তুমি কি অন্ত্যামি ?

অন্ত্যামি সকলের ক্ষেত্রে নই । কিন্তু তোমার মতো বোকা আর দুর্বল মনের মেয়েকে বোঝা কিছু শক্ত নয় । কে শিখিয়েছে বোলো তো ! রাজা ?

তাতে তোমার কী যায় আসে ?

ধ্রুবর মুখটা আস্তে আস্তে রক্তিম হয়ে উঠছিল । কপালের দুপাশের দুটো শিরা ফুলে উঠল । রাগলে ওর ওরকম হয়, রেমি বহুবার দেখেছে । হাতের বইটা রেখে ধ্রুব সোজা হয়ে বসে বলল, ডিভোর্স দিলে রাজাকে বিয়ে করবে ?

রেমি ক্রুদ্ধ ধ্রুবর দিক থেকে চোখ ফেরাতে পারছিল না । পুরুষ মানুষ, বিশেষ করে ধ্রুবর মতো



ধারালো চেহারার পুরুষ যখন আমূল রেগে ওঠে তখন তাদের স্পর্শ করে অলৌকিক কিছু। রেমি স্পষ্ট দেখতে পাচ্ছিল, ধুবর শরীরের চারদিকে সেই ফেটে পড়ার আগের দুরন্ত রাগ একটা ছটা বিকীর্ণ করছে। রূপ যেন দেহের সীমানা ভেঙে ফেলতে চাইছে। রেমির বাকরোধ হয়ে গেল। সে চোখ ফেরাতে পারছিল না।

ধুব দাঁতে দাঁত পিষে বলল, শোনো। কেউ চৌধুরীর মতো নোংরা লোক যা করতে পারে তাই করেছে। তার হাতের সূতোর টানে তোমরা নাচছো। কিছু না জেনে, না বুঝে।

রেমি স্থলিত গলায় বলে, কেউ চৌধুরিটা আবার কে?

কেন, তোমার স্বস্তুর কৃষ্ণকান্ত! চেনো না!

উনি কী করেছেন?

কী না করেছেন? একজন ভদ্রলোকের পক্ষে যা কিছুতেই সম্ভব নয়, তা উনি অনায়াসে করতে পারেন। হাসি মুখে। বোধহয় পলিটিকস না করলে কোনো মানুষ এরকম ভয়েড অফ সেনটিমেন্টস হতে পারে না। লোকে জানে উনি পুরোনো মূল্যবোধে বিশ্বাসী, রক্ষণশীল। লোকেরা গাড়ল।

রেমি শক্তিত হয়ে বলে, উনি কী করেছেন তা বলবে তো?

তোমাকে বলে লাভ নেই। তুমি বিশ্বাস করবে না। রাজাকে তোমার সঙ্গে জুটিয়ে দিয়েছেন উনিই।

উনি?

তুমি বোকা। তোমাকে ঠিকানো বা ভোলানো খুব সোজা।

রেমি বিশ্বাস করতে পারছিল না। বারবার ঠোঁট কামড়ে শুকনো মুখে আপনমনে বলছিল, উনি! উনি!

ধুব একটা পাগলা রাগের চোখে রেমির দিকে চেয়ে থেকে বলল, তুমি এখন আমাকে বলো, রাজাকে বিয়ে করতে চাও?

রেমি এক পা পিছিয়ে গিয়ে অসহায় গলায় বলে, তুমি আমাকে ভালবাসো না কেন?

সেটা কোনো ফ্যাকটর নয়। কাউকে ভালবাসা আমার পক্ষে অসম্ভব। কথাটার জবাব দাও। ওকে বিয়ে করবে?

আমি জানি না।

কেন জানো না?

ভেবে দেখিনি।

ধুব কোনোনী যা করেনি, হঠাৎ রেমিকে দুহাতে ধরে প্রচণ্ড দুটো ঝাঁকুনি দিল। সেটা মার নয় ঠিকই, কিন্তু মারের চেয়েও বেশী। সেই অসম্ভব জোরালো ঝাঁকুনিতে মাথা ঘুরে চোখে অন্ধকার দেখল রেমি।

ধুব তাকে ছুঁড়ে বিছানায় ফেলে দিয়ে বলল, আমি তো তোমাকে পাসপোর্ট দিয়েই রেখেছি। যার সঙ্গে খুশি প্রেম করো, ডিভোর্স চাও তো তাও সহি। সব ঠিক। কিন্তু তার মধ্যে ফাঁকিবাজী আমার সহ্য হয় না। ইউ মাস্ট বি অনেস্ট। ভেরী অনেস্ট।

আমি কী করেছি? রেমি ফোঁপাতে ফোঁপাতে জিজ্ঞেস করে।

তুমি রাজাকে নষ্ট করেছো। ওর ভবিষ্যৎ অন্ধকার করে দিয়েছো। ওকে লোভ দেখিয়ে নাচিয়ে, আশা দিয়ে তারপর একদিন ছোলাগাছি দেখাতে চাইছো।

তোমাকে কে বলেছে এসব?

আমি জানি। যে দু-একজন লোকের আমি আগাপাশতলা জানি, যাদের চোখের দিকে তাকালেই সব বুঝতে পারি সেই অল্প কয়েকজনের মধ্যে তুমিও পড়ো।

রেমি কাঁদছিল। কিন্তু কে জানে কেন, তার বুকে একটুও দুঃখ বা জ্বালা ছিল না। বরং কান্নার সঙ্গে তার গা শিহরিত হচ্ছিল বারবার। সে বলল, আমি কী করব তুমি বলে দাও।

আমি! আমি কেন বলতে যাবো?

আমি যে কিছু বুঝতে পারি না। বড্ড বোকা।

কে বোকা?

আমি। আমাকে তো তুমি সব সময় বলো, বোকা।

ধুব একটুও হাসল না। মুখটা যেমন থমথমে ছিল তেমনি থমথমেই হয়ে রইল। কয়েক পলক রেমির দিকে স্থির চেয়ে থেকে সে বলল, বোকা সেটা বড় অপরাধ নয়। বড় অপরাধ হল ডিজঅনেস্টি। তুমি অসৎ হয়ে যাচ্ছে। চালাকী করছ। ধুব চৌধুরিকে পটানোর জন্য রাজার সর্বনাশ করছ।

ওর সর্বনাশ হবে না।

অলরেডি হয়ে গেছে। কাল ওর সঙ্গে আমার দেখা হয়েছিল। জলে ডোবা মানুষের মতো ফ্যালফ্যালে মুখ, ভীষণ আনমনা, রোগা। লক্ষণগুলো আমি চিনি। ফাঁদ পাততে গিয়ে বেচারি নিজেই ফাঁদে পড়ে গেছে।

আমি ওর সঙ্গে কখনো সেভাবে মিশিনি।

যে ভাবেই মেশো, তুমি যুবতী এবং বলতে নেই বোধহয় সুন্দরীও। তোমার সঙ্গটাই তো যেকোনো পুরুষের পক্ষে বিপজ্জনক। এখন কেসটা অত্যন্ত সিরিয়াস দাঁড়িয়ে গেছে। তোমাকে এবার একটা ডিসিশন নিতে হবে।

আমি পারব না। তোমার পায়ে পড়ি।

নিজে না পারো কেঁট চৌধুরির পরামর্শ নাও। সেই তো তোমার গারডিয়ান অ্যানজেল।

আমি পারব না।

পারতে হবে রেমি। আমাকে জন্দ বা বশ করার জন্য তোমরা তিনজন জেনে বা না জেনে যা করেছো তার সমাধানও তোমাদেরই করতে হবে।

কী সমাধান?

উকিলের কাছে যাও। ডিভোর্সের মামলা করো। আমি ছেড়ে দেবো। তারপর তোমাকে বিয়ে করতে হবে। রাজাকেই।

রেমি উথলে উঠে বলে, এ জীবনে পারব না। তার চেয়ে আমাকে মেরে ফেল। পায়ে পড়ি, মেরে ফেল।

তুমি কি ওয়ান ম্যান উওম্যান রেমি?

আমি আর কাউকে চাই না, আর কিছু চাই না। শুধু তোমাকে।

ধুব মাথা নেড়ে বলল, তুমি কী চাও বা না চাও সেটা বড় কথা নয়। ইউ মাস্ট ফিনিশ ইওর কেস।

আমাকে তাড়িয়ে দেবে?

না। তোমাকে রাজার হাতে ছেড়ে দেবো। তোমাকে আমি অনেস্ট হতে শেখাবো।

আমি তো ওকে চাই না।

চাইতে হবে রেমি। ওকে পাগল করলে কেন তবে?

সারা রাত কত কাতর অনুনয়-বিনয় কত, পায়ে ধরাধরি। ধুব এক ইনচি জমি ছাড়ল না।

এক তীব্র, যন্ত্রণাময় অশ্বখুরধ্বনি শুনতে পাচ্ছিল শচীন। বুকে তার ঘনিয়ে উঠছে বাথা। অশ্বখুট শব্দ করে পাশ ফিরল সে। তারপরই সজাগ হয়ে চোখ মেলল।

কোথাও আলোর রেশমাত্র নেই। অবোধ কঠিন গভীর এক অন্ধকার। ঘোড়ার পায়ের শব্দ এখনো দৌড়োচ্ছে। সে শব্দ তার বুকের ভিতরে। শব্দ তার হৃৎপিণ্ডের।

শচীনের সামনের অন্ধকার রূপময় হয়ে যেতে লাগল। বহুরঙা এক ময়ূর পেখম ধরেছে যেন। সেই রঙ আরোপিত হচ্ছিল এক প্রতিমায়। চপলা।

তার স্বপ্নকালের জীবনে সে আর কোনো মেয়েকে দেখেনি যার সঙ্গে চপলার তুলনা হতে পারে। জবুথবু শাড়িতে মোড়া মেয়েদেরই এতকাল দেখেছে সে। চপলা শাড়ি পরে, সিদুর দেয়, ঘোমটা টানে, সবই ঠিক কথা। কিন্তু তার ব্যাকগ্রাউণ্ড অন্যরকম। সে ঘোড়া এবং সাইকেলে চাপতে জানে, চালাতে পারে রাইফেল। চমৎকার ইংরিজিতে কথা বলতে পারে। ইংরেজদের সঙ্গে বহু দিনার খেয়েছে সে। তবু সব ছেড়েছুড়ে বাঙালির গৃহস্থঘরের বউ হতেও তার বাধেনি।

চপলা সম্পর্কে এটুকু ছিল শচীদের প্রাথমিক মুগ্ধতা। তারপর জল আরো গড়াল, যখন সে এই মহিলার অসামান্য মুখশ্রী ভাল করে লক্ষ্য করল একদিন।

একথা ঠিক, চপলা একটু লঘু স্বভাবের মেয়ে। ইয়ার্কি ঠাট্টা তার ভীষণ প্রিয়। চিমটি দিয়ে কথা বলতেও সে ওস্তাদ। কিন্তু ওটুকু শচীনকে আরো পেড়ে ফেলেছে।

নিজের স্বাস্থ্যে মৃদু কম্পন টের পায় শচীন। দুই সন্তানের মা, চৌধুরিবাড়ির বউ চপলার প্রতি তার সমস্ত সন্তার একমুখী স্রোত দ্রুত এক গতিতে নিয়ে চলেছে তাকে। উজান বাইবার শক্তি তার নেই। সে ভেসে যাচ্ছে এক অমোঘ লক্ষ্যে। নিয়তির নির্দেশে।

বুকের মধ্যে ঘোড়ার তীব্র দৌড় টের পায় শচীন। বুক বাথিয়ে ওঠে যন্ত্রণায়। মাঝরাত্তে আজকাল প্রায়ই তার এইরকমভাবে ঘুম ভেঙে যায়। ঘুম আসেও না বড় সহজে। কঁটাইছোড়া তন্দ্রার মধ্যে সারাক্ষণ হানা দেয় চপলার মুখ। এক প্রলয় বাতাসে ভেঙে পড়েছে প্রতিরোধের দ্বার। কী করবে শচীন?

তার ভিতরকার বুদ্ধিমান ও বিবেচক উকিলটি মাঝে মাঝে তাকে সাবধান করে দেয়, কূল ভাঙবে, মর্যাদা নষ্ট হবে, কোথাও ঠাঁই হবে না তোমাদের। নিষিদ্ধ ফলের দিকে হাত বাড়িও না।

নিষিদ্ধ ফল? শচীন যেন অবাক হয়ে ভাবে, চপলা কেন নিষিদ্ধ ফল হতে যাবে? নিষিদ্ধই যদি, তবে অত সুন্দর কেন? অত দুট্টু কেন? কেনই বা অত 'গা-ঘেঁষা'?

শচীনকে নিজের জন্য কখনোই চিহ্নিত করত না চপলা, ননদের জন্যই নির্দিষ্ট রেখেছিল তাকে। কিন্তু সবসময়ে কি সব হিসেবমতো ঘটে?

শচীন যতদূর দেখতে পায়, তাদের দুজনের মধ্যে বিদ্যুৎ খেলেছিল সেই জলসায়। শচীন তার গাঢ় গভীর গলায় গজল গাইতে গাইতেই দেখল, চপলার মুখে চোখে এক অদ্ভুত অপার্থিব মুগ্ধতার ভাব নেমে এসেছে কখন। চোখ দুটিতে গভীর সম্মোহন। চোখের ফাঁদে সেই যে ধরা পড়ল শচীন, তারপর থেকে কেবল ছটফট করে ভিতরটা।

চপলা তেমন ভাল গান জানে না। বলতে কি, তার খাঁকতি হয়তো ওই একটাই। তবু কয়েকটা রবীন্দ্রসংগীত শুনিয়েছিল সেদিন। রূপমুগ্ধ শচীনের সে গান খারাপ লাগেনি।

পরদিন শচীনের কাছে কাছারিঘরে এসে হানা দিল চপলা। কর্মচারীরা তটস্থ। চপলা বলল, কাজ তাড়াতাড়ি শেষ করে ওপরে আমার ঘরে আসুন।

শচীনের লুক্ক মন এই আমন্ত্রণের ভালমন্দ বিচার করল না। ভিতরে এক শিহরিত আনন্দের উজ্জীবক স্পর্শ তার চোখমুখকে উজ্জ্বল করে দিল। সে বলল, যাবো।

সেদিন সন্ধ্যায় চপলার ঘরে আর কেউ ছিল না। শুধু চপলা আর শচীন।

চপলা একটু সেজেছিল। ফ্রিলওয়া খুব আধুনিক ব্লাউজ তার গায়ে এবং ঝলমলে একটা শাড়ি। পরিপাটি বাঁধা খোঁপা। মুখে কিছু প্রসাধন এবং গায়ে দামী সুগন্ধ।

চপলা বিনা ভূমিকায় বলল, উকিল হয়ে পচে মরবেন কেন? জীবনে উন্নতি করার ইচ্ছে হয় না আপনার

শচীন এই আচমকা কথায় সামান্য নাড়া খেয়ে বলল, কেন, ওকালতি কি খারাপ?

খারাপই তো। প্রেস্টিজ পেতে হলে ব্যারিস্টার হতে হয়। পারবেন না

উকিল পাত্র কি আপনার ননদের পছন্দ নয়?

নন্দকে টানা কেন আবার! আমার নিজেরই পছন্দ নয়।

শচীন একটু প্রগলভ হয়ে সাহস করে বলল, আপনার তো আর পাত্রের চিন্তা নেই। থাকলে আমিই প্রথম ক্যাণ্ডিডেট হতাম।

চপলার সঙ্গে বউদি-দেওর সম্পর্কে এরকম ইয়ার্কি চলতে পারে বটে, কিন্তু চপলা একথায় কেমন যেন হয়ে গেল। কিছুক্ষণ কথা না বলে দুটি চোখ পেতে রাখল শচীনের মুখের ওপর।

তারপর চোখ সরিয়ে নিয়ে খুব চাপা গলায় বলল, আমার জীবনটা খুব সুখের নয় শচীনবাবু।

আবহাওয়াটা হঠাৎ ভারী হয়ে ওঠায় শচীন বিব্রত বোধ করতে থাকে।

চপলা একটা ডেসকে রাখা কয়েকটা পত্রপত্রিকা নাড়াচাড়া করতে করতে বলে, এ জায়গায় বিয়ে করার একটুও ইচ্ছে ছিল না আমার। কথা ছিল, বিলেত যাবো, ব্যারিস্টারি পড়ব বা আই সি এস কমপিট করব। বাবা রাজি থাকলেও শেষ অবধি মা আর ঠাকুমা বেঁকে বসে। কিছুই হল না। একদম জলঘট হয়ে রইলাম

শচীন মিনমিন করে বলে, তা কেন?

জলঘট নয়? আমার স্বামী দেখতে কার্তিকঠাকুর হলে কী হয়। একদম আনশ্মাট। ভাল করে কথা বলতে জানে না। জমিদার নন্দনরা যেরকম হয় ঠিক তেমনি। না লেখাপড়ায় ভাল, না আর কিছুতে। আমি অনেক কষ্টে খানিকটা মানুষ করার চেষ্টা করেছি। ইচ্ছে ছিল বাবাকে বলে ওর বিলেত যাওয়ার ব্যবস্থা করি। কিন্তু ভেবে দেখলাম, পাঠিয়ে লাভ নেই। সাহেবদের দেশে গিয়ে শুধু কয়েকটি কু-অভ্যাস নিয়ে আসা ছাড়া ওর দ্বারা আর কিছু হবে না।

শচীন মৃদু একটু হাসল বটে, কিন্তু তারপর বিষণ্ণ গলায় বলল, কনকদা ঠিক আগের মতো নেই।

আগে কীরকম ছিল? আরো খারাপ?

না। ঠিক খারাপ নয়। এমনিতে ভালমানুষ, কিন্তু একগুঁয়ে ধরনের।

আহা, আর সারটিফিকেট দিতে হবে না। আমার চেয়ে ভাল তো কেউ জানে না। এক কথায় বোকা আর জেদী

শচীন কী আর বলবে, মাথা চুলকোলো একটু।

চপলা বলল, আমি একটু ঠোঁটকাটা। স্পষ্ট কথা বলতে ভালবাসি। কিছু মনে করবেন না।

না, না।

পাশ্চাত্যের মতো পুরুষমানুষের ঘর করতে করতে আমার ভিতরটা মরে যাচ্ছে। এই যা দেখছেন ভালমানুষ বউ সেজে ঘুরে বেড়াচ্ছি এটা আমার ছদ্মবেশ। সারাজীবন কি ছদ্মবেশ পরে কাটিয়ে দেওয়া যায়! সবসময় মনে হচ্ছে আমি অন্য এক নারীচরিত্রে অভিনয় করে যাচ্ছি মাত্র।

শচীনের বৃকের ধকধকানিটা শুরু হল এসময়ে। সে বৃকতে পারছিল, চপলা তাকে একটা কিছু বলতে চায়। এ হল তারই ভূমিকা। সেই চরম কথাটা কী তাও সে আন্দাজ করতে পারে। একই সঙ্গে বৃকের মধ্যে তীব্র চিনচিনে আনন্দ ও ভয় হচ্ছিল তার। দুদে উকিল হয়েও সে কথা খুঁজে পাচ্ছিল না। শুধু বলল, সে তো ঠিক কথা।

চপলা বলল, এত অল্প বয়সে ওকালতি করা কি আপনাকে মানায় ! সুন্দর ওই চেহারা কালো কোট প্যাণ্ট পরে মক্কেলদের পিছন পিছন ঘোরা আমি একদম সহিতে পারি না । তার চেয়ে ব্যারিস্টার হয়ে আসুন । ব্যারিস্টারের প্রেস্টিজই আলাদা ।

শচীন একটু অবাক হয় । মনের গহনে এরকম একটা ইচ্ছে যে তার ছিল না তা নয় । কিন্তু ইচ্ছেটাকে ঝুঁচিয়ে দেওয়ার কেউ ছিল না । গরিবের ছেলে ওকালতি পাশ করে কিছু পয়সার মুখ দেখেই ভেবেছিল, জীবনে এর চেয়ে বেশী আর কী চাওয়ার থাকতে পারে ? এই তো চূড়ান্ত সফলতা ! কিন্তু কারো কারো চোখে ওকালতিটাও যে যথেষ্ট না-মনে হতে পারে এটা সে ভাবেনি । এখন ভাল । তার মনে হল, বুদ্ধিমান ও উদ্যোগী ছেলোদের কোথাও থেমে যাওয়া উচিত নয় । তাদের উন্নতির পথ দূরপ্রসারী । বিশেষ করে চপলার মতো মেয়ের মন রাখার চেয়ে সংকর্ম আর কী আছে ।

শচীন বলল, ব্যারিস্টারি পড়তে অনেক টাকা লাগে । আমরা কিন্তু তত বড়লোক নই । জানি । ওই কারণেই তো মুখপড়ি আপনাকে বিয়ে করতে রাজি হয়নি । কিন্তু আমার মনে হয়, চেষ্টা যারা করে তাদের টাকার অভাব কোনো বাধা নয় ।

আমি ব্যারিস্টার হলে আপনি খুশি হন ?

হই । ভীষণ খুশি হই

আপনার ননদের সঙ্গে বিয়ে হবে না জেনেও ?

বিয়ে যে হবেই না একথা কে বলল ?

হবে বলছেন ?

হতেও তো পারে । বিয়ের ব্যাপারে কত অঘটন ঘটে আমাদের দেখছেন না ? আমার কি কনককান্তির মতো ভেড়ার সঙ্গে বিয়ে হওয়ার কথা !

রক্ষণশীল পরিবারের ছেলে শচীন একটু চমকে উঠল সে কখনো তার আত্মীয় বা পরিচিত মহলে কোনো মহিলাকে স্বামীর নাম উচ্চারণ করতে শোনেনি । তার সঙ্গে ভেড়া বিশেষণ তো নয়ই ।

শচীন জবাব দিচ্ছে না দেখে চপলা আবার জিজ্ঞেস করে, বলুন না ! আমার মতো সব দিক দিয়ে চৌকস মেয়েকে কি এ সংসারে মানায় ? একটু শান থেকে চুন খসলেই এদের জাত যায় । আমরা এত রেসট্রিকশন ভাল লাগে না বলেই কলকাতায় পালিয়ে গেছি । কিন্তু গেলে কী হবে ! যাকে নিয়ে জীবন সেই তো জলঘট । কাজেই বিয়ের কথা কিছু বলা যায় না । বিশাখার সঙ্গেও আপনার একদিন হট করে বিয়ে হয়ে যেতে পারে ।

বোধহয় নয় ।

কেন নয় ?

শচীন একটা দীর্ঘশ্বাস ফেলে বলে, আর বোধহয় তা হয় না ।

কারণটা কী ? হঠাৎ এমন কী ঘটল ?

ঘটেছে বউঠান । আপনি বুঝবেন না ।

হঠাৎ চপলা ভীষণ রহস্যময় এক কটাক্ষে শচীনকে বিদ্ধ করে বলল, একেবারেই যে বুঝিনি তা নয় ।

শচীন মুখ আড়াল করল ।

বেচারি ! অত লজ্জুক হলে কি চলে ? একটু সাহসী হতে হয় । ডাকাতি করতে গিয়ে চোরের মতো হাবভাব ভাল নয় ।

একথায় শচীনের ফর্সা রঙে রক্তিমতা দেখা দিল ।

শচীনের অবস্থা দেখেই বোধহয় চপলা দয়া করে তাকে রেহাই দিতে বলল, আজ গান শোনাবেন না !

শচীন সেদিন গানের মধ্যে ঢেলে দিয়েছিল নিজেকে ।

শেষ হলে চপলা এক পেট খাবার খাওয়াত তাকে । বলল, উকিল যে এমন গায়ক হতে পারে জানা ছিল না ।

কেন, উকিলরা কি গাধা ?

তাই বললাম বুঝি বলছিলাম উকিল পেশাটার সঙ্গে গান যেন ভারি বেমানান ।

ব্যারিস্টার হয়ে গান গাইতে হবে তাহলে !

চপলা দৃঢ় স্বরে বলল, হ্যাঁ । মনে রাখবেন ব্যারিস্টার বা আই সি এস কিছু একটা আপনাকে হতেই হবে । আমি জানি আপনি পারবেন ।

সেদিন এই পর্যন্ত ।

তারপর জল আর একটু গড়িয়েছে কতদূর গড়িয়েছে তা হিসেব করা শচীনের অসাধ্য । সে নিজের মনের কথা বলতে পারে । এক পাগল প্লাবনে ভেসে গেছে বিশাখা, ভেসে গেছে জমিদার শ্রীকান্ত রায়ের মেয়ে । তার মনের মধ্যে এখন শুধু একটিমাত্র মুখ । সকাল থেকে গভীর রাত অবধি সেই মুখ একবারের জন্যও অস্ত যায় না । ঘুম ভেঙে যায় বারবার । এক অশ্বখুরধ্বনি মথিত করে শচীনের বুক । সর্বনাশের নেশায় নাচে হৃৎপিণ্ড ।

শচীন অনেকটা জল খেল ঘটি থেকে । তারপর মশারি তুলে বাইরে এসে জানালার ধারে দাঁড়াল । জানালার ধার থেকেই আমবাগানের শুরু । সেখানে ঝুপসি আঁধার । অজস্র জোনাকি জ্বলছে । বিঝি ডাকছে সুতীর ঝালায় । আচমকা শেয়াল ডেকে উঠল দূরে । দমকা এক বাতাসে টিনের চালে ঘষটান খেয়ে গেল সুপুন্নির পাতা । আকাশে মেঘ চমকাল । বৃষ্টি আসবে । মেঘ ডাকছে দূরে কোথাও ।

শচীনের মনে হচ্ছিল তার গা ভরে জ্বর এসেছে বুঝি । চোখে জ্বালা । এক একবার তার মনে হচ্ছে, এ কী করছে সে ? একটা সংসার ভেসে যাবে, দু-দুটি অবোধ শিশু পড়বে ভীষণ বিপাকে, তাছাড়া তাকেও তো ভেসে পড়তে হবে সব বন্ধন ছেড়ে । চেনা মানুষের কাছে মুখ দেখানোর জো থাকবে না । -এ কি সম্ভব ? এ কি উচিত হবে ?

কিন্তু ক্ষণকালের জন্য মাত্র এইরকম যুক্তিশীল আচরণ করে তার মন । পর 'হুত্বেই একটা আবেগ ভিতরকার সব নীতিবোধের ঢোকাঠ ডিঙায়, বেড়া ভাঙে, সীমানা লঙ্ঘন করে কী করবে শচীন ?

তালি এক হাতেও বাজছে না । শচীন তবু অবিবাহিত, পিছুটান ছাড়লেও খুব বেশী কিছু যাবে আসবে না । উকিল মানুষ, যেখানেই হোক পসার পাবেই । কিন্তু চপলাকে ছাড়তে হবে তার বহুশুণ বেশী । তবু চপলার ভিতর তেমন কোনো দুর্ভাবনা নেই ।

শচীন খবর পেয়েছে, কনককান্তিকে কলকাতায় রওনা করে দিয়েছে চপলা । নিজে থেকে গেল । এই থাকার অর্থও খুব স্পষ্ট আর উদ্ভেজক ।

শচীন যে সঠিক কোনো সিদ্ধান্তে আসতে পেরেছে তাও নয় । তার মাথা পাগল-পাগল, মন অস্থির । সবচেয়ে বড় কথা, চপলার সঙ্গে তো স্পষ্ট কোনো কথা হয়নি । শুধু আভাস ইংগিত মাত্র । এখনো তারা আপনি থেকে তুমিতে নামেনি । এমন কি, শচীনের মতো পাগলামিও পেয়ে বসেনি চপলাকে । সে দিবি বাড়ির লোকের সঙ্গে হাসিমুখে কথা বলছে, শিশুদের পরিচর্যা করছে, সংসারের ধকল সামলাচ্ছে । মেয়েরা হয়তো পুরুষদের চেয়ে অনেক বেশী শক্ত হয় । এদিকে শচীন ৭৭৭ মামলার সওয়াল গুলিয়ে ফেলছে । দুটো মামলার শুনানি পিছিয়ে দিতে চেয়ে জজকে খোসামোদ করেছে ।

সবচেয়ে বড় সমস্যা হল, শশিভূষণের মামলা উঠতেও দেবী নেই। হেমকান্ত তাকেই শশিভূষণের উকিল হয়ে বরিশাল পাঠাবেন বলে স্থির করেছেন। অথচ সেই মামলার প্রত্নুতি হিসেবে যেসব আরগুমেন্ট সাজানো উচিত ছিল তা আজও করে উঠতে পারেনি শচীন।

বাড়ির লোকের সঙ্গে সে ভাল করে কথা বলতে পারে না। বড্ড অনামনস্ক থাকে। তিনবার ডাকলে সাড়া দেয়। এরকম চলতে থাকলে সে অচিরেই ধরা পড়ে যাবে। কী লজ্জা!

সুফলা একদিন বলেই ফেলল, দাদা কেবল বুঝি চৌধুরিদের কুটনি মেয়েটার কথা ভাবো!

তাকে কে বলল? ফাজিল

সুফলা গোঁজ হয়ে বলে, ভীষণ পাজি, জানো না তো?

আমি মামলা মোকদ্দমার কথা ভাবি। ওসব ভাববার সময় কই?

ওদের বাড়ির বউ আমাদের বাড়ি আসে, জানো?

একটু কেঁপে উঠে শচীন বলল, আসে কখন?

রোজ দুপুরের দিকে। তুমি বেরিয়ে গেলে।

কী চায়?

কী আবার চাইবে ধরেবেঁধে তোমার সঙ্গে বিশাখার বিয়ে দিয়ে তবে ছাড়বে।

আমি বিয়ে করলে তো

তুমি ওবাড়ি যাও, সবাই তো জানে।

সে যাই কাছারির কাজে। টাকা দেয়।

টাকা দিলেই কি? ও বাড়ির চৌকাঠও ডিঙানো উচিত নয়।

তাকে এত পাকা কথা শেখাচ্ছে কে?

সুফলা সাহস করে দাদাকে অনেকটা বলেছে। এবার ভয় পেয়ে চূপ করে গেল।

বউঠান এসে কী বলে? শচীন জিজ্ঞেস করে।

কিছু বলে না। ধানাই পানাই গল্প করে মার সঙ্গে। আসল মতলব তো আমরা জানি।

জানিস তো জানিস, খবরদারদুম করে অপমান-উপমান করে বসিস না যেন। যা কুঁদুলি তোরা!

আমরা অপমান করব কেন? আমরা কি ওদের মতো যে লোককে মানুষ বলে মনে করিনা!

সেদিন বিকেলে দেখা হল চপলার সঙ্গে। রোজই কাছারির কাজ শেষ হলে নীচের তলার একটা ঘরে তার সঙ্গে দেখা হয় চপলার। ব্যাপারটা দৃষ্টিকটু হয় কিনা তা ভেবে দেখার চেষ্টা করেনি শচীন। আর ভাবতে ভাল লাগে না।

সে চপলাকে জিজ্ঞেস করল, আপনি যে আমাদের বাড়িতে প্রায়ই যান তা তো বলেননি কখনো আমাকে।

চপলা বিষণ্ণ গলায় বলল, কী সুন্দর সংসার আপনাদের। ভারী শান্তি, শ্রী। এরকম বাড়িতে যে কেন বিশাখা যেতে চায় না তা আমার মাথায় ঢোকে না।

## ॥ ৫০ ॥

এত ভয় রেমি জীবনেও পায়নি, মাতাল ধুবকে সে ততটা ভয় পেত না, যতটা পেল এই পাগল ধুবকে। নির্বিকার মুখে যে পুরুষ তার বিয়ে করা বউকে অন্য পুরুষের সঙ্গে ঘর করার পরামর্শ দেয় এবং মৌলিক সত্যতার দোহাই পাড়ে তার পাগলামী সম্পর্কে সন্দেহ থাকতে পারে না।

সেই রাতে ধুব ঘুমোলো না, কাঠের মতো শক্ত হয়ে বসে রইল চেয়ারে। মশার কামড় খেল অনেক। সামনে খোলা একখানা বই। একটা লাইনও পড়ছিল না সে। রেমি বিছানায় পড়ে রইল চূপ করে। রাত দশটা নাগাদ জগা এসে খোঁজ নিয়ে গিয়েছিল তার। সাড়ে দশটা নাগাদ খাওয়ার

জন্য ডাক এসেছিল। তারা দুজন নড়েনি।

খুব ভোরবেলায় খুব বই বন্ধ করল। হাই তুলে উঠে বাইরে বেরোনোর পোশাক পরল।

রেমি শড়মড় করে উঠে বলল, কোথায় যাচ্ছে?

একটু জাঁগং করে আসি। শরীরটা ফিট রাখতে হবে।

তুমি কোথাও চলে যাবে না তো!

গেলেই বা ক্ষতি কী? আজ থেকে আমি তোমার কেউ নই।

কথাটা অনেকবার বলেছো। আর বোলো না।

আচ্ছা বলব না। তুমি ঘুমোও।

তুমি কোথায় যাচ্ছে? পালাবে না তো!

না। আমার জীবনের প্রথম ও শেষ ঘটকালীর জন্য এখন কিছুদিন কলকাতায় থাকব।

তোমাদের ব্যাপারটা হয়ে গেলে কিছুদিনের জন্য উধাও হতে পারি।

রেমি এই পাগলামীর কী জবাব দেবে? ভয়ে চূপ করে রইল।

খুব জগিং করতে গেল, না আর কোথাও, তা বোঝা যাচ্ছিল না। কারণ দুপুর গড়িয়ে যাওয়ার পরও তার ফেরার নাম নেই।

সাধারণত রেমি ধুবর জন্য অপেক্ষা না করেই খেয়ে নেয়। উচ্ছুংখল পুরুষের সঙ্গে মানিয়ে নেওয়া শক্ত, মানাতে গেলে প্রাণ যায়। তাই রেমি তার সময় মতো ভাত খেয়ে নেয়। ধুব তার সময় মতো ফেরে, কখনো খায়, কখনো খায় না।

কিন্তু রেমি আজ খেল না, অপেক্ষা করতে লাগল।

দুপুরে এবং রাতে কৃষ্ণকান্তর খাওয়ার সময়ে রেমি উপস্থিত থাকে। এটা রেওয়াজ। আজ রেমি ওপরে না উঠে নীচের ঘরে চূপচাপ শুয়ে ছিল। মাঝেমাঝে কাঁদছে। বুক জ্বলছে জ্বালায়।

জগা এসে দুপুরে দরজায় টোকা দিয়ে বলল, বউদি, ওপরে যাও। বড় কর্তা ডাকছে।

এই একজনের ডাক রেমি কখনো উপেক্ষা করতে পারে না। সম্ভবত কৃষ্ণকান্ত খেতে বসেছেন

এবং বউমাকে না দেখে উদ্বিগ্ন।

রেমি যথাসাধ্য নিজের মুখ থেকে অনিদ্ভার ক্লাস্তি ও কান্নার চিহ্নগুলি মুছে ফেলবার চেষ্টা করল লঘু প্রসাধন দিয়ে। বড় করে সিঁদুরের টিপ পরল, ঘোমটাটা একটু বেশী করে টানল আজ, তারপর ওপরে গেল।

ধোঁয়া-ওঠা গরম ভাত এবং ফুটন্ত ঘি ছাড়া কৃষ্ণকান্তর চলে না। সেরকমই দেওয়া হয়েছিল তাঁকে। কিন্তু বউমাকে না দেখতে পেয়ে কৃষ্ণকান্ত ভাতে হাত দেননি। ফলে গরম ভাত ঠাণ্ডা হয়েছে, ঘি জড়িয়ে গেছে।

কৃষ্ণকান্ত উদ্বিগ্নের গলায় জিজ্ঞেস করলেন, কী হয়েছে মা? শরীরটা কি ভাল নেই?

রেমি ভাতের থালাটা চোখের পলকে জরিপ করে নিয়ে হাত বাড়িয়ে থালাটা তুলে নিয়ে বলল, ভাত ঠাণ্ডা হয়ে গেছে। আমি আবার গরম ভাত নিয়ে আসছি।

কৃষ্ণকান্ত খুশি হয়ে একটা বড় স্বাস ছাড়লেন।

ফুটন্ত ঘি দিয়ে গরম ভাত মেখে প্রথম গ্রাসটি মুখে তুলে কৃষ্ণকান্ত বললেন, আমার বাবার একবার কী হয়েছিল জানো?

কী বাবা?

মাত্র পঁয়তাল্লিশ ছেচল্লিশ বছর বয়সে তাঁকে একবার বুড়ো হওয়ার বাতিকে পেয়েছিল। সে সাজঘাতিক বাতিক। দিন রাত মৃত্যুচিন্তা করতেন। কথাটা বললাম কেন জানো?

রেমি স্নিগ্ধ চোখে স্বপ্নের মুখের দিকে একবার দৃষ্টিক্ষেপ করে চোখ নামিয়ে নেয়।

কৃষ্ণকান্ত একটু মজা পাওয়ার হাসি হেসে বললেন, বাবা ছিলেন খুব নিষ্কর্মা লোক। সারাদিন



বসে-টসেই থাকতেন আর খুব ভাবতেন, যারা কাজ করে না এবং বৃথা চিন্তা করে তাদের বুড়োমিতে পেয়ে বসে খুব অল্প বয়সেই। আমার ভয় হচ্ছে আমাকেও না আবার ওই বুড়োমিটা চোপে ধরে।

আপনি তো আর নিষ্কর্মা নন বাবা।

তা নই। আর নই বলেই এই বুড়ো বয়সেও আমাকে বুড়োমিতে পায়নি এতদিন। কিন্তু এবার মস্তিষ্ক চলে গেলে মা, একটু নিষ্কর্মার মতোই লাগবে নিজেকে।

মস্তিষ্ক ছাড়াও তো আপনি কত কাজ করেন।

করি বৈকি মা। কিন্তু ব্যাপারটা কী জানো, মস্তিষ্ক আছি বলেই সেই সুবাদে পাঁচটা কাজ জুটে যায়। গদি গেলে তখন আর কে পৌছে বলো, কাজকর্ম কমে গেলেই বাজে চিন্তা এসে জোটেই।

একটা দীর্ঘশ্বাস ছাড়লেন কৃষ্ণকান্ত।

রেমি একটু সান্ত্বনা দেওয়ার চেষ্টা করে বলল, আপনার কাজ একটু কমাই উচিত বাবা, যা খাটছেন, আমার তো ভয় হয় অসুখ করবে বুঝি।

দর পাগলী, কাজ করলে কখনো অসুখ করে? শরীরটা ভগবান দিয়েছেন কাজ করার জন্যই, বসে থাকার জন্য নয়। এটাকে নিংড়ে যত পারি কাজ আদায় করে নিলে তবেই শরীর ধারণ করার একটা মানে হয়। নইলে বৃথা শরীর পুষে রেখে লাভ কী?

কৃষ্ণকান্ত খুব সামান্যই খান। কিছুদিন হল মাছ মাংস খাওয়া ছেড়ে দিয়েছেন। ঘি-মাখা ভাত শেষ করেই অন্য সব পদ সরিয়ে রেখে দুধ আর কলা দিয়ে ভাত মাখতে মাখতে একটু হেসে বললেন, তুমি আমার মা বলেই একটা কথা আজ তোমাকে বলতে ইচ্ছে করছে। আমার বাবা হেমকান্ত চৌধুরী সম্পর্কে তুমি কিছু শুনেছো? কোনো গুজব?

রেমি শুনেছে। কিন্তু মুখে তা স্বীকার না করে নিপাট ভাল মানুষের মতো বলল, না তো বাবা।

কৃষ্ণকান্ত মুখটা গম্ভীর করে বললেন, শোনাটাই স্বাভাবিক ছিল। তোমাকে বলেই বলি মা, তাঁর একবার পদস্থলন হয়েছিল।

রেমি সিটিয়ে রইল লজ্জায়।

কৃষ্ণকান্ত রেমির দিকে ভ্রূক্ষেপও না করে দূরগত এক চোখে সামনের দিকে চেয়ে আস্তে আস্তে বললেন, পঁয়তাল্লিশ ছেচাল্লিশ বছর বয়সে যে কোন স্বাস্থ্যবান পুরুষেরই পূর্ণ যৌবন থাকে। তিনি নিজেকে বুড়ো ভাবতে শুরু করেছিলেন বটে, কিন্তু সত্যিই তো তা নয়। বিপত্নীক, সুপুরুষ এবং খুব সজ্জন প্রকৃতির এই মানুষটির পদস্থলন ঘটল সেই বয়সে। সকলেই অবাক হয়ে গিয়েছিল। ছিছিষ্কারও পড়ে গিয়েছিল চারদিকে। কিন্তু আমি তাঁর কোনো দোষ দেখতে পাইনি। আজও, এতদিন পরেও অনেক বিচার, অনেক বিশ্লেষণ করে মনে হয়েছে, কাজটা আমাদের দৃষ্টিকোণ থেকে যেমনই দেখাক, তাঁর দিক থেকে প্রয়োজন ছিল।

রেমি কিছু বলল না। টেবিলের ওপর আঙুলের দাগ দিতে থাকল। কৃষ্ণকান্ত ধীরে ধীরে বললেন, জীবনে এক-আধবার পদস্থলন অনেকেরই ঘটে কিন্তু তা দিয়ে লোকটার বিচার করে মূর্খরা। বুঝলে মা!

প্রসঙ্গটা কেন উত্থাপন করেছেন কৃষ্ণকান্ত তা যেন আচমকাই বুঝতে পারল রেমি। বুঝে কঁপে উঠল ভিতরে ভিতরে।

কৃষ্ণকান্ত ভারী মোলায়েম গলায় বললেন, হেমকান্তের নিন্দে যারা করে বেড়াত তাদেরও খবর আমি রাখতাম। তারা কেউই খুব নিষ্কলঙ্ক ছিল না। কিন্তু মানুষের ধর্মই হল, নিজের দোষ টপকে অন্যের দোষ দেখা।

রেমি মৃদুস্বরে শুধু বলল, ঠিকই তো।

কৃষ্ণকান্ত দুধভাতটুকু অনেকক্ষণ নাড়াচাড়া করছিলেন। হঠাৎ নির্বিকার গলায় জিজ্ঞেস করলেন, তোমার সময় কেমন কাটছে মা?

ভালই তো ।

খুব ভাল যে নয় সে আমি জানি । আর সেইজন্যই রাজাকে বলেছিলাম তোমাকে একটু গানটান শেখায় যেন । তা রাজা আসে তো !

রেমিও তিনটা ঝাঁ ঝাঁ করে উঠল । শরীরে সমস্ত তন্ত্রীতে বয়ে গেল একটা ঝড় । মাথা নীচু রেখে সে প্রাণপণে নিজেকে সংযত করার চেষ্টা করতে করতে বলল, মাঝে মাঝে ।

মাঝে মাঝে ? কেন সে কি খুব নবাবপুত্র হয়েছেন নাকি ? তাকে আমি বলেছি পারলে রোজ যেন আসে । গান শেখাবে, একটু কম্প্যানিও দেবে । আমাদের দামড়াটা কবে কোথায় যায়, কবে আসে তার তো ঠিক নেই । তোমার সময় কাটে কী করে ?

রেমি তার অদ্ভুত চোখ দুখানা তুলে কৃষ্ণকান্তকে একপলক দেখল । বাপের বাড়ি খুব বেশী দূর নয় তার, বিয়েও এমন কিছু বেশী দিন আগে হয়নি, তবু বাপের বাড়ির লোকেরা যে তার পর হয়ে গেছে, দূরত্বটাও বেড়ে গেছে তাকে তার কারণ এই মানুষটি । রেমি জানে লোকটা বড় সোজা নয় । ঝানু কুটনীতিক, দোষে গুণে তৈরি হওয়া মানুষ, কিন্তু এই মানুষটির মধ্যে এক অগাধ গভীর দীঘির মতো আশ্রয় আছে তার । সে এও বোঝে, এ লোকটার “মা” ডাকের মধ্যে কোনো চাতুরী নেই, কৃত্রিমতা নেই । “মা” কীভাবে ডাকতে হয় তা মাতৃহীন এই লোকটা সত্যিই শিখেছিল ।

রেমি মৃদু একটু হেসে বলল, রাজা ব্যস্ত মানুষ । ওর অনেক ফাংশন থাকে । রেডিও প্রোগ্রাম থাকে । ফিল্মের কাজ থাকে ।

জানি । কিন্তু সেসব ওর জন্য করে দিল কে ? কার ঝুঁটির জোরে এখন করে যাচ্ছে তা জানো ? না তো বাবা !

সেটা তো বলবে না, প্রেস্টিজ যাবে যে, তাছাড়া কৃতজ্ঞতার ল্যাঠাও তো আছে । যাকগে, রাজা না পারলে আমি আর কাউকে গানের মাস্টার রেখে দেবো । ভাল করে শেখো । একটা কিছুতে মনপ্রাণ ঢেলে দাও ।

আপনি আমার জন্য এত ভাবেন কেন বাবা ?

আমি না ভাবলে কে ভাববে বলো ! আমার স্বার্থও তো আছে । বুড়ো বয়সে একটি মায়ের মতো মা পেয়েছি । কিন্তু দামড়াটার দোষে বুঝি আমার মা তিষ্ঠোতে না পেরে শেষ পর্যন্ত পালায় । সেই ভয়েই তো তোমাকে এত বাঁধবার চেষ্টা ।

আমি তো পালাতে চাই না বাবা !

চাইবে কেন মা ? তুমি চঞ্চলা হলে এ বাড়ির লক্ষ্মীও চঞ্চলা হবেন । আমি জানি একদিন তুমি এক ঝুঁটোয় বাবা-ব্যাটাকে বাঁধতে পারবে । আমি সেই আশাতেই বেঁচে আছি ।

রেমি মাথা নীচু করে রইল । দুই চোখ দিয়ে টপ টপ করে জল পড়ছিল অবিরল ।

কৃষ্ণকান্ত অন্যমনস্ক ছিলেন বলেই বোধহয় ব্যাপারটা লক্ষ্য করলেন না । কিংবা লক্ষ্য করলেও না-লক্ষ্য করার ভান করলেন । ধীর গলায় বললেন, আমার আরো দুটো ছেলে আছে, কিন্তু তাদের সম্পর্কে আমি খানিকটা নিশ্চিন্ত । বড়জন মিলিটারি, ত্যাজাপুত্র, তার কথা ভেবে লাভ নেই । ছোটোটা মোটামুটি নিরাপদ চরিত্রের ছেলে । আমার একমাত্র প্রবলেম তোমার স্বামীটিকে নিয়ে ।

জানি বাবা ।

তুমি তো জানবেই মা । দামড়াটা আমার যত বড় শত্রুই হোক, এ কথা বলতে হবে যে, ওর মতো স্বচ্ছ বুদ্ধি ও প্রাজ্ঞল মন আমার অন্য দুই ছেলের নেই । কিন্তু কেন যেন ব্যালানসড হল না । কোথায় চরিত্রের মধ্যে একটা ভারসাম্যের অভাব রয়ে গেল । তাই না ?

হ্যাঁ

ওকে কি তোমার পাগল বলে মনে হয় ? উন্মাদ পাগল না হলেও প্রচ্ছন্ন পাগল ?

প্রচ্ছন্ন পাগল কথাটা রেমি এই প্রথম শুনলো । কান্নার মধ্যেও একটু হাসি পেল তার । মাথা

নেড়ে শুধু 'হ্যাঁ' জানাতে পারল সে। কথা বলতে পারল না।

কৃষ্ণকান্তও একটু ম্লান হেসে বললেন, এই পাগলামীর কোনো চিকিৎসাও তো নেই। এখন ওর সমস্ত রোখটা গিয়ে পড়েছে তোমার ওপর। তোমাকে যত্ননা দিচ্ছে, কষ্ট দিচ্ছে।

রেমি ম্লানমুখে বলল, মেয়েরা তো কষ্ট করার জন্যই জন্মায়। তাতে কিছু নয় বাবা। তবে একটা জিনিস আমি সইতে পারি না।

কৃষ্ণকান্ত উদ্বিগ্ন হয়ে বলেন, কী সইতে পারো না? দামড়াটা কি গায়ে হাতটাতও তোলে নাকি? চাবকে আমি ওর—

রেমি আর্তস্বরে বলে, না না, তা নয়।

তাহলে কী?

আপনি দেখবেন বাবা, আমাকে যেন এ বাড়ি থেকে কেউ জোর করে তাড়িয়ে না দেয়।

তোমাকে তাড়াবে? কৃষ্ণকান্ত হতভম্বের মতো বলেন, তোমাকে? কার এত বুকুর পাটা?

আপনি অত অস্থির হবেন না।

কে তোমাকে তাড়াতে চেয়েছে? ওই দামড়াটা? রাজু? ওরে রাজু? দেখ তো মেজদাদাবাবু ঘরে আছে কিনা! না থাকলে যেন এলেই আমার সঙ্গে দেখা করে।

রেমি তটস্থ হয়ে বলে, আমি তো বলিনি যে আপনার ছেলে আমাকে তাড়াতে চেয়েছে।

ভদ্রলোকের মেয়েরা কি সব কথা মুখে আনতে পারে! দামড়াটা যে এত ছোটোলোক হয়ে গেছে আমার তা জানা ছিল না। আর যাই করে বেড়াক মনটা চণ্ডা ছিল।

উনি বলেননি।

তাহলে কে? বলো, তার নাম বলো। চব্বিশ ঘণ্টার মধ্যে তাকে এ বাড়ির পাট গোটাতে হবে।

রেমি এই বিস্ফোরক পরিস্থিতিতেও হেসে ফেলে।

হাসছো মা? হাসির কারণটা কী?

আপনার অকারণ উতলা হওয়া দেখে।

কেউ কিছু বলেনি তোমাকে?

না। আমি বলছিলাম এমন পরিস্থিতি যাতে না হয় যে, আমাকে এ বাড়ি ছেড়ে চলে যেতে হয়।

সেটা কেন হবে বলো তো!

হতে কি পারে না?

কৃষ্ণকান্ত কিছুক্ষণ থম ধরে বসে রইলেন। তারপর হঠাৎ বললেন, ঠিক আছে। আমি আজই উকিল ডাকছি। এই বাড়ি তোমার নামে লিখেপড়ে দিই। তারপর আর এ বাড়ি ছাড়ার কোনো প্রশ্নই উঠবে না।

রেমি ভয় পেয়ে বলল, না না তার দরকার নেই।

তুমি আমাকে বারবার নিরস্ত করছো কেন মা?

আপনি তো আছেন বাবা। আমার আর ভয় নেই।

আমি চিরকাল থাকব না। তখন?

আপনি না থাকলে এই ভূতের বাড়িতে কি আমিই থাকতে পারব?

কৃষ্ণকান্তর চোখ ছলছল করে উঠল। কিছুক্ষণ কথা বলতে পারলেন না। তারপর দুধভাতের শেষ অংশটুকু রেখেই উঠে গেলেন আঁচাতে।

রেমি হাঁফ ছেড়ে বাঁচল। ভালবাসারও দমবন্ধ করা এক অক্রমণ আছে। সে তার স্বস্তিরের কাছ থেকে যা পেয়েছে তা আর কারো কাছ থেকেই কখনো পায়নি। এরকম একমুখী গভীর স্নেহের কোনো অভিজ্ঞতা ছিল না বলে তার আজ দমবন্ধ লাগছিল এতক্ষণ।

রেমি দুপুরে এক কাপ কফি খেয়ে অপেক্ষা করতে লাগল নীচের ঘরে। ধুব আসুক একসঙ্গে

খাবে ।

খিদে, ক্লান্তি, নিদ্রাহীনতায় রেমির শরীর বড় অবশ লাগছিল । কেন যে এই কারাগারে নিজেকে আবদ্ধ রেখেছে এতদিন তা কিছুতেই যুক্তি দিয়ে বোঝে না সে । শব্দের স্নেহ তো গৌণ ব্যাপার । যাকে নিয়ে সম্পর্ক রচিত হয় সেই মূল মানুষটাই যদি আড় হয়ে থাকে, যদি পাগল হয়, স্নেহহীন হয়, তবে এক কোটি মানুষের ভালবাসাও তো মূল্যহীন । তবু রেমি কেন আছে ? কোন যুক্তিগ্রাহ্য কারণে ?

রেমি ভেবে দেখেছে, যুক্তির পথ দিয়ে সব সময়ে তো হাঁটে না মানুষ । তার মন অনেক সময়েই অদ্ভুত আচরণ করতে থাকে । কিছুতেই তাকে বাগে আনা যায় না ।

দুর্বল শরীর জুড়ে কখন নেমে এল ঘুম রেমি টের পায়নি । ধুবই তাকে জাগাল ।  
ওঠো ওঠো ।

ধড়মড় করে উঠে পড়ে রেমি, কী হয়েছে গো ?

কিছু হয়নি । মুখ অত শুকনো কেন ?

শুকনো ? বলে রেমি নিজের মুখে একটু হাত বুলিয়ে বলে, কোথায় শুকনো ? তুমি এতক্ষণে এলে ?

এইমাত্র ।

খাওনি তো ?

না ।

চলো, খাবে চলো । আমি আজ তোমার জন্য বসে আছি ।

আমার জন্য ? কেন ?

ইচ্ছে হল, তাই চলো, আমার ভীষণ খিদে পেয়েছে ।

ধুব একটু হাসল । তারও মুখ শুকনো । হাসিটা ভাল ফুটল না । একটা হাই তুলে বলল, খাবো, তাড়া কিসের ?

তোমার নেই । আমার আছে ।

চলো, আজ বাইরে কোথাও খাওয়া যাক ।

ওমা ! কেন ?

এখন তিনটে বাজে । এই অবেলায় ঠাকুর চাকরদের উদ্ব্যস্ত করার দরকার কী ? ওরা একটু বিশ্রাম নিচ্ছে নিক না ।

ওদের উদ্ব্যস্ত করব কেন ? আমি বুঝি পারি না !

বাড়ির একঘেয়ে খেতে ভাল লাগে না । চলো, বাইরে যাই ।

আমার যে রেস্টুরেন্টে খেতে ঘেম্মা করে ।

ভাল রেস্টুরেন্টে যাবো । ঘেম্মা করবে না ।

তোমার অন্য কোনো মতলব নেই তো !

না, কী মতলব থাকবে ?

সকালে আমাকে বিজ্ঞী অপমান করে গেছ । সারা রাত কষ্ট দিয়েছো ।

তবু তোমার মন বিদ্রোহী হচ্ছে না ?

হচ্ছে না আবার ! খুব হচ্ছে ।

তার লক্ষণ কোথায় ?

কী লক্ষণ দেখতে চাও ?

একটা বিশ্লেষণ । মাইরি দেখাবে ?

পারব না, যাও ।

কুঞ্জবনে আর এসো না, বুঝলে ?

কেন বলো তো !

এটা তোমার জায়গা ছিল । একা একা বসে ভাবতে । আমি ঠাট্টা করে নাম দিয়েছিলাম কুঞ্জবন । কৃষ্ণ থাকত, কিন্তু রাধা আসত না । আজকাল রাধা আসে, কৃষ্ণও থাকে । তুমি পালাও । এসব কী হচ্ছে মনু ? আমার যে হাট অ্যাটাক হয়ে যাবে ।

সেইজনই তো তোমাকে সাবধান করছি । পৃথিবীর অনেক ঘটনা সম্পর্কেই তো তুমি চোখ বুঝে থেকেছো এতকাল । এটাও চোখ বুজে এড়িয়ে যাও ।

কিন্তু এ তো আমার পরিবারের কলঙ্ক মনু ।

তা জানি । কিন্তু তোমার বা আমার কিছু করার নেই ।

কেন নেই ?

যদি বাধা দাও তবে মরীয়া হয়ে একটা কিছু করে ফেলবে ।

কী করতে পারে বলো তো !

আত্মহত্যা করতে পারে । পালিয়ে যেতে পারে ।

তা বলে চুপ করে থাকতে হবে ?

অন্য কেউ হলে আমি চুপ করে থাকতে বলতাম না । তুমি বলেই বলছি । তুমি শাস্ত, ভাবুক মানুষ । এসব সামাল দেওয়া তোমার কাজ নয় ।

তার মানে তুমি আমাকে অপদার্থ ভাবো ।

যা ভাবি তাই ভাবি । এখন তো নতুন করে ভাবতে পারব না ।

হেমকান্ত কিছুক্ষণ গম্ভীর বিষণ্ণ মুখে বসে থেকে বললেন, আমি সত্যিই অপদার্থ মনু ।

তুমি কী তা তো এ জন্মে সবটা জানা যাবে না । তবে যাই হও, তুমি যেমনটি, ঠিক তেমনটিই থেকে ।

তা না হয় থাকলাম, কিন্তু ওদের যে রোখা দরকার মনু । তুমি একটা কিছু করতে পারো না ? রঙ্গময়ী মাথা নেড়ে বলে, না গো । তুমিও পারো না, আমিও পারি না । আমাদের সেই জোর নেই ।

কেন নেই ?

বোঝো না ? একটু তলিয়ে দেখ, বুঝতে পারবে ।

হেমকান্ত যথাসাধ্য তলিয়ে দেখলেন, কিন্তু বুঝতে পারলেন না । বললেন, আমি বুঝতে পারছি না মনু ।

সোজা তো ।

বুঝিয়ে দাও ।

তোমার আর আমার সম্পর্ক নিয়েও লোকের সন্দেহ আছে ।

হেমকান্ত একটা দীর্ঘশ্বাস ফেলে বলেন, লোকের মন বড় নোংরা মনু ।

সে তুমি যাই বলে, কথাটা তো সত্যি । তাই তুমি বা আমি কারো নৈতিক চরিত্র নিয়ে কথা বলতে পারি না । যদি বলি তবে ওরাও আমাদের বিরুদ্ধে আঙুল তুলে বলবে, তোমরা কি সাধু ?

বলবে বলছে ?

নিশ্চয়ই বলবে । বিশাখা একদিন বুঝি শচীনকে আলতো করে কী একটু বলেছিল চপলাকে নিয়ে । শচীন উপেটে বিশাখাকে চোটপাট করেছে । বলেছে, চৌধুরি বাড়ির অনেক কেচ্ছাকাহিনী আছে ।

বিশাখা বলেছিল তাহলে

একটু বলেছিল। কিন্তু বেচারাকে অপমান হতে হয়েছে।

ওরা কতদূর এগিয়েছে মনু ?

আমি কি আড়ি পাতি নাকি যে জানবো ?

তুমি জানো। বলছ না।

খুব বেশী জানি না। তবে হাবভাব দেখে মনে হয় শচীন আর চপলা দুজনেই একটু বেশী  
বেপরোয়া। কাউকে গ্রাহ্য করছে না। করবেও না।

কনককে একটা খবর পাঠাবো ?

তুমি বোকা।

কেন ?

কনকের কিছুই করার সাধ্য নেই। তাকে আমি চিনি। চপলা ওকে যেমন ভেড়া বানিয়েছে ও  
তেমন ভেড়াটি হয়েই থাকবে। তুমি যদি ওর বউয়ের নামে ওকে কিছু বলো ও বিশ্বাস করবে না।  
উল্টে বরং তোমার ওপর রেগে যাবে।

কিন্তু কলকাতা যাওয়ার আগে কনকের সঙ্গে নাকি বড় বউমার ঝগড়া হয়েছিল।

হয়েছিল। তাতে কি প্রমাণ হয় যে, কনক পুরুষসিংহ ? আর চপলা ওর কৃতদাসী ?

তা বলছি না। ঝগড়া হয়েছিল কেন জানো ?

তোমার মেনীমুখে ছেলে বউ ছাড়া থাকতে পারে না। তাই বউকে টানাটানি করেছিল যাওয়ার  
জন্য। চপলা যেতে চায়নি বলে ঝগড়া। কিন্তু সেই ঝগড়ায় কার হার হয়েছে তা তো দেখছি !

বিষয় হেমকান্ত গভীর মুখে বললেন, হুঁ।

সংসারটা হল কাঁথার উল্টো পিঠের মতো। সামনেটা বেশ নকশাদার, সাজানো গোছানো সিজিল  
মিছিল। কিন্তু উল্টোপিঠে যত সূতার গিট, উল্টোপাশ্টা ফোঁড়। তোমার তো তলার দিকটা দেখবার  
দরকার নেই। যা হচ্ছে হোক।

শচীনকে যদি বরখাস্ত করি ?

রঙ্গময়ী একটু হেসে বলে, তাতে তোমারই ক্ষতি। সে তোমার বিষয়-সম্পত্তি যেক্ষেত্র মতো  
আগলাচ্ছে। তাকে তাড়ালে আবার পাঁচ ভুতে লুটে খাবে। তাছাড়া লাভও নেই। বরখাস্ত করলে  
ওদের রোখ আরো বাড়বে। বেহেড় হয়ে এমন কাণ্ড করে বসবে যে, তুমি মুখ দেখাতে পারবে না।

খবরটা কতদূর রটেছে জানো ?

রটেছে। ভালই রটেছে। এসব কি চাপা থাকে ?

আমার ধারণা, তুমি ইচ্ছে করলে এর মীমাংসা করে দিতে পারো। তোমার তো অনেক বুদ্ধি।

আমার ওপর তোমার অনেক বিশ্বাস। কিন্তু বললামই তো আমি সরাসরি কিছু করতে পারি না।

আমার মনেও তো পাপ।

হেমকান্ত সামান্য উদ্বার সঙ্গে বললেন, তোমার মনে পাপ থাকবে কেন মনু ? তুমি এমন কী  
অন্যায় করেছো ?

অন্যায় নয় ? ও বাবা, কত কলঙ্ক আমার !

হেমকান্ত মাথা নেড়ে বললেন, আমাকে যা তা একটা কিছু বোঝালেই যে আমি বুঝব অত বোকা  
আমি নই মনু। আমি বিপত্নীক, তুমি এখনো কুমারী। যদি চাই তো আমরা বিয়ে করতে পারি।  
তাতে কোনো নৈতিক অপরাধ হয় না, বিশ্বাসঘাতকতা হয় না, পাপও হয় না। বরং অরক্ষণীয়া  
কন্যাকে উদ্ধার করার পুণ্যই হয়। আমাদের সঙ্গে ওদের তুলনা করছ কেন ? চপলা ঘরের বউ,  
ছেলেমেয়ের মা, সে আর তুমি কি এক ?

রঙ্গময়ী হেমকান্তের কথায় মাথা নীচু করে লাজুক ভঙ্গীতে দাঁড়িয়ে রইল। হঠাৎ মৃদু হেসে বলল,

খুব বৃদ্ধি হয়েছে আজকাল, না ?

বিপাকে পড়েছি মনু, এখন আমার মাথার ঠিক নেই। একটা কিছু পরামর্শ দাও। আমার তো তুমি ছাড়া কেউ নেই, জানোই।

রঙ্গময়ী একটা বড় রকমের শ্বাস ফেলে বলে, সেটাই তো হয়েছে মুশকিল। তোমার আমি ছাড়া কেউ নেই। কিন্তু কপালগুণে আমি মেয়েমানুষ। তার ওপর আবার শিক্ষাদীক্ষা নেই। আমি তোমাকে কী পরামর্শ দেবো ?

তুমি মেয়েমানুষ হয়ে না জন্মালে আমার যে কী গতি হত !

বলছ যখন ভেবে দেখব। তবে যেটুকু অভিজ্ঞতা হয়েছে তাতে বলতে পারি, এসব ক্ষেত্রে জোর করে কিছু করতে যাওয়া ঠিক নয়।

জোর করতে পারি এমন জোরই যে আমার নেই।

রঙ্গময়ীর অসামান্য ধারাল মুখশ্রীতে লজ্জার লাভণ্য তেমন মানায় না। তবু লজ্জার রেশটুকু এখনো টলটল করছে মুখে। সলাজ দৃষ্টিক্ষেপ করে সে বলল, আজ কিছু একটা খুব জোরের কথা বলে ফেলেছো।

কী বলো তো !

ভেবে দেখ। এইমাত্রই তো বললে !

কোন কথাটা ?

উঃ, তোমাকে নিয়ে আর পারি না। সব কথাই শরিয়ে না দিলে হয় না।

বুঝেছি। হেমকান্তের ফর্সা রঙেও একটু লাল আভা মিশল।

ছাই বুঝেছো।

বুঝান ?

বলো তো কী ?

বিয়ের কথাটা তো ?

যাক। বলে রঙ্গময়ী পিছু ফিরল। হাঁটতে হাঁটতে বলল, কুঞ্জবনে থেকো না। ওরা আসবে।

এটা আমার জায়গা মনু। আমি থাকব। ওরা অন্য জায়গায় যাক।

রঙ্গময়ী যেতে যেতেও দাঁড়িয়ে পড়ে বলল, শোনো বোকা মানুষটার কথা। কুঞ্জবন তবু খোলামেলা জায়গা। এখানে দুজন আর যাই করুক তেমন ঘনিষ্ঠ হতে পারবে না। তুমি কুঞ্জবন না ছাড়লে ওরা ঘরে গিয়ে দোর দেবে।

হেমকান্ত রেগে গিয়ে বলেন, দিক। যা খুশি করুক।

রঙ্গময়ী মাথা নেড়ে বলে, ওটা কাজের কথা নয়। রাগের কথা। ঘর কিন্তু ভাল জায়গা নয়। যত কাণ্ড সব নির্জন ঘরেই তো হয়। যা বলছি শোনো। মাথা ঠাণ্ডা রাখো।

হেমকান্ত ঘরের ব্যাপারটা বুঝতে একটু সময় নিলেন। কিন্তু যেই বুঝলেন অমনি ছাঁকা খাওয়ার মতো চমকে উঠলেন।

সন্ধ্যাবেলা সেজবাতির আলোয় হেমকান্ত একখানা বাঁধানো খাতার প্রথম পাতায় লিখলেন ইহা আমি কী বলিলাম ! আমার মুখনিঃসৃত এই কথা যে আমাকে বিন্ময়ে আবিষ্ট করিতেছে, আনন্দে শিহরিত করিতেছে। তবে কি রবিবাবুর সেই কবিতার মতো আমার অভ্যন্তরেও এক নির্বরের স্বপ্নভঙ্গ ঘটতেছে ! বাঁধ ভাঙিয়া প্রলয়ংকর জলরাশি প্রমত্ত বেগে নামিয়া আসিবে ? রবির কর কি কোনো উপায়ে গুহার সূচীভেদ্য অঙ্ককার বিকীর্ণ করিয়া আমার প্রাণে স্পর্শ রাখিয়াছে ? আদি কবি বাঙ্গালীর মতো আমিও যে আজ স্বীয় মুখে উচ্চারিত একটি বাক্যকে সর্বস্বয়্যে পর্যালোচনা করিতেছি। কিমিদং ? ইহা কী ?

ইহা যাহাই হউক, এই বাক্যের মধ্যে নিহিত রহিয়াছে সত্য। যাহা সত্য তাহাই আজ সবেগে

বাহির হইয়া গেল। আমি নিমিত্ত মাত্র। অবচেতন মনের কথা শূন্যিয়াছি। চেতনার এমনই একটি স্তর যাহা ঘুমন্ত ও স্বপ্নময়। এইসব জীবনসত্য সেখানেই আত্মগোপন করিয়া থাকে। উপলক্ষ পাইলে সবেগে বাহির হইয়া আসে।

যে মানবীকে উপলক্ষ করিয়া আজ এই সত্য প্রকটিত হইল তাহাকে আমি বাল্যকালাবধি জানি। বয়সে সে আমার অপেক্ষা প্রায় বিশ বৎসর ছোটো। তাহাকে শিশু অবস্থায় আমি এক আধবার ক্রোড়েও ধারণ করিয়া থাকিব। ঠিক স্মরণ নাই। তবে সেই শিশুকে আমি বড় হইতে দেখিয়াছি। আমার যখন বিবাহ হয় তখন সে নিতান্তই বালিকা। আমার বাসরঘরে সে তাহার পিসির সহিত রাত জাগিতে গিয়া ঘুমাইয়া পড়িয়াছিল। গাছ বাহিতে, সাঁতার দিতে পারিত চমৎকার। রুক্ষ চুলে তেল জুটিত কি জুটিত না। পূজার দানের সস্তা ও মোটা শাড়ি পরিয়া সে ঘুরঘুর করিত। মুখখানায় বুদ্ধির দীপ্তি ছিল।

তাহাকে প্রথম ভাল করিয়া লক্ষ্য করি কিশোরী বয়সে। আমরা স্বামী-স্ত্রী দোতলার ঘরে থাকিতাম। আমাদের জানালার পাশেই একটি কাঠচাঁপা গাছের পুষ্পিত শাখা ছিল। পুষ্পের সুগন্ধ ঘরেও পাওয়া যাইত।

একদিন ভোর রাতে জানালার বাহিরে কাঠচাঁপা গাছের নরম ডাল ভাঙিয়া পড়িয়া শব্দ হইল, সেই সঙ্গে একটি শিহরিত মৃদু কাতরতার ধ্বনি। তাহা আত্ননাদ নহে। যেন একটা কোকিলের শ্বাসরোধ হইয়াছে। বা গলা ভাঙিয়াছে। উপমাটা বোধহয় ভাল হইল না। যাহাই হউক, আত্ননাদটি ঠিক আত্ননাদ নহে, কেহ যেন আত্ননাদ করিতে গিয়াও অমানুষিক প্রয়াসে সেটি রুদ্ধ করিল।

সেই শব্দ এমনই মৃদু যে আমার স্ত্রীর ঘুম ভাঙিল না। আমি উঠিয়া প্রথমে জানালা দিয়া দেখিলাম। তেমন কিছু দৃষ্টিগোচর হইল না। দ্রুত নীচে নামিয়া কাঠচাঁপা গাছের তলায় ঘাসের উপর অর্ধশায়িত যাহাকে আবিষ্কার করিলাম সে সেই কিশোরী। কোমরে ও হাতে সাজ্যাতিক চোট লাগিয়াছে। তবু সে কাতর কোনো শব্দ করিতেছে না। শুধু মুখটি বিকৃত করিতেছে অবরুদ্ধ যন্ত্রণায়।

তাহাকে ধরিয়া তুলিয়া প্রশ্ন করিলাম, গাছে উঠেছিলে কেন ?

ফুল তুলতে।

কাঠচাঁপা গাছে কেউ ওঠে ? ওর ডাল নরম হয় জানো না ?

জানি।

তবে উঠেছিলে কেন ?

তোমাদের দেখতে।

আমাদের দেখতে ? আমাদের দেখার কী আছে ?

তোমরা ওরকমভাবে শুয়ে থাকো কেন ?

আমি স্তম্ভিত হইয়া বলিলাম, কীভাবে শুয়ে থাকি ?

বিশ্রীভাবে।

আমার ইচ্ছা হইয়াছিল অসভ্য মেয়েটার গালে বিরাশি সিন্ধা ওজনের একটি চড় কষাইয়া দিই। কিন্তু নিজেকে সংবরণ করাই আমার চিরকালের অভ্যাস।

বলিলাম, তোমার লজ্জা হয় না ?

কেন হবে ?

আমরা স্বামী-স্ত্রী যে ঘরে বাস করি সেখানে অসময়ে ঊঁকি দাও, এটা কেমন কথা ?

বেশ করব ঊঁকি দেবো।

কেন ঊঁকি দেবে ?



আমার ইচ্ছে ।

বাঃ বেশ তো ! আমার এর বেশী কথা মুখে আসিল না ।

সে বলিল, বেশই তো ! কী করবে, মারবে ? মারো না ।

মারাই উচিত ।

বলছি তো মারো । মারো না !

আমি হঠাৎ হাসিয়া ফেলিয়া বলিলাম, মার খাওয়ার অত শখ কেন ?

তুমি আমাকে মারলে আমি খুশি হই । মেয়ে ফেললে আরো খুশি ।

এ কাজ আর কোরো না । বাড়ি যাও ।

কিশোরী সপাটে আমার মুখের উপর বলিল, রোজ করব । রোজ আসব । রোজ দেখা

আমার বিস্ময়ের ঘোর আর কাটিতে চায় না । এই মেয়েটি কি উন্মাদ হইয়া গিয়াছে ? সামান্য গরীব ঘরের মেয়ে, ইহার তো অত তেজ থাকিবার কথা নহে ।

মনুষ্যচরিত্র আমি কোনোকালেই তেমন অনুধাবন করি নাই । আমার কাজে বেশীর ভাগ মানুষের অস্তিত্বই গৌণ । তাহারা কখন, কেন কিরূপ আচরণ করে তাহা লইয়া আমি বিশেষ মাথা ঘামাই না । কিন্তু এই কিশোরী আমাকে ভাবাইয়া তুলিল । আমি ইহার মধ্যে স্বাভাবিকতার অভাব লক্ষ্য করিতেছিলাম, কিন্তু কারণটি অনুমান করিবার সাধ্য ছিল না ।

তবে তাহার বাবাকে আমি পরদিন জিজ্ঞাসা করিলাম, আপনার কন্যাটির মধ্যে কোনো অস্বাভাবিক মানসিকতা আছে কি ?

আজ্ঞা না তো !

সে কি খুব তেজী স্বভাবের মেয়ে ?

তাও নয় । বরং স্বভাব নম্রই । কেন বলুন তো ?

আমি তাকে হঠাৎ লক্ষ্য করলাম । সে একটু অদ্ভুত আচরণ করছে । তার প্রতি একটু লক্ষ্য রাখবেন ।

বিবাহযোগ্য কন্যার দায়গ্রস্ত পিতা ভয় পাইয়া বলিলেন, আজ্ঞে নিশ্চয়ই রাখব । তবে আমি দুবেলা গায়ত্রী জপ করি, অখাদ্য কুখাদ্য খাই না, নিত্য পূজা-পাঠ আমার বৃত্তি । আমার বংশে কেউ পাগল হবে এটা অস্বাভাবিক ব্যাপার ।

আমি একটু হাসিলাম । বলিলাম, তবু লক্ষ্য রাখবেন

আচ্ছা । বলিয়া তিনি চলিয়া গেলেন ।

কয়েকদিন পর আমার ভাই আসিয়া আমাকে এক অদ্ভুত ঘটনার কথা বলিল ।

তাহা সবিস্তারে লিখিতে চাই না । এইসব পারিবারিক ঘটনার লিখিত বিবৃতি থাকা ভাল নয়

তবে নলিনী যাহা বলিল তাহা আমাকে চমকাইয়া দিল ।

আমি বলিলাম, এই মেয়েটির একটি অস্বাভাবিক আচরণ আমিও লক্ষ্য করেছি ।

কী রকম ?

মেয়েটি সেদিন আমাদের শোওয়ার ঘরে উঁকি মারতে গিয়ে গাছ থেকে পড়ে যায় তারপর ?

আমি তাকে শাসন করতে গিয়ে ফাাসাদে পড়ে যাই । সে উল্টে আমাকে শাসন করে দিল ।

নলিনী সবিস্তারে কাহিনীটি আমার কাছে শুনিল । সে স্বদেশী করা মানুষ, প্রায় সাধু বৈরাগী ।

সংসারের কোনো মোহ তার নাই । কিন্তু তাই বলিয়া সে বাস্তব বোধ বর্জিত নয় । ধৈর্য ধরিয়া আমার অভিজ্ঞতার কথা শোনার পর সে বলিল, রোগটি আমি অনেক আগেই ধরেছিলাম ।

কিসের রোগ ?

দাদা, এ দেহের রোগ নয় । রোগটা মনের ।

আমি সরল বিশ্বাসে বলিলাম, আমারও তাই বিশ্বাস। মেয়েটা পাগল।

নলিনী হাসিল। বলিল, পাগল বটে। তবে সে পাগলামি অন্যরকম।

কি রকম?

চিন্তদৌর্বল্যের পাগলামি।

সে আবার কি?

দাদা, এ মেয়েটিকে তুমি কখনো আঘাত কোরো না। এর মনে ব্যথা বা দাগা দিও না।

ওসব বলছিস কেন?

এ মেয়েটি তোমাকে তার জীবনের মধ্যে একটা অত্যন্ত বড় জায়গা দিয়েছে।

আমাকে! আমাকে!

নিজেকে তুমি যত তুচ্ছই ভাবো, কারো কারো কাছে তুমিই হয়তো দেবতার মতো মহান।

॥ ৫২ ॥

রেমি খুব নরম খুব সবুজ ঘাসের ওপর দিয়ে হাঁটছে এখন। পা ডুবে যাচ্ছে কোমল সব স্পর্শের মধ্যে। শিউরে উঠছে গা। চারদিকে কী গভীর সবুজ সব টিলা। মাঝখানে একটা স্বপ্নের মতো অবিশ্বাস্য সুন্দর উপত্যকা। এত সুন্দর যে বিশ্বাস হয় না, ভয় করে। এরকম জায়গায় তো কখনো আসেনি আগে রেমি। কে নিয়ে এল তাকে!

পাশে পাশে একজন পুরুষ হাঁটছে। খুব কাছে। খুব গা ঘেঁষে। টের পাচ্ছে রেমি, কিন্তু তার মুখের দিকে সে তাকায় না। যেন জানে কে। কিংবা যেন জানতে নেই কে। কেউ একটা হবে। তবে পুরুষটির গায়ে কোনো গন্ধ নেই। তার কোনো ছায়া নেই। রেমি তবু নিশ্চিত। এরকমই যেন হওয়ার কথা।

এত সুন্দর জায়গা তবু তারও কি একটু দোষ থাকতেই হবে? না থাকলে হত না? উপত্যকার ঢাল বেয়ে, নরম ঘাস মাড়িয়ে যেখানে এসে পৌঁছোলো রেমি, সেখানে একটা ছোটো নদী। আঁকা বাঁকা। কিন্তু তাতে একটা রক্তিম স্রোত বয়ে যাচ্ছে। একটা ঝোপের ধারে পড়ে আছে একটি ভূগ-প্রতিম শিশুর নিথর দেহ।

রেমি থেমে সামান্য ভয়ের একটা শব্দ করল। অমনি একটা পুরুষ হাত এসে চেপে ধরল তার মুখ। সেই হাতে সিগারেটের তীব্র গন্ধ। না, সিগারেট নয়। অ্যালকোহল? না, অন্য কিছু।

রেমি লোকটার মুখের দিকে তাকাল না। নদীর দিক থেকে মুখ ঘুরিয়ে নিল। উল্টো দিকে হাঁটতে লাগল। পাশাপাশি গা ঘেঁষে পুরুষটিও।

রেমি বলল, ট্রেন আসতে এত দেরী করছে কেন?

পুরুষের গলাটা গমগম করে বলে উঠল, আজ দেরী হবে।

কোথা দিয়ে ট্রেন আসবে তা জানে না রেমি। এখানে তো কোনো রেল লাইন নেই, স্টেশন নেই। তবু বলল।

না, আছে। ভাবতে না ভাবতেই সে দেখল, একটা ছোট্ট প্ল্যাটফর্ম। লাল মোরমে ছাওয়া। অনেক কৃষ্ণচূড়া ফুল গাছ থেকে লাল মোরমে ঝরে পড়ে আছে। একটা সবুজ টিউবওয়েল। কোনো মানুষ নেই। যাত্রী নেই। পয়েন্টসম্যান বা কুলি নেই। স্টেশনের রঙিন ঘর থেকে অবিরল টরেটকার শব্দ আসছে।

খুব নির্বিকার মনে রেমি ধীরে ধীরে পুরুষটির পাশাপাশি পায়চারী করতে লাগল মোরমের ওপরে। এমা, সে জুতো বা চটি পরে আসেনি আজ! খালি পায়ের নিচে মোরমের দানা কিরকির করছে। সুড়সুড়ি দেয়।

সে সরাসরি তাকায় না । কিন্তু পাশ-চোখে লক্ষ করে, তার সঙ্গী পুরুষটি আকাশের দিকে চেয়ে আছে । চেয়ে থাকারই কথা যেন । রেমি নিজেও আকাশের দিকে তাকায় । সেখানে রক্তমেঘ । সমস্ত দিগন্ত জুড়ে ছড়িয়ে আছে ভয়াবহ লাল । এত লাল রং কোথাও জড়ো হতে আর দেখেনি রেমি ।

প্ল্যাটফর্মের শেষ প্রান্তে লোহার বেড়ার ধারে রেমি একটু দাঁড়ায় । দেখতে পায়, একটা শেয়াল সেই শিশুদেহটি মুখে করে একটা জলা থেকে উঠে আসছে । রেমিকে দেখে শেয়ালটা থমকে দাঁড়ায় । চোখে চোখ রাখে । তারপর অপরাধীর মতো চোখ নামিয়ে নিয়ে হেঁটে চলে যেতে থাকে ।

রেমি এবার আর চেষ্টা না । চেষ্টানো বারণ ।

রেমি বিষন্ন গলায় বলল, নিয়ে গেল ।

গমগমে পুরুষ-কণ্ঠ বলে, ঢিল মারছি, দাঁড়াও, ।

আতঙ্কে রেমি বলে, না থাক । শেয়ালটা পাগল ।

তাতে ভয় কি ? আমরা বেড়ার মধ্যে আছি ।

তবু থাক । আমরা তো চলেই যাবো ।

যাবো কী করে ? টিকিট হয়নি যে ।

কেন ?

টিকিটবাবু নেই ।

তাহলে কী হবে ?

দেখি, যদি টিকিটবাবু আসে । নইলে এখানেই রাত কাটাবো আমরা ।

লোকে নিন্দে করবে না ?

এখানে লোক নেই । শুধু শেয়ালেরা থাকে ।

শুধু শেয়াল ! মা গো !

আর কিছু বলল না রেমি । দাঁড়িয়ে রইল । সামনে লাল আকাশ ।

বাইরে দেয়ালে পিঠ রেখে দুজনে তখনো দাঁড়িয়ে ।

ধ্রুব আর জয়ন্ত ।

জয়ন্ত বলছিল, আমি দিদির সম্পর্কে সব খোঁজ খবর রাখি জামাইবাবু

কী খবর বলো তো ?

দিদিকে আপনি নষ্ট করার চেষ্টা করেছিলেন ।

তাই নাকি ?

সব জানি । নইলে রাজার সঙ্গে ওকে নিয়ে কথাটা উঠত না ।

তোমার দিদিকে তোমার চেয়ে আমি একটু বেশী চিনি ।

চেনারই কথা । কিন্তু আপনি সত্যিই তো আর দিদিকে চেনার চেষ্টা করেননি । আমার দিদি একটু সরল, হয়তো বোকাও । আপনাকে ঠিক মতো বুঝতে পারেনি । ও কী করে বুঝবে যে, ইউ হ্যাভ ইভিল ডিজাইনস ! তাই কাজটা আপনার কাছে সহজ হয়ে গিয়েছিল । কিন্তু যদি দিদি তখন একবারও আমাকে জানাত, তাহলে—

তাহলে কী ?

তাহলে আপনি আজ এত সুস্থ স্বাভাবিক থাকতেন না । দিদিকেও মরতে হ'ত না ।

জয়ন্ত, আজ অনেক কথা হয়েছে । থাক ।

আপনার সঙ্গে আমাদের এমনিতেও সম্পর্ক বিশেষ ছিল না । দিদি যদি মরে যায় তাহলে একেবারেই থাকবে না । আমি তো আপনার পরোয়া করি না ।

এসব শুনে ধুবর কোনো প্রতিক্রিয়া হচ্ছিল না। রাগ, দুঃখ, অনুতাপ কিছুই নয়। কিন্তু তার খুব অদ্ভুত একটা কথা মনে হচ্ছিল। রেমি যদি মরে যায় তবে নীচের ঘরে একা থাকতে তার কি ভূতের ভয় করবে? এমন নয় যে, ধুবর ভূতের ভয় আছে। কিন্তু তার মনে হচ্ছিল, এবার ভূতের ভয় হতেও পারে। রেমি মৃত্যুর পর বোধহয় মাঝে মাঝে এসে হানা দেবে স্বপ্নে। গলা টিপে ধরতে চাইবে কি?

ধুব নড়তে পারছিল না আর একটা কারণেও। তার পিঠের দিকে মেরুদণ্ডের নীচে দুপাশে একটা তীব্র ব্যথা টের পাচ্ছিল সে। নড়তে গেলেই সেই ব্যথা বর্শার ফলার মতো মাজা ভেদ করতে চায়। সেই সঙ্গে তলপেটটা বড্ড ভারী লাগছে।

ধুব অশ্রুট একটা যন্ত্রণার শব্দ করল। জয়ন্ত একবার ফিরে দেখল তাকে।  
কিছু বললেন?

না। আমার কোমরে একটা ব্যথা হচ্ছে।

হচ্ছে বলে জয়ন্ত একটু হাসে।

হাসছো কেন? এটা কি মজার কথা?

না, আপনার যে যন্ত্রণা-টন্ত্রণা একটু-আধটু হচ্ছে এটা জেনে নিশ্চিন্ত হলাম। আপনার কিছু হোক, খুব খারাপ কিছু এটা আমি আন্তরিকভাবে চাই।

ধুব মুখটা একটু বিকৃত করল। না, তার রাগ হচ্ছে না। খুব শীত করছে তার।

জগাদা বেরিয়ে এসে চারদিকে চেয়ে হঠাৎ তাকে দেখতে পেয়ে এগিয়ে আসে।

এখানে দাঁড়িয়ে কী করছো

কী করব আর? দাঁড়িয়ে আছি।

ওটা কে? বউদিমণির ভাই না?

জয়ন্ত বলল, হ্যাঁ। কেন, আমি থাকলে অসুবিধে আছে কিছু?

জগা স্থির চোখে জয়ন্তকে একটু মেপে নিয়ে বলে, অসুবিধে আমাদের কেন হবে? বলছিলাম, দাঁড়িয়ে না থেকে ভিতরে গিয়ে বসতেও পারেন।

না, বেশ আছি। দিদি মরলে বাড়ি চলে যাবো।

বাঃ, ভাইয়ের উপযুক্ত কথা বটে।

হ্যাঁ। আগে কখনো শোনেননি তো এরকম কথা! এবার শুনে নিন।

শুনছি ভাই। আমি হলাম জগা। সবাই চেনে। সম্পর্কটা এরকম না হলে ব্যাপারটা অন্যরকম হয়ে যেত।

আপনি যে জগা তা জানি। একজন পলিটিক্যাল উদ্ভাদের ভাড়া করা গুণ্ডা। কিন্তু তা বলে অত রুস্তমী দেখাচ্ছেন কেন? আমি আপনাদের মতো লোককে কেয়ার করি না।

জগা স্থির নেত্রে কিছুক্ষণ জয়ন্তকে লক্ষ করে। তার হাত পা কঠিন হয়ে ওঠে। তবে নিজেই সে খুব সামলে রাখে।

ধুবর দিকে চেয়ে জগা বলে, তোমার কি শরীর খারাপ লাগছে?

একটা ব্যথা হচ্ছে।

চলো, ভিতরে গিয়ে বসবে।

না জগাদা। ঠিক আছি।

ব্যথাটা খুব বেশী হচ্ছে বুঝতে পারছি। তুমি তো সহজে কাতরাও না।

খুব নয়। সহ্য করতে পারব। ওদিককার কোনো খবর আছে?

না। কেউ কিছু বলছে না। কর্তাবাবু খুব কৌতূহল। ওই যে হোমিও ডাক্তার এসে গেছে।

যাই।

একটা নীল গাড়ি এসে থেমেছে। একজন বড়ো মানুষ লাঠিতে ভর করে নামছিলেন।  
ধুব এক পলক দেখেই বিরক্তিতে চোখ সরিয়ে নিল। রেমি মৃত্যুর দিকে কতটা এগিয়ে গেছে তা জানে না ধুব। তবে এটা জানে, এখন ছোটো ছোটো মিষ্টি ও সুস্বাদু হোমিওপ্যাথির বড়ি দিয়ে লড়াইটা চালানো যাবে না।

জগা খুব শ্রদ্ধার সঙ্গে ডাক্তারকে ধরে ধরে ভিতরে নিয়ে গেল।

ধুবর কোথাও একটু বসতে হচ্ছে করছিল। বুকের মধ্যে যে একটা চাপ বাঁধা হাঁসফাঁস ভাব সেটা বায়ুজনিত। একটু বমি করলে চাপটা কমে যেতে পারে। কোমরের ব্যাথাটাও। তার স্বাভাবিক শরীর চমৎকার। সহনশীল, চটপটে, শক্তপোক্ত। এই সব ব্যাথা-বেদনা ইত্যাদি আনে মদ্যপান। আজকের দিনটায় না খেলেই ভাল হত।

লোকলজ্জা ধুবর বড় একটা নেই। সে হঠাৎ সিদ্ধান্ত নেয় এবং ধীরে ধীরে ফুটপাথে উবু হয়ে বসে। গলায় আঙুল চালিয়ে হড়াৎ করে খানিকটা জল তুলে দেয়।

সেই অবস্থাতেই সে লক্ষ্য করে রেমির তেঁ-এটে খচ্চর ভাইটা একলাফে কয়েক হাত সরে গেল। বমিটা বেরিয়ে যাওয়ায় খানিকটা ভাল লাগল ধুবর। নিজের বমির সামনেই বসে রইল সে গাড়লের মতো। মাথাটা সামান্য ঘুরছে। তবে হালকা লাগছে।

আত্মীয়-স্বজন বড় কম আসেনি। এতক্ষণ বাইরে অনেকে ঘোরাঘুরি করছিল, জটলা পাকাচ্ছিল। এখন কেউ নেই। কয়েকটা গাড়ি শুধু দাঁড়িয়ে আছে।

বলতে কী, ধুবর আজ একটু একা লাগছে। বহুকাল এরকম একা বোধ করেনি সে। কেন এমন মনে হচ্ছে?

ধুব তার অপ্রকৃতিস্থ মাথায় ব্যাপারটার একটা ব্যাখ্যা খুঁজতে থাকে। মনে হচ্ছে, রেমির সঙ্গে তার জাগতিক সম্পর্ক ছিড়ে যেতে বসেছে বলেই বোধহয় এই একা বোধ। রেমি যদি মরে যায় তাহলে কাল থেকে তার সব বন্ধন গেল না, একথা ঠিক, রেমি বেঁচে থাকতেও তার কোনো বন্ধন ছিল না। কিন্তু বড় স্টিম লঞ্চার পিছনে বাঁধা গাধাবোটের মতো লেঙুর তো ছিল। স্টিম লঞ্চ হয়তো টেরই পায় না গাধাবোটকে, কিন্তু তবু থাকে তো। এবার সেটুকুও যাচ্ছে। চমৎকার। ধুবর বরং খুশী হওয়ার কথা।

ধুব খুশি যে একেবারেই হচ্ছে না তা নয়। বন্ধনমুক্তি কার কাছে না সুখের! তাছাড়া ভাগ্যবানেরই বউ মরে। কিন্তু তবু একা বোধটাও বড় স্পষ্ট।

ধুব দাঁড়ানোর একটা চেষ্টা করল। কিন্তু হাঁটুর জোড় খুলতে চাইল না। এরকমই হওয়ার কথা। পেটে অঢেল মদ। কিন্তু নেশাটা কেটে গেছে। কিন্তু মদ তো তার ক্রিয়া করবেই। নেশা হয়নি বলেই বরং দ্বিগুণ ক্রিয়া করবে। শোধ নেবে শরীরের নানা জায়গায় ছোবল মেরে। তাই নিচ্ছে।

বাড়ি ফিরে যেতে পারে ধুব। কিন্তু জানে ফিরে গিয়ে ঘুমোতে পারবে না। একা ঘরে আজ তার গা ছমছম করবে। বাড়ি আজ বড় ফাঁকা। প্রায় সবাই এখানে চলে এসেছে।

ধুব একটা বড় শ্বাস ফেলল। নেশা করে বহুবার পথে-ঘাটে পড়ে থেকেছে। তাতে লজ্জা নেই তার। সে তো কিছু টের পায় না তখন। কিন্তু এরকম পরিপূর্ণ সচেতন অবস্থায় রাস্তায় শুয়ে পড়া কি সম্ভব? তার এখন ভীষণ ইচ্ছে করছে শুয়ে একটু চোখ বুজে থাকে।

শোবে? একটু দ্বিধা করে ধুব। তারপর সামান্য হাসল। লোকলজ্জা সংকোচ এসব বিসর্জন দিতে তার দ্বিধা থাকা উচিত নয়।

বমির জায়গাটা থেকে সামান্য সরে গিয়ে ধুব দেয়াল ঘেঁষে টানটান হয়ে শুয়ে পড়ল ফুটপাথে।

আঃ! ভারী আরাম পেল সে। শীত করছিল একটু। সেটা কিছু নয়। ফুটপাথে হাজার হাজার মানুষ কলকাতায় রাত কাটায়। আজ সচেতনভাবে ফুটপাথে শুয়ে নিজেকে তাদের সঙ্গে এক করে ভাবতে পেরে ভারী রোমাঞ্চ হল তার। চমৎকার!

মাথার নীচে আড়াআড়ি ডান হাতখানা রেখে সে চিৎ হয়ে আকাশের দিকে তাকাল। ফুলঝুরির মতো আলোর কণা ছড়িয়ে আছে আকাশময়। মেঘ নেই, কুয়াশা নেই। রাত্রি চলেছে ভোরের আলোর দিকে। রেমি কি রাতটা কাটাতে পারবে!

এই সুন্দর রাত্রিটিতে ধুবরও খুব মরে যেতে ইচ্ছে করছে। কোনো কারণ নেই। এমনি। এখন হঠাৎ ফুটপাথে শুয়ে মরে গেলে কেমন হয়?

একটা কুকুর খুব সন্তর্পণে তার বমিটা ঠুকছে। সন্দেহভরে তাকে একটু চেয়ে দেখে। ধুব কুকুরটাকে তাড়ায় না। ওকেও তো টিকে থাকতে হবে। থাক।

ধুব চোখ বোজে। তার ঘুম আসছে।

জামাইবাবু

উঁ! ধুব চোখ খুলে বুকের সামনে দুটো পা দেখতে পায়। অনেক উঁচুতে যেন মাথাটা।

শুয়ে আছেন কেন?

এমনি। ভাল লাগছে।

আপনি কি খুব বেশী অসুস্থ?

কেন, জেনে কী হবে?

বলুন না।

আমি অসুস্থ হলে তো তুমি খুশিই হও। তাই না?

আমি হই। কিন্তু দিদি হয় না।

তার মানে?

আমার দিদি আপনাকে বড় ভালবাসত। ডেসপাইট ইওর ইভিল ডিজাইনস।

তাই নাকি? হবে। আমি ভালবাসার কথা বেশী জানি না।

আপনার জানার কথাও নয়। যারা পায় তারা মর্ম বোঝে না। আপনার যন্ত্রণাটা কি খুব বেশী? না। এখন ব্যথাটা নেই। আমাকে একটু ঘুমোতে দাও।

এখানে ঘুমোবেন কেন? কাছেই আপনাদের গাড়ি আছে। ব্যাকসীটে গিয়ে শুয়ে পড়ুন। গাড়ির ব্যাকসিটে যে শোওয়া যায় তা আমি জানি। কিন্তু আমার এখানেই ভাল লাগছে।

আপনার রিলেটিভরা দেখতে পেলো রাগ করবে।

তাতে তোমার কী?

বললাম তো, আমার কিছু না।

দিদির কথা কী বলছিলে?

দিদি আপনাকে ভালবাসত। কাজটা ঠিক করত না। কিন্তু বাসত। অঙ্কের মতো, বোকার মতো। দিদি যদি টের পায় আপনি ফুটপাথে শুয়ে আছেন আর আমি আপনাকে ওঠানোর চেষ্টা করছি না তাহলে দিদি খুব দুঃখ পাবে।

রেমি এখন সুখদুঃখের ওপারে।

জানি। তবু দিদির কথা ভেবেই আমার অস্বস্তি হচ্ছে।

আমাকে তোমার লাথি মারতে ইচ্ছে করছে না?

না। আমি ইতর নই। আপনি উঠুন।

আমি বেশ আছি জয়। চমৎকার।

ডাক্তার ডাকবো?

না। ডাক্তার কী করবে? আমি একটু ঘুমোই।

জয়ন্ত দ্বিধাভরে দাঁড়িয়ে রইল।

ধুব চোখ বুজল। টের পেল জয়ন্তর রবারসোলের জুতো মৃদু শব্দে সরে যাচ্ছে।

ঘুম এল ঝাঁপিয়ে। যেন একরাশ জল এসে ডুবিয়ে ভাসিয়ে নিয়ে গেল তাকে।

রেমির ট্রেন আসছে না।

সে মৃদুস্বরে বলল, আমার জুতো হারিয়ে গেছে। কিনে দেবে ?

গমগমে পুরুষ কণ্ঠ বলে, জুতো ! সে তো তোমার পায়েই আছে।

রেমি অবাক হয়ে দেখে, ওমা ! তাই তো ! কী চমৎকার এক জোড়া লাল চপ্পল তার পায়ে ! মাখনের মতো নরম।

চপ্পলের দিকে চেয়ে থাকতে থাকতে হঠাৎ চমকে ওঠে রেমি ! এ মা গো ! রক্ত ! রক্ত গড়াচ্ছে যে ! চটির রঙ লাল বটে, কিন্তু রক্তের লাল !

রেমি চৈতন্যে উঠে চটিজোড়া পা থেকে ছেড়ে ফেলবার চেষ্টা করছিল। ভীষণ ঝাঁকুনি লাগছিল শরীরে।

সে কি ভুল বকছে ? রেমি আবছা ক্ষীণ চোখের আলোয় ছায়া ছায়া কিছু লোককে দেখতে পায়। অপারেশন থিয়েটার ? হ্যাঁ, তাই তো ! তবে এতক্ষণ সে কোথায় ছিল ? কত দূরে ?

আবার কি চলে যাবে রেমি ? অশ্রুট এক অভিমানে সে বলে, তুমি আমাকে কোথায় নিয়ে যাচ্ছিলে ওগো ? কোথায় ? রাজার সঙ্গে আমার বিয়ে দেবে বলে ? শুনেছো কখনো নিজের বউকে কেউ অন্যের সঙ্গে বিয়ে দেয় ?

হ্যাঁ, পাগল ধুব একদা তাই করেছিল।

বেড়াতে যাওয়ার নাম করে ধুব রেমিকে বের করে আনল বাড়ি থেকে। ট্যাকসিতে তুলে সাঁ করে নিয়ে এল ওয়েলিংটন স্কোয়ারের কাছে একটা বাড়িতে।

ঠিক বাড়ি নয়। একটা রহস্যজনক আস্তানা। পুরোনো একটা বাড়ির দোতলায় রেমিকে নিয়ে উঠল ধুব। খুব নোংরা পরিবেশ। পচা তরকারি খোসা, রোদ না লাগা দেয়াল, নর্দমা ইত্যাদির মিশ্র গন্ধে গা ঘুলিয়ে ওঠে।

লোকজন কেউই প্রায় ছিল না। দোতলার বারান্দার শেষপ্রান্তে একটা ঘর। সেই ঘরে রাজা স্নানমুখে বসে আছে।

রেমি রাজাকে দেখেই আঁতকে উঠে বলে, এ আমাকে কোথায় আনলে তুমি ?

ধুব কঠিন স্বরে বলে, জায়গাটা খারাপ নয় রেমি। তোমাকে মানায়।

তার মানে ?

এখানে যতটা নোংরামি তার চেয়ে ঢের বেশী নোংরামি তোমার মনে।

কী বলছো ওসব ? আমি যা করেছি শুধু তোমার জন্য।

জানি। বিশ্বাসও করি। কিন্তু তা করতে গিয়ে এ বেচারাকে ডুবিয়ে দিয়েছে।

রেমি কুখে উঠে বলে, আমি কাউকে ডোবাইনি।

ওকে জিজ্ঞেস করো ও তোমার প্রেমে পড়ে গেছে কিনা।

সে দোষ আমার নয়।

তুমি ওকে প্রণয় দিয়েছো। প্রেম-প্রেম খেলা খেলেছো আমি এ খেলা অপছন্দ করি।

রেমি হঠাৎ পাগলের মতো চৈতন্যে উঠল, না ! না ! না ! না !

ধুব তার মুখ চেপে ধরল জোরালো হাতে ! বলল, খবরদার চৈতাবে না।

রেমি এক ঝটকায় মুখটা ছাড়িয়ে নিয়ে বলে, একশবার চৈতাব। তুমি এ কাণ্ড কেন করছো তা কি আমি জানি না ?

কী জানো ?

তুমি ঋগ্বেদমশাইয়ের ওপর শোধ তুলতে চাও।

তার মানে ?

উনি আমাকে ভালবাসেন । খুব-বেশী ভালবাসেন । আমাকে ওর কাছ থেকে দূর করে দিয়ে ভুমি  
ওঁকে জন্ম করতে চাও । আমি জানি ! সব জানি !

আশ্চর্য এই, ধ্রুব এই কথা শুনে মিইয়ে গেল । তারপর মুচকি একটু হাসল ।

## ॥ ৫৩ ॥

একটা পঙ্ক্তি কৃষ্ণকান্ত আজকাল প্রায়ই আপনমনে বিড়বিড় করে আওড়ায় । হতো বা প্রাণ্যসি  
স্বর্ণং, জিত্বা বা ভোক্ষসে মহীম । সংস্কৃত শেখা তার কাছে এক নতুন জগতের দরজা খুলে যাওয়ার  
মতো । এক গহীন চির-প্রদোষের স্নিগ্ধ আলো ছড়িয়ে আছে । কত ফুল, কত না লতানে গাছ,  
মহীরুহ । গায়ে কাঁটা দেয় । ব্যাকরণের বেড়াভাল সে অনায়াসে টপকাতে পারে ওই অসম্ভব রূপময়  
জগতে প্রবেশ করার তীব্র তৃষ্ণায় । বৃক্ষমূলের বেদীতে বসে আছেন ঋষিরা । জ্ঞান ও উপলব্ধির স্নিগ্ধ  
মহিমা তাঁদের মুখমণ্ডলে । যেখানে মায়ামুগ্ধ হরিণ শকুন্তলার আঁচল চিবিয়ে খায় স্নেহবশে ।  
ন্যাগ্রোধ, ইন্দুদি, বহ্নাশ্ফোট কত শব্দ কৃষ্ণকান্তর বুকের মধ্যে নানা রকম বিস্তারণ ঘটাতে থাকে ।  
কিন্তু কোনো কোনো পঙ্ক্তি তার বুকের মধ্যে গতিময় তীরের মতো এসে আঁমূল ঠেঁখে যায় । যদি  
মরো তো স্বর্গলাভ করবে, যদি জেতো তো ভোগ করবে পৃথিবীকে । এই পঙ্ক্তির মধ্যে লুকোনো  
এক যাদু তাকে ভিন্নতর কাজে উত্তেজিত করে অনবরত ।

মনু পিসি শুধু তাকে সংস্কৃতই শেখায় না । মাঝে মাঝে এমন সব কবিতার লাইন মুখস্থ করিয়ে  
দেয় যা দামামার শব্দ তুলে দেয় রক্তে । হায় সে কী সুখ এ গহন তাজি, হাতে লয়ে জয়তুরী,  
জনতার মাঝে ছুটিয়া পড়িতে, রাজ্য ও রাজ্য ভাঙিতে গড়িতে, অত্যাচারের বক্ষে পড়িয়া হানিতে  
তীক্ষ্ণ ছুরি । জালিয়ানওয়ালাবাগের নৃশংস ঘটনার কথা এখনো লোকের মুখে মুখে ফেরে । কৃষ্ণকান্ত  
সেই ঘটনার পুঙ্খানুপুঙ্খ বিবরণ শুনে নিয়েছে মনুপিসির কাছে, মাস্টারমশাইয়ের কাছে । তার শরীর  
অস্পষ্ট অনিদিষ্ট প্রতিশোধম্পৃহায় শিহরিত হয় ।

তাছাড়া আছে শশিভূষণ । সে বরিশালের জেলে বন্দী । মামলা উঠবে শীগগীরই । হয়তো ফাঁসি  
হয়ে যাবে । কিন্তু শশিভূষণের স্মৃতি কিছুতেই তাড়াতে পারে না কৃষ্ণকান্ত । কয়েকদিন তাদের  
বাড়িতে ছিল লোকটা । অসুস্থ, সংজ্ঞাহীন । তবু সেই লোকটার মুখে এমন এক সর্বস্ব পণ রাখা  
মরীয়া ভাব ছিল যা সহজে ভুলতে পারে না সে । ভুলতে অবশ্য চায়ও না ।

একদিন এই শহরেও বিলিতি কাপড়ে বহুৎসব হয়ে গেল । পুলিশ গুলি চালিয়েছিল । কয়েকজন  
মরেছে । কৃষ্ণকান্ত সময়মতো খবর পায়নি । পেলে যেত । গিয়ে পুলিশদের ঘাড়ে লাফিয়ে পড়ে  
হাতের রাইফেল কেড়ে নিত । উন্টে গুলি চালাত দুম দুম ।

সিদ্ধান্ত নিতে খুব বেশী দেরী হল না কৃষ্ণকান্তর । একদিন সন্ধ্যাবেলা সে রঙ্গময়ীকে বলল,  
মনুপিসি, আমি স্বদেশী করব ।

রঙ্গময়ী চোখ কপালে তুলে বলে, বলিস কী ? তাহলে যে তোর বাবা শয্যা নেবে ।  
শয্যা নেবে কেন ?

স্বদেশী করা কি চাট্টিখানি কাজ রে ! জেল আছে, মারধর আছে, ফাঁসিগুলি আছে ।  
আমি তো ভয় পাই না ।

তুই দামাল ছেলে, তাই ভয় পাস না । কিন্তু তোর বাবা যে পায় ।

তুমি বাবাকে বোলো না । আমি লুকিয়ে করব ।

রঙ্গময়ী সন্নেহে হেসে বলে, আচ্ছা করিস । বয়স হোক ।

কত বয়স ?



অন্তত কুড়ি একুশ ।

ততদিন বসে থাকতে হবে ?

না, ততদিন তৈরি হতে হবে ।

তৈরি হতে হয় আবার কী ভাবে ?

সে অনেক আছে । স্বদেশীদের ট্রেনিং হয়, জানিস না ? শরীরটাকে মজবুত করে তুলতে হয়। অনেক লেখাপড়া আছে, লাঠি খেলা ছোরা খেলা শেখা আছে । বন্দুকের টিপ ঠিক করতে হয় । এ হল একরকম স্বদেশী । আর একরকম আছে, যারা অহিংসার পথে চলে । চরকা বোনে, কাপড় পোড়ায়, অসহযোগ করে । তারা মার খায়, কিন্তু মারে না । যেমন গান্ধীজী ।

আমি মারতে চাই ।

সে জানি । তোর চোখমুখেই সে কথা লেখা আছে । কিন্তু মারলেই তো হল না । কোন পথটা ঠিক আগে সেইটে বিচার করতে হবে । তার জন্যই বয়স দরকার ।

তোমার কাছে কোনটা ঠিক ?

আমি মেয়েমানুষ, আমার কথা ছেড়ে দে । বড় হ, বোধবুদ্ধি পাকুক, তখন নিজের বোধবুদ্ধিমতো পথ বেছে নিবি । স্বীবুদ্ধিতে চলতে নেই ।

লাঠি ছোরা খেলা কার কাছে শেখা যায় বলো তো ।

শেখানোর লোকের অভাব কী ? বিপিনের কাছেই শেখ না ।

বাবাকে বলে দেবে না তো !

বলব না । তবে তোর বাবাও এক সময়ে মুণ্ডুর ভাঁজত । তার কাছেও অনেক শেখার আছে ।

কিন্তু বাবা কি শেখাবে ?

সেটা বলে দেখতে পারি । অন্য কাউকে না হলেও তোকে হয়তো শেখাবে ।

এক আধদিন শিখিয়ে ছিল । তারপর আর গা করে না ।

তোর বাবা লাঠিখেলা ছোরাখেলাও জানত এক সময়ে । আমি বলি, বাবার কাছেই শেখ ।

তোরও কাজ হবে, তোর বাবারও সময়টা কাটবে ।

তুমি বাবাকে বলে দাও ।

দেবো ।

আজই ।

আচ্ছা বাবা, আচ্ছা । আজই ।

এক্ষুনি চলো ।

রঙ্গময়ী আতঙ্কিত হয়ে বলে, ও বাবা, এখন কি যেতে পারি । রাত হয়েছে ।

রাত হয়েছে তো কি ?

আমরা বাইরের লোক, হুটহাট অন্দরমহলে ঢোকা আমাদের বারণ ।

কে বলেছে তুমি বাইরের লোক ?

বাইরের লোক নই ? বলিস কী রে ! আমাদের তাড়িয়ে দেওয়ার পর্যন্ত কথা উঠেছিল ।

সে তো বড়দা আর শচীনদা মিলে করেছিল । যত সব বদমাইশী ।

ছিঃ । ও কী কথা ? বদমাইশী আবার কী ! গুরুজন না ।

বদমাইশীই তো । বাড়ির সব লোককে তাড়িয়ে দিল না

যা করেছে তা তাদের ভালর জন্যই ।

ছাই ভাল । হরদা আমাকে কত গল্প বলত । পাগল লোক । তাকে তাড়াবে কেন ? ওয়া কি আমাদের আপন লোক নয় ?

রঙ্গময়ী একটু শ্রান হেসে বলল, বেশ বাবা বেশ । সবাইকে আপন বলে ভাবা তো খুব ভাল ।

কিন্তু একটু বড় হলে বুঝবে, দুনিয়াটা অত ভাল নয় । সেইজন্যই তো তোকে বড় হতে বলি অত করে ।

কী করে এড়াতে বড় হওয়া যায় বলো তো ! ব্যায়াম করে ?

রঙ্গময়ী খুশি হলে । মাথা নেড়ে বলে, বড় কি জোর করে হওয়া যায় রে ! যখন বয়স হবে তখন আপনা থেকেই বড় হয়ে যাবি । কসরৎ করতে হবে না ।

একটা কথা বলবে মনুপিসি ?

কী কথা

শচীনদার সঙ্গে কি ছোড়দির বিয়েটা হবে ?

বোধহয় না ।

কী করে বুঝলে ?

যেভাবেই বুঝে থাকি না কেন, তোর তাতে কী দরকার ? ওসব নিয়ে ভাববার দরকার নেই তোর ।

বড় বউদি কিন্তু বলে, হবে ।

রঙ্গময়ী অপ্রতিভ বোঝ করতে থাকে । চপলার প্রসঙ্গটা তার কাছেও অস্বস্তিকর । সে বলল, বলুক গে ।

তুমি দেখো, বড় বউদি বিয়েটা ঠিক দেবে ।

আচ্ছা দেখব ।

এখন চলো ।

কোথায় ?

বাবার কাছে ।

কমল সকালে যাবো ।

না, এক্ষুনি ।

তুই বড্ড জ্বালাস বাবা ।

তুমি তো সবসময়েই বাবার কাছে যেতে আগে । এখন যাও না কেন ?

বলিস না ওসব । রঙ্গময়ী আতঙ্কিত গলায় বলে, লোকে কী ভাববে ?

তাহলে চলো ।

রঙ্গময়ী কিছুক্ষণ এই অত্যন্ত জেদী ছেলেটির দিকে চেয়ে থাকে । জেদটা ভাল না মন্দ তা বুঝবার চেষ্টা করে । তার মনে হয়, ছেলেটার মধ্যে আগুন আছে । কিন্তু আগুনটা কোথেকে এল ? ওর বাবা তো ভেজা ন্যাকড়ার মতো মানুষ । মা ছিল আর পাঁচজন মেয়েমানুষের মতোই সাধারণ । কৃষ্ণকান্ত কি তবে তার কাকার আগুনটুকু পেল ?

নলিনী যত না বিপ্লবী ছিল তার চেয়ে বেশী ছিল সন্ন্যাসী । ওই এক ধরনের মানুষ । সংসারের মাটি কিছুতেই গায়ে মাখে না । কৃষ্ণকান্ত ঠিক সেরকমও নয় ।

রঙ্গময়ী হাত বাড়িয়ে কৃষ্ণকান্তের কপাল থেকে চুলগুলি সরিয়ে সেই দাগটা আবার দেখল । স্পষ্টতই রাজটীকা । কোনো ভুল নেই । নাসামূল থেকে চওড়া কপাল ভেদ করে মাথা স্পর্শ করেছে গিয়ে । সরল ও সুস্পষ্ট । একটা গভীর তৃপ্তির স্বাদ ছাড়ে রঙ্গময়ী ।

কী দেখলে পিসি ? রাজটীকা ?

রঙ্গময়ী চাপা গলায় বলে, খবরদার ! কাউকে বলবি না ।

বলি না তো ! তুমি বারণ করার পর থেকে কাউকে বলিনি । তুমি লম্বা চুল দিয়ে ঢেকে রাখতে বলেছিলে । তাই রাখি । তবে বউদি মাঝে মাঝে চুল পুটি করে আঁচড়াতে বলে ।

রঙ্গময়ী গর্জন করে বলে, শুনবি না ।

কৃষ্ণকান্ত একটু ফচকে হাসি হেসে বলে, কেউ দেখে ফেললে কী হবে পিসি ? কিছু কি হয় ?  
তোদের তো শত্রুর অভাব নেই । কার মনে কী আছে ! সুলক্ষণ দেখে হিংসায় জ্বলেপুড়ে হয়তো  
বিষই খাওয়াবে ।

দূর ! রাজটীকা কত ছেলের আছে !

তোকে বলেছে ।

বলবে কেন ? দেখি তো । ক্লাসের অনেক ছেলের কপালে রাজটীকা ।

রঙ্গময়ী ঠাট্টা বুঝে হাসে । কৃষ্ণকান্ত আজকাল খুব ঠাট্টা ইয়ার্কি শিখেছে । সে বলে, রাজটীকা  
অত সস্তা নয় রে । এখন যা । কাল সকালে তোর বাপকে যা বলার বলব ।

রঙ্গময়ীর কাছে পড়া শেষ করে প্রসন্নমনে হ্যারিকেন হাতে বাড়ি ফেরার সময় কৃষ্ণকান্তের আবার  
সেই পঙক্তিটা মনে পড়ে । মরলে স্বর্গে যাবে, বেঁচে থাকলে ভোগ করবে সমস্ত পৃথিবী, সুতরাং  
তোমার আদর্শ প্রতিষ্ঠায় প্রাণকে বাজি রাখো ।

বারবাড়ির অঙ্ককার মাঠে একটু দাঁড়ায় কৃষ্ণকান্ত । চরাচর নিঃশব্দ । এই নির্জনতায় দাঁড়িয়ে সে  
অনেক বড় একটা কিছুকে অনুভব করে । সে তার স্বদেশকে টের পায় । তার মনে হয় এই  
ভারতবর্ষের জন্য তার কিছু করার আছে । তার গায়ে কাঁটা দেয় । ভিতরে ভিতরে এক অদ্ভুত  
অকারণ আনন্দ চেউ দিতে থাকে । সে সামান্য সংসারে বাঁধা থাকবে না । সে সামান্য মানুষ হয়ে  
বেঁচে থাকবে না । তার কপালে আছে জন্মগত রাজটীকা । সে একটা কিছু হবে । হবেই ।

রাত্রিবেলা বাবার পাশে খেতে বসে কৃষ্ণকান্ত খুব কুণ্ঠিত স্বরে বলল, বাবা, আপনি নাকি অনেক  
ব্যায়াম জানেন ।

হেমকান্ত একটু হাসলেন, কেন, তুমি শিখবে ?

শিখলে হয় । শরীরটা মজবুত করা দরকার ।

বিপিনের কাছে যেও । সে শেখায় ।

আপনি শেখালে আরো ভাল হয় ।

আমি সেই কবে করতাম । এখন ভুলেও গেছি বোধহয় ।

আপনি শেখালে আমি খুব তাড়াতাড়ি শিখতে পারব ।

হেমকান্ত স্নেহে ছেলের দিকে একটু তাকান । তারপর বলেন, আচ্ছা দেখা যাবে ।

হেমকান্তের কাছে শেখার একটা আলাদা আনন্দ আছে । কৃষ্ণকান্ত হঠাৎ টের পেয়েছে তার  
সংসার-উদাসীন বাবা সব ছেলেমেয়ের মধ্যে তাকেই একটু বেশী ভালবাসেন । কেন বাসেন তা সে  
জানে না । এই গম্ভীর মানুষটির কাছ থেকে তার স্নেহ-কাঙাল মন বারবার ওই রকম ভালবাসা  
চায় ।

কৃষ্ণকান্ত কি হেমকান্তের মধ্যে তার মাকেই দেখতে চায় ?

না, কৃষ্ণকান্ত তার মাকে চেনেই না । মাকে সে দেখতে চায়ও না তেমন করে । সে বাবাকেই  
চায় । পুরোপুরি বাবাকে ।

কাল থেকে কি আমি মুণ্ডর ভাঁজবো বাবা ?

ক্ষতি কি ? ওটাও ভাল অভ্যাস । তোমাকে একটু শিখিয়েছি না ?

আজ্ঞে হ্যাঁ ।

মুণ্ডর ঘোরালে কাঁধ আর হাতের পেশী শক্ত হয় । খুব ভাল অভ্যাস ।

আপনি লাঠিখেলা জানেন ?

জানতাম ।

ছোরাখেলা ?

হ্যাঁ, তুমি কি ওসবও শিখতে চাও নাকি ?

হ্যাঁ ।

কেন বলো তো

এমনি । শিখে রাখা তো ভাল ।

খাওয়ার মাঝখানে হঠাৎ সামনে এসে বসে চপলা । মাথায় ঘোমটা পুরোপুরি টানা নয় । গা থেকে সুবাস আসছে । ইভনিং ইন প্যারিস । শাড়িটা যথেষ্ট ঝলমলে । মুখে প্রসাধন । বাড়ির বউ নিশ্চয়ই এত রাতে সাজে না । কারণ না থাকলে ।

হেমকান্ত সামান্য গম্ভীর হয়ে ভাত মাথতে থাকেন । খেতে রুচি নেই । শুধু মেখেই যান । চপলা একটু প্রগল্ভা । কৃষ্ণকান্তকে প্রশ্ন করে, কী কথা হচ্ছিল রে ? লাঠি ছোরা খেলবি ? হ্যাঁ বউদি ।

কেন ডাকাতি করবি নাকি

না, ডাকাত মারব ।

তার জন্য বন্দুক শেখ ছোরা লাঠির দিন আর নেই ।

কৃষ্ণকান্ত বলে, স্বদেশীরা লাঠি ছোরার খেলা শেখে কেন তাহলে ?

স্বদেশীদের ব্যাপারই আলাদা । তুই তো আর স্বদেশী নয় ।

হেমকান্ত উঠে পড়েন । বাইরে থেকে তাঁর গাড়ুর জল ঢালার গব গব শব্দ হয় । কুলকুচো করছেন জোরে ।

কৃষ্ণকান্ত তার বউদির মাদকতাময় মুখটির দিকে চেয়ে বলল, আমিও স্বদেশী হবো ।

এসব কে তোকে শেখাচ্ছে বল তো

কে আবার শেখাবে । বলো তো এই লাইনগুলো কার ? হায় সে কী সুখ এ গহন তাজি হাতে লয়ে জয়তুরী, জনতার মাঝে ছুটিয়া পড়িতে, রাজ্য ও রাজ্য ভাঙিতে গড়িতে অত্যাচারের বক্ষে পড়িয়া হানিতে তীক্ষ্ণ ছুরি ।

ও বাবা ! বাংলা আবার কোনো জন্মে পড়েছি নাকি ? তার ওপর আবার কবিতা । কার লেখা রে ।

বলব কেন ? তুমি খুঁজে বের কর ।

লাইনগুলো বেশ ভাল । তবে স্বদেশী-স্বদেশী গন্ধ আছে ।

তুমি শশীদাকে চেনো ?

শশীদা আবার কে ?

আমাদের বাড়িতে যে স্বদেশী লোকটা লুকিয়ে ছিল ।

চিনব কী করে ? তখন তো আমি এখানে ছিলাম না । কেন সে কী করেছে ?

দারুণ লোক । বরিশালে একটা সাহেব মেরেছিল ।

ওঃ দারুণ কাজ তো ।

দারুণ নয় ?

শুনেছি একজন নিরীহ পাদ্রীকে খুন করেছিল । নিরীহ মানুষকে মারা তো খুব বীরত্বের কাজ ! লোকটা ছিল স্পাই ।

ওসব মারার পর বানিয়ে বলেছে ।

তুমি কিছু জানো না ।

আমি অনেক জানি । সাহেবরা এখনো সপ্তাহে তিনচারদিন আমাদের বাড়িতে ডিনার খায় ।

তোমরা মুগী খাও ?

খেলে কী ?

এঃ মা ।

ওঃ, খুব বৈষ্ণব হয়েছিস তোরা, না। তোর বড়দাও তো খায়।

খায়

খায় মানে। ঠ্যাং চিবোতে বসলে জ্ঞান থাকে না।

দাঁড়াও বাবাকে বলে দেবো।

দিস। কিছু হবে না। আমরা ছেলেবেলা থেকে মুগী খাই। বাবা বনমোরগ মেরে আনত, আমরা রেঁধে খেতাম।

ঘেন্না করে না?

ঘেন্নার কী রে বাঁদর? মুগী কি অখাদ্য?

তোমাদের জাত যায় না?

আমরা তো সাহেব।

সাহেবরা আমাদের শত্রু।

তোরা মাথা।

একশবার শত্রু। বলে আচমকা চাঁচিয়ে ওঠে কৃষ্ণকান্ত। তার মুখ চোখে ক্রোধবহির হলকা।

চপলা একটু অবাক হয়ে চেয়ে থাকে।

কৃষ্ণকান্ত বউদির দিকে চেয়ে ছিল। চোখের ভিতর থেকে যে হলকা বেরিয়ে আসছিল তার তা হঠাৎ স্তিমিত হয়ে গেল। চমৎকার একটু হেসে সে বলল, এসব বাবাকে বোলো না।

চপলার বিস্ময় তখনো কাটেনি। বলল, তুই কী রে?

আমি আবার কী?

এইমাত্র তোর চেহারাটা কেমন অন্যরকম হয়ে গিয়েছিল। আমি তো ভয় পেয়ে গিয়েছিলাম।

কৃষ্ণকান্ত লজ্জা পায়। মাথা নামিয়ে হাসে।

চপলা হঠাৎ বলল, তোর রাগ তো সাজঘাতিক। বড় হয়ে মানুষ খুন করবি না তো।

না। শুধু ইংরেজ।

চপলা একটু ইংরেজ-প্রেমিক। কিন্তু এই বালক দেওরটির সঙ্গে তার আর তর্ক করার সাহস হল না। কৃষ্ণকান্তের চোখের আঙনের কথা সে ভুলতেও পারল না। অনেক রাত্রি পর্যন্ত সে বার বার অনামনস্ক হয়ে গেল। কী দেখল সে কৃষ্ণকান্তের মধ্যে? কী?

কয়েক দিনের মধ্যেই কৃষ্ণকান্ত প্রবল বেগে মুণ্ডুর ঘোরাতে লাগল, নানাবিধ ব্যায়াম শুরু করে দিল। যে মনোযোগ নিষ্ঠা ও একাগ্রতার সঙ্গে সে এসব করে তা দেখে হেমকান্ত অবাক। খুশিও। তাঁর অন্য ছেলেদের মধ্যে এ জিনিস নেই। তাঁর নিজের মধ্যেও নেই।

হেমকান্তের শরীরেও কি নবযৌবন এল? তিনি ইদানীং যে জবুথবু ভাবটা অনুভব করছিলেন তা এক লহমায় কেটে গেল কৃষ্ণকান্তের পাল্লায় পড়ে।

ভোরবেলা কাক ডাকার আগেই তিনি ওঠেন। কৃষ্ণকান্তকে ডাকতে হয় না। তার ভিতরে যেন নির্ভুল এক ঘড়ি টিক টিক করে সর্বদা। হেমকান্ত উঠে রোজই দেখতে পান, কৃষ্ণকান্তও উঠে তৈরি হচ্ছে।

বাণপ্যাটায় তারপর বেরোন দৌড়োতে। দৌড়োলে দম বাড়ে, ফুসফুস শক্তিশালী হয়, সারা শরীরে রক্তের সঞ্চালন ঘটে। শেষ রাত্রির অন্ধকারে নদীর ধারের রাস্তা ধরে দৌড়োবার সময় একটা পরিশ্রুত জলগন্ধময় বাতাস এসে ঝাপটা দেয়। শরীরের কোষে কোষে ঢুকে যত পাপতাপ দূষিত জিনিস শুষে নিয়ে যায়। বড় ভাল লাগে হেমকান্তের।

লাকড়ির ঘর থেকে ধূলিধূসর বিস্মৃত কয়েকখানা লাঠি বেরোলো। চমৎকার পাকা বাঁশের লাঠি, পেতলে বাঁধানো গাটি। মুছেটুছে তেল চকচকে করে তোলা হল সেগুলোকে। তারপর একদিন ভিতরের উঠোনে মালকৌঁচা মেরে লাঠি হাতে লাফ দিয়ে নামলেন হেমকান্ত।

ঠাকঠক লাঠির শব্দে বাতাস গরম হয়ে ওঠে। হেমকান্তর রক্ত চনমন করতে থাকে। বিস্মৃত বিদ্যা আবার ফিরে আসতে থাকে তাঁর কাছে। প্রথম যৌবনের মতোই এখনো দ্রুত চলছে তাঁর পা, হাত। তেমনি বিদ্যা বেগে ঘোরাফেরা করছে চোখ। নিজের সক্ষমতা দেখে তিনি নিজেই অবাক।

আরো অবাক, যখন দেখেন কৃষ্ণকান্ত স্বভাব-লাঠিয়ালের মতো এক এক লহমায় লাঠির এক একটা কৌশল চমৎকার শিখে নিচ্ছে। চোখে সেই তদগত দৃষ্টি, যা সাধকদের থাকে। তবে বৈরাগ্য ও নিষ্পৃহতা নয়। চোখে একধরনের খিকিখিকি আগুন আছে কৃষ্ণকান্তর।

অদ্ভুত ! অদ্ভুত ! মনে মনে বারবার বলেন হেমকান্ত। তাঁর বিস্ময়ের ঘোর আর কাটতেই চায় না। এক পরিপূর্ণ আনন্দে তাঁর হৃদয় মথিত ও ব্যথিত হতে থাকে।

কয়েকদিন পর এক সন্ধ্যাবেলা কৃষ্ণকান্তর খোঁজ পাওয়া যাচ্ছিল না। লোক লঙ্কর চারদিকে ছুটল। হেমকান্ত চিন্তিতভাবে পায়চারী করছিলেন বারান্দায়। হঠাৎ কী খেয়াল হতে তিনি ধীরে ধীরে গিয়ে নলিনীর পরিত্যক্ত ঘরে হাজির হলেন।

দরজাটা ভেজানো। খুব সন্তপ্ণে দরজাটা ঠেলে ঢুকলেন তিনি। তারপর থমকে দাঁড়ালেন। নলিনীর ঘর এখনো যেমনকে তেমনই আছে। সেই টোঁকি, টেবিল, চেয়ার, দেয়ালে পাবনার ঠাকুরের সেই ছবি। নলিনী তাঁর শিষ্য ছিল।

টোঁকির ওপর চূপ করে বসে আছে কৃষ্ণকান্ত। শিরদাঁড়া সোজা। চোখ মুদ্রিত। ধ্যানস্থ। মশা ছেকে ধরেছে তাকে। কিন্তু সে বোধহয় টেরই পাচ্ছে না।

হেমকান্ত মৃদুস্বরে ডাকলেন, কৃষ্ণ !

কোনো জবাব নেই।

হেমকান্ত দরজাটা ভেজিয়ে এসে টোঁকিতে বসলেন। ছেলের মুখোমুখি। তারপর মেরুদণ্ড সোজা করে চোখ বুজলেন।

## ॥ ৫৪ ॥

একটু মায়া কি অবশিষ্ট ছিল ওর বুকে। পাখি পুষলেও তো লোকের মায়া হয় ! বোধহয় সেইরকমই কিছু হবে। রেমি তো এদের বাড়ির দাঁড়ের ময়না ছাড়া কিছুই নয়। অদৃশ্য এক শিকল টুনটুন করে। রেমি টের পায়। চলে যেতে উড়ে যেতে বাধা নেই। তবু পারে না রেমি। শিকল। কিসের যেন শিকল।

ধুব এক সর্বনাশের মুখে, এক গহ্বরের ধারে ঠেলে নিয়ে গিয়েও ফেলে দিল না শেষ অবধি। সেই নোংরা ঘর, অদ্ভুত পরিবেশ আর রাজার বিবর্ণ মুখ আমৃত্যু ভুলতে পারবে না রেমি। তার বুকে উঠে আসছে বমির ভাব। হাত পায়ে ঝিমি ধরার মতো অবশ ভাব। উপোসী শরীর দুর্বল। মাথা বোধবুদ্ধিহীন, ফাঁকা।

ধুব তার দিকে তাকিয়ে রইল কিছুক্ষণ। তারপর হঠাৎ যেমন এসেছিল তেমনি রেমির হাতটা ধরে একটা টান দিয়ে বলল, চলো।

রেমি কিছু প্রশ্ন করল না। পিছু পিছু নেমে এল।

ট্যাকসিতে একটাও কথা বলল না ধুব। বাড়ির দরজায় তাকে নামিয়ে দিয়ে সেই ট্যাকসিতেই কোথায় উঠাও হয়ে গেল।

রেমি ঘরে এল। নীচের ঘরে। এ ঘর তার নয় আর। ধুবর। চূপচাপ ঘরে কিছুক্ষণ বসে রইল রেমি। জীবনের সংকট সময়ে সিদ্ধান্ত নিতে পারাটা ভীষণ জরুরী ব্যাপার। কিন্তু রেমি কোনোদিনই এই জরুরী ব্যাপারটা পেরে ওঠেনি।

আবছা ঘরে বহুক্ষণ বিবশ হয়ে বসে রইল সে। বুকজোড়া ভয়, উৎকণ্ঠা, দ্বিধা মাথায় এলোমেলো হাজার চিন্তা।

বহুক্ষণ ধরে তার একটা কথাই বার বার মনে হচ্ছিল। কিছুদিনের জন্য তার কোথাও চলে যাওয়া দরকার। কাছাকাছি নয়। একটু দূরে কোথাও। আবার যদি সমুদ্রের ধারে যায় তাহলে বেশ হয়। সঙ্গে কেউ থাকবে না। একা।

যত সময় যাচ্ছিল ততই তার এই প্রয়োজনটা তীব্র হয়ে উঠছিল। ধুবর কাছ থেকে কিছুদিনের জন্য তার দূরে সরে যাওয়া উচিত। শিকলটা ঠুনঠুন করে বাজবে, এই বাড়ি থেকে দূরে গিয়ে সে বোধ করবে এক আশ্চর্য বিরহ, তবু তার যাওয়া দরকার। ধুবকে ফিরে পেতে হলে তাকে হারানো দরকার, নিজেরও দরকার হারিয়ে যাওয়া

একথা সত্য ধুব তাকে ভালবাসে না। কখনো সখনো দাঁড়ের ময়নাকে নিয়ে খেলা কবেছে বটে, কিন্তু ভালবাসেনি। ভালবাসাবাসি নেই বলেই তাদের মধ্যে দাম্পত্য কলহ নেই, ভুল বোঝাবুঝি নেই, মান অভিমান নেই, পরস্পরকে দখলের চেষ্টা নেই।

না, ভুল ভাবছে রেমি। ধুবর নেই, কিন্তু তার আছে। ধুবকে সে বহুবার বোঝানোর চেষ্টা করেছে যে, তার জন্য একবুক ভালবাসা টলটল করে রেমির বুকে। কিন্তু ধুব তো আঁজলা পাতল না কোনোদিন। পাতবেও না। তার পিপাসা নেই।

না, দূর, খুব দূর কোথাও তাকে যেতেই হবে। ধূ ধূ এক দূরত্বের ব্যবধান গড়ে তুলতে হবে।

অনেকটা জল খেয়ে রেমি শুয়ে রইল বিছানায়। একটা বাচ্চা এসেছিল তার পেটে! আজ সেকথা মনে পড়ল। না, তার রাগ হল না। চোখে জল এল। সেই ভ্রূণহত্যার মধ্যে শুধু নিষ্ঠুরতাই ছিল না, ছিল কূট সন্দেহ। এত অন্যায় এত অবিচার ওই একটিমাত্র লোক তার ওপর করেছে যা সারাজীবনে আর কেউ করে উঠতে পারবে না।

দূরে যাবে? হঠাৎ শিহরিত হয় রেমি। সে তো ইচ্ছে করলেই এক অনতিক্রম্য দূরত্ব রচনা করতে পারে ধুবর সঙ্গে! ইচ্ছে করলেই পারে। আর কিছু না হোক ঝুঁজলে একটু বিষ সে কি এঘরেই পেয়ে যাবে না?

রেমি উঠল। ঝুঁজতে লাগল।

কিছু অচেনা ওষুধপত্র আছে। টিউবে কিছু অয়েন্টমেন্ট। যদি খেয়ে নেয় তাহলে অসুস্থ হতে পারে। মরার নিশ্চয়তা নেই।

বিকেলে রাজা এল।

তখন এক আচ্ছন্নতায় আক্রান্ত রেমি পড়ে আছে বিছানায়। পেটে খিদে মরে একটা যন্ত্রণা হচ্ছে। বুকে উথাল পাথাল। চোখ বুজে সে নানারকম দুঃস্বপ্ন দেখছিল।

টুকটুক করে দরজায় অনেকক্ষণ শব্দ হচ্ছিল। তবু চোখ খোলেনি রেমি। ভীষণ ক্লান্ত। শব্দটা স্বপ্নে হচ্ছে না বাস্তবে তা বুঝতে অনেকক্ষণ সময় নিল সে। তারপর ক্ষীণ গলায় বলল, কে?

আমি রাজা। একটু আসবো?

রেমি চকিতে নিজের শরীরের দিকে চেয়ে দেখল। না, শাড়ি ঠিকই জড়ানো আছে, শায়া দেখা যাচ্ছে না। তবু আর একটু গা ঢেকে সে উঠে বসল। মাথাটা ঘুরছিল খুব।

এসো।

রাজা ঘরে আসে। মুখখানা থমথমে গম্ভীর। রেমি রাজার দিকে এক পলক চেয়েই চোখ নামিয়ে নেয়। আজ রাজার সঙ্গে তার দেওর বউদির সম্পর্কটা তেমন সহজ নেই। ভারী লজ্জা করছিল রেমির।

রাজা বিছানার মুখোমুখি একটা চেয়ারে বসে বলল, খুব শুকনো দেখাচ্ছে তোমাকে। কিছু খাওনি বোধ হয়

রেমি মাথা নেড়ে বলল, না।

রাজা কিছুক্ষণ চুপ করে থেকে বলল, আজ যা ঘটেছে সেটা একসট্রিম। তবে তুমি এটাকে অত সিরিয়াসলি নিও না। কুট্রিদা যে পাগল তা তো এতদিনে বুঝেই গেছ। কী আর বলব।

রেমি মাথা নত করেই ছিল। সেইভাবেই নিজের করতলের দিকে চেয়ে বলল, ও আমাকে কোথায় নিয়ে গিয়েছিল জানো? ওটা কেমন জায়গা?

খুব খারাপ। আমরা ওটাকে গদাধরের আড্ডা বলে জানি। আর কিছু জানতে চেও না। কোনো ভদ্রলোক জেনেবুঝে ওখানে নিজের বউকে নিয়ে যায় না।

তুমি তবে গিয়েছিলে কেন?

আমি! বলে একটু থমকায় রাজা। তারপর বলে, কুট্রিদার এই ঠেকটা বহুদিনের। আমাকে বারকয়েক কুট্রিদাই নিয়ে গেছে ওখানে। মাঝে মাঝে জলসা বসে। আমি গান গাইতে গেছি। আজ গিয়েছিলাম, কুট্রিদা একটা জরুরী কাজ আছে বলে অ্যাপয়েন্টমেন্ট করেছিল। গিয়ে বুঝলাম তা নয়।

ওটা কি ফূর্তি করার জায়গা?

তা ছাড়া আর কী! মধ্য কলকাতার টপ মস্তানরা ওখানে জড়ো হয় সন্ধ্যাবেলায়। সারাদিন ফাঁকা থাকে।

আমার এত গা ঘিনঘিন করছে।

করতেই পারে। তবু তো তুমি সবটা জানো না।

আর জেনে কাজ নেই। তুমি বোসো, আমি বরং স্নান করে আসি।

আমি বসব না বউদি। একটা কথা বলেই চলে যাবো।

কী কথা?

রাজা কিছুক্ষণ ভুঁকুঁচকে নিজের নখ দেখল। তারপর মুখ তুলে তার শ্রীময় মুখখানা ভরে একটা ভারী সুন্দর হাসি হাসল। বলল, তোমার সঙ্গে আমার সম্পর্কটা নিয়ে একটা কথা উঠেছে জানোই তো।

নতমুখী রেমি বলল, জানি। কিন্তু ওসব আজ থাক।

না, আমি সে কথা বলতে ঠিক আসিনি। অন্যদিকে আর একটা রিলেশানও তৈরি হচ্ছে তুমি বোধহয় তার খবর রাখো না।

কিসের রিলেশন?

কুট্রিদার সঙ্গে একজনের। মানে একটা মেয়ের।

রেমি এবার মুখ তুলল। তীব্র হয়ে উঠেছে তার চোখের দৃষ্টি। আর লজ্জা নেই, সংকোচ নেই, বরং প্রচণ্ড একটা তেজ ধক ধক করছে চোখে। তার উপোসী ক্ষীণ গলা থেকে বাঘিনীর চাপা গড়ড় হংকার বেরিয়ে এল, বিশ্বাস করি না।

কেন করো না?

ওর নামে এর আগেও রটানো হয়েছিল। বাজে কথা।

কুট্রিদার আর সব দোষ থাকতে পারে, শুধু এই দোষটা নেই বলছ?

মেয়েদের সম্পর্কে ওর কোনো দুর্বলতা নেই।

ছিল না হয়তো। এখন হয়েছে। বিশ্বাস করো।

মেয়েটা কে?

আমি জানি না। দেখিনি।

শোনা কথা?

হ্যাঁ, কিন্তু বিশ্বাসযোগ্য, কিন্তু একথা তোমাকে বিশ্বাস করতে বলছি না এখনই। প্রমাণ পেলে



বিশ্বাস করো আমি আর একটা কথা বলতে চাই।

রেমির শ্বাস ক্রমে উত্তপ্ত হয়ে উঠছিল। হাত মুঠো পাকিয়ে যাচ্ছিল আপনা থেকেই। রাজা বলল, অনেক কষ্ট পেয়েছো এদের কাছে। এ যুগের মেয়েরা এত সহ্য করে না। কেন কষ্ট পাচ্ছে তুমি?

কী করব?

কিছু একটা করো। অন্তত করার জন্য পজিটিভালি ভাবতে শুরু করো।

তুমি বোসো। আমি স্নানটা করে আসি। বড় গরম লাগছে।

রাজা বসল। রেমি গিয়ে বাথরুমে জলের তলায় বিছিয়ে দিল নিজেকে। কত জল যে ঢালল মাথায় আর গায়ে তার হিসেব নেই। অনেকক্ষণ উন্মাদ স্নানের পর একটু শীত করছিল রেমির। হাত পা থরথর করে কাঁপছে। কিছু ভাবতে পারছিল না রেমি, কিছু বুঝতে পারছিল না। মনে হচ্ছিল আরো আরো জল ঢেলে গেলে, আরো বহুক্ষণ স্নান করলে বুঝি সব সংকট কেটে যাবে, মনের অস্থিরতা ধুয়ে যাবে।

তা হল না। তবু অনেকটা শরীরে তাপ কমল।

এলোচুলে সে এসে বসল রাজার মুখোমুখি। ধুব যেসব শক্ত বই পড়ে তারই একটা নিয়ে পাতা ওলটাচ্ছিল রাজা। রেমি আসার পর বইটা রেখে দিয়ে বলল, কিছু খেয়ে এসো। তাহলে ভাল লাগবে।

রেমি কে জানে কেন রাজি হয়ে গেল। হয়তো খেলে এত খারাপ লাগবে না।

এ বাড়িতে খাবারের অভাব নেই এবং বাঁধাধরা সময় বলেও কিছু নেই। রেমি গিয়ে এক গ্লাস দুধ খেল রান্নাঘরে দাঁড়িয়ে। শক্ত খাবার খাওয়ার মতো রুচি নেই। দুধ খেতেও বমি পাচ্ছিল। তবু জোর করে খেল।

আশ্চর্য, বাস্তবিকই কিছুটা ভাল লাগছিল তার। লম্বা হলঘরের মতো ডাইনিং হল-এ সে কিছুক্ষণ পায়চারী করল। তারপর এক টুকরো মাছ দিয়ে এক মুষ্টি ভাতও খেয়ে নিল সে।

ঘরে আসতে রাজা ভারী সুন্দর করে হেসে বলল, তুমি যে আমার কথায় বাধা মেয়ের মতো খেয়ে আসবে এতটা ভাবিনি।

রেমি কথটা গ্রাহ্য না করে বলল, তোমার কুট্রিদা সম্পর্কে কী বলছিলে যেন।

কী বলব বলো তো যতটুকু জানি বললাম। এর বেশী জানি না।

তুমি কথটা বিশ্বাস করো?

করি

তোমার কুট্রিদার কি আগে কোনো প্রেম-ট্রেম ছিল?

ছিল বউদি। তবে সেসব জানতে চাওয়া বোকামি।

রেমি একটা করুণ দীর্ঘশ্বাস ছেড়ে বলে, আমি সত্যিই বোকা।

কেন বলো তো

আমার ধারণা ছিল, তোমার কুট্রিদা বোধহয় কখনো কোনো মেয়ের দিকে মনোযোগ দেয়নি।

এ ধারণা কি করে হল

কী জানি কী করে। তবে আমি এ বিষয়ে এত নিশ্চিত ছিলাম যে কখনো জানতেও চাই নি।

কুট্রিদার মতো সুপুরুষ আর স্মার্ট ছেলেদের প্রেম না হওয়াই তো আশ্চর্যের বিষয়।

সে আমি জানি। তবে মনে করতাম, মেয়েরা গণ্ডায় গণ্ডায় ওর প্রেমে পড়লেও ও কখনো কারো প্রেমে পড়েনি। মেয়েদের সম্পর্কে এত উদাসীন।

ভুল ধারণা।

এ মেয়েটা কে জানো না তাহলে?

না। তবে খোঁজ নেবো।

রেমি মাথা নেড়ে বলে থাকগে, নিও না।

কেন ?

আমার তেমন ভাল লাগবে না জেনে। থাকগে।

তোমাকে আর একটা কথা বলব।

কী গো ?

দুটো মস্ত মস্ত লোক টেবিলের দুধারে বসে ঝুঁটি চালছে। এ ওকে মাত করার চেষ্টা করছে, ও একে। আমরা দুজন দুই ঝুঁটি। এটা বুঝতে পারছ ?

না তো !

বুঝবার চেষ্টা করো। তুমি বা আমি দুজনের কেউই এ খেলায় কোনো ইমপরট্যান্ট ফ্যাকটর নই। চাল দেওয়ার জন্য আমাদের কাজে লাগানো হচ্ছে মাত্র। এবার বুঝতে পারছ ?

রেমি মৃদু একটু হেসে বলল, বেশ কথা বলো তুমি। শোনো, অবেলায় খেয়ে শরীরটা আইটাই করছে। আমি একটু আধশোয়া হয়ে তোমার কথা শুনি ? কিছু মনে কোরো না।

আরে না। শোও। আমি যাই।

তুমি যে কথাটা শেষ করোনি। শেষ করো আগে।

বলছিলাম দুজনের মাঝখানে পড়ে অকারণে কষ্ট পাচ্ছে কেন ?

কী করব ?

বেরিয়ে এসো।

তারপর ?

তারপর আমি আছি।

তুমি ! আধশোয়া রেমি ফের উঠে বসে, আবার সেই কথা।

কথাটা কি খারাপ ? অন্যায় ?

তা বলিনি। বললাম যে তোমাকে আমাকে নিয়েই এত গুণগোল। আবার তো গুণগোল লাগবে।

না রেমি, আসলে তুমি বাইরের গুণগোলকে তেমন ভয় পাও না। তোমার মনটা এক জায়গায় আটকে গেছে। নানা সংস্কার কাজ করছে। কিন্তু লাভ নেই। কুট্রিদা কোনোদিনই বোধ হয়—কথাটা শেষ করল না রাজা। ভদ্রতাবশে।

কিন্তু রেমি মনে মনে বাক্যটা পূরণ করে নিল। তারপর মাথা নেড়ে বলল, আজও একটু আগে দূরে কোথাও চলে যাওয়ার কথা ভাবছিলাম। খুব ভাবছিলাম। আমার বোধ হয় ওর কাছ থেকে একটু দূরে থাকা দরকার।

ফর দি টাইম বিয়িং ? তাতে লাভ নেই।

চিরকাল দূরে থাকব ?

ভেবে দেখ।

ভেবেছি। চিরকাল দূরে থাকতে হলে মরতে হয়।

ওঃ বাবা। তাহলে আমার প্রস্তাব ফিরিয়ে নিচ্ছি। আর যাই করো, মরো না।

আমি মরলে খুব ক্ষতি হবে ?

আর কারো না হোক আমার হবে। ভীষণ ক্ষতি হবে।

কেন ? আমি তো তোমাকে কিছুই দিইনি।

দাওনি। সবাই কি দেওয়ার প্রত্যাশা করে ?

বালিকার মতো সরল অকপট গলায় রেমি বলে, তুমি আমাকে ভালবাসো তা আমি খুব

গভীরভাবে টের পাই। এত ভালবাসলে কেন ?

এসব তো পুরোনো কথা। জবাব চাও কেন ?

জবাব চাইনি তো শুধু প্রশ্ন করলাম। আমাকে কী করতে বলো তুমি এখন ?

কুট্টিদার ওপর তোমার মোহ কবে কাটবে ?

মোহ কি আর আছে ? বুঝতে পারছি না। বোধ হয় কেটেই গেছে।

তাহলে এবার থেকে আমার কথা একটু মনে কোরো রোজ।

মনে করি তো ! রোজ তোমাকে ভাবি। ভাবতে ভাল লাগে।

বানিয়ে বলছ না তো !

আমি বানাতে জানিই না।

তাহলে শোনো। কুট্টিদা আজ গদাধরের আড্ডায় তোমাকে নিয়ে গিয়েছিল আমার হাতে তুলে দেওয়ার জন্য।

জানি। কাল সারা রাত এসব কথাই বলেছে। ও কি জেলাস ?

না, মোটেই নয়। তুমি চলে গেলে ওর কিছু যায় আসে না।

তাই হবে।

এই ঘটনার পরও ওর সঙ্গে বসবাস করতে তোমার অপমান লাগবে না ?

ভীষণ অপমান লাগছে। বড় জ্বালা। বড় ঘেন্না।

যদি মোহভঙ্গ হয়ে থাকে রেমি, ভাল করে ভেবে দেখ, তাহলে আমি তোমাকে একদিন নিয়ে যাবো।

তাতে সব মিটে যাবে ?

মনে হয় যাবে না। তবে আমরা বেঁচে যাবো।

আমাকে ভাবতে একটু সময় দাও।

সময় নিশ্চয়ই দেবো। আমাকেও ভাবতে হবে। এতদিন ব্যাপারটা ছিল খেলার মতো। এখন তো তা থাকছে না।

শ্বশুরমশাই ? উনি কী করবেন ?

কিছু করবেন নিশ্চয়ই। জানি না।

ওঁকে তুমি ভয় করো না ?

ভীষণ ভয় করি রেমি। চিরকাল করে এসেছি।

ওঁর রি-অ্যাকশন কী হবে ?

উনি আমাদের খুন করতে লোক পাঠাবেন হয় তো।

তাহলে ?

সেইটেই ভেবে দেখতে হবে। কাউন্টার স্ট্র্যাটেজি।

থাক রাজা। বিপদ ডেকে এনো না। আমার যেমন কাটছে কেটে যাবে।

রাজা প্রথমমে মুখ করে খানিকক্ষণ বসে রইল। তারপর বলল, আমি খুব কাপুরুষ নই রেমি।

জানি। কিন্তু অন্যায় সাহসও ভাল নয়। ওঁর অনেক ক্ষমতা।

হ্যাঁ, সেও ঠিক। মন্ত্রিসভা যাওয়ার পর উনি এখন আবার আগের মতো গুণ্ডাদের সদরী করছেন। সব খবরই রাখি।

তাহলে এসব প্ল্যান না করাই ভাল।

তুমি এভাবে শুকিয়ে যাবে ?

আমি হয়তো বেশীদিন বাঁচব না। কোনো কোনো গাছ আছে, এক জায়গা থেকে উপড়ে নিয়ে অন্য জায়গায় লাগালে বাঁচে না।

তুমি বোধহয় আমার বিপদের কথা ভেবে এসব বলছ।

তা নয় গো। শুধু তুমি আমি নয়, বিপদ সকলের। অনেক কেলেংকারি।

তা যা হওয়ার হয়েই গেছে। তবে চৌধুরী বাড়িতে কেলেংকারির অভাব নেই। এ বাড়ির বউ মেয়ে ছেলে সকলেরই ইতিহাস আছে।

রেমি একটু হেসে বলল, তাই বলেই কি আমারও কেলেংকারি করার অধিকার জন্মায় ?

তা নয়। বললাম, তুমি এ ব্যাপারে পাইওনিয়ার নও।

রেমি কিছুক্ষণ বিবশ হয়ে চেয়ে রইল। আপনমনে একটু মাথা নাড়ল। তারপর বলল, আমি একটা জিনিস কিছুতেই বুঝতে পারি না, জানো ?

কী

তুমি কি বলতে পারো ও আমাকে কেন ভালবাসে না

রাজা ভুলটি করল। প্রশ্নটা শুনে সে খুশি হল না। একটু বিরক্তির সঙ্গে বলল, ওসব জটিল প্রশ্নের জবাব জানি না। কুট্টিদার মধ্যে ভালবাসা-ফাসা নেই, বুঝলে ! একদম নেই।

কঠিন পুরুষদের বোধহয় থাকেও না, না ?

কে জানে। রাজার গলায় স্পষ্টই উদাসীনতা।

রেমি একটু বিষণ্ণ হেসে বলল, বরাবর ও আমাকে অন্য পুরুষের দিকে ঠেলে দেয়। নিজের বউকে কেউ পারে বোলা ?

সেটা এতদিনে তোমার বোঝা উচিত ছিল।

কিন্তু একটা জিনিস ছিল। অন্য কোনো মেয়ের প্রতি দুর্বলতা ছিল না।

এখন হয়েছে।

মেয়েটাকে একটু দেখাবে, আমার খুব দেখতে ইচ্ছে করে সে কেমন মেয়ে।

রাজা উঠে দাঁড়াল। বলল, দেখাতে পারব কিনা জানি না। চেষ্টা করব।

নিশ্চয়ই খুব সুন্দর, তাই না !

সুন্দর কি না তা দেখার চোখ কি কুট্টিদার আছে ? থাকলে তোমাকেই দেখতে পেত।

আমি আর কী এমন সুন্দর !

সুন্দর নও ! বলে রাজা আচমকা—ভীষণ আচমকা—হাত বাড়িয়ে খামচে ধরে রেমিকে টেনে আনল নিজের কাছে। কয়েক মুহূর্তের বিভ্রম, সন্মোহন, প্রলয়।

ঠিক সেই মুহূর্তে দরজার বাইরে অনুচ্চ গলা খাঁকারির একটা শব্দ পাওয়া গেল। দরজায় মৃদু একটু করাঘাত।

রেমি ছাড়ানোর চেষ্টা করেনি নিজেকে। গায়ে শক্তি নেই। মন অবশ। রাজা নিজেই তাকে বিছানায় বসিয়ে দিল। তারপর গিয়ে দরজা খুলল।

চৌকাঠে দাঁড়িয়ে জগা।

কী চাও জগাদা ?

বউদি খেয়েছে কিনা জানতে এলাম।

খেয়েছে।

ঠিক আছে, তোমরা গল্প করো।

জগা দরজাটা আবার টেনে দিয়ে গেল।

রাজা চাপা গড়গড়ে গলায় বলে, স্পাই ! স্পাই !

রেমি একটুও উত্তেজিত হল না। মৃদু স্বরে বলল, সব সময়েই কেউ না কেউ আমাকে পাহারা দেয়, তাই না ?

আর তুমি সেটা সহ্য করো। কেন করো রেমি ?

রেমি মাথা নেড়ে বলল, আর করব না । আমাকে খুব দূরে নিয়ে যেতে পারবে কেন পারব না ?

কোথায় ?

বোমবে ।

বোমবে সেখানে কী ?

আমি কলকাতা ছেড়ে দেবো । বোমবের ফিল্ড অনেক ভাল ।

রেমি একটা যেন স্বস্তির শ্বাস ফেলে বলল, ঠিক আছে ।

প্রমিস রেমি ?

রেমি হাসে, প্রমিস আবার কেন কথাটা বিশ্বাস হচ্ছে না

হচ্ছে । তবু তোমার ওপর থেকে খুব চৌধুরির সব হিপনোটিজম এখনো কাটেনি হয়তো ।

কেটে গেছে । যাওয়ার আগে আমি শুধু সেই মেয়েটাকে একবার দেখে যেতে চাই ।

কুটিনার প্রেমিকাকে ?

হ্যাঁ । তাকে একবার চোখের দেখা না দেখে পারব না ।

## ॥ ৫৫ ॥

স্ট্রীলোক লইয়া আমার জীবনে কোনওরূপ সমস্যা ছিল না । তাই স্ট্রী-চারিত্র কতদূর রহস্যময় তাহা লইয়া ভাবিবারও অবকাশ হয় নাই । অল্প বয়সে সুনয়নীর সহিত বিবাহ হইয়া গেল । সুনয়নী যথেষ্ট সুন্দরী । দাম্পত্যজীবনে আমাদের দ্বন্দ্ব ছিল না । স্ট্রীলোক লইয়া কাজেই আমার আর শিরঃপীড়ার কারণ নাই ।

কিন্তু স্ট্রীলোকেরা আমাকে সুখে থাকিতে দিবে কেন

সেই কিশোরীর কাঠচাপা গাছ হইতে পতিত হওয়া এবং আমার সহিত কিছু অদ্ভুত বাক্যবিনিময় ঘটবার পর একদিন লক্ষ করিলাম, সুনয়নী যেন গভীর । কথা কহিতেছে না, চোখে চোখ রাখিতেছে না, দেখা হইলেই মুখ ফিরাইয়া লইতেছে । রাত্রে শয়্যায় সে অন্য দিকে পাশ ফিরিয়া ঘুমের ভান করিয়া নিশ্চুপ জাগিয়া থাকিতেছে, তাহাও টের পাইতাম । তবে অভিমান ভাঙাইবার অভ্যাস বিশেষ নাই বলিয়া আমি ঘটনাটিকে উপেক্ষা করিতে লাগিলাম ।

কিন্তু নিশ্চেষ্ট থাকিব এমন উপায় কী ?

একদিন ঘোর রাত্রে অনুভব করিলাম, সুনয়নী কাঁদিতেছে । গুমরানো কান্না । খুব গভীর বেদনা হইতে উঠিয়া আসিতেছে । কান্না আমি সহিতে পারি না ।

উঠিয়া তাহার গায়ে হাত রাখিয়া বলিলাম, কী হয়েছে সুনু ?

সে জবাব দিল না ।

আরও কয়েকবার প্রশ্ন করিলাম । জোর করিয়া তাহার মুখ আমার দিকে ফিরাইবার চেষ্টা করিলাম । তেমন জোর করি নাই নিশ্চয়ই । সে মুখ ফিরাইল না ।

আমি হাল ছাড়িয়া উঠিয়া পড়িলাম । পাশে শুইয়া কেহ কাঁদিলে ঘুম হওয়া সম্ভব নহে । সেজ বাতিটির পলিতা বাড়াইয়া একখানি কাব্যগ্রন্থ খুলিয়া বসিলাম ।

অল্প পরেই সুনয়নী উঠিল । এলোচুল খোঁপা করিল । চোখ মুছিল । তারপর বলিল, তোমার সঙ্গে আমার কথা আছে ।

বিরক্ত হইয়া বলিলাম, কথা আছে তো বললেই পারতে । কেঁদেকেটে ওরকম হয়রান হচ্ছে কেন ?

সুনয়নী বলিল, কাঁদি কি আর সাথে ?

কাল্লা আমি সহিতে পারি না তুমি তো জানো !

না কেদে উপায় কী বলো ! মেয়েদের সবচেয়ে যেটা জোরের জায়গা সেখানেই যদি কেউ হাত দেয় তাহলে কী করব ?

আমি না বুঝিয়া হাঁ করিয়া চাহিয়া থাকিয়া বলিলাম, ও আবার কী কথা ? কী হয়েছে বলো তো !

সুনয়নী তাহার বালিশের তলা হইতে একখানি ভাঁজ করা কাগজ বাহির করিয়া আমার হাতে দিয়া কাঁপল, পরশুদিন তোমার টেবিলের ওপর পেয়েছি। পড়ো।

খুলিয়া দেখিলাম গোটা গোটা সুছাঁদ অক্ষরে লেখা, ও ডাইনি, ওকে যদি কখনো আর আদর করো তাহলে আমি মরব।

সম্বোধন নাই, ইতি নাই। শুধু এই কয়েকটি কথা। কে লিখিয়াছে সে সম্পর্কে আমার মনে সন্দেহ নাই। বুকটা একটু দুরুদুরু করিয়া উঠিল। সুনয়নীর চোখে চোখ রাখিতে পারিলাম না। বড় গ্লানি বোধ করিতেছিলাম। এ সেই উম্মাদিনী কিশোরীর কাজ।

কিন্তু সুনয়নীকে কথাটা বলা যায় না। কাজেই আমাকে মিথ্যাচার করিতে হইল। বলিলাম, এটা কে লিখেছে ?

কী করে বলব ?

এটার অর্থই বা কী ?

অর্থ তো পরিষ্কার। আমি ডাইনী আর তুমি দেবদূত।

আমি মাথা নাড়িয়া কহিলাম, এ চিঠি যে আমাদের উদ্দেশ্যেই লেখা এমন কোনো কথা নেই।

তাহলে তোমার টেবিলে রেখে গেল কেন ?

সেইটেই বুঝতে পারছি না। কিন্তু এটা নিয়ে এত উত্তেজিত হওয়ারও কিছু নেই।

নেই ? বেশ কথা তো ! যে খুশি যা খুশি লিখে রেখে যাবে আর আমি সহ্য করব ?

তাহলে কী করবে ?

সেটা তুমি বলে দাও। চিঠিটা কে রেখে গেছে সেটা খুঁজে বের করতে হবে।

আমার বুক কাঁপিয়া উঠিল। খোঁজ খবর করিতে গেলে অবোধ ও অবুঝ কিশোরীটি ধর, পড়িয়া যাইবে যে ! তাহাকে রক্ষা করিবার একটা ব্যাকুল আগ্রহ বোধ করিতে লাগিলাম।

মাথা নাড়িয়া কহিলাম, সুনু, এরকম চিঠি আমাকে কেউ লিখতে পারে বলে আমার মনে হয় না। কোথাও একটা গোলমাল হয়েছে। মনে হয় কেউ ভুল করে রেখে গেছে বা বাচ্চারা কেউ কুড়িয়ে এনে রেখেছে। এটা নিয়ে শোরগোল না করাই ভাল।

সুনয়নী একটু সরল প্রকৃতির ছিল। সম্ভবত একটু ভালমানুষ গোছের। সে আমার স্ত্রী হইলেও তাহাকে খুব গভীরভাবে মনোযোগ দিয়া কখনো লক্ষ্য করি নাই। বিবাহ বাসরে প্রথম তাহার মুখখানা দেখিয়া মনে হইয়াছিল, বাঃ, বেশ তো ! ব্যস, আমার রূপমুগ্ধতার ওইখানেই শেষ। এই নিষ্পৃহতা আমাকে চেষ্টা করিয়া অর্জন করিতে হয় নাই। আমার স্বভাবে ইহা ছিলই। তাই সুনয়নীর সহিত শারীরিকভাবে এতদিন ঘনিষ্ঠ বসবাসের পরও সে কখনোই আমার হৃদয় জুড়িয়া বসে নাই। বোধহয় ইহা একপ্রকার ভালই।

সুনয়নী আরো কিছুক্ষণ অশ্রুবিসর্জন করিল। অজানা পত্রলেখিকার উদ্দেশ্যে কিছু গালি ও অভিশাপ বর্ষণ করিল। তারপর চিঠিটি কুটিকুটি করিয়া ছিড়িয়া ফেলিল। তারপর আমার দিকে হাত বাড়াইয়া বলিল, এসো, আমাকে অনেক আদর করো।

সেই কামনার আহ্বানে সাড়া দিলাম বটে, কিন্তু মনটা কেমন আড় হইয়া রহিল। শরীরের মিলনে মন নাচিয়া উঠিল না। এক অজানা স্পন্দনে আজ আমার হৃৎপিণ্ড আন্দোলিত হইতেছে। কিছু ভয়,

কিছু চোরা আনন্দ, কিছু শিহরণ আমি টের পাইতেছিলাম, যাহা দৈনন্দিন নহে, স্বাভাবিক নহে ।

পরদিন সেই কিশোরীকে খুঁজিয়া বাহির করিলাম । কথটা যত সহজে বলা গেল, কাজটা তত সহজ হয় নাই । কিশোরীটি সর্বদাই আমাদের বাড়ির সর্বত্র ঘুরিয়া বেড়ায় । পরনে আধময়লা শাড়ি, নগ্ন পদ, চুল ঝুঁটি করিয়া বাঁধা । তাহাকে খুঁজিতে হয় না । কিছুক্ষণ পরপরই তাহাকে দেখা যায় । আমি তাহাকে এইভাবে সকলের সামনে কিছু প্রশ্ন করিতে সাহস পাইলাম না । লোকের সন্দেহ হইতে পারে । তাই আমি তক্কে তক্কে রহিলাম । বারবাড়ি হইতে খেলা সারিয়া দ্বিপ্রহরের দিকে সে নদীর ঘাটে চলিল । আমি আড়াল হইতে চোখ রাখিতেছিলাম ।

নদীর ধারে সারা বছরই উন্টানো নৌকা কিছু পড়িয়া থাকে । মেরামতির জন্য । অনেকগুলি আবার ঠেকনো সহযোগে ঈষৎ উঁচুতে তোলা । এগুলির অভ্যন্তর ছায়াময় এবং গৃহসদৃশ । বালক-বালিকারা এইসব নৌকার নিচে দিব্য খেলার সংসার পাতিয়া বসে ।

আমার সেই কিশোরীটি এইরূপ একটি নৌকার ছায়ায় বসিয়া উদাস দৃষ্টিতে ব্রহ্মপুত্রের ঢেউ দেখিতেছিল । সেইখানে, সেই নির্জনতাতেও তাহার মুখোমুখি হইতে কেমন যেন সাহস হইতেছিল না । মনে হইতেছিল, কী এক অসামাজিক কাণ্ড করিতে চলিয়াছি ।

যাহা হউক অবশেষে সাহস সংগ্রহ করিলাম এবং সেই নৌকার কাছে গিয়া সবগে গলা খাঁকারি দিলাম ।

কিশোরীটি অপাঙ্গে একবার আমাকে চাহিয়া দেখিল । কিন্তু যেরূপ প্রত্যাশিত ছিল সেরূপ কিছুই ঘটিল না । শশব্যস্তে উঠিয়া বসিবে, সলজ্জ অবনত দৃষ্টিতে জড়োসড়ো হইবে, সেরূপ কিছুই না ।

বলিল, তুমি কি আমাকে বকবে ?

এমনভাবে বলিল যেন বকাঝকা সে বড় গ্রাহ্য করে না । বকিলে বকিতে পার, তোমারই শ্রম ।

আমি বলিলাম, চিঠিটা কি তুমি লিখেছিলে ?

আমি ছাড়া আর কে ?

কেন লিখলে ?

আমার ইচ্ছে ।

ইচ্ছে মানুষের নানারকম হয়, তা বলে কি ইচ্ছেমতো চলা উচিত ?

তুমি আমার বাবাকে কী বলেছো ?

কী বলেছি ?

তুমি বাবাকে জিজ্ঞেস করেনি আমি পাগল কিনা ?

করেছি ।

তুমি কি আমাকে পাগল ভাবো ?

ঠিক তা নয় । তবে তোমার কিছু আচরণ স্বাভাবিক নয় ।

বেশ তো, আমি না হয় পাগল । পাগলেরা অনেক কিছু করে, কী করবে ?

কিছু করব বলিনি তো ।

করো না । আমিও যা খুশি করব ।

আমার ওপর তোমার এত রাগ কেন ?

তুমি ওর সঙ্গে থাকো কেন ?

ও মানে কে ? সুনয়নী ?

হ্যাঁ ।

ও যে আমার বিবাহিতা স্ত্রী ।

কিশোরী এবার ডগডগে চোখ দুইটি সম্পূর্ণ মেলিয়া আমার চোখে স্থাপন করিল, সেই দৃষ্টি এতই তীব্র যে সহিতে পারিতেছিলাম না । এক তীব্র জ্বালা ও উত্তাপ যেন আমাকে স্পর্শ করিতেছিল ।

কিশোরী হঠাৎ চক্ষু নত করিয়া কহিল, তুমি কি আমাকে মরতে বলো ?

ও কী কথা মরতে বলব কেন ?

আমি মরতে পারি, তাতে যদি তোমাদের শান্তি হয় ।

ও কথা বলবেও না, ভাববেও না ।

তাহলে কী করব ?

দয়া করে শোওয়ার ঘরে উঁকি দিও না, আর চিঠিও লিখো না ।

কেন আমার যে ইচ্ছে করে ।

এললাম যে সবসময় ইচ্ছেমতো চলতে নেই । ধরা পড়ে যাবে ।

ধরা পড়লে পড়ব ।

না । ধরা পড়লে তোমার নিন্দে হবে ।

হোক না নিন্দে । তোমাকে জড়িয়েই তো হবে ।

সেটা কি ভাল হবে ?

হবে । তোমার সঙ্গে জড়িয়ে আমার নিন্দে হলে আমি খুশি হই ।

আমি স্তম্ভিত হইয়া গেলাম । এই পাগলিনীকে কে কীই বা বুঝাইতে পারিবে ? রাগ করিয়া লাভ নাই । এই উদ্বাদিনী যে কোনও পরিণতির জন্যই প্রস্তুত । ইহার ভয় বলিয়া কিছু নাই । লজ্জা নাই । ঘৃণা নাই । মেয়েদের বয়ঃসন্ধির প্রেম কি এরকমই ভয়ানক ?

অগত্যা অন্য পন্থা ধরিতে হইল ।

কহিলাম, আমাকে কি তুমি ভালবাসো ?

কী আশ্চর্য ! এত কথায় ইহাকে বাগে আনিতে পারি নাই । কিন্তু ভালবাসা কথাটি উচ্চারণ করা মাত্র যেন জোঁকের মুখে লবণ পড়িল । আচমকা তাহার শ্যামলা রঙে রক্তোচ্ছ্বাস দেখা দিল । চক্ষু নত ।

সে জবাব দিল না । কিন্তু একটু পরেই দেখিলাম, সে হাতের পিঠ দিয়া চোখ মুছিতেছে ।

কাঁদছো কেন ? আমি স্নেহে প্রণম করিলাম ।

তুমি যাও ।

কেন বলো তো !

আমি আর চিঠি দেবো না । উঁকিও মারব না ।

ঠিক তো !

ঠিক ।

মরার কথাও ভাববে না তো !

মরব । আজই মরব ।

আমি আত্মসংবরণ করিতে পারিলাম না । হাত বাড়াইয়া তাহার একটি হাত সবলে চাপিয়া ধরিয়া কহিলাম, বেয়াদবি করবে তো এক্ষুনি নিয়ে গিয়ে তালাবন্ধ করে রাখব ।

সে হাত ছাড়াইয়া লইল । তারপর বলিল, এখানে কেন এসেছো ?

তোমাকে শাসন করতে ।

সবাই দেখছে ।

এখানে কে দেখবে ?

বাড়ির ছাদ থেকে দেখা যায় । নদীর ঘাট থেকেও । তুমি যাও ।

আমি বলিলাম, তোমাকে নিয়েই যাবো । চলো ।

আমি যাবো না ।

আমি কোমল কণ্ঠে কহিলাম, লক্ষ্মী সোনা, এরকম করে না । চলো । আমাকে কষ্ট দিয়ে তোমার



কী লাভ ?

তোমার আবার কষ্ট কিসের ? সুন্দর বউ পেয়েছে।

বউ সুন্দর হলে বুঝি আর কারও কোনো কষ্ট থাকে না ?

তাই তো।

কিন্তু আমি কষ্ট পাচ্ছি। বলিয়া হাসিলাম। বলিলাম, তোমার জন্য।

পাগলিনী বলিল, তুমি ওকে বিয়ে করলে কেন ?

আমি হাসিব না কাঁদিব ভাবিয়া না পাইয়া কহিলাম, আমি যখন সুনয়নীকে বিয়ে করি তখন তুমি তো এইটুকু খুঁকি।

এইবার সে হাসিল। হঠাৎ বলিল, নইলে কি আমাকে করতে ?

আমি আমূল লজ্জা পাইয়া বলিলাম, ওসব কথা থাক।

থাকবে কেন ? কান ভরে শুনে নিই। আমি তো আজ মরবই। বলো।

আমি বিব্রত ও হতচকিত হইয়া কহিলাম, বোধহয় তোমাкеই করতাম। এখন চলো।

আমার যা শুনবার শোনা হয়ে গেছে। এখন তুমি যাও। আমি জলে ঝাঁপ দেবো।

সর্বনাশ।

যারা সাঁতার জানে তারা মরে না। আমি স্নান করব।

তটস্থ হইয়া কহিলাম, অন্য কোনো মতলব নেই তো !

না। তুমি যাও।

চলিয়া আসিলাম। মনটা বড় ভারাক্রান্ত। জীবনে নূতন একটি অপ্রত্যাশিত দিক হইতে যেন একটি আলোর রেখা আসিয়া পড়িয়াছে। কিন্তু সেই আলো আমাকে উজ্জ্বল করে নাই। বিষন্ন করিয়াছে।

এই কিশোরী কন্যাটির ভবিষ্যৎ কী ? আমিহি বা কী করিব ?

সেইদিন রাত্রে সুনয়নী বলিল, চিঠিটা নিয়ে আমি খোঁজখবর করেছি।

বুক কাঁপিয়া উঠিল। বলিলাম, ও, তা কী জানলে ?

ঝি চাকররা কেউ কিছু বলতে পারছে না। তবে—

তবে আবার কী ?

থাকগে। তোমার শুনে কাজ নেই।

বলিয়া সুনয়নী হঠাৎ আমাকে জড়াইয়া ধরিয়া হি-হি করিয়া হাসিতে লাগিল।

কী হল ?

তোমার দিকেও তাহলে মেয়েরা নজর দেয় ?

আমি বলিলাম, না না।

শোনো, আমি বরং খুশিই হয়েছি।

তার মানে ?

অনেক ভেবে চিন্তে দেখলাম, তুমি তো একদম সাধু মানুষ। ন্যালাক্ষ্যাপা গোছের। মেয়েরা তোমাকে বরং এড়িয়েই চলে। একটা মেয়ে যে নজর দিয়েছে তাতেই বোঝা যায় তার চোখ আছে।

এই কথায় খুশি হওয়া উচিত না রাগ করা উচিত তাহা বুঝিতে পারিলাম না। চুপ করিয়া রহিলাম।

সুনয়নী বলিল, রাগ করলে ?

না তো !

চিঠিটা পেয়ে তুমি একটু খুশিই হয়েছো, না ?

না। চিঠিটা আমাকে লেখা কিনা তাই তো জানি না।

তোমাকেই গো, আর সাধু সেজো না ।

সন্দেহ আছে ।

আমাকে কেন ডাইনী বলল বলো তো !

বলুক না, কথায় তো ট্যাকস নেই ।

আমি কিন্তু খুব ভেবেছি ।

কী ভাবলে ?

আমাকে ডাইনী কেন বলল । হিংসে থেকে ।।

দূর ! ওসব ভেবো না ।

আমার খুব ইচ্ছে করে মেয়েটার সঙ্গে আলাপ করি ।

আবার ভাবছ ?

খুব ভাবছি । ঠিক ওকে খুঁজে বের করব দেখো ।

কী দরকার ?

বললাম যে, তোমাকে সে ভালবাসুক তাতে ক্ষতি তো নেই । কিন্তু আমি ওর কী ক্ষতি করেছে ?

আমি হাই তুলিলাম ।

ওকে পেলে খুব সাজাবো । কনের মতো । নিজেও সাজবো । তারপর আয়নায় পাশাপাশি দাঁড়িয়ে দেখব কে বেশী সুন্দর । যদি আমি হারি—

আঃ সুনয়নী !

সুনয়নী আজ বড় প্রগলভা । আকুলভাবে আমাকে আলিঙ্গন করিয়া কহিল, আমার সঙ্গে ও পারবে না ।

কে পারবে না ?

ও । রূপের পাল্লায় হেরে যাবে । দেখো ।

কী যে হল তোমার !

আজ আমাকে একটু আদর করো । আমার দম বন্ধ হয়ে আসছে ।

## ॥ ৫৬ ॥

হাতে পায়ে খিল ধরল রেমির । এত দুর্বল লাগছে শরীর যে, রাজা চলে যাওয়ার পর সে আবার শুয়ে পড়ল । অবেলায় খেয়েছে বলেই কি ? বুকে বায়ুজনিত একটা চাপ, ব্যথা । একটু জল খেলে হত । কিন্তু উঠতে ইচ্ছে করছে না । কিছু করতে ইচ্ছে করছে না ।

কথাটা ধুবকে কি জানাবে ? সে যে রাজার সঙ্গে বসে চলে যাচ্ছে একথাটা কি জানানো উচিত নয় ?

না । তাই কি হয় ! একটু আগেই তো সে ভেবেছিল ধুবকে ছেড়ে খুব দূরে কোথাও তার চলে যাওয়া দরকার । তবে জানাবে কেন ? তাছাড়া ধুবর তো আর একজন বউ হবে । সে কি খুব সুন্দরী ? খুব ?

ঘুম পাচ্ছে, কিন্তু ঘুম আসছে না । ভারী অদ্ভুত অবস্থা । চোখের পাতা ভারী, হাই উঠছে বারবার । মাথায় ঝিমঝিমুনি, তবু স্নায়ুগুলি এত টান টান স্পর্শকাতর যে সামান্য শব্দে, সামান্য অনুভূতিতে চমকে উঠছে । চটকা ভেঙে যাচ্ছে বারবার । সে কি কারো জন্য অপেক্ষা করছে মনে মনে ? কার জন্য ? একটু ভেবে দেখল রেমি । না তো ! সে কারো অপেক্ষা করছে না । কেউ তো আসার নেই । তবে ?

সন্ধের মুখে দরজায় ঠক ঠক। উঠতে ইচ্ছে করল না রেমির। শুধু জিঞ্জেরস করল, কে ? কী চাও ?

বউদিমণি, আপনার কি শরীর খারাপ লাগছে ?

না। তবে টায়ার্ড লাগছে। কেন ?

বড়বাবু জিঞ্জেরস করতে পাঠালেন।

বলো গিয়ে একটু পরে যাবো।

না গেলেও চলবে। বড়বাবু বেরিয়ে যাচ্ছেন। শুধু জানতে পাঠালেন।

আচ্ছা। বোলো আমি টায়ার্ড।

রেমি চুপ করে পড়ে রইল। তার স্বস্তির বড় বেশী বিচক্ষণ। আর বিচক্ষণ বলেই রাজা যখন এই ঘরে ছিল তখন বাইরে মোতায়েন রেখেছিলেন জগাকে। ঘটনাটা ছোটো, কিন্তু মনে থাকবে রেমির। এতটা না করলেও উনি পারতেন। হয়তো রেমির ভালর জন্যই করেন। তবু আজ ব্যাপারটা ভারী দৃষ্টিকটু লেগেছে রেমির। এই পাহারা অনাবশ্যক। এই বাড়ির সঙ্গে তার সম্পর্ক এখন ছিড়বার মুখে।

আস্তে আস্তে উঠল রেমি। উঠে আলমারি খুলল। ধুবর কয়েকটা প্রিয় বোতল লুকোনো থাকে ওপরের তাকে। জামাকাপড়ের পিছনে। কাঠের চেয়ারে উঠে রেমি একটা বোতল নামাল। গায়ে লেখা হুইসকি।

খুব নেশা হবে নাকি ? হোক। শরীরের কিছুনিটা তো কাটবে। এই ঘর থেকে আজ সে আর বেরোবে না। স্বস্তিরমশাই গন্ধ না পেলেই হল।

দরজায় ছিটকিনি দিয়ে এল রেমি। গেলাসে অল্প একটু ঢেলে অনেকখানি জল মেশালো। তারপর চুমুক দিল। এই প্রথম খাচ্ছে না। ধুবর পাল্লায় পড়ে অতীতে তাকে কয়েকবার এক-আধ চুমুক খেতে হয়েছে। স্বাদ তার চেনা। তরলটুকু শেষ করতে খুব একটা বেশী সময় নিল না সে। পরের বার একটু বেশী ঢালল, জল মেশাল কম।

কতটা খেয়েছে তা ঘণ্টা খানেক বাদে হিসেব করতে পারে না আর রেমি। তবে সে স্পষ্ট টের পাচ্ছে তার শরীর আর মাথা আর তার নিজের জিস্মায় নেই। কানে ঝিঝি পোকাকার ডাক। চারদিকটা কেমন যেন অবাস্তব, অবিশ্বাস্য। ভারসাম্য হারিয়ে ফেলছে।

চেয়ার থেকে উঠে বিছানায় বসল রেমি। পাশের টেবিলে অর্ধেক ভরা গেলাসটা রেখে একটু কাত হল। বোঁ করে ঘুরে উঠল মাথা। উলমল করছে শরীর। তার কি আনন্দ হচ্ছে ? খুব আনন্দ ! না তো !

কিছুক্ষণ ঝুম হয়ে পড়ে থাকে রেমি। ঘুম আসছে। ভারী রোডরোলারের মতো অতিকায় এক ঘুম তাকে বিছানায় পিষে ফেলছে। এবার সে ঘুমোবে। চাপটা হয়ে, হালকা হয়ে। নিশ্চিহ্ন এক ঘুমের নেই-রাজ্যে হারিয়ে যাবে।

দরজায় সামান্য নাড়া। রেমি উঠল না। চাইল না।

দরজাটা খোলো। ধুবর গলা।

রেমি একটু তাকাল। দরজাটা কি তার খুলে দেওয়া উচিত ? ঠিক যেন বুঝতে পারছে না। সে তো রোজ ধুবর জন্য দরজা খুলে দেয় না। তবে ? সে আবার চোখ বোজে।

দরজায় দুম দুম করে দুটো শব্দ হল। রেমি একটু হাসল মাত্র। উঠল না।

শুনছো ! ভিতরে কী করছে ? দরজাটা খুলে দাও।

রেমি একটা গভীর শ্বাস ছেড়ে পাশ ফিরল। মাথার মধ্যে কী অদ্ভুত এক রিমঝিম ! সমস্ত শরীরে একটা ভাসন্ত ভাব। যেন ভার নেই তার।

ধুবর গলায় স্বর হঠাৎ আতঙ্কিত একটা আর্তনাদের মতো শোনাল, রেমি ! রেমি ! সাড়া দাও।

কী হয়েছে তোমার ?

রেমি আধো ঘুমে খিল খিল করে হাসল। বেশ হয়েছে। খুব হয়েছে। এবার একটু রেমির জন্য কাঁদো তো, পাষণ একটু কাঁদো। জীবনে অন্তত একবার। মরার আগে দেখে যাই।

ধুব খুব দ্রুত পায়ে সরে গেল দরজার কাছ থেকে। তারপর উত্তেজিত স্বরে ডাকতে লাগল, জগাদা জগাদা শিগগির এসো। কুইক।

জগা দৌড়ে এল, টের পেল রেমি।

কী হয়েছে ?

দরজা ভাঙতে হবে।

কেন ?

মনে হচ্ছে রেমির খুব বিপদ ! তাড়াতাড়ি করো।

বুম করে বোমার মতো একটা আওয়াজ হল। দরজার ছিটকিনি ভেঙে পাল্লা দুটো ছিটকে গেল দুদিকে।

বউদিমণি ! কী হয়েছে ?

এত শব্দে রেমি দুহাতে কান ঢেকে ফেলেছিল। আস্তে মুখ ঘুরিয়ে জগার দিকে তাকাল সে। মাথা টলমল করছে, তবু বাস্তববুদ্ধি একেবারে হারায়নি। চোখটা বন্ধ করে বলল, তুমি যাও জগাদা। তোমার ছোড়দাকে পাঠিয়ে দাও। দরজাটা ভেজিয়ে যেও।

জগা একটু স্থির চোখে রেমি এবং ঘরের পরিবেশ লক্ষ করল। তারপর বেরিয়ে গিয়ে ধুবকে ডেকে বলল, ডাক্তার ডাকতে হবে না। তুমি ঘরে যাও।

কী হয়েছে ?

গিয়ে দেখ। খুব খারাপ কিছু নয়।

ধুব ঘরে আসে। দরজাটা ভেজিয়ে দেয়। ধীরে ধীরে রেমির কাছে এসে সেও সমস্তই লক্ষ করে। রেমি ভেবেছিল, ধুব খুব হাসবে, বিদ্রূপ করবে তাকে।

কিন্তু ধুব সেরকম কিছুই করল না। গলাসটা তুলে নিয়ে একটু দেখল। তারপর টেবিল থেকে বোতলটাও। রেমি মিটমিট করে চেয়ে দেখছিল।

ধুব গলাস আর বোতল রেখে রেমির দিকে চেয়ে বলল, উঠতে পারবে ?

কেন ?

বাথরুমে গিয়ে গলায় আঙুল দাও।

না।

দাও। নইলে কষ্ট পাবে। অনেকটা খেয়েছো।

আমি আরো খাবো।

ধুব আর কথা বলল না। খুব আচমকাই রেমিকে পাঁজাকোলা করে তুলে বাথরুমে নিয়ে গিয়ে বেসিনের সামনে দাঁড় করিয়ে বলল, গলায় আঙুল দাও।

আমি পারব না।

আচ্ছা, দাঁড়াও। বলে ধুব আচমকাই মাথাটা ধরে একটু নাড়া দিল। অমনি টলমল করে উঠল রেমির শরীর। বমি উঠতে লাগল বুক বেয়ে।

গলায় আঙুল দিতে হল না। ভাতসুদ্ধ গোটা তরলটা গলগল করে বেরিয়ে যেতে লাগল। সঙ্গে তীব্র স্বাদের টক স্বাদ। রেমি সেই বমির তোড় সহ্য করতে না পেরে পড়েই যেত হয়তো। কিন্তু ধুবর লোহার মতো শক্ত হাত ধরে রইল তাকে।

বমির পর কেমন দিশাহারা লাগছিল রেমির। শরীর শূন্য, মাথা শূন্য। ভারী অদ্ভুত এক পরিস্থিতি। সে যেন এই জগতের মানুষই নয়।

ধুব তাকে আবার কোলে তুলে ঘরে এনে খাটে শুইয়ে দিল। পাখা ঘুরতে লাগল বনবন করে। ফ্রিজ থেকে ঠাণ্ডা জল এনে তাকে অনেকখানি খাইয়ে দিল। তারপর অদূরে চেয়ারে বসে রইল চুপ করে।

প্রচণ্ড ঘুম পাচ্ছে রেমির। কিন্তু কিছুতেই ঘুমোতে পারছে না। কী যে হচ্ছে তার শরীরের মধ্যে। ধুব অনেকক্ষণ অবস্থাটা লক্ষ করে হঠাৎ জিজ্ঞেস করে, ঘুম আসছে না তোমার না। আমার গলা চিরে গেছে, মাথা ঘুরছে।

তবু ঘুমিয়ে পড়ার কথা। ঘুম আসছে না কেন?

তোমার জন্য। তুমি কেন ওভাবে তাকিয়ে আছো আমার দিকে

আমি বাইরে গেলে ঘুম পাবে

হ্যাঁ। তুমি যাও।

ধুব নিঃশব্দে উঠে বাইরে গিয়ে দরজাটা টেনে দিল। রেমি এপাশ ওপাশ করতে লাগল। মাথাটা কি লোহার মতো ভারী। না কি বেলনের মতো হালকা। কী যে হচ্ছে তার ভিতরে। আচমকা উঠে বসল সে। তারপর ডাকল, শোন! ওগো! এই! শোনো! না শিগগির! ধুব দরজা সোঁলে ঘরের মধ্যে এসে দাঁড়াল। দরজাটা ভেজিয়ে দিল আবার।

ডাকছো কেন?

আমি বসে চলে যাচ্ছি, জানো। খুব ব্যাকুলভাবে রেমি বলে।

জানলাম। ধুবর কণ্ঠস্বর ভাবলেশহীন।

কার সঙ্গে জানো?

না তো।

রাজার সঙ্গে।

তাই নাকি?

ভাল হবে না?

ভালই তো।

যেতে দেবে আমাকে?

আমি যেতে দেওয়ার কে? তুমিই তো যাবে।

আঃ, বলোই না যেতে দেবে কি না।

দেবো।

সত্যি বলছ?

বলছি।

তোমার একটুও কষ্ট হবে না আমার জন্য?

এখন ঘুমোও।

ঘুম আসছে না যে।

চেষ্টা করো। আমি বাইরে যাচ্ছি।

তাহলে আমি আবার ছুইসকি খাবো।

ধুব সামান্য একটু হাসল। তারপর বলল, ভয় দেখাচ্ছে?

না তো! আমি খাবো।

খাবে তো কী হয়েছে? অনেকেই খায়। মেয়েরা আজকাল খুব টানছে।

আমি কি তাদের মতো?

হয়ে যাবে। ধীরে ধীরে হয়ে যাবে। তবে একদিনে অত নয়।

বসেতে গিয়ে আমরা কী করব জানো?

না।

তুমি যা চেয়েছিলে তাই।

খুব ভালো।

তোমার কিছু যাবে আসবে না

না। বরং খুশি হবে।

রেমি ধুবর মনোভাব জানে। তবু কেমন যেন এই জবাবে সে অবাক হয়ে গেল। বলল, একটা কথা বলবে?

বলব না কেন?

আমার ওপর তোমার এত ঘেন্না কেন? এত ঘেন্না কি একজন মানুষকে আর একজন করতে পারে

তোমাকে কখনো ঘেন্না করিনি।

করোনি? তাহলে আমি অন্য একজনের সঙ্গে চলে যাবো জেনেও খুশি হও কী করে?

বলেছি তো, আমি তোমাকে ঘেন্না করি না, কিন্তু তোমার দায়িত্ব চিরকাল বইতেও রাজি নই। বিয়ে করার জন্য পুরুষের এক ধরনের যোগ্যতা লাগে। আমার তা নেই।

তবু বিয়ে তো হয়েছে

না, হয়নি। এটা বিয়ে নয়। চাপিয়ে দেওয়া।

তুমি আমাকে ঘেন্না করো।

না, করি না। কখনো করিনি।

আমাকে তুমি কখনো একটুও ভালবাসোনি!

তাও বাসিনি। ঠিক কথা। কিন্তু আজ নতুন করে এসব কথা কেন? এখন ঘুমোও।

ঘুম কি আসে! কত চিন্তা।

কিসের চিন্তা? জীবনটাকে খেলা হিসেবে নাও। আয়ু কতদিনেরই বা। সব ঠিক হয়ে যাবে।

বসে ভাল শহর।

আজ রাজা এসেছিল।

জানি।

কী করে জানলে? তোমরা কি সবসময়ে বাড়ির বউঝিদের পিছনে স্পাই লাগিয়ে রাখো?

আমি রাখি না। তবে তোমার গবুচন্দ্র রাখেন।

কে গবুচন্দ্র?

মন্ত্রী গবু, তোমার স্বশুর।

উনি তো আর মন্ত্রী নন।

না। তবে শোনা যাচ্ছে উনি সেনট্রাল মিনিস্টার হবেন। ডেপুটি মন্ত্রী-টম্রী বোধহয়। ফেরেববাজ লোকদের পথ এ সমাজে সবসময়ে খোলা।

ফেরেববাজ কাকে বলে?

তোমার স্বশুরের মতো লোকেরাই ফেরেববাজ। অন্য ডেফিনিশনের দরকার কী?

ওঁর ওপর তোমার রাগ বলেই কি আমাকে যন্ত্রণা দাও এত?

হতে পারে। এখন আমি এত কথা বলতে পারছি না রেমি। তুমি ঘুমোও। আমি বরং বাতিটা নিবিয়ে দিয়ে যাই।

না, না! আঁতকে উঠে রেমি বলে, বাতি নিবিও না। তাহলে আমি ভয়েই মরে যাবো।

বাতি চোখে লাগছে বলেই বোধহয় ঘুম আসছে না।

ঘুম আসবে। তুমি কাছে থাকো।

এই তো একটু আগে আমাকে চলে যেতে বললে ।

তখন বুঝতে পারিনি ।

কী বুঝতে পারেনি ?

তোমাকে যে আমার ভীষণ দরকার ।

কিসের দরকার ?

আমি একজনকে একবার দেখতে চাই । দেখাবে ?

ধ্রুব অবাক হয়ে বলে, কাকে দেখাবো ?

তাকে ।

সে কে বলবে তো !

যাকে তুমি ভালবাসো । আমি চলে গেলে যাকে বিয়ে করবে । একবার চোখের দেখা দেখব ।

কিছু বলব না । ভয় নেই ।

এ কথায় ধ্রুবর ফর্সা রং টকটকে রাঙা হয়ে গেল । প্রথমটায় সে কিছু বলতে পারল না ।

অনেকক্ষণ চুপ করে থেকে বলল, ঘুমোও ।

বারবার ঘুমোতে বলছ কেন ? বললাম যে ঘুম আসছে না । যদি ঘুম পাড়াতে চাও তবে একটু বিষটিষ কিছু এনে দাও । একেবারে ঘুমিয়ে পড়ি ।

তাহলে জেগে শুয়ে থাকো । আমি যাই

তুমি যেও না । বেশীদিন তো আর নয় । আমি বন্ধে চলে যাচ্ছি । একটু থাকো

তুমি বড্ড বাজে বকছ ।

খুব বাজে বকছি ? কথাটা সত্যি নয় ?

আমি কাউকে বিয়ে করব একথা সত্যি নয় ।

তবে কী করবে ?

আমি বিয়ে ব্যাপারটাকে বিশ্বাসই করি না ।

তবে কিসে করো ?

ওটা একটা ছেলোমানুষী প্রথা । মানেই হয় না ।

তুমি তাকে বিয়ে করবে না ?

না ।

তবে একসঙ্গে থাকবে কী করে ?

থাকলে দোষ কী ? দুনিয়াটা তো বিয়েহীন সমাজের দিকেই এগোচ্ছে ।

কী যে বলো !

তোমার বুঝতে একটু সময় লাগবে রেমি । বিয়ে একটা অচলায়তন । ওই প্রথা উঠে গেলেই ভাল ।

আমি অত তর্ক করতে পারি না আমি তাকে একবার দেখব ।

এসব তোমাকে কে বলল রাজা নিশ্চয়ই ।

রাজাই ।

বলাটা ওর উচিত হয়নি ।

কেন, আমি শকড হবো বলে

হ্যাঁ । তুমি আমার ওপর বড় বেশী নির্ভর করতে চাও

কিন্তু আমি সামলে গোছি দেখছো না, কেমন স্বাভাবিক

স্বাভাবিক হলে অতখানি হুইসকি গিলে বসে থাকতে না ।

রেমি মাথা নেড়ে বলে, এসব ভেবে খাইনি । আমার ঘুম আসছিল না, শরীরটা কেমন করছিল,

তাই খেয়েছি। আমাকে একবার দেখাতে তোমার ভয় কী ?

আমি কাউকে ভয় পাই না।

জানি। মেয়েটা কে বলো তো !

কেউ একজন হবে। অত ভাবছো কেন ?

আমার চেয়ে ফর্সা ?

জানি না।

জানো। বলতে চাও না। বললে দোষ কী ? এই তো বললে ভয় পাও না।

তোমার চেয়ে ফর্সা নয়।

কেমন দেখতে ?

এইসব ভেবেই বোধহয় তোমার ঘুম আসছে না ?

মেয়েটাকে কবে দেখাবে গো ?

দেখলে কি খুশি হবে ?

খুশি কি হওয়া যায় ?

তাহলে দেখতে চাইছো কেন ?

আমার বর কেমন পাত্রী পছন্দ করল, সে আমার চেয়ে কত গুণ সুন্দর এসব জানার কৌতূহল হয় না ?

রেমি, ব্যাপারটা খুব সরল অঙ্ক নয়। তুমি বোকা, ঠিক বুঝবেও না। তবে জেনে রেখো, এখনো খুব চৌধুরী মেয়েবাজ নয়।

তাই কি বলেছি !

তবে অত জেলাস কেন ?

জেলাসি বোধহয় আমার একটু হওয়ার কথা !

কেন হবে ? তুমিও তো অন্য একজনের সঙ্গে বসে ঘর বাঁধতে যাচ্ছে।

ঘর ভাঙতেই যাচ্ছি। কিন্তু সে তো তোমার জন্যই। আমি কি যেতে চেয়েছি ?

কিন্তু যখন যাচ্ছে তখন সর্বাঙ্গকরণেই যাও। পিছুটান রেখো না।

তোমাকেও একটা কথা বলি ?

আবার কী কথা ?

যাকে নিয়ে থাকবে বলে ঠিক করেছো তাকে একটু ভালবেসো, একটু মূল্য দিও। আমার মতো হেলাফেলা কোরো না।

উপদেশের জন্য ধন্যবাদ। তবে সে তোমার মতো ছিচকাঁদুনে নয়। আমি কেমন সে জানে। তাই সে বেশী একসপেকটও করে না।

লিবারেটেড মহিলা নাকি ?

ধরো তাই।

রেমি একটু ভেবে বলে, তোমার সঙ্গে এরকমই কাউকে মানাবে।

খুব একটু হেসে বলে, তাহলে পাত্রী পছন্দ !

আগে একবার চোখের দেখা দেখি।

খুব আচমকা কাছে এসে দুহাতে রেমিকে ধরে তুলল। মুখোমুখি দাঁড়িয়ে বলল, তুমি আমাকে ভালবাসো আমি জানি। একটা কাজ করতে পারো ? ফর মাই সেক ?

রেমির শরীর এই আকস্মিক স্পর্শে ঝংকার দিয়ে উঠল। ভিতরে ভিতরে মৃদু বিদ্যুতের তরঙ্গ বয়ে যাচ্ছে। বিহ্বল হতভম্ব চোখে সে খুবর মুখের দিকে কিছুক্ষণ বাক্যহারা চেয়ে রইল। তার ভিতরে একটি প্রার্থনা নীরবে মাথা কুটছিল। আমাকে জড়িয়ে ধরো, ভীষণ জোরে। এত জোরে



যেন শ্বাস বন্ধ হয়ে যায়। যেন ভেঙে গুঁড়িয়ে যাই আমি।

শ্বলিত কণ্ঠে সে জিজ্ঞেস করল, কী গো? তোমার জন্য আমি সব পারি।

আমাকে ডিভোর্স দাও। ক্লিন ডিভোর্স।

তারপর?

কিছুদিন বাপের বাড়ি গিয়ে থাকো।

তারপর?

তারপর আমি তোমাকে নিয়ে কোথাও একসঙ্গে থাকব। কিন্তু স্বামী-স্ত্রী হিসেবে নয়।

একটুও না ভেবে রেমি ধুবর বৃকের মধ্যে মাথাখানা ক্লান্তভাবে রেখে বলল, যা বলবে করব, যদি তাতে ভাল হয়।

ভালর জন্য নয় রেমি। আমি প্রথা ভাঙতে চাই।

কেন যে তুমি এরকম পাগল!

তুমি বসে যেও না রেমি। পারবে না।

কে যেতে চেয়েছে?

গেলেও তুমি সহ্য করতে পারবে না বেশীদিন। আমি তোমাকে জানি।

রেমি মুখ তুলল। ধুব তার সুন্দর টুলটুলে মুখখানার দিকে চেয়ে রইল কিছুক্ষণ। তারপর যা সে কদাচিৎ করে তাই করল আজ। খুব নিবিড়ভাবে চুমু খেল রেমিকে। বিছানায় তারা যখন ঘনিষ্ঠ হচ্ছিল তখন ধুব বলল, আর হুইসকি খেও না।

রেমি বলল, মেয়েটাকে দেখাবে তো! ঠিক?

## ॥ ৫৭ ॥

এরকম বৃষ্টির রূপ এক সময়ে ছেলেবেলায় দেখেছিল চপলা। বহুকাল আর দিগদিগন্তব্যাপী পাগল হাওয়ায় বয়ে আসা গভীর বিরামহীন বৃষ্টিপাত দেখেনি সে। সারাদিন কেবল জলের শব্দ। উষ্টোপাশ্চাৎ জলের শব্দ। পুকুর ছাপিয়ে জল ঢেকে ফেলেছে বাগান, উঠান, বারবাড়ির মাঠ। ব্রহ্মপুত্রের চেহারা দেখে শিউরে উঠতে হয়। সুড়কির রাস্তার প্রায় সমান সমান উঠে এসেছে ব্রহ্মপুত্রের স্রোত, ওপাড়ে শত্ৰুগঞ্জে কোনো ডাঙাজমি দেখা যায় না। স্রোত চলেছে দ্রুতগামী রেলগাড়ির মতো, বাগানের গাছপালা অনেকগুলোই শুয়ে পড়েছে প্রবল বৃষ্টির দাপটে। শুধু বারবাড়ির দুটো কদম গাছ ভরে গেছে ন্যাড়ামাথা ফুলে।

সারাদিন যা কিছু ছোঁয়া যায় তাই যেন ভেজা, স্যাঁতা, মিয়োনো। না-শুকোনো ভেজা জামাকাপড়ের সৌদা গন্ধ আসে বারান্দা থেকে। বাতাসটা পর্যন্ত জলে ভরা। দিন-রাত চারদিক থেকে হাজারো ব্যাঙের ডাক শোনা যায়। এই ডাকটি সহ্য করতে পারে না চপলা। কেমন যেন বৃকের মধ্যে খাঁ খাঁ করতে থাকে।

আজকাল চপলার বৃকের ভিতরেই যত যন্ত্রণা। এই যন্ত্রণার কোনো ব্যাখ্যা নেই। কেমন উদাস লাগে, সারাদিন যেন এক ভারহীন শরীরে সে হাঁটে চলে শোয়।

চপলা আজ স্নান করেনি, প্রথম বর্ষার কাঁচা জলে তার ঠাণ্ডা লেগেছে। শরীরে একটু জ্বোরে ভাব। একটু শীত জড়িয়ে আছে হাতে পায়ে। দুপুরে খাওয়ার পর ছেলে মেয়ে নিয়ে মশারির মধ্যে শুয়ে ছিল সে। বাচ্চা দুটো ঘুমিয়ে পড়েছে, চপলার আজকাল খুব সহজে ঘুম আসতে চায় না। এপাশ ওপাশ করে শরীরে ব্যথা হয়ে গেল।

বৃষ্টির তোড়টা কিছু কমেছে। চপলা উঠে বারান্দায় এসে এলোচুলের রাশিতে আঙুল চালিয়ে জট

ছাড়াতে লাগল। বাতাস কমেছে, বৃষ্টিও অনেক কম। তবে এটা সাময়িক। ঘণ্টা খানেক বাদেই হয়তো আবার এক পরত মেঘ চলে আসবে। বিভীষণ বৃষ্টি নামবে তার পর। কয়েকদিন যাবৎ এরকমই হচ্ছে।

চপলা একটা হাই তুলল, এখানে থাকতে তার যে ভাল লাগছে তা নয়। আজকাল এ বাড়ির চাকর-বাকর আর কৃষ্ণকান্ত ছাড়া কেউই তার সঙ্গে বড় একটা কথা বলে না। কেন বলে না তার কারণটা বড্ড স্পষ্ট। বড্ড নির্লজ্জ।

কিন্তু এরা কি জানে সেই কুমারী বয়স থেকে যে পিপাসা তার বুকের মধ্যে ছিল তা আজও রয়ে গেছে। কনককান্তি সে পিপাসা মেটাতে পারেনি। সে সাধ্যই তার নেই। সেই আকর্ষ পিপাসা নিয়ে যৌবনের এই দামাল দিন পার হচ্ছে সে। কিন্তু পার হওয়া কি সোজা?

শচীন কালও এসেছিল। ভারী উদ্ব্রান্ত সে। একটু রোগা হয়ে গেছে। চোখের দৃষ্টিতে ক্ষাপামির ভাব। একটা ওলট-পালট কিছু করে ফেলতে চায়। চপলার বয়স শচীনের চেয়ে কম, সে উকিলও নয়। তবু অভিজ্ঞতা তার অনেক বেশী। সে জানে, পুরুষের ভালবাসা হল গড়ানে জমি, সেখানে জল দাঁড়ায় না।

তা ছাড়া ছুট করে কিছু করলেই তো হল না। পায়ের নিচে শক্ত জমি না থাকলে প্রেম-ট্রেম সব দু'দিনেই ভেসে যাবে। চপলা তাই অনেক করে বুঝিয়েছে কাল শচীনকে, এখুনি কিছু করে বসবেন না, মীজ। আর একটু সময় নিন।

কিসের সময়? আমি যে পাগল হয়ে যাবো!

পাগল হতেই তো বারণ করছি।

বারণ করলেই কি হল!

মীজ! ওরকম করলে আমি কিন্তু চলে যাবো।

যান না। আমি পিছু নিতে জানি।

সে তো বুঝতে পারছি। পিছু নিলে যোলো কলা পূর্ণ হবে। কিন্তু আমি সবদিক ভেবেচিন্তে এগোতে চাই। আপনি পাগলামি করবেন না।

শচীনের চেহারাযে যে ক্ষাপামির ছাপ পড়েছে সেটা কি প্রেমিক পুরুষের লক্ষণ? ঠিক বুঝতে পারছিল না চপলা, তবে একজন পুরুষ মানুষের ভিতরে যে এতটা ওলট-পালট সম্ভব এটা তার ধারণায় ছিল না। কাল শচীনকে দেখে কেন যেন তার একটু ভয় হল। একটা ঝড় সে তুলেছে কিন্তু সামাল দিতে পারবে তো? পুরুষরা যখন এরকম আমূল উন্মাদ হয়ে ওঠে তখন কি সব লণ্ডভণ্ড করে দেয়? যদি দেয় তবে চপলা কী করবে?

চপলার শরীর সম্পর্কে শুচিবায়ু কেটে গিয়েছিল কৈশোরেই, যৌন সংসর্গ ঘটেনি ঠিকই, তবে স্পর্শদোষ ঘটেছিল। আজও তেমন শুচিবায়ু নেই। কিন্তু সংস্কার কাজ করে। কনককান্তির প্রতি তার বিরাগ নেই, অনুরাগও নেই। আছে থাক না, এরকম মনোভাব। শচীনের প্রতিও যে সে কোনো বাঁধন-ছেঁড়া আকর্ষণ অনুভব করে তাও নয়। সে শচীনকে অন্যরকমভাবে চেয়েছিল। একজন রূপমুগ্ধ ভক্ত। অটেল প্রশংসাবাক্য, চাটুকারিতা আর মুগ্ধ দৃষ্টি দিয়ে প্রতিদিন বিধৌত করে দেবে তাকে। কিন্তু খুব কাছে আসবে না, অন্তত সে রকম সাহস হবে না। চপলাও দাক্ষিণ্য দেখাবে বৈ কি। কখনো-সখনো দু-একটা স্তোক, একটু-আধটু দৃষ্টির প্রসাদ, সামান্য হাসির দাক্ষিণ্য। সেটুকু নিয়েই সন্তুষ্ট থাকবে। সে ক্ষেত্রে বিশাখার বর হলেও শচীনের সঙ্গে তার নির্দোষ অথচ গোপন একটা ইঙ্গিতময় সম্পর্ক থেকে যেত

কিন্তু তা হল না। হিসেবে ভুল হয়েছিল চপলার। শচীনকে সে ঠিকমতো জরিপ করে নেয়নি। যতটা নিরীহ, ভীতু আর ঠাণ্ডা মাথার মানুষ বলে মনে হয়েছিল ততটা শচীন নয়। তার ভিতরটা আগ্নেয়গিরির মতো টগবগ করে ফুটছে। চপলা সেই আঁচ টের পাচ্ছে আজকাল। শচীন যদি এতটা

উন্নত না হত তাহলে তাদের মধ্যে এত তাড়াতাড়ি, এত অল্প সময়ের মধ্যে এরকম অবৈধ প্রণয় ঘটে উঠত না ।

এখন চপলা কী করবে তা বুঝতে পারছে না । কিছুতেই বুঝতে পারছে না । চৌকাঠের বাইরে পা বাড়ালেই ফেরার দরজা বন্ধ হয়ে যাবে । আর ফিরতে কি কোনোদিন ইচ্ছে করবে না চপলার ? সে মেয়েমানুষ । চিরকাল মেয়েমানুষেরা নিরাপদ ঘরের আশ্রয়, পুরুষের ছায়ায় নিরাপত্তা খুঁজে এসেছে । সেও তো ব্যতিক্রম নয় ।

বষ্টির ইলশেণ্ডি ছাট আসছিল, তবু রেলিঙে ভর দিয়ে দাঁড়াল চপলা । ঠাণ্ডা বাতাসের ঝাপটায় শরীর শিরশির করছে । সূতীর চাদরটা ভাল করে গায়ে জড়িয়ে নেয় সে । ভেজা রেলিং হাতে হ্যাঁক করে শীতল শিহরন তোলে ।

কিছুক্ষণ দাঁড়িয়ে জলের চাদরে ঢাকা বাগানটা দেখে সে । কিন্তু ভিতরে কোনো প্রতিক্রিয়া হয় না ।

চপলা আস্তে আস্তে বারান্দা ধরে এগোলো । আজকাল বিশাখা আলাদা ঘরে থাকে । কৃষ্ণকান্তও আলাদা ঘরে । কৃষ্ণকান্ত আজকাল ধ্যানট্যান করে ।

বিশাখার ঘরের ভেজানো দরজার বাইরে চোরের মতো এসে দাঁড়ায় চপলা । মেয়েটা বড় সুন্দরী, কিন্তু সে রকমই সাজঘাতিক মুখেরা আর অহংকারী । শতীনের সঙ্গে চপলার নতুন সম্পর্কটা তৈরি হওয়ার পর থেকে কিছু বিশাখার আর সেই তেজ নেই । ওর চোখের কোলে আজকাল প্রায় সবসময়েই জলের দাগ লক্ষ করা যায় । সারাদিন নিজের ঘরেই বসে থাকে । বেশীরভাগ সময়ে দরজা বন্ধ । হয়তো ঘরে বসে কাঁদে, ভাবে । ইদানীং বিশাখাও ভারী রোগা হয়ে গেছে ।

চপলা দরজাটা খুব সামান্য ঠেলল । খুলল না । পুরোনো পুরুঁকাঠের দরজা । সহজে খোলার নয় । খড়খড়ি সামান্য একটু তুলে ভিতরটা দেখতে চেষ্টা করল চপলা ।

ঘরটা আধো অন্ধকার । তবে উত্তর দিককার একটা জানালা খোলা । সেটা দিয়ে মেঘলা আকাশের একটু ফ্যাকাসে আলো এসেছে ঘরে ।

সেই জানালায় চূপ করে পাথরের মূর্তির মতো দাঁড়িয়ে আছে বিশাখা । শরীর যেন প্রাণহীন, স্পন্দনহীন, সংজ্ঞাহীন ।

চপলা অনেকক্ষণ চেয়ে রইল । কিন্তু বিশাখা একটুও নড়ল না । এক চুলও না । শুধু এলানো চুল বাতাসে পিঠময় গড়িয়ে যাচ্ছে ।

দৃশ্যটা দেখে কয়েকদিন আগে চপলার এক ধরনের হিংস্র আনন্দ হতে পারত । আজ হল না । আজ সামান্য একটু মোচড় দিল বৃকের মধ্যে । মেয়েটা অহংকারী, মেয়েটা ঝগড়াটে, সন্দেহ নেই কিন্তু এখন যে ওর এই বোবা একটা ভাব, ওই যে পাথর হয়ে যাওয়ার মতো ভঙ্গি, এটা যেন ওর যথার্থ পাওনা নয় । শতীনের প্রতিশোধ কতটা সাজঘাতিক হতে পারে এটা বোধ হয় বোকা মেয়েটা আগে বুঝতেও পারেনি ।

চপলা হঠাৎ দরজাটা ধরে টানল । বেশ জোরে । পাল্লা দুটো খটাং শব্দে খুলে গেল । খুব আস্তে মুখটা ফেরাল বিশাখা । দুটো বড় বড় চোখে নিস্পলক দৃষ্টি । কিন্তু বিস্ময় নয় । কেমন শূন্য ।

চপলা ঘরে ঢুকে দরজাটা আটকে দিল ।

তোর সঙ্গে কথা আছে ।

বিশাখা খানিকক্ষণ চেয়ে থেকে, যেন কষ্টে চিনতে পারল চপলাকে । কিন্তু নড়ল না । ওখান থেকেই বলল, তুমি এখন যাও বড় বউদি, আমার কিছু ভাল লাগছে না ।

চপলা কথাটা গায়ে মাখল না । তারও মনের অবস্থা এমন যে, ছোটোখাটো অপমান তার গায়ে লাগে না আজকাল । অনেক সময়ে বুঝতেই পারে না, কোনটা অপমান, কোনটা নয় ।

চপলা বিশাখার পাশে গিয়ে দাঁড়ায় । জানালা দিয়ে উত্তরে নদীর প্রলয়ঙ্করী চেহারার দিকে চেয়ে

থাকে কিছুক্ষণ । বিশাখা যেন বা চপলার ছোঁয়াচ বাঁচাতেই একটু সরে যায় ।

চপলা চাপা গলায় বলে, তোর কী হয়েছে ?

কিছু নয় । তুমি যাও ।

শোন, তাড়িয়ে দিস না । আমার সত্যিই কথা আছে ।

আমি কিছু শুনতে চাই না । বিশাখা মাথা নেড়ে বলল । কিন্তু তার গলায় রাগের ঝাঁঝ নেই । দুটো বড় বড় চোখ হঠাৎ টলটল করে ভরে উঠল জলে ।

চপলা খুব দ্রুত চাপা গলায় বলে, আমি না হয় খারাপ । খুব খারাপ । আমার চরিত্র ধরলাম ভীষণ নোংরা ।

ও সব বলছ কেন ? বোলো না । পায়ে পড়ি । ও সব থাক ।

শোন বিশাখা, শোন ।

না । বলে বিশাখা দু হাতে কান চাপা দিয়ে বলে, ও সব শুনতে চাই না ।

কেমন একটা মরীয়া আবেগে চপলা হঠাৎ হাত বাড়িয়ে বিশাখার দু হাত চেপে ধরে রুদ্ধ গলায় বলল, শোন, শোনাটা ভীষণ দরকার ।

বিশাখার দুচোখ দিয়ে টপ টপ করে জল পড়ছিল । ঠোট কাঁপছে । তারপরই হঠাৎ শব্দ করে কঁদে ওঠে সে । মাথা নেড়ে বলে, কেন এরকম করলে বউদি ? কেন এরকম হয়ে গেলে ? কৃষ্ণ যে তোমাকে মায়ের মতো ভালবাসে

এ কথায় চপলা কেমন যেন বিকল হয়ে যায় । কৃষ্ণ ! কৃষ্ণ তার দেওর । ছোটো, এখনো অবুঝ । এই বালক দেওরটিকে কেন যে সে এত ভালবাসে । শুধু ভালবাসা নয়, কৃষ্ণর মধ্যে এক অদ্ভুত সম্মোহনকারী আকর্ষণ আছে । মনে হয় একদিন ছেলেটা মস্ত কিছু হয়ে উঠবে । তাই ভালবাসার সঙ্গে কৃষ্ণর প্রতি একটা শ্রদ্ধার ভাবও আছে চপলার । কিন্তু কৃষ্ণর কথাটা হঠাৎ বিশাখা কেন তুলল তা সে বুঝল না ।

চপলা বিশাখার হাত দুটো ছেড়ে দিয়ে বলে, শচীনকে তো তুই দু চোখে দেখতে পারিস না ।

বিশাখা দু হাতে মুখ ঢেকে কাঁদতে লাগল । জবাব দিল না ।

চপলা ফের জিজ্ঞেস করল, তাহলে তোর এই অবস্থা কেন ?

বিশাখা জবাব দিল না এ কথারও ।

চপলা বলল, আমি খারাপ তো বলছিই । আমার খারাপ হওয়ার কারণ আছে । তুই বুঝবি না । নিজের দোষ আমি ঢাকতেও চাই না । কিন্তু আমি জানতে চাই, তোর কী হল ? তুই কেন এরকম করছিস ?

জবাব দেওয়ার মতো অবস্থা বিশাখার নয় । সে দৌড়ে গিয়ে বিছানায় উপুড় হয়ে পড়ল । তার পর কান্নার বাঁধ ভেঙে দিল ।

অনেকক্ষণ চুপ করে দৃশ্যাটা দেখল চপলা । কিন্তু আর বিশাখার কাছে যাওয়ার উৎসাহ বোধ করল না ।

ঘর থেকে বেরিয়ে এসে দরজাটা ভেজিয়ে দিল সে ।

ধীরে ধীরে কিন্তু মোটামুটি দৃঢ় পদক্ষেপে হেঁটে সে হেমকান্তর ঘরের সামনে এল ।

হেমকান্তর দিবানিদ্রা নেই বড় একটা । ইজিচেয়ারে আধশোয়া হয়ে রবীন্দ্রনাথের একখানা বই পড়ছেন ।

চপলা ডাকল, বাবা

হেমকান্ত কিছু বিস্মিত চোখ তুলে বললেন, বলো ।

আমি কাল কলকাতা যেতে চাই । ব্যবস্থা করে দিতে পারবেন ?

হেমকান্ত নড়েচড়ে সোজা হয়ে বসে বললেন, কালই যেতে চাও ? কিন্তু দিনটা দেখতে হবে ।

পুরুতমশাইকে খবর পাঠিয়ে পাঁজিটা দেখতে বলে দাও তো ।

পাঁজি দেখতে হবে না বাবা । কাল দিন শুভ । আমি জানি ।

দেখেছো ?

দেখেছি । আপনি শুধু একজন কাউকে সঙ্গী দিলেই হবে ।

তার আর ভাবনা কি ? খাজাঞ্জিমশাই যেতে পারবেন ।

ভাল । আর একটা কথা বাবা, আমি যে কাল যাচ্ছি সেটা যেন গোপন থাকে ।

কেন বলো তো !

কথাটার জবাব চপলা ভেবে আসেনি । হেমকান্ত এরকম প্রশ্ন করবেন বলে আশাও করেনি । সে তাই কথাটা ঘুরিয়ে দেওয়ার জন্য বলল, আপনার ছেলেকে একটা টেলিগ্রাম করে দিলে ভাল হয় । স্টেশনে থাকতে পারবে ।

সে তো ঠিক কথা । দেওয়া যাবে । তুমি গিয়ে গোছগাছ করো ।

চপলা ধীরে ধীরে নিজের ঘরে ফিরে আসে । বুকটা কেমন করছে । বুকটা ভেঙে গুঁড়িয়ে যাচ্ছে একটা পাষণ্ডভারে ।

ছেলে মেয়ে দুজন একে একে ঘুম থেকে উঠল । তাদের যান্ত্রিকভাবে সাজিয়ে দিল চপলা । খাইয়ে খেলতে পাঠাল ছাদের ঘরে । বিকেল পেরিয়ে সন্ধ্যা হল ।

চপলা এ সময়ে একবার কাছারির দিকে ঊঁকিঝুঁকি দেয় রোজ । আজ দিল না । শচীনকে জন্য জলখাবার পাঠানো আজকাল তারই কাজ । কিন্তু সে উঠল না । দাসীরা যা ভাল বুঝবে সাজিয়ে দেবে ।

অন্ধকার ঘরে সেজ জ্বালিয়ে দিয়ে গেছে একজন চাকর । বাতিটা কমিয়ে মশার শব্দের মধ্যে চেয়ারে চুপচাপ বসে থাকে চপলা । বাইরে বৃষ্টির জোর বাড়ছে । বাদলা বাতাস হঠাৎ ঘরে ঢুকে চারদিকের জিনিসপত্রে একটা শব্দ তুলে চলে গেল । সেজবাতি লাফিয়ে চিমনিতে কালি ফেলতে লাগল । দরজা বন্ধ করতে উঠল না চপলা ।

সন্ধ্যা পার হওয়ার মুখেই বোধ হয় আচমকা দরজায় শচীনের লম্বা ফর্সা চেহারাখানা দেখে একটু চমকে উঠেছিল চপলা ।

এত সাহস শচীন! কোনোদিন করেনি ! তাদের দেখা হয় নিচের তলায় পিছন দিককার একটা ঘরে । দোতলা অন্দরমহল । এখানে যার-তার উঠে আসবার অধিকার নেই ।

চপলা বুঝল, শচীন এখন সত্যিই পাগল ।

শচীন জিজ্ঞেস করল, আজ দেখা নেই কেন ? এতক্ষণ নিচে অপেক্ষা করলাম ।

আজ আমার শরীর ভাল নেই ।

কী হয়েছে ?

জ্বর ।

জ্বর ! তাতে কী ? একটা খবরও তো পাঠানো যেত

আমার জ্বর তাতে আপনাকে খবর দেবো কেন ? আপনি তো ডাক্তার নন । উকিল ।

ওটা আবার কেমন কথা চপলা ? বলে শচীন ঘরে ঢুকল । দু পা এগিয়ে এসে বলল, আজ কি মুড ভাল নেই ?

চপলা শচীনের দিকে চেয়ে বলল, আপনার সত্যিই মাথার ঠিক নেই ।

কেন বলো তো !

দোতলায় উঠে এসেছেন ! লোকে কী ভাববে ?

ভাবুক না । ভাবুক, বলুক । আমার কিছু যায় আসে না ।

যায় আসে না কেন ?

দিন কয়েক মাথার সতিই ঠিক ছিল না রেমির। তার সামান্য মাথা কতই বা বইতে পারে? কিন্তু সেই কয়েকটা দিন ধুব ছিল অস্বাভাবিক রকমের স্বাভাবিক। এক ফোঁটা মদ খায়নি। অফিসে যায়নি। বলতে গেলে সারাক্ষণই বাড়িতে থেকেছে। পিছন দিকে সামান্য একটু জমি আছে। সেখানে কোনোকালে ফুলগাছ লাগানো হত। আজকাল হয় না। ধুব হঠাৎ সেই পতিত জমি উদ্ধারে মন দিল কয়েকদিন। মাটি খুঁড়ে সার দিয়ে কয়েকটা গাছ লাগাল।

আর রেমি তখন ঘর-বন্দী হয়ে কখনো হাসে, কখনো কাঁদে, কখনো চুপ করে বসে থাকে। কী ভাবে তা সে নিজেও ভাল বুঝতে পারে না। কোনো বিষয়ে আগাগোড়া কিছুই চিন্তা করতে পারে না সে। কখনো এটা নিয়ে এক টুকরো ভাবে, কখনো আর একটা নিয়ে আর এক টুকরো ভাবে। মাথার ভিতর দিয়ে খণ্ড মেঘের মতো চিন্তা ভেসে যায়। কোনোটাই থামে না, আকাশ ভরে ওঠে না, ঘটে না বৃষ্টিপাত। ধুবর প্রেমিকার কথা ভাবে একটু, তক্ষুনি রাজার মুখ মনে পড়ে যায়, কৃষ্ণকান্তর জন্য ভাবনা হতে থাকে হঠাৎ, তারপর না-হওয়া একটা বাচ্চার অশ্রুত কান্নার শব্দ কানে আসে তার। সমীর! হ্যাঁ, সমীরকেও তার মনে পড়ে। জলঢাকা যাওয়ার পথে সমীরের সেই তার কাছে আত্মবিসর্জন! সবচেয়ে বেশী, সবচেয়ে গভীরভাবে সে যার কথা ভাবে তার মতো শব্দ তার দ্বিতীয় নেই। ধুব

ধুব তাকে লক্ষ করে, কিন্তু বেশী কথা বলে না। একটু গম্ভীর দেখায় ওকে আজকাল। কিন্তু ধুব লক্ষ করে তাকে। বিয়ের পর এতকালের মধ্যে এমন করে রেমিকে লক্ষ করেনি সে আগে।

কিন্তু ধুবর সেই চোখের ভিতরে কী আছে তা টের পায় না রেমি। ভিতরে ভিতরে একটা বাঁধ কেটে যাচ্ছে তার। যে আবেগটা ধুব নামে এক সীমানায় আবদ্ধ ছিল এতকাল তা আর নেই। ধুবর প্রেমিকা আছে। তারও আছে রাজা। তারা তো এখন আর শুধু পরস্পরের নয়। কোথায় কী করে যেন একে অন্যের দাবি একটু করে হারিয়ে ফেলেছে।

কিন্তু রাগ করে না রেমি। অভিমানও হয় না। শুধু অসহায় এক কান্না ভিতর থেকে উঠে এসে তাকে ওলটপালট করে দিয়ে যায়।

বেসিনে মাটিমাথা হাত ধুতে ধুতে একদিন বাথরুম থেকেই ধুব মুখ ফিরিয়ে তার কান্না দেখছিল। দেখতে দেখতে হঠাৎ বলল, তুমি কিন্তু একটু কেমন হয়ে যাচ্ছে। আনব্যালানসড। বুঝলে!

রেমি জবাব দিল না।

ধুব এসে ভেজা হাতখানা তার কপালে রেখে বলল, এমন কিছু ঘটনা তো ঘটেনি।

ঘটেনি! রেমি কান্নার মধ্যেও অবাক না হয়ে পারে না।

ধুব উদাস গলায় বলে, আমরা তো সবাই একদিন মুছে যাবো। আমরা যা সব করেছি তার চিহ্নও থাকবে না কোথাও। বুঝলে! অনুতাপ শোক এইসব কত কী করে মানুষ অযথা আয়ুর খানিকটা সময় বইয়ে দেয়। ওঠো, বী এ স্পোর্টসম্যান।

রেমি বেশ আশ্চর্য একথা শুনে উঠল। চোখের জলও মুছল। কাঁদতে কাঁদতে হিঁকা উঠে গিয়েছিল তার। সেটা বন্ধ হল না। ধুবর দিকে চেয়ে বলল, তাকে আনো।

কাকে?

তাকে! আমি দেখব।

ধুবর কোথাও হাসি ছিল না। চোখে না, ঠোঁটে না। রেমিকে একজন ডাক্তারের মতো চোখে দেখল কিছুক্ষণ। রোগটা ধরার চেষ্টা করল যেন। তারপর বলল, একদম পেগলে যাচ্ছে। আজকাল স্বশুরের পদসেবা-টেবা করতেও ভুলে গেছ বোধহয়।

আমি ঠুর পদসেবা করি না তো। উনি ওরকম নন।

আহা। করলেও তো পারো।

কেন ?

একটা কাজ নিয়ে থাকা ভাল। যেরকম অবস্থা করেছে তাতে এখন তোমাকে একপলক দেখেই সবাই টের পেয়ে যাবে যে, এই কচি মেয়েটার কিছু একটা হয়েছে। তোমার স্বশুরমশাইও সেটা টের পাচ্ছেন। উনি মোর দ্যান অ্যাভারেজ বুদ্ধিমান। পদসেবাটেবা করে সেটা কাটিয়ে দেওয়াই বুদ্ধিমতীর কাজ হবে।

রেমি একটা দীর্ঘশ্বাস ছেড়ে বলল, ঠুকে নিয়ে তোমার কি আজকাল খুব ভাবনা হয় ?

খুব একথার জবাব না দিয়ে বলল, তোমাকে নিয়েই ভাবনা হচ্ছে। কেঁদেকেটে মুখখানা করেছে। রাবণের মা। এত কান্নার কী আছে ? কত মেয়ে ডিভোর্স করে আবার বিয়ে করছে।

আমি কি তাদের দলে ?

দল আবার কী ! তারাই কি খুব খারাপ মেয়ে ? যার সঙ্গে যার বনে না তার সঙ্গে খাম আর ডাকটিকিটের মতো সেঁটে থাকার দরকার কী ? না বনলে ছেড়ে দেওয়াই তো ভাল।

ছাড়ছিই তো।

ছাড়ছো, কিন্তু এমন একটা সীন করছো যে সবাই ভাবছে এই ছাড়ার পিছনে তোমার কোনো দায় নেই। যত দায় আমার।

রেমির চোখ ভরে জল এল ফের। সে কথা বলতে পারল না। কোনোরকমে আঁচলে চোখ ঢেকে বলল, তুমি এখন যাও।

খুব চলে গেল।

রেমি তার কান্না শেষ করল অনেকক্ষণ বাদে। তারপর ভাবতে বসল। স্বশুরমশাই কিছু টের পাচ্ছেন সত্যি ? পাওয়ারই কথা। সে আজকাল দোতলার ঘরে থাকে না। থাকে ধুবর সঙ্গে একই ঘরে। গত কয়েকদিন এরকমই আছে সে। কিন্তু অদ্ভুত থাকা। পাশাপাশি দুজনে শোয়, একই বিছানায়। মাঝখানে একটু নো-ম্যানস-ল্যান্ড ফাঁকা পড়ে থাকে। কেউ সেটুকু ডিঙায় না। আসন্ন বিচ্ছেদের সূচনা ? হবে। সেই বিচ্ছেদের কিছু আগাম চিহ্ন রেমির মুখচোখে গভীরভাবে পড়েছে। স্বশুরমশাই তীক্ষ্ণ দৃষ্টিসম্পন্ন মানুষ। সবই লক্ষ করেন। কিন্তু কখনোই কিছু আগ বাড়িয়ে বলতে আসেন না। কৃষ্ণকান্তর স্ট্যাটেজি অন্যরকম। কখন দ্রুত অ্যাকশন নিতে হবে, কখন অপেক্ষা করতে হবে তিনি তা চমৎকার বোঝেন। রেমিকে তিনি বরাবর এই সুযোগটা দিয়েছেন। সম্ভবত এখনো দিচ্ছেন। রেমি আজকাল স্বশুরের দেখাশুনো ঠিকমতো করে না। ওপরে যায় খুব কম। উনি হয়তো অপেক্ষা করেন। সব টের পেয়েও নিজে থেকে কিছু করেন না।

রেমি আজ ওপরে এল। পড়ন্ত বেলায়। কৃষ্ণকান্ত বাড়ি নেই। কখন বেরিয়েছেন তা খোঁজ নিয়ে জেনে রেমি বুঝতে পারল, উনি দুপুরে খাননি। আজকাল নাকি প্রায়দিনই দুপুরে খান না। পারটির কী সব জরুরী মিটিং চলছে।

অনেকদিন লতুর সঙ্গে দেখাই হয় না। কোনোকালে ননদের সঙ্গে ভাব ছিল না রেমির। ঝগড়াও নেই। সহজ একটা ঈষতীন, ভালবাসাহীন সম্পর্ক ছিল মাত্র। লতু আজকাল খুব পারটি করে। প্রায়ই বাড়ি থাকে না। আজও নেই।

বাড়ি ফাঁকা। রেমি দোতলার সামনের বারান্দায় দাঁড়িয়ে রাস্তা দেখছিল।

দেখতে দেখতে আনমনা রেমি হঠাৎ ভীষণ চমকে উঠল। গলির মধ্যে আজকাল কয়েকটা

দোকান হয়েছে। বাড়ির ফটকের উষ্টোদিকেই একটা পানের দোকান। এতদিন লক্ষ করেনি রেমি। দেখতে পেল সেই দোকানের সামনে রাজা দাঁড়িয়ে আছে। উদভ্রান্ত চেহারা। উর্ধ্বমুখ হয়ে তাকে অবাক চোখে দেখছে।

চোখে চোখ পড়তেই হাত তুলে রেমিকে দাঁড়াতে ইঙ্গিত করে কোথায় যেন চলে গেল খুব তাড়াতাড়ি হেঁটে।

রেমি বিবশ হয়ে গেল। রাজা কি প্রায়ই ওখানে এসে দাঁড়িয়ে থাকে আজকাল! তাকে দেখার জন্য? সে কখনো টের পায়নি তো আগে!

একটা শিহরন আর ভয় খেলা করে গেল রেমির শরীরে। তাকে যে এমনভাবে কেউ কামনা করে, এত পাগলের মতো তাকে চায় এটা ভাবলেই শিউরে ওঠে গা। কিন্তু পাগলটা এত বিপজ্জনকভাবে যদি রোজ এসে হানা দেয় তাহলে ধরা পড়ে যাবে। এ বাড়িতে আসতে বাধা নেই রাজার। অনায়াসেই আসতে পারে। সেটা দৃষ্টিকটুও হবে না। কিন্তু ওই পানের দোকানের সামনে দাঁড়িয়ে হাঁ করে চেয়ে থাকাটাই অস্বাভাবিক। ও কেন করে ওরকম?

রেমি হঠাৎ শুনতে পেল ফোন বাজছে। ফোন তার ধরার কথা নয়। কিন্তু হঠাৎ তার মনে হল, ফোনটা হয়তো রাজাই করছে।

সে ঘরে এসে ফোন তুলে নিল কানে, কে বলছেন?

রেমি, আমি রাজা।

আন্দাজ করেছিলাম। কী ব্যাপার বলো তো! ওরকমভাবে বাইরে দাঁড়িয়ে ছিলে কেন? সাথে কি আর ওভাবে দাঁড়াতে হয়। তোমার স্বপ্তর আমাকে ওয়ার্নিং দিয়েছে। বাড়িতে ঢুকলে খুন করবে।

বলো কী? কেন, তুমি কী করেছো?

যা করেছি তা তো তুমি জানোই। তোমার সঙ্গে মেলামেশা।

সেটা তো উনিই করতে বলেছিলেন।

হ্যাঁ, কিন্তু উনিই আবার আইন পালটেছেন। উনি যখন যেভাবে নাচাবেন আমাদের তেমনি নাচতে হবে।

রেমি খুব ক্লান্তি বোধ করে বলল, ঠঁর ছেলেও তো আমার সঙ্গে ডিভোর্স চাইছে। তুমি কথটা শুঁকে বলেছো?

না। ওসব বলে লাভ নেই। উনি কানে তুলবেন না। মানুষটা ওর কাছে বড় কথা নয়। বড় হচ্ছে ফ্যামিলি। কুট্রিলা তোমাকে ছাড়লেও উনি তোমাকে ও বাড়ি থেকে বেরোতে দেবেন না। দরকার হলে খুন করবেন, তবু বাড়ির বউকে অন্য পুরুষের ঘর করতে দেবেন না।

রেমি একটু দ্বিধায় পড়ে বলল, ঠিক তা নয় রাজা। তোমার কুট্রিলা আমাকে তাড়ালেও উনি আমাকে ভীষণ ভালবাসেন। এমন কি, সব বিষয়সম্পত্তি আমার নামে লিখে দিতেও চেয়েছিলেন।

ওসব বিশ্বাস কোরো না রেমি। পালাও।

পালাবো?

পারলে এক্ষুনি। যদি বাঁচতে চাও।

তুমিই তো বলছ উনি খুন করবেন।

আমাদের রিস্ক নিতে হবে।

আমি যে কোনো রিস্ক নিতে পারি রাজা। মরতে আমার একটুও ভয় নেই। কিন্তু তোমাকে বিপদে ফেলতে ইচ্ছে করে না।

আমার বিপদ তোমাকে না পেলে। তোমাকে না পেলে আমি মরে যাবো।

রেমি একটু স্নান হাসল। ঠোঁট কামড়ে বলল, সে তো বুঝতেই পারছি। নইলে বোকার মতো



পানের দোকানে দাঁড়িয়ে থাকতে না ।

গত চারদিন ধরে রোজ ঘণ্টা চারেক এই গলিতে ঘোরাঘুরি করি ।

কেউ দেখে ফেলেনি তো !

না । গলির মোড়ে লাল বাড়িটায় আমার এক বন্ধু থাকে । দরকার হলে তার ঘরে ঢুকে পড়ি ।  
বন্ধু কি সব জানে ?

না জানলেও আন্দাজ করছে । আমার মুভমেন্টটা তো যথেষ্ট সন্দেহজনক ।

কেন অমন করছো রাজা ? আমি এমন কিছু দুর্লভ তো নই ।

এখন ভীষণ দুর্লভ । আর তুমি যত দুর্লভ হবে আমি তত পাগল হবো ।

শ্রীজ, পাগল হয়ো না । তুমি যদি বাড়িতে ঢুকতে সাহস না পাও তাহলে আমিই বেরোবো ।

দেখা করব তোমার সঙ্গে ।

পারবে ?

রেমি হাসে, পারব না কেন ? কেউ তো আমাকে আটকাচ্ছে না ।

কুট্রিদা বাড়িতে নেই ?

আছে । থাকলেই কী ?

ওর সামনে দিয়ে বেরিয়ে আসতে পারবে ?

ওমা ! কী বলে রে পাগল ! ও তো আমি গেলেই বাঁচে ।

এখন আসতে পারবে রেমি ?

পারব ।

আমি মোড়ে অপেক্ষা করি তাহলে ?

না । তুমি ট্রাম ডিপোর কাছে গীজার গলির মুখটায় থাকো । আসছি ।

উঃ, বাঁচালে, তোমাকে না দেখে একদম থাকতে পারছি না ।

আমিও না ।

ফোনটা রেখেই রেমি বুঝতে পারল তার শেষ কথাটা সম্পূর্ণ মিথ্যে এবং বানিয়ে বলা । রাজাকে না দেখে তার বেশ কয়েকটা দিন কেটে গেছে । কিন্তু সে বিন্দুমাত্র বিরহ বোধ করেনি ।

রেমি নিচের ঘরে এসে দেখল, ধুব নেই । ওয়ার্ডরোব খুলে রেমি শাড়ি ব্লাউজ বের করে পরতে লাগল । সামান্য প্রসাধন মাখল মুখে । চুল আঁচড়াল । যখন চটিজোড়া খুঁজছে তখন দরজায় টোকা দিয়ে ঘরে ঢোকে ধুব ।

তুকেই বলে, বেরোচ্ছে ! বাঃ ! এই তো উন্নতি দেখা যাচ্ছে ।

রেমি জবাব দিল না । চটি পরল ।

ধুব তার দিকে খানিকক্ষণ চেয়ে থেকে বলল, ওই গাড়লটাকে বোলো ওভাবে এ গলিতে ঘুরঘুর না করতে । কেউ চৌধুরীর চোখ তো মোটে এক জোড়া নয় ।

রেমি থমকায় । তারপর বলে, তুমি তাহলে জানো ?

শুধু আমি কেন, জগদা হরিদা থেকে শুরু করে ঠিকে ঝি পর্যন্ত জানে ।

জানে ?

পানওলাটা কেউ চৌধুরীর একজন ক্যাডার আর ক্যাডার বলেই ইল্লিগাল কন্সট্রাকশন করে দোকানঘরটা খুলতে পেরেছে । গাড়লটা যা ভাবছে তা নয় ।

রেমি যদিও নার্ভাস বোধ করছিল তবু বলল, বেশ তো, জেনে এখন কী করবে ?

তা আমি কী জানি ! তোমার স্বস্তির জানে । তাকে জিজ্ঞেস কোরো ।

আমি ওর সঙ্গে দেখা করতে যাচ্ছি ।

হ্যাঁ । গীজার গলির মুখে ও দাঁড়িয়ে আছে । যাও ।

তুমি আমাদের কথা শুনেছো ?

সে আর শক্ত কথা কী ? নিচের হলঘরে একসটেশন ধরে যে কেউ শুনতে পারে । ইন ফ্যাকট আমি না শুনলেও জগদাদা শুনত । সে তোমাকে নজরে রাখছে ।

রেমি অবাক হল না । এ তো সে জানেই । ঘেল্লায় মুখটা একটু কঁচকে বলল, তোমরা কী বলো তো !

খরাপ । খুব খরাপ । এর পরও স্বশ্রুতকে তোমার ঘেল্লা হয় না ?

রেমি জবাব দিল না । মুখ ফিরিয়ে বেরিয়ে এল ।

পিছন থেকে ধুব বলল, রেমি, এই বাড়ি থেকে যাতে কেউ তোমার পিছু না নেয় সে জন্য আমি চেষ্টা করেছি । জগদাদাকে অন্য একটা কাজে লাগিয়ে রেখেছি । তবু যদি নেয় তবে একটু কাটিয়ে দিও ।

পিছু নেবে ? রেমি একটু থেমে যায় ।

ঠিক পিছু নেওয়ার কথা নয় । কার সঙ্গে মিট করছে সেটা দেখে চলে আসবে । কিন্তু আমার মনে হয় সেটাও উচিত নয় । তুমি বরং একটু ঘুরে-টুরে কালিঘাট পার্ক হয়ে তারপর গীজার দিকে যাও ।

রেমি মাথা নেড়ে বলল, পারব না । আমি তো চুরি করছি না । যে খুশি পিছু নিক, দেখুক ।

ভয়টা তোমার নয় । রাজার । কেউ চৌধুরী তোমাকে কিছু বলবে না, কিন্তু ওর পিছনে লোক লাগাবে ।

রেমি পুরোটো শুনতে দাঁড়াল না । বেরিয়ে এল ।

গীজার গলির মুখে রাজা দাঁড়িয়ে ছিল । রেমিকে দেখেই তার মরা চোখ ধক করে জ্বলে উঠল ।

এই ! তুমি কেমন আছো ?

রেমি একটু হাসবার চেষ্টা করল । মাথা নেড়ে লাজুক ভঙ্গিতে বলল, ভাল । তুমি ?

আমি ভাল নেই রেমি । দিনরাত হাঁ করে তোমার কথা ভাবছি ।

অত ভাবার কী ?

তুমি বোধহয় আমার কথা ভাবো না ?

ভাবি । কিন্তু তোমার মতো পাগল তো নই । একটা ট্যাকসি ধরো ।

কোথায় যাবে ?

যেখানে নিয়ে যাবে সেখানেই যাবে । এখানে নয় । চলো ।

ট্যাকসিতে উঠেই একটু অসভ্যতা শুরু করেছিল রাজা । হাত চেপে ধরল, বার দুই চুমু খাওয়ার চেষ্টা করল । ওর গা জ্বোরো রুগীর মতো গরম, চোখ জ্বলজ্বলে । একটা স্ক্যাপামি খুব ভাল রকম পেয়ে বসেছে রাজাকে । কিন্তু রেমির শালীনতা বোধ অন্যরকম । ট্যাকসিতে কি চুমু খাওয়া যায় ! বিশেষত অচেনা ট্যাকসিওলা একজন পুরুষমানুষ, এবং তার সামনে একটা আয়নাও রয়েছে, যা দিয়ে সে প্যাসেনজারদের ভালরকম জরিপ করে ।

কী হচ্ছে রাজা ?

কতকাল পরে তোমাকে এত কাছে পেয়েছি রেমি ।

চিরকালের মতোই তো পাবে । ট্যাকসিতে এসব নয় ।

চলো তাহলে আমার ফ্ল্যাটে ।

সেখানে কী ?

আমি তোমার সবটুকু চাই । আজই । এক্ষুনি ।

রেমি দীতে ঠোট কামড়াল । ক্ষতি কী ? তার কোনো শারীরিক কামনা নেই এখন । কোনো ভালবাসার আবেগও কাজ করছে না । তবু ক্ষতি কী ? ধুব চৌধুরিরও জানা উচিত যে তার

সতীলক্ষ্মী বউ আর সেরকম নেই। নষ্ট হয়েছে।

রেমি বলল, ঠিক আছে। আমি একটা টেলিফোন করব তার আগে।

টেলিফোন কেন ?

দরকার আছে। প্রশ্ন কোরো না।

ট্যাকসি এক জায়গায় দাঁড় করায় রাজা।

রেমি নামতে নামতে বলে, তুমি এসো না, মীজ। আমি একা কথা বলব।

রাজা নড়ল না, কিন্তু সন্দিহান চোখে চেয়ে রইল।

রেমি ওয়ুথের দোকানে ঢুকে ফোন করল।

ধুব চৌধুরি আছেন ?

ওপাশ থেকে জগা বলে, আপনি কে ?

জগাদা, তোমার দাদাবাবুকে ডেকে দাও। আমি রেমি।

কথা বলতে বলতেই ধুব ফোন হাতে নেয়, বলো রেমি।

আমি রাজার ফ্ল্যাটে যাচ্ছি।

ও। তাতে কী ?

বুঝতে পারছ না ?

পারছি তো। তুমি ওর ফ্ল্যাটে যাচ্ছে। তারপর ?

তারপর কী হতে পারে অনুমান করো।

কী হবে ?

অনেক কিছু। যা যা হওয়া সম্ভব।

ও। তা এটা জানাতে আমাকে টেলিফোন কেন ?

বাঃ, তোমাকে জানাব না ?

কেন, আমি তো বাধা দিইনি কখনো।

তবে বলছ না কেন—গো অ্যাহেড ?

তুমি কিন্তু চেষ্টাছো রেমি। কোনো পাবলিক প্লেস থেকে কথা বলছ না তো ? তাহলে সবাই কিছু শুনেছে।

রেমি সচেতন হয়ে দেখে, বাস্তবিকই দোকানদার আর খদ্দেররা তার দিকে চেয়ে আছে। একটু লজ্জা পেয়ে সে গলা নামিয়ে বলে, তুমি তাহলে অনুমতি দিচ্ছো ?

অনেকদিন আগেই দিয়েছি।

স্বস্তরমশাই শুনলে কী বলবেন ?

সেটা তিনিই জানেন। কিন্তু তুমি অত অনুমতির ধার ধারছো কেন ? এসব কি মেয়েরা স্বামী আর স্বস্তরকে জানিয়ে করে ?

আমি জানালাম। আমি তো ভয় পাই না, তাই জানালাম।

ভয়ের কী ? গো অ্যাহেড।

রেমি ফোনটা রেখে দিল।

তার আশা ছিল, রাজার ফ্ল্যাটে যাচ্ছে এ খবরটা জানিয়ে রাখলে সেখানে হয় ধুব গিয়ে হাজির হবে, না হয় অন্তত জগাকে পাঠাবে। একটা কিছু হবেই। হবেই।

কিন্তু রাজার ফ্ল্যাটে কেউ বাধা দিতে আসেনি। কেউ না।

চপলা খুব ধীরে ধীরে নলিনীকান্তর পুরোনো, পরিত্যক্ত ঘরখানার দিকে এগিয়ে গেল। প্রায় পা টিপে টিপে। আজকাল কৃষ্ণকান্ত এই ঘরে থাকে। স্বেচ্ছা নির্বাসনের মতোই। সে কদাচিৎ ভিতরবাড়িতে যায়। বলাই বাহুল্য, এই ঘরখানাকে বাড়ির অন্য সবাই ভয় পায়। কারণ এ ঘরের বাসিন্দা নলিনীকান্তর অপঘাতে মৃত্যু ঘটেছিল। হর কমপাউন্ডার থেকে শুরু করে অনেকেই নলিনীর ভৃত্যকে ঘোরাফেরা করতে দেখেছে। কিন্তু কৃষ্ণর কেন ভৃত্যের ভয় নেই? সব বাচ্চাদের থাকে, কৃষ্ণরই কেন নেই তা বুঝতে পারে না চপলা। এই কিশোর দেওরটি ক্রমেই নিজেকে একটা কুয়াশা দিয়ে ঢেকে ফেলছে যেন।

চপলা ভেজানো দরজার বাইরে দাঁড়িয়ে একটু দ্বিধা করল। ভিতরে ঢুকতে কেমন কেমন লাগছে। আজকাল কৃষ্ণ নাকি ধ্যান করে, মৌন পালন করে, স্ত্রীলোকের মুখের দিকে সহজে তাকাতে চায় না।

কিন্তু চপলা ওর সঙ্গে আজ একটু কথা না বলে পারবে না। আস্তে দরজাটা ঠেলল সে। ভেজানো দরজা ফাঁক করে দেখল, কৃষ্ণকান্ত টেবিলে বাতির আলোয় লেখাপড়া করছে। প্রাইভেট টিউটর পড়িয়ে চলে গেছে। এখন সে একা।

চপলাকে দেখে কৃষ্ণকান্ত একটু হাসল। বলল, এসো বউদি।

চপলা ঘরে ঢুকে দরজা ভেজিয়ে দিয়ে বলে, কী রে হনুমান, কদিন হল বউদির খোঁজ নিস না যে বড়!

কৃষ্ণকান্ত ভারী লাজুক একটু হাসল। কী সুন্দর যে দেখাল ওকে। মুগ্ধ দৃষ্টিতে চেয়ে থাকে চপলা।

কৃষ্ণকান্ত বলল, খবর নিই না কে বলল? আমি রোজ তোমার কথা ভাবি।

থাক আর বানিয়ে বানিয়ে বলতে হবে না। এ ঘরে বসে তুই দিনরাত কী করিস বল তো!

এই পড়াশুনো করি।

সবাই বলে তুই নাকি ব্রহ্মচর্য করছিস। মেয়েদের দিকে তাকাস না।

ঠিক তা নয়। কৃষ্ণকান্ত লজ্জা পেয়ে বলে।

তাকে আমি খুব ভাল চিনি, বুঝলি হনুমান। ব্রহ্মচর্য করছিস তো কী? তা বলে আমার মুখও দেখবি না নাকি?

তাই বলেছি! আজকাল অনেক কাজ পড়েছে বউদি। ভোরবেলা সংস্কৃত পড়ি। লাঠিখেলা, ছোরাখেলা শিখি, ব্যায়াম করি, ধ্যান করি।

তুই এতসব করছিস কেন বল তো! স্বদেশী হবি নাকি সত্যিই?

এমনিই, স্বদেশীরা ছাড়া বুঝি এসব কেউ করে না?

কী জানি বাপু তোর এই বয়সে এসব লক্ষণ আমার মোটেই ভাল লাগে না।

এই বলে চেয়ারের পাশে চৌকির বিছানায় বসল চপলা। তারপর ডান হাতখানা বাড়িয়ে রূপবান দেওরটির মাথায় একটু হাত বুলিয়ে দিতে গিয়ে তার চোখে জল এল।

বউদির হাতের স্পর্শটি খুব স্বস্তিকর বোধ হচ্ছিল না কৃষ্ণকান্তর। বাস্তবিকই সে মেয়েদের সংস্পর্শ সম্পূর্ণ বাঁচিয়ে চলছে আজকাল। মেয়েদের কথা সে ভাবে না, তাদের দিকে তাকায় না, স্পর্শ গোমাংসের মতো পরিহার করে চলে। কিন্তু বউদিকে সে কিছু বলতে পারে না। বউদি তাকে বড় বেশী ভালবাসে। সে শুধু কাঠ হয়ে রইল।

চপলা আঁচলে চোখ মুছে বলে, কাল চলে যাচ্ছি।

কৃষ্ণকান্ত অবাক হয়ে বলে, কোথায় যাচ্ছে?

কলকাতা ।

কেন, এত তাড়াতাড়ি যাওয়ার কথা তো ছিল না তোমার !

যাচ্ছি । আর ভাল লাগছে না রে ।

কেন ভাল লাগছে না ?

এ বাড়ির কেউই আমাকে পছন্দ করে না ।

মাঃ, কী যে বলো ।

তুই সব কথা জানিস না । আজকাল তো ভিতর-বাড়ির সঙ্গে সম্পর্ক নেই তোর ।

আমি তো তোমাকে খুব পছন্দ করি ।

তার তো নমুনা দেখতেই পাচ্ছি । দিনে একবারও খোঁজ করিস না বউদিটা বেঁচে আছে না মরে গেছে ।

আমি তোমার খবর নিই । রোজ নিই । বিশ্বাস করো ।

আচ্ছা করলাম ।

তবে যাচ্ছ কেন ? কে তোমাকে পছন্দ করে না ?

চপলা খুব অনামনা হয়ে দেয়ালের দিকে চেয়ে রইল, জবাব দিল না । অনেকক্ষণ বাদে হঠাৎ বলল, তুই এত ঘর থাকতে এই ঘরটা বেছে নিলি কেন বল তো । এই ঘরটা তোর কি খুব ভাল লাগে ?

কৃষ্ণকান্ত মৃদু হেসে কুণ্ঠিত গলায় বলে, এ ঘরটা একটু অন্যরকম বউদি ।

কীরকম ?

অন্য সব ঘরের মতো নয় ।

কিন্তু ঘরটা তো একদম বিচ্ছিরি । দেয়ালে নোনা ধরেছে, জানালার পাল্লা ভাঙা, চৌকিটা নড়বড়ে । লোকে বলে এ ঘরে ভূতও আছে ।

কৃষ্ণকান্ত মাথা নেড়ে বলে, দূর ! সব বাজে কথা ।

তুই কখনো ভূত দেখিস না ?

না তো ?

একা থাকতে তোর ভয় করে না ?

না । একা তো থাকি না ।

তাই নাকি ? তোর সঙ্গে কে থাকে তবে ?

কাকা ।

কাকা ! কাকা আবার কে রে ?

আর শশীদা ।

চপলা অবাক হয়ে দেওয়ার দিকে চেয়ে বলে, কী সব বলছিস ! তোদের সেই শশীদা তো এখন জেলখানায়, তার ফাঁসি হবে । আর কাকা কে বল তো ! নলিনীকান্ত ?

কৃষ্ণকান্ত মাথা নেড়ে বলে, আমি কাকার ভয়েস শুনতে পাই ।

ওমা !

সত্যি বউদি । যখন ভয়-ভয় করে, মাঝরাতে যদি হঠাৎ ঘুম ভেঙে যায়, তখন কাকার গলা কানে আসে ।

চপলা শিউরে উঠে দেওয়ার হাত চেপে ধরে বলে, তোর মাথা খারাপ হয়ে গেছে ।

কৃষ্ণকান্ত কাঁদো-কাঁদো হয়ে বলে, সত্যি শুনি বউদি । বিশ্বাস করো । কাকা বলে, ভয় কী রে ! ভয় কী ? আমি তো আছি ।

চপলা বড় বড় চোখে চেয়ে ছিল । বলল, আমি তোকে আর এ ঘরে থাকতে দেবো না ।

কেন বউদি ?

তোকে ভূতে পেয়েছে।

দূর ! ভূত নয়। ভূত মানে যা অতীত । কিন্তু কাকা তো ভূত নয়। কাকা আছেন যে।

মাগো ! তুই কী রে। শুনেই তো আমার গায়ে কাঁটা দিচ্ছে।

এই ঘরে শশীদাও আছে। শশীদা তো আর মরেনি।

তুই কি তারও ভয়েস শুনিস ?

না। শশীদা যতদিন আমাদের বাড়িতে ছিল ততদিন কেবল ভুল বকত। খুব জ্বর ছিল। পরে জ্বর একটু কমলে একদিন আমাকে বলেছিল, তোমার ভিতরে ফায়ার আছে।

কিসের ফায়ার ?

তা জানি না। তবে বলেছিল। আমি যখন বিছানায় শুই তখন নিজেকে একদম শশীদা বলে মনে হয়।

সেটা আবার কীরকম ?

মনে হয় আমি সাহেব খুন করে পালিয়ে এসেছি। পুলিশ আমাকে খুঁজে বেড়াচ্ছে। ধরতে পারলেই নিয়ে গিয়ে ফাঁসিতে ঝোলাবে। ভাবতে এত আনন্দ হয় না !

চপলা ক্রমে বিষ্ময়ে স্থির হয়ে যাচ্ছিল। চোখ ক্রমে বিস্ফারিত হচ্ছে।

তুমি শুনে ভয় পাচ্ছো বউদি ?

ভীষণ ভয় পাচ্ছি। লক্ষ্মীসোনা, আমার একটা কথা রাখবি ?

কী কথা ?

আগে আমাকে ছুঁয়ে বল কথাটা রাখবি।

ও বাবা, ওসব কিরেটিরে আমি কাটতে পারব না। বলো না কী !

আমার সঙ্গে কাল কলকাতায় চল।

কলকাতা ! না বউদি, আমার ভাল লাগে না।

লক্ষ্মীসোনা, বরাবরের মতো নয়, কয়েকদিনের জন্য চল।

কেন বলো তো ?

তোর মাথা থেকে ওই ভূতগুলো না নামালে আমার শান্তি নেই।

তুমি যে কেন খামোখা ভয় পাচ্ছো ? আমার তো বেশ লাগে।

ছাই লাগে। তোর মাথারই ঠিক নেই। তোর চোখমুখও কেমন অন্যধারা হয়ে গেছে। চোয়দুটো অত জ্বলজ্বল করে কেন তোর ?

করে ! সত্যি করে ? কৃষ্ণকান্ত খাড়া হয়ে বসে ব্যগ্র গলায় জিজ্ঞেস করে।

করেই তো। একদম ডাকাতের মতো, খুনীর মতো চোখ। এত অল্প বয়সে তোর চোখ এরকম হল কী করে, ভূতে না পেলে ?

আমি যে রোজ ধ্যান করি।

কার ধ্যান করিস ?

সে আছে।

তোর মাথা খারাপ হতে আর বাকি নেই। আমি স্বশ্রমশাইয়ের কাছে যাচ্ছি এখনই। দাঁড়া।

কৃষ্ণকান্ত মাথা নেড়ে বলে, আমাকে কলকাতা যাওয়ার পারমিশন বাবা এখন দেবে না।

কী করে বুঝলি ?

বাবার খুব ইচ্ছে এখন আমার পৈতে হোক।

তোর পৈতে ! কই উনি তো আমাকে কিছু বলেননি !

কাউকেই বলেননি। শুধু আমাকে।

কবে পৈতে ?

ঠাকুরমশাই দিন দেখছেন। শীগগীরই। তুমি থেকে যাও।

থাকব ? বাবাকে যে বলে এলাম কালই চলে যাবো।

যেও না বউদি। আমার তো মা নেই।

ওঃ, খুব তো সেনটিমেন্টে খোঁচা দিতে শিখেছিস ! আমাকে মা বলে সত্যি ভাবিস নাকি ?

তোমাকে একটু মা-মা লাগে কিন্তু ! সত্যি।

ইয়ার্কি করছিস না তো।

একদম না। তোমাকে ছুঁয়ে বলতে পারি।

বল তো। বলে হাত বাড়াল চপলা।

কৃষ্ণকান্ত হাতখানা ছুঁয়ে বলল, সত্যি বলছি। এবার বলো আমার পৈতে পর্যন্ত থাকবে !

থাকব। তবে শর্ত আছে।

কী শর্ত ?

তোকে আমার ঘরে থাকতে হবে।

সে কী ?

শোন বাপু তোর ভয় নেই। আমি তোকে একটুও জ্বলাতন করব না। তুই ধ্যানট্যান করিস করবি। আমি বাইরে একজন চাকর মোতায়েন রাখব যাতে কেউ ঘরে ঢুকতে না পারে।

কিন্তু এ ঘর থেকে গেলে আমি বাঁচবই না।

সত্যি ?

সত্যি বউদি। বিশ্বাস করো, এ ঘরে কাকা থাকে, শশীদা থাকে।

তাহলে একটা কাজ করি ?

কী বলো তো।

আমি তোর এই ঘরটাতেই এসে থাকি বরং। ওদিকটায় একটা খাট পেতে নিলেই হবে।

প্রস্তাবটা খুব পছন্দ হল না কৃষ্ণকান্তর। সে বউদির দিকে প্রশ্নাতুর চোখে খানিকক্ষণ চেয়ে থেকে বলল, তোমার একটা কী যেন হয়েছে। খুব ভয় পাচ্ছে।

পাচ্ছি।

কিসের ভয় বলো তো !

সে তুই বুঝবি না।

বলো না !

বলতাম, কিন্তু তোর মতো শুদ্ধ ব্রাহ্মচারীর মনটাকে নষ্ট করে দিতে ইচ্ছে হয় না, থাকগে, সব শুনতে নেই।

কৃষ্ণকান্ত ভারী সুন্দর করে একটু হাসল। তারপর হঠাৎ বলল, ছোড়দির সঙ্গে শচীনদার বিয়ে দিতে পারলে না তো বউদি !

শচীনদার নাম উচ্চারণের সঙ্গে সঙ্গে শরীরে বিদ্যুৎ খেলে গেল চপলার। সে স্পষ্ট টের পেল তার মুখ রক্তশূন্য হয়ে যাচ্ছে, বুক কাঁপছে।

চপলা হাসবার চেষ্টা করে বলল, কই আর পারলাম !

ছোড়দিটা খুব বোকা না ?

বোধহয়।

কৃষ্ণকান্ত একটু ভেবে নিয়ে বলে, মুখে যাই বলুক ছোড়দি কিন্তু শচীনদাকেই বিয়ে করতে চায় জানো ?

না তো, কী করে জানব ? তুই টের পেলি কী করে ?

আমি টের পাই।

তাহলে ওরকম করল কেন ?

কে জানে ! কিন্তু মাঝরাতে উঠে কাঁদতে বসত। আমি দু-একদিন দেখেছি।

একটু গভীর হয় চপলা। একটা দীর্ঘশ্বাস ফেলে। তারপর বলে, তুই কি বিশাখার জন্য খুব ভাবিস ?

না তো ! ভাববার কী আছে ? শচীনদার জন্য একটু কষ্ট হয়।

কেন ?

শচীনদা যে ভীষণভাবে ছোড়দিকে বিয়ে করতে চায়।

আবার কেঁপে ওঠে চপলার বুক।

একটু শ্বাস তার বুকে আটকে আঁকুপাঁকু করতে থাকে। কম্পিত গলায় সে বলে, কী করে বুঝলি ?

শচীনদা যে ছোড়দিকে চিঠি দেয়।

দেয় ? সত্যি ? চপলার চোখ বড় হয়ে ওঠে ক্রমে।

দেখবে ?

তোর কাছে আছে ?

আছে। বলে কৃষ্ণকান্ত তার টেবিলের টানা থেকে একটা মুখ-আঁটা খাম বের করে আনে।

মুখ-আঁটা খামটা হাতে নিয়ে কিছুক্ষণ স্তব্ধ হয়ে বসে থাকে চপলা। বুকের ভিতরটা ধরফর করতে থাকে। শচীনের হাতের লেখা সে চেনে। খামের ওপর তারই গোটা হাতের লেখায় শ্রীমতী বিশাখা চৌধুরি নামটা দেখেও যেন বিশ্বাস হয় না। সে জিজ্ঞেস করল, এ চিঠি তুই কোথায় পেলি ?

শচীনদা তো আজই বিকেলবেলায় চিঠিটা আমাকে দিয়ে বলল, ছোড়দির কাছে পৌঁছে দিতে।

এতে কী লেখা আছে জানিস ?

না। কী করে জানব ! পরের চিঠি পড়তে নেই।

চপলার মন আঁকুপাঁকু করছে জানার জন্য। চিঠিটা সে ব্লাউজের মধ্যে রেখে বলল, আমি বিশাখাকে দিয়ে দেবখন।

দিও।

এরকম আরও চিঠি দিয়েছে নাকি ?

না। এই প্রথম আমাকে চিঠি পৌঁছে দিতে বলল।

একটু নিশ্চিন্ত হয় যেন চপলা। শচীনের হাত এড়িয়ে সে পালাতে চাইছে কলকাতায়, তবু কী আশ্চর্য, নিজের অধিকারটুকু পাছে চলে যায় সেই ভয়ে পাগল হয়ে যাচ্ছে ভিতরে ভিতরে। চপলা উঠে দাঁড়িয়ে বলল, আমি যাচ্ছি রে। তুই পড়।

কলকাতায় যাবে না তো !

দেখি স্বস্তুরমশাইয়ের সঙ্গে কথা বলতে হবে। তোর পৈতের দিন কবে ঠিক হল আগে জেনে নিই।

ছোড়দি কেমন আছে গো বউদি ?

ভালই তো !

না। ছোড়দিটা বড্ড কান্নাকাটি করত। ওর জন্যই আরও আমি পালিয়ে চলে এসেছি।

ভাবিস না। দেখবি সব ঠিক হয়ে যাবে। মেয়েরা কথায় কথায় কাঁদে। বলতে বলতে আনমনে দরজার কাছ থেকে মুখ ফিরিয়ে বলে, যোগীবর, তোমার ভয় নেই। আমি তোমাকে যোগভ্রষ্ট করতে এ ঘরে আসব না। তবে মাঝে মাঝে দেখে যাবো। তাতে দোষ নেই তো !

শৈশব ও যৌবনের মধ্যবর্তী একটা অদ্ভুত দ্বৈত সত্তার টানাপোড়েন চলছে এখন কৃষ্ণকান্তর



মধ্যে । সে এবার যে হাসিটা হাসল তা শিশুর মতো । বলল, কী যে বলো না !

চপলা অঙ্ককার মাঠটা ধীর পায়ে পার হয় । ধীরে ধীরে নিজের ঘরে আসে সে । আজ সন্ধেবেলায় এই ঘরের দরজার কাছেই তাকে স্পর্শ করেছিল শচীন । তার সমস্ত শরীর শাঁখের মতো বেজে উঠেছিল সেই স্পর্শে । সাড়া দিয়েছিল । অনাবৃষ্টির তৃষিত শরীরও ছিল পুরুষ স্পর্শের জন্য উন্মুখ । কিন্তু এই প্রাচীন বাড়ির পুরোনো বন্ধ বাতাসে সংস্কারের ভূতও তো কিছু আছে, যেমন আছে গুপ্ত প্রণয়ের অনেক কেলেকারী । চপলার অর্ধেক মন নত হয়েছিল শচীনের কাছে বাকী অর্ধেক আড় হয়ে ছিল ।

চপলা জলে ভিজিয়ে খুব ধীরে ধীরে সাবধানে খামের জোড় খুলে ফেলে । বর্ষাকালের ভেজা বাতাসে আঠা তেমন জোড়েঁনি ভাল করে । চমৎকার নীলাভ একটা কাগজে ছোটো ছোটো সুন্দর হস্তাক্ষর !

বিশাখা, তোমার চিঠি পেয়েছি । এত কিছু হয়ে যাওয়ার পর নতুন করে আবার তোমার কাছ থেকে এরকম প্রস্তাব আশা করিনি । ইঠাৎ কেনই বা এরকম পাগলের মতো আচরণ করছো ? আমার বিয়ে করবার কোনো সংকল্প নেই । বাড়ি থেকে যে প্রস্তাব উঠেছিল তাতে আমি অসম্মতি জানিয়ে দিয়েছি ।

জীবন অনেক বড় এবং জটিল । তোমাকে যদি আমি উদ্ধার না করি তবে তুমি গলায় দড়ি দেবে ইত্যাদি লিখেছো । ঠাকুর দেবতার নামে অনেক ভয় দেখিয়েছো । এসব বড় বাড়াবাড়ি । আমার জন্য তোমার এত আগ্রহ এতকাল কোথায় ছিল ? তুমি সুন্দরী, সুপাত্রের অভাব হবে না । উপরন্তু কোকাবাবুরনাতি শরতের প্রতি নিজের দুর্বলতার কথা তুমি নিজেই প্রচার করেছো । তারপরও এই নাটক কেন ?

আমি নাটক পছন্দ করি না । তবে তোমার প্রতি আমার স্নেহ আছে । কিন্তু তোমার প্রস্তাব গ্রহণযোগ্য নয় । আশা করি বুঝবে । —শচীন

## ॥ ৬০ ॥

রাজার ফ্ল্যাট যেমন ফাঁকা হবে বলে ভেবেছিল রেমি তা নয় । আসলে রাজাদের বাসায় এর আগে কখনোই আসেনি রেমি । আসার প্রয়োজনও দেখা দেয়নি । সে শুনেছে, রাজার বাবা মা দিল্লিতে থাকে । এখানে সে একা । কিন্তু একদম একা যে নয় তা রেমি জানত না ।

রাজার ফ্ল্যাটে তার এক বিশ্বাস দিদি এবং তার মেয়ে থাকে । দিদির বয়স চল্লিশের ওপর । তাঁর মেয়েটি যুবতী এবং দুর্দান্ত সুন্দরী । দরজা খুলে সে যখন চৌকাঠের ফ্রেমে দেখা দিল তখন বড় মান হয়ে গেল রেমি ।

মেয়েটিকে দেখে এমন একটা খাঙ্কা লাগল রেমির মনে যে, তার এতক্ষণের দুঃসাহস ও নিয়ম ভাঙার আগ্রহ উবে গেল । মেয়েটিকে দেখামাত্র সে নিজের সঙ্গে মেয়েটির একটা চট-জলদি তুলনা সেরে নিল মনে মনে । না, সে সুন্দরী হলেও এ মেয়েটির কাছে দাঁড়াতেই পারবে না ।

রাজাকে দেখে মেয়েটি একটু অবাক হয়ে বলল, তুমি এই দুপুরে ফিরলে যে !

এমনি । বলে রেমির দিকে চেয়ে রাজা বলে, আমার ভাণী । জয়িতা ।

জয়িতা রেমির পরিচয় পেয়ে চোখ বড় বড় করে বলে, ধুবমামার বউ ! উঃ, কী দারুণ !

রেমি মৃদু একটু হেসে বলে, দারুণ কেন ?

জয়িতা দরজা ছেড়ে ভিতরের দিকে সরে গিয়ে বলল, আসলে দারুণ হল ধুবমামা । আমরা

সবাই ধুবমামার ভক্ত ।

এ সময়ে ধুবর প্রসঙ্গ ভাল না লাগারই কথা রেমির । কিন্তু আশ্চর্য— লাগল । জয়িতা তার হাত ধরে ড্রিং রুমের একধারে দেয়ালে একটা অ্যাবস্ট্রাক্ট মুরালের নিচে চমৎকার নরম ডিভানে নিয়ে গিয়ে টেনে বসাল । বলল, তোমার কথাও ভীষণ শুনি । তুমি তো দারুণ সুন্দরী ।

তোমার কাছেও ?

আমি ! আমার রঙটাই যা ফর্সা । চুল নেই, দেখ না ! বলে নিজের চুল সামনে টেনে এনে দেখায় জয়িতা । বলে, তুমি হচ্ছে সত্যিকারের সুন্দরী । আমি দেখন সুন্দরী ।

রেমি রাজার সঙ্গে কুলের মুখে কালি দিতে এসেছিল এখানে । মনটা ছিল উত্তেজনা ও রাগে টানটান । ধুব তাকে বলেছে, গো অ্যাহেড । ভিতরটা পাগল পাগল ছিল সেই থেকে । হঠাৎ সব ভুলে গিয়ে খুব হাসল রেমি, বলল, তুমি তো বেশ কথা বলো !

জয়িতা আচমকা রেমিকে দুহাতে ধরে বলল, জানো আমরা সবাই তোমাকে হিংসে করি ? আমাকে ? আমাকে হিংসে করার কী আছে ?

অনেক কিছু আছে । ওরকম জাঁদরেল শ্বশুর, অত টাকা, ক্ষমতা । কিন্তু আমরা তোমাকে হিংসে করি তোমার স্বামী ভাগো । ধুবমামার মতো একজন প্লে-বয়কে কী করে বাগালে বলো তো !

প্লে বয় কী

ওঃ, তুমি তো আবার সেকেলে ।

মোটাই সেকেলে নই । ইংলিশ মিডিয়ামের ছাত্রী । তবে যাকে প্লে-বয় বলে ও তো ঠিক তা নয় । নয় বুঝি !

মোটাই নয় । বাইরে থেকে মনে হয় ।

আমরা তো বাইরে থেকেই মনে করি । তুমি মামী এবার ভিতরের খবর একটু-আধটু বলো ।

রাজা ঘরে ঢোকবার পরই ভিতরের দিকে কোথায় যেন গেছে । এখনো দেখা নেই । তাতে বেঁচে গেছে রেমি । রাজার সঙ্গে নিভৃত হওয়ার চিন্তাটাই যেন তার কাছে অস্পষ্ট মনে হচ্ছে । কেন যে এরকম হল তা বুঝল না রেমি । কিন্তু জয়িতাকে ধুবর কথা বলার মধ্যে যে শিহরিত আনন্দ পেতে লাগল সে তা বলার নয় ।

একদম পাগল । বুঝলে, একদম পাগল ! যখন ভাল তখন ওর মতো ভাল নেই, আবার যখন বিগড়ে যায় তখন সেই বাঁকা বাঁশকে সোজা করার সাধ্য কারো নেই ।

জয়িতা খুব আগ্রহ নিয়ে শুনতে শুনতে বলে, খুব পারসোনালিটি ওর, না ?

খুব ।

আমরা জানি । নইলে কৃষ্ণকান্ত চৌধুরিকে বোল খাওয়ানো তো সোজা নয় । তুমি একটা কথা জানো বউদি ?

কী কথা ?

বললে আমাকে ঘেন্না করবে না তো ?

ওমাঃ তোমাকে ঘেন্না করার কী আছে ?

আছে । বললে হয়তো ভাববে, মেয়েটা কী রে ।

বলোই না ।

আমি কিন্তু একরকমি ব্যেস থেকে ধুবমামাকে বিয়ে করার জন্য পাগল ।

খুব হেসে উঠে রেমি বলে, যাঃ ।

সত্যি । বিশ্বাস করো । আমাদের আত্মীয়তার সম্পর্কটা ফিলমজি । লতায় পাতায় মামা-ভাগ্নী । আসলে বিয়ে-টিয়ে অনায়াসেই হতে পারে । তাই আমি বরাবর ভেবে রেখেছিলাম বড় হয়ে ধুবমামাকেই বিয়ে করব ।

ওমাঃ করলে না কেন ?

করব কী করে ? লোকটা আমাকে পাত্তা দিল নাকি ?

দেয়নি ! তোমার মতো সুন্দরীকে যে পাত্তা না দেয় সে বোকা ।

জয়িতা চোখ বড় বড় করে বলে, আর কী ডাঁটিয়াল জান ! আমি চিঠি দিতাম ও জবাব পর্যন্ত দিত না ।

চিঠি দিতে ? কেন, দেখা হত না

দেখা হলে কী হবে ? এমন গম্ভীর হয়ে ডাঁট নিয়ে থাকত যে কাছে ঘেঁষতেই পারতাম না । তাই একদিন চিঠি দিলাম ।

প্রেমপত্র ?

তাছাড়া কী আর ! তবে খুব ভীতু প্রেমপত্র । পর পর দুবার চিঠি দিয়ে একটাও জবাব পেলাম না ।

খোঁজ নিয়েছিলে চিঠি পেয়েছে কিনা ।

নিইনি আবার ! চিঠি পেয়ে নাকি একটু ভূঁ কঁচকে ছিল । তারপর মুচকি একটু হেসেছিল দয়া করে । কেন, তোমাকে বলেনি সে সব কথা ?

না, কোনোদিন বলেনি ।

আসলে ধুবমামার দোষ নেই । বিয়ের আগে ও অনেক প্রেমপত্র পেত । একতরফা । যতদূর জানি, নিজে কোনো মেয়েকে পাত্তা দিত না কোনোদিন । কারা প্রেমপত্র দিত জানে ? আমার মতো অনেক মেয়ে । বলেই জয়িতা হঠাৎ মুখটা কানের কাছে এনে বলল, তাদের মধ্যে বউদি টউদিও আছে, কাজিনও আছে । তোমার বরকে পারলে মেয়েরা ছিড়ে খায় ।

রেমি একটু অবাক হয়ে বলে, একজনের জন্য এতজন পাগল !

পাগল মানে দারুণ পাগল । লোকটা যে দারুণ অ্যাট্রাক্টিভও সেটা তো মানবে । শুধু চেহারাটাই নয় । আরো কিছু আছে । কখনো টের পাও না ।

আমি ! রেমি খুব অসহায়ের মতো বলে, আমি ঠিক ওকে বুঝতে পারি না ।

কিন্তু তোমার মনে হয় না ও তোমাকে হিপনোটাইজ করে রেখেছে !

তা বোধহয় হয় । রেমি একটু ভেবে বলে ।

ওর ওই হিপনোটাইজমটাই সাঙ্গাতিক । কী একটা আছে, বোঝা যায় না । মাঝে মাঝে মনে হয় আনফ্যাদমেবল ।

ও কোনো মেয়ের সঙ্গে কখনো মিশত না ?

জয়িতা একটু ভেবে বলে, আমি তো তেমন কিছু জানি না । ধুবমামা একটু অহংকারী মানুষ । এ ধরনের লোকেরা কখনো মিষ্টি-মিষ্টি কথা বলে না, মেয়েদের কখনো কমপ্লিমেন্ট দেয় না । মেয়েদের সঙ্গ বেশীক্ষণ সহ্যও করতে পারে না । ভাবে, বেশীক্ষণ মেয়েদের সঙ্গ করলে পুরুষের পৌরুষ কমে যায় ।

রেমি খুব হাসতে থাকে । বলে, বোধহয় তাই আমারও সঙ্গ করে না ।

তুমি কিন্তু ভীষণ লাকি । অনেকের মুখের গ্রাস ছিনিয়ে নিয়েছো । কত মেয়ে যে তোমাকে হিংসে করে ।

তুমি করো ?

করতাম । তোমাকে দেখে মনে হচ্ছে হিংসে করাই যায় না ।

কেন ?

কী যে মিষ্টি না তুমি ! ধুবমামাও কম লাকি নয় ।

পতি গর্বে এখন রেমি রমরম করছে ভিতরে ভিতরে । সে তো জানত না, ধুব নামক এক

পাথরের বিগ্রহে এত কিশোরী ও যুবতী পূজা দিতে চেয়েছে ! সেই দুর্লভ পুরুষ তার । রেমির বৃকে হঠাৎ খামচে ধরল এক ভয় । তার ?

মনের ভাব অনুযায়ী রেমির মুখের ভাব এত সহজেই পাল্টায় যে, লোকের চোখে ধরা পড়ে । জয়িতা তার হাত ধরে বলল, তোমার মনে দুঃখ দিলাম না তো !

না । ক্ষীণ স্বরে রেমি বলে, দুঃখ দেওয়ার মতো কিছু তো বলেনি ।

কথা অনেক হয়েছে, এবার চা খাবে দাঁড়াও মাকে ডাকি । মা বোধহয় ঘুমেচ্ছে ।

রেমি হঠাৎ জয়িতার দিকে চেয়ে কাদে কাদে হয়ে বলে, আমি বাড়ি যাবো ।

বাড়ি যাবে এই তো এলে ।

না, শোনো । আমার বাড়ি যাওয়া ভীষণ দরকার । আমি একটা জরুরি কাজ ভুলে গিয়েছিলাম ।

মিথো কথাটা খুব ভাল বলতে পারে না রেমি । কিন্তু তার মুখের করুণ ভাবটায় কোনো ফাঁকি ছিল না । জয়িতা তার মুখটার দিকে কয়েক পলক চেয়ে থেকে হঠাৎ হেসে ফেলে বলে, কী যে পাগলী না একটা তুমি খুব ভাল মিলেছে বোধহয় তোমাদের দুটিতে । কী কাজ ভুলে এসেছো বলো তো

সে আছে একটা ।

একটুও বসবে না ?

না গো, বড় জরুরী ব্যাপার ।

রাজামামা যে নিয়ে এল তোমাকে দাঁড়াও মামাকে তাহলে ডাকি ।

রাজা কী করছে ?

নিজের ঘরে গেছে । বোধহয় জামা কাপড় পাল্টাতে । ডেকে আনছি, বোসো ।

রেমি প্রমাদ গুলল । রাজা কি রেগে যাবে তার ওপর ? খুব রেগে যাবে ? যাক । রেমি পারবে

না । সে ধুবর বউ । ধুবর বউ । আর কারো হতে পারবে না সে । তাকে ছাউক, মারুক ডাঙুক ধুব ।

রেমি উঠে দাঁড়িয়ে বলল, তুমি রাগ কোরো না জয়িতা । একটা কথা বলব ?

বলোই না ।

তুমি আমার সঙ্গে চলো ।

ও বাবা, বাঘের ঘরে ঘোঘকে ঢোকাবে ?

কেন নয় ? বাঘ তো পাথরের । চলো ।

খুব হাসল জয়িতা । তারপর বলল, সত্যি কথা বলতে কী মামী,—ইস তোমাকে মামী-ফামী ডাকতে ইচ্ছেই করে না—আচ্ছা বউদি ডাকবো ? ডাকলে ক্ষতি কী ? ধুবমামা তো আর সত্যিকারের মামা নয় । ডাকবো ?

ওমা ! অত ফমালিটির কী আছে ? তুমি আমাকে রেমি বলে ডেকো, আমি খুব খুশি হবো ।

বাবাঃ বাঁচলাম । তোমার মতো একটা বাচ্চা মেয়েকে নাম ধরেই ডাকা সবচেয়ে ভাল ।

চলো তো এখন । শাড়িটা পালটে নাও ।

সত্যি যাবো ?

যাবে । না নিয়ে আমি নড়ছি না ।

তাহলে পনেরোটো মিনিট সময় দাও । এই প্রথম ধুবমামার সঙ্গে সত্যিকারের আলাপ হয়ে যেতে পারে । একটু সাজি আজ ? অবশ্য যদি তুমি পারমিশন দাও ।

দিচ্ছি । কিন্তু তোমার মায়ের ঘর কোনটা ?

কেন, যাবে ?

একটু আলাপ করে যাই ।

আসলে এইভাবে নিজের পাহারার ব্যবস্থা করছিল রেমি । কারণ অস্থির ও পাগল রাজা আড়ালে

কোথাও অপেক্ষা করছে অর্ধৈর্ষ্য হয়ে ।

এসো । বলে ডাইনিং কাম ড্রয়িং পেরিয়ে একটা ঘরে তাকে নিয়ে গেল জয়িতা ।

তার মা ঘুমোচ্ছিল ঠিকই । রাজার এই দিদি মোটেই প্রবীণা নন । বয়স সম্ভবত চল্লিশের ধার ঘেষে । চমৎকার বাঁধুনি শরীরের । মেয়ের মতোই সুন্দর চেহারা । হঠাৎ মা আর মেয়েকে দুই বোন মনে হবে ।

পরিচয় পেয়ে দিদি তাড়াতাড়ি হাত বাড়িয়ে একেবারে কাছটিতে বসিয়ে বললেন, তুমি ধুবর বউ ও বাবা !

এই অবাক হওয়া এবং চমকে যাওয়ার মধ্যে একটা সমীহ এবং ভয়ের ভাব আছে । রেমি অনেক আগে থেকেই এটা টের পেয়ে আসছে । ধুবর বউ যেন কী সাজঘাতিক একটা ব্যাপার ।

দিদি বললেন, আমরা তোমাদের বাড়িতে খুব একটা যাইনি । আত্মীয়তা তো তেমন কাছের নয় । তবে সব খবর রাখি ।

রেমি বিনীতভাবে একটু হাসে ।

দিদি বলেন, তোমরা হলে ভি আই পি । তবে আমার স্বামী যখন মারা যান তার আগে কৃষ্ণকান্ত চৌধুরি অনেক সাহায্য করেছিলেন । সে কথা কোনোদিন ভুলব না ।

রেমি এসব কথায় আবার আত্মস্থ হয়ে যায় পুরোপুরি । তার স্বস্তির কৃষ্ণকান্ত চৌধুরি, যাকে এক ডাকে সবাই চেনে, যার ক্ষমতার হাত বহু দূর প্রসারিত, তার স্বামী ধুব চৌধুরি, যে বহু যুবতীর কামনার লক্ষ্যস্থল ছিল । তাহলে সে তো কম কিছু পায়নি জীবনে ।

কিছুক্ষণ কথা বলতে না বলতেই আচমকা রাজা এসে ঘরে ঢুকল বউদি, একটু শুনে যাও ।

দিদি শশব্যস্তে বলে, যাও । কথা বলো ।

রেমি ধীরে ধীরে ওঠে । রাজা তাকে নিয়ে আসে দক্ষিণের একটা ফাঁকা ঘরে । সেখানে খাটে বিছানা পাতা । জানালা একটু ভেজানো ।

কী, বলো !

গল্প করার জন্যই আজ এসেছিলে বুঝি !

রেমি অবাক হয়ে বলে, তুমি তো বলোনি যে বাসায় দিদি আছেন জয়িতা আছে ।

ওরা থাকলেই বা কী ।

ছিঃ রাজা, তোমার মাথার ঠিক নেই ।

ঠিক নেই তা জানি । কিন্তু পাগলামি ছাড়া বাঁচাও তো যায় না । এত রেকর্ডিকশন কি মানা যায় ?

আচ্ছা মানছি । কিন্তু আজ নয় । আজ আমি বাড়ি ফিরে যাচ্ছি ।

তোমাকে আমি চিনি রেমি ।

মোটাই নয় । তোমার উচিত ছিল বাড়ির সিকিউরিটি আমাকে জানানো ।

জানালা কী হত ? তুমি আসতে না ?

আসতাম । তবে অন্য রকম মন নিয়ে ।

তোমার মনটা সব সময়েই সেই অন্য রকম । তুমি কখনো কুটিলদাকে ভুলতে পারবে না ।

কী করে বুঝলে ?

জয়িতার সঙ্গে তোমার কথাবার্তা আমার কানে আসছিল ।

তাতে কী প্রমাণ হল ?

রাজা একটা দীর্ঘশ্বাস ফেলে বলল, তোমার সহমরণ কে ঠেকাবে বলো তো !

সহমরণ ! কী যে বলো !

ঠিকই বলছি । কুটিলদাকে পেয়েছে মৃত্যুপ্রেম । তোমারও পরিণতি তাই ।

মৃত্যুপ্রেম ! সেটা আবার কী ?

কুটুদিকে যে মরণে ধরেছে তা কি তুমি টের পাও না ? নইলে কেউ ওরকম বেপরোয়া আর বেহেড হতে পারে ! নাকি ওরকম যা খুশি তাই করে বেড়ায় ?

রেমি রাজার দিকে অপলক চোখে কিছুক্ষণ চেয়ে থেকে ক্লান্ত স্বরে বলল, তোমরা পুরষরা মেয়েদের কাছে যে কী চাও তা সঠিক জানো না । মাঝে মাঝে চাওয়াটা আকাশে উঠে যায় ।

তাই নাকি ?

রেমি হাতের পিঠ দিয়ে চোখ দুটো মুছে নিয়ে বলল, এরপর একদিন দেখবে আমাকে পাগলা গারদে পাঠানো হয়েছে ।

রাজা একটু হেসে আচমকা রেমিকে বুকের মধ্যে টেনে নিয়ে বলে, না । তোমাকে পাগল হতে দেবোই না আমি ।

ছাড়ো ছাড়ো ! ছিঃ । বলে এক ঝটকায় সরে যায় রেমি । তারপর চাপা হিংস্র গলায় বলে, খবরদার আমাকে নিয়ে খেলা করতে চেও না কোনোদিন !

কী বলছ রেমি ?

ওরকম করছ কেন ? আমি কি দেহসর্বস্ব ? শরীর ছাড়া আমার কিছু নেই ? রেমি রাগে গড়গড় করতে করতে বলে ।

শরীর শরীরের কথা উঠছে কেন ? ভালবাসা—

ওটা মোটেই ভালবাসা নয় । শালীনতা বোধ বাদ দিয়ে ভদ্রতার ধার না ধেরে ও কী রকম ভালবাসা ?

আমরা তো ভারচুয়ালি স্বামী-স্ত্রী রেমি ।

মোটেই নয় ।

নয় ?

না আমি এখনো ওরকম করে ভাবতে পারি না ।

তবে কী ভাবো ?

রেমি একটা চেয়ার সামনে পেয়ে বসে পড়ল । তারপর একটু দম নিয়ে বলল, আমি খুব টায়ার্ড । এখন কোনোরকম জেদ বা জোর খাটিও না । আমার ভাল লাগবে না ।

বেশ আর কী

আর কিছু নয় । শুধু বলি, পুরুষের খেলার পুতুল হয়ে থাকার জন্য রেমি নয় । তোমার কুটুদা ক'দিন আগে আমাকে বলেছিল ডিভোর্স করে আবার আমাকে নিয়ে থাকবে । তবে স্বামী-স্ত্রী পরিচয়ে নয় । ও নাকি বিয়েতে বিশ্বাসী নয় ।

বলেছিল ?

হ্যাঁ, ওটা ওর পাগলামি কিন্তু আমাকে তাতে সায় দিতে হবে । আবার তুমি আমাকে একঘর আত্মীয়স্বজনের ভিতর বাড়িতে নিয়ে এসেছো একটা চূড়ান্ত কিছু করতে । আমি এসব বুঝতে পারছি না । ভালও লাগছে না ।

আচ্ছা রেমি, ক্ষমা চাইছি । তোমার মনের অবস্থাটা ঠিক জানতাম না ।

রেমির যে মন আছে সেটা জানো তো ! তাহলেই হবে ।

যাচ্ছে তাহলে ?

যাচ্ছি । বলে রেমি উঠল ।

একটা কথা শোনো রেমি । রাগ পুষে রেখো না । যদি তোমার শরীর আর কোনোদিন ছুঁতে নাও নাও, মেনে নেবো । কিন্তু ভুল বুঝো না । আমি তোমাকে ভীষণ ভালবাসি ।

জানি । বার বার ওকথা বলো কেন ? ভালবাসার কথা অত বলতে নেই । তোমার কুটুদা আজ

অবধি কখনো বলেনি ।

কুট্টিদা তোমাকে ভালবাসেও না তো রেমি ।

কে বলল বাসে না ? বাইরের লোক কি টের পায় কখনো ? আমি পাই ।

## ॥ ৬১ ॥

বাবা, আমি কাল যাবো না ।

হেমকান্ত গশ্বের পর ভাতের গ্রাস সদ্য মুখে তুলতে গিয়ে পুত্রবধূর এই কথা শুনলেন এবং একটু বিরক্ত হলেন । যাদের মতের স্থির নেই তারা মানুষ হিসেবেও খুব বিশ্বাসযোগ্য এবং আস্থাভাজন নয় । তবে চপলা সম্পর্কে তাঁর এতকালের ধারণাটা ছিল অন্যরকম এবং বিপরীত ।

কেন ? আমি যে তোমার চলনদার ঠিক করে ফেলেছি ।

কৃষ্ণের নাকি পৈতে দিচ্ছেন ! কৃষ্ণের খুব ইচ্ছে ওর পৈতে পর্যন্ত এখানে থেকে যাই ।

হেমকান্ত বললেন, তার এখনো দেবী আছে । ততদিনে কলকাতায় গিয়ে আবার ঘুরে আসতে পারবে ।

একথার কী জবাব দেবে চপলা ! থাকার কথা বলতে তার খুব লজ্জা করছিল একটু আগেও । কেউ চাইছে না সে আর এখানে থাকুক । শুধু কৃষ্ণ ছাড়া । সে বলল, তাহলে যাবো ?

হেমকান্ত বললেন, কৃষ্ণ যখন ধরেছে আর তাকে যখন তুমি কথা দিয়েছে তখন তার মতটা নেওয়া ভাল । কিন্তু কৃষ্ণ কোথায় বলো তো ! আজকাল তো তাকে রাত্রিবেলা খাওয়ার সময় দেখতে পাই না ! সে কি আগে খেয়ে গেছে ?

রান্নার ঠাকুর সুদর্শন দু'পা এগিয়ে এসে বলে, ছোটোবাবু তো আজকাল রাত্রে ভাত খায় না ।

হেমকান্ত অবাক হয়ে বললেন, ভাত খায় না ? সে কী ? ভাত খায় না তো কী খায় ?

চিড়ে মুড়ি খই কিছু একটা খান । একটু দুধ আর কলা ।

কই, আমাকে তো আগে এসব বলিসনি !

সুদর্শনের মুখে কথা যোগাল না । ছোটোবাবু কেন ভাত খায় না তা জিজ্ঞেস করার সাহস তার নেই । বাস রে, ছোটোবাবুর চোখ আজকাল ভাঁটার মতো জ্বলজ্বল করে । বড়বাবুর সঙ্গেও কথা বলার অভ্যাস তার নেই । কম কথার গম্ভীর মানুষ, কথা বলতে ভয় করে । সে তো রান্নার ঠাকুর বই নয় । এ বাড়ির ইঁদুর আরশেলার মতোই তুচ্ছ জীব ।

লজ্জা পেল চপলা । বাস্তবিক সেও জানত না যে, কৃষ্ণকান্ত আজকাল রাত্রে ভাত খায় না । অথচ বাড়ির বড় বউয়ের তো এটা জানা উচিত ছিল । তবু সে কখনো জানার চেষ্টা করেনি । এ সংসারে কী যে সব ঘটে যাচ্ছে তা এতকাল ভাল করে তাকিয়ে দেখার আগ্রহই সে বোধ করেনি । সে বলল, আচ্ছা, আমি কৃষ্ণের কাছে যাচ্ছি ।

হেমকান্ত শান্ত মুখখানা তুলে বললেন, তার দরকার নেই বউমা । আমি শিশুদের মতামতকেও মূল্য দিই । কাল সকালে বরং আমার সঙ্গে দেখা হলে জেনে নেবো ।

চপলা মৃদু স্বরে বলে, ও বোধ হয় ব্রহ্মচর্য করছে বাবা ।

হেমকান্ত উজ্জ্বল মুখে বললেন, ওর মধ্যে একটা কিছু আছে বলে কি তোমার মনে হয় না বউমা ?

খুব হয় ।

কী আছে বলো তো !

ও খুব তেজী হবে ।

হেমকান্ত একটু চুপ করে থেকে বললেন, আমার আর কোনো সম্ভান এত উজ্জ্বল নয় । ওর ওই উজ্জ্বলতা তাই আমার কাছে আনন্দেরই বিষয় । কিন্তু ভয় কী জানো ?

কী ভয় বাবা ?

এ তো স্বদেশীদের যুগ । তেজী ছেলে দেখে তারা আবার নিয়ে না দলে ভেড়ায় ।

এ ভয় যে খুব আছে সে বিষয়ে চপলা নিশ্চিত । তবু মুখে বলল, তা নয় । ও হয়তো সাধু সন্ন্যাসী হবে ।

এ বাড়িতে সেই বীজাণুও আছে । তুমি তো সবই জানো । সাধু হলেও চিন্তার কথা, স্বদেশী হলেও চিন্তার কথা । আমার সঙ্গে তো ওর কোনো ঘনিষ্ঠতা নেই । তুমি একটু জানবার চেষ্টা করো তো, ও আসলে কী হতে চায় ।

করব । কিন্তু আপনি ওকে নিয়ে অত ভাববেন না ।

মা-মরা ছেলে বলে ভাবি । এই যে রাতে ভাত খায় না তা জানতে আমার কয়েকদিন সময় লেগে গেল, তাও কথাটা উঠল বলে, ওর মা বেঁচে থাকলে কি হত এরকম ?

কেউ এ কথার জবাব দিল না । কারণ কথাটা অত্যন্ত কঠোর সত্য ।

হেমকান্ত জিজ্ঞেস করলেন, বিশাখাকেও আজকাল দেখতে পাই না বড় একটা । সেও কি ভাইটার একটু দেখাশোনা করতে পারে না ?

চপলা অবাক হয়ে বলে, কিন্তু কৃষ্ণ যে আজকাল এ বাড়িতে থাকেই না । বারবাড়িতে থাকে ।

বারবাড়ি ? সে কী ? হেমকান্তর খাওয়া একদম থেমে গেল ।

হ্যাঁ বাবা, আমি মনে করেছিলাম, আপনি জানেন ।

জানব কী করে ? এত বড় বাড়ি, কে কোথায় যাচ্ছে আসছে তা কি নজরে পড়ার কথা ? বারবাড়িতে থাকে কেন ?

ও ঘরে ও ধ্যান করে । পড়ে ।

কোন ঘরটায় বলো তো !

যে ঘরে শশিভূষণ ছিল ।

তার মানে নলিনীর ঘর ! হেমকান্ত খুবই অবাক হয়ে বলেন, ও ঘরে ও একাই থাকে নাকি ? একদম একা ।

হেমকান্তর এর পরেও অনেক প্রশ্ন থাকার কথা, কিন্তু সে সব করলেন না । একটা কথা মনে মনে স্থির করে নিলেন । তারপর অনেকক্ষণ বাদে বললেন, ছেলেটা অদ্ভুত ।

এ কথার জবাব কী দেবে চপলা ভেবে পেল না । হেমকান্ত কোনো প্রশ্ন করেননি । কিন্তু তবু বোধ হয় কিছু শুনতে চান । তেমনভাবেই চপলার দিকে তাকালেন ।

চপলা মৃদু স্বরে বলল, খুবই অদ্ভুত বাবা । তবে এটা পাগলামি নয় । অন্য কিছু ।

ধ্যান করে বলছ ? কিসের ধ্যান ? ও তো কোথাও দীক্ষা নেয়নি ।

ওর ঘরে ঠাকুরের ফটো আছে ।

ওঃ, নলিনীর সেই পাবনার ঠাকুর ! বলে আবার চুপ করে থাকেন হেমকান্ত । একটু যেন চিন্তিত । তারপর বললেন, তোমরা কিছু বলতে যেও না । ওজন মেপে কথা না বললে একটা গোলমাল হয়ে যেতে পারে । যা বলার আমিই বলব ।

বাকি সময়টা হেমকান্ত খুব আনমনে খেয়ে উঠে গেলেন ।

গভীর রাতে কেরোসিনের উজ্জ্বল বাতির সামনে বসে হেমকান্ত তাঁর ছেলের কথা ভাবলেন কিছুক্ষণ । তাঁর ছেলে ! ভাবতে শরীর কষ্টকিত হয়ে ওঠে পুলকে, গৌরবে, আনন্দে । কিন্তু বস্তুত নিজের কোনো সম্ভানকেই তো তিনি সৃষ্টি করেননি । তারা তাঁর মাধ্যমে সৃষ্ট হয়েছে মাত্র । কী করে গাণা শরীর ধারণ করল, কোথা থেকে পেল প্রাণ সে রহস্য তো তাঁর অধিগম্য নয় । তবে এ ছেলে



তাঁর একথা তিনি ভাবেন কেন ? এই যে “আমার ছেলে” বা “আমার” বলে বোধ এ এক বিষম অজ্ঞতাপ্রসূত ধারণা । আসলে তাঁর সন্তান বলে তিনি যাদের জানেন তারা কোনো বৃহত্তর জটিল সৃষ্টিলীলার ফসল । তিনি নিজেও তাই । হেমকান্ত শুধু এদের অভিভাবক, নিরাপত্তারক্ষী ও যোগানদার । এইসব মহৎ চিন্তা আজ তাঁর হৃদয়কে দ্রব করে ফেলল । মনটা প্রসারিত হয়ে গেল বহু দূর পর্যন্ত ।

এই রাত্রির নির্জন নিরাশ্রয়ে হেমকান্ত তাঁর বর্তমান পরিস্থিতির কথা ভাবলেন । একথা সত্য যে তাঁর জীবনে এখন দুই স্তরের দুটি গ্লানির সংক্রমণ ঘটেছে । তাঁর নিজের জীবনে মনু ! তাঁর পুত্রবধূর ক্ষেত্রে শচীন । এই দুই গ্লানি আজকাল অহরহ তাঁকে নিষ্পেষিত করে । চপলার ব্যভিচারহেতু তাঁর নিজের সঙ্গে মনুর সম্পর্কটাকে পর্যন্ত অশুচি মনে হয় । অথচ এরকম মনে হওয়ার কোনো কারণ নেই । সেদিনকার সেই কিশোরীর বয়ঃসন্ধির বাঁধনছেঁড়া ভালবাসা আজ বয়স ও অভিজ্ঞতার শাসনে সংযত ও সেবামুখী । তিনি নিজেও মৃত্যুচিন্তায় আক্রান্ত হওয়ার পর থেকে আরো স্তিমিত, আরো স্নেহ । তবু একটা ঘনায়মান ব্যভিচারের নৈকট্য নতুন করে তাঁর আর মনুর সম্পর্কটাকে বিচার করতে চাইছে অন্য একরকম মাপকাঠিতে । আসছে সংশয়, সন্দেহ, যা আগে কখনো ছিল না ।

এই ক্লিষ্ট সময়টায় কৃষ্ণকান্তের মধ্যে কয়েকটি উজ্জ্বল লক্ষণ দেখে তাঁর গ্লানি অনেক কেটে গেল । বুকটা হালকা লাগতে লাগল ।

বাইরে তুমুল বৃষ্টিপাত ঘটে যাচ্ছে । জানালার পাল্লা সামান্য ফাঁক করতে গিয়ে তিনি বায়ুবেগের প্রবলতা টের পেলেন । যতদূর চোখ যায় অন্ধকারে সাদা আবছা একটা পতনশীল জলের ঝরোখা ।

জানালা আবার বন্ধ করে দিয়ে তিনি ডায়েরি লেখার খাতাটি খুলে বসলেন ।

আজ মনে হইতেছে, বয়স হইয়াছে, এ জীবনের অনেক ছেলেখেলা এবার গুটাইতে হইবে । কিন্তু মন কি বয়সের শাসন মানে ?

আশ্চর্য এই, যখন যৌবন ছিল তখন আমি প্রকৃত বৃদ্ধের ন্যায় নিষ্পৃহ ও উদাস আচরণ করিয়াছি । স্ত্রী ছাড়া অন্য নারীর যৌবনের দিকে আগ্রহী হই নাই । নিজের স্ত্রীর প্রতিও যথোচিত মনোযোগী ছিলাম ? মনে হয় না ।

আজ যখন যৌবনের ভাণ্ডটি ফুরাইয়াছে, বয়সে লাগিয়াছে অন্ত্যায়মান জীবনসূর্যের রঙ তখন একটা হাহাকার হৃদয় জুড়িয়া বাজিতেছে । কেবল মৃত্যুভয় নহে, ইহার মধ্যে সুপ্ত ভোগপ্ৰপ্য়া, আকাঙ্ক্ষা ও যৌবনোচিত আরো অনেক অতৃপ্ত বাসনা লুক্কায়িত আছে । মানুষ তো কেবল কতকগুলি আকাঙ্ক্ষারই সমষ্টি নহে । বিধাতা তাহার মধ্যে অন্য সম্ভাবনার বীজও উপ্ত করিয়াছেন । তবু মানুষ বৃদ্ধি আকাঙ্ক্ষা ছাড়া কিছুই জানে না ।

আমার জীবনটার শেষভাগ এই আত্মধিকারেই পরিপূর্ণ হইয়া উঠিতেছে । আজ এই পরিণত বয়সে যখন সব সম্ভাবনা ও ভবিষ্যৎ স্বপ্নের দুয়ার রুদ্ধ হইয়াছে, যখন আর কিছুই হওয়ার নাই বলিয়া ধুব জানিয়াছি তখন মাঝেমধ্যে যৌবনের পাছদুয়ারটি খুলিয়া দিয়া স্মৃতি রোমন্থন করিতে বড় মধুর লাগে ।

সেই কিশোরীটির সব কথা এখনো ফুরায় নাই । তাহার সাজঘাতিক ভালবাসা ক্রমে আমাকে তাহার প্রতি মনোযোগী করিয়া তুলিল । তাহার পিতা এস্টেটের সামান্য কর্মচারী মাত্র । তাহার সহিত সূত্রাংপ্রকাশ্যে সহজভাবে আলাপাদি করা অসম্ভব ও দৃষ্টিকটু হইত । কিন্তু কোনোপ্রকারে ইহার নৈকট্যও আমার কাম্য বিষয় হইয়া উঠিল ।

অনেক ভাবিয়া স্থির করিলাম, ইহাকে যদি আমার স্ত্রীর সর্ব সময়ের সঙ্গিনী ও সাহায্যকারিণী নিয়োগ করি তাহা হইলে বোধ করি তেমন খারাপ দেখাইবে না ।

কিশোরীটি রোজ প্রাতঃকালে কুঞ্জবনে ফুল তুলিতে যাইত । এই খবরটি আমার জানা ছিল । প্রাতঃকালে শয্যাভ্যাগ ও কখনো প্রাতঃভ্রমণ আমারও অভ্যাস ছিল ।

একদিন ভোরবেলা যখন আকাশের তারা মুছিয়া যায় নাই, ব্রহ্মপুত্রের বুক হইতে দেবতাদের শরীর-গন্ধ বহন করিয়া এক অলৌকিক বাতাস বহিয়া আসিতেছে, আমাদের সাংসারিকতার স্তর যখন এক স্বপ্নলোকে নিমজ্জিত হইয়া আছে, তখন দুরুদুরু বক্ষে আমি কুঞ্জবনে গিয়া ঢুকিলাম।

কিশোরীটি বড়ই চপলা, দুটমতি। আবছায়া ভোরের আলোয় আমি একটি করবী বৃক্ষের নিচে তাহার ছায়ামূর্তিটি দেখিতে পাইয়া অনুচ্চস্বরে নাম ধরিয়া ডাকিলাম। ছায়ামূর্তি চমকাইয়া উঠিয়া কিছুক্ষণ স্থাণুবৎ দাঁড়াইয়া রহিল। পরমুহূর্তেই আর তাহাকে দেখা গেল না। আমি বেশী ডাকাডাকি না করিয়া নিঃশব্দচরণে তাহার অনুসন্ধানেনে ব্যাপ্ত হইয়া পড়িলাম। বেশী ডাকাডাকি করিলে লোকে জানিয়া যাইবে।

কিন্তু কিশোরীটি দুটবুদ্ধিতে অদ্বিতীয়া। কখনো খুব নিকটেই তাহার পদশব্দ শুনি। অদূরে তাহার দেহের স্পর্শে পত্রপুষ্প শিহরিত হইতেছে। অথচ সে ধরা দিতেছে না।

কিছুক্ষণের মধ্যে আমি ক্রান্ত হইয়া অনুচ্চ স্বরে বলিলাম, তোমার সঙ্গে একটু কথা ছিল যে ! শুনতে চাও না ?

আমার পশ্চাতে কয়েক হাত দূর হইতে সে বলিল, কী কথা ?

সুনয়নীর শরীরটা ভাল নেই। তুমি ওর কাছে থাকবে ?

ঝি হয়ে নাকি ?

না, না, ছিঃ ও কী কথা

তবে কী হিসেবে থাকবে ?

এমনি থাকবে। সখি হয়ে।

সই ! বুদ্ধিটা কার ?

ধরো না কেন, আমারই।

কিশোরী খিলখিল করিয়া হাসিয়া বলিল, তোমার তো খুব বুদ্ধি !

আমি মাথা চুলকাইয়া বলিলাম, থাকবে কিনা বলো।

কী দেবে ?

যা লাগে সবই পাবে। শাড়ি গয়না টাকা। সুনয়নী মানুষও ভাল।

হঠাৎ কিশোরী চাপা গর্জনে বলিল, থাক, আর বউয়ের প্রশংসা করতে হবে না।

আমি অপ্রতিভ হইয়া বলিলাম, তা বলিনি। বলছিলাম সুনয়নী তোমাকে কোনো কষ্ট দেবে না।

আমি শাড়ি গয়না টাকা কিছু চাই...না।

তবে কী চাও ?

আমি সতীনের সেবা করতে পারব না।

সতীন ! আমি নির্লজ্জ মেয়েটার এই সাজবাতিক বেহায়াপনায় একেবারে হতবাক হইয়া গেলাম। বৃকের ভিতরটা দমাস দমাস করিতে লাগিল। পাগলিনী বলে কী !

আমি গলা ঝাঁকারি দিয়া কহিলাম, ওসব আবার কী কথা !

কেন, তোমার কি লজ্জা হল নাকি ?

আমি কিশোরীকে মুখোমুখি দেখিবার জন্য পিছন ফিরিলাম। একটি ঝুমকা ফুলের গাছের আড়ালে সে দাঁড়াইয়া আছে।

বলিলাম, তোমারও এসব বলতে লজ্জা হওয়া উচিত।

কেন, সেদিন তো নদীর পাড়ে অন্য কথা বলেছিলে।

আমি সঙ্কুচিত হইয়া বলি, তোমার কি ভয়ডর নেই ? এসব আর কাউকে বোলো না। বললে কলঙ্ক রটবে। তোমার বিয়ে হবে না।

বিয়ে আবার নতুন করে কী হবে ? দুবার হয় নাকি ?

আমি প্রমাদ গণিলাম । গলা খাঁকারি দিয়া কহিলাম, আচ্ছা, ওসব কথা থাক । কাজটা করবে তো !

আমাকে ওর সেবা করতে নিচ্ছ কেন ?

ভাবলাম আলস্যে সময় কাটিয়ে কী করবে ! তোমারও কাজ হবে, সুনয়নীরও ভাল হবে ।

আমাকে তুমি দেখতে পারো না কেন ?

কে বলল দেখতে পারি না ?

আমি সব টের পাই ।

আচ্ছা, আর ছেলেমানুষী করতে হবে না । তোমার বাবাকে আজই বলব যাতে সুনয়নীর কাছে তোমাকে পাঠায় ।

কিশোরী ধৈর্যহীন স্বরে কহিল, না, বাবাকে বলবে না ।

তাহলে ? তুমি কি কাজ করতে চাও না ?

কাজ আবার কী ? আমি চাকরি করতে পারব না ।

এটা চাকরি হবে কেন ?

আমি সব বুঝি । শোনো, আমি সুনয়নীর কাছে এমনি থাকব । সেবা-টেবার ত্রুটি হবে না । কিন্তু তার বদলে টাকা পয়সা গয়নাগাটি কিছু দিতে পারবে না । আমি ওসব নেবো না ।

কেন, নিলে ক্ষতি কী ?

তোমরা বড়লোক, ইচ্ছে করলেই দিতে পারো । কিন্তু ওসব আমার চাই না ।

এই কিশোরী যে সহজে প্রলুব্ধ হইবে না এইরকম ধারণা আমার ছিল । ইহার মধ্যে কিছু অসাধারণও আছে, যাহা সহজলভ্য নহে । আমাকে ইহার চরিত্রের সেই রহস্যময় দিকটিই মুগ্ধ করিল । কিশোরীর চেহারাটি ধারালরকম এবং আকর্ষণীয় বটে, কিন্তু আমার রূপতৃষ্ণা বিশেষ প্রবল নহে । সুতরাং একমাত্র নারীদেহ বা রূপ দেখিয়া মোহিত হওয়া আমার চরিত্রে নাই । কিন্তু এই কিশোরীর ওই অতিরিক্ত, ব্যাখ্যার অতীত একটা চারিত্রিক গুণ আমাকে একেবারে পাড়িয়া ফেলিল । ব্যাখ্যার অতীত এই কারণে যে, মেয়েটি নিতান্তই দরিদ্র এক কর্মচারীর কন্যা । ইহাদের সংসারে নিত্য অভাবের গীত কীর্তন হইতেছে । সেই বিকট দারিদ্র্যের দূষিত আবহাওয়া ইহাদের নৈতিক বোধ ও সততারও হানি ঘটাইতেছে । ব্রাহ্মণের ব্রহ্মতেজ অন্তর্মিত, এখন বুঝি তাহার মনুষ্যত্বও যায় । সেই পরিবেশে জন্মিয়া ও লালিত পালিত হইয়া এই মেয়েটি কী করিয়া নিজের অভ্যন্তরে দীপশিখাটিকে নিরুদ্ভূত রাখিয়াছে তাহা কে জানে ! কিংবা মেয়েটি আমার প্রতি মোহমুগ্ধ বলিয়াই কি বিষয়গত ক্ষুদ্রতা হইতে উর্ধ্বে উঠিবার চেষ্টা করিতেছে ? এবং আমিও ইহার প্রণয় পাশে আবদ্ধ হইয়া একান্তই ভাবাবিষ্ট নয়নে ইহার গুণ আবিষ্কারে উঠিয়া পড়িয়া লাগিয়াছি !

আমি মৃদু কণ্ঠে জিজ্ঞাসা করিলাম, তুমি তবে কী চাও ?

তোমাকে খুশি করার জন্য কাজটা করব । আর কিছু চাই না ।

বেশ । তাই করো ।

তুমি খুশি হবে তো ?

হ্যাঁ, হবো ।

কাজ না দেখেই ?

আমি ব্যথিত হইয়া কহিলাম, কাজ তো বেশী কিছু নয় । আসলে কাজ নেইও । শুধু একটু সঙ্গে থাকা । কাজ করার জন্য তো ঝি চাকরের অভাব নেই ।

আমি তো ইহাকে কিছুতেই বলিতে পারিলাম না যে, সঙ্গে থাকার জন্যও সুনয়নীর অনেক লোক আছে । আমি শুধু ইহার নৈকট্য কামনা করিয়া সঙ্গে থাকার ব্যাপারটি মস্তিষ্ক হইতে বাহির করিয়াছি ।

কিশোরী হঠাৎ কহিল, তোমার বউ আমাকে পছন্দ করবে তো !

করবে না কেন !

একটু জিজ্ঞেস করে দেখো ।

কেন বলো তো

তোমার বউকে খুব বোকা ভেবো না ! সেই চিঠি দেওয়ার পর একদিন বুড়ো খাজাঞ্চিমশাই হঠাৎ আমাকে দিয়ে একটা পরচা লেখালেন । কেন লেখালেন তখন বুঝতে পারিনি । পরে টের পেয়েছি । আমার হাতের লেখা তোমার বউ পরীক্ষা করেছে ।

আমি বিস্মিত ও ভীত কণ্ঠে কহিলাম, তারপর ?

কিশোরী হাসিয়া কহিল, আমি তিন রকম হাতের লেখা জানি ।

॥ ৬২ ॥

গায়ে নাড়া দিয়ে কে যেন উত্তেজিত স্বরে ডাকছে, কুট্টিদা ? কুট্টিদা ?

ধুব একটা অতল ঘুমের খাদ থেকে উঠে আসছিল । অতি কষ্টে চোখ খুলে তাকাল সে । মাথার ওপর তারাভরা আকাশ, নীচে কঠিন কংক্রিট । এ রকম পরিস্থিতি তার কাছে অস্বাভাবিক কিছু নয় । এ রকম হতেই পারে । সে আবার চোখ বোজে । শরীরের মধ্যে বিকেলের কেটে যাওয়া নেশা এখন শোধ নিচ্ছে । মাথাটা লোহার মতো নীরেট আর ভারী । তীব্র একটা যন্ত্রণায় খুলে পড়ছে চোখের ডিম । সে আবার চোখ বোজে ।

কুট্টিদা ! কুট্টিদা !

কে রে ?

আমি রতন । ওঠো, ওঠো শীগগীর ।

ধুব ভারী বিরক্ত হয়ে বলে, কোন রতন ?

আমি রতন । কী হয়েছে তোমার ? এখানে কেউ শুয়ে থাকে ? ওঠো !

উঃ, কী চাস ?

ওঠো ! বাড়ি চলো ।

ধুব চোখ খোলে । একটা গহন গুহার অন্ধকার থেকে হামাগুড়ি দিয়ে বেরিয়ে আসার চেষ্টা করতে সে অশ্রুট স্বরে বলে, কী হয়েছে ?

এখানে শুয়ে আছো কেন ? কত বড় বাড়ির ছেলে তুমি সে কথা ভুলে যেতে আছে ? ওঠো শীগগীর !

শরীরটা এমন সঁটে গেছে ফুটপাথে যে তোলা অসম্ভব । তবু ধুব প্রাণপণ চেষ্টায় একটু নড়ে । কিছু না ভেবেই সে জিজ্ঞেস করে, রেমিকে শ্মশানে নিয়ে গেছে নাকি ?

শ্মশানে ! কী যে বলো না ! শ্মশানে নেবে কেন ?

তবে ডাকছিস কেন ? কী হয়েছে ?

তোমাকে নিয়ে পারা যায় না । দাঁড়াও আমি তোমাকে ধরে তুলছি ।

রতন লোকটা কে তা ধুব চিনতে পারছে না । তবে লোকটার গায়ে বেশ জোর আছে । বগলের তলায় দুটো হাত ভরে দিয়ে পিছন থেকে এক ঝটকায় তুলে ফেলল তাকে । মাথাটা চড়াং করে ঘুরে গেল ধুবর । দপ দপ করতে লাগল চোখের ডিম । মাথাটা ঝুলে পড়ল আলগা অনাস্থীয় একটা জিনিসের মতো । সবচেয়ে বিপদের কথা হল, ধুব নিজের পা দুটোর জায়গায় একটা শূন্যতা অনুভব করল হঠাৎ । তার ধারণা হল, ফুটপাথে শুয়ে থাকার সময় কোনো গাড়ি তার পা দুখানা কেটে দিয়ে গেছে ।

পা ! ওঃ, আমার পা ! বলে ধুব চুঁচিয়ে ওঠে ।

রতন নামক লোকটা মোলায়েম গলায় বলে, সোজা হয়ে দাঁড়ানোর চেষ্টা করো । পা দুটো অমন ভাঁজ করে রেখেছো কেন ?

ধুব চেষ্টা করে । কিন্তু পা দুটো কোথায় তা সে বুঝতে পারে না কিছুতেই । দুটো দাঁড়ার মতো জিনিস সে দেখতে পাচ্ছে তলার দিকে । ও দুটোই পা নাকি ?

রেমি ! রেমি এখনো মরেনি ?

কী যে সব বলো তুমি ! মরবে কেন ?

তাহলে ?

রক্ত দেওয়া হচ্ছে । পাঁচজন সারজেন এসে গেছে । একজন বড় হোমিওপ্যাথ আছে । এক তান্ত্রিককে আনা হয়েছে ।

অপারেশন ?

তা জানি না । তবে কিছু একটা হচ্ছে ।

এখন কি রাত ?

ভোর চারটে ।

ধুব সোজা হয়ে দাঁড়ায় । ঘুমটা ঝরে পড়ছে শরীর থেকে । আস্তে আস্তে ঝিঝি ছাড়ার মতো নেশাটা কেটে যাচ্ছে তার । কিন্তু নেশা কাটা কোনো আরামদায়ক অনুভূতি নয় । ব্যথা যন্ত্রণা তেঁষ্টা হতাশা চাগাড় দিয়ে ওঠে ।

হাঁটতে পারবে ?

পারব । বলে রতনের দিকে তাকায় ধুব । চিনতে পারে । চুনী পিসির ছেলে । আপন পিসি নয়, একদা তাদের দেশের বাড়িতে রতনের মা ছিল দাসী । ছোটো পিসির খাস দাসী ।

ধুব বলল, এবার ছেড়ে দে ।

রতন সাবধানে হাত সরিয়ে নেয় । বলে, এই ঠাণ্ডায় এ ভাবে শুয়ে ছিলে, সর্দি বসে যায় যদি ?

আমার কিছু হয় না । ওদিককার খবর কী ?

খারাপ কিছু নয় বোধ হয় । বড় কর্তা বসে আছেন । চিন্তা নেই । বহু লোক এসেছে । তুমি বাড়ি যাবে ?

ধুব মাথা নেড়ে বলে, না ।

রতন হাত দিয়ে ধুবর জামাকাপড় ঝেড়ে দিতে দিতে বলে, তাহলে একটা গাড়ি খুলে দিই ! শুয়ে থাকো ।

একটা সিগারেট দে তো !

আমি তো খাই না । দাঁড়াও কারো কাছ থেকে চেয়ে আনি ।

থাক । বলে ধুব একটা মস্ত হাই তোলে ।

বাইরে নিঃঝুম কয়েকটা গাড়ি দাঁড়িয়ে আছে শুধু । লোকজন কেউ নেই । এই ঠাণ্ডায় সবাই লবিতে ভীড় করেছে । শুধু একটা ল্যাম্পপোস্টের তলায় ঠেস দিয়ে ঠায় দাঁড়িয়ে আছে জয়ন্ত । খুবই রহস্যময় এবং আততায়ীর মতো দেখাচ্ছে তাকে ।

চোখে চোখ পড়তেই জয়ন্ত বলল, সিগারেট ? আমার কাছে আছে । নেবেন ?

ধুব উদার গলায় বলে, দাও ।

জয়ন্ত এগিয়ে আসে । পকেট থেকে সিগারেট বের করে দেয় । তারপর বলে, আমি এতক্ষণ আপনাকে পাহারা দিচ্ছিলাম ।

তাই নাকি ? বলে ফের হাই তোলে ধুব । তারপর বলে, পাহারা দেওয়ার কিছু নেই । আমার অভ্যাস আছে । মাতালদের মুখে কত কুকুর মুতে দিয়ে যায় । ওতে কিছু হয় না । ইটস অল ইন দি

গেম। রেমির কোনো খবর পেলে ?

জয়ন্ত মাথা নেড়ে বলে, না। আমাকে খবর দেবে কে ? ভিতরে ঢুকতেই পারছি না। আপনার রিলেটিভরা গোটা নারসিং হোম দখল করে আছে। কাউকে কিছু জিজ্ঞেস করলেই এমনভাবে তাকাচ্ছে যে, আমি যেন শত্রুপক্ষের লোক।

ধুব সিগারেটটার কোনা স্বাদ পাচ্ছে না। ফস ফস করে বিন্সাদ ঝাঁঝীন খোঁয়া অভ্যাসবশে কয়েকবার টেনে সিগারেটটা ছুঁড়ে ফেলে দিয়ে বলে, রেমির একটা খবর নে তো রতন। নিয়েছি তো। এতক্ষণ ভিতরেই ছিলাম।

তবু আর একবার যা।

যাচ্ছি তুমি চলো, গাড়ির মধ্যে শুয়ে থাকবে।

আমার জন্য ভাবছিস কেন ? আমি সিদ্ধ মাতাল। এ সব কিছু হয় না।

বাড়ির একটা সম্মান আছে তো

আচ্ছা যা, আর ফুটপাথে শোবো না।

ভিতরে গিয়ে বসতেও পারো।

সেটা অনেকে পছন্দ করবে না। তুই যা। তাড়াতাড়ি খবরটা নিয়ে আয়।

রেমি তার সারা জীবনেও এত ফুল কখনো দেখেনি। চারদিক থেকে ফুলেরা ঝেঁপে ধরেছে তাকে। সাদা, হলুদ, লাল, গোলাপী কত রকমের যে ফুল, সব ফুল রেমি তো চেনে না। যেদিকে চোখ ফেরায় রেমি সেদিকেই শুধু রাশি রাশি থোকা থোকা, গুচ্ছ গুচ্ছ ফুল। আর কিছু নেই। এত সুন্দর সব গন্ধ যে শ্বাস বন্ধ হয়ে আসে।

ক্ষীণ কণ্ঠে রেমি বলল, এত ফুল কেন ?

একটা কর্কশ পুরুষ গলায় কে যেন নেপথ্য থেকে জবার দিল, ফুল তোমার ভাল লাগে না ? লাগে। কিন্তু এত ফুল কেন ?

সবাই তোমাকে ফুল দিচ্ছে যে, কী করা যাবে।

আমার শ্বাস আটকে আসছে। ফুল দিচ্ছে কেন আমাকে ?

পুরুষ গলা বলল, আসলে আমরা একটা ফুলের বাগানের ভিতর দিয়ে যাচ্ছি।

এটা কি বাগান ?

এখানে ফুলের চাষ হয়। চলো।

কোথায় যাবো ?

চলো। হাতটা বাড়াও, আমি ধরছি।

রেমি ভুলেও জিজ্ঞেস করল না “তুমি কে ?” জিজ্ঞেস করতে নেই। সে কি জানে লোকটা কে ? না, সে জানে না। তবে মনে হয় এ লোকটা খুব স্বাভাবিকভাবেই তার সঙ্গে আছে। থাকারই কথা যে।

রেমি হাতটা বাড়ায়। ভারী দুর্বল, নিজীব তার হাত। কাঁপছে, অবশ হয়ে আসছে। সে হাত বাড়তেই একটা শক্ত কঠিন কর্কশ ঠাণ্ডা হাত সেটা ধরল। তারপর আস্তে আস্তে টেনে নিতে লাগল তাকে।

অজস্র বিচিত্র ফুলের রং অঙ্ক করে দিচ্ছিল রেমিকে। গন্ধে পাগল হয়ে যাচ্ছে সে। পথ দেখতে পাচ্ছে না, লোকটাকে দেখতে পাচ্ছে না। তবু যাচ্ছে। শুধু যাচ্ছে। ফুলগুলো সরে সরে যাচ্ছে একটু করে। গালে, মুখে, কপালে স্পর্শ করছে বার বার। ভেজা, ঠাণ্ডা অদ্ভুত স্পর্শ।

পায়ের তলায় কি জল ? ঠাণ্ডা, ভেজা মাটি, গা শিরশির করে, শীত শীত করে। শিউরে শিউরে ওঠে রেমি। হাঁটে। তার দুচোখ বেয়ে জল পড়ছে। সে কি কাঁদছে ? কেন কাঁদছে ?

হঠাৎ সে তার সঙ্গীকেই জিজ্ঞেস করে, আমি কি কাঁদছি গো ?

হ্যাঁ ।

কেন বলো তো ! আমার তো কিছু মনে পড়ছে না

মনে করে দেখার দরকার কী ?

তবে কাঁদছি কেন ?

মনের মধ্যে কান্না জমে ছিল বোধ হয় । কাঁদো । কাঁদলে চোখের জলে মাটি উর্বর হবে । আরো ফুল ফুটবে ।

কথাটা খুবই যুক্তিযুক্ত মনে হয় রেমির কাছে । ঠিকই তো । এ কথা সে তো ভূগোলের বইতেও পড়েছিল । চোখের জল মাটির উর্বরতা বাড়ায় । ভূগোলের বই ? না কি বিজ্ঞানের বই ! ঠিক মনে নেই

আমার পা অবশ্য হয়ে আসছে কেন গো ?

পা ?

হ্যাঁ । আমি পা দুটোয় সাড় পাচ্ছি না । অবশ্য ।

একটু হাসির শব্দ শুনল রেমি । তবে বিদ্রূপের হাসি নয় । মজার হাসি । পুরুষটি বলল, শুধু পা নিয়ে ভাববার কিছু নেই ।

তাই বুঝি ?

হ্যাঁ রেমি । শরীরটা কিছু নয় ।

তা অবশ্য ঠিক ।

যখন শরীর থাকবে না তখন তুমি সব কিছুর মধ্যে ছড়িয়ে থাকবে ।

কি রকম গো ?

এই ফুল মাটি জল বাতাস সব কিছুই তখন রেমি হয়ে যাবে ।

খুব মজা হবে, না ?

হ্যাঁ, সে ভারী মজা । ভারী আনন্দ ।

তখন কেউ ভাল না বাসলেও দুঃখ হবে না, না ?

না, একটুও না । কিন্তু তখন তোমাকে সকলেই ভালবাসবে ।

বাসবে ? ঠিক জানো ?

না বেসে উপায় আছে ?

রেমি মৃদু একটু হাসল । আবেগের হাসি । ঠিকই তো ! তখন ভাল না বেসে উপায় আছে ? তখন তো রেমিকেই স্বাসের সঙ্গে বৃক্কের মধ্যে নিতে হবে । রেমি যে বাতাস হয়ে যাবে তখন । রেমি হয়ে যাবে ফুল । তখন রেমির দিকে তাকিয়েই মুগ্ধ হয়ে যেতে হবে । রেমি হয়ে যাবে মাটি । আর মাটিকে কি অস্বীকার করা যায় ? তখন চারদিকটাই হয়ে যাবে রেমি-ময় । সবকিছুই রেমি হয়ে যাবে ।

রেমি বলল, আমার খুব ভাল লাগছে ।

লোকটা জবাব দিল না । শুধু অনুকম্পার একটু হাসি হাসল । রেমি বলল, শুনতে পাচ্ছো ? পাচ্ছি ।

আমি কিন্তু আর হাঁটতে পারছি না । এবার চলো ফিরে যাই ।

কোথায় ফিরে যাবে ?

তাই তো ! রেমি ভেবে পেল না, কোথায় ফিরবে । তার যে কিছু মনে পড়ছে না । অনেক ভেবে সে বলল, ফিরে যাওয়ার কথা কি ছিল না !

ওঃ, হ্যাঁ । সেইখানেই তো তোমাকে ফিরিয়ে নিয়ে যাচ্ছি ।

কোথায় বলে তো !

যেখানে তুমি ছিলে । আকাশ বাতাস মাটি গাছপালার মধ্যে ।

তাদের মধ্যে মিশে যাবো ?

যাবে রেমি । বললাম তো !

কিন্তু আর একটা জায়গা ছিল যে আমার ! রেমি বলে কোনো কোনো লোক ভাবত আমাকে । তারা খুব মজার লোক ।

তাদের কাছে আর নয় রেমি ।

নয় ? রেমি একটা দীর্ঘশ্বাস ছাড়ল ।

না, রেমির কিছু মনে নেই । মনে নেই সেই কালীঘাটের বাড়ি, যেখানে একটা অদৃশ্য খোঁটায় বাঁধা ছিল তার অস্তিত্ব । কিছুতেই ছেঁড়া যেত না বন্ধন । অথচ কেউ বাঁধেনি তাকে ।

রাজার ফ্ল্যাট থেকে এক অবশ্যস্বার্থী পতনের মুখ থেকে জয়িতাকে নিয়ে ফিরে এসেছিল রেমি । তার সর্বাঙ্গ বলে উঠতে চেয়েছিল, ওগো, এই দেখ, এখনো আমি শুদ্ধ, এখনো একগতি, এখনো আমি তোমারই ।

কিন্তু কে শুনবে সেই আর্ত নীরব চিৎকার ? ধুব ? হায় ।

সেই দিন জয়িতা অনেকক্ষণ বসে ছিল তাদের বাড়িতে ধুবর সঙ্গে দেখা করবে বলে । দেখা হয়নি । ধুব ছিল না ।

অনেক রাত অবধি জয়িতাকে আটকে রেখে গাড়ি করে বাড়ি পাঠিয়ে দিল রেমি । তার খুব ইচ্ছে ছিল, ধুবর সঙ্গে জয়িতার আলাপ করিয়ে দেয় । সে যে রাজার সঙ্গে কোনো অবৈধ সংসর্গ করেনি তার সাক্ষী ছিল তো জয়িতা, তাই ।

ধুব ফিরল অনেক রাতে । বেশ মাতাল । তবে বেহেড নয় ।

সেই রাতেও রেমি নীচের ঘরে ছিল ।

ধুব তাকে দেখে মৃদু হেসে বলল, সব হল ? বরফ ভাঙল তাহলে ?

রেমি শিউরে উঠে বলে, না, না, ছিঃ ।

ছিঙ্কির কেন ? গো অ্যাহেড । আবার কাল চলে যেও । রোজ যেও । কিছু হয় না ওতে ।

রেমি এর জবাবে কী বলবে ভেবেই পেল না । শুধু অসহায় কাহিল হয়ে বসে ছিল বিছানায় ।

ধুব গোটা চারেক অ্যান্টিসিড গিলে বলল, আমি চেয়েছিলাম তোমার মুক্তি । এতকাল পরে সেটা হল ।

রেমি আবার আতঙ্কিত হয়ে বলে, না ।

মুক্তি হয়নি বলছ ?

তুমি আমাকে বিশ্বাস করো না ?

আমার বিশ্বাস অবিশ্বাস দিয়ে তোমার কী হবে ?

আমার সঙ্গে রাজার কিছু হয়নি । কিছু না । পায়ে পড়ি, এ প্রসঙ্গ আজ আর তুলো না ।

ধুব একটা দীর্ঘশ্বাস ফেলল । বিছানায় এসে তার পাশে বসে বলল, আজ তোমাকে বেশ ব্রাইট দেখাচ্ছে ।

কেন ? রেমি সভয়ে প্রশ্ন করে ।

কেন সে তো তোমার জানবার কথা ।

মোটাই ব্রাইট দেখানোর কথা নয় । সেই দুপুর থেকে তোমার জন্য বসে আছি । এতক্ষণ জয়িতা ছিল ।

জয়িতা কে ?

রাজার ভাণ্ডী ।



ও ।

চেনো !

দেখেছি । ও এসেছিল কেন ?

তোমার সঙ্গে দেখা করতে ।

কেন, আমার সঙ্গে ওর কী দরকার ?

ও তোমার আডমায়ারার ।

তাই নাকি ?

তোমার তো অনেক আডমায়ারার । আজ সব শুনলাম ।

ধুব মদু একটু হাসল । তারপর অশ্রুট গলায় বলল, গার্লস... ! কথাটা শেষ করল না । একটা দীর্ঘশ্বাস ছেড়ে বলল, আমার কথা থাক । তোমার কথা বলো ।

আমার কী কথা ?

ডিটেলস ।

কিসের ডিটেলস ?

সব । যা ঘটল তার সব । যদি অবশ্য আপত্তি না থাকে ।

ঠিক এই সময়ে রেমির রাগ হল । সত্যিকারের রাগ । এই মাতাল, চরিত্রহীন, অস্থিরমতি পুরুষটির জন্য ভিতরে এক গভীর ও যুক্তিহীন ভালবাসার কারণ খুঁজে না পেয়ে নিজের ওপরেও তার এক তীব্র রাগ হল । দুই রাগ মিলে মিশে আচমকাই ফুসে উঠল সে ।

তোমার ঘেমা হয় না ! ঘেমা হয় না জিজ্ঞেস করতে ? আমাকে কী মনে করো তুমি.. ?

বলতে বলতে রেমি ধুবর ওপর ঝাঁপিয়ে পড়ে আঁচড়ে কামড়ে জামা-কাপড় ছিঁড়ে একটা ছেলেমানুষীর ঝড় তুলে দিল ।

প্রথমটায় ধুব ভাবাচাকা খেয়ে গেল । বিছানায় পড়ে গিয়ে রেমির আক্রমণ ঠেকানোর চেষ্টা করল কিছুক্ষণ । তারপর দু হাতে রেমির দু হাত চেপে ধরে বলল, নেশাটা কাটিয়ে দেবো নাকি ? দেবো । সব নেশা কাটিয়ে দেবো

কেন ?

তুমি কেন ভালবাসবে না আমাকে ?

এ কি গায়ের জোরের জিনিস রেমি ?

আমার কোনো জোর নেই ?

না । আজ আর নেই ।

## II ৬৩ II

ইরফান নামে যে লোকটাকে বিপিন লাঠির তালিম দেওয়ার জন্য পাঠিয়েছে সে লোকটা যে ওস্তাদ এক নজরেই বোঝা যায় । চওড়া ধরনের চ্যাপটা মেদহীন পেটানো শরীর । এক বিন্দু ঢিলেমি নেই শরীরে । পাখসাঁট মেরে লাঠি ঘোরায় বিদ্যুতের গতিতে ।

বারবাড়ির মাঠের ধারে কাঠের চেয়ারে বসে নিবিষ্টভাবে দেখছিলেন হেমকান্ত । ইরফান তালিম দিচ্ছে কৃষ্ণকান্তকে । কৃষ্ণকান্তর পায়ের কাজ চমৎকার । বয়সের অনুপাতে তার গ্রহণক্ষমতা অনেক বেশি । হেমকান্ত দেখলেন, ঘণ্টাখানেকের তালিমে চমৎকার পাল্লা দিয়ে যাচ্ছে কৃষ্ণকান্ত । তাঁর বুকটা ভরে যায় । গা গরম হয়ে ওঠে ।

ইরফান ঘেমা শরীরে লাঠিটা নামিয়ে রেখে হেমকান্তকে একটা সেলাম দিয়ে বলল, এ তো তৈরি

আছে কত। বেশি সময় লাগবে না।

হেমকান্তর রক্ত চনমন করছিল অনেকক্ষণ। কিন্তু চক্ষু লজ্জায় মুখ ফুটে বলতে বাঁধছিল, একটু হবে নাকি আমার সঙ্গে ? ওস্তাদ লোক দেখলে কার না ইচ্ছে হয় তার সঙ্গে তাল ঠুকতে ! কৃষ্ণকান্ত ধপাস করে হেমকান্তর চেয়ারের পাশে মাটিতে বসে বলল, বাবা, আপনি একটু লাঠি ধরুন না। ইরফানদাদা ভাল লড়ে।

হেমকান্ত লাজুক গলায় বললেন, না, না। থাক।

বলেন বটে, কিন্তু চেয়ারে ঠেস দিয়ে রাখা লাঠিটা হাতে তুলেও নেন তিনি।

ইরফান একটু হেসে বিনীতভাবে বলে, ধরেন না কত। ধরেন।

হেমকান্তকে আর বলতে হল না। উঠে কাপড়টা মালকৌঁচা মেয়ে নিলেন। তারপর নেমে পড়লেন।

ইরফান ভালই লড়ে। কিন্তু হেমকান্তর বিস্মৃত-প্রায় কলাকৌশল সবই কৃষ্ণকান্তকে শেখাতে গিয়ে আবার আয়ত্তে এসেছে। আধ ঘণ্টা লাঠি ঠোকাঠুকি করলেন ওস্তাদের মতোই। ইরফান হয়তো তেমন গা ঘামাল না। একটু ছেড়ে এবং বাঁচিয়ে লড়ল। তা হোক। হেমকান্তর তৃপ্তি এটুকুই যে, তিনি ততটা বুড়িয়ে যাননি।

লড়াইয়ের শেষে হেমকান্ত খুব চওড়া মুখে হাসছিলেন। মনটা বড় ভাল লাগছে। শরীরটা লাগছে পালকের মতো হালকা আর ঘোড়ার মতো তেজী।

কৃষ্ণকান্ত বাবার কৃতিত্বে মুগ্ধ। বড় বড় চোখে হেমকান্তর দিকে তাকিয়ে থেকে বলল, বাবা, আপনি ইরফানদাদার চেয়েও ওস্তাদ।

ইরফানও বিনীতভাবে বলে, কতর হাত বড় সজুত।

হেমকান্ত লজ্জায় রাঙা হলেন।

ভেজা গামছায় গা মুছে ছেলেকে নিয়ে ঘরে এসে বসলেন হেমকান্ত। মিহরির জলে লেবু দেওয়া সরবতের গ্লাস হাতে তুলে নিয়ে বললেন, শুনলাম তুমি নাকি ধ্যান-ট্যান করো !

কৃষ্ণকান্ত বলে, করি।

ধ্যান-ট্যান শুরু ছাড়া করা বিপজ্জনক। অধীরবাবুর ছেলে ওইসব করতে গিয়ে পাগল হয়ে গেল। তা তোমার এই বয়সেই ধ্যানের ইচ্ছে হল কেন ?

আমি একটা বইতে পড়েছি ধ্যান করলে মনের জোর বাড়ে।

সে তো বটেই। শরীরের চেয়ে মনের শক্তি অনেক বেশি। মনের জোর যার আছে সেই প্রকৃত শক্তিমান। আর একথাও ঠিক, ধ্যান মনের শক্তি বাড়িয়ে দেয়। কিন্তু তার জন্য একজন শুরু চাই। শুরুতে চাই ভক্তি ও বিশ্বাস।

পৈতে হলে ধ্যানে অধিকার জন্মায় বাবা ?

তা জন্মায়। আচার্যও একরকম শুরু। তবে পুরুতমশাইয়ের তো বয়স হয়েছে, তাঁকে দিয়ে খুব বেশি কিছু হওয়ার নয়।

আমাদের কুলগুরু আছেন না বাবা ?

হেমকান্ত একটু হাসলেন। মৃদু স্বরে বললেন, আছেন তো বটেই। তবে বাবার আমল থেকেই তাঁদের সঙ্গে সংযোগ নেই। কোথায় আছেন তাও জানি না। জানলেও লাভ ছিল না। কুলগুরুরা আজকাল আর আচরণসিদ্ধ নন।

তাহলে কি ধ্যান করব না ?

করবে না কেন ? তবে খুব বেশি নার্ভের ওপর চাপ যেন না পড়ে। তুমি যাকে সবচেয়ে বেশি ভালবাসো তাকে ভেবো। দুর্গা, কালী, শিব। যাকে পছন্দ।

আমার কালীকে পছন্দ।

তবে তাকেই ভেবো । কিন্তু বেশি নয় । আমি নিজে অবশ্য খুব বেশি ধর্মাচরণ করিনি । মনু বোধহয় জানে । ওর কাছে শুনে নিও ।

মনুপিসির কাছেই তো আমি শুনি ।

আর একটা কথা ।

কী বাবা ?

তুমি নাকি আজকাল একবেলা মোটে ভাত খাও ।

হ্যাঁ বাবা ।

কেন ?

ব্রাহ্মণরা তো তাই করতেন ।

উপনয়ন না হলে তো প্রকৃত ব্রাহ্মণের মতো আচরণ করার দরকার নেই । তাতে বরং শরীর-টরীর খারাপ হতে পারে । তোমার মা নেই, ঠিকমতো যত্নআত্তি হয় না । তার ওপর আবার ওসব করলে—

কৃষ্ণকান্ত বাবার দিকে চেয়ে বলে, তাহলে কী করব আপনি বলে দিন ।

হেমকান্ত ফাঁপড়ে পড়ে যান । নিজের ইচ্ছেমতো ছেলেকে পরিচালিত করতে তাঁর ঠিক সাহস হয় না । বিশেষ করে কৃষ্ণকান্ত যখন ঠিক সাধারণ স্তরের ছেলে নয় । আরো একটা কথা হল, কৃষ্ণকান্ত অতিশয় পিতৃভক্ত । যারা পিতৃভক্ত এবং প্রতিভাবান তাদের কী করে পরিচালনা করা যায় তা হেমকান্ত কখনো ভেবে দেখেননি । তাঁর কনিষ্ঠ পুত্র তাঁকে বেশ জটিলতার মধ্যে ফেলে দিয়েছে ।

হেমকান্ত কৃষ্ণকান্তর মাথায় স্নেহে হাত রেখে বললেন, আমি তোমার ভালমন্দ যে খুব ভাল বুঝি তা নয় । কিসে যে তোমার ভাল হবে তা আমি ভেবে দেখব । তবে শুধু এইটুকু বলি, বেশি কৃচ্ছ্রসাধন করার খুব একটা দরকার নেই ।

কৃচ্ছ্রসাধন নয় । ব্রহ্মচর্য ।

ও বাবা, সে তো অনেক বড় কথা ।

করব না বাবা ?

ভেবে দেখি । একজন পণ্ডিতের বিধান নিতে হবে ।

সরবত শেষ করে হেমকান্ত উঠলেন । তাঁর মনটা আজ স্বচ্ছন্দ নয় । ভিতরে ভিতরে একটা অস্বস্তি কাজ করছে । জীবনটা নানা সমস্যায় কণ্টকিত । নানা ভাবনায় মন আক্রান্ত ।

বর্ষশেষে শরৎঋতুর আর্বিভাবে চারদিকের প্রকৃতিতে একটা সাজোসাজো ভাব । বৃষ্টির দেবতা আকাশকে ধুয়ে মুছে ফটফটে নীল ফুটিয়ে তুলেছেন । তাতে ভাসছে খণ্ড মেঘের কাশফুলি সৌন্দর্য । তার সঙ্গে মানিয়েই বুঝি নদীর ওধারে অফুরান মাঠে কাশফুলের বন্যা এসেছে । আজকাল সকালের বাতাসে একটু হিম থাকে । শিশির জমে থাকে ঘাসের ওপর । হেমকান্তর বড় প্রিয় এই ঋতু । দোতলার বারান্দায় বসে অনেকক্ষণ চেয়ে রইলেন নদীর দিকে । মনটা যে ভাল হয়ে উঠল, তা নয় । তবে অন্যমনস্ক রইলেন ।

আচমকাই রঙ্গময়ী আজ অপ্রত্যাশিত হানা দিল ।

এই বয়সে যদি হাতে পায়ে চোট লাগে তবে কে দেখবে তোমাকে বলো তো ! অত বাহাদুরী করতে কে তোমাকে বলেছে ?

হেমকান্তর মুখে আনন্দের একটা ছটা ফুটে ওঠে । হাসিমুখে বলেন, আরে, হঠাৎ নিষিদ্ধ এলাকায় যে ? কী ব্যাপার ?

ঠাকুরবাড়ির দালান থেকে দেখতে পেলাম তুমি ওই ডাকাতে চেহারার লেঠেলটার সঙ্গে তাল ঠুকছো । দেখে ভয়ে মরি । কী জোরে লাঠি ঘোরাচ্ছিল লোকটা, আর কী ঠোকাঠুকির শব্দ ! এখনো

বুক দূরদূর করছে ।

হেমকান্ত উদারভাবে হাসলেন, তোমার এত ভয় কেন বলো তো ! আমার লাগলে সেবা করতে হত সেই ভয় ?

না । বরং উল্টোটা । তোমার চোট লাগলে আমি এসে সেবাটুকুও করতে পারতাম না । যতদিন বড় বউ আছে ।

কেন পারতে না ? এত মনের অসুখে মরো কেন বলো তো !

সে কথা পুরুষমানুষেরা বুঝবে না । কিন্তু বাহাদুরিটা কাকে দেখানোর জন্য হচ্ছিল শুনি !

হেমকান্ত খুব তরল হেসে বললেন, বুড়ো বয়সের খোঁটা দিচ্ছ তো ! বুঝেছি । যদি বলি তোমাকে দেখানোর জন্য ?

আমাকে ! রঙ্গময়ী চোখ বড় বড় করে বলে, আমাকে বীরত্ব দেখিয়ে লাভ কী ? নতুন করে মজতে হবে নাকি ?

হেমকান্ত খুব রাঙা হয়ে গেলেন লজ্জায় । রঙ্গময়ী একটু ঠোঁটকাটা বরাবরই । ওর সঙ্গে টক্কর দিতে যাওয়া বৃথা ।

রঙ্গময়ী ছিটেগুলির মতো তীব্র গলায় ফের বলে, আর বুড়ো বয়সের খোঁটা কখন দিলাম বলো তো ! তোমার কি ধারণা আমি তোমাকে বুড়ো ভাবি ?

নইলে একটু লাঠি চালাচালির জন্য অত চিন্তা হবে কেন ? ভাবছিলে বুড়ো বয়সে লেগে-টেগে গেলে হাড়ে বাত সৈদোবে । তাই না ?

তোমাকে বুড়ো-বাতিকে পেয়েছে । সব কথার মধ্যে খোঁটা দেখছ ।

হেমকান্ত মৃদু হেসে বলেন, ঝগড়ার মাথাটি তো বেশ পাকা । ওদিকে বড় বউয়ের ভয়ে মেচি বেড়াল ।

রঙ্গময়ী অপলক চোখে কিছুক্ষণ চেয়ে থেকে বলে, ঝগড়া করি খুব, তাই না ! আচ্ছা সে কথার জবাব পরে দেবো । কিন্তু বুড়ো বয়সের কথাটা আগে শেষ করো ।

হেমকান্ত হাতজোড় করে বলেন, ঘাট হয়েছে । মাপ চাইছি ।

তাহলে কখনো ভাববে না তো যে মনু আমাকে বুড়ো বলেছে !

তার জন্য তোমার অত দুশ্চিন্তা কেন বলো তো মনু ?

দুশ্চিন্তা আমার হবে না তো কার হবে ? শেষে এই নিয়ে আকাশ-পাতাল ভাবতে বসবে । তাহলে কি বুড়ো হয়ে যাচ্ছি ! তাহলে কি শীগগীর মরে যাবো ? তাহলে কি সংসার করা বৃথা ? হাঁ করে এইসব ভেবে ভেবে সতিাই বুড়োটে হয়ে যাবে ।

হেমকান্ত একটা দীর্ঘশ্বাস ফেলে বললেন, সে চিন্তা কি সহজে ছাড়ে মনু ? বুড়ো হচ্ছিই তো, মরতেও হবে ।

আবার ওসব কথা !

ভয় পেও না । সেবার আচমকা কুয়োর বালতি জলে পড়ে যাওয়ায় একটা কেমন লেগেছিল । আজ আর সেরকম নয় । আসলে এই যে এতকাল বেঁচে রইলাম, একদিন মরেও যাবো, এর অর্থটা ঠিক বুঝতে পারলাম না । কেন জন্ম হল, কেন বেঁচে থাকা, এর একটা অর্থ থাকবে তো !

সেসব ভাববার লোক আছে । তোমাকে ভাবতে হবে না ।

খুব হাসলেন হেমকান্ত । তারপর মাথা নেড়ে বললেন, ভালবাসা কি এরকমই যুক্তিহীন ?

কাল থেকে আর ওই ডাকাতিটার সঙ্গে লাঠি খেলো না কিন্তু । বলে গেলাম ।

এখনি যেও না মনু । তোমার সঙ্গে কথা আছে ।

কী কথা ? তাড়াতাড়ি বলো ।

অত তাড়া কেন ?

বড় বউ কালীবাড়ি গেছে পূজো দিতে । এসে পড়বে ।

কথাটা কৃষ্ণকে নিয়ে । তোমার কি মনে হয় ও একটু অস্বাভাবিক ?

রঙ্গময়ী ভূঁ কুঁচকে বলে, ও আবার কী অলুক্ষণে কথা ? অস্বাভাবিক হবে কেন ?

একটু অন্যরকম মনে হয় না ?

না তো ! অন্যরকম কেন হবে ?

ও যে একা থাকে, ব্রহ্মচর্য করে, এক বেলা খায় এসব তুমি জানো ?

জানব না কেন ? আমিই তো বলেছি ।

তুমি বলেছো ? আশ্চর্য ! কেন ?

তোমার আর সব ছেলে যেরকম সেরকমই ও হোক তা আমি চাইনি । তাই ।

এরকম করে লাভ কী ?

সহশক্তি বাড়বে । মনটা বরঝরে হবে ।

তাই বলো ! আমি ভাবছিলাম, ওর মাথায় এসব পোকা ঢোকাল কে ! গোপনে গোপনে স্বদেশী করছে নাকি তাই বা কে জানে । স্বদেশীওলাদের তো কাণ্ডজ্ঞান নেই । এইটুকু ছেলেকেও হয়তো হাতে বোমা দিয়ে সাহেব মারতে পাঠাবে ।

রঙ্গময়ীর মুখটা সামান্য বিমর্ষ হয়ে গেল । গলাটা এক পর্দা নামিয়ে বলল, ও যদি নিজেকে থেকে স্বদেশী করতে চায় তবে কি তুমি বাধা দেবে ?

দেবো না ? কী সব বলছ ?

রঙ্গময়ী একটা দীর্ঘশ্বাস ফেলে বলে, সব কিছু কি তোমার আর আমার ইচ্ছেয় চলবে গো ! এ যা যুগ পড়েছে, এর হাওয়া বাতাস গায়ে লাগবেই । কৃষ্ণ তোমার অন্য ছেলেদের মতো আঁচলধরা নয় । হয় মায়ের আঁচল, নয় তো বউয়ের আঁচল ধরে যারা টিকে আছে তাদের থেকে ওর খাত আলাদা । স্বদেশীর হাওয়া থেকে ওকে বাঁচাতে হলে তোমাকে ছেলে নিয়ে কাশীবাসী হতে হয় ।

হেমকান্ত চিন্তিত মুখে রঙ্গময়ীর দিকে কিছুক্ষণ তাকিয়ে থেকে বললেন, তোমার ভিতরেও একটু স্বদেশী পোকা আছে মনু, আমি অনেকদিন আগেই টের পেয়েছি ।

থাকলে আছে । কী করব বলো !

হেমকান্ত একটা দীর্ঘশ্বাস ফেলে বললেন, আমি পৃথিবীর ঘটনা নিয়ন্ত্রণ করতে পারি না মনু । যা হওয়ার তা তো হবেই । শুধু তোমাকে বলি, কৃষ্ণ তোমার খুব বাধের ছেলে । ওকে নিজের ছেলে বলে ভেবে ওর ভালমন্দ যা হয় ঠিক করো ।

এ কথার মানে কী ? আমি ওকে ছেলে বলে ভাবি না নাকি ?

হয়ত ভাবো । তবু বললাম । আজ কৃষ্ণ আমার কাছে জানতে চেয়েছিল কী ভাবে চলবে । আমি বলতে পারিনি । যদি পারো তো তুমি বোলো ।

কৃষ্ণকে নিয়ে তুমি অত ভেবো না । একটু শক্ত হও ।

শক্ত হওয়া আর এ জন্মে হবে না মনু । তাই আমি চেষ্টা করছি নিষ্পৃহ হতে । কোনোরকমে চোখ কান বুজে যদি আয়ুটা পার করে দেওয়া যায় । তারপর যা হয় হোক ।

বাঃ, বেশ বীরপুরুষের মতো কথা তো ! সকালের সেই লাঠিয়াল কোথায় গেল ? মালকৌচা মেরে খুব যে বীরত্ব ফলাচ্ছিলে এখন সেই লোকটা কোথায় ?

লাঠিবাঁজি কি সর্বত্র চলে মনু ? লাঠি এখন নিজের মাথায় মারতে ইচ্ছে করে মাঝে মাঝে ।

আতঙ্কিত মনু বলে, কেন গো ! ও কী কথা ?

হেমকান্ত অনুভূজিত কণ্ঠেই বলেন, আমার মনে বড় অশান্তি । চারদিকে কী যে সব হচ্ছে !

রঙ্গময়ী কিছুক্ষণ চুপ করে দাঁড়িয়ে থাকে । তারপর গাড় স্বরে বলে, তুমি ভেবো না । তোমার মনে অশান্তি হতে পারে এমন কিছু আমি হতে দেবো না ।

হেমকান্ত একটু হাসলেন। বললেন, আমি কি বাচ্চা ছেলে মনু, যে আমাকে ভোলাচ্ছে! বাচ্চার বেশিও তো কিছু নও।

তাই নাকি?

তুমি সাবালক হলে আমার আর চিন্তা ছিল কী?

আমাকে নিয়ে যে ভাবছো তার তো প্রমাণ পাই না। আমার এমন অশান্তির সময়টায় দিবা ছোঁয়াচ বাঁচিয়ে দূরে দূরে আছো।

তাহলে কী করব? অন্দরমহলে এসে খুঁটি গাড়ব নাকি?

তাই কি বলেছি?

বড় বউ কবে যাবে?

যাবে না বলছে। কৃষ্ণর পৈতের পর যেতে চায়।

তার তো ঢের দেবী।

হঁ। কী আর করা! শচীনোর খবর-টবর রাখো নাকি?

নাঃ। সে আজকাল আমার সঙ্গে কথা বলে না। তবে বড় বউ কী কারণে জানি না তার ওপর খুশি নয়।

বলো কী? এটা তো মস্ত খবর!

তোমার কাছে মস্ত খবর বটে, আমার অন্য ভয়।

কিসের ভয়?

শচীনোর মুখচোখে একটা হন্যে ভাব। বেহিসেবী কিছু করে না বসে। বড় বউ বুদ্ধিমতী বটে, কিন্তু পুরুষ পাগল হলে তাকে সামাল দিতে পারবে কি?

শচীন কী করবে?

ওর বাপ রাজেনবাবু সাজঘাতিক রাগী লোক। জানো বোধহয়।

জানি না। তবে জানলাম।

খুব অহংকারীও। শচীনোর মধ্যেও সে ভাবটা আছে। বড় বউ এত দিন নাচিয়ে যদি আর পান্তা দিতে না চায় তবে শচীন একদম বেহেড হয়ে যাবে। একদিন দোতলায় উঠে বড় বউয়ের ঘরে হানা দিয়েছিল সন্ধেবেলায়। জাপটে ধরারও চেষ্টা করে।

হেমকান্ত মেরুদণ্ডে হিমশীতল স্পর্শ অনুভব করে বিবর্ণ মুখে বলেন, তাই নাকি? তারপর কী হল?

কিছু হয়নি। বড় বউ সামলে নিয়েছিল বিপদটা। কিন্তু শচীনোর মধ্যে আমি একটা পাগলামি দেখছি।

কী করব মনু?

করার অনেক আছে। শশিভূষণের মামলা উঠতে দেবী নেই। শচীনকে বরিশালে পাঠানোর কথা ছিল। তার কী হল?

ভাল কথা মনে করেছে।

শোনো, কথা ভাল হলেও প্রকৃতবে শচীন মাথা নাও পাততে পারে। বললাম তো, ওর অবস্থা ভাল দেখছি না।

তাহলে?

ওকে সঙ্গে নিয়ে তুমি নিজেকে যাও।

আমি?

হ্যাঁ। তুমি গেলে হয়তো চক্কুলজ্জায় আপত্তি করবে না। ওর ওপর ছেড়ে দিলে যাবো-যাচ্ছি করে সময় কাটাবে, অজুহাত দেবে।

কিন্তু শশিভূষণ আমাদের কে বলো !

এমনিতে কেউ নয়। কিন্তু তোমার বাড়িতে ছিল। পুলিশ তো তোমাকে ছাড়বে না।

হেমকান্ত অনেকক্ষণ ভাবলেন। তারপর দীর্ঘশ্বাস ছেড়ে বললেন, তোমার বাস্তববুদ্ধি আমার চেয়ে বেশি। আমি তোমার প্রস্তাব মেনে নিলাম। যাবো।

গেলে দেবী কোরো না।

কেন, এত তাড়া কিসের ?

তুমি যখন থাকবে না তখন আমি বড় বউকে কলকাতায় পাঠানোর চেষ্টা করব। এখন পাঠালে গণ্ডগোল হবে। আমার বিশ্বাস, বড় বউ কলকাতায় গেলে শচীন তার পিছু নেবে।

না, আমি কালই যাবো। শচীনকে ডেকে পাঠাচ্ছি আজ বিকেলে।

তবে আমি যাই ?

এসো গিয়ে।

রঙ্গময়ী চলে গেলে হেমকান্ত অনেকটা সময় কাটালেন প্রচণ্ড অস্থিরতার মধ্যে। বিকেলে শচীন কাছারিতে এলে ডেকে পাঠালেন।

শচীন, শশিভূষণের কেসটার জন্য আমাদের একবার বরিশাল যাওয়া দরকার।

শচীন ব্রুঁচকে বলল, বরিশাল ! কিন্তু আমার যে এখানে অনেকগুলো মামলা হাতে রয়েছে।

শশিভূষণের মামলায় উকিল তো দিতেই হবে।

শচীন একটু ভেবে বলে, আমি আর একজনকে ঠিক করে দেবো।

আর একজন ! সেটা কি ভাল হবে ?

কেন হবে না ? ভাল উকিলের কি অভাব আছে ?

হেমকান্ত কী বলবেন ভেবে পেলেন না। খানিকক্ষণ চূপ করে থেকে বললেন, তোমার সঙ্গে আমার কথা হয়েছিল, শশীর মামলা তুমিই লড়বে। নতুন উকিলকে ব্যাপারটা বোঝানো সময়সাপেক্ষ। একটু ভেবে দেখ যদি সম্ভব হয়। কালই আমার যাওয়ার ইচ্ছে।

আমি আপনাকে কাল জানাবো। মনে হচ্ছে যাওয়া সম্ভব হবে না।

হেমকান্ত অসন্তুষ্ট হলেন। কিন্তু কিছু করারও তো নেই ! বললেন, ঠিক আছে। যাও।

শচীন চলে গেল।

হেমকান্ত বুঝলেন, ব্যাপারটা সহজ হবে না। রঙ্গময়ী যত বুদ্ধিমতীই হোক, ব্যাপারটা এত সহজ সরল নয়।

॥ ৬৪ ॥

আজ আর নেই ! আজ আর তার কোনো জোর নেই ধুবর ওপর ! কথাটার মানে কী ? রেমি যেমন রাগে আক্রোশে আবেগে ঝাঁপিয়ে পড়েছিল ধুবর ওপর তেমনি হঠাৎ নিবে গেল। অবশ্য হয়ে পড়ল।

আজ আর নেই কেন ? জল টলটলে চোখে ধুবর দিকে চেয়ে সে আকুল গলায় প্রশ্নটা করে।

ধুব তার দিকে চেয়ে খুব মনোযোগ দিয়ে দেখছিল তাকে। তারপর বলল, কখনো কখনো মানুষ অধিকার হারায়। তুমিও হারিয়েছো।

কেন সেটা ব্যাখ্যা করে বলো।

অত কথা বলতে গেলে আমার নেশা ছুটে যাবে।

আমি তোমার মাথায় এক্ষুণি ঠাণ্ডা জল ঢেলে দেবো না বললে।

ধুব অনেকক্ষণ চূপ করে থেকে মৃদু গলায় বলে, দু নৌকোয় পা দিয়ে চলার চেষ্টা করছো কেন

রেমি ? আজ দুপুরের পর থেকে আমার সঙ্গে তোমার সব সম্পর্ক শেষ হওয়া উচিত ।

কেন, দুপুরে কী এখন হল ?

কী হয়েছে তার খবর কে রাখে বলো ! কিন্তু তুমি তো তৈরি হয়েই বেরিয়েছিলে । তোমার মন তো প্রস্তুত ছিল । শোনো রেমি, শরীরের কোনো দোষ হয় না । শরীর তো একটা নিরপেক্ষ জিনিস । মন যেভাবে চালায় সে সেইভাবে চলে । তোমার শরীরটা কী করেনি সেটা বড় কথা নয় । তোমার মন তো টলেছে । সেটাই আসল কথা ।

এ পাগলকে রেমি কী করে বোঝাবে যে, তার শরীর যদিও বা কখনো অবাধ্যতা করে, মন করতে চায় না । সে মাথার মধ্যে একটা পাগলামির মতো কিছু টের পাচ্ছিল । গলা দিয়ে স্বর বেরোতে চাইছে না । সে ফিসফিস করে বলল, আমার মন কখনো টলেনি । কখনো না । তুমি আমাকে জোর করে তাড়িয়ে দিচ্ছে । তুমি যে কিছুতেই আমাকে সহ্য করতে পারছো না ! আমি কী করব ?

তুমি কী করবে সে বিষয়ে তোমারই সিদ্ধান্ত নেওয়া উচিত । সেটা আমি কেন স্থির করে দেবো ? কেনইবা এ যুগে একজন মেয়ে একজন পুরুষের ওপর এত নির্ভরশীল হবে ? স্বাধীন হও রেমি, নিজের ওপর বিশ্বাস রাখতে শুরু করো । পারবে ।

তুমি আমাকে বিশ্বাস করো না ?

করি । কিন্তু আমার বিশ্বাসভাজন হয়ে তোমার লাভ কী ? আমাকে এতটা গুরুত্বই বা দিচ্ছে কেন ? আমি তোমাকে পরিপূর্ণ স্বাধীনতা দিতে চাই, বুঝছো না ? বিয়ের বন্ধন নয়, ভালবাসা, বিশ্বাস, সততা এইসব কোনো শর্তই নয় । তুমি তোমার ইচ্ছেমতো চলবে, আমি চলব আমার মতো । কেউ কারো কাছে দায়বদ্ধ নই ।

আমি ওরকম সম্পর্ক বুঝি না । তুমি আমার কে হবে তাহলে ?

কেউ নয় । আমি একজন লোক, তুমি একজন মহিলা ।

মাগো ! আমি ওরকম ভাবতে পারব না ।

দেখ না চেষ্টা করে । আদিকালে তো এরকমই ছিল মেয়ে আর পুরুষের সম্পর্ক । তাছাড়া আমাকে নিয়ে তোমার প্রবলেমও তো নেই । তুমি রাজার সঙ্গে বোঝে চলে যাচ্ছো । তুমি যেরকম বর-বউ সম্পর্ক চাও সেটা হয়তো বা রাজার সঙ্গে কোনোদিন গড়ে উঠবে । আমার সঙ্গে নয় ।

আমি ভীষণ ঘাবড়ে যাচ্ছি । আমি পারব না ।

এক্সপেরিমেন্ট করে দেখ ।

রেমি শুকিয়ে যাচ্ছিল ভিতরে ভিতরে । আকণ্ঠ ভয়, পিপাসা, অনিশ্চয়তা । কৌদতে পর্যন্ত ভুলে যাচ্ছিল সে । ধুব এরকম সব আভাস অনেকদিন ধরেই দিচ্ছে বটে, কিন্তু এখন যেন তারা সত্যিই পৌঁছে গেছে পথের একেবারে শেষ মাথায় । সামনেই খাদ ।

রেমি ধুবর দুটো হাত ধরে টেনে নিল নিজের দিকে । নিজের শরীরে সেই হাতদুটোর বেটনী দিয়ে বলল, একটু জড়িয়ে ধরো আমাকে । শক্ত করে । মনে হচ্ছে আমি অজ্ঞান হয়ে যাবো । পাগল হয়ে যাবো । মরে যাবো ।

ধুব হতাশ গলায় বলে, কেন যে তোমার সংস্কারগুলো যাচ্ছে না !

রেমি ধুবর বুকের মধ্যে মুখ গুঁজে শক্ত হয়ে রইল । বলল, শোনো, আমি রাজার সঙ্গে যাবো না । তুমি যা চাও তাই হোক । আমাকে ডিভোর্স করো । তারপর আমরা একসঙ্গে থাকব ।

ধুব তার মাথায় স্নেহে একটু হাত বুলিয়ে দিয়ে বলে, চালাকি করছো ?

কিসের চালাকি ?

ছলে ছুতোয় আমার সঙ্গে লেগে থাকতে চাও !

ছল ছুতো কেন হবে ? প্রোপোজালটা তুমি দিয়েছিলে ।

দিয়েছিলাম কিন্তু এখন দেখছি তোমার দ্বারা লিভিং টুগেদার সম্ভব নয় । ও একটা আলাদা



দৃষ্টিভঙ্গি, আলাদা দর্শন। নিজের প্রাক্তন স্ত্রীর সঙ্গে লিভিং টুগেদার হয় না।

আমি পাগল হয়ে যাবো। আমাকে ছেড়ো না।

তুমি কী করে ওরকম সম্পর্ক অ্যাকসেস্ট করবে বলো তো! তুমি তো আজ পর্যন্ত আমাকে নাম ধরেও ডাকতে পারোনি। পারবে?

তোমার জন্য আমি সব পারি।

আচ্ছা, ডাকো তো!

নাম ধরে? ধুব!

ও কি ডাকা হল? শুধু উচ্চারণ করলে।

আস্বে আস্বে হবে। দেখো।

হবে না। কিছুতেই তোমার হবে না। তোমার সেই মানসিকতা নেই।

সেটাও হবে। তুমি শিখিয়ে নিও।

শেখানোর কিছু নেই। বললাম তো ওটা একটা মানসিক গঠন।

তুমি কি ওই মেয়েটাকে ভালবাসো?

কোন মেয়েটাকে?

ওই যে, আমি চলে গেলে যাকে নিয়ে তুমি থাকতে চাও।

ধুব রেমিকে কেন যে একটু গাঢ় করে চেপে ধরল একথা শুনে তা বলা মুশকিল। কিন্তু ধরল। তারপর বলল, ওটাও আমার একটা এক্সপেরিমেন্ট রেমি। তুমি ঠিক বুঝবে না।

আমি ওকে একবার দেখব। কতবার বলেছি। একটু দেখাবে?

এই প্রসঙ্গটায় ধুব ভারী অস্বস্তি বোধ করে, লক্ষ্য করেছে রেমি। ধুব তাকে তেমনি কটকটে করে চেপে ধরে থেকে বলে, না। দরকার নেই।

কেন নেই?

তোমার সঙ্গে ওর তুলনা করার কিছু নেই।

ও কেমন?

ওর মতো।

রেমির ফের রাগ হল। হিংসে হল। সে জানে ধুবকে সে পায়নি। সেটা মেনে নেওয়া গিয়েছিল। কিন্তু আর কেউ ধুবকে পেয়েছে এটাও বা সে মানে কী করে? মাথাটা পাগল-পাগল হয়ে যায় তার। পায়ের তলা থেকে মাটি সরে যেতে থাকে। খুন করতে ইচ্ছে করে। আগুন লাগাতে ইচ্ছে করে।

রেমি আচমকাই ধুবর আলিঙ্গন ভেঙে ফণা তুলল, আমি আর সহ্য করব না। বুঝলে! আর সহ্য করব না। ও কোথায় থাকে বলো! নাম কী?

ধুব মাথা নেড়ে বলল, ওরকম প্রগলভ হয়ো না। আমি তো কিছু লুকোইনি। লুকোবার কিছু নেইও।

তবে ওর ঠিকানা দাও।

কেন, গিয়ে হামলা করবে নাকি?

না। কিছু করব না। ভয় নেই। ঠিকানাটা দাও।

ওর কোনো দোষ নেই। ওর ঠিকানা দিয়ে কী হবে? দোষ তো আমার। যদি দোষ বলে মনে করা যায়।

দোষ নয়?

আমার কাছে নয়। আমি অন্য ভাবে ভাবতে শিখছি।

রেমি দর্শন বোঝে না। তার নিজস্ব কোনো দৃষ্টিভঙ্গি বা জীবনদর্শন নেইও। ধুবর মানসিকতাও

তার কাছে রহস্যময় । কিন্তু সে নিজস্ব অধিকারবোধ বোঝে । সে বুঝল, এখন যদি জোর খাটানো না যায় তবে সব হারিয়ে ফেলবে সে । শুধু কান্নায় তো হবে না ।

রেমি তীর স্থির চোখে ধুবর দিকে চেয়ে থেকে বলল, আমি মরলে তুমি খুশি হও ? অনেক সমস্যার সমাধান হয়ে যায় তাহলে ! তাই না ?

না । সব সমস্যাই থেকে যায় । বরং আরো জটিল হয় ব্যাপারটা । কিন্তু মরার কথা ভাবছে কেন ?

তুমি কি জানো, যে অবস্থায় আমি আছি তাতে অনেক আগেই আমার মরা উচিত ছিল ? না । এরকম কোনো সিচুয়েশন তৈরি হয়নি ।

হয়নি একজন মাত্র মানুষের জন্য । তিনি স্বপ্নরমশাই । তিনি না থাকলে আমাকে মরতেই হত । ধুব একটা দীর্ঘশ্বাস ছেড়ে বলল, তিনি না থাকলে অনেক সমস্যা তৈরিই হত না রেমি । এমন কি তোমার সঙ্গে আমার বিয়েটাই হত না ।

সেটা হয়তো ঠিক । কিন্তু উনি আমার জন্য যা করেছেন তা বাবাও করেনি ।

একজন মানুষকে আমরা দুজন দুটো অ্যাঙ্গেল থেকে দেখছি রেমি । তোমার সঙ্গে আমার মিলবে না । তবু বলি, যদি ওর জন্যই তোমার মরা না হয়ে থাকে তবে ওর জন্যেই বেঁচে থাকো । আমার কাছে কিছু প্রত্যাশা কোরো না ।

তবে আমার বেঁচে থাকাটা চাইছে কেন ?

মরাটাও তো মিনিংলেস । ওটা তো কোনো সমাধান নয় ।

কেন সমাধান হবে না ? আমি মরলে আমার সমস্যা মেটে । তোমারটা হয়তো মেটে না ।

দাঁড়াও । আমার মাথায় এখন কোনো লজিক কাজ করছে না ।

কোনোদিনই করে না । কিন্তু তুমি আমার মরাটা চাইছো ।

কবে চেয়েছি ?

রোজ চাইছো । নানাভাবে বুঝিয়ে দিচ্ছো যে, আমাকে তোমার প্রয়োজন নেই । বউকে অন্যর ঘরে পৌঁছে দিতে চাইছো আপদবিদেয় করার জন্য, এত ঘেন্না আমাকে তোমার । কিন্তু কেন ? ওই মেয়েটার জন্য ? কতদিন ধরে ওর সঙ্গে সম্পর্ক তোমার ?

আঃ, বাজে বোকো না ।

আজকাল তুমি আমার শরীর ছুঁতে চাও না । কেন বলো তো ! ঘেন্না ?

রেমি ! চুপ করো ।

রেমি আঁচলটা ফেলে দেয় । খুব দ্রুত হাতে নিরাবরণ হতে হতে রুদ্ধশ্বাসে বলে, দেখ দেখ আমি তার চেয়ে কতটা খারাপ । দেখ তো চেয়ে অন্ধ, শুধু শরীরও যদি তোমার চাহিদা হত তাহলেও কি আমি ফ্যালনা ! দেখ ।

ধুব দেখল । মাথা নেড়ে বলল, আমি তো বলিনি তুমি খারাপ !

রেমি তেমনি রুদ্ধশ্বাস উত্তেজিত স্বরে বলে, সেক্স ছাড়া অনেক বেশী কিছু দিয়েছি তোমাকে । তুমি তা বুঝলে না । ও মেয়েটা কী পারে দিতে তোমাকে ? শরীর তো ! তাও কি আমার সঙ্গে পাল্লা দেওয়ার মতো ? বলো !

ধুব রেমিকে ধরে টেনে আনে কাছে, পাগলী হয়ে যাচ্ছ নাকি ?

আমার কি নরম্যাল হওয়ার কথা ? এত কিছুর পরেও ?

ধুব একটা দীর্ঘ চুপন দিল তার ঠোঁটে । বলল, তোমার কি জ্বর হয়েছে ? শরীরটা বড্ড গরম । শ্বাস জোরে করো ।

ছাড়ো আমাকে । খুব ক্ষীণ গলায় বলে রেমি ।

ছাড়ব ? সত্যিই চাও ছেড়ে দিই ।

চাই। তুমি বদমাশ।

সে তো পুরোনো কথা। তবু তো ছাড়তে চাও না আমাকে।

ছাড়ো। আমি সেই মেয়েটার কাছে যাবো।

যেয়ো। তাড়া किसের ?

ঠিকানাটা দাও।

আমি নিয়ে যাবো।

তুমি ওর সঙ্গে শুয়েছো ?

কী হবে জেনে ? পুরুষদের তো সতীত্ব নষ্ট হয় না।

আমি জানতে চাই। বলো।

এই রকম রুদ্ধশ্বাস কথাবার্তার মধ্যেই ধুব রেমিকে বিছানায় নিয়েছে। তাদের রাগ, উত্তেজনা, আক্রোশ আর ঘৃণা সব কিছুই একটা রক্ত ঝুঁজছিল। বেরোবার পথ না পেলে দুজনেরই ভিতরে তা টগবগ টগবগ করে ফুটতে থাকত অনেকক্ষণ। দুজনেই সেই পথ পেয়ে গেল দুজনের শরীরে।

এমন আদর, এত ভালবাসাবাসি, বহুকাল হয়নি তাদের। উন্মত্তের মতো, জ্বালাময় তীব্রতার সঙ্গে তারা আঁকড়ে ধরল পরস্পরকে। অথচ বোঝা যাচ্ছিল, শরীরের এই মিলন দুজনের মধ্যে সেতুবন্ধ তৈরি করছে না। একটু ফাঁক থেকে যাচ্ছে কোথাও।

আনন্দের একটা ক্ষণস্থায়ী শিখর থেকে নেমে এসে অবসন্ন দুটি শরীর যখন পড়ে ছিল পাশাপাশি তখন রেমি হাত বাড়িয়ে ধুবর চুলের মুঠি নরম হাতে ধরে নিজের দিকে টেনে আনল।

বলো। শুয়েছো ?

সত্যি কথা সইতে পারবে ?

সেটা আমি বুঝবো। তুমি বলো।

একটু রহস্য থাক না।

না, থাকবে না।

তোমাকে সব কথা বলতে হবে এমন প্রতিজ্ঞা কি বিয়ের সময় করেছি ?

না করলেও আমি তোমার বউ তো ! আমার কিছু অধিকার আছে তোমার ওপর। আমি জানতাম তোমার সবটুকুই আমার। হয়তো ভুল জানতাম। কিন্তু তবু আমার সম্পত্তিতে কেউ ভাগ বসিয়েছে কিনা সেটা না জানলে আমার শান্তি নেই।

জানলে কি শান্তি হবে ? যদি জ্বালা আরো বাড়ে ?

তবু জানতে চাই।

শোনো রেমি। তোমাকে তো বোঝানোর চেষ্টা করলাম যে, শরীরের দোষ নেই। যেসব মেয়েরা রেপড হয় তারা তো নিজের ইচ্ছেয় হয় না। সমাজও তাদের প্রতি সিমপ্যাথেটিক। তুমি বরং খোঁজ নিয়ে দেখ, আমার মন আর কেউ দখল করেছে কিনা। সেটা অনেক বেশী বিপজ্জনক।

ওর আগে শরীরের কথাটাই বলো।

শুনবেই ?

শুনবোই।

তাহলে বলি, হ্যাঁ। কয়েকবার।

রেমি কিছুক্ষণ স্তব্ধ হয়ে রইল। তারপর ঠাণ্ডা স্বরে বলল, তোমার ধোঁয়া করল না ?

তোমার করে ?

আমার ! রেমি অবাক হয়ে তাকায়।

রাজা যখন— !

রেমি লজ্জায় রাঙা হয়। তারপর বলে, তুমি আমাকে বিশ্বাস করো ?

করি। কারণ তুমি খুব ভাল মিথ্যেবাদী নও।

আমাকে রাজা কয়েকবার চুমু খেয়েছে কিংবা বলা ভাল খাওয়ার চেষ্টা করেছে। আমি জানি তুমি জেলাস নও। তবু বলি, আমার কিন্তু ঘেন্না হয়েছে ভীষণ।

আর আজ ?

আজ তোমার ওপর রাগ করে আমি একটা যাচ্ছেতাই কাণ্ড করতে যাচ্ছিলাম ঠিকই। কিন্তু যদি ঘটনাটা ঘটত তবে নিশ্চয়ই আমি গলায় দড়ি দিতাম।

খুব একটা দীর্ঘশ্বাস ফেলল। তারপর খুব ধীরে ধীরে রেমির নগ্ন শরীরে হাত বুলিয়ে দিতে দিতে বলল, এ কথাটা তোমার কাছে সত্যি বলে মনে হয় ?

কেনি কথাটা ?

এই যে রাজার ওপর তোমার ঘেন্না

সত্যি নয় ? তুমি আমাকে কেন বিশ্বাস করো না বলো তো !

কারণ ঘেন্না যে যুক্তিসিদ্ধ নয় রেমি। যে কোনো মেয়েকেই আকর্ষণ করার মতো গুণ আছে রাজার। হি ইজ হ্যান্ডসাম, ভাল গায়, স্মার্ট।

সব ঠিক। তবু আমার ওরকম হয়।

হয় ? আমাকে ছুঁয়ে বলো।

একটু দ্বিধা করে রেমি। বলে, ছুঁয়ে কেন ?

দিব্যি দেওয়ায় আমার বিশ্বাস নেই, কিন্তু তোমার আছে। তাই দিব্যি দিচ্ছি। আমার দিব্যি, সত্যি বলো।

রেমি কুণ্ঠিত হাত বাড়িয়ে তার গলাটা জড়িয়ে ধরল। তারপর গভীর চুমু দিল ঠোঁটে। দাঁতের দাগ বসিয়ে দিল। দিতে দিতে কাঁদতে লাগল ফুলে ফুলে।

কাঁদছে কেন ?

তুমি আমার এমন সর্বনাশ করতে গেলে কেন ? আমাকে দুভাগ করে দিয়ে তোমার কী লাভ ?

এটাও একসপেরিমেন্ট রেমি।

কিসের একসপেরিমেন্ট ?

আমি বিয়েতে বিশ্বাস করি না, সতীত্বে বিশ্বাস করি না, কোনো পুরোনো প্রথা কেই মানি না। আমি তোমার মধ্যে কিছু সেকেলে পতিপরায়ণতা লক্ষ্য করেছিলাম। মনে হয়েছিল, এটা একটা সংস্কার মাত্র। কিন্তু ভাঙা যায়। তাই তোমাকে রাজার দিকে ঠেলে দিয়েছিলাম রেমি। শুধু দেখতে চেয়েছি কতক্ষণ তুমি রেজিস্ট করতে পারো।

শুধু একসপেরিমেন্ট ? আমি কি তোমার গিনিপিগ ?

গিনিপিগ কে নয় ?

ঠিক আছে। একসপেরিমেন্টের ফলটা কী হল ?

দেখলাম, তুমিও রেজিস্ট করতে পারলে না।

পেরেছি।

খুব মাথা নেড়ে বলে, পারোনি। রাজার ভাগ্নী আর দিদি ছিল বলে বৈধে গেছ। নিজের ইচ্ছেয় প্রতিরোধ করোনি। পারতেও না রেমি।

রেমির কান্নার বেগ বাড়ল।

খুব তাকে বুকে টেনে নিল। খুব খুব আদর করল তাকে। বলল, শোনো রেমি, তুমি মানুষ। মানুষ কখনো কি বিগ্রহ হয় ? পাথর তো নয় সে।

এসব কী বলছে আমি যে বুঝতে পারছি না।

পারার দরকার নেই। এসো।

এই বলে খুব রেমিকে প্রায় পিষে ফেলতে লাগল নিজের শরীরের সঙ্গে ।

এখন এক কুয়াশাচ্ছন্ন উপত্যকায় দাঁড়িয়ে রেমি যখন চারদিককার মায়াবী হলুদ আলোটির উৎস খুঁজছে তখন একটা কালো পাখি উড়ে গেল মাথার ওপর দিয়ে আর তীব্র ককর্শ স্বরে বলে গেল, খাঃ ! খাঃ !

কী সর্বনেশে ডাক ! ও বাবা ।

ওগো ! রেমি ডাকল ।

চারদিককার ন্যাড়া পাথুরে পাহাড়ের অবরোধ । কে যেন প্রতিধ্বনির মতো জবাব দিল, কী বলছে ?

পাখিটা কী বলে গেল !

কী বলে গেল ?

খা ! কী খেতে চায় ও ?

তোমার ভয় কিসের ?

আমার পেটে যে বাচ্চা ! ভয় করে ।

বাচ্চা!

হ্যাঁ গো ! সেই যে আমাদের ভালবাসাবাসি হয়েছিল একদিন । মনে নেই কবে ?

অনেকদিন আগে । আমার তো ভালবাসার কপাল নয় । তবু একদিন হয়েছিল । কাঙালের মতো শুষে নিয়েছিলাম একদিনের সেই ভালবাসা । সেইটেই পেটের মধ্যে আমার বাচ্চা হয়ে এসেছে যে ।

পাখিটা কী বলে গেল তোমাকে ?

খা আমার ভীষণ ভয় করে । আমার যে একটা নষ্ট হয়ে গেছে ।

তোমার পেটে এখন কোনো বাচ্চা নেই রেমি । শুনতে পাচ্ছো না ?

কী শুনবো ?

হেঁড়া নাড়ী দিয়ে রক্তের স্রোত বয়ে যাচ্ছে ! শুনছে

হ্যাঁ । ও, তাই তো ! বাচ্চাটা ! সে কি আছে ?

॥ ৬৫ ॥

এমনিতে শশিভূষণের মামলায় জড়িয়ে পড়ার ইচ্ছে তো হেমকান্তর ছিল না । গ্রহদোষই হবে । ছোকরা তাঁর বাড়িতে আশ্রয় নিয়েছিল । পুলিশ ধরেই নিয়েছে, হেমকান্ত এই বিপজ্জনক খুনীকে পুলিশের হাত থেকে বাঁচানোর চেষ্টা করেছিলেন । কথাটা সত্য না হলেও বিশ্বাস করবে কে ? দারোগা রামকান্ত রায় আর শশিভূষণের ব্যাপারে হেমকান্তর লিখিত বিবৃতির জন্য চাপাচাপি করেনি । এ লক্ষণটাও ভাল নয় । পুলিশ চুপচাপ তার মানে তলায় তলায় জল ঘোলা হচ্ছে । শশিভূষণের মামলায় সম্ভবত হেমকান্তকে টানা হবে । আর সেইজন্যই তাঁর বরিশাল যাওয়া । বিচক্ষণ ও করিৎকর্মা শচীন সঙ্গে থাকলে হেমকান্ত অনেকটা নিশ্চিত থাকতে পারতেন । শচীন যদি না যায় তবে সঙ্গে কাকে নেবেন তাও হেমকান্ত স্থির করতে পারছেন না । একা বরিশাল গিয়ে অনভিজ্ঞ তিনি কীই বা করতে পারেন ?

এইসব চিন্তা তাঁকে অস্থির করে তুলছিল । পুত্রবধূ এবং শচীনের কুৎসিত সম্পর্কটাও তাঁর এক কঠিন সমস্যা । এ সময়ে সুনয়নীর অভাব তিনি বড় বেশী টের পাচ্ছেন । সে যে খুব বুদ্ধিমতী ছিল

এমন নয়, তবে এসব ক্ষেত্রে মেয়েদের একটা নির্দিষ্ট ভূমিকা আছে। মনু বুদ্ধিমতী ঠিকই, কিন্তু হেমকান্তের অন্দরমহলে তো তার অধিকার নেই। সে কতটুকুই বা করতে পারে ?

রাত্রিতে খেতে বসে কিছুই তেমন খেতে পারছিলেন না। ভারী অনামনস্ক।

রোজকার মতোই চপলা সামনে বসে আছে। অনেকক্ষণ স্বশ্রুরের অনামনস্কতা লক্ষ্য করে হঠাৎ জিজ্ঞেস করল, কী নিয়ে এত ভাবছেন বাবা ?

ভাবছি কাল বরিশাল যেতে হবে, কিন্তু কোনো প্রস্তুতি নেই।

বরিশাল ! কালই কেন ? কোনো জরুরী দরকার ?

কাল না গেলেও হত। কিন্তু শশিভূষণের মামলা উঠল বলে। বেশী দেরী করা ঠিক হবে না। এখন থেকে উকিল মোক্তারের ব্যবস্থা না করলে বিপদ। পুলিশ তো আমাদেরও জড়াবে।

চপলা বিস্মিত হয়ে বলে, উকিল তো আছেই। শুনেছিলাম শচীনবাবুই নাকি কেস নেবেন।

চপলার মুখে শচীনবাবু শুনে হেমকান্ত এক ঝলক চপলার মুখের দিকে চেয়ে দেখলেন। না, কোনোরকম বৈলক্ষণ্য নেই। হৃদয়গত দুর্বলতা থাকলে এত সহজে নামটা উচ্চারণ করতে পারত না। হৃদয়দৌর্বল্যের ব্যাপারটা হেমকান্ত ভালই বুঝতে পারেন আজকাল। হেমকান্ত মাথা নেড়ে বললেন, কথা তো ছিল, কিন্তু সে আজ বলে দিয়েছে, যেতে পারবে না। হাতে নাকি অনেক মামলা।

চপলা চুপ করে রইল কিছুক্ষণ। তারপর বলল, বরিশালে আমার বাবার এক বন্ধু থাকেন। সুধাকাকা। ভাল উকিল। তাঁকে দিয়ে কি হবে ?

হেমকান্ত মুখ তুলে বলেন, স্থানীয় লোক পেলে তো সুবিধেই হয়। তবে পরিচয় তো নেই। তাছাড়া শশিভূষণ আমার বাড়িতে ছিল, সুতরাং এখানকার সব ঘটনা না জানলে তো তিনি আমার হয়ে লড়তে পারবেন না।

আপনি কী চান বাবা ? শশিভূষণকে বাঁচাতে ?

টেররিস্টদের আমি পছন্দ করি না। কিন্তু শশীকে বাঁচানো দরকার আমাদেরই স্বার্থে। হয় প্রমাণ করতে হবে যে আমরা না জেনে তাকে আশ্রয় দিয়েছি, নয় তো সে খুনের জন্য দায়ী নয়।

একটা কাজ করব ?

কী করতে চাও ?

আমি যদি আপনার সঙ্গে যাই ?

তুমি ! বলে হেমকান্ত বিস্মিত চোখে তাকালেন। পথি নারী বিবর্জিতা আগুবাঁকাও তাঁর মনে পড়ে গেল। মেয়েদের নিয়ে চলাফেরার অভ্যাসও তাঁর নেই। তবু চপলার এই প্রস্তাবটা হঠাৎ মন্দ লাগল না।

একটু দোনামোনা করছিলেন দেখে চপলা বলল, সুধাকাকা খুব বড় উকিল। তার চেয়েও বড় কথা উনি একটু স্বদেশী ঘেঁষা। আমরা তাঁর বাড়িতেও উঠতে পারব।

হেমকান্ত ইতস্তত করে বলেন, তাঁর বাড়িতে। সঙ্গে দুজন চাকর যাবে, দুটো বাচ্চা, তুমি আমি সব মিলিয়ে যে মেলা লোক।

চপলা একটু হেসে বলল, ও নিয়ে আপনি ভাববেন না বাবা। সুধাকাকার বিরাট বাড়ি, খুব বড়লোক। আমরা গেলে খুশিই হবেন।

হেমকান্ত একটু হাসলেন। বললেন, আমি তো ভাবছিলাম সবিতার স্বশ্রুরকে শেষ অবধি গিয়ে ধরব। তবে মেয়ের বাড়িতে ওঠার ইচ্ছে ছিল না।

ওরা তো ঠিক শহরে থাকে না বাবা; আপনার সুবিধে হত না।

হেমকান্ত একটু নিশ্চিন্তের হাসি হেসে বললেন, তাহলে চলো। ভালই হবে। তবে এ সময়টা

খাল নদী সব ভরভরন্ত, বঘটাও জোর গেছে, বরিশালের রাস্তা কি নিরাপদ হবে মা তোমাদের পক্ষে ?

অত ভাববেন না। বরিশালের লোকেরা তো যাতায়াত করছে।

তা বটে। তাহলে গোছগাছ করে নাও।

পরদিন প্রায় কাউকেই না জানিয়ে, এক রকম চুপিসারেই হেমকান্ত বরিশাল রওনা হলেন। সঙ্গে চপলা, দুই ছেলেমেয়ে। দুজন শক্তসমর্থ চাকর এবং একজন মুনসী।

বাড়ির আশ্রিত ও কর্মচারীরা সবাই হেমকান্তর এই সদলবলে রওনা হওয়ার দৃশ্যটা দেখল কিন্তু কেউ ভিতরকার ব্যাপারটা জানল না।

বিনোদচন্দ্র দুপুরবেলায় রঙ্গময়ীকে জিজ্ঞেস করলেন, ওঁরা গেলেন কোথায় ?

তার আমি কী জানি !

তাকে বলেনি ?

আমাকে বলবে কেন ?

বিনোদচন্দ্র মেয়েকে ভয় করেন। রঙ্গময়ী বড় স্পষ্ট কথা বলে। তাছাড়া এই মেয়েটির কাছে তাঁর এক ধরনের অপরাধবোধও আছে। বিয়ে দিতে পারেননি বলে। তাই স্তিমিত স্বরে বললেন, তাকে তো কত সবেই জানান।

যদি জানিয়েই থাকে তবে তা রটানোর জন্য নয়।

রটানোর কী আছে ?

কিছু আছে বাবা। আপনি সব বিষয়ে মাথা ঘামাবেন না।

বিনোদচন্দ্র ভালই জানেন, রঙ্গময়ীর সঙ্গে হেমকান্তর একটু গোপন সম্পর্ক আছে। তাতে রক্ষা। নইলে এ বাড়ি থেকে এতদিনে উচ্ছেদ হতে হত। মাথা নেড়ে বিজ্ঞের মতো বললেন, 'রঞ্জে রঞ্জে পাপ, রঞ্জে রঞ্জে পাপ।

কর পাপ ?

এ বাড়ির। এই তো শুনছি বাড়ির বউয়ের সঙ্গে নাকি উকিলবাবুর কী একটা কেলেকারী।

কারা বলছে ?

সবাই। কে না জানে ! শহরে ছি ছি পড়ে গেছে। সেই ভয়েই ছেলের বউকে নিয়ে কতাবাবু পালালেন নাকি ?

হতে পারে।

ভাল। খুব ভাল।

রঙ্গময়ী গিয়ে বাড়ির কর্তৃত্ব নিল। এ ব্যাপারে তার অধিকার যে প্রশ্নাতীত তা সবাই জানে। রঙ্গময়ীকে এ বাড়ির দাসদাসী কর্মচারী সবাই মানে এবং যথেষ্ট ভয় খায় ঘরে ঘরে তাল্লা লাগানো ছিলই। তবু রঙ্গময়ী সব টেনেটুনে দেখল। বিশাখার ঘরে আর একটা টোঁকি আনিয়ে নিজের বিছানা করাল।

বিশাখা শুয়ে একটা গল্পের বই পড়ছিল। বলল, কৃষ্ণকে আনাবে নাকি বারবাড়ি থেকে ?

হ্যাঁ, ছেলেটা বড্ড পর পর ভাব করছে আজকাল।

তুমিই তো পোকা ঢুকিয়েছো।

তাই হবে। বলে রঙ্গময়ী অভিযোগটা মেনে নিল।

কিন্তু বিশাখার মুখচোখে রাগ বা বিরক্তি নেই। বরং একটু কৌতুক ঝিকমিক করছে। বইটা মুড়ে রেখে সে উঠে বসে বলল, আমার মাথাতেও পোকাটা ঢোকাবে পিসি ?

কিসের পোকা ! কী যা তা যে বলিস !

চং কোরো না পিসি। গোপনে গোপনে তুমি যে স্বদেশীদের দলে তা আমি জানি।

স্বদেশী করতে তুই আবার আমাকে কবে দেখলি ? মরণ !

সব জানি পিসি । আমাকেও ওই দলে ঢুকিয়ে দাও ।

দলের খোঁজ আমি রাখি না ।

মাকালু গদাই ওরা সব তবে ঘুরঘুর করে কেন তোমার কাছে ?

ওরে চূপ, চূপ ! ওসব উচ্চারণও করতে নেই ।

তবে যে বললে খোঁজ রাখো না !

আর জ্বালাসনি । ওরা আসে কে বলল তোকে ?

আমি বারান্দার কোণ থেকে দেখতে পাই ।

খবরদার, বাপের কানে কথাটা তুলিস না । একে তো শশীর ব্যাপারে জড়িয়ে পড়ায় চিন্তায় অস্থির, এসব শুনলে শয়্যা নেবে ।

বাবাকে বলব আমি অত বোকা নাকি ? কিন্তু তোমারও সাহস কম নয় । এসব করছে কেন বলো তো !

এমনি কি করি ? ছেলেগুলো মাঝেমাঝে দিদি বলে এসে দাঁড়ায় ।

কী বলো তুমি ওদের ?

কিছু বলি না । এমনি খোঁজ খবর নিই, কোথায় কী হচ্ছে ।

ওরা তোমাকে স্বদেশী বলে চিনল কী করে ?

ফের স্বদেশী বলছিস মুখপুড়ি ?

আচ্ছা বলো, চিনল কী করে ?

শশী আসার পর থেকেই । ওরা ধরে নিয়েছে ওদের দলে ।

ধরা যখন পড়বে তখন টেরটি পাবে তুমি ।

রঙ্গময়ী তার ধারালো মুখে একটু হেসে বলল, আমার আর কিসের ভয় রে !

ওসব করো কেন ? করতে ভাল লাগে ?

সময়টা তো কাটাতে হবে । বড্ড লম্বা পরমায়ু আমার । সহজে ফুরোবে বলে মনে হয় না ।

আমাকেও একটু স্বদেশী করতে দাও না ।

কেন, তোর আবার এসব শখের কী হল ?

আমারও যে লম্বা পরমায়ু কাটাতে হবে । কিছু করেই সময়টা কাটাই ।

তার দরকার নেই । ভাল পাত্র দেখে বাপ বিয়ে দিয়ে দিক ।

বিয়ে ! ক্ষেপেছো পিসি ?

কেন, করবি না ?

মাথা নেড়ে বিশাখা বলল, কক্ষনো নয় । তোমার মতো থাকব ।

তা কেন ? আমার জীবনটা কি খুব সুখের ?

খুব সুখের পিসি । বেশ আছো তুমি ।

দূর পাগল ! রাগ থেকে ওসব বলছিস ।

মোটাই নয় । মাঝে মাঝে রাগ করি তোমার ওপর সে অন্য কারণে, কিন্তু তোমাকে ভালবাসি না ? বলো !

রঙ্গময়ীর চোখে জল এল এ কথায় । কিন্তু দুর্বলতাটা প্রকাশ হতে দিল না । মুখে হাসি টেনে ফলল, তা বাসবি না কেন ? কিন্তু বিয়েতে অনিচ্ছেটা তো ভাল কথা নয় ।

বিশাখা ঠোঁট উন্টে বলল, যা সব দেখছি তাতে আর বিয়ের কথা ভাবতেও ইচ্ছে করে না ।

কী দেখলি আবার ?

বৃন্দাবন লীলা, কেন, তুমিও কি দেখছো না ? ঢং করো না পিসি ।



রঙ্গময়ী কথাটা ঘোরানোর জন্য বলে, স্বদেশী করার কেন শখ হল বল তো !

এমনি । কিছু নিয়ে থাকি ।

কিছু শশীভূষণকে তো তুই সহ্যই করতে পারতি না । রোগা ভোগা ছেলেটা দু দিন ছিল, তুই খুব রাগ করছিলি তার ওপর ।

ভারী আনমনা হয়ে গেল বিশাখা । তারপর বলল, করতাম নাকি ? তখন বোধহয় ব্যাপারটা বুঝতে পারতাম না ।

আজ পারিস ?

পারি ।

ছাই পারিস । এখন থেকে রোজ খবরের কাগজ পড়বি । তাতে দেশের হালচাল কিছু বুঝতে পারবি । দেশকাল সম্পর্কে একটু ধারণা না হলে কি এমনি এমনি স্বদেশী করা যায় ?

বেশ তো । পড়ব ।

রোজ কিছু ।

হ্যাঁ গো । এখন একটা গল্প বলো ।

খাড়ি মেয়ে গল্প শুনতে চাস কেন ? এখনও কি ছোটো আছিস ?

আছি । অন্তত তোমার কাছে ।

বলব । রাত্রে । এখন যাই, গিয়ে ছেলেটাকে নিয়ে আসি ।

নিয়ে এসো পিসি । ও কেমন ধারা যেন হয়ে গেল । আগের মতো ঝগড়া করে না, আদর খায় না । কেমন গম্ভীর বয়স্ক বয়স্ক ভাব । ওর দিকে তাকালে আমার কান্না পায় । কী হল বল তো !

কিছু হয়নি । বড় তো হচ্ছে ।

ধুং । কী যে বলো তার ঠিক নেই । কত আর বয়স হয়েছে ? এখনো গাল টিপলে দুধ বেরোয় । চলো ওকে ধরে আনি দুজনে । ক'দিন তিনজনে মিলে এ ঘরে খুব আড্ডা হবে ।

রঙ্গময়ী একটা শ্বাস ফেলে বলে, আড্ডা দেওয়ার ছেলেই কিনা । আসতেই চাইবে না হয়তো ।

কেন আসবে না ?

মেয়েদের সঙ্গ বর্জন করেছে যে ।

আমরা আবার মেয়ে নাকি । একজন দিদি, অন্যজন পিসি । দাঁড়াও ওর বায়ু আজ ছোটাবো ।

না মা, ওসব জোর জবরদস্তি ভাল নয় । ওর মধ্যে একটু আগুন আছে । সেটা নিবিয়ে দিস না । যদি আসতে না চায় তবে জোর করার দরকার নেই ।

আমার যে ওর জন্য ভীষণ কষ্ট হচ্ছে ।

হোক । কষ্টটা সহ্য কর । পিঠোপিঠি বড় হয়েছিস কষ্ট তো হবেই । বিয়ে হলেও তো ভাইকে ছেড়ে থাকতে হত !

বিশাখা প্রতিবাদ করল না । চুপ করে বসে রইল ।

দুপুরে বিশাখার ঘরে রঙ্গময়ী একটু চোখ বুজেছে । বিশাখা ঘর থেকে বেরিয়ে এল । সিঁড়ি দিয়ে নেমে বারবাড়ি মুখে হাঁটতে হাঁটতে সে নানা কথা ভাবছিল । তার জীবনটা শুধু দুঃখের নয় । ভারী অপমানেরও । এত অপমান সয়ে সে ঝেঁড়ে আছে কী করে ? যে লোকটা তাকে বিয়ে করার জন্য আগ্রহী ছিল আজ সে মুখের ওপর জবাব দিচ্ছে ! ভারী আশ্চর্য । সেই লোকটাই আবার সাতবুড়ির এক বুড়ি দুই ছেলেমেয়ের মা এক সখবার প্রেমে পড়ে হাবুডুবু খাচ্ছে । এসব ভাবলে পাগল পাগল লাগে ভিতরটা । বিশাখা দিশাহারা হয়ে যায় । তার সমস্যা শুধু এটুকুই নয় । আজও বিশাখা বুঝতে পারছে না কোনো পুরুষের ঘর সে সত্যিই করতে পারবে কিনা । কাউকে তার সত্যিই পছন্দ হবে কিনা কোনোদিন । এক সময়ে হাড় হাভাবে শশীভূষণকে সে দু চোখে দেখতে পারত না । আজকাল তার কথা ভাবতে ভাল লাগে । শচীনকে এক সময়ে সইতে পারত না সে । আজকাল

শটীনকে দেখলে বুক দুড় দুড় করে । কোকাবাবুর নাতিকে কি তার সতিই পছন্দ ছিল ? এখন সে ঠিক করে বলতে পারবে না । বিশাখা মাঝে মাঝে ভাবে, সে বোধহয় সতিই পাগল ।

ভেজানো দরজা ঠেলে ঢুকে সে দেখতে পায়, কৃষ্ণ বিছানায় শিরদাঁড়া সোজা করে আসনশিড়ি হয়ে বসে একটা বই পড়ছে । তাকে দেখে অবাক হয়ে চেয়ে থেকে বলে, ছোড়দি !

কী করছিস শুনি !

গীতাটা পড়ছিলাম ।

খুব পড়ুয়া হয়েছো, না !

কৃষ্ণকান্ত ভারী সুন্দর করে হাসল, কী চাস বল তো !

বাবা বরিশাল গেছে জানিস তো !

জানি ।

তুই আমার সঙ্গে থাকবি চল ।

তোর সঙ্গে ? কেন ? ভূতের ভয় ?

তোর মাথা ! ভূতের ভয় তো কী, মনুপিসি আছে না !

তাহলে আবার আমাকে কেন ?

এমনি । চল, আর ঝগড়া করব না ।

কৃষ্ণকান্ত একটু হাসল, বলল, আমি যে ব্রহ্মচর্য করছি ।

তাতে কী ? আমাদের সঙ্গে থাকলে কি ব্রহ্মচর্য নষ্ট হবে ?

শুধু মা ছাড়া আর কোনো মেয়ের মুখই দেখতে নেই ।

এই যে আমার দিকে তাকালি ।

তা কী করা যাবে ? এসে পড়লি হঠাৎ, তাই ।

রোজ যে মনুপিসির কাছে সংস্কৃত পড়িস, তখন মুখ দেখিস না ?

মনু পিসি তো মায়ের মতোই । তুই কিন্তু একটু ঝগড়া করছিস ।

কখন আবার ঝগড়া করলাম ?

এই তো করছিস ।

আর করব না । চল ।

না রে । আমার একা থাকতেই ভাল লাগে আজকাল ।

তুই একটা কী রে ? ভূতের ভয়ও পাস না ?

না । ভয় কিসের ? আমি তো রোজ ণ্ডের দেখি ।

যাঃ । রাম রাম ।

আমি যেখানে থাকব সেখানেই রোজ কাকা দেখা দেবেন, জানিস ?

ফের ওসব কথা ?

তুই ভীষণ ভীতু ।

বিশাখা তার ভাইয়ের মাথায় একটু হাত বুলিয়ে দিল । মা-মরা ভাই । বলল, রোগা হয়ে গেছিস ।

রোগা ? কী যে বলিস । ইরফানদাদার কাছে রোজ লাঠি শিখি, মুণ্ডর ঘোরাই, জানিস ?

সব জানি । তবু রোগা হয়ে গেছিস ।

এটা রোগা ভাব নয় । চর্বি মরলে এ রকম চেহারা হয় ।

বাজে বকিস না । হ্যাঁ রে, আমার সঙ্গে আর এক পাতে খাবি না কোনোদিন ?

না । এক পাতে খেতে নেই ।

কী হয় খেলে ?

স্বাস্থ্যের পক্ষে খারাপ ।

কী যে সব মাথায় ঢুকেছে তোর !

গীতা শুনবি ?

আমি সংস্কৃত বুঝি না তো ।

না বুঝলেও শুনতে ভাল লাগবে । শোন না ।

পড় তাহলে ।

বিশাখা শুনল । ভারী সুন্দর উচ্চারণ আর কণ্ঠস্বরে কিছুক্ষণ পড়ল কৃষ্ণকান্ত । বিশাখা কিছু না বুঝলেও মুগ্ধ হয়ে গেল । বলল, বেশ তো পড়িস ।

খুব লাজুক হাসি হাসল কৃষ্ণকান্ত । বলল, আমার যখন ফাঁসি হবে তখন গীতার শ্লোক মুখস্থ বলতে বলতে গলায় দড়ি পরবো

ওমা বলে চমকে ওঠে বিশাখা ফাঁসি হবে মানে !

হবেই তো একদিন ।

বিশাখা বিবর্ণ মুখে বাক্যহারা হয়ে চেয়ে থাকে ভাইয়ের দিকে । তারপর বলে, ফাঁসি হবে কেন ? স্বদেশী করলে তো হয় ।

তুই কি পাগল ছিঃ ওসব কথা বলতে নেই ।

তুই কাঁদবি খুব । না ?

কাঁদবো মানে । মরেই যাবো তাহলে ।

হি হি । খুব মজা হবে । বাবা কী করবে তখন ?

এইসব বুঝি ভাবিস বসে বসে ?

খুব ভাবি । আর ভীষণ মজা লাগে । কৃষ্ণকান্তর ফাঁসি হচ্ছে আর তার বাবা কাঁদছে দিদিরা কাঁদছে দাদারা কাঁদছে মনুপিসি কাঁদছে, হি হি হি হি...

থাপ্পড় খাবি এবার । চুপ কর তো ।

আমি কিন্তু সাহেব মারবোই ।

মারা বের করছি তোমার । ঘরে তালো দিয়ে রাখব ।

হঠাৎ জানালা দিয়ে বারবাড়ির মাঠের দিকে চেয়ে কৃষ্ণকান্ত চমকে উঠে বলে, এই ছোড়দি ! ওই দেখ, শটীনদা আসছে । উল্টোখুস্কো চুল, রাগী মুখ । কী হয়েছে রে ঠুঁর ?

## ॥ ৬৬ ॥

যে সময়টায় রেমির পেটে ছেলেটা এল সেটা এক অদ্ভুত সময় । তার আর ধ্রুবর মধ্যে এক বিশ্বাস-অবিশ্বাস, ত্যাগ ও গ্রহণের টানাপোড়েন । ভারী অনিশ্চিত তাদের দাম্পত্য জীবনের ভবিষ্যৎ । রাজা তখনো হানা দেয় টেলিফোনে, বলে, চলো রেমি, তোমাকে একটা ভদ্র জীবনযাপন করার পথ করে দিই । ও বাড়িতে আর থেকো না । ওরা তোমাকে মেরে ফেলবে ।

এ প্রস্তাবের জবাবে রেমি তখন কিছুই স্থির করে বলতে পারে না । সে কিছুতেই তার পরিচিত ছক, তার চেনা গণ্ডী ছাড়তে সাহস পায় না আর ।

লতু যদিও ভীষণ বাচ্চা মেয়ে এবং বাড়িতেও বেশীক্ষণ থাকে না তবু একদিন সে তার বউদিকে লক্ষ করল । বলল, তোমার কী হয়েছে বলো তো !

কী আবার হবে ! কিছু না ।

ছোড়দার সঙ্গে তোমার হ্যাকনীড সম্পর্কটার কথা জানি । সেটা তো নতুন কিছু নয় । কিন্তু

তোমাকে খুব ফ্যাকাসে দেখাচ্ছে আজকাল। কী গো ?

ভারী লজ্জা পায় রেমি। নন্দকে লজ্জার কিছু নেই। তবু পায়।

লতুর মারফৎ কথাটা অতএব প্রচার হয়ে গেল।

আগেরবার কৃষ্ণকান্ত পক্ষ ছিলেন না। সম্ভবত কূট সন্দেহবশে তাঁরই আভাসে ইঙ্গিতে পেটের বাচ্চাটা নষ্ট করা হয়েছিল। কিন্তু এবার তিনি রেমির পক্ষ নিলেন। একদিন সম্মেহে ডেকে বললেন, কোথাও গিয়ে একটু ঘুরেটুরে আসবে ? স্বাস্থ্যকর কোনো জায়গায় ?

রেমি অবাক হয়ে বলে, কেন বাবা ? আমি তো এখানেই বেশ আছি।

রোগা হয়ে গেছ মা, তাই বলছিলাম। মনটাকে সর্বদা উঁচুতে রেখো। ঠাকুর দেবতার কথা ভেবো। পবিত্র চিন্তা কোরো। এ রকমই নিয়ম।

পবিত্র চিন্তা কী রকম তা জানে না রেমি। তবে সে কোনো অপবিত্র চিন্তাও করে বলে মনে পড়ল না। সে মাথা নেড়ে বলল, আচ্ছা।

এসব পুরানো প্রথার কোনো কার্যকারিতা আছে কিনা আমি জানি না। তবে না জেনে কিছু ভেঙে ফেলতেও আমার মন সরে না। আমার এক বুড়ি মাসী আছে। তাকে খবর দিয়েছি। এখানে এসে কিছুদিন থাকবে। এ সময়ে বাড়িতে একজন বয়স্ক অভিব্যক্তির দরকার।

সময়টা এক রকম ভালই কাটছিল রেমির। কৃষ্ণকান্তর মাসী মানুষটি খুবই শুচিবায়ুপরায়ণ। তবে মানুষটা হাসিখুশি। রেমির তাকে খারাপ লাগল না। কৃষ্ণকান্ত একজন মেয়ে গায়োনাকোলজিস্টকে সাপ্তাহিক চুক্তিতে নিয়োগ করলেন, সে এসে প্রতি রবিবার রেমিকে দেখে যায়। পুষ্টিকর খাবার, ওষুধপত্র ইত্যাদির এক বেশ রাজসূয় আয়োজন হল। তাকে নিয়ে ছোটোখাটো একটা হৈ-চৈ !

ধুব আর সে আজকাল একসঙ্গে থাকে, নীচের ঘরে। ধুব যে তাকে আগের চেয়ে কিছু বেশী ভালবেসেছে তা নয়। তবু পেটে বাচ্চাটা আসার পর থেকে আর দূর দূরও করছে না আগের মতো। মায়া ! হবেও বা

ধুব নিজেই একদিন রেমিকে বলল, আটকে গেলে রেমি, বাঁধা পড়ে গেলে।

তার মানে ?

এই যে ছেলের মা হতে চলেছো, খুব জটিল হয়ে গেল সব কিছু।

তাই নাকি ? আমার তো কিছু জটিল মনে হচ্ছে না ! এরকমই তো হওয়ার কথা।

স্বাভাবিক নিয়মে হওয়ারই কথা বটে, কিন্তু আমি তো সাধারণ নিয়মে চলি না।

তাহলে তুমি তোমার নিয়মেই চলো। আমি চলি আমার নিয়মে।

খুব চ্যাটাং চ্যাটাং কথা শিখেছো দেখছি।

সব কিছুর মধ্যে অত জটিলতা দেখ কেন ?

জটিল বলেই জটিল দেখি। তোমার মতো বোকা তো নয়।

তুমিও এক রকম বোকা। স্বাভাবিক কিছুই তোমার ভাল লাগে না।

শোনো খুকি, তুমি বাস করো কৃষ্ণকান্তর পুরানো মূল্যবোধের জগতে। ওই লোকটাও যুগের সঙ্গে নিজেকে তেমন বদলে নিতে পারেনি। পারেনি বলেই মস্তিষ্ক গেছে, রাজনীতিতে প্রভাব কমে যাচ্ছে, কেউ তেমন পাত্তা দিচ্ছে না। কিন্তু তোমরা শিশুর-পুত্রবধু যে জগতে বাস করো তা তো আর বাস্তবিকই নেই। সমাজ একটা স্থাণু জিনিস নয়। বার বার নানা চাপে পড়ে, নানা নতুন চিন্তাভাবনার ফলে তার বিবর্তন হয়। ব্যক্তিগত ধ্যান-ধারণাও পাটে যায়।

বাইরের সমাজে কী হচ্ছে তা দিয়ে আমার কী ?

তোমার কিছুই নয় ?

না। আমি বেশ আছি।

খুব হেসে মাথা নেড়ে বলে, না, তুমি বেশ নেই। আমি তোমাকে এত নিশ্চিত থাকতে দেবো ও না।

কেন দেবে না ?

তোমাকে আমার মতো করে জগৎটাকে দেখতে হবে, কৃষ্ণকান্তর মতো করে নয় বাবার নাম ধরছো ?

ধরার জন্যই নাম। এতে যে চমকে উঠলে ওটাও সংস্কার। জানো, বিদেশে আজকাল মা-বাপের নাম ধরে ডাকাটাই রেওয়াজ ?

মা গো ! ভাবতেও পারি না।

পারো। অভ্যাসে মানুষ সব পারে। পুরোনো ধ্যান-ধারণা ছেড়ে একটু ঝরঝরে মন নিয়ে ভাবতে শেখো। তোমার বাস্তবিকই ব্রেনওয়াশ হয়ে গেছে।

মোটাই না। ব্রেন ওয়াশ হয়ে থাকলে তোমারই হয়েছে। এমন সব কিস্তি কথা বলো যে পিস্তি জ্বলে যায়।

খুব একটু হেসে বলে, তুমি তো খুব ঘর-সংসার সম্পর্ক সতীত্ব ইত্যাদিকে মানো। তুমি কি জানো যে আমাদের পূর্বপুরুষরা যখন জঙ্গলে বাস করতেন তখন বিয়ে-টিয়ে ছিল না, সম্পর্ক মানা হত না, ঠিক পশু সমাজের মতোই যে কোনো নারী-পুরুষ মিলিত হত। আমরা তাদেরই বংশাবতংস নানা রকম কৃত্রিম নিয়ম-কানুন বানিয়ে ব্যাপারটাকে ছেলেমানুষী করে তুলেছি। জানো এসব ?

জানি। তোমাকে আর বক্তৃতা দিতে হবে না। আমি তোমার পছন্দমতো নিজেকে বদলাতে পারব না।

খুব একটু হতাশার ভাব প্রকাশ করল। তবে হাসলও। বলল, তুমি ইংলিশ মিডিয়ামে পড়তে না ?

আহা, জানো না যেন।

জানি, কিন্তু তোমার হাবভাব দেখে বিশ্বাস হতে চায় না। তোমার স্বস্তির তোমাকে এ রকম হিপনোটাইজ করল কী করে বলো তো ! আমাকে তো পারেনি। ইন ফ্যাকট আমাদের তিন ভাইয়ের কেউই, ওই বুড়োর দলে নই। দাদা একজন ডিভোর্সীকে বিয়ে করেছে, বুড়োর খোঁতা মুখ ভৌতা করে দিয়েছে।

তুমি পারোনি বলে দুঃখ হচ্ছে ?

আমি অন্যভাবে চেষ্টা করেছিলাম। এ বংশে যা আজও হয়নি সেই ডিভোর্স করে কৃষ্ণকান্তর মুখটাকে যথার্থ কৃষ্ণকান্ত করে দিতাম যদি তুমি একটু কো-অপারেট করতে। রাজার সঙ্গে যদি বোমবাই পালিয়ে যেতে রেমি, তবে সোনায়ে সোহাগা হত।

আর লিভিং টুগেদার ! সেটার কথা বললে না ! সেই যে মেয়েটা—

খুব একটু গম্ভীর হয়ে জিজ্ঞেস করে, ফিলিং জেলাস ?

একটুও না। যাও না তার কাছে, যাও।

যাবো ?

এক্সকুজি যাও।

খুব যে তাড়া দেখছি ! এত উদার হলে কবে থেকে ?

কেন, আমি কি খুব পজেন্সিভ ? যদি তাই হতাম তাহলে আমার কাছে তুমি অন্য মেয়ের কথা বলতে পারতে ?

তা বলে তুমি উদারও নও।

সব উদারতাই কি ভাল ? কতবার তো তোমাকে বলেছি আমাকে একবার মেয়েটাকে দেখতে দাও। কই, দেখাও নি তো ! তুমিও তো উদার নও তাহলে !

তুমি তো মেয়েটাকে পারলে খুন করবে।

না, করব না। তোমার পছন্দের মেয়েকে খুন করব কেন? এখন দেখাও। দেখি তুমি আমার চেয়ে কত বেশী উদার!

ঠিক আছে। দেখাবো।

কবে?

দেখাবো একদিন।

এখানে নিয়ে আসবে?

ধুব একটুও হাসছিল না এখন। মাথা নেড়ে বলল, না। তবে ভেবো না, কথা যখন দিয়েছি ঠিকই রাখব।

একটু বিবর্ণ হয়ে যাচ্ছিল রেমি। ধুব দেখাবে! সত্যি? কিন্তু তখন কি সহ্য করতে পারবে সে? একটু ঘন শ্বাস পড়ছিল তার। বুক ধড়ফড় করছিল।

ধুব আনমনে অন্য দিকে চেয়ে বলল, কিন্তু কোনো সীন করো না। মেয়েটার প্রতি আমার কোনো দুর্বলতা নেই। একটুও না। আমি শুধু এক্সপেরিমেন্ট করছি একটা।

কিসের এক্সপেরিমেন্ট?

একজন নারী ও পুরুষের সম্পর্ক কতটা নির্বিচার হতে পারে। বিশেষ করে যেখানে প্রেম নেই, অধিকারবোধ নেই, আবেগ নেই, অথচ সম্পর্ক আছে।

রেমি বলল, তুমি একটা পাগল। পাগল। ওরকম কিছু হয় না। আর যদি হয়ই তবে আমার সঙ্গেই কেন ওরকম করো না! যা কিছু এক্সপেরিমেন্ট তা আমার ওপরেই হোক।

ধুব মাথা নেড়ে বলল, না রেমি। এর জন্য দুজনেরই মানসিক প্রস্তুতি চাই ট্রেনিং চাই। তোমার তা নেই।

নেই আবার! এত উপেক্ষা এত অবহেলা আর নিষ্ঠুরতা সইলাম তবু কি ট্রেনিং হয়নি? আর কত চাও?

ধুব এ কথার জবাব দিল না। কিন্তু আচমকা রেমিকে আদর করল। খুবই উষ্ণ, খুবই আন্তরিকভাবে। মিষ্টি অবসাদে যখন দুজনেই শরীর এলিয়ে দিল তখন রেমি জিজ্ঞেস করল, তোমার আনন্দ হয় না? থ্রিল হয় না?

কিসের আনন্দ?

এই যে বাবা হবে।

ধুব একটু হাসল, বলল, হয়। কিন্তু সে তোমার আনন্দের মতো নয়।

তুমি কি মঙ্গলগ্রহের মানুষ? কিছুই আমাদের মতো নয়?

বোধ হয় তাই। এই পৃথিবীতে বহু গ্রহান্তরের লোক বসবাস করে। তারাই একদিন সংস্কার ও গোঁড়ামীমুক্ত, বুদ্ধি ও যুক্তিগ্রাহ্য একটি সমাজ-ব্যবস্থা চালু করবে। সেদিন তুমি আর তোমার স্বপ্নের মতো লোক যাবে নিবাসনে।

আঃ, ফের বড় বড় কথা। ছেলে হবে, আনন্দ হচ্ছে কিনা সেইটে বলো।

বললাম তো, হচ্ছে।

তোমার মুখ দেখে কিছু বোঝা যায় না। কেমন গোমরা হয়ে থাকে।

বাচ্চা হওয়া কি একটা সাজঘাতিক ঘটনা নাকি? ভিথিরিদেরও হচ্ছে তো।

তোমার তো বলতে গেলে প্রথম। একটাকে তো খুন করেছে।

ধুব চুপ করে গেল। তারপর রেমিকে বুকের মধ্যে টেনে নিয়ে খুব ভালবাসল কিছুক্ষণ। তারপর বলল, এখনো সেজন্য দুঃখ পাও, না?

পাবো না! কী নিষ্ঠুর তুমি!

বাচ্চাটা কি আমারই ছিল রেমি ?

তোমার নয় তো কার ? কী করে যে সমীরকে তোমার সন্দেহ হল ! ছিঃ !

ধুব মাথা নাড়ল, আমার নয় । সন্দেহ ছিল তোমার স্বশ্বরের । আমি নিমিত্ত মাত্র ।

তখন কেন রুখে দাঁড়াওনি ? এত যে তুমি মুক্তমনা মানুষ তখন সাহসটা কোথায় ছিল ?

সাহস আজও নেই । সে কথা থাক । আমি নিজে উদ্যোগী হয়ে বাচ্চাটা নষ্ট না করলে কী হত

জানো ?

কী হত ?

তোমার স্বশ্বর কিছুতেই তোমাকে বাচ্চা নষ্ট করার প্রস্তাব দিতে পারত না । স্বশ্বর হয়ে সেটা তো সম্ভব নয় । অথচ তাঁর সন্দেহ ছিল, বাচ্চাটা তাঁর বংশের নয় । সেক্ষেত্রে উনি আরো ক্রুড কোনো পন্থা নিতেন । সেকথা তোমার না শোনাই ভাল । হয়তো বিশ্বাসও করবে না ।

করব । বলো ।

হয়তো একদিন জগাদা বা তোমার স্বশ্বরের বংশবদ্য আর্কাকেউ সিঁড়িতে তোমাকে ধাক্কা দিয়ে ফেলে দিত অসাবধানতার ভান করে । কিংবা তোমার বাথরুমে তেল ঢেলে পিছল করে রাখা হত । কিংবা তোমার খাবারে মিশিয়ে দেওয়া হত কোনো ওষুধ । তোমার নিরাপত্তার কথা ভেবে আমিই অগ্রণী হয়ে নিরাপদে ব্যাপারটা করে ফেলি ।

এতটা ? খুব অবাক হয়ে রেমি বড় বড় চোখ করে ধুবর দিকে চেয়ে থাকে । চোখে ভয় ।

ধুব খুব নিবিড়ভাবে বুকে আরো চেপে ধরে রেমিকে । বলে, আমাকে বিশ্বাস করবে না তুমি, জানি । স্বশ্বরমশাই তোমাকে প্রাণাধিক ভালবাসেন এও সত্য রেমি, কিন্তু বংশমর্যাদা ঠঁর কাছে আরো অনেক বড় । আমার মাকে মরতে হয়েছিল শুধু ওই জেদী লোকটার অদ্ভুত কিছু ধারণার জন্য ।

বলো, আমি শুনব ।

না, একদিনে এত নয় । তোমার মাথা দুর্বল । এত নিতে পারবে না । পেটে বাচ্চা রয়েছে, এ সময়ে এসব বিষয় কাহিনী তোমার পক্ষে ভালও নয় ।

আমাকে যদি জগাদা ধাক্কাই দিত তাহলে নয় পড়ে মরতামই, তুমি কেন আমাকে বাঁচানোর চেষ্টা করেছিলে ? তুমি তো আর আমাকে ভালবাসো না

আমি তোমাকে এক রকম ভালবাসি রেমি । রকমটা আলাদা । তোমাকে অনেকবার বলেছি, তুমি বুঝতে পারোনি । আমি তোমাকে একজন পৃথিবীবাসী হিসেবেই ভালবাসি ।

আর কিছু নয় ?

আর কী চাও রেমি ?

আমি যে কী চাই জানি না । কিন্তু তোমার চোখ দেখে মনে হচ্ছে তুমি মিথ্যে কথা বলছ । তুমি আমাকে তার চেয়ে একটু বেশী ভালবাসো ।

না, রেমি । আমি ভাল না বাসার চেষ্টা করছি । আমি চেষ্টা করছি আমার ভালবাসাকে ব্যক্তিবিশেষে সীমাবদ্ধ না রেখে সকলের প্রতি সমানভাবে ছড়িয়ে দিতে । তোমার প্রতি তাই আমার বিশেষ দুর্বলতা থাকতে নেই ।

সেটা তো থিওরেটিক্যাল কথা । আসল কথাটা ?

আসল কথা ! ধুব একটু ভাবল । তারপর রেমিকে ছেড়ে দিয়ে নিরুত্তাপভাবে চিৎ হয়ে শুয়ে মশারির চালের দিকে চেয়ে থেকে বলল, তোমার প্রতি আমার একটু আসক্তি ছিল । কবে কেমন করে সেটা হল তা বলতে পারব না । হয়তো আমার প্রতি তোমার টান দেখেই রেসিপ্রোকাল একটু টান আমারও হয়েছিল । সেটা ভাঙতেই আমি আর একটা মেয়েকে আমদানী করেছি । সে তোমার প্রতিপক্ষ নয় । সে আসলে আমাকে একটা ভারসাম্য রক্ষায় সাহায্য করছে । তাই বলছিলাম তাকে

তোমার হিংসে করার কিছু নেই।

রেমি বড় অবাক হল। ধ্রুব পাগলামি কোথায় পৌঁছেছে তা ভেবে একটু ভয়ও পেল সে। গাঢ়স্বরে বলল, ওগো, পায়ে পড়ি। আমাকে বরং ভালবেসো না। কিন্তু ভারসাম্য আনতে গিয়ে তুমিই যে ব্যালাস্ট হারিয়ে ফেলছো! এসব কী হচ্ছে বলো তো!

খুব অদ্ভুত! না?

ভীষণ অদ্ভুত। এ যে পাগলামী!

এর চেয়ে নরম্যাল আর কী হতে পারে রেমি? আজ পাগলামী বলে মনে হলেও ভবিষ্যতের মানুষ যদি কখনো আমার এক্সপেরিমেন্টের কথা জানতে পারে তাহলে বলবে বিংশ শতাব্দীতে এই একটা সত্যিকারের নরম্যাল লোক ছিল।

ওই মেয়েটাও কি তোমার মতো পাগল?

মেয়েটা! ওঃ, মেয়েটার কথা যে তুমি কেন ভুলতে পারছো না!

ভুলব? কী সর্বনেশে সব কাণ্ড করছো তুমি, এ কি ভোলা যায়?

তোমাকে অনেকবার বলেছি রেমি, মেয়েটা কোনো ফ্যাকটর নয়। মেয়েটা অ্যাকচুয়ালি নন-এনটিটি।

কেন নন-এনটিটি হবে? সেও তো একটা মানুষ?

মানুষ তো বটেই। কিন্তু তোমার প্রতিপক্ষ নয়। আবার বলছি আমি তার প্রেমে পড়িনি। আমি একটা সার্বজনীন ভালবাসা আয়ত্ত্ব করার চেষ্টা করছি।

তুমি পাগল।

এই বলে রেমি অনেকক্ষণ কাঁদল। ধ্রুব বাধা দিল না। চুপ করে শুয়ে রইল।

এই ঘটনার কিছুদিন পরে এক দুপুরে একটি মেয়ে টেলিফোনে রেমিকে চাইল

রেমি গিয়ে ফোন ধরতেই ওপাশ থেকে মেয়েটি বলল, আমি ধারা।

ধারা! কে ধারা?

আমি আপনার সঙ্গে একটু দেখা করতে চাই।

কেন বলুন তো!

দরকার আছে। একটু এক জায়গায় আসতে পারবেন?

রেমি অস্বস্তিতে পড়ে বলে, না, সেটা সম্ভব নয়।

কেন, বাড়ির রেস্ট্রিকশন আছে?

তাও আছে। আমার শরীরও ভাল নয়।

আপনি যে প্রেগন্যান্ট তা আমি জানি। কিন্তু বেশী দূর নয়।

আপনিই আসতে পারেন তো! আমার স্বপ্নরমশাই আমাকে বেরোতে নিষেধ করে গেছেন।

আমি আসব? মেয়েটা যেন অবাক হয়ে বলে, সেটা কি ভাল দেখাবে?

আপনি কে বলুন তো! ধারা নামে কাউকে আমার মনে পড়ছে না তো!

আপনার সঙ্গে আমার পরিচয় নেই। ধ্রুব কি আপনাকে কিছু বলেনি?

ও কী বলবে?

আমার পরিচয়!

না। ও কি চেনে আপনাকে?

মেয়েটি একটু হাসল, চেনে। তাহলে আমিই কি আসবো?

আপনার ইচ্ছে।

ধ্রুব বলছিল আপনি আমাকে দেখতে চান!

এ কথায় রেমি হঠাৎ চমকে ওঠে। তারপর স্তব্ধ হয়ে যায়।



মেয়েটি আবার বলে, আমি কি সত্যিই আসব ?

রেমির মাথাটায় গুণগোল লাগতে থাকে । ধুব কথা রেখেছে, কিন্তু সে নিজে কেন মাঝখানে নেই ? এখন কী বলবে রেমি ? তার পা কাঁপছে । বুক কাঁপছে ।

রেমি অত্যন্ত বিতৃষ্ণার সঙ্গে বলে, আপনার ইচ্ছে ।

আমার তো ইচ্ছে নেই । আপনার ইচ্ছে বলেই যাওয়া ।

ঠিক আছে, আসুন ।

এখন গেলে আপনার কোনো অসুবিধে নেই তো !

না, অসুবিধে কিসের ?

তাহলে উইদিন ফিফটিন মিনিটস ! কেমন ?

ঠিক আছে ।

পনেরোটা মিনিট কী করে যে কাটল রেমির তা আজ আর সে বলতে পারবে না । ওই পনেরো মিনিট তার কাছে পৃথিবীটা একদম শূন্য হয়ে গিয়েছিল । কোনো অনুভূতি, রাগ, হিংসে, জ্বালা কিছুই বোধ করেনি সে । বোধ করেনি শীত বা তাপ । যা সন্দেহের মধ্যে ছিল, অনুমানের রাজ্যে ছিল, যা ছিল চোখের আড়াল এবং যাকে শেষ পর্যন্ত চোখমুখ বুজে ভুলে থাকা যেত সেটা এমন রূঢ় বাস্তব হয়ে আসছে দেখে বড় অসহায় হয়ে গিয়েছিল রেমি । দুচোখ দিয়ে অজস্র ধারায় শুধু জল বেয়ে পড়ল কোলের ওপর । পায়ের তলা থেকে বাস্তবিকই মাটি সরে যাচ্ছে ।

একজন চাকর এসে বলল, আপনার সঙ্গে একজন দেখা করতে এসেছেন । ড্রয়িংরুমে বসিয়েছি ।

রেমি আর চমকাল না । উঠে ড্রেসিং টেবিলের সামনে গেল । চোখ মুছে একটু পাউডার দিল মুখে । চুলটি আঁচড়ে নিল । তারপর কলিং বেল টিপে চাকরকে ডেকে বলল, মেয়েটাকে এঘরে নিয়ে আয় ।

মেয়েটি ঘরে ঢুকতেই ঘরটা যেন ভরে গেল স্নিগ্ধ রূপে । রেমি আশা করেছিল, ধুব যেমন বলেছে তেমনই হবে বোধ হয় মেয়েটা । কালো-টালো, কুচ্ছিৎ, তা মোটেই নয় । আদিকালে যেমন পানপাতার মতো মুখের কথা শোনা যেত এর মুখটাও তেমনি ভরাট, নিটোল চোখের মণি একটু খয়েরী, কিন্তু মস্ত মস্ত দুটো চোখ । ঠোঁট পূরন্ত । ভগমগ করছে শরীর । চোখের দৃষ্টি অতি উজ্জ্বল । মুখে মিষ্টি ভদ্র হাসি । পরনে মণিপূরী কাজ করা তাঁতের দারুণ শাড়ি । রেমি একটু হতভম্ব হয়ে গিয়েছিল দেখে ।

## ॥ ৬৭ ॥

আজ শটীনের চেহারার মধ্যে একটা দুর্যোগের পূর্বাভাস ছিল । ফর্সা মুখ লাল টকটক করছে কোনো অভাঙ্গুরীণ উত্তেজনায় । চুল অবিন্যস্ত । চোখের দৃষ্টিতে নীরব হুংকার । কৃষ্ণকান্ত আর বিশাখা পরস্পর মুখ তাকাতাকি করে বসে রইল । শটীন সাইকেলটা স্ট্যাণ্ডে তুলল একটা হিংস্র ঝটকায় । তারপর অতি দ্রুত পায়ে ভিতরবাড়ির দিকে চলে গেল ।

কৃষ্ণকান্ত দিদির দিকে তাকিয়ে হৃ কঁচকে বলল, কোথায় গেল বল তো !

বিশাখা খুব স্তিমিত গলায় বলে, বোধহয় বউদির খৌজ করতে ।

কৃষ্ণকান্ত খুবই বুদ্ধিমান । সে যতই ব্রহ্মচর্য করুক আর স্বেচ্ছা নিবাসনে বাস করুক, ঘটনার আঁচ সে ঠিকই পায় । তাই, প্রসঙ্গটা ঘুরিয়ে বলল, তুই বরং যা ছোড়া দি । গিয়ে শটীনদাকে জিজ্ঞেস কর কাকে খুঁজছে ।

দাসী-চাকররাই বলবে। আমার যাওয়ার কী ?

বিশাখা বিবশ হয়ে কিছুক্ষণ বসে রইল। শচীন এই এস্টেটের উকিল হলেও বাইরের লোক। এ বাড়ির অন্দরমহলে হটহাট ঢুকে যাওয়ার অধিকার তার নেই। তার ওপর শচীন কেন অসময়ে এসে হাজির হয়েছে তাও জানে বিশাখা। সব মিলিয়ে তার ভিতরেও একটা রাগের ঝাঁঝ উঠছিল। কিন্তু বেশী কিছু করার সাধ্য তার নেই। বাবা যদি একটু কঠিন ধাতের মানুষ হত তবে শচীনের এত বাড়ি হতে পারত না।

কৃষ্ণকান্ত এবার একটু চাপা গলায় বলে, শচীনদা একটু রেগে আছে মনে হচ্ছে।

কেন রেগে আছে তা বিশাখা অনুমান করতে পারে। ভিতরকার ঘটনা সে সবটা জানে না ঠিকই, কিন্তু বউদির এই যে হঠাৎ বরিশাল যাওয়া এটা যে এমনি নয়, ভিতরে যে আরো একটু কিছু আছে তা বুঝতে তার অসুবিধে হয় না। শচীনকে ফাঁকি দিয়েই গেছে বউদি। মুখের গ্রাস সরে যাওয়ার খবর পেয়ে এখন জখমী বাঘের মতো এসেছে শচীন। কি কেলেকারী হয় কে জানে! কৃষ্ণকান্তর কথার জবাবে শুধু বলে, হ্যাঁ, খুব তেজ হয়েছে। দারোয়ান দিয়ে গলাধাক্কা দেওয়ালে ঠিক হত।

কৃষ্ণকান্ত বলে, যাঃ, কী যে বলিস!

ঠিকই বলি। বাবা ওরকম মেনীমুখো বলেই এসব কেলেকারী হচ্ছে। অন্য কোনো জমিদারবাড়ি হলে ওকে ঘাড়ধাক্কা তো দিতই, বাড়ির বউকেও চুলে দড়ি বেঁধে ঝুলিয়ে রাখত।

কৃষ্ণকান্ত কোনো কথা বলল না। কৃষ্ণকান্ত যে চূপ করে রইল তার কারণ একটাই। ভিতরে ভিতরে সে নিজের বয়সকে ছাড়িয়ে একটু বেশী পরিণত হয়ে উঠেছে। সে তার ছোড়দির মতো সহজে উত্তেজিত হয় না। প্রতিক্রিয়ার বদলে তার ভিতরে শুরু হয় বিচার বিশ্লেষণ এবং সমাধানের চেষ্টা। বউদির সঙ্গে যে শচীনদার একটা সম্পর্ক তৈরি হয়েছে তা শোনা আছে তার। অনেক ভেবে সে এই সমস্যার কোনো সমাধান খুঁজে পায়নি। এ কথাও ঠিক যে, তার বাবা নিরীহ, বড়দা কনককান্তি ব্যক্তিত্বহীন এবং সে নিজে ছেলেমানুষ। সেই কারণেই এই প্রায় অভিভাবকহীন পরিবারের কোনো রক্ষাকবচ নেই।

কৃষ্ণকান্ত ছোড়দির দিকে একদৃষ্টে খানিকক্ষণ চেয়ে থেকে বলল, তুই তো খুব ঝগড়াটে। এখন গিয়ে ঝগড়া করতে পারিস না ?

ঝগড়া! বিশাখা অবাক হয়ে বলে, কার সঙ্গে ?

কেন, শচীনদার সঙ্গে !

ঝগড়া করব কেন ?

তুই তো ঝগড়ার কথাই বলছিস এতক্ষণ। এখন যা না গিয়ে ঝগড়া করে আয়।

আমার বয়ে গেছে। যে যার কর্মফল ঠিক ভুগবে। ভগবান তো আছেন। এই বলে বিশাখা উঠে গেল।

শচীনের মুখোমুখি হওয়ার কোনো ইচ্ছা ছিল না বিশাখার। তবু একবার শচীনের রাগে গনগনে মুখটা দেখতে ইচ্ছে করছিল। বৃকের জ্বালা খানিকটা জুড়োয় তাহলে।

দোতলায় উঠবার সিঁড়ির গোড়ায় যখন বিশাখা প্রথম ধাপটায় পা তুলেছে তখন শচীন নেমে এল ঝড়ের বেগে। সামনে বিশাখাকে দেখেই একটু থমকে গেল।

বিশাখা দেখল, শচীনকে একদম অস্বাভাবিক দেখাচ্ছে। যেন বা উদ্ভাসেরই দৃষ্টি তার চোখে।

শচীন তাকে ধমকের স্বরে জিজ্ঞেস করে, চপলা কোথায় ?

বিশাখার আপাদমস্তক এই প্রশ্নে জ্বলে যায়। এই পুরুষটির প্রতি তার কিছু দুর্বলতা দেখা দিয়েছিল বটে, কিন্তু তার আর কিছুই এখন অবশিষ্ট নেই। উপরন্তু লোকটার বেহায়া নির্লজ্জপনা দেখে তার ভিতরটা আরো গরম হয়ে গেল।

বিশাখা পাশ্টা প্রশ্ন করে, আপনি কার ছকুমে ওপরে গিয়েছিলেন ?

তার মানে ? শুকুমটা আবার কার কাছ থেকে নিতে হবে ? তোমার কাছ থেকে নাকি ?  
বাইরের লোক হয়ে আপনি যখন-তখন ভিতরবাড়িতে ঢুকবেন কেন ?

আমার দরকার ছিল ।

কী দরকার তা আমার জানার প্রয়োজন নেই ; কিন্তু আপনি পুরুষমানুষ, একটু লজ্জাবোধ থাকলে কখনোই আপনি মেয়েদের অন্দরমহলে ঢুকতেন না ।

ছোটো মুখে বড় কথা মানায় না বিশাখা । যাক, এ তর্ক হেমকান্তবাবু ফিরলেই হবে । আমি জানতে চাই চপলা বরিশাল গেল কেন । তুমি বলতে পারো ?

আমার বউদিকে নাম ধরে ডাকার সাহস কবে থেকে হল ?

যবে থেকেই হোক, জবাবটা তোমার জানা আছে ?

জানলেও বলব কেন ? আপনি কে ?

কথা কাটাকাটি বেশ উচ্চগ্রামে উঠে যাওয়ায় সিঁড়ির মুখে দাসদাসীদের উঁকিঝুঁকি শুরু হয়ে গেল । বিশাখা যথেষ্ট তপ্ত বোধ করছে ভিতরে ভিতরে ।

শচীন বরং কিছু অপ্রস্তুত । এ বাড়ির মেরুদণ্ডহীন কর্তার আমলে সেই প্রকৃতপক্ষে এস্টেটের কর্ণধার হয়ে দাঁড়িয়েছে । তার দৌলতেই জমিদারীর ডুবুডুবু নৌকো এখনো কোনোক্রমে টিকে আছে । এ বাড়ির কেউ তার মুখের ওপর কথা বলবে এটা ভাবাই যায় না । কিন্তু বলছে । এবং খুব অন্যায্য কথাও বলছে না । কিন্তু শচীনের ন্যায্য অন্যায্য বিচারবোধ ক্রিয়াশীল নয় । তার মাথায় এখন ঝড় । চপলা ছাড়া তার পৃথিবী অন্ধকার । বিশাখার মুখে এরকম ন্যায্য কথাবার্তা শুনে সে দিশা হারিয়ে ফেলে বলে, আমি কে তা জানো না ? আমি নইলে তোমাদের ভিটেয় ঘুঘু চরত তা জানো ?

জানি । আপনি উকিল । বাবা আপনাকে এস্টেটের কাজ দেখার জন্য মাইনে দিয়ে রেখেছেন । সোজা কথায় আপনি আমাদের কর্মচারী । আপনার কী অধিকার বাড়ির বউ কোথায় গেছে তা আমার কাছে জানতে চাওয়ার ?

শচীন এটা সহ্য করতে পারল না । একদম বেহেড হয়ে গিয়ে সে বলল, সরিয়েছো ! তোমরাই চপলাকে সরিয়েছো ! কিন্তু পারবে বাঁচাতে ? চপলা আমার । আমি যেমন করে পারি তাকে দখল করবই । দেখি তোমরা কী করতে পারো ।

যে রাগ ও হতাশা বহুকাল ধরে বিশাখার ভিতরে মাথা কুটে কুটে একটা বেরোবার পথ খুঁজছিল আজ সে পথ পেয়ে গেছে । বিশাখা ঝুঁসে উঠে বলল, খুব আসকারা পেয়ে গেছেন তাই না ? কিন্তু এর ফল আপনাকে ভোগ করতে হবে । হেমকান্ত চৌধুরীকে আপনি যত নিরীহ ভাবেন তত নিরীহ যে তিনি নন সেটা আমিই বুঝিয়ে দেবো আপনাকে । বাবা বরিশাল থেকে ফিরুন, তারপর বুঝবেন ।

কী বুঝবো ? কী করবে তোমরা আমার ?

লেঠেল দিয়ে ঘরবাড়ি ভেঙে দেবো । ভিটে-ছাড়া করব । আর কখনো এ বাড়িতে ঢুকবেন না । যান !

এর জবাবে উকিল শচীনের মুখে কোনো কথা এল না । কিন্তু তার ডান হাতটা নিজের অজান্তেই ওপরে উঠে গেল.....

তারপর সম্পূর্ণ অপ্রত্যাশিত আচমকা একটা চড় এসে ফেটে পড়ল বিশাখার বাঁ গালে । অবিশ্বাস, দুর্বোধতা এবং মানসিক বিকলতার দরুন চড়টাকে আসতে দেখেও বিশাখা নড়েনি । চড়টা বাঁ গালে পড়তেই সে চোখে অন্ধকার দেখল । দুলে উঠল শরীর । বিশাখা উবু হয়ে বসে পড়ল মেঝের ওপর ।

মাগো !

যে কোনো কাপুরুষের পক্ষে এ সময়ে পালিয়ে যাওয়াটাই ছিল স্বাভাবিক । কিন্তু শচীন পালাল

না। খুব অবিশ্বাসের সঙ্গে সে কিছুক্ষণ নিজের ডান হাতের চেটোটর দিকে চেয়ে রইল। তারপর তাকাল কুঁজে হয়ে থাকা বিশাখার দিকে।

দাসদাসীরা ছুটে আসছিল বিশাখাকে ধরে তুলতে।

তাদের অবাধ করে দিয়ে শচীন নিজেই শেষ ধাপটায় নেমে নিচু হয়ে পাঁজাকোলায় তুলে নেয় বিশাখাকে। নিঃশব্দে সিঁড়ি ভেঙে ওপরে উঠে আসে। ঘরে নিয়ে শুইয়ে দেয় বিছানায়।

বিশাখার তেমন কিছু হয়নি। একটা চড় আর কতটাই বা মারাত্মক? তবে তার দুই চোখে বিশ্বের বিস্ময়। তার নিজের মা-বাবাই তাকে কখনো মারেনি। পিঠোপিঠি ভাই কৃষ্ণকান্ত কখনো-সখনো কিলটা চড়টা দিলেও সে নিতান্তই খুনসুটি সত্যিকারের মার জীবনে সে এই প্রথম খেল। তাও এক পরপুরুষের হাতে।

দুজনেই ভীষণ অবাধ হয়ে চেয়ে থাকে দুজনের দিকে। ঘরে লোকজনের ভীড় হয়ে যাচ্ছিল। শচীন একটু চমকাল কেন যেন।

তারপর বিশাখার দিকে চেয়ে বলল, আমারই ভুল হয়েছিল।

শুধু এইটুকু বলেই শচীন ঘর থেকে বেরিয়ে নীচে এসে সাইকেলে উঠে চলে গেল।

তিন দিন শচীন আর এমুখো হল না।

তিন দিন বিশাখারও কাটল এক অদ্ভুত ঘোরের মধ্যে। বাঁ গালটা ফুলে লাল হয়ে ছিল অনেকক্ষণ। কিন্তু সে জ্বালা জুড়োতে দেবী হয়নি। জ্বালা মনের মধ্যে। তিন দিন ভাল করে দিন-রাত ঠাহর করতে পারল না সে। অনুভব করতে পারল না তার চারদিককার বাস্তবতা। টের পেল না সে ঘুমিয়ে স্বপ্ন দেখছে, না কি জেগে আছে। এত অপমান সয়ে মানুষ বেঁচে থাকে কী করে? এত অপমান একজনকে করতেই বা পারে কি করে আর একজন?

রঙ্গময়ী সবই জানে। কিন্তু সে উচ্চবাচ্য করে না। শুধু লক্ষ্য রাখে আর বাড়ির অন্যান্যদের ইশারায় তফাৎ থাকার নির্দেশ দেয়। বিশাখা তিনটে দিন চলল পুতুলের মতো রঙ্গময়ীর নির্দেশে। খেতে বললে খেল, স্নান করতে বললে করল। যেন বা ঠিক বুঝতে পারছে না সে আসলে কী করছে। কথা প্রায় ছিলই না তার মুখে।

তিন দিনের দিন ভোরবেলা উঠে রঙ্গময়ী লক্ষ্য করল, বিশাখার মুখচোখ একটু স্বাভাবিক। রাতে ঘুম হয়েছে। চোখের কোল ভরাট।

রঙ্গময়ী একটা স্বস্তির শ্বাস ফেলল।

দুপুরবেলা খেতে বসে একটু ঠাট্টাতামাসাও করল বিশাখা রঙ্গময়ীর সঙ্গে। তারপর দুজনে ঘরে এসে মুখোমুখি বসল।

বিশাখা হঠাৎ বলল, কী গো মনুপিসি, কী ভাবছো?

কই, কিছু তো ভাবছি না!

ভাবছো না কেন? একটু ভাবো।

কী ভাববো?

আমার কী করা উচিত একটু ভেবে বলো তো! গলায় দড়ি দিয়ে ঝুলে পড়ব, নাকি বিষ খাবো।

বালাই যাট। তুই ওসব করতে যাবি কেন?

অপমানটা তো দেখলে।

নিজের চোখে দেখিনি, তবে শুনেছি।

এর পরেও বেঁচে থাকতে বলো!

বেঁচে থাকবি না কেন? পাগল নাকি?

পাঁচজনকে মুখ দেখাবো কী করে?

সে যদি দেখায় তোর দেখাতে দোষ কী?

সে তো ছেলে। ছেলেদের তো সবই মানায় মনুপিসি।

তোকে বলেছে! পুরুষমানুষ হয়ে একটা মেয়ের গায়ে হাত তুলেছে লোকে তাকে দুয়ো দেবে না তার নিজেরও কি কম লজ্জা

ওর কি লজ্জা বলে কিছু আছে!

রঙ্গময়ী কথাটার জবাব চটজলদি দেয় না। একটু চুপ করে থেকে বলে, শুনেছি, তিন দিন জলস্পর্শ করেনি।

বিশাখা কথাটা শুনে চুপ করে থাকে। বুকের মধ্যে কেমন এক অচেনা ব্যথা চিনচিন করতে থাকে। কেমন অদ্ভুত লাগে একটা সিরসিরে ভাব।

অনেকক্ষণ বাদে সে বলে, জলস্পর্শ করেনি কেন?

তা কী করে বলব? তবে মনে হয় প্রায়শ্চিত্ত করছে।

আর প্রায়শ্চিত্ত করে কী হবে? যা হওয়ার তা তো হয়েই গেছে। শহরে টি টি পড়ে যায়নি এতক্ষণে?

রঙ্গময়ী মাথা নেড়ে বলে, দূর বোকা! দাসদাসীরা কানাকানি করবে সে তো ঠেকানোর উপায় নেই। তবে লোক জানাজানি হয়নি। হবেও না। শহরে এখন অন্য সব সামাজ্যিক কাণ্ড হচ্ছে। কে কাকে চড় মারল তা নিয়ে কে মাথা ঘামাবে?

কী কাণ্ড মনুপিসি?

রেল লাইনের ধারে গুদাম থেকে বিদেশী কাপড় বের করে আগুন লাগানো হল সেদিন। গুলি-গোলা চলেছে। ধরপাকড় হল কত। আহা!

কিন্তু স্বদেশী আন্দোলনের ঘটনা মোটেই স্পর্শ করল না বিশাখাকে। সে আনমনা হয়ে রইল। একটা হাই আসছিল, সেটা চেপে বন্ধ করে বলল, আমার বড় যেমা হচ্ছে নিজের ওপর।

কেন হবে? দোষ তো শচীনোর। তুই তো অন্যায় কিছু বলিসনি।

ঠিক বলেছি বলছো?

নিশ্চয়ই। এই সত্যি কথাগুলো কারো মুখ থেকে বেরুনো ঠিকার ছিল।

বিশাখা একথা শুনে একটু উজ্জ্বল হল। বলল, ঠিক বলছো?

ঠিক বলছি না তো কী? আমি পরস্য পর, নইলে ক্যাট ক্যাট করে কিছু কথা ওর মুখের ওপর বলতে আমারও ইচ্ছে করেছে কতবার।

বিশাখা বলে, আমি ভাবছিলাম কাজটা হয়তো ভীষণ অন্যায় হয়ে গেল। বাবা হয়তো ফিরে এসে সব শুনে আমার ওপর রাগ করবে।

রাগ করলেই হল? সে নিজে তো কিছু পারেনি করতে। মুখচোরা মানুষ, চোখের ওপর এসব ঘামনা দেখেও চোখ বুজে থেকেছে। দোষ তো তারই।

বিশাখা চুপ করে থেকে কিছুক্ষণ ভেবে বলল, শচীনবাবু বোধহয় আর আমাদের কাজ করবেন না না?

না করলেই মঙ্গল। এইভাবেই যদি ভালয় ভালয় ব্যাপারটা মিটে যায় তবে খুব ভাল।

বিপাশা মাথা নেড়ে বলল, না মনুপিসি, তাতে ভাল হয় না।

কেন হয় না?

আমার একটা কলঙ্ক থেকে যায়। লোকে বলবে আমি ঝগড়া করে শচীনকে তাড়িয়েছি।

লোকের আর খেয়ে বসে কাজ নেই। তুই রাখ তো।

বিশাখা মাথা নেড়ে বলে, না মনুপিসি, আমার লজ্জা করছে।

ওমা! লজ্জা কিসের?

ঝগড়া করেছি যে! সেই লজ্জা। আমি চাই না উনি এভাবে কাজ ছাড়ুন।

রঙ্গময়ী একটু চুপ করে থেকে বলে, কথাটা খুব মন্দ বলিসনি। শচীনকে ইদানীংকার ব্যবহার দেখে রাগ হয় বটে, কিন্তু ছেলেটা খারাপ ছিল না। তোর বাবার জমিদারী যেতেই তো বসেছিল। ছেলেটা প্রাণপাত করে কিছু সামাল দিয়েছে। ওকে তাড়ানোটা ঠিক নয়। কিন্তু কী আর করবি ?

শচীনঝুঁ কি এখনো আমার ওপর রেগে আছেন ?

রঙ্গময়ী হেসে ফেলে। তারপর বলে, রেগে আছে বলে তো মনে হয় না। চড় মেরে সেই তো কোলে করে তোকে দোতলায় তুলে নিয়ে এসেছিল। রাগের লক্ষণ তো নয়।

খ্যাৎ ! কী যে বলো না ! যাও—

রঙ্গময়ী হেসে বলে, কথাটা তো সত্যি। তুই যত নিজের ঘাড়ে অপমান নিচ্ছিস সে নিয়েছে তার দশগুণ। তাই তো বলছিলাম, তুই গলায় দড়ি দিবি কেন ?

সারাটা দুপুর বিশাখার কটল ফের অন্যরকম এক ঘোরের মধ্যে। চড় খাওয়ার অপমান বুক থেকে নেমে গেছে। এখন সে ভাবছে শচীন তাকে কোলে করে দোতলায় তুলেছিল। শচীন তিন দিন জলম্পর্শ করেনি। যত ভাবছে তত বুকের চিনচিন ব্যথাটা নাড়া খাচ্ছে। অশ্রুট এক ব্যথা। বড় অদ্ভুত। বড় সুখদায়ক।

চারদিনের দিন হেমকান্ত বরিশাল থেকে একা ফিরলেন।

একা যে বাবা ? বউদি কোথায় ? বিশাখা বাবাকে প্রায় হাত ধরে গাড়ি থেকে নামাতে নামাতে প্রণাম করে।

বউমা কলকাতা চলে গেল।

সে কী ! ওখান থেকেই ?

হ্যাঁ। কিছুতেই ফিরতে চাইল না।

কেন বলো তো !

বলছিল ছেলেমেয়েদের ইস্কুল খুলে গেছে। কনকেরও অসুবিধে হচ্ছে।

বিশাখা সহর্ষ বিন্ময়ে চেয়ে রইল বাবার মুখের দিকে। বুকটা দূরদূর করছে। বউদি যে অতিশয় বুদ্ধিমতী সে বিষয়ে তার সন্দেহ ছিল না। কিন্তু সেই বুদ্ধি যে প্রলয় ঘটায়নি, সংসারে আনেনি ভাগ্যচুর এবং কলঙ্ক তাইতে ভারী হালকা বোধ করল বিশাখা। তার মনে হল, এবার সব ঠিক হয়ে যাবে।

চতুর্থ দিন বিশীর্ণ শরীরে কাছারি ঘরে বিকেলে এসে বসল শচীন। তার উজ্জ্বল কপ্তি কিছুটা ম্লান। মুখ অসম্ভব গম্ভীর।

হেমকান্ত সন্ধের পর তাকে ডেকে পাঠালেন।

এই যে শচীন, এদিককার সব খবর ভাল তো !

ভালই। শশীর মামলায় উকিল দিতে পারলেন ?

শশীর মামলা তার বাবা লড়বে। কলকাতা থেকে এক ব্যারিস্টারও আসবেন শুনেছি। আমাদের তরফের যা বক্তব্য তা পেশ করার জন্য একজন ভার নিয়েছেন। আমার বেহাইয়ের বন্ধু। সুতরাং চিন্তার কিছু নেই।

আমিও যাবো একবার ?

যাবে ?

যাবো বলেই তো ভাবছি।

ইচ্ছে হলে যেও।

আমি একটা কথা ভাবছিলাম।

কী কথা ?

মামলা মোকদ্দমা এখন অনেক বেড়েছে। এস্টেটের কাজ দেখার জন্য যদি একজন পাকা লোক

দেখে নেন তো ভাল হয় ।

তোমার বদলে ? হেমকান্ত কিছু বিস্মিত হয়ে উঠে বসেন ।

হ্যাঁ । আমার একটু অবকাশ দরকার ।

হেমকান্ত ফাঁপরে পড়ে বলেন, কথাটা কী জানো ! লোক পাওয়া খুব সোজা নয় । এমন যাক্স পাকা লোক তারা সং বড় একটা হয় না । আমার অবস্থা তো জানোই । নিজে কিছু দেখাশোনা করতে পারি না । তোমাকে পেয়ে ভেবেছিলাম আর সমস্যা পড়তে হবে না ।

আমি গোড়া বেঁধে দিয়ে যাচ্ছি । আপনিও একটু চোখ রাখবেন । হয়ে যাবে ।

কেন শচীন, তোমার কী পোষাচ্ছে না ?

শচীন জিব কেটে বলে, ছিঃ ছিঃ, তা নয় । পয়সার জন্যে আপনার কাজ করছিলাম না । স্নেহ করেন, তাই ।

স্নেহ তো এখনো করি ।

করেন ? বলে শচীন হঠাৎ হেমকান্তের চোখে চোখ রাখে ।

হেমকান্ত মৃদু হেসে বলেন, না করার কারণ কী ?

শচীন দাঁতে ঠোঁট চেপে বলে, স্নেহ না করার অনেক কারণ আছে । তবু যদি করেন তবে বুঝি যে আপনি সত্যিই অনেক উঁচুদের মানুষ ।

হেমকান্ত লজ্জা পেয়ে বলেন, আরে কী যে বোলা ! ছেলেমানুষ ।

শচীন আবেগের সঙ্গে বলল, আমার অপরাধের সীমা নেই । কিন্তু সব তো বলা যাবে না । বুদ্ধিভ্রংশ তো মানুষেরই হয় ।

তা হয় বটে । কিন্তু ব্যাপারটা কী বলবে ?

আজ্ঞে বলব । তবে তার উপযুক্ত সময় আছে । এখন নয় ।

তাহলে আমার এস্টেটের কাজটা করবে তো !

করব । তবে আমি কয়েক দিন ছুটি চাই ।

কেন ?

মা আর বাবাকে নিয়ে কাশী হরিদ্বার যাবো ।

বেশ তো, যাও ।

বেশীদিন নয় । ততদিন কাজ চালিয়ে নিতে পারবেন ?

পারা যাবে । এখন বর্ষা সবে শেষ হয়েছে । টিমে সময় । পারব । যাও ।

শচীন হঠাৎ আজ হেমকান্তকে একটা প্রণাম করে বলল, আমার যেতে দু-তিন দিন দেবী আছে । রোজই আসব । আপনি কাছারিতে আমার সঙ্গে একটু যদি বসেন তো সব বুঝিয়ে দিয়ে যেতে পারি ।

সে হবেখন । তোমার শরীরটা তো ভাল দেখছি না ।

ও কিছু নয় ।

জ্বরজ্বর হয়নি তো !

না । বেশ আছি ।

হেমকান্ত খুশি হলেন । খুব খুশি । তার বউমা কলকাতা গেছে । শচীন যাচ্ছে হরিদ্বার আর কাশী । বেশ । লক্ষণ তো খুবই ভাল ।

মেয়েটির হাসিটি অদ্ভুত সুন্দর। কোনো কায়দা নেই, একেবারে শিশুর মতো সরল ও সহজ হাসি। নম্র স্বরে বলল, আসবো ?

আসুন। রেমি ক্ষীণ কণ্ঠে বলল।

আমি খারা। ধুব আমাকে বলেছিল, আপনি আমাকে দেখতে চান।

বসুন।

ধারা খুব সহজভাবে বসল। একটুও সংকোচ নেই, অতিরিক্ত স্মার্ট হওয়ার চেষ্টাও নেই। কথাবার্তা টানটান এবং স্পষ্ট। গলার স্বরটির মধ্যে একটা আন্তরিকতা মাখানো নম্রভাব রয়েছে।

রেমি চেয়ে ছিল। কথা আসছিল না মুখে বা মনে। কী বলবে ?

ধারা অবস্থাটা অনুমান করে নিল বোধ হয়। শাড়ির কুঁচিটা অকারণে একটু ঠিকঠাক করে বলল, আমার আসল নাম কিন্তু ধারা নয়।

তবে কী ?

রাখা। বড্ড সেকলে নাম বলে আমি একটু বর্ণবিপর্যয় করে নিয়েছি।

তাই বুঝি ! রেমি এলানো গলায় বলে।

আপনার নামটা কিন্তু ভীষণ আধুনিক।

রেমি একটু নড়েচড়ে বসল। তারপর একটা গভীর শ্বাস ফেলে বলল, আমি কিন্তু বড্ড সেকলে।

খুব হাসল ধারা। ভদ্রতার হাসিই হবে। তারপর বলল, আপনি আমাকে দেখতে চেয়েছিলেন কেন বলুন তো।

এমনি।

দেখাদেখির ব্যাপারটি কিন্তু খুব অস্বস্তিকর। তাই না ? আমার তো মনে হয়েছিল আপনি আমার সঙ্গে ঝগড়া করবেন।

ঝগড়া করব। রেমি ভ্রু কুঁচকে বলল, না, ঝগড়া করব কেন ? হেরে গেলে ছেলেবেলায় বন্ধুদের সঙ্গে ঝগড়া করতাম। এখন তো বড় হয়েছি।

আপনি সুন্দর কথা বলেন তো ! ধুব যা বলেছিল মোটেই তা নয়।

ও কী বলেছিল ?

বলেছিল আপনি একটু প্রাচীনপন্থী, আর—

আর কী ?

একটু অ্যাগ্রেসিভ।

আপনার কি তাই মনে হচ্ছে ?

ধারার মুখে হাসিটি লেগেই ছিল। হাসিতে উজ্জ্বল মুখখানা এক অপরাধ ভঙ্গিতে নেড়ে বলল, এখনো নয়। তবে রেগে যাওয়ার কীই বা আছে বলুন ! আমি কিন্তু ধুবকে বলেছিলাম, তোমার বউ আমাকে দেখলে কিছুতেই রাগ করতে পারবে না। ধুব বলেছে, না না, রেমি ভীষণ রাগী। তুমি একটু গার্ড নিও।

বলেছে বুঝি ?

হ্যাঁ। বোধ হয় টিঙ্গ করছিল। তবু আমি একটুও ভয় পাইনি। ধুবকে বললাম, উনি যখন দেখা করতে চান আমি দেখা করব। আই হ্যাভ নাথিং টু লুজ। অপমান করলেও আমার গায়ে লাগবে না।

লাগবে না ! কেন !



আমি যে জীবনের শুধু ব্রাইট সাইডটা দেখি। একদম পেসিমিস্ট নই। বলে ধারা আবার হাসতে থাকে।

রেমি একবারও হাসতে পারেনি। এবারেও পারল না। তবে মেয়েটার মধ্যে এমন একটা প্রাণপ্রাচুর্য ও খুশিয়াল ভাব আছে যে সেটা অজান্তে রেমির ভিতরকার আড়ষ্টতা কাটিয়ে দিচ্ছিল। সে স্বাভাবিক গলায় বলল, আমি ঠিক উন্টে। ব্রাইট সাইড আমার চোখেই পড়ে না।

তার কারণটা কী জানেন?

কী?

আপনার নানারকম এক্সপেরিয়েন্স হয়নি। তাই। জীবনে যাদের খুব একটা ঘটনা ঘটে না, নানারকম অভিজ্ঞতা হয় না তারা সবসময়ে বিষণ্ণ থাকে আর ডার্ক সাইড নিয়ে ভাবে।

আপনার কি অনেক অভিজ্ঞতা?

তা বলতে পারেন। তবে বিয়ের পর আমাকেও আপনার মতো জবুথবু ঘরবন্দী করে রাখার একটা চেষ্টা হয়েছিল।

আপনার বিয়ে হয়েছে?

ধারা হাসিমুখে বলে, দু'বার। আমি দু'টাইম ডিভোর্স।

এইটুকু বয়সে?

কী করব বলুন। কোনো বিয়েই এক বছরের বেশী টেকেনি।

কেন টিকল না?

খুব সহজভাবে, যেন অন্য কারো গল্প বলছে, এমন সরল গলায় ধারা বলল, প্রথম যার সঙ্গে বিয়ে হয়েছিল হি পারহ্যাপস হ্যাড ইডিপাস কমপ্লেক্স। মা ছাড়া আর কিছু বুঝতেই চাইত না। তার মা কেমন ছিল জানেন? ভেরি বিচী, ভেরী পজেসিভ। একদিন বরের সঙ্গে ড্রিংক করে ফিরেছিলাম বলে আমাকে উনি চড় মেরেছিলেন, কিন্তু নিজের ছেলেকে কিছু বলেননি।

তারপর?

তারপর আর কী? খুব ঝামেলা হতে শুরু করল। অ্যাণ্ড উই সেপারেটেড।

দ্বিতীয় জনও কি তাই?

না। চাঁদ ওয়াজ এ নাইস গায়। আমি কখনো ওকে ডিসলাইক করতে পারিনি। এখনো করি না।

তাহলে?

কী বলব! সামথিং ডিডনট ক্লিক। ওর সব ভাল, কিন্তু হাজব্যাণ্ড মাস্ট বি সামথিং ডিফারেন্ট। উই ওয়্যার রাদার ফ্রেন্ডস।

রেমির সামান্য একটু মজা লাগছিল। স্বামী-স্ত্রী সম্পর্কে তার ভিতরে যে একটা বন্ধমূল ধারণা প্রোথিত রয়েছে তা একটু নাড়া খাচ্ছিল মেয়েটির এসব আলগা কথায়। কিন্তু তবু মেয়েটাকে কিছুতেই সে খুব অপছন্দ করতে পারছিল না। তাই একটু রাগ হচ্ছিল নিজের ওপর। মেয়েটা বড্ড সরল, বড্ড অকপট।

রেমি বলল, এখন?

এখন! ওঃ, এখন আমি ভেরী মাচ ফ্রি অ্যাণ্ড ভেরী মাচ হ্যাপী।

বিয়ে করবেন না?

কী দরকার? আপনি খুব ঘরসংসার পছন্দ করেন?

রেমি চুপ করে কিছুক্ষণ ভাবল। সে ধারার মতো অভিজ্ঞ নয়। ইংলিশ মিডিয়ামে পড়া, কিছু উচ্চকিত পোশাক পরা, কয়েকজন ছেলে বন্ধুর সঙ্গে নিরামিষ মেলামেশা এবং সামান্য কিছু বিদেশী নৃত্যগীত ছাড়া তার আধুনিকতার তেমন কোনো দীক্ষা হয়নি। আধুনিকতা তো কেবল আচরণ নয়,

ও একটা বিশেষ মনোভঙ্গী। ধারা জিনস্ পরেনি, চোখমুখের ভাবে বা অঙ্গভঙ্গিতেও ভারী শিষ্ট ভাব, কিছু ওর মনটাই অন্য রকম। এ পৃথিবীকে, এই জীবনকে রেমি যে-চোখে দেখে ও মোটেই সেরকম দেখে না। রেমি অনেকক্ষণ ভেবে বলল, কী জানি। বোধ হয় ঘরসংসার বলে নয়, ভালবাসি একজন বা দুজন মানুষকে। তাদের ছাড়তে ইচ্ছে করে না।

ইচ্ছে না করলে ছাড়বেন কেন? সেকথা বলছি না। কিন্তু ধরুন, কখনো আপনার নিজের মতো করে থাকতে ইচ্ছে করে না? আর একটু ফ্রিডম পেতে ইচ্ছে করে না?

করে। খুব করে। রেমি খুব আকুল গলায় বলে।

ধারা চমৎকার হাসিটা হেসেই যাচ্ছে। বলল, আমাদের দেশের মেয়েদের কী মুশকিল জানেন? তাদের ইচ্ছেটাই মরে যায়। ছেলেবেলা থেকে এমন সব শেখানো হয় যে, মাথাটাই তাদের অবসেসড। ঘরসংসার পেলেই তাদের আর সব ইচ্ছে মরে যায়। আর না হলে চুরি করে গোপনে কোনো লাভারের সঙ্গে ভয়ে ভয়ে মেলামেশা করে। কিন্তু এটা তো ঠিক নয়। আমার যদি কাউকে ভাল লাগে তবে প্রকাশ্যেই মিশব, নিজেকে তো বাঁধা দিইনি। বলুন ঠিক কিনা!

রেমি বলল, ঠিকই তো।

ধুব বলে আপনি ভীষণ সেকলে।

রেমি এই প্রথম একটু হাসতে পারল। মাথা নেড়ে বলল, আমি ঠিক কেমন তা ও জানেই না। কেন জানবে না?

জানে না, তার কারণ আমাকে ও লক্ষ করে না।

বাট ইউ আর চার্মিং। সিম্পলি চার্মিং।

হবে হয়তো। কিন্তু ও সেটাও লক্ষ করেনি কখনো। ওর সঙ্গে আপনার পরিচয় কবে থেকে? বেশীদিন নয়।

কোথায় দেখা?

সেটা একটু অদ্ভুত ঘটনা। আমাদের দেখা খুব নরমাল সারকামস্ট্যানসে হয়নি।

কিরকম?

আমার মতো যারা একা এবং স্বাধীন জীবন যাপন করতে চায় সেইসব মেয়েদের পদে পদে বিপদ। আপনি ঠিক বুঝবেন না। যারা নিরাপদ ঘরে থাকে তাদের পক্ষে এ শহর সম্পর্কে ধারণা করা কঠিন। ধরুন সোনাগাছি, টেরিটিবাজার, চীনাপট্টি, খিদিরপুর ডক বা সম্ভার এসপ্লানেডের গলিঘুঁজি এসব মেয়েদের পক্ষে নিরাপদ জায়গা নয়। লোকে ডাকে, ইশারা করে, অফার দেয়, গাড়িতে তুলে নিতে চায়, আড়কাঠি পিছনে ঘুরঘুর করে, ছেলেরা দল বেঁধে পিছু নেয়, টিটকারি দেয়। এসব সহ্য করে এবং এড়িয়ে তবে চলাফেরা করতে হয়।

রেমি একটু শিউরে ওঠে। বলে, মা গো! আপনি ওসব জায়গায় একা যান?

না গেলে আর স্বাধীনতা কিসের? যখন যেমন খুশি ঘুরব ফিরব দেখব তবে না স্বাধীনতা! আমি অ্যাডজাস্টেড হওয়ার চেষ্টা করছি। মাঝে মাঝে অবশ্য বেশ বিপদে পড়ে যেতে হয়। এরকম একটা বিপদে পড়েই ধুবর সঙ্গে আলাপ হয়ে গেল।

বলে হাসে ধারা। নিয়মরক্ষার খাতিরে রেমিও ঠোঁটটা রবারের মতো টেনে একটু হাসবার চেষ্টা করে। বলে, তাই নাকি?

ধারা বলে, যত রোম্যান্টিক শোনাচ্ছে তত রোম্যান্টিক কিছু নয় ব্যাপারটা। আপনি কি জানেন যে, ধুবর এক দল অত্যন্ত ন্যাস্টি ফ্রেন্ডস আছে!

খানিকটা জানি।

ভীষণ ন্যাস্টি। ধুব কি করে যে ওদের সঙ্গে মেশে! এ প্যাক অফ হেলহাউণ্ডস। ওদের মধ্যে একজন হচ্ছে লালু। চেনেন?

রেমি মাথা নেড়ে বলে, না। ওর বন্ধুরা বড় একটা এ বাড়িতে আসে না।

ইউ আর লাকি। ওই লালুর একটা জুয়ার ব্যবসা আছে টালিগঞ্জে। ব্যবসাটা অবশ্য দুর্নবরী। আমি আমার এক বয় ফ্রেণ্ডের সঙ্গে একদিন জুয়া খেলতে গিয়েছিলাম।

আপনি? রেমি চোখ কপালে তোলে।

কী আছে তাতে? একটা নতুন অভিজ্ঞতা হল। কিন্তু জয়েন্টটা যে এত খারাপ তা আগে জানতাম না। আমার সঙ্গে শ পাঁচেক টাকা ছিল। ঘণ্টা খানেকের মধ্যে আমি সব টাকা হেরে গেলাম। আমার বয়-ফ্রেণ্ড রাজু হারল দেড় হাজার টাকার মতো। আমাদের কারো কাছেই আর টাকা ছিল না। রাজু যখন শেষ রাউণ্ড খেলছে তখন ওর বিড করার মতো টাকা পকেটে নেই। এর আগেই ঘড়ি আংটি সব বিড দিয়ে হেরেছে। এমন কি আমার ঘড়িটা অবধি ধার নিয়ে খুইয়েছে। কিন্তু তবু মুখে মুখে বিড দিয়ে যাচ্ছিল। শেষ বাজিতে ও আরো দেড় হাজার টাকা হারল। কিন্তু পেমেন্টের টাকা নেই। কী অবস্থা ভাবুন। লালু সঙ্গে সঙ্গে ওর কলার চেপে ধরল, টাকা না দিয়ে যেতে পারবে না। রাজুর তখন কাঁদো-কাঁদো অবস্থা। আমি জানতাম বেচারার মোটেই বড়লোক নয়। একটা বিদেশী ফার্মের অফিসার। মাইনে ভালই পায়, কিন্তু ঝপ্ করে দু'আড়াই হাজার টাকা জুয়ায় হেরে যাওয়ার মতো ভাল অবস্থা তো নয়। রাজু অনেক কাকূতি মিনতি করছিল, কিন্তু লালু আর তার তিনটে রাম্ফিয়ান বন্ধু ওকে চেয়ারে বসিয়ে রেখে দরজা বন্ধ করে দিল। বলল, যেতে দেবো না, তবে ফোন করতে দেবো। কল সামওয়ান হু উইল পে ফর ইউ।

রেমির হাত-পা হিম হয়ে যাচ্ছিল গল্প শুনে। বলল, কী সাজঘাতিক!

সাজঘাতিক আর কী শুনলেন! এর পরের ঘটনা আরো সাজঘাতিক। রাজু যখন বলল যে, ফোন করে কাউকে পাওয়ার উপায় নেই তখন লালু কী বলল জানেন? বলল, ঠিক আছে, তোমার গার্ল ফ্রেন্ডকে রেখে দিচ্ছি। রাত দশটার মধ্যে যদি টাকা নিয়ে না আসতে পারো তবে রাত্রিবেলা উই ক্যান এনজয় হার।

রেমি ককিয়ে ওঠে, মাগো! আপনি কী করলেন?

ধারা একটু হেসে বলে, আপনি ভয় পাচ্ছেন! কিন্তু ইটস অল ইন দি গেম। এসব তো ঘটতেই পারে। তবে আমার যেটা ভয় হচ্ছিল সেটা রাজুকে নিয়ে। আমি জানতাম রাজু ইজ এ কাওয়ার্ড এবং আমার প্রতি সফটনেস থাকলেও হি ইজ অলওয়েজ ইন টু মাইণ্ডস্। ও হয়তো আমাকে রেসকিউ করতে আসবে না।

তবু গুণাদের সঙ্গে থাকতে রাজি হলেন?

আমি রাজি হয়েছিলাম কে বলল? বাট দে ডিডন্ট কেয়ার টু আস্ক মি। আমার মতামতের তোয়াক্কা করেছিল নাকি ওরা!

আপনি কিছু করলেন না?

ধারা হেসে ফেলে বলে, একজন মেয়ের পক্ষে যা সম্ভব সবই করেছিলাম। চেষ্টায়েছি, কামড়ে দেওয়ার চেষ্টা করেছি, জানালা দিয়ে লাফিয়ে পড়ার চেষ্টা করেছি। রাজুও আপত্তি করছিল মিনমিন করে। বগু লিখে দিতে চাইছিল। কিন্তু কিছুতেই কিছু হল না।

রেমি উদ্বেগের গলায় বলে, রাজু চলে গেল?

যেতে চাইছিল না। কিন্তু লালু এবং তার বন্ধুরা শিকারের গন্ধ পেয়ে গেছে। তাই রাজুকে একটু ম্যানহ্যাণ্ডেল করে বের করে দিল। তখন সঙ্গে সাড়ে সাতটার মতো বাজে। ওরা বলে দিল, রাত দশটা পর্যন্ত ডেডলাইন। তারপর আমাকে ওরা যা খুশি করবে।

রাজু পুলিশে খবর দিতে পারত তো!

পারত। তবে লাভ ছিল না। পরে ওকে হয়তো ওরা খুন করত, আর পুলিশও কি কিছু করত ভাবেন?

তারপর কী হল ?

ধারা খুব হাসতে লাগল। একদম প্রাণখোলা হাসি। তারপর হাসি থামিয়ে বলল, আপনি হলে বোধ হয় মুর্ছা যেতেন

শুধু মুর্ছা ! ভয়ে হার্টফেল করতাম।

আমারও ভীষণ ভয় করছিল। তবে ওরা কথা রেখেছিল কিন্তু। রাজুকে বের করে দিয়ে ওরাও ঘর থেকে বেরিয়ে গেল। আমাকে একা রেখে।

আপনি পালালেন না ?

কী করে পালাবো ? দরজা বন্ধ করে গেল যে !

তারপর ?

আমাকে অবশ্য দশটা পর্যন্ত অপেক্ষা করতে হয়নি। ঘণ্টা খানেক পরেই দরজা খুলে দারুন স্মার্ট একটা ছেলে ঘরে ঢুকল। দেখে আমি অবাক। ওরকম একটা বিচ্ছিরি জায়গায় এরকম ভদ্র আর আরিস্টোক্র্যাট চেহারার একজন ইয়ংম্যানকে দেখব ভাবতেই পারিনি।

সেই কি ও ?

ধারা খুব হেসে ওঠে। মাথা নেড়ে বলে, হি ইজ রিয়েলি স্ট্রাইকিং, তাই না ?

রেমি বিরস মুখে বলে, আমি তো তাই শুনি। মেয়েরা বলে। তারপর ?

আমার দিকে কিছুক্ষণ চেয়ে থেকে জিজ্ঞেস করল, আপনি কি লালুর হোস্টেজ ? আমি তখনো ভয়ে সিটিয়ে আছি। বললাম, হ্যাঁ। কাইগুলি আমাকে ছেড়ে দিতে বলবেন ? ও একটু হাসল। বলল, লিবারেশন কি এত সোজা ? জুয়া খেলতে অচেনা জায়গায় যখন আসতে পেরেছেন তখন বাকিটাও পারতে হবে।

বলল ?

বলল, তবে একটু হাসি ছিল মুখে। বুঝতে পারছিলাম, ইয়ার্কি করছে। হি ইজ নট সিরিয়াস।

তারপর কী হল ?

বললে আপনি বিশ্বাস করবেন না। ওর সঙ্গে আমার আরো কিছু কথাবার্তা হয়েছিল। আজ আর ডিটেল মনে নেই। তবে কাটা কাটা কথা, ডিবেটের মতো। কিন্তু কয়েক মিনিটের মধ্যেই আমার ভিতরে সামথিং ওয়াজ টিকিং।

কী সেটা ?

একটা আর্জ। আকৃতি। লোকটাকে আমার ভীষণ ইন্টারেস্টিং লাগছিল। আমাকে অনেক প্রশ্ন করল। কোথায় থাকি, কার সঙ্গে থাকি, কী করি, উড্ডনচণ্ডী কেন, এসব। আমিও জবাব দিছিলাম। কিন্তু খুব হাসি পাচ্ছিল আর মজা লাগছিল।

ভয় করছিল না ?

একদম না। একটু আগেও যে সাজঘাটিক ভয় পাচ্ছিলাম তা ওকে দেখে একদম উবে গেল। বললাম না, সামথিং ওয়াজ টিকিং ইনসাইড মি !

ওরা কিছু করল না ?

না। ওদের আর দেখতেই পেলাম না। ধুব আমার ইন্টারভিউ নিয়েছিল মিনিট পনেরো ধরে। তারপর বলল, চলুন পৌঁছে দিয়ে আসি। আমি ওর পিছু পিছু নেমে এলাম। ও আমাকে একটা ট্যান্সিতে তুলে দিয়ে চলে যাচ্ছিল। আমিই ওকে বললাম, আমার ফ্ল্যাট পর্যন্ত চলুন, প্রীজ।

ও রাজি হল ?

কেন হবে না ?

শুনেছি ও মেয়েদের বেশী পাত্তা দেয় না।

আমাকেও দিয়েছিল নাকি প্রথমে ? বলে ধারা খুব হাসল। মাথা নেড়ে বলল, মোটেই ভাববেন

না যে এক কথায় পৌঁছে দিতে রাজি হয়েছিল। আমাকেই বেশ খানিকটা সাধাসাধি করতে হল। বললে বিশ্বাস করবেন না। অন্য মেয়ে হলে ওই জায়গা থেকে পালানোর প্রথম চাপ পেলই আর পিছু ফিরে তাকাত না। কিন্তু আমি একটু অন্যরকম। পালানোর চেয়ে ইনভলভমেন্ট আমার বেশী ভাল লাগে।

রেমি করুণ গলায় বলে, আপনার খুব সাহস।

তা বলতে পারেন। তবে সাহস করে আমি ঠিকিনি। আলটিমেটলি দেখেছি, মেয়েরা স্বাধীন হয়ে থাকতে চাইলে থাকতে পারে। একটু-আধটু অসুবিধে যা হয় তার তুলনায় লাভই বেশী।

আপনি কি একা থাকেন?

একদম একা। একটা সরকারী ফ্ল্যাট আছে আমার। ওনারশিপ।

চাকরি করেন?

নিশ্চয়ই।

বাড়ির কেউ নেই?

সবাই আছে। মাঝে মাঝে যাই। আমার বাবা অবশ্য গত বছর মারা গেছেন। কিন্তু তিনি আমাকে কোনো কাজে বাধা দেননি। ইন ফ্যাক্ট লিবারেশনের প্রথম পাঠটা তাঁর কাছেই শেখা।

ওর সঙ্গে কি আপনার খুব ঘনিষ্ঠ সম্পর্ক?

ধুব?

হ্যাঁ। বলে রেমি লজ্জায় লাল হয়।

ধারা সামান্য একটু হেসে গম্ভীর হয়ে গিয়ে বলে, প্রসঙ্গটা খুব সেনসিটিভ।

ধারা এই প্রথম সত্যিকারের গম্ভীর হল। রেমি দেখল, গম্ভীর মুখ ধারাকে মানায় না। সৌন্দর্যটা যেন অর্ধেক কমে যায়।

রেমি বলল, অবশ্য আপত্তি থাকলে শুনতে চাই না।

ধারা মাথা নেড়ে বলল, আমার লুকোনোর কিছু নেই। আপনাকে ফ্র্যাংকলি বলতে পারি, সারা জীবনে এই একজন পুরুষ সম্পর্কেই আমি দুর্বল। সেন্টিমেন্টাল কোনো ব্যাপার আমার ছিল না। বাস্কবীর চেয়ে আমার ছেলে-বন্ধু বেশী। তাই ইমোশন কমে গেছে। তবু ধুব হাজ ডান সামথিং টু মি কিন্তু মেয়েদের যে আলাদা ইনস্টিংট থাকে তা দিয়ে বুঝতে পারি, হি ইজ ইনভিনসিবল।

তার মানে?

ও কোনো মেয়েকেই কানাকড়ি মূল্য দেয় না।

আপনার সঙ্গে ওর ঘনিষ্ঠতা হয়নি?

ধারা আবার হাসল, বলল, হয়েছে, আবার হয়ওনি। আমার মাঝে মাঝে মনে হয় ওর সবটাই প্লে-অ্যাকটিং। অনেক সুযোগ পাওয়া সত্ত্বেও হি নেভার স্রেস্ট উইথ মি, নেভার কিস্‌ড মি।

রেমির মাথা ঘুরছিল। চোখ কিছুক্ষণ বন্ধ করে রইল সে। টের পেল, চোখের কোলে জল টলটল করছে।

ধারা হাত বাড়িয়ে তার একটা হাত ধরে বলল, আপনি একটু ইমোশনালি আপসেট। আজ বরং আমি যাই!

রেমি কিছু বলতে পারল না। থম মেয়ে বসে রইল।

বহুক্ষণ বাদে যখন চোখ খুলল তখন ঘরে ধারা নেই।

শচীন কাশী রওনা হওয়ার আগের দিন চৌধুরি-বাড়িতে এসেছিল বিদায় নিতে। শরৎকাল শুরু হয়েছে। ব্রহ্মপুত্রের ওপাড়টা কাশফুলে সাদা। আকাশ গভীর নীল। মাঝে মাঝে সাদা মেঘ এসে ক্ষণস্থায়ী বর্ষা দিয়ে যায়। ভারী মোলায়েম একটা হাওয়া বয়। নদীতে পালতোলা নৌকোর গতিতে লেগেছে এক খুশিয়াল চঞ্চলতা। শচীনের মন প্রকৃতির এই স্নিগ্ধতায় কিছু প্রসন্ন। ভিতরকার ক্ষত ও রক্তপাত সে ভুলে যাচ্ছে ধীরে ধীরে। কামনার বস্তু চোখের সামনে না থাকলে কামনা ধীরে ধীরে কমে যেতে থাকে। ইংরিজি একটা প্রবাদবাক্যও আছে না, আউট অফ সাইট আউট অফ মাইণ্ড ! চপলাকে যথার্থ ভোলেনি অবশ্য শচীন। কিন্তু কোথায় যেন একটা স্বপ্নভঙ্গও ঘটেছে তার।

ওই যে সেদিন চড় মেরেছিল বিশাখাকে, সেই থেকে তীব্র আত্মগ্লানি দিনরাত তাকে দন্ধ করেছে। কয়েকটা দিন সে প্রায় পাগলের মতো বিড়বিড় করত। নিজের গলা টিপে ধরত। ডান হাতে জাঁতি চেপে ধরেছে, পিন ফুটিয়েছে বহুবার। সে যে এত নীচ হতে পারে তা সে নিজেও জানত না।

আজ বড় সংকোচের সঙ্গে সে বারবাড়িতে সাইকেল থেকে নামল। তারপর সাইকেলটা দাঁড় করিয়ে রেখে সে বারান্দায় উঠে সোজা গিয়ে কৃষ্ণকান্তর দরজায় থান্না দিল। দরজা ভেজানো ছিল, খুলে গেল।

কৃষ্ণকান্তকে প্রায় রোজই দেখে শচীন। কিন্তু এতদিন এক অবৈধ প্রেমের জ্বলন্ত আবেগ তাকে এমন অন্ধ করে রেখেছিল যে, দেখলেও কিছুই লক্ষ করেনি সে। আজ কৃষ্ণকান্তর চেহারার মধ্যে ঋষিবালকসুলভ উজ্জ্বলতা দেখে সে একটু অবাক হয়।

শচীন একটু হেসে বলল, ব্রহ্মচর্য করছো শুনলাম ! সতি নাকি ?

কৃষ্ণকান্ত স্মিত হেসে উঠে দাঁড়িয়ে বলল, ঠিক ব্রহ্মচর্য নয়।

তবে কী ? স্বদেশী ?

কৃষ্ণকান্ত একথার জবাব দিতে পারল না। মুদু হাসল মাত্র।

শচীন একটু গভীর হয়ে বলে, আমাদের দিয়ে তো কিছু হবে না। আমরা স্বার্থপর সংসারী হয়ে গেছি। তোমাদের মতো ছেলেরা যদি পারে।

কৃষ্ণকান্ত একথা শুনে একটু উজ্জ্বল হয়। তারপর বলে, বিপিনদার সঙ্গে আমার একটু যোগাযোগ করিয়ে দেবেন শচীনদা ?

বিপিন এই অঞ্চলের চিহ্নিত স্বদেশী। কংগ্রেসের মস্ত পাণ্ডা। তবে আজকাল তাকে বড় একটা কেউ দেখতে পায় না। শোনা যায়, গ্রন্থত্বারের ভয়ে সে পালিয়ে বেড়াচ্ছে।

শচীন কথাটা শুনে কৃষ্ণকান্তকে খুব স্থির চোখে অনেকক্ষণ লক্ষ করে বলে, তোমার বয়স এখনো খুব কম। এখনই কেন ওসব করতে চাইছো ?

আমার যে ভীষণ ইচ্ছে।

তা আমি খানিকটা জানি। এই বুদ্ধিটা তোমাকে কে দিয়েছিল বলো তো !

তেমন কেউ নয়।

আরে আমি তো আর সরকারের স্পাই নই, আমাকে বলতে ভয়টা কী ?

শচীনদাকে দেখার পর থেকে—

শচীন হাসল। বলল, বুঝছি। কিন্তু দেখলে তো পরাধীন দেশে বাস করলে দেশপ্রেমের কীরকম দণ্ড নিতে হয় ! জেল, দ্বীপান্তর, ফাঁসি, গুলি।

জানি।

ভয় করে না ?

কৃষ্ণকান্ত উজ্জ্বল মুখে বলল, একটুও না।

শচীন চিন্তিত মুখে বলে, তোমার ভিতরে একটা ব্রাইটনেস আছে। স্বদেশী করতে গিয়ে সেটা নষ্ট করবে কেন? বরং আরো তৈরি হও। লেখাপড়া শেখো, জ্ঞানার্জন করো। স্বদেশী করা মানে তো সবসময়ে সাহেব মারা নয়।

আর কীরকম স্বদেশী আছে?

দেশের সুসন্তান হয়ে উঠলে তাতেও দেশের কাজ হয়। যারা প্রতিভাবান তাদের উচিত প্রতিভার সম্পূর্ণ সদ্ব্যবহার করা। তাতে আমাদের আখেরে দেশের ভালই হয়।

বাবাও এরকম কী একটা বলেন।

ঠিকই বলেন। উনি জ্ঞানী মানুষ।

আমার খুব শশীদার মতো হতে ইচ্ছে করে।

কার মতো হবে সেটা কি এখনই স্থির করা উচিত? সেইজন্যই একটু বয়স হওয়া দরকার। কত বয়স?

সময় হলে আমিই তোমাকে বলে দেবো।

খুব বাধ্য ছেলের মতো কৃষ্ণকান্ত ঘাড় নেড়ে বলে, আচ্ছা।

শচীন একটু সঙ্কোচ বোধ করছিল। ইতস্তত করে বলল, বিশাখা কেমন আছে?

ছোড়দি! ছোড়দি তো ভালই আছে।

শচীন খুব লজ্জা-লজ্জা ভাব করে পকেট থেকে একটা মুখ-আঁটা খাম বের করে বলল, বিশাখাকে এই চিঠিটা দিয়ে দেবে?

হ্যাঁ। বলে হাত বাড়িয়ে চিঠিটা নেয় কৃষ্ণকান্ত।

শচীন মৃদুস্বরে বলে, রাগ জিনিসটা মানুষের মস্ত শত্রু। কত বড় শত্রু তা সেদিন বুঝেছি। কেলেঙ্কারীর আর কিছু বাকি রাখিনি। ছিঃ ছিঃ।

কৃষ্ণকান্ত খুব লাজুক একটু হাসল। তারপর বলল, ভগবান যা করেন মঙ্গলের জন্যই করেন।

শচীন একটু থমকে চেয়ে থাকে। তারপর আচমকাই তার মুখটা লাল হয়ে ওঠে। বিশাখাকে চড় মারার চেয়েও ঢের বেশি কেলেঙ্কারি সে ঘটাতে যাচ্ছিল। ফাঁড়ীটা কেটেছে এমন নয়। চপলার কথা মনে পড়লেই তার বুক ব্যথিয়ে ওঠে, শ্বাস দ্রুত হয়, আবার একটা তিক্ত হতাশায় ঝাঁ ঝাঁ করতে থাকে চারদার। তবে সেই সঙ্গে স্বাভাবিক বুদ্ধি, বিবেচনা ও বোধ ফিরে এসেছে শচীনের। দুই ছেলের মা, পরস্পরী একজনকে গ্রহণ করার যেসব অঙ্ককারময় দিক আছে সেগুলোও তার মনে আসে।

শচীন মাথা নেড়ে বলে, ঠিকই বলেছো। তুমি খুব ঈশ্বর-বিশ্বাসী, তাই না?

কৃষ্ণকান্ত লজ্জায় মাথা নুইয়ে বলে, আমি ঈশ্বর-বিশ্বাসী হতে চাই।

শচীন একটা দীর্ঘশ্বাস ছেড়ে বলে, আমারও অনেক সাধ ছিল জীবনে। এক এক বয়সে এক এক রকম। সবশেষে দেখ উকিল হয়ে জীবন কাটাতে হচ্ছে।

ওকালতি তো খুব ভাল। খুব বুদ্ধি লাগে।

তা লাগে। তবে বড় মিথ্যে কথা বলতে হয়।

কৃষ্ণকান্ত একটু হেসে বলে, তা হোক। আমিও কিছু আইন পড়ব।

পড়। আইন জানা থাকা ভাল।

শশীদার কী হবে শচীনদা? ফাঁসি?

কী করে বলি! অপরাধ তো বেশ গুরুতর। প্রমাণ হলে—

আপনি শশীদার হয়ে মামলা লড়বেন না?

লড়ে লাভ নেই। শশী সম্পর্কে আমি তেমন কিছু জানি না। তোমার বাবার সঙ্গে আমার কথা

হয়েছিল অন্য ব্যাপারে। উনি আমাকে ওঁর ডিফেনসে নামতে বলেছিলেন।

আমাদের বিরুদ্ধেও কি কেস হবে ?

কে জানে ! পুলিশ মুচলেকা চেয়েছিল, তোমার বাবা দেননি। সেই রাগে কেস করতেও পারে পুলিশ। রামকান্ত রায় লোক ভাল নন। স্বদেশীদের ওপর খুব রাগ।

ওকে কেউ মারতে পারে না ?

শচীন একটু চমকে ওঠে। তারপর বলে, ওসব কথা মনেও স্থান দিও না।

কিন্তু মারা তো উচিত। বাঙালি হয়ে উনি কেন স্বদেশীদের ধরিয়ে দেবেন ?

সব বাঙালি যদি তোমার মতো ভাবতে পারত তাহলে ইংরেজ নিজে থেকেই পালাত। কিন্তু সে কথা থাক। রামকান্ত রায় কিন্তু ভয়ঙ্কর লোক।

কৃষ্ণকান্ত চুপ করে থাকে।

শচীন খানিকক্ষণ বসে থাকে, তারপর উঠতে উঠতে বলে, কাল আমি কিছুদিনের জন্য কাশী যাচ্ছি। ফিরে এলে দেখা হবে। তোমার ছোড়দিকে চিঠিটা মনে করে দিও কিন্তু।

দেবো।

ইচ্ছে ছিল বিশাখার সঙ্গে দেখা করে মাপ চেয়ে নেবো। কিন্তু ভেবে দেখলাম সেটা না করাই ভাল। রাগী মেয়ে, হয়তো চটে যাবে। তীর্থযাত্রার সময় মনটা খামোখা ভার হবে। তাই ওই চিঠি।

ছোড়দি কিন্তু রাগত না।

রাগত না ? শচীন অবাক হয়ে বলে, তুমি কী করে জানলে ?

তামি জানি।

শচীন ক্ষীণ একটু হাসে, কিন্তু রাগের তো কারণ ছিল।

কৃষ্ণকান্ত মাথা নেড়ে বলে, তাও না। ছোড়দিটা বড্ড বোকা। ভীষণ আদুরে তো। একটু শাসনে ওর ভালই হয়।

শচীন খুব হাসল, তুমি তো খুব পাকা মাথার মানুষ ! বাঃ। তোমার উন্নতি হোক। আজ আসি, হ্যাঁ ?

শচীন চলে গেলে কৃষ্ণকান্ত চিঠিটা নিয়ে ভিতরবাড়িতে আসে।

দোতলার ঘরে চুপ করে বসে আছে বিশাখা। কিছু শীর্ণ হয়েছে ইদানীং। তবু সেই শীর্ণতায় তার সৌন্দর্য হয়েছে আরো স্কুরথার। আজকাল সে ঘর থেকে বড় একটা বেয়োয় না। চুপচাপ বসে বসে ভাবে।

ছোড়দি, কী করছিস ?

আচমকা কৃষ্ণকান্তর ডাকে বিশাখা চমকে ওঠে। সে কিছু করছে না। ভিতরে, খুব গভীরে সে একটা গোপন ও গোলাপী স্বপ্ন দেখে। কিন্তু তার মনে হয়, স্বপ্নটা যে কোনোদিন যে কারো কাছে ধরা পড়ে যাবে।

কী রে ! আয়। বলে ভাইকে হাত বাড়িয়ে কাছে টেনে বসায় বিশাখা। আজকাল একটু তফাৎ হয়ে থাকে বলেই কৃষ্ণর ওপর তার প্রগাঢ় মায়া।

কৃষ্ণকান্ত দুইমির হাসি হেসে বলে, তোর বাঁ গালে এখনো চড়ের দাগটা ফুটে আছে।

যাঃ। বলে বিশাখা নিজের গালে হাত বোলায়, ফাজিল !

তাকে চড় মেরে শচীনদার যা অনুশোচনা হয়েছে বলার নয়।

বিশাখা লজ্জায় লালবর্ণ হয়ে বলে, ওসব কথা তোকে কে বলতে বলেছে !

বলবে কেন। জানি।

কী জানিস ?

শচীনদা কাশী চলে যাচ্ছে।



কাশী ! বলে ভূ কৌচকায় বিশাখা, কাশী কেন ?

কাশীবাসী হয় না লোক বুড়ো বয়সে !

সে কি বুড়ো হয়েছে ?

না, তবে বৈরাগ্য এসেছে ।

কবে এল ?

সেই চড় মারার পর থেকে । কাশী গিয়ে শচীনদা সম্মাস নেবে ।

কৃষ্ণকান্ত এত গম্ভীর মুখে কথাগুলো বলে যে বিশাখা ধক্ষে পড়ে যায় । চারদিকে টালুমালু করে তাকিয়ে বলে, সত্যি কথা বলবি ?

সব সত্যিই তো বলছি ।

কী হয়েছে ওর ?

বললাম তো, অনুশোচনা ।

সুফলাটা অনেকদিন আসে না । এলে জিজ্ঞেস করতাম । চিন্তিত মুখে বিশাখা বলে ।

কী জিজ্ঞেস করতি ? শচীনদার কথা ?

হ্যাঁ ।

কেন ? শচীনদার খোঁজে তোর কী দরকার ?

বিশাখা একটা দীর্ঘশ্বাস ছেড়ে বলে, আমার জন্য কেউ কষ্ট পাক তা আমি চাই না । শুনছি, সেই ঘটনার পর ও তিনদিন নাকি উপোস ছিল । জল অবধি খায়নি ।

তাকে চড় মেরেছে বলে ?

তাই তো শুনেছি । তবে রাগলে মানুষ অনেক কাণ্ড করে । সেগুলো ধরতে নেই ।

তোর কিন্তু একটু ওরকম কিছু হওয়ার দরকার ছিল ।

কেন রে দুষ্ট ? ও আবার কী কথ ?

খুব বাড় বেড়েছিল যে তোর ।

কবে বাড় দেখেছিস ! এমন থান্ড মারব না !

যখন বিয়ের কথা হয়েছিল তখন কী বলতিস মনে নেই ?

বিশাখা লাল হয়ে হাসতে লাগল । তারপর বাঁ গালে হাত বোলাতে বোলাতে বলল, বেশ করতাম বলতাম ।

আর এখন ?

এখন কী ?

এখন বিয়ের কথা উঠলে কী বলবি ?

তা জেনে তোর কী হবে ?

শুনিই না ।

ভাগ পাজী কোথাকার !

কৃষ্ণকান্ত ছোড়দির মুখের ভাব খুব মন দিয়ে লক্ষ করল । যা দেখল তাতে খুশিই হল সে । জামার পকেট থেকে চিঠিটা বের করে বলল, এই নে । শচীনদা দিয়ে গেছে ।

বিশাখা প্রথমটায় যেন বিশ্বাস হচ্ছে না এভাবে চেয়ে রইল । তারপর কুণ্ঠিত হাত বাড়িয়ে চিঠিটা নিয়ে বলে, কখন এসেছিল ?

এইমাত্র । ঘণ্টাখানেক আগে ।

এত সকালে আসে না তো !

চিঠিটা বিশাখা খুলল না । হাতে নিয়ে বসে রইল । চোখটা অল্প বোজা । কিছুক্ষণ যেন স্পর্শের একটা আনন্দ অনুভব করল । তারপর ভাইয়ের দিকে চেয়ে বলল, কাশী যাওয়ার কথা কী বলছিল ?

সত্যি নাকি ?

সত্যি । শচীনদা কাল কাশী যাচ্ছে । তবে ফিরবে ।

বিশাখা একটা শ্বাস ছাড়ল । বালিশের তলায় খামটা রেখে দিয়ে বলল, একবার সুফলাকে ডেকে আনতে পারবি ?

সুফলাদি ! কেন ?

দরকার আছে ।

একটু ভাল কৃষ্ণকান্ত । তারপর বলল, বিকেলে ।

তাহলেই হবে ।

কৃষ্ণকান্ত চলে যাওয়ার পর বিশাখা খুব সাবধানে খামের মুখ ছিঁড়ল । নীল রঙের বিলিতি মসৃণ কাগজে লেখা

সূচরিতাসু, তোমাকে কোন মুখে এই চিঠি লিখিতেছি তাহা জানি না । কিন্তু না লিখিয়া শান্তি পাইতেছি না । আমাকে তোমার নিশ্চয়ই রাক্ষস বলিয়া বোধ হইতেছে । অতি হীনচরিত্রের, অতি কাপুরুষ বলিয়া বোধ হইতেছে । এইরূপ হওয়াই স্বাভাবিক ।

সেদিন আমার মাথার মধ্যে কী যে হইয়া গেল ! ক্রোধ মানুষের কত বড় রিপু তাহা সেদিন বুঝিলাম । আমার অপরাধের ক্ষমা নাই । তোমার নিকট ক্ষমা চাহিব না । কারণ, আমি নিজেও যে নিজেকে ক্ষমা করিতে পারিতেছি না । তবে তোমাকে একটা কথা বলি । পুরুষ মানুষের অভিমানে বড় আঘাত দিয়াছিলে । অন্য কেহ হইলে আমার ওইরূপ উত্তেজনা হইত না । তোমার মুখ হইতে ওইসব কথা শুনিয়া যেন আমার ভিতরে এক বিস্ফোরণ ঘটয়া গেল ।

কেন এইরূপ হইল তাহা লইয়া অনেক ভাবিয়াছি । নিজেকে ইচ্ছামতো শাস্তি দিয়াছি । কিন্তু ভিতরের গ্লানি আজও মরে নাই । যখন তোমাকে ধরিয়া দোতলায় তুলিতেছিলাম তখন তোমার দেহ স্পর্শ করিয়া আমার মনে হইতেছিল, এই পবিত্রা দেবীদেহ স্পর্শ করিবার অধিকার আমার মতো কাপুরুষের নাই । এই কলঙ্কিত হাতে তোমাকে স্পর্শ করাও যে পাপ ।

এ সকল আবেগের কথা ভাবিয়া উড়াইয়া দিও না । একদা আমাকে এবং আমার পরিবারকে তুমি ঘৃণা করিতে । তাহা আমি ভুলি নাই । তোমার উপর আমার কিছু আক্রোশ থাকিবারই কথা । কিন্তু সেদিন সব আক্রোশ দূর হইয়া গেল । আক্রোশ আসিল নিজের উপর ।

কিছুদিন যাবৎ আমি কেবল তোমার কথাই ভাবিতেছি । ভাবিতেছি, তুমি এখন আমাকে আরো কত ঘৃণা করিতেছ, আরো কত হীন চক্ষুতে দেখিতেছ । এই জন্মে আর তোমার কাছে নিজেকে পুরুষ বলিয়া পরিচয় দেওয়ার কোনো উপায় রহিল না ।

কিছুদিনের জন্য আমি তীর্থভ্রমণে বাহির হইতেছি । সঙ্গে আমার মা-বাবাও যাইবেন । ফিরিয়া আসিয়া হেমকান্তবাবুর কাছে আমার সকল অপরাধই স্বীকার করিব । তোমাদের এস্টেটের কাজটিও ছাড়িয়া দিব । আর কোনো কারণেই তোমাকে এই কলঙ্কিত মুখশ্রী দেখাইতে পারিব না ।

আমার গ্লানির আরো কারণ আছে । একটি অতি অস্বাভাবিক পরিস্থিতিতে ভাগ্যের দোষে এবং নিজের দুর্বলতাবশে জড়াইয়া পড়িয়াছিলাম । সেই নাগপাশ আজও কাটে নাই । তবে আমি তোমাকে এইটুকু বলিতে পারি দায় সবটুকু আমারই ছিল না । অপরপক্ষেরও ছিল । সাফাই গাইতেছি না । আজ মনে হইতেছে আমার আর বাঁচিয়া থাকা বৃথা । এই জীবন লইয়া কী করিব ? যখন মানুষ নিজের উপর শ্রদ্ধা হারায়, যখন আত্মবিশ্বাস চলিয়া যায় তখন আয়ু বড় দুর্বল বলিয়া বোধ হয় ।

স্থানান্তরে গমন বা ভ্রমণ আমার এই অস্থিরতার কতক উপশম করিতে পারে বলিয়া বাহির হইতেছি । যদি হয় ভাল, নচেৎ অন্য উপায় চিন্তা করিব ।

তোমার নিকট এই পত্র দেওয়ার আর একটি কারণ আছে । আমি তোমার কাছ হইতে একটি

জবাব চাই। আমি জানি আমাকে তুমি ক্ষমা করিতে পারিবে না। ক্ষমা প্রার্থনা করিবার অধিকারও আমার নাই। আমি শুধু তোমার অকপট মনোভাবটুকু জানিতে চাই। যদি পত্রে আমাকে যথেষ্ট ভৎসনা কর তবে বোধহয় কিছু জ্বালা জুড়াইবে। কারণ আমি তোমাকে সেদিন যে চূড়ান্ত অপমান করিয়াছি তাহার প্রতিশোধ লইবার সুযোগ তুমি পাও নাই।

এই পত্রে তোমাকে সেই সুযোগ লইতে অনুরোধ করিতেছি।

একদা তুমি আমার নিকট দেবীদুল্লভ ছিলে। পরে পরিস্থিতির পরিবর্তন ঘটায় আমি তোমাকে প্রত্যাখ্যান করি। জীবন কী বিচিত্র! ঘটনারও কী আকস্মিক পরিবর্তন! আজ আবার তুমি যেন স্পর্শাতীত এক দুল্লভ আসনে সমাসীন মহামহিম দেবীমূর্তি! আমি আর তোমার নিকটবর্তী হইতে পারিব না।

যে প্রলাপ বকিলাম তাহাতে বিরক্ত হইও না। আজ আমি বড় ভগ্নহৃদয়, বড় হতাশ, বড় যন্ত্রণাবদ্ধ। তোমার ভৎসনা আমার ভিতরে প্রাণির অবসান ঘটাইবে। আমাকে সঞ্জীবনী মন্ত্র দিবে। ঈশ্বর তোমার মঙ্গল করুন।

ভগ্নহৃদয়  
শচীন

চিঠি পড়ে বিশাখা হাউহাউ করে কাঁদতে লাগল।

॥ ৭০ ॥

গাড়ির ব্যাকসীটে বসে ধুব নার্সিং হোমের উজ্জ্বল দরজার দিকে চেয়েছিল। কিছুই ভাবছে না, মনে পড়ছে না। মাথায় আজকাল এরকম এক একটা ফাঁকা ভাব, ব্র্যাংকনেস আসে। মাঝে মাঝে তার মনে হয়, মগজটা শুকিয়ে যাচ্ছে না তো!

লাণ্টুদা বেরিয়ে এসে বাইরে দাঁড়াল। সিগারেট ধরিয়ে চারদিকে তাকাচ্ছে। দেখার অবশ্য কিছু নেই। চারদিক নিঝুম এবং জনশূন্য। লাণ্টুদাকে বেশ স্বাস্থ্যবান দেখাচ্ছে। বড় বেশী স্বাস্থ্যবান। যখন খেলত তখন পেটানো ছিপছিপে শরীর ছিল। এখন রীতিমতো মুশকো, ভারী, গুণ্ডামীর চেহারা। টাইট একটা ভুঁড়িও হয়েছে। ভাল কামায়, দেদার টানে। মনটা সাদামাটা এবং মেজাজ উগ্র।

ধুবকে সন্ধ্যাবেলা একটা বড় চড় মেরেছিল লাণ্টুদা। এখনো কি চড়ের জায়গাটা চিনচিন করছে? নিজের গালে একটু হাত বোলায় ধুব।

গাড়িটা কাদের তা বুঝতে ধুবর একটু সময় লাগল। মদ খাওয়ার পর হঠাৎ কোনো ধাক্কায় নেশা কেটে গেলে বোধশক্তি খুব ভাল কাজ করতে চায় না। পারসেপশন বড্ড কমে যায়। তবু কিছুক্ষণ গাড়ির গদি এবং ড্যাশবোর্ডের চাকতিগুলো নজর করে ধুবর মনে হল, এটা তাদেরই গাড়ি। ইগনিশনে চাবি ঝুলছে। মৃত্যুহিম এই রাতের নিস্তেজ, ঘুমন্ত ভাবটা তার সহ্য হচ্ছে না। কিছু একটা করা দরকার। রেমি যদি মরে যায় তাহলে বিস্তর জবাবদিহি করতে হবে তাকে। লোকে বলে, রেমি খুব ভাল মেয়ে ছিল। ওকে নাকি মৃত্যুর দিকে ঠেলে দিয়েছে ধুবই। রেমি সত্যিই মরে গেলে কথাটা ফের উঠবে। ধুবর এইসব আত্মীয়স্বজন ঝাঁপিয়ে পড়বে তার ওপর। শোধ নেওয়ার চেষ্টা করবে। রেমির বাপের বাড়ির লোকেরাও ছেড়ে কথা কইবে না। কিন্তু শালারা বুঝবে না, ধুব নিজেই মরতে চেয়েছিল বরাবর, রেমিকে বাঁচিয়ে।

রেমির মরার এই সময়টায় এখানে স্টেটে বসে থাকতে ইচ্ছে করছে না ধুবর। তার পালানো উচিত। পৃথিবীটা তো একজন রেমির মৃত্যু ঘটছে বলে থেমে নেই। কালও সূর্য উঠবে। টা করে

কেঁদে উঠবে নবজাতকেরা । লোকে থাকে, ঘুমোবে, রতিক্রিয়া এবং ধাক্কাবাজি করে যাবে, যেমন করত বরাবর ।

ধুব হামাগুড়ি দিয়ে সামনের সীটে এসে বসল । গাড়িটা স্টার্ট দিয়ে ঘুরিয়ে নিয়ে এল ফটকের সামনে ।

লাল্টু তাকিয়ে ছিল । ধুব গলা বাড়িয়ে বলল, বেড়াতে যাবে ? চলো একটু ঘুরে আসি ।

লাল্টু অবাক হয়ে চেয়ে বলে, বেড়াতে যাবি মানে ? এটা কি বেড়ানোর সময় ?

আমার আর বসে থাকতে ভাল লাগছে না । একটু ঘুরে আসি ।

লাল্টু এক পা এগিয়ে এসে জানালায় ঝুঁকে তীক্ষ্ণ চোখে ধুবকে দেখে নিয়ে বলে, তোর কী হয়েছে ?

খুব অস্থির লাগছে ।

গাড়ির ড্রাইভার কোথায় ?

জানি না ।

তুই এই অবস্থায় গাড়ি চালাবি না । ড্রাইভারকে ডাক, সে ঘুরিয়ে আনবে ।

আমি পারব ।

লাল্টুদা নীরবে ধুবকে আর একবার জরিপ করে । তারপর ঘুরে এসে ড্রাইভারের দরজা খুলে ধুবকে একটু ঠেলে সরিয়ে দিয়ে নিজে স্টিয়ারিং হুইল ধরে বসে ।

কোথায় যাবি ?

ধুব লাল্টুকে বাধা দেয় না । সে জানে, লাল্টুদা একটু মস্তান টাইপের । ধুবর যেসব গুণা বদমাশ বন্ধু আছে তারাও লাল্টুদাকে সমঝে চলে ।

লাল্টু গাড়ি চালাতে থাকে দক্ষিণের চওড়া গড়িয়াহাট রোড ধরে । চালাতে চালাতে বলে, কাকা একদম ব্রেকডাউন ।

ধুব একটা বড় শ্বাস ছেড়ে বলে, জানি ।

ইউ আর রেসপনসিবল ফর এভরিথিং ।

এটা প্রশ্ন নয়, ঘোষণা । ধুব চুপ করে থাকে ।

লাল্টু বলে, এত ভাল একটা মেয়ে, আমাদের বংশে এরকম একটা বউ আর আসেনি, তাকে রাখতে পারলি না । ডিসগাস্টিং । ওর বদলে তুই মরলি না কেন ?

ধুব চুপ করে থাকে । তবে তার কোনো প্রতিক্রিয়া হয় না ।

লাল্টু ধুবর দিকে চকিতে একবার চেয়ে দেখে বলে, এখন টের পাচ্ছিস ?

কী টের পাবো ?

রেমি কেমন মেয়ে ছিল !

ভালই তো !

শুধু ভাল নয় । শী হ্যাড বিন জেম অফ এ গার্ল । তোর মতো বানরের গলায় ও ছিল মুক্তোর মালা । জানিস ?

ধুব একথার জবাব দিল না । তবে ক্ষীণ কণ্ঠে জিজ্ঞেস করল, তুমি পাস্ট টেনসে কথা বলছো কেন লাল্টুদা ? ইজ শী ডেড ?

লাল্টু মাথা নাড়ে, না । কিন্তু মরতে আর বাকি কী ? ডাক্তাররা বলছে শী হ্যাড নো রেজিস্ট্যান্স । বাঁচার ইচ্ছেটাই তো মরে গেছে মেয়েটার । একটা ভাল মেয়েকে এনে ঘরে বন্দী করে রেখে তিলে তিলে মারলি তোরা । ও আর বেঁচে থেকে কী করবে ? তাদের বংশধর দরকার ছিল, দিয়ে গেল ।

ধুব একটা দীর্ঘশ্বাস ছাড়ল । না, রেমির জন্য তার শোক হচ্ছে না । অন্তত তেমন তীব্র কোনো শোক নয় । একটু দুঃখ হচ্ছে, একটু ভয়ও । তার বেশী কিছু নয় । সে ক্ষীণ স্বরেই বলে, বাচ্চাটা

কেমন আছে জানো ?

ভালই বোধ হয় । কেন ?

এমনি । রেমি যদি মরে যায় তবে ওটাও বোধ হয় বেঁচে থাকবে না ।

বেঁচেও থাকবে আর তোর মতো জানোয়ারের হাতে আর একটা জানোয়ারও তৈরি হবে ওটার জনা ভাবতে হবে না ।

লান্টুর এইসব কথাবার্তার সামনে খুব একেবারেই প্রতিরোধহীন । সে লান্টুকে ভয় পায়, এমন নয় । কিন্তু লান্টুর এমন একটা সহজ সরল অকপট এবং ধারালো জিব আছে যা অপ্রিয় কথাকে তরোয়ালের মতো ব্যবহার করতে পারে । লোকটা ঘুষ খায়, মাতাল হয়, গুণামী করে, আবার পরের দায়ে দফায় ঝাঁপিয়ে পড়ে, জান কবুল করে লোকের উপকার করে বেড়ায় । ব্যালাঙ্গের অভাব আছে বটে, কিন্তু লান্টুর অস্তিত্ব বিশেষ রকমের ঝাঁঝালো ।

গড়িয়াহাটার মোড়ে ডানদিকে গাড়ি ঘুরিয়ে রাসবিহারী আভেনিউ ধরে গাড়ি চালাতে চালাতে লান্টু বলল, এখন কেমন লাগছে ?

অস্থির ।

বমি করবি ?

না ।

লান্টু বাঁ পকেটে হাত ঢুকিয়ে অ্যান্টাসিড ট্যাবলেটের একটা স্ট্রিপ বের করে খুব দিকে বাড়িয়ে দিয়ে বলে, দুটো খেয়েনে ।

খুব একটা উদগার তোলে । ট্যাবলেট দুটো মুখে ফেলে চিবোতে থাকে । বিস্বাদে ভরে যায় মুখ ।

লান্টুদা !

কী ?

তুমি কি ঠিক জানো যে, বাচ্চাটা আমার ?

লান্টু আর একবার টেরিয়ে খুব দিকে তাকিয়ে নিয়ে বলে, আমার জানার কথা নয় । কিন্তু তোর কি সন্দেহ আছে ?

না, এমনি বলছিলাম । খুব হতাশ গল্গায় বলে ।

লান্টু বিষ গলায় বলে, রেমি কিরকম মেয়ে তা আমি জানি । তুই কেমন তাও জানি । নোংরামির লাইনে যাওয়ার চেষ্টা করিস না । একটা চড় খেয়েছিস, এবার গাড়ি থেকে থাক্কা দিয়ে ফেলে দেবো ।

খুব মৃদুস্বরে বলল, আমি রেমির বিরুদ্ধে কিছু বলছি না ।

লান্টু চাপা হিসহিসে গলায় বলে, তবে কী বলছিস ? তুই কখন কী বলিস তা খেয়াল করে বলিস ? তোর সেই কাণ্ডজ্ঞান আছে ? রাজার সঙ্গে রেমিকে কে ভিড়িয়েছিল তাও সবাই জানে । ইউ রাসক্যাল, ইউ !

লান্টু ব্রেক চাপে । গাড়িটা হৌচট খেয়ে দাঁড়িয়ে দুলতে থাকে ।

খুব শরীরটা জোর টাল খেয়েছিল । সামলাতে একটু সময় নিল সে । তারপর বলল, তুমি এত রেগে যাও কেন কথায় কথায় ?

লান্টু হয়তো মারত । কিন্তু অতি কষ্টে নিজেকে সামলে নিল সে । খুব দিকে বাঘা চোখে চেয়ে বলে, দ্যাখ কুট্রি, আমাদের বংশে যদি সত্যিকারের কলঙ্ক কেউ থেকে থাকে তবে সেই ব্ল্যাক স্পট হজ্জিস তুই । কাকার উচিত ছিল বহুদিন আগে তোকে গুলি কবে মেরে ফেলা ।

খুব খুব অসহায় গলায় বলে, আমার যে সিওর হওয়া দরকার ।

কিসের সিওর ?

বাচ্চাটা সম্পর্কে ।

লাল্টু তেমনি বাঘা চোখে চেয়ে থেকে বলে, ঠিক আছে । তোর সন্দেহের কারণটা কী আমাকে বল ।

রেমি রাজার সঙ্গে মিশত । সবাই জানে ।

তুই রেমির গায়ে কাদা মাখাতে চাস ?

না । আমি সত্যি কথাটা জানতে চাই ।

ইস ! ধর্মপুত্র ! বলে লাল্টু আবার গাড়ি স্টার্ট দেয় । বলে, অন্য কেউ হলে আমি কিছু মনে করতাম না । কিন্তু রেমি সম্পর্কে তোর মুখে ওসব কথা শুনলেও পাপ হয়, বুঝলি রাসকাল !

রেমি কি তোমাদের কাছে রমণী-রত্ন ?

আলবাৎ তাই তোর মতো লুস্পেনের সঙ্গে বিয়ে হয়েছিল বলে আজ ওর এই দশা । মরেও বেচারার শাস্তি নেই । শেষ সময়টাতেও তুই চেষ্টা করছিস যাতে ওর ইমেজটা নষ্ট করে দেওয়া যায় । তোর মতো হারামজাদা দুনিয়ায় আর একটাও বোধ হয় নেই রে কুড়ি ।

ধুব আপন মনে একটু হাসল ।

লাল্টু সামনের দিকে চেয়ে গাড়ি চালাতে চালাতে স্বগত ভাষণের মতো বলতে লাগল, আরে মদ আমরাও খাই । তোর চেয়ে বেশীই টানতে পারি । তা বলে নর্দমায় পড়ে থাকি না, বেহেডও হই না । ঘরসংসার করি, চাকরি করি, পরোপকারও করি । সব বজায় রেখে তবে ভদ্রলোকেরা ফুটিফার্ত করে । তোর মতো আমাদের বংশে কে আছে বল তো ! কাকা পিছনে আছেন বলে খুঁটোর জোরে তোর মতো মেড়া লাফায় । নইলে কবে ফুটে যেতি । বংশের নাম ডোবালি, কাকার নাম ডোবালি, তার ওপর রেমির এই স্যাড এণ্ড । সভা দেশ হলে তোকে মার্ডার চার্জে ফাঁসি দিত ।

গাড়িটা ল্যাম্পডাউন দিয়ে ঘুরিয়ে তীব্র গতিতে চালায় লাল্টু । চোখের পলকে ফের নার্সিং হোমের সামনে এনে দাঁড় করিয়ে দেয় । দরজা খুলতে খুলতে বলে, আমাকে যা বলেছিস বলেছিস । আই শ্যাল ফরগেট । কিন্তু যদি আর কারো কাছে রেমি সম্পর্কে ওসব বলিস আমি জানে খেয়ে নেবো ।

লাল্টু ইগনিশন থেকে চাবিটা খুলে নিয়ে পকেটে রাখে ।

নার্সিং হোম তেমনি নিশ্চুপ । লবিতে এক নিঃশব্দ ভীড় । সোফায় মাথায় হাত দিয়ে বসে আছেন কৃষ্ণকান্ত ।

লাল্টু ভীড় কেটে এগিয়ে গিয়ে কৃষ্ণকান্তর পাশে জায়গা করে নিয়ে বসে ।

কাকা !

কৃষ্ণকান্ত মুখ তুলে তাকান । যেন চিনতে পারছেন না । তারপর একটা দীর্ঘশ্বাস ছেড়ে বলেন, তোদের খুব কষ্ট হচ্ছে ?

না কাকা, কষ্ট কী ?

কফির কথা বলে দিয়েছি । একটু দেখ, হল কিনা ।

আপনি ব্যস্ত হবেন না । কফি তো দিচ্ছেই মাঝে মাঝে ।

কৃষ্ণকান্ত আকুল চোখে চারদিকে চেয়ে দেখে বলেন, এখনো নাকি ব্লাড দেওয়া চলছে । কাজ হচ্ছে না তেমন ।

হবে । চিন্তা করবেন না । শী উইল সারভাইভ ।

কৃষ্ণকান্ত ভাষাহীন চোখে কিছুক্ষণ চেয়ে থাকেন লাল্টুর দিকে । তারপর মাথাটা আস্তে আস্তে নেড়ে বলেন, আমার অনেক পাপ ছিল । অনেক পাপ । কর্মফল ফলছে ।

ওসব বলবেন না কাকা । এ তো আপনার আমার হাতে নয় ।

কৃষ্ণকান্ত বুকভাঙা একটা শ্বাস ছেড়ে বলে ওঠেন, মা ! বুড়ো বয়সে এ কষ্টটা পেতে হল ।

রেমির জন্য এই একজন মানুষের শোক কত গভীর ও কত ভেজালহীন তা দেখে ভারী আশ্চর্য

হয়ে গেল লান্টু। কৃষ্ণকান্তকে কেউ কখনো এত দুর্বল হতে দেখেনি। লান্টুর মনে আছে উনিশশো তেতাল্লিশে জেলে থাকার সময় কৃষ্ণকান্তর একটি মেয়ে টাইফয়েডে মারা যায়। সে খবর জেলখানায় পৌঁছে দিতে হয়েছিল লান্টুকেই। কৃষ্ণকান্ত একটু উদাস চোখে চেয়েছিলেন মাত্র। কয়েক ফোঁটা চোখের জল পড়েছিল। কিন্তু ভেঙে পড়েননি। “লোহার মানুষ” বলে খ্যাতি হয়েছিল তো এমনি নয়।

রাজনীতিতে বহু জল ঘোলা হয়েছে বহুবার নানারকম বিপদে, বিপাকে পড়তে হয়েছে। কখনো উত্তেজিত হননি।

এই বয়সেও কৃষ্ণকান্তর মনোবল অসাধারণ। যত বিপদই আসুক তাঁকে কেউ ভেঙে পড়তে দেখেনি কখনো।

খুড়িমার মৃত্যু লান্টুর মনে পড়ে যায়। অসাধারণ রূপসী সেই মহিলা সারাজীবন স্বামীর অবহেলা সহ্য করতে করতে একদিন আর পারেননি। গায়ে কেরোসিন ঢেলে আগুন দিয়েছিলেন। একথাও ঠিক, মানসিক দিক দিয়ে ছিলেন ভীষণ দুর্বল। আত্মহত্যার আগে তাঁর পাগলামির লক্ষণ দেখা গিয়েছিল। সেই পাগলামিরই কিছু উত্তরাধিকার সূত্রে বর্তেছে ধুবর ভিতরেও। কিন্তু খুড়িমার মৃত্যুতেও অবচল ছিলেন কৃষ্ণকান্ত। ছেলের উচ্চুংখলতাতেও তিনি বিচলিত নন। তাই কৃষ্ণকান্তর এই শোকার্ত চেহারা বড় অচেনা লাগে লান্টুর।

লান্টু কৃষ্ণকান্তর হাতখানা ধরে বলে, কাকা, আপনি বাড়ি যান। একটু রেস্ট নিন। চলুন আমি আপনাকে রেখে আসি।

কৃষ্ণকান্ত লান্টুর দিকে চেয়ে বলেন, রেস্ট আমাকে দেবে কে? শরীরটা শুইয়ে রাখলেই কি রেস্ট হয়? রেস্টের সঙ্গে মনের সম্পর্ক নেই?

লান্টু কৃষ্ণকান্তর কজ্জিটা আলতো হাতে চেপে ধরে নাড়ীটা অনুভব করছিল। নাড়ীর গতি স্বাভাবিক নয়। প্রেসার বেড়েছে সন্দেহ নেই। সে বলল, আপনার কাছে প্রেসারের ওষুধ নেই? কৃষ্ণকান্ত মাথা নেড়ে বলেন, না।

জগা ভীড়ের ভিতরে থেকে মাথা তুলে বলল, কর্তার প্রেসারের ওষুধ আমার কাছে আছে। দেবো?

লান্টু বলে, দে।

কৃষ্ণকান্ত বিনা প্রতিবাদে বড়িটা গিলে চোখ বুজে হেলান দিয়ে থাকেন সোফায়।

দোতলার অপারেশন থিয়েটার থেকে একজন সিনিয়র নার্স নেমে আসে। ভীড়টা তার দিকে নীরব প্রশ্ন তুলে চেয়ে থাকে।

লান্টু এগিয়ে গিয়ে জিজ্ঞেস করে, এনি নিউজ?

স্টিল নাথিং।

তার মানে?

ব্রাড চলছে।

অপারেশন?

এখনো শুরু হয়নি।

ক্লবের অবস্থা কিরকম?

একই রকম। ডাক্তাররা কনসাল্ট করছেন।

লান্টু একটু অসন্তোষের গলায় বলে, এখানে কিছু না হলে আমরা পেশেন্টকে বেটার কোনো নার্সিং হোম-এ রিমুভ করতে পারি। ওঁরা সেকথা বলছেন না কেন? আমাদের ফাইন্যান্স কিছু জানা দরকার।

নার্সটি একটু থতমত খায়। এরা যে ভি আই পি-র আত্মীয় তা সে জানে। বিনীত স্বরে বলে,

পেশেন্টের অবস্থা রিমুভ করার মতো নয় ।

হেমারেজটা কি চলছে ?

চলছে । তবে আমার মনে হয় রোট অফ ব্রিডিং একটু কম ।

তার মানে কী ইজ শী ইমপ্রুভিং ?

এখনো কিছু বলা সম্ভব নয় । ডাক্তার বলতে পারেন ।

আপনি তো ও-টিভেই ছিলেন ?

হ্যাঁ ।

আপনি কী দেখলেন বলুন ।

নার্সটি খুবই অস্বস্তি বোধ করতে থাকে । অনিশ্চিত গলায় বলে, পেশেন্টের এখনো জ্ঞান নেই ।

কোমা কি ?

অনেকটা তাই । তবে খুব ডীপ কোমা নয় । মাঝে মাঝে কনশাস হয়ে উঠছেন । তবে কাউকে চিনতে পারছেন না ।

কারো নাম করছে ?

নার্স একটু চিন্তা করে বলে, বোধহয় ওঁর হাজব্যাণ্ডের কথা বলছেন । স্পষ্ট বোঝা যাচ্ছে না ।

কী বলছে ?

ডিলিরিয়ামের মতো । স্পষ্ট কিছু বোঝা যাচ্ছে না ।

পেশেন্ট কি তার হাজব্যাণ্ডকে দেখতে চাইছে ?

নার্স মাথা নাড়ল, না । শী ইজ স্পিকিং টু হিম ইন হার ডিলিরিয়াম ।

লাল্টু খুব বিরক্ত গলায় বলে, ডাক্তারদের জানাবেন যে, পেশেন্টের আত্মীয়রা অত্যন্ত উদ্বেগের মধ্যে আছেন । তাঁরা মাঝে মাঝে পজিটিভ কোনো খবর যেন দেন । একদম সায়লেন্ট থাকলে আমাদের উদ্বেগ কীরকম হয় বুঝতেই পারছেন । পেশেন্টের স্বশর হাই প্রেসারের রুগী ।

নার্স মাথা নেড়ে বলে, ঠিক আছে । আমি বলব ।

মেক ইট এ পয়েন্ট । সাইলেন্ট থাকলে এদিকেও এক-আধজন রুগী হয়ে পড়তে পারেন ।

নার্সটি চলে গেলে লাল্টু এসে কৃষ্ণকান্তর পাশে বসে বলল, ব্রিডিংটা কম ।

তাই বলল ?

হ্যাঁ ।

ঠিক শুনেছিস ?

ঠিক শুনেছি । আপনি ভাববেন না ।

আর কী বলল ?

কৃষ্ণকান্ত সবই শুনেছেন, তবু আবার 'শুনতে চান । লাল্টু নার্সের কথার সঙ্গে আরো কিছু যোগ করে রেমির অবস্থার উন্নতি সম্পর্কে তাঁকে নিঃসন্দেহ করতে লাগল ।

রেমি বাস্তবিকই খুঁজছিল তার একমাত্র পুরুষকে । পুরুষ ? না স্বামী ?

স্বামী কাকে বলে তা এখন আর রেমি বুঝতে পারছে না । তবে সে জানে, সমস্ত পৃথিবীর সব পুরুষ একদিকে, আর এই পুরুষটি অন্যদিকে । একে সে আর সকলের সঙ্গে মিশিয়ে দেখে না । এ শুধু তার । শুধু তার ।

রেমি ডাকছিল, কোথায় তুমি ?

বহু দূর থেকে অজ্ঞকার ভেদ করে ক্ষীণ জবাব এল, কেন রেমি ?

কাছে এসো ।

পারছি না রেমি

কেন ?



এখানে এমন ব্যবস্থা যে ইচ্ছে করলেই যাওয়া যায় না। চেষ্টা করছি।  
 আমি এখানে। এই যে! ওগো  
 তুমি অনেক ওপরে রেমি। আমি যে উঠতে পারছি না।  
 কেন গো?  
 পারছি না। কিছুতেই পারছি না।

॥ ৭১ ॥

বরিশালের জেলে সতীন্দ্রনাথ সেনের অনশন নিয়ে চারদিকে একটা তুমুল উত্তেজনা বয়ে যাচ্ছিল। একশ দিন পার করেও সতীন সেন খাদ্য, পানীয়, ওষুধ কিছুই গ্রহণ করছেন না। গায়ের তাপ ধীরে ধীরে নেমে আসছে। নাড়ির গতি ক্ষীণ হয়ে আসছে। খবরের কাগজে যে বিবরণ থাকে তা সাঙ্ঘাতিক। সতীন সেনের নিদারুণ শয্যাশ্রুত হয়েছে, পেটে একটা মাংসের দলা পাকিয়ে উঠেছে, অসহ্য যন্ত্রণায় মরণোন্মুখ বিপ্লবী ছটফট করছেন। তবু কিছুতেই অনশন ভাঙছেন না। সতীন সেনের এই অনশনের ঘটনা এবং তাঁর বিরুদ্ধে মামলা নিয়ে এত হৈ-চৈ হচ্ছিল যে শশিভূষণের ঘটনাটা চাপা পড়ে গেল।

খবরের কাগজ এলেই প্রায় বাঁপিয়ে পড়ে কৃষ্ণকান্ত। সতীন সেনের খবরের পর সে সাগ্রহে পড়ে নেয় মীরাট ষড়যন্ত্রের মামলার খবর, সুভাষ বসু বা মহাত্মা গান্ধীর বক্তৃতা। তার ভিতরটা গমগম করতে থাকে এক অদ্ভুত উত্তেজনায়। এক বৃহৎ দেশের অগণিত দুঃখী মানুষের সঙ্গে সে নিজের এক গভীর আত্মীয়তা অনুভব করতে থাকে। একদিন সে গিয়ে জনসভায় আলম সাহেবের বক্তৃতাও শুনে এল।

রঙ্গময়ী সংস্কৃত পড়াতে বসে একদিন বলল, তোর কী হয়েছে বল তো! সব সময় কী যেন ভাবিস!

কিছু হয়নি পিসি। বলে কৃষ্ণকান্ত একটু চুপ করে থেকে বলে, সতীন সেন কি মারা যাবেন? কৃষ্ণকান্ত কেন অন্যমনস্ক তা এই কথা শুনে রঙ্গময়ী বুঝতে পেরে যায়। সতীন সেন কে তা রঙ্গময়ী ভালই জানে। তবু না জানার ভান করে বলে, সতীন সেন কে রে?

তুমি খবরের কাগজ পড়ো না পিসি? সেই যে বরিশালের জেলে যিনি অনশন করছেন!

কয়েকদিন আগে সুখেন্দু দত্ত নামে কংগ্রেসের এক ভলাগিঁয়ারকে চট্টগ্রামে খুন করা হয়েছিল। সুখেন্দুর বয়স ছিল মাত্র ষোলো বছর। কংগ্রেসের ভিতরকার দলাদলি আর গণ্ডগোলে পণ্ড হয়ে যাওয়া একটা মিটিং থেকে যখন সে ফিরছিল তখন তাকে ছুরি মারা হয়। দেশের বড় বড় নেতারা এই খবরের জন্য দুঃখ প্রকাশ করেছেন। সেই থেকে রঙ্গময়ীর মনটা খারাপ। সে বলল, শোন বোকা, স্বদেশী করতে চাইলেই হয় না। ওসব গণ্ডগোলে এখনই যাওয়ার দরকার নেই। বড্ড খুনোখুনি বাবা।

খুনোখুনি জিনিসটা কৃষ্ণকান্তর খুব অপছন্দ নয়। খুনোখুনি না থাকলে স্বদেশী করার ব্যাপারটা কি আলুনি হয়ে যায় না? দেশের জন্য খুন করে ফাঁসি যাওয়ার ব্যাপারটা মোটামুটি সে নিজের ভবিষ্যৎ হিসেবে স্থির করে নিয়েছে। ক্ষুদ্রিরামের মতো।

কিন্তু মুশকিল হল স্বদেশীওলাদের সঙ্গে তার যোগাযোগ ঘটছে না। স্কুলে সে বহুজনকে বলে রেখেছে। কিন্তু স্বদেশীদের ঠিকানা কেউ তাকে দিতে পারেনি। কিংবা দিতে চায়নি। একদিন একটা ছেলে বলে ফেলল, তোর বাবা তো বিপ্লবী শশিভূষণকে ধরিয়ে দিয়েছিল। ওরা তোর বাবাকেও খুন করবে।

একথায় খুব চমকে যায় কৃষ্ণকান্ত । এরকম একটা ধারণা অনেকের আছে বলে সে শুনেছে । কিন্তু ঘটনাটা সত্য নয় । তবে কৃষ্ণকান্ত তাই নিয়ে ছেলেটার সঙ্গে তর্ক বা ঝগড়া করল না । গুম হয়ে রইল ।

বাড়ি ফিরে সে সোজা হেমকান্তের কাছে গিয়ে বলল, বাবা, শশীদাকে ধরিয়ে দিয়েছিল কে জানেন ?

হেমকান্ত মাথা নেড়ে বললেন, কেউ ধরায়নি । পুলিশই ধরেছে ।

কিন্তু কেউ না কেউ অবশ্যই পুলিশকে খবর দিয়েছিল । নইলে শশীদা যে আমাদের বাড়িতে লুকিয়ে আছে তা পুলিশ জানল কি করে ?

হেমকান্ত একটা দীর্ঘশ্বাস ছেড়ে বললেন, শশী খুব একটা লুকিয়ে ছিল এমন কথা বলা যায় না । আমরা তো তাকে ঠিক লুকিয়ে রাখিনি । বাড়িতে এতগুলো কর্মচারী, দাসদাসী, তারা নিশ্চয়ই এ নিয়ে আলোচনা করেছে । পুলিশের স্পাইরাও সজাগ । কে খবর দিয়েছে তা বলা অসম্ভব ।

আপনি কোনো স্পাইয়ের কথা জানেন ?

হেমকান্ত অবাক হলেও প্রিয় পুত্রের মুখের দিকে চেয়ে হেসে বললেন, স্পাই যে কে আর কে নয়, তা ভাবনার বিষয় । স্বদেশীরা বোধকরি আমাদেরও পুলিশের স্পাই বলে মনে করে । কৃষ্ণকান্ত রেগে গিয়ে বলে, মনে করবে কেন ? ওরা কি বোকা ?

তা নয় বাবা । আমার দোষ হল, আমার বাড়িতেই শশী ধরা পড়ে । ফলটা হল ভারী অদ্ভুত । স্বদেশীগুলারা ভেবে নিল আমি ধরিয়ে দিয়েছি, আর পুলিশ ধরে নিল আমি জেনেশুনে ওকে লুকিয়ে রেখেছি । উভয়সংকট কথাটার মানে আজ টের পাচ্ছি । কিন্তু তুমি এ নিয়ে ভাবছো কেন ? আপনার সম্পর্কে কেউ খারাপ কিছু বললে আমার খুব রাগ হয় ।

হেমকান্ত অবাক হয়ে বললেন, কেউ কি কিছু বলেছে ?

স্কুলে সেই ছেলেটির সঙ্গে ঝগড়া করেনি বটে কৃষ্ণকান্ত, কিন্তু রাগ ও অভিমান তার বৃকের মধ্যে জমা ছিল । হেমকান্তের শাস্ত কঠ ও নির্বিরোধী নিরীহ স্বভাব এবং অসহায় মুখ দেখে ইঠাৎ তার ভিতরটা উথাল-পাথাল করে উঠল । চোখের জল রাখতে পারল না, কান্নাও চাপা রইল না ।

হেমকান্ত একটু হতভম্ব হয়ে ছেলেকে দুহাতে জাপটে ধরে ব্যস্ত হয়ে বললেন, আরে ! তুমি কাঁদছো কেন ? কখনো তো তোমাকে কাঁদতে দেখিনি ? কী হয়েছে ?

কী হয়েছে তা বলবে কী করে কৃষ্ণকান্ত ? শুধু বাবার বিশাল বক্ষপটে নিজে লুকিয়ে ফেলল সে । কান্নাটাকে জোর করে গলা টিপে মারল । স্বদেশীরা যদি তার নিরীহ বাবাকে খুন করেই তাহলে কৃষ্ণকান্তের হাতে একদিন কয়েকজন স্বদেশী মরবেই । বাবাকে ছুঁয়ে থেকে সে নিঃশব্দে এই প্রতিজ্ঞা করল ।

পরদিন সকালে ইরফান মিঞার সঙ্গে লাঠি খেলার সময় কৃষ্ণকান্ত যে বিপুল বিক্রম, বাড়তি তেজ ও তৎপরতা দেখাল তা প্রায় গুরুমারা বিদ্যে । ইরফান অবাক হয়ে বলে, ছোটোকর্তা যে ওস্তাদের মতো লড়ছেন আজ ! উরে বাবাঃ, লাঠি যে কথা কয় আপনার হাতে !

এই ঘটনার পর থেকে বাড়তি বিক্রম প্রায় সব ব্যাপারেই প্রকাশ পেতে লাগল তার । মুণ্ডর ভাঁজা, ডন-বৈঠক, ধ্যান ও লেখাপড়া সবকিছুতেই । পরীক্ষায় সে ডবল প্রমোশন পেল । বন্ধুকের নিশানা হতে লাগল অব্যর্থ । শরীরটা লকলক করে বেড়ে উঠে উপছে পড়তে লাগল প্রাণশক্তি ও উদ্যমে । গরীব প্রজাদের যেসব ছেলেকে জড়ো করে সে দল পাকাত তারা আরো যশব্দ হয়ে উঠতে লাগল তার । গম্ভীর, ধীর, সাহসী ও বিচক্ষণতা মিশিয়ে বেশ একটা ব্যক্তিত্ব তৈরি হতে লাগল তার ।

লাহোর কংগ্রেসে যে বড় রকমের একটা পরিবর্তন ঘটে গেল সেটা বেশ ধাক্কা দিল তাকে । উনিশশো ত্রিশের এপ্রিল মাসে চট্টগ্রাম অস্ত্রাগার লুণ্ঠনের ঘটনা দাবানলের মতো ছড়িয়ে পড়ল

চারদিকে । লোকের মুখে মুখে মাস্টারদার নাম ।

এইসব ঘটনা কৃষ্ণকান্তর ভিতরে উপর্যুপরি বিস্তারিত ঘটাতে লাগল । অন্তর্গত এক উদ্ভেজনায়ে সে সর্বদা অস্থির চঞ্চল । গৃহবাস প্রায় অসহনীয় হয়ে উঠতে লাগল । প্রতিমুহূর্তেই তার ইচ্ছে করে সব ছেড়েছুড়ে ঝাঁপিয়ে পড়তে ।

ঠিক এই সময়ে একদিন হেমকান্ত কোকাবাবুদের বাড়িতে একটা অন্নপ্রাশনের নিমন্ত্রণ থেকে ফিরছিলেন । নিমন্ত্রণ ছিল দুপুরে । কিছু কথাবার্তা বলতে বলতে এবং সন্ধ্যা জলসায় এক বড় গায়কের ঠুংরী শুনতে গিয়ে একটু দেবী হয়ে গিয়েছিল ।

যখন ফিরছেন তখন বেশ ঘোরালো অন্ধকার । সন্ধ্যাবেলা কিছু জলঝড় হয়ে গেছে । বৃষ্টি এখনো পড়ছে ঝিরঝির করে । রাস্তায় লোক চলাচল নেই বললেই হয় । ঘোড়ার গাড়িটার শব্দ ফাঁকা রাস্তায় বেশ জোরালো হয়ে কানে আসছে ।

পাশের জানালাটা খুলে হেমকান্ত ব্রহ্মপুত্রের দিকে চেয়ে ছিলেন । এই নদীর প্রতি তাঁর আকর্ষণ্য আকর্ষণ । প্রবহমানতার মধ্যে তিনি আদি-অন্তহীন এই জীবনের ছায়া দেখতে পান ।

মৃত্যু-চেতনা বাস্তবিক তাঁকে আজও ছেয়ে আছে । সাংসারিক কোলাহলে মাঝে মাঝে একটু পলিমাটির আন্তরণ পড়ে তার ওপর । কিন্তু শয়নে স্বপনে জাগরণে ভিতরে ভিতরে ঘৃণাপোকার মতো মৃত্যুকীট তাঁকে ক্ষয় করে চলেছে, তিনি অনুভব করেন । আজ এই অন্ধকারে বৃষ্টিধৌত আবহের ভিতর দিয়ে আবছায়া নদীটির দিকে চেয়ে তাঁর ভিতরে এক করুণ সুর বাজতে লাগল ।

একথা ঠিক, মানুষের মৃত্যু হলেও সে সর্বাংশে মরে না । তার কিছু থেকে যায় । কিন্তু জাগতিক পরিচয়ে নয় । সে এক ভিন্ন অস্তিত্ব, এক ভিন্ন জগৎ ।

মৃত্যুর পরবর্তী সেই ভিন্ন জগৎ আর ভিন্ন অস্তিত্বের কথাই বিবশ হয়ে ভাবছিলেন হেমকান্ত । আজকের আবহাওয়া এইসব চিন্তা-ভাবনার অনুকূল । এক মৃদু-কোমল বৃষ্টির অসংখ্য প্রেতহাত চরাচরকে এক রহস্যময় অস্পষ্টতা দিয়েছে । নদীর বিস্তারটি আবহাওয়ায় আধেকলীন । পার্থিবতায় লেগেছে পরলোকের আলো-আঁধারি । ঘোড়ারগাড়ির চলমানতাও যেন পৃথিবী ছেড়ে এগিয়ে যাচ্ছে অলৌকিকতায় ।

হেমকান্তর চোখে পলক পড়ছিল না । বৃষ্টির ছাঁটে অন্ন অন্ন ভিজে যাচ্ছেন । কিন্তু গ্রাস করছেন না ।

কালীবাড়ি ছাড়িয়ে গাড়িটা এগোতেই আচমকা লাগামে টান পড়ল । গাড়োয়ান ঠেচিয়ে উঠল, “হেঁশিয়ার !”

হেমকান্ত সামান্য টাল খেয়ে সোজা হয়ে বসতে না বসতেই পাদানীতে কে যেন লাফিয়ে উঠল । দরজার হ্যাণ্ডেল ঘুরিয়ে এক ঝটকায় খুলে ফেলল পান্নাটা । হেমকান্তর মাথায় তখনো পরলোকের ঘোর । বাস্তবতায় নেমে আসতে পারেননি । একটু বিরক্ত হয়েছেন চিন্তাসূত্রে এরকম বাধা পড়ায় ।

একজন লোক পাদানী থেকে ঝুঁকে পড়ল ভিতর দিকে । তার মুখে কালো কাপড় জড়ানো । হাতটা প্রসারিত করে দিল ভিতর দিকে ।

ঘটনাটা স্পষ্ট দেখলেন হেমকান্ত । কিন্তু তাঁর মস্তিষ্কে অসঙ্গতিটা তখনো ধরা পড়ছিল না । তবে আগজুকের হাতটা যখন বিদ্যুৎবেগে তাঁর বৃকের দিকে নেমে এল তখন তিনি ঘোড়ার গাড়ির ভিতরকার অন্ধকারেও ইস্পাতের শানানো ঝিলিক লক্ষ্য করলেন । একটা অশ্বুট ভয়াব্র চিংকার তাঁর কণ্ঠ থেকে আপনিই নির্গত হল । তিনি নন, তাঁর শরীরই বোধহয় আত্মরক্ষার তাগিদে একটা হাত তুলেছিল । শরীরটা যতদূর সম্ভব সরে যেতে চেয়েছিল আঘাত থেকে ।

ছোরাটা বিধল তাই সঠিক বুকে নয়, একটু ওপর দিকে কাঁধের কাছ বরাবর । যেখানটায় বিধল সেখানটা যেন আচমকা অবশ হয়ে ঝিনঝিন করতে লাগল । ছপাৎ করে ছটকে বেরোলো গরম রক্ত ।

ঘটনাটা বিশ্বাস করতে পারছিলেন না হেমকান্ত । কী হচ্ছে এসব ? কেন হচ্ছে ? এরকম কিছু প্রথম তাঁর ঠোঁটে খেলা করল, কিন্তু উচ্চারণ করার মতো অবকাশ হল না । আততায়ী তার ব্যর্থতা বুঝতে পেরে ছোরাটা টেনে নিল এবং আবার একবার হাতটা আঘাতে উদ্যত হল ।

হেমকান্ত এবার নিজের সর্বনাশ বুঝতে পারলেন । তিনি ভীত, নিরীহ, নির্বিরোধী বটে, কিন্তু অচল অথর্ব নন । এখনো তাঁর শরীরে মত্ত হাতির বল । এখনো তিনি যথেষ্ট গতিবেগসম্পন্ন । ডান হাতটা বাড়িয়ে তিনি ছোরাসুদ্ধ হাতটা চেপে ধরলেন । ঠিক এই সময়ে ঘোড়ার গাড়ির মাথা থেকে তাঁর গাড়োয়ান গাজী মিঞা সপাটে চাবুকটা চালান আততায়ীর পিঠে ।

হেমকান্ত অবশ্য হাতটা ধরে রাখতে পারলেন না । বরং অত্যন্ত ধারাল সেই দোখার ছোরায় তাঁর হাতের তেলো চড়াং করে ফেড়ে গেল । ফোয়ারার মতো রক্ত ঝরতে লাগল হাত দিয়ে ।

কিন্তু আততায়ী আর দ্বিতীয় চেষ্টা করল না । গাড়িতে একটা দুলুনী তুলে বেড়ালের মতো লাফিয়ে পড়ে এক দৌড়ে মিলিয়ে গেল পরকালের আবছায়ায় ।

গাজী নেমে এল নীচে, হেমকান্তের অবস্থা দেখে ঝুঁকরে উঠল, কত্যা ! কী হল কত্যা ? হেমকান্ত অশ্রুচোখ স্বরে বললেন, তাড়াতাড়ি কর ! খুব তাড়াতাড়ি । আমাকে মনুর কাছে পৌঁছে দে ।

গাজী এক মুহূর্ত দেবী করল না । নিজের আসনে উঠে ঘোড়াদুটোকে প্রায় নিংড়ে যতদূর সম্ভব দ্রুত গতিতে এবড়োখেবড়ো রাস্তায় গাড়ি ছুটিয়ে দিল

যখন বাড়ির দেউড়িতে গাড়ি পৌঁছোলো তখনো হেমকান্ত জ্ঞান হারাননি বটে, কিন্তু অত্যধিক রক্তপাতে অবসন্ন হয়ে পড়েছেন । চোখ আধবোজা, ঠোঁট সাদা, রক্তে ভেসে যাচ্ছেন । বিড়ি বিড়ি করে শুধু বলছেন, মনু ! কৃষ্ণকে দেখো ! আমার কৃষ্ণকে দেখো ।

খবরটা ছড়িয়ে পড়তে দেবী হল না । বাড়ি ভিড়ে ভিড়াক্তার হয়ে গেল দেখতে না দেখতে । তিনজন ডাক্তার হেমকান্তের পরিচর্যা করতে লাগলেন । দারোগা রামকান্ত রায় অন্তত দশবারোজন কনস্টেবলকে নিয়ে এসে হাজির হলেন ।

হেমকান্ত মারা গেছেন এরকম একটা গুজব ছড়িয়ে পড়ায় পাড়াপ্রতিবেশীদের মধ্যে কান্নার রোল পড়ে গেল । প্রজ্ঞারা বিলাপ করে কাঁদতে লাগল বারবাড়ির উঠানে জড়ো হয়ে । দাঙ্গাবাজ কিছু লোক লাঠি, বস্ত্র আর মশাল নিয়ে বিভিন্ন দিকে ধাওয়া করে গেল ।

রামকান্ত রায় গাড়োয়ানের জবানবন্দী নিতে নিতে চারদিককার উত্তেজনা ও শোক লক্ষ করে মৃদু একটু হাসলেন । হেমকান্তের ওপর এই আক্রমণে তিনি অখুশি হয়েছেন বলে মনে হল না ।

গাজী তার জবানবন্দীতে বলল, কালীবাড়ি ছেড়ে এসে পড়তেই নির্জন রাস্তায় আচমকা একটা লোক লাফিয়ে পড়ে ঘোড়ার বলগা টেনে ধরে । কাজটা খুবই বিপজ্জনক । কারণ জমিদারবাবুর গাড়ির দুটো ঘোড়াই ওয়েলার এবং শক্তিশালী । তবে গাজী লোকটাকে পাগল ভেবে নিজেই লাগাম টেনে গাড়ি থামায় । কিন্তু গাড়ি থামবার আগেই আর একজন পাদানীতে উঠে দরজা খুলে কতাবাবুকে ছোরা মারে । লোকদুটোর মুখে কালো কাপড় বাঁধা ছিল, রাতটাও ছিল অন্ধকার, ফলে তাদের চেনা যায়নি । তবে দুজনেরই বয়স কম । ছোকরা বলেই মনে হয় ।

জবানবন্দী নিয়ে রামকান্ত রায় তাঁর ঘোড়ায় চেপে রওনা হয়ে গেলেন । কিছু লোক তাঁর দিকে বিষাক্ত চোখে চেয়ে রইল ।

প্রচুর রক্তপাতের ফলে হেমকান্ত সংজ্ঞা হারিয়ে ফেলেছিলেন । আঘাত খুবই গুরুতর । তবে মৃত্যু যে নিশ্চিত এমন কথা বলা যায় না । চারজন ডাক্তার রোগীকে ভালভাবে পরীক্ষা করার পর নিজেদের মধ্যে পরামর্শ করতে লাগলেন ।

রক্তময়ী হেমকান্তের শিয়রের কাছে বসে শূন্য চোখে চেয়ে ছিল সামনের দিকে । বিশাখা রক্ত দেখে জ্ঞান হারিয়ে ফেলেছিল । তাকে তার ঘরে নিয়ে যাওয়া হয়েছে । অত্যন্ত অস্থির পায়ের রক্তাভ

মুখে বারান্দায় উদ্ভাস্তের মতো ঘুরে বেড়াচ্ছিল কৃষ্ণকান্ত। খালি গা, পরনে ফেরতা দিয়ে পরা একটা ধুতি। চোখ দুটো লাল টকটকে। তার নিরীহ, নির্বিरोধ বাবার এই অবস্থা কে করল ? স্বদেশীরা ? হায় ভগবান, সে যে নিজেকে মনে মনে ঘোর স্বদেশী !

রাতটা উদ্বেগের মধ্যে কাটতে লাগল।

শেষ রাতের দিকে হেমকান্তকে নিয়ে যাওয়া হল হাসপাতালে।

রঙ্গময়ী আর কৃষ্ণকান্ত দুজনেই সঙ্গে যেতে চেয়েছিল। কিন্তু ডাক্তাররা নিষেধ করায় যাওয়া হয়নি।

হেমকান্তকে হাসপাতালে নেওয়ার পর বিশাখার ঘরে বসেছিল তিনজনে। কৃষ্ণকান্ত, রঙ্গময়ী আর বিশাখা। উপবাস ও উদ্বেগে তিনজনের চেহারাতেই গভীর ক্লান্তির ছাপ। বিশাখার চোখ মুখ কঁদে কঁদে ফুলে উঠেছে। রঙ্গময়ীর চোখ দুটিও লাল, তবে সে দাঁতে দাঁত চেপে কান্না রুখেছে। কৃষ্ণকান্তের চোখে এক গভীর শূন্যতার চাউনি।

বিশাখা ফোঁপাতে ফোঁপাতে বলে, কী হবে পিসি ? বাবা কি বাঁচবে ?

রঙ্গময়ী একটা শ্বাস ছেড়ে বলে, বাঁচবে। সাহেব ডাক্তার দেখছে হাসপাতালে। ভাবিস না তো।

তুমিও তো ভাবছো। আমাকে ভোলাচ্ছো, না ?

তাকে ভোলাবো কি রে ? আমাকে ভোলায় কে ? সারাটা জীবন একজনের মুখ চেয়ে বেঁচে আছি না ? তোর তো সে বাবা, আমার কী জানিস ? আমার কাছে সে-ই ভগবান। তুই বুঝবি না।

বিশাখা রঙ্গময়ীর এই অস্পষ্ট স্বীকারোক্তি শুনে এই শোকের সময়েও অবাক হয়ে চেয়ে রইল।

উঠানে এখনো বিস্তর লোকের জমায়েত। সারা রাত কেউ ঘুমোয়নি। এক-আধজন পাঞ্জি লোক রটাতে চেয়েছিল, কাণ্ডটা কোনো মুসলমানের। সেই শুনে একটা উত্তেজনার সঞ্চার হয়েছিল বটে, কিন্তু কিছু প্রবীণ মানুষ গুজবটিকে চাপা দিয়েছেন। এটা যে স্বদেশীদের কাজ সে বিষয়ে এখন মোটামুটি সকলেই নিশ্চিত। লাঠি আর বল্লম নিয়ে যারা আততায়ীদের খুঁজতে বেরিয়েছিল তারা ফিরে এসেছে। এখন কী কর্তব্য তাই নিয়ে কথাবার্তা আলোচনা চলছে চাপা গলায়।

শচীন হাসপাতাল থেকে খবর নিয়ে ফিরল। হেমকান্তর অবস্থা খারাপ। তবে এযাত্রা বেঁচে যেতে পারেন। শুনে উঠানে জমায়েত লোকজন একটু স্বস্তির শ্বাস ফেলে।

শচীন ধীর পায়ে দোতলায় উঠে আসে। সিঁড়ির মুখেই উদ্বেগাকুল মুখে কৃষ্ণ, বিশাখা আর রঙ্গময়ী।

শচীন একটু হাসল। বলল, ভয় নেই। একটু ভাল আছেন।

বিশাখা বলল, সত্যি কথা বলছেন তো ?

সত্যি। জ্ঞান ফিরেছিল।

কিছু বলেছেন তখন ?

একটাই কথা বারবার বলছেন। মনু কৃষ্ণকে দেখো।

রঙ্গময়ী কৃষ্ণকে নিজের কাছে টেনে নিয়ে একটু ধরা গলায় বলে, বড্ড ভাবে ছেলের কথা।

কৃষ্ণ কোনো কথা বলল না। পাথরের মতো রঙ্গময়ীর গা ঘেঁষে দাঁড়িয়ে রইল।

শচীন বলল, আপনারা একটু ঘুমিয়ে নিন বরং। আমি আবার হাসপাতালে যাচ্ছি। সব সময় খবর নেবো। চিন্তা নেই।

রঙ্গময়ী বলে, ঘুম কি আসবে ? অমন নিপাট ভাল লোককে যারা মারে তারা কেমন লোক শচীন ?

শচীন একটু হেসে বলে, তারা খারাপ কি ভাল তা জানি না। তবে তাদের সিদ্ধান্ত যে ভুল এ বিষয়ে সন্দেহ নেই। আমার মনে হয়, ওঁর পক্ষে এ জায়গা অঙ্গ নিরাপদ নয়। একটু সুস্থ হলেই ওঁকে কলকাতা বা অন্য কোথাও পাঠিয়ে দেওয়া উচিত।

এ কথা শুনে তিনজনই চুপ করে রইল  
সেই নীরবতায় দু' জোড়া চোখ আর দু' জোড়া চোখের ওপর নির্নিমেষ হয়ে ছিল । শচীন আর  
বিশাখা ।

॥ ৭২ ॥

একটি লোকও নার্সিং হোম ছেড়ে যায়নি । ধীরে ধীরে পূর্বের আকাশ ফর্সা হয়ে আসছিল ।  
লাউঞ্জে এক ক্লাস্ত নীরবতা । অদৃশ্য এক ঘড়িতে টিক টিক করে সময় বয়ে যাচ্ছে ।

একজন ডাক্তার সিঁড়ি দিয়ে ধীর পায়ে নেমে এলেন । প্রায় ত্রিশ জোড়া চোখ একসঙ্গে তাঁর  
ওপর গিয়ে পড়ল ।

ডাক্তারের মুখে হাসি নেই, কিন্তু খুব গম্ভীরও নন । ভীড়টার দিকে তাকিয়ে একটু থমকালেন ।  
তারপর নেমে এসে কৃষ্ণকান্তের দিকে চেয়ে বললেন, স্যার, আপনি এখন বাড়ি যেতে পারেন ।  
ব্লিডিংটা বন্ধ হয়েছে ।

কৃষ্ণকান্ত বিরক্ত হয়ে বললেন, আরো স্পষ্ট করে বলুন অবস্থাটা কী ।

অবস্থা একটু ভাল । তবে আউট অফ ডেনজার বলা যাবে না ।

তাহলে বাড়ি যেতে বলছেন কেন ? আমার কথা ভেবে ? আমার জন্য ভাবতে হবে না ।

ডাক্তারটির বয়স অল্প নয় । মধ্যবয়স্ক এবং বিশিষ্ট চিকিৎসক হিসেবে যথেষ্ট নামডাক আছে ।  
তবু কৃষ্ণকান্তের সামনে তাঁকে নিতান্তই ছেলেমানুষের মতো লাগছিল । তটস্থ হয়ে বললেন, না স্যার,  
সে কথা বলিনি । বলছিলাম শী ইজ রেসপনডিং টু আওয়ার ট্রিটমেন্ট, কিছু ব্লাড দেওয়া গেছে ।  
হাট তেমন খারাপ নয় । ইফ এভরিথিং গोज ওয়েল তাহলে সকাল আটটা নাগাদ আমরা  
অপারেশনটা করে ফেলতে পারব ।

আপনার কথায় একটি ইফ থেকে যাচ্ছে । ওই ইফটা ইরেজ করুন তারপর বাড়ি যাবো । আমার  
বউমার যদি ভালমন্দ কিছু হয় ডাক্তার, তাহলে আমার নিজের ভালমন্দে কিছু যায় আসে না । অবস্থা  
কিছু ইমপ্রুভ করেছে বলছেন ?

অনেকটা ।

সারভাইভালের চান্স কী ?

ফিফটি ফিফটি ।

এটা কি ইমপ্রুভমেন্ট ?

তা বলা যায় স্যার, কারণ ঘণ্টা দুয়েক আগেও শী ওয়াজ জাস্ট সিংকিং । আপনি এখন নিশ্চিন্তে  
বাড়ি যেতে পারেন । কয়েক ঘণ্টার মধ্যে কোনো বিপদ ঘটবে না । বরং আমরা ইমপ্রুভমেন্টের কিছু  
পজিটিভ সাইন পাচ্ছি । নতুন করে কনভালশনও দেখা দেয়নি ।

কৃষ্ণকান্ত ডাক্তারকে উপেক্ষা করে প্রস্রাবের চোখে লাপ্টুর দিকে তাকালেন ।

লাপ্টু বলল, তাই করুন কাকা ।

কী করব ?

বাড়ি যান । একটু বিশ্রাম করুন । একটু বেলায় ফের এলেই হবে ।

তোরা কে কে থাকবি এখানে ?

আমি আছি । জগাও থাক । আর সবাই চলে যাক এখন ।

আর কুটি ! সেই দামড়া কোথায় ?

গাড়িতে বসে আছে ।

তার কি লজ্জা হয়েছে ?

লাল্টু মদু একটু হাসল। জবাব দিল না।

কৃষ্ণকান্ত ডাক্তারের দিকে চেয়ে বললেন, আমি আমার নাতিটাকে একবার দেখব।

নিশ্চয়ই। আমি আয়াকে বলে দিচ্ছি।

যদি দেখেন যে ঘুমোচ্ছে তাহলে থাক। বাচ্চাদের এ সময়টায় খুব ঘুম দরকার।

ঠিক আছে। দেখছি।

একটু বাদেই একজন পরিচ্ছন্ন আয়া মোটাসোটা ফর্সা একটি ঘুমন্ত বাচ্চাকে কোলে করে নিয়ে এল। কৃষ্ণকান্ত নির্নিমেষ চোখে দেখলেন। তারপর জগার দিকে তাকিয়ে চোখের একটা ইংগিত করলেন। জগা দশ টাকার একটা নোট আয়ার হাতে দিল।

কৃষ্ণকান্ত বাইরে এসে চারধারে ভোরের আবছা আলোয় নির্জন রাস্তাঘাটের দিকে অনামনস্ক চোখে চেয়ে দেখলেন। বৃকের পাষণভার সবটুকু নেমে যায়নি। তবু একটু আশা ভরসা হচ্ছে, মনের ভিতর একটু জোর পাচ্ছেন। ছেলেবেলায় একসময়ে তিনি কিছুদিন ব্রহ্মার্চ্য পালন করেছিলেন। তখন ধ্যান করতে খুব ভাল লাগত। একটা মানসিক স্থিরতা আসত ধ্যানে। বৃকের জোর বেড়ে যেত। নানা ঘটনার ওলট-পালট শ্রোত এসে ভাসিয়ে নিয়ে গিয়েছিল তাকে দূরে। তবু জীবনে একটা স্থির প্রত্যয়ের ভূমি বরাবরই ছিল তার। আজও কি আছে? কে জানে! কিন্তু ওই প্রত্যয়টুকু না থাকলে জীবনের সুখদুঃখগুলিকে অহরহ সহ্য করা যায় না। তিনি জীবনে সহ্য করেছেন বড় কম নয়। স্বদেশী আমলে মার খেয়েছেন, জেল খেটেছেন, স্ত্রীর অপঘাত মৃত্যু ঘটেছে একরকম চোখের সামনে, বড় ছেলে বংশের নাম ডুবিয়ে এক ঘর-খেদানো মেয়েকে বিয়ে করে আলাদা হয়েছে, মেজো ছেলে উচ্ছিন্ন গেছে। কিন্তু আজ হঠাৎ মনে হচ্ছে, এই শেষ ধাক্কাটা, রেমিকে নিয়ে এই যমে-মানুষে টানাটানি তিনি বৃষ্টি সহিতে পারবেন না।

এদিক ওদিক তাকিয়ে কৃষ্ণকান্ত তাঁর মেজো ছেলেটিকেই খুঁজছিলেন। কুলাঙ্গারটা অবশ্য তাঁর সামনে এসে দাঁড়ানোর মতো সাহস পায় না। তবু খুঁজছিলেন। আশ্চর্যের বিষয়, সবচেয়ে অবাধ্য, সবচেয়ে বখা, সবচেয়ে নির্দিত ও শিকৃত এই ছেলেটির প্রতি তাঁর এক অপরিমেয় দুর্বলতা রয়েছে, যা ব্যাখ্যার অতীত, যা যুক্তিহীন। এই দুর্বলতা ঠিক পুত্রস্নেহ নয়। অন্য কিছু। কৃষ্ণকান্ত জীবনে কাউকে ভয় পেয়েছেন বলে মনে পড়ে না। এখনো পান না। কিন্তু এই মধ্যম পুত্রটির চোখের দিকে তাকালে তিনি এক বিপুল ভাঙচুরের কাল্পনিক ছবি দেখতে পান। তাঁর মনে হয় এই ধর্মহীন, অবিস্ময়কারী কালাপাহাড় দুনিয়াতে সং বস্তু বলে কিছু রাখবে না, সমাজ বলে কিছু রাখবে না, সব নীতিবোধ ফুৎকারে উড়িয়ে দেবে। একে তিনি বুঝতে পারেন না। তাঁরই শরীর থেকে জাত, তাঁরই আত্মার স্ফুলিঙ্গ থেকে প্রাপ্ত এর প্রাণ, তাঁরই বীজ, তাঁরই জীন, তবু এ যেন এক অপরিচিত দেশের অচীন-ভাষাভাষী, অজানা আদব-কায়দার মানুষ। কিছুই মেলে না। তা বলে ধুব কখনো কৃষ্ণকান্তের মুখে মুখে কথা বলে না, তর্ক বা ঝগড়ার প্রসঙ্গ ওঠে না, এমন কি চোখে চোখ রাখে না পর্যন্ত। তবু ওর ভিতরে একটা কঠিন উপেক্ষা ও ঘণাকে খুব স্পষ্ট টের পান তিনি। এটা শুধু জেনারেশন গ্যাপ নয়, এক ধরনের নীরব বিদ্রোহ। নিজের বাপকে সবচেয়ে প্রধান প্রতিদ্বন্দ্বী বলে ধরে নিয়েছে ও। জেনারেশন গ্যাপ সহনীয়, কারণ তা স্বাভাবিক এবং প্রকৃতির নিয়মেই ঘটে থাকে। কিন্তু এটা অন্য কিছু। শুধু কৃষ্ণকান্তই ধুবর ঘৃণা ও বিদ্বেষের পাত্র নয়, কৃষ্ণকান্ত যা কিছু পছন্দ করেন, যা কিছুকে মূল্য দেন বা যাকে স্নেহ করেন সবকিছুর প্রতিই ধুবর জাতক্রোধ। এরকম পরিপূর্ণ বিদ্বেষ খুব স্বাভাবিক নয়। বাঘের ঘরে এই ঘোঘের বাস তাই কৃষ্ণকান্তর পক্ষে অসম্ভব।

কৃষ্ণকান্ত নিজের গাড়িতে গিয়ে উঠলেন। ড্রাইভার তাড়াতাড়ি কোথা থেকে এসে দরজা খুলে দিল।

কৃষ্ণকান্ত গম্ভীর গলায় জিজ্ঞেস করেন, দামড়াটাকে দেখেছিস?

এই তো ছিলেন।

কোথায় ছিল ?

গাড়িতেই বসেছিলেন। একটু আগে নেমে গেলেন।

ধারেকাছে আছে ?

ড্রাইভার কয়েক পা হেঁটে চারদিকটা দেখে এসে মাথা নাড়ল, না। ডেকে আনব ?

কৃষ্ণকান্ত একটু ভেবে বললেন, থাকগে। বাড়ি চল। একটু বাদেই আবার আসতে হবে।

বাড়ি বেশি দূরে নয়। কয়েক মিনিটেই পৌঁছে গেলেন কৃষ্ণকান্ত। চাকর, দারোয়ান সব তটস্থ, জাগ্রত। তিনি কোনোদিকে ভ্রূক্ষেপ না করে দোতলায় উঠে নিজের চেম্বারে ঢুকলেন। একটা করুণ দৃশ্য চোখে পড়ল। লতু টেলিফোনের কাছে টেবিলে মাথা রেখে ঘুমিয়ে আছে। শোয়নি। বড় কর্তব্যপরায়ণ মেয়ে। কৃষ্ণকান্ত ওকে বলে গিয়েছিলেন যেন টেলিফোনের কাছে থাকে।

মেয়ের মাথায় হাত রেখে কৃষ্ণকান্ত ডাকলেন, ওঠো মা।

লতু এক ডাকে সোজা হয়ে বসে একটু হাসল, এসে গেছেন বাবা ? বউদি !

একটু ভাল।

বৈঁচে যাবে তো !

মনে তো হয়।

ছেলেমেয়ে কারো দিকেই কোনোকালে নজর দিতে পারেননি কৃষ্ণকান্ত। এরা বড় হয়েছে মেয়ের ছায়ায় এবং মেয়ের মৃত্যুর পর দাসদাসীদের তত্ত্বাবধানে। তাই ছেলেমেয়েদের সঙ্গে তাঁর ঘনিষ্ঠতা কম। এদের শিশুকালেও তিনি খুব একটা কোলেপিঠে নেননি, ছানারঘাটা করেননি। সেই দূরত্বটা আজ আর অতিক্রম করা সম্ভব নয়।

লতুর দিকে তাকিয়ে আজ কৃষ্ণকান্তর একটু কষ্ট হল। মেয়েটা সারা রাত বসে ছিল টেলিফোনের কাছে। কত না জানি কষ্ট পেয়েছে। তিনি খুব নরম স্নেহসিক্ত গলায় বললেন, যাও গিয়ে স্নান সেরে নাও। রাত জাগলে সকালে স্নান করতে হয়। তাতে ক্লান্তিটা চলে যায়।

লতু একটা হাই চেপে বলে, আপনিও সারা রাত জেগে ছিলেন। চোখ তো লাল হয়ে আছে। টার্ডার দেখাচ্ছে।

কৃষ্ণকান্ত একটু হেসে বলেন, আমার কথা আলাদা। সারাটা জীবন তো অনিয়মেই কেটেছে মা। আমাকে কি কখনো আরামে থাকতে দেখেছো ? কিছু হবে না আমার। ভয় পেও না।

লতু এমনিতে বাবার মুখের ওপর কোনো কথা বলে না। কিন্তু আজ নরম স্বরে বলল, এখন তো বয়েস হচ্ছে ! তাই না ! আপনার রাত জাগার দরকার ছিল না। আর সবাই তো ছিল।

মেয়ের একটু লঘু শাসনে কৃষ্ণকান্ত কয়েক বছর আগে হলেও চটে যেতেন। আজ চটলেন না। বয়স হচ্ছে, কথাটা তো মিথ্যে নয়। এতকাল নিজের বয়সটাকে একেবারেই পাশ্চাত্য দেননি তিনি। বয়স একটা অ্যাবস্ট্রাক্ট জিনিস, একটা সংস্কার মাত্র। জন্ম থেকে মৃত্যু পর্যন্ত একটা মানুষের জীবনকে বয়সের পরিপ্রেক্ষিতে যে ভাগটা করা হয় সেটাও উদ্ভট। মানুষকে কিছু কাজ করার জন্যই জন্মগ্রহণ করতে হয় এবং শরীর পাত করেও সেইসব কাজ সম্পূর্ণ করার প্রয়াসই জীবন। এছাড়া জীবনের আর কোনো উদ্দেশ্য নেই।

মেয়েকে বললেন, বউমার ওরকম অবস্থা, ঘুম বা বিশ্রাম সম্ভব ছিল না।

অপারেশন কি হয়ে গেছে ?

না। আজ সকাল আটটায় হবে।

আপনি কি যাবেন আবার ?

না গিয়ে উপায় কী ?

তাহলে আপনি স্নান করে আত্মিক সেরে নিন। আমি ঠাকুরকে তাড়াতাড়ি ডাঙা রাঁধতে বলে দিই।



কৃষ্ণকান্ত কিছু বললেন না। লতু চলে গেলে নার্সিং হোমে ফোন করে জানলেন, রেমির অবস্থা আর একটু ভাল। অপারেশনের তোড়জোড় চলছে। আর তাঁর সদ্যোজাত নাতি ভাল আছে। লান্টুকে ফোনে ডাকিয়ে নিম্নস্বরে জিজ্ঞাসা করলেন, দামড়াটাকে দেখেছিস নাকি? ধারেকাছে আছে?

না তো!

একটু দেখ। কাল রাত থেকে বোধ হয় কিছু খায়টায়নি।

দেখছি। কিছু বলতে হবে?

বাড়ি চলে আসতে বলিস। এসে স্নান-খাওয়া সেরে যেন যায়।

বলব। আপনি ভাববেন না।

একটু দেখিস ওকে লান্টু। বলে কৃষ্ণকান্ত টেলিফোন নামিয়ে রাখলেন।

একটা রেস্টারায় বসে এক কাপ চা খাওয়ার চেষ্টা করছিল খুব। পারছিল না। মুখটা বিশ্বাদে ভরে আছে। মুখোমুখি বসে তার দিকে স্থির ও ঠাণ্ডা চোখে চেয়ে ছিল জয়ন্ত। খানিকক্ষণ ভগ্নীপতির দূরবস্থা লক্ষ করে বলল, লেবুর জল খাবেন?

লেবুর জল খেলে কী হয়?

জানি না। শুনেছি হ্যাংওভারের পক্ষে ভাল।

দূর। লেবুর জল খেলে বমি হয়ে যাবে।

হোক না। তাতে রিলিফ পাবেন।

না হে, রিলিফ অত সোজা নয়। অ্যাসপিরিন আছে তোমার কাছে?

না। আমি তো রাখি না। দরকার হলে এনে দিতে পারি। কিন্তু খালিপেটে কি ওসব খাওয়া ভাল?

আমার পক্ষে সব সমান। এখন উপদেশ দিও না, আই নীড কুইক রিলিফ।

ঠিক আছে, এনে দিচ্ছি! বাইরের ওষুধের দোকানগুলো বোধ হয় এখনো খোলেনি।

নার্সিং হোমে একটি মেডিসিন স্টোর আছে।

জয়ন্ত উঠে গেল। একটু বাদে দুটো ট্যাবলেট এনে টেবিলের ওপর রেখে বলল, ইওর পয়জন।

খুব ট্যাবলেট দুটো গিলে বলল, তুমি সেই মাঝরাত থেকে আমার সঙ্গে আঠার মতো লেগে আছো, আর টিকটিক করে যাচ্ছো। কেন বলো তো!

আপনাকে আর একটু স্টাডি করছি।

খুব স্মার্ট ভাবছো নাকি নিজেকে? আমাকে স্টাডি করছো মানে?

নার্সিং হোমের সামনে আপনার এই রাত কাটানোটা আমার একটু অদ্ভুত লাগছে। ভেরী আনলাইক ইউ।

এতে অস্বাভাবিক কী আছে?

আমার দিদির জন্য আপনি কোনোদিনই কিছু ফিল করেননি। বরং নানাভাবে তাকে সর্বনাশের দিকে ঠেলে দেওয়ার চেষ্টা করেছেন। ইঠাৎ এমন রেসপনসিবল হাজব্যাণ্ডের মতো বিহেভ করছেন যে, খুব অবাক লাগল।

খুব একটু হাসল, তারপর টপ করে মাথাটা দুহাতে চেপে ধরে “ওঃ” বলে একটা কাতরতার শব্দ করে চোখ বুজে থাকে কিছুক্ষণ। চোখ বোজা অবস্থাতেই বলে, তুমি বোধ হয় আমার সম্পর্কে একটু সফট হয়ে পড়েছো জয়। ইউ আর টেকিং কেয়ার অফ মি।

জয় বলে, সে তো ঠিকই। আপনার প্রতি আমার ব্যক্তিগত কোনো সফটনেস নেই। কাল রাতেই তো বলেছিলাম, দিদির জন্যই আপনাকে চোখে চোখে রাখছি। দিদি বিধবা হোক এটা তো

আর চাইতে পারি না ।

ধুব খানিকক্ষণ মৃদু মৃদু হাসল । তারপর বলল, আপাতত তোমার দিদি বিধবা হচ্ছে না । তাকে জ্বালাতে আমি আরো কিছুদিন বাঁচবো ।

জয় মাথা নেড়ে বলল, আর আপনিও বোধ হয় এ যাত্রা বিপত্নীক হতে পারছেন না । অনেক কষ্ট করেছিলেন যদিও । বেটার লাক নেকস্ট টাইম ।

ধুব এবার হোঃ হোঃ করে হেসে ওঠে । খানিকক্ষণ হেসে আবার একটা কাতর শব্দ করে থেমে যায় । বলে, পেটের মধ্যে একটা কী যেন হচ্ছে জানো ? একটা পেন । খুব বিচ্ছিরি টাইপের ।

ডাক্তার দেখাচ্ছেন না কেন ?

ভয় পাই । দেখালেই হয়তো বলবে ক্যানসার ।

আপনি তাহলে ক্যানসারকে ভয় পান ?

কে না পায় ?

পেলে তো ভালই । অস্তুত বোঝা যায় আপনি কিছুটা হিউম্যান ।

ধুব এটাকে অপমান হিসেবে নিল না । বরং আবার তার মুখে স্থিত হাসি ফুটে উঠল । খুশিয়াল একরকম গলায় সে বলে, এত স্মার্ট কিন্তু কখনো ছিলে না জয় ।

এখন হয়েছি তাহলে ?

বোধ হয় । আজ বেশ ভাল ফর্ম দেখছি তোমার ।

সেটা আপনার মনে হচ্ছে আপনি আজ ভাল ফর্মে নেই বলে ।

ধুব একথায় হাসল না । কিছুক্ষণ মুখ বিকৃত করে চোখ বুজে রইল । তারপর বলল, তোমার লেবুজল প্রেসক্রিপশনটা একটু টাই করলে হত । এই রেস্টুরেন্টে কি পাওয়া যাবে ?

যাবে না মানে ? আপনি কি সোজা ভি আই পি ? এক্ষুনি কাঁপতে কাঁপতে দেবে ।

তাহলে বলে দাও । আর এক কাপ লিকারও দিতে বোলো, দুধ চিনি ছাড়া শুধু পাতলা একটু লিকার ।

একটু হুইস্কি মিশিয়ে দেবে নাকি ? জয় ঠাট্টার গলায় বলে ।

দরকার নেই ।

জয় উঠে গেল । ধুব নিজের ভিতরে অ্যাসপিরিনের ক্রিয়া শুরু হওয়ার জন্য চোখ বুজে খুব ব্যগ্র মনে অপেক্ষা করতে থাকে । তারপর হতাশভাবে মাথা নেড়ে নিজেকেই নিজে বলে, ইট ইজ নট ওয়াকিং ।

লেবুজল এবং লিকার একই সঙ্গে টেবিলে রেখে গেল বেয়ারা ।

জয় বলল, লেবুজলটা আগে খেয়ে নিন ।

সভয়ে গ্লাসটার দিকে চেয়ে থেকে ধুব বলে, খেলে কিছু হবে না তো !

বললাম তো, জানি না । শুনেছি ।

আরে, শুনেছি তো আমিও । কখনো টাচ করিনি ।

করে দেখুন ।

ধুব গ্লাসটা তুলল । অল্প অল্প করে কয়েকটা চুমুক দিয়ে বলল, খুব খারাপ লাগছে না ।

তাহলে খেয়ে নিন ।

ধুব খেয়ে নিল । একটা মস্ত ঢেঁকুর তোলার পর একটু স্বস্তি বোধ করতে লাগল । লিকারের কাপ মুখে তুলে বলল, রেমির অপারেশন কটায় ?

আটটা এখনো দেড় ঘণ্টা দেরী আছে ।

ততক্ষণ আমি কোথাও একটু শুয়ে থাকতে চাই ।

বাড়ি চলে যান না । টেক এ ন্যাপ ।

ধুব মাথা নেড়ে বলে, না । কারো গাড়িটাড়ি নেই ? ব্যাকসিটে একটু পড়ে থাক। যেত ।  
না । গাড়ি সব চলে গেছে । তবে আবার আসবে ।

তবে থাক ।

কাল রাতে আপনি কিছুক্ষণ ফুটপাথেও শুয়ে ছিলেন ।

মনে আছে ।

জয়ন্ত কিছুক্ষণ অপলক চোখে ধুবকে লক্ষ্য করে বলল, আমার ধারণা আপনার শরীর সুস্থ নেই ।  
একজন ডাক্তার দেখানো উচিত ।

ধুব একটা বড় শ্বাস ছেড়ে বলে, সেটা আমি জানি । আমি আগেকার মতো সুস্থ আর নেই ।  
নিজের ওপর আমার শোধ তোলা হয়ে গেছে । এখন অপেক্ষা ।

জয়ন্ত অবাক হয়ে বলে, কথাটার মানে কী ?

তুমি বুঝবে না ।

নিজের ওপর শোধ তুলছেন কেন ? কৃতকর্মের জন্য নাকি ?

ধুব মাথা নেড়ে হাসিমুখে বলে, না । একটা ভুলের জন্য ।

কিরকম ভুল ?

টু বি বর্ন ইন এ রং প্রেস অ্যাণ্ড ইন এ রং টাইম অ্যাণ্ড ইন এ রং ফ্যামিলি ।

জয়ন্ত চূপ করে থাকে ।

ধুব বলে, কিছু বুঝলে ?

আপনার এ ধারণাটাও তো ভুল হতে পারে !

না । কিন্তু সে কথা থাক । চলো একটু মর্নিং ওয়াক করে আসি ।

জয়ন্ত একটা হাত তুলে বলে, আমার আর ওয়াকের দরকার নেই । এমনিতেই যথেষ্ট টায়ার্ড ।

তাহলে আমি একটু ঘুরে আসি ।

আসুন ।

ধুব উঠল, ধীর পায়ে বেরিয়ে এসে শীতের সকালে কবোক্ষ রোদে হাঁটতে লাগল ।

একটা বাঁক ঘুরল সে । মাথাটা দুলছে । মাথাটা হঠাৎ শূন্য লাগছে । ধুব ফেরার চেষ্টা করল ।  
কিন্তু হাঁটতে জোর পেল না । বুকের মধ্যে একটা অস্থিরতা ।

শরীরের একটু অহংকার ছিল ধুবর । কিন্তু সেই চমৎকার দীর্ঘ, একহারা চাবুকের মতো শরীরটাই  
এখন একটা বোঝার মতো মনে হচ্ছিল ।

ধুব হাত বাড়িয়ে বাতাসের হাতল ধরার একটা অক্ষম চেষ্টা করল । তারপর দুমড়ে মুচড়ে উপুড়  
হয়ে পড়ে গেল কঠিন শানের ফুটপাথে ।

॥ ৭৩ ॥

কৃষ্ণকান্ত এক জ্বালাভরা চোখে সূর্যোদয় দেখছিল । রাঙা আকাশ থেকে রক্তের স্রোত মিশছে  
ব্রহ্মপুত্রের জলে । ভোরবেলার শান্ত সুন্দর স্রী আজ সে অনুভব করতে পারছিল না । আজ বুকের  
জ্বালা, অক্ষম রাগ আর এক গভীর বেদনায় এমন সুন্দর ভোরবেলাটিকে তার ছাইয়ের মতো বিবর্ণ  
বোধ হচ্ছিল ।

অপঘাতে তার কাকা মারা গিয়েছিল । সেই কাকাকে ভাল করে মনেও নেই তার । কিন্তু সে  
জানে, এই বংশের মুখোজ্জ্বলকারীদের তিনি ছিলেন একজন । ব্রহ্মচারী, দেশভক্ত সেই মানুষটিকে  
কে বা কারা খুন করেছিল ব্রহ্মপুত্রের ওপর । সেই মৃত্যুর জন্য এক থম-ধরা শোক আছে

কৃষ্ণকান্তর। ফের তার নিরীহ বাবার ওপর এই বর্বর আক্রমণ তাকে উত্তেজিত করছে একটা কিছু করে ফেলতে। একটা মারাত্মক কিছু।

কৃষ্ণকান্ত একা একা অনেকক্ষণ ছাদে ঘোরাফেরা করল। কখনো জোরে, কখনো ধীরে। রাত্রি জাগরণের জন্য তার কোনো ক্লান্তি বোধ হচ্ছে না। তার ক্ষুধা-তৃষ্ণার বোধও লুপ্ত। মাঝে মাঝে নিজের তপ্ত মাথাটা চেপে ধরছে দুহাতে। বাবা কি বাঁচবে? বাবা যদি না বাঁচে তবে কৃষ্ণকান্তর মধ্যে একটা বিপুল কিছু ঘটে যাবে। হয়তো সে পাগল হয়ে যাবে। যদি তা না হয় তবে সে হয়তো হয়ে উঠবে এক সাজ্জাতিক খুনী, গুণ্ডা বা ডাকাত। একটা লগুভগু কিছু সে করবেই।

রোদ বেশ চড়া হয়ে ওঠার পর কৃষ্ণকান্ত থমথমে মুখে নেমে আসে নীচে। তালা দেওয়া একটা ঘরের সামনে দুদণ্ড দাঁড়ায়। চাবি কোথায় আছে তা সে জানে। একটু দ্বিধা করে সে গিয়ে হেমকান্তর ঘরে ডেস্কের দেরাজ খুলে চাবির গোছা নিয়ে এসে দরজাটা খুলে ঢোকে।

এ ঘর আজকাল খোলা হয় না বলে একটা বন্ধ বাতাসের গন্ধ। কৃষ্ণকান্ত দুটো জানালা খুলে দেয়। চার পাঁচটা বন্দুকের বাস্কর্যাকের ওপর সাজানো। চেস্ট অফ ড্রয়ার্সটা খুলে ভিতরে উঁকি দেয় সে। প্রথম ড্রয়ারে কিছু তেমন নেই। শুধু চারটে টোটোর বাস্ক। দ্বিতীয় ড্রয়ারটায় বন্দুকের তেল, লোহার লম্বা শিকে লাগানো বুরুশ, যা দিয়ে ব্যারেল পরিষ্কার করা হয়। তিন নম্বর ড্রয়ারে নেপালী কুকরি, জৌনপুরী ছোরা হ্যাণ্ডিং নাইফ এবং আরো কয়েকরকম শৌখিন বিলিতি ড্যাগার রয়েছে। পরের ড্রয়ারটা খুলে অভীষ্ট বন্দুকটা পেয়ে যায় কৃষ্ণকান্ত। চার পাঁচ রকমের গুলি, বহু টোটোর বাস্ক এবং নানাবিধ টুকরো-টাকরা জিনিসের মধ্যে ন্যাকড়ায় জড়ানো চামড়ার খাপে সাবধানে লুকিয়ে রাখা একটা জার্মান মাউজার পিস্তল। জিনিসটা যে আছে এটা সে জানত। কিন্তু কোনোদিন চোখে দেখেনি। হেমকান্ত অস্ত্রশস্ত্র পছন্দ করেন না। এ ঘর তিনি কদাচিৎ খুলেছেন।

কৃষ্ণকান্ত পিস্তলটা জামার তলায় রেখে ড্রয়ারটা বন্ধ করে। দরজায় তালা দিয়ে চাবি যথাস্থানে রেখে সে চলে আসে বারবাড়িতে নিজের ঘরে। তোশকের তলায় খাপসুদ্ধ পিস্তলটা রেখে সে বেরিয়ে আসে।

শচীন হাসপাতাল থেকে এল আটটা নাগাদ। কৃষ্ণকান্ত তখন দালানের সিঁড়িতে বসে গভীর চিন্তায় মগ্ন। পিস্তল হাতে এলেও টোটা তার হাতে নেই। সে প্রথম ড্রয়ারটা হাঁটকে দেখেছে। সেখানে শুদ্ধ বন্দুকের টোটা আছে। পিস্তলটা বহুকাল ব্যবহৃত হয়নি।

শচীন এসে সাইকেল থেকে নামতেই কৃষ্ণকান্ত মগ্নতা ভেঙে টান টান উঠে দাঁড়ায়।

শচীনদা, বাবা?

শচীন একটু হেসে বলে, ভয় নেই। ভাল আছেন।

জ্ঞান ফিরেছে?

হ্যাঁ হ্যাঁ। ইনজুরিটা খুব কম নয়। তবে জ্ঞান আছে। তোমার কথা খুব বলছেন।

আমি যাবো।

যাবে। আমিই নিয়ে যাবো। তবে এবেলাটা থাক।

কেন?

এখনও দুর্বল তো। তোমাকে দেখলে যদি উত্তেজিত হন বা উঠে বসার চেষ্টা করেন তবে ব্রিডিং হবে।

কৃষ্ণকান্ত স্নানমুখে বলে, তবে থাক।

ডাক্তাররা বলছে, ভিজিটারদের এখন না এলেই ভাল।

বাবা বাঁচবে তো!

বাঁচবেন না কেন? ইনজুরি ফ্যাটাল নয়। নিশ্চিন্ত থাকো।

আপনার সঙ্গে বাবার দেখা হয়েছে?

একবার। এখন আর দেখা করতে দিচ্ছে না। শুনলাম, ঘুমোচ্ছেন। ভাল আছেন। তোমাকে ওরকম দেখাচ্ছে কেন বলো তো! কেমন যেন রেগে আছে!

কৃষ্ণকান্ত জবাব দিল না। একটু হাসবার চেষ্টা করল মাত্র।

শচীন বলল, যাও, স্নান করে কিছু খাও, অত ভাবতে হবে না।

বাবাকে কারা মেরেছে শচীনদা? জানেন?

না। পুলিশ খোঁজ করবে।

পুলিশ করবে জানি। আপনার কিছু সন্দেহ হয় না?

শচীন মাথা নেড়ে বলল, এ তো ভাবনাচিন্তার অতীত। হেমকান্তবাবুর মতো নির্বিरोधी লোক আমি তো অস্তুত দেখিনি। ওঁর কেউ শত্রু থাকতে পারে বলে কল্পনাও করা যায় না। আমার মনে হয় কেউ ভুল করে এ কাণ্ড করেছে। হয়তো অন্য কাউকে মারতে চেয়েছিল।

কৃষ্ণকান্ত বলল, তা নয় শচীনদা। আমার ইস্কুলের একটা ছেলে কাঁদিন আগেই বলেছিল, আমার বাবাকে নাকি স্বদেশীরা মারবে।

কেন মারবে? তাঁর অপরাধ?

স্বদেশীদের ধারণা বাবা শশীদাকে ধরিয়ে দিয়েছে।

শচীন একটু হতভম্ব হয়ে যায়। তারপর খুব বিস্ময়ের সঙ্গে বলে, সে কী? এ কথা তো আগেও হয়েছে। আমি নিজে শশিভূষণের সঙ্গে কথা বলেছি। সেও তো এরকম সন্দেহ করে না। এমন কি উনি দারোগা রামকান্তবাবুর অনুরোধেও নিজেকে বাঁচানোর জন্য কোনো স্টেটমেন্ট দেননি।

কিন্তু লোকে তো বাবাকে ভাল বলে না।

শচীন একটু ভাবে। তারপর বলে, আচ্ছা দেখা যাক। খুদী যদি ধরা পড়ে তবে তার কাছ থেকেও তো কিছু জানা যাবে। তোমার স্কুলের সেই ছেলেটি কে বলো তো!

কেন, তাকে ধরিয়ে দেবেন?

দেওয়াই তো উচিত।

কৃষ্ণকান্ত মাথা নেড়ে বলল, তার দরকার নেই। আমি আজ স্কুলে গিয়ে নিজেই ব্যবস্থা করব। মারপিট করবে নাকি?

কৃষ্ণকান্ত একটু হেসে বলে, দরকার হলে করতেও পারি। তবে আপনি কিছু ভাববেন না।

শচীনকে একটু চিন্তিত দেখাল। সে বলল, আজই স্কুলে যাবে?

যেতেই হবে শচীনদা।

শচীন চিন্তিত মুখে খানিকক্ষণ তার মুখের দিকে চেয়ে থেকে বলে, তোমার বাবার জন্য তোমার রাগ হতেই পারে। কিন্তু রাগের বশে হট করে কিছু করে ফেলো না কৃষ্ণ। তোমার বয়স অল্প।

কৃষ্ণকান্ত মাথা নেড়ে বলল, আমি তেমন কিছু করব না শচীনদা। শুধু জেনে নেবো, ছেলেটা কোথা থেকে শুনল যে আমার বাবাকে স্বদেশীরা খুন করবে।

তার চেয়ে ছেলেটার নাম আমাকে বলো। আমি গিয়ে তার সঙ্গে কথা বলব।

কৃষ্ণকান্ত লাজুক হেসে বলে, সেটা ভাল দেখাবে না। শত হলেও সে আমার স্কুলের বন্ধু। তার নাম আপনাকে বলে দিলে বিট্টে করা হবে। আমিই ওর কাছ থেকে জেনে নেবো।

শচীন খুব ভাল করে কৃষ্ণকান্তের মুখটা দেখল। দেখে তার মনে হল, পাত্রটি খুব সহজ নয়। এইটুকু ছেলে ঠিক এরকম আত্মপ্রত্যয় নিয়ে কথা বলে না। কৃষ্ণের রকম-সকম একটু আলাদা।

শচীন চিন্তিত মুখেই বলল, ঠিক আছে। তবে মুশকিলে পড়লে আমাকে সব বোলো। মনুদিদি কি ভিতর-বাড়িতে আছে?

হ্যাঁ। দোতলায়। ছোড়দিও আছে। যান না।

কথাটায় কিছু ছিল না, তবু একটু লাল হল শচীন। কস্পিত বুক ও উদ্দীপ্ত এক আনন্দ নিয়ে সে

ওপরে ওঠার সিঁড়ি ভাঙতে লাগল।

বিশাখা ভেঙে পড়েছে অনেক আগেই। সারা রাত কান্নার পর সকালের দিকে অবসন্ন বিশাখা বিছানায় তেড়াবঁকা হয়ে শুয়ে ঘুমিয়ে পড়েছে কখন। রঙ্গময়ী ঘুমোয়নি। তার বুকের জ্বালা তাকে ঘুমোতে দেয়নি। স্নান করে সে দোতলায় ভেজা শাড়ি মেলছিল।

শচীন ওপরে এসে ডাক দিল, মনুদিদি!

কী খবর শচীন?

ভাল। একটু হাসি মুখে টেনে শচীন বলে, ঘুমোচ্ছেন।

আমাদের দেখা করতে দেবে না?

আজ নয়।

তবে কবে? আমার যে হাতে পায়ে বল নেই। অত রক্ত গেল।

অত ঘাবড়াবেন না। হেমকান্তবাবু তো দুর্বল লোক নন। একটু রক্ত গেলেও ক্ষতি কিছু হয়নি। সামলে উঠছেন।

ডাক্তাররা কী বলছে?

এমনিতে ভয় নেই। একমাত্র যদি ক্ষত বিষিয়ে ওঠে বা ধনুষ্টঙ্কার হয়। ওরা সব ব্যবস্থাই করছে।

বিষিয়ে ওঠার লক্ষণ কিছু দেখা গেছে নাকি?

আরে না! আপনিও যদি অত উতলা হন তবে কি করে চলবে? আমি আপনাকে আর একটা কথা বলার জন্য ওপরে এসেছি। কক্ষর দিকে একটু লক্ষ্য রাখবেন।

কেন বলো তো!

একটু ইতস্তত করে শচীন বলে, ও একটু অন্য ধাতের। ইস্কুলে কোন ছেলে নাকি ক'দিন আগে ওকে বলেছে যে, ওর বাবাকে স্বদেশীরা মারবে। ও আজ স্কুলে যাচ্ছে সেই ছেলের সঙ্গে মোকাবিলা করতে। একটা হাস্যামা বাধাতে পারে। আপনি বরং বিশ্বাসী কোনো দারোয়ানকে ওকে না জানিয়ে স্কুলে মোতায়েন রাখবেন। গণ্ডগোল হলে গিয়ে যেন ছাড়ায়।

কক্ষ স্কুলে যাবে কী? ওর বাবার এই অবস্থা?

স্কুলে যাবে ক্লাস করতে নয়, ওই ছেলেটাকে ধরতে।

কোন ছেলের কথাটা বলেছে জানো?

না, আমাকে বলেনি।

ঠিক আছে, আমি দেখছি।

আমি তাহলে যাই?

যাবে কেন? মোড়িটায় বোসো। তোমার ধকল গেছে সবচেয়ে বেশী। বেলের পানা করতে বলেছি। একটু মুখে দিয়ে যাও। হাসপাতালে আমাদের কে কে আছে?

ওরে বাবাঃ, সে অনেক লোক। শচীন হেসে বলল, শহর সুদূর ভেঙে পড়েছিল মাঝ রাত্রে। এখন প্রজারা আছে বেশ কিছু। কর্মচারীও আছে।

ওঁকে সবাই কত ভালবাসে! বলে রঙ্গময়ী উদাস নিষ্পন্দ হয়ে দাঁড়িয়ে থাকে কিছুক্ষণ। তারপর বলে, ভাল হয়ে ফিরে এলে আর এখানে এক দণ্ড থাকতে দেবো না।

কোথায় যাবেন?

যেখানেই হোক। কলকাতায় পাঠিয়ে দেবো। কনকের কাছে গিয়ে থাকবে। কী বলো, ভাল হবে না?

শচীন একটু হেসে প্রগলভের মতো বলে ফেলল, আপনি কাছাকাছি না থাকলে ওঁকে দেখবে কে? উনি কি পারবেন আপনাকে ছাড়া?

এ কথায় রঙ্গময়ীর যেমন আপাদমস্তক লজ্জায় শিউরে ওঠা উচিত ছিল তেমন কিছুই হল না । কথটা যেন লজ্জাজনক বলেই মনে হল না তার কাছে । উদাস চোখে বারান্দার বাইরে দিগন্তের দিকে চেয়ে বলল, দরকার হলে আমিও থাকব । আমার আর কার জন্য বেঁচে থাকা বলো !

শচীন রঙ্গময়ীর এই কথায় চোখ নামিয়ে নিল । আশ্চর্য এই, রঙ্গময়ীকে তার খুব নির্লজ্জ বলে মনে হল না । বহুকাল ধরেই কৃষ্ণকান্ত আর রঙ্গময়ীকে নিয়ে যে গুজব প্রচলিত আছে তা সবই সে জানে । কিন্তু দুজনের কাউকেই তার কখনো অপবিত্র মনে হয়নি । রঙ্গময়ীর এই সত্য ভাষণে তাই সে নির্লজ্জতার কোনো চিহ্ন পেল না ।

রঙ্গময়ী ধীর স্বরে বলল, এমন মানুষ তো খুব বেশী পাবে না । কেবল আপন মনে ঘরে বসে ভাবেন, কারো অনিষ্ট চিন্তা করেন না, বিষয় চিন্তা করেন না । যেসব ভাবনা ভাবেন সেগুলোও আধ্যাত্মিক ভাবনা । পৃথিবীতে কী ঘটে যাচ্ছে সে খেয়ালও নেই । এরকম মানুষকে কে মারতে পারে বলো তো ! ওদের কি হাত ওঠে ?

প্রজাদের কেউ হতে পারে কি মনুদিদি ?

রঙ্গময়ী দীর্ঘশ্বাস ফেলে বলে, না । ঊঁর প্রজারা তো কেউ দুঃখে নেই ।

তবে কি কৃষ্ণর বন্ধু যা বলেছে তাই সত্যি ?

স্বদেশীরা ? হতে পারে । শশীকে নিয়ে তো কম গুজব ছড়ায়নি । যেই মারুক তার দশবার ফাঁসি হওয়া উচিত । স্বদেশীরা আসল কাজ ফেলে যদি এসব করতে থাকে তবে আন্দোলনের বারোটা বাজতে দেয়ী হবে না । বোসো, আমি আসছি ।

রঙ্গময়ী চলে গেলে বারান্দায় রাখা হেমকান্তর আরামকোদারায় বসে ফুরফুরে হাওয়ায় ব্রহ্মপুত্রের দিকে চেয়ে থাকে শচীন । পাল তোলা নৌকো রূপোলি জল কেটে মস্তুর গতিতে চলেছে । ওপরে ছিন্ন মেঘ ভাসছে ভেলার মতো । বহু দূর পর্যন্ত অব্যবহৃত মুক্ত পৃথিবী । দেখতে দেখতে শচীনের তন্দ্রা চলে এল । ক্লান্ত মাথাটা একটু কাত হয়ে গেল ডানদিকে ।

ভারী কোমল ও নরম একটা দেহগন্ধ, খুব অস্পষ্ট একটু গয়নার টুংটাং আর শাড়ির খসখস তার চটকা ভাঙিয়ে দেয় । চোখ চাইতেই দুটি অপরূপ চোখে আটকে যায় সে ।

বিশাখা খুব কঁদেছে । চোখের কোল ভারী । মুখখানা থমথমে । তবু একটু রক্তাভ উজ্জ্বলতা দেখতে পায় ওর মুখে শচীন । সে উঠে বসে । বিশাখা কিছু জিজ্ঞেস করার আগেই বলে, উনি ভাল আছেন । কোনো ভয় নেই ।

বিশাখা চোখ নত করে বলে, মনুপিসির কাছে শুনলাম ।

তোমরা এবার নেয়ে খেয়ে একটু বিশ্রাম নাও । সারা রাত খুব ধকল গেছে তোমাদের । আপনার তো তারও বেশী ।

আমার জন্য ভেবো না । আমি তো প্রায়শ্চিত্ত করছি ।

কিসের প্রায়শ্চিত্ত ?

তোমার কাছে এবং তোমাদের পরিবারের কাছে আমার অনেক দোষ জমা হয়ে আছে । সাধ্যমত চেষ্টা করছি সেগুলো স্বালন করতে । প্রায়শ্চিত্ত কথটার মানে জানো ?

না । আমাকে তো কেউ কিছু শেখায়নি ।

প্রায়শ্চিত্ত কথটার মানে পুনরায় চিন্তে গমন ।

তার মানে কি ?

মানুষ যখন কোনো অন্যায় করে তখন যে তার স্বাভাবিক চিন্তাবৃত্তি থেকে পতিত হয়ে যায় । সেই পতিত মনটিকে আবার স্বস্থানে স্থাপন করাই প্রায়শ্চিত্ত ।

ওসব শব্দ কথা আমি বুঝি না । তবে আপনার কাছেও আমার অনেক দোষ জমা হয়ে আছে । কাটাকাটি করে নিলেই হয় ।

হয় ? সত্যি বলছো ?

একটু রাঙা হয়ে বিশাখা বলে, সত্যি না তো কী ? আপনাকে আর কাশী গয়া বৃন্দাবন করে বেড়াতে হবে না ।

শচীন একটু হেসে বলে, ওটা তো বেড়াতে যাওয়া, প্রায়শ্চিত্ত করতে নয় । আমি তো ঠিক করেছিলাম তোমাকে আর মুখ দেখাবো না ।

আমারও মুখ না দেখানোই বোধহয় উচিত ছিল

কাশী রওনা হওয়ার আগে তোমাকে একটা চিঠি দিয়েছিলাম । তুমি তার জবাব না দেওয়ায় মনে বড় কষ্ট হয়েছিল ।

আর আমি যে সুফলাকে দিয়ে আপনাকে অত বলে কয়ে ডেকে পাঠালাম আপনি তো গ্রাহ্যও করলেন না !

সুফলাকে দিয়ে ? কই সে তো বলেনি আমাকে !

বলেনি ! কী পাজি মেয়ে ! আমি ওকে ডাকিয়ে এনে বলে পাঠালাম, শচীনবাবুকে বলিস একবার যেন দেখা করে যান । আমি খুব আশা করে থাকব ।

শচীন মৃদু হেসে বলে, বোধহয় হিংসেতে বলেনি । মেয়েরা একটু ও রকম হয় । তোমার ওপর সুফলার একটু রাগও থাকতে পারে । যাকগে, তোমার জবাব তাহলে গিয়েছিল, একটু অন্যভাবে ।

হ্যাঁ । আপনি রাগ রাখবেন না ।

না । কিন্তু সেদিন ডেকে পাঠিয়ে কী বলতে বলো তো !

বলতাম, আপনি কাশী যাবেন না, আমি<sup>১</sup> আপনার ওপর রাগ করিনি ।

একটুও করেনি ?

না । আমাকে কেউ কখনো শাসন করেনি বলেই নাকি আমি একটু কেমনধারা হয়ে গেছি । কৃষ্ণও বলে ।

বলে নাকি ?

হ্যাঁ । ওই তো বলেছিল, আমার নাকি মাঝে মাঝে একটু শাসন হওয়া দরকার ।

শচীন হেসে ফেলে বলে, দরকার ? তাহলে...

তাহলে কি ?

শাসনের জন্য একজন লোক তো চাই ।

বিশাখা মুখ নত করল । হাসি নেই মুখে, তবে একটু স্মিত ভাব । পর মুহূর্তেই সংযত আর গম্ভীর হয়ে বলে, বাবা সত্যিই ভাল আছেন তো ?

সত্যিই ভাল আছেন । অস্তুত প্রাণের ভয় নেই ।

আমি একটু পূজো দিতে যাবো কালীবাড়িতে ।

যাও না ।

খুব ধীরে ধীরে বিশাখা সিঁড়ির দিকে এগিয়ে গেল । এক দৃষ্টে চেয়ে রইল শচীন । কী অপূর্ব, কী অপার্থিব সৌন্দর্য এই মেয়েটির !

॥ ৭৪ ॥

ধ্রুবর যে একটা কিছু হয়েছে তা আশঙ্কা করেছিল জয়ন্ত । তাই সতর্কভাবে সে রেস্টুরেন্টের দরজার বাইরে এসে ধ্রুবকে দেখছিল । হাঁটার ভঙ্গিটা কিছু অস্বাভাবিক । যেন জল ভেঙে হাঁটছে । পদক্ষেপ সমান মাপের নয় । শরীরটা একটু ঝুঁকে আছে ।

ধ্রুব যখন পড়ল তার আগেই জয়ন্ত লম্বা লম্বা পায়ে এগিয়ে গেছে তার দিকে ।



ধুবর জ্ঞান ছিল না। কপালটা ঠুকে গেছে ফুটপাথের শানে। একটু রক্ত পড়ছিল ক্ষতস্থান থেকে।

এত সকালে রাস্তায় বিশেষ লোকজন থাকে না বলে একটা সিন হল না। জয়ন্ত ধুবকে চিৎ করে শুইয়ে হাইড্র্যান্টের নোংরা জল তুলে ঝাপটা দিল চোখে। কয়েকবার ঝাপটা দিতেই ধুব তাকায়। আস্তে আস্তে উঠেও বসে। তবে চোখের দৃষ্টি কাচের মতো ভাবলেশহীন, মুখ সাদা।

জয়ন্ত জিজ্ঞেস করে, এখন কেমন লাগছে ?

বেটার। কী হয়েছিল বলো তো ? পড়ে গিয়েছিলাম নাকি ?

আপনার ডাক্তার দেখানো দরকার।

বার বার ওকথা বলছ কেন ? আমার কিছু হয়নি।

জয়ন্ত একথার জবাব না দিয়ে ধুবকে ধরে আস্তে আস্তে দাঁড় করাল। তারপর বলল, একটা ট্যাকসি ধরে দিই, বাড়ি চলে যান।

বাড়ি ! বলে ধুব কিছুক্ষণ ভাববার চেষ্টা করে। কিন্তু তার চিন্তাশক্তি ভাল কাজ করছে না। মাথাটা শূন্য। একটু ভাববার চেষ্টা করে হাল-ছাড়া গলায় বলল, তাই করি তাহলে। আমি কেন যে নিজের ওপর গ্রিপ হারিয়ে ফেলছি !

সকালবেলায় ট্যাকসি সহজলভ্য। জয়ন্ত একটা ট্যাকসি ধরল এবং ধুবকে তুলে নিজেও উঠে বসল পাশে।

চলুন, পৌঁছে দিয়ে আসি।

রেমির কী হবে ?

যা হচ্ছে তা আপনাকে ছাড়াই তো হচ্ছে। কেউ তো আপনার সাহায্য চায়নি।

ধুব কথাটার জবাব দিল না প্রথমে। একটু বাদে একটা দীর্ঘশ্বাস ছেড়ে বলল, তা বটে। আমার এক ফোঁটা রক্তও নেওয়া হয়নি রেমির জন্য।

বাড়ির সামনে ধুবকে নামিয়ে দেয় জয়ন্ত, নিজে নামে না। ট্যাকসি থেকে মুখ বাড়িয়ে বলে, গিয়ে গরম জলে স্নান করে ভরপেট কিছু খেয়ে নিন।

ধুব ফটক খুলে বাড়িতে ঢোকে। লোকজন, চাকর বাকর আজ চোখেই পড়ল না। নিজের ঘরে এসে ধুব কিছুক্ষণ চূপচাপ বিছানায় পড়ে থাকে। কাল রাতে সে মদের দোকানে ভাঙচুর করেছে। তখনো সে বেশ ফিট ছিল। তারপর পুলিশের খবর থেকে পালাতে দৌড়েছে অনেকটা পথ। তারপর বাড়ি ফিরে রেমির খবর পেয়ে গেছে নার্সিং হোম-এ। সব ঘটনাগুলো ভেবে দেখল সে। কোথাও কোনো অস্বাভাবিকতা ছিল না তার। অসুস্থতা তো নয়ই। তাহলে কী হল ? জ্ঞানবয়সে সে কখনো অজ্ঞান হয়েছে বলে মনে পড়ে না।

শরীরটা যে ভীষণ দুর্বল তা একটু নড়াচড়া করতে গেলেই সে টের পাচ্ছে। মাথাটা বড্ড বেশী ফাঁকা।

কিছুক্ষণ চূপচাপ শুয়ে থাকতে থাকতে কখন টুপ করে ঘুমের মধ্যে তলিয়ে গেল সে, টেরও পেল না।

যখন ঘুম ভাঙল তখন দুপুর গড়িয়ে গেছে। শীতের বেলা প্রায় শেষ হয়ে এল। রোদের আভাষ লালচে রঙ ধরে গেছে।

ডাকছিল লতু। এই ছোড়া, ওঠ ! খাবি না !

ধুব খুব কষ্টে চোখ খোলে। কিন্তু জেগে উঠতে আরো খানিকক্ষণ সময় লাগে তার। কিছুক্ষণ সে নিজের ঘর, জিনিসপত্র বা লতুকেও চিনতে পারে না। মাথাটা পরিষ্কার হয়ে যেতে সে পাশ ফেরে। কনুইয়ের ওপর ভর দিয়ে মাথাটা তুলে ঘড়ি দেখে। তিনটে।

লতু বড় বড় চোখ করে তাকে দেখছিল। বলল, কখন এসেছিস কেউ টের পায়নি তো ! বাবা

ভীষণ ভাবছেন। বোধ হয় থানাতেও খবর দেওয়া হয়েছে।

ধুব বহুক্ষণ কিছু খায়নি। সম্ভবত কাল বিকেলের পর থেকে তার পেটে খাবার পড়েনি। এখন পেটের ভিতরে একটা ওলট পালট হচ্ছে। সে লতুর দিকে চেয়ে বলে, সকালেই এসেছি।

কাউকে ডাকিসনি কেন?

ডাকবো কি করে? ঘুমোচ্ছিলাম না!

খবরটা দিবি তো যে বাড়িতে এসেছিস!

আমি একটু স্নান করব। গরম জল দিতে বল স্ত্রী।

কেন, বাথরুমে গীজার তো আছেই।

তুই চালিয়ে রেখে যা।

তোর কি শরীর খারাপ?

হ্যাঁ, উইক লাগছে।

হবেই। কাল থেকে কিছু খাসনি বোধ হয়। তার ওপর ওই টেনশন।

এবার বিদ্যুৎ চমকের মতো রেমির কথা মনে পড়ল ধুবর। টেনশন কথাটাই মনে পড়িয়ে দিল। নইলে—আশ্চর্য রেমির কথা তার মনেই ছিল না। সে লতুর দিকে চেয়ে বলল, রেমির কী খবর?

লতু মাথা নাড়ল, ভাল।

কিরকম ভাল?

অপারেশন হয়েছে। ব্রিডিং বন্ধ।

তার মানে বাঁচবে?

হ্যাঁ, বাঁচবে না কেন? তুই ওঠ। আমি গীজার চালিয়ে দিচ্ছি। বলে লতু বাথরুমে গিয়ে গীজার চালিয়ে ঘরে এসে বলল, আবার যেন ঘুমিয়ে পড়িস না। আমি খাবার, তৈরি রাখতে বলে যাচ্ছি ঠাকুরকে। বাবাকে ফোন করে তোর খবর দিতে হবে। ওপরে যাচ্ছি।

বাবা কোথায়?

দুপুর পর্যন্ত নার্সিং হোমে ছিলেন। তার পর রাইটার্সে গেছেন। একটুও বিশ্রাম করেননি আজ। ভয় হচ্ছে অসুস্থ হয়ে না পড়েন। বউদির জন্য যা কান্নাকাটি করেছেন আর যা টেনশন গেছে তাতে কাল রাতেই স্ট্রোক হয়ে যেতে পারত।

ধুব উঠল এবং টের পেল, তার শরীরের গ্লানি অনেকটা কম। দুর্বলতা আছে তবে তা মারাত্মক নয়। তবু নিজেকে তার ভারী শিশু-শিশু লাগছে আজ। লতু তার সঙ্গে কদাচিৎ এত ভাল ব্যবহার করে। এই যে তাকে স্নান করে খেয়ে নিতে বলে গেল লতু ঠিক এরকমটা ওর কাছে প্রত্যাশিত নয়। মনে মনে লতু তাকে ঘেল্লা করে এবং সবচেয়ে বড় কথা, তাকে পান্তা দেয় না। আজ দিচ্ছে। এতে কি খুশি হবে ধুব? নাকি কোনো প্রতিক্রিয়া ঘটানোর মতো নয় ব্যাপারটা?

সে উঠে হালকা কিছু ব্যায়াম করল। তার শরীর নমনীয় এবং সুগঠিত। সহজে কোনো অসুখ করে না। কিন্তু যখন করে তখন ভোগায়। ধুব অসুখ-বিসুখকে বড় ভয় পায়। কারণ অসুখ মানেই একধরনের বন্দীত্ব। বন্দীত্ব তার অসহ্য।

গরম জলে কয়ে স্নান করল সে। শরীর অনেক ঝরঝরে লাগতে লাগল। ঘরে আসতেই ঠাকুর উঁকি দিয়ে জিজ্ঞেস করল, খাওয়ার ঘরে যাবেন, না এখানে খাবার দিয়ে যাবো?

খাওয়ার ঘরে।

ধুব পায়জামা আর পাজ্জাবির ওপর শাল জড়িয়ে নেয়। গরম জলে স্নান করার পর শীতটা একটু বেশী লাগছে।

ঠাকুর গরম ভাত বেড়ে দিয়েছে টেবিলে। ধুব ভাত ভাঙল। তারপর ঠাকুরের দিকে চেয়ে বলল, বউদি কেমন আছে জানো?

ঠাকুর শশবাস্তে বলল, ভাল ।

ঠিক জানো

হ্যাঁ দাদাবাবু । আমি তো দুপুরেই নার্সিং হোমে গিয়েছিলাম ।

নিশ্চিন্ত হ'ল ধ্রুব । লতুর কথা যে তার বিশ্বাস হয়নি তা নয় । তবে এমন হতে পারে যে, কোনো অশুভ কিছু ঘটে থাকলে লতু হয়তো সত্যি খবরটা তাকে দিতে চায়নি ।

পেট ভরে খাওয়ার পর ধ্রুব ঘরে এসে একটা সিগারেট ধরায় । পেট ভরার পর এক ধরনের আলসেমি জড়িয়ে ধরেছে তাকে । একবার নার্সিং হোমে যাওয়া উচিত সে বুঝতে পারছে । কিন্তু উৎসাহ পাচ্ছে না ।

জানালা দিয়ে সে বাড়ির পিছনকার ছোট্ট বাগানটার দিকে চেয়ে থাকে । রাঙা রোদে নম্র ও স্বপ্নময় হয়ে আছে জায়গাটা । পপি ফুল ফুটেছে অনেক । নিঃশব্দ এক প্রাণের খেলা চলছে এই এক টুকরো বাগানের পরিধিতেও ।

ধ্রুব সিগারেটটা শেষ করে কিছুক্ষণ শুয়ে থাকে বিছানায় । ভাল লাগে না । এরকম শুয়ে বসে সময় কাটানোর মানেই হয় না কিছু । বিকেলবেলা ঘরে থাকতেও পারে না সে ।

ধ্রুব উঠল । চটি পরে আস্তে আস্তে বেরিয়ে এল বাড়ি থেকে । তারপর হাঁটতে লাগল । এমন উদ্দেশ্যহীন ভাবে বহুকাল সে হাঁটেনি । কিন্তু কিছুক্ষণ হাঁটবার পর সে বুঝতে পারে, এটারও কোনো মানে হয় না । হেঁটে যদি কোথাও যাওয়ার না থাকে তবে হাঁটবার মানে কি ?

আসলে ভীষণরকম একঘেয়ে লাগছে তার বিকেলটা । এরকম তো লাগে না । আজ লাগছে কেন

গা গরম করা এবং সময় কাটানোর মতো একটা জিনিস আছে । মদ । কিন্তু গত কালের অভিজ্ঞতা তার ভাল নয় । আজ সকালে অল্পক্ষণের জন্য হলেও সে অজ্ঞান হয়ে পড়ে গিয়েছিল রাস্তায় । না, আজ সে মদ খাওয়ার সাহস পাচ্ছে না । শরীরের ভিতরে যদি কোনো গোলমাল ঘটে গিয়ে থাকে তবে সেটাকে একটু থিতোনোর সময় দেওয়া ভাল ।

তার দূরকম বন্ধু আছে । একরকম, জুয়াড়ি, মদ্যপ, বদমাস, লোচ্ছা এবং গুণ্ডা । আর একদল ভদ্র, শিক্ষিত, মধ্য বা উচ্চবিত্ত— কারো সঙ্গেই বস্তুত তার খুব ঘনিষ্ঠতা নেই । থাকার কথাও নয় । সে কাউকেই খুব বেশীক্ষণ সহ্য করতে পারে না । নিয়মিত কোথাও সে আড্ডা দেয় না । তার অনেকগুলো ঠেক আছে । কোনোটা মেসবাড়ি, কোনোটা গুঁড়িখানা বা জুয়ার আড্ডা, একজন নষ্ট মেয়েমানুষের ঘর অবধি, আর আছে কফি হাউস, ধারার ফ্ল্যাট, দুটো ক্লাব ইত্যাদি । যখন যেটায় খুশি যায় বা যায় না । মাঝে মাঝে ধ্রুব একা একা ঘুরে বেড়ায় ভূতগ্রস্তের মতো । কখনো কলকাতার বাইরে পাড়ি দেয় ।

শিগগিরই—যদি তার বাবা কৃষ্ণকান্তর চাল খেটে যায় তবে তাকে যেতে হবে নাসিক । জায়গাটায় সে গেছে । ভাল নয়, খারাপও নয় । কৃষ্ণকান্তর এক বন্ধুর ফার্ম আছে সেখানে । তার সঙ্গে ব্যবসাতে জুড়ে দেওয়া হবে তাকে । কিন্তু মুশকিল হল, কৃষ্ণকান্ত সেটা পেরে উঠবে কি না সেটাই প্রশ্ন ।

তার বাবাকে সবাই সম্মিহ করে, এ কথা ঠিক । একথাও ঠিক বাংলাদেশের এনিমি প্রপাটির ক্ষতিপূরণ বাবদ টাকাও আইনত কৃষ্ণকান্তর প্রাপ্য । কিন্তু কথটা সবাই মেনে নিচ্ছে না । তার দাদু হেমকান্ত অন্য দুই ছেলেকে বঞ্চিত করে ছোটো ছেলের নামে সব বিষয় সম্পত্তি উইল করে ন্যায্য কাজ করেননি একথা ধ্রুবও মানে । এই উইলের ফলে রাগ করে বহুকাল আগে তার জ্যাঠা কনককান্তি কলকাতার বাড়ি ছেড়ে চলে গিয়েছিলেন, আর কখনো এ বাড়ির চৌকাঠ মাড়াননি । সেই জ্যাঠা এবং সেজো জ্যাঠার ছেলেরা বড় হয়েছে । তারা ফুঁসছে । এনিমি প্রপাটির টাকা বড় কম নয় এ বাজারে । প্রায় ত্রিশ লক্ষ টাকা দাবি করেছেন কৃষ্ণকান্ত । কাটছাঁট হওয়ার সম্ভাবনা কম,

কারণ তিনি প্রাক্তন মন্ত্রী এবং সম্ভাব্য এম পি । এত টাকা যদি পেয়েই যান কৃষ্ণকান্ত তবে আত্মীয়রা তার ভাগ আশা করবে না কেন ? কৃষ্ণকান্তকে তারা এত স্বার্থপর হতে কেনই বা দেবে ?

কৃষ্ণকান্ত কী চান তা খুব খানিকটা আঁচ করতে পারে । তিনি আপাতত খুবকে দূরে সরিয়ে দিয়ে একটা লাগাতার দুশ্চিন্তা থেকে অব্যাহতি পেয়ে রাজনীতিতে নতুন কোনো খেলা শুরু করবেন । এনিমি প্রপাটির টাকার কিছু খুবকে দেবেন, বাকিটা ঢালবেন রাজনীতিতে । সাধ্বী নারীর সতীত্ব, ধর্মিকের সততা, নেতার আদর্শ থেকে শুরু করে সব কিছুই আজকাল ক্রয় বা বিক্রয়যোগ্য ।

কিন্তু আশ্চর্য এই, খুব কৃষ্ণকান্তের এই শেষ প্রচেষ্টায় বাধা হতে চায় না ।

কেওড়াতলার কাছে আদিগঙ্গার ওপর কংক্রিটের ব্রিজে এসে দাঁড়ায় খুব । অবিরল পোড়া ঘী-এর গন্ধ সমেত মড়া পোড়ানো ধোঁয়া এসে নাকে লাগছে । অনিবার্ণ চিতার আলো জ্বলছে শ্মশানে । খুব সেইদিকে চেয়ে দাঁড়িয়ে থাকে । তার কোথাও যেতে ইচ্ছে করে না আজ ।

কৃষ্ণকান্তের জীবনে যে এটাই শেষ উদ্যোগ হবে তা খুব ভাল করেই জানে । আত্মিক জোর বহুকাল আগে শেষ হয়ে গেছে কৃষ্ণকান্তর, ছেড়ে গেছে নীতিবোধ, ছিল শুধু অফুরন্ত শারীরিক ক্ষমতা । এখন বোধ হয় সেটাও শেষ হয়ে আসছে । আর বেশীদিন নয় ।

খুব সরে যেতে চায় আরো একটা কারণে । সে বুঝতে পারছে, কলকাতা শহরের আবাল্য পরিবেশে সে আর মনের খাদ্য পায় না । কেমন স্তিমিত হয়ে আসছে সব উৎসাহ, উদ্দীপনা, যৌবনের উচ্ছলতা । তার উচ্চাশা নেই, লোভ পর্যন্ত হয় না কিছুতে । রোজ বার বার এক ঠেক থেকে আর ঠেক, এক চেনা মুখ থেকে আর এক চেনা মুখ, একইরকম ফুর্তি বা ফুর্তির চেষ্টা করতে করতে তার মনে হয় যেন সে বিভিন্ন দেয়ালে মাথা ঠুকে ঠুকে ফিরে আসছে । কোনো মানে হয় না এরকম জীবনের । নাসিক তাকে এরকম জীবনযাপন থেকে মুক্তি দিতে পারে । আর এক মুক্তি ঘটবে রেমির কাছ থেকে । এমন নয় যে রেমিকে সে ঘৃণা করে । তা নয় । তবু রেমি এক জগদ্দল বোঝার মতো চেপে আছে ঘাড়ে । সে মেয়েদের সঙ্গে ভাবালুতার কথা বলতে পারে না, কোনো মেয়েকেই একনিষ্ঠ গাড়লের মতো ভালবেসে যাওয়াও তার পক্ষে সম্ভব নয় । ওরকম প্রতিভা তার কোনো দিনই ছিল না । তাই যৌনতা ছাড়া রেমির সঙ্গে সে ঘনিষ্ঠতার কোনো সম্পর্ক স্থাপন করতে পারেনি । আর কে না জানে, যৌনতা বড় অগভীর এক অভ্যাস মাত্র । তা দুই নর-নারীর সম্পর্ককে কখনো দৃঢ় করে না ।

ভরসা এই, কৃষ্ণকান্ত তার মতো দায়িত্বজ্ঞানহীনের সঙ্গে নবজাতক সহ স্নেহের বউমাটিকে কিছুতেই ছাড়বেন না । রেমিও তো নতুন খেলনা পেল । ছেলে । এবার খুবর মুক্তি ।

আস্তে আস্তে ব্রিজটা পেরোয় খুব । চেতলায় পা দিয়ে আদিগঙ্গার ধার ধরে উত্তরমুখে রাস্তায় হাঁটতে থাকে । মিনিট পাঁচ সাত হাঁটার পর গলিটা ঠাওর পায় । অন্ধকার গলি, স্নাতস্নাত, ঘিঞ্জি । শেষ প্রান্তে অন্য দুটো বাড়ির সঙ্গে জড়ামরি করে একটা লাল ছোটো দোতলা বাড়ি দাঁড়িয়ে আছে । খুব পুরোনো বাড়ি । প্রায় ত্রিশ বছর আগে বাড়িটা এক দেউলিয়া মক্কেলের কাছ থেকে খুব সস্তায় কিনে নেন কৃষ্ণকান্ত । তারপর এক মহিলাকে দানপত্র লিখে দেন । সেই ঘটনার ফলে এক প্রচণ্ড শোরগোল উঠেছিল আত্মীয়মহলে । কিন্তু কৃষ্ণকান্ত গ্রাহ্য করেননি । এই মহিলা কোনোদিন কালীঘাটে তাদের বাড়িতে আসেননি, তবে তাঁর ভাইপো ভাইব্বিদের কেউ কেউ আসে । মাঝে মাঝে ।

ছেলেবেলা থেকেই খুব গুজবটা শুনেছিল । এই মহিলা নাকি তার দাদু হেমকান্তর গুপ্ত প্রণয় সঙ্গিনী ছিলেন । সোজা কথায় রক্ষিতা । অন্য মত হল, ইনি হেমকান্তর দ্বিতীয়া স্ত্রী, অর্থাৎ খুবর 'গাকুমা' ।

তখন খুবর মা বেঁচে ছিল । এই মহিলাকে নিয়ে একদিন খাওয়ার টেবিলে মা ও বাবার একটু ঐক্যবর্তী হয়েছিল । কী বিষয় নিয়ে তা খুব জানে না । সম্ভবত মা কৃষ্ণকান্তর বাবার চরিত্র নিয়ে

কোনো কটাক্ষ করে থাকবে। মায়ের এই স্বভাব ছিল। মাকে ভালবাসত খুব, কিন্তু এটাও লক্ষ্য করেছে যে, সুযোগ পেলেই তার মা নানা ছুতোয় তার বাবাকে হেয় করার চেষ্টা করত। বোধ হয় সেরকমই কোনো দাম্পত্য বাদানুবাদ হয়েছিল সেই রাতে।

কৃষ্ণকান্ত হঠাৎ একটা হুংকার দিয়ে চাকরকে ডাকলেন। বললেন, ছেলে মেয়েদের ডেকে নিয়ে আয়।

তারা তিন ভাই তখন ছোটো, লতু নিতান্তই বাচ্চা। চারজনকে খাবার টেবিলের চারধারে বসালেন কৃষ্ণকান্ত। তারপর সকলের মুখের দিকে ভাল করে তাকিয়ে নিয়ে গম্ভীর গলায় বললেন, শোনো। ভবিষ্যতে একটা বিষয় নিয়ে কথা উঠতে পারে বলে তোমাদের আজ আমি একটা জিনিস পরিস্কারভাবে জানাতে চাই। চেতলার বাড়িতে রঙ্গময়ী নামে যে মহিলা থাকেন তিনি তোমাদের ঠাকুমা। আমি তাঁকে ছেলেবেলায় পিসি বলে ডাকতাম। তাঁর বাবা ছিলেন আমাদের পুরোহিত। আমার বাবা তাঁকে পরে ধর্মমতে বিবাহ করেন। আমি তাঁকে আমার মা বলে স্বীকার করেছি। ভবিষ্যতে তাঁর সম্পর্কে যদি কেউ কোনো নোংরা বা খারাপ ইংগিত করে তোমরা তার প্রতিবাদ করবে। তোমরা বলবে যে, তিনি তোমাদের ঠাকুমা। ধর্মত এবং বৈধ ঠাকুমা। বুঝলে? এখন যাও।

তারা কিছুই বোঝেনি। তবে ঘাড় নেড়ে চলে এসেছিল। বুঝেছিল পরে। বড় হয়ে।

চেতলার ঠাকুমার তেজ ছিল সাজঘাতিক। আজও আছে। ধুবর মা আগুনে পুড়ে মরার পর সে বেশ কিছুদিন একটানা চেতলার ঠাকুমার কাছে ছিল। তাকে তার ছোটো ভাই আর লতুকে এখানে দিয়ে গিয়েছিলেন কৃষ্ণকান্ত নিজে।

বড় বড় তীক্ষ্ণ চোখ ও ক্ষুরধার মুখশ্রী বিশিষ্ট এই ঠাকুমাকে ধুব বরাবর পছন্দ করেছে। প্রচণ্ড স্বাবলম্বী ও পরিশ্রমী। দারুণ দাপট আর শাসনে সবাই টিট থাকে সব সময়ে। যেটা শাসনে হয় না সেটা হয় তার ভালবাসার তীব্রতায়। এমন স্বার্থশূন্য মানুষ ধুব খুব কম দেখেছে।

ধুব গলিটায় ঢুকে বাড়ির কড়া নাড়ল। নীচের তলাটা আজকাল ফাঁকা থাকে। ঠাকুমার ভাইপোরা তফাৎ হয়েছে, নাতি নাতনীও বড় কেউ কাছে থাকে না। ঠাকুমার নাতনীদেবর মধ্যে একজন ছিল বিজয়া। ধুবর প্রথম ভিকটিম। অর্থাৎ বিজয়া তার প্রেমে পড়েছিল। সে পড়েনি। ধুব কোনোদিনই কেন কারো প্রেমে পড়তে পারল না? কেন পারল না?

এই নিদারুণ প্রশ্নটা নিয়ে যখন সে হতবুদ্ধির মতো দাঁড়িয়ে আছে বন্ধ দরজার সামনে তখন ওপাশ থেকে প্রশ্ন এল, কে?

আমি ধুব। কালীঘাটের ধুব।

ও ধুবদা!

দরজা খুলে একটি কিশোরী হাসিমুখে দাঁড়ায়। তোমার ছেলে হয়েছে জানি। মিষ্টি আনলে না? ঠাকুমার এই নাতনীর নাম নবা।

ধুব একটু লাল হয় লজ্জায়। বলে, ঠাকুমা কী করছে?

বসে বসে বকবক করছে। আর কী করবে? এসো।

ধুব ওপরে উঠে আসে। পুরোনো বাড়িটাকেও ঘসে মেঝে পরিস্কার পরিচ্ছন্ন রাখা হয় সবসময়। অপরিচ্ছন্নতা রঙ্গময়ীর ভীষণ অসহ্য। ধুব এমন পরিপাটি গোছানো সংসার বড় একটা দেখেনি।

রঙ্গময়ী এখন বয়সের ভারে কিছু শ্রান্ত। নাম ভুলে যান, কথার খেঁই হারিয়ে ফেলেন। তবু সারাদিন প্রায় আশি বছরের শরীরটাকে এতটুকু বিশ্রাম দেন না। এখনো নিজে রাঁধেন, ঘর ঝাঁট দেন, ঘণ্টার পর ঘণ্টা জপতপ করেন। বললে বলেন, খাটি বলে বেঁচে আছি।

বেঁচে থাকা যে রঙ্গময়ীর কাছে খুব সুখের এমন নয়। তবে রঙ্গময়ী বেঁচে ছিলেন বলেই এদের সংসারটা জোড়াতালি দিয়ে চলেছিল। অনেক শিশু বেঁচে গিয়েছিল অকালমৃত্যুর হাত থেকে,

নিবারিত হয়েছিল সংসারের কিছু অনিবার্য ভাঙন।

রঙ্গময়ী দোতলার সিঁড়ির মুখের চাতালে একটা মোড়া পেতে বসা। ধুবকে দেখেই বলে উঠলেন, এই, তোর অশৌচ না! সদ্য ছেলের বাপ হয়েছিস, আঁতুর-মাখা!

তাহলে চলে যাবো নাকি?

তাই বললাম বুঝি? পায়ে হাত দিয়ে প্রণাম করিস না। তফাতে বোস।

তোমার বড় বাতিক।

তা তো বটেই। ছেলে কেমন হলো?

ভাল করে দেখিনি। সব বাচ্চাই একরকম।

বাচ্চা একরকম হলে কি হয়! বংশের ধারা যখন পাবে তখন দেখবি কেমন অন্যরকম হয়! এই নবা, ওকে একটা চেয়ার দে।

ধুব বসল।

রঙ্গময়ী বললেন, খুব কষ্ট পেল মেয়েটা।

কোন মেয়েটা?

তোর বউটা। আবার কে! বেঁচে যে আছে সেই ঢের। ও মরলে কৃষ্ণটাও বুঝি বাঁচত না। আমি দিনরাত ভগবানকে ডেকেছি।

সব খবরই রাখো তাহলে?

খবর রাখব না? কেন, বিলেতে থাকিস নাকি!

ধুব চুপ করে থাকে। রঙ্গময়ীর কাছে সে কেন এসেছে তা ঠিক বুঝতে পারে না। কিন্তু এসে তার খারাপ লাগছে না। এ যেন একটা প্রাচীন গাছের কাছে বসে থাকা। এ যেন পিদিমের আলায়ে এক প্রাচীন পুঁথি পাঠ।

## ॥ ৭৫ ॥

এক সাহেব ডাক্তার আনানো হল ঢাকা থেকে। দেখে শুনে তিনি বললেন, হি হ্যাজ কনস্টিটিউশন অফ এ বুল। নাথিং টু ফিয়ার। হি উইল পুল আউট।

হেমকান্ত সম্পর্কে এই উক্তি যে কতটা খাঁটি তা দশ দিনের মাথায় বোঝা গেল। দু দুটো গভীর ক্ষত এবং প্রচুর রক্তপাতজনিত অবসাদ কাটিয়ে হেমকান্ত উঠে বসলেন। বললেন, হাসপাতালে আর একদিনও নয়। আমার বংশে কেউ কখনো হাসপাতালে যায়নি।

এগারো দিনের দিন তিনি একরকম জোর করে হাসপাতাল থেকে বাড়ি চলে এলেন। তাঁর বাড়ি ফেরায় একটা উৎসবের মতো হৈ-চৈ ছড়িয়ে পড়ল শহরে। বহু লোক দেখা করতে এলেন। বিস্তর প্রজাও এল বিভিন্ন মহাল থেকে। বাড়িতেও বেশ মানুষের ভীড়। খবর পেয়ে বড় মেজো দুই ছেলেই সপরিবারে চলে এসেছে। এসেছে মেয়েরাও। গিজগিজ করছে বাড়ি।

ভীড় একটু কমলে দুর্বল শরীরে হেমকান্ত চোখ বুজলেন। আগাগোড়া তাঁর কাছে দাঁড়িয়ে অপেক্ষা করছিল রঙ্গময়ী। এতক্ষণ কথা বলেনি, বার বার শুধু চোখের জল মুছেছে আঁচলে। লোকের ভীড়ে কথা বলার সুযোগ পায়নি এতক্ষণ, এবার পেল।

হেমকান্ত রঙ্গময়ীর দিকে তাকাননি ভাল করে। তবে তার দেহের গন্ধ এবং নৈকট্যজনিত একটা তাপ টের পাচ্ছিলেন এত হৈ-চৈ-এর মধ্যেও। আশ্চর্য এক সুখানুভূতিতে তাঁর অভ্যন্তর টেঁটুস্বর হয়ে যাচ্ছিল। রঙ্গময়ী যে তাঁর জীবনে কতখানি জুড়ে আছে তা যেন এতদিনে খুব স্পষ্ট ভাবে অনুভব করলেন।

চোখ বুজে রেখেই হেমকান্ত মৃদুস্বরে ডাকলেন, মনু ।

বলো ।

অত চোখের জল ফেলছো কেন ? আমি তো বেঁচেই আছি এখনো ।

চোখে জল আসবে না ? বেঁচে আছো সেই আনন্দেই চোখে জল আসছে ।

বেঁচে থেকে আমার কিন্তু তেমন আনন্দ হচ্ছে না ।

কেন, তোমার কি মরার ইচ্ছে নাকি ?

অনেকটা তাই । মরার জন্য দীর্ঘদিন অপেক্ষা করতে আর ভাল লাগে না । মরতে যখন হবেই তখন সেই ভয়ংকর ব্যাপারটা এবারই চুকে গেলে হত । আর দুশ্চিন্তা করতে হত না ।

সে তো বুঝলাম । স্বার্থপরেরাই ওরকম ভাবে । তুমি মরলে আমার কী হত বলো তো ! কী নিয়ে বাকি জীবনটা কাটত আমার ?

একটু হেসে হেমকান্ত চোখ খুলে মুখ তুলে রঙ্গময়ীর দিকে তাকালেন । রঙ্গময়ী এই কয়দিনে খুব রোগা হয়ে গেছে । অনেক কান্নার চিহ্ন পড়েছে চোখের কোলে । চুলে এলোমেলো ভাব । পোশাকে পারিপাট্য নেই । তবু রঙ্গময়ীর ধারাল মুখখানা পিপাসার্তের মতো মুগ্ধ হয়ে চেয়ে দেখেন হেমকান্ত । বলেন, এমন অবস্থা হয়েছে নাকি তোমার ?

কেন, অন্যরকম অবস্থা আবার কবে ছিল ?

হেমকান্ত একটা দীর্ঘশ্বাস ফেলে বললেন, যেই আমাকে মেরে থাকুক সে আমার একরকম উপকারই করেছে । অনেক দিনের একটা দ্বিধা কেটে গেছে আমার ।

কিসের দ্বিধা গো ?

বিপদে না পড়লে তো মনটাকে ঠিক বোঝা যায় না । যখন লোকটা আমাকে ছোঁরা মারল তখন আমি হঠাৎ বুঝলাম, আয়ু ফুরিয়ে এল, আর সময় নেই । সেই সময় সকলের আগে কার কথা মনে পড়ল জানো ?

রঙ্গময়ী চোখ নত করল ।

হেমকান্ত বললেন, তোমার কথা । গাড়োয়ানকে বললাম, গাড়ি ছুটিয়ে শিগগির আমাকে মনুর কাছে পৌঁছে দে । তারপর যা হয় হবে ।

জানি । বলে রঙ্গময়ী একটা দীর্ঘশ্বাস ফেলে বলল, কিন্তু এই বিপদের মধ্যে আর নয় । তোমাকে কলকাতায় বা অন্য কোথাও যেতে হবে ।

হেমকান্ত বিস্মিত হয়ে বলেন, কেন মনু ?

যারা তোমাকে মারার চেষ্টা করেছিল তারা তো জানে তুমি মরোনি ।

সে তো জানেই । তাতে কি ? আবার অ্যাটেমপট করবে বলে ভাবছো ? করুক । আমি ভয় পাই না ।

তুমি পাও না, কিন্তু আমি পাই ।

তুমিই বা পাবে কেন ? তুমি না স্বদেশী করো !

স্বদেশী করি কে বলল তোমায় ?

আমি কি বোকা মনু ?

রঙ্গময়ী তীব্র চোখে হেমকান্তের দিকে চেয়ে বলল, তার সঙ্গে তোমার কী সম্পর্ক ? তোমাকে কিছু লোক মারতে চেষ্টা করছে আর আমি স্বদেশী করি বলে হাল ছেড়ে দেবো, এটা কেমন যুক্তি হল ?

তোমার স্বদেশীরাই তো মারতে চেয়েছিল আমাকে । ওদের ধারণা আমিই শশীকে ধরিয়ে দিয়েছি । কাজেই তোমার তো ভয় পেলে চলবে না মনু । তোমার আদরের স্বদেশীরা আমাকে মারবে, তোমাকেও তার জন্য বাহবা দিতে হবে ।

খুব বিধিয়ে কথা বলতে শিখেছো তো ! এতদিনে এই বুঝলে !

হেমকান্ত ক্ষীণ হেসে বললেন, কী বুঝব তা জানি না। তবে ছোরা খাওয়ার পর আমার ভয় ডর কেটে গেছে। বেশ বরবরে লাগছে মনটা। জীবন কি আবার শুরু করা যায় মনু ?

কি জানি ? তুমি তো আর বড়ো হও নি। জীবন শুরু করতে বাধা কী ? শুধু একটা কথা আমার রাখো। এখানে আর নয়।

তবে কোথায় ?

কলকাতায় কনকের কাছে গিয়ে থাকো, না হয় তো অন্য কোথাও।

এস্টেটের কী অবস্থা হবে তাহলে ?

সে কথাও আমি ভেবে রেখেছি। বিশাখার বিয়ে দিয়ে দাও। শচীন সব দেখাশোনা করবে।

শচীন ? সে কি বিশাখাকে বিয়ে করবে আর ?

বিয়ের পিড়িতে গুঠার জন্য পা বাড়িয়ে রয়েছে।

বলো কি ? বলে হেমকান্ত একটু চিন্তিত হয়ে পড়লেন। তারপর মাথা নেড়ে বললেন, কিন্তু এখন তো আর তা হয় না।

কেন হবে না ?

শচীন বিশ্বাসযোগ্য নয়। সে আমার বংশের মর্যাদা নষ্ট করতে বসেছিল।

হীরের আঙটির আবার বাঁকা আর সোজা।

যে বিশ্বাসযোগ্য নয় তার সঙ্গে মেয়ের বিয়ে দিতে পারব না মনু।

শোনো। শচীন তেমন ছেলে নয় যে অন্যের ঘরের বউকে ফুসলে নিয়ে যাবে। তোমার বউমার ব্যাপারে আমি তো তার দোষ দেখি না। বউমা নিজে এত ঢলাঢলি করেছিল যে বেচারার মাথা খারাপ হয়ে গেল। আমি তার সঙ্গে কথা বলে দেখেছি। খুব অনুভূত, লজ্জায় মুখ দেখাতে চায় না। তাছাড়া দেখলে তো, এই ঘটনার পর কেমন ছোট্টাছুটি করল। তিন রাত্রি ঘুমোয়নি।

সবই বুঝলাম মনু, তবু মনটা সায় দেয় না।

যদি বিশাখা রাজি থাকে ?

বিশাখা রাজি হবে ? কী বলছো ! সে তো বরাবর অরাজি।

সব ঘটনা তুমি জানো না। জেনে কাজও নেই। তবে আমি জানি। বিশাখার এখন অমত তো নেই-ই, বরং আগ্রহই আছে।

হেমকান্ত চুপ করে ছাদের দিকে চেয়ে রইলেন অনেকক্ষণ। তারপর বললেন, আচ্ছা ভেবে দেখি।

বেশী ভেবো না গো। তোমাকে আর বেশীদিন এখানে থাকতে দিতে আমার ভয় করে।

সে তো বুঝলাম মনু। কিন্তু কলকাতাতেই বা আমার কিসের স্বস্তি ? সেখানে কনকের সংসার, আমার সেখানে ভাল লাগবে না। বাপ পিতামহর এই বাড়ি ছেড়ে কোথাও গিয়ে কি ভাল লাগার কথা ?

সে বললে তো হবে না। আগে প্রাণটা বাঁচুক।

আমি চলে গেলে তোমার কী হবে মনু ?

আমার আবার কী হবে ?

পারবে থাকতে আমাকে ছেড়ে ?

রক্তময়ী শুরু হয়ে গেল হঠাৎ। দুটো চোখ ফের টসটসে হয়ে ওঠে জলে। নিজেকে সামলে নিয়ে বলে, তোমার ভালর জন্য সব পারি।

হেমকান্ত চোখ বুজলেন। অনেকক্ষণ চুপচাপ থাকার পর ধীর স্বরে বললেন, আজই সব ব্যাপারে মতামত দেও না। আমাকে ভাবতে দাও।

রক্তময়ী তাঁর কপালে একবার হাত রাখল। বলল, ঘুমোও। পরে আসব।



হেমকান্ত বললেন, ঘুম কি আসে ? এক কাজ করো, কৃষ্ণকে আমার কাছে পাঠিয়ে দাও ।  
দিই । বলে রঙ্গময়ী চলে গেল ।

হেমকান্ত চোখ বুজে শরীরের গভীর অবসাদ টের পাচ্ছিলেন । মৃত্যু স্পর্শ করে গেল তাঁকে ।  
কত কাছ দিয়ে গেল । পলকের জন্য অবগুষ্ঠন উন্মোচন করে দেখিয়ে দিয়ে গেল তার মুখ । তবু  
রহস্যময় মৃত্যুর সবটুকু দেখা হল না । কিছু বাকি রয়ে গেল । আবার অপেক্ষা । সে অপেক্ষা কি খুব  
দীর্ঘ হবে ?

শরীর ! শরীর ছাড়া অস্তিত্ব নেই । এই বাহ্য রূপ, এই ক্ষুধা তৃষ্ণা কামাতুর দেহ নিয়ে তাঁর কত  
না দুশ্চিন্তা ছিল । ছিল মৃত্যু ভয় । আজও আছে হয় তো । কিন্তু মৃত্যুর ক্ষণিক নৈকট্য তাঁকে অনেক  
জড়তামুগ্ধ করেছে । মনে হচ্ছে, সাহসের সঙ্গেই একদিন এই দেহ ছাড়তে পারবেন, যখন সময়  
হবে ।

আসব বাবা ?

হেমকান্ত চোখ খুলে হাসলেন । হাত বাড়িয়ে বললেন, এসো ।

তাঁর প্রিয় কনিষ্ঠ পুত্রটি দাঁড়িয়ে আছে দরজায় । দীর্ঘ গড়ন আর দেবদূতের মতো পবিত্র  
মুখশ্রী । দেখলেই তাঁর মন ভরে যায় । জায়া শব্দের অর্থ যার ভিতর দিয়ে পুরুষ আবার জন্মগ্রহণ  
করে । স্ত্রীর ভিতর দিয়ে হেমকান্ত তাঁর পুত্র কন্যারূপে জন্মগ্রহণ করেছেন নিশ্চয়ই, কিন্তু এই কনিষ্ঠ  
পুত্রটির দিকে তাকিয়ে তাঁর আজ মনে হল, এই দেবশিশুর মধ্যেই তাঁর জন্মগ্রহণ বুঝি সবচেয়ে  
সার্থক হয়েছে ।

বিছানায় তাঁর পাশে এসে বসল কৃষ্ণকান্ত । মুখখানা শুকনো । চোখদুটো করুণ ।

আপনি কেমন আছেন বাবা এখন ?

তোমরা ভাল থাকলেই আমি ভাল । এখন আর নিজের একার ভাল থাকাটাকে বেশী মূল্য দিই  
না । তোমাদের সবাইকে নিয়ে তো আমি ।

কথাটা নতুন । ঠিক এরকম কথা হেমকান্তের মুখে কখনো শোনেনি কৃষ্ণকান্ত । সে স্থির করল,  
কথাটা তার খাতায় টুকে রাখবে । আজকাল সে একটা উদ্ভৃতি লিখে রাখার খাতা করেছে । বাবার  
কথাটা তার বড় ভাল লাগল ।

কৃষ্ণকান্ত বলল, আমি ইস্কুলের সেই ছেলেটাকে ধরেছিলাম ।

কোন ছেলেটাকে ?

ক্লাস নাইনের চুনীলাল ।

সে আবার কি করেছে ?

আপনাকে যেদিন স্ট্যাব করা হয় তার কয়েকদিন আগে চুনী আমাকে বলেছিল, স্বদেশীরা নাকি  
আপনাকে মারতে চায় ।

বলেছিল ? হেমকান্ত গভীর হয়ে একটু ভাবলেন । সন্দেহটা ছিলই, এখন সাক্ষ্যেরও সমর্থন  
পাওয়া যাচ্ছে । একটা দীর্ঘশ্বাস ফেলে বললেন, সে যাই হোক, আমাদের ও নিয়ে আর দুশ্চিন্তার  
কারণ নেই । ছেলেটা কী বলল ?

প্রথমে কিছু বলতে চায়নি । আমি একটু ভয় দেখাতেই বলল, সে শুনেছে ননীলালবাবুর কাছে ।

কোন ননীলাল ? মেছোবাজারে যার তামাকের দোকান ?

হ্যাঁ ।

হেমকান্ত আবার চুপ করে থাকেন । তারপর বলেন, এসব কথা যেন পাঁচ কান না হয় বাবা ।  
স্বদেশীদের মধ্যেও অনেক বাজে লোক আছে । অস্তিত্ব বিপন্ন হলে তারা মরীয়া হয়ে যা খুশি করতে  
পারে ।

কৃষ্ণকান্ত তার বাবার মুখের দিকে এক দৃষ্টে চেয়ে ছিল । মাথা নেড়ে বলল, আমি কাউকে

বলিনি। তবে—

তবে কী বাবা ?

স্বদেশীদের বোঝা উচিত যে কাজটা অন্যায় হয়েছে।

কিশোর ছেলের মুখে কথাটা শুনে একটু চমকে উঠলেন হেমকান্ত। যেন একজন বড় মানুষ কথা বলছে। তিনি একটু হেসে বললেন, তাদের বোঝাবে কে বলো ? কেবল আবেগ নিয়ে যারা চলে তারা সব সময় যুক্তির ধার ধারে না। সত্যকেও অনেক সময় সত্য বলে স্বীকার করতে চায় না। তাদের বোঝাতে গেলেই বরং হিতে বিপরীত হবে। তার দরকার নেই।

কেন দরকার নেই বাবা ?

যা করার পুলিশ করবে। এটা তাদেরই কাজ।

পুলিশ কিছু করবে না।

হেমকান্ত অবাক হয়ে বললেন, এ কথা কে বলল তোমাকে ?

শুনেছি। দারোগা রামকান্ত রায়ের আপনার ওপর খুব রাগ।

তাই নাকি ? কেন বলো তো !

আপনার কাছে নাকি উনি একটা স্টেটমেন্ট চেয়েছিলেন, আপনি তা দেননি।

আমার স্টেটমেন্ট দেওয়ার কথা নয়। লিখিত পড়িত কিছু দেওয়া বিপজ্জনক বলেই আমি দিইনি। শচীনও বারণ করেছিল।

সেই জন্যই রাগ। আপনাকে স্ট্যাব করে যারা পালিয়েছে তাদের ধরার জন্য পুলিশ কিছুই করেনি।

হেমকান্ত উদাস গলায় বললেন, তাদের ধরেই বা কি হবে বলো তো ! হয় জেল-এ আটকে রাখবে নয়তো ফাঁসি দেবে। তাতে আরো রাগ বাড়বে ওদের।

কৃষ্ণকান্ত চূপ করে থমথমে মুখে চেয়ে থাকে। দাঁতে দাঁত দৃঢ়বদ্ধ। চোখে রাগ, জল।

হেমকান্ত সম্মুখে তার পিঠে হাত বুলিয়ে দিয়ে বলেন, আমার জন্য ভেবো না। মানুষের জীবনের একটা সীমারেখা আছে। সেটা পেরোনো যায় না। কিন্তু তা বলে সে শেষও হয় না। পুত্র কন্যাদের মধ্যে বেঁচে থাকে।

কৃষ্ণকান্ত তার বাবার দিকে তাকায়। মাথা নেড়ে বলে, না বাবা, না।

না কেন কৃষ্ণ ? আমার তো মনে হয় জীবনের সব কাজ আমার ফুরিয়েছে। আমার আর কিছু করার নেই। এই তো বিদায় হওয়ার সঠিক সময়।

কৃষ্ণকান্তর চোখ বেয়ে টসটস করে জল গড়িয়ে পড়ে।

হেমকান্তও কাঁদলেন। বহু দিন পর বুক-ভাঙা এক শোক অনুভব করছেন আজ। আশ্চর্য, সেই শোক নিজেরই জন্য। ছেলের পিঠে হাত রেখে অবরুদ্ধ গলায় অস্পষ্ট উচ্চারণে বললেন, আমার তো মনে হয়, তোমার মতো উজ্জ্বল একটি ছেলের বাবা হওয়াই আমার জীবনের উদ্দেশ্য ছিল। এখন তুমি যদি বেঁচে থাকো, মানুষের মতো মানুষ হও, তবে আর চিন্তা কী ?

আপনি ওকথা বলছেন কেন বাবা ? আপনার শরীর খারাপ নয় তো ?

না। আমি তো ভালই আছি। ভাবছিলাম, যদি আবার কেউ আমাকে মারে ? আমি রাজনীতি জানি না, বুঝি না। তা নিয়ে আমার চিন্তাও নেই। আমি শুধু বুঝি, স্বদেশীর রূপ ধরে যে মারতে আসবে সে আমার নিয়তি ছাড়া অন্য কিছু নয়।

মনুপিসি তো বলছে, আপনাকে কলকাতায় পাঠিয়ে দেবে।

বাপের ভিটে ছেড়ে কোথায় যাবো বাবা ? কলকাতাই কি আর বাঁচিয়ে রাখবে ? সেখানেও মরণ আছে। তাছাড়া সেখানে কনক সংসার পেতে বসেছে। আমি গেলে ওদের অসুবিধে হবে।

কৃষ্ণকান্ত কী বলবে ? চূপ করে রইল।

হেমকান্ত চোখ বুজে ধীর স্বরে স্বগতোক্তির মতো বলতে লাগলেন, এই নদী, গাছপালা, বাগান, এই নরম মাটির গন্ধ, কত স্মৃতি এসব ছেড়ে কোথায় যাবো ? মানুষের বাড়ি কিরকম জানো ? সে শুধু ইট কাঠ পাথর তো নয় । বংশানুক্রমে একটি পরিবারের বসবাসের ফলে সেখানে একটা প্রাণ জেগে ওঠে । তুমি কি তা টের পাও ?

কৃষ্ণকান্ত কান্না গিলে বাবার দিকে বিশ্বয়ভরে চেয়ে ছিল । এরকম তারও মনে হয় । তবে শুধু এ বাড়ি নয়, তার চারপাশে যা কিছু আছে সব কিছুর মধ্যেই একটা জীবনের আভাস পায় সে । কাকার যে ঘরখানায় সে থাকে তার বাতাসে আজও সে কাকার স্বাসের শব্দ পায় । তার তো প্রায়ই মনে হয়েছে, তার মা দেহহীনভাবে ঘুরে বেড়ায়, দোতলার রেলিং ধরে ঝুঁকে তাকে রোজ দেখে, যখন সে ঘোড়ায় চড়ে বা সাইকেল চালায় । মৃতেরা যে সবাই বেঁচে আছে এটা শুধু সে বিশ্বাসই করে না, সে জানে ।

সে বলল, করি বাবা ।

হেমকান্ত স্বপ্নাতুর চোখে ছেলের মুখের দিকে চেয়ে থাকেন । তার মধ্যে নানা দুঃসাহসী স্বপ্ন জেগে ওঠে । ছেলেকে নিয়ে সকলেই স্বপ্ন দেখে । কিন্তু এ তা নয় । নিজের এই ছেলেটির মধ্যে কিছু সূক্ষ্ম অনুভূতি আছে বলে তিনি টের পান ।

ক্লান্ত হেমকান্ত চোখ বুজলেন ।

আপনি ঘুমোন আমি যাই ।

রোসো । একটু বসে থাকো আমার কাছে । তোমার বড়দা মেজদা সব কোথায় ?

ওরা বেরিয়ে গেছেন । বউদি আর দিদিরা সব নিচের বৈঠকখানায় পাড়ার মেয়েদের সঙ্গে গল্প করছেন ।

ওরা খুব নিশ্চিন্ত, না ? ভাল । খুব ভাল ।

আপনার শরীর ভাল নয় বলে ডাক্তার এ ঘরে ভীড় করতে বারণ করেছেন ।

হ্যাঁ । শরীরটা ভাল নয় ঠিকই । বড় ক্লান্ত । তবে কেউ কেউ কাছে থাকলে ভাল লাগে, এই যে তুমি বসে আছো কাছে, তাতে আমার খুব ভাল লাগছে ।

তার প্রতি হেমকান্তের বিশেষ দুর্বলতার কথা কৃষ্ণকান্ত জানে । তাই সে লজ্জায় মুখ টিপে একটু হাসল । হেমকান্ত তার একখানা হাত ধরে থেকে চোখ বুজে রইলেন ।

দুটি রক্তস্রোত পরস্পরের সঙ্গে কথা বলতে লাগল ।

রামকান্ত রায় এলেন বিকেলে, তাঁর চেহায়ায় একটা দৃষ্ট স্পর্ধিত ভাব দেখা যাচ্ছিল । ঘোড়া থেকে নেমে গটগট করে ওপরে উঠে এলেন । কারো অনুমতি নেওয়ার তেমন প্রয়োজন বোধ করলেন না ।

হেমকান্তকে ছান্না খাওয়ানো হয়েছে একটু আগে । উঁচু তাকিয়ায় আধশোয়া হয়ে বড় আর মেজো ছেলের সঙ্গে মৃদু স্বরে কথা বলছিলেন । রামকান্ত রায় স্বরে ঢোকায় কনককান্তি বিরক্ত হল । বলল, কী চাইছেন আবার ? এজাহার তো অনেক সেওয়া হয়েছে !

রামকান্ত রায় একটু মাথা উঁচু করে বললেন, আরো নিতে হবে । আপনারা যদি একটু ঘরের বাইরে যান তাহলে ভাল হয় ।

কনক উঠে দাঁড়িয়ে একটু উষ্ণার সঙ্গে বলে, স্ট্যাবিং-এর পর দশ এগারো দিন কেটে গেছে, এখনো আপনারা কাউকে অ্যারেস্ট করতে পারেন নি । কিন্তু একজন সিরিয়াস উণ্ডেড লোককে খামোকা বকবক করিয়ে মারছেন । এটা কেমন কথা ?

রামকান্ত রায় তাঁর আলিসান দেহাটি নিয়ে স্তম্ভের মতো চুপ করে দাঁড়িয়ে রইলেন শুধু । জবাব দিলেন না । স্থির দৃষ্টি হেমকান্তের মুখে নিবদ্ধ ।

হেমকান্ত ছেলেদের দিকে চেয়ে মৃদুস্বরে বললেন, তোমরা যাও । কথা বলতে হ'লে বলব ।

চিন্তার কিছু নেই।

ছেলেরা চলে গেল।

হেমকান্ত বললেন, বসুন। কী খবর?

খবর একটা আছে। লোকটা ধরা পড়েছে।

হেমকান্ত চমকে উঠে বললেন, কে?

বলব। আপনিই তাকে আইডেনটিফাই করবেন।

হেমকান্ত চিন্তিত মুখে বললেন, সনাক্ত করব? কিন্তু আমি যে তাকে ভাল করে দেখিনি। অজ্ঞকার ছিল। আপনি তো জানেন।

সবই জানি। কিন্তু তবু কিছু লক্ষণ ঠিকই মেলাতে পারবেন। ধরুন হাইট, গলার স্বর, হাতের গড়ন এইসব কিছু না কিছু।

যা মনে পড়েছে সবই বলেছি।

এইবার লোকটাকে চোখে দেখুন। হয়তো আরো কিছু মনে পড়বে।

কবে যেতে হবে?

আপনি এখন কেমন আছেন? থানায় যেতে পারবেন?

আজ পারব না।

আজ নয় যেদিন পারবেন সেদিন গেলেই হবে। তবে দেরী করা চলবে না।

হেমকান্ত চুপ করে রইলেন। মনটা খারাপ হয়ে গেল। ছেলটো ধরা পড়ুক তা তিনি চাননি।

আচমকা রামকান্ত রায় বললেন, হেমকান্তবাবু একটা কথা বলব?

বলুন।

আমার প্রথম থেকেই কেন যেন মনে হচ্ছে আপনি লোকটাকে চিনতে পেরেছেন। কিন্তু বলতে চাইছেন না।

॥ ৭৬ ॥

ধুব রঙ্গময়ীর দিকে চেয়ে তার আঁকিবুকিওলা মুখে সেই নব যুবতীকে দেখবার চেষ্টা করছিল, যাকে দেখে মজে গিয়েছিল তার দাদু। সারা জীবন যথার্থ সংযম ও ঘটনাশূন্য কাটিয়ে বুড়ো বয়সে তিনি ঠুর প্রেমে মগ্ন হন। ধুব প্রেম ব্যাপারটা আজও জানে না। সে কি খুব একটা ভসভসে আবেগ? এককেন্দ্রিক কাম? না ব্যাখ্যার অতীত আর কিছু? যে বয়সে তার দাদু প্রেমে পড়েছিলেন সেটা এ আমলের পক্ষে খুব বেশী বয়স নয়। প্রেমে পড়া চলে তো বটেই, হচ্ছেও আকছার। কিন্তু সেই আমলের পক্ষে সেটা স্বাভাবিক ছিল না। হেমকান্তের মতো সংযত পুরুষের তো আরো নয়।

রঙ্গময়ীর মুখচোখে বেশ একটু সত্যিকারের খুশি ছড়িয়ে আছে। ধুবর ছেলে হওয়া যেন তাঁরও কিছু হওয়া। বুড়ো বয়সের এক ধরনের স্থায়ী ধরা গলায় রঙ্গময়ী বললেন, দেখছিস কি অমন হাঁ করে? রূপ নাকি?

ধুব একটু হাসল। তারপর মাথা নেড়ে বলল, সত্যিই তাই ঠাকুমা। আমি তোমার রূপ দেখছিলাম।

ও বাবা, আমি কিন্তু বয়সকালেও সুন্দরী ছিলাম না। তোর ঠাকুমার কাছে দাঁড় করালে তো বাদরী বলে মনে হত। আর তোর বউটাও ভারী ভাল দেখতে। তা তোদের এত রূপের বংশ, তুই আমার বুড়ো মুখের রূপ দেখছিস কি রে?

আমি দেখি বা না দেখি, একজন তো দেখেছিল! আমি তার চোখ দিয়ে দেখার চেষ্টা করছি।

সে আবার কে?

সে দাদু । বলো তো তুমি যদি সুন্দরীই না হবে তবে তোমাকে দেখে দাদু মজেছিল কেন ? রঙ্গময়ী তেমন প্রাণ খুলে হাসলেন না । কেমন একটু ম্লান দেখাল তাঁকে । ধরা গলায় বললেন, এই বুঝলি দাদু ?

কী বুঝবো ?

মজতে কি চেহারা লাগে রে ! তাহলে তুই কেন মজলি না আমার অমন নাতবউ পেয়ে ? আমার কথা বাদ দাও ।

কেন তোর কথা বাদ থাকবে কেন ? তুই কি সৃষ্টিছাড়া কিছু ? সেই দাদুরই নাতি, সেই বাপেরই ছেলে । তোর কথা বাদ থাকবে কেন ? তা তোর দাদুর কথাই ধর না, অমন বউ পেয়েছিল তবু কেমন যেন গা করত না । ঢলাঢলি ছিল না । তখন তো আর আমি প্রতিবন্ধক ছিলাম না, অন্য কোনো মেয়েও এসে মন টলায়নি । তবু ওরকম হয়েছিল কেন তার ?

সে সব শুনবো বলেই তো এসে বসলাম তোমার কাছে । বলো ।

মজবার কোনো আইন নেই, নিয়ম নেই ।

ধুব মাথা নাড়ল । তারপর মুখ টিপে একটু হেসে বলল, এ কথাটা আমি মানি না । বুঝলে । সব কিছুই একটা আইন আছে । থাকতেই হবে ।

রঙ্গময়ী একটু হেসে বললেন, শোন পাগলা । মজবার একটা আইন বা নিয়ম আছে ঠিকই । কিন্তু সে সব জেনে কী করবি ? তোদের বংশের পুরুষেরা কোনোকালে কাউকে দেখে মজেনি ।

এই যে আমার দাদু মজেছিল, তোমার রূপে !

রঙ্গময়ী মাথা নেড়ে বলেন, সে খাতই তোদের নয় । সারা জীবন আমি তার তাঁবেদারি করেছি, সেবা দিয়েছি । কিন্তু ভবি কি ভোলে রে পাগল ! সে পাথর শেষ অবধি গেলনি ।

কী যে বলো !

রঙ্গময়ী একটা দীর্ঘশ্বাস ফেলে বললেন, বাইরে থেকে অনেক রকম শোনা যায় । লোকে রটাতেও ভালবাসে । কিন্তু যে জানে সেই শুধু জানে । যখন শুনলাম তোর সঙ্গে নাতবউয়ের মিল হয় না তখন মনে মনে হেসেছিলাম । তারই নাতি তো । হবে কি করে ? ওই যে কৃষ্ণ, পরের জন্য প্রাণটা দিতে পারে, বুকে কত সাহস, কত তেজ, তবু নিজের বউয়ের চোখের জল কোনোদিন ঘোচাতে পারেনি । তিন পুরুষ ধরে তোদের চিনি রে নিমকহারাম । রঞ্জে রঞ্জে চিনি । তোর দাদু দায়ে পড়ে আমাকে মেনে নিয়েছিল মাত্র ।

ধুব খুব শান্ত ভাবে রঙ্গময়ীর দিকে চেয়ে ছিল । কিন্তু ভিতরে ভিতরে একটা অস্থিরতা টের পাচ্ছিল সে । বংশের ধারা ? বংশের ধারাই কি সে বহন করে চলেছে ? এরকম তো কথা ছিল না । সে তো ধারাটা উল্টো বওয়াতে চেয়েছিল !

ঠাণ্ডা গলাতেই ধুব বলে, তুমি কি বলতে চাও হেমকান্ত চৌধুরী তোমাকে কোনোদিন ভালবাসেনি ?

রঙ্গময়ী হেসে বললেন, আজ যে তোর মুখে ও ছাড়া আর কথা নেই ! কী হল বল তো ভাই ?

বলো না ! আমার জানা দরকার ।

জানা দরকার কেন ?

কারণ আছে ।

রঙ্গময়ী হাত উল্টে বলেন, তার ছিল ওই একরকম স্বভাব । বাইরে থেকে দেখলে ঠাণ্ডা, শান্তশিষ্ট, একটু আত্মভোলা । কিন্তু ভিতরটা ছিল শুকনো খটখটে । ভালবাসতে চাইত না যে তা নয় । পারত না । যেমন কৃষ্ণ পারেনি । তুই পারিস না ।

তোমার কৃষ্ণ আমার মাকে ভালবাসত না কেন জানো ?

জানব না কেন ? খুব জানি । তুইও তো সেই দুঃখে বাপকে দেখতে পারিস না । মা গায়ে আগুন

দিয়ে মরল, সে তো দুঃখের কথা ঠিকই। কিন্তু কৃষ্ণকে দুখে লাভ কি রে ভাই ? দোষ ওর স্বভাবের নয়, বংশের। তুই যে এত ফণ্টিনটি করে বেড়াস বলে শুনি, কেন জানিস ? নাটবউকে ভালবাসতে পারিসনি বলে। যদি পারতিস তবে ঘরে এতদিন স্থিত হয়ে যেতি।

ধ্রুব কৃত্রিম শংকার গলায় বলে, তাহলে কি হবে ঠাকুমা ?

কি আর হবে ! কতগুলো কপাল পুড়বে, যেমন আমার পুড়েছে।

কিন্তু শেষ অবধি তো তোমরা মিলেছিলে ঠাকুমা !

রঙ্গময়ী হাত তুলে বলেন, ও কথা থাক। বলিস না। বড় ফুর্তির জোয়ার লেগেছিল বলে ভাবিস নাকি ? বউকে ভাল না বাসলে কী হয়, সে ছিল ছেলে-পাগলা। তাও সব ছেলে নয়। ওই কৃষ্ণ। তা কৃষ্ণ ছেলের মতো ছেলে ছিল বটে। যেমন চেহারা, তেমনি সাহস, তেমনি তেজ। আবার বড় সৎ, দয়ালু। ছেলে ছাড়া সে আর কিছু বুঝত না। ঠিক সেই ধাত আবার পেল কৃষ্ণ। বউ বড় কথা নয়, ছেলেই সব। তাও সব ছেলে সমান নয়। তাদের মধ্যে বিশেষ একজন।

সেই ছেলে কে ঠাকুমা ?

আহা জানিস না যেন।

কে বলো।

কেন, তুই !

আমি ! তোমার কৃষ্ণ আমাকে দু-চোখে দেখতে পারে না তা জানো ?

জানি, খুব জানি। তোকে গালাগাল না দিয়ে নাকি জলম্পর্শ করে না।

তাহলে ?

তাহলেও কিন্তু আছে রে ভাই। সে তুই বুঝবি না, বুঝতে চাসও না। এযুগের ছেলেরা বাপের ভালবাসার তোয়াক্কা করছে খোড়াই। ওসব সেকেলে মায়া ভালবাসা তারা পছন্দও করে না। স্বার্থপরতার যুগ না এটা !

আমি কি স্বার্থপর ?

নোস ? ওরকম বাপকে তিলে তিলে দন্ধে মারছিস, তোর মতো স্বার্থপর আছে ?

কৃষ্ণকান্ত শেষ হচ্ছে তার নিজের কর্মফলে ঠাকুমা।

তার কর্মফল তুই বিচার করবি কেন ? তুই কি তার জন্ম দিয়েছিস ? বিচার করতে হলে করবে আদালত, করবে দেশ, করবে ভগবান। তোর অত মাথাব্যথা কেন ?

ঠাকুমা, রেগে যাচ্ছে।

রঙ্গময়ী একটু হাসলেন। বললেন, রাগ হয় রে। কৃষ্ণকে এইটুকু বেলা থেকে দেখেছি। একখানা আস্ত দেবশিশু। এতটুকু পাপ কোথাও ছোঁয়নি। কলিযুগের মানুষ বলে মনে হত না। সেই কৃষ্ণ পলিটিকস করতে গিয়ে কত কাদা মাখল। মন্ত্রী হয়েছিল বলে কত লোকের চোখ টাটিয়েছে। কিন্তু কৃষ্ণর মতো অত প্রাণ দিয়ে ভালবাসুক তো কেউ দেশকে ! সেই ছেলোটা যখন এই বুড়ো বয়সে আমার কাছে এসে হাউহাউ করে কাঁদে তখন তাদের ওপর আমার রাগ হলে কি দোষ ? তোরা কে তাকে কতদিন একটু সুখ একটু শান্তি দিয়েছিস ?

কাঁদে ? ধ্রুব ভীষণ অবাক হয়ে বলে।

কাঁদবে না কেন ? পাথর তো নয় ? তবে সব চোখের জল জমা করে রেখে দেয়। আর কারো কাছে কাঁদে না। আমার কাছে এসে কাঁদে।

রঙ্গময়ীর চোখে একটু জল এল। মুখটা সামান্য ঘুরিয়ে নিলেন। তারপর একটু সময়ের ফাঁক দিয়ে বললেন, আর কার কাছেই বা যাবে ! কৃষ্ণর তো যাওয়ার জায়গা নেই।

এসব কথা শুনে যে ধ্রুবর বাপের ওপর স্নেহ উথলে উঠল মোটেই তা নয়। তবে সে কোনো কথাও বলল না। চূপচাপ বসে রইল কিছুক্ষণ। তারপর হঠাৎ “আসি” বলে উঠে চলে এল।

সজ্জের অনেক পর সে ধারার ফ্ল্যাটে পৌঁছোলো ।

ধারা কিছু করছিল না আজ । রেকর্ড চেনজারে একগাদা রেকর্ড চাপিয়ে বসে নিজের চুল এলোমেলো করছিল শুধু । ঠিক করেছিল আজ রান্নার ঝামেলা করবে না । শুধু ডিম ভেজে খেয়ে শুয়ে থাকবে ।

এমন সময় ধুব এল ।

ধারা ভারী উদ্বেগের মুখ নিয়ে তাকিয়ে ধুবর মুখে কী খুঁজল । তারপর জিজ্ঞেস করল, তোমার বউ কেমন আছে ?

ভাল ।

বাচ্চা ?

ভাল ।

বাবাঃ, বাঁচলাম । কাল থেকে যা ভাবছিলাম ।

ধুব আচমকাই ধারার দু কাঁধ শক্ত হাতে চেষ্টে ধরে বলল, কী ভাবছিলে ?

রেমি বাঁচবে কি না ! ও বাবা, তুমি অমন খুনীর মতো তাকাচ্ছে কেন ?

ধুব হাত সরিয়ে নিয়ে মাথা নেড়ে কী যেন একটা কিছু ঝেড়ে ফেলার চেষ্টা করে । তারপর বলে, কিছু খাওয়াবে ? আই অ্যাম হাংরি ।

কী খাবে ?

লাইট কিছু নেই ?

থাকবে না কেন ! সব আছে । কিন্তু তুমি কী খেতে চাও বলবে তো । ডিম ভেজে দিই ।

ধুব বিরক্ত স্বরে বলে, হোপলেস । যেখানেই যাবো একটা করে ডিম ভাজার অফার । ওই বোগাস পোলট্রির ডিমগুলো তোমরা খাও কি করে বলো তো ! আর কী অফার করতে পারো ? ধারা লজ্জিত ভাবে হেসে বলে, পাঁউরুটি আছে । মাখন দিয়ে দেবো ?

দূর !

তাহলে ? চীজ খাবে একটু ?

ধুব মাথা নাড়ল, না । বরং একটু চা করো ।

শুধু চা ?

ওতেই হবে । আর বি কুইক ।

ধারা চলে গেলে ধুব মুখে একটা ভ্রুকুটি মেখে বসে থাকে । মাঝে মাঝে কপালে হাত বোলায় । মাথাটা ধরে আছে । খুব ধরে আছে । অনেকদিন সে কলকাতার বাইরে যায় না । বড্ড রক্ত লাগছে এখানকার বাতাস । কিন্তু সারা ভারতবর্ষেই সে একটা পুরোনো বন্ধ বাতাসের গন্ধ পায় । দেশ কি তার জানালা দরজা এঁটে বন্ধ করে রেখেছে ! কিছু বইছে না তো ! ধুব উঠল । রান্নাঘরের দরজায় গিয়ে দাঁড়িয়ে বলল, ধারা, আমার জন্য ভাত রাঁধবে ?

ভাত ! ওমা, খেলে করে দেবো ।

ভাত খাওয়ার পর যদি আমি শুতে চাই ।

ধারা মুখটা অন্য দিকে ফিরিয়ে নিয়ে বলে, শোবে ।

ধুব মাথা নেড়ে আবার ফিরে আসে বৈঠকখানায় । একটা কিছু করার জন্য তার হাত পা নিসপিস করছে । একটা কিছু ভাঙতে হবে । দান উণ্টে দিতে হবে । ওলটপালট । ওলটপালট ।

ধারার ঘরে একটা ছোট্টো বেতের চেয়ারে পা মুড়ে বসা তার অভ্যাস । আজও সেইভাবে বসে ধুব জানালা দিয়ে চেয়ে আছে । কিছু দেখছে না । বাইরে কিছু আলো, কিছু অন্ধকার । দেখবার মতো দৃশ্য কিছু নেই । চেয়ে থেকে সে অন্য কথা ভাবছিল । ভাবছিল এসবের কোনো মানেই হয় না । এই যে এত সব বাড়ি-ঘর, সোফাসেট, গাড়ি-ঘোড়া, নর-নারী ।

ধারা চা নিয়ে ঘরে এসে বলে, তোমার ভাত রাঁধছি কিন্তু ।

রাঁধো । কিন্তু প্লীজ জিজ্ঞেস কোরো না সঙ্গে আর কি রাঁধবো ।

করব না । সারপ্রাইজ থাক

শুধু বলে রাখি আমি গুঁটকি মাছ, ডাঁটা আর শাক চচ্চড়ি খাই না ।

নেইও ।

বাঁচা গেল ।

চায়ে চুমুক দিয়ে একটু চোখ বুজে থাকে ধুব ।

উণ্টো দিকের চেয়ারে বসে চায়ের কাপের কিনারার ওপর দিয়ে নিবিড় চোখে ধারা দেখছিল ধুবকে । সে বুঝতে পারছে না, ও আজ কী চাইছে । থাকবে ! সত্যিই থাকবে ? যদি থাকেও তাহলেও প্রেমিকের মতো যে আচরণ করবে না তা ধারা জানে । ওর মুখে একটা অত্যন্ত উচাটন ভাব । শরীরে অস্থিরতা ।

তোমার কী হয়েছে বলো তো !

ধুব চায়ে আর একবার চুমুক দিয়ে বলে, মনটা ভাল নেই ।

কেন ভাল নেই ! আবার সেই হিউম্যান রিলেশন নিয়ে ভাবছো নাকি ?

ধুব ঠাট্টা বুঝে হাসল । তারপর বলল, ভাবলে কি দোষ ?

যার খাওয়া পরার চিন্তা নেই, হৃদয়ঘটিত প্রবলেম নেই, একমাত্র সে-ই ওইসব ফিলজফিক্যাল ব্যাপার নিয়ে ভাবতে পারে ।

ধুব তীক্ষ্ণ চোখে ধারার দিকে চেয়ে বলল, হিউম্যান রিলেশনটাই যে সবচেয়ে বড় প্রবলেম সেটা অসম্ভব তোমার বোঝা উচিত । মানুষ এখন সবচেয়ে বেশী কথা বলে । অথচ যত দিন যাচ্ছে ততই মনে হচ্ছে এত কথা বলেও আমরা পরস্পরের সঙ্গে কিছুতেই যেন কমিউনিকেট করতে পারছি না । একটা শূন্য বলয় গড়ে উঠছে বন্ধুর সঙ্গে বন্ধুর, স্বামীর সঙ্গে স্ত্রীর, বাপের সঙ্গে ছেলের, ভাইয়ের সঙ্গে ভাইয়ের, এমন কি প্রেমিকের সঙ্গে প্রেমিকার, টের পাও না ?

ওসব তোমার মনগড়া ব্যাপার । মোটেই এরকম হচ্ছে না ।

ভাল করে অবজার্ভ কোরো, টের পাবে । আসল প্রবলেম হল মানুষের আজ আর কমিউনিকেট করার কিছুই নেই সে হৃদয়ের চর্চা ছেড়ে দিয়েছে, আদর্শবাদ বলে কিছুই অধিকাংশ মানুষের নেই, অভ্যস্তরে ভালবাসার পুকুর শুকিয়ে গেছে, আবেগ ফুরিয়েছে, আন্তরিকতাও সে অনুভব করে না । কাজেই সে কমিউনিকেট করবেই বা কী ?

বাঃ, আজ যে একদম উণ্টো কথা বলছো !

বলছি নাকি ?

বলছো না ? তুমিই তো ওসব হৃদয়চর্চার সব চেয়ে বড় শত্রু ছিলে । লিভিং টুগেদার, প্রেমহীন সহবাস, কনট্রাস্ট ম্যারেজ এসব কত কী বুঝিয়েছো আমাদের ।

ধুব একটু লজ্জিত হয়ে বলে, ও ব্যাপারগুলো অবাস্তব ঠিকই, কিন্তু ওগুলোই আসলে আঠা । একটু আঠা বা চিট না থাকলে মানুষে মানুষে ঠিক মোয়াটা বাঁধে না, বুঝলে !

বুঝলাম না । তবে দয়া করে এখনই বোঝাতে বসে যেও না ।

কেন বলো তো !

এখন থাক । শত্রু কথা বেশী একদিনে বুঝবার চেষ্টা না করলেই ভাল ।

মেয়েরা ভারী তত্ত্ব কথা অপছন্দ করে । তাই না ধারা ?

তাই । এটুকু বুঝলে যে কত ঝামেলা কমে যায় ।

ধুব চা শেষ করে হঠাৎ উঠে দাঁড়িয়ে বলল, তাহলে আসি । এনজয় উওরসেলফ ।

ধারা অবাক হয়ে বলে, তার মানে ? এই যে খাবে বললে ! থাকবে !



বলেছি নাকি ? বাট আই হ্যাড চেনজড মাই মাইণ্ড ।

ধুব ! প্লীজ !

না, আজ আমি এমন একজনকে চাই যে খুব নিবিষ্টভাবে আমার কথা শুনবে । বাধা দেবে না, বিরক্ত হবে না, তর্ক করবে না ।

আচ্ছা বাবা, ঘাট হয়েছে । বোসো, আমি সব শুনব, বাধা দেবো না, তর্কও করব না ।

ধুব একটু হেসে বলে, বাধা দেবে না বটে, কিন্তু মনে মনে বিরক্ত হবে । মেয়েরা এমনিতেই শ্যালো হয় । তুমি আরো অগভীর ।

কী বললে ?

বললাম যে, অগভীর ।

আমি !

কেন তোমার কি ধারণা ছিল তুমি খুব গভীর মানসিকতার মেয়ে ?

ধারা থমথমে মুখ করে চেয়ে রইল । কথা বলতে পারল না ।

ধুব তার দিকে চেয়ে বলে, তোমার আঠা নেই ধারা । যার নেই সে এসব বুঝবে না ।

ধারা মৃদু স্বরে বলল, একটা কথা বলবে ? তুমি সব সময়ে আমাকে অপমান করতে চাও কেন ? তুমি কি স্যাডিস্ট ?

কেন, স্যাডিস্ট কি তোমার অপছন্দ ? আমার তো মনে হয় তোমার দু-দুটো স্বামীর একজনও যদি স্যাডিস্ট হত তাহলে তোমাকে ডিভোর্স করতে হত না ।

ধারা ঠাণ্ডা গলায় বলে, তাই নাকি ? কি করে বুঝলে ?

মেয়েরা অত্যাচারীদের পছন্দ করে, জানো না ? আমার বউ আমাকে কেন অত ভালবাসে বলো তো ! কেননা আমি ওর ওপর সবচেয়ে বেশী অত্যাচার করি ! ও কোনো সময়ে আমাকে ভুলে যায় না । প্রাণপণ আমাকে জয় করার চেষ্টা করে । ক্ষতবিক্ষত হয়, কাঁদে, কপাল চাপড়ায়, তবু তপ্ত ইচ্ছু চৰ্ণণের মতো জ্বলে গাল, না যায় ত্যজন ।

মেয়েদের সাইকোলজি খুব ভাল বুঝেছো তো —বাঃ ! ।

তোমার মতও কি তাই নয় ?

মেয়েরা অত্যাচারীদের ঘেন্না করে ।

ধুব একটু হেসে বলল, তাই নাকি ?

তোমার বউ যে তোমাকে ঘেন্না করে তা তুমি টের পাও না । কিন্তু আমি ওর সঙ্গে একদিন কথা বলেই সেটা টের পেয়েছি ।

রেগে যাচ্ছে ধারা ?

মোটাই নয় । আমি কখনো রাগি না ।

রেগো না । রাগলে তোমার চেহারাটা পাটে যা় ।

আমার চেহারা নিয়ে তোমাকে অত ভাবতে হবে না ।

চেহারা ছাড়া তোমার আর কী আছে ধারা ? বলতে বলতে ধুব একটু এগিয়ে যায় । আলতো ভাবে ধারার দু গালে দুটো করতল চেপে ধরে । মুখখানা তুলে খুব নিবিষ্টভাবে চোখের দিকে তাকায় ।

ধারার ভিতর ঠাণ্ডা রাগটা সেই স্পর্শে মরে গেল । রক্তে লাগল এসে উদ্ভাপ । ধুবের চোখে চোখ রেখে বলল, কেন মাঝে মাঝে ওরকম হয়ে যাও তুমি ! কেন ওরকম অদ্ভুত লাগে তোমাকে !

আমি স্যাডিস্ট ধারা । তোমাকে এখন আমার খুন করতে ইচ্ছে করছে ।

করো না খুন । করো !

করব ?

ধারা হাসল, করো। তবু তোমার মুরোদ দেখে যাই। আর তো কিছু পারোনি। ভীতু কোথাকার।

কিছু খুনটা পারি ধারা। আমার শরীরে খুনীর রক্ত আছে।

তাই নাকি ?

আমার বাবা খুনী। অবশ্য স্বদেশী খুনী। বাট হি ইজ এ ডাউনরাইট মার্ভার অলরাইট। আমাকে তোমার ভয় পাওয়া উচিত।

পাচ্ছি না।

ধুবর হাত দুটো ধারার গলায় নেমে আসে। দশটা আঙুল বাঁকা হয়ে ধীরে ধীরে চেপে বসতে থাকে তার নরম গলায়।

॥ ৭৭ ॥

লোকটা কী বলছে তা কিছুতেই বোধগম্য হচ্ছিল না হেমকান্তর। কিছু ধীর স্থির মানুষ, বেশী কথা বলা বা তর্ক করা তাঁর স্বভাব-বিরুদ্ধ। তাই তিনি খানিকক্ষণ সামান্য বিস্ময়ের দৃষ্টিতে রামকান্তর দিকে চেয়ে থেকে বললেন, আমি তাকে চিনি ?

চেনারই কথা।

চিনতে পেরেও বলছি না ? এ কী করে সম্ভব ? যে আমাকে খুন করতে চেষ্টা করেছে তাকে চিনতে পেরেও চূপ করে থাকব কেন ?

আমাদেরও সেইটেই প্রশ্ন।

হেমকান্ত মাথা নেড়ে বললেন, আমি কিছু বুঝতে পারছি না।

এমনও তো হতে পারে যে আততায়ী আপনার একজন প্রিয়পাত্রই হবে। সেক্ষেত্রে তার নাম বলতে না চাওয়াটা স্বাভাবিক।

হেমকান্ত চূপচাপ দারোগা সাহেবের মুখের দিকে বিস্মিত চোখে চেয়ে রইলেন। এরা তিলকে তাল করতে ওস্তাদ। সরলকে জটিল করায় এদের জুড়ি নেই।

হেমকান্ত মৃদু একটু হেসে বললেন, রহস্য না রেখে যদি তার নামটা বলেন তাহলে আমার উৎকণ্ঠা অনেক কমে যায়।

রামকান্ত রায় হাসলেন। খুবই উচ্চাঙ্গের হাসি। তাতে প্রচুর অহংকার এবং প্রত্যয় মিশে আছে। বললেন, ব্যস্ত হবেন না। এখনই তার নামটা করতে পারছি না।

হেমকান্ত ধৈর্য হারালেন না। শরীরটা দুর্বল। আচমকা আততায়ী গ্রেফতারের খবরটায় এবং রামকান্ত রায়ের এইসব হেয়ালী শুনে উদ্বেগে শরীরটা আরো দুর্বল লাগছে। তিনি চোখ দুটো একটু বুজলেন।

রামকান্ত রায় বললেন, আপনাকে আমার দু একটি প্রশ্ন করার ছিল।

করুন।

স্বদেশী অর্থাৎ টেরিস্টদের প্রতি আপনার এই দুর্বলতা কেন ?

কে বলল আমি টেরিস্টদের প্রতি দুর্বল ?

আমরা সবই টের পাই হেমকান্তবাবু।

হেমকান্ত একটা দীর্ঘশ্বাস ছেড়ে বললেন, আমি তো কিছুই করিনি যাতে আপনার ওরকম মনে হতে পারে !

আপনি করেন নি ? আপনার বাড়িতে শশীকে আশ্রয় দিয়েছিলেন সেকথা না হয় ছেড়েই দিচ্ছি।

কিন্তু আপনার ছোটো ছেলে কৃষ্ণকান্ত যে স্বদেশী হিসেবে তৈরি হচ্ছে সে খবর আপনার অজানা থাকার কথা নয় ।

কৃষ্ণ ! বলে হেমকান্ত চমকে উঠে বলতে চেষ্টা করলেন । বুকটা বড় বেশী ধক ধক করতে লাগল । রক্তস্রোত কি ভীষণ জোরে বইছে ? হেমকান্ত স্থলিত কণ্ঠে বললেন, কী করেছে কৃষ্ণ ?

কী করেনি বলুন ? সে স্বদেশী করবে বলে ব্যায়াম করে, লাঠি খেলে, বন্দুক চালায়, ব্রহ্মচর্য করে । আমরা সব খবরই রাখি ।

হেমকান্ত অবাক হয়ে বলে, শরীরচর্চা বন্দুক চালানো এসব তো আমরাও করতাম কিন্তু কৃষ্ণকান্ত এসব অকারণে করেছে না । তার বন্ধুদের কাছে আমরা জানতে পেরেছি সে খুব বেশী মাত্রায় স্বদেশী মনোভাবাপন্ন ।

হেমকান্ত মাথা নেড়ে বললেন, হতেই পারে না । আপনি ভুল জানেন ।

আমাদের ইনফর্মেশন কদাচিৎ ভুল হয় ।

কৃষ্ণ আমার ছেলে, তার নাড়ীনক্ষত্র আমি জানি ।

সবটা জানেন না । আপনি স্নেহাঙ্ক বাবা, সবটা কি করে জানবেন ? আর একটা কথাও না জানিয়ে পারছি না ।

বলুন ।

আপনাদের পুরুতঠাকুরের মেয়ে রঙ্গময়ী সম্পর্কেও আমাদের কাছে কিছু ইনফর্মেশন আছে ।

হেমকান্ত ফের উত্তেজিত হয়ে উঠে বসার চেষ্টা করেন । কিন্তু পারেন না । মাথাটা একটু ঘুরে যায় । বলেন, সে আবার কী করল ?

ওঁর প্রতি আপনার সফটনেসের কথাও আমরা জানি । এক্ষেত্রেও আপনি আমাদের সঠিক তথ্য জানাবেন না বলেই ধরে নিচ্ছি । শুধু বলে দিচ্ছি, ওঁর বিরুদ্ধে অ্যাকশন নিতে আমাদের বাধ্য করবেন না ।

হেমকান্ত খুব বিস্বাদ অনুভব করলেন মনটায় । তাঁর ও রঙ্গময়ীর সম্পর্ক নিয়ে পুলিশও কথা বলছে ! ভিতরটা উত্তপ্ত হয়ে উঠছিল তাঁর । দারোগা সাহেব বেশ কিছুক্ষণ যাবৎ তাঁকে ছোটো ছেলের মতো ধমকাচ্ছেন । এবার একটু প্রতিবাদ করা উচিত ।

হেমকান্ত মৃদু স্বরে বললেন, আপনি আমাকে ভয় দেখানোর চেষ্টা করছেন কি ?

ভয় দেখানো আমার কাজ নয় । আমার কাজ সতর্ক করা ।

কিন্তু রঙ্গময়ী কী করেছে তা আপনি এখনো বলেন নি । ক্রমাগত হেঁয়ালিতে কথা বললে তো হবে না । আপনাকে পরিষ্কার করে বলতে হবে আমার ছেলে এবং রঙ্গময়ী সম্পর্কে আপনার অভিযোগ কী ।

অভিযোগ এখনো করছি না । শুধু সন্দেহ প্রকাশ করছি । বিলিতি কাপড় পোড়ানোর ব্যাপারে রঙ্গময়ীর ইনস্টিগেশন ছিল । আপনি ওঁকে জিজ্ঞেস করলেই জানতে পারবেন । সেই ঘটনায় ফায়ারিং-এ দু জন মারা গেছে । যে কজন অ্যারেস্টেড হয় তাদের একজনের কাছ থেকে আমরা রঙ্গময়ীর সম্পর্কে ইনফর্মেশন পাই । অবশ্য সন্দেহ আমাদের আগে থেকেই ছিল । শশীকে উনি শেলটার দেওয়ার খুব চেষ্টা করেছিলেন ।

হেমকান্ত হতাশভাবে মাথা নেড়ে বললেন, আমি কিছুই জানি না । আর বিলিতি কাপড় পোড়ানো থেকে শুরু করে সব রকম আন্দোলন তো সারা দেশেই হচ্ছে । এর জন্য রঙ্গময়ীর প্ররোচনার দরকার কী ? আপনিই বা এসব অনুমান করতে যাচ্ছেন কেন ?

অনুমান নয় । আমরা শুধু অনুমানের ওপর নির্ভর করে কিছু বলি না ।

রামকান্তবাবু, আপনি কার সামনে দাঁড়িয়ে কথা বলছেন তা ভুলে গেছেন । আমি শান্তিপ্রিয় মানুষ বটে, কিন্তু কেউ আমাকে চোখ রাঙায় এটা আমি পছন্দ করি না ।

রামকান্ত রায় একটু অবাক হলেন। লোকটিকে তিনি নিরীহ বলেই জানতেন। কিন্তু আজ হঠাৎ ঐর ভাবান্তর এবং কাঠিন্য দেখে তাঁকে খতমত খেতে হল। তবে তিনি সব পরিস্থিতিতেই মানিয়ে নিতে পারেন। তাছাড়া তিনি জানেন, এসব জমিদারদের কিছু রাজনৈতিক ক্ষমতা থাকে, প্রভাব প্রতিপত্তিও তো কম নয়। একজন দারোগাকে বদলী বা বরখাস্ত করা খুব কঠিন নাও হতে পারে। হেমকান্ত দাপুটে বা প্রভাবশালী লোক নন বটে, কিন্তু তাঁর প্রভাবশালী শুভানুধ্যায়ীর অভাব নেই।

রামকান্ত রায় গলার স্বর নরম করে ফেললেন। বললেন, আপনার ভালর জন্যই বলছি। আপনি যে নির্বিরোধী মানুষ এ কথা কে না জানে? তবু আপনার বাড়িতে কোনোরকম সিঁড়ি শাস অ্যাকশন হলে তো বিপদ আপনারই। আমি সরকারের চাকর মাত্র।

হেমকান্ত মাথা নেড়ে বললেন, শুধু সেটুকু হলে আমার বলার কিছু থাকত না। কিন্তু আমার মনে হয় আপনার এই পরিবারের প্রতি একটু আক্রোশও আছে।

না না, কী যে বলেন!

হেমকান্ত একটু ক্ষীণ হেসে বললেন, প্রথম থেকেই আপনি ধরে নিয়েছেন যে, আমি স্বদেশীদের প্রতি সিমপ্যাথেটিক। ওরকম মনোভাব ভাল নয়। যখন আমাকে ছোরা মারা হল তখনো আপনি এটাকে অন্যভাবে দেখার চেষ্টা করছেন। আমার কাছে ব্যাপারটা অদ্ভুত লাগছে।

রামকান্ত রায় গম্ভীর এবং অপ্রস্তুত অবস্থায় চুপ করে রইলেন। তারপর হঠাৎ বললেন, আচ্ছা, তাহলে চলি।

রামকান্ত রায় চলে যাওয়ার প্রায় সঙ্গে সঙ্গেই কনক এসে ঘরে ঢুকল। পিছনে জীমূতকান্তি।

কী হল বাবা?

হেমকান্ত সহাস্যে বললেন, কিছু নয়। চিন্তা কোরো না।

কী বলতে এসেছিল?

একটা খবর দিয়ে গেল। লোকটা নাকি ধরা পড়েছে!

পড়েছে?

সত্যি মিথ্যে জানি না। তবে লোকটা সুবিধের নয়।

কনককান্তি বলল, সুবিধের তো নয়ই। দারুণ বদনাম।

একটা অদ্ভুত কথা বলে গেল। যে আমাকে ছোরা মেরেছে তাকে নাকি আমি চিনি। কিন্তু বলছি না।।

এরকম অদ্ভুত কথার মানে কি? লোকটা কে?

তা তো কিছু বলল না। আবার কৃষ্ণ সম্পর্কেও নাকি ওদের সন্দেহ দেখা দিয়েছে?

কৃষ্ণ! কনক এবং জীমূত দুজনেই অবাক।

হেমকান্ত দুশ্চিন্তাগ্রস্ত মুখে বললেন, সেইটেই ভাবনার কথা। কৃষ্ণ একটু লাঠি-টাঠি খেলে। বন্দুক চালানো শেখে। এসব দেখেই ওদের ধারণা হয়েছে যে কৃষ্ণ স্বদেশী করে। ওরা এখন ছায়া দেখলেই চমকায়।

কৃষ্ণ স্বদেশী করবে কি? ও তো দুধের ছেলে! জীমূতকান্তি অকপট বিস্ময়ে বলে।

হেমকান্ত মাথা নেড়ে বলেন, দুধের ছেলে বলে কথা নয়। দুধের ছেলেরা অনেকেই স্বদেশী করে। কংগ্রেসে কত ভলাশিয়ার আছে ওর বয়সী। সেটা কথা নয়। কথা হল, কৃষ্ণ সম্পর্কে সন্দেহ প্রকাশ করে আমাকে ঘাবড়ে দিতে চাইছে।

তাহলে এখন কী করা?

হেমকান্ত চিন্তিতভাবে বললেন, সেইটেই ভাবছি। রামকান্ত রায়কে আমিও একটু ভয় দেখিয়েছি। তাতে কাজও হয়েছে। কিন্তু আমার মনে হয় না লোক ও সহজে ছাড়বার পাত্র। কিন্তু লোক আছে যারা কাজ দেখাতে গিয়ে অনেক অনর্থ বঁধায়। রামকান্ত সেই শ্রেণীর লোক।

গোড়াউনে বিলিতি কাপড় পোড়ানোর ঘটনায় ফয়ারিং করার দরকার ছিল না। কাজেই কৃষ্ণ সম্পর্কে আমার দুর্ভাবনা হচ্ছে।

কনক বলল, তাহলে একটা কাজ করা যাক। কৃষ্ণকে এখান থেকে সরিয়ে নিলে কেমন হবে ?

হেমকান্ত একটা দীর্ঘশ্বাস ছেড়ে বললেন, আমাকে একটু ভাবতে দাও। কৃষ্ণ আমাকে ছেড়ে কোথাও যেতে চায় না। এ জায়গার প্রতিও ওর টান আছে। আমি ওর সঙ্গে একটু কথা বলে দেখি।

কনক ও জীমূত দুজনের মুখেই দৃষ্টিশ্রুতি। হেমকান্ত সেটা লক্ষ করলেন। কিন্তু আশ্চর্যের বিষয় মুখে দৃষ্টিশ্রুতির কথা বললেও ভিতরে ভিতরে তিনি তেমন একটা ভয় পাচ্ছেন না। নিজের ভিতরে এই পরিবর্তন দেখে তিনি নিজেও কম বিস্মিত নন। আততায়ীর ছোরা তাঁর কিছু উপকার করেছে।

রামকান্ত রায়ের আগমন এবং নির্গমন দুই-ই ছাদ থেকে নিরীক্ষণ করেছে কৃষ্ণকান্ত। তার চোখে জ্বালা। তার ভিতরে এক অন্ধ রাগ। লোকটা যে তাদের শত্রু এ বিষয়ে তাঁর বিন্দুমাত্র সন্দেহ নেই। শিশিভূষণের ঘটনা থেকে লোকটার আক্রোশের শুরু। এ পর্যন্ত নানাভাবে হেমকান্তকে জব্দ করার চেষ্টা করেছে লোকটা। অকারণেই।

কৃষ্ণকান্ত বুঝতে পারছে, তাদের শত্রুর সংখ্যা ক্রমেই বাড়ছে। অথচ তারা তেমন কোনো অন্যায় করেনি। হেমকান্ত সব রকম ঘটনার উর্ধ্বে বিচরণ করেন। অথচ তাঁকেই লোকে ছোরা মারে। পুলিশ এসে তাঁকে জ্বালাতন করে, শহরবাসী তাঁর নামে বদনাম রটায়।

কৃষ্ণকান্তর সবচেয়ে নির্ভরযোগ্য জায়গা রঙ্গময়ী। ছাদ থেকে নেমে সে রঙ্গময়ীকে খুঁজতে গেল।

মন্দিরের চাতালে রঙ্গময়ী একা উদাস মুখে বসে আছে। তাকে দেখে খুশি হয়ে বলল, আয়।

দারোগা এসেছিল, দেখেছো ?

দেখেছি। মস্ত ঘোড়া, নাল লাগানো বুট, কোমরে বেল্ট, চোখ রান্ধসের মতো ধক ধক করছে।

বলে রঙ্গময়ী বিষণ্ণ মুখে হাসল।

কী চায় বলো তো। রোজ আসে কেন ?

কী জানি বাবা কেন আসে। সেই স্টাভিং নিয়েই বোধ হয় কথা।

কেউ ধরা পড়েছে ?

পড়েছে বোধহয়।

কি করে জানলে ?

রঙ্গময়ী মাথা নেড়ে বলে, জানব কি করে ? আন্দাজে বলা। তবে কানাঘুষো শুনছি কে যেন ধরা পড়েছে খানায়।

লোকটা কে জানো ?

রঙ্গময়ী মাথা নেড়ে বলে, না।

কৃষ্ণকান্ত গম্ভীর মুখে চূপ করে থাকে। যে ধরা পড়েছে সে কি সত্যিই স্বদেশী ? কথাটা বিশ্বাস করতে ইচ্ছে হয় না তার। স্বদেশীদের সে মনে প্রাণে ভালবাসে।

রঙ্গময়ী খুব আলতো একটা হাত নরম করে তার পিঠে রেখে বলে, কী অত ভাবছিস ? পুলিশের কথা অত বিশ্বাস করতে নেই। যে ধরা পড়েছে তার সঙ্গে হয়তো ঘটনার কোনো সম্পর্কই পাওয়া যাবে না।

কৃষ্ণকান্ত বলল, রামকান্ত রায় বাবাকে দেখতে পারে না কেন বলো তো ?

ও ওইরকম। আমাকেও দেখতে পারে না। তোকেও না।

কৃষ্ণকান্ত চমকে উঠে বলে, কি করে বুঝলে ?

আমার কাছে খবর আসে ।

আমরা কি করেছি যে দেখতে পারে না ?

রঙ্গময়ী একটু হাসে । বলে, কত কি করেছি ! তোতে আমাতে মিলে ইংরেজ রাজত্বটার ভিতটাই নাড়িয়ে দিয়েছি বোধহয় । তাই ওর অত মাথাব্যথা ।

সত্যি বলছো পিসি ?

সত্যিই বলছি । আমার মনে হয় তোর এখন কলকাতায় গিয়ে কিছুদিন থাকা দরকার ।

কেন পুলিশ কি আমাকে ধরবে ?

না ধরলেও জ্বালাতন করবে । নজর রাখবে ।

তাহলে তুমি কি করবে ?

আমার আর কি করার আছে ?

তোমাকেও তো জ্বালাতন করবে ।

রঙ্গময়ী মাথা নেড়ে বলে, করে কলকাতা । আমি কোথাও যাবো না ।

কৃষ্ণকান্ত মাথা নেড়ে বলে, তাহলে আমিও যাবো না ।

রঙ্গময়ী এ কথাটার কোনো জবাব দেয় না । চুপচাপ বসে থাকে । তার স্নেহময় হাতখানা ধীরে ধীরে কৃষ্ণকান্তের মাথায় গভীর চুলের মধ্যে বিলি কেটে দেয় । অনেকক্ষণ বাদে সে বলে, দাদা বউদিরা সব এসেছে, তাদের সঙ্গে ঠিকমতো কথাটোথা বলিস তো ? নাকি মুখচোরার মতো পালিয়ে বেড়াস !

কৃষ্ণকান্ত একটু লাজুক হেসে বলে, ওরা সব কেমন যেন ! কেবল সংসারী কথাবার্তা বলে । আর কেবল এক কথা, কত বড় হয়েছিস ! কী সুন্দর হয়েছিস ! আমার ওসব ভাল লাগে না ।

রঙ্গময়ী হাসে । বলে, সংসারী মানুষ সংসারের কথা বলবে না তো কী বলবে ? একটু মিশিস ওদের সঙ্গে, নইলে নিন্দে হবে । দুঃখ পাবে ওরা ।

কৃষ্ণকান্ত চুপ করে থাকে ।

রঙ্গময়ী খুব নীচু স্বরে বলে, তোর ঘর থেকে একটা জিনিস আমি চুরি করেছি ।

কৃষ্ণকান্ত একটু চমকে উঠে বলে, কি জিনিস ?

যেটা তুই তোর বাবার চেস্ট অফ ড্রয়ার্স থেকে চুরি করেছিলি ।

কৃষ্ণকান্ত রঙ্গময়ীর মুখের দিকে চেয়ে বলে, পিস্তল ?

রঙ্গময়ী একটু বিষণ্ণ হেসে বলে, বোকা কোথাকার ! ও দিয়ে তুই কী করবি বল তো !

কেন নিলে ? আমার যে ওটা দরকার ।

রঙ্গময়ী মাথা নেড়ে দৃঢ় গলায় বলে, না, ওটার তোমার কোনো দরকার নেই ।

কেন নেই পিসি ?

এই বয়সে ওসব অস্ত্র কাছে রাখতে নেই । কখন পুলিশ বাড়ি সার্চ করে তারও ঠিক নেই ।

কৃষ্ণকান্ত একটা শীতলতা অনুভব করে । পুলিশ আসা রিচিত্র কিছু নয় । আসতেই পারে ।

সে জিজ্ঞেস করে, কী করেছো ওটা নিয়ে ?

চুকিয়ে রেখেছি । ভয় নেই ।

ওটার গুলি ছিল না ।

জানি । আমি খুলে দেখে নিয়েছি ।

তুমি পিস্তল খুলতে পারো ?

কেন পারব না ?

কে তোমাকে শেখাল ?

কেন তোর বাবা !

বাবা ।

তোমার বাবাকে আমি কি কম জ্বালিয়েছি ?

বাবা তো নিজেই বন্দুক পিস্তল ছুঁতো না !

কে বলল ছুঁতো না ! পছন্দ করত না ঠিকই । কিন্তু বন্দুক চালাতে পারত ভালই । তিন ভাই-ই পারত । চোর ডাকাতের ভয় আছে না জমিদারদের । তাই শিখে রাখতে হত ।

কী করে শেখাল ? তুমি বায়না ধরেছিলে ?

রঙ্গময়ীর চোখ চিকচিক করে উঠল সুখস্মৃতিতে । একটু চুপ করে থেকে বলল, আমি অন্য একটা বুদ্ধি খাটিয়েছিলাম । তোমার বাবাকে কিছু বলিনি । ধরেছিলাম সুনয়নীকে ।

মা ! মাকে ধরলে কেন ?

ওই তো মজা । আমি বললে যদি অন্য কিছু মনে করে ! তাই তোমার মাকে ধরে পড়লাম । বললাম, তোমার কতকি বেলো আমাদের বন্দুক চালানো শেখাতে । তোমার মা তো শুনে ভিরমি খায় আর কি ! মেয়েমানুষ আবার কবে বন্দুক পিস্তল চালায় ! কিছুতেই রাজি হয় না ।

তারপর কী হল ?

আমিও ছাড়িনি । বলে বলে মাথাটা খারাপ করলাম । তারপর সুনয়নী তোমার বাবাকে গিয়ে একদিন ধরল, আমাদের বন্দুক চালানো শেখাও । শুনে তোমার বাবার কী রাগ !

রাগল কেন ?

ওই যে পুরুতের মেয়ে বুদ্ধি দিয়ে তার বউয়ের মাথাটা বিগড়েছে সেই জন্য । আমাকে ডেকে পাঠিয়ে খুব বকাঝকা করেছিল । কিন্তু সুনয়নী তো সোজা পাত্রী নয় । দারুণ জেদী । শেষে একদিন তোমার বাবা আমাদের নিয়ে পিছনের বাগানটায় চাঁদমারী শুরু করল ।

মা পেরেছিল ?

রঙ্গময়ী খিলখিল করে হেসে বলে, একটুও না । বন্দুকের প্রথম শব্দটা শুনেই পালিয়ে যায় । তোমার ভয় করেনি ?

না । তবে লজ্জা করছিল ।

কেন, লজ্জা কিসের ?

সে তুই বুঝবি না । কিন্তু প্রথম দিনেই আমি দারুণ শিখে নিই । পরে সুনয়নীও শিখেছিল একটু । কানে তুলো দিয়ে, কাঁধে কাপড় জড়িয়ে অনেক কসরৎ করে শিখতে হয়েছিল তাকে ।

শিখতে গেলে কেন বলো তো !

সে কি আর এক কথায় বলা যায় ! জালিয়ানওয়ালাবাগের সেই ঘটনার কথা খুব ভাবতাম । ক্ষুদিরামের ফাঁসি । এসব মনে করে করে কেন যেন একদিন বন্দুক চালানোর ইচ্ছে হয়েছিল । মনে হল, শিখে রাখি, পরে হয়তো কাজে লাগবে ।

॥ ৭৮ ॥

কত সহজভাবে একটা হত্যাকাণ্ড এবং মৃত্যু সংঘটিত হতে পারে ! কত সহজ ! কত সামান্য শারীরিক আয়াস ! আর সামান্য একটু ইচ্ছা ।

ধারা একবারও নিজেকে সরিয়ে নেয়নি । একটুও চেষ্টা করেনি ধুবর হাত ছাড়িয়ে দিতে । যেন বা খেলাচ্ছলে মৃত্যু তার আকাঙ্ক্ষিত ।

কিন্তু ধুব কেন মারবে ধারাকে ? তার ইচ্ছাশক্তির যে তেমন জোর নেই ! তার আঙুলগুলো বাঁকা হয়ে বসেছিল ধারার গলায়, কিন্তু ততদূর কঠিন হতে পারেনি । দুহাতের ভিতর সে অনুভব করল

ধারার স্বাসের কম্পন, রক্তের মৃদু সঞ্চালন, কণ্ঠমণির ওঠাপড়া। ধারার দুই চোখ তার চোখে নিবদ্ধ। গলার সামান্য চাপে চোখ দুটো বিস্তারিত হয়ে গেল। মুখখানা একটা অতিরিক্ত ফোলানো লাল টুকটুকে বেলুন। মুখখানা সামান্য হাঁ। জিব কাঁপছে। বার দুই “খঃ খঃ” শব্দ করল ধারা। ভাষাহীন এক রুদ্ধ আত্ননাদ।

একটু এলিয়ে পড়ছিল ধারার শরীর। হাঁটুর কাছ থেকে ভাঙছিল। ধুব এই পর্যন্ত দেখল। তারপর প্রশ্ন করল নিজেকে, কেন? ওকে মেরে কী হবে তোমার?

নিজেই জবাব দিল, কিছুই কি নয়? দেখা যাক, আমার ভিতরে কোনো বিস্ফোরণ ঘটে কিনা।

কিসের বিস্ফোরণ? তোমার বারুদ ভিজে গেছে কবে! শত স্ফুলিঙ্গও আর বিস্ফোরণ ঘটাবে না।

দেখা যাক। কিছু করা তো হবে। একটা অন্যরকম কিছু, যা রোজকার কৃতকর্মের মতো নয়। যা অন্যরকম।

ফাঁসির দড়ি আছে। আছে যাবজ্জীবন গরাদের ভিতরে থাকার কষ্ট। কিংবা ছদ্মবেশে পালিয়ে বেড়ানো। ভয় নেই?

ভয়ই তো দরকার। আমার জীবন যে বড় নিরাপদ, বড় ঘটনাহীন। আমার প্রায় সব পথই নির্বিঘ্ন করে রেখেছে আমার জন্মদাতা। তার সব ক্ষমতা প্রয়োগ করে আমাকে দীপশিখার মতো আড়াল করতে চেষ্টা করছে। আমি সেই সিকিউরিটি ভেঙে দেবো। দিই?

শুধু নিজের কথা ভেবে ওকে মারবে? তোমার জীবনে ওর ভূমিকা কতটুকু? এ তো তোমার দর্শন নয়।

নয়? আমার দর্শন বলতে আছেন বা কি? আমার ভিতরে এক চির ঘুমন্ত আমি। কিছুতেই তাকে জাগাতে পারছি না যে! কতবার চেষ্টা করেছি। হেরে যাচ্ছি। কী যে করতে চাই কিছুই জানি না। অস্থিরতা তীব্র থেকে তীব্রতর হয়। মনে হয় খুব মহৎ কিছু হওয়ার কথা ছিল আমার। এই দ্বন্দ্ব আমি বারবার মাতাল বা লম্পট হওয়ার চেষ্টা করেছি। হতে পারিনি তো তাও।

ধারাকে খুন করে কি কিছু হতে পারবে?

ওকে খুন করার পিছনে আমার কোনো মোটিভ নেই। অকারণ এই হত্যা সংঘটিত হলে আমার একসময় না একসময় অনুতাপ আসবে। আসবেই। তীব্র সেই অনুতাপের দহনে যদি দপ করে জ্বলে উঠতে পারি কখনো।

কোনোদিন ওইভাবে হিসেব করে তো জাগেনি মানুষ। ঘৃণা থেকে যা জাগে তা তীব্রতর ঘৃণাই। হননেচ্ছা থেকে আরো তীব্রতর হননেচ্ছা জন্ম নেয়। মৃত্যু কত সহজ দেখছেন না? পদ্মপাতায় জলের মতো টলমল করে এই দেহের ভিতরে প্রাণবিন্দু। একটুতেই খসে যায়। মেরো না। মেরো না। পারো তো মৃত্যুকে অবলুপ্ত কর। মা প্রিয়স্ব। মা জহি। শক্যতে চেং মৃত্যুমবলোপয়ঃ।

বড় ক্লান্তি লাগল ধুবর। একটি মৃত্যুর পর আছে দীর্ঘ প্রতিক্রিয়া। অত প্রতিক্রিয়া সে সামলাতে পারবে না। সামলাবে তার বাবা কৃষ্ণকান্ত। সেটাও ভারী অপমানকর হবে। লোপাট করা হবে প্রমাণ এবং সাক্ষীসাবুদ। দাঁড় করানো হবে মিথ্যা সাক্ষী। রাজনৈতিক চাপ সৃষ্টি করা হবে। প্রচ্ছন্ন হুমকিতে কেঁপে যাবে বিচারকের রায় লেখা হাত। ধারার হত্যাকারী কিছুতেই ধরা পড়বে না। তার ধরা পড়তে নেই।

ধুব খুব ধীরে হাত দুটো সরিয়ে নেয়।

ধারার স্তান ছিল না বললেই হয়। একটা মৃদু গোঙানীর শব্দ করে এবং প্রকাশ স্বাস ফেলে সে পড়ে গেল মেঝেয়। ফাঁকা ঘরে পতনের শব্দটা হল ভীষণ।

ধুব ফাস্ট-এইড জানে না। কিন্তু একটুও না ঘাবড়ে সে হাঁটু গেড়ে বসে নীচ হয়ে ধারার মুখে মুখ দিয়ে প্রাণপণে বাতাস টেনে আবার তা সঞ্চালিত করতে থাকল ভিতরে। অনেকক্ষণ ধরে। প্রচণ্ড



পরিশ্রমে তার ঘাম হতে লাগল। এক ফাঁকে উঠে গিয়ে সে পাখাটা চালিয়ে দিয়ে এল ফুল স্পিডে। বাথরুম থেকে জল এনে মুখে ঝাপটা দিল কয়েকবার।

আধঘণ্টা বাদে বিভ্রান্ত, কম্পমান, দুর্বল ধারা উঠে বসতে পারল। প্রচণ্ড কাশছে, কাঁদছে। তার মুখের লালা আর চোখের জল এক হয়ে যাচ্ছে। একটিও কথা নেই মুখে। শুধু হিক্কার মতো শব্দ উঠে আসছে বুক থেকে। তা কান্নাও হতে পারে বা অবকুদ্ধ স্বাস।

ধুব পালাল না। বসে রইল মুখোমুখি। পাথরের মতো চুপ।

আরো অনেকক্ষণ বাদে, যখন সময়ের হিসেব হারিয়ে ফেলল ধুব, ধারা ভাঙা গলায় বলল, কী চেয়েছিলে তুমি? মারতে?

ধুব মাথা নেড়ে বলল, হ্যাঁ। কিন্তু পারলাম না।

কিন্তু কেন? তুমি কি পাগল?

ধুব মাথা নাড়ল, বোধহয়। আমাকে বিশ্বাস করা তোমার ঠিক হবে না ধারা।

ধারার চোখে আতঙ্ক, ঘৃণা, বিদ্বেষ। ধুবর দিকে একদৃষ্টে খানিকক্ষণ চেয়ে থেকে বলল, আমার কোনো সিকিউরিটি নেই, পুরুষ সঙ্গী নেই, তাই?

ধুব মাথা নেড়ে বলে, না।

থাকলে সাহস করতে?

করতাম। কিন্তু ও কথা কেন? আমি তো পারিনি দেখছই!

পারোনি! কে বলল পারোনি। জাস্ট নাউ ইউ হ্যাভ কিল্ড সামথিং ইন মি। আমি আর সেই আগের মানুষটা নেই। জানো সেটা?

ধুবর ভিতরে প্রতিক্রিয়াটা শুরু হল এখন, এই মুহূর্তে। নিজের ভিতরে একটা কাঁপুনি টের পাচ্ছিল সে। ভারী অবশ লাগছে শরীর। শরীরের ভিতরে একটা যন্ত্রণার মতোও কিছু টের পাচ্ছে সে। মাথাটা ঘোলাটে। সে একজন মানুষকে অল্পের জন্য খুন করতে করতে বেঁচে গেছে।

ধুব একটু হাসবার ব্যর্থ চেষ্টা করে বলে, তুমি আমাকে অফারটা দিয়েছিলে।

ধারা নিজের মুখটা দুহাতে চেপে ধরে যেন অবিশ্বাস ভরে মাথাটা নাড়ে। বলে, আমি যে বিশ্বাস করতে পারছি না। উঃ। তোমাকে ঠাট্টা করে কী বলেছি আর তুমি সত্যিই তা করবে?

চেষ্টা করে দেখলাম পারা যায় কিনা।

তুমি যাও। প্লীজ! তুমি চলে যাও।

আর আসবো না তো!

না। আমি তোমাকে সহ্য করতে পারছি না। আর একটু হলেই তুমি আমাকে মেরে ফেলতে! উঃ।

ধুব তার শুকনো ঠোঁট জিব দিয়ে ভেজানোর চেষ্টা করল। পারল না। তার জিবও খড়ের মতো শুকনো। মৃদু স্বরে সে বলল, মেরে ফেলতাম ঠিকই। কিন্তু তবু তোমাকে বাঁচাল কে বলো তো! কে বাঁচাল? কী বলতে চাও?

তোমাকে যে মারতে চেয়েছিল সেও ধুব, যে বাঁচাল সেও ধুব।

আমি ওসব কথা বুঝতে চাই না। প্লীজ! যাও।

ধুব উঠল। নেমে এল রাস্তায়।

অনেক রাত হয়েছে। লবণহ্রদ এলাকায় যানবাহন নেই। সে রাস্তাও ভাল চেনে না। হাঁটা পথ কোথা দিয়ে কোথায় চলে গেছে। উদোম, বিশাল এক জায়গা। ছড়ানো ছিটোনো ঝাঁচকচকে নতুন সব বাড়ি।

কিছুদূর চেনা পথে গিয়ে আচমকা পথের নিশানা হারিয়ে ফেলে সে। কিন্তু চিন্তিত হয় না। আজ সে বড় অন্যমনস্ক। বড় অন্যরকম।

হাঁটতে হাঁটতে ধুব বেশ কিছুদূর চলে গিয়ে এক জায়গায় দাঁড়ায়। লোকবসতি প্রায় শেষ। সামনে প্রান্তরের মতো কিছু অন্ধকারে ভয়াল ও বিশাল হয়ে আছে।

শহুরে ধুব একবার পা বাড়িয়েও টেনে নেয়। অচেনাকে আজ তার ভয় করে। তার ভিতরে যে একজন হত্যাকারী আছে তা অনেকদিন ধরে জানে ধুব। কিন্তু সেই হত্যাকারীর অস্তিত্ব সম্পর্কে এত নিঃসংশয় ছিল না সে। আজ হল।

পিছনে রাস্তার শেষ আলোটি জ্বলছে। তার ছায়া প্রলম্বিত হয়ে সামনে প্রান্তরের অন্ধকারে গিয়ে মিশে গেছে। ভৌতিক সেই ছায়ার দিকে ধুব অনেকক্ষণ চেয়ে থাকে। কিছু মনে হয়, একটু ভয়-ভয় করে। কেমন যেন নিজেকে অবিশ্বাস হতে থাকে, নিজের সঙ্গে সহবাস করতে অস্বস্তি হয়।

ধুব ফেরে এবং ফের হাঁটতে থাকে। শরীর ক্লান্ত, ঘুম পাচ্ছে, খিদেয় জ্বলে যাচ্ছে পেট। সেই ব্যাথাটা ধীরে ধীরে চাগাড় দিচ্ছে।

আচমকাই দুটো হেডলাইট তাকে ঝলসে দেয়। ধুব চোখ আড়াল করে দাঁড়ায়। তারপর হাত তালে, রোখকে!

গাড়িটা পার্ক করাই ছিল। পুলিশের একটা জীপ। দু জন লোক নেমে এগিয়ে আসে। খুব স্নগ্ধ এবং সতর্ক ভঙ্গী।

ধুব চৌধুরি না? উই মীট এগেন!

ধুব দেখতে পায়, একজন ইনস্পেকটর বা ঐজাতীয় লোক। মুখটা চেনা। সে বলল, রাস্তা হারিয়ে ফেলেছি।

আপনি তো প্রায়ই রাস্তা হারান। কিন্তু এখানকার গভর্নমেন্ট হাউসিং এস্টেটের এক মহিলাকে খুন করার চেষ্টা করেছিলেন বলে থানায় একটা টেলিফোন গেছে। কী ব্যাপার বলুন তো!

টেলিফোন! বলে ধুব খুব অবাক হয়। ধারার টেলিফোন নেই। যদি করে থাকে তবে অন্য কারো ফ্ল্যাট থেকে। সেক্ষেত্রে খবরটা ধারা গোপন রাখেনি বলেই ধরে নিতে হবে।

সে বলল, কী করবেন? অ্যারেস্ট?

উপায় কী?

তাহলে চলুন।

আপনি জীপে উঠে বসুন। আমাদের লোক ভদ্রমহিলার স্টেটমেন্ট আনতে গেছে। এলে আমরা রওনা হবো।

ধুব আপত্তি করে না। পুলিশের জীপ একটি চমৎকার নিরাপদ আশ্রয়। সে ঠিক যথাস্থানে পৌঁছে যাবে। ঘটনাগুলো সে স্পষ্টই অনুমান করতে পারে। তাকে থানা নিয়েই পুলিশ কৃষ্ণকান্ত চৌধুরিকে ফোন করবে। কিছু সাক্ষাতিক বা আধা-সাক্ষাতিক কথা হবে তাদের। তারপর পুলিশ সামান্য একটু আদর মেশানো শাসন করে নিজেদের গাড়িতে করে তাকে বাড়ি পৌঁছে দিয়ে আসবে।

ধুব জীপগাড়িতে উঠে বসল। চোখ বুজে মৃদু হেসে আপনমনে বলল, ধারা, তুমি পারবে না। সহজাত কবচ-কুণ্ডল নিয়ে জন্মেছি আমি! আমি অবধ্য, অপরাধেয়।

কতক্ষণ বসে মশার কামড় খেতে খেতে ঢুলেছে ধুব তা খেয়াল নেই। আচমকা একটা হাত তার কাঁধ ধরে ঝাঁকাল।

ধুবদা! এই ধুবদা।

কে? ধুব চোখ মেলে।

আরে আমি। আমি সদানন্দ।

সদানন্দকে চেনে ধুব। পুলিশের সাব ইনস্পেকটর। কৃষ্ণকান্ত একে চাকরি করে দেন।

সদানন্দ ধুবর পাশে উঠে বসে বলে, কী করেছিলেন বলুন তো ! ভদ্রমহিলা সাজঘাতিক আপসেট ।

ধুব জবাব দেয় না । চারদিকে চেয়ে দেখে । ধারার অ্যাপার্টমেন্ট থেকে বহু দূর চলে গিয়েছিল সে । আবার কী করে যে ফিরে এল !

ধুব সদানন্দের মুখের দিকে না তাকিয়ে জিজ্ঞেস করে, মেয়েটা কী স্টেটমেন্ট দিল ? সে সাজঘাতিক । অ্যাটেমপটেড মার্ডার ।

তাহলে ও বেঁচে আছে কি করে ?

সেটা পয়েন্ট নয় । পয়েন্ট হল, কী হয়েছিল তা উনি জানেন না ।

তাহলে ?

আমিও জানতে চাই কী হয়েছিল ! বলবেন ?

ধুব একটা হাই তুলে বলে, আমিই কি জানি ! না জানলে বলবটা কী ?

গলা টিপে ধরেছিলেন নাকি ?

ধরেছিলাম । তবে মারার জন্য নয় । জাস্ট ফান ।

মহিলা কে হন আপনার ?

ধুব একটু চুপ করে থেকে বলে, বন্ধু ।

কতদিনের চেনা ?

জেরা করছ নাকি সদানন্দ ?

আরে না । কেস তো ডিসমিস হয়েই গেছে । আপনার কেস কি টেক্কে ! তবে মারডার হয়ে গেলে একটু ঝঞ্জাট ছিল । মেয়েটা কি হাফ-গেরল্ড ?

তা নয় । এমনিতে শী ইজ গুড । হাই কানেকশনস । তবে একটু অ্যাডভেনচারাস টাইপের । বুকেছি । সুশীল, কী করছ ! গাড়ি ছাড়ু ।

দুজন রাস্তার ধারে পেছাপ করতে করতে গল্প করছিল । ডাক শুনে প্যাণ্টের চেন টানতে টানতে এসে জীপ-এ উঠল ।

তাদের একজন বলল, আসামী তো ধরা পড়েছে । এবার কি করবেন সদানন্দদা ?

সোজা কালীঘাট চলো । বাড়িতে পৌঁছে দিই আগে ।

গাড়ি চলতে লাগল ।

সদানন্দ ধুবর দিকে ফিরে বলল, বাড়ি গিয়ে একটা ট্র্যাংকুলাইজার খেয়ে শুয়ে পড়ুন ।

তোমরা কেসটা নেবে না সদানন্দ ?

কিসের কেস ?

এই ধারা যে নালিশ করল !

সদানন্দ হেসে ওঠে, নিয়েছি তো । কেস নেবো না কেন ?

বাজে বোকো না । কেস নিলে আমাকে তোমার অ্যারেস্ট করা উচিত ।

করেছি তো । ফর্মালিটি মেইনটেনড টু দি লাস্ট । এই তো আপনাকে ধরে নিয়ে যাচ্ছি ।

কিন্তু লক-আপে নিচ্ছে না ।

লক-আপ সকলের জন্য নয় । আপনার লক-আপ লাগবে না ।

কেন লাগবে না ?

যেহেতু আপনি পালাবেন না ।

কেস যদি ওঠে এবং আমাকে যদি খুঁজে না পাও ?

সদানন্দ খুব হাসে । তারপর বলে, সাত মন ঘি-ও পুড়বে না দাদা, রাধাও নাচবে না ।

তার মানে ?

বাড়ি গিয়ে আগে ঘুমোন তো । কাল আমি বিকেলের দিকে গিয়ে দেখা করবখন । তখন কথা হবে ।

আমি কিন্তু আজ এক ফোঁটাও মদ খাইনি সদানন্দ ।

খাননি ! বলে সদানন্দ যেন খুব সতর্ক ভাবে বাতাসটা শোঁকে । তারপর বলে, তাতেই বা কী প্রমাণ হয় ? আপনি খুন করতে চেয়েছিলেন ?

প্রাইমা ফেসি কেস তো তাই !

জীপ-এর সামনে বসা দুজনের একজন মুখ ফিরিয়ে বলে, আপনি তো বলেছিলেন ইট ওয়াজ এ ফান ।

তাও বটে ।

তাহলে আবার কী ? আমরা ভদ্রমহিলাকে কাল বুঝিয়ে দেবো ইট ওয়াজ রিয়েলি ফান । আর কিছু নয় ।

ধুব একটু চুপ করে থেকে সদানন্দকে চাপা স্বরে বলে, আমাকে লক-আপ-এ নিয়ে চলো । সে কী ?

নিয়ে চলো সদানন্দ । ধরো যে কমপ্লেন করেছে তা অনেকটা সত্যি ।

রাখুন তো দাদা । ওসব মেয়েছেলেকে আমরা চিনি । দুবার ডিভোর্স করেছে, ছেলে ছোকরাকে নাচিয়ে বেড়ায় । ওসব আমরা জানি ।

ডিভোর্সের খবর জানলে কি করে ?

বাঃ, এতক্ষণ ধরে তদন্ত করতে হল না ?

লোকজন জমেছিল ?

দু চারজন । ও নিয়ে ভাববেন না । সাক্ষী কেউ দেবে না ।

কেসটা হাস আপ করবে সদানন্দ ?

কেসই নয় তার আবার হাস আপ।এটা কেস নাকি ? যেসব মেয়েছেলের পিছনে চোদ্দটা পুরুষ ঘোরে তাদের ও রকম কেস দুচারটে হয়ই । আপনি এর সঙ্গে আর মিশবেন না ।

লবণহুদ ছাড়িয়ে জীপ বেলঘাটা পেরোচ্ছে । নির্জন রাস্তাঘাট ।

কটা বাজল বলো তো সদানন্দ !

সাড়ে বারোটা ।

বাকি রাস্তাটা ধুব চুপচাপই রইল । শুধু সদানন্দের নানা কথার জবাবে হুঁ হুঁ করে ঠেকা দিয়ে গেল ।

খুব নিরাপদে এবং ঘটনাহীন ভাবেই বাড়ি পৌঁছে যায় ধুব । ডাইনিং হল-এ ঢুকে ঢাকা-দেওয়া খাবার গো-গ্রাসে -খায় সে । তারপর ঘরে এসে সিগারেট ধরায় ।

বড় ভয় করছে তার । একা ঘরে ততটা ভয় হত না । আজ তারা দুজন । সে আর সে । ধুব আর ধুব ।

উঠে আলমারি খুলে হুইস্কি বের করে ধুব । তারপর অশুভীন জলস্রোতে ভেসে যেতে থাকে । একসময়ে বোতল এবং সে একই সঙ্গে গড়িয়ে পড়ে মেঝেয় । অচেতন অবস্থায় রাত কেটে যায় ।

ধুবর ঘুম ভাঙল অনেক বেলায়, তীব্র মাথার যন্ত্রণা, পেটে গোলান, মুখ তিক্ত কষায় শুষ্কতায় ভরা । চোখ খুলে রাখতে কষ্ট হচ্ছে ।

কে যেন ডাকছে, ধুব, ধুব !

কে ?

আমি ।

গলার স্বরটা চিনতে পারে ধ্রুব। ইলেকট্রিক শক খাওয়ার মতো উঠে বসে মেঝের ওপর।  
দরজায় কৃষ্ণকান্ত দাঁড়িয়ে।

কিছু বলছেন ?

বলছিলাম। তৈরি হয়ে একবার নার্সিং হোম-এ যাও।

যাচ্ছি।

বউমা আর বাচ্চা ভালই আছে। চিন্তা নেই। তোমার একবার যাওয়া কর্তব্য বলে স্মরণ করিয়ে  
দিয়ে যাচ্ছি।

ধ্রুব উঠল। টলে পড়ে যেতে যেতে দাঁড়াল।

কৃষ্ণকান্ত চলে গেছেন। তবু ফাঁকা দরজাটার দিকে সম্মোহিতের মতো চেয়ে থাকে সে। গত দু  
মাসের মধ্যে বোধহয় এই প্রথম তার সঙ্গে কথা বললেন কৃষ্ণকান্ত।

কিন্তু কেন বললেন ? ব্যাপারটা কী ?

॥ ৭৯ ॥

“আবার সেই কিশোরী। কিন্তু এখন তাহাকে আর কিশোরী বলি কি করিয়া ? বয়সের এক নূতন  
ঋতু আসিয়া তাহাকে যেন পত্রে পুষ্পে ফলভারে অপরূপ সাজে সাজাইয়াছে।

“কিশোরী যে সুন্দরী তাহা বলা যায় না। কিন্তু সৌন্দর্যের সংজ্ঞা কী তাহাও তো ঝুঁজিয়া বা বুঝিয়া  
পাইলাম না। শাস্ত্রোক্ত সৌন্দর্য লক্ষণের সহিত যাহার বিন্দুমাত্র মিল নাই সেও এমন এক আকর্ষণে  
বরণীয়া হইয়া উঠে যাহার ব্যাখ্যা হয় না। ক্ষীণ কটি, উন্নত বক্ষ, গুরু নিন্ম, পঙ্ক বিশ্বাধর বা  
হরিণ-নয়নের যতই প্রশংসা থাকুক, এ সকল যাহার নাই সেও অন্য কারণে যে সৌন্দর্যের লহর  
তুলিতে পারে এই কিশোরীই তাহার প্রমাণ।

“কি দিয়া ইহার সেই রূপের বর্ণনা করিব ? আমার ভাষাজ্ঞান বা বর্ণনাশক্তি তেমন নাই। শুধু  
বলিতে পারি, এই যুবতীর মধ্যে একটি বুদ্ধির দ্যুতি আছে, যাহা সচরাচর মহিলাকূলে দেখিতে পাওয়া  
যায় না। দীর্ঘ শরীর, মেদবর্জিত মজবুত গঠন, কাঠামোতে কোমলতার কিছু অভাব আছে বটে, কিন্তু  
মুখখানা কেহ যেন নরকনে চাঁছিয়া কুঁদিয়া তুলিয়াছে। ইহার গায়ের রঙ তাম্রাভ। গৌরী নহে বলিয়া  
ইহার অগৌরবের কিছু নাই। যুবতীর গাত্রবর্ণ নূতন তামার পয়সার মতোই উজ্জ্বল।

“এই বয়সে মেয়েদের কটাক্ষ করিবার প্রবণতা থাকে। এই যুবতী চোখের সেই কটাক্ষ দিয়া  
অনায়াসে পুরুষচিহ্ন জয় করিতে পারে। সচ্চিদানন্দ তো চোখ দেখিয়াই মজিয়াছে। কিন্তু আশ্চর্য  
এই, যুবতী তাহার এই একাঙ্গী বাণ কদাচিৎ প্রয়োগ করে।

“ঋতুখানে কিছুদিন বিষয়কর্মে কিছু ব্যস্ত হইয়া পড়ায় এবং সকালে ঘুরিয়া বেড়ানোর ফলে  
সাক্ষাৎ বিশেষ হয় নাই। একদিন শীতকালে সন্ধ্যাবেলা বসিয়া রবিবাবুর একটি কাব্য পাঠ করিতেছি  
এমন সময় সুনয়নী আসিয়া নিকটে এক মোড়া টানিয়া বসিল। আমি আড়চোখে তাহাকে দেখিয়া  
মনে মনে কিছু সন্তুষ্ট হইলাম। স্ত্রীলোকদিগের—বিশেষ করিয়া সংসারী স্ত্রীলোকদিগের স্বামীর  
সহিত বিশেষ কোনো প্রয়োজন কদাচিৎ দেখা দেয়। সর্বদা নৈকট্য ও বাক্যালাপ হেতু সুনয়নীর  
সহিত আমার নূতন করিয়া কোনো প্রয়োজন দেখা দেয় না। কিন্তু স্ত্রীলোকেরা স্বামীকে অনামনস্ক  
থাকিতে দিতে চায় না। কি জানি হয়তো ভাবে, স্বামী অনামনস্ক বা কর্মব্যস্ত থাকিলে তাহার উপর  
অধিকার কমিয়া যায়।

“সুনয়নী একটা এমব্রয়ডারি হাতে নিয়া কিছুক্ষণ সেলাই মকশো করিল। তারপর দাঁত দিয়া  
একটি সূতা কাটিয়া বলিল, বাব্বাঃ, যা কঠিন ডিজাইন !

“আমি ইহার জবাব দিলাম না।

“সুনয়নী উসখুস করিতে লাগিল। তারপর বলিল, শুনছি।

শুনছি।

একটা কথা।

বলো।

রাগ করবে না তো?

না।

একটা জিনিস শিখিয়ে দেবে?

কি জিনিস?

আমার খুব বন্দুক চালানো শিখতে ইচ্ছে করে।

“চমকিয়া উঠিলাম। এই নিবোধ স্ত্রীলোক বলে কি? বন্দুক চালনা শিখিবে! বলিলাম, মাথা খারাপ নাকি?

কেন, শিখতে নেই?

শিখে করবে কি?

সে আমি বুঝবো। বলো শেখাবে।

এ বুদ্ধি কে দিল তোমাকে?

কেউ দেয়নি। আমি শিখব।

“আমি হাসিতে লাগিলাম। স্ত্রীর সঙ্গে ঘনিষ্ঠতা না থাকিলেও সুনয়নীকে আমি চিনি। তাহার স্বভাবও আমার অজানা নয়। একে ধনীকন্যা বলিয়া আদরে লালিত পালিত হইয়াছে, জমিদার বাড়ির বধূ হইয়া আসিবার পর তাহার গায়ে আর হাওয়া লাগে নাই। বন্দুকের মতো হিংস্র জিনিস ইহার হাতে কল্পনা করিতেও কষ্ট হয়।

হাসছো যে!

হাসবার কথাই তো। তুমি শিখবে বন্দুক তাহলে সূর্য পশ্চিমে উঠবে।

কেন, এমন কি শক্ত কাজ? মেয়েরা পারে না?

মেয়েরা পারবে না কেন? কিন্তু তুমি তেমন মেয়ে নও।

শিখিয়েই দেখ না পারি কিনা!

তোমার কি শিকার করার শখ হয়েছে?

মা গো! আমি বাপু জীবজন্তু মারতে পারব না।

তাহলে শিখে কি করবে? বন্দুক জিনিসটা খুব ভাল নয়।

কেন বলো তো!

“আমি একটা দীর্ঘশ্বাস ছাড়িয়া কহিলাম, আমি দেখেছি বন্দুক হাতে নিলেই মনে একটা হিংস্রতা আসে। ছেলেবেলা থেকেই আমার এরকম হত। বড় হয়ে কিছুদিন খুব বন্দুক নিয়ে মাতামাতি করেছি। টিপও খারাপ ছিল না। কিন্তু মনটা কেমন কঠিন হয়ে যাচ্ছিল জীবজন্তু মারতে মারতে। তাই অস্ত্রটা আর ছুঁই না।

তুমি একটা অদ্ভুত মানুষ। বন্দুক হাতে নিলেই বুঝি কাউকে মারতে ইচ্ছে করবে আমার?

“আমি ইতস্তত করিতে লাগিলাম। হয়তো সুনয়নীকে বুঝাইয়া কহিতে পারিলাম না। আর বুঝিবার মতো বুদ্ধিও ইহার নাই। তাই কহিলাম, মেয়েদের অস্ত্রশিক্ষা শাস্ত্রে বারণ।

তোমাকে বলেছে! বারণ হবে তো মা দুর্গার দশ হাতে দশটা করে অস্ত্র থাকত না। মা কালীরও থাকত না।

বাঃ, বুদ্ধিটা তো বেশ খুলেছে দেখছি।

ঠাট্টা করতে হবে না। শেখাবে কিনা বলো।

“রাজি হইতে হইল। কারণ সুনয়নী ছাড়িবে না। তবে এ লইয়া দুই তরফে তর্কবিতর্ক কম হয় নাই। অবশেষে সুনয়নী কবুল করিল যে, বন্দুক চালাইবার প্রস্তাব তাহার মাথায় আসে নাই। আসিয়াছে আর একজনের মাথায়। তাহার প্ররোচনায় সুনয়নী নাচিয়া উঠিয়াছে।

“এই আর একজন সেই যুবতী। তাহার উল্লেখ মাত্র আমার ধমনীতে রক্তস্রোত কিছু উদ্দাম হইল। বুক গুরুগুরু রবে ডাকিয়া উঠিল। কোনদিন যে এই অবিমূষ্যকারী যুবতী আমার পাখির বাসা ভাঙিবার জন্য ঝড় তুলিবে! বন্দুক চালনা যে তাহার এক ছুতা তাহা বুঝিতে কষ্ট হইল না। এই ছুতায় সে আমার নিকট নৈকট্য অর্জন করিতে চাহিতেছে। চাই তো আমিও। কিন্তু তাহা উচিত কি?

“একদিন কাছারির পিছনের বাগানে বন্দুক শিক্ষার আয়োজন হইল। একটি টারগেট বোরড লাগাইয়া কিছু দূরে বন্দুক শিক্ষার্থীদের জন্য গদী পাতিয়া রীতিমত শয্যার ব্যবস্থা হইল। কানে গুঁজিবার তুলারও অভাব রাখা হয় নাই। আগের দিন বন্দুকগুলি আমি নিজে পরিষ্কার করিয়াছি।

“প্রথম দুইজনকেই বন্দুক বস্তুর সহিত প্রাথমিক পরিচয় করাইয়া দিলাম। সুনয়নীর মুখ তখন শুকাইয়াছে। বলিল, খুব আওয়াজ হয় নাকি?

“আমি বলিলাম, তা একটু হয়।

শুনেছি, বন্দুকের ঝুঁদো নাকি গুলি ছোঁড়ার সময় ঘোড়ার মতো লাথি মারে?

আমি হাসিয়া কহিলাম, তাহলে বায়না ধরেছিলে কেন? বন্দুক তাহলে তুলে রেখে দিতে বলি? না, না। শিখব যখন বলেছি ঠিকই শিখব।

“অনেক ধ্বস্তাধ্বস্তির পর সুনয়নী বন্দুক ছুঁড়িল বটে, কিন্তু “উঃ মাগো!” বলিয়া প্রায় মূর্ছা যাইবার উপক্রম। সেই যে সে পলাইল আর সেদিন এমুখো হইল না।

“ফলে বাগানে আমি ও সেই যুবতী রহিলাম।

“লক্ষ করিলাম বন্দুকের বিকট শব্দে সে বিশেষ ঘাবড়ায় নাই। চোখমুখ স্বাভাবিক। তবে ব্রীড়ার ভাবখানি আছে। আমি একটু হাসিয়া কহিলাম, তুমি কী করবে?

শিখব।

কেন শিখতে চাইছো বলো তো

তোমাকে বলব কেন

আমাকে বলবে না তো কাকে বলবে?

বললে তুমি বকবে?

বকার কী আছে?

তুমি তো বকতে ভালবাসো। সব সময়ে কেবল জ্যাঠামশাইয়ের মতো এমন গোমড়া মুখে থাকো যে, দেখলেই ভয় করে।

তুমি আমাকে বিশেষ ভয় পাও বলে তো মনে হয় না।

খুব পাই। তবে ভয় করলে আমার চলবে না বলে জোর করে তোমার সঙ্গে মিশি।

“মিশি’ কথাটা শুনিয়া আমার হাসি পাইল। পাগলী বলে কি? কহিলাম, ভয় করলে চলবে না কেন?

কারণটা কি জানো না?

“আমি ভয় পাইয়া চুপ করিলাম। কারণ ইতিপূর্বে সে নিজেকে আমার স্ত্রী বলিয়া দাবী করিয়াছে। কথাটা আপাতত একটু চাপা পড়িয়াছে। কিন্তু সুযোগ দিলেই আবার দাবী তুলিবে এবং স্ত্রীবুদ্ধিবশত সেই দাবী লইয়া কুরুক্ষেত্র করিতেও হয়তো পিছাইবে না। আমি তাড়াতাড়ি কহিলাম, আচ্ছা ঠিক আছে। বন্দুকটা হাতে নাও।

“যুবতী বন্দুক হাতে লইল। দৃপ্ত ভঙ্গিতে দাঁড়াইল। এবং আশ্চর্য, প্রথম বারেই চমৎকার ফায়ার করিল।

“কিন্তু কথা তাহা নহে। কথা হইল তাহার নৈকট্য, তাহার দেহগন্ধ, তাহার ভঙ্গিমা আমাকে এমন আন্দোলিত করিতেছিল যে, নিজের মধ্যে এক বেসামাল ভাব টের পাইলাম।

“বেশ কয়েকবার গুলি ছুঁড়িবার পর সে হাসিয়া আমাকে বলিল, দেখলে তো ! আমি তোমার বড় বউয়ের মতো নই।

“কী বলিব। বড় বউ কথাটার মধ্যে যে প্রচ্ছন্ন ইংগিত আছে—তাহা না বুঝিবার মতো নির্বোধ আমি নহি। কাজেই না-বুঝিবার ভান করিয়া অন্য প্রসঙ্গে গিয়া কহিলাম, তোমার হাত ভাল। আমি কিন্তু রোজ শিখব।

শেখে লোকে একদিনেই। তারপর প্র্যাকটিস করে। কাল থেকে বন্দুক এনে নিজে নিজে চালিও।

তার মানে তুমি থাকবে না। না ?

আমাকে তোমার আর কিসে দরকার ?

বন্দুকেরই বা দরকার কী ছিল ?

ছিল না ! অবাক হইয়া বলি, তাহলে শিখলে কেন ?

“যুবতী মিটি মিটি হাসিয়া সম্পূর্ণ বেহায়ার মতো বলিল, ক’দিন যাবৎ খুব বাড় হয়েছে তোমার, দেখাই দিতে চাইছি না। তাই অনেক ভেবে ভেবে এই বুদ্ধিটা বের করলাম। ভাললাম বন্দুক চালানো শিখবার ছল করে লোকটাকে কাছে পাওয়া যাবে। নইলে তো পুরুতের মেয়েকে পাস্তা দেবে না।

“যাহা হউক সুনয়নীর চেয়ে এই যুবতী যে অনেক সাহসী তাহা প্রমাণ হইল। শুধু তাহাই নহে। অনেক নারীর চেয়েই এই যুবতী বহুগুণে সাহসী ও উপস্থিত বুদ্ধির অধিকারিণী।

“আমার মনে হয়, মেয়েদের মধ্যে এইসব গুণই পুরুষ খোঁজে। রূপমুগ্ধতা বেশীদিন স্থায়ী হয় না। পুরুষ মানুষ নারীর উপর নির্ভর করিতে চায়, কিন্তু নির্ভরযোগ্য নারী বড়ই দুর্লভ। এই যুবতীর মধ্যে আমি এই দুর্লভ জিনিসটির সন্ধান ক্রমে ক্রমে পাইতেছি।

“কোথায় গিয়া আমরা ঠেকিব তাহা জানি না। কিন্তু আমার জীবনের সহিত এই যুবতীর নিগূঢ় সংযোগ আমি অনুভব করিতেছি। একটি চোরা স্রোত আসিয়া আমার জীবনে গোপনে যোগ হইতেছে।

“তুচ্ছ বন্দুকের ভিতর দিয়া আজ সত্যের আর একটি দিক উদ্ঘাটিত হইতেছে।”

ডায়েরীর পাতায় এই বিবরণ হেমকান্ত লিখেছিলেন বেশ কিছুদিন আগে। এই বিবরণ রঙ্গময়ী লুকিয়ে পড়েছে সুনয়নী মারা যাওয়ার পর। পড়ে কেঁদেছে।

আজ হেমকান্ত আর তার মধ্যে সুনয়নী নেই। কিন্তু দুস্তর বাধাও কিছু কম নয়। আছে প্রাপ্তবয়স্ক ছেলেমেয়ে, আছে সংসারের অলিখিত নিয়ম, আছে লোকলজ্জা।

রঙ্গময়ী সন্ধেবেলার দিকে হেমকান্তের ঘরে এল।

কেমন আছো এবেলা ?

হেমকান্ত মুখে উদ্বেগ মেখে বসেছিলেন। বললেন, রামকান্ত দারোগা এসেছিল জানো ?

আমি সব জানি। তোমাকে অত ভাবতে হবে না।

হবে না ! লোকটা কি বলে গেল জানো ?

জানি। যে তোমাকে ছোরা মেরেছিল সে ধরা পড়েছে।

তাকে নাকি আমি চিনি !

চেনা অস্বাভাবিক নয়। সেও তো এই শহরের লোক।



কিন্তু দারোগা বলছে ইচ্ছে করেই নাকি আমি তাকে চিনতে চাইছি না ।

দারোগার সব কথায় বিশ্বাস করতে নেই ।

হেমকান্ত চোখ বুজে বললেন, মাথাটা গুলিয়ে যাচ্ছে ।

যাওয়ারই কথা । কী ঠিক করলে ?

কিসের কী ঠিক করব ?

আমি তোমাকে বলেছি না এ জায়গা তোমাকে ছাড়তে হবে ।

হেমকান্ত মাথা নেড়ে বললেন, এখনই কি ?

খুব দেরীও করা চলবে না । পুলিশ, স্বদেশী সবাই পিছনে লাগবে ।

কেন যে আমারই এত অশান্তি ?

ঘাবড়াচ্ছে কেন ? অশান্তি কোনোকালে পোহাওনি বলেই ওকরম মনে হচ্ছে ।

আমার চিন্তা কৃষ্ণকে নিয়ে, তোমাকে নিয়ে । দারোগা আর কী বলে গেছে জানো না তো !

জানি না । তবে আন্দাজ করতে পারি । ঠাকুরদালানে তো আর বসে বসে শুধু মাছিই তাড়াই না ।

পুলিসের স্পাই কেন আসে তাও জানি ।

সবই যদি জানো তাহলে কিছু করছো না কেন ?

করতেই তো চাইছি । তুমি অন্য কোথাও গেলে সব খিতিয়ে পড়বে ।

একেই বলে ত্রী-বুদ্ধি । দারোগা কৃষ্ণর ওপর নজর রাখছে, তোমাকে সন্দেহ করছে । আমি অন্যত্র গেলে সে সমস্যা মিটবে কী করে ?

রঙ্গময়ী চারদিকে চেয়ে কেউ নেই দেখে হেমকান্তর কপালে একটু হাত বুলিয়ে দিয়ে বলল, ত্রী-বুদ্ধি তো কখনো নাওনি । নিলে ঠকতে না ।

হেমকান্ত উৎসুক ও উদ্বিগ্ন দুই চোখে রঙ্গময়ীর দিকে চেয়ে রইলেন কিছুক্ষণ । যেন তাঁর শূন্য হৃদয় একটা আশ্রয় খুঁজছে ।

একটু হেসে বললেন, তোমার বুদ্ধি নিই না বুঝি ! তাহলে চলছি কি করে ?

তাহলে বলো, চলে যাবে এখান থেকে !

যাবো । তবে একা নয় ।

তার মানে ?

যদি যাই তাহলে তোমাকে রেখে যাবো না ।

রঙ্গময়ী লজ্জায় রাঙা হয়ে বলে, আমাকে কোথায় নেবে ?

আমি যেখানে তুমিও সেখানে ।

রঙ্গময়ী কিছুক্ষণ অপলক চোখে হেমকান্তর দিকে চেয়ে থেকে বলে, তার মানে জানো ? মানে আবার কি ?

আমার মা বাবা ভাই বোন সংসার রয়েছে । তোমার সঙ্গে ওভাবে চলে গেলে এরা কেউ আর আমাকে আত্মীয় বলে স্বীকার করবে ?

ওরা তোমার কে মনু ? আমি ছাড়া তোমার আর কে আছে ?

রঙ্গময়ী একটা দীর্ঘশ্বাস ফেলল । হেমকান্তর কপালখানা স্নেহভরে ঝুঁয়ে থেকে বলল, ভগবান জানানেন তুমি ছাড়া আমার কেউ নেই । কিন্তু এতদিন বুঝি তুমিই সেটা জানতে না ।

জানতাম । তবে লোকলজ্জা ছিল, বাধা ছিল ।

সে আর সে । ধুব আর ধুব । না, ধুব আর একা নয় । কখনোই আর সে সম্পূর্ণ একা নয় । একজন ধুবকে সে চেনে । মোটামুটি স্বাভাবিক আচরণশীল, একটু ভাবুক, খানিকটা প্রথাবিরোধী, সামান্য উদাসীন । কিন্তু এই ধুবর মধ্যে ব্যাখ্যার অতীত কিছু নেই । কিন্তু গত রাতে ধারার ফ্ল্যাটে যে ধুব আচমকা বেরিয়ে এসেছিল তার ভিতর থেকে সে সম্পূর্ণ আলাদা । সে অচেনা । আগন্তুক । কৃষ্ণকান্ত অপসৃত হওয়ার পর ফাঁকা দরজাটার দিকে বেকুবের মতো তাকিয়ে দাঁড়িয়ে থাকতে থাকতে ধুবর এইসব মনে হল । একটু গা-শিরশির করছিল তার ।

আজ ধুব অনেকক্ষণ ঠাণ্ডা জলে স্নান করল । হ্যাং-ওভার কাটানোর সবচেয়ে সহজ উপায় ঠেসে খাওয়া । যতখানি সম্ভব আজ পেট পুরে খেয়ে নিল ধুব । অনেকটা স্বাভাবিক বোধ করতে লাগল সে ।

নার্সিং হোম-এ যাবে বলে তৈরি হয়ে বসে ছিল সে । এমন সময় চাকর এসে খবর দিল, আপনার টেলিফোন ।

ফোন ধরতেই ধারার গলা পাওয়া গেল, ধুব ?

একটু কুষ্ঠার সঙ্গে ধুব বলে, হ্যাঁ ।

তুমি কেমন আছো ?

ধুব অবাক হয়ে বলে, তার মানে ?

আমি জানতে চাই তুমি কেমন আছো ।

আমার কি খারাপ থাকার কথা ?

আমি কাল সারা রাত তোমাকে নিয়ে খারাপ সব স্বপ্ন দেখেছি । বলো না কেমন আছো !

ভালই আছি তো !

ধারা একটা দীর্ঘশ্বাস ছাড়ল । তারপর বলল, তুমি আমার একটা কথা বিশ্বাস করবে ?

কী কথা ?

আই অ্যাম রিয়েলি সরি !

ধুবর একটু ওলট-পালট লাগছিল ব্যাপারটা । কাল রাতে যা ঘটে গেছে তাতে ধারার দুঃখ পাওয়ার কিছু নেই । দুঃখিত হওয়ার কথা তো তার ।

ধুব বলল, সরি ফর হোয়াট ?

আমি পুলিশে খবর দিয়েছিলাম ।

ধুব একটু হাসল, বলল, তাই নাকি ?

হ্যাঁ । আজ সকালে উঠে তাই ভীষণ খারাপ লাগছে ।

খবর দিয়ে তো ঠিক কাজই করেছো ।

পুলিশকে কী বলেছি জানো ?

কী করে জানব ?

বলেছি, হি ট্রায়েড টু মার্ডার মি ।

কথাটা কি মিথ্যে ?

যাঃ ! কী যে বলো ! আজ সকালে আমার মাথা পরিষ্কার হয়ে গেছে । কাল আমি ভীষণ বোকার মতো কাজ করেছি ।

কেন, বোকার মতো কেন ?

আমি তো জানতাম তোমার ভিতরে একজন স্যাডিস্ট আছে । যাকে তুমি ভালবাসো বা পছন্দ করো তাকে কষ্ট দিয়ে আনন্দ পাও । আজ সারাদিন ধরে এসব ভেবেছি আর হেসেছি । কাল রাতে

যে কী ছেলেমানুষী কাণ্ড করেছে। আচ্ছা, পুলিশ তোমার কাছে যায়নি ?

ধুব মৃদু একটু হাসল। বলল, না। তবে কাল রাতেই সপ্ট লেক-এর রাস্তায় আমি পুলিশের হাতে ধরা পড়েছিলাম।

সত্যি ?

তারা আমাকে একরকম গ্রেফতারও করেছিল।

তারপর ?

তুমি তাদের কাছে যে স্টেটমেন্ট দিয়েছিলে তার কথাও শুনেছি।

পুলিশগুলো ভীষণ অসভ্য, জানো ?

কেন, কী করেছে ?

এমন ছৌক ছৌক করে তাকাচ্ছিল। আর কেবল ব্যক্তিগত প্রশ্ন। ক'বার বিয়ে করেছে, কী করে চলে, কারা কারা ফ্ল্যাটে আসে। আশ্চর্য কী জানো, তোমার সম্পর্কে কোনো প্রশ্নই করছিল না।

তাই নাকি ?

কেন বলো তো !

ওরা যে আমাকে চেনে।

তাই মনে হচ্ছিল। যে লোকটা আমার ফ্ল্যাটে এসেছিল সে বার বার বলছিল, কী করে বুঝলেন যে উনি আপনাকে খুন করতেই চেয়েছিলেন। আমি বললাম, বাঃ, আমার গলা টিপে ধরেছিল যে। তখন কী বলল জানো ?

কী বলল ?

বলল, গলায় আঙুলের দাগ তো দেখছি না ! আমি তখন ওকে দাগ দেখালাম। তখন বলল, এ তো আপনি নিজেই নিজের গলা চেপে ধরে তৈরি করে থাকতে পারেন ! বোঝো কাণ্ড ! সদানন্দর কথা ভেবে ধুব আপনমনে হাসছিল। বলল, তুমি বোধহয় কাল রাতে আমাকে ফাঁসিতে ঝোলানোর জন্য উঠেপড়ে লেগেছিলে !

ফোনে ধারার একটু উচ্ছ্বসিত হাসি শোনা গেল, বললাম তো কাল রাতে আমার মাথাটা ভারী বোকা-বোকা ছিল। একটুও বুদ্ধি খেলছিল না।

আজ খেলছে তো !

আজ বুদ্ধিও খেলছে আর লজ্জাও লাগছে।

ফ্ল্যাটের সবাই বোধহয় ঘটনাটা জেনে গেছে !

ভারী লাজুক গলায় ধারা বলে, কী করব বলো ! বললাম যে, কাল রাতে ভারী বোকার মতো কাণ্ড করেছে সব। পাশের ফ্ল্যাটে টেলিফোন করতে গিয়েছিলাম। তাইতেই জানাজানি হয়ে গেল কিছুটা।

এরপর আর তোমার ওখানে যাওয়াটা নিরাপদ রইল না ধারা। দেখলেই সবাই ধরে ঠাণ্ডাবে।

না, না। এরা কেউ সেরকম নয়। কেউ কারো ব্যাপারে নাক গলায় না।

ভাল।

পুলিশ তোমাকে অ্যারেস্ট করে কী করল বললে না তো !

কী আবার করবে ! বাড়ি পৌঁছে দিয়ে গেল। বলল, ওরা তোমাকে বুঝিয়ে দেবে যে, গলা টেপার ব্যাপারটা ছিল নিছক রসিকতা। তার বেশি কিছু নয়।

তাই বলল ! ও মা !

ধুব একটু হেসে বলে, আমার বাবার কথা ভুলে যাচ্ছে কেন ধারা ? জানো না হি ওয়াজ এ মিনিষ্টার ? তোমাকে খুন করলেও আমার কিছু হত না।

হত না ?

একেবারে রেড হ্যাণ্ডেড ধরলে বা আই উইটনেস থাকলে একটু ঝামেলা হত ঠিকই। কিন্তু তা নইলে কিছুই হত না।

আর এদিকে আমি ভেবে ভেবে মরছি যে, ধুবকে পুলিশ বোধহয় হ্যারাস করে মারছে। না। বরং কাল তারা আমার অশেষ উপকার করেছে। সন্ট লেকের মরুভূমি থেকে জীপ-এ করে পৌঁছে দিয়ে গেছে।

বাঁচলাম। ওরা ঠিক কাজই করেছে।

তুমি কেমন আছো ধারা ?

ভালই তো।

আজ অফিসে যাওনি ?

না। শরীরটা ভাল নেই। গলায় ব্যথা।

খুব ব্যথা ?

তেমন কিছু নয়। ডাক্তার দেখিয়েছি। হয়তো একটা কলার নিতে হবে।

আই অ্যাম সরি।

সরি ? যাক, তোমার মুখ থেকে যে কথাটা বেরিয়েছে সেই আমার ভাগ্য। তবে সরি হওয়ার দরকার নেই

কেন ?

আই অ্যাম এনজয়িং দা পেইন।

বটে ! ব্যথা কেউ এনজয় করে ?

আমি তো করছি। ব্যথাটা যেন তুমিই। সারাক্ষণ সঙ্গে আছো। ভাল লাগছে ধুব, বিশ্বাস করো। করলাম। আজকাল পাগলের সংখ্যা খুব বেড়ে যাচ্ছে।

আমি একাই পাগল ? তুমি নও ?

আমিও বোধহয়। কিন্তু আমি আমার সম্ভাব্য হত্যাকারীর সঙ্গে তোমার মতো এরকম আকুলতা নিয়ে কথা বলতে পারতাম না। এ যে এক গালে মারলে আর এক গাল পেতে দেওয়ার চেয়েও মারাত্মক মনোভাব !

ইয়ার্কি কোরো না। আজ একবার আসবে ?

আজ ! কী যে বলো ! আজ আসতে আমার লজ্জা করবে না ?

প্রীজ !

কেন ?

কি জানি ! আজই তোমাকে দেখার জন্য পাগল-পাগল লাগছে। কোনো কাজ নেই তো ! একটু আছে।

ওঃ সরি। তোমার বউ যে নার্সিং হোমে তা একদম খেয়াল ছিল না। কেমন আছে রেমি ? খবর পেয়েছি ভালই।

আর বাচ্চাটা ?

সেও ভাল।

তাহলে আসতে পারবে ? কাল খেতে চেয়েছিলে। খাওনি। আজ এসো, খাওয়াবো।

তুমি নিজেই তো এক খাদ্য। অন্য খাবার লাগবে না।

আমি খাদ্য না অখাদ্য তা তো কখনো চেখে দেখনি। বুঝবে কী করে ব্রহ্মচারীমশাই ?

আজ থাক ধারা। আর একদিন হবে।

কেন সংকোচ করছ ? কালকের ঘটনায় তোমার চেয়ে আমার লজ্জা ঢের বেশি। বিশ্বাস করো।

তুমি প্রলাপ বকছো কিনা জানি না। কিন্তু যদি সত্যিই তোমার এরকম অদ্ভুত ইচ্ছে হয়ে থাকে

তবে শিগগির একদিন যাবো । কিন্তু আজ নয় । আজ আমার ধুবর সঙ্গে একটু বোঝাপড়া আছে ।

কর সঙ্গে ?

ধুব অর্থাৎ নিজের সঙ্গেই ।

কী যে সব অদ্ভুত কথা বলো না !

কাল রাতে আমার ভিতর থেকে যে অদ্ভুত লোকটা বেরিয়ে এসেছিল তার সঙ্গে আগে আর কখনো দেখা হয়নি । তাকে দেখার পর থেকেই আমার একটা প্রবলেম শুরু হয়েছে । ওই যে কী একটা সিনেমা আছে না ক্র্যামার ভারসাস ক্র্যামার ! এ অনেকটা তাই । ধুব ভারসাস ধুব একটা খিচান চলছে ।

আমি একটা কথা বলব ধুব ?

বলো না ।

লোকটা তোমার অচেনা হলেও আমার অচেনা নয় । তাকে আমি বছবার বহু অকেশনে দেখেছি ।

বটে ! তাহলে সাবধান করোনি কেন ?

তুমি স্যাডিস্ট, সাবধান করে কী হবে ? আর ওই স্যাডিজমই তোমার অ্যাট্রাকশন । তুমি তো বর্বর নও, একটু নিষ্ঠুর মাত্র ।

খুব পোয়েটিক্যাল ডায়ালগ দিচ্ছে যে !

আজ যেন কেমন একটা লাগছে গো । এসো না, খুব মজা করবো দুজনে ।

মজা আজ জমবে না ধারা । দুজনে মজা হয়, কিন্তু তিনজনে মজা হয় না । তৃতীয় লোকটা বাগড়া দেবে ।

তিনজন আবার কে ?

তুমি, আমি আর ধুব !

ফের সেই হেয়ালী !

হেয়ালী নয় । তুমি বুঝবে না ।

তাহলে সারাদিন বই পড়ে কাটাতে হবে আজ ?

বই পড়ো, গান শোনো, রাঁধো, খাও । যা খুশি করো । সময় কেটে যাবে ঠিক ।

ধুব ফোন নামিয়ে রাখল ।

জগা খুব কাছ থেকে আচমকা জিজ্ঞেস করলো, কে বলো তো মেয়েটা !

ধুব একটু চমকে গিয়েছিল । জগাকে দেখে হুঁচকে বলল, তোমার সে খবরে কী দরকার ?

জগার মুখে হাসি বা অমায়িক ভাব নেই । একটা হিংস্রতাই আছে বরং । বলল, দরকার একটু আছে । আজ যখন তুমি ঘরে ঘুমোচ্ছিলে তখন খুব সকালে কতাবাবুর কাছে পুলিশ ফোন করেছিল ।

ধুব একটু অবাক হয় । পুলিশের তো ফোন করার কথা নয় । সদানন্দ বলেছিল কেসটা ডিসমিস হয়ে গেছে । সে জিজ্ঞেস করে, কী বলল পুলিশ ?

তুমি স্পট লেক-এ একটা মেয়ের ফ্ল্যাটে কাল নাকি হুজ্জাতি করেছো ! সত্যি নাকি ? করে থাকলে কী ?

খুব গুণধর ছেলে হয়েছে তাহলে ! অ্যাঁ ! আর যে দোষই থাক এ দোষটা তোমার ছিল না কখনো । এখন এটাও অভ্যাস করলে ?

ধুবর রাগ হল না । জগার ওপর রাগ করে লাভও নেই । এক সময়ে এবং এখনো জগা কৃষ্ণকান্তর ডান হাত ছিল বা আছে । যত লাঠিবাজি বা গা-জোয়ারির ব্যাপার আছে তাতে জগাই নেতৃত্ব দেয় । শরীরে অসীম ক্ষমতা, মনে অগাধ সাহস, প্রভুভক্তি তুলনাহীন । শুধু তাই নয়, প্রভুর

পরিবারভুক্ত সকলকেই সে আত্মীয়সমান জ্ঞান করে। সেই বোধ থেকেই সে কৃষ্ণকান্তর ছেলেমেয়েকে প্রয়োজনে শাসন বা ভীষন করতে পিছপা হয়নি। ধুব জানে জগার ওপর কর্তৃত্ব ফলিয়ে লাভ নেই, সে তাকে পরোয়া করে না। ধুব তাই জগার চোখের দিকে গভীর ভাবে কিছুক্ষণ চেয়ে থেকে বলল, করলাম না হয়।

ওসব না হয় টাইয় ছাড়ো। সত্যি কথাটা কী ?

ওটাই সত্যি কথা। মেয়েটির ফ্যাটে আমি যাই।

কর্তাবাবু আজ চোখের জল ফেলেছেন তা জানো ? শত দুঃখ পেলেও আমরা তাঁর চোখে জল দেখিনি কখনো।

কাদলেন নাকি ?

কাদবারই কথা। ফোন যখন ধরেন তখন আমি সামনে ছিলাম। ফোনটা নামিয়ে রেখে অনেকক্ষণ দু হাতে মুখ ঢেকে বসেছিলেন। তখন আমি জল গড়াতে দেখেছি।

ব্যাপারটা এমন কিছু নয় যে কাদতে হবে।

তুমি সদ্য বাবা হয়েছো। এখনই ঠিক বুঝবে না। তবে পরে বুঝবে বাপ হলে কেমন লাগে বুকের ভিতরটা।

ধুব চূপচাপ দাঁড়িয়ে রইল। কিছু বলল না

জগাও একটু চূপ করে থেকে হঠাৎ চাপা স্বরে জিজ্ঞেস করে, কী হয়েছিল কাল ওখানে ? তেমন কিছু নয়।

মেয়েটাকে তুমি মারধর করেছিলে ? নাহলে পুলিশ জানল কী করে ?

একটু ঝগড়া হয়েছিল।

ঝগড়া নয়, তার চেয়ে বেশি কিছু। যদি বলো তাহলে গিয়ে সাফ করে দিয়ে আসতে পারি।

ধুব একটু চমকে উঠে বলে, না না। ওসব কে বলেছে ?

জগা চূপ করে থাকে কিছুক্ষণ। তারপর চাপা গলাতেই বলে, যদি মেয়েমানুষের কাছে যেতেই হয় তো যাবে। পুরুষ মানুষের একজনকে নিয়ে চলে না। কিন্তু সেটা একটু বুদ্ধি খাটিয়ে যেতে হয়। তুমি হুজ্জতি করে বেড়াও কেন ? মাল খেয়ে সারা শহরে জানান দিয়ে বেড়াচ্ছ, মেয়েমানুষ নিয়ে হৈ-চৈ ফেলে দিচ্ছে। তুমি ওরকম কেন ?

তবে কিরকম হতে হবে ?

যে রকম হলে লাঠিও ভাঙে না আবার সাপও মরে ! তোমার তো অত বুদ্ধি আর এই সামান্য ব্যাপারটা বোঝো না ?

ধুব একটা হতাশার শ্বাস ছাড়ল।

জগা বলল, মেয়েটা কে ?

মেয়েটাকে ভুলে যাও জগাদা।

ভুলব কেন ? একটু কড়কে দেবো।

কড়কানোর দরকার নেই।

আছে। জাতসাপের লেজ দিয়ে কান চুলকানো যে ভাল নয় সেটা তাকে বুঝিয়ে দেবো।

ও কিছু করেনি।

আর কিছু না করুক পুলিশের কাছে তোমার নামে নালিশ করেছে। লোক জানাজানি হয়েছে। সেটা কি কম ? তুমি তো জানোই কর্তাবাবু পলিটিক্যাল লিডার। তার ছেলেকে নিয়ে বদনাম রটলে ভোটের ক্ষতি হয় না ? ইমেজ নষ্ট হয়ে যায় না ?

এসব কথা জগা শিখেছে দীর্ঘকাল কৃষ্ণকান্তর সঙ্গ করে করে। ধুব জানে, জগার মাথায় একমাত্র কৃষ্ণকান্তর ইমেজ রক্ষা ছাড়া অন্য চিন্তা নেই। কৃষ্ণকান্তর ইমেজ রক্ষা করতে গিয়ে সে একাধাটা

লাশও নামিয়ে দিয়েছে। ধুব জগার দিকে আবার অসহায়ভাবে খানিকক্ষণ চেয়ে থেকে বলে, ওঁকে আমিই সাবধান করে দেবো।

দিলে ভাল। মেয়েছেলের গণ্ডগোলে আমি নাক গলাতে চাই না। তবে বেশি বেগড়বাই দেখলে আমাকে বোলো। এখন চলো, নার্সিং হোম-এ যাবে তো!

ধুব আবার বড় একটা শ্বাস ফেলে বলে, হুঁ।

রেমির জ্ঞান ছিল না। অপারেশনের পর এখনো অ্যানাস্থেশিয়ার ঘোর কাটেনি। তাছাড়া অপরিণীম দুর্বলতা তো আছেই। নাকে নল, হাতে ঝুঁচ নিয়ে বিছানার সঙ্গে মিশে আছে সে।

ধুব মুখের দিকে চেয়ে ছিল। নার্স রেমিকে ডাকল, শুনুন! এই যে মিসেস চৌধুরি দেখুন কে এসেছে! আপনার হাজবাণ্ড।

রেমি শুধু “উঁ, উঁ” বলল বার দুয়েক। একবার দুটি চোখের পাতা একটু কাঁপল।

খুব কষ্ট হচ্ছে ভেবে ধুব বলল, থাক থাক।

নার্স বলে, ভিতরে কনশাসনেস আছে।

কেমন আছে ও?

ভাল। এখন অনেক ভাল। শুধু ইউরিনে এখনো ব্লাড আসছে।

সেটা কি খারাপ লক্ষণ?

একটু ডেনজার আছে এখনো। বিকেলে একজন ইউরোলজিস্ট এসে দেখবেন।

ধুব ডাক্তারি শাস্ত্রের কিছুই জানে না। তাই শুধু মাথা নাড়ল।

ছেলেকে দেখবেন না?

ছেলে! ধুব যেন ঠিক বিশ্বাস করছে না এমনভাবে বলল।

দাঁড়ান, আয়াকে বলছি নিয়ে আসতে।

থাকগে।

থাকবে কেন? বাবা হয়েছেন, দেখুন। খুব সুন্দর বাচ্চা।

ধুব আর জগা গাড়লের মতো পরস্পর দৃষ্টি বিনিময় করে দাঁড়িয়ে থাকে।

আয়া একটা বাচ্চাকে নিয়ে আসে। ন্যাকড়াই জড়ানো একটুখানি রাঙা একটা ইঁদুরছানা। হাতে নম্বরের টিকিট বাঁধা।

ধুব নিম্পৃহ চোখে দেখল।

জগা বলল, চৌধুরি বাড়ির ছেলে দেখলেই চেনা যায়।

কি করে চিনলে?

রং দেখছো না? হাড়ের কাঠামোটাও দেখ। কত বড় হয়েছে দেখেছো? সাড়ে আট পাউণ্ড।

ধুব বিশেষ উৎসাহ বোধ করল না এই সংবাদে। সে জানে এ বাচ্চা সে সৃষ্টি করেনি। তার ভিতর দিয়ে সৃষ্ট হয়েছে মাত্র। মানুষ একটা সূত্র ধরে জন্মায়। সে এই শিশুর জন্মের কারণ, স্রষ্টা নয়। সে এর রক্ষণাবেক্ষণকারী, কিন্তু নিয়ন্তা নয়। যেমন কৃষকান্ত নন ধুবর নিয়ন্তা। কিন্তু কৃষকান্ত এ তত্ত্ব কি কোনোদিন বুঝবেন?

“প্রদোষের আলো নান হইয়া আসিয়াছে। আমার ঘরখানিতে কিছু ভৌতিক ছায়া ঘনাইয়া উঠিতেছে। এইসব ছায়া আমার পরিচিত। আমি একা মানুষ বলিয়া এবং একাকী থাকিতে পছন্দ করি বলিয়া নিজের পারিপার্শ্বিককে বড় বেশী অনুভব করি। এইসব ছায়াদের সহিত আমার পরিচয়

বহুকালের। কখনো এমন হইয়াছে যে, আমি নির্জনতায় একাকী আমার চারিদিকের ছায়াগুলির মধ্যে একপ্রকার নীরব বাস্তবতা লক্ষ্য করিয়াছি। ইহারা যেন কিছু বলিতেছে, কিছু প্রকাশ করিতে চাহিতেছে।

“কিন্তু কী বলিবে? ছায়া রাজ্যের কোন গোপন বার্তা ইহারা আমাকে শুনাইতে চাহে? এক একদিন আমি এইসব ছায়ার সহিত কিছু ক্রীড়ায় মতিয়া উঠি। দেবাজের উপর হইতে সেজবাতিটি সরাইয়া আলমারির মাথায় স্থাপন করি। কখনো বা জানালার তাকের উপর রাখি। এইরূপে ছায়াগুলির রূপান্তর ঘটে, নকশা পাণ্টাইয়া যায়। কখনো বা আমি ছায়াগুলির সহিত কথা কহিবার চেষ্টা করি। কিন্তু ছায়া অলীক, তাহার সত্তা নাই। বস্তু ও আলোর পারস্পরিক অবস্থানের উপর নির্ভরশীল এক প্রতিক্রিয়া মাত্র। এই সত্য জানিয়াও মাঝে মাঝে ওইসব ছায়ার ভিতর আমি পরপারের অস্পষ্ট দর্শন পাইয়া যাই।

“আজও প্রদোষের আলো স্নানতর হইল। ঘরে এখনো আলো দিয়া যায় নাই। শিয়রে স্নানমুখী সেই কিশোরী বসিয়া আছে। আজ সে আর কিশোরী নহে। বয়সের হিসাবে সে প্রবীণাই বোধহয়। ত্রিশ ছুইয়া তাহার সতেজ শরীরটা যেন তপোক্রিষ্টা উমার মতো। এই বয়সে গৃহবধূরা পুত্রকন্যার জননী এবং ঘোর সংসারী। এই যুবতী অনুভূত বলিয়াই বোধহয় সংসারের নানাবিধ গ্লানি ইহাকে স্পর্শ করে নাই। আমার বিশ্বাস, বিবাহ হইলেও ইহার অন্তর অমলিন থাকিত।

“আজ প্রদোষের এই ক্ষীণ আলোয় ইহার মুখের প্রতি চাহিয়া মনে হইল, আমার হৃদয় কতকাল যাবৎ চাতকের মতো তৃষ্ণার্ত ও উর্ধ্বমুখ হইয়া আছে। সুনয়নী আমাকে সম্মান দিয়াছে, সংসার দিয়াছে। আমার দাম্পত্য জীবন বিন্দুমাত্র অসুখের ছিল না। তবু তাহাই সবটুকু নহে। কী যেন অসম্পূর্ণ ছিল। আজ আমার প্রিয় ছায়াগুলির মধ্যে সেও এক অস্পষ্ট রহস্য মাখিয়া আসিয়া দাঁড়াইয়াছে। রক্তমাংসের অতীত এক শাশ্বত মানবী। পুরুষকে পরিপূর্ণ করিবার অমৃত ভাণ্ডটি তাহার হাতে।

“যে নির্লজ্জ প্রস্তাব তাহার নিকট করিলাম স্বাভাবিক নিয়মে আমার ন্যায় সম্মুখিত রসনার মানুষের পক্ষে তাহা সম্ভব ছিল না। কিন্তু ঘরের ছায়াগুলি—সত্তাহীন অলীক ওই ছায়াগুলি কী এক পরিমণ্ডল রচনা করিয়া দিল। আমার মনে হইল যাহা চাই তাহা আজ এই মুহূর্তে মুখ ফুটিয়া চাহিয়া না লইলে চিরকাল, এমন কি পরজন্মেও আক্ষেপে মাথা কুটিয়া মরিতে হইবে। তৃষ্ণা মিটিবে না।

“সে লজ্জায় অধোবদন হইল। কিন্তু জানি, এই প্রস্তাব তাহার কর্ণে বংশীধ্বনির মতো শুনাইল। সে আর সেই কিশোরী নহে। চঞ্চলমতী, দুঃসাহসী, লজ্জাহীনা সেই কিশোরী প্রতিনিয়ত যেন উপচাইয়া পড়িত। আজ এই যুবতী কিন্তু নিজেকে দুই কুলের মধ্যে বাঁধিয়াছে। তাহার উদ্ভাস নাই, গভীরতা আছে। দুঃসাহস প্রকাশ পাইতেছে প্রগাঢ় দায়িত্বজ্ঞানে। নির্লজ্জতা ঢাকিয়াছে অন্তঃশীলা স্নেহের শ্রোত। ইহাকে আমি কোনোদিনই কামনা করি নাই, তবে চাহিয়াছি। আজ আমি যে বয়স ও যে মানসিকতায় উদ্ভীর্ণ হইয়াছি তাহাতে দেহগত কামনা আমাকে পীড়া দেয় না। কোনোকালেই দিত না। তাই এই যুবতী যখন কিশোরী ও প্রগল্ভা ছিল তখনো আমি ইহাকে কামনা করি নাই।

“সে বলিল, আমরা কি পারব?

কি পারার কথা বলছো?

সব ছেড়ে চলে যেতে হবে, তা জানো?

কেন, সব ছেড়ে যাবো কেন?

তোমার ছেলে-মেয়েরা বড় হয়েছে। তারা সব সম্মানের মা-বাবা।

সে সব জানি।

আমার বাড়ি থেকেও কথা উঠবে।

কেন উঠবে?



দশ বছর আগে হলে উঠত না এখন উঠবে।

“আমি হাসিয়া কহিলাম, আমাদের এখন এসব ভাববার মতো সময় নেই। সময় জিনিসটা ভারী অদ্ভুত। কখন যে মানুষ যুবক অবস্থা থেকে টক করে বুড়োর দলে চলে যায় তা টেরই পাওয়া যায় না।

“সে চোখ পাকাইয়া কহিল, তুমি কি বুড়ো ?

“আমি একটু ভাবিয়া কহিলাম, নিজেকে বুড়ো ভাবার বাতিক আমার কেটে গেছে। বয়স নিয়ে বেশী ভাবি না। কিন্তু এটাও ঠিক, সময় জিনিসটাকে খেয়াল রাখতে হয়।

আচ্ছা মানলাম। কিন্তু ধরো যদি আমাদের এক হতেই হয় তাহলে তার আগে কতগুলো কাজ সেরে নিতে হবে না ? ছট করেই কি এ বয়সে বিয়ের পিড়িতে বসা যায় ?

আমাদের আবার বকেয়া কাজ বাকি কী ?

পুরুষমানুষের যদি কখনো কিছু খেয়াল থাকে। তোমার বিয়ের যুগিয়া মেয়ে ঘরে রয়েছে, নাবালক ছেলে। এদের ব্যবস্থা করতে হবে না ?

“আমি হাল ছাড়িয়া কহিলাম, তবেই হয়েছে। ওসব করতে গেলে কত সময় বয়ে যাবে।

যাবে যাক। এতদিন যখন অহল্যার মতো অপেক্ষা করতে পেরেছি আর কিছুদিনও পারব। বিশাখার বিয়েটা হোক, তুমি কন্যাদায় থেকে মুক্ত হও, তারপর সব।

নাবালক পুত্রকে নিয়ে কী বলছিলে ?

কিছু বলছিলাম না। ভাবছিলাম। তোমাকেও ভাবতে বলি।

কৃষ্ণকে নিয়ে তো কোনো ঝামেলা নেই। ভাবব আবার কী ?

“সে মাথা নাড়িয়া কহিল, ভাববার আছে বৈকি। কৃষ্ণ তো আর পাঁচটা ছেলের মতো নয়। ওর বুদ্ধি বেশী, তেজ বেশী। ও যদি আমাদের এই বুড়ো বয়সের বিয়েকে না মানে তবে আমি বড় ঞ্জাশি পাবো। ও আমার ছেলেই। আর ছেলে বলেই দৃষ্টিস্তা।

“আমি একটু স্থিগায় পড়িলাম। বাস্তবিক কৃষ্ণ শুধু বুদ্ধিমান নহে, প্রবল রকম তেজস্বীও। সে আমার পুত্র এবং তাহার সহিত আমার বয়সের প্রচুর ব্যবধান থাকা সত্ত্বেও আমি তাহাকে কি করিয়া যেন শ্রদ্ধা করিতে শুরু করিয়াছি। এই শ্রদ্ধাবোধের পিছনে যথেষ্ট কারণও বিদ্যমান। পুরুষমানুষের সর্বশ্রেষ্ঠ গুণ ব্যক্তিত্ব। বুদ্ধি, মেধা, অন্যান্য সাফল্যের চেষ্টাও ব্যক্তিত্ব অনেক বেশী গুরুত্বপূর্ণ। ব্যক্তিত্ববান তাহাকেই বলা যায়, যে ঘৃণাকে ঘৃণা, সুন্দরকে আলিঙ্গন, শুভকে অভিনন্দন জানাইতে কুণ্ঠিত হয় না। যে লক্ষ লোকের বিরুদ্ধতা সত্ত্বেও সত্যকে সত্য বলিয়া ঘোষণা করিতে ভীত হয় না। সৌভাগ্যক্রমে আমি তেমনই ব্যক্তিত্ববান একটি পুত্র লাভ করিয়াছি। বয়ঃপ্রাপ্ত হইলে সে কিরূপ হইবে তাহা আগাম বলিতে পারি না। কিন্তু এই বাল্যকালে, জীবনের উষ্মালয়ে তাহার চরিত্রের যে গঠন লক্ষ করিতেছি তাহা যেমন আশাপ্রদ তেমনই আনন্দদায়ক।

“কাজেই কৃষ্ণকে লইয়া ভাবিতে হইবে বৈকি। সে মুখে কিছুই হয়তো বলিবে না। তাহার ভদ্রতাবোধ উদাহরণযোগ্য। সে বিনয়ী এবং নম্র। কিন্তু তাহার অভ্যন্তরে ইস্পাত-কঠিন এক দৃঢ়তাও আছে। আজ এই বয়সে যদি আমি পুনরায় বিবাহ করি তাহা হইলে তাহার মনোভাব কী হইবে সেটাই ভাবনার বিষয়। মনে হইতেছে, একমাত্র তাহার প্রতিক্রিয়া ছাড়া আর কাহারও প্রতিক্রিয়া বা মতামত লইয়া মাথা ঘামাইবার কিছুই নাই।

“সে বলিল, কী ভাবছো ?

কৃষ্ণের কথা। তুমি ঠিকই বলেছো, কৃষ্ণকে নিয়েই ভাবনা।

“সে একটা দীর্ঘশ্বাস ফেলিয়া বলিল, আমি ওকে সব বলব।

“আমি বিস্মিত হইয়া কহিলাম, বলবে ! কৃষ্ণকে এসব বলবে কেন ?

বলা উচিত। কিন্তু তুমি ভেবো না। আমি বুঝিয়ে বলব।

“আমি কিছুক্ষণ স্তব্ধ থাকিয়া বলিলাম, তোমার বুদ্ধির ওপর আমার আস্থা আছে । তুমি যা করবে ভেবেই করবে জানি ।

ভেবেই করব । কৃষ্ণ অবিবেচক নয় ।

বিশাখার বিয়ের ব্যাপারে একটু রাজেনবাবুকে খবর দেবে  
রাজেনবাবু তো কালও তোমাকে দেখতে এসেছিলেন !

না না, দেখতে এলে আলাদা রকম আসা । তখন বিয়ের প্রস্তাব দেওয়া ঠিক নয় । প্রস্তাব দিতে  
হলে আলাদাভাবে আমন্ত্রণ করে আনা উচিত । আমি বরং একটা চিঠি লিখে পাঠাচ্ছি ।

তাই ভাল ।

শচীন কি আসে-টাসে ? ওকে ক’দিন দেখছি না ।

বড় বউমা আসার পর থেকে আসছে না । বোধহয় লজ্জায় ।

“আমি হাসিলাম । লজ্জা হওয়ারই কথা । কহিলাম, কাগজ আর দোয়াত কলম আনো । চিঠিটা  
লিখে ফেলি ।

“চিঠির মুসাবিদা করিয়া আজ বুকের ভার হালকা হইল । কন্যার বিবাহ হইবে, পিতা হিসাবে  
দায়মুক্ত হইব । আনন্দেরই কথা । কিন্তু মনে হইতেছে এই পত্রের মুসাবিদা করিয়া যেন আমি আমার  
জীবনেরই একটি রুদ্ধদ্বারকে অর্গলমুক্ত করিবার চেষ্টা করিতেছি । আমি কি স্বার্থপর ?

“চিঠিখানা তাহার হাতে দিয়া একটু হাসিলাম । তপ্তির হাসি । জানি চিঠি পাইয়া রাজেনবাবু  
আসিবেন । তারপর কী হইবে তাহা জানি না । আমার ঈশ্বরে বিশ্বাস পোক্ত হইলে হয়তো বলিতাম,  
সবই মঙ্গলময়ের ইচ্ছা । কিন্তু আমি নিশ্চেষ্ট ও কর্মকুষ্ঠ হইলেও অদৃষ্টবাদী নহি । তাই সকল বিষয়ে  
ঈশ্বরের বা অদৃষ্টকে বরাত দিয়া বসি না ।

“সে আমার মাথার উপর স্নিগ্ধ হাতখানা ক্ষণিকের জন্য রাখিল । তারপর দ্রুত পায়ে চলিয়া  
গেল ।

“আজ উঠিয়া বসিতে পারিতেছি । তেমন দুর্বলতাও বোধ করিতেছি না । আজ সচ্চিদানন্দকে  
একটি পত্র লিখিলে কেমন হয় ? জীবনে কোনো এমন মানুষ পাই নাই যাহাকে সব কথা খুলিয়া বলা  
যায় । সচ্চিদানন্দও যে সেরূপ মানুষ তাহা নহে । তবে সে আমার আবাল্য সূর্যদ এবং বিশ্বস্ত । সে  
আমার যতই সমালোচনা করুক বা প্রকাশ্যে বিদ্রূপ করুক অন্তর দিয়া সে আমাকে একদা  
ভালবাসিয়াছিল । আজ প্রবাসে গিয়া সে বড় উকিল হইয়াছে, কংগ্রেস করিতেছে, দেখা-সাক্ষাৎ  
নাই । তথাপি আমি জানি সে আমাকে জীবন হইতে মুছিয়াও ফেলে নাই । কতগুলি সম্পর্ক মুছিয়া  
ফেলা যায়ও না ।

“লিখিলাম ! ভাই সচ্চিদানন্দ, বহুকাল তোমাকে পত্র দিই না । তোমার শেষ পত্র পাইয়াছি  
বোধহয় মাস ছয়েক আগে । তাহাতে ক্ষতিবৃদ্ধি ঘটে নাই । তোমার আমার মধ্যে নিয়মিত পত্র  
বিনিময়ের পৌনঃপুনিক ক্লাস্তি নাই । যখন প্রয়োজন ও আগ্রহ দেখা দেয় তখন লিখিলেই চলে ।  
ইহা একরূপ ভাল । ইহাতে কথা জমিয়া উঠিবার অবকাশ পায় । পত্র লিখিবার আনন্দ ব্যাহত হয়  
না । তাহা ছাড়া পত্র তো বাহক মাত্র । যাহা সে বহন করিয়া লইয়া যায় তাহা হৃদয় । সেই হৃদয়ই  
যদি স্পন্দিত না হয় তাহা হইলে পত্র লিখিয়া কী হইবে ? তোমার আমার সম্পর্ক যতই ঘনিষ্ঠ হউক,  
পরম্পরের কুশলবাব্তা না পাইলে অস্থির হইব এমন নহে ।

“আজ তোমাকে কী লিখিব তাই ভাবিতেছি । লিখিবার যে কত কিছু আছে । কত কথা অভ্যন্তরে  
জমিয়া পুঞ্জীভূত হইয়াছে । কিন্তু ঘটনাবলীর বিবরণ দিয়া তোমার শিরঃপীড়ার কারণ হইব নাকি ?

“বরং তোমাকে একটি সংবাদ দিই । সেই কিশোরী রঙ্গময়ীকে তুমি তো ভুলিতে পার নাই ।  
তাহাকে লইয়া অনেক বিদ্রূপ বাণ আমার প্রতি নিক্ষেপ করিয়াছ । এমন কি বিবাহ করিবার পরামর্শ  
দিতেও তোমার বাধে নাই । বরাবরই তুমি ঠোটকাটা এবং অবিনয়ী । যদিও নিজেকে তুমি

উচিতবস্ত্র বলিয়া মনে কর।

“রঙ্গময়ী আজ আর কিশোরী নাই। তুমি এখানকার বাসস্থান গুটাইয়াছ। বহুকাল এ শহরে পদার্পণ কর নাই। রঙ্গময়ীকেও সূতরাং তুমি এখনকার রূপে চাক্ষুষ কর নাই। কিন্তু আমার চক্ষুর সম্মুখেই সে বয়ঃপ্রাপ্ত হইয়াছে। বড় ইচ্ছা করে আমার চক্ষু দুইটি আজ তোমাকে দিই, আমার দুই চক্ষু দিয়া তুমি রঙ্গময়ীকে অবলোকন কর।

“রূপের কথা কি ছাই বকিতেছি ? রঙ্গময়ীকে রূপের জন্য কে শিরোপা দিবে ? ধারাল মুখশ্রী ও তীক্ষ্ণ চক্ষু দুইটি ছাড়া তাহার চটকদার কিছু নাই। কিন্তু আমার চক্ষু দিয়া যদি দেখিতে তবে তাহার মধ্যে আর এক অপরূপাকে তুমি দেখিতে পাইতে। একদা তুমি তাহার রূপে মজিয়াছিলে। কিন্তু হৃদয়ের কন্দরে তাহার যে এক দিব্য প্রস্রবণ আছে তাহাতে অবগাহন করিতে পার নাই।

“তোমাকে কী বলিব তাহাই ভাবিয়া পাইতেছি না। এ বয়ঃসন্ধির প্রণয় প্রলাপ নহে। ইহা এক আবিষ্কারের কাহিনী। কিন্তু এমনই ব্যক্তিগত সেই আবিষ্কার যে, খুব ঘনিষ্ঠ বয়স্যকেও বুঝি বুঝাইয়া বলা যায় না।

“এই আবিষ্কার ঘটিল এক আকস্মিকতার মাধ্যমে। এক আততায়ী আমাকে হত্যা করিবার জন্য আক্রমণ করে। বলা বাহুল্য যে, সে সফল হয় নাই। তবে আমাকে সে মৃত্যুর দ্বারপ্রান্তে পৌঁছাইয়া দিয়াছিল বটে। আজও আমি একপ্রকার শয্যাশায়ী।

“এই ঘটনাটির কথা বিশদ লিখিব না। তাহার প্রয়োজনও নাই। মানুষের জীবনে দৈব-দুর্বিপাক তো ঘটিয়াই থাকে। কিন্তু এই ঘটনার অন্যতর এক গভীর তাৎপর্য আছে। যেমন দুর্যোগের অশনিপাতে মানুষ আচমকা বহুদূর পর্যন্ত দেখিতে পায়, এই ঘটনার সময় মৃত্যু-অশনির ক্ষণিক স্পর্শে আমি সেইরূপে এক দূরদৃষ্টি লাভ করি।

“ভায়া হে, মৃত্যু চিন্তার কথা তোমাকে বহুবার লিখিয়াছি। হয়তো বিরক্ত হইয়াছে। আজও লিখি, মৃত্যুর কথা আমি কখনো ভুলি না। সর্বদা বাঁচিয়া থাকিয়া মৃত্যুর ধ্যান ইহজন্মে আমাকে ছাড়িবে না।

“কিন্তু প্রকৃত মৃত্যুর মুখোমুখি হইয়া আমার জীবনে মোড় ফিরিল। আজ আর আমি সেই দুর্বলহৃদয়, মৃত্যু চিন্তায় বিহ্বল হেমকান্ত নই। মৃত্যু যেন আমাকে ঘাড়ে ধরিয়া একটা বাঁকুনি দিয়া বলিয়া গেল, মরিতে হয় তো মর না ! মৃত্যু এইরূপ।

“আমি দেখিলাম এবং চিনিলাম। মনে হইল, ইহা তো খুব বেশী কিছু নয়। খুব অঘটন কিছু তো নয়। আততায়ীর অস্ত্র, সন্ন্যাস রোগ, যক্ষ্মা—উপলক্ষ্য যাহাই হউক, ঘটনা সামান্যই।

“বাল্যকাল হইতেই আমি গাছপালা ও পশুপক্ষীর সন্নিগ্ধ থাকিতে ভালবাসি। ইহাদের মধ্যে ক্ষুদ্র প্রাণের প্রকাশ ও সেই প্রাণের নানা ক্ষুদ্র ক্রীড়া প্রত্যক্ষ করিয়াছি। জীবজগতের সহিত তবু একান্ততা আমার কোনোদিন ঘটে নাই। কোনোদিন মনে হয় নাই, একটি মানুষ বা একটি গাছের জন্ম বা মৃত্যু কোনো ঘটনাই নহে। বিশ্ব জুড়িয়া প্রাণের যে অবিরল প্রকাশ ঘটিতেছে আমরা তাহারই ক্ষুদ্র ক্ষুদ্র অংশ মাত্র। একটি নিবিয়া গেলেও প্রাণ তো অবিনাশী—ক্রিয়া করিয়াই চলে। যে কেবল ব্যক্তিগত মৃত্যুর কথা ভাবিয়া বিষণ্ণ হয় সে জ্ঞানবান নহে।

“একটু ভুল বকিতেছি কি ভাই সচ্চিদানন্দ ? হইতে পারে। আজ আমার মনটাই প্রগলভ। বাকা বা ভাষা তো তদনুরূপই হইবে। ক্ষমা করিও। তোমার এই চির-নাবালক বয়স্যটির অনেক অত্যাচার সহ্য করিয়াছ। এবারটাও কর।

“যাহা বলিতেছিলাম। খানু পাগলের তাড়া খাইয়া বাল্যকালে আমার যে দুর্দশা হইয়াছিল তাহা তোমার মনে আছে। এবার আততায়ী আসিয়া তদপেক্ষা অনেক বড় বাঁকুনি দিয়া গিয়াছে। সেই আন্দোলন আমার রক্তে এখনও দোলাচল সৃষ্টি করে।

“এই ঘটনার ফলে আমার অভ্যন্তরে যেন ঘুম ভাঙিল। নিদ্রোথিতের মতো চারিদিকে চাহিয়া

দেখিতেছি। বাস্তব জগৎ স্বপ্নের মতো নহে। সেই দৃষ্টিতেই রক্তময়ীর দিকে চোখ ফিরাইলাম। এই যুবতী বাল্যকাল হইতে আমাকে প্রার্থনা করিয়া শিবের মাথায় জল ঢালিয়াছে, কলঙ্কের গুরুভার বহন করিয়াছে, বিবাহহীন কৌমার্যকে অবলম্বন করিয়া বড় অনাদরে বাঁচিয়া আছে। ইহাকে আদর করিবার কেহ নাই। কিন্তু সকলেই ইহার নিকট কেবল আদর যত্ন ও সেবা প্রত্যাশা করে।

“এইসব দেখিলাম। মনে হইল, কেন ইহাকে আর কষ্ট দিব? সংসার ইহাকে কিছু দেয় নাই। সংসার দেয় নাই বলিয়া আমিও চিরকাল স্তোকবাক্যে ইহাকে তুষ্ট রাখিব? আর কিছু তাহার প্রত্যাশা বা দাবী নাই?

সূতরাং—”

কতবাবু

হেমকান্ত চমকে উঠে চিঠিখানা ঢাকা দিলেন।

চাকরটা মৃদু স্বরে বলল, দারোগাবাবু এসেছেন।

দারোগাবাবু! বিস্মিত হেমকান্ত আপনমনে কথাটি উচ্চারণ করে একটা দীর্ঘশ্বাস ছাড়লেন।

তারপর বললেন, নিয়ে আয়।

একটু বাদে যখন রামকান্ত রায় ঘরে ঢুকলেন তখন সেজবাতির আলোয় তাকে আরও প্রকাণ্ড দেখাচ্ছিল।

হেমকান্ত বললেন, বলুন কি খবর!

আপনি কেমন আছেন?

একটু ভাল। বলে হেমকান্ত নড়েচড়ে বসলেন।

রামকান্ত রায় শালগাছের মতো সিঁথে দাঁড়িয়ে থেকে বললেন, আমি একটা অপরিণত কাজ করতে এসেছি।

হেমকান্ত অবাক হয়ে চেয়ে থেকে বললেন, কি কাজ?

আপনার বাড়ি সার্চ করার আদেশ আছে।

আমার বাড়ি সার্চ করবেন? হেমকান্ত হাঁ করে রইলেন।

সরকারী কাজ।

সে তো বুঝলাম। কিন্তু সার্চ করবেন কেন?

সব কারণ তো আপনাকে বলা সম্ভব নয়। তবে আমার কাছে ওয়ারেন্ট আছে। দেখবেন?

হেমকান্ত ওয়ারেন্ট দেখতে আগ্রহ প্রকাশ করলেন না। কিন্তু তাঁর চোখে হঠাৎ একটা তীব্র রাগের দীপ্তি দেখা দিল। তিনি বললেন, সার্চ করবেন। কিন্তু আমার বাড়িতে এত রাত্রে আমি পুলিশ ঢুকতে দিতে পারি না। বাড়িতে মেয়েরা রয়েছেন। আপনি কাল সকালে আসবেন।

রামকান্ত রায় হেমকান্তের গলার দৃঢ়তা লক্ষ করে একটু দ্বিধায় পড়লেন। বললেন, আমি বাড়ির সব জায়গা সার্চ করব না। শুধু বিশেষ কয়েকটা স্পট।

হেমকান্ত মাথা নেড়ে বললেন, আপনার একজন সেপাইও আজ রাত্রে আমার দেউড়ি যেন না পেরোয়। তার ফলাফল ভাল হবে না।

রামকান্ত রায় একটু হেসে বললেন, আপনি রাগ করছেন কেন? আমাদের তো সত্যিকারের জরুরী প্রয়োজনও এটা হতে পারে। আজ রাত্রে যদি সার্চ করি তবে বাড়ির লোকদের একটুও বিরক্ত করব না। কিন্তু যদি সেই অনুমতি না দেন কাল সকালে এসে গোটা বাড়ি লগুভগ করে যাবো। সেটাই কি ভাল হবে?

হেমকান্ত বহুদিন পর সত্যিকারের রাগলেন। ধীরে ধীরে উঠে দাঁড়ালেন। দুই হাত মুষ্টিবদ্ধ। কপালে একটা শিরা রাজ্জটিকার মতো ফুলে আছে। মুখ রক্তিম। বললেন, আমি জানি রাত্রে বাড়ি

সার্চ করার নিয়ম নেই। আপনি ইচ্ছে করলে বাড়ি ঘিরে রাখতে পারেন। তবু কেন জবরদস্তি করছেন ?

রামকান্ত রায় একটা শ্বাস ফেলে বললেন, সরকারী নিয়ম আপনি আমার চেয়ে ভাল জানেন না হেমকান্তবাবু।

যদি নিয়ম থেকেও থাকে তবু বলছি, আপনি ওকাজ করবেন না। এখন আসুন।

দুজনে দুজনের দিকে কিছুক্ষণ বিষদৃষ্টিতে চেয়ে রইলেন।

তারপর রামকান্ত রায় বললেন, আচ্ছা। দেখা' যাবে।

সামান্য উত্তেজনায় হেমকান্তর, দুর্বল শরীর কাঁপছিল। দরজায় তাঁর দুই ছেলেমেয়ে এবং ছেলের বউরা উৎকণ্ঠিত মুখে নিঃশব্দে ভীড় করে এসে দাঁড়িয়েছে কখন।

কনক বলল, কী হয়েছে বাবা ?

হেমকান্ত মাথা নেড়ে বললেন, কিছু হয়নি। দারোয়ানদের বল দেউড়ি পেরিয়ে যেন কেউ ঢুকতে না পারে।

রামকান্ত রায় একটু হাসলেন। তারপর নিঃশব্দে বেরিয়ে গেলেন।

হেমকান্ত সংজ্ঞা হারিয়ে লুটিয়ে পড়লেন মেঝেয়।

॥ ৮২ ॥

ধুব, বাপ হয়েছিস শুনলাম। সেলিব্রেট করবি না !

ধুব শালা, বাপ সবাই হয়, সেটা কোনো ইভেন্ট নাকি ! দেখিস না, ফুটপাথে অবধি বিয়োচ্ছে ভিথিরিরা !

তবু এই প্রথম বাপ হলি, ফাগুই আলাদা।

সরকার বেশী বাপ হতে বারণ করেছে না ! এই বাঁধাবাঁধির যুগে বাপ হয়ে তো আমার লজ্জাই লাগছে।

তুই মাইরি বেশ বলিস। তবে বেশী বাপ আর তুই হলি কোথায় ! সেই কবে মাস্কাতার আমলে একটা বিয়ে কেলিয়েছিলি, তারপর বাপ হতে হতে তো বুড়ো মেয়ে গেলি বাবা।

বাপ আরো একবার হতে যাচ্ছিলাম, কিন্তু সেবারটা টসকে গেল।

যেটা টসকে গেছে সেটা তো হিসেবের মধ্যে নয়। এটা হিসেবের মধ্যে। আজ একটা ব্ল্যাকনাইট দুজনে মিলে উড়িয়ে দিই আয়। দাম আমি দেবো।

কেন, তুই দিবি কেন ? বাপ তো হলাম আমি, তুই তো নয়।

আরে ওই হল। তুই বাপ হলে আমিও বাপ। তুই আর আমি কি আলাদা ! এক পাইট ব্ল্যাকনাইট পেঁদিয়ে ঝুম হয়ে বসে থাকি আয়। মুগাঁর রয়্যাল ঝুমে নিবি একটা ?

না, আমার কেমন ইচ্ছে হচ্ছে না।

তুই কি শেষে ফিলজফার হয়ে যাবি ধুব ? নাকি সাধুধু ?

বকিস না অত।

মাইরি বলছি, তোর লক্ষণ আমার ভাল ঠেকে না কোনোদিন। শালা মিনিষ্টারের ঘরে রূপোর চামচে মুখে করে জন্মেছিস, তোর শালা কত আপ খেয়ে বসে থাকার কথা। কেন যে শালা ডাউন ব্যাটারির লোকদের সঙ্গে মিশে মিশে বথে গেলি। তা বখবি তো ভাল করে বথ। তা না আবার মাইরি কী যে সব উল্টোপাল্টা বলিস মঙ্গলগ্রহের ভাষায় কিছু বোঝা যায় না। ব্ল্যাকনাইট আবার ইচ্ছে করছে না কী রে ?

তুই শালা আগের জন্মে ঠুঁড়ির নাতি ছিলি। দুনিয়ায় যাই ঘটুক সেই অকেশন ধরে তোর খানিকটা গেলা চাই। আমার গোয়ালে গাই বিয়ালেও ব্ল্যাকনাইট, ধুব চৌধুরীর ছেলে হল বলেও ব্ল্যাকনাইট—

তুই মাইরি বেশ বলিস। আসলে কি জানিস, একটা অকেশনে খেলে আর খুঁতখুঁতুনিটা থাকে না। আমার তো আবার ডাক্তারের বারণ। মাল খেতে গেলেই কেমন বুকটা খচ করে ওঠে। একটা অকেশন পেলে আর সেটা হয় না। তখন মনে হয়, নেশার জন্য তো নয়, এই একটা আনন্দের ব্যাপার ঘটল তাই একটু ফুর্তি করা আর কি।

তুমি হচ্ছে মালের গাঁড়ে। সবই বোঝো তবু নিজের সঙ্গে লুকোছাপাও করা চাই।

বাপু এই সাঁঝবেলাটায় আর এডুকেট করিস না আমাকে। এই সময়টায় আমি ভারী মাতৃহারা ছেলের মতো হয়ে যাই। ভিতরটা ফুঁপিয়ে ফুঁপিয়ে কীদে। আমার জীবনটা যে কিরকম ট্রাজিক তা তো জানিস।

পাছায় দুটো লাথ কষালে তোর দুঃখ এখন কোথায় যাবে রে গাঁড়ে ?

তুই কি মদ্যপান নিবারণী সভা তৈরি করতে লাগবি রে শেষ অবধি, ধুব ? আমি তোর লক্ষণ যে ভাল দেখছি না।

আমার ভিতরে এখন অনেক দৃষ্টিস্তা।

আবার দৃষ্টিস্তা কি ? ছেলে ভূমিষ্ঠ হয়েছে, দি ক্যাট ইজ আউট অফ দি ব্যাগ। বউ টিকিট কাটতে বসেছিল, শেষ অবধি ব্যাক করানো গেছে। ইউ আর এ হ্যাপী ম্যান।

আই অ্যাম নেভার এ হ্যাপী ম্যান।

সেইজন্যই তো বলি, ধুবটা কি শেষ অবধি ফিলজফার হয়ে যাবে ? তোর জন্য বড্ড ভাবনা হয় রে।

লাথি গাবি।

মাইরি তুই বল দোস্ত, তোর হ্যাপী না হওয়ার কারণটা কী ? একে তো রাজাগজার বংশ, তার ওপর খোদ একটা মিনিষ্টারের ছেলে, লেখাপড়া শিখেছিস, চাকরি ধড়ান্বড় ছাড়ছিস ধরছিস, মেয়েছেলে চাইলেই পাস, তোর শালা দুঃখ-টুঃখ কি সইবে রে ?

তুই মাল খাওয়া ছাড়া দুনিয়ার আর কি বুঝিস বল তো দুনিয়ায় বহুরকম দুঃখ আছে। তোর মতো মাতাল সেটা বুঝবে না।

মাতালও লোকে দুঃখ থেকেই হয়। দেবদাসের কথা ভুলে যাচ্ছিস দোস্ত ! তবে আমি অনেক ভেবেটেবে দেখেছি ফিলজফার হওয়ার কোনো মানে হয় না, নেতা হওয়ার মানে হয় না, কিছু হওয়ারই কোনো মানে হয় না। কারণ, কেউ কিছু করতে পারবে না এই দেশের। চারদিকে মাইরি এত দুঃখ ঢেউ দিচ্ছে যে আমার সারাক্ষণ বুকটা ছছ করে। তাই বুঝ হয়ে থাকি। মাল খেয়ে যাওয়া ছাড়া কারও কিছু করার নেই, বুঝলি !

বুঝলাম তুই তো দেখছি আমার চেয়ে ঢের বড় ফিলজফার।

ফিলজফারও কি মালের কথা বলে মাইরি ?

কেন, তুই তো একসময়ে ফিলজফিতে এম-এ চমকেছিলি। তুই জানিস না ?

ওসব বাত ছোড়ো দোস্ত। মরা ইতিহাস। কবে ঘি খেয়েছিলাম তার গন্ধ কি আজও লেগে আছে আঙুলে ? ব্ল্যাকনাইটটা কি হবে দোস্ত ?

কালও আমার পেটে একটা বিচ্ছিরি ব্যথা হয়েছিল। তুই তো জানিস মদ জিনিসটা আমার কোনোকালে নয় না। জোর করে খেয়ে যাই মাত্র। না খেলে কোনো কিছু ফিলও করি না।

দ্যাখ ধুব, তুই কিছু আমাকে রাগিয়ে দিচ্ছিস।

কেন, তোর রাগের কী হল ?

আমি মালের বিরোধিতা সহিতে পারি না ।

তুই খা না !

আমি তো খাবোই । আমি মাল খেয়ে মরার জনাই জন্মেছি । কিন্তু তুই শালা কি ভাল হয়ে যাবি ধুব ? এরকম তো কথা ছিল না ।

আমার ভাল হওয়ার কোনো চান্স নেই ।

কেন নেই দোস্ত ? এই যে দেখছি মাল খেতে চাইছিস না । এ তো ভাল লক্ষণ নয় ! আমারও যে শালা এসব দেখলে কনফিডেন্স নষ্ট হয়ে যাবে ।

আরে আমি ভাল হবেটা কী করে ? জন্মেছি সামন্ততান্ত্রিক পরিবারে, গরীবের রক্তচোষা পয়সা খেয়ে বড় হয়েছি । তার ওপর বাপ মিনিস্টার, সে আর এক কেলো । মিনিস্টার মানেই করাপশন । আমার রক্তে সেইসব বীজ কিলবিল করছে । আমার ভাল হওয়া কি সোজা ?

কিন্তু তুই তাহলে এরকম করছিস কেন ? মাল খাবি, রাজা উজীর সাজবি, নর্দমায় ফুটপাথে মুখ থুবড়ে পড়ে থাকবি, তবে না লাইফ । ভাল হোস না ধুব, ম্লীজ । তোর পা ধরতে রাজি আছি ।

তা ধর । কিন্তু ভয় পাস না । আমার মাথাটা আজ টিপটিপ করছে ।

বাঃ তাহলে তো ভাল লক্ষণ । দু ফোঁটা পড়লে টিপটিপ একদম নেমে যাবে ।

তা নামবে । কিন্তু আরো কথা আছে ।

কী কথা ?

আমার ব্রেনটা ভাল কাজ করছে না ।

সে কীরকম ?

ওলটপালট হয়ে যাচ্ছে । কাল আর একটা কেলো করতে বসেছিলাম ।

কী কেলো ?

তা তোকে বলা যাবে না । কাল রাতেও অনেকক্ষণ টেনেছি । কিন্তু দেখছি গোলমাল হচ্ছে ।

গোলমাল না হলে মাল খায় কোন বুরবক, এত দাম দিয়ে কিনে খাওয়ার মানেটা কি ? সব গোলমাল করে দাও মা কারণেশ্বরী ! দুঃখ ভুলিয়ে দাও মা, झाला झুড়িয়ে দাও মা, চারদিকটা স্বপ্নের মতো করে দাও মা ।

আমার কেসটা একটু অন্যরকম ।

তুই নিজেই অন্যরকম রে ধুব । তোর সঙ্গে মেশা আমার উচিত হয়নি ।

দেখ চৈতন, আমার প্রবলেম অনেক সিরিয়াস ।

তোর কোনো প্রবলেম নেই ধুব । কেন ওসব বানাচ্ছিস । দেশের দিকে চেয়ে দেখ । চারদিকে দেখ কী দুঃখ ! লোকে খেতে পাচ্ছে না, পরতে পাচ্ছে না, মাগ-ভাতারে বনিবনা হচ্ছে না, ভিথিরি খরা, লোডশেডিং, করাপশন, আর্বজনা, অসুখ । মাইরি দম বন্ধ হয়ে আসছে । ওঃ ।

লাথিটা এবার ঝাড়ব ? নে শালা পিছু ফের ।

লাথি আজকাল আর লাগে না রে । ইমিউনিটি এসে গেছে তো । ভাগ্যের লাথি, পুলিশের লাথি, বউয়ের লাথি, কুকুর ইঁদুরের লাথি, লাথিতেই তো আমার জীবনটা ভরা । লাথি মেরে কিছু শেখাতে পারবি না রে বাপ ।

মাজাটা তো ভাঙতে পারব ।

মাজা নেই, মেরুদণ্ড নেই, ওসব নেই রে ধুব । কে যেন বলছিল তোর মিনিস্টার বাবা তোকে পুনা না বরোদা না নাসিক কোথায় যেন পাঠাবে ।

কথা একটা আছে ।

যাবি ধুব ?

হয়তো যেতে হবে ।

কলকাতার গাডা ছেড়ে যাবি ? যা । শুনেছি, ওসব জায়গা নাকি অনেক ভাল হয়ে গেছে । ঝা চকচকে রাস্তা, দারুণ ডিসিপ্লিন, ট্রামে বাসে ভীড় নেই, ট্যাকসি পাওয়া যায় আর গুঁড়িরা মালে জল মেশায় না । যা । ভাল থাকবি ।

ভাল থাকা অত সস্তা নয় । বিস্তর ঝঞ্জাট আছে ।

কিসের ঝঞ্জাট ?

সে সব ফ্যামিলি ম্যাটার । তোকে বলা যাবে না ।

কে শুনতে চাইছে ? ফ্যামিলি ম্যাটার শুনলেই আমার মাথা ধরে । ফ্যামিলি লাইনটা কী বল তো ! যাচ্ছেতাই একেবারে ।

আমারও তাই মনে হয় । কে বলে তুই ফিলজফার নোস ?

আজ একটু হয়ে যাক দোস্ত । তুই চলে যাচ্ছিস । একটা ফেয়ারওয়েল নিয়ে নে । ব্ল্যাক নাইট ।

না রে চৈতন, আজ থাক । আমার আজকাল কেমন হাঁসফাঁস লাগে । কাল সকালে রাস্তায় অজ্ঞান হয়ে পড়ে গেলাম হঠাৎ ।

অজ্ঞান ! বলিস কি ?

তাই তো বলছি । আমার শালা দেখতে পেয়েছিল ভাগ্যিস । নইলে রাস্তার লোক হাসপাতালে চালান করে দিত ।

তোর কোন শালা ? যাদের বাড়িতে গিয়ে আমরা হুজ্জাত করেছিলাম ?

হ্যাঁ । সে-ই ।

সে এখনো তোর সঙ্গে সম্পর্ক রেখেছে ?

ঠিক রাখতে চায় না । তবে বিপদে পড়ে রেখেছে ।

তোর কপাল রে ধুব । আমার যত রিলেটিভ আছে কেউ মাইরি ভয়ে আর সম্পর্ক রাখে না ।

তোকে ভয় কিসের ?

ওই যে মাঝে মাঝে একটু বেহেড হয়ে যাই । জীবনটা আমার বড় ট্রাজিক রে ধুব । এই দুঃখে হয়ে যাবে নাকি এক হাত ব্ল্যাকনাইট ?

তুই টাকা পেলি কোথায় বল তো !

কেন শালা, আমি কালোয়ারের ছেলে, আমার পকেটে টাকা থাকতে নেই ?

তা আছে । কিন্তু হঠাৎ এতো ব্ল্যাকনাইট ব্ল্যাকনাইট করছিস কেন ? তুই তো খাস পঁচো কালীর পেছাপ । কালীমার্কা ।

মাঝে মাঝে একটু ফিনফিনে নেশা করতে ইচ্ছে হয় না ?

আজ ইচ্ছেটা হয়েছে কেন ?

বড় দুঃখ রে ! একটু মূর্গীর রয়্যাল দিয়ে মুখবন্ধন করে নিলে বড় ভাল জমত ব্যাপারটা ।

তোর কি এখনো খিদে পায় চৈতন ? আমার পায় না ।

আমার পায় ।

আমার মনে হয় পেটে একটা গজকচ্ছপ ঢুকে বসে আছে । গ্যাস হচ্ছে ।

দিনে বারোটা করে অ্যান্টাসিড খাবি ।

তোর মাথা !

মাতালদের রেডবুকে লেখা আছে রে । বারোটা অ্যান্টাসিড ।

\* \* \*

আপনাকে দারুণ ফ্রেশ দেখাচ্ছে ।

রেমি কথটা শুনে তরুণী নার্স মেয়েটির দিকে হুঁচকে তাকাল । কথটা যেন ঠিক বুঝতে



পারছে না। বলল, আমি কি ভাল আছি ?

ওমা ! ভাল নেই ? একদম ভাল হয়ে গেছেন আপনি।

রেমির মনে হচ্ছিল তার শরীরের ওপর দিয়ে একটা ঝড় বয়ে গেছে। একতাল ময়দার মতো তাকে ঠেসে মেখে ছেনে তারপর দলা পাকিয়ে ফেলে গেছে কে যেন। মৃত্যুর এক আবছা অঙ্ককার জগৎ থেকে ফিরে এসেছে সে, কিন্তু এখনো সেই মৃত্যুর একটু শীতল স্পর্শ, মাথার ভিতরে এখনো কয়েক ফোঁটা মৃত্যুর অঙ্ককার রয়ে গেছে। এখনো দুই জগতের এক মধ্যবর্তী মানসিক অবস্থায় রয়েছে রেমি। ঠিক স্বাভাবিক নয়।

নার্স মেয়েটি তা জানে। দীর্ঘকাল সংজ্ঞাহীনতার পর এরকম হওয়াটাই স্বাভাবিক, সে রেমির আত্মবিশ্বাস বাড়ানোর জন্যই বলল, অসুস্থতার কোনো চিহ্নই আপনার মুখে নেই।

রেমি ক্ষীণ গলায় বলল, আমার শরীর বড় দুর্বল।

ও তো একটু হবেই।

ছুঁচের বড় ব্যথা।

কমে যাবে। আর কয়েকটা দিন।

রেমি হাসল না। বড় বড় দুই চোখে অনির্দিষ্টভাবে চেয়ে রইল। তার দৃষ্টি স্থির নয়, স্বাভাবিক নয়। শ্বাস ক্ষীণ, নাড়ী ক্ষীণ, শরীর সাদা, শীর্ণ, শিরা-উপশিরার নীলাভ সরীসৃপ চামড়ার নীচে দৃশ্যমান।

আপনার হাজব্যাণ্ড এসেছিলেন।

কখন ?

আজ সকালে। না দুপুরে বোধহয়।

আমার ছেলে ?

কাল সকাল থেকে এ ঘরে বেবিকে দেওয়া হবে। আপনার হাজব্যাণ্ড দেখে গেছেন বেবিকে।

আমি একবার দেখব। দেখাবেন ?

নিশ্চয়ই। বলে নার্স মেয়েটি আয়াকে ডেকে বেবি আনতে বলে দেয়।

আপনার হাজব্যাণ্ড কিছু খুব হ্যাণ্ডসাম।

রেমি হাসে না। খুশি হয় না। জবাব দেয় না।

ইনজেকশনটা দিয়ে দিই এবার।

দিন। আমার আর ব্যথা লাগে না।

নার্স ইনজেকশন দেয়। রেমি নির্বিকার চেয়ে শুয়ে থাকে। ছুঁচটা বের করে নিয়ে নার্স বলে, লাগল না তো !

আমার আর লাগে না। বললাম না। কত ব্যথা গেল ক'দিন। ইনজেকশন সে তুলনায় কিছুই নয়।

আপনি আমাদের খুব ভয় পাইয়ে দিয়েছিলেন।

কেন বলুন তো !

এমন কাণ্ড বাঁধালেন ! হেয়ারেজ থামে না। এখন-তখন অবস্থা। ডাক্তাররা তো হাল ছেড়ে দিয়েছিল।

মরলেই বা কী হত ?

ও বাবা ! আপনার কিছু হলে আমাদের গর্দান থাকত না কি ?

কেন ? গর্দানের ভয় কী ?

নার্সিং হোম ভরে গিয়েছিল লোকে। ভি আই পি-দের ফোনে ফোনে আমরা অস্থির। স্বয়ং কে. কে. চৌধুরি মানে আপনার স্বপ্নরমশাই সারারাত্রি লবিতে বসেছিলেন।

খুব হৈ-হৈ হয়েছিল ?

সাজ্জাতিক । নার্সিং হোমে একজন হোমিওপ্যাথ, একজন কবিরাজ এবং একজন তান্ত্রিককেও আনা হয়েছিল ।

বলেন কি ?

তাই তো বলছি আপনার কিছু হলে মিস্টার চৌধুরি আমাদের গর্দনি নিতেন ।

উনি আমাকে একটু বেশি ভালবাসেন ।

ভি আই পি-দের আমরা এমনিতেই একটু বেশী যত্ন নিই । কিন্তু আপনার ব্যাপারে আমাদের নাওয়া-খাওয়া ছাড়তে হয়েছিল ।

ইস । আমার ভীষণ লজ্জা করছে ।

লজ্জার কিছু নেই মিসেস চৌধুরি । আপনি যে ভাল হয়ে গেছেন সেইটেই আমাদের সান্ত্বনা ।

রেমি একটু ভাবল । অজ্ঞান অবস্থায় সে সারাক্ষণ যে সব অদ্ভুত দৃশ্য দেখেছে তার মধ্যে এক অচেনা পুরুষ ছিল । সেই পুরুষ কে তা সে জানে না । তবু সেই পুরুষের সঙ্গে একজনের সুন্দর একটা আদল ছিল ।

রেমির রক্তহীন মুখে ক্ষীণ একটু লাল রঙ দেখা গেল । সে জিজ্ঞেস করল, ও ছিল না ?

ও কে ? কার কথা বলছেন ?

আমার হাজব্যাণ্ড !

আপনার হাজব্যাণ্ড ছিলেন কিনা ওই ভীড়ের মধ্যে লক্ষ করিনি । ছিলেন নিশ্চয়ই । সবাই ছিলেন ।

রেমি একটু চেয়ে থাকে মেয়েটির দিকে ।

মেয়েটা বলে, আপনার হাজব্যাণ্ড কিন্তু খুব স্মার্ট । দারুণ ।

আমাদের বাড়ির কেউ কি এখন আছে বাইরে ?

আছে । জগা বলে একজন ।

তার কথা বলছি না । আর কেউ ?

খোঁজ করব ?

দেখুন না একটু । আমার বাপের বাড়ির কেউ আসতে পারে ।

তারা অনেকক্ষণ আগে এসে দেখে গেছে ।

আচ্ছা ।

রেমি চোখ বোজে । দীর্ঘ একটা সময় চেতনাহীনতায় কাটিয়ে এখন তার প্রিয়জনদের দেখতে ইচ্ছে করছিল ।

আম্মা বাচ্চাটাকে নিয়ে এসে মৃদুস্বরে ডাকে, বউদি ! এই যে দেখুন । রাজপুস্তুর । সোনার বাউটি দিতে হবে কিন্তু ।

রেমি নিম্পলক তাকিয়ে থাকে বাচ্চাটার দিকে । তার । তার । একমাত্র তার বত্রিশ নাড়ী-হেঁড়া ধন । লাল, তুলতুলে, মোটাসোটা, ন্যাড়ামাথা । তবু যেন জগ্মজগ্মাস্তরের চেনা । লক্ষ বছর এই শিশু তার গর্ভে বাস করেনি কি ? বুক জুড়ে বাৎসল্যের মেঘ পুঞ্জীভূত হয়ে এল । কোথায় ছিল এই অসম্ভব অদ্ভুত অনুভূতি ! একটু আগেও তো একে দেখেনি সে !

রেমি হাত বাড়ায় । একটু ছোঁয় তার ছেলেকে

ওকি ঘুমোচ্ছে ?

হ্যাঁ বউদি । খুব ঘুমোচ্ছে ।

তাহলে রেখে এসো । আর শোনো, ফর্সা কাপড় দিয়ে জড়িও ।

আম্মা খুব হাসে, ফর্সা কাপড় কি গো ! ওর দাদু যে ডজনখানেক দামী নরম তোয়ালে দিয়ে

গেছেন। বাচ্চার কি অভাব আছে নাকি কিছু ?

রেমি লজ্জা পায়। কৃষ্ণকান্ত যে একটা তুলকালাম কিছু করবেন এ তো তার জানাই ছিল।  
ওর দাদু কি আজ এসেছিল ?

আসেনি আবার ! তিনবেলা হানা দিচ্ছেন গো ! আমরা সব ভয়ে জড়োসড়ো।

রেমি মিষ্টি করে বলে, উনি খুব ভাল। ভয় পেও না।

আপনাদের সবাই ভাল। বর ভাল, স্বশুর ভাল, ছেলে ভাল। বাউটি না নিয়ে কিছু ছাড়ব না।

রেমি একটা শ্বাস ফেলে চোখ বুজল।

তারপর একটু অঙ্ককার পেরোলো রেমি। শরীর এত দুর্বল যে চোখ বুজলেই ঘুমের আঠায় জড়িয়ে যায় চোখ। বোধহয় ঘুমের ওষুধ দেওয়া হয়েছে তাকে।

বিছানায় মিশে থাকা রেমি তার আধো-ঘুমের মধ্যে আবার দৃশ্যাবলী দেখতে পাচ্ছিল। একজন লোক একা একটা বিশাল রোদে-পোড়া মাঠ পেরোচ্ছে। দু' বগলে ক্রাচ, গায়ে শতছিন্ন পোশাক। কোথায় চলেছে ?

ধুব না ? রেমি কৈপে ওঠে ভয়ে।

॥ ৮৩ ॥

সংজ্ঞা যখন ফিরল তখন হেমকান্তর উত্তেজনা প্রশমিত হয়েছে। দুর্বল শরীরে রাগ, অপমান এবং অযোগ্যের স্পর্ধা তাঁকে বড় বেশি আন্দোলিত করে ফেলেছিল। হেমকান্ত চারদিকে চাইলেন। ঘরভর্তি তাঁর আত্মজনেরা। আত্মীয়দের দেখে এতটা প্রসন্ন তিনি কোনোকালে বোধ করেননি। ছেলেমেয়েদের সঙ্গে তাঁর বরাবর দূরত্ব ছিল। নিজের অনেক নাতি-নাতনীকে তিনি ভাল করে চেনেনও না।

একদম শিয়রের কাছে রঙ্গময়ী বসা। হাতে পাখা।

হেমকান্ত রঙ্গময়ীকে উপেক্ষা করলেন, কারণ সে-ই সবচেয়ে নিকট আত্মীয়া, তাকেই উপেক্ষা করা যায়।

কনক আরক্ত মুখে দাঁড়িয়ে ছিল। হেমকান্তর সংজ্ঞা ফিরে আসার পর প্রশ্ন করল, এখন কেমন আছেন ?

ভাল। দুর্বলতা আর আচমকা উত্তেজনায় মাথাটা কেমন করল।

করতেই পারে। দারোগাদের স্পর্ধা যে কোথায় পৌঁছেছে !

হেমকান্ত একটা দীর্ঘশ্বাস ফেললেন। ঘরের সবাই চাপা স্বরে কথা বলছে। সকলের চোখেই একটা আতঙ্ক আর দিশেহারা ভাব এই অল্প আলোতেই লক্ষ্য করলেন হেমকান্ত। কনককে বললেন, দারোগার আর দোষ কি ? ইংরেজরাই ওদের মাথায় তুলেছে।

জীমূতকান্তি এগিয়ে এসে হেমকান্তর কাছে দাঁড়ায়। বলে, স্বদেশীরা আপনাকে মারার চেষ্টা করল আর রামকান্ত রায়কে ছেড়ে দিল এটা দেখে আশ্চর্য হচ্ছি। স্বদেশীরা কি শত্রুমিত্র ভুলে গেছে ?

হেমকান্ত মৃদু হেসে বললেন, আমাকে মারা সোজা কিন্তু রামকান্তকে মারা তো সহজ নয়। তার কাছে অস্ত্র থাকে, সঙ্গে সেপাই থাকে। তাছাড়া সে নিশ্চয়ই সর্বদা সতর্ক হয়েই চলে। থাকগে, রামকান্ত রায় কি চলে গেছে !

বিশাখা মৃদু স্বরে বলল, গেছে।

হেমকান্ত ফের একটা দীর্ঘশ্বাস ফেললেন। ভীড়ের মধ্যে তিনি তাঁর প্রিয় পুত্রটির মুখ খুঁজছিলেন। কিন্তু ঘরে কৃষ্ণকে দেখা যাচ্ছিল না। হেমকান্ত বিশাখার দিকে জিজ্ঞাসু চোখে চেয়ে

বললেন, কৃষ্ণ কোথায় ?

সে বোধহয় বাড়ি নেই।

এত রাতে কোথায় গেল ?

কি জানি।

হেমকান্ত উদ্বিগ্ন হয়ে উঠে বসলেন। দুই ছেলের দিকে চেয়ে বললেন, তোমরা দেখ তো ! দরকার হলে চাকর দারোয়ানদের চারধারে পাঠাও। আর প্রজাদেরও খবর দাও।

কনক বলে, অত ব্যস্ত হচ্ছেন কেন ?

কারণ আছে বলেই হচ্ছে। কৃষ্ণর ওপর রামকান্ত খুশি নয়, জানোই তো। কি হয় না হয় তার ঠিক কি ?

আচ্ছা, আমরা দেখছি।

বাড়িতেও দেখ। আগে বাড়ির ঘরগুলো কাছারির ওদিকটা সব ভাল করে দেখে নিও। তাকে পেলেই আমার কাছে পাঠাবে।

খুব ফিসফিস করে রঙ্গময়ী বলে, তাকে আমি শচীনদের বাড়ি পাঠিয়েছি।

হেমকান্ত বিস্মিত হয়ে বলেন, কেন ?

পুলিস দেখে।

হেমকান্ত ছেলদের দিকে চেয়ে বললেন, থাক আর খুঁজতে হবে না। তোমরা বরং রাজেনবাবুর বাড়িতে যাও। সে সেখানেই আছে। তাকে নিয়ে এসো। দেউড়িটা সব সময়ে বন্ধ রাখতে বলে দিও।

জীমূত আর কনক বেরিয়ে গেল। কৃষ্ণকান্ত মেয়ে আর বউদের দিকে তাকিয়ে বললেন, তোমরা গিয়ে যে যার ঘর ভাল করে খুঁজে দেখ। বাড়ির আনাচ কানাচ তো রাত্রে ভাল দেখতে পাবে না। তবু চাকর আর দাসীদের দিয়ে খুঁজিয়ে নিও। কিছু আপত্তিকর জিনিস বা কাগজপত্র থাকলে আমার কাছে নিয়ে এসো।

চপলা বলল, কেন বাবা ?

অনেক সময় পুলিস নিজেই আপত্তিকর জিনিস আগে থেকে রেখে যায়। ওদের তো কূটকৌশলের অভাব নেই। আমার ওপর রাগ তো আছেই। কৃষ্ণর ঘরটা ভাল করে দেখো।

হেমকান্ত এসব সিদ্ধান্ত নিলেন ঠাণ্ডা ভাবে, একটুও ভয় না পেয়ে না ঘাবড়ে। নিজের এই নিরুত্তাপ আচরণ এবং মোটামুটি বুদ্ধিমানের মতো চিন্তা করার শক্তি দেখে নিজেই একটু অবাক হয়ে যাচ্ছিলেন হেমকান্ত। অন্যোরাও হচ্ছেল বোধহয়। কিন্তু তাদের মুখের ভাব ততটা অল্প আলোয় দেখা গেল না।

সবাই চলে গেল। রইল রঙ্গময়ী। বলল, দুর্বল শরীরে অনেক ধকল গেছে। এবার শুয়ে পড়ো।

হেমকান্ত শুনলেন না। বললেন, সারাদিন শুয়ে বসেই আছি। বিশ্রাম নিতে আর ভাল লাগছে না।

তাহলে কি মুণ্ডর ভাঁজবে নাকি ?

যা দিনকাল দেখছি তাই ভাঁজতে হবে। দারোগার স্পর্ধা দেখে বড় অবাক হয়েছি আজকে।

রঙ্গময়ী মৃদু একটু হেসে বলল, একটা কথা বলব ?

বলো। কি কথা ?

রামকান্ত রায় যখন আসে তখন তুমি কী করছিলে ?

হেমকান্ত অবাক হয়ে বলেন, কী করছিলাম মানে ? বসে ছিলাম।

বসে কিছু করছিলে না ?

না তো।

কোথায় বসে ছিলে ?

এই ডেসকে ।

সেখানে বসে কী করছিলে মনে করে দেখ ।

হেমকান্ত একটু ভেবে বললেন, মনে পড়েছে । একটা চিঠি লিখছিলাম ।

কাকে ?

হেমকান্ত রঙ্গময়ীর দিকে চেয়ে বললেন, অত খোঁজ নিচ্ছে কেন ?

কারণ আছে বলেই নিচ্ছি ।

সচ্চিদানন্দকে ।

তাতে এমন কোনো কথা লেখোনি তো যে অন্যে দেখলে ক্ষতি হতে পারে ।

না । বলেই হেমকান্ত থমকালেন । সংজ্ঞাহীনতার ফলে স্মৃতিশক্তি দুর্বল হয়ে পড়েছে বোধহয় ।

কী হল ?

হ্যাঁ মনু, তাতে আমি অনেক আবোলতাবোল লিখেছি বটে ।

লিখেছো ! এই রে ।

কেন, কী হয়েছে ? কেউ দেখে ফেলেছে নাকি ?

রঙ্গময়ী মাথা নেড়ে বলে, তোমাকে যখন অজ্ঞান অবস্থায় বাতাস দিচ্ছিলাম তখন দেখলাম, বিশাখা ডেসকে দাঁড়িয়ে চিঠিটা পড়ছে ।

বলো কি ?

খুব বেশি পড়েনি । আমি ওকে ডাক দিয়ে জল আনতে পাঠাই । কারণ ওর ভাবসাব দেখে আমার মনে হল, এই বিপদের মধ্যেও যখন অত মন দিয়ে একটা লেখা কাগজ পড়ছে তখন ওই কাগজে তেমন কিছুই লেখা আছে ।

তারপর কী হয়েছে ? কাগজখানা কই ?

আছে । আমি সরিয়ে রেখেছি । তোমার তোশকের তলায় ।

ওতে তোমার কথা আছে মনু ।

কেন সচ্চিদানন্দকে ওসব লেখো ?

দোষের কিছু হয়েছে ?

আগেই তো বলেছি উনি লোক ভাল নন ।

তোমার সন্দেহ অমূলক । সচ্চিদানন্দ আমার বাল্যবন্ধু । আমি ওকে চিনি ।

তোমার মতো সদাশিব কখনো কাউকে খারাপ দেখে না ।

দেখে বইকি ! এই যে রামকান্ত দারোগা এলোকটা খারাপ ।

ভুল । রামকান্ত খারাপ হবে কেন ? বরং রামকান্ত কর্তব্যপরায়ণ মানুষ, মাঝে-মাঝে বাড়াবাড়ি করে ফেলে ।

তুমি সব সময়ে আমার উষ্টো দিকে দাঁড়াও কেন বলো তো !

রঙ্গময়ী মাথা নেড়ে বলে, সে সাহস আমার নেই ।

তবে রামকান্তকে সাপোর্ট করছো কেন ?

করছি না । সাপোর্ট করবো কেন ? তবে সে যে সার্চ করতে এসেছিল তার কারণ আছে ।

কী কারণ ?

কৃষ্ণ তোমার একটা রিভলবার সরিয়ে নিয়েছিল ।

হেমকান্ত চমকে উঠলেন, রিভলবার ?

হ্যাঁ, বোধহয় সেটা সে এক-আধদিন স্কুলেও নিয়ে গিয়ে থাকবে । ওর যা বয়স নতুন খেলনা পেলে সকলকেই দেখানোর ইচ্ছে হয় ।

সর্বনাশ !

ভয় পেও না । ওটায় গুলি ছিল না । আমার মনে হয় কেউ ওর কাছে রিভলবার দেখে পুলিশকে জানিয়েছে ।

সেটা আমাকে এতদিন বলোনি কেন ?

বলার কী আছে । তোমারও তো শরীর ভাল ছিল না । তাছাড়া আমিও তো ওর মায়ের মতোই । ওর ভালমন্দ নিয়ে ভাবি ।

রিভলবারটা চেয়ে নাওনি ওর কাছ থেকে ?

চাইনি, তবে চুপি চুপি সরিয়ে নিয়েছি । ওটা এখন আমার কাছে আছে ।

পুলিস জানে বলছো ?

জানে বলেই তো মনে হয় । না হলে সার্চ করতে চাইবে কেন ? একটা কথা বলি ? বলো ।

কৃষ্ণকে রিভলবার নিয়ে কিছু বলতে যেও না । যা বলার আমিই বলব ।

কিন্তু এ তো অতি বিপজ্জনক ঘটনা

ছেলেমানুষ, ও কি আর অত বোঝে ?

হেমকান্ত একটা দীর্ঘশ্বাস ছেড়ে বললেন, আজ রাতে আমার আর ঘুম হবে না । কৃষ্ণ রিভলবার নিয়ে কী করতে চায় বলো তো ।

তোমাকে ছোরা মারার পর থেকেই বোধহয় ওর একটা শোধ নেওয়ার ঝোঁক এসেছে । ভীষণ ভালবাসে তোমাকে ।

শোধ নেওয়ার জন্য রিভলবার ! ও তো জানেও না কে আমাকে ছোরা মেরেছে ।

তার ওপরেই যে শোধ নিতে হবে তার কোনো মানে নেই । ও শোধ নিতে চায় দলটার ওপর । পুলিশের ওপরেও খুব রাগ ।

ওকে সামলাও মনু । ওকে নিয়ে আমার ভীষণ দুশ্চিন্তা ।

সে তোমাকে বলতে হবে না । কৃষ্ণ যে আমারও ছেলে সেটা ভুলে যাও কেন ? তবে বড় হচ্ছে, কত আর সামাল দিতে পারব আমরা ?

তাহলে বলো ওকে নিয়ে তাড়াতাড়ি কাশী চলে যাই ।

সে একরকম ভাল প্রস্তাব । যেতে তো আমারও ইচ্ছে । কিন্তু সংসারকে ফাঁকি দিয়ে কি যেতে পারবে ? কত দায়িত্ব তোমার ।

হেমকান্ত কয়েক পলক চোখ বন্ধ করে কৃষ্ণকান্তর মুখটা দেখতে পেলেন কল্পনায় । ছেলেটি তাঁরই ঔরসজাত, অথচ যেন অন্য এক পরিমণ্ডল থেকে আসা । বড্ড অচেনা, বড্ড অন্যরকম ।

রক্তময়ী বলল, কত আর ভাববে ? এসব তোমাকে না বললেই হয়তো হত । কিন্তু ঘটনা যেদিকে গড়াচ্ছে তা দেখে মনে হল, সবকিছু তোমার জানা না থাকলে হয়তো বিপদে পড়বে । জানলে আগে থেকে বিলিব্যবস্থা করা যায় ।

ঠিক কাজই করেছে মনু । আরো আগে বললে ভাল করতে । কাল সকালে রামকান্ত সার্চ করতে আসবে । রিভলবারটা সাবধানে রেখেছো তো ।

সাবধান হওয়ার দরকার নেই । তোমার কাছে রাখলেই চলত । তোমার লাইসেন্স আছে, পুলিশের কিছু বলার থাকত না । কিন্তু আমি একটা ভুল করেছি ।

সর্বনাশ । আবার কী করলে ?

একটা স্বদেশী ছেলেকে দিয়েছি ।

মনু ! ছিঃ ।

রক্তময়ী লজ্জা পেল না । স্থির চোখে হেমকান্তর দিকে কিছুক্ষণ চেয়ে থেকে বলল, আমি তোমার

মতো লেখাপড়া জানি না। আমার অত বুদ্ধিও নেই। আমি ক্ষুদ্র বুদ্ধিতে যা বুঝছি করেছি। রাগ করো না।

হেমকান্ত চুপ করে একটি ভাবলেন। তারপর একটা দীর্ঘশ্বাস ছেড়ে বললেন, পুলিশ এসে রিভলবারটারই খোঁজ করবে ট্রেস করা না গেলে আমাকে ফেলবে জবাবদিহিতে। তুমি ঠিকই বলেছো মনু, রিভলবারটা যে বাড়িতে নেই তা পুলিশ জানে।

তোমার পায়ে পড়ি, এর জন্য শাস্তি যা আমাকে দিও। কৃষ্ণকে কিছু বোলো না।

হেমকান্ত করুণ মুখে মাথা নেড়ে বললেন, বলার কিছু নেইও। কী বলব? ছেলে বড় হচ্ছে, নিজস্ব মতামত নিজস্ব চরিত্র তৈরি হচ্ছে। আমি কী করতে পারি বলো।

হেমকান্তর করুণ মুখখানার দিকে কিছুক্ষণ চেয়ে থেকে রঙ্গময়ী মাথা নাড়ল। বলল, আমিও সেই কথা বলি। তুমি ভেবো না।

রঙ্গময়ী চলে যাওয়ার পর হেমকান্ত তাঁর খাস চাকরটিকে ডেকে বললেন, হরি, মনুর কাছে কেউ আসে-টাসে নাকি রে? ছোকরামতো কেউ। দেখেছিস কখনো?

হরি জন্মাবধি এই বাড়িতে আছে। অসম্ভব বিশ্বাসী। গলা কেটে ফেললেও কেউ তার মুখ থেকে কথা বের করতে পারে না। কম কথার মানুষ, বুদ্ধিমান এবং সজাগ লোক। মাথা চুলকে একটু বিনয়ের ভাব দেখিয়ে বলে, বাইরে থেকে তেমন কাউকে যাতায়াত করতে দেখি না। তবে... তবে কি

প্রতুল দাদাবাবু কৃষ্ণদাদাকে পড়িয়ে চলে যাওয়ার সময় ঠুর সঙ্গে মাঝে মাঝে দেখা করতেন।

প্রতুল! ছেলেটা তো এমনিতে নিরীহ। স্বদেশী করে নাকি?

হরি ফের মাথা চুলকে বলে, সে কি করে বলব? তবে কৃষ্ণদাদাকে একটু-আধটু স্বদেশী শেখাত।

হেমকান্ত বাড়ির খোঁজখবর বড় একটা রাখেন না। প্রতুলকে দেখেনওনি বহুদিন। তাই জিজ্ঞেস করলেন, কৃষ্ণকে কি এখনো ও পড়ায়?

না। দাদাবাবু আজকাল নিজেই পড়ে।

প্রতুল আসে মাঝে মাঝে?

মাঝে মাঝে আসতে দেখি। তবে চুপি চুপি। আঁধার হলে।

কি করে বেড়ায় একটু খোঁজ নে তো?

হরি মাথা চুলকে বলে, খোঁজ পুলিশেও নিচ্ছে। ধরতে পারছে না।

হেমকান্ত বিমূঢ়ের মতো চেয়ে থেকে বলেন, তুই তো অনেক খবর জানিস দেখছি। বলিস না কেন আমাকে?

বলার কি! শরীর তো এমনিতেই খারাপ। এসব শুনে আরো বিগড়োবেন।

প্রতুল তাহলে ফেরার?

মনে তো হয়।

রিভলবারটা কবে কৃষ্ণ নিয়ে গেছে জানিস?

কবে বলতে পারব না। তবে নিয়েছিল বেশ কিছুদিন আগে।

তুই জানতে পেরেছিলি?

একদিন ঘরটা সাফ করতে গিয়ে তোশকের তলায় দেখতে পাই।

তখনো আমাকে বলিসনি?

ও অস্ত্রটার গুলি বাড়িতে নেই। শুধু ওটা দিয়ে আর কী হবে?

গুলি তো কিনতে পাওয়া যায়।

হরি মাথা চুলকে বলে, আমি কথাটা মনুদিদিকে বলে দিয়েছিলাম। মনুদিদি গিয়ে সরিয়ে আনে।

খুব বুদ্ধিমান । বলে হেমকান্ত গম্ভীর হয়ে কিছুক্ষণ চেয়ে থাকেন জানালার বাইরের অন্ধকারে । তারপর বলেন, ওরা এল কিনা দেখ । কৃষ্ণর জন্য চিন্তা হচ্ছে ।

এই যে যাই ।

বলে হরি বেরিয়ে গেল

হেমকান্ত তোশকের তলা থেকে সচ্চিদানন্দকে লেখা চিঠিখানা বের করলেন । ভারী লজ্জা করছিল চিঠিখানার দিকে চেয়ে । শাস্ত্রে তাই বলে শতং বদ মা লিখ । লেখা জিনিস দলিলের মতো । শত গুজবেও যা করতে পারে না এক টুকরো চিরকুট তা অনায়াসে করতে পারে । হেমকান্তর একটা ডায়েরীও আছে । এক কিশোরীকে নিয়ে নানা প্রণয়োপাখ্যান । এগুলো কি পুড়িয়ে ফেলা উচিত

বিশাখা যদি চিঠিটা পড়ে থাকে তবে যথেষ্ট ক্ষতি হয়ে গেছে । আর কিছু করার নেই । বিশাখা ভাল স্বভাবের মেয়ে হলেও নিন্দেমন্দ করা এবং কটকচালি তাদের প্রিয় স্বভাব । কোনো সময়ে তার মুখ দিয়ে কথাগুলো প্রকাশ পেতে পারে । ভাবতে ভাবতে হঠাৎ হেসে উঠলেন হেমকান্ত । তাঁকে আর রঙ্গময়ীকে নিয়ে প্রচার তো বহুকাল ধরে হচ্ছে । অতএব ভয়ের আর কী ?

বাইরে সাড়াশব্দ পাওয়া গেল । হেমকান্ত চিঠিটা লুকোলেন ।

ঘরে এসে ঢুকল কনক আর জীমূত । তাদের মুখচোখের চেহারা ভাল নয় । কেমন উদ্ভ্রান্ত । কৃষ্ণ কোথায় ?

কনক বলল, সে ও বাড়িতে নেই ।

নেই মানে ? মনু যে তাকে পাঠিয়েছে ।

গিয়েছিল । কিন্তু তারপর কোথায় চলে গেছে ।

হেমকান্ত উদ্বেগজন্য দাঁড়িয়ে পড়লেন, তার মানে ? এত রাতে সে যাবে কোথায় ?

তা কেউ বলতে পারছে না । সন্ধেবেলায় গিয়ে ও বাড়িতে শচীনকে খোঁজ করে । শচীন ছিল না । কিছুক্ষণ বসে ছিল বাইরের ঘরে । ওদের এক ঝি বলল, একটা ছেলে নাকি সাইকেলে হঠাৎ কোথা থেকে এসে ওকে ডেকে নিয়ে যায় । সেই সাইকেলেই উঠে গেছে ।

হেমকান্ত দুর্বল শরীরে অবসন্ন বোধ করে বিছানায় বসে পড়লেন । বললেন, তাহলে ?

আমরা চারদিকে লোক পাঠিয়েছি । খোঁজ পাওয়া যাবেই ।

সাইকেলওলা ছেলেটা কে ?

ওদের ঝি তা বলতে পারল না ।

হেমকান্ত উঠে পড়লেন । বললেন, গাড়ি জুড়তে বলো । আমি বেরোবো । কনক জীমূত দুজনেই হাঁ-হাঁ করে ওঠে, এই শরীরে কোথায় যাবেন ?

শরীরে যথেষ্ট জোর পাচ্ছি । চিন্তা কোরো না ।

মাথা ঘুরে পড়ে যাবেন । একটু আগেই তো অজ্ঞান হয়ে গিয়েছিলেন ।

বাধা দিও না । গাড়ি জুড়তে বলো ।

খবর পেয়ে মেয়েরা বউরাও এল ।

কোথায় যাবেন বাবা ? আজ অন্ধকার রাত ।

আমি বিশেষ একজনের কাছে যাবো । সে বোধহয় বলতে পারবে ।

জীমূত বলে, তার নাম বলুন । আমরা খোঁজ নিচ্ছি ।

সে আবাসকণ্ডার তার নাম বলা উচিত হবে না । আমাকে যেতে দাও । কৃষ্ণর কিছু হলে আমি মরেও শাস্তি পাবো না ।

তাহলে আমরা কেউ আপনার সঙ্গে যাই ।

হেমকান্ত একটু ভেবে বললেন, কনক বরং চলো । আর শোনো, বন্দুকের ঘরটা কাউকে খুলতে



পাঠাও । আমি সঙ্গে একটা অস্ত্র রাখতে চাই ।

সকলেই মুখ চাওয়াচাওয়ি করল । কিছু কেউ প্রতিবাদ করল না ।

হেমকান্ত বন্দুকের ঘরে ঢুকে চেস্ট অফ ড্রয়ারস খুললেন । নীচের দেয়ালে একদম কোণের দিকে হাত বাড়িয়ে একটা পিস্তল বের করে গুলি ভরলেন । তাঁর হাত কাঁপছিল । বুকে কষ্ট হচ্ছিল । তিনি অস্ত্র পছন্দ করেন না । কিন্তু কৃষ্ণ, তাঁর প্রিয় পুত্র কৃষ্ণর জন্য তিনি দরকার হলে হাজারটা লোককে মারতে পারেন ।

ঘোড়ার গাড়িতে বসে কনক জিজ্ঞেস করে, কোথায় যাবেন বাবা ?

প্রতুলের বাড়ি । কাছেই ।

প্রতুল কে ? কৃষ্ণর সেই প্রাইভেট টিউটর ?

হ্যাঁ । ছেলেটা শুনেছি স্বদেশী করে ।

কৃষ্ণর সঙ্গে তার কিসের সম্পর্ক ?

হেমকান্ত একটু চুপ করে থেকে সতর্ক গলায় বলেন, আমার ধারণা কৃষ্ণ স্বদেশীদের সঙ্গে মেলামেশা করছে । এবার হয়তো অ্যাকশনে নামতে চাইছে ।

সর্বনাশ ।

হেমকান্ত একটা দীর্ঘশ্বাস ফেলে বলেন, তোমরা কেউ থাকো না এখানে । আমিও সবদিকে নজর রাখতে পারি না । কী যে হবে ।

গাড়ি একটা ঘিঞ্জি পাড়ায় ঢোকে । তারপর এসে দাঁড়ায় একটা টিনের বাড়ির সামনে । হতদরিদ্র চেহারার বাড়ি ।

গাড়োয়ানের পাশ থেকে নেমে হরি ভিতরে গিয়ে এক বুড়ো ভদ্রলোককে ডেকে আনে । প্রতুলের বাবা । শশব্যস্তে এসে ভদ্রলোক হাতজোড় করে দাঁড়ান, আজ্ঞে আপনি !

প্রতুল কোথায় ?

প্রতুল! সে তো মাসেকের ওপর বাড়ি নেই । পুলিশ এসে রোজ খোঁজ করে যাচ্ছে ।

হেমকান্তর শ্বাস হঠাৎ বন্ধ হয়ে আসতে থাকে ।

॥ ৮৪ ॥

চৈতন ধুবকে লক্ষ্য করছিল । খুব নিবিষ্ট চোখে এবং অখণ্ড মনোযোগে । এতকাল করেনি । দরকারও হয়নি । আর পাঁচজন মোদো মাতাল ইয়ারবাজের মতোই একজন ছিল ধুব । তফাৎ শুধু, ও মিনিস্টারের ছেলে । এখন আর ধুবর বাবা মিনিস্টার নয় বটে, কিছু কিছু কমও যায় না ।

সে যাই হোক, ধুবকে মিনিস্টারের ছেলে বলে কোনোদিন খাতির দেখায়নি চৈতন । ধুবর বন্ধুরা সবাই জানে বাপের সঙ্গে ধুবর বনিবনা নেই । তবু ধুবকে সবাই খাতির করে । কিছু তো বলা যায় না, শত হোক মিনিস্টারের ছেলে তো । উপকার না করুক ফাঁসিয়ে দিতে পারে । সকলেই জানে ধুবর পিছনে সর্বদা ছায়ার মতো গার্ড থাকে । পুলিশের লোক অবধি নজর রাখে । কাজেই ধুবকে খাতির না করে উপায় নেই । কিন্তু চৈতন কোনোকালে ধুবকে তার বাপের ছেলে হিসেবে দেখেনি । আলাদা বা বিশিষ্ট কেউ বলেও মনে করেনি । কিন্তু আজকাল একটু কেমন যেন লাগছে ওকে ।

মল্লিকপুরের এই বাগানবাড়িখানা শীতের দুপুরে রমরম করছে । বিস্তর পাখি ডাকছে গাছে গাছে । মাংসের গন্ধে মাত হয়ে আছে বাতাস । গাছতলায় শতরঞ্জি পেতে জনা দশেক ইয়ারদোস্ত তিনপাশি খেলছে, পাশে বোতল, গেলাস, গরম মাছভাজা আর ফুলুরি । জনা চারেক এমনি এমনি গাঁজাচ্ছে বসে বসে । তাদের মধ্যে দুটো গেঁজেল আছে । দুই গেঁজেল গাঁজাভরা সিগারেট অন্যদের

গছিয়ে দলে টানার চেষ্টা করছে। যেমনটা হয় আর কি। দু'তিনজন বেরিয়েছে ইদিক সিদিক একটু ঘুরে আসতে।

লরি ভর্তি এই যারা এসেছে, অর্থাৎ তারা যে খুব সুবিধের লোক নয় তা চৈতনের চেয়ে ভাল আর কে জানে? এদের মধ্যে তাদের আড্ডায় কলকাতার এক সেরা খুনে এবং পয়লা নম্বরের গুণ্ডা আছে। আছে অন্তত তিনজন শ্মাগলার, মেজো বা সেজো গুণ্ডা, মাতাল, মেয়েমানুষের কারবারী। এরা সব চৈতনের বন্ধু। ধুবরও। কিন্তু ধুব আজ মিশ খাচ্ছে না।

চৈতন একটা বোতল নিয়ে নিরিবিলা দেখে একটা পেয়ারা গাছের ছায়ায় এসে বসেছে। তিনপাশির উদ্বেজনা তার আজকাল সহ্য হয় না। হার্ট খারাপ। গ্যাঁজাতেও তার ভাল লাগে না। খামোখা মুখের ফেকো তোলা, কাউকেই তো নতুন কিছু বলার নেই, কারো কাছ থেকেই নতুন করে কিছু শোনারও নেই। চৈতন তাই গাছতলায় বসে আছে। কিন্তু শুধু শুধু বসে নেই। সে ধুবকে দেখছে। ঠিক তার মতোই ধুবও একটু আলগা হয়ে বসে আছে সিঁড়িতে। পিছনের সিঁড়িতে কনুই রেখে, সামনে দু'পা ছড়িয়ে। তার পাশে যে ছোকরাটা বসে আছে সে জ্যোতিষী। নাম পানু। তারাপীঠে যাতায়াত আছে। এক সময়ে হাওড়ার দানুবাবুর সাকরেদ ছিল। সিনেমা করতে গিয়েছিল একসময়ে। যাত্রার দল খুলেছিল। সব ছেড়েছুড়ে এখন হোলটাইম জ্যোতিষী। এ দলে সবাই যে সকলের বন্ধু তা নয়। কেউ হয়তো তার বাইরের বন্ধুকে ধরে এনেছে। অচেনা, আধচেনা বেশ কয়েকজন আছে। পানু এই আধচেনাদের দলে।

পানু এতক্ষণ ধুবর হাত দেখছিল। কী ফোরকাস্ট করল কে জানে। চৈতন দেখল, একটু বাদে ধুব ভারী বিরক্ত হয়ে হাতটা টেনে নিল। তারপর উদাস হয়ে বসে আছে ওই। পানু হাতের গেলাসে চুমুক মারতে মারতে ধূর্ত চোখে চারদিক নজর করছে। ধুবর হাতে গেলাস নেই, চোখের দৃষ্টি বহু দূরে।

চৈতন বিড়বিড় করে বলল, মরবে শালা, এবার মরবে। মরার আগে মুর্গীদের যেমন ঝিমুনি রোগ ধরে এই শালাকেও তেমনি ধরেছে।

তিনটে মেয়েছেলে এসেছে দলের সঙ্গে। তিনজনই ভাড়াটে। হাফ-গেরস্ত। বয়স কুড়ি-বাইশের মধ্যে। খুব ছলবলে, খুব স্মার্ট। কেউ দেখলে বুঝবে না যে হাফ-গেরস্ত। মনে হবে বালিগঞ্জের বড়লোক-বাড়ির মেয়ে। সারাদিন সঙ্গ দেবে, টলাটলি করবে, একটু-আধটু ছোঁয়াছুঁয়ি চলতে পারে, তবে তার বেশী কিছু নয়। সতী টাইপের আর কি।

সেই মেয়ে তিনজন এখনো ফিল্ডে নামেনি। সাজগোজ করছে। তারা ফিল্ডে নামলে ছল্লোড়বাজি লেগে যাবে। মেয়েমানুষ যেখানে নামে সেখানকারই হিউম্যান প্যাটার্ন পালটে যায়। কিন্তু চৈতন জানে ওই তিনটি ফুটফুটে মেয়ে ধুবকে একটুও টলাতে পারবে না। লরিতে ধুব ওই তিনটি মেয়ের সঙ্গে ড্রাইভারের কেবিনে বসে ছিল। চৈতন পিছনের ফুটোটা দিয়ে কয়েকবারই উঁকি মেরে দেখেছে, ধুব মুখ খাট্টা করে বসা, মেয়ে তিনজন সিটিয়ে বসে ফিসফিস করে নিজেদের মধ্যে কথা বলছে।

চৈতন উঠে গিয়ে শালপাতায় গোটাকয় মাছভাজা নিয়ে এল রান্নার জায়গা থেকে। আবার পেয়ারা গাছের তলায় বসে ধুবর দিকে চেয়ে বিড়বিড় করে বলল, ইমপোটেন্ট শালা। ব্রহ্মচারী হয়েছে বাটা। মরবি, মরবি। এই বলে রাখছি এসব ভাল লক্ষণ নয়।

একটা মেয়ে ফিল্ডে নামছে খোঁপা বাঁধতে বাঁধতে। কালো শাড়ি, কালো ব্লাউজ, ম্যাচিং টিপ। দারুণ দেখাচ্ছে। চৈতন হাঁ হয়ে দেখল। লরিতে আসতে ঘামটাম হয়েছিল, হাওয়ায় চুল হয়েছিল বেগোছ। এখন সব সেরেসেরে নতুন মেকআপ নিয়ে আসায় খোলটাই পাল্টে গেছে একেবারে। ছিপছিপে শরীরটা দেখলে বোঝা যায়, এরা বেশ তৈরি করে নিজেদের

সিঁড়ি দিয়ে নামতে নামতে মেয়েটা ধুবর কাছে একটু থামল। কী একটু বলল। ধুব শালা

তাকালও না, শুধু হাত নেড়ে খুব অবহেলার সঙ্গে কি একটা জবাব দিল। মুখ চুপ হয়ে গেল মেয়েটার।

তবে পুথিয়ে গেল। তিনপাতির আড্ডা থেকে একটা হাল্লা উঠল জোর, এসে গেছে! এসে গেছে! কমলি এসে গেছে!

দুন্দাড় উঠে ছুটে গেল কয়েকজন। একটা টেপ রেকর্ডার চালু হল। বিনচাক হিন্দি গান বলসাতে লাগল বাতাসে।

পর পর আরও দুটো মেয়ে ফিল্ডে নামছে। একজনের কমলা, অন্যজনের সবুজ শাড়ি। এ দুটিও দারুন। আবার একটা হাল্লাচিল্লা উঠল।

এরকমই হওয়ার কথা। এরকম হওয়াই নিয়ম।

চৈতন একটা মাছের কাঁটা দুটো মোটা আঙুল দিয়ে কষের দাঁতের ফাঁক থেকে টেনে বের করার ব্যর্থ চেষ্টা করতে করতে ফের আপনমনে বলল, শালা সতী।

তিনজন মেয়েছেলেকে কত আর ভাগাভাগি করা যায়? এক একজনকে নিয়ে তিন চারজন করে হামলে পড়ল। তিনপাতির আড্ডায় টিমটিম করছে মাত্র জনা চারেক। আর সব নাচানাচির জন্য তৈরি হয়েছে।

চৈতন চোখ বুজে একটা লম্বা শ্বাস নিল। তারপর বোতল হাতে নিয়ে উঠল। শালাকে একটু নাড়া দেওয়া দরকার।

ধুব! আই বে ধুব!

ধুব প্রথমটায় সাড়া দিল না।

আই বে শালা ধুব! শুনছিস?

ধুব চোখ ফেরাল।

কী ভাবছিস বসে বসে গাড়লের মতো?

কিছু ভাবছি না।

শিকনিক ভাল লাগছে না?

লাগছে। লাগবে না কেন?

ফুটি করতে এসেছিস তা অমন শোকাভাপা মুখ করে বসে আছিস কেন?

ওসব আমার ভাল লাগছে না আজ।

মাল টানছিস, না?

না। পেটে ব্যথা হয়।

মাছভাজা খাবি?

ইচ্ছে করছে না।

চৈতন একটা দীর্ঘশ্বাস ছেড়ে ধুবর পাশে বসে বলে, তুই কি সুইসাইড করবি ধুব?

ধুব অবাক হয়ে বলল, সুইসাইড! কেন, সুইসাইডের কী হল?

আমার ছোটো ভাই তোর মতো বয়সে সুইসাইড করেছিল। বেশীদিনের কথা নয়। মরার আগে তাকে ঠিক এরকম দেখতাম।

এরকম মানে?

ঠিক তোর মতো। কোনো কিছুতে গা নেই, কথা বললে উন্টেপাশটা জবাব দেয়, সব সময়ে অন্যমনস্ক, উদাস উদাস ভাব। তারপর একদিন মাঝরাতে গোঙানি শুনে তার দরজা ভেঙে ঢুকে দেখা গেল ব্রেন্ড দিয়ে শিরা কেটে পড়ে আছে। রক্তের সমুদ্র একেবারে।

বোকারা সুইসাইড করে।

তুই কি খুব চালাক?

ধুব হেসে ফেলে। বলে, হঠাৎ আমাকে দেখে কেন যে সুইসাইডের কথা তোর মনে হল !  
পাগল আছিস মাইরি।

চৈতন একটা চাপা হুকুর দিয়ে বলে, পাগল আছি তো আছি, তোর বাপের কী ? এখন সত্যি করে বল তো তোর হয়েছোটা কী ?

কিছু হয়নি। তুই আজকাল বড্ড আমার পিছনে লেগেছিস।

লাগাচ্ছিস বলে লাগছি।

কেন, একজন মানুষের কি একটু একা বসে থাকতে ইচ্ছে হয় না ?

হবে না কেন ? আমিও তো এতক্ষণ একা বসে ছিলাম। বসে বসে চুক চুক করে মাল খাচ্ছিলাম, মাছভাজা খাচ্ছিলাম। তুই কিছু করছিস না। শুধু বসে হাঁ করে চেয়ে আছিস। কেন ?  
তোকে নিয়ে আর পারি না চৈতন।

শুধু তাই নয়। তিনটে ডবকা মেয়েছেলে গা ঘেঁষে বসা তবু একটু ছৌক ছৌক করলি না, একবার ভাল করে চেয়ে দেখলি না। মেয়েমানুষের এই অপমান কি ধর্মে সহিবে রে !

ধুব খুব হাসল খাণিকক্ষণ। তারপর বলল, এই মেয়েগুলো বড্ড সাব-স্ট্যাণ্ডার্ড।

তা হোক না। সাব-স্ট্যাণ্ডার্ড ছাড়া ভাড়া খাটবে কেন ? তোর এত শুচিবায়ু কবে থেকে হল বল তো ?

হবে কেন ? বরাবরই ছিল। কোনোদিন আমাকে দেখেছিস মেয়েছেলের পিছনে ছৌক-ছৌক করে বেড়াচ্ছি ?

দেখিনি, কিন্তু দেখতে চাই। তুই নরম্যাল নোস কেন ?

আমার তো মনে হয় বিশ জন লোকের পক্ষে তিনজন ভাড়াটে মেয়েমানুষের পিছনে লাগাই অ্যাবনরম্যাল এবং ইনহিউম্যান।

চৈতন রাগের চোখে কিছুক্ষণ চেয়ে থেকে হঠাৎ ঠাণ্ডা মেরে গেল। তারপর বলল, তুই কি নারীদরদী নাকি রে ?

কি জানি কী। তবে ওই তিনজনের মধ্যে একজনকে আমি চিনি।

চিনিস ? কী সূত্রে চিনিস ?

সে তোকে বলা যাবে না। কিন্তু মেয়েটা এ দলে থাকায় আমার খারাপ লাগছে। কিন্তু কিছু করারও নেই।

তোর রিলেটিভ হয় ?

ওরকমই।

কোন মেয়েটা ?

তা তোর জেনে কাজ নেই।

চৈতন আবার বড় বড় চোখ করে ধুবর দিকে চেয়ে থেকে বলে, তুই তো রাজার ছেলে। রাজার বংশের মেয়ে কখনো হাফ-গেরস্ত হয় ? তুই গুল কাড়ছিস।

বংশের মেয়ে কে বলল ?

এই যে বললি রিলেটিভ !

না। তবে রিলেটিভের মতোই।

সত্যি বলছিস ?

সত্যি। মিথ্যে বলব কেন ?

মেয়েটা তোকে চিনতে পেরেছে ?

পেরেছে। খুব অস্বস্তি বোধ করছে।

একটু দেখিয়ে দে ধুব মেয়েটাকে।

কেন, কি করবি ?

কলকাতার গাড়িতে তুলে দিয়ে আসব

সাধে কি আর পাগল বলে তোকে ?

এতে পাগলামির কি আছে ?

মেয়েটাকে পাঠিয়ে দিলে তোরা ওকে পুরো টাকা দিবি ?

দেবো ।

তাতেও লাভ নেই । এটাই ওর ব্যবসা । এরকম ওকে করতেই হবে । খামোখা একটা সীন তৈরি করে লাভ কি ?

ওই মেয়েটার জন্যই কি এমন খাট্টা মুখ করে বসে আছিস ?

ধুব মাথা নেড়ে বলে, না । আমি ব্যাপারটা স্পোর্টিংলি নিয়েছি । আমার কোনো সংস্কার নেই, দেহের শুচিতা আমি মানিও না । তবে মেয়েরা যখন শরীরটাকে ভাড়া খাটায় তখন খারাপ লাগে । আমি সহ্য করতে পারি না ।

চৈতন আবার একটা দীর্ঘশ্বাস ফেলে বলে, তোর জন্য দুশ্চিন্তায় আমার নেশা ছুটে যাচ্ছে রে ধুব ।

কেন, দুশ্চিন্তার কি ?

তুই কি শেষে সামাজিক জ্যাঠামশাই হয়ে দাঁড়াবি ?

ধুব হাসল না । চুপ করে রইল ।

চৈতন তার আর একটু কাছ ঘেঁষে বসে নরম গলায় বলল, কোন মেয়েটা তা বলবি না ? বলে লাভ কি ?

একটু দেখি ।

দেখে কি হবে ? বাকি দু'জনের সঙ্গে ওর তফাৎ নেই । একইরকম ।

তবু একটু দেখিয়ে দে ।

ধুব রাগল না, শুধু একটু হেসে মাথা নেড়ে বলল, না রে । তা হয় না । ওকে আলাদা করে চেনার আর দরকার নেই ।

তুই কি ওর প্রতি একটু সফট ধুব ?

ধুব আবার হাসে, না । আমার ভিতরে সফটনেস বলে কিছু নেই ।

জানি । ধারাও সেই কথা বলে ।

ধুব চুপ করে থাকে ।

সামনে বিস্তৃত লন । দুপুরের ফলাও রোদে চারদিকে প্রকৃতির যেন এক উৎসব চলছে । লন্-এ তিনটে মেয়েকে নাচাচ্ছে মাতাল ও উদ্দগু পুরুষেরা । একটা আদিম দৃশ্য ।

তিনজনের মধ্যে কে তা অনেকক্ষণ চেয়েও বুঝতে পারল না চৈতন । দুঃখিতভাবে সে বোতলের মুখ নিজের মুখে তুলে নিল ।

ধুব !

বল ।

তুই আমাদের কাছ থেকে দূরে সরে যাচ্ছিস ।

কোথায় ? এই তো তোদের সঙ্গে জুটে চলে এসেছি ।

এসেছিস ! সত্যি এসেছিস !

তার মানে ?

সেই যে রবিঠাকুরের গানে আছে, তব মুখপানে চাহি এসেছে কি আসো নাই বুঝিব কেমনে ? ফিলজফি হচ্ছে ?

পাগল ! মাতালের পেটে কি ফিলজফি সয় রে ! লাইনটা মনে পড়ে গেল তাই বললাম । কিন্তু আমার সত্যি মনে হচ্ছে তোর খোলটা পড়ে আছে এখানে । তুই নেই ।

আমি সেই অর্থে কোথাও নেই রে চৈতন ।

উন্টে ফিলজফি ঝাড়ছিস গুরু ?

না । আমি বাস্তবিক কেমন যেন একটা নেই-নেই ভাবের মধ্যে আছি ।

আর একটা দীর্ঘশ্বাস ছেড়ে চৈতন বলে, আমরা সেই ভয় হচ্ছিল রে । কেবলই মনে হচ্ছে, ধুবটা কি বাঁচবে ?

চৈতন ফের বোতল মুখে তোলে এবং ঝুম হয়ে বসে থাকে ।

এরা কে কখন খাবে তার কোনো ঠিক নেই । লরি কখন ফিরবে তারও নিশ্চয়তা নেই । কিন্তু ধুবর আর ভাল লাগছিল না

নিঃশব্দে উঠল ধুব এবং পায়ে পায়ে লন-এর উল্টোদিক দিয়ে ঘুরে বাড়ির পিছনের উঠোনটায় এসে দাঁড়াল । দুটো কয়লার উনুনে দু'জন ঠাকুর প্রবল বেগে রান্না করছে ।

ধুবকে দেখে একজন গামছায় হাত মুছে বিগলিত মুখে এগিয়ে এসে বলে, কিছু দিই স্যার ? মাংস, মাছভাজা, চপ ?

ধুব একটু ইতস্তত করে । তার খিদে পেয়েছে ।

লোকটা কোথা থেকে একটা কাঠের চেয়ার টেনে এনে ঝেঁড়েঝুড়ে বসতে দেয় তাকে । ভাঁড়ে মাংস, শালপাতায় চপ আর মাছভাজা নিয়ে এসে দেয় । বলে, পোলাও হয়ে এল স্যার । একটু চেখে দেখবেন ।

ধুব একটা চপ খেয়েই উঠে পড়ে । তার ভাল লাগে না । পেটের মধ্যে একটা অস্বস্তি হচ্ছে । প্রবল একটা আলোড়ন ।

খেলেন না স্যার ?

না ।

টেস্ট ভাল হয়নি স্যার ?

খুব ভাল হয়েছে । কিন্তু আমার শরীরটা আজ ভাল নয় ।

ধুব উঠে উঠোনটা থেকে বেরিয়ে পিছন দিকে খানিকটা এগোয় । এদিকটা পতিত জমির মতো পড়ে আছে । আগাছায় ভরা । একটা মজা পুকুর । ধুব খানিকদূর এগিয়ে দাঁড়ায় । একটা বড় গাছকে ঝেঁপে ধরে আঁটেপুটে ঝেঁপে ফেলেছে একটা প্রবল লতা ।

জায়গাটা খুব নির্জন । ধুব ঘাসের ওপর আস্তে আস্তে বসল । তারপর শুয়ে পড়ল । পেটে গৌতলানোর ভাবটা প্রবল হচ্ছে । বমি আসছে । সম্ভবত গ্যাস হয়েছে ।

শুয়েই ধুব বুঝতে পারল, একটা ভুল করেছে সে । শোওয়া উচিত হয়নি । শরীর জুড়ে একটা ঝিমঝিমুনি উঠেছে তার । চোখে কেমন ধাঁধা লাগছে । মাথাটা চক্কর দিচ্ছে । হাতখানেক উঁচু ঘাস ও আগাছার মধ্যে ডুবে তার মনে হল, এখন অজ্ঞান হয়ে পড়ে থাকলে কেউ তাকে খুঁজে পাবে না ।

দুশ্চিন্তাটা বেশীক্ষণ রইল না ধুবর । আস্তে আস্তে চোখ বুজল । আঠার মতো লেগে গেল দু'চোখের পাতা ।

কতক্ষণ শুয়ে ছিল তা বোঝা মুশকিল । কিন্তু চোখ চেয়ে সে যাকে দেখতে পেল তাকেই দেখবে বলে একটা স্কীণ আশা ছিল তার ।

কী হয়েছে তোমার বলো তো ! শুয়ে আছো কেন এখানে ?

তুই যা নোটন ।

কালো শাড়ি পরা সুন্দর মেয়েটা ফ্যাল ফ্যাল করে খানিকক্ষণ তার মুখের দিকে চেয়ে থেকে থেকে কাদো কাদো হয়ে বলে, কতক্ষণ ধরে তোমাকে খুঁজছি । ডেবেছিলাম পালিয়ে গেছ । রান্নার

ঠাকুর বলল, এদিকে আসতে দেখেছে তোমাকে । ছুটে এসেছি । আর তুমি তাড়িয়ে দিচ্ছে ?  
 তোকে তাড়াবো না তো কাকে তাড়াবো ?  
 আমার সব দোষ, না ?  
 তবে কার দোষ ?  
 নোটন চোখের জলে মুখ ভাসিয়ে বলে, ঠিক আছে, আমার দোষ । কিন্তু তোমার কি হয়েছে  
 খুবদা ?

কিছু হয়নি ।

রাগ করছো কেন ? একটা থাপ্পড় মারো বরং ।

আমার কী হয়েছে জেনে কী করবি ? এত দরদ কবে থেকে হল ?

দরদ বরাবরই ছিল । তুমি বুঝবে না ।

না, আমি বুঝবো কেন ? বুঝবি তুই । কবে থেকে শুরু করেছিস এসব ?

বেশীদিন নয় । আমার দাদাকে জ্যাঠামশাই তাড়িয়ে দিয়েছিলেন তা জানো ?

তাড়িয়ে দিয়ে থাকলে এমনি দেয়নি ।

আমি কি বলেছি এমনি ? দাদারই দোষ ছিল । কিন্তু সেই থেকে দাদা নিকরদেশ ।

তোরা বাবার কাছে গেলি না কেন ?

গেলে যদি জ্যাঠামশাই রাগ করে ! যা রাগ !

খুব চুপ করে নোটনের মুখের দিকে চেয়ে থাকে ।

॥ ৮৫ ॥

ফেব্রার পথে ঘোড়ার গাড়ি যথাসাধ্য দ্রুত বেগেই চলছিল, তবু হেমকান্তর মনে হচ্ছিল, গাড়ি  
 যথেষ্ট দ্রুত চলছে না । বড় ধীর, বড় শ্লথ । দুবার বে-খেয়ালে তিনি হাঁফ মারলেন, জোরে ! জোরে !  
 গাড়োয়ান সপাসপ চাবুকের শব্দ করল । এবড়ো-খেবড়ো রাস্তায় গাড়িটা বিপজ্জনকভাবে নাচতে  
 থাকে ।

কালীবাড়ির সামনে গাড়ি দাঁড় করালেন হেমকান্ত । তাঁর ঈশ্বরবিশ্বাস খুব জোরদার নয়,  
 কালীবাড়িতে তিনি আসেনও না । আজ উদ্ভ্রান্তের মতো নেমে দ্রুত পায়ে গিয়ে ঢুকলেন মন্দিরের  
 চাতালে ।

বেশ রাত হয়েছে, আরতি শেষ হয়ে গেছে অনেকক্ষণ । মন্দিরের দরজা বন্ধ করার তোড়জোড়  
 হচ্ছে । হেমকান্তকে দেখে পুরোহিত শশব্যস্ত এগিয়ে এলেন ।

আজ্ঞে, আপনি ! আসুন আসুন ।

হেমকান্ত স্থির দৃষ্টিতে বিগ্রহের দিকে চেয়ে ছিলেন । মন্দিরের বড় বাতি নিবিয়ে দেওয়া হয়েছে ।  
 শুধু প্রদীপ জ্বলছে । সেই স্তিমিত আলোয় কালীর মুখ ভাল দেখা যাচ্ছে না ।

হেমকান্ত বিগ্রহের দিকে নিবিষ্ট চোখে চেয়ে পুরোহিতকে জিজ্ঞেস করলেন, আপনার এই বিগ্রহ  
 কতটা জাগ্রত ?

এরকম প্রশ্ন বড় একটা কেউ করে না ! পুরোহিত শঙ্কুচন্দ্র শর্মা একটু অবাক হয়ে বললেন,  
 আজ্ঞে মা বড় জাগ্রত ।

কিছু কামনা করলে পাওয়া যায় ?

মায়ের অদেয় কিছু নেই ।

আমার বিশ্বাস-টিশ্বাস কিছু নেই কিন্তু । নাস্তিকও বলতে পারেন । তবু আজ আমার বড় বিপদ ।

চাইলে পাবো ?

ভক্তি করে একটু চেয়ে দেখুন না, চৌধুরীমশাই ।

চাইব ? বলছেন !

পুরোহিত একটু হাসলেন ।

হেমকান্তকে চেষ্টা করতে হল না । আপনা থেকেই বুকটা থরথর করে কাঁপিয়ে একটা দীর্ঘশ্বাস বেরিয়ে এল । চোখ বুজতেই চোখের কোল ভরে গেল জলে । মনটা দীন হয়ে গেল, মাথা নুয়ে এল আবেগে । নিজেকে মনে হল, কত তুচ্ছ, কত নম্বর, কী অসহায় ।

একেই কি ভক্তি বলে ? কে জানে ! তবে দীন নম্র হৃদয়ে ভিথিরির মতো নিজের প্রিয় পুত্রের মঙ্গল প্রার্থনা করলেন তিনি । অশ্রুট স্বরে ডাকলেন, মা, মাগো !

পকেট থেকে কয়েকটা কাঁচা টাকা বের করে পুরোহিতকে দিয়ে হেমকান্ত বললেন, প্রণামী ।

একটা মানসিক করে যান, চৌধুরীমশাই ।

মানসিক ! বলে হেমকান্ত ভূঁকুঁচকে একটু ভাবলেন । তারপর বললেন, আচ্ছা, করা যাবে । আজ থাক । প্রথম দিনেই এতটা সইবে না ।

পুরোহিত মাথা নেড়ে বললেন, ঠিক আছে ।

হেমকান্ত গাড়িতে এসে উঠলেন । কোঁচা দিয়ে চোখের কোল ভাল করে মুছে নিয়ে মাথাটা পিছনে হেলিয়ে বসে রইলেন ।

বাড়িতে এসে শুনলেন, এখনো কোনো খবর নেই । হেমকান্ত রাত্রে আর জলগ্রহণ করলেন না । বিছানায় শুয়ে চোখ বুজে রইলেন । রিভলভারটা বালিশের পাশে রাখলেন । জানেন এটা কোনো কাজে লাগবে না ।

বাড়িতে বাচ্চারা ছাড়া কেউই শুতে গেল না । কনক আর জীমূত্‌বার বার বার বেরিয়ে গিয়ে বিভিন্ন জায়গা থেকে খবর আনছিল । অর্থাৎ খবর নেই । মেয়েরা হেমকান্তের পাশের ঘরে বসে নীচু স্বরে কথাবার্তা বলছিল ।

সময় কত দীর্ঘ ও মধুরগামী ! হেমকান্ত অনুভব করছিলেন । রাত যেন কাটতেই চায় না । ছেলেটা কোথায় গেল ? কেন গেল ? একবারও বলে গেল না কেন ?

এমনও হতে পারে, স্বদেশীরা হেমকান্তের ওপর আক্রোশবশত কৃষ্ণকান্তকে মেরে ফেলেছে । এমনও হতে পারে, কৃষ্ণকে ধরে নিয়ে গিয়েছে পুলিশ । খুব সম্ভব ছেলেটা বিপদের মধ্যে আছে । কিরকম বিপদ, কতটা সাজঘাতিক বিপদ তা হেমকান্ত কিছুতেই আন্দাজ করতে পারছেন না । বারবাড়িতে এক দুই করে কর্মচারী এবং প্রজারা জড়ো হয়েছে, টের পাচ্ছেন হেমকান্ত । অনেক লোকের গলার স্বর শোনা যাচ্ছে ।

হেমকান্ত উঠে জানালায় গিয়ে দাঁড়ালেন ।

হরি !

হরি জেগে ছিল । হেমকান্তের ডাক শুনে দৌড়ে এল, আন্তে !

ওরা কোনো খবর এনেছে ?

না । খবর কিছু পাওয়া যায়নি ।

পুলিস বাড়ি সার্চ করবে বলে কথা ছিল । তাদের খবর কী ?

এখনো পুলিশ আসেনি ।

আসবে । শেষ রাত্রে । তৈরি থাকিস ।

তৈরি আছি । তবে—

তবে কি ?

আপনার বিছানার ওটা কি সরিয়ে নেবো ?



না। রিভলভার আমার কাছেই থাকবে।

যে আঙুর।

হেমকান্ত দুর্বল বোধ করছিলেন। একটু তেষ্টা পাচ্ছে কিন্তু কেন যেন জলের গলাস ঠোঁটে ছোঁয়াতেও প্রবৃত্তি হল না। তেষ্টা নিয়েই হেমকান্ত শুয়ে পড়লেন। চোখ বুজতেই কৃষ্ণ নরুণকাটা মুখখানা উজ্জ্বল হয়ে ভেসে উঠল সামনে। হেমকান্ত আত্মবিশ্বস্তের মতো দুখানা হাত সামনের দিকে প্রসারিত করে দিয়ে বললেন, এসো কৃষ্ণ, কোলে এসো।

মিহি স্বরে কে যেন ডাকল, বাবা!

কে? বলে একটু চমকে চাইলেন হেমকান্ত।

বিশাখা মুখের ওপর ঝুঁকে পড়ে বলল, কাকে ডাকছিলেন? কৃষ্ণকে?

হেমকান্ত একটা দীর্ঘশ্বাস ছাড়লেন। লজ্জাও পেলেন। স্তিমিত গলায় বললেন, তার কি কোনো খবর এল?

না, তবে চিন্তার কিছু নেই।

তার মানে? সারা সন্ধ্যা রাত অবধি ছেলেটার খবর নেই, চিন্তা হবে না? বলো কী?

বিশাখা শিরে বসল। হেমকান্তের মাথায় হাত বুলিয়ে দিতে দিতে মৃদু স্বরে বলল, কৃষ্ণ ধারেকাছেই কোথাও আছে। আমার মনে হয় পুলিশ বাড়ি সার্চ করবে বলে ভয়ে কোথাও লুকিয়ে আছে।

বিশাখা খুব কঁদেছে নিশ্চয়ই। তার গলার স্বর ভারী। শ্বাসে এখনো কম্পন। হেমকান্ত বললেন, সে তত ভীকু ছেলে নয়। যাওয়ার সময় তোমাকে কিছু বলেনি তো!

আমাকে! বিশাখা মাথা নেড়ে বলল, তেমন কিছু বলেনি। বিকেলবেলায় একবার ওপরে এসেছিল। লালটুকে একটু আদর করল। তারপর চলে গেল।

লালটু!

মেজদার ছেলে।

বুঝেছি। কিছু বলেনি তাহলে?

না। আমার ধারণা চেনা জানা কারো বাড়িতে গিয়ে লুকিয়ে আছে।

থাকলে ভাল। কিন্তু ভয়টা আমার যাচ্ছে না।

মশারিটা টাঙিয়ে দিই, একটু ঘুমান।

না। মশারি টাঙালে দমবন্ধ লাগবে আজ। তোমরা বরং গিয়ে ঘুমোও।

আমাদের কারো আজ ঘুম হবে না বাবা।

আমারো হওয়ার কথা নয়। কটা বাজল?

রাত তিনটে।

ওঃ। তাহলে তো ভোর হয়েই এল। বাইরে ওরা এখনো আছে?

আছে। বারবাড়িতে সবাই বসে আছে।

ওদের কিছু খাওয়াও তো হয়নি

হয়েছে। চিড়ে গুড় কলা দেওয়া হয়েছে সবাইকে।

শটীন সব খবর জানে

বিশাখা হঠাৎ কথা বলতে পারল না। লজ্জায় মাথা নুইয়ে ফেলল। হেমকান্ত প্রথমটায় মেয়ের এই প্রতিক্রিয়ার কারণটা বুঝলেন না। পরে বুঝলেন। বললেন, বড় যোগ্য ছেলে। বিপদে নির্ভর করা যায়। সে কি খবরটা পেয়েছে জানো?

পেয়েছেন। খুব কুণ্ডার সঙ্গে বলে বিশাখা, থানায় গিয়ে বসে আছেন।

হেমকান্ত মেয়ের ব্রীড়াবনত মুখের দিকে চেয়ে ক্ষণেকের জন্য একটা সুখের অনুভূতি বোধ

করলেন। তারপর বললেন, ঠিক আছে। এ বাড়িতে আসতে সে বোধহয় এখন লজ্জা বোধ করছে। বিবেচক ছেলে। আমি জানি কৃষ্ণর জন্য তার উদ্বেগ কম নয়।

আমি যাই বাবা ?

লজ্জা পেও না, মা। বোসো। এমনি করে মাথায় হাত বুলিয়ে দাও। মনু কোথায় বলতে পারো ?

মন্দিরের দালানে বসে আছেন। হরিকাকাও আছেন। কেউ ঘুমোয়নি।

চেনাজানা সব বাড়িতে খোঁজ নেওয়া শেষ হয়েছে ?

হয়েছে। দূরে যারা গেছে তারা সকলে এখনো ফেরেনি। এই অস্ত্রটা আপনি কাছে রেখেছেন কেন, বাবা ?

কেন রেখেছি ! হেমকান্ত এটুকু বলে সামান্য ভাবলেন। তারপর মাথা নেড়ে বললেন, কেন যে রেখেছি তা জানি না। মনে হল একটা অস্ত্র কাছে রাখা ভাল। আজ সব উল্টোপাল্টা ঘটনা ঘটছে।

এতে কি গুলি ভরা আছে ?

আছে। এক কাজ করো এটা ওই দেরাজে রেখে দাও। সাবধানে নাও, ট্রিগারটায় আঙুল দিও না।

বিশাখা উঠে রিভলভারটা দেরাজে রেখে আসে।

হেমকান্ত মেয়ের দিকে চেয়ে বলেন, তুমি এখন যাও, মা। ঘুমোতে না পারো অস্ত্রত একটু বিশ্রাম নাও। আমি বরং শুয়ে শুয়ে একটু কৃষ্ণর কথা ভাবি।

বিশাখা হেমকান্তের গায়ে একটা ঢাকা দিল। তারপর নিঃশব্দে চলে গেল।

হেমকান্ত একা ঘরে জেগে থেকে কৃষ্ণর কথা ভাবতে লাগলেন। যত ভাবেন তত বুকটা আনন্দে বিষাদে উথাল-পাখাল করে আর চোখ বার বার ভরে যায় জলে।

চোখের ওপর দিয়ে একটি অস্ত্রহীন রাত বড় মন্সুর গতিতে কেটে গেল। হেমকান্ত ক্রান্তিতে চোখ বুজে শুয়ে থেকে বহুবীর টের পেলেন তাঁর বড় দুই ছেলে, মেয়ে এবং বউরা বার বার নিঃশব্দে ঘরে এসে তাঁকে দেখে গেল। বোধহয় ওদের আশঙ্কা হেমকান্ত শোকে না মরে-টরে যান।

ভোঁরের সামান্য ফর্সা ভাব দেখা দিতেই হেমকান্ত উঠে পড়লেন।

হরি !

একডাকে হরি এসে সামনে দাঁড়ায়, যে আজ্ঞে।

হরির গলার স্বরও ভারী। অর্থাৎ কৃষ্ণর জন্য সেও সম্ভবত কৈদেছে। হেমকান্ত জিজ্ঞেস করলেন, পুলিশ কি এসেছে ?

আজ্ঞে না।

আসার কথা ছিল, এল না কেন ?

হরি চুপ করে থাকে।

হেমকান্ত ফের জিজ্ঞেস করলেন, কোনো খবর পাওয়া গেল ছেলেটার ?

আজ্ঞে না। বলতে গিয়ে হরি সামান্য ফুঁপিয়ে ওঠে।

হেমকান্ত বিরক্ত হয়ে বলেন, কাঁদছিস কেন ? তার তো এখনো কোনো খারাপ খবর আসেনি !

আজ্ঞে না।

তবে ?

আপনার বড় কষ্ট হচ্ছে যে !

কষ্ট ! বলে হেমকান্ত খুব ফ্যাকাশে একটু হেসে বলেন, সারাটা জীবন পায়ের ওপর পা দিয়ে অন্যের খেটে-খাওয়া পয়সায় আরামে দিন কাটিয়েছি। এখন ভগবান একটু কষ্ট দেবেন না ? ধর্ম বলে যদি কিছু থাকে তবে তার একটা বিচারও তো আছে।

হরি চূপ করে রইল।

হেমকান্ত প্রাতঃকৃত্য সারতে আজ বেশী সময় নিলেন না। তাড়াতাড়ি ঘরে ফিরে এসে বেরোনের পোশাক পরতে পরতে হরিকে ডেকে বললেন, গাড়ি জুততে বল।

গাড়ি তৈরিই আছে।

আমি একটু থানায় যাচ্ছি। এদিকটা সব দেখেখুঁনে রাখিস।

আপনি চিন্তা করবেন না।

যদি এর মধ্যে সার্চ করতে চলে আসে তবে সব দেখাবি, যা দেখতে চায়। কিন্তু সব সময়ে সঙ্গে থাকিস।

আজ্ঞে।

হেমকান্ত সিঁড়ির মুখেই দাঁড় করানো ঘোড়ার গাড়িতে উঠে বললেন, থানা। তাড়াতাড়ি চালা।

গাড়ি ছুটল। সকালে ব্রহ্মপুত্রের ধার-ঘেঁষা রাস্তায় চলন্ত গাড়ি থেকে হেমকান্ত এই দুঃখের মধ্যেও মুগ্ধ দৃষ্টিতে প্রকৃতির রূপ দুটো ক্লাস্ত, অনিদ্রাজনিত জ্বালাভরা চোখে দেখছিলেন আর স্নিগ্ধ হচ্ছিলেন। মানুষের কত বিপদ, কত উদ্বেগ, কত অশান্তি, কিন্তু প্রকৃতি কেমন শান্ত, নির্বিকার, বৈরাগী! ওয়ার্ডসওয়ার্থের কাব্যের মধ্যে এরকম প্রকৃতি-বীক্ষণের বড় আবেগময় অভিজ্ঞতার কথা আছে। গাছপালা, নদী, আকাশ, পাহাড়, সমুদ্র, ফুল, পাতা, পাখি, প্রজাপতি, কীটপতঙ্গের যে জীবন সেই জীবনে এই দ্বন্দ্ব নেই, এই উদ্বেগ নেই।

থানার সামনে এত ভোরেও ভীড় দেখে ভারী অবাক হলেন হেমকান্ত। ভীড়ের জন্য তাঁর গাড়ি একটু দূরেই থামল।

গাড়োয়ান নেমে এসে বলল, কিছু একটা হয়েছে কর্তাবাবু।

কি হয়েছে খোঁজ নিয়ে আয়।

গাড়োয়ান গেল। হেমকান্ত দুরু দুরু বুক হাত দিয়ে চেপে ধরলেন। কৃষ্ণর কোনো কিছু হয়নি তো! ভীড়টা তার জন্যই নয় তো! কৃষ্ণকান্ত পকেটে গুলিভরা রিভলভারটা নিয়ে এসেছেন। কেন তা তিনি বলতে পারবেন না। বুড়ো বয়সে ছেলের জন্য উদ্বেগে মনটা যেন কেমন হয়ে গেছে। নইলে যে জিনিসকে তিনি সর্বদা এড়িয়ে চলেছেন সেই আগ্নেয়াস্ত্র স্পর্শ করে ভরসা পাচ্ছেন কেন আজ? এক হাত বুকে চেপে রেখে অন্য হাত পকেটে ভরে তিনি রিভলভারটা ধরে রইলেন।

গাড়োয়ান খুব উত্তেজিতভাবে ছুটে এল।

কর্তা সর্বনাশ!

কী হয়েছে?

দারোগাবাবুকে গুলি করেছে আজ্ঞে।

হেমকান্ত দরজাটা খুলে নামলেন, বলিস কি?

আজ্ঞে। শচীনবাবুও আছেন ভীড়ের মধ্যে দেখলাম।

শচীন। ছুটে গিয়ে ডেকে আন তো।

গাড়োয়ান যায়। কয়েক মিনিট পরেই শচীন শশব্যস্তে এসে বলে, আপনি এসেছেন

কী ব্যাপার বলো তো।

শচীন ইতস্তত করে বলে, সঠিক ঘটনা জানি না, আমি কাল রাত থেকেই থানায় বসে আছি। আপনাদের বাড়ি রেড হব খবর পেয়েই চলে আসি। তারপর শুনলাম, কৃষ্ণ মিসিং। সেজন্য রামকান্ত রায়ের সঙ্গে কথা বলার দরকার ছিল।

তারপর কী হল?

উনি খুব ব্যস্ত ছিলেন। রাত বারোটা নাগাদ একজন ইনফর্মার এসে নাকি খবর দেয় যে, কেওটখালির দিকে স্বদেশীদের একটা ঘাঁটির সন্ধান পাওয়া গেছে। সেই শুনেই উনি ছোটোখাটো

ফোর্স নিয়ে রওনা হন। তার পর আর ফেরেননি। একটু আগে খবর এল শট ডেড।

ডেড ? ঠিক জানো ?

তা জানি না। তবে গুজব ছড়িয়ে গেছে। খুব ষ্ট্রং গুজব। ম্যাজিস্ট্রেট সাহেব নিজে অ্যাকশনে নামছেন। প্রচুর ধরপাকড় হবে।

ডেডবন্ডি এসেছে ?

শচীন শুকনো মুখে মাথা নেড়ে বলে, না।

কৃষ্ণর কোনো হদিশ করতে পেরেছে।

না। আর সেইটেই চিন্তার বিষয়।

হেমকান্তর বুকটা কেঁপে উঠল আবার। বললেন, চিন্তার কারণ তো বটেই। একটু কোনো খবরও পাওয়া যায় না ?

শচীন খুব সোজাসুজি হেমকান্তর দিকে চেয়ে থেকে বলল, একটা খবর আমার কাছে আছে।

হেমকান্ত কাঁপা গলায় বললেন, খারাপ খবর ?

একদিক দিয়ে দেখতে গেলে খারাপই।

এসো গাড়িতে গিয়ে বসি। প্রকাশ্যে রাস্তায় এসব কথা না হওয়াই ভাল।

গাড়িতে দুজনে মুখোমুখি বসার পর হেমকান্ত জানালা দরজা বন্ধ করে দিলেন। তারপর খানিকক্ষণ দম নিয়ে নিজেকে প্রস্তুত করে বললেন, এবার বলো।

শচীন মৃদুস্বরে বলল, কৃষ্ণ বোধহয় স্বদেশীদের খপ্পরে পড়েছে।

খপ্পরে বলতে কী বোঝাতে চাইছে ? গুম করেছে ?

না। আমি বলতে চাইছি, স্বদেশীদের সঙ্গে কোনো সূত্রে ওর যোগাযোগ হয়েছে। ওকে কাজে লাগানো হচ্ছে।

স্বদেশী বলতে কোন দল ? কার দল ?

বীরু সেনের দল।

হেমকান্ত চূপ করে গেলেন। বীরু সেন কে তা তিনি জানেন না। তবে জানতে চাইলেনও না।

তিনি জিজ্ঞেস করলেন, কৃষ্ণকে দিয়ে ওদের কী কাজ হবে বলো তো ! ও তো নেহাত বাচ্চা ছেলে।

বাচ্চাদের দিয়েই কাজ হয়। বিশেষ করে কৃষ্ণর মতো ব্রাইট ছেলে পেলে তো কথাই নেই।

কিন্তু যদি খুনখারাপি করায় ?

শচীন মুখটা নামিয়ে নিল। কিছু বলল না।

হেমকান্তর হঠাৎ মনে হল, শচীন কিছু গোপন করতে চাইছে। তিনি একটু ঝুঁকে বললেন, কোথায় রেখেছে ওকে জানো ?

শচীন মুখ তুলল। চোখের দৃষ্টি করুণ। বলল, যতদূর জানি কেওটখালিতে।

যেখানে রামকান্ত রায়কে মারা হয়েছে ?

তাই তো গুজব।

হেমকান্ত শচীনের হাতটা চেপে ধরে বললেন, যাবে ? চলো একবার গিয়ে ছেলটাকে দেখে আসি।

শচীন স্তিমিত গলায় বলল, কি করে যাবেন ? পুলিশ গোটা এলাকা ঘিরে ফেলেছে। কাউকে ওই অঞ্চলে ঢুকতে দেবে না।

ঠিক দেবে। আমরা ঠিক পথ করে নেবো।

পুত্রের জন্য উদ্বেগে পাগল বাপের পাগলামি শচীনের অজানা নয়। সে ভ্রান একটু হেসে বলল, আমি সে চেষ্টা আগেই করেছি। ওই অঞ্চলে যাওয়ার কোনো উপায় নেই।

পুলিস কি অ্যাকশন নিচ্ছে ওখানে ?

নেওয়ারই তো কথা ।

যদি কৃষ্ণর কিছু হয় ?

শচীন জানে, কৃষ্ণ একা নয়, বীরু সেনের গোটা দলটাকেই পুলিশ হয় ধরবে, নয়তো পৃথিবীর বুক থেকে মুছে দেবে । ইংরেজ ম্যাজিস্ট্রেট নিজে সেখানে হাজির আছে । তবে শচীন সেকথা বলল না, বরং বলল, না তেমন ভয় পাওয়ার কিছু নেই । স্বদেশীরা কি অত বোকা ? নিশ্চয়ই পালিয়ে গেছে । কিছু খবর পেয়েছো ?

এটুকু জানি যে, এখনো কেউ ধরা পড়েনি বা মরেওনি ।

হেমকান্তর হাত পা বুক সবই কাঁপছে । তিনি অস্থির বোধ করতে লাগলেন । বললেন, ঠিক আছে । তুমি এখন কী করবে ?

আমি থানায় আর কিছুক্ষণ অপেক্ষা করি । খবর যা আসার তা থানাতেই আসবে ।

খবর পেলে আমাকে জামাবে সঙ্গে সঙ্গে ।

নিশ্চয়ই । আপনি চিন্তা করবেন না ।

শচীন নেমে গেল । হেমকান্ত গাড়ি ছুটিয়ে ফিরতে লাগলেন ।

কিন্তু ফিরলেন না । নদীর ধারে গাড়ি দাঁড় করিয়ে নামলেন । গাড়োয়ানকে বললেন, গঙ্গা মাঝি ঘরে আছে কিনা দেখ তো ! থাকলে ডাক ।

গঙ্গা মাঝি তলব পেয়ে ছুটে আসে ।

কর্তা ডাকছেন ?

নৌকোটা আছে ?

আছে । যাবেন ?

যাবো । চল ।

নিঃশব্দে হেমকান্ত নৌকায় গিয়ে ওঠেন । মাঝারি নৌকো । গঙ্গা মাঝি বৈঠা ধরতেই হেমকান্ত হাত বাড়িয়ে বলেন, আমাকেও একটা দে ।

দুই সবল হাতের বৈঠার তাড়নায় নৌকো কেওটখালির দিকে ছুটেতে থাকে । রোদে ঝকঝক করছে নদী । চমৎকার শান্ত্রী ছড়িয়ে আছে চারদিকে ।

হেমকান্ত ডাকলেন, গঙ্গা ।

আজ্ঞে কর্তা ।

কাল রাতে এই রাস্তা দিয়ে পুলিশ গেছে দেখেছিস ?

আজ্ঞে হ্যাঁ কর্তা ।

কতজন ?

মেলা পুলিশ ।

গুলিগোলার শব্দ শুনেছিস ?

আজ্ঞে না ।

পুলিস কেওটখালিতে কেন গেছে জানিস ?

গঙ্গা মাথা নাড়ল, না কর্তা ।

কৃষ্ণকে কাল থেকে পাওয়া যাচ্ছে না, জানিস ?

গঙ্গা দুঃখিত মুখে বলে, সব ওই স্বদেশীদের কাজ । আমি তো সারা রাত ছোটো কর্তাকে খুঁজতে নৌকো বেয়ে এখানে সেখানে গেছি ।

সারা রাত, তবে তো তোর নৌকো বাইতে কষ্ট হচ্ছে এখন !

না কর্তা, কষ্ট কি ? গতরের কাজে কষ্ট নাই

অনেকক্ষণ নৌকো চলল। শহর শেষ হল। নির্জন নদীর ধার। নিরবচ্ছিন্ন গাছপালায় শ্যামলিমা।

এই কেওটখালি। ওই শ্মশান গঙ্গা অশ্রুট স্বরে বলে।

দুইজনে নৌকো ভেড়ায়। পাড়ে কাদা, কাঁটা গাছ, আগাছার জঙ্গল। নিস্তব্ধতা।

গঙ্গা একটা খুঁটো পুঁতে নৌকো বাঁধে। হেমকান্ত নেমে চারদিকে চেয়ে দেখেন। একটু ইতস্তত করে খাড়াই বেয়ে উঠতে থাকেন ওপরে। গঙ্গা নৌকোর খোল থেকে একটা লম্বা লাঠি টেনে নিয়ে হেমকান্তর পিছু পিছু উঠতে থাকে।

শ্মশানের ঘাটে মস্ত বটগাছের তলায় দাঁড়িয়ে হেমকান্ত চারদিকে তাকিয়ে কিছু খোঁজেন। এ সব দিকে তাঁর বড় একটা আসা হয় না। সামনে একটা সুড়কির লাল রাস্তা। তার ওপাশে গাছপালার ফাঁকে ফাঁকে কিছু টিনের চাল দেখা যাচ্ছে।

গঙ্গা নিঃশব্দে পাশে এসে দাঁড়িয়ে বলে, এদিকটায় নয়।

তবে কোনদিকে?

আরো দক্ষিণে।

তুই জায়গাটা চিনিস?

চিনি। বীরবাবুরা আমার নৌকোয় অনেকবার এসেছেন।

তাহলে তুই চিনিস। ওরা লোক কেমন?

ভদ্রলোক।

দলে কয়জন আছে?

বেশী না। দশ বারোজন হবে।

প্রতুল ওদের দলে আছে?

আজ্ঞে হ্যাঁ। উনিই চিনিয়ে দিয়েছিলেন আমাকে।

কৃষ্ণকে কি তুই এখানে এনেছিস কাল?

আজ্ঞে না। ছোটো কর্তা আসতে চাইলেও আনতাম না।

হেমকান্ত একটা দীর্ঘশ্বাস ফেলে পা বাড়িয়ে বললেন, চল।

চলুন।

রাস্তাটা ধরে পূর্বদিকে খানিকটা এগোনোর পর ডানহাতে একটা সরু পথ পাওয়া গেল। গঙ্গা সেই দিকে দেখিয়ে বলল, এই কাছেই।

কয়েক রশি পথ। চারদিকে ঘন গাছপালা, আগাছা, বসতিহীন জমি। সে সব ডিঙিয়ে খানিকদূর এগোবার পর একটা খোড়ো ঘর নজরে পড়ল। চারদিকটায় ফাঁকা পোড়ো জমি। নির্জন।

কেউ তো এখানে নেই বলে মনে হচ্ছে। হেমকান্ত সভয়ে বললেন।

থাকবার কথাও নয়। এক বজ্রগম্ভীর গলা পিছন থেকে বলে উঠল।

॥ ৮৬ ॥

ধ্রুব আধবোজা চোখে নোটনের মুখের দিকে চেয়ে থাকে। প্রয়োজনের চেয়ে একটু বেশীই চেয়ে থাকে।

বলতে নেই নোটনের মুখখানা ভারী ছমছমে সুন্দর। আভিজাত্য নেই ঠিকই, কিন্তু চটক আছে, যৌন আবেদন আছে। নোটনের মুখে আভিজাত্যের ছাপ থাকার কথাও নয়। কিন্তু একটু পবিত্রতা আশা করা যেত। কারণ ওর দাদু আর দাদুর বাবা দুই পুরুষ ধরে ধ্রুবদের দেশের বাড়ির বাঁধা পুরুত

ছিল। গুরুগারি করত। নোটন মনু ঠাকুমার দাদার সাক্ষাৎ নাভনী। ওই তেজস্বিনীর রক্তের উত্তরাধিকার এর মধ্যে কিছুটা থাকার কথা ছিল।

নোটনের মুখের দিকে চেয়ে এই সবই বোধ হয় খুঁজছিল ধুব।

কিন্তু নোটন সেই চোখের অন্যরকম মানে করে সিটিয়ে গিয়ে বলল, ওরকম তাকিয়ে আছে কেন?

আমার চোখকে ভয় পাস?

পাই না আবার? যা রাগী তুমি।

রাগী বলে ভয় পাস, না কি নিজের মনে পাপ আছে বলে?

এ কথায় নোটনের চোখ ছলছল করতে লাগল। কতটা অভিনয়, কতটা সত্যিকারের অভিব্যক্তি তা ধরা মুশকিল। ধুব সেটা বোঝার জন্যই নোটনের ক্রন্দনোন্মুখ মুখখানার দিকে ফের একদৃষ্টে চেয়ে থাকে।

নোটন হাঁটু জড়ো করে বসেছে, দু'হাতে জড়ানো দুই হাঁটু, তার ওপর খুঁতনি ছিল। এখন মুখটা সরিয়ে আঁচলে চোখ মুছে বলল, আজ কেবল বকবেই বুঝি?

বকেছি নাকি? কই, বুঝতে পারিনি তো?

বকেছো। বকতে তোমরা পারো, কিন্তু আমাদের অবস্থাটা তো জানতে না!

মুকুল এখন কোথায়?

নোটন তার কচি ঠোঁট ভারী সুন্দর ভঙ্গীতে উল্টে বলল, কি জানি কোথায়? আগে ভাবতাম ঠিক একদিন ফিরে আসবে, সংসারের দায়িত্ব নেবে। এখন আর ওসব ভাবি না। কোথাও আছে বোধ হয়, নাহলে মরেটরে গেছে।

তোরা খোঁজ করিসনি। ঠিকমতো খোঁজ করলে পাত্তা পাওয়া যেত।

পেয়ে লাভ কি? শুধু মা একটু ঠাণ্ডা হত, আর কি হবে বল? বেকার ছেলেরা বাড়ি বসে বসে কেবল গারজিয়ানি করে ছোটোদের ওপর। গেছে ভাল হয়েছে।

ধুব স্থির দৃষ্টিতে দেখছিল নোটনকে। মায়ের পেটের দাদা সম্পর্কে এত ঔদাসীনা খুব স্বাভাবিক নয়। তবে বোধ হয় অস্বাভাবিকতাই আজকাল স্বাভাবিক। মানুষের মন আজকাল এরকমই।

ধুবর শরীর এখন ততটা খারাপ লাগছিল না। শুধু গলা পর্যন্ত অস্থলের একটা জ্বালা। অস্থল আজকাল সবসময়কার সঙ্গী। এর ভয়ে সে মদ খায় না, তবু হচ্ছে। শরীরে কিমুনির ভাবটাও আছে। কিন্তু নোটনের সামনে বসে থেকে শরীরকে খুব একটা টের পাচ্ছিল না সে। নোটনের এই অধঃপতন তার নিজেরও ব্যক্তিগত অপমান বলে মনে হচ্ছে। তেমন কোনো কারণ নেই মনে হওয়ার। সামান্য যে কারণটা ছিল তাকে কারণ বলে না ভাবলেই হয়। বেশ কয়েক বছর আগে নোটনের সঙ্গে তার একটা বিয়ের প্রস্তাব এনেছিল নোটনের মা। কৃষ্ণকান্ত তাদের ওই স্পর্ধায় এমন চটে গিয়েছিলেন যে শুধু হাতে-মারা বাকি ছিল। কিন্তু কৃষ্ণকান্ত শেষ অবধি ভাতে ওদের ঠিকই মেরেছেন। নোটনের দাদা মুকুল কৃষ্ণকান্তর ওকালতি ব্যবসার কেরানী ছিল। ডালহৌসির অফিসে বসত। একটু কুঁড়ে ছিল ছেলোটা, কামাই করত। এছাড়া তেমন কোনো দোষের কথা ধুব জানে না। কৃষ্ণকান্ত মুকুলকে তাড়ালেন তো বটেই, তার আগে যথেষ্ট অপমান করলেন। সম্ভবত মুকুলের আত্মসম্মান জ্ঞান কিছু প্রখর ছিল। সে সেই যে পালাল আর কখনো ফিরে আসেনি। নোটনদের অবস্থা খারাপই ছিল, আরো খারাপ হতে লাগল। মনু ঠাকুমা ওদের আশ্রয় দিতে পারত, দেয়নি। মনু ঠাকুমার অঙ্ক এক স্নেহ আছে কৃষ্ণকান্তর ওপর। তার ধারণা কৃষ্ণ সাধারণ ছেলে নয়, দেবতার অংশ। কৃষ্ণ কখনো ভুল করে না, অন্যায় করে না।

কৃষ্ণকান্ত সম্পর্কে এরকম হঠকারী ধারণা আরো অনেকেরই আছে। যেমন ছিল ধুবর দাদু হেমকান্তর। তাঁর ধারণা ছিল, কৃষ্ণকান্ত ভারতবর্ষের প্রধানমন্ত্রী হবে। দেশের আরো অনেক

আহাম্মকেই সম্ভবত এরকম কোনো ধারণা ছিল। কৃষ্ণকান্ত প্রধানমন্ত্রী না হলেও ভারতবর্ষের রাজনীতিতে নিজস্ব একটা জায়গা করে নিতে পেরেছেন এইসব ধারণাকে ভাঙিয়েই।

ধুবর স্থির ও অনুসন্ধানী চোখের ওপর চোখ রাখতে পারল না নোটন। মুখ নামিয়ে নিল। তারপর মৃদুস্বরে বলল, আমাদের তোমরা শেষ করে দিতে চেয়েছিলে ধুবদা। দেখ, আমরা শেষ হয়ে গেছি।

ধুব একটা বড় রকমের শ্বাস ছেড়ে বলল, নাটক-ফাটক করিস নাকি ?

চকিতে একবার মুখের দিকে চেয়ে নোটন বলল, করি। করব না কেন ?

তাই বেশ সাজানো ডায়ালগ দিচ্ছিস।

সাজানো হবে কেন ? কথাটা খারাপ শোনাতে পারে, কিন্তু সত্যি কিনা বলো !

আমি তোদের শেষ করতে চেয়েছি একথা কে বলল ?

তোমার কথা তো বলিনি। বলেছি তোমরা।

আমরা বলতে কে কে ?

ধরো জ্যাঠামশাই।

জ্যাঠামশাই খার্ড পারসন সিঙ্গুলার নাহার। তোমরা বলতে তাকে বোঝায় না।

ও বাবা, অত কথা আমি জানি না। শুধু জানি তোমরা সব একরকম।

খুব জানিস তো !

রাগ কোরো না ধুবদা। আমি তোমাদের নিন্দে করছি না।

ভয় পাচ্ছিস কেন ? রাগ করলেও আমি তো কোনো ক্ষতি করব না। করার সাধ্য নেই।

নোটন মাথা নীচু করে বসে রইল খানিকক্ষণ। তারপর বলল, দাদার দোষ থাকতেই পারে।

কিন্তু আমরা তো কোনো অন্যায় করিনি। মনু ঠাকুমা পর্যন্ত আমাদের দূর-দূর করে খেদাল।

ধুব একটু হাসল। নোটন বোধ হয় জানে না ওদের ওপর কৃষ্ণকান্তের এত রাগের প্রকৃত কারণটা কি। তাই সে বলল, তোর দাদার দোষটাই বড় নয় রে নোটন। আরও একটা ব্যাপার আছে।

নোটন একটু চমকে উঠে ধুবর দিকে চেয়ে বলল, কী বলো তো !

তুই কি জানিস না ?

নোটন কি ভেবে হঠাৎ ফের মাথা নীচু করে বলে, সে তো জানি। তোমার সঙ্গে আমার বিয়ের প্রস্তাব তো ?

তবে জানিস।

সেটা মার খুব ভুল হয়ে গিয়েছিল।

ভুল ! ভুল কিসের ?

মা তোমাকে দেখে একেবারে মুগ্ধ। তারপর মা-মরা ছেলে বলে বোধ হয় মায়াও ছিল খুব। আমাকে অনেক অল্প বয়েস থেকে মা শিখিয়েছিল, ওই ধুবই তোর বর।

বটে ! তুইও তাই ভাবতি ?

ভাববো না ! শিবরাত্রিরে শিবের মাথায় জল ঢালতে পর্যন্ত তোমাকে ভাবতে হয়। এক সময়ে সেটাই তো বিশ্বাস করতাম।

ধুব হাসতে গিয়েও একটু লাল হল লজ্জায়।

নোটন একটু বিষণ্ণ গলায় বলে, মা তো বোকা, তাই ওই-কাণ্ড করেছিল। মনু ঠাকুমা মাকে বহুবার বলেছে, ও কাজ করতে যেও না, কৃষ্ণ খেয়ে ফেলবে। তবু মা কেমন বেহেড হয়ে গেল। কিন্তু সেই জন্যই কি জ্যাঠামশাইয়ের এত রাগ !

ধুব একটা শ্বাস ফেলে বলে, সামন্ত রক্ত তো। চট করে গরম হয়। শোন নোটন, তোরা ফুটি



কর। আমি চুপি-চুপি কেটে পড়ি।

নোটন একটু কাছে সরে এসে বলে, তোমার মুখ দেখে মনে হচ্ছে শরীর ভাল নেই। কি হয়েছে বলো তো !

অম্বল। আজকাল হচ্ছে খুব।

এখনো কি ড্রিংক করো ?

করি। ছেড়ে দেওয়ার চেষ্টা করছি।

আমার বাবা বলত তোমাদের বংশে নাকি মদের চলন নেই। কেউ কখনো খায়নি। তাই বাবার ধারণা ছিল, তুমি বোধ হয় মদ খেয়ে মরেই যাবে। সহ্য হবে না।

ধুব এ কথাটায় হাসল না। তবে মাথা নেড়ে বলল, মদ খেতে হলে হেরিটেজ দরকার হয় না। তবে একথাটা ঠিক যে আমার নেশাও নেই। জোর করে খাই। না খেলে কিছু ফিল করি না।

জোর করে খাও কেন ?

তোকেন কেন বলব ?

কেন বলবে না ?

সব কথা তোর জানার দরকার নেই।

নোটন আচমকা লঘু গলায় বলে, ভুলে যাচ্ছে কেন আমি তোমার বউ হলেও হতে পারতাম।

এই প্রগলভতা ধুব নীরবে সহ্য করল। তবে একটু বাদে তেতো গলায় ছোট্ট করে বলল, ভাগ্য ভাল যে হোসনি।

কেন ? ভাগ্য ভাল কেন বলছো ?

বড্ড দু' নম্বরী হয়ে গেছিস রে নোটন।

বিয়ে হলে হতাম ?

যারা হয় তাদের মধ্যে বীজাণু থাকে।

নোটন হঠাৎ খামচে ধরল ধুবর হাত। প্রবল শ্বাসের সঙ্গে তীব্র স্বরে বলে, কক্ষনো নয় ! কিছুতেই নয়। বরং বিয়ে করোনি বলেই আজ আমি এরকম। এখনো তোমার ওপর রাগে অভিমানে আমি অনেক সময় একা ঘরে ফুঁপিয়ে ফুঁপিয়ে কাঁদি।

ভুল করিস।

করি তো। কিন্তু কি করব ? মা কেন ভুল শিখিয়েছিল ?

সেতোর মা জানে আর তুই জানিস। শোন এখন সীন ক্রিয়েট করে লাভ নেই। তোর একটা ছোটোভাই আছে না ?

আছে। চঞ্চল।

তার বয়স বোধ হয় পনেরো ষোলো হল !

বেশী। আঠারো।

আমার কাছে চঞ্চলকে আসতে বলিস।

চাকরি দেবে ?

দিতে পারি।

কত টাকা মাইনের চাকরি ?

হঠাৎ এ প্রশ্ন কেন ?

নোটন একটু হাসে, আমাকে এসব করতে দেবে না তো ? কিন্তু এসব করে আমি যা রোজগার করি চঞ্চল তার অর্ধেক টাকাও মাইনে না পেলে তো হবে না।

ধুব ফের স্থির দৃষ্টিতে চেয়ে থেকে বলে, স্ট্যাণ্ডার্ড অফ লিভিং খুব বেড়েছে তাহলে ! অ্যাঁ !

একটু বেড়েছে। আর শোনো, আমার ভাল করতে চেও না।

তোর ভাল করতে কে চাইছে ! ভালই তো আছিস । আমার আবার বেশী সতীপনা ভালও লাগে না । চঞ্চলকে চাকরি দিতে চাইছি তোর জন্য নয় । অন্য কারণে ।

কি কারণ সেটা তো বলবে ।

একটা প্রায়শ্চিত্ত করতে ।

কিসের প্রায়শ্চিত্ত ?

আমার বাবা বিনা দোষে তোর দাদাকে তাড়িয়েছিল । আমি বাবার পাপের প্রায়শ্চিত্ত করতে চাই ।

নোটন খানিকক্ষণ স্থির হয়ে বসে রইল । তারপর হঠাৎ মুখ ঝুঁপিয়ে ঝুঁপিয়ে কাঁদতে লাগল ।

ধুব ধীরে ধীরে উঠল । কিছু না বলে আস্তে আস্তে পিছনের ফটকের দিকে এগোতে লাগল । বেলা পড়ে এসেছে । সামনের দিক থেকে মাতাল গলার কিছু স্তিমিত কোলাহল আসছে । এখন কেউই আর স্বাভাবিক নেই ।

কয়েক পা এগোতেই নোটন ডাকল, কোথায় যাচ্ছে ?

চলে যাচ্ছি ।

একটু দাঁড়াও । আমার দরকার আছে ।

আমার সঙ্গে তোর আর দরকার কিসের ?

আছে । শোনো, আমি তোমার সঙ্গে যাবো ।

ধুব মাথা নেড়ে বলে, পাগল ? ওরা তোকে পয়সা দিয়ে এনেছে । ছাড়বে কেন ?

নোটন উঠে এসে ধুবর মুখোমুখি দাঁড়িয়ে বলল, সবাই ডেড ড্রাংক । কেউ টের পাবে না ।

ড্রাংকদের আমি চিনি রে নোটন । ঠিক টের পাবে ।

তাছাড়া টাকা আমি সবটা আগাম নিয়ে নিয়েছি ।

কত দিয়েছে ?

হাজার ।

বাঃ, তোর রেট তো ভাল ।

নোটন মাথা নামায় ।

ধুব বলে, দিনে হাজার হলে তোর মাসের রোজগার ত্রিশ হাজার ।

মোটাই নয় । এরা বেশী দিয়েছে । তাছাড়া সব দিন এসব হয় নাকি ?

এরা তোকে বেশী দিল কেন ?

জেদাজেদি করে ।

সেটা কিরকম ?

আমি ফিলমে ছোটখাটো রোল করি, জানো ?

শুনেছিলাম । তোর ছবি আমি দেখিনি । একটাও ।

দেখবে কি ? রিলিজই হয়েছে মাত্র দুটো । একটা সুপার ফ্লপ ।

তারপর বল রেট বেশী পেলি কেন ।

আজ আমার শুটিং ডেট ছিল । ডিরেকটর ছাড়বেন না, এরাও ছাড়বে না । টানাটানিতে হাজার টাকা পেয়ে গেলাম ।

বাঃ, ব্যবসার মাথা তো পরিষ্কার ।

ঠাট্টা করছো ?

না । শুধু ভাবছি এত টাকা পেয়েও যদি পালিয়ে যাস তবে পরে এরা বদলা নেবে কিনা ।

নিলে নেবে । কিন্তু তোমাকে দেখার পর আমার আর এখানে থাকতে ইচ্ছে করছে না ।

কেন, আমি কি দোষ করলাম ?

কি করেছে তা জানি না। কিন্তু আমাকে নিয়ে চলে।

নিয়ে যাওয়ার কি আছে। হেঁটে বা রিকশায় স্টেশনে গিয়ে ট্রেনে চাপলেই কলকাতা।  
আমাকে এত ঘেন্না করো কেন ধুবদা ?

ঘেন্না কেন হবে। ওয়ার্কিং গার্লদের ঘেন্না করার কি আছে। তবে তোকে বলি, যা তোর রোট  
বলছিস তার দশ ভাগের এক ভাগ মাইনেও চঞ্চলকে কেউ দেবে না।

নোটন একটু হাসল। বলল, তোমার প্রেস্টিজে লাগছে, না ?

লেগেছে একটু। এসব করে রোজগার করছিস তারও আবার দেমাক কিসের ?

দেমাক তোমাকে দেখাবো না তো কাকে দেখাবো ? তোমার ওপরেই যে আমার সবচেয়ে বেশী  
রাগ।

সে তো বুঝলাম, রাগ থাকতেই পারে। কিন্তু এদের কেন বঞ্চিত করবি ? পরে হয়তো ঝামেলা  
করবে।

করবে না।

কেন করবে না ?

আমি বলব, ধুব চৌধুরি আমাকে তুলে নিয়ে গিয়েছিল।

তাতে কি হবে ? ওরা মানবে ?

খুব মানবে। তোমাকে ওরা ভীষণ ভয় খায়।

তা বলে আমার বদনাম দিবি ?

বদনাম একটু নাও ধুবদা, আমার জন্য নাও। বিয়ে করোনি আমাকে, তোমার জন্য কম-দুঃখ  
সইতে হয়নি, তার বদলে এটুকু বদনাম সহ্য করবে না ?

কিন্তু এই নাটকটারও দরকার ছিল না।

ছিল। আজ শুধু তোমার সঙ্গে অনেকটা পথ ফিরব। আর কোনোদিন হয়তো সুযোগ হবে না।

ধুব হা ! জাতীয় একটা শব্দ করে বলল, চল তাহলে। আর দুটো মেয়ে কোথায় ?

খুব খেয়ে পড়ে আছে।

বাগানের চোরাপথে গাছপালার আড়ালে ফটকের দিকে হাঁটতে হাঁটতে ধুব হঠাৎ কি ভেবে একটু  
চোখ ফেরাল। দেখল, চৈতন উঠোনের পাশটায় দাঁড়িয়ে সোজা তাকিয়ে আছে তাদের দিকে।

একজন দেখছে। নোটন চাপা গলায় বলল। বলেই ঘোমটা তুলে মুখ আড়াল করল।

ধুব বলল, ভয় নেই। ও চৈতন। আমার খুব ইন্টিমেট ফ্রেন্ড।

ওকে ডেকো না তা বলে। আজ শুধু তুমি আর আমি।

এ যে আধুনিক গানের লাইন রে। ভ্যাট।

মীজ ধুবদা, পায়ে পড়ি।

ডাকব কেন ? চৈতন এখন অনেক খাবে। যাবে না। তোর ভয় নেই।

দু'জনে নিঃশব্দে রাস্তায় এসে পড়ল। ধুব একটা রিকশার জন্য এদিক ওদিক চাইছিল। নোটন  
বলল, রিকশা না।

কেন রে ?

একটু হাঁটব। পাশাপাশি।

ও বাবা ! তুই যে বাড়াবাড়ি করছিস নোটন।

মোটাই বাড়াবাড়ি নয়। বলে নোটন তার হাতব্যাগ খুলে একটা অ্যান্ডাসিডের ব্লিপ বের করে  
দুটো বড়ি ছিড়ে ধুবর দিকে বাড়িয়ে বলল, আমারও ভীষণ অব্বল হয়। সঙ্গে রাখি। খাও।

খুব ড্রিংক করিস নাকি নোটন ?

খুব করলে কি চলে ? কাজ করে খেতে হয় না ? অল্পখ খাই।

তবে অশ্বল হয় কেন ?

কি যে বলো না । অশ্বল বুঝি শুধু ড্রিংক করলেই হয় । আমার ওপর দিয়ে কত অনিয়ম যাচ্ছে, খাওয়ার সময় অসময় নেই, রাতে ঘুমোনের সময়ও হয়তো হল না । এসব থেকে হয় । কতদূর নষ্ট হয়েছিস নোটন ?

নষ্ট ! নষ্ট কিসের ?

ও তাই তো ! আমিও তো নষ্টামিকে খারাপ ভাবি না । সরি !

তুমি ভাবো । ভাবো বলেই বললে । বরং আমার কাছেই আর ওসব নীতির মূল্য নেই ।

আমার কাছেও নেই রে । ঘোমটাটা এবার ফেলে দে ।

কেন দেবো ?

আর তো কেউ দেখছে না ।

তুমি তো দেখছো ।

আমি কি দেখবো ?

নোটন একটু ঝিলিক দিয়ে হাসে, আজ ঘোমটাটা থাক । ঠিক এইভাবে একদিন তোমার পাশে পাশে হাঁটবো বলে সেই শিশুকাল থেকে স্বপ্ন দেখছি । আজ সত্যিই হাঁটছি তো, তাই ঘোমটাটা থাক ।

তোর এখনো এইসব রোমান্টিক ইচ্ছে হয় ?

হয় । কেন হবে না ? ওই যে বয়ঃসন্ধিতে তোমাকে বর বলে মনে হয়েছিল, তাইতেই সর্বনাশ হয়ে গেল আমার । কখনো কোনো মেয়েকে বিয়ের আগে বলতে নেই, ওই তোর বর । ভীষণ খারাপ ওটা, জানো ?

বুঝলাম ।

কোনোদিনই বুঝবে না ধ্রুবদা । মনে মনে হাসছো ।

হাসছি তোর ঘোমটা দেখে লোকে কি ভাবছে ?

ভাবাতেই তো চাইছি । বড়ি দুটো খাও ।

হাতের বড়ি দুটো মুখে ফেলে চিবোয় ধ্রুব । বলে, শীতের কিছু গায়ে দিলি না । এখানে খুব ঠাণ্ডা ।

আমার বেশ লাগছে ।

হুইস্কি খেয়েছিস নাকি ?

না । আজ খাইনি ।

আমার সম্মানে নাকি ?

বলতে পারো ।

ধ্রুব আড়চোখে তাকাল । খুব কাছ ঘেঁষে ঘোমটা মাথায় হাঁটছে নোটন । গা থেকে সুন্দর গন্ধ আসছে । একটু বিভ্রমের মতো । একটু মায়া । পৃথিবীটা এরকম একটা মায়াই । ক্ষণস্থায়ী সম্পর্ক, ক্ষণস্থায়ী তার তাৎপর্য ।

বজ্রনির্ঘোষের মতো কণ্ঠস্বরটি শুনে হেমকান্ত স্থানুবৎ দাঁড়িয়ে রইলেন । কিছুক্ষণ তাঁর শরীরে সাড় রইল না, মনটা থমকে গেল । তাঁর যে নিজস্ব জগৎ সেখানে উচ্চকিত কোনো ঘটনা ঘটে না, শব্দ হয় না । সবকিছুই সেখানে কোমল, নস্র, মৃদু । এরকম একটা পারিপার্শ্বিক তিনি তৈরি করে

নিয়ে সেখানে নিবাসিত করেছেন নিজেকে। পৃথিবীর সূক্ষ্ম সূক্ষ্ম সব মায়া সেখানে শিল্পের মতো তত্ত্বজাল বিস্তার করে। বাইরের শব্দময়, ঘটনাবহুল পৃথিবীর সেখানে প্রবেশ নিষেধ। তাই এই কর্কশ, সুরহীন, হিংস্র কণ্ঠস্বরটি তাঁর ভিতরে সব স্পন্দন যেন কয়েক নিমেষের জন্য স্তব্ধ করে দিল। যেন বা থেমে গেল রক্তের প্রবাহমানতা, বন্ধ হয়ে গেল হৃৎপিণ্ড।

তারপর খুব ধীরে ধীরে হেমকান্ত মুখ ফেরালেন। যা দেখলেন তা আরো চমকে দেয় তাঁকে। জটাজুটধারী এবং সামান্যমাত্র রক্তাশ্রুর পরিহিত এক সাধু কটমট করে চেয়ে আছে তাঁর দিকে। সাধুটি বয়স্ক, কেননা জটের চুল সবই প্রায় সাদা, গায়ে লোলচর্ম, দেহটি কৃশকায় এবং তপোক্রিষ্ট। শুধু চোখ দুটি ভয়ংকর রকমের উজ্জ্বল।

হেমকান্ত অনুমান করলেন লোকটির বয়স আশির কাছাকাছি। এই বয়সে কৃশ শরীরের ভিতর থেকে এরকম বাজখাঁই স্বর কি করে বেরোয় সেটাই রহস্য।

হেমকান্তের বিস্ময়বোধ স্তিমিত হলে তিনি বললেন, কারো থাকার কথা নয় কেন? কোথায় গেছে সব?

লোকটা আবার একটা পিলে-চমকানো হংকার দিল, পেগাম করেছিস? সাধু সন্ত দেখলে পেগাম করতে হয় জানিস না?

হেমকান্ত দ্বিধায় পড়লেন। সাধুসঙ্গ বড় একটা করেননি জীবনে। প্রণামের পাটও বহুকাল চুকে গেছে। অভ্যাসই নেই। একটু ইতঃস্তত করে প্রণামের জন্য এগিয়ে যেতেই সাধু ফের হংকার দিল, ঝুঁতে নেই। দূর থেকে গড় কর।

হেমকান্ত মাটির ওপর হাঁটু গেড়ে বসে মাথা নোয়ালেন। উঠে বললেন, আমি আমার ছেলের খোঁজে এসেছি। শুনেছি সে বীরুবাবুর দলের সঙ্গে ছিল।

সাধু দাঁত কিড়মিড় করছিল। রাগে না? কোনো শারীরিক কারণে তা কে বলবে! তবে এবার একটু গলার পর্দা নামল। বলল, তারা এখানে থাকবে কেন? বোকা নাকি? পুলিশ আসবে খবর পেয়ে কালই সব সরে পড়েছে।

শুনলাম গুলিগোলা চলেছে!

ওই উত্তরে আরো মাইল দুই দূরে একটা পাটস্কেত আছে। সেখানে খুব লড়াই হয়েছে। দুটো মরেছে। এ পক্ষের একটা, ও পক্ষের দুটো।

দারোগাবাবু ছাড়া আর কে?

তা জানি না। তোর ছেলে কত বড়?

বেশী বড় নয়।

বাচ্চা নাকি?

ঠিক তাও নয়।

খোঁজ নে। নাম কি বল তো।

কৃষ্ণকান্ত চৌধুরি।

তোর নাম কি?

হেমকান্ত চৌধুরি।

অ। তোরা সেই জমিদার বুঝি?

আজ্ঞে হ্যাঁ।

তা তোর বংশের ছেলে স্বদেশী করছে কি রে! অ্যাঁ। এ যে দৈত্যকূলে প্রজ্ঞাদ। দে, কিছু প্রণামী দে।

হেমকান্ত বিরক্ত হলেন। মাগুনে লোককে দু চোখে দেখতে পারেন না। তাই চূপ করে রইলেন।

সাধু একটা গা-জ্বালানো হাসি হেসে বলল, তুই কৃপণ নাকি ?

হেমকান্ত গম্ভীর মুখে বললেন, প্রণামী কিসের ? আমি প্রণামী-টনামী দিই না ।

হাড়-কেল্লন কোথাকার ! কৃপণের বড় কষ্ট তা জানিস ! টাকার ওপর বসে থেকেও ভোগ করতে পারে না । জ্যান্ত যম । তুই কৃপণ কেন ?

কৃপণ কে বলল ?

তবে প্রণামী দিচ্ছিস না কেন ? দে, দে, দিয়ে ফেল । যত দিবি তত বাঁচবি ।

সাধু বেশ আত্মবিশ্বাসের সঙ্গে হাত বাড়িয়ে দিল । হেমকান্ত বিরক্ত বোধ করলেন । লোকটার হাবভাব সন্দেহজনক এবং ব্যবহার অপমানকর । তাঁকে 'তুই' করে বলে এমন লোকের সংখ্যা খুবই কম । অন্য সময় হলে তিনি লোকটাকে উপেক্ষা করে স্থানত্যাগ করতেন । কিন্তু এখন ছেলের জন্য চিন্তায় তাঁর বুক শুকিয়ে আছে । এ লোকটা কিছু খবর দিতে পারে বলেই মনে হয় । এ পক্ষের দুজন মরেছে, তাদের মধ্য কৃষ্ণ নেই তো ?

হেমকান্ত পকেট থেকে একটা টাকা বের করে লোকটার হাতে দিয়ে বললেন, স্বদেশীদের মধ্যে যে দুজন মারা গেছে তাদের নাম কি ?

সাধু টাকাটা কাঁধের একটা গেরুয়া ঝোলায় রেখে বলল, তোর ছেলে মরেনি । ভয় নেই । তবে মরবে ।

তার মানে ?

দারোগাটাকে ওই মেরেছে কিনা ।

ও মেরেছে ? হেমকান্ত হাঁ করে রইলেন ।

মেরেছে বলতে মেরেছে ! একেবারে সাক্ষাৎ নিজের হাতে ।

বাজে কথা ।

আমি নিজের চোখে দেখেছি, বুঝলি ব্যাটা !

হেমকান্ত তবু চেয়ে রইলেন । চোখে অবিশ্বাস । কিছুক্ষণ কথাই এল না মুখে । তারপর বললেন, আমার ছেলে একাজ করতে পারে না ।

সাধু চারপাশটা একটু দেখে নিল । তারপর মৃদু একটু হেসে বলল, সংসারী মানুষের অনেক দোষ রে শালা । একটা দোষ কি জানিস ? বড্ড মায়ায় জড়িয়ে পড়ে । ওই মায়ার চোখ দিয়ে দেখে বলে ছেলেপুলে সম্পর্কে সত্যি কথাটা মানতে চায় না । ভাবে লোকে বানিয়ে বলছে ।

আপনি দেখেছেন ?

বলছি না, নিজের চোখে দেখেছি ?

কী দেখেছেন ?

সে তোকে বলব কেন ? একটা টাকা দিয়ে কি মাথা কিনেছিস নাকি ?

হেমকান্ত ভারী অবাক হয়ে গেলেন । বললেন, টাকা দিয়ে মাথা কিনব কেন ?

তোদের চিনি না ভেবেছিস ? টাকাটা দিলি, কিন্তু যেম্মা করে দিলি, দিয়েই নানা রকম খোঁজ খবর করতে লাগলি । ভাবছিস টাকা যখন দিয়েছি তখন এই জন্তুটা সব গড়গড় করে বলে দেবে !

হেমকান্ত আসলে তাই ভেবেছিলেন । কিন্তু লোকটা তা বুঝল কি করে ? হেমকান্ত লজ্জিত হয়ে বললেন, তা ভাবছি না । আমি আমার ছেলের জন্য বড্ড দুশ্চিন্তায় আছি ।

তোর ছেলে ! তোর ছেলে হবে কেন ? ছেলে কি তোর নিজের হাতে গড়া ? ছেলে ভগবানের, তুই নিমিস্তমাত্র । বাড়ি যা, গিয়ে কথাটা বসে বসে ভাব । শাস্তি পাবি ।

ঘটনাটা বলবেন না ?

খটমটে এবং খিটখিটে সাধুটা হঠাৎ ফোকলা একটা হাসি হাসল । বলল, খুব জানতে ইচ্ছে করছে ?

জানা দরকার। ছেলেটার কি হল না জানলে স্বস্তি বোধ করছি না।

তাহলে আর একটা টাকা দে। দেখিস অবহেলায় দিস না।

হেমকান্ত বিনাবাক্যে আর একটা টাকা বের করে সাধুর বাড়ানো হাতে দিলেন।

সাধু সেটা ঝোলায় পুরে বলল, আমি কিন্তু স্বদেশীদের দলের নই। দেখিস বাবা, পুলিশ লেলিয়ে দিস না। ওরা বড় মারে শুনেছি।

না, আপনি বলুন। আমি বড় অশান্তিতে আছি।

বলছি। আয়, ওই সর্বক্ষেতের মধ্যে গিয়ে বসি। এ জায়গায় লোকজন এসে পড়বে।

হেমকান্ত রাজি হলেন। সাধু তাঁদের সর্বক্ষেতের মধ্যে নিয়ে এল। এবড়ো খেবড়ো জমির ওপর গ্যাঁট হয়ে বসে সাধু বলল, আমি ওই পাটক্ষেতের ধারে একটা বটগাছের তলায় থাকি। স্বদেশীরা ছিল দশ বারো জন। সকলের মুখ চিনি। কাল মাঝরাতে ঘুমিয়েছিলাম, এমন সময় গুলিগোলায় আওয়াজ শুনে উঠে পড়ি। ধুনিটা উল্কে দিয়ে মজা দেখি, পাটক্ষেতের মধ্যে কুরুক্ষেত্র হচ্ছে। অন্ধকারে ভাল দেখা না গেলেও দৌড়বাঁপ হুড়োহুড়ি খুব বোঝা যাচ্ছিল। কিছুক্ষণ এরকম চলার পর একটা দশাসই লোক, তার গায়ে পুলিশের পোশাক, দৌড়ে পালিয়ে আসছিল। তার ডান হাত দিয়ে খুব রক্ত গড়াতে দেখেছি।

তারপর ?

তার হাতে একটা খেঁটে বন্দুক ছিল, কিন্তু মনে হয় তাতে গুড়ুল ছিল না। লোকটা ছুটেতেও পারে না তেমন। ইয়া লাশ, খেয়ে দেয়ে শরীরে খুব ননী লাগিয়েছে। হ্যা-হ্যা করে হাঁফাচ্ছিল। এসে সটান পড়ল আমার ধুনির সামনে, বাবা গো, বাঁচাও।

আপনার কাছে ?

তবে আর বলছি কি ? আমি বুঝতে পারছিলাম, ব্যাটার আয়ু বেশীক্ষণ নয়। লোকটা পড়তেই পাটক্ষেত থেকে বড় একটা দা হাতে একটা ভারী সুন্দর চেহারার ছেলে বেরিয়ে এল। পরনে ধুতি, গায়ে একটা বালাপোষের কোট। খুব ফর্সা, লম্বা আর মজবুত তার চেহারা।

হেমকান্ত ডুকরে উঠলেন, কৃষ্ণ !

তা আর বলতে।

তারপর কি হল ?

নিজের চোখে দেখেছি বললাম না ! আমার চার হাতের মধ্যে ঘটনা। সেই ছোঁড়া এসে এক কোপে ঘাড়টা অর্ধেক নামিয়ে দিয়ে এক দৌড়ে চলে গেল।

হেমকান্ত শিউরে চোখ বুজলেন। দৃশ্যটা তিনি মনশ্চক্ষে দেখতে পাচ্ছিলেন, কিন্তু বিশ্বাস হচ্ছিল না। খুন এ বংশের রক্তে নেই। যতদূর তিনি জানেন, তাঁর পূর্বপুরুষেরা কেউই খুন করেননি বা কাউকে লাগিয়ে অন্য কাউকে খুন করাননি। লেঠেল বা পোষা গুণ্ডা থাকা সত্ত্বেও। তাহলে কৃষ্ণ একাজ করল কি করে ? তাঁর ছেলে হয়ে ? তিনি যে পিপিড়ে মারতেও মায়া বোধ করেন !

সাধু হেমকান্তের মুখের ভাব লক্ষ্য করছিল। কথা বলল না। কিন্তু মৃদু মৃদু হাসতে লাগল।

হেমকান্ত চোখ খুলে সাধুর মুখের সেই হাসি দেখে হুঁ কৌটকালেন। জিজ্ঞেস করলেন, তারপর ?

আর কি ? অন্ধকারে তেমন কিছু দেখারও ছিল না। টর্চের আলো পড়ছিল খুব এধার ওধার। শেষ অবধি কয়েকটা পুলিশ কাঁকাতে কাঁকাতে পাটক্ষেত থেকে বেরিয়ে এসে আমার ওপর হামলে পড়ল। দারোগাকে কে খুন করেছে, তা তাদের বলতে হবে।

আপনি বললেন ?

পাগল নাকি ? বললে স্বদেশীরা এসে কেটে রেখে যাবে না আমাকে ? তাই আমি সাফ বলে দিয়েছি ভয়ে ভিড়মি খেয়ে পড়েছিলাম, কিছু দেখিনি।

তারা বিশ্বাস করল ?

সে তারাই জানে। তবে সাধু দেখে আর ঘাঁটায়নি।

হেমকান্ত একটা দীর্ঘশ্বাস ফেলে বললেন, তারা হিন্দু বলে সাধু দেখে ছেড়ে দিয়েছে। ধর্মাত্ম ভীতু জাত তো। কিন্তু এরপর সাহেব আসবে। তারা ছেড়ে কথা কইবে না। দরকার বোধ করলে বেঁধে থানায় নিয়ে বেত মারবে। তখন কি করবেন ?

সাধু বড় বড় চোখে চেয়ে বলল, তাই করে নাকি স্নেহগুলো ?

করে। ওদের অত ধর্মভয় নেই।

তাহলে তো ঝুলিয়েছিস আমাকে।

আপনি বরং এক কাজ করুন। কিছু টাকা দিচ্ছি, এখান থেকে সরে পড়ুন। কাউকে কিছু বলবেন না।

সাধু তৎক্ষণাৎ হাতটি পেতে বলে, দে তাহলে।

যাবেন ?

যাবো বলেই তো বেরিয়ে পড়েছি। আমি কি বোকা ? দে, তাড়াতাড়ি দে।

হেমকান্ত পকেটে হাত দিয়ে বললেন, পাঁচটা টাকা দিলে হবে তো ?

তুই খুব কৃপণ, দে, তাই দে। কৃপণের বড় টাকার কষ্ট রে।

হেমকান্ত টাকাটা দিয়ে বললেন, স্বদেশীরা কোনদিকে গেছে জানেন ?

সেটা জেনে কি হবে ? তারা কি কোথাও বসে থাকবে ? যে যদিকে পারে পালিয়েছে। বাড়ি যা।

কোনো হদিশ দিতে পারেন না ?

ছেলের জন্য ভাবছি তো ! পাগল। ছেলে যের্যে তোর নয় এটা বুঝবার চেষ্টা কর গে। যখন ছোটো ছিল তখন পেলেক্সিস, পুষেক্সিস, এখন দুনিয়ার হাতে ছেড়ে চলে যা।

ছেলেটা যে বড় ছোটো।

আমি কত বছর বয়সে সম্যাস নিই জানিস ?

কত বছর ? বলে হেমকান্ত বিস্মিত চোখে তাকালেন।

শুনলে হাসবি। মায়ের বুকে দাগা দিয়ে বাবাকে কাঁদিয়ে বেরিয়ে পড়েছিলাম। তাও এ জন্মে বৃষ্টি সিদ্ধি হল না। ফের আসতে হবে।

দার্শনিক কথাবার্তা হেমকান্তর এখন সহ্য হচ্ছিল না। সাধুদের তিনি দু চোখে দেখতেও পারেন না। বিরস মুখে বললেন, না জানলে বলবেন না। কিন্তু পুলিশের হাতেও পড়বেন না যেন।

সাক্ষী রাখতে চাস না তো ! আমিও কি সাক্ষী থাকতে চাই রে। কি যে সব হুড়যুদ্ধ বাবা, মানেই ঝুঁজে পাই না।

এই বলে সাধু উঠল। বলল, তোদের তো নৌকো আছে।

আছে।

তবে আমাকে শব্দগুঞ্জে পৌঁছে দে। ওখান থেকে হাঁটা দেবো।

কোনদিকে যাবেন ?

ওরে তোর ভয় নেই। আমি গারো পাহাড় পেরিয়ে হিমালয়ের দিকে চলে যাবো। সাহেব আমাকে ঝুঁজে পাবে না।

না পাওয়াই দরকার। আপনি যদি সাক্ষী দেন তবে আমার ছেলের ফাঁসী হবে।

জানি। আমি কারো নিমিত্ত হতে চাই না, এবার ওঠ। বেলা হল।

হেমকান্ত উঠলেন।

সাধুকে শব্দগুঞ্জে এক আঘাটায় নামিয়ে দিয়ে ভারাক্রান্ত মনে ফিরে এলেন বাড়িতে। যখন এলেন



তখন সারা শহর থমথম করছে। রাস্তায় লোকজন নেই। বাচ্চারা পর্যন্ত চলাফেরা করছে না।

রঙ্গময়ী অপেক্ষায় ছিল। হেমকান্ত বাড়িতে পা দিতে না দিতেই ছুটে এল।

কোথায় গিয়েছিলে?

হেমকান্তের ভিতরটা দুশ্চিন্তায় কেমন বোবা হয়ে গেছে। কিছুক্ষণ রঙ্গময়ীর দিকে চেয়ে থেকে মাথা নেড়ে বললেন, পাওয়া গেল না।

তুমি ওকে খুঁজতে গিয়েছিলে? রঙ্গময়ী রীতিমত ধমক দেয়।

কেন, তাতে দোষ হয়েছে?

খুঁজতে গিয়ে নিজের বিপদ ডেকে আনবে যে!

তার মানে?

স্বদেশীরা যদি কৃষ্ণকে নিয়ে গিয়ে থাকে তবে ওরাই ওকে দেখবে। কিন্তু তোমাকে কেউ দেখবে না।

তার মানে?

তোমাকে রক্ষা করার কেউ তো নেই।

আমার কি হবে?

কি হয়েছিল মনে নেই?

হেমকান্ত একটু চুপ করে থেকে বললেন, এর চেয়ে মৃত্যুই শ্রেয়। আমি এই মনের ভার আর বইতে পারব বলে মনে হয় না।

পারতে হবে। কৃষ্ণর জোরই তো তুমি। কত ভালবাসে তোমাকে।

এই কি ভালবাসার লক্ষণ?

নয় কেন?

একবার বলেও গেল না কোথায় যাচ্ছে, কেন যাচ্ছে।

ঠিক কাজই করেছে। এ তুমি বুঝবে না। তবে একথা জেনো, ও তোমাকে যত ভালবাসে তত আর কাউকে নয়।

ভালবাসা নিয়ে জোর জবরদস্তি দাবি তর্ক কিছু চলে না, ভালবাসার বিচারও বোধ হয় এক জীবনে শেষ হয় না। হেমকান্ত তাই তর্ক করলেন না। খুব সংশয়পূর্ণ এবং বিষন্ন চোখে কিছুক্ষণ চেয়ে রইলেন রঙ্গময়ীর দিকে। তাঁর আজ মনে হচ্ছিল, কৃষ্ণর সবই ভাল, কিন্তু ওর মনটা বড় নিষ্ঠুর প্রকৃতির। মায়া দয়া কিছু কম।

হেমকান্ত নিজের ঘরে এসে চুপচাপ বসে রইলেন। মাথার মধ্যে চিন্তার একটা ঘূর্ণিঝড়। সাধুর কথা কি তিনি বিশ্বাস করবেন? এ কি সম্ভব?

বাড়িটা আজ খুবই নিস্তব্ধ। কিন্তু হেমকান্ত আজ তাঁর পুত্রকন্যা পুত্রবধূ এবং নাতিনাতিনীদের কোনো সাড়া শব্দ পাচ্ছিলেন না। সম্ভবত তাদের কানেও গুজবটা পৌঁছে গেছে। হেমকান্ত অস্থির হলেন না। খুব সামান্য বিপদ ঘটলেও কিছুদিন আগে পর্যন্ত তিনি বড় অস্থির হয়ে উঠতেন, অসহায় বোধ করতেন। আজ তা হচ্ছিল না। একটা বিষাদ অনুভব করছিলেন তিনি। খুব গভীর বিষাদ।

দুপুরে বিশাখা খুব ভয়ে ভয়ে তাঁর কাছে এসে বলল, সকাল থেকে কিছু মুখে দেননি। এবার দুটো খাবেন চলুন।

খাওয়ার কথায় হেমকান্ত খুব বিম্মিতভাবে চেয়ে রইলেন মেয়ের দিকে। তারপর বললেন, তোমরা খেয়েছো?

বিশাখা মাথা নাড়ল, নাড়তে গিয়ে তার চোখ থেকে অব্যাহত জল খসে পড়ল গাল বেয়ে। ঘোঁপানির শব্দ হল। ঠোট দাঁতে কামড়ে কান্না সামলানোর চেষ্টা করল সে।

হেমকান্ত মেয়ের মুখ লক্ষ করে শান্ত কণ্ঠে বললেন, কাঁদছো কেন? কান্নার কিছু নেই। সে

বৈঁচে আছে খবর পেয়েছি।

বিশাখা চোখ বড় বড় করে বাবার দিকে চেয়ে বলল, বৈঁচে আছে ? কার কাছে খবর পেলেন ? তোমরা কি ধরে নিয়েছিলে যে সে মারা গেছে ?

আমরা কী ভাবব তা বুঝতেই পারছি না। কত লোক এসে কত কি বলে যাচ্ছে ! কী বলছে ?

একজন বলে গেল, গুলি লেগেছে। হাসপাতালে। হাসপাতালে খবর নিয়ে জানা গেল বাজে কথা। আবার একজন এসে বলল, নদীতে লাশ পাওয়া গেছে। কেউ বলছে স্বদেশীদের দলের সঙ্গে চলে গেছে।

হেমকান্ত চাপা একটা সতর্কতাসূচক শব্দ করে বললেন, যে যা বলুক শুনে যাও। নিজেরা কারো কাছে কিছু কবুল করো না। তবে সে যে বৈঁচে আছে এটা বোধ হয় বিশ্বাস করা যায়। কোথায় আছে ?

সেটা বলা যাবে না। তাছাড়া তার এখন এ বাড়িতে পা না দেওয়াই ভাল।

কিন্তু বাবা, তার যে ভাল জামাকাপড় সঙ্গে নেই। কি খাচ্ছে, কোথায় শুচ্ছে তা কি জানেন ?

হেমকান্ত মাথা নেড়ে বললেন, কিছুই জানি না। জানার উপায়ও নেই। এমন কি সে যে বৈঁচে আছে এটাও খুব সূক্ষ্ম সূত্রে খবর পেয়েছি। সুতরাং কারো কাছে কিছু বোলো না। বললে তার বিপদ, আমাদেরও বিপদ।

বাড়ির সবাই যে দুশ্চিন্তায় কণ্ঠায় প্রাণ নিয়ে বসে আছে।

থাকুক। বাড়ির লোককেও বলা ঠিক হবে না। সকলের মনের জোর তো সমান নয়।

কিন্তু কেউ খেতে চাইছে না, শুতে চাইছে না, কাঁদছে।

এক কাজ করো তাহলে। সবাইকে জানিয়ে দাও যে, একজন এসে জানিয়ে গেছে কৃষ্ণ অন্যত্র চলে গেছে। কিন্তু কথাটা যেন বাইরের লোক জানতে না পারে। কেউ জিজ্ঞেস করলে সবাই বলবে, জানি না।

বিশাখা এই হৈয়ালিতে খুশি হল না। কিন্তু মেনে নিল। মাথা নেড়ে বলল, আপনাকে কিছু খেতে দিই।

বৈঁচে থাকতে হলে খেতে তো হবেই। কিন্তু আজ আর অন্নব্যঞ্জন গলা দিয়ে নামবে না। আমাকে বরং একটু সরবত দিতে বোলো। আর তোমরা যা পারো একটু খাও।

বিশাখা ধীর পায়ে চলে গেল। হেমকান্ত আবার চোখ বুজলেন এবং প্রিয় পুত্রটির কথা চিন্তা করতে লাগলেন।

॥ ৮৮ ॥

সুব আর মোটিন যখন স্টেশনে এসে পৌঁছালো তখন চারদিক বেশ অন্ধকার হয়ে গেছে। বাগ্মনবাড়ি থেকে স্টেশন মাইলখানেক। তারা হেঁটেছেও ধীরে। দুজনেই একটু ক্লান্ত।

ছুটির দিন বলেই বোধহয় স্টেশন ফাঁকা, শব্দহীন। শীতার্ঘ্য কুয়াশায় চারদিক আচ্ছন্ন। স্টেশনটাকে ভারী ভূতুড়ে আর অলীক বলে মনে হয়। আজকাল কলকাতা আর তার কাছাকাছি সব অঞ্চলে জনসংখ্যা এত বেড়েছে যে এরকম নির্জনতা প্রায় অপ্রাকৃত বলে মনে হয়। সব জায়গাতেই গায়ে গায়ে লোক, সবরকম যানবাহনেই ঠাসাঠাসি, ঠুতোঠুতি।

নোটেন জিজ্ঞেস করল, বসবে না ? প্ল্যাটফর্মে বেঞ্চগুলো একদম ফাঁকা।

খোলা জায়গায় বসবি ? আজ বেশ ঠাণ্ডা।

হোক । প্ল্যাটফর্মটা নির্জন । দুজনে কথা বলা যাবে ।

তোর আর কত কথা আছে রে নোটন ?

অনেক অনেক । এক জন্ম ধরে বললেও ফুরাবে না ।

তা নাই ফুরোক । কিন্তু সেসব কথা আমার কানে না ঢাললেই নয় ?

তুমি ছাড়া আমার কে আছে আর বলো !

নাটকে এই ডায়ালগ তোকে প্রায়ই দিতে হয় বোধহয় ?

তোমার সঙ্গে নাটক ? আর যেখানেই করি এই একটা জায়গায় নোটন কেবল নোটন ।

তাই বুঝি ! অতিভক্তি কিসের লক্ষণ জানিস ?

অতিভক্তি হবে কেন ? ভক্তি করতে তো দিচ্ছেই না ।

আর ভক্তিতে কাজ নেই ।

শোনো, চলো ওখানে গিয়ে নির্জনে বসি । একটু ঠাণ্ডা লাগে লাগুক । তোমাকে আবার কবে এইভাবে পাবো ভগবান জানেন । হয়তো আর দেখাই হবে না ।

খুব হেসে বলল, রোমাঞ্চিক আবর্জনা ঢালবি তো কানে ? ঢালিস । তার আগে একটা প্র্যাকটিক্যাল কাজ সেরে নিই । টিকিটটা কেটে ট্রেনের সময়টা জেনে আসি । তুই এগো ।

জনহীন কাউন্টারে গিয়ে খুব দুটো কলকাতার টিকিট কাটল । ট্রেনের টাইম যা জানল তাতে সময় হয়ে গেছে । ট্রেন এল বলে ।

খুব খোলা প্ল্যাটফর্মে এসে প্রথমে নোটনকে দেখতেই পেল না । তারপর দেখল, কাছেরটা ছেড়ে বেশ দূরে অন্ধকারমতো এলাকায় একটা বেঞ্চে বসে আছে নোটন । তাকে হাতছানি দিয়ে ডাকল ।

খুব কাছে গিয়ে পাশে বসে বলল, ট্রেনের সময় কিছু হয়ে গেছে ।

একটা ট্রেন ছেড়ে দাও না ।

বলিস কি ? এর পর হয়তো ঘন্টাকানেক বাদে আর একটা আসবে ।

হোক গে । পায়ে পড়ি ।

তোর অত কথা কিসের রে নোটন ? অনেক তো বলেছিস ?

কোথায় আর বললাম ? শুধু নিজের সংসারের দুঃখের গল্প শোনালাম । ও কি কথা ?

আর কি বলার আছে ?

আছে । বলব । তার আগে তুমি বলো ।

আমার কথাই আসে না ।

বউদির কথা বলো । ছেলের কথা বলো ।

খুব হাসল খুব । তারপর বলল, হিংসে ?

মোটাই না ।

তবে জেনে কি হবে ? বউদি খুব ভাল মেয়ে এই পর্যন্ত বলা যায় । তবে আমার সঙ্গে বনে না ।

কেন বনে না ?

আমার সঙ্গে কারোই বনার কথা নয়, জানিস তো আমার স্বভাব ।

খুব জানি । তোমাকে জানতে আবার আলাদা বিদ্যে লাগে নাকি ?

কি জানিস ?

তুমি নিজেকে যা প্রমাণ করতে চাও তা তুমি মোটেই নও ।

কি প্রমাণ করতে চাই ?

প্রমাণ করতে চাও যে তুমি খুব খারাপ, চম্বিহীন, মাতাল ।

তা নই ?

মোটাই না ।

কিছু লক্ষণগুলি তো মেলে ।

একটুও মেলে না । মেয়েরা আর কিছু না বুঝুক ছেলেদের চোখ বোঝে ।

আমার চোখে কি আছে রে নোটন ?

খুব মায়া আছে । নইলে আমাকে তুমি ঘেন্না করতে পারতে । মায়াটুকু বাধা দিচ্ছে ।

বেশ বললি তো ! কোন্ নাটক থেকে দিলি এটা ?

নোটন হেসে ফেলে বলল, এটা মিলে গেছে কিন্তু । নাটকেরই ডায়ালগ । তা বলে কথাটা মিথ্যে নয় ।

চালিয়ে যা ।

নোটন মাথা নেড়ে বলে, ভীষণ ইয়ার্কি করে যাচ্ছে তখন থেকে । বলো না ! বলে নোটন খুব ধীরে ধ্রুব বাহু স্পর্শ করল । একটু কাছে সরে এল ।

ধ্রুব মৃদু হেসে বলল, গুড প্রোগ্রেস । এরপর কাঁধে মাথা রাখার নিয়ম না ?

রাখলে তুমি বকবে ?

বকার কিছু নেই । রাখতে পারিস । তবে আমার কাঁধ ভীষণ ঠাণ্ডা ।

কাঁধ ঠাণ্ডা মানে ?

মানে তোর বুঝে কাজ নেই । এবার ঘোমটা ফেলে স্বাভাবিক হ ।

ঘোমটা কেন ফেলব ? লোকে তোমাকে আর আমাকে বর-বউ ভাববে ভয়ে ? ভাবুক । আমি তাই চাই ।

বেশ তো । কিন্তু ভাববার মতো কয়েকটা লোকও তো চাই । এখানে যখন কাউকেই দেখা যাচ্ছে না তখন কাকে আর ঘোমটা দেখাবি ?

কেন তুমি তো আছো । তুমিই দেখ । দেখে ভাবো ।

কি ভাবব ?

আমাদের বর-বউ বলে ভাবো ।

বাড়াবাড়ি করছিস নোটন ?

বাড়াবাড়িকে কি নাটকের পেশাদার মেয়েরা ভয় খায় ? না তুমিই ভয় খাও ?

ধ্রুব হাল ছেড়ে হেলান দিয়ে বসল । বলল, যা খুশি কর । তবে জেনে রাখ আমি এ গাড়িটা ধরব ।

না, ধরবে না ।

ধরবই ।

ধরলেও কলকাতায় পৌঁছোতে পারবে না ধ্রুবদা ।

কেন পারব না ?

কারণ আমি তাহলে গাড়িটার তলায় পড়ব । রান ওভারের কেস হলে ট্রেন সহজে নড়বে না ।

সব মেয়েই পুরুষদের একটা ভয় খুব দেখায় । মরার ভয় ।

আর কোন অস্ত্র আমাদের দিয়েছে বলো !

কেন, জিব ! ওটা কি কম ?

নোটন খুব কাছে সরে এল । ধ্রুব সরল না, নির্বিকার বসে রইল । নোটন কানের কাছে মুখ এনে বলল, এবার কাঁধে মাথাটা রাখছি । প্লীজ, সরে যেও না ।

ধ্রুব সরলো না । নোটন কাঁধে মাথা রাখল । একটা হাত ধ্রুবর একখানা করতল তুলে নিল ।

ধ্রুবদা ! নাটক করলাম বলে ভাবছো !

কি জানি কি । তোর তো আমার ওপর এত টান থাকার কথা নয় রে নোটন ?

কেন থাকবে না ?

তোর সবরকম অভিজ্ঞতা হয়ে গেছে। তারপরও কি আর হৃদয় থাকে ?  
নোটন মাথাটা কাঁধে একটু ঘষে বলল, থাকে না তো জানানোই। আমারও হয়তো নেই। কিন্তু  
আজ সারাক্ষণ তোমাকে কাছে পেয়ে কেমন যে হয়ে গেছি, ভারী অস্থির লাগছে।

কিরকম অস্থিরতা রে নোটন ? শরীর !

না গো। ওরকম বোলো না। শরীর দিয়ে কি তোমাকে বোঝা যায় ?

তবে কি ?

নাটক করি, সিনেমা করি, আরো অনেক খারাপ কাজ করি, অস্বীকার করছি না। জীবনে একজন  
কেউ নেই আমার। সেই একজন কেউ হতেও পারবে না কোনোদিন।

সেই একজন কে ?

জানি না। কিন্তু তুমি হতে পারতে।

আমার হওয়ার কথা ছিল না তো।

সেও জানি। সব ভুল। এই যে বসে আছি কাঁধে মাথা রেখে, ঘোমটা দিয়ে, এও ভুল। কাল  
থেকেই হয়তো আর এমন অস্থির লাগবে না। তবু আজ যে লাগছে তাতে বুঝতে পারছি এখনো  
একটু নোটন আছি। সেই আগের নোটন। তাই না ?

আগের নোটনটাকেও তো আমি ভাল চিনতাম না রে ?

তুমি চিনতে না। আমি তোমাকে চিনতাম। স্বামী বলে, ইহকাল পরকালের দেবতা বলে।

ধুব শব্দ করে হেসে উঠল

নোটন বলল, চুপ। জানি ওসব বাক্যে কথা। কিন্তু আজ হেসো না।

চালিয়ে যা।

শোনো। একটা জিনিস দেবে ?

আবার কি ? কাঁধ পর্যন্ত পৌঁছে গেছিস। আবার কি ?

একটা চুমু দেবে ? একটা। পায়ে পড়ি। কাউকে কখনো বলব না। একবার।

ধুব একটা ঝাঁকি দিয়ে সোজা হয়ে বসে।

কি হল ধুবদা ! রাগ করলে ?

না। গাড়ি আসছে।

গাড়ি ! নোটন যেন কথাটা বুঝতেই পারেনি এমনভাবে স্বপ্নোচ্ছিতের মতো চারদিকে তাকাল।  
বলল, গাড়ি দিয়ে কি হবে ? আমরা তো এখন যাবো না।

তাহলে তুই বসে থাক। আমি চলি।

নোটনের পক্ষে স্বাভাবিক হত ধুবর হাত চেপে ধরা এবং জোরাজুরি করা। নোটন তার কিছুই  
করল না। চুপচাপ বসে চেয়ে রইল সামনের দিকে। একটু নড়ল না, বাধা দিল না।

ধুব উঠে কয়েক পা এগিয়ে গিয়েছিল। হলুদ একটা আলো নিঃশব্দে এগিয়ে আসছিল।  
প্ল্যাটফর্মে সেই আলোয় কয়েকজন লোককে দেখা গেল। দাঁড়িয়ে আছে। নাটকটা কি তারা  
দেখেছে ?

গাড়ি এল। খুব ফাঁকা। এত ফাঁকা ট্রেন বড় একটা দেখা যায় না। ধুব একটা কামরার হ্যাণ্ডেল  
ধরে মুখ ফিরিয়ে চাইল। একই জায়গায় একই ভঙ্গীতে নোটন বসে আছে। যেন মৃতদেহ।

তার হাত থেকে হাতলটা বিনীতভাবে ছাড়িয়ে নিয়ে ট্রেনটা চলে গেল। ধুব ধীর পায়ে ফিরে  
এসে নোটনের পাশে বসে বলল, উইল পাওয়ার আছে নাকি তোরা !

নোটন মৃদু একটু হেসে বলে, পারলে না যেতে ?

কই আর পারলাম।

শোনো ধুবদা, চুপ করে বোসো। ভয় পেও না, আমি তোমাকে খেয়ে ফেলব না।

কেউ খেলে খাদ্য হতে আমার আপত্তি ছিল না । কিন্তু মেয়েমানুষকেও আমার আজকাল ভাল লাগে না ।

মেয়েমানুষ ! আমি কি তোমার কাছে শুধু মেয়েমানুষ ! আর কিছু নয় ?  
আবার কি ?

আসার সময় সারা রাস্তা একটিও কথা বলোনি । ঘাড় শক্ত করে চোখ অন্য দিকে ফিরিয়ে রেখেছে । মনে মনে আমি অপমানে পুড়ে গেছি, জানো ?

তা হয়তো গেছিস ।

একবার তো অস্তুত রিকগনাইজ করতে পারতে !

করা উচিত ছিল বুঝি ?

কেন করবে না ? নষ্ট হয়ে গেছি বলে কি সব পরিচয় মিথ্যে হয়ে যায় ?

নষ্ট তো আমিও হয়েছি ।

তুমি হওনি । বলে হঠাৎ একটু আবেগবশে দুই শীতল নরম করতলে নোটন ধুবর দুটো গাল চেপে ধরল ।

ধুব মুখটা ছাড়িয়ে নিয়ে বলে, নষ্টামির কি আছে । এদেশের যে বিপুল অধঃপতন ঘটেছে তাতে মেয়েদের শরীর বেচে খাওয়াটা স্বাভাবিক ব্যাপার ।

নোটন একটু বিষণ্ণ হাসি হেসে বলে, শরীর বেচে খাই বুঝি ? না গো, অতটা নয় । তবে সতীও নই ঠিকই । থাকা সম্ভব নয় ।

আমার অত শুচিবায়ু নেই নোটন । তবে তোকে এদের দলে দেখে আমি ভারী অস্বস্তি বোধ করছিলাম । সেটা ঘেন্না নয়, অপমান করাও নয় ।

সত্যি বলছ ?

বলছি । সত্যি বলতে আমার কোনো বাধা নেই ।

ঘেন্না করো না তো !

না, করি না ।

তাহলে দাও । একবার । একটিবার ।

তৃষিতের মতো নোটন তার মুখখানা এগিয়ে দেয় । ঠোট দুটি একটু ফাঁক করা । চোখ ভ্রিমিত আলোতেও স্বপ্নাচ্ছন্ন দেখায় । তার পরিষ্কার শ্বাস এসে লাগে ধুবর মুখে ।

ধুব মৃদু স্বরে বলে, একটা কথা তোকে বলি নোটন । এখনো প্রকাশ্যে এদেশে মেয়ে পুরুষ চুমু খায় না । খেতে নেই ।

কেউ তো নেই ।

অঙ্ককারে দেখা যাচ্ছে না । কিন্তু প্ল্যাটফর্মে দু-চারজন থাকেই । ঘাপটি মেরে আছে ।

কিন্তু আর যে সুযোগ হবে না !

কেন হবে না ?

কে কোঁথায় চলে যাবো ।

কেন চাস ?

তোমাকে কি সব বোঝানো যাবে ?

যাবে না কেন ? বাংলা ভাষাতেই তো বলবি ।

সব ভাব যে কথায় আসতে চায় না ।

চেষ্টা কর, হবে ।

আবার বলবে না তো নাটকের ডায়ালগ দিচ্ছিস ।

তা বললেই কি ! নাটক তো জীবন থেকেই আসে ।

চাই তার কারণ ওটা আমার চিহ্ন হয়ে থাকবে। আমার পরিণতি কি হবে জানি না, কিন্তু মরণ পর্যন্ত মনে থাকবে, স্পর্শ থাকবে। দাও।

ধুব খুব করুণ দৃষ্টিতে মুখখানার দিকে চেয়ে রইল কিছুক্ষণ। আবহাওয়ায় নোটনের মুখখানা যেন সীমানা ছাড়িয়ে চারিদিককার আলোছায়ার মধ্যে প্রসারিত হয়ে যাচ্ছিল। চোখে জল। বড় সুন্দর।

কেন চিহ্ন রাখতে চাস নোটন? আমি তোর কে?

কে তা জানো না?

ওরকম ভাবতে নেই। তোর একদিন ভাল বিয়ে হয়ে যাবে। বরের ঘর করবি; ভালবাসা হবে। কেন একটা চিহ্ন চাস? পৃথিবীতে কেউ কারো নয়। ওরকম ভাবাই ভুল।

এটা বুঝি নাটকের ডায়ালগ নয়?

হতে পারে। আমি নাটক বহুকাল দেখিনি।

আচমকাই নোটন ধুবর গলাটা দুহাতে জড়িয়ে ধরল। ধুব বাধা দেওয়ার আগেই নোটনের ঈষদুঃখ এবং ভেজা ঠোঁট চেপে বসে গেল তার ঠোঁটে। কিছুক্ষণ নোটনের বুকের ধকধক নিজের বুকে শুনল সে। বাধা দিল না।

শুচিবায়ু এবার গেল তো! নোটন ঠোঁট সরিয়ে নিয়ে মুখের দিকে চেয়ে বলে।

ধুব সামান্য তেতো গলায় বলে, এত লিপস্টিক মাখিস কেন? বিত্ৰী আঠা-আঠা ভাব। কত দাম জানো এই লিপস্টিকের?

দাম দিয়ে কি হবে? বিত্ৰী।

নোটন তার রুমাল দিয়ে ঠোঁট মুছে নিয়ে বলল, এবার দাও।

আবার কি? এই তো হল।

তুমি তো দাওনি। আমি দিয়েছি।

ফল তো একই।

মোটাই নয়। আমি চাই তুমি নিজেকে থেকে দাও।

একটা সীন ক্রিয়েট না করেই ছাড়বি না।

আমার এটা জীবন-মরণের প্রশ্ন ধুবদা। সীনের কথা ভাবছো তুমি? ভেবো না। পৃথিবীতে কোনো সীনই চিরদিন থাকে না। মুছে যায়।

ধুব একটা দীর্ঘশ্বাস ফেলে বলল, বুঝলাম। কিন্তু যদি দিই সেটাও যে নিজের ইচ্ছেয় দেবো এমন তো নয়। তুই বলছিস বলেই।

তাহলেও বরফ ভাঙুক।

ধুব চারদিক চেয়ে দেখে নিল। কেউ নেই। খুব কোমল হাতে সে জড়িয়ে ধরল নোটনকে। তারপর মুখখানা একটু ভাল করে দেখে খুব আলতো ঠোঁট ছোঁয়াল ঠোঁটে। একটু চেপে ধরল। তারপর মুখখানা সরিয়ে নিয়ে বলল, হয়েছে তো!

নিজের গলার স্বর ভারী অন্যরকম শোনালা ধুবর কানে। স্বাভাবিক নয়। তার বুকে একটা অস্থিরতা শুরু হয়েছে। শ্বাসকষ্ট হচ্ছে। কিন্তু সেটা শারীরিক কোনো কারণে নয়। তার গলাটাই কেমন যেন অন্যরকম।

নোটন জবাব দিল না। চোখ বুজে পিছনে হেলান দিয়ে সে স্বপ্নাচ্ছন্ন মতো বসে ছিল।

ধুব নোটনের দিকে বেকুবের মতো চেয়ে রইল। কি করবে তা বুঝতে পারল না। নোটন বড় দূরের মানুষ হয়ে গেছে হঠাৎ।

উট্টোদিকের একটা ট্রেন এসে থামতেই কিছু লোকজন দেখা গেল। তারপর আবার চুপচাপ হয়ে গেল স্টেশন।

নোটন চোখ মেলে বলল, মুখে যতই বলো তোমার শুচিবায়ু নেই, তোমার সত্যি সত্যি বিশ্বাস নেই,

তুমি খুব মুক্তমনা, আসলে ভিতরে ভিতরে তুমি ভীষণ শুচিবায়ুগ্রস্ত, প্রাচীনপন্থী, মর্যালিস্ট ।

এই বুঝলি ?

বুঝব কেন, জানি । তোমাকে ছেলেবেলা থেকে এত ধ্যান করেছি যে তোমার কিছুই আর আমার অজানা নেই ।

ধ্যানে জেনেছিস ? ভাল ।

ঠাট্টা করছো । ধ্যান বলে কি কিছুই নেই ?

থাকতে পারে । আমি জানি না । তবে তুই আবার ধ্যানও শিখেছিস জেনে হাসি পাচ্ছে । একটা লোককে ধ্যান করার কি ?

এ তো সাধুদের ধ্যান নয় । আমার ধ্যান । এক এক মানুষের এক এক ধ্যান থাকে ।

আমার ওপর তোর এত টান হল কবে থেকে, কি ভাবে—সেটাই তো রহস্য ।

তাহলে সেটা রহস্যই থাক । তুমি বিশ্বাস করবে না জানতাম । বলে একটু হাসল নোটন ।

ধুব একটা শ্বাস ফেলে বলল, না, আমার কিছু সহজে বিশ্বাস হয় না ।

নোটন তার একটা মৃদু হাত ধরে বলল, কিন্তু কী সুন্দর আদর করলে আজ আমাকে । মনে হচ্ছিল আমার ভিতরটা পর্যন্ত ধুয়ে যাচ্ছে । কী যে সুন্দর লাগল, কী যে ভাল ।

ধুব আপনমনেই একটু লজ্জা পেল । এরকম সে কদাচিৎ করে ।

নোটন বলল, আজ বউদির কাছে যখন ফিরে যাবে কিরকম লাগবে তোমার নিজেকে ? কিরকম আর লাগবে ? রোজ যেমন লাগে ।

নিজেকে অপবিত্র মনে হবে না ? বিশ্বাসঘাতক মনে ভাববে না ?

মোটাই না ।

ভেবো । তাতে কতি নেই । আমি আজ যত পেলাম, তোমার তত হারায়নি গো । পুরুষ মানুষ হীরের আংটি ।

এত বকবক করিস কেন বলতো !

চুপ করে থাকব ?

থাক না একটু ।

তাহলে কাঁধে মাথা রাখতে দাও ।

রাখ । তবু চুপ কর ।

নোটন হাসল । কাছে সরে এসে কাঁধে মাথা রেখে নিঃশ্বাস হয়ে বসে রইল ।

গাড়ির সময় যে কখন হল তা টেরও পায়নি তারা । হঠাৎ ফের কুয়াশায় স্নান করা স্নান হলুদ আলোয় চারপাশ যখন অন্ধকার থেকে ভেসে উঠল তখন একটু চমকে উঠল তারা ।

ওঠ নোটন । গাড়ি আসছে ।

সময় হয়ে গেল ?

হল ।

ইস ! আর একটু দেয়ী করা যায় না ?

পাগল !

কেন, তোমার জন্য বউদি ভাবে ?

দূর । তোর বউদি ভাবে না, কেউ ভাবে না ।

তাহলে ?

আমার আর ভাল লাগছে না । স্টেশনে কি এভাবে ঘণ্টার পর ঘণ্টা বসে থাকা যায় ?

যায় যদি ভালবাসা থাকে । তোমার তো নেই ।

এখন ওঠ ।



উঠছি।

ট্রেন এল। দুজনে মোটামুটি একটা ফাঁকা কামরায় উঠে বসতে না বসতেই ছেড়ে দেয় ট্রেন।  
খোলা জানালা দিয়ে হু হু করে ঠাণ্ডা বাতাস আসছিল। নোটনের চুল উড়ছে। সে খুব মন দিয়ে  
বাইরের অন্ধকারের দিকে চেয়ে ছিল।

খুব বলল, ঠাণ্ডা লাগাচ্ছিস কেন? জানালাটা ফেলে দিই বরং!

না থাক।

কি দেখাচ্ছিস?

বাইরেটা।

বাইরে দেখার কিছু নেই।

অন্ধকার তো আছে। খুব ইচ্ছে করছে অন্ধকারে ডুবে যেতে।

কত পাগলামি করবি এক বিকেলে? তোর কোটা ফুরোয় না?

না। আজ একটা অন্যরকম দিন।

তাই নাকি?

আজ আমি মরব।

॥ ৮৯ ॥

রামকান্ত রায় খুন হওয়ার পরেই ধরপাকড় শুরু হল। শহরময় একটা হলমূল। কিন্তু আশ্চর্যের  
বিষয় পুলিশ একবারও হেমকান্তের বাড়িতে হানা দিল না। অথচ সেটাই ছিল স্বাভাবিক।

হেমকান্ত দুদিন ঘুমোলেন না, খেলেন না। নিজের ঘরে চুপচাপ বসে থাকলেন বেশীর ভাগ  
সময়। এমন ধমধমে মুখ ও গম্ভীর তাঁর চেহারা যে কেউ কাছে বিশেষ ঘেঁষতে সাহস পেল না।  
রক্তময়ী শুধু মাঝে মাঝে এসে চুপ করে বসে থাকে কাছে। তারপর চলে যায়।

তিন দিনের দিন দুপুরবেলা কনক খুব সতর্কভাবে হেমকান্তের কাছে এসে দাঁড়াল। কাঁচুমাচু মুখ।  
মৃদু স্বরে ডাকল, বাবা!

হেমকান্ত মুখ ফেরালেন, কিছু শীর্ণ দেখাচ্ছিল তাঁকে। চোখের কোল ফোলা, দৃষ্টি ভারী অনিশ্চয়,  
জবাব দিলেন, বলো।

আপনি এরকমভাবে অল্পজল ত্যাগ করলে যে শরীর ভেঙে পড়বে।

আমি তো ঠিক আছি। শরীর ভালো আছে।

আপনি এরকম নিজেকে গুটিয়ে রাখলে আমরা কার কাছে যাবো? কে আমাদের ভরসা দেবে?  
হেমকান্ত একটা দীর্ঘশ্বাস ফেলে বললেন, তার একটা খবরও তো এখনো পেলাম না কনক!  
যা শোনা যাচ্ছে তাতে তো খুব খারাপ কিছু মনে হচ্ছে না।

নতুন কিছু শুনেছো?

রোজই আমি আর জীমূত বেরিয়ে চারদিকে খোঁজ খবর করছি।

কিছু শুনেতে পাও?

যা শুনি সেটা একদিক দিয়ে খুবই আনন্দের।

হেমকান্ত টানটান হয়ে বসে বললেন, বলো কী শোনো তোমরা?

সকলের মুখেই এখন কৃষ্ণর নাম।

কৃষ্ণর নাম? কেন?

সবাই জেনে গেছে যে, কৃষ্ণ বিপ্লবীদের দলে চলে গেছে।

আর কিছু শোনো ?

রামকান্ত রায়ের হত্যাকারী হিসেবে তার নাম অনেকে বলছে বটে, তবে সেটা গুজব । গুজব কী করে বুঝলে ?

গুজব না হলে এতদিন পুলিশ এসে আমাদের রাড়ি তছনছ করত । সবাইকে ধরে নিয়ে যেত । সে সময় এখনো যায়নি ।

আমার মনে হয় পুলিশ গুজবটা বিশ্বাস করে না ।

হেমকান্ত বিরক্ত হয়ে বলেন, সেটা জানলে কি করে ?

থানার অফিসারদের সঙ্গে কথা বলেছি ।

তারা কী বলছেন ?

কৃষ্ণের নামে কোনো প্রিভিয়াস ক্রিমিন্যাল রেকর্ড নেই । তাছাড়া সে জমিদার এবং ব্রাহ্মণবংশের ছেলে । বয়স নিতান্ত কম । ফলে...

তাতে কী ? ওটা কোনো অভ্যুত্থান হতে পারে না ।

পুলিস এসব ফ্যাক্টরকে গুরুত্ব দেয় । তাছাড়া মেথড অফ মার্ডারটাও দেখতে হবে ।

কী মেথড ?

রামকান্ত রায়কে প্রথমে গুলি করা হয় । অবশ্য গুলিটা লাগে দুপক্ষের লড়াইয়ের সময় । তারপর ?

রামকান্ত পালাচ্ছিলেন উণ্ডেড অবস্থায় । কিছু দূর গিয়ে পড়ে যান । তখন কেউ চপার দিয়ে বাকি কাজটা সারে ।

খুব বীভৎস, না ?

হ্যাঁ, দেখে মনে হয় খুব ক্রুয়েল কোনো লোক করেছে ।

পুলিসের কি ধারণা যে, কৃষ্ণ অত ক্রুয়েল হতে পারে না ?

ঠিক তাই । পুলিসের আরো একটা ধারণা আছে ।

কী সেটা ?

তাদের বিশ্বাস কৃষ্ণ স্বৈচ্ছায় স্বদেশীদের দলে চলে যায়নি, তাকে কিডন্যাপ করা হয়েছে । সত্যিই কি তাই ?

তা কি করে বলব ? তবে শচীন এ ব্যাপারে হয়তো কিছু একটা বুঝিয়েছে পুলিসকে ।

শচীন বুঝিয়েছে ! ভারী বুদ্ধিমান ছেলে । পরিস্থিতি যাই হোক সেটাকে অনুকূল করে নিতে জানে । খুব বুদ্ধিমান ।

হ্যাঁ । শচীনের ব্যাপারেও আপনার সঙ্গে একটু কথা ছিল ।

হেমকান্ত ছেলের মুখের দিকে তাকিয়ে কিছু একটা অনুমান করার চেষ্টা করে বললেন, শচীনের কথা পরে বোলো, এখন আমি কৃষ্ণের কথা আরো গুনতে চাই ।

কী গুনতে চান বলুন ।

পুলিসের ধারণাটা কতদূর স্থায়ী হবে ? ওদের ইনফর্মার নেই ?

আছে । তবে গতকাল ভূপতি নামে একজন ইনফর্মার খুন হয়েছে ।

ভূপতি ? চিনি নাকি তাকে ?

মেছোবাজারে থাকত ।

খুন হল কি করে ?

মুন্ডাগাছার রাস্তায় তাকে মৃত অবস্থায় পাওয়া যায় । তার কাজই নাকি ছিল ইস্কুলে কলেজে ঘুরে ঘুরে ছেলদের কাছ থেকে খবর সংগ্রহ করা । বীর সেনের দল সম্পর্কে সেই পুলিসকে খবর দিয়েছিল ।

হেমকান্ত একটু শিউরে উঠলেন। তারপর বললেন, এত খুন এত রক্তপাত কি ভাল হয়েছে বাবা ?

আমরাও সেই কথাই আলোচনা করি। কী যে সব হচ্ছে ?

হেমকান্ত মাথা নেড়ে বললেন, দেশ স্বাধীন করার দরকার আছে মানি। তা বলে এ ভাবে মানুষ মেরে সেটা করতে হবে ? তোমরা কী ভাবছো জানি না, কিন্তু এ সব দেখে আমার ঝেঁচে থাকার ওপর ঘেলা ধরে যাচ্ছে।

দেশের অন্য সব জায়গায় এত হাঙ্গামা নেই। যত আমাদের এই বাংলায়। এখানকার ছেলেরা একটু বেশী মিলিটারি হয়ে যাচ্ছে।

হেমকান্ত সমর্থনসূচক মাথা নাড়লেন। তারপর বললেন, কৃষ্ণকে নিয়ে আর কী কথা হল ? পুলিশ ধরে নিয়েছে কৃষ্ণ সঙ্ঘর্ষের ছেলে এবং ভাল ছেলে। যদি দলটাকে ধরা যায় তবে কৃষ্ণকে রাজসাক্ষী করার কথাও পুলিশ ভাবছে।

হেমকান্ত খুব স্নান একটু হাসলেন। তারপর মাথা নেড়ে বললেন, ও বাবা ! সে তো অনেক দূরের কথা। আগে তো জ্যান্ত অবস্থায় ধরা পড়ুক।

আপনি অত ভাববেন না।

ভাবনার ওপর কি মানুষের হাত থাকে, বলো ! যে সব ঘটনা ঘটছে তাতে ভাবনা না হওয়াটাই বিস্ময়কর হবে।

সবই তো জানি বাবা। তবু আপনি স্বাভাবিক ভাবে থাকলে আমরা জোর পাই। সবাই কাল্মাকটি করছে সারা দিন। বিশেষ করে মেয়েরা। বাড়িটায় একটা শোকের ছায়া।

আমার জন্যে তোমরা খুব চিন্তিত, বুঝি। আচ্ছা দেখি।

তাহলে উঠুন। স্নান করে দুটি মুখে দিন। সাড়ে বারোটা বেজে গেছে।

তোমরা কি আমি না খেলে কেউ খাও না ?

অনেকটা সেইরকমই।

তাহলে আমার তো খুব অন্যায় হয়ে গেছে।

না, না, এরকম তো জীবনে কিছু ঘটনা ঘটেই। আপনাকে আমরা খুব শক্ত মানুষ বলে জানি। আপনি ভেঙে পড়লে আমরা আর মনের জোর পাই না। আপনি আমাদের সঙ্গে থাকলে এতটা অসহায় বোধ করতাম না।

হেমকান্ত মাথা নাড়লেন। বুঝেছেন। একটু চুপ করে থেকে বললেন, শচীনের কথা কী বলছিলে ?

হাঁ, শচীনের সম্পর্কে আপনি একটি সিদ্ধান্ত নিয়েছেন শুনলাম।

নিয়েছি তবে তোমাদের সঙ্গে পরামর্শ না করে পাকা সিদ্ধান্ত নিতে পারি না। তোমাদের কি অমত আছে ?

কনক একটু ভাবল। তারপর বলল, ছেলেটি সব দিক দিয়েই ভাল। তবে আমাদের সমান সমান নয়।

সমান হয়তো ছিল না। এখন হয়েছে। যদি আর্থিক অবস্থাকে মাপকাঠি হিসেবে ধরো তাহলে শচীন পাসমার্কা পাবে।

আমি বংশমর্যাদার কথা ভেবে বলছিলাম।

মর্যাদা আজকাল আর কারই বা ধরবে ! রাজেনবাবু, অর্থাৎ শচীনের বাবা চমৎকার মানুষ। তোমরা আবার নতুন করে ভেবে দেখ। বউমা এবং মেয়েদের সঙ্গেও আলোচনা কর। লাখ কথা ছাড়া বিয়ে হয় না।

বলব তবে এখন তো বিয়ের তাড়াহুড়ো কিছু নেই। কৃষ্ণর খৌজ আগে পাওয়া যাক। তারপর।

হেমকান্ত মাথা নাড়লেন। বললেন, ওটা বিবেচনার কথা হল না।

তাহলে ?

কৃষ্ণের জন্য আমরা অপেক্ষা করতে পারি না। বিশাখার বিয়ের বয়স হয়ে গেছে। তোমরা তো জানোই ওর মা না থাকায় আমার দায়িত্ব এখন অনেক বেশী। আর একটা কথাও আছে। কী কথা বাবা ?

আমি হয়ত এখানকার পাট চুকিয়ে ফেলব। আমার আর ভাল লাগছে না।

চুকিয়ে ফেলবেন ? তাহলে কোথায় থাকবেন গিয়ে ? কলকাতা ?

না। ও শহরে আমার ভাল লাগে না। আমার ইচ্ছে ভাল খদ্দের পেলে এস্টেট বিক্রি করে দেবো। তারপর সব টাকা পয়সার বিলিব্যবস্থা করে নিরিবিলি কোথাও গিয়ে থাকব।

এ সিদ্ধান্ত কি আপনার পাকা ?

হেমকান্ত মাথা নাড়লেন, না। ভাবছি।

এস্টেট কেনার লোক পাওয়া যাবে বলে ভাবছেন ? এখন নগদ টাকার খুব অভাব চলছে।

খদ্দের তবু পাওয়া যাবে। হয়তো দাম পাবো না।

আপনি এস্টেট বিক্রি করে দিন সেটা আমরাও চাই। কিন্তু ডিপ্রেসনটা কেটে যাওয়ার পর করলেই ভাল।

দেখা যাক। আর একটা কথাও ভেবে রেখেছি।

কি কথা বাবা ?

আমার এখানে থাকার ইচ্ছে নেই। এস্টেটের সঙ্গে নিজেকে জড়িয়ে রাখতে আজকাল আমার আর ভাল লাগে না। তাই ভেবেছি বিশাখার বিয়ে দিতে পারলে শতীনকে এস্টেটের অভিভাবক করে রেখে যাবো।

কনক উদ্বিগ্ন গলায় বলে, কোথায় যেতে চান বাবা ?

হেমকান্ত মৃদু হেসে বললেন, ভয় পেও না। আমি দাদার মত সন্ম্যাস নেবো না।

কনক তবু নিশ্চিন্ত হল না। বলল, আমাদের বংশে এরকম একটা প্রবণতা তো আছে।

আছে। কিন্তু আমার খাতু সেরকম নয়। ভয় পেও না।

সন্ম্যাস নেওয়ার তো দরকারও নেই বাবা।

হেমকান্ত হাতটা উঠে বললেন, কি জানি বাবা জীবনের গভীর গভীরে কত কী আছে। সুখের সংসার ছেড়ে মানুষ যখন ঈশ্বর সন্ধানে যায় তখন বুঝতে হবে সুখের ধারণা সকলের এক রকম নয়। কদিন আগে কেওটখালিতে এক সন্ম্যাসীর সঙ্গে আচমকা দেখা। প্রথমটায় চমকে উঠে ভেবেছিলাম, দাদা বুঝি।

আপনি কেওটখালি গিয়েছিলেন কি খুনের দিন ?

হেমকান্ত মাথা নাড়লেন, গিয়েছিলাম।

কাজটা ভাল করেননি। বিপদ হতে পারত।

সে বিপদ তো কৃষ্ণর চেয়ে বেশী নয়। অতটুকু ছেলে কোথায় কোথায় হাভাতের মতো ঘুরছে কে জানে।

হেমকান্ত একটা দীর্ঘশ্বাস ফেললেন।

কনক বলল, সন্ম্যাসীটা কে ?

হেমকান্ত মাথা নেড়ে বললেন, কি করে বলব ? তবে খুব পারসোনালিটি আছে। লোকটাকে দেখে মনে হচ্ছিল, বেশ তো আছে। কিছু নেই, তবু বেশ আনন্দে নিভাষিনার ঝেঁচে আছে।

এবার উঠুন বাবা।

শতীনকে নিয়ে কথাটা শেষ হল না।

আপনি স্থির করেছেন আমাদের অমত হওয়ার কথাই নয়।

যা বললাম সকলের সঙ্গে পরামর্শ করে দেখো।

করব বাবা।

হেমকান্ত উঠলেন। তিন দিন পরে স্নান করলেন তিনি। ভাতের পাতেও বসলেন একটু।

বাড়িশুদ্ধ লোক স্বস্তির শ্বাস ফেলল।

আমবাগানে পড়ন্ত রোদের আলোয় চুপ করে দাঁড়িয়ে ছিল বিশাখা। চোখের দৃষ্টি হরিণের মতো ভীত ও চঞ্চল। শরীরে অস্থিরতা।

আমবাগানের পিছন দিকে একটা কাঁচা রাস্তা আছে। তার দৃষ্টি সেই দিকে। চারটে প্রায় বাজে।

খুব বেশী অপেক্ষা করতে হল না। ঝোপঝাড়ের মাথার ওপর দিয়ে এক সাইকেল-আরোহীর চলন্ত মাথা দেখা গেল।

বিশাখার হাত-পা হিম হয়ে যাচ্ছিল ভয়ে। বৃকের ভিতর ঠিক উন্টোরকম এক উথাল-পাথাল।

সে চারিদিকে ত্রস্তভাবে চেয়ে দেখল কেউ লক্ষ্য করছে কিনা।

না। আমবাগান সম্পূর্ণ নির্জন এবং নিঃশব্দ।

শটীন সাইকেলটা ঝোপের মধ্যে ঠেলে ঢুকিয়ে ছায়াচ্ছন্ন বনভূমিতে ঢুকল। তার মুখে সামান্য হাসি। চোখে দুটু মি।

তলব কেন ?

বিশাখা চোখ নত করে। বলে, খুব খাটুনি পড়েছে বুঝি ?

কেন ? খাটুনির কী দেখলে ?

আজকাল তো কাছারিতেও আসেন না !

কাজ অনেক পড়ে গেছে তোমাদের এস্টেটের। কিন্তু সময় করতে পারছি না। কৃষকের ব্যাপারটা নিয়ে কদিন খুব ব্যস্ত থাকতে হল।

বিশাখা চোখ তুলে বলল, কিছু খবর পাওয়া গেল ?

পাওয়া গেছে তো অনেক। কোনটা বিশ্বাসযোগ্য, কোনটা নয় তাই এখন ভাবনা।

আমরা ভেবে ভেবে পাগল হয়ে যাচ্ছি।

সেটা তো স্বাভাবিক। তবে একটা কথা আছে।

কি কথা ?

কৃষকের মতো কারেজিয়াস এবং বুদ্ধিমান ছেলে তো শুধু ঘরে আটকে থাকার নয়। তাকে তোমরা কি দিয়ে আটকাবে ?

তা বলে এতটুকু বয়সে স্বদেশী করবে ?

করবে তা তো বলিনি। কিন্তু কিছু একটা করবেই। ওর খাতই আলাদা। তোমাদের বংশে এরকম এক আধজন ছিলেন। ও তাঁদেরই রক্তের খারা পেয়েছে।

সবাই খুব ওর কথা বলছে আজকাল, না ?

সবাই বলছে বিশাখা। আই ফিল প্রাউড অব্ হিম।

বিশাখা চোখ পাকিয়ে বলল, ইংরিজি বলতে বারণ করেছি না ?

শটীন হেসে ফেলে বলে, ওঃ তাই তো। আচ্ছা আর বলব না।

খুব রোগা হয়ে গেছেন কিন্তু।

আচ্ছা তুমি ওই আপনি আজ্ঞে বলার অভ্যাসটা ছাড়বে ?

ছাড়ব তো ঠিকই। তবে—

তবে টবে নয়। এখনই বলো।

লজ্জা করে।

আমাকে আবার লজ্জা কিসের ?

তোমাকে ছাড়া আবার আমার লজ্জা কাকেই বা !

এই তো বলেছো ।

বিশাখা জিব কেটে বলে, ইস, যেয়ে গেছে ।

তাহলে তো হয়েই গেল ।

বিশাখা মাথা নেড়ে বলে, না, হল না ।

হল না কেন ?

বাড়িতে কিছু শুনতে পাচ্ছি না ।

কী নিয়ে শুনবে ?

বিয়ে নিয়ে ।

শুনছো না ?

না । কী বিস্তী যে লাগছে ।

এত বড় একটা ঘটনা ঘটে গেল । এখন বিয়ে নিয়ে ভাববার মতো মানসিক অবস্থা কি কারো আছে ?

সে ঠিক কথা । কিন্তু আমাদের কী অবস্থা বলো তো !

শচীনের মুখ উদাস হয়ে গেল । বলল, এক দুদিনে তোমার আমার চেনা-জানা হল বিশাখা, সইতে হবে ।

সইছি না বুঝি ? ভাই নিরুদ্দেশ, তোমার দেখা নেই । কষ্ট কি কম ?

শচীন এই ছেলেমানুষী কথায় একটু হাসল ।

বিশাখা হঠাৎ বলল, সেই পেত্নীর কি খবর ?

কোন পেত্নী ?

ওই যে কে এক জমিদারের মেয়ে আমার গ্রাসে ভাগ বসাতে চেয়েছিল ?

শচীন উঁচু স্বরে হেসে ফেলেই সতর্ক হল । বলল, ভয় নেই ।

নেই তো !

না । তোমার গ্রাসে ভাগ বসায় সাধ্য কার ?

যা ভয়ে ভয়ে ছিলাম ।

এখন ভয় কেটেছে তো !

সবটা কি কাটে ?

আর ভয় কিসের ?

পুরুষ মানুষকে কি বিশ্বাস আছে ?

শচীন হঠাৎ গম্ভীর হয়ে বলে, কী ইদানীং ইংগিত করছো বল তো !

ইংগিত আবার কি ?

তাহলে বিশ্বাসের কথাটা উঠল কেন ?

বিশাখাও গম্ভীর হয়ে গেল । চোখ পাকিয়ে বলল, আমার কপাল ভাল নয় । তাই ভয় পাই ।

শচীন চুপ করে রইল ।

মরবি ! মরবি কেন ?

এমন সুন্দর দিন তো আর জীবনেও আসবে না ।

সুন্দর দিন বলেই বুঝি মরতে হয় ?

তুমি তো মেয়েমানুষের মন জানো না ।

মেয়েরা বুঝি খুব মরতে ভালবাসে ?

খুব । একটু সুন্দর ভাবে মরতে পারলে আর কী চাই ?

তুই বোধহয় খুব বোকা ।

মেয়েমাত্রই বোকা ।

ধুব শীতে গুটিয়ে যাচ্ছিল । বলল, এবার জানালাটা বন্ধ করতে দে । শীত লাগছে ।

তুমি আমার কাছ ঘেঁষে বোসো, তাহলে গরম লাগবে ।

তুই বড্ড বাজে বকিস ।

নোটন স্বপ্নাতুর চোখে ধুবর দিকে চেয়ে থেকে বলল, খুব খারাপ লাগছে আমাকে তোমার না ?

খারাপ লাগছে না । তবে বড্ড বকিস ।

প্রগল্ভতা ! তা আজ একটু প্রগল্ভ না হয় হলাম ।

এটাও নাটক থেকে দিলি নাকি ?

হতে পারে । আজকাল নাটকের ডায়ালগের সঙ্গে মনের কথা গুলিয়ে ফেলি গো ।

খুব মুশকিল তো তাহলে তোর ।

আমার না । নোটন মাথা নেড়ে বলে, মুশকিল তোমার । তুমি অনবরত আমাকে সন্দেহ করে যাচ্ছে । ভাবছো যা বলছি সব বানিয়ে বলছি । একটাও মনের কথা বলছি না । তাই বড্ড মুশকিল হচ্ছে তোমার ।

ধুব অপ্রস্তুতভাবে একটু হাসল । বলল, হবে ।

নোটন জানালাটা বন্ধ করে দিল । চুল ঠিক করল । তারপর খুব কাছ ঘেঁষে গিয়ে গা লাগিয়ে বসে বলল, আমাকে ঘেন্না করবে না, খবরদার ।

ধমকাচ্ছিস কেন ? ঘেন্না করলে কি চুমু খেতাম ?

নিজের ইচ্ছেয় খাওনি । আমি জোর করে আদায় করেছি ।

তা হোক । ঘেন্না যে করি না তা তো বুঝতে পেরেছিস ।

নোটন মাথা নেড়ে বলে, না, এখনো বুঝতে পারিনি । তবে বুঝতে চাই ।

সন্দেহ বাতিকটা তো তোরই ষোলো আনা দেখছি ।

ধুবর কাঁধে মাথাটা রেখে নোটন চোখ বুজে বলল, আজকের পর আর তো আমাকে কোনোদিন পাবো না । আজ ঘেন্না কোরো না ।

কী যা যা-তা বলছিস !

একটু জড়িয়ে ধরো ।

ধুব অনায়াসে বিনা দ্বিধায় জড়িয়ে ধরল নোটনকে । বলল, ওরকম করিস না । আমি ভাল লোক নই । আমার জন্য কেউ বেশী উতলা হলে খুব খারাপ লাগে ।

বউদি তোমাকে খুব ভালবাসে না ?

তা বোধহয় বাসে । কিন্তু এ কথা আগে হয়ে গেছে নোটন ।

হয়েছে হোক । আরো হবে । আজ কেবল উল্টোপাল্টা বকে যাওয়ার দিন ।

সরে বোস । স্টেশন আসছে ।

না ।

লোকে দেখবে ।

দেখুক গে ।

ধুব হাসল, নোটনের মাথাটা নেড়ে দিয়ে বলল, তোর যত সাহস আছে আমার তত নেই । সরে  
বোস ।

নোটন মাথাটা তুলল । স্টেশনে গাড়ি থেমে আবার চলল । কেউ উঠল না তাদের কামরায় ।  
নোটন আবার ঘন হয়ে বসে বলল, বড্ড জ্বালাচ্ছে । বলছি না আজ আমি মরব ! মরার দিনটায়  
একটু দয়ামায়া করবে তো আমাকে ।

মরবি কেন তা কিন্তু বলিসনি । হেঁয়ালি করছিস ।

আর বেঁচে থাকার কি কোনো মানে হয় ?

এটাও হেঁয়ালি ।

তোমার কাছে হেঁয়ালি লাগছে কেন জানো ? তুমি আমার মনকে তো বুঝতে পারোনি ।

মন বোঝাবুঝির সময় দিলি কোথায় ? এখনকার এই তোকে আমি কতটুকু চিনি বল তো ! তুই  
বা কতটুকু এখনকার আমাকে চিনিস ?

তেমনি স্বপ্নাচ্ছন্ন চোখে নোটন নিষ্পলক কিছুক্ষণ চেয়ে থাকে ধুবর দিকে । ঠোঁট দুটি অল্প  
ফাঁক । এক মায়াবী আলো যেন ঘিরে আছে মুখমণ্ডল । জীবনে এই প্রথম নিজের স্ত্রী ছাড়া দ্বিতীয়  
কোনো মেয়ের ঘনিষ্ঠ সংস্পর্শে তেমন অস্বস্তি বোধ করছে না ধুব । বরং ভাল লাগছে । মায়ী হচ্ছে ।

ধুবর মাথাটা কেমন হয়ে গেল । বুকের মধ্যে সামান্য তরঙ্গ খেল গেল । নোটনকে সোজা করে  
বসিয়ে দিয়ে বলল, মরিস না নোটন । তুই তো পাগল, হয়তো যা বলছিস তাই করে বসবি ।

নোটনের দুই চোখ টলটল করে উঠল জলে । ধরা গলায় বলল, আমি তোমাকে কিন্তু চিনি । খুব  
চিনি ।

কি ভাবে চিনিস ?

সারা দিন রাত এক সময়ে তোমাকেই ধ্যান করতাম তো । বোঝাতে পারব না । তবে চিনি । তুমি  
আমাকে একটুও চেনো না ।

ধুব চুপ করে ফাঁকা দীর্ঘ কামরাটার দিকে চেয়ে রইল শূন্য চোখে । তারপর বলল, আমার  
সেস্টিমেন্ট বলে কিছু নেই । আবেগ নেই । আমি সত্যিই ইমোশন্যাল ব্যাপারগুলো বুঝি না । যদি  
বুঝতাম তাহলে তোর অবস্থাটাও বুঝতে কষ্ট হত না ।

সবই বোঝো । স্বীকার করতে অহঙ্কারে বাধে ।

অহঙ্কার ! তা একটু বোধহয় আমার আছে ।

আছেই তো । তুমি অহঙ্কারী, নাক উঁচু । কিন্তু ওরকমই থেকো । অহঙ্কারই তো তোমাকে  
মনায় । সস্তা হবে কেন ?

ও বাবা ! আবার উন্টো চাপান !

নোটন মাথা নেড়ে বলে, এও তুমি বুঝবে না । আজ তোমাকে যত কাছে টেনে এনেছি এত কাছে  
টানা উচিত নয় । তোমাকে একটু তফাতে, একটু দূরে রাখলেই ভাল । তবে আজকের কথা তো  
আলাদা । এ রকম দিন তো আর আসবে না ।

ফের নোটন !

তোমাকে ছুঁয়ে বলছি আজ আমি মরব ।

গাড়ি শিয়ালদায় ঢুকছে নোটন ।

চটকা ভেঙে নোটন তাকাল, বলল, ফুরিয়ে গেল রাস্তা ?

তোকে কি বাড়ি পৌঁছে দিয়ে যাবো ?



অসুবিধে না হলে দাও ।

অসুবিধে কি ! বেশী রাত্তিও হয়নি ।

তাহলে চলো ।

প্লাটফর্ম পার হওয়ার সময় কেউ কথা বলল না তেমন । মল্লিকপুরের কুয়াশাচ্ছন্ন সেই স্টেশনের স্বপ্নলোক গাড়ির কামরার নিরঙ্কুশ নির্জনতার পর এত আলো আর লোকজনের মধ্যে এসে একটা বেসুর বাজল ।

ধুব বাইরে এসে একটা প্রাইভেট গাড়ি ভাড়া করল । নোটনকে পাশে বসিয়ে বলল, আমাদের ফোন নম্বর তো জানিস ।

জানি ।

কাল একবার ফোন করিস ।

কাল ! কেন বলো তো !

করিস তো । কথা আছে । তোর ভাইয়ের একটা চাকরির ব্যাপারে কিছু হয়ে যেতে পারে ।

নোটন হঠাৎ খিল খিল করে দুলে দুলে হাসতে লাগল ।

হাসছিস কেন ?

তুমি ভয় পেয়েছো ।

ভয় কিসের ?

কাল আমি সত্যি বেঁচে থাকব কিনা সেটা ভেবে ভীষণ ভয় পেয়েছো তুমি ।

আবার খিলখিল হাসি । অনাবিল, সত্যিকারের খুশিতে ভরা সেই হাসি শুনে ধুবও হেসে ফেলল ।

নোটন বলল, বলো ভয় পেয়েছো কিনা ।

একটু পেয়েছি ।

আমি মরলে তোমার কি ?

মরার কথায় আমার ভীষণ খারাপ লাগে ।

কিন্তু আমার যে ইচ্ছে করছে ।

ইচ্ছে ওরকম হয় । রোমাণ্টিক ইচ্ছে । ওটার কোনো মানে নেই ।

নোটন এবার নিঃশব্দে হাসতে লাগল । ছোট্ট একটা চিমটি দিল ধুবর হাতে । বলল, আজ আমাদের কী হয়েছে গো !

ধুব চূপ করে ভাবতে লাগল । এই যে লঘুভার সময় সে কাটাচ্ছে, উপভোগ করছে একটি চপলা বেহায়া মেয়ের সঙ্গ, এর মানে কি ? কেন ওরকম হচ্ছে ? নিজেকে সে কিছুতেই বুঝতে পারছে না । কদিন আগে তার ভিতরকার আর এক ধুব খারার গলা টিপে ধরেছিল । আজ আর এক ধুব এই কবেকার চেনা একটা মেয়ের সঙ্গে দেখালা করছে । এর কোনো মানে হয় ?

কি ভাবছো ?

কিছু না ।

চূপ করে আছো যে !

তোকে একটু পরে ছেড়ে দিতে হবে তো, তাই মন খারাপ ।

আবার চিমটি দিয়ে নোটন বলে, ইয়াকি দিচ্ছে ? তোমাকে আমি চিনি না, না ?

সত্যিই ।

তুমি অন্য কথা ভাবছো ।

তুই কি অন্তর্যামী ?

তাই তো ।

তবে বল কী ভাবছি।

একটা খারাপ মেয়েকে ছুঁয়ে আজ অপবিত্র হয়েছে কিনা তাই ভাবছো।

দূর বোকা। পবিত্রতা অপবিত্রতা নিয়ে বহুদিন মাথা ঘামাইনি। ওসব নয়। তবে তোর কথা ভাবছি।

কি ভাবছো ?

সে তোর শুনে কাজ নেই।

পায়ে পড়ি, বলো। না শুনলে মরে যাবো।

তোর কথাই ভাবছি, সঙ্গে নিজের কথাও।

কি ভাবছো বলো। বলে নোটন ধুবকে আঁকড়ে ধরে।

ধুব নিজেকে ছাড়াল না। নরম হাতে নোটনের মাথাটা নিজের শরীরে একটু চেপে ধরে বলে, আমাকে তুই আজ হিপনোটাইজ করলি কি করে ? আজ অবধি কেউ এতটা পারেনি।

সত্যি বলছো ?

সত্যি ছাড়া মিথ্যে বলব কেন ? তাই ভাবছি আমার কি বয়স হয়ে গেল ? প্রতিরোধ ভেঙে যাচ্ছে।

নোটন চূপ করে বেড়ালের মতো কাছ ঘেষে বসে রইল কিছুক্ষণ। সামনে ড্রাইভার বার বার আয়না দিয়ে তাদের দেখছে। কিন্তু তারা গ্রাহ্য করল না। নোটন বলল, আমি জানি। বলব ? বল না।

আমি তোমাকে এত ভালবাসি বলেই তুমি ঠেকাতে পারনি আমাকে ? সত্যিকারের ভালবাসার কাছে ধরা তো দিতেই হয়।

সমস্যা সেখানেও।

কিসের সমস্যা ?

তোর অত ভালবাসা কোথা থেকে এলো ? ইজ ইট বিলিভেবল ?

আমি ঢং করছি না গো।

জানি। তবু বিশ্বাস হচ্ছে না।

এক কাজ করবে ?

কি কাজ ?

আজ রাতটা আমার কাছে থাকো।

তার মানে ?

মানে আবার দু রকম হয় নাকি ? মানে একটাই। আজ আমার কাছে থাকো।

ধুব কিছুক্ষণ নোটনের দিকে চেয়ে থেকে বিস্ময় বোধ করল। প্রস্তাবটা তার প্রত্যাখ্যান করতে ইচ্ছে হল না। কিন্তু সে বললও না কিছু।

ঘেন্না হচ্ছে ?

বার বার ঘেন্নার কথা বলছিস কেন ?

তাহলে থাকো।

ধুব মৃদু একটু হাসল। বলল, বাড়িতে মা ভাই নেই ?

ওখানে কে যাবে ?

তাহলে ?

কোনো হোটেলে চলো।

ধুব হতাশায় মাথা নাড়ল, না রে। ওটা খারাপ দেখাবে, খারাপ লাগবে।

খারাপ কেন ?

মনে হবে যেন তোকে নিয়ে ফুর্তি করছি। তা তো নয়।

না, তা নয়। তাহলে ?

নোটনের উন্মুখ ভাব দেখে ধুব বলে, অত অস্থির হচ্ছিস কেন ?

নোটন বলে, অস্থির হবো না ? কী জীবন যাপন করি জানো ?

সে জীবন থেকে তোকে বাঁচাবে কে ?

তুমি। তুমি ছাড়া আর কে ?

কি ভাবে ? তোর সঙ্গে রাত কাটিয়ে ?

মাথা নেড়ে নোটন বলে, না। কিন্তু যদি আমি বুঝতে পারি আমার জন্য তুমি আছো তাহলে এখনো আমার আশা আছে।

কিসের আশা নোটন ?

এই বহু পুরুষের সঙ্গ করা, অনেকের মন রেখে চলা, দিন রাত টাকা রোজগারের কথা ভাবা এসব থেকে মুক্তি।

রোজগার করা কি খারাপ ?

খারাপই তো। মেয়ে হয়ে রোজগার করে মরছি। আমার যে ভাল লাগে না।

তোর শরীরে এখনো পুরুতের রক্ত রয়ে গেছে।

আছেই তো। আমি ইচ্ছে করে রোজগারে নামিনি।

যখন নেমেছিস তখন মেনে নেওয়াই তো ভাল।

আমাকে এড়াতে চাইছো ?

মোটাই নয়।

শোনো, আমার জন্য তোমাকে কিছুই করতে হবে না। বিয়ে করতে বলব না, ভরণ পোষণ চাইব না, রাত কাটাতেও না। শুধু আমাকে তোমার বলে ভেবো একটু, একটু ভালবেসো তাহলেই হবে। আর যখন খুব কাল্পা পাবে তখন কাছে ডাকলে এসো। তোমাকে কিল চড় ঘুষি মারব হয়তো, তারপর বুকে পড়ে কাঁদবো। সেটুকু সহ্য কোরো। পারবে না এটুকু ?

ধুব মাথা নেড়ে বলল, এই যা বলছিস এও তোর মনের কথা নয়। যে রকম চাইছিস সে রকম পেলেও তুই খুশি হবি না। তোর ভিতরে বড় অস্থিরতা।

ঠিকই তো। ভীষণ অস্থিরতা, মাঝে মাঝে পাগল-পাগল লাগে।

যে জীবন কাটাচ্ছিস তা অ্যাকসেপ্ট করতে পারছিস না।

ঠিক তাই।

আমি বলি অ্যাকসেপ্ট করে নে। সব ঠিক হয়ে যাবে।

তুমি এ কথা বলবে কেন ?

আমি যা বিশ্বাস করি তাই বলি।

না। তুমি এরকম জীবন বউদিকে যাপন করতে দেবে ?

ধুব হাসল, বলল, এখন বুঝলাম তুই আমাকে সত্যিই চিনিস না।

কেন ?

আমি রেমি সম্পর্কে অন্ধ নই, পজেজিভও নই।

প্লীজ, ওরকম বোলো না। ভয় পাই।

ভয় পাস কেন ?

তোমাকে অত নিষ্ঠুর ভাবতে ভয় করে।

গাড়িওয়ালা লোকটা এতক্ষণ দক্ষিণে চলছিল। এবার জিপ্সেস করল, বাঁ হাতি রাস্তাটা নেবো ?  
ধুব সচকিত হয়ে বাইরের দিকে তাকায়। জায়গাটা বুঝে নেয়। বলে, ঠিক আছে।  
নোটন দু হাতে মুখটা ঢেকে রেখেছিল। সোজা হয়ে বসে হাত সরিয়ে বলল, আমাকে অন্য  
কোথাও নিয়ে যাও।

কোথায় যাবি ?

যেখানে খুশি। আমি বাড়ি যাবো না।

কেন ?

আজ বাড়ি যেতে ইচ্ছে করছে না।

কেন সেটা বলবি তো ?

বাড়িতে আমার কে আছে বলো তো ! মা দিন রাত নানারকম খোঁটা দেয়, ভাই ঘেঁষা করে।  
অথচ আমার রোজগার খেয়ে বেঁচে আছে।

এই জন্য ? দূর !

আমি বাড়ির অ্যাটমোসফিয়ার সইতে পারি না।

সেটা তোর মনের দোষ।

কেন মনের দোষ হবে কেন ?

তুই রোজগার করছিস বলে নিশ্চয়ই পরিবারের সবাইকে নিজের তাঁবে রাখতে চাস।  
অত শত ভেবে দেখিনি। বাড়ি যখন ফিরি তখন ভীষণ টায়ার্ড থাকি। বোরো তো। ফিরে এসে  
সকলের মুখ আষাঢ়ের মেঘের মতো দেখলে কেমন লাগে বলো তো !

আমি তো কারো মুখের দিকে তাকাই না। তুইও তাকাবি না।

না তাকালেই কি। বাক্যবাণ আছে না ! কানও কি বুজ্জে রাখতে বলো ?

বলি।

না। ওসব হয় না। তার চেয়ে আমি যদি আলাদা থাকি ?

একা ?

ধরো যদি তাই থাকি !

আজকাল মেয়েরা তো একা থাকেই।

বলছো থাকতে ?

আমি বলার কে ? ইচ্ছে হলে থাকবি।

তুমি বলো। তুমি যা বলবে শুনবো।

কারো আজ্ঞাবাহী না হলে চলছে না ?

না। তোমার আজ্ঞাবাহী হয়ে থাকবো। বলো।

তাহলে বলি এবার একটা বিয়ে করে আলাদা হ। যা রোজগার করবি তা তোর মাকে পাঠিয়ে  
দিবি। বিয়ে করলেই সব ঝামেলা মিটে যাবে।

বিয়ে ?

নয় কেন ?

তুমি বলছো ?

বলছি।

এই আমার প্রতি তোমার ভালবাসা ?

আমার সঙ্গে তো তোর আজ হঠাৎ দেখা। না হলে কী করতিস ?

আর যাই করি বিয়ে করতাম না।

কেন বল তো !

দূর, ও একটা জীবন নাকি ?

আর আমার আজীবাবাহী হয়ে দিন কাটানোটা জীবন ?

তোমার জন্য সব পারি ।

ধুব মদু হাসল । আস্তে আস্তে তার ভিতরটা কঠিন হচ্ছে । দানা বেঁধে উঠছে প্রতিরোধ ।  
এতক্ষণে এই অস্থিরমতি মেয়েটির প্রতি তার প্রত্যাখ্যানের ভাবটা আসছে ।

সে বলল, না পারিস না ।

কে বলল পারি না ?

তাহলে একটা কথা বলি, শুনবি ?

শুনবো ।

আজ বাড়ি যা । আমাকে ছেড়ে দে ।

তোমাকে কি ধরে রেখেছি ।

রাখার চেষ্টা করছিস ।

দু হাতে তাকে আঁকড়ে ধরে নোটন । বলে, আমাকে ঘেমা কোরো না গো ।

কে ঘেমা করছে ?

তোমার চোখ করছে । আমি টের পাচ্ছি ।

ছাড় নোটন ।

না । ছাড়ব না । কিছুতেই না ।

॥ ৯১ ॥

হেমকান্ত একটু সামলে উঠেছেন বটে, তবু দিনরাত কৃষ্ণকান্তর কথাই চিন্তা করেন । সংসারের আর সব কিছুই গৌণ হয়ে গেছে । দিন পনেরো কুড়ির মধ্যেই ছেলেমেয়েরা যে যার জায়গায় ফিরে গেল । বাড়িতে মাত্র দু'টি প্রাণী । হেমকান্ত আর বিশাখা । রঙ্গময়ী ঠিক আগের মতোই স্বাভাবিক আসে যায় । তবে তার মুখে ইদানীং একটু কাঠিন্য দেখা যায় । বেশী হাসে না ।

একদিন রঙ্গময়ী বেশ চোখা গলায় বলল, দিনরাত বসে বসে ভাবলেই হবে ? মেয়ের বিয়ের চিন্তাটা করবে কে ? পাড়ার লোক ?

হেমকান্তর কানে কথাটা ঢুকল, কিন্তু মগজে কোনো ছাপ ফেলল না । সম্পূর্ণ অনামনস্ক চোখে চেয়ে বললেন, কার বিয়ে ? কী ভাবব ?

এই মানুষকে নিয়ে কী যে করি !

হেমকান্ত মদু একটু হাসলেন । বললেন, এই মানুষটা যে অপদার্থ তা তো বহুকাল ধরে জানো । নতুন করে চিনলে নাকি ?

অপদার্থ একবারও ভাবি না ।

তুমি না ভাবলেও লোকে ভাবে ।

কেউ ভাবে না । শুধু বলতে এসেছিলাম ভাবন কাজী হয়ে বসে থাকলে তো চলবে না । বিশাখার বিয়ের কথাটা একটু মনে রেখো ।

ও তুমি মনে রাখো গে । আমার ওসব নিয়ে ভাববার মতো মনের অবস্থা নয় ।

আজ্ঞা লোক, তুমি বাপ না ! আমি ভাবলে কী হবে ? আর শুধু ভাবলেই তো চলবে না, উদ্যোগ নিতে হবে ।

ক'টা দিন থাক মনু । হেমকান্ত কাতর স্বরে বললেন ।

দিন আর কত যাবে বলো তো ! বিশাখার কত বয়স হল হিসেব আছে ?

হেমকান্ত একটা দীর্ঘশ্বাস ফেলে চুপ করে রইলেন ।

রঙ্গময়ী চাপা স্বরে বলে, আর শুধু তাই-ই তো নয়, দেবা-দেবীর মুখ তো দিন দিন শুকিয়ে যাচ্ছে তোমার এই উদাস ভাব দেখে । তুমি তো কোনোদিকে তাকাও না, কিছু লক্ষণও করো না ।

বিশাখা আর শচীনের কথা বলছো নাকি ?

তাছাড়া আবার কে ?

হেমকান্ত আর একটা দীর্ঘশ্বাস ছেড়ে বললেন, বিয়েটা দেওয়া তাহলে দরকার বলছো ! দরকার । খুব তাড়াতাড়িই দরকার ।

সে বিয়েতে কৃষ্ণকান্ত তো থাকবে না মনু ।

কৃষ্ণর কথা কেন ভাবছো বলো তো ! বাপ হয়েছে বলেই কি তার ওপর তোমার মোলো আনা অধিকার ? তাকে দেশের দরকার নেই, মানুষের দরকার নেই ? ছেলে বুকে আগলে বসে থাকটা ই কি রীতি ?

তা বলিনি । হেমকান্ত বিষাদমাখা মুখে বললেন, বলছিলাম যে, বিশাখাকে তো বড় ভালবাসে । ছোড়দির বিয়েতে সে থাকবে না

ওসব মেয়েলি ভাবনা তোমাকে মানায় না । কৃষ্ণ যেমন সত্যিকারের পুরুষ তার বাপ হিসেবে তোমারও কিছু পৌরুষ দেখানো দরকার ।

তুমি বড় ক্যাট ক্যাট করে কথা শোনাও মনু ।

তা শোনাই । আমার কপালই যে অমন । নইলে তোমার কানে কথা ঢুকবে কেন ? কৃষ্ণর কথা সারা শহরের লোক ভাবছে । সারা দেশ ভাবছে ।

ভাবছে ?

বিশ্বাস হচ্ছে না ?

কি জানি ! বলে হেমকান্ত চুপ করে গেলেন ।

কিন্তু সারা দেশ না হোক, কৃষ্ণর নাম যে রাজনৈতিক মহলে পৌঁছে গেছে তার প্রমাণ পেতে হেমকান্তর বিশেষ দেরী হল না ।

একদিন সকালবেলা কয়েকজন অচেনা লোক দেখা করতে এল ।

খবর পেয়ে হেমকান্ত বৈঠকখানায় গিয়ে দেখেন, ধুতি এবং পাঞ্জাবি পরা বিশিষ্ট চেহারার কয়েকজন মানুষ । যুবক, মধ্যবয়স্ক দুরকমই আছে । মধ্যবয়স্কদের একজন বেশ ফর্সা, মুখে আভিজাত্যের ছাপ । হাতজোড় করে বললেন, আমার নাম সোমক দাশগুপ্ত । আপনার সঙ্গে একটু দেখা করতে এলাম ।

সোমক দাশগুপ্ত নামটা চেনা মনে হল না হেমকান্তর । প্রতিনমস্কার করে বসলেন, লক্ষ করে দেখলেন আগন্তুকদের পরনে খদ্দেরের পোশাক । একটু স্বদেশী মার্কা চেহারা ।

সোমক বললেন, আমরা কৃষ্ণকান্তর কথা কাগজে পড়েছি ।

কাগজে ? হেমকান্ত সোজা হয়ে বসে বললেন, কাগজে তার কথা বেরিয়েছে নাকি ?

আজকের কাগজেই আছে । বলে একজন ভাঁজ করা-একটা বাংলা খবরের কাগজ এগিয়ে দিল ।

ভিতরের পাতায় ছোট্ট একটু খবর লাল পেনসিলে দাগানো । কিশোরগঞ্জের এক গ্রামে এক দল বিপ্লবী পুলিশের হাতে ধরা পড়েছে । দলের কয়েকজন পালিয়ে যায় । তাদের মধ্যে পুলিশ একজনকে চিনতে পেরেছে । জমিদার হেমকান্ত চৌধুরির নিরুদ্বিগ্ন ছেলে কৃষ্ণকান্ত চৌধুরি ।

হেমকান্ত আর্তনাদ করে উঠলেন, সর্বনাশ ।

সকলে চুপ ।

একটু বাদে সোমক বললেন, বাবা হিসেবে আপনার দুশ্চিন্তা স্বাভাবিক । কিন্তু কৃষ্ণকান্ত আমার

ছেলে হলে আমি গৌরব বোধ করতাম।

হেমকান্ত অতি কষ্টে নিজেকে সামলে নিলেন। তারপর বললেন, আমার এই ছেলেটির অনেক সম্ভাবনা ছিল। ভারী মেধাবী, সাহসী। ও চলে যাওয়ায় আমার একটা অবলম্বন হারিয়ে গেছে। সোমক বললেন, জমিদারদের ছেলেরা যেমন হয় আপনার ছেলে তেমন হয়নি। এটা খুব শুভ লক্ষণ। আমার বাবাও জমিদার। যশোরে আমাদের বিষয় সম্পত্তি আছে।

হেমকান্ত চুপ করে লোকটার মুখের দিকে চেয়ে রইলেন। কথাগুলো ভাল বুঝতে পারছিলেন না। কৃষ্ণ পালিয়েছে। কিন্তু কতদিন পালিয়ে থাকতে পারবে? হয় ধরা পড়ে জেল খাটবে, ফাঁসি হবে, কিংবা গুলি খেয়ে মরবে। অস্থিরতায় মাথাটা নাড়লেন হেমকান্ত। বলে উঠলেন, নাঃ। সকলে তাকে নিবিষ্ট চোখে দেখছিল। হেমকান্ত সচেতন হয়ে লজ্জা বোধ করেন। শ্বাস ছাড়তে গিয়ে টের পেলেন, শ্বাসের বাতাসটা কেঁপে গেল।

সোমক বললেন, আমরা কংগ্রেস করি। তবে টেরিস্ট দলের নই। সেই ব্যাপারেই আপনার সঙ্গে কিছু কথা বলার ছিল।

আমি রাজনীতির কিছুই বুঝি না। আমাকে বলে কী লাভ?

যদি কখনো কৃষ্ণকান্ত আপনার সঙ্গে যোগাযোগ করে তাহলে আমাদের কথা আপনি যদি দয়া করে বলেন তাহলে খুব উপকার হবে।

আমার সঙ্গে সে কি যোগাযোগ করবে বলে আপনাদের ধারণা?

শুনেছি সে অত্যন্ত পিতৃভক্ত।

হেমকান্তর বুকটা দুলে উঠল গর্বে, আনন্দে, অহংকারে। কিছু বলার মতো খুঁজে পেলেন না।

সোমক বললেন, টেরিস্ট দলে একবার ঢুকলে অবশ্য বেরিয়ে আসা মুশকিল। তবু কৃষ্ণ হয়তো পারবে। তার নামে অন্তত মার্ভার চার্জ নেই।

নেই? হেমকান্ত খুব উদ্গ্রীব হয়ে প্রশ্ন করলেন।

না। থাকলে আমরা খবর পেতাম।

কী বলতে হবে কৃষ্ণকে?

সে যেন মহাত্মাজীর সঙ্গে গিয়ে একবার দেখা করে।

হেমকান্ত চুপ করে রইলেন। তারপর বললেন, মহাত্মাজী কি ওর কথা জানেন?

আমরা তাঁকে জানাবো।

কেন জানাবেন?

কৃষ্ণ খুব ব্রাইট ছেলে। কিন্তু পথটা ঠিক নয়। ও পথে গিয়ে লাভ নেই।

হেমকান্ত একটু অসন্তুষ্ট হয়ে বললেন, তাহলে কী বলব তাকে? পুলিশের কাছে ধরা দিতে?

সোমক হাসলেন। বললেন, সেটা মহাত্মাজী স্থির করবেন।

হেমকান্ত মাথা নেড়ে বললেন, উনি মস্ত মানুষ। ওঁকে এইসব ছোটোখাটো ব্যাপার নিয়ে বিরক্ত করবেন কেন?

উনি বিরক্ত হবেন না।

হেমকান্তর এ প্রশ্নাব পছন্দ হল না। কৃষ্ণ টেরিস্টদের দলে ঢুকেছে, খুন করেছে, ফেরারী হয়ে ঘুরছে। অর্থাৎ চিহ্নিত, দাগী। সে এখন মহাত্মাজীর শরণ নিলেও পুলিশ তাকে ছাড়বে না। খুন প্রমাণ না হলেও ছাড়বে না। অন্তত জেলে পুরবেই। তার চেয়ে বরং পালিয়ে থাকা ভাল।

হেমকান্ত বিরস মুখে বললেন, সে যদি আসে তখন দেখা যাবে। এখন কিছুই বলে কোনো লাভ নেই।

আমাদের বিশ্বাস, আজ হোক কাল হোক, সে আপনার সঙ্গে যোগাযোগ করবেই।

লোকগুলো চলে গেলে হেমকান্ত হাঁফ ছাড়লেন। চিন্তা অবশ্য তাঁর আরো বাড়ল। ঘরে এসে

খবরের কাগজ খুলে বসলেন। আজকাল খবরের কাগজ বড় একটা পড়েন না। খবরটা বেশ কয়েকবার পড়লেন। তারপর একজন চাকরকে ডেকে বললেন, মনুকে খবর দে।

রঙ্গময়ী আসতেই বললেন, খবর জানো?

কিসের খবর?

এই যে।

রঙ্গময়ী খবরটা পড়ে একটু সাদা হয়ে গেল। বলল, কারা এসেছিল তোমার সঙ্গে দেখা করতে?

কংগ্রেসের লোকেরা।

কি বলল?

তরাই খবরটা দিয়ে গেছে।

ওরা কী চায়?

ওরা চায় কৃষকে মহাত্মার কাছে নিয়ে যেতে।

মহাত্মা! ও বাবা! সে যে অনেক বড় ব্যাপার।

তাই তো দেখছি।

গিয়ে কি হবে?

আমি জানি না মনু, আমাকে জিজ্ঞেস করছো কেন? পলিটিকস আমার চেয়ে তুমি ভাল জানো।

রঙ্গময়ী মাথা নেড়ে বলল, না গো, আমি মেয়েমানুষ অত কি বুঝি! তবে কংগ্রেসের মধ্যে এখন বড় গণ্ডগোল।

পলিটিকস মানেই গণ্ডগোল। কৃষ যে কেন ওর মধ্যে ঢুকতে গেল। বোকা ছেলে।

তুমি কিছু কবুল করোনি তো?

না। চিনিই না কি কবুল করব?

নামগুলো জেনে নিয়েছো?

শুনেছি, তবে মনে নেই। একজনের নাম সোমক দাশগুপ্ত।

রঙ্গময়ী একটা শ্বাস ছেড়ে বলল, জানি।

কিরকম জানো?

নাম শুনেছি।

নেতা নাকি!

নেতাই। তবে বড় কিছু নয়। নামটা শোনা যায় লোকের মুখে।

কি করব বলো তো!

কি আর করবে, কিছু করার নেই।

ওরা বলল, কৃষ নাকি ঠিক আমার সঙ্গে দেখা করবে। আমার বিশ্বাস হয় না।

আমার হয়।

কৃষ আসবে?

আসবে। সে তোমাকে ভীষণ ভালবাসে।

হেমকান্ত হতাশ গলায় বলেন, সকলেই ওই কথা বলে, কিন্তু আমি তো কিছু বুঝি না। ভালবাসে তো এরকম একবন্ধে একবারও না বলে চলে গেল কেন?

নিমাই যখন সম্ম্যাস নেয় তখন কি শচীমাকে বলে গিয়েছিল? ওরকম নিয়মরীতি কিছু নেই গো।

হেমকান্ত চুপ করে রইলেন। হাতে খবরের কাগজ। মনে দৃষ্টিস্তা।

রঙ্গময়ী বলল, কতবার বলতে হবে যে, কৃষর জন্য চিন্তা করার কিছু নেই। ভগবান আছেন, তিনি দেখবেন।



হেমকান্ত মাথা নেড়ে বললেন, তোমার মতো ঈশ্বরবিশ্বাসটা আমার পাকা নয় ।

তোমার কোনো বিশ্বাসই পাকা নয় ।

হেমকান্ত একটু হাসলেন, বললেন, শুধু তোমার ওপর বিশ্বাসটাই খুব পাকাপোক্ত, তাই না ?  
রঙ্গময়ীও একটু হাসে । তারপর বলে, বিশাখার বিয়ে নিয়ে কথাটা কবে এগোবে ?

হেমকান্ত বিরক্ত হলেন । তবে বিরক্তি প্রকাশ না করে শান্ত স্বরে বললেন, ওরা খুব অস্থির হয়ে  
পড়েছে, না ?

না । ওরা অবিবেচক নয় । এ অবস্থায় যে তোমার পক্ষে বিয়ে নিয়ে চিন্তা করা মুশকিল তা ওরা  
জানে । বিশাখা তো ভাইয়ের জন্য প্রায়ই কাঁদে ।

আমি ভাবছিলাম ক'টা দিন গেলে আমার মানসিক অবস্থাটা একটু স্বাভাবিক হত ।

রঙ্গময়ী মাথা নেড়ে বলে, সেটা হবে না । তোমার মনকে আমি চিনি । যত দিন যাবে তত বেশী  
করে ভাববে, দুশ্চিন্তাও বাড়বে । তার চেয়ে বিয়ের ব্যাপারটা নিয়ে মাথা ঘামাতে থাকো, কোমর  
বঁধে কাজে নামো, তাতে খানিকটা ভাল থাকবে । দুশ্চিন্তা থেকে মুক্তি দেয় কাজ ।

বলছো ?

বলছি ।

তাহলে বোধহয় সেটাই করা ঠিক হবে ।

তাহলে বাবাকে দিন স্থির করতে বলি ?

বলো ।

একটা কথা ।

আবার কী ?

কৃষ্ণ তার ছোড়দির বিয়ের খবর যদি পায় তাহলে হয়তো এসে পড়তেও পারে ।

হেমকান্তর চোখ উজ্জ্বল হল, আসতে পারে ?

হ্যাঁ । তার কারণ বিয়ে বাড়ির হট্টগোলের মধ্যেই তার পক্ষে আসা সম্ভব । অন্য কোনো সময়ে  
আসা সম্ভব নয় ।

কেন বলো তো !

তুমি কি কিছু টের পাও না ?

কী টের পাবো ?

কৃষ্ণর কথা জেনেও পুলিশ তোমার কাছে একবারও কেন আসেনি ?

হেমকান্ত অবাক হয়ে বললেন, কেন, আমার কাছে কেন আসবে ?

আসাই স্বাভাবিক ছিল । জিজ্ঞাসাবাদ করাটাও তো দরকার । তুমি কিছু জানো কিনা বা তোমার  
সঙ্গে যোগাযোগ আছে কিনা ।

তা বটে ।

পুলিশ আসেনি, তার কারণ পুলিশ চব্বিশ ঘন্টা তোমার বাড়ির ওপর নজর রাখছে ।

বলো কী ?

সত্যি কথাই বলছি ।

কই, আমি তো কাউকে লক্ষ করিনি ।

তুমি আবার কবে কাকে লক্ষ করো ? বাইরে কদম গাছটার তলায় আজকাল একটা ভিখিরি  
সারাদিন বসে থাকে । পিছনের আমবাগানে কয়েকটা দারোয়ান খাটিয়া পেতে বসে সারাদিন খৈনি  
ডলে । একটা নতুন বোষ্টম পাড়ায় ভিক্ষে করতে আসছে আজকাল । একটা আধ-ন্যাংটা পাগলকেও  
দেখবে সজ্জের ঝোঁকে বিড়বিড় করে বকতে বকতে এদিক সেদিক ঘুরঘুর করে বেড়ায় ।

ও বাবা, এত আয়োজন !

তাই বলছি, এমনিতে কৃষ্ণর পক্ষে আসা বিপজ্জনক।

বিয়ে বাড়িতে কি নজর রাখবে না বলছো ?

রাখবে। নিশ্চয়ই রাখবে। তবে অনেক লোক নিমন্ত্রিত হয়ে আসবে। কাজের লোক থাকবে অনেক। তার মধ্যে নজর রাখা খুব মুশকিল।

হেমকান্ত মাথা নেড়ে বললেন, আমি চাই না বিপদ মাথায় নিয়ে কৃষ্ণ আসুক।

সে বুদ্ধিমান ছেলে। বিপদ বুঝলে আসবে না।

হেমকান্ত হঠাৎ সন্দিহান দৃষ্টিতে রঙ্গময়ীর দিকে চেয়ে বললেন, মনু একটা কথা বলবে ? কি কথা ? বলো।

তোমার সঙ্গে কি কৃষ্ণর যোগাযোগ আছে ?

রঙ্গময়ী দাঁত দিয়ে ঠোঁট কামড়াল। তারপর মৃদুস্বরে বলল, সরাসরি নেই। তবে মাঝে-মাঝে খবর পাই।

কি খবর পাও ?

ভাল আছে। চিন্তা কোরো না।

ভাল বলতে ?

ফেরারী অবস্থায় যতটা ভাল থাকা যায়।

যাদের সঙ্গে আছে তারা তো বিপজ্জনক লোক।

হাঁ। তবে কিশোরগঞ্জে দলের প্রায় সবাই ধরা পড়ে গেছে। বিপজ্জনক হলেও তারা কৃষ্ণকে বুক করে রাখত। তারা ধরা পড়ায় একটু চিন্তার কথা।

হেমকান্ত হাত বাড়িয়ে রঙ্গময়ীর একটা হাত চেপে ধরলেন, মনু, বাপের মুখের দিকে চেয়ে সত্যি কথা বলো।

রঙ্গময়ী বড় বড় চোখদুটো হেমকান্তর চোখে রাখে। তারপর স্ফুরিত অধরে একটু অভিমান প্রকাশ করে বলে, আর আমি ওর মা, একথাটা ভুলে যেও না।

হেমকান্ত তটস্থ হয়ে বললেন, জানি। জানি।

তার জন্য আমারও বুক পোড়ে।

মানছি মনু।

রঙ্গময়ী মাথা নেড়ে বলে, মানলে আমাকে সন্দেহ করতে না।

সন্দেহ ! কিসের সন্দেহ ?

সন্দেহ যে, আমি কৃষ্ণর খবর জেনেও লুকোই।

লুকোও তো ঠিকই মনু, সব কথা আমাকে তো বলো না।

সেটা লুকোবো বলে নয়। বলি না বলার মতো খবর নয় বলে।

হেমকান্ত রঙ্গময়ীর হাতটা ছাড়লেন না। একটু চেপে ধরে বললেন, বিয়ে বাড়িতে সে আসবে এসব কি ঠিক ?

রঙ্গময়ী মাথা নেড়ে বলে, না। আমার সন্দেহ সে আসতে পারে।

সে কোথায় আছে জানো ?

না। কি করে জানবো ?

হেমকান্ত হতাশায় চোখ বুজলেন। অনেকক্ষণ ঝুম হয়ে বসে থাকার পর উঠলেন, বললেন, ঠিক আছে, ব্যবস্থা করো। বিশাখার বিয়েটাই আগে দিই।

দিন স্থির করা আছে। আমিই দেখে রেখেছি। বাবাকেও দেখিয়ে নেবো।

কবে ?

ফাল্গুন । তেরোই । মোটে এক মাস হাতে আছে ।

॥ ৯২ ॥

বাথরুমের দরজা খুলে এক অচেনা ঘরে পা দিল রেমি । বিশাল জানালা দিয়ে সকালের রোদ এসে লুটোপুটি খাচ্ছে ঘরে । মস্ত ঘর । আলোয় বলমল । কিন্তু অচেনা । রেমির কেমন ভয়-ভয় করল কেমন অনিশ্চিত হয়ে গেল হাত পা । কার ঘর ? কে থাকে এখানে ? তাকে দেখে কেউ কি টেঁচিয়ে উঠে বলবে, কে, কে তুমি ? এখানে কেন ?

রেমির মুখ থেকে, মাথা থেকে টপ টপ করে জল পড়ছে মেঝেয় । মুখ মুছতে ভুলে গেছে সে । কিন্তু তোয়ালেটা হাতে ধরা আছে এখনো । ভূঁ কঁচকে সে মস্ত তোয়ালেটার দিকে তাকায় । সাদা জমির ওপর আবছা গোলাপী ফুল । খুব দামী, নরম তোয়ালে । কিন্তু কার ? অন্য কারো ব্যবহার করা নয় তো ! অন্যের ব্যবহার করা তোয়ালে বা গামছায় মুখ মুছতে বড় ঘেন্না তার ।

একটা টাইমপিস টিকটিক করছে নীচু টেবিলের ওপর । বাইরে কাকের ঝগড়া । একটা দুটো গাড়ির শব্দ । রেমি ঘরের মধ্যে আরো এক পা এগোলো । তারপর ফের দাঁড়িয়ে তোয়ালেটা দু'হাতে বুকে চেপে ধরে রইল প্রাণপণে । ভয় । ভূঁ কঁচকে মনে করার চেষ্টা করল । কিছু মনে পড়ল না । মাথার ভিতরে খুব ঘন কুয়াশা । কিন্তু বিছানার ওপর পাতা মণিপুরী এই ঢাকনাটা তার চেনা । তার ওপর পাতা একটা সবুজ অয়েল ক্লথ । দুটো খুদে পাশবালিশ, একটা ছোট্ট মাথার বালিশ, কাঁথা । কোনো শিশু নেই অবশ্য । এ সব খুব অবাক চোখে দেখল রেমি । কিছু মনে পড়ছে না ।

বউদি ! ও বউদি ! জলে যে মেঝে ভিজ়ে গেল গা ! ওম্মা !

রেমির বিস্মৃতি এক ঝটকায় কেটে গেল । ঝম করে যেন মাটিতে পড়ল পা । স্বপ্ন থেকে চোখ মেলল জাগরণে । একটা স্বস্তির শ্বাস ফেলল সে । তারপর লজ্জায় তাড়াতাড়ি মুখ মুছতে মুছতে বলল, বাচ্চাটা কোথায় গেল রে রাধা ?

কোথায় আবার ? বড়বাবু তাকে টেবিলে শুইয়ে পেট বুক চোখ কান সব দেখছেন মন দিয়ে । দেখগে যাও । আর তোমার বাচ্চাও বটে দাদুকে চিনেছে । অমন আঁতুরে ছেলে যে এমন শেয়ানা হয়—বলতে বলতেই রাধা একটা ন্যাকড়া বের করে মেঝেটা মুছে ফেলল । তোয়ালেটা রেমির হাত থেকে নিয়ে বাথরুমে রেখে এল ।

রেমি দুর্বল শরীরে বিছানায় বসল একটু । রাধা একটা মস্ত চীনেমাটির ঢাকনা দেওয়া স্যুপ বটল এনে রেখেছে টেবিলের ওপর । ওতে আছে গরম দুধ-সাগু । খেতে হবে । বাধ্যতামূলক এই দুধ-সাগু দেখলেই রেমির ভয় করে, বমি আসতে চায় । কিন্তু তার স্বশরীরের আদেশ খুব কড়া । খেতেই হবে । এতে স্বাস্থ্য ভাল হবে । বুকে দুধ আসবে ।

খেয়ে নাও গো বউদি ।

আজ অর্ধেকটা খাই, বাকি অর্ধেক বাথরুমে চুপি চুপি ফেলে দে ।

চাকরিটা খেতে চাও আমার ? গর্দনিটাও না যায় সেই সঙ্গে ।

উঃ, কী যে জ্বালা ।

খেয়ে নাও না নাক চোখ বুজে ! খারাপ জিনিস তো নয় । পোয়াতিদের খেতে হয় ।

রেমি ঢাকনা খুলে দু'হাতে সাদা বউলটা তুলল মুখের কাছে । সহনীয় করার জন্য রাঁধুনী খানিকটা ভ্যানিলা মিশিয়ে দিয়েছে । ছড়িয়ে দিয়েছে এলাচের গুঁড়ো । তবু গা গুলিয়ে ওঠে । খুব ধীরে ধীরে অল্প অল্প করে খায় রেমি । তার শাশুড়ি নেই, মা কাছে থাকে না, কিন্তু একজন তার সব অভাব পূরণ করে চলেছেন । কী আপ্রাণ চেষ্টা । এই দুধ-সাগুর অরুচিকর পদার্থটির মধ্যেও স্বস্তিশায়ীয়ে গভীর স্নেহ মিশে আছে ।

রেমি বৈচে ওঠার পর আনন্দে কৃষ্ণকান্ত ঘণ্টা দুয়েক কেঁদেছেন । সে কথা ভাবলে আজও

চোখ ভরে জল আসে রেমির। কষ্ট হয় বটে, তবু সে নিঃশেষে দুধ-সাণ্ডটা খেয়ে নেয়।  
কেন তার মাঝে মাঝে মাথাটা এমন কুয়াশায় ঢেকে যায় সেটা সে কিছুতেই ভেবে পায় না। কী হয় তার ? কেন হয় ?

রেমি এখনো কাউকে বলেনি তার সমস্যার কথা। বলার মতো কে-ই বা আছে তার ! একমাত্র কৃষ্ণকান্ত। কিন্তু বুড়ো মানুষকে নতুন করে উদ্বিগ্নে ফেলতে চায় না রেমি। ধুবর সঙ্গে তার বড় একটা দেখাই হয় না। ছেলে নিয়ে বাড়ি ফেরার পর থেকেই রেমি থাকে দোতলায়, ধুব ওপরে আসে না। যতদূর খবর পায়, ধুব আজকাল মদ খাচ্ছে না। একটু রোগা হয়ে গেছে। মাঝে মাঝে অফিসের কাজ নিয়ে বাইরে যাচ্ছে। কিন্তু রেমিকে বা বাড়ির আর কাউকেই সে কিছু বলে যায় না।

রেমির এখন কাউকে দরকার। সব কথা তো সবাইকে বলা যায় না। ঘনিষ্ঠ বিশ্বাসযোগ্য একজন আপনজন দরকার। ধুব ছাড়া আর কেউ তো নেই সেরকম। পরের মতো ব্যবহার বটে তার, কিন্তু রেমির তো আর কেউ নেই।

রেমি অনামনস্কভাবে সুন্দর পাত্রটির দিকে চেয়ে ডাকল, রাধা !

কী বলতেছো ?

তোর কাকাবাবুর খবর কী রে ?

বাড়িতেই তো ছিলেন সকালবেলায়।

এখন নেই ?

দেখছি।

তাড়াতাড়ি দেখ। থাকলে একটু ওপরে আসতে বল।

রাধা বউলটা নিয়ে চলে গেল। রেমি প্রত্যাশ্যাহীন অপেক্ষা করতে লাগল। হয়তো আসবে। হয়তো আসবে না। ধুবর তো কিছু ঠিক নেই।

কিন্তু একটু বাদেই সিঁড়িতে হাওয়াই চপ্পলের চেনা শব্দ পেল রেমি। ধক করে উঠল তার বুক। আজও বুকটা এরকম করে ! কেন করে তা কে বলবে ?

ধুব দরজার ফ্রেমে এসে দাঁড়াতেই রেমি দুর্বল শরীরে ওঠে। ভাল করে চেয়ে দেখে মানুষটার দিকে। কিরকম মেজাজে আছে ? রাগ না স্বাভাবিক ? ঘেন্না নয় তো ?

না, ধুবর মুখে ঘেন্না নেই। বরং একটু উজ্জ্বল হাসির পূর্বাভাস তার চোঁট ঝুঁয়ে আছে।

রেমি আশ্বস্ত হল। বলল, এসো, ঘরে এসো।

চটি খুলে, না না-খুলে ?

তার মানে ?

শুনলাম ওপরতলাটা নাতির সম্মানে তোমার শ্বশুরমশাই পুরো স্টেরিলাইজ করে রেখেছেন, যার-তার যেকোন অবস্থায় ওপরে আসার অধিকার নেই।

আমি তো অতসব জানি না।

আমরা ভুক্তভোগীরা জানি।

তোমাকে ওপরে আসতে কি উনি বারণ করেছেন ?

ডাইরেকটলি করেননি। তবে ফরমান জারি আছে যে, হাত পা সাবান দিয়ে না ধুয়ে এবং পরিস্কার জামাকাপড় না পরে কেউ-যেন ওপরে না আসে।

তাই বুঝি তুমি আস না ?

অনেকটা তাই। কাজ কি বড়লোকদের সঙ্গে মাখামাখি করে ? নীচের তলার লোক আমরা নীচুতেই বেশ থাকি।

বড়লোকের তুমি বুঝি কেউ নও ?

আমি ! আমি আবার কে ? এ লায়াবিলিটি।

তোমার ছেলের জন্যই এসব প্রিকশন নেওয়া হচ্ছে, পরের জন্য তো নয়।

ছেলে ? বাপরে ? ও আমার ছেলে নাম-কো-বাস্তে । ওর আসল পরিচয় হল, কৃষ্ণকান্ত চৌধুরির নাতি

রেমি হেসে ফেলে । বলে, খুব ইয়াকি শিখেছো ! এসো তো, তোমার সঙ্গে কথা আছে । চটিটা বাইরেই রাখো বরং ।

ধুব চটি ছেড়ে ঘরে আসে । চারদিকে উৎসুক চোখে তাকায় । তারপর বলে, সে ব্যাটা কোথায়, সেই খাঞ্জা খাঁয়ের নাতি ?

কার কথা বলছো ? ছেলে ?

তাই না হয় হল ।

তাকে তোমার দেখতে ইচ্ছে করে তাহলে ?

ইচ্ছে তো করে মাঝে মাঝে ভাই ! তবে কী জানো, আমার তো মোহর নেই যা দিয়ে মুখ দেখব ।

ছেলের মুখ দেখতে বাপের বুঝি মোহর লাগে ?

তাই তো শুনছি । দাদু নাকি পাঁচ মোহর ডাউন করেছে !

দাদুর ছিল তাই দিয়েছে । তোমার নেই, তুমি দেবে না ।

ভরসা দিচ্ছো ?

রেমি খুব হাসল, বলল, আসল কথাটা বললেই তো হয় । ছেলে, বউ, সংসার এসবের ওপর তোমার কোনো টান নেই । খামোখা স্বশুরমশাইকে দুষছো কেন ?

ধুব বিছানায় বসে । তারপর গৈয়ো লোকের মতো চারদিকে চেয়ে চেয়ে ঘরের আসবাবপত্র দেখতে থাকে । স্ট্যাণ্ডে ছোট্ট দোলনা, ঘরের কোণে পাথরের টেবিলে নতুন কেনা একটা স্টেরিলাইজার, নানারকম ওষুধপত্র, জীবাণুনাশক, একটা ওজন নেওয়ার যন্ত্র, তোয়ালে ন্যাপকিন, বাচ্চার জামাকাপড়ের ছড়াছড়ি । ধুব একটা শ্বাস ফেলে বলে, এত আয়োজন মাত্র একজনের জন্য ?

রেমি একটু লজ্জা পেয়ে বলে, স্বশুরমশাই ওকে বড় ভালবাসেন ।

তা বাসুন । কিন্তু ফুটপাথেও বাচ্চা জন্মায় এবং বেঁচে থাকে ।

ওসব কথা থাক । প্রীজ !

ধুব হাসল । মাথা নেড়ে বলল, থাক । এখন কেন ডেকেছো বলো ।

আমার একটা বিদঘুটে অসুখ হয়েছে ।

কী অসুখ ?

মাঝে মাঝে আমি সব ভুলে যাই । এই ঘর, এই বাড়ি, কিছুই চিনতে পারি না । আজ একটু আগেও হল । বাথরুম থেকে ঘরে পা দিয়েই মনে হল, এ ঘর তো আমার নয় । অন্য কার ঘরে ঢুকে পড়লাম আমি ! বেশিক্ষণ থাকে না ব্যাপারটা, কিন্তু প্রায়ই হয় ।

ধুব মুখ গম্ভীর করে শুনছিল । বলল, মানুষজনকেও চিনতে পারো না ?

না ।

নিজের ছেলেকেও না ?

রেমি একটু ভাবল । তারপর বলল, যখন ওরকম হয় তখন মিনিটখানেকের জন্য মাথাটাই ফাঁকা হয়ে যায় । কিছুই স্মৃতি থাকে না । ছেলেকেও তখন চেনা লাগে না ।

ডাক্তারকে বলেছো ?

না । ভাবলাম আগে তোমাকে বলি ।

ডাক্তার তো রোজই আসে ।

আসে ।

আজ ডাক্তারকে বোলো । আমরা লে ম্যান, অসুখের কী বুঝি ?

আমার কি মাথার গণ্ডগোল হবে গো ?

তা কেন ? এটা কোনো ডেফিসিয়েন্সি থেকেও হতে পারে । খুব সিরিয়াস কিছু বলে মনে হয় না ।

আমার ভীষণ ভয় করে, মনে হয় পাগল হয়ে যাবো না তো ! সেই ভয়ে ডাক্তারকেও কিছু বলি না ।

ডাক্তারকে ভয় কী ?

যদি বলে, আপনি পাগল হয়ে যাচ্ছেন !

দূর বোকা । ডাক্তাররা কখনো ওরকমভাবে বলে না ।

রেমি মাথা নেড়ে বলে, আমি পারব না । তুমি ডাক্তারকে বলো ।

আমি ! আমি কেন ?

তুমি আমার স্বামী না ?

নামকোবাস্তে ।

সে তো জানিই । তবু স্বামী তো । তুমিই বলো ।

দায়িত্বে জড়াচ্ছে ?

না হয় জড়ালাম । হাত দিয়ে তো পারলাম না, যদি দায়িত্ব দিয়ে পারি ।

ডাক্তার কখন আসে ?

দশটা নাগাদ ।

এখন মোটে আটটা ! দু'ঘণ্টা দেবী ।

রেমি একটু নাকি সুরে আশ্বাস করে বলে, তা হোক, আজ না হয় অফিসে একটু দেবীই হবে ।

ধুব একটু হাসল । আজ সকালে পরিষ্কার করে দাড়ি কামিয়েছে, চুল আঁচড়েছে, পরনে একটা ধবধবে সাদা পায়জামা, গায়ে পিন্টি রঙের একটা র-সিল্কের পানজারি । চেহারাটা বড় বেশী ধারাল দেখাচ্ছে আজ । একটু শীর্ণতায় ওর লাবণ্য নষ্ট তো হয়ইনি, বরং শক্তপোক্ত দেখাচ্ছে । হাসির বিদ্যুৎ মুখখানায় এক দারুণ সৌন্দর্যের আলো ফেলল ।

হয়তো বা ধুবকে এত সুন্দর দেখে রেমি একাই । বারবার এক বিভোর তন্ময়তা পেয়ে বসে । পেয়ে বসে মুগ্ধতা, কাম, তীব্র আকর্ষণ, আজও বুদ্ধিব্রংশ হয়ে গেল রেমির । হঠাৎ সে ঘন শ্বাস ছেড়ে বলল, তুমি কি জানো তোমার মতো সুপুরুষ আর একজনও নেই ।

এরকম কথা রেমি কখনো বলে না । ধুব অবাক হয়ে রেমির দিকে চাইল । তারপর বলল, তাই নাকি ?

কথাটা কি তোমাকে আর কেউ বলেছে ?

ধুব মাথা নেড়ে বলল, না । কারণ কথাটা সত্যি নয় ।

বটে ! বলে রেমি ধুবর কাছ ঘেঁষে বসল । আলতো করে হাত রাখল কাঁধে ।

ধুব বলল, সত্যি হলে কেউ না কেউ বলতই । তাছাড়া আর একটা কথা । আমার শরীরে জমিদারের রক্ত আছে । ব্রু ব্লাড । জমিদাররা সব সময়ে সুন্দরী মহিলাদের বিয়ে করতেন । ফলে বংশানুক্রমে তাঁদের বাচ্চারাও সুশ্রীই হত । আমার সেই উত্তরাধিকার থাকতেই পারে । কিন্তু কেবল শারীরিক সৌন্দর্য দিয়ে পুরুষের বিচার চলে না । তার মধ্যে আরো কিছু থাকা চাই ।

সেটা কী ?

পৌরুষ এবং চরিত্র । আমার তা নেই । এক রকমের চেহারা আছে যা দিয়ে কেবল মেয়ে পটানে চলে । পুরুষের সত্যিকারের সৌন্দর্য ওটা নয় । চেহারা হবে এমন যার সামনে পুরুষ নারী নির্বিশেষে মাথা নোয়াবে ।

রেমি শুনছিল না । ধুবর খুব কাছে বসে, তার কাঁধে ধুঁতনি রেখে মুখের দিকে অপলক চোখে

চেয়ে ছিল। আফটার শেভ লোশনের মৃদু গন্ধ আসছিল নাকে। মুগ্ধ সম্মোহিত হয়ে যাচ্ছিল। এত সব কথার পর হঠাৎ মৃদু স্বরে বলল, আমার সঙ্গে এক ঘরে থাকতে কি তোমার খুব অসুবিধে হয় ?  
ধুব একটু হাসল। বলল, থাকিনি কি ? কিন্তু তোমার মাননীয় স্বশ্রমশাই তো তা হতে দিচ্ছেন না।

উনি বিবেচক বলেই দোতলায় রেখেছেন আমাকে। উনি ভাবেন, বাচ্চা থাকলে সে তো রাতে কাঁদবে, বিছানা ভেজাবে, তুমি হয়তো বিরক্ত হবে।

তাই বুঝি ?

তা নয় ? একা আমাকেই তো তুমি সইতে পারো না। মাঝরাতে ছেলে রোজ কাঁদলে পারবে ? পারব বললে কি বিশ্বাস করবে ? আমাকে তো ট্রায়াল দিয়ে দেখনি।

ট্রায়াল দেবো না হয়। আজই নীচের ঘরে ব্যবস্থা করছি।

ধুব একটু তটস্থ হয়ে বলল, আজ থাক।

কেন, থাকবে কেন ?

একটা অ্যারেঞ্জমেন্ট আবার পান্টানো অনেক হাস্যামার ব্যাপার। পরে হবে।

রেমি একটু হেসে বলে, ভয় পেলে ?

ভয় না।

রেমি হাসল। করুণার হাসি। দীর্ঘ একটা শ্বাস ফেলে বলল, জানি গো জানি। আমি মরলে তুমি বাঁচতে।

ধুব খুব গম্ভীর মুখে মাথা নেড়ে বলে, না। তুমি মরলে আমার কোনো লাভ হত না রেমি। আমি যদি অন্য কোনো মেয়েকে চাইতাম তাহলেও না হয় হত। আমার সেরকম কেউ নেই।

কিন্তু আমি তো তোমাকে বেঁধে রেখেছি।

তা রেখেছো। তবু প্রথমে যতটা খারাপ লাগত এখন ততটা লাগে না। আচ্ছা, দরজা-ফরজা খোলা রেখে এমন গা ঘেষাঘেষি করছো আজ কোন সাহসে বলো দেখি ? কেউ দেখে ফেলবে না ?

দেখুকগে। পরপুরুষ তো নও।

খুব সাহস হয়েছে তো আজকাল ?

রেমি একখানা হাত বাড়িয়ে ধুবর মুখ চাপা দিল। বলল, তুমি কাছে থাকলে আমার শরীর-মন সব অন্যরকম হয়ে যায়। কত ভালবাসি তা তো বুঝলে না।

ধুব কিছু বলতে যাচ্ছিল। কিন্তু আচমকাই ঘরের বাতাস প্রকম্পিত করে একটা বাজ পড়ল। বউমা !

সচকিত রেমি ছিটকে উঠে দাঁড়াল। ধুব একা ভ্যাবাচ্যাকা খেয়ে দেখল, দরজার অতি সূক্ষ্ম ও স্বচ্ছ পর্দার ওপাশে কৃষ্ণকান্ত দাঁড়িয়ে আছেন। কোলে কাঁথায় সময়ে মোড়া নাতি। ঘরের ভিতরটা তিনি খুব স্পষ্ট ও পরিষ্কার দেখতে পাচ্ছেন।

ধুব বা রেমি কেউ একটাও শব্দ করতে পারেনি বিমূঢ়তায়।

কৃষ্ণকান্ত পর্দা সরিয়ে ঘরে ঢুকলেন। ধুবর দিকে দৃকপাত করলেন না। রেমির দিকে চেয়ে বললেন, বাপের বোধ হয় এখনো ছেলের মুখ দেখার সময় হয়নি, না মা ?

রেমি ঘোমটায় ঢাকা মুখ নত করে থাকে। জবাব দেয় না।

কৃষ্ণকান্ত তপ্তস্বরে বললেন, যদি বাপের সময় বা ইচ্ছে হয় অন্তত তাহলে তাকে একবার আমার দাদাভাইয়ের মুখখানা দেখিয়ে রেখো। অন্তত মুখচেনাটা হয়ে থাক।

এবারও ঘরে শুদ্ধতা।

কৃষ্ণকান্ত নাতিকে রেমির দিকে বাড়িয়ে দিয়ে বললেন, শরীরটা একটু লালচে দেখাচ্ছে আজ। বুঝলে ! হাম-টাম হতে পারে। আজ আর গায়ে জলস্পর্শ করো না। তেলটেলও দিও না। ডাক্তার এলে একবার ভাল করে দেখতে বোলো। রেমি ছেলেকে কোলে নেয়।

কৃষ্ণকান্ত নাতির ঘুমন্ত মুখখানার দিকে মায়াজরে একটুক্ষণ চেয়ে থাকেন। তারপর ধীরে ধীরে দরজার কাছে যান। একটু থেমে পিছন ফিরে বলেন, পৌরাণিক অভিধান আর কয়েকটা বই থেকে গোটা দশেক নাম বেছে রেখেছি। কোনটা খাপ খাবে তা বুঝতে পারছি না। লিস্টটা পাঠিয়ে দেবো, ছেলের বাপকেও বোলো একটু দেখে রাখতে। বলে কৃষ্ণকান্ত চলে গেলেন।

রেমি ছেলেকে বিছানায় শুইয়ে স্ট্যাণ্ডের মশারি দিয়ে ঢাকা দিল। তারপর চাপা স্বরে বলল, ওগো।

কী বলছ ?

ছেলে দেখ।

দেখছি। বলে ধুব হাসল। আড়চোখে গোলাপী নাইলনের মশারির মধ্যে শোয়ানো ছেলের টুলটুলে মুখখানা কয়েক সেকেন্ড চেয়ে দেখল সে।

রেমি বলল, কী মনে হচ্ছে ?

কী আবার মনে হবে ?

নিজেকে বাবা-বাবা লাগছে না ?

ধুর ! কে কার বাবা ? জন্মানোর জন্য ওর আমাকে এবং তোমাকে দরকার ছিল মাত্র।

ও আবার কি রকম কথা ?

দুনিয়াটা ঠিক ওরকমই প্রকৃতির নিয়মে চলে রেমি।

চুপ করো তো। অত জ্ঞানের কথা ভাল নয়।

॥ ৯৩ ॥

প্রস্তাবটা দ্বিতীয়বার তুলতে খুবই লজ্জা করছিল হেমকান্তর। রাজেনবাবু ভাল মানুষ, হয়তো কিছু মনে করবেন না, বরং খুশিই হবেন। কিন্তু হেমকান্ত নিজের মানমর্যাদার কথা ভেবে সঙ্কোচ বোধ করছিলেন। বিয়ের কথা আগে একবার হয়েছিল, বিশাখা অরাজি থাকায় এগোয়নি। এখন আবার নতুন করে প্রস্তাব তোলার একটা ভাল অজুহাত থাকা চাই।

ভেবেচিন্তে যে কিছু স্থির করবেন তার উপায় নেই। তেরোই ফাল্গুন বিয়ের দিন ধার্য করলে হাতে সময় খুবই কম। রঙ্গময়ী রোজ তাগাদা দিচ্ছে। বলছে, অত সঙ্কোচ করছো কেন ? রাজেনবাবুও জানে যে, শচীন আর বিশাখা এখন বিয়ের জন্য মুখিয়ে আছে। কেউ কিছু মনে করবে না।

দিনকাল পাল্টে গেছে। আজকাল ছেলেমেয়েরা নিজেদের বিয়ে নিয়ে নিজেরাই বোধহয় মাথা ঘামায়।

ছুটির দিন দেখে হেমকান্ত একদিন রাজেনবাবুকে দুপুরে খাওয়ার নিমন্ত্রণ করে পাঠালেন। খুবই একান্তে এবং সাধারণভাবে প্রস্তাবটা করবেন বলে।

নির্দিষ্ট দিনে রাজেনবাবু এলেন। খাওয়াদাওয়ার পর দুজনে বসলেন বাইরের ঘরে।

হেমকান্ত বিনীতভাবে বললেন, আমার দুর্ভাগ্যের কথা তো সবই জানেন।

দুর্ভাগ্য ! দুর্ভাগ্য কী বলছেন ?

ছেলেটা গৃহত্যাগী হল। মা-মরা ছেলে। বলে একটা দীর্ঘশ্বাস ফেললেন হেমকান্ত।

রাজেনবাবু মান হেসে বললেন, বাপ হয়ে ছেলের জন্য উদ্বেগ থাকবে না তা তো হয় না। তবু বলি অমন ছেলের বাবা হতে পারলে আমি নিজে ভারী গৌরব বোধ করতাম।

এ কথায় হেমকান্তর চোখে জল এল। সামলাতে একটু সময় নিলেন। তারপর ধরা গলায় বললেন, আমি নানা দিক দিয়েই ভাগ্যতাড়িত। স্ত্রী অকালে চলে গেলেন, ছেলে বিবাগী।

আমরা সব খবরই রাখি হেমবাবু। ভগবান সবসময়ে তো শুধু দেন না, কিছু নেনও। কর্ত্তী বড়



লক্ষ্মীমস্ত ছিলেন। তিনি চলে যাওয়ায় আমরাও একরকম মাতৃহারা হয়েছি। আমার দুর্দিনে তিনি অনেক সাহায্য করেছেন।

হেমকান্ত একটা দীর্ঘশ্বাস ফেললেন। তারপর বললেন, একবার শচীনীর সঙ্গে বিশাখার বিবাহের একটা প্রস্তাব তুলেছিলাম। আপনিও সম্মতি দিয়েছিলেন। নানা ঘটনায় আর সে ব্যাপারে এগোনো সম্ভব হয়নি। এখনো যদি আপনার মত থাকে তবে অগ্রসর হই।

রাজেনবাবু সহসা জবাব দিলেন না। চুপ করে রইলেন। তাঁর বিচক্ষণ মুখখানায় কোনো ভাব প্রকাশ পেল না। একটু পর বললেন, প্রস্তাবটি গ্রহণযোগ্য বলেই করেছিলাম। এখনো অমত কিছু নেই। বিশেষত পাত্র ও পাত্রীরও যখন পরস্পরকে পছন্দ। কিন্তু একটা ছোট বাধা হচ্ছে।

হেমকান্ত উদ্বিগ্ন হয়ে বললেন, কী বাধা?

যদি অভয় দেন তো বলি।

অভয় না দেওয়ার কিছু নেই। আমি খোলামেলা মানুষ।

রাজেনবাবু আবার একটু ভাবলেন। তারপর মৃদুস্বরে বললেন, আপনি বিপত্নীক। কিন্তু বেশ কম বয়সেই বিপত্নীক হয়েছিলেন। ইচ্ছে করলে আবার বিয়ে করতে পারতেন, কিন্তু করেননি।

হেমকান্ত ভারী অসহায় বোধ করে বললেন, আবার ওসব কথা কেন রাজেনবাবু?

রাজেনবাবু মাথাটা সামান্য নেড়ে বললেন, আমি আপনার পরম শুভাকাঙ্ক্ষী বলেই কথাটা তুলতে চাইছি।

হেমকান্তের অভ্যন্তরে একটা ভয় টিকটিক করছিল। বুঝতে পারছেন, একটা আঘাত আসছে। তবু বলতে হল, বলুন না। সঙ্কোচের কিছু নেই।

রাজেনবাবু গলাখাঁকারি দিয়ে মৃদুস্বরে বললেন, মানুষ হিসেবে আপনি তুলনাহীন। এমন মাটির মানুষ খুব কম দেখা যায়। আপনার অন্যান্য গুণ সম্পর্কেও আমরা জানি। এই তো সেদিন গুণ্ডার ছুরি খেলেন বিনা অপরাধে। কিন্তু কারো বিরুদ্ধে অভিযোগ করলেন না। আপনার মতো মহৎ বাবা না হলে কি কৃষ্ণকান্তের মতো উজ্জ্বল ছেলে ভূমিষ্ঠ হয়?

হেমকান্ত কুণ্ঠায় চক্ষু নত করলেন।

রাজেনবাবু বললেন, কিন্তু আমরা এও বুঝি আপনার রক্ষণাবেক্ষণের জন্য একজন মানুষ দরকার। যে-সে মানুষ নয়। বেতনভুক কর্মচারী দিয়ে সেবা জিনিসটা হয় না। আপনার বড় দুই ছেলে প্রবাসে, বিশাখার বিয়ে হয়ে গেলে আপনি সম্পূর্ণ একা হয়ে যাবেন। তখন যদি দেখাশোনার লোক না থাকে তবে খুবই অসুবিধে হবে।

আমার অভ্যাস আছে।

রাজেনবাবু মাথা নেড়ে বললেন, অভ্যাসের কথা বলছেন! আজ শক্তসমর্থ আছেন বলে বুঝতে পারছেন না। বয়স যখন হবে তখন বুঝবেন।

হেমকান্ত চকিতে একবার রাজেনবাবুর মুখের দিকে চেয়ে নিলেন।

রাজেনবাবু বললেন, তাই আমি আপনার কাছে আজ একটা প্রস্তাব নিয়েই এসেছি।

হেমকান্ত নড়েচড়ে বসলেন। বড় অস্বস্তি। আঘাতটা কি আসছে এইবার? যথাসম্ভব শাস্ত কঠে বললেন, বলুন।

আমি মনে করি কালক্ষেপ না করে আপনার আবার দার পরিগ্রহ করা প্রয়োজন।

কথাটা প্রায় সাধু ভাষায় বলা, তবু অর্থ তো পরিষ্কার। হেমকান্ত সহসা জবাব দিতে পারলেন না। চুপ করে রইলেন। রক্তময়ীর মুখটা চোখের সামনে ভেসে উঠল। সিদ্ধান্ত তো তিনি নিয়েই রেখেছিলেন। তবু সঙ্কোচ ছিল। ভয় ছিল।

রাজেনবাবু নম্র গলায় বললেন, আমি সব দিক বিবেচনা করেই কথাটা বলার সাহস পেলাম। একটু স্পর্ধা হয়তো প্রকাশ পেল, কিন্তু যদি আমার পরামর্শ গ্রাহ্য করেন তবে আখেরে মঙ্গলই হবে।

হেমকান্ত মাথা নাড়লেন। বুঝেছেন। তারপর বললেন, কিন্তু এ প্রস্তাবটার পিছনে অন্য কিছু নেই তো রাজেনবাবু? কোনো গুজব বা রটনা?

রাজেনবাবু সামান্য হাসলেন। তারপর হেমকান্তের দিকে একটু চেয়ে থেকে শান্ত গলায় বললেন, রটনা যাই থাকুক আমি কিন্তু আপনার চরিত্র জানি। যাকে যথার্থ পৌরুষ বলে আপনার তা আছে। যদি না থাকত তাহলে আজ এ বাড়ির মেয়ের সঙ্গে নিজের ছেলের বিয়ে দেওয়ার প্রস্তাব কানেও তুলতাম না।

হেমকান্ত কী বলবেন বুঝতে পারছিলেন না। সঙ্কটে তাঁর মাথা গুলিয়ে যায়। বললেন, বিশাখাকে পুত্রবধূ হিসেবে গ্রহণ করার ব্যাপারে এটাই কি আপনার শর্ত?

রাজেনবাবু জিব কেটে বললেন, ছিঃ ছিঃ, শর্ত কিসের? আপনার মতো মানুষকে শর্ত দিয়ে বেঁধে কি ছোটো করা উচিত? আমি প্রস্তাবটা করছি অন্য কারণে।

কারণটাই জানতে চাই, যদি বলতে বাধা না থাকে।

রাজেনবাবু মাথা নেড়ে বললেন, বলতে যে হবে তা জানতাম। তাই অনেক ভেবেছি। ভেবে ভেবে বুঝলাম আপনার সঙ্গে সোজাসৃজি এবং খোলাখুলি কথা বলাই ভাল। আপনি তো জানেন, পুরুষ মানুষ যেমনই হোক তার পিছনে একটা অন্দরমহল থাকে!

হেমকান্ত মৃদু হেসে বললেন, আমি অন্দরমহলের বিশেষ খবর রাখি না। সুনয়নী বেঁচে থাকতেও রাখতাম না। আর এখন তো আমার অন্দরমহল বলেই কিছু নেই।

রাজেনবাবুও সহাস্যে বললেন, আপনি একদিক দিয়ে ভাগ্যবান। আমাদের শুধু অন্দরমহলের খবরই রাখতে হয় না, ওই চাবির গোছার ঝনঝকার, ওই বালা আর চুড়ির শব্দের মধ্যে যেসব সঙ্কেত আছে সে সম্পর্কেও হুশিয়ার থাকতে হয়।

দুজনেই হাসলেন।

হেমকান্তের হাসি কিছুটা ম্লান। বললেন, বুঝেছি। অন্দরমহলে আমাকে নিয়ে কোনো কথা উঠেছে। তাই না?

রাজেনবাবু হ্যাঁ-না কিছু বললেন না। চুপ করে রইলেন। অনেকটা সময় পার করে বললেন, ঠিক তা নয়। মেয়েরা কুটকচালি পরনিন্দা পরচর্চা করে বটে, সেটা স্বাভাবিকও। কিন্তু আমার অন্দরমহলে একটু অন্যরকম মনোভাবও আছে। আপনার প্রতি আমাদের এক ধরনের দুর্বলতা আছে। আমরা বাস্তবিকই আপনার সুখে সুখী এবং দুঃখে দুঃখী হই। কৃষ্ণ নিরুদ্দেশ হওয়ায় আমার স্ত্রী খুবই কান্নাকাটি করেছেন।

কৃষ্ণকান্ত প্রসঙ্গে হেমকান্ত ফের উদাস হয়ে গেলেন। স্থির দৃষ্টিতে দেয়ালের দিকে কিছুক্ষণ চেয়ে থেকে বললেন, আমি বড়ই হতভাগ্য। জীবনে কোনো কিছুকেই আমি নিয়ন্ত্রণ করতে পারিনি। যা ঘটবার সবই ঘটে যাচ্ছে, আমার যেন কিছুই করার নেই।

রাজেনবাবু মাথা নেড়ে বললেন, ওরকমভাবে বলবেন না। মানুষ সব সময় সব কিছু নিয়ন্ত্রণে রাখতে পারেও না। তা বলে আপনাকে কেউ দুর্বলচিহ্ন বলে ভাবে না।

হেমকান্ত মৃদু হেসে বললেন, ঠিক সেটাই ভাবে। আমিও জানি যে, আমি দুর্বলচিহ্ন। কিন্তু আপনি বিশ্বাস করুন, আমার কখনো কোনো পদস্থলন ঘটেনি।

ছিঃ ছিঃ, সে ইঙ্গিত আপনার শত্রুও করে না।

করে। আমি জানি।

কিছু দুর্মুখ থাকতে পারে, তাদের কথা আলাদা।

দুর্মুখ নয়, যেটা ঘটা স্বাভাবিক সেটাই তারা বলে। কিন্তু আমি এমনই দুর্বলচিহ্ন যে মনু সম্পর্কে সিদ্ধান্ত নিতে আমার বহু বছর লেগেছে।

মনু! বলে রাজেনবাবু সোজা হয়ে বসলেন।

হেমকান্তর আর ভয় করল না। দুর্বলতা তিনি কাটিয়ে উঠেছেন। সহজভাবে রাজেনবাবুর দিকে চেয়ে বললেন, হ্যাঁ মনু। তাকে নিয়েই তো যত রটনা।

রাজেনবাবুর মুখ থেকে হাসিটা মুছে গিয়েছিল। আবার ফিরে এল। বললেন, আপনি কি সত্যিই কোনো সিদ্ধান্ত নিয়েছেন?

নিয়েছি। আমরা বিয়ে করার কথা ভাবছি। তবে এখানে নয়, প্রকাশ্যেও নয়।

গোপনীয়তার দরকার আছে কি?

আছে। আমার ছেলেমেয়েরা বড় হয়েছে, তারা সামাজিক জীব। আমি তাদের কোনো অস্বস্তিতে ফেলতে চাই না।

রাজেনবাবু একটা স্বস্তির শ্বাস ছেড়ে বললেন, আমার কাজ অনেক সহজ হয়ে গেল।

সহজ হল?

হল। আমি আপনাকে এ কথাটাই বলতে চেয়েছিলাম।

হেমকান্ত অবাক হয়ে বললেন, সে কী? আপনি আমাদের বিয়ে অনুমোদন করেন?

করি। কারণ আমি পুরুষমানুষ। মধ্যবয়সে স্ত্রী-বিয়োগ ঘটলে যে পুরুষের কী দুর্গতি হয় তা আমি আন্দাজ করতে পারি। অনেককে দেখেছি।

আর আপনার অন্দরমহল?

অন্দরমহলের কথা আলাদা। বাইরের জগতের সব কিছুই তাদের কাছে বাঁকা ভাবে গিয়ে পৌঁছোয়। আপনি ও নিয়ে চিন্তা করবেন না।

কিন্তু চিন্তার কথা আছে যে। আমার মেয়েটি যদি আপনার অন্দরমহলের কাছে আমার কলঙ্কের জন্যই গ্রহণযোগ্য না হয়?

কলঙ্ক আর থাকছে কই? আপনি যদি মনুকে বিয়ে করেন তাহলে তো ল্যাঠা চুকেই গেল।

বুড়ো বয়সের বিয়েই কি খুব প্রশংসাযোগ্য?

আমার অন্দরমহল মনে করেন, পুরুষের বিয়ের বয়সটা বড় কথা নয়। আর আপনার তেমন বয়স হয়েছে বলেও তো আমরা জানি না। আপনি আমার চেয়ে বয়সে অন্তত সাত-আট বছরের ছোটো। তাই না?

আমার পঞ্চাশ পূর্ণ হয়েছে।

ছেলেমানুষ। আর মনুও তো হামা দেয় না। সেও যথেষ্ট বয়স্কা মহিলা।

তবু আপনার অন্দরমহলে সব কথাই জানাবেন। আপত্তি থাকলে আমি আর মেয়ের বিয়ের প্রস্তাব নিয়ে অগ্রসর হবো না।

জানাব। তবে আপত্তি যে আর উঠবে না এ বিষয়ে আপনি নিশ্চিত থাকতে পারেন।

হেমকান্ত মাথা নাড়লেন।

রাজেনবাবু চলে যাওয়ার পরও অনেকক্ষণ স্থিরভাবে বসে রইলেন তিনি। খুব অন্যমনস্ক। গভীর বিষণ্ণ।

সামনেই একটু নড়াচড়া লক্ষ করে চিন্তারাজ্য থেকে বাস্তবে নামলেন। চোখের দৃষ্টি চিন্তামুক্ত হতে সময় নিল। তারপর দেখলেন, রঙ্গময়ী।

রঙ্গময়ী বলল, সব শুনেছি।

শুনেছো? যাক।

যাক কি? অত হাল ছাড়লে চলবে না।

আমার হাল নেই মনু। বহুকাল আমার নৌকো বেহাল হয়ে স্রোতে ভেসে চলেছে।

তাই বুঝি?

তা নয় তো কি?

বেশ স্বার্থপরের মতো কথা কিন্তু ।

কথাটা কি মিথ্যে ?

নয় ? হাল তুমি ধরোনি বলেই কি আর কেউ ধরে নেই ?

হেমকান্ত একটু হাসলেন । বললেন, হাল ধরেছো নাকি ? কাছেই আসতে চাও না তো হাল ধরা !

নইলে এতকাল সত্যিই শ্রোতে ভেসে যেতে ।

রাজেনবাবু কি প্রস্তাব দিয়ে গেলেন শুনলে তো ?

শুনেছি ।

এবার বলো কী করা যায় !

কী আবার ! তুমি তো সবই জানিয়ে দিয়েছো ।

কাজটা কি ঠিক হল ?

খুব ঠিক হল । ঢাক-ঢাক গুড়গুড়ের চেয়ে ভাল ।

বিয়েটা যদি ভেঙে যায় ?

পাগল নাকি ? মিঞা-বিবি রাজি তো কাজির সাধ্য কি ?

হেমকান্ত বিষণ্ণ মুখে মাথা নেড়ে বললেন, রাজেনবাবুর একটি অন্দরমহল আছে । সিদ্ধান্ত হবে সেখানে । আমাদের বেশীরভাগ সংসারেই গুরুতর সিদ্ধান্তগুলো আসে হাঁসেল থেকে ।

আসে বেশ হয় । তোমার মতো উদাসী পুরুষদের সিদ্ধান্ত হাঁসেল থেকে আসবে না তো কোথা থেকে আসবে ?

রাগ করছো কেন ? আমি বলছি সেখানে যদি অন্য কোনো রকম সিদ্ধান্ত হয় ?

রাজেনবাবুর অন্দরমহলকে আমি ঠাঁর চেয়েও বেশী চিনি ।

চেনো ? তাহলে বলো তাঁর মত কী !

তাকে আমি সব বলেছি । উনি শুনে মোটেই রাগ করেননি । বরং নিশ্চিন্ত হয়েছেন । পাঁচজনের পাঁচ কথা রটানোর সুযোগ দেওয়ার চেয়ে বিয়ে অনেক ভাল । তাতে একটু ছিঃ ছিঃ হতে পারে বটে, কিন্তু শেষ অবধি মুখে কুলুপ পড়বেই ।

হেমকান্ত একটু দীর্ঘশ্বাস ছেড়ে বললেন, কৃষ্ণকান্তটা যদি কাছে থাকত !

আবার তার কথা এখন কেন ?

সে থাকলে আমি স্বাভাবিক মাথায় সব কিছু চিন্তা করতে পারতাম । এখন অর্ধেক মাথায় কেবল তার কথা ভাবি, বাকি অর্ধেক মাথা নিয়ে বিষয়চিন্তা করি ।

সে যে দূরে আছে সেটাও ভগবানের আশীর্বাদ বলে জেনো ।

কেন বলো তো !

সে কাছে থাকলে তুমি হয়তো শেষ অবধি আমাকে বিয়ে করার কথা ভেবেই যেতে কিন্তু করতে পারতে না । তোমার লজ্জা হত, সঙ্কোচ হত ।

হেমকান্ত চুপ করে রইলেন । কথাটা যুক্তিযুক্ত ।

রঙ্গময়ী বলল, রাজেনবাবু তোমার কাছে আর একটা কথা জানতে চাইবেন ।

সেটা কী ?

উনি জানতে চাইবেন তোমার আর আমার বিয়ে কবে হবে ।

কী বলব বলো তো !

বলবে হয়ে গেছে ।

হেমকান্ত চমকে উঠে বললেন, মিথ্যে কথা বলব ?

মিথ্যে হবে কেন ? তার আগেই যে আমাদের বিয়ে হয়ে যাবে ।

সে কী ? বলে হেমকান্ত উত্তেজনায় উঠে বসলেন ।

রঙ্গময়ী এগিয়ে গিয়ে হেমকান্তর হাত ধরে বলল, ওরকম করছো কেন ? বোসো ।

হেমকান্ত বসলেন । বললেন, আমি তো ভেবেই কুল পাচ্ছি না মনু, কী বলছো তুমি !

রঙ্গময়ী হেমকান্তর সামনে হাঁটু গেড়ে বসে তাঁর মুখের দিকে চেয়ে বলল, সেই ছোট্ট থেকে তোমার দিকে চেয়ে বসে আছি । মগডালের ফল তুমি, হাতের নাগালে তো নও । একটা জীবন তোমার দিকে চেয়েই কাটিয়ে দিতে পারতাম । আর তো বয়স নেই । রক্ত কত ঠাণ্ডা হয়ে গেছে । তবু আজ তোমার মেয়ের ভবিষ্যৎ ভেবে এই কাজ তোমাকে আর আমাকে করতে হবে । ওদের বিয়ের পর আমরা না হয় কাশীবাসী হবো ।

কিন্তু আমাদের বিয়ের কথা কী বলছিলে ?

আমাদের বিয়ে আজ ।

আজ ?

চমকে উঠো না । আজ লগ্ন আছে, দিন আছে ।

বলো কী ?

ঠিকই বলছি । এ তো সানাই বাজিয়ে লোক ডেকে বিয়ে নয় । বিয়ে হবে ঠাকুরবাড়িতে । বাবা পুরোহিত হবেন । যজ্ঞ হবে ।

হেমকান্ত নিজের কানকে যেন বিশ্বাস করতে পারছিলেন না । স্থির চোখে রঙ্গময়ীর দিকে চেয়ে ছিলেন ।

রঙ্গময়ী বলল, জানি এটা বড় সুখের সময় নয় । কৃষ্ণ বাইরে, তোমার মন ভাল নেই । তবু বলি, সময় আর কখনো হবে না ।

গোপনে বিয়ে করতে হবে মনু ?

আমি তো তাই বলি । গোপনই ভাল ।

হেমকান্ত অনেকক্ষণ ভাবলেন । তারপর অদ্ভুত একটা কথা বললেন, কিন্তু বিয়ে তো উপোসী থেকে করতে হয় ।

বিয়ে কত রকম আছে তুমি জানো ?

না । তা জানি না ।

তবে ওটা নিয়ে মাথা ঘামিও না । আমি জানি । তোমার সঙ্গে আমার বিয়ে হবে সম্পূর্ণ শাস্ত্রীয় মতে । একটুও ত্রুটি থাকবে না ।

কাজটা কি ভাল হবে মনু ?

তা আমি জানি না গো । পাত্রী পছন্দ না হলে এখনো ভেবে দেখ ।

## ॥ ৯৪ ॥

স্বচ্ছ গোলাপী মশারির মধ্যে শিশুশরীর আর টুলটুলে মুখখানা অনেকক্ষণ দেখল ধ্রুব । ঠিক বটে, তার নিজস্ব দর্শন অনুযায়ী ওই শিশুকে সে নিজের বা নিজস্ব বলে দাবী করতে পারে না । প্রকৃতির নিয়মে মানুষ জন্মায় । জন্মানোর জন্য দুটি নরনারীকে ওর দরকার মাত্র । তার শরীর থেকে জন্মগ্রহণ করেছে বলেই নিজস্ব বলে দাবী করবে এমনতরো যুক্তি সে মানে না । কিন্তু যুক্তি এক জিনিস, বাস্তবে যা ঘটে তা অন্য রকম । মশারির ভিতরে শোয়ানো ছোট্ট শিশুটিকে দেখে ধ্রুব কেমন নরম হয়ে যাচ্ছিল

বড় মায়া !

কথাটা শুনে রেমি মুখ টিপে হাসল । তারপর বলল, তাই নাকি ? এই তো কি সব অলক্ষুণে কথা বলছিলে ?

সেটাও মিথ্যে নয়। আবার মায়াও মিথ্যে নয়।

অতবোকো না তো। ছেলেটাকে একটু ভাল করে চোখ চেয়ে দেখ। আমি যা পারিনি তা হয়তো ও পারবে।

সেটা আবার কী?

তোমাকে বাঁধতে।

ধুব খুব হাসল। বলল, সেকলে ডায়ালগ দিচ্ছে যে! বাঁধাবাঁধি আবার কিসের? ওকে আমি ছেলেবেলা থেকেই বন্ধনমুক্তির মন্ত্র শেখাবো।

তোমার ছেলে, তুমি যা খুশি শিখিও। আর আমি কী শেখাবো জানো?

কী?

আমি ওকে শেখাবো, এই লোকটাকে যেন সব সময়ে দুই হাতে আঁকড়ে ধরে থাকে।

পারিবারিক এই আবহাওয়া খুব খারাপ লাগছিল না ধুবর। যদিও সংসারের আবহাওয়া খুব তাড়াতাড়ি বদলায়, তবু সকালটা আজ তার ফুরফুর করে কাটছে। রেমি শরীরের সঙ্গে লেপ্টে বসে আছে, সামনের দরজাটা তবু খোলা।

ধুব রেমির কাঁধটা আলতোভাবে জড়িয়ে ধরে বলল, তোমার কী হয়েছে বলছিলে, স্মৃতিভ্রংশের মতো?

রেমি একটা দীর্ঘশ্বাস ফেলল। তার পরিষ্কার শ্বাসের বাতাসটি লাগল ধুবর গালে। কানের কাছে মুখ রেখে রেমি বলল, আমার কী মনে হয় জানো?

বলো শুনি।

মনে হয় তোমার অত অবহেলা সইতে সইতে আমার মাথাটা কেমন গোলমাল হয়ে যাচ্ছে।

তোমাকে অবহেলা করলাম আর কই। প্রবলেমকে কি লোকে অবহেলা করে? বরং সেটার কথাই সব সময়ে ভাবে।

আমি কেন তোমার প্রবলেম বলো তো? খাওয়াতে হয় না, পরাতে হয় না। এমনকি একসঙ্গে না থাকলেও চলে। আমি তো ছায়ার মতো থাকি। কায়াইন।

বাঃ বেশ বলেছো। পিওর কবিতা। তবে এ নিয়ে আমরা এত কথা বলে ফেলেছি অলরেডি যে আর আলোচনার মানেই হয় না।

নাই বা আলোচনা করলে। কিন্তু আমার মাথার অসুখটা কেন করল সেটা একটু ভাববে তো? মাথার অসুখ নয়।

নয় বলেছো? তুমি ভাল করে আমাকে একটু দেখ না গো!

কী দেখব? আমি কি ডাক্তার?

তুমি আমার সবচেয়ে বড় ডাক্তার। আমার চোখ দেখ, নাড়ী দেখ, ঠিক বুঝতে পারবে। পাগল আর কাকে বলে!

কোনোদিন তো এমনভাবে বলিনি। দেখ না, বুঝতে পারো কিনা!

ধুব রেমির মুখখানা দুহাতে ধরে চোখের দিকে চাইল। অনেকক্ষণ একদৃষ্টে চেয়ে রইল। রেমিও পলক ফেলল না।

তোমার চোখের দৃষ্টি খুব স্বাভাবিক।

মোটাই না।

তুমি কি করে বুঝলে যে স্বাভাবিক নয়?

রেমি মৃদু হেসে বলে, তুমি আমাকে ছুঁয়ে আছো, চোখের দিকে চেয়ে আছো, তবু আমার চোখের দৃষ্টি স্বাভাবিক হবে কি করে? আমার চোখে এখন আনন্দের আলো জ্বলছে।

ধুব হাসছিল, মৃদুস্বরে বলল, খুব শেয়ানা হয়েছে। এত বুদ্ধি করে কথা বলতে পারছো, তবু

ভাবছে পাগল হয়ে যাবে কিনা ?

রেমি মাথাটা নেড়ে বলে, না গো, বিশ্বাস করো। সত্যিই হচ্ছে। যখন হয় তখন কিছু চিনতে পারি না। আর মনে হচ্ছে, দিন দিন ব্যাপারটা বাড়ছে।

ধুবকে চিন্তিত দেখাল। জিঞ্জিষাস করল, বাবাকে বলেছো ?

বাবা ? স্বপ্নরমণাইকে বাবা বলছো তুমি ? বলে রেমি অবাক হয়ে তাকাল।

ধুব বড় একটা কৃষ্ণকান্তকে বাবা বলে সম্বোধন বা উল্লেখ করে না। হঠাৎ মুখ ফস্কে বেরিয়ে গেছে। সামলে নিয়ে বলে, বাবাই তো হয় লোকটা সম্পর্কে, তাই না ?

তোমার ফিলজফিতে তো তা নয় !

ঠুকছো ডিয়ার। এখন একটু ছেড়ে দাও। ডাক্তার এলে ডেকে পাঠিও।

কোথায় যাবে ?

আসছি একটু।

পালাবে না তো ?

না, পালাবো কেন ? আর পালিয়ে যাবোই বা কোথায় ?

এসো তাহলে।

রেমি ছেড়ে দিল। ধুব খুব ধীরে ধীরে ঘর থেকে বেরিয়ে নীচে নেমে এল। রেমির চোখের দৃষ্টির মধ্যে একটা খোলাটে ভাব সে লক্ষ করেছে। অবহেলা করে বটে সে, কিন্তু রেমির সবকিছুই তার জানা। ওই চোখ তার গভীরভাবে চেনা। কী হয়েছে রিমির ? একটা শক্ত অসুখের প্রতিক্রিয়া কি ? মানসিক ভারসাম্য গোলমাল নয় তো ?

নীচে নেমে এসে সে বৈঠকখানার টেলিফোনটা একবার তুলে ডায়াল করতে গিয়েও রেখে দিল। একটা চেয়ারে বসে চুপচাপ অপেক্ষা করতে লাগল ডাক্তারের জন্য। ডাক্তার আসতেই পথ আটকাল ধুব, আপনার সঙ্গে কথা আছে।

ডাক্তার বয়স্ক মানুষ, কৃষ্ণকান্তের প্রায় পারিবারিক বন্ধু। ধুবকে এইটুকু বয়স থেকে চেনেন। হেসে বললেন, বল রে পাগলা।

রেমিকে ভাল করে দেখেছেন দু-এক দিনের মধ্যে ?

ডাক্তার উদ্বিগ্ন হয়ে বললেন, কেন বল তো ?

ওর চোখে কিছু অস্বাভাবিকতা লক্ষ করেননি ?

ডাক্তার মাথা নেড়ে বললেন, না। তবে বউমা তো ভাল করে কিছু বলে না। চেক আপ একটা নামমাত্র করতে হয় বলে করা। তোর বাবা আবার বাচ্চাটার জন্যই বেশী অস্থির, তাই ওটাকেই বেশী করে দেখে যাই। কেন, বউমার কোনো কমপ্লিকেশনস দেখা দিয়েছে নাকি ? চোখে কী দেখেছিস ?

ওর দৃষ্টিটা স্বাভাবিক নয়। কেমন ঘোলাটে। মাঝে মাঝে স্মৃতিভ্রংশের মতো হচ্ছে।

কই, আমাকে বলেনি তো ?

লজ্জায় বলেনি।

আহা, এতে লজ্জার কী আছে ? বাঙালী মেয়েরা এই করে করেই তো যত গুণগোল পাকায়। চল তো গিয়ে দেখি।

একটু সাবধানে হ্যাণ্ডেল করবেন।

ডাক্তার একটু বিরক্ত হয়ে বললেন, নে চল তো। তোর কাছে আর আমাকে ডাক্তারী শিখতে হবে না।

ডাক্তার রেমিকে দেখলেন অনেকক্ষণ ধরে। অনেকগুলো প্রশ্ন করলেন। তারপর ধুবর সঙ্গে নীচে নেমে এসে একান্তে বললেন, মানুষের মন বড় বিচিত্র জিনিস। কখন কোন খোঁটায় বাঁধা পড়ে মাথা কুটে মরে তার তো ঠিক নেই। বউমাকে কয়েকদিন অবজার্ভেশনে রাখা দরকার। তারপর

প্রয়োজনমতো সাইকিয়াট্রিস্ট দেখাতে হবে।

মনের কথা কী বলছিলেন? খোঁটা না কি যেন বললেন?

ডাক্তার একটু হাসলেন, বললেন, এ হচ্ছে অবসেশনের যুগ। মানুষ চট করে অবসেশড হয়ে যায়। বউমারও সেরকম একটা কিছু আছে মনে হয়। খুব দুশ্চিন্তা করে নাকি?

তা করে বোধ হয়।

তার ওপর ডেলিভারির সময় ওরকম একটা ধকল গেল। শরীরটা ভীষণ দুর্বল তো। মাথাটা চিন্তার বোঝা বইতে পারছে না।

সাইকিয়াট্রিস্ট যদি এখনই দেখানো হয়?

দূর পাগল! খামোখা সাইকিয়াট্রিস্ট কতগুলো ওষুধ গেলাবে। তাতে ভালমন্দ কত কী হতে পারে। আমি পুরোনো আমলের মানুষ রে বাপু, ন্যাচারাল কিওরের পক্ষপাতী বেশী। দেখ না দুদিন। চট করে কিছু হবে না, ভয় নেই।

আমি একটা জিনিসকেই ভয় পাই।

সেটা কী?

মানুষ, বিশেষ করে মেয়েরা একটু সেন্টিমেন্টাল হয়। আপনার বউমা খুব উইক নেচারের। তাই ভাবছিলাম মানসিক স্থিরতা হারিয়ে সুইসাইড-টাইড করে বসবে না তো!

আরে না! সেরকম কিছু দেখেছিস নাকি?

না, ভাবছিলাম আর কি।

নতুন মা হয়েছে, এখন সুইসাইডের কথা ভাববে না। তবু নজরে রাখিস না হয়। তোর বাবাকে কিছু বলতে হবে এ বিষয়ে?

না, থাক। উনি খামোখা দুশ্চিন্তায় পড়ে যাবেন।

জানি বউমা-অস্তু প্রাণ।

ডাক্তার চলে গেলে ধুব অফিসে বেরোলো। একটা অন্যমনস্কতা আগাগোড়া রইল সঙ্গে। অফিসে এসেও সেটা ছাড়ল না। কাজে মন গেল না বলে একটা কাগজে ধুব কয়েকটা পয়েন্ট লিখল। রেমির ওপর কতরকম মানসিক বাধা পড়েছে তার একটা হিসেব। স্বামীর উপেক্ষা, স্বামীর প্রণয়িনীর সঙ্গে সাক্ষাৎকার, নিজস্ব প্রেমিকের সঙ্গে প্রেমে ব্যর্থতা, স্বামীর নীচতা ও হীনতা (কখনো কখনো) সত্ত্বেও তার প্রতি আনুগত্যবোধ এবং কিছু বস্তাপচা সংস্কার মানার অভ্যাস, স্বামীর মাতলামী, স্বশুরের আধিপত্য, প্রথম সন্তান ধারণ করা সত্ত্বেও ভ্রূণহত্যা, যৌন মিলনের অভাব(?) ইত্যাদি।

অনেকক্ষণ হিসেবটা মনোযোগ দিয়ে দেখল সে। আরো কিছু বোধ হয় বাদ থেকে গেল। তবু এটুকু থেকেই বোঝা যায় রেমির পাগল হওয়ার যথেষ্ট কারণ আছে।

টেলিফোনটা এল তিনটে নাগাদ। যখন ধুব কেটে পড়ার তাল করছে।

ধুবদা! আমি নোটন।

কী খবর রে?

তোমার সঙ্গে ভীষণ দরকার।

কিসের দরকার?

আজ সন্কেটা আমাকে দেবে?

না রে, আজ উপায় নেই। তোর বউদির শরীর খারাপ।

খুব সিরিয়াস কিছু?

নাঃ, তবে বাড়ি ফেরা দরকার।

খুব স্নেহ হয়েছে তো।



ত্রেণ কেন হবো ?

নাকি ছেলের মুখ দেখে বিশ্ব ভুলেছো ?

ওসব নয় । তোর দরকারটা কী ?

সব কথা কি ফোনে বলা যায় ?

তাহলে পরে কোনো সময়ে দেখা করিস ।

শোনো, আমি তোমার অফিস-বাড়িরই দোতলা থেকে ফোন করছি । পালাতে পারবে না ।  
বোসো আসছি ।

জ্বালালি, দোতলায় আবার কার কাছে ?

কত পাটি থাকে আমাদের ।

আয় তাড়াতাড়ি । সময় নেই আমার ।

ধুব ফোন রেখে দিয়েই বুবল, তার বৃকে হৃদস্পন্দনের শব্দ বেড়ে যাচ্ছে । দ্রুত হচ্ছে । শ্বাসে  
একটু জোর পড়ছে । লক্ষণগুলি ভাল নয় । নোটন সস্তা মেয়ে, ভাড়াটে মেয়ে । মল্লিকপুর এবং  
ফেরার পথে ট্রেনে যা ঘটেছিল তার জের টানার একটুও হচ্ছে নেই ধুবর । নোটনের কথা সে ক'দিন  
ভাবেওনি । কিন্তু এখন নোটন আসছে বলে তার এরকম সব হচ্ছে কেন ?

ধুব উঠে দাঁড়াল । ভাবল, নোটন আসার আগেই চলে যাই । তারপর মনে হল, সেটা দুর্বলতা ।  
এত সহজে হার মানবে কেন সে ? ভেবে আবার বসলো । মনটাকে কঠিন ও নির্বিকার করার একটা  
অক্ষম চেষ্টা করল সে ।

নোটন যখন তার সামনে এসে দাঁড়াল তখন হৃৎস্পন্দন একটু দামামার মতো বেজে গেল তার ।  
চালাক, ভীষণ চালাক মেয়েটা । একটুও সাজেনি । জানে, না সাজলেই ধুব পছন্দ করবে বেশী ।  
চওড়া পাড়ের একটা সাদা খোলের শাড়ি পরেছে, ডান হাতে একটা মোটা রূপোর বালা, কানে দুটো  
লাল পাথরের টপ । মুখে রূপটান নেই, কাজল নেই । একটু স্মিত হাসি আর চোখে দিপদিপ  
আলো ।

ধুব গলাটা যথাসম্ভব ভারী করে বলল, কী বলবি ?

বসি একটু ?

বোস ।

নোটন বসে শাড়ির আঁচল দিয়ে মুখের ঘাম মুছল । বলল, ভাবছিলাম তোমাকে বুঝি ধরতেই  
পারবো না । আমার সঙ্গে একটা জায়গায় কয়েক মিনিটের জন্য যাবে ?

ধুব সঙ্কিহান হয়ে বলে, কোথায় ?

চলো না । বেশী দূর নয় । ফেরার পথেই পড়বে ।

আমাকে কোথাও নিয়ে যাবি কেন তুই ? আমাকে দিয়ে কী কাজ ?

আমার কাজ আমি বুঝবো । চলো ।

ধুব তীক্ষ্ণ চোখে নোটনকে দেখে বুঝবার চেষ্টা করছিল । কিছু বোঝা গেল না । মেয়েদের  
প্রকৃতিদণ্ড ক্যামোফ্লেজ আছে । বলল, তোর কাজে আমাকে দরকার হচ্ছে কেন সেটিই জানতে  
চাই ।

এত প্রশ্ন করলে বড্ড অপমান হয় জানানো ?

অপমান ! বলে ধুব একটু ভাবে । সে বুঝতে পারছে, নোটন আজ আর একটু এগোবে । কিন্তু  
কেন ? ধুবর কাছ থেকে ওর পাওয়ার তো আর কিছু নেই ! প্রেম জিনিসটা ওর মতো মেয়ের হতে  
পারে না আর । সেই মন ওর মরে গেছে কবে । তবে কি ও প্রতিশোধ নিতে চায় ? কৃষ্ণকান্ত ওর  
দাদাকে অপমান করেছিলেন । দাদা নিরুদ্দেশ । ধুবর সঙ্গে ওর বিয়ের স্বপ্ন দেখেছিল ওর মা । সেই  
স্বপ্ন ওর চুরমার হয়ে গেছে । স্বাভাবিক জীবনযাপন থেকে বিচ্যুত হয়ে প্রায়-পতিতার এক

জীবনযাপন করতে হচ্ছে ওকে। হ্যাঁ, প্রতিশোধস্পৃহা নোটনের থাকতেই পারে। হয়তো ধুবকে নিজের কঙ্কায় নিয়ে সেই শোধটাই তুলতে চায় নোটন।

কয়েক মুহূর্তে এইসব কথা ভেবে নিয়ে ধুব হঠাৎ গা-ঝাড়া দিয়ে উঠে বলল, চল কোথায় যেতে চাস।

নোটন এক মুখ হেসে উঠে দাঁড়াল। ভারী সুন্দর দেখাল ওকে। ছিপছিপে শরীর, তাকুণো ঝলমল করছে চেহারা। চোখের দৃষ্টিতে একটু দুটুটি আর বুদ্ধির ঝিকমিকি।

নীচে একটা লাল অ্যামবাসাডার দাঁড়িয়ে ছিল।

ধুব অবাক হয়ে বলে, গাড়ি কিনলি নাকি?

না। গাড়ি আমার নয়। ধার নিয়েছি। ওঠো।

সামনে ড্রাইভার বসে। তার গায়ে সাদা ইউনিফর্ম। ধুবর একটু ঘেন্না হল। বোঝাই যায়, গাড়ির মালিক নোটনের ক্রায়েন্ট।

নোটন পাশে বসেই ঘন হয়ে এল। ধুবর একখানা হাত নিজের হাতে চেপে ধরে বলল, এরকম করো কেন বল তো?

কি রকম?

এই সন্দেহ কেন? ঘেন্না কেন?

ধুব চুপচাপ বসে রইল। জবাব দিল না।

তোমাকে একটা কথা আজ বলব ধুবদা।

বল।

আমি তোমাকে চাই। যেভাবেই হোক চাই। তোমাকে ছাড়া আমি বাঁচব না।

ধুব হাতটা টেনে নিয়ে বলে, পাগলামি করিস না।

রাগ করছ?

করছি। বাড়াবাড়ি করলে এর পর তোর মুখও দেখব না।

॥ ৯৫ ॥

“ইহা কী হইতে চলিয়াছে? কী ঘটবে? জীবনের গতি বিচিত্র সন্দেহ নাই। ইহার বাঁকে বাঁকে অঘটন, বিপর্যয়, রঙ্গ, তামাশা। তবু বলি, আজ আমার জীবনে যাহা ঘটিতে চলিয়াছে তাহা অদৃষ্টপূর্ব বা অপ্রত্যাশিত ছিল না। কিন্তু আমি হইলাম ভাবনকাজী। ভাবিয়া ভাবিয়া মেঘের উপর প্রাসাদ তুলিয়া ফেলি, কিন্তু বাস্তবে কুটাগাছটিও নাড়িতে উদ্যোগী হই না। ঘটনা ঘটাইতে আমার কুণ্ঠা সীমাহীন। বাতায়নে বসিয়া পৃথিবীর রঙ্গতামাশা দেখিব, নিজে তাহাতে যোগ দিব না, ইহাই আমার চিরকালের মনোভাব।

“তবু কপালদোষে আমার মতো কমহীন অবসরপ্রিয় নিরুপদ্রব মানুষকে লইয়া পৃথিবীর ঘটনাবলীর তরঙ্গরাশি ছিনিমিনি খেলিতেছে। একটি প্রাচীন বাটির অভ্যন্তরে বহু বৎসরের পুরাতন কালদুষ্ট আবহাওয়ায় আমার আত্মা প্রতিপালিত হইয়াছে। ইহাই আমার পৃথিবী। কাছারিঘরের পিছনে অযত্নলালিত উদ্যানটির মধ্যে আমি প্রকৃতির লীলা প্রত্যক্ষ করিতাম। চাহিদা আমার বিশেষ নাই। পুত্রকন্যারা কেহ প্রতিষ্ঠিত, কেহ বিবাহিত। তাহাদের প্রতি দায়দায়িত্ব তেমন কিছু ছিল না, সম্পর্কও নিতান্তই আলগা। একমাত্র কৃষ্ণকান্ত আমাকে কিছু মায়ায় বাঁধিয়াছিল। এখনো সেই মায়াই আমাকে বিহ্বল করিতেছে। ইহা ছাড়া আর একটি বন্ধনের কথা স্বীকার করিব। পুরোহিত-কন্যার বালিকাহৃদয় যে-খাতে বহিতে শুরু করিয়াছিল আজও যৌবনপ্রাপ্তে আসিয়া সে

খাতেই বহিতেছে। এই নারীকে সাধ্বী বলিব না তো কাহাকে বলিব ? তাহার সেই সাধ্বী অনুরাগকে অবহেলা করার অনেক চেষ্টা করিয়াছি। পারি নাই। আজ বুঝিতেছি একটি ক্ষীণ বন্ধনে সেও আমাকে বাঁধিয়াছে। কুল ভাসায় নাই, সৌজন্য ভাঙে নাই, দেহস্পর্শে আবিল করে নাই। কিন্তু একমুখী লক্ষে বহিয়াছে ঠিকই। আমি তাহার সংযম, তাহার নিষ্ঠা ও সেবাপরায়ণতার প্রশংসা করি। আমি রূপমুগ্ধ নহি, হইলে বলিতাম আমি তাহার রূপানলেও ঝাঁপ দিয়াছি। কিন্তু তবু এই বয়সে পুনরায় দারপরিগ্রহ করিবার মতো উদ্যম এবং উৎসাহ আমার ছিল না।

“কৃষ্ণকান্তের জন্য উদ্বেগে আমার অভ্যস্তর শুকাইতেছে। জীবনীশক্তি হ্রাস পাইতেছে। বীর পুত্রের জন্য গৌরবের চেয়ে তাহার বিরহ আমাকে কাতর করিয়াছে অনেক বেশী। অপাপবদ্ধ তাহার কিশোর মুখের শ্রী আমার ভিতরে এক কোমল অভিভূতির সৃষ্টি করিত। কতকাল যেন তাহাকে দেখি না। কৃষ্ণকান্তের ভিতর দিয়াই প্রথম বুঝিলাম, পুত্র কেমন হয়। পুত্রস্নেহ কাহাকে বলে। আমার সেই পরম প্রিয় পুত্র পুলিশের তাড়া খাইয়া, প্রতি মুহূর্তে লাঠি গুলির বিপদের মধ্যে অভুক্ত, অস্নাত, নিরাশ্রয় হাটে মাঠে ঘাটে ঘুরিয়া বেড়াইতেছে। আর আমি ? আমি মহাসুখে অট্টালিকার নিরাপদ আশ্রয়ে চর্বচোষ্য ভোগ করিয়া গদির বিছানায় দেহ এলাইয়া দিবাস্বপ্ন দেখিতেছি। তাহাও একরূপ সহনীয় ছিল, কিন্তু এই অবস্থায় বিবাহের টোপরটি পরিব কোন মুখে ?

“সত্য বটে বিবাহের অনুকূলেও যুক্তি আছে। পুরোহিত-কন্যার জীবন লইয়া আর ছিনিমিনি খেলিবার সময় নাই। এও সত্য দুর্জনের মুখ বন্ধ করিবার নিমিত্ত বিশাখা ও শচীনের বিবাহের আগেই এই কর্মটি চুকাইয়া ফেলা অভিপ্রেত। তবু মন সায় দেয় না। মনে হয়, কী যেন একটি কুকর্ম, পাপকাজ করিতে চলিয়াছি। ইহার ফল বছকাল ধরিয়া ভোগ করিতে হইবে।

“বিবাহ আজই। বিশ্বাস হয় না। সুনয়নী কবে মরিয়াছে, সেই শূন্য স্থান পূরণ করিতে যাইতেছি, সুনয়নীর আত্মা ব্যথিত হইবে না তো ! পুত্রকন্যারা সকুলেই কি এই বিবাহ স্বীকার করিবে। তার চেয়ে বড় প্রশ্ন, আজ এই পরিণত বয়সে বিবাহ করিয়া আমরা পরস্পরকে কীই বা দিতে পারিব ? কেমন যেন ব্যাপারটা অস্বাভাবিক লাগিতেছে। মনে কাঁটার মতো কী যেন বিধিতেছে।

“অবশ্য বিবাহের কোনো আয়োজন নাই, উপকরণ নাই, নিমন্ত্রিত কেহই আসিবেন না। ঠাকুরদালানে পুরোহিত একান্তে শুধু দুই হাত এক করিয়া দিবেন। সাক্ষী থাকিবেন শালগ্রাম শিলা, অগ্নি, গৃহদেবতা। তবু বড় চঞ্চল বোধ করিতেছি।

“একটু আগে বিশাখা আসিয়া আমার মুখের দিকে ক্ষণমাত্র দৃষ্টিক্ষেপ করিয়াছিল। তাহার চোখে বিষ্ময়। আমি সভয়ে চোখ নামাইয়া লইলাম। আমাকে চমকিত করিয়া বিশাখা কহিল, বাবা, আপনার গরদের পাঞ্জাবি বের করে রেখেছি।

“আমি কহিলাম, গরদের পাঞ্জাবি কী হবে ?

আজ পরতে হবে না ?

আজ ! আজ কী ব্যাপার ?

“বিশাখা নতমুখে কহিল, আমি জানি না। পিসি বলল তাই। কিন্তু বিষ্ময়ের কথা তাহার মুখ দেখিয়া মনে হইল না যে সে আমাকে ঘৃণা করিতেছে বা রাগ করিয়া আছে। অথচ সেটাই তো স্বাভাবিক !

“যাহার এত বড় বিবাহযোগ্যা কন্যা আছে তাহার বিবাহ কিরূপ হইবে ?

“অনেক ভাবিলাম। ভাবিতে ভাবিতে বেলা কাটিতে লাগিল। একবার মনে হইল নিরুদ্ধেশ হইয়া যাই না কেন ? গিয়া স্বদেশীদের দলে ভিড়িয়া পড়ি বা সম্মাস গ্রহণ করি। আমাদের বংশে তো ইহা নূতন নহে।

“আবার ভাবিলাম এই সময়ে চপলতা মানায় না। স্থির থাকিতে হইবে। সংযত থাকিতে হইবে।

“পড়ন্ত বেলায় সদাশয়-হাস্য মুখে মাখিয়া ধূতি পাঞ্জাবিতে সাজিয়া রাজেনবাবু আসিয়া হাজির।

কহিলেন, এ কী, এখনো যে প্রস্তুত হননি !

কিসের প্রস্তুত ?

“রাজেনবাবু আমার মুখের দিকে চাহিয়া হাসিয়া ফেলিলেন। কহিলেন, দেখুন, আপনার মতো ভাগ্যবান খুব কম লোকই আছে। লোকে দ্বিতীয়বার বিয়ে করতে গেলে তার আত্মীয়স্বজন বন্ধুবান্ধব কেউ বড় একটা খুশি হয় না। কিন্তু আপনার ক্ষেত্রে ঘটেছে উল্টো।

কিরকম ?

স্বয়ং আপনার মেয়েই চায় আপনি বিয়েটা করুন। আমি আপনার হবু বেয়াই, আমিও চাই করুন। কারণ বিশাখার বিয়ের পর আপনি একদম একা হয়ে যাবেন। আমরা আপনাকে এক অসহায় অবস্থায় ফেলতে পারি না। অনেক আলোচনা, গবেষণার পরই আমরা সর্বান্তঃকরণে এই বিয়ে অনুমোদন করেছে। এবার আপনি অনুমোদন করলেই হয়।

“বুঝিলাম মনু সব দিক দিয়া আঁট বাঁধিয়া লইয়াছে। সে কিছুতেই আমার মুখে চুন-কালি লেপন হইতে দিবে না। তবু বিশাখা কেন অনুমোদন করিল তাহা ভাবিয়া পাইলাম না। কিন্তু কৃতজ্ঞ বোধ করিলাম।

“রাজেনবাবু তাড়া দিলেন, উঠুন, উঠুন, লগ্নের বেশী দেরি নেই। আমার গিন্নীও আসছেন।”

আমি ব্যথিত হইয়া কহিলাম, এই তামাশায় আবার তাঁকে কেন ?

রাজেনবাবু সহাস্যে কহিলেন, তামাশা হবে কেন ? তিনি এয়ারো কাজ করতে আসবেন। ব্যাপারটা আমাদের কাছে তামাশা নয়। আমরা আপনার শুভাকাঙ্ক্ষী।

“বিশ্বাস হইল না। মনে হইল ইহারা রঙ্গ দেখিতেই আসিয়াছেন। আমাকে লইয়া পরে নিজেদের মধ্যে ঠাট্টা বিদ্রূপ করিবেন। শেষ অবধি জল কোথায় গড়াইবে ?

“এক এক সময়ে মানুষের স্বীয় বুদ্ধি লোপ পায়। ভাবিয়া কূল করা যায় না। আমারও আজ সেই অবস্থা। মস্তিষ্ক অসাড়, মন জড়বৎ, দেহ শক্তিহীন। আমার যেন এক কঠিন অসুখে বিকারের মত অবস্থা। চারদিকে যাহা সব দেখিতেছি তাহা যেন স্বপ্নবৎ এবং অপ্রাকৃত।

“উঠিলাম। কিছু বেশবাক্য করিতে হইল। রাজেনবাবুর স্ত্রী আসিলেন। অবশ্য তাঁহার অবগুষ্ঠিত মুখের ভাবটি দেখিতে পাইলাম না। বিশাখার সহিত নীচু স্বরে কথা কহিতে কহিতে ঠাকুরদালানের দিকে চলিয়া গেলেন।

“রাজেনবাবু বলিলেন, শচীনেরও আসার কথা।

“ঘোলোকলায় পূর্ণ হয় তাহা হইলে। ভাবী জামাতাবাবাজীবন স্বশ্রুতের বিবাহ দেখিতে আসিতেছে, ইহা অপেক্ষা কি মৃত্যু শ্রেয় ছিল না !

“রাজেনবাবু আমার মুখের ভাব দেখিয়া মনেরক্ষণ অনুমান করিয়া কহিলেন, আপনি বড় বিমর্ষ হয়ে আছেন। রঙ্গময়ীর দিকটাও তো ভাববেন ! বহুকাল ধরে সে আপনার পরিচর্যা করে আসছে। বিয়ে অবধি হল না। তার একটা সামাজিক পরিচয়ের কি দরকার নেই !

“জবাব দিলাম না।

“রাজেনবাবু নিজেই কহিলেন, বলতে পারেন শচীনই একরকম এই বিয়ের হোতা। আমরা সেকলে লোক, সে শিক্ষিত এবং আধুনিক স্বভাবের। কাজেই সে আমাদের কাছে সব কিছু বুঝিয়ে বলেছে। রঙ্গময়ীকেও সে রাজী করিয়েছে। শুধু আপনাকে রাজী করানোর সাহস দেখায়নি। সে তার রঙ্গময়ী নিয়েছিল। অথবা শচীনের জন্য সংকোচ বোধ করবেন না।

“একটা দীর্ঘশ্বাস ফেলিলাম। বাড়ির চাকরবাকর দাসদাসী এবং কর্মচারীরাও আছে। তাহারাও জানিবে। লজ্জায় যে কী করিয়া তাহাদের কাছে মুখ দেখাইব তাহা বুঝিতেছি না।

“ঠাকুর দালানে যখন পৌঁছিলাম তখন চারদিক অন্ধকারে ঢাকিয়াছে। মন্ত বারান্দায় স্নিগ্ধ দীপ জ্বলিতেছে। যজ্ঞকাঠ ও অন্যান্য উপকরণ প্রস্তুত। একধারে বিশাখা ও রাজেনবাবুর স্ত্রী বসিয়া

আছে। বিনোদচন্দ্র কিছু উদ্বিগ্ন, তটস্থ। একখানা পুঁথি হাতে বসিয়া ছিলেন, আমাদের দেখিয়া উঠিয়া দাঁড়াইলেন।

“যখন আসন গ্রহণ করিলাম তখন মনে হইতেছিল যূপকাষ্ঠে আমাকে ফেলিয়া বলির আয়োজন চলিয়াছে। বিনোদচন্দ্র কহিলেন, বিবাহ শাস্ত্রমতেই হবে। স্ত্রী আচারগুলো বাহুল্য বলে বাদ দিচ্ছি।

“আমি মাথা নাড়িয়া সম্মতি দিলাম।

“যখন বিনোদচন্দ্রের রুগণা স্ত্রী তাঁহার কন্যাকে বিবাহস্থলে লইয়া আসিলেন তখন আমি সেদিকে দৃকপাত করিতে পারি নাই। অধোবদনে বসিয়া নিজের শ্রদ্ধ করিতেছিলাম।

“কিন্তু দৃকপাত করিতে হইল। একটি রক্তাভ রেশমী বস্ত্রে অঙ্গ আচ্ছাদন করিয়া, ঘোমটা দিয়া মনু যখন আমার হস্তে সমর্পিতা হইতেছিল তখন একবার চারচোখে মিলন ঘটিল।

“চন্দনচর্চিত মুখ, একটি রূপটানের প্রলেপ, কাজল সবই ছিল। কিন্তু তাহার চেয়েও অনেক বেশী যে জিনিসটি প্রকটিত হইতেছিল তাহা অভাস্তরীণ এক দীপ্তি। নারীর নিজস্ব দীপ্তি থাকিতে পারে। থাকেও। কিন্তু পুরুষের দ্বারাই বৃথি সে প্রকৃত দীপ্তি পায়। আজ রঙ্গময়ীর মুখে যে দীপ্তি দেখিলাম তাহা আর কখনো দেখি নাই। সেই আনন্দিত মুখশ্রী একটি ফুৎকারে আমার সব দ্বিধা ও দ্বন্দ্ব উড়াইয়া দিল, বৃকে বল আসিল। মনে হইল, আমার এই অপ্রতিভ পরিস্থিতিতে আর কেহ না থাক, পাশটিতে তো মনু থাকিবে। তাহার উপর আমি কি সর্বাধিক নির্ভরশীল নহি?”

“বিবাহ হইয়া গেল।

“এই বিবাহে বাসর জাগিবার দায় নাই। সকলে বিদায় লইল। শচীন ঠাকুরদালানে ওঠে নাই। একটি দূরে সাইকেলে ভর রাখিয়া দাঁড়াইয়া ছিল। উঠানে স্বল্প আলোয় দাসদাসী ও কর্মচারীরাও উপস্থিত ছিল। কিন্তু আমার আর ততটা সংকোচ বোধ হইতেছিল না। মনুর স্পর্শে আমার ভিতরে তাহার তেজ ও সাহস সংক্রামিত হইয়াছে।

“বিবাহের পর যখন দুইজনে জোড়ে হাঁটিয়া ঘরে আসিলাম তখন এক আশ্চর্য অনুভূতি হইতেছিল। ভাঁটানো বয়সে বেশ আবার জোয়ার লাগিয়াছে। মনে হইতেছে পৃথিবীর দুঃখ, সন্তাপ, দুর্দৈবের সহিত আরো বহুকাল সংগ্রাম করিতে পারিব।

“সামান্য কিছু আহার করিয়া একটি অধিক রাত্রে আমরা এক শয়্যায় রাত্রিবাস করিতে ঘরে ঢুকিলাম। মনু দরজা বন্ধ করিয়া দিয়া ঘোমটা সরাইয়া আমার দিকে স্ত্রী চোখে চাহিয়া কহিল, অমন করছিলে কেন?

তটস্থ হইয়া কহিলাম, কেমন?

চোরের মতো বসে থেকে এমন একখানা ভাব করছিলে যেন কেউ তোমাকে ধরেবঁধে বিয়ে করতে বসিয়েছে।

একরকম তাহাই। তবু মুখে হাসি টানিয়া কহিলাম, হঠাৎ ঘটে গেল তো, তাই।”

মোটাই হঠাৎ নয়। আমাদের এই বিয়ে বহুকাল আগে থেকেই ঘটে ছিল। শুধু অনুষ্ঠানটুকু হল আজ। বলো তাই কিনা!

কী আর কহিব! বলিলাম, তাই হবে মনু। আমি কেমন তা তো জানোই।

জানি বলেই তো এই কাণ্ড করলাম। তোমাকে বাঁচিয়ে রাখতে হলে এছাড়া পথ ছিল না।

“গভীর রাত্রি পর্যন্ত দুজনে নানা কথা কহিলাম। সে সব কোনো প্রেমালাপ নহে। ঘর-সংসারের কথা, কৃষকের কথা, ছেলেমেয়েদের কথা, সুনয়নার কথাও। আমাদের নূতন কথা তো কিছুই নাই। তবু পুরাতন সব কথার মধ্যেই একটি নূতনের সুর লাগিতেছিল।

“আমরা একই শয়্যায় পাশাপাশি শয়ন করিলাম। কিন্তু কেহই দেহের সীমানা লঙ্ঘন করিলাম না। এমন কি একটি চুষনও নহে। বড় লজ্জা ও সংকোচ হইতেছিল।

“পরদিন সকাল হইতে না হইতেই মনু সংসারের চারদিক সামাল দিতে ঝাঁপাইয়া পড়িল। এখন

সে আর নিতান্ত পুরোহিতকন্যা নহে, সে এ বাড়ির গৃহিণী। তাহার গৃহিণীপনা দেখিবার মতোই। এমন সুচারুভাবে সে সবকিছু গোছগাছ করিতে লাগিল যে আমি ভরসা পাইলাম।

“দ্বিপ্রহরে একান্তে সে আমাকে বলিল, শোনো, আমরা কিন্তু এখানে থাকব না।

কোথায় থাকবে ?

কাশীতে লোক পাঠাও।

কাশী

হাঁ। আমাদের বাড়িটা সেখানে ফাঁকা পড়ে আছে। লোক গিয়ে সেটা মেরামত করতে থাকুক। বিশাখার বিয়ের পরই আমরা চলে যাবো।

সেটাই কি ঠিক হবে ?

হবে। এস্টেট শচীন দেখবে। তোমাকে ভাবতে হবে না।

“চুপ করিয়া গেলাম। মনু যাহা বলে তাহা ঠিকই বলে। তাহার পরামর্শ শুনিয়া আমার কখনো ক্ষতি হয় নাই।

“কালরাত্রি কাটিয়া ফুলশয্যা আসিল। কিরূপে সেই রাত্রির বর্ণনা করিব ? আমার ভিতরে যে পুরুষ এতকাল নিদ্রিত ছিল, সুনয়নীর সংস্পর্শেও যাহার ঘুম পুরাপুরি ভাঙে নাই, সেই পুরুষটিকেই যেন মনু আজ জাগাইয়া তুলিল। কাম ও প্রেমের মধ্যে পার্থক্য যোজনবিস্তার। কাম তো যে কোন নারী-পুরুষেই সংঘটিত হইতে পারে। কিন্তু দুটি নরনারী যখন যুগক্ষয়ী প্রতীক্ষার ভিতর দিয়া পরস্পরকে প্রার্থনা করে এবং কালের সকল নিয়মকে উপেক্ষা করিয়া অনুরাগের পরীক্ষায় উত্তীর্ণ হয় তখন তাহাদের মিলনে অবশ্যই দেবলোকের স্পর্শ, গন্ধ, শব্দ নামিয়া আসে।

“আমি দুঃখী, ক্রিষ্ট, বিগতপ্রায়-যৌবন পুরুষ। মনুও বালিকা নহে। তাহারও জীবন প্রাপ্তিশূন্য। দুই ক্ষতবিক্ষত হৃদয় এবং বয়স্ক শরীরের সেই মিলন ভাষায় বর্ণনার অতীত। আমরা কেবল পরস্পরের মধ্যে পরস্পর বিলীন হইয়া যাইতে লাগিলাম। কাঁদিলাম, হাসিলাম, কত স্মৃতি রোমন্থন করিলাম। অবশেষে পরস্পরকে সুদৃঢ় বাহুপাশে কাঙালের মতো আঁকড়াইয়া ধরিয়া কখন যেন ঘুমাইয়া পড়িলাম।

“মাত্র একটি মাস পরেই বিশাখার বিবাহ। সূতরাং আর সময় নাই। পরদিন হইতেই বাড়িতে মনু রাজমিস্ত্রি লাগাইল। বিবাহের খরচের জন্য শচীন এস্টেটে ঘুরিতে বাহির হইল। আমাকেও নানা মহালে যাইতে হইল।

“কাশীতে লোক পাঠানো হইয়াছে। বাড়ি মেরামতের কাজ সেখানে চলিতেছে। সূতরাং নানা বিষয়কর্মে আমাকে বিশেষরকম ব্যস্ত হইয়া পড়িতে হইল। মোটামুটি দাম পাইয়া একটি মহাল বিক্রি করিয়া দেওয়া গেল। বড় এস্টেটের ঝামেলা অনেক।

“সুখেই কয়েকটা দিন কাটিল। তাহার পরই সংসারের একটা কুৎসিত দিক অকস্মাৎ ভদ্রতা ও সৌজন্যের মুখোশ খুলিয়া সম্মুখে দাঁড়াইল।

“বিশাখার বিবাহ উপলক্ষে আমার ছেলেমেয়েরা আসিয়া উপস্থিত হইতে শুরু করিয়াছে। বউমা, ছেলেমেয়ে সকলেই আসিতেছে। সকলেরই মুখ গম্ভীর। ভ্রুকৃটি, বাকাহীনতা।

“ঘরে মনু গৃহিণীর আসনে আসীনা, এই দৃশ্য কেহই সহ্য করিতে পারিতেছে না। প্রত্যেকের মুখেই মুক প্রশ্ন, এ কে ? এ এখানে কেন ? কে ইহাকে অন্দরমহলে স্থান দিয়াছে ?

“জানি প্রশ্নগুলি সঙ্গত। কারণ মনুর ভূমিকার এই পরিবর্তন তাহাদের কাছে অপ্রত্যাশিত, অভিনব। মনে মনে এই সকল সম্ভাব্য প্রশ্নের কী জবাব দিব তাহা অনেক মহড়া দিয়াছি। কিন্তু কার্যকালে নীরবতা ছাড়া আর কিছুই অবলম্বন করার ছিল না। কারণ আমাকে কেহ কোনো প্রশ্ন করে নাই।

“বিশাখার বিবাহের তিন দিন আগে অকস্মাৎ বোমাটি ফাটিল। তাহার বিশ্লেষণ আমাকে

আমৃত্যু তাড়া করিবে। সংসার যে কিরূপ কঠিন ঠাই তাহা আর একবার আমার কাছে উদ্ঘাটিত হইল।”

॥ ৯৬ ॥

কৃষ্ণকান্তকে দেখে জীমূতকান্তি বিছানায় উঠে বসলেন। প্রকাণ্ড পালঙ্ক, পুরোনো আমলের ফুল লতাপাতার নকশা। তাতে পুরু গদির বিছানা। জীমূতকান্তির চেহারা প্রাচীনতার ছাপ থাকলেও বার্ষ্য নেই। এখনো টকটকে ফর্সা রং, অসাধারণ মুখশ্রী, শরীরের গঠনও চমৎকার। গলায় বাঘা আওয়াজ খেলে।

সেই গলাতেই বললেন, আয়। বোস।

কৃষ্ণকান্ত বিছানার পাশেই একটা চেয়ারে বসলেন। বললেন, কেমন আছেন?

বয়স হলে মানুষ একটু রোগভোগের কথা বলতে ভালবাসে। জীমূতকান্তিরও তাই। বললেন, আছি তো কোনোরকম। প্রশ্নারটাই বড্ড গোলমাল করে। কিছুই তেমন খাই না, তবু পেটে মাঝে মাঝে এমন গ্যাস হয় যে দম নিতে কষ্ট হয়। তখনই বুকে ব্যথা, প্রশ্নার।

কৃষ্ণকান্ত মন দিয়ে শুনলেন সবটুকু। বাধা দিলেন না। তাঁর এই দাদা ইতিপূর্বে দু-সুবার যমের মুখ থেকে ফিরে এসেছেন। এখনো যে বেঁচে আছেন সেটাই সৌভাগ্যের বিষয়। বরাবর পশ্চিমে ছিলেন। প্রথমদিকে তাঁর সম্ভানাদি হয়নি। একটু বেশী বয়সে দুই ছেলে এবং এক মেয়ে পর পর জন্মায়। যখন তারা জন্মায় তখন কৃষ্ণকান্ত জেল-এ। জেল থেকে বেরিয়েই ফের স্বদেশী আন্দোলনে নামলেন। আবার জেল-এ গেলেন। সেই সময়েই খবর পেয়েছিলেন কাশীবাসী হওয়ার আগে হেমকান্ত তাঁর অন্যান্য পুত্রদের বঞ্চিত করে নিরুদ্দেশ নাবালক কনিষ্ঠ পুত্রকেই যাবতীয় বিষয়সম্পত্তি উইল করে দিয়ে গেছেন। অছি হিসেবে নিযুক্ত হয় শচীন, রাজেন মোক্তার এবং স্থানীয় বিশিষ্ট কয়েকজন ব্যক্তি।

কিন্তু স্বদেশী আন্দোলনের সেই যুগে কৃষ্ণকান্ত বিষয়সম্পত্তির চিন্তা আদর্শেই করতেন না। খবরটা পেয়েও তাঁর কোনো ভাবান্তর হয়নি। তবে তাঁর মনে হয়েছিল, হেমকান্ত তাঁর জ্যেষ্ঠ দুই পুত্রকে বঞ্চিত করে অন্যায় করেছেন।

কনককান্তি কলকাতায় যে ব্যবসা করতেন তা শেষ অবধি ডোবে। পয়সাকড়ির টানাটানির মধ্যে পড়ে গিয়েছিলেন। কৃষ্ণকান্ত যখন শেষ অবধি বিষয়সম্পত্তির দখল নিলেন তখন বড়দার অবস্থা বেশ খারাপ। কলকাতার বাড়িতেও তিনি থাকতে চাইছিলেন না, প্রেস্টিজে লাগছিল। কৃষ্ণকান্ত তখন কনককান্তিকে বালিগঞ্জে একখানা ছোটো বাড়ি করে দেন।

জীমূতকান্তি চাকরি করতেন। তাঁর অভাব ছিল না, প্রাচুর্য না থাক। অবসর নেওয়ার পর কলকাতায় ফিরে এসে কিন্তু তিনি সরাসরি কৃষ্ণকান্তকে বললেন, বাবার বিষয়সম্পত্তি থেকে আমরা অন্যায়ভাবে বঞ্চিত। তুই দাদাকে যেমন বাড়ি করে দিয়েছিস তেমন আমাকেও দে।

কৃষ্ণকান্ত সেই দাবি মেনে নিয়ে জীমূতকান্তিকেও এই বাড়িখানা করে দেন টালিগঞ্জে।

এক সময় বিষয়সম্পত্তি সম্পর্কে নিলোভ ও উদাসীন ছিলেন কৃষ্ণকান্ত। তারপর বিষয়সম্পত্তি হাতে পাওয়ার পর তিনি উদার হাতে দানধ্যান করেছেন। বহু বিপ্লবীর সংসার টেনেছেন তিনি। দেশ ভাগের সময় নগদে, গয়নায় তিনি প্রচুর টাকা নিয়ে চলে আসেন। এ ব্যাপারে তাঁকে অত্যন্ত সূচিস্তিত পরামর্শ দিয়েছিল তাঁর ছোটো জামাইবাবু শচীন।

কিন্তু এখন কৃষ্ণকান্ত বিষয়সম্পত্তি সম্পর্কে তেমন উদাসীন নন। তাঁর তিন ছেলের মধ্যে বড়টি প্রায় ত্যাজ্যপুত্র, ছোটোটি এখনো পড়াশুনো করছে। মেজোটি অদ্ভুত এবং কিভূত। তিনি জানেন

তাঁর কোনো পুত্রই বৈষয়িক ব্যাপারে তেমন দড় নয় । বিশেষ করে খুব । এদের জন্য একটা পাকা ব্যবস্থা তিনি করে যেতে চান । সেই জন্যই এনিমি প্রপাটির ক্ষতিপূরণ দাবি করেছেন ।

মুশকিল হল, মানুষ স্বভাবত অকৃতজ্ঞ । কনককান্তি মারা গেছেন, কিন্তু তাঁর ছেলেরা লায়েক হয়েছে । জীমূতকান্তির ছেলেরাও কম যায় না । এখন সকলেই বলতে চায়, হেমকান্তর উইল সিদ্ধ নয়, তা বে-আইনী । তারা এখন এনিমি প্রপাটির টাকার ভাগ চাইছে ।

কৃষ্ণকান্ত তাই চিন্তিত । উদ্বিগ্ন । ভাগ চাইলেই পাবে, এমন নয়, কিন্তু কেউ একটা অবজেকশন দিয়ে বসলে টাকা পেতে গুণগোল হবে ।

কৃষ্ণকান্ত এ বাড়িতে ঢোকার পরই চারদিকে একটা তটস্থ, সম্ভ্রমাত্মক এবং সম্ভবত খানিকটা ভীত নিস্তদ্ধতা বিরাজ করছে । বউমারা সামনে আসছেন না, বাচ্চারা চেঁচামেচি করছে না ।

কৃষ্ণকান্ত জানেন, এখনো তাঁকে এরা সবাই ভয় পায়, সম্ভ্রম করে । এখনো মুখের সামনে দাঁড়িয়ে কোনো প্রতিবাদ করার মতো বৃকের পাটা কারো নেই । কিন্তু এরকম চিরদিন থাকবে না । তিনি বুড়ো হয়েছেন, আগের দাপুটে ভাবটা একটু মিইয়ে গেছে । রাজনীতিতেও প্রভাব কমেছে । এখন হয়তো এরা ক্রমে ক্রমে সাহসী হয়ে উঠবে । অবাধ্যতা করবে । আর তাঁর মৃত্যুর পর যে কী হবে তা বেশ ভাবনার বিষয় ।

কৃষ্ণকান্ত আত্মীয়স্বজনদের প্রতি অত্যধিক স্নেহশীল । তাদের দায়ে দফায় বরাবর গিয়ে পড়েছেন । নিজের গোষ্ঠীর প্রতি তাঁর সীমাহীন আসক্তির ফলেই দাদাদের এবং দিদিদের ছেলেরা ভাল চাকরি পেয়েছে, মেয়েদের বিয়েও হয়েছে চমৎকার সব ঘরে-বরে । কিন্তু তবু তাঁর আত্মীয়েরা এতে খুশি নয় । তারা আরো কিছু চায় । কৃষ্ণকান্ত তাদের দোষ দেন না । মানুষের তো চাওয়ার শেষ নেই । কিন্তু এনিমি প্রপাটির টাকা তাদের পাওনা হয় না ।

কৃষ্ণকান্ত মেজদাদার দিকে চেয়ে ছিলেন । বুঝবার চেষ্টা করছিলেন, গুঁর মনোভাবটা কী । তাঁকে দেখে কেমন প্রতিক্রিয়া হয়েছে । লক্ষ করে বুঝলেন, মেজদা অস্বস্তিতে পড়েছেন । মানুষটা কোনোদিনই শক্তপোক্ত ছিলেন না ।

কৃষ্ণকান্ত খুব শান্ত গলায় হঠাৎ প্রশ্ন করলেন, মেজদা, আমি শুনতে পাচ্ছি আপনি এনিমি প্রপাটি ক্রেম করবেন !

জীমূতকান্তি এত সরাসরি প্রশ্নটা আশা করেননি । ভাবী অস্বস্তি বোধ করে বললেন, আমি তো এসব কিছু জানি না । তবে ছেলেরা কী সব যেন বলে ।

কী বলে ?

ওদের সঙ্গে একটু কথা-টথা বলে দেখ ।

কৃষ্ণকান্ত ভুরুটিগুস্তীর মুখে বললেন, আপনি বেঁচে থাকতে আমি ওদের সঙ্গে কথা বলব কেন ? জীমূতকান্তি ফর্সা গালে অসহায় হাতখানা বুলিয়ে বললেন, উইলের কথা আমরা কেউ জানি না । বাবা আমাদের জানাননি । শচীনের কাছে গচ্ছিত ছিল ।

তাতে কী হল ? উইলটা কি সিদ্ধ নয় ?

তা বলছি না ।

আর কথাটা এতকাল পরেই বা উঠছে কেন ?

আমি বুড়ো হয়েছি, যে কোনোদিন রওনা দেব । আমার ওসব দিয়ে কী হবে ? ছেলেরা এখন সাবালক হয়েছে, ওদের নিজস্ব মতামত হয়েছে ।

নিজস্ব মতামতের কোনো দাম নেই, যদি তা অন্যায়্য হয় ।

তুই বরং ওদের সঙ্গে কথা বল ।

কৃষ্ণকান্ত মাথা নাড়লেন, ওরা আমার সমান সমান নয়, ওদের সঙ্গে বিষয় সম্পত্তি নিয়ে কথা বলা সম্ভব হবে না । আর আপনি বেঁচে থাকতে ওদের কোনো দাবী দাওয়া থাকতে পারে না ।



আমি কী করব বল ।

আপনি ওদের বলুন, দেশের বিষয় সম্প্রতিতে ওদের কোনো হিস্যা নেই । ওরা সেটা বুঝুক ।  
যদি বুঝতে না চায় ?

তাহলেই বা সুবিধে হবে কিসের ? অবজেকশন দিলে ক্রেম পেতে একটু দেরী হবে ঠিকই । কিন্তু  
আইন মোতাবেক আমিই তা পাবো । তখন ?

ওরা তো অবজেকশন এখনো দেয়নি !

না । তবে দেওয়ার তোড়জোড় করছে । কিন্তু আমি পলিটিকসের লোক, ক্রেম পেতে আমার  
অসুবিধে হবে না । তবু অবজেকশন দিতে বারণ করছি একটা কথা ভেবে ।

জীমূতকান্তি একটা দীর্ঘশ্বাস ফেলে বললেন, আমার আর এসব ভাল লাগে না রে কৃষ্ণ ।

তা হলেও বিষয়টা আপনার জানা উচিত । আজকাল যৌথ পরিবার ভেঙে যাচ্ছে, পারিবারিক  
ঝগড়াঝাটি প্রায় প্রত্যেক পরিবারে ।

সে তো ঠিকই ।

আমাদের পরিবার বেড়ে যাওয়ায় হাঁড়ি আলাদা হয়েছে ঠিকই কিন্তু কোনো পারিবারিক  
কোন্দলের কথা কেউ জানে না । আপনার ছেলেরা যদি অবজেকশন দেয় তবে চৌধুরী পরিবারের  
ভিতরকার সম্পর্কের কথা সবাই জানবে ।

জীমূতকান্তি মাথা নেড়ে বললেন, সে তো ঠিকই । তুই আমাকে কী করতে বলিস ?

আমি জানি আপনার বাড়িতে এবং বড়দার বাড়িতে আমার ভাইপোরা প্রায়ই মিটিং করে । তাতে  
বোধহয় আমার মুণ্ডুপাত হয় । তা হোক । আপনাকে বলি, এইসব অস্বাস্থ্যকর মিটিং আপনি ওদের  
বন্ধ করতে বলুন ।

জীমূতকান্তি অন্যদিকে চেয়ে দুর্বল গলায় বললেন, মিটিং ঠিক নয় । একদিন বুঝি ছেলেরা বসে  
কী সব কথা বলেছে ।

কৃষ্ণকান্ত মাথা নেড়ে দৃঢ় গলায় বললেন, মিটিং হয়েছে এই ঘরে এবং তাতে আপনিও  
পার্টিসিপেট করেছিলেন । আমি সব খবরই রাখি ।

জীমূতকান্তির মুখটা একটু রাঙা হল উত্তেজনায । কিন্তু নিজের কনিষ্ঠ ভাইটিকে তিনি চেনেন ।  
এর সঙ্গে বগড়া করা যায় না, একে অপমান করা বিপজ্জনক । শুধু কৃষ্ণকান্তের সামাজিক মর্যাদা ও  
মেজাজের জন্যই নয়, আসল কথা হল তাঁরা সবাই কৃষ্ণকান্তের দ্বারা নানাভাবে উপকৃত । তাই এর  
চোখের দিকে তাকালে একটু অস্বস্তি সকলেরই হয় । জীমূতকান্তি রাগলেও সেই ভাব গোপন করে  
বলেন, তোর ডিসিশনটা কী ?

আমার ডিসিশন জানাতেই আজ আসা । আপনার বা বড়দার ছেলেরা যদি মেনে নেয় তো ভাল,  
সেক্ষেত্রে এনিমি প্রপার্টির টাকা থেকে ওদের কিছু আমি দেবো । অবশ্যই সেটা সমান সমান ভাগ  
হবে না । আর যদি অবজেকশন দেয় তাহলে কেউ একটাও পয়সা পাবে না ।

জীমূতকান্তির মুখটায় একটু ভাবাচাচা ভাব দেখা দিল । শুধু বললেন, কিছু বলতে কত দিবি ?

সেটা নির্ভর করছে কত টাকা ক্ষতিপূরণ ওরা দেয় তার ওপর । এখনই কিছু বলা যাচ্ছে না ।  
আপনার ছেলেরা টাকাটা সমান তিন ভাগে ভাগ করে হিস্যা নিতে চায় । সেটা অন্যায় আদার ।

কথাটা শেষ হতেই লালটুর বউ কৃষ্ণা এসে ঘরে ঢুকল । বেশ লম্বা, সুশ্রী চেহারা । খুব সাহেবী  
কেতার মেয়ে । বয়সকট চুল রাখে, দারুণ সব মড পোশাক পরে এবং সিগারেট মদও নাকি খায় বলে  
কৃষ্ণকান্ত শুনেছেন । এখন অবশ্য মাথায় বেশ বড় ঘোমটা, ভারী লাজুক ভাব । হাতে চা, প্লেটে  
খাবার । সেগুলো টেবিলে রেখে একটা প্রণাম করল কৃষ্ণকান্তকে, তারপর নিজের স্বশুরকেও ।

কৃষ্ণকান্ত সবই লক্ষ করলেন । মেয়েটা সহবং জানে ।

কৃষ্ণা মিষ্টি গলায় জিজ্ঞেস করল, ভাল আছেন কাকা ?

তুমি কেমন আছো মা ?

ভাল । চায়ে চিনি দিয়েছি কিছু ।

দেবে না কেন ? আমার চিনি বারণ নয় । তবে ওসব খাবার-টাবার নিয়ে যাও । আমি যখন-তখন খাই না ।

একটুও না ?

না মা । যখন-তখন খাই না বলেই এখনো ভাল আছি । তা আজ ছুটির দিন লালটুটা কোথায় গেল ?

কোথায় বেরিয়েছে ।

কৃষ্ণা সস্ত্রমসূচক দূরত্বে ঘোমটা মাথায় দাঁড়িয়ে রইল । দৃশ্যটা জীমূতকান্তি অবাক হয়ে দেখলেন । তিনি নিজে তাঁর পুত্রবধুর কাছ থেকে বিশেষ সমীহ পান না । আজকালকার স্বাধীনচেতা মেয়েরা মানবেই বা কেন ? কিন্তু প্রশ্ন হল, তাহলে কৃষ্ণকে মানে কেন ?

চায়ের কাপ নিয়ে কৃষ্ণা চলে যাওয়ার পর জীমূতকান্তি বললেন, তোর ওপর তো কথা বলার সাহস কারো নেই । তাই আমি বলি, তুই নিজেই ভাইপোদের সঙ্গে কথা বললে পারিস । তোর কথা ওরা ঠিক মেনে নেবে ।

আপনি আমাকে বার বার একথাটা বলছেন । আমার আত্মমর্যাদাজ্ঞান একটু বেশী । ছোটোদের সঙ্গে এ নিয়ে কথা বলাতে আমার রুচিতে বাঁধে ।

তাহলে আমি এক কাজ করি । ওদের বলি, তুই এই চাস ।

বলবেন । একটা কথা । কারো জন্য কিছু করে সে বিষয়ে পরে উল্লেখ করতে বা তার জন্য উষ্টো কিছু দাবী করতে আমি ঘৃণা বোধ করি ।

তোকে আমরা জানি ।

ওদের একথাটা বুঝিয়ে দেবেন যে, ছোটো কাকা নিজের পরিবারের, নিজের বংশের ভাল ছাড়া মন্দ কখনো দেখেনি । এটা যদি সত্য হয় তবে ভবিষ্যতেও তাই করব । কিন্তু আমি যদি দেখি আমার বংশের ছেলেরা, আমার নিজের ভাইপোরাই পিছন থেকে নানা ষড়যন্ত্র করছে তাহলে বাধ্য হয়েই তাদের সংশ্রব আমাকে বর্জন করতে হবে । সেটা ওদের পক্ষে ভাল হবে না মন্দ হবে তা ওদের ভেবে দেখতে বলবেন ।

জীমূতকান্তি আবার রক্তাভ হলেন । কৃষ্ণকান্ত যে স্পষ্টই হুমকি দিচ্ছেন সেটা বুঝতে অসুবিধে নেই । তিনি এও জানেন, কৃষ্ণকান্ত কখনো ফাঁকা আওয়াজ করেন না । জীমূতকান্তি তাই বললেন, না না, তুই অত বাড়িয়ে ভাবছিস কেন । ওদের কার ঘাড়ে কটা মাথা যে তোর বিরুদ্ধে দাঁড়ায় ?

কৃষ্ণকান্ত উঠলেন । চিন্তিত বিরক্ত মুখভাব । জীমূতকান্তিকে একটা প্রণাম করলেন ।

জীমূতকান্তি বললেন, ধুবর ছেলেকে নিয়ে একদিন ওরা যেন আসে । আমি তো কোথাও যেতে পারি না ।

আসবেখন । বউমার শরীরটা ভাল নেই ।

কী হয়েছে ?

মাঝে মাঝে স্মৃতিভ্রংশের মতো হচ্ছে । অনেকদিন রোগটা লুকিয়ে রেখেছিল । এখন গড়িয়ে গেছে খানিকটা ।

সেটা কিরকম রোগ ? পাগলামি নাকি ?

না । মনে হয় সাময়িক ।

ডাক্তার দেখছে তো !

রোজ ।

কৃষ্ণকান্ত বেরিয়ে এলেন । দরজার বাইরে ছোটো বউমা আর বাচ্চারা বশংবদ দাঁড়িয়ে ছিল ।

কৃষ্ণকান্ত বেরোতেই ঢিব ঢিব প্রণাম। কৃষ্ণকান্ত বাচ্চাদের কারো মাথায় হাত রাখলেন, কারো গালটা টিপে দিলেন একটু। মায়াভরে একটু তাকিয়ে রইলেন। চৌধুরিদের রক্তবীজ। বাড়ছে। ছড়িয়ে পড়ছে। নিজের বংশ, নিজের গোষ্ঠীর প্রতি তাঁর অসীম মমতা। অসীম স্নেহ। শুধু বেয়াদবি আর বিশ্বাসঘাতকতা তাঁর সহ্য হয় না।

নাতি হওয়ার পর কৃষ্ণকান্তর বাইরে যাওয়া একটু কমেছে।

বিকেলে একটা দলীয় মিটিং সেরে একটু তাড়াতাড়িই ফিরে এলেন। বৈঠকখানার মুখেই জগা দাঁড়িয়ে।

কি রে, কিছু বলবি ?

একটু কথা ছিল।

দামড়াটাকে নিয়ে নাকি ?

হ্যাঁ।

কথাটা কী ?

আপনি জামাকাপড় ছেড়ে অবসর হয়ে বসুন। তারপর বলছি। তেমন জরুরী কিছু নয়। কৃষ্ণকান্ত খুব একটা দৃষ্টিস্তাগ্রস্ত হলেন না। ধুব সম্পর্কে খারাপ খবর পেয়ে পেয়ে এখন ভোঁতা হয়ে গেছেন।

ওপরে এসে জামাকাপড় বদল করে সাবান দিয়ে হাতমুখ ধুয়ে নাতি দেখতে গেলেন।

হাম হয়েছিল বলে ছেলেটা একটু রোগা হয়ে গেছে। পিট পিট করে তাকিয়ে আছে ঝি-এর কোল থেকে।

কৃষ্ণকান্ত বিরক্ত হয়ে বললেন, সবসময়ে কোলে রাখিস কেন ? বিছানায় ছেড়ে দিয়ে নজর রাখবি শুধু। ওই হাত পা ঝুঁড়বে, চোঁচাবে ওইতে ব্যায়াম হয়। বউমা কোথায় ?

একটু বেরোলেন।

সঙ্গে কেউ গেছে ?

গেছে। মোক্ষদা।

বেশীদূর যায়নি তো !

না, বোধহয় কাটারা অবধি।

কাটারা ! সেখানে কেন ?

জানি না।

বউমা এলে আমাকে একটা খবর দিবি তো !

নিজের ঘরে এসে চুপচাপ বসে কিছু কাগজপত্র দেখতে লাগলেন কৃষ্ণকান্ত।

॥ ৯৭ ॥

“আজ এই দিনপঞ্জীতে যাহা লিখিতেছি তাহা লিখিতে আমার কলম সরিতে চাহিতেছে না। আজ জীবন সায়াহ্নে আসিয়া আমি দার পরিগ্রহ করিয়া যদি ভুলই করিয়া থাকি, তাহা হইলেও তাহা এমন বিকট প্রতিক্রিয়া সৃষ্টির উপযোগী ঘটনা ছিল কী ? ইহারা—অর্থাৎ আমার আত্মীয় পরিজনেরা যে আমার এত বড় হিতাকাঙ্ক্ষী তাহা জানিতাম না। সম্ভবত অহরহ আমার ইষ্ট চিন্তা করিয়া ইহাদের ভাল ঘুম হইতেছে না।

“ঘটনাটা ঘটিল সকালে। বিবাহ উপলক্ষে বাড়িটা মেরামত হইতেছে, শামিয়ানা খাটানোর জন্য গাড়ি গাড়ি বাঁশ আসিয়া নামিতেছে, স্যাকরা, কাপড়ওয়ালা, আতরওয়ালা প্রভৃতি নানা রকম

লোকজনের সমাগমে বাড়ি মুখর। সকলেই তদারকে ব্যস্ত। আমিও পূর্ব দিকটার একটা জানালার খড়খড়ি মেরামত করাইতেছিলাম।

“ভিতর বাড়িতে একটা শোরগোল শোনা গেল, বেরোও, বেরোও বাড়ি থেকে ! নইলে কাঁটা মেয়ে তাড়াব

“গলাটা আমার কন্যার। ললিতা। এত চিৎকার করিতে তাহাকে কখনো শুনি নাই। তাড়াতাড়ি ভিতর বাড়িতে আসিয়া দরদালানে উঠিতেই ললিতা ছুটিয়া আমার সম্মুখে আসিয়া এক বিকারগ্রস্ত মুখে অনুরূপ বিকট কণ্ঠে বলিল, আপনি কি চান আমরা মুখে চুনকালি মেখে ফিরে যাবো ? কোন আক্কেলে আপনি ওই ডাইনীকে বউ বলে ঘরে ঠাঁই দিয়েছেন ? কোন মস্ত্রে আপনি এমন ভেড়া হয়ে গেলেন ?

“হেমকান্ত চৌধুরি শাস্ত প্রকৃতির লোক, সন্দেহ নাই। কিন্তু তা বলিয়া আজ অবধি তাহার মুখের উপর এত বড় কথা বলিবার মতো বুকের পাটা তাহার পুত্র কন্যাদের ছিল না। তাহা হইলে ?

“প্রথমত বিস্ময়ে আমি কোনো জবাবই দিতে পারিলাম না। ললিতা আরো অনেক কিছু কহিতেছিল। অশ্রুরুদ্ধ লালাসিক্ত, উত্তেজিত কণ্ঠস্বরে সব কথা ভাল করিয়া স্পষ্ট হইল না। কিন্তু কথার দরকারই বা কী ? মনোভাব তো বুঝাই যাইতেছে।

“আমি লজ্জায় রক্তিম বর্ণ ধারণ করিলাম। দরদালানে অনেকেই আছে। মেয়ে বউ, নাতি নাতনী লইয়া জনা দশ বারো। ইহার উপর আত্মীয় স্বজন কুটুম জ্ঞাতি লইয়া সংখ্যাটা বড় কম হইবে না। কী একটা গুঞ্জন চলিতেছিল।

“আমি ললিতাকে বলিলাম, কী হয়েছে ?

“ললিতা প্রায় লাফাইয়া উঠিয়া বলিল, কী হয়নি তাই বলুন ! মায়ের গয়নার বাস্ক কোন সাহসে ওই ডাইনী নিজে আগলে বসে আছে ? ওর কী অধিকার ? কোন সাহসে ও বলে যে সিন্দুকের চাবি আমাদের হাতে দেবে না ?

“বুঝিলাম রোগ গুরুতর। আত্মীয় স্বজন আসিবার পূর্বেই মনু সিন্দুক ও আলমারি খুলিয়া তাহার স্বর্গতা সতীনের সব গহনাপত্র বাহির করিয়াছিল। ইতিপূর্বে এই গহনার বাস্ক কিছু লুট হইয়াছে। আমার দুই বিবাহিতা কন্যা ও পুত্রবধূরা বিভিন্ন সময়ে বিভিন্ন ছুতায় উপটৌকন লইয়াছে, কিছু লইয়াছে কাহাকেও না বলিয়া। তবু সুনয়নীর অবশিষ্ট গহনাও বড় কম নাই। যাহা আছে তাহা গড়িয়া পিটিয়া কোনওক্রমে বিশাখার বিবাহটা পার করা যাইবে। কিন্তু বুঝিতেছি, ইহাদের অপরিমিত লোভ এখনো ওই গহনার বাস্কে থাকা দিবার জন্য উদ্যত হইয়া আছে।

“আমি বলিলাম, গয়নার বাস্ক দিয়ে তুই কী করবি ?

“সে সতেজে বলিল, সে আমি বুঝবো। আমার মায়ের গয়নার বাস্ক ওর হেফাজতে থাকবে কেন ?

“এবার একটু কঠোর হওয়া আবশ্যক মনে করিয়া কহিলাম, ওর হেফাজতে নেই। আছে আমার হেফাজতে। গয়না ভেঙে নতুন গয়না গড়ানো হবে বিশাখার জন্য।

“ললিতা প্রায় লাফাইয়া উঠিয়া কহিল, বিশাখা ! শুধু বিশাখার হলেই হবে ? আমরা কি ভেসে এসেছি ? ও গয়নায় আমাদের ভাগ নেই ?

“ভাগ আছে কিনা জানি না। গহনা সুনয়নীর, তাহার মৃত্যুর পর ভাগ বাঁটোয়ারা যথেষ্ট হইয়াছে এবং মনু ও বিশাখার মতে কন্যা ও পুত্রবধূরা প্রাপ্যের অধিকই জোর করিয়া গ্রহণ করিয়াছে। ইহার পরেও ভাগ থাকে কী প্রকারে তাহা জানি না। বলিলাম, এখন এ নিয়ে চেষ্টামেচি কোরো না। ঘরে গিয়ে মাথা ঠাণ্ডা করো। পরে ভেবে দেখা যাবে।

“সে বিকট স্বরে বলিল, পরে ? পরে ও গয়না থাকবে ? স্যাকরা এসে বসে আছে না !

“বিরক্তির স্বরে কহিলাম, তোমার স্পর্ধা সীমাহীন। গুরুজনের সঙ্গে কী করে কথা বলতে হয়

তাও শেখেনি। তোমার এই বেয়াদবির দরুন সকলের সামনে আমাদের মাথা হেঁট হচ্ছে। যাও ঘরে যাও।

“ললিতা এ কথায় একটু দমিল। কিন্তু দরদালানের ধুমায়িত গুঞ্জনটি এই ফাঁকে উসকাইয়া উঠিল। আমাদের বয়স্কা এক আত্মীয়া—সম্পর্কে আমার কাকীমা—হঠাৎ ফোড়ন কাটিলেন, বুড়ো বয়সের বে তো, বউকে একটু সাজাবে-গোজাবে। এখন তোরা কোথাকার কে লো?”

“দাঁড়াইয়া এইসব শুনিতে ঘৃণা হইতেছিল। নিঃশব্দে সিঁড়ি বাহিয়া উপরে আসিলাম, সামনেই মনু দাঁড়াইয়া ধোপার হিসাব লইতেছে, সে যেখানে দাঁড়াইয়া আছে সেখানে হইতে দরদালানের কথা সবই শোনা যায়। তবু তাহার মুখে বৈলক্ষণ্য নাই।

“আমি ক্রুদ্ধ স্বরে তাহাকে বলিলাম, গয়নার বাস্কাটা ওদের মুখের ওপর ছুঁড়ে ফেলে দাও।

“রঙ্গময়ী লঘু স্বরে কহিল, তাতে ওদের নাক ভাঙ্গবে? কিন্তু তুমি অত রেগে যাচ্ছে কেন? বলছে বলুক না। গয়না দিলে আমাদের চলবে না।

কেন চলবে না?

মোট একশ বাইশ ভরি সোনা আছে। পান বাদ দিলে অনেক কমে যাবে। কর্মকার মশাইয়ের সঙ্গে কথা হল তো সেদিন।

ঠিক আছে। আমি গয়না নতুন গড়িয়েই বিশাখার বিয়ে দেবো।

তা না হয় দিলে। কিন্তু জরোয়ার যে সেট সুনয়নীর আছে তার পাথরগুলো কী জানো তো? ত্রিশখানা হীরে, আশিটা মুক্তা, পাল্লা এসব কি গাছ থেকে পাড়বে? অত টাকা তোমার কই? না হলে হবে না।

“মনু ফুঁসিয়া উঠিয়া কহিল, কেন হবে না? বড় দুই মেয়ের বেলা হতে পেরেছে আর বিশাখার বেলাতেই বা হবে না কেন?

“আমি বিরক্তির সঙ্গে কহিলাম, সুখের চেয়ে স্বস্তি ভাল মনু। ওরা গয়না নিয়ে খানিকক্ষণ কামড়াকামড়ি করুক। সেই ফাঁকে বিয়েটা শান্তিমত চোকাই।

“রঙ্গময়ী রহস্যময় হাসি হাসিয়া মাথা নাড়িয়া কহিল, আমি আর সেই আগের মনু নেই গো যে, যা বলবে তাই শুনবো। এখন আমি তোমার বউ, এ বাড়ির ভালমন্দ আমাকেও ভাবতে হবে, মতামত দিতে হবে।

ওরা যদি তোমাকে সন্দেহ করতে শুরু করে মনু?

“মনু হাসিল, সন্দেহ আবার কী? গয়না যদি আমি নিজেই নিই তাহলেও তো চুরির দায় অশায় না গো। বড় বউয়ের গয়না ন্যায়ত ধর্মত ছোটো বউয়েরই প্রাপ্য।

“কথাটা সঙ্গত। তবু আমি উত্তেজিত হইয়া কহিলাম, তা বলে এখন অশান্তি করাটা কি ঠিক হবে মনু?

হবে। কারণ গয়নার বাস্কা দিলেও অশান্তি মিটবে না। ওরা বিশাখার জন্য প্রায় কিছুই রাখেনি। আমার হিসেব মতো সুনয়নীর সাতশো ভরির ওপর সোনা ছিল। আছে মোটে একশ বাইশ ভরি। আমি এ থেকে কাউকে এক রতিও নিতে দেবো না।

“আমি জানি রঙ্গময়ীর জীবনে গহনার প্রয়োজন নাই। হাতে মোট চারিগাছা করিয়া সোনার চুড়ি, দুটি বালা, শীখা ও নোয়া এই সে ধারণ করিয়াছে। গলায় সরু চেন। কানে দুটি বেলকুড়ি। এছাড়া আর কিছুই সে লয় নাই, লইবেও না। নিজের অভাবী পরিজনদের জন্যও সে এ বাড়ি হইতে কখনো কিছু পাচার করে নাই বা করিবেও না। সে অন্য ধাতুতে গড়া। কিন্তু তবু তাহার এই দৃঢ়তার অন্য একটা অর্থ করিবে আমার দুই বড় কন্যা, এবং অন্যান্য আত্মীয়রা।

“দীর্ঘশ্বাস ফেলিয়া পোশাক পরিয়া বাহির হইয়া পড়িলাম। মনটা বিরস, ভগ্ন, হতোদ্যম।

“দ্বিপ্রহরে যখন ফিরিলাম তখন দরদালানে খণ্ডযুদ্ধ চলিতেছে। চৈচামেচি শাপশাপান্তে ঝাঁপাইয়া

পড়িয়াছে আত্মীয় পরিজনেরা। আমি যে বৃড়া বয়সে মদনানলে ভস্মীভূত হইয়াছি, একটি ডাকিনী আসিয়া যে সুখের সংসার ছারেখারে দিতেছে ইহাই বক্তব্য। তবে সকলে একমত নয়। বিশাখা রঙ্গময়ীর পক্ষ লইয়াছে এবং তাহাকে সাধ্যমতো সাহায্য করিতেছে কয়েকজন অমিততেজা আত্মীয়রা। তবে রঙ্গভূমিতে রঙ্গময়ী নাই। সে বিলক্ষণ প্রশান্তমুখে চাবির গোছাটি আঁচলে বাঁধিয়া রান্নার তদারকি করিতেছে।

“সেই দ্বিপ্রহরে অনেকগুলি পেট উপবাসী রহিল। অনেক অশ্রু বিসর্জিত হইল। পুরুষেরা গম্ভীর রহিল।

“সন্ধ্যায় আবার লাগিল ধুকুমার।

“বিশাখার বিবাহের পূর্বদিন পর্যন্ত এইরূপ চলিল। আর ইহার মধ্যেই রঙ্গময়ী গোপনে স্যাকরার দোকানে গহনা চালান দিল। নূতন গহনা আসিয়া পৌঁছাইতেই তাহা সিন্দুকজাত করিয়া চাবি আগলাইয়া রহিল। আমি তাহার সাহস দেখিয়া অবাক হইয়া কহিলাম, তুমিও কুঁদুলি কম নও।

“সে গর্জিয়া উঠিয়া কহিল, কবে কোঁদল করতে দেখলে !,

এটাও তো এক ধরনের নীরব কোন্দল। কিছু বলছ না, কিন্তু উসকে দিচ্ছ।

ওদের ভিতরে অনেক স্টীম জমেছে। সেগুলো বেরোক। বেরোলে ঠাণ্ডা হবে।

এরপর তোমাকে মারতে আসবে যে !

এসেছিল।

“চমকাইয়া কহিলাম, কে এসেছিল

তোমার শুনে কাজ নেই।

মেয়েদের কেউ ?

মেয়ে বউ সবাই।

তারপর কী হল ?

আমি পরিষ্কার বলে দিলাম, তোমরা মানো বা না মানো আমি এখন এ বাড়ির কর্তা। গয়না আমার। যা খুশি করব।

পারলে বলতে ?

পারলাম। কারণ ওদের আমি এইটুকু বেলা থেকে দেখছি। প্রত্যেকের নাড়ীনক্ষত্র জানি।

ওরা কী বলল

ঝগড়া অনেকদূর গড়াইল। আমি তখন এক একজনের নাম করে কে কোন গয়না হাতিয়েছে তার হিসেব দিতে লাগলাম। সব আমার মুখস্থ। ফাঁস হয়ে যাওয়ায় সবাই চূপ। তারপর নিজেদের মধ্যে লেগে গেল। আমি বললাম গয়না আমি নিজে তো নিচ্ছি না। বিশাখা পাবে। আর বিশাখাই যাতে পায় তা আমি শেষ অবধি দেখব।

তোমার সাহস আছে।

“রঙ্গময়ী মাথা নাড়িয়া কহিল, সাহস নয় গো, কর্তব্য। জানি এ গয়না হাতছাড়া করলে তোমাকে অনেক দেনা করতে হবে। বিয়ের জন্য এমনিতেই একটা মহাল চলে গেল। খরচ তো কম নয়। তাছাড়া আমরা তো কাশী চলেই যাচ্ছি, এদের সংশ্রবে আর আসতে হবে না।

“আমি কহিলাম, সেই ভাল মনু। কাশীই ভাল। এরা বড় নীচ ! এরা বোধহয় তোমাকে আমার উপপত্নী ভাবে।

তার চেয়েও খারাপ। বলছে বিয়ে নাকি হয়নি। আমি নাকি এসে জোর করে তোমার ঘরে ঢুকে পড়েছি।

শুনিলাম। স্বকর্ণেই সব শুনিলাম। নিজের আত্মীয়দের প্রতি অপ্রসন্নতায় মনটা তিক্ত হইয়া গেল আমার উজ্জ্বলতম সন্তানটি আজ কাছে নাই। সেই বিবেচক, বুদ্ধিমান, হৃদয়বান ও

বিবেকসম্পন্ন কিশোর কোথায় কী করিতেছে কে জানে !

“বিবাহের আগের রাতে চারিদিকে নানা হই চই চলিতেছে । হারিকেন ও হাজাক জ্বালাইয়া চারদিকে নানারূপ নির্মাণ ও মেরামত তদারকি ও খবরদারি চলিতেছে । আমি বৈঠকখানায় বসিয়া কনককান্তির সহিত একটি ফর্দ মিলাইতোছিলাম । এমন সময় কানাই মাঝি আসিয়া একটা নমস্কার করিয়া দাঁড়াইল ।

কী রে ?

একটু কথা আছে হজুর ।

কী কথা ?

আড়ালে বলা দরকার ।

“উঠিয়া বাহিরে আসিলাম । কানাই খুব নীচু স্বরে কহিল, বেশি দেবী করবেন না । ভিতর বাড়িতে গিয়ে একটা চাদর মুড়ি দিয়ে খিড়কি ধরে বেরিয়ে সদরঘাটে চলে আসুন । কেউ যেন না দেখতে পায় হজুর ।

কী হয়েছে বলবি তো !

তিনি এসেছেন । আমার নৌকোয় আছেন ।

কে ? কে ? কার কথা বলছিস ?

“কানাই নীচু স্বরে আমাকে একটু ভৎসনা করিল, হজুর কি তাঁর বিপদ ডাকতে চান ? চুপ মারুন । যা বলছি করুন গে ।

“আমার বুক, পা, হাত কাঁপিতে লাগিল । সে আসিয়াছে । আমার পুত্ররত্ন আমার তৃষিত বক্ষের অমৃতধন সে কি আসিয়াছে । এ কি সত্য হইতে পারে ? সে বাঁচিয়া আছে ! সে ধরা পড়ে নাই !

“ঘরে আসিতেই কনককান্তি উঠিয়া দাঁড়াইয়া কহিল, কী হয়েছে বাবা ? আপনি এমন করছেন কেন ?

“আমি মাথা নাড়িয়া কহিলাম, কিছু নয় ।

ও লোকটা কে বলুন তো !

তুমি চিনবে না ।

কোনো খারাপ খবর নেই তো !

না, না । চিন্তা করো না ।

“নিজের মনের ভাব গোপন করিবার কোনো প্রতিক্রিয়াই আমার জানা নাই । এর জন্য বছবার অপ্রস্তুত হইতে হইয়াছে । কৃষ্ণর আগমন সংবাদে আরো বেসামাল হইয়া পড়িয়াছি ।

“কনককে ফর্দ মিলাইতে বসাইয়া নিজের ঘরে আসিলাম । একটা কালো শাল আলমারি হইতে বাহির করিয়া কাঁধে লইয়া বাহির হইতে যাইব, এমন সময় মনু আসিয়া দাঁড়াইল, কোথায় যাচ্ছে ?

একটু ঘুরে আসি ।

এত রাতে ঘুরতে যাচ্ছে

মাথাটা গরম লাগছে মনু ।

সে তোমার মুখ দেখেই বোকা যাচ্ছে ।

“মনু খানিকক্ষণ অপলক নেত্র আমাকে দেখিল । তারপর বুকের উপর হাত রাখিয়া কহিল, ঝগড়াঝাটিতে খুব মুষড়ে পড়েছো তো ওসব মনে রেখো না । মেয়েমানুষ এক নিকৃষ্ট জীব ।

“আমি দীর্ঘশ্বাস ফেলিলাম । আমার সময় নাই কহিলাম, একটু ঘুরে আসছি মনু ।

তা কালো শাল নিলে কেন

ইচ্ছে হল ।

অমন পুঁটলিই বা পাকিয়েছো কেন ? গায়ে দাও ।

“তাড়াতাড়ি শাল খুলিয়া গায়ে দিলাম ।

“মনু মুখের দিকে চাহিয়া বলিল, তোমাকে ভারী উত্তেজিত দেখাচ্ছে । মুখটা টকটক করছে লাল । কেন গো ?

কিছু হয়নি মনু । দোহাই ।

“মনু পথ ছাড়িল না, হঠাৎ বলিল, দাঁড়াও । বেশী সময় নেবো না ।

কী করবে ?

আমি সঙ্গে যাবো ।

তুমি ? দোহাই মনু, না ।

কেন বলো তো !

কারণ আছে । ফিরে আসি, তারপর শুনো ।

“মনু একটা দীর্ঘশ্বাস ফেলিয়া কহিল, দুর্গা দুর্গা ! এসো গে । ভাল খবর হলেই ভাল ।

“বাহির হইতে যাইতেছি, মনু হঠাৎ ডাকিল, শোনো, ঝড়কি দিয়ে বেরোবে তো !

“অবাক হইয়া কহিলাম, হ্যাঁ ।

না । ওদিকে পুলিশের লোক আছে ।

তবে ?

কুঞ্জবনে চলে যাও । দাঁড়াও আমিও যাচ্ছি ।

॥ ৯৮ ॥

কৃষ্ণকান্ত নিজের বাইরের ঘরটায় এসে বসবার প্রায় সঙ্গে সঙ্গেই নিঃশব্দে জগা এসে দাঁড়াল । মুখ গভীর এবং কঠিন ।

কৃষ্ণকান্ত একবার তার মুখের দিকে চেয়ে চোখ সরিয়ে নিয়ে বললেন, বল কী হয়েছে ।

দেশের বাড়ির পুরুত বিনোদচন্দ্রের নাতনীকে আপনার মনে আছে ?

কে বল তো !

দাদাবাবুর সঙ্গে যার সম্বন্ধ এসেছিল বলে আপনি খুব রাগ করেছিলেন ।

তার কী হয়েছে ?

সে এখন কল গার্ল । সিনেমা থিয়েটারও করে বেড়ায় ।

বটে !

দাদাবাবু ফের তার খপ্পরে পড়েছে ।

ফের বলতে ? আগে কিছু ছিল নাকি ?

না । তবে বিয়ের একটা কথা হয়েছিল তো ! ওর মা খুব হন্যে হয়ে পড়েছিল ।

ঘটনাটা কী ?

দাদাবাবুকে ক’দিন আগে অফিস থেকে তুলে নিয়ে যায় । সেদিনটার বিশেষ খবর জানি না । অফিসের অনেকেই দেখেছে । একজন বেয়ারা আমাকে খবরটা দেয় ।

তারপর ?

মেয়েটা টালিগঞ্জের দিকে একটা ফ্ল্যাট কিনেছে । দাদাবাবুকে মাঝে মাঝে ওখানে নিয়ে যায় ।

কৃষ্ণকান্ত ভুকুটিকুটিল মুখে জগার দিকে তাকালেন, এটা নিয়ে কটা হল ?

বেশী নয় । কিন্তু দাদাবাবুর আর যাই দোষ থাক মেয়েমানুষের কারবারটা ছিল না ।

কৃষ্ণকান্ত একটা দীর্ঘশ্বাস ফেলে বললেন, ছিল না বলতে কী বোঝাতে চাস ? বরাবর মেয়েরা



ওর পিছনে ফুরত । ও পাশ্চা দিত না । এই তো !

হ্যাঁ ভাই ।

আজকাল দিচ্ছে তো !

মনে হচ্ছে । খারা নামে সন্ট লেকের সেই মেয়েটা তো পুলিশ অবধি ডেকেছিল ।

কৃষ্ণকান্ত মাথা নাড়লেন । তারপর ঋনিকঙ্কণ চূপ করে বসে রইলেন । স্বগতোক্তির মতো বললেন, রুচিটা নেমে যাচ্ছে ।

রুচি ?

কৃষ্ণকান্ত জগার দিকে কঠিন চোখে চেয়ে বললেন, এসব থার্ড ক্লাস মেয়ে ওর নাগাল পাচ্ছে কী করে ?

সব খবর তো পাওয়া যায় না ।

এ মেয়েটার নাম কি জানিস ?

নোটন ভট্টাচার্য ।

খুব খারাপ ?

বললাম তো কল গার্ল ।

বামুনের মেয়ে হয়ে এত নিচে নামে কী করে ?

বামুন কায়েত শুদ্ধুর সব আজকাল আর আলাদা করা যাচ্ছে না, একাকার ভদ্রলোক ছোটলোকও আজকাল আর আলাদা করা যাচ্ছে না, না ?

জগা মাথা নিচু করল ।

কৃষ্ণকান্ত সামান্য একটু হাসলেন । বললেন, নোটন না কি যেন নাম বললি !

নোটন ।

ওর ফ্ল্যাটে ওর মা ভাই থাকে না ?

না । তারা আলাদা বাসায় থাকে ।

মেয়েটা একা ?

হ্যাঁ ।

মেলামেশাটা কতদূর তা খবর নে ।

কিছু করতে হবে ?

না । এখন হাত দেওয়ার দরকার নেই ।

যদি বলেন তো মেয়েটাকে একটু শাসিয়ে দিতে পারি ।

কৃষ্ণকান্ত একটা ধমক দিলেন, নাঃ । একবারের বেশী দুবার বলতে হয় কেন ?

ঠিক আছে ।

এখন যা ।

জগা চলে গেল ।

কৃষ্ণকান্ত ফাঁকা ঘরেও ভুকুটি করে বসে রইলেন কিছুক্ষণ । তারপর হঠাৎ আপন মনেই হেসে উঠলেন ।

তাকে কে রেখেছে বল তো !

রেখেছে ? নোটন ভূঁ কঁচকে ধুবর দিকে তাকায়, তার মানে ?

এই যে চকচকে নতুন ফ্ল্যাট, ভাল সব ফার্নিচার, টিভি, তোর নিশ্চয়ই এত রোজগার নয় । কে দিচ্ছে এত ?

তার মানেই কি রাখা ?

রাখা কথাটা যদি অপছন্দ হয় তবে আধুনিক একটা শব্দ আছে। স্পনসরশিপ। তোকে কে স্পনসর করছে বল তো! বেশ এলমদার আদমী মনে হচ্ছে।

নোটন হাসল না। ভূঁ চুচকে রেখেই বলল, তোমার মন বড্ড নোংরা।

এতদিনে বুঝলি? নোংরা না হলে তোর মতো মেয়ের খপ্পরে এত সহজে পড়ে যাই?

এই রাত্তায় নোটন অভ্যস্ত হয়ে গেছে গত কয়েকদিনে। তবু মুখখানায় ক্লিষ্ট একটা ভাব দেখা দিল। তারপর বলল, খুব সহজে হয়নি। অনেক কাঠখড় পুড়িয়ে তবে তোমাকে পেয়েছি। আমি কিরকম মেয়ে বলো তো!

ওসব নিয়ে আর কথা তুলিস না। যা বলছি তার জবাব দে। লোকটা কে?

তা জেনে তোমার কী হবে?

ধুব স্থির চোখে নোটনের দিকে চেয়ে রইল। নোটন জানালার কাছে একটা টেবিলের ওপর বসে আছে। মুখ বাইরের দিকে ফেরানো। ধুবর দিকে ইচ্ছে করেই চাইছে না তা ধুব জানে।

একটু আগেই তারা বিছানায় ছিল। বাইরে মরে আসছিল বিকেল। ধুবর সেই শারীরিক যুদ্ধ মোটেই ভাল লাগছিল না। নোটন তাকে জোর করে নামিয়েছে এই যুদ্ধে। অকারণ। সে জানে নোটনের মতো মেয়ের বিশেষ একজনের প্রতি অতটান থাকার কথা নয়। উপরন্তু ধুব এও জানে, এই ফ্ল্যাট, এই বিছানা, এই সাজসজ্জা এত সব আয়োজন অলক্ষ্যে কেউ করেছিল নোটনের সঙ্গে ফুটি করবে বলেই। নোটন সম্ভবত তার প্রতি বিশ্বস্ত থাকছে না। রাখা মেয়েমানুষেরও একটা এথিকস থাকা উচিত।

ধুব বলল, তার নাম জেনে আমার লাভ নেই ঠিকই। কিন্তু কেউ যে একজন তোকে স্পনসর করছে এটা তো ঠিক!

হ্যাঁ।

সে এই ফ্ল্যাটে আসে?

এখনো আসেনি।

আসবে তো?

সে এখন দেশের বাইরে আছে।

বিদেশে?

হ্যাঁ।

আর সেই সুযোগে তুই আমাকে ফাউ জুটিয়েছিস

নোটন চুপ করে রইল। তারপর স্নান গলায় বলল, ফাউ কেন হবে? তুমি ফাউ একথা কে বলল?

ফাউ নই তো কি?

ওসব কথা থাক। তুমি আজ আমাকে সহ্য করতে পারছো না।

পারছি না তো বটেই। সব কথা তুই কখনো আমাকে খুলে বলিসনি।

নোটন ফুঁপিয়ে কঁদে উঠল। কাদতে কাদতেই অস্পষ্ট গলায় বলল, নতুন কোনো কথা তো আর নয়। আমি কেমন তা তো তুমি জানোই।

আমাকে জুটিয়েছিস কেন আমাকে দিয়ে তোর কী হবে? বিয়ে করে ঘর করতে চাস? সেটা আকাশ-কুসুম কল্পনা। তোকে আমি কোনোদিনই বিয়ে করব না। তারপর তোর নিজের মজ্জেল আছে। বিদেশ থেকে সে একদিন ফিরবে। তখন তাকে রিফিউজ করার মতো জোর তোর থাকবে না। তাহলে এসব কেন করছিস? আমি এসব এনজয় করছি না নোটন, আমার ভাল লাগছে না।

এত বকছো কেন গো? একটু চুপ করো না!

চুপ করছি নোটন। আজ উঠি।

চকিতে নোটন উঠে কাছে আসে। সামনে দাঁড়িয়ে সজল দুখানা চোখ তুলে চোখে রেখে বলে,  
কাল আসবে না?

না। আমার তোকে আর ভাল লাগে না।

ধুব এই কথা বলে আর দাঁড়াল না। দরজা খুলে বেরিয়ে এল। তীব্র এক পরাজয়ের গ্লানি তার সমস্ত শরীরে অবসাদের মতো জড়িয়ে আছে। মাঝে মাঝে নিজেকে ভীষণ ঘেন্না হয় তার।

আজ অবধি, নোটনের আগে অবধি কোনো মেয়ের সঙ্গে এতদূর নামেনি ধুব। ইচ্ছে হয়নি। এ ব্যাপারে কোনো শুচিতাবোধ বা সংস্কার নেই তার, কিন্তু মেয়েমানুষের শরীর ভিষ্কার মধ্যে পৌরুষের একটা অবনমন ঘটে বলে তার ধারণা। তার বোধ তাকে অহরহ মেয়েমানুষ থেকে দূরে রেখেছে। কিন্তু পা কাটল পচা শামুকে। নোটন। হায় নোটনের মতো সহজলভ্যার কাছে তাকে হার মানতে হল।

কেন? এ প্রশ্নের জবাব সে নিজের মধ্যে খুঁজে পায় না। সম্ভবত নোটনের মধ্যে একটা করুণ আত্মসমর্পণ তাকে নরম করে ফেলেছিল। কিংবা ওদের যে একসময়ে খুব অপমান করা হয়েছিল তার প্রতিক্রিয়া কাজ করেছে ভিতরে ভিতরে। যাই হোক, পরাজয় ঘটেছে। আর ঘটেছে বলেই নোটনকে আর একটুও সহ্য করতে পারছে না ধুব।

তিনতলা থেকে ঝড়ের বেগে নিচে নামছিল ধুব। সিঁড়ির নিচে একটা লোক দারোয়ানের টুলের পাশে দাঁড়ানো। উর্ধ্বমুখ।

ধুব থমকাল। ফ্যাতন না!

ফ্যাতনই। ধুবকে দেখে একটু হাসল, কী গুরু, এখানে?

ধুব একটু হাঁফাচ্ছিল। উত্তেজনায়, পরিশ্রমে। মুখোমুখি হয়ে বলল, তুই এখানে কেন?  
এ বাড়িতে কার কাছে গুরু?

আছে একজন।

এটা আমার এলাকা, জানো তো!

না জানার কী?

সব দিকে নজর রাখতে হয়। তোমার চিড়িয়াটা কে?

বললাম তো চিনবি না।

নোটন নাকি?

ধুব একটু রোষ কষায়িত চোখে চেয়ে বলল, তাতে তোর কী?

কিছু নয় বস। রাগছো কেন? শুনলাম মাল খাওয়া ছেড়ে বৈরাগী হওয়ার ফিকির খুঁজছো!

কে বলছে এসব কথা?

তোমার দোস্ত প্রশান্ত।

না, মাল খাচ্ছি না। পেটে ব্যথা হয়।

ব্যথা ফের কমেও যায়। চলো, আজ আমি খাওয়াবো।

না ফ্যাতন। আমার তাড়া আছে।

নোটনের সঙ্গে তোমার কবে থেকে?

তুই ওকে চিনিস?

বহুং খুব। মালটা ভাল।

তোর সার্টিফিকেটের দরকার নেই।

আছে গুরু, আছে

ধুব বিরক্ত হয়। কিন্তু সেটা তেমন ঝাঁঝের সঙ্গে প্রকাশ করতে পারে না। ভিতরে ভিতরে একটা

অবসাদ একটা অপরাধবোধ কুরে কুরে খাচ্ছে। একটা স্বাস ফেলে বলল, ফ্যাডন, আমাকে বেশী বকাস না। আজ মেজাজ ভাল নেই।

কেন, নোটনের সঙ্গে কিচাইন হয়েছে নাকি ?

না।

হলে বোলো, মাল ফিট করে দেবো।

তোমার মতলবটা কী বল তো ফ্যাডন।

ফ্যাডন হাসল। প্রশান্ত হাসি। তার বেঁটেখাটো মজবুত চেহারাটা এবং চোখের দৃষ্টিতেই পরিষ্কার ছাপ আছে মানুষটার। গুণ্ডামি, লোচ্চামি, খচরামি সবই ফুটে আছে চোখে আর চেহারায়ে। ধুব একটু চেয়ে রইল। তারপর চাপা গলায় বলল, মেয়েটাকে ট্রাবল দিস না। ও কিছু করেনি। কে বলল ট্রাবল দেবো ?

তোমার মতলব ভাল মনে হচ্ছে না।

ফ্যাডন মাথা নেড়ে বলল, ওসব নয়। জগাদা এসেছিল।

জগাদা ! কবে ?

পরশু। বলে গেল নজর রাখতে।

জানে নাকি কিছু ?

সব জানে।

কী বলে গেছে ? উদ্বিগ্ন ধুব জিজ্ঞেস করে।

বলে গেছে, নজর রাখতে। মেয়েটা সুবিধের নয়। তোমাকে বিপদে ফেলতে পারে।

বাবার কানে গেছে ?

তা আমি জানি না। আমার কাজ আমি করছি।

তোকে কিছু করতে হবে না। লিভ হার অ্যালোন। মেয়েটা এমনিতে যাই করে বেড়াক, আসলে দুঃখী। ওকে ছেড়ে দে।

ধরবার কথাও তো কিছু হয়নি বস। আমি কিছু করব না। ভয় নেই।

তাহলে আজ তুই এখানে আমার জন্য অপেক্ষা করছিলি কেন ?

ফ্যাডন হেসে বলল, তোমাকে অভয় দেওয়ার জন্য।

তার মানে ?

তার মানে, চালিয়ে যাও বস, লাইন ক্লিয়ার।

জগাদা কি তোকে এই কথা বলে গেছে ?

ফ্যাডন মাথা নাড়ল। বলল, জগাদা বলে গেছে, দাদাবাবু এখানে নোটন নামে একটা মেয়ের কাছে আসে। তুই একটু নজর রাখিস।

ব্যাস ! আর কিছু বলেনি ?

না।

তীব্র একটা ঘেন্না হচ্ছিল ধুবর। নিজের ওপর। নিজের চারপাশটার ওপর। ফ্যাডন তার সঙ্গে বাইরে এল। একটা ট্যান্ড্রি ধরে দিয়ে বলল, যখন খুশি চলে এসো। লাইন ক্লিয়ার থাকবে কেউ হুজ্জাতি করবে না।

কথাটার জবাব দিল না ধুব। ট্যাকসিতে পাথরের মতো বসে রইল।

বাড়ি ফিরেই সে জগাকে ডাকল নিজের ঘরে।

কী ব্যাপার বলো তো জগাদা ?

জগা একটু তটস্থ হয়ে বলে, কিসের ব্যাপার ?

তুমি নোটনের খবর পেলে কি করে ?

জগা কঠিন মুখ করে চোখ ফিরিয়ে নিয়ে বলে, কেন ?

জানলে কি করে বলো আগে ।

সেটা জেনে কি হবে ?

নোটনের কথা তুমি বাবাকে বলেছো ?

বলেছি ।

সব ?

সব আমি জানি না । যেটুকু জানি বলেছি ।

বাবা কী বলল ?

কিছুই না ।

তার মানে ?

কর্তাবাবু তোমাকে ধর্মের নামে ছেড়ে দিয়েছে ।

বলে একটা দীর্ঘশ্বাস ফেলল জগা

ধুব বলল, আমার ওপর এখনো তোমরা নজর রাখো ?

রাখতে হয় । না রাখলে তুমি বিপদে পড়বে ।

আমার বিপদ নিয়ে তোমাকে মাথা ঘামাতে কে বলেছে ?

জগা এবার ধুবর দিকে তাকায় । চোখে আগুন । চাপা কিন্তু সাজঘাতিক আক্রোশের গলায় বলে, তোমার বংশে এরকম বেলেল্লাপনা কেউ কখনো করেনি দাদাবাবু। বুঝলে ! আমাদের মতো ছোটো ঘরে যদি জন্মাতো আর এসব করে বেড়াতে তবে কবে তোমার গলা টিপে ভূত ছাড়িয়ে দিতাম ।

ধুব অবাক হয়ে তাকিয়ে রইল । তারপর বলল, সাব্বাস জগাদা । আর তুমি তোমার কর্তাবাবুর হয়ে যা সব করে বেড়াও সেগুলো সব পুণ্যের কাজ, না ?

পলিটিকসে ওসব লাগে । কিন্তু বলো তো কর্তাবাবুর কখনো কোনো চরিত্রের দোষ ছিল ?

ধুব হেসে ফেলল । তারপর বড় একটা শ্বাস ছেড়ে বলল, মদ আর মেয়েমানুষ বাদ দিলে আর কোনো কাজেই বোধহয় চরিত্র নষ্ট হয় না, না

কর্তাবাবু পলিটিকস করেন, আর কিছু নয় । ওরকম মানুষ বেশী নেই বুঝলে দাদাবাবু ।

ধুব অপলক চোখে এই সম্মোহিত লোকটিকে দেখছিল । কৃষ্ণকান্ত একে যে গভীর হিন্মটিজমে আচ্ছন্ন করে রেখেছে তা থেকে এর মুক্তি নেই । এর পাপ পুণ্যের ধারণাও রাহগ্রস্ত । একে কিছুই বোঝানো যাবে না ।

ধুব বলল, নোটনকে কী করতে চাও তোমরা ?

জগা একটা চাপা গর্জনের স্বরে বলল, কিছুই না ।

কেন, ওর ওপর এত দয়া কেন ?

কর্তাবাবু চাইলে ওর লাশ আদি গঙ্গায় ভাসত । কিন্তু—

কিন্তু কী জগাদা ?

কর্তাবাবু তোমাকে ধর্মের নামে ছেড়ে দিয়েছেন, বললাম তো !

আমিও তো তাই জানতে চাই, হঠাৎ তোমাদের নোটনের ওপর এত দয়া কেন ?

শুনবে ?

শুনি ।

কর্তাবাবু প্রথম দিন শুনে রেগে গিয়েছিলেন । পরদিন সকালে আমাকে ডেকে বললেন, ধুবর তো কখনো মেয়েমানুষের দোষ ছিল না । এ মেয়েটার সঙ্গে যদি তেমন মেলোমেশা করেই থাকে তো করতে দে । পুরুষমানুষের বোধহয় একটু স্বাধীনতা দরকার । বেশী আঁটবান্দ দিলে বিগড়ে যায় ।

ধুবর চোখ থেকে যেন একটা ঠুলি খুলে পড়ল । কৃষ্ণকান্ত একথা বলেছেন ! কৃষ্ণকান্ত !

তুমি যাও জগাদা ।

বলে ধুব বিছানায় এলিয়ে চোখ বুজে রইল । এর চেয়ে বড় পঁরাজয় জীবনে তাকে ভোগ করতে হয়নি । অবসাদ ছিলই এখন যেন এক জড়তা তাকে পাকে পাকে জড়িয়ে ধরল । সবাই সব জানে । সবাই সব খবর রাখে । শুধু তাই নয়, নোটনের সঙ্গে যাতে সে নিরাপদে মেলামেশা চালিয়ে যেতে পারে তারও সূচু ব্যবস্থা হয়ে আছে ।

এর চেয়ে মৃত্যু কি ভাল ছিল না ?

কতক্ষণ শুয়ে ছিল ধুব তার হিসেব নেই । দরজায় ঠুকঠুক শব্দ শুনে উঠে বসল ।  
কে ?

আমি । বলে রেমি এসে ঘরে ঢোকে । কেমন অস্বাভাবিক ঝলমল করছে মুখ লালচে একটু আভা । ঠোঁটে অস্বাভাবিক হাসি ।

তুমি ! ধুব একটু নিজীব হয়ে যায় ।

কখন এলে ?

অনেকক্ষণ ।

আমি তোমার কাছে একটু বসব ?

বোসো ।

রেমি কাছে এসে বসল । পা গুটিয়ে, জড়োসড়ো হয়ে ।

কী চাও রেমি ?

কী যে চাই কিছু বুঝতে পারছি না । হ্যাঁ গো, আমি কি পাগল হয়ে যাচ্ছি ?

॥ ৯৯ ॥

নীল আকাশের প্রতিবিম্বে নীলাভ জল, তাতে ছলাং ছল ঢেউ ভাঙছে । পাচা পাট আর বাঁশের একটু কটু গন্ধ । পিছল পাড় ঢালু হয়ে নেমে গেছে । দণ্ডকলস আর কাঁটাঝোপে আকীর্ণ এই জায়গাটা আসলে আঘাটা । মানুষের মল শুকিয়ে আছে এখানে সেখানে । জলে ছোট্টো একটা ছে-তোলা নৌকো । একটু দূরে নোঙর করেছে । কাউকে দেখা যায় না ।

উঁচু পাড়ের ওপর হেমকান্ত দাঁড়ালেন । সতর্কভাবে চারদিক দেখে নিলেন । কেউ ধারেকাছে নেই । দ্রুত পায়ে তিনি নামতে লাগলেন । শেয়ালের গর্ত, উঁচু নিচু জমি, মাটির ঢেলা—চলা বড় শক্ত । তবু হেমকান্ত দ্রুতবেগ বজায় রাখলেন । ধুতি কাঁটাঝোপে লেগে ফড়ফড় করে ছিড়ে গেল । চামড়ায় চিড় ধরল কয়েক জায়গায় । জুতো কাদায় মাটিতে মাখামাখি । শেষ কয়েক পা ভারসাম্য রাখতে না পেরে পড়ে গেলেন । উঠলেন, আবার পড়লেন । অবশেষে খানিকটা দমফোট অবস্থায় জলের কাছাকাছি এসে দাঁড়ালেন । নিজের শারীরিক অবস্থার দিকে খেয়াল নেই । কিছু টেরও পাচ্ছেন না । আকুল, তৃষ্ণার্ত দুই চোখে চেয়ে রইলেন অদূরে বাঁশের লগিতে বাঁধা নৌকোর ছেয়ের অঙ্কার মুখটির দিকে ।

পরে ভায়েরীতে লিখেছিলেন “...শরীর বলিয়া যে একটা ছাইবস্তু আছে তাহা তো টেরই পাই নাই । কাঁটাঝোপ, খানাখন্দ, পিছল মাটির সেই নাবালকে যেন রাজপথ মনে হইতেছিল । কাঁটায় কাঁটিয়া ছিড়িয়া গিয়াছে অনেক, পতনে কালশিটাও পড়িয়াছে, তদপেক্ষা গুরুতর নদীতটের ওই অংশে বিষধর সর্পের অভাব নাই, তাহার একটা অনায়াসে দংশন করিতে পারিত । কিন্তু আমি জানি ব্যথা-বেদনা সর্প দংশন কিছুই তখন আমি টের পাইতাম না । শরীরী হইয়াও সেই মুহূর্তে আমি শরীরের অনেক উর্ধ্বে বিরাজ করিতে ছিলাম । এক বাধাবন্ধনহারা আকর্ষণ, এক নাড়িছেঁড়া টান

আমাকে যেন আছাড়-পিছাড় করিয়া লইয়া যাইতেছিল।

“ঘটনার কথা পরে লিখিতেছি। তাহার আগে আমার এই শরীর-চেতনার কথা বলিয়া লই। নদীতটে সেই দিনের সেই অভিজ্ঞতা লইয়া যতই ভাবিতেছি ততই যেন এক ঘন কুয়াশায় ঢাকা রহস্যের যবনিকা থিরথির করিয়া কাঁপিয়া উঠিতেছে। যেন কী একটা সত্য ধরা পড়িবে পড়িবে করিতেছে। অনেক ভাবিয়া ভাবিয়া ঘুরিয়া ফিরিয়া কেবল মনে হইতেছে, স্নেহের টান যদি শরীর ভুলাইতে পারে তবে বৃহত্তর স্নেহ, আরও প্রগাঢ় স্নেহ হয়তো বা শরীরের মোহ চিরদিনের মতো ঘুচাইতে সক্ষম।

“মানুষ মরিতে ভয় পায়। মৃত্যুকে জয় করাই তাহার জৈবিক চাহিদা। বাঁচিব, মরিব কেন, এই বাতাই তাহার অন্তস্তল হইতে নিয়ত প্রবাহিত হইতেছে আমিও জীব। কিন্তু শ্রিয় পুত্রের দর্শনাভিলাষে সেদিন ওই দুর্গম পথে মৃত্যু ঘটিলে বা ঘটবার উপক্রম করিলে তো বিন্দুমাত্র বিচলিত বোধ করিতাম না কেন? তাহার কারণ ওই স্নেহ। স্নেহ যে কী প্রগাঢ় বস্তু ইহা যে কত মূল্যবান এবং যুগে যুগে যে কেন স্নেহ, প্রেম, ভালবাসার এত জয়গান করা হইয়াছে তাহাও অল্পসল্প বৃথিতে পারিতেছি। প্রেম মৃত্যু উপশমকারী, ইহার মতো নিদান আর নাই।

“ঈশ্বরকে আমি তেমন ভালবাসিতে পারি নাই। যাঁহারা পারিয়াছেন তাঁহারা ভাগ্যবান। ভালবাসিবার পূর্বে ঈশ্বরের অস্তিত্বে বিশ্বাসটা পোক্ত হওয়া দরকার। তাঁহার সৃষ্ট জগতের সবকিছুরই অস্তিত্ব প্রকাশমান, কেবল তাঁহার অস্তিত্বই প্রমাণের অপেক্ষা রাখে—ইহা কি দৃষ্টিকর্তার এক প্রচণ্ড রসিকতা! সমস্যাও সেখানেই। যাহাকে দেখি নাই, যাহার অস্তিত্বের তেমন কোনো প্রকট প্রমাণ নাই, কেবল কতকগুলো শাস্ত্রগোলা কথা আছে, তাহাকে যুক্তির খাতিরে এবং পুরোহিতদের ভয়ে না হয় মানিয়া লওয়া গেল। কিন্তু ভালবাসা তো সেই পথে আসিবে না!

“সত্য বটে, সেই বিরাট বিপুল নিরাকারকে ভজিবার জন্য আবহমানকাল হইতে মানুষ নানা প্রতীক খাড়া করিয়া আসিয়াছে। আমাদের তো তেত্রিশ কোটি প্রতীক। কালী, দুর্গা, জগদ্ধাত্রী, শিব, কৃষ্ণ অভাব নাই। কিন্তু এই প্রতিমা পূজার ব্যাপারটি মানিয়া লইলেও আমি কি জানি কেন ইহার মধ্যে একটি ছেলেমানুষী দেখিতে পাই। মাটি, সোনা বা রূপা যাহা দিয়াই গড়িয়া লও না কেন উহা তো মানুষেরই নির্মাণ। তাহাকে দেবতা ভাবিয়া হৃদয় উদ্বেল হইবে কি করিয়া?

“উপরন্তু আর একটি কথাও আছে। এই পুতুল পূজা করিয়া একটি আত্মসম্মতি পাওয়া যায় বটে, কিন্তু ইহাতে প্রবৃত্তির গায়ে হাত পড়ে না, ফলে বিগ্রহ পূজারীর মধ্যেও চৌর্যবৃত্তি, হীনমন্যতা এবং ঈর্ষা প্রবল। ধর্মের নানা দিক। কিন্তু লৌকিক পূজা পার্বণের ভিতর আমি কোনো অবলম্বন আঁজিও ঈজিয়া পাই নাই।

“নলিনী বাঁচিয়া থাকিতে একদা আমাকে বলিয়াছিল, দাদা, পুরোহিতের কাছে ধর্ম ব্যাখ্যা শোনার চেয়ে নাস্তিক হওয়া ভাল। কুলগুরু বা পুরোহিত সে দুই চোখে দেখিতে পারিত না। সে প্রায়ই বলিত, তিনি রূপ ধরে আসেন, তাঁকে জন্মাতাই হয় বারবার, নইলে চলবে কী করে?

“নলিনী তাহার ঠাকুরের মধ্যে তাঁহাকে পাইয়াছিল। সে যে সঠিক পথেরই সন্ধান পাইয়াছিল তাহা তাহার চোখ মুখের দীপ্তিতেই প্রতিভাত হইত। অকালমৃত্যু তাহাকে সংসারের বন্ধন হইতে মুক্তি দিয়াছে, কিন্তু সেই ঘটনার ব্যাখ্যা কিরূপে করিব? কতবার ভাবিয়াছি, এই তো কাছেই পাবনা। যাই ঠাকুরকে একবার দেখিয়া আসি। কিন্তু গড়িমসি করিয়া যাওয়া হয় নাই। গিয়া পড়িলে হয়তো এই জন্মেই জন্মের রহস্য ভেদ করিতে পারিতাম। হয়তো সেই শাস্তকে পাইতাম, যাহা নলিনী পাইয়াছিল, যাহা কালক্রমে কৃষ্ণও পাইবে।

“হ্যাঁ, কৃষ্ণর কথা। তাহার কথাই তো বলিতে বসিয়াছি, আজ আমার কত আনন্দ। ডায়েরী লিখিবার পূর্বে বার বার অঙ্গ শিহরিত হইয়াছে। তাহার মুখখানি দেখিয়াছি। প্রাণ তরিয়্যা দেখিয়াছি। কতদিন বাঁচিব কে জানে! হয়তো এই আয়ুতে আর বেড় পাইব না। কর্মচক্রে সে

কতদূর ভাসিয়া যাইবে, আমিও বা গিয়া কাশীর কোন গলিতে খাবি খাইতে খাইতে মরিব !

“হে সহ নৌকা নীল জলে দুলিতেছে, ভাসিতেছে। উপরে অখণ্ড আকাশ, জলে তাহারই শতখা ভঙ্গুর ছায়া। ঠিক এই জীবনের মতো। একটি শাস্ত, একটি মায়। তবে মায়ার ভিতরেও ওই শাস্তেরই খণ্ড খণ্ড ছায়া আছে। যে ছায়া লইয়া থাকে সে তাই থাক। যে আরো কিছু চায় সে উপরের দিকে চাহিবেই।

“আবার দর্শন। বড় জ্বালা হইল। বুড়া বয়সে কেবল কথা আসে, টিকা-টিগুনী আসে। রাজেনবাবু বলেন, মনুও বলে, আমি নাকি বুড়া নই। ভাল কথা। কিন্তু এই বন্ধবগানি কিসের লক্ষণ তাহাও কি বলিয়া দিতে হইবে ?

“যাহা বলিতে ছিলাম। নৌকা দুলিতেছে, ভাসিতেছে, আমার বন্ধদেশ আন্দোলিত হইতেছে। স্বাস গাঢ় হইয়া আসিতেছে। চোখের পলক পড়িতেছে না। খবর সত্য তো ! সে আসিয়াছে তো ! তাহার কোনো বিপদ ঘটবে না তো !

“আচমকা ছে-এর ভিতর হইতে একজন সুঠাম মাঝি বাহির হইয়া আসিল। লগিটা অবহেলায় তুলিয়া লইল। তাহার পর একটি ঝাঁকুনিতে নৌকাটিকে একেবারে তীরবর্তী করিয়া সংক্ষিপ্ত একটা হাঁক মারিল, আসুন কর্তা।

“কম্পিত পদে ও বক্ষে তাড়াতাড়ি গিয়া নৌকায় উঠিলাম। লোকটা নিম্নস্বরে কহিল, ভিতরে যান।

“ভিতরে ঢুকিলাম। একদম শেষ প্রান্তে একটি সবল চেহারার কিশোর বসিয়া আছে। বেশভূষা মলিন। কিন্তু অমলিন তাহার হাসিটি। আমি বজ্রাহতের মতো দাঁড়াইয়া পড়িলাম। মাত্র এই কয়েক মাসের মধ্যে কৃষ্ণর কি এত পরিবর্তন হইয়াছে ? এ যে সেই বালক নহে। এ যে যীতিমতো যৌবনোদ্ভূত পুরুষ ! মুখের সেই কমনীয়তা কোথায় গেল ? ছে-এর ভিতরকার প্রদোষবৎ স্বল্প আলোকেও তাহার মুখের রেখাগুলির কাঠিন্য ও কর্কশভাব চোখে পড়ে।

“সে উঠিল। বলিল, বাবা, আপনি কেমন আছেন ?

“আমি জবাব দিতে পারিলাম না। দীর্ঘকাল পরে সেই বিস্মৃত কণ্ঠে বাবা ডাক শুনিয়া আবেগে আমার কণ্ঠ রুদ্ধ হইল, সর্বঙ্গ কাঁপিতে লাগিল। আমি তাহার দিকে কম্পিত একখানি হাত বাড়াইয়া দিলাম।

“সে সবল দুই বাহুতে আমাকে ধরিল। ধীরে ধীরে পাটাতনে বসাইয়া দিল। তারপর কোমল কণ্ঠে বলিল, আপনার শরীর ভাল আছে তো বাবা ?

“তাহার কণ্ঠে উদ্বেগ, উৎকণ্ঠ। নিজের পুত্র কন্যাদের নিকট আমি যথার্থ ভালবাসা পাই নাই, তাহাদেরও আমি যথাযথ ভালবাসি নাই। ব্যতিক্রম শুধু এই কৃষ্ণ। আমার পিতৃহৃদয়ের কেবল কেন যেন তাহাকে কেন্দ্র করিয়াই মথিত হয়। আর সেও বিশ্বসংসারে সকলের নিকট অপদার্থ বলিয়া চিহ্নিত তাহার এই বাপটিকে কেন যেন বুক ভরিয়া ভালবাসে।

“আমি কিছুক্ষণ নীরবে অশ্রুবিসর্জন করিলাম। আবেগ কিছু প্রশমিত হইল। সেও অশ্রুসিক্ত দুখানি চোখ বারংবার মার্জনা করিল।

“আমি প্রশ্ন করিলাম, তুমি কেমন আছ ?

“ভাল আছি বাবা। আপনি অকারণ ভাববেন না।

কোথায় আছ, কী খাও, কী পরো কিছুই তো জানি না।

“সে হাসিয়া কহিল, তার তো কিছু ঠিক থাকে না বাবা। আমাদের দলটা পুলিশের সঙ্গে লড়াইতে ছত্রভঙ্গ হয়ে যায়। কে মরেছে, কে ধরা পড়েছে তা জানি না। একা একা কিছুদিন পালিয়ে বেড়াই। তারপর একদিন হঠাৎ পাবনার ঠাকুরের আশ্রমে হাজির হয়ে যাই। কাকার ঠাকুর তো, তাই সেখানেই আশ্রয় নিলাম।



“একটা নিশ্চিন্তের দীর্ঘশ্বাস ফেলিয়া কহিলাম, নিলে ! যাক বাঁচা গেল ।

“সে ভূ কুণ্ঠিত করিয়া কহিল, নিলাম, কিন্তু সব কথা ঠাকুরকে বলিনি । কেমন সংকোচ আর ভয় হল ।

“আমি মৃদুস্বরে কহিলাম, যাঁকে গুরু বলে মানবে তাঁর কাছে কোনো কথা গোপন করতে নেই ।

“সে হাসিয়া কহিল, আমি তো অগ্নিমন্ত্রে আগেই দীক্ষা নিয়েছি । আমাদের কর্মধারার সঙ্গে ঠাকুরের কিছু অমিল আছে । উনি বোধহয় আমাদের কর্মধারার সমর্থক নন । আমাকে উনি হঠাৎ এক রাতে বাঁধের ধারের তাসতে ডেকে পাঠালেন । তারপর খুব স্নেহের সঙ্গে বললেন, ঢাকায় চলে যাও, সেখানে গিয়ে সারেগুড় করো ।

উনি বললেন ?

হ্যাঁ । শুনে আমি চমকে উঠলাম । আমি কে বা কোথা থেকে এসেছি তা তো ঠুঁকে বলিনি । একটা ছদ্ম নাম আর ঠিকানা দিয়েছি মাত্র । কিন্তু উনি দিনরাত মানুষ ঘাঁটেন, কাজেই অনুমানশক্তি তীব্র এবং তীক্ষ্ণ । অনুভূতি ভীষণ প্রখর ।

তুমি কী বললে ?

আমি কিছু বলিনি । মাথা নিচু করে ছিলাম । উনিই বললেন, এভাবে পালিয়ে বেড়িয়ে কোনো লাভ হবে না । বরং সারেগুড় করলে পথ পাবে । তখন আমি বললাম, আমার বিরুদ্ধে খুনের চার্জ আছে । ধরলে ফাঁসি দেবে । উনি তবু বললেন, যা বলছি তা করলে ভালই হবে । এখানে নয়, ঢাকায় চলে যাও । সেখানে সারেগুড় করো ।

তুমি কি তাঁকে বিশ্বাস করতে পারছো না ?

“কৃষ্ণ কিছুকৃষ্ণ ভ্রুকৃষ্ণ করিয়া কী ভাবিয়া কহিল, তাঁকে আমার খুব বিশ্বাস করতে ইচ্ছা হয় । মানুষের প্রতি ওরকম অগাধ ভালবাসা আর কারো মধ্যে কখনো দেখিনি । অদ্ভুত মানুষ । কিন্তু সারেগুড় করার ব্যাপারে আমার দ্বিধা আছে ।

তুমি বুদ্ধিমান, বিবেচক । আমি আর তোমাকে কী বলতে পারি ? যা ভাল বুঝবে করবে ।

না বাবা, আমি আপনার পরামর্শও চাই । সাত দিন আগে আমি ঢাকায় যাচ্ছি বলে আশ্রম থেকে বেরিয়ে পড়ি । কিন্তু ঢাকায় যেতে মন সরেনি । এখানে গত চারদিন ধরে এই নৌকোয় বাস করছি । ছোড়দির বিয়ের খবর পেয়েছি ।

“আমি একটা দীর্ঘশ্বাস ফেলিলাম । কহিলাম, আরও একটা খবর তোমার জানা দরকার । তোমার কাছে সত্য গোপন করতে পারব না, তাতে তুমি আমাকে ঘৃণা করলেও না ।

“সে মৃদু হাসিয়া কুণ্ঠিত স্বরে বলিল, আপনাকে বলতে হবে না । আমি জানি । মনুপিসি আমাদের নতুন মা হয়েছেন ।

জানো তাহলে !

জানি বাবা ।

আমাকে তোমার ঘৃণা হয় না ?

আপনার জন্য আমার ভারি দুশ্চিন্তা ছিল । আমি বেরিয়ে এসেছি, ছোড়দির বিয়ে হয়ে যাচ্ছে, আপনি একা । দেখাশোনার কেউ নেই । মনুপিসি আপনার ভার নেওয়ায় আমার দুশ্চিন্তা গেছে ।

সত্যি বলছো ?

“কৃষ্ণকাস্তু দুটি অকপট চোখে আমার দিকে চাহিয়া বলিল, বাবা, আমি তো নিজের মাকে দেখিনি । মনু পিসিকেই মা বলে জানি । মনুপিসির মতো আপনজন আমাদের আর কে আছে ?

“বুক হইতে এক পাষণভার নামিয়া গেল । মনে হইল, আমার অন্য পুত্রকন্যা জামাতা ও বধুমাতারা আমার যতই নিন্দামন্দ করুন আর যতই কলঙ্ক নিক্ষেপ করুন আমার আর তাহাতে কিছু আসিয়া যায় না । বড় নিশ্চিন্ত, বড় সুখী বোধ করিলাম । তারপর প্রসঙ্গান্তরে গিয়া প্রশ্ন করিলাম,

এখন তাহলে কী করবে ?

সেটা জানতেই আপনার কাছে আসা। আপনি বলে দিন কী করব।

“আমি সামান্য হাসিলাম। সংসারী অদূরদর্শী মানুষ আমরা, আমাদের সাধ্য কি যে কাহাকেও সং পরামর্শ দেই ? কিসে ভাল হইবে, কিসে মন্দ হইবে সে সম্পর্কে সম্যক ধারণা করিবার মতো জ্ঞান ও বিচারবোধ কয়টি লোকের থাকে ? কয়জনই বা অগ্র পশ্চাৎ বিবেচনা করিয়া কাজ করিতে পারে ? মাথা নাড়িয়া কহিলাম, যার আশ্রয়ে গেছ তার পরামর্শই মেনে চলো। তাতেই ভাল হবে।

আপনি বলছেন ?

বলছি। তাঁর ওপর নলিনীর বড় বিশ্বাস ছিল। তিনি যা বলবেন তাই করো। অগ্র পশ্চাৎ তিনি যত দেখতে পান আমরা তা পাই না।

“এককথায় হঠাৎ কৃষ্ণর মুখ উজ্জ্বলিত হইয়া গেল। কিছুক্ষণ স্মিত মুখে বসিয়া থাকিয়া সে হঠাৎ নত হইয়া আমার পদধূলি গ্রহণ করিয়া বলিল, আমার দ্বিধার ভাবটা কেটে গেছে।

“আমি মাথা নাড়িলাম বলিলাম, ফেরারী জীবনে বিপদ অনেক। তাছাড়া তুমি এখন বিচ্ছিন্ন, একা। এর চেয়ে সারেগুর করাই ভাল।

“কৃষ্ণ ক্ষণকাল চিন্তা করিয়া কহিল, আশ্রমে অনেক রাজনৈতিক নেতা আসেন। ঠাকুর রাজনীতি বিষয়ে ভালই খোঁজবর রাখেন। তিনি যখন সারেগুর করতে বলছেন তখন তার পিছনে নিশ্চয়ই কারণ আছে। গত কদিন ধরে সেই কারণটা অনেক ভেবেও ধরতে পারিনি।

“আমি কাঙালের মতো তাহার মুখখানি আমার দুই চক্ষু দিয়া পান করিতেছিলাম। কহিলাম, যখন একটা ঝুটি পেয়েছো তখন সেইটেই ধরে থাকো। জীবনের সব ক্ষেত্রেই একটি কেন্দ্রবিন্দু থাকা দরকার, একটা বিশ্বাসের স্থল। আমার তেমন কিছু ছিল না বলেই জীবন থেকে অনেকটা বিচ্যুত হয়েছি। নলিনী খানিকটা তাঁকে অবলম্বন করেছিল। কিন্তু যতদূর জানি, ঠাকুর তাকে পাকাপাকিভাবে নিজের কাছে রাখতে চেয়েছিলেন। নলিনী হবে হচ্ছে করে বিলম্ব করছিল। না করলে হয়তো তার অপঘাত হত না।

“কৃষ্ণ আমার মুখের দিকে স্থির দৃষ্টিতে চাহিয়া ছিল। কহিল, আপনি যা বললেন তাতে আমার দ্বিধা আরো কেটে গেল। আমি আজই তাহলে ঢাকা রওনা হই ?

আজই ? বিশাখার বিয়েটা... ?

“সে মাথা নাড়িল। বলিল, আমার কথা বাড়িতে উচ্চারণও করবেন না বাবা। শুভকাজে মানুষের মন ভারাক্রান্ত হবে। শুধু আপনি জানলেন, আর মনুপিসি যেন জানেন। আর কেউ না।

“নৌকা ইতিমধ্যে মাঝগাঙে আসিয়া পড়িয়াছে এবং মাঝি মহা উৎসাহে জাল ফেলিতেছে পকেটে কিছু টাকা আনিয়াছিলাম। বাহির করিয়া কৃষ্ণর হাতে দিয়া কহিলাম, তোমার কাজে লাগবে।

“সে ঈষৎ শিহরিয়া বলিল, এত টাকা কোন কাজে লাগবে ? অল্প কিছু দিন।

“আমি দীর্ঘশ্বাস ফেলিয়া কহিলাম, বিষয় সম্পত্তি সব তোমারই থাকবে। ফিরে এসে নিও।

॥ ১০০ ॥

ধুব খুবই মনোযোগ দিয়ে রেমিকে লক্ষ্য করছিল। বিশেষ করে ওর চোখ, দৃষ্টিতে কিছু অনিশ্চয়তা এবং আত্মবিশ্বাসের অভাব আছে, কিছু পাগলামি নেই। তবে কিছুই বলা যায় না। মানসিক ভারসাম্য এমন একটা জায়গায় হয়ত পৌঁছে গেছে যেখান থেকে এক পা এগোলেই পাগলামির অঁথে খাদ।

এর জন্য কি আমিই দায়ী ? মনে মনে আজ এই প্রশ্ন উদ্যত হল তার নিজের দিকে । ধুব রেমিকে নিজের খুব কাছে টেনে আনল । একটা হাত দিয়ে তার কোমর জড়িয়ে নিজের শরীরের সঙ্গে লেস্টে রেখে বলল, তোমার কিছুই হয়নি । কেন ভাবছ ?

রেমি দীনভাবে তার মুখখানা তুলে ধরল ধুবর মুখের দিকে । এত কাছাকাছি দুজনের মুখ যে পরস্পরের শ্বাস পরস্পরের মুখে পড়ছে । রেমি অনেকক্ষণ ধুবর চোখে তার দুটি চোখ পেতে রাখল । তারপর বলল, তুমি বলছ ? তুমি যদি আরো জোর দিয়ে বল যে সত্যিই আমার কিছু হয়নি তাহলে বোধহয় আমার কিছু হবে না ।

ধুব কিছু বলল না, শুধু আরো ঘন করে, শক্ত করে ধরে রইল রেমিকে ।

রেমি ত্রু কুঁচকে ধুবর মুখের দিকে চেয়ে সন্দ্বিহান গলায় বলে, হঠাৎ এত আদর করছ কেন বল তো ! পাগল হয়ে যাচ্ছি বলে ভয় পাচ্ছ ?

ধুব মাথা নেড়ে বলে, না । তুমি পাগল হবে না রেমি । পাগলামির লক্ষণ তোমার মধ্যে নেই ।

তুমি তো আর ডাক্তার নও ।

না হলেই বা ! পাগলামির লক্ষণ চেনা যায় । বিশেষ করে নিজের বউয়ের ।

আমি তোমার বউ তো কেবল নামে ।

ধুব মাথা নেড়ে সম্মতি জানাল । বলল, সেটাই ভাবছিলাম । যদি তুমি পাগল হও তাহলে হয়ত আমার জনাই হবে । আমি তোমার মাথায় এতদিন ধরে নানা উন্টোপাল্টা আইডিয়ার বীজ বুনেছি । কাজটা হয়তো ঠিক হয়নি ।

রেমি একটা দীর্ঘশ্বাস ছেড়ে বলল, যা বিশ্বাস কর তাই বলেছ । সেটা তো অন্যায় নয় । কিন্তু আমি একটা জিনিস একদম সহিতে পারি না, সেটা হল আমাকে তোমার ত্যাগ করার কথা । তোমার ওই ত্যাগ করার কথা আমাকে দিনরাত কুরে কুরে খেয়েছে । ভিতরে ভিতরে কেবল ভয়, কেবল অনিশ্চয়তা, পায়ের তলা থেকে যেন কেবলই মাটি সরে যায় । আমি কোথায় দাঁড়াব বল তো !

ধুব মাথা নেড়ে বলল, ঠিক ত্যাগ নয় রেমি, যাক গে, সেসব কথা বড্ড পুরনো হয়ে গেছে । তোমাকে যে কথাটা আজ বলতে চাই, তা একটু অদ্ভুত শোনাবে ।

কী গো ? ভয়ের কথা কোন ?

কি জানি । কথাটা শুনে তুমি ভয় পেতেও পারো ।

কী কথা ?

আমার আজকাল মনে হচ্ছে, আমি খুব বেশিদিন বাঁচব না ।

রেমি একটু শিউরে উঠে ধুবর হাত খামচে ধরল । তারপর স্তব্ধ হয়ে রইল । অনেকক্ষণ বাদে বলল, তোমার কী হয়েছে ?

তেমন কিছু নয় । শরীর ভালই আছে । কিন্তু কি জান, আমি এই জীবনের কোন পারাপাস খুঁজে পান্ছি না, ঘেঁচে থাকাটা বড্ড অর্থহীন, বড্ড জ্বালা ।

রেমি আবার কেঁপে উঠল । কাঁপুনিটা উঠে এল বুক থেকে । একটা কান্নার তরঙ্গ বয়ে গেল সমস্ত শরীরে । ভেজা গলায় সে বলল, ওসব কী বলছ !

শোনো, তোমাকে বুঝিয়ে বলি । তুমি ছাড়া আমার বিশেষ কেউ বন্ধু নেই যাকে সব কথা উজাড় করে বলা যায় ।

বন্ধু ! আমাকে তুমি সত্যিই বন্ধু মনে কর ?

করি রেমি । ইউ আর এ ফেইথফুল ফ্রেন্ড । গুড ফ্রেন্ড ।

রেমি একটা দীর্ঘশ্বাস ফেলে বলল, এতদিন এ কথাটা বলনি কেন ?

বজ্রিনি, দরকার হয়নি বলে । আজ আমি মনে মনে একজন বিশ্বস্ত বন্ধু খুঁজছি । খুঁজতে খুঁজতে তোমার কথা মনে হল ।

তাহলে বল তোমার কী হয়েছে ?

কিছু হয়নি আর সেটাই সমস্যা। আমার কিছু হচ্ছে না, আমি কিছু হয়ে উঠছি না, আমার অস্তিত্বের কোন তরঙ্গ নেই। ভিতরে একটা বিরাট ভ্যাকুয়াম তোমার পাগলামির চেয়েও যেটা বেশি যন্ত্রণাদায়ক।

একটু বুঝিয়ে বল আমার তো বেশি বুদ্ধি নেই।

বুদ্ধির দরকার নেই রেমি। শুধু একটু অনুভব করার চেষ্টা কর তাহলেই হবে। বুদ্ধি দিয়ে কাউকে বোঝা যায় না, ভালবাসলে বোঝা যায়।

তাহলে তুমি স্বীকার করছ যে আমি তোমাকে ভালবাসি

স্বীকার করি। তোমার ভালবাসা সাফোকেটিং, আমার কাছে অস্বস্তিকর। আমি যে ধরনের ফ্রিডমে বিশ্বাস করি তাতে প্যাজেজিভ ভালবাসার স্থান নেই। দখলদারি ভাব স্বাধীনতার অন্তরায়। মানুষে মানুষে সম্পর্কের ক্ষেত্রেও স্বাধীনতা এবং অধীনতার জটিল সব সমস্যা আছে। তুমি হয়ত বুঝবে না।

হ্যাঁ গো, আমার মত তুমিও কি একটু পাগল হয়েছে ?

তুমি আমি কেউ পাগল নই। শুধু পরিস্থিতির শিকার। তোমার আর আমার মধ্যে একটা অদৃশ্য লড়াই ছিল। সে লড়াইটা আইডিয়া ভারসাস প্রিমিটিভেনেস। কিন্তু ওসব তুমি বুঝবে না। তোমাকে শুধু আমার প্রবলেমটার কথা বলি।

বল না গো।

আমার মনে হচ্ছে, অনেকদিন বেঁচে আছি। আরো বহুদিন বেঁচে থাকার কোন মানে হয় না। আমি তা পেয়ে উঠব না। কারণ আমার আর কিছু করার নেই

সে কী গো ?

আমি জমিদার পরিবারে জন্মেছি, বাবা নেতা এবং মন্ত্রী। জীবনে আমাকে কোন অর্থনৈতিক সংগ্রাম করতে হয়নি, হবেও না। যদি মা বাবা বড় বাচ্চের জন্য রুজি রোজগারের লড়াই করতে হত তবে বোধ হয় জীবনটা এত আলুনি লাগত না। আমি কাউকেই তেমন ভালবাসি না, কারো জন্য কোন রেসপনসিবিলিটি আছে বলেও মনে হয় না, আমার কোন উচ্চাকাঙ্ক্ষা নেই। কিসের জন্য বেঁচে থাকা রেমি ?

রেমি খুব কবে আঁকড়ে ধরে ধুবকে। বুকে গাল ঘষতে ঘষতে বলে, তোমার ছেলে হয়েছে না ? তাকে মানুষ করবে কে ?

ছেলের জন্য আমার কিছু করার আছে কি রেমি ? দাদুর দেদার টাকা, আদরের নাতির জন্য সব বন্দোবস্তই তিনি করবেন। আমার কাছ থেকে ওর কিছু নেওয়ার নেই। না কোন সং শিক্ষা, না ধনদৌলত বা বাড়ি জমি। আর যদি বাপের স্নেহের কথা তোল, তাহলে বলব তারও ওর দরকার নেই।

রেমি বড় বড় চোখ করে বলে, তুমি কী বলতে চাইছ বল তো ? মরতে চাও মানে কি সুইসাইডের কথা ভাবছ ?

মাঝে মাঝে ভাবি। কিন্তু আমার মনে হয় তার দরকার নেই। মানুষের যখন বাঁচার ইচ্ছেটা একদম নিবে যায় তখন তার শরীরও আন্তে আন্তে মৃত্যুর দিকে চলে পড়ে। তুমি ইচ্ছাশক্তিতে বিশ্বাস কর ?

জানি না।

আমার হল নেতিবাচক ইচ্ছাশক্তি। বাঁচার ইচ্ছেটা নিবে গিয়ে একটা মৃত্যুপ্রেম দেখা দিচ্ছে। কেবল মনে হচ্ছে, আর নয়, আর নয়। বহুদিন হয়ে গেল এইখানে।

রেমির বিখ্যাত বড় বড় দুখানি চোখ টসটসে জলে ভরে উঠল। গাল ভাসিয়ে নামল। ফুপিয়ে

ফাঁপিয়ে কেঁদে উঠল সে

কাঁদছে কেন ? কাঁদলে আমার কী লাভ ? আমি তোমাকে আমার প্রবলেমটার কথা বললাম । তোমার কাছে যদি সলিউশন থাকে তো দাও । আমার বাঁচার ইচ্ছেটাকে জাগিয়ে তোল, যদি পার । কেঁদে ভাসিয়ে দিলে তো সমস্যাটা মিটেবে না ।

আমি বোকা, আমার বুদ্ধি নেই, আমি এসব কথা শুনে আরো পাগল পাগল হয়ে যাচ্ছি । ধুব হেসে রেমির নাকটা টিপে দিয়ে বলল, এরকম বন্ধু দিয়ে আমার কী হবে বল তো ! বন্ধু হবে শক্ত সমর্থ, দৃঢ়চেতা, যার ওপর হেলান দেওয়া যায়, যাকে অবলম্বন করে বাঁচার জোর পাওয়া যায় । রেমি চোখ মুছল । ধুবকে দুহাতে জড়িয়ে ধরে বলল, মরার কথা ভাবতে পারবে না । কথা দাও ।

এসব কি প্রতিজ্ঞা করা যায় রেমি ? ভিতরকার ব্যাপার, নানারকম জটিল কজ অ্যাণ্ড এফেকটের ওপর নির্ভরশীল ।

আমি আজ থেকে তোমার প্রবলেম নিয়ে ভাববো । কিন্তু আমি তো স্নো থিংকার, একটু সময় লাগবে । আমাকে সময় দেবে তো !

দিলাম ।

আর শোনো, আজ থেকে আমি এই ঘরে থাকব ।

ওয়েলকাম, মন্ত্রীমশাই চটবেন না তো ?

না, চটবেন কেন ?

ভয় পাচ্ছ একা ঘরে কিছু করে বসি পাচ্ছে ?

রেমি মাথা নেড়ে বলে, তা নয় । তোমার কাছে কাছেই ত আমার থাকার কথা ! ফিরে তাকাও না বলেই বাবা আমাকে দোতলায় থাকতে বলেছেন ।

ধুব মাথা নেড়ে জানাল যে, সে সবই জানে । একটা দীর্ঘশ্বাস ফেলে বলল, তোমাকে আর একটা জটিল সমস্যার কথা জানাতে চাই । শুধু ভয় পাচ্ছি তুমি কি ভাবে ব্যাপারটা নেবে ।

একসঙ্গে বেশি কি আমি সইতে পারব ?

পারবে । পারতেই হবে । যদি আমার বন্ধু হতে চাও তাহলে শেয়ার কর ।

রেমি ঝকঝক করে চোখে চেয়ে দেখল ধুবকে । বলল, ঠিক আছে বলো ।

আজই তোমাকে বলার ইচ্ছা ছিল না । কিন্তু ভাবি, কি জানি কি হয় । হাতে হয়ত বেশি সময় নেই ।

উঃ ফের সেইসব কথা ।

আমার সঙ্গে কোন মেয়ে কখনো কোন ফিজিক্যাল রিলেশন ছিল না । তুমি ছিলে একমাত্র । মুখে আমি যতই আধুনিক হই না কেন, চিন্তায় যতই বিপ্লব করি না কেন, আমি বেসিক্যালি ইনঅ্যাক্টিভ, চিন্তাকে আমি কদাচিৎ কাজে অনুবাদ করি, ভাষাটা একটু সাধু শোনাল রেমি ?

উঃ, বল আমি বুঝতে পারছি । কার সঙ্গে তোমার কী হয়েছে ?

পচা শামুকে পা কাটল, তুমি চিনবে না তাকে, নষ্ট ব্রষ্ট একটা মেয়ে আমাদের দেশের বাড়ির পুরুতের নাতনী, ওর মা এক সময় মেয়েটাকে আমার সঙ্গে বিয়ে দেবার চেষ্টা করেছিল । তাতে হেড অফিস চটে যায় । মেয়েটার এক দাশা তোমার স্বপ্নের অফিসে চাকরি করত । হেড অফিস অর্থাৎ তোমার স্বপ্নর তাকে নিজের চাকরি থেকে তাড়ায় । ছেলেটা সেই থেকে নিরুদ্দেশ । এটুকু হল ব্যাকগ্রাউণ্ড । বুঝলে ?

বুঝছি, বল ।

মেয়েটা সংসার চালাতে নিচে নামতে থাকে । এরকম আকছার হচ্ছে । কিন্তু এই মেয়েটার ক্ষেত্রে নষ্ট হয়ে যাওয়ার পিছনে তোমার স্বপ্নের অবদান যথেষ্ট ।

মেয়েটাকে আমি চিনি ?

বোধহয় না । তার নাম নোটন, সিনেমা থিয়েটারে ছোট পার্ট করে । আসলে কল গার্ল, কেপট এবং আরও হয়তো কিছু । অত জানি না । এক পিকনিকে মেয়েটার সঙ্গে হঠাৎ দেখা । দুঃখী মেয়ে, নিচে নেমেছে, তার ওপর ওর জীবনে আমাকে নিয়ে একটা ট্রাজেডী আছে বলে আমি খুব একটা এড়াতে পারিনি ওকে ।

সে কী ? বলে রেমি বড় বড় চোখে তাকায় ।

বন্ধু, শক্ত হও । অমন চমকে উঠলে বা রিঅ্যাক্ট করলে আমার মনের জোর কমে যাবে । আমি ভীষণ দুর্বল, শূন্য, অগ্রপশ্চাৎ বিবেচনাহীন । এখন আমাকে গাইড করার দায়িত্ব তোমার । শাস্তভাবে শোন, উত্তেজিত হয়ো না ।

রেমি স্তিমিত হল । বলল, বল ।

এখন আমি তোমার স্বামীই শুধু নই, বন্ধু । তাই না ?

বেশ, বল ।

মেয়েটার কাছে আমি বশ মানলাম । কিন্তু কেন মানলাম তার কারণটা আমার কাছে স্পষ্ট নয়, আমার মনে হল সামথিং ইজ ভেরি মাচ রং উইথ মি । ভিতরে যে ভ্যাকুয়ামটার কথা তোমাকে বলছিলাম সেটাই কারণ কিনা কে জানে ! একদিন বিনা কারণে ধারার গলা টিপে ধরেছিলাম । মেয়েটা মরতে বসেছিল ।

রেমি চমকে উঠে বলে, বল কি গো ! গলা টিপে—

ধুব কঠিন গলায় বলল, রেমি ! প্লীজ ডোন্ট রি-অ্যাক্ট । পাদ্রীরা যে রকম মুখ করে কনফেশন শোনে, পাকা জুয়াড়িরা যেমনভাবে জুয়া খেলে ঠিক সেইরকমভাবে তোমাকে এসব শুনতে হবে । পাথর হও কঠিন হও ।

রেমি নিজের কপাল টিপে ধরে বলে, পারছি না । ধারাকে খুন করতে চেয়েছিলে !

না । আমি চাইনি । আমার ভিতরে একজন অচেনা ধুব চেয়েছিল । সেই ধুবকে আমি ভয় পাই । কে জানে একদিন সে'তোমারও গলা টিপে ধরতে চাইবে কিনা ।

ধরো, তাহলে বেঁচে যাই ।

আবার রি-অ্যাক্ট করছ ?

রেমি একটা মৃদু দীর্ঘশ্বাস ফেলে বলে, আচ্ছা বল ।

নোটনের সঙ্গে মিশবার সময় আমার কোন প্রতিক্রিয়া হল না । ঘেন্না হল না ।

রেমি আচমকা প্রশ্ন করে, নোটন দেখতে কেমন ?

মজানোর মত রূপ নয় । তবে চটক আছে । প্লীজ ওটা নিয়ে আর খুঁটিয়ে জানতে দেও না । তুমি ওর চেয়ে অনেক সুন্দর ।

সত্যি কথা বলছ ?

মিথ্যে বলব কিসের ভয়ে বল তো ? কোন ভয় থাকলে কি এত কথা বলতাম ?

মাপ চাইছি । রাগ কোর না । বল ।

আমার সমস্যাটা বুঝতে পারছ তো ? নোটনের সঙ্গে শারীরিক মেলামেশা আমার পক্ষে স্বাভাবিক নয় । কারণ আমি ওরকম নই । তবে কেন হল ? আমি ভাবতে বসলাম । ভেবে কিছুতেই সলভ করতে পারলাম না । আমাদের বংশটা কেমন জান ? জমিদারি হাবভাব থাকলেও লাম্পট্যা নেই । আমার দাদু বুড়ো বয়সে একটা বিয়ে করেছিলেন বলে খুব হই হই হয়েছিল । কিন্তু আমি জানি তার মধ্যে কোন কামের উন্মাদনা ছিল না । তোমার স্বশুরের জ্যাঠামশাই সন্ন্যাসী হয়ে যান, কাকা স্বদেশী এবং ব্রহ্মচারী ছিলেন । তোমার স্বশুরকেও লোকে চোর, ক্ষমতালোভী স্বজনপোষক বললেও কেউ কখন লাম্পট বলে নি । আমার মধ্যেও সম্ভবত ওই শুচিতার বোধ ছিল । প্রতিরোধ

ছিল। সেই প্রতিরোধ নোটন ভাঙল কি করে? নোটনের কি সেই ক্ষমতা আছে?

সিনেমা থিয়েটারের মেয়েরা অনেক ছলাকলা জানে।

ধুব মাথা নাড়ল, না রেমি। প্রতিরোধ ভাঙবার ক্ষমতা নোটনের ছিল না। প্রতিরোধ ভেঙেছে আমার ভিতরকার অন্য এক ধুব। তাকে আমি চিনি না। তাকে আমি ভয় পাই।

রেমি বলল, গুরুত্ব করে বোল না, আমার গা ছম ছম করে।

তা করলে চলবে কেন সিস্টার? এ তো ভূতের গল্প নয়।

কিছু এমন করে বলছ যে ভয় করে।

ডাক্তার বেমন রোগীর রোগের বিবরণ শোনে তেমনি করে শোন। একুনি বললাম এটা ভূতের গল্প নয়, তাই না? আসলে কিছু আমার বিশ্বাস এটা বাস্তবিক ভূতেরই গল্প। একটা ধুব আর একটা ধুবের তৃত।

আবার?

রেমি, সবটা না শুনলে বুঝবে না। না বুঝলে চিকিৎসা করবে কি করে?

আচ্ছা বল।

এবার আসল কথাটা বলছি। আজ বিকেলে আমি নোটনের কাছে ছিলাম।

সে কী! আজও?

আবার চমকাচ্ছ?

রেমি সাদা মুখ করে চেয়ে থাকে।

প্রীজ রেমি!

রেমি ফের দীর্ঘশ্বাস ফেলে বলে, আমি ভাবছিলাম এসব অনেক আগের কথা।

না। একেবারে টাটকা খবর।

বল।

যখন ওর বাড়ি থেকে বেরিয়ে আসছিলাম তখন দেখি নিচে টালিগঞ্জ পাড়ার এক মেজো মস্তান দাঁড়িয়ে আছে। আমার চেনা।

মারল নাকি তোমাকে?

ধুব হাসল, মাথা নেড়ে বলল, না। আমাকে মারলে কালই গিয়ে জগাদা ওর হাত কেটে দিয়ে আসবে।

জগাদা কি গুণ্ডা?

গুণ্ডাদের গুরু। তবে আদর্শবাদী গুণ্ডা। প্রফেশন্যাল নয়। জগাদার কথাতেই আসছি। সেই মেজো গুণ্ডা আমাকে খুব অভয় দিল, নোটনের কাছে আমার যাতায়াতকে অ্যাপ্রভও করল। আমি ওকে দু'চার কথা জিজ্ঞেস করতেই যা বেরিয়ে এল সেটা শুনলে তুমি বোধহয় মূর্খা যাবে।

কী গো!

সে যা বলল তাতে বুঝলাম জগাদা সব খবর রাখে। সে গিয়ে ফ্যাডনকে বলে এসেছে যেন আমি নিরাপদে নোটনের কাছে যাতায়াত করতে পারি সেদিকে নজর রাখতে।

জগাদা! দাঁড়াও স্বপ্নুরমশাইকে ওর নাম বলছি।

ধুব স্নান হেসে বলে, সবটা শুনে নাও। অস্থির হলো না।

অত আস্তে আস্তে ভাঙছ কেন?

রহস্য কাহিনী এ ভাবেই বলতে হয়। একটু আগে বাড়ি ফিরে আমি জগাদাকে চার্জ করেছিলাম। সে কী বলল জান? বলল, নোটনের কাছে আমার যাতায়াত স্বয়ং তোমার স্বপ্নুরমশাই অনুমোদন করেছেন।

রেমি রাঙা হয়ে উঠে বলল, ধ্যাৎ! হতেই পারে না।

জগাদা প্রয়োজনে মিথ্যে কথা বলে বটে, কিন্তু কৃষ্ণকান্ত প্রসঙ্গে কখন বলবে না। গলা কেটে ফেললেও না।

শ্বশুরমশাই কি তেমন মানুষ ?

জানি না, তোমার শ্বশুরমশাইকে আমি ভাল চিনি না। আমার শুধু মায়ের মৃত্যুর দৃশ্য মনে পড়ে। আগুনের মধ্যে মা বেগুন পোড়া হচ্ছে।

আবার পুরনো কথা ?

ঠিক আছে, থাক। কিন্তু আমার প্রপ্ন তোমার শ্বশুর আমাকে লাম্পটের পথ দেখাচ্ছেন কেন ? কেন রি-অ্যাক্ট করলেন না ?

উঃ, আমি এত ভাবতে পারি না।

ভেঙে পোড় না। তোমার শ্বশুর সম্পর্কে আমার মনে অনেক ধাঁধা আছে ঠিকই, কিন্তু আজকের ব্যাপারটা আমি হজম করতে পারছি না। উনি কি ভাবেন যে আমার কোন সেকসুয়াল চাহিদা মিটছে না বলেই আমি বখে যাচ্ছি ? আর তাই সেই পথ প্রশস্ত করে দিচ্ছেন ?

উনি ওরকম করেননি, জগাদা মিথ্যে বলেছে।

তুমি অন্ধ, একদেশদর্শী। আমার বন্ধু হতে গেলে আর একটু নিরপেক্ষ হতে হবে। নিজেকে রেফারি বলে ভেবে নাও। ফাউল যে করবে তার বিরুদ্ধেই বাঁশি বাজাবে।

শ্বশুরমশাই এরকম ফাউল করতে পারেন না।

কেন পারবেন না ? উনি বহু ফাউল জীবনে করেছেন।

তা বলে নিজের ছেলেকে নিয়ে—

নিজের ছেলে বলে কি তাকে নিয়ে এক্সপেরিমেন্ট করতে নেই। আমার তো মনে হয় উনি আমার রোগ ধরতে না পেরে মরীয়া হয়ে এখন বেপরোয়া নিদান দিচ্ছেন।

ছিঃ, তোমার মুখে কিছু আটকায় না।

না, আমার মুখ তোমার শ্বশুরও আটকাতে পারেননি। আর সেইটেই ওর মস্ত অশান্তির কারণ।

চল আমরা কোথাও চলে যাই।

যেতে তো হবেই রেমি। তোমার শ্বশুর এনিমি প্রপাটির বিস্তার টাকা পাচ্ছেন। সেই টাকা দিয়ে আমাকে তিনি নাসিকে পাঠাবেন তাঁর এক বন্ধুর সঙ্গে পার্টনারশীপে ব্যবসা করতে। সাপও মরবে, লাঠিও ভাঙবে না।

কেন, তুমি যাবে। আমিও যাব।

যেতে আপত্তি নেই। কিন্তু আমি এতদিনে বুঝে গেছি কোথাও গিয়েও আমি ভাল থাকব না।

হ্যাঁ গো, মদ ছেড়ে দিয়ে কি তোমার কষ্ট হয় ?

না রেমি। মদের কোন নেশা আমার ছিল না। বন্ধুরা জানে আমি বরাবর জোর করে মদ খেতাম। একথা জিজ্ঞেস করলে কেন ?

ভাবছিলাম এতদিনের নেশা ছেড়ে দেওয়ায় তোমার ব্রেনটা হয়তো গোলমাল করছে।

না। ওসব নয়। আমার ব্রেন ঠিক আছে। শুধু বৈচে থাকার ইচ্ছেটা চলে যাচ্ছে।

আমি কী করব বল তো ?

বসে বসে ভাবো। সারাদিন ভাব। দেখ কিছু করতে পার কিনা।

আমি দিব্যকে নিয়ে আজই চলে আসছি এ ঘরে।

দিবাটা আবার কে ?

তোমার ছেলে।

ওর নাম দিব্য ? কে রাখল ?

শ্বশুরমশাই। দিব্যকান্ত। পছন্দ নয় ?



বেশ নাম ।

ওর মুখের দিকে রোজ কিছুক্ষণ চেয়ে থেক । দেখো তোমার সব অসুখ সেরে যাবে ।

তাই নাকি ? তবে তুমি নিজে পাগল হয়ে যাবে বলে ভয় পাচ্ছ কেন ?

রেমি লজ্জায় হাসল । মাথা নেড়ে বলল, আর তেমন মনে হচ্ছে না । পাগলামি তুমি সারিয়ে দিয়েছ ।

.. ১০১ ..

“যখন বাড়ি ফিরিলাম তখন বেশ ঘোরের মধ্যে আছি । চারিদিকে কিছুই ভাল করিয়া লক্ষ করিতেছি না । কেমন যেন এক অলীক পৃথিবীর স্বপ্নবৎ দৃশ্যাবলী আমাকে ঘিরিয়া ধরিয়াছে । মনে মনে কেবল একটি প্রশ্নই গুঞ্জন তুলিতেছে, নিরুদ্দেশ যাত্রায় এক ক্ষুদ্র নৌকায় আমার প্রাণপ্রিয় কিশোর পুত্রটি কোথায় ভাসিয়া গেল ? যাহা আমার প্রিয়, যে আমার প্রিয় তাহাকেই কেন দেশের প্রয়োজন হইল ? কেন তাহাকেই গ্রাস করিল এই মহাপৃথিবী ?

“জানি এই সকল প্রশ্নের সদুত্তর নাই । আমি চিরকাল মনে মনে আন্দোলন করিব, ভাবিব, কাঁদিব । কিন্তু আমার করার কিছুই থাকিবে না । আমরা তো ঘটনাবলীর নিয়ামক নাই । আমরা কত নাহি । ঘটনা আমাদের লইয়া ঘটে মাত্র ।

“নানাভাবে নিজেকে স্তোক দিতে দিতে, আচ্ছন্ন হৃদয়ে এবং ক্লান্ত শরীরে ফিরিতেছিলাম । বাড়ির অনতিদূরে রাস্তার পাশে কিছু ঝোপঝাড় । হঠাৎ তাহার আড়াল হইতে এক ব্যক্তি বাহির হইয়া আসিল । বেশ শক্ত পোক্ত চেহারা, পরনে পুলিশের পোশাক । লোকটা আসিয়া আমার পথ আটকাইয়া কহিল, আপনার সঙ্গে একটু কথা আছে ।

“বিস্মিত হইয়া কহিলাম, কী কথা ?

“এখানে নয়, আমার সঙ্গে আসুন ।

“আমার যাইবার ইচ্ছা ছিল না । কিন্তু পুলিশকে ইদানীং সমীহ করিতে শিখিয়াছি । বুঝিয়াছি এই একটি জায়গায় বেশী ট্যাগুই ম্যাগুই করিলে মান লইয়া সংসারে বাস করা কঠিন হইবে । ইংরাজ কর্তারা ইহাদের কাঁধে ভর দিয়াই রাজ্য শাসন করিতেছে । কাজেই একটু দ্বিধার ভাব করিয়া কহিলাম, কেন বলুন তো ।

“উনি সামান্য উদ্ভার সহিত কহিলেন, বলার জন্যই আড়ালে নিয়ে যেতে চাইছি ।

“আমার বাড়িতে অনেক ফাঁকা ঘর আছে । সেখানে বসে কথা বললে হয় না ?

“উনি এবার সামান্য হাসিয়া বলিলেন, তাতে আমার আপত্তি নেই । কিন্তু আপনার মেয়ের বিয়ে, বাড়ি ভর্তি আত্মীয়স্বজন, সেই পরিস্থিতিতে বাড়িতে পুলিশ গেলে নানা কথা উঠতে পারে । ভেবে দেখুন ।

“ভাবিবার কিছু নাই । কথটা যুক্তিযুক্ত । লোকটিকে ভাল করিয়া দেখিলাম । আমি মানুষের মুখ দেখিয়া কিছুই অনুমান করিতে পারি না । আমার সেই ক্ষমতা নাই । কিন্তু এই লোকটির মুখে পুলিশসুলভ রূঢ়তা কিছু নাই । একধরনের ভদ্র বিচক্ষণতা ও গাভীর্য আছে । বুকটা একটু কাঁপিতেছিল । বিপ্লবী পুত্রের পিতা হওয়া বড় কম বিপজ্জনক তো নয় ।

“বলিলাম, চলুন ।

“লোকটি আমাকে ঝোপের আড়ালে একটা ফাঁকা জায়গায় লইয়া গেল । জায়গাটি নির্জন । মুখামুখি দাঁড়াইয়া কহিল, কোথায় গিয়েছিলেন ?

“বিপদের গন্ধ পাইলাম । টোক গিলিয়া কহিলাম, আমার মেয়ের বিয়ে । কত কাজ । একটু

কাজে গিয়েছিলাম।

“মিথ্যাবাদী হিসাবে আমি নিতান্তই অপটু। তাই গলায় আত্মবিশ্বাস বা দৃঢ়তা ফুটিল না। অনেকটা দয়াভিক্ষার সুর বাহির হইল।

“লোকটা আমার দিকে কিছুক্ষণ স্থির চোখে চাহিয়া থাকিয়া কহিল, আপনি কোথায় গিয়েছিলেন তা আমি জানি।

“জানেন? বলিয়া বেকুবের মতো চাহিয়া রহিলাম।

“উনি কহিলেন, কৃষ্ণকান্তকে আরেস্ট করা আমার পক্ষে শক্ত ছিল না। কিন্তু করিনি কেন জানেন?

“আমি মাথা নাড়িলাম, না।

“তিনি কহিলেন, একটি মাত্র কারণে। আপনার বাড়িতে একটা শুভ কাজে ব্যাঘাত ঘটতে চাইনি। কিন্তু আমি কৃষ্ণকান্তর গতিবিধি জানতে চাই। আপনি কি বলবেন?

“আমি ফাঁপরে পড়িলাম। কৃষ্ণ ধরা দিবে বলিয়াই রওনা হইয়াছে। কিন্তু এখানে নয়। আমি তাহার সেই পরিকল্পনা বানচাল করিব কেন? যদি এ লোকটা কৃষ্ণ ঢাকা পৌছাইবার আগেই তাহাকে গ্রেফতার করে? তাই কহিলাম, আমি জানি না। সে আমাকে কিছু বলেনি।

“লোকটা একটা দীর্ঘশ্বাস ফেলিয়া কহিল, সেটাই স্বাভাবিক। তবে সে বলে থাকলেও আপনি আমাকে কিছুতেই বলতেন না। তাই না?

“আমি নীরব রহিলাম।

“উনি ধীর স্বরে কহিলেন, ও যেখানে যেতে চায় যাক। আমার তাতে ক্ষতিবৃদ্ধি নেই। কিন্তু বিপদ কী জানেন? সর্বত্র কৃষ্ণের জন্য ফাঁদ পাতা আছে। হয় ধরা পড়বে, নয়তো মারা পড়বে। আমার এলাকা থেকে বেরিয়ে গেলেই যে পরিত্রাণ পাবে তা নয়।

“আমি কী বলিব! চুপ করিয়া রহিলাম।

“উনি গাঢ় স্বরে কহিলেন, ও কোথায় যাচ্ছে হৃদিশ দিলে ওর উপকারই হত।

“কী ভাবে?

আমি ওকে নিরাপদে সেখানে পৌঁছে দেওয়ার ব্যবস্থা করতাম।

“আমি একটা দীর্ঘশ্বাস ফেলিলাম। পুলিশকে বিশ্বাস নাই। ইহারা মিষ্ট কথায় নানা ছলে মানুষকে ভুলাইতে জানে। রামকান্ত রায়কেও দেখিয়াছি কখনো মিছরি কখনো ছুরি। তাই মাথা নাড়িয়া কহিলাম, আমি জানি না।

“লোকটা আর চাপাচাপি করিল না। শুধু কহিল, আপনার এবং আপনার বাড়ির সকলের ওপরেই পুলিশের নজর আছে। কাজেই একটু সাবধানে চলাফেরা করবেন। আর কৃষ্ণর সঙ্গে যদি যোগাযোগ হয় তবে তাকে বলবেন, কিছুতেই যেন দিদির বিয়ের সভায় উপস্থিত না থাকে।

“আমি মাথা নাড়িয়া সম্মতি জানাইলাম। গলার স্বর ফুটিতেছে না।

“লোকটি চলিয়া গেলে আমি ধীরে ধীরে বাড়ি ফিরিলাম। কুঞ্জবনের যে রক্তটি দিয়া নির্গত হইয়াছিলাম সেইটি দিয়াই প্রবেশ করিলাম। ঘরে আসিতেই উদ্ভিগ্ন মনু জিজ্ঞাসা করিল, দেখা হল?

তুমি সবই জানো তাই না?

না গো। তবে আন্দাজ করেছিলাম। কী বলল?

অনেক কথা। মনু, ফেরার সময় পুলিশের খপ্পরেও পড়েছি।

তারা কী বলল?

লোকটা ভাল না খারাপ বুঝলাম না। কৃষ্ণর খবর চাইছিল।

দিলে নাকি?

না। পাগল তো নই।

লোকটা কে ?

চিনি না ।

বেশ লম্বা ছিপছিপে চেহারা । নিচের ঠোঁটে কাটা দাগ !

“লোকটাকে ভাল করিয়া লক্ষ্যই করি নাই । এত ঘাবড়াইয়া গিয়েছিলাম যে, লক্ষ্য করিবার মতো মানসিক স্বেচ্ছ ছিল না । কিন্তু মনুর বিবরণ শুনিয়া মনে হইল, লোকটা ঐরূপই বটে । তাই কহিলাম, হ্যাঁ, চেন নাকি ?

ও মৃত্যুঞ্জয় । ওকে বললেও ভয় ছিল না ।

কেন ?

স্বদেশীদের প্রতি ওর একটু দয়ামায়া আছে ।

তা আমি কী করে জানব ?

না বলে ভালই করেছে । এবার কৃষ্ণের কথা একটু শুনি ।

“আনুপূর্বিক সবই তাহাকে বলিলাম । সে মন দিয়া ছলোছলো চোখ করিয়া শুনিল । তারপর দুটি হাত জোড় করিয়া কপালে ঠেকাইয়া কহিল, ধরা দিচ্ছে । ঠাকুর, দেখো ।

ঠাকুর দেখবেন বলেই আমার বিশ্বাস । যদি না দেখেন তো ভবিতব্য মনু ।

তোমাকে কেমন ফ্যাকাসে দেখাচ্ছে । শরীর ভাল তো !

ভালই । তবে বুকটা কাঁপছে, একটু ব্যথাও টের পাচ্ছি ।

শোও । চূপ করে একটু শুয়ে থাকো ।

না । অনেক কাজ ।

কাজ তো কী ? একটা শব্দ অসুখ বাঁধালে কাজটা করবে কে ? বুকের ব্যথা খুব ভাল কথা নয় । ডাক্তারকে খবর পাঠাই ।

লাগবে না মনু । ঠিক আছে, শুচ্ছি ।

“শুইলাম । আমার হৃদযন্ত্র যে ঠিকমতো কাজ করিতেছে না তাহা টের পাইতেছিলাম । কিন্তু শরীর লইয়া আজ আর আমার মাথাব্যথা নাই । আমি এখনো স্বপ্নবৎ একটি ঘোরের মধ্যে বিরাজ করিতেছি । কৃষ্ণর মুখানা চোখের সম্মুখে ভাসিতেছে । চোখে জল আসিল । বুক ফুলিয়া উঠিতে লাগিল । এত স্নেহ আমার কোথায় ছিল জানি না । আমার অন্য সন্তানদের কাহাকেও লইয়া আমার পিতৃহৃৎ এমন উথলিয়া উঠে নাই ।

“মনু মাথার কাছে বসিয়া কহিল, বৃকে একটু হাত বুলিয়ে দেবো ?

দাও ।

“মনু নরম হাতে আমার বুক স্পর্শ করিয়া কহিল, তোমাকে নিয়ে আমার অনেক সাধ ।

তাই নাকি ? সাধ কি বুড়োকে নিয়ে হয় ?

তুমি বুড়া হলে আমিও তো বুড়ি । বয়সটা তো কথা নয় । যতদিন বাঁচি ততদিনই তো জীবন । মরার আগে অবধি তো ছাড়াছাড়ি নেই ।

“একটা দীর্ঘশ্বাস ফেলিয়া কহিলাম, তা বটে । কিন্তু আমার কেবলই কেন মনে হয় বলো তো যে, আর বেঁচে থাকার কোনো মানেই হয় না ?

মানে হবে না কেন ?

কেবল মনে হয় যথেষ্ট বেশীদিন বেঁচে আছি । এবার বিদায় নেওয়াই ভাল । কে জানে কোথা থেকে আবার কোন দুঃখ বা আঘাত আসে ।

এই ভয় তো তোমার চিরকালের । কিন্তু ভয় পেলে চলবে কেন ? ভয়ের কিছু নেই । তুমি কৃষ্ণর কথা বড্ড বেশী ভাবো ।

ভাবি । না ভেবে পারি না ।

এবার আমাকেও একটু ভাবতে দাও । তোমার ভাবনার ভার নেবো বলেই না বউ হয়েছে ।  
ভাবনা কি ভাগ করা যায় মনু ?

ধরে নাও, মনু যখন ভাবছে তখন আমি একটু কম করে ভাবি না কেন । ওরকম মনে করলেই  
দেখবে দৃষ্টিভঙ্গি কমে যাচ্ছে ।

চেষ্টা করব ।

একবারটি ডাক্তার ডাকি ?

আবার ডাক্তার কেন ? তুমিই তো আমার ডাক্তার ।

তা বটে । কিন্তু সামনে একটা শুভ কাজ, অনেক খাটুনি । একটু দেখিয়ে রাখা ভাল ।

“চুপ করিয়া রহিলাম । মনু ডাক্তার ডাকিল । ডাক্তার আসিয়া বুক পরীক্ষা করিয়াই কহিল,  
করেছেন কী ?

কী হয়েছে ডাক্তার ?

প্রেশার ভীষণ বেড়েছে । একটু মোক্ষণ দরকার ।

মোক্ষণ ! বলো কী ?

“ডাক্তার আমাকে বিশেষ আমল না দিয়া তাহার আসুর্কিক চিকিৎসার আয়োজন করিতে লাগিল ।  
আমি ভয়ে কাঁটা হইয়া রহিলাম । ছেলে মেয়ে বউ নাতি-নাতনিরা আসিয়া ভীড় করিল । ডাক্তার  
ছুরি শানাইতে লাগিল ।

“শরীরটা যে আমার ভাল নাই, অপরিসীম ক্লান্তি ও দুর্বলতা যে আমাকে আছন্ন করিয়া  
ফেলিয়াছে তাহা টের পাইতেছিলাম । সারা শরীরে ঘাম, উত্তাপ । শ্বাস গরম । মাথা ঘুরিতেছে ।  
বারবার চোখে অন্ধকার দেখিতেছি ।

“মনু আমার ডান হাত শক্ত করিয়া ধরিল । ডাক্তার স্পিরিট দিয়া বাহুর উর্ধ্বদিকে একটা জায়গা  
ভাল করিয়া মুছিল । ছুরির আঘাত আমি টেরই পাইলাম না । শুধু শুনিতে পাইলাম একটী পাত্রে  
কলকল করিয়া রক্ত ঝরিয়া পড়িতেছে । কত রক্ত ঝরিল তাহা বলিতে পারিব না । হঠাৎ প্রগাঢ় এক  
নিদ্রাবেশ আসিল । আমি ঢলিয়া পড়িলাম ।

“ঘুম ভাঙিল সকালে । শরীর অতিশয় দুর্বল । পাশ ফিরিবার সাধ্য নাই । শিয়রে স্নানমুখী মনু  
উপবিষ্টা ।

আমি কেমন আছি মনু ?

ভাল আছে । শুয়ে থাকো, উঠো না ।

খুব ফাঁড়া গেল নাকি ?

গেল । ডাক্তার না ডাকলে কী যে হত ।

কী আর হত ।

খুব দুষ্ট হয়েছে । ডঙ্কা বাজিয়ে চলে যেতে সবাই পারে । সংসার দেখত কে ?

আমার সংসার আর কোথায় মনু ? তুমি ছাড়া আর কে আছে ?

আমি তো আছি । আমার প্রতি তোমার দায়িত্ব নেই ?

“হাসিলাম । কে কাহার দায়িত্ব লইয়াছে তাহা আমি ভাবিয়া পাই না । এতকাল তো মনুর উপর  
নির্ভর করিয়াই কাটিল, বাকী জীবনটাও সেই ভাবেই যাইবে বলিয়া অনুমান করি । আমি আর তাহার  
কী ভার লইব । হাতটা বাড়াইয়া তাহার হাতখানা মুঠা করিয়া ধরিলাম । কী যে এক ভরসা ও শান্তি  
অনুভব করিলাম তাহা বলিবার নয়, স্পর্শমাত্রই যেন মনটা নির্ভরতা, বিশ্বস্ততা ও আনুগত্যের অনুষ্ণ  
পাইয়া নাচিয়া উঠিল, আর কেহ না থাক, মনু আছে । মনু কাছে থাকিলে কিছুদিন বাঁচিয়া থাকা  
যায় ।

“মনু আর একটু ঘন হইয়া বসিয়া কহিল, সারা রাত ওই মুখখানা দেখে দেখে কেটে গেল ।

ভালবাসা কেমন হয় তা জানো ?

সারা রাত জেগে ছিলে ?

জাগব না ? এই তো আমার বাসর জাগা ।

জেগে থাকার দরকার ছিল কি ? আমি তো ঘুমোচ্ছিলাম ।

কাল ডাক্তার কত রক্ত বের করে ফেলল শরীর থেকে । ভয়ে মরি । বুকের ব্যথাটা কেমন ?  
টের পাচ্ছি না ।

শুয়ে থাকো । একদম উঠবে না । আমি বিছানাতেই তোমার সব করে দেবো ।

“আমি মাথা নাড়িয়া কহিলাম, শুয়ে থাকলে শয্যাকণ্টকী হয়ে যাবে মনু । আমার মেয়ের বিয়ে,  
তুলে যেও না ।

যাইনি । কিন্তু আমি আছি, ছেলেরা আছে, তোমার অত ভাবনার কী ?

“ভাবনা লইয়াই জগৎ, ভাবনার হাত হইতে নিষ্কৃতি কোথায় ? বলিলাম, আমাকে না হলেও  
চলে জানি । কিন্তু বড় অস্থির লাগে ।

আজকের দিনটা বিশ্রাম করো ।

“করিলাম । প্রাতঃকৃত্যাদির পর নির্জন ঘরে আবার ঘুমাইয়া পড়িলাম । আমার এই দীর্ঘ  
বিশ্রামটির যেন প্রয়োজন ছিল । বিকাল গেল । ঘুম হইতে জাগিয়া আবার ঘুমাইলাম । অজান্তে দিন  
কাটিল রাত কাটিল ।

“যখন বিছানা ছাড়িয়া উঠিলাম তখন সানাই পৌঁ ধরিয়াছে । মনু মদু হাসিয়া কহিল, এই তো  
ঝরঝরে লাগছে ।

“ম্নান হাসিলাম ।

“বিপদে পড়িলেই মানুষ চেনা যায়, এই সাবেকী কথাটি যে কত খাঁটি তাহার প্রমাণ আর একবার  
পাইলাম । বিশাখা ও শচীনের বিবাহ উপলক্ষে লোক জড়ো হইয়াছিল মন্দ না । আত্মীয় স্বজন কুটুম  
বয়স্য পরিচিত মিলাইয়া হাজার দেড়েক । তাহার উপর প্রজারা তো আছেই । আত্মীয় কুটুমদের  
কথাই বলি, যে-বিবাহ উপলক্ষে তাহারা আমন্ত্রিত সেই বিবাহ লইয়া কাহারো মাথাব্যথা নাই ।  
মাথাব্যথা যত আমাকে ও মনুকে লইয়া । সকলেই কেবল আমাদের কথা ফুস ফুস গুজ গুজ করে,  
টিপ্পনী কাটে, তামাশা করে, এমন ভাবে তাকাইয়া থাকে যেন আমরা দুটি চিড়িয়াখানার কিভূত  
জন্তু । জীবনে আমি কদাচ এরূপ পরিস্থিতির সম্মুখীন হই নাই । প্রবল অস্বস্তি বোধ করিতে  
লাগিলাম । সম্ভবত রক্তচাপ বাড়িল ।

“আমার তো সমস্যা একটি নহে । শ্লেষ বিদূষ সহ্য করিতে হইতেছে, পুত্রের জন্য দুশ্চিন্তা ভোগ  
করিতে হইতেছে, শরীরও বেচাল । মনু শুধু মাঝে মাঝে কানে কানে বলিয়া যায়, একটু সহ্য করো ।  
আর কটা দিন । আমরা তো চলেই যাবো ।

“বিবাহের দিন সকাল হইতেই ধুম লাগিয়াছে । আমি উপরের বারান্দায় একটি ইজিচেয়ারে  
বসিয়া সেই কর্মব্যস্ততা কিছু লক্ষ করিতেছি । মনু আছে । সে বহু যজ্ঞ সামলাইয়াছে, এটিও  
পারিবে । তাই দুশ্চিন্তা নাই । কিন্তু অস্বস্তি আছে । তাহাকে হয়তো অনেক কটুকাটব্য বিদূষ ও  
অপমান সহ্য করিতে হইতেছে । গহনার অধিকার সে ছাড়ে নাই । বিশাখাই সুনয়নীর অবশিষ্ট গহনা  
পাইয়াছে । ইহা এক স্থায়ী অশান্তির কারণ হইয়া রহিল । কৃষ্ণকে সর্বস্ব উইল করিয়া দিতেছি, ইহা  
জানাঙ্গনি হইলে অশান্তি চরমে উঠিবে ! কাশী গিয়াও পরিত্রাণ পাইব না ।

“বসিয়া বসিয়া এই সকল ভাবিয়া মনটা বিকল হইতেছিল । এক বয়স্কা আত্মীয় উপরে আসিয়া  
কহিলেন, ও হেম, কেউ তো কাজ করছে না । যে যার ঘরে বসে আছে । বলি বিয়েটা ওতরাবে কি  
করে ?

কী হয়েছে ?

জানি না বাপু, কী সব রাগবাগ হয়েছে সকলের । তোমার মেয়েরা বউমারা কেউ ঘর থেকে বেরোচ্ছে না । কাজকর্ম দেখিয়ে দেবে কে ?

কেন, মনু নেই ?

সে তো কালীবাড়ি পূজো দিতে গেছে । একা মানুষের সাধ্যও তো নয় । কত লোক এসে কত কিছুব খোঁজ করছে ।

মনু আসুক, আমি কী বলব ? কনককে খুঁজে দেখ । আজ সেই কন্যাকর্তা ।

কনক তো বিদ্বি করতে বসেছে । এ বেলা আর উঠতে পারবে না ।

“একটা দীর্ঘশ্বাস ফেলিলাম । স্পষ্টই অসহযোগ । কিন্তু আমার তো কিছু করিবার নাই । চোখ দুইটি মুদিয়া রহিলাম । কয়েক ফোঁটা অশ্রু গড়াইয়া পড়িল ।”

॥ ১০২ ॥

দরজা খুলে বৃদ্ধা স্নিগ্ধ ও প্রসন্ন মুখে বললেন, আয় । মনে পড়ল তাহলে ?

মনু ঠাকুমা, আমি তোমার কাছে কিছু কথা জানতে এসেছি ।

দরকার না হলে যে এই পোড়াকপালীকে তোদের মনে পড়ে না সে আমি জানি । আয় বোস এসে ।

বাইরের ঘরে নয়, ভিতরের দিকের চিক-ঢাকা বারান্দায় একটা মোড়ায় রঙ্গময়ীর মুখোমুখি বসল ধ্রুব । রঙ্গময়ীর বাঁ হাঁটুতে কঠিন বাত । উঠতে বসতে কষ্ট হয় । কষ্টেই বললেন, পুরোনো কথা জানতে এসেছিস তো !

তা বলতে পারো ।

আমার বাপু আজকাল মাথায় বুড়োমি ঢুকেছে । ভীমরতি না কী বলে । কিছু তেমন মনে থাকে না । যা জানতে চাস এইবেলা জেনে নে ।

সত্যি করে বলবে আমার পিতৃদেবতাটি কেমন লোক ?

কী কথার ছিরি ছেলের ! আবার বেঁধেছে নাকি তোদের বাপ-ব্যাটায় ?

বাঁধলে বাঁধতেও পারে ।

বাঁধলে যদি বাঁধতেই পারে তো গিয়ে ধুকুমার লাগিয়ে দে না সোরাব-রুস্তমের কাণ্ড । আমার কাছে এসেছিস কেন ?

তোমার কাছে কিছু পয়েন্ট নিতে এসেছি । ঝগড়া করতেও তো কিছু পয়েন্ট লাগে ! তুমি যে টোপলা নিয়ে বসে আছো ।

কিসের টোপলা রে বদমাশ ?

পুরোনো কথার । তুমি ছাড়া আর তো কেউ জানে না ।

সে সব জেনে গিয়ে বাপের সঙ্গে লাগবি ?

ধ্রুব একটু হাসল, আমার যে জানা দরকার ঠাকুমা ।

পুরোনো কথা অনেক শুনেছিস । আর শুনে ডানা গজাবে না ।

তবু বলো । আমার একটা কথাই জানা দরকার । কৃষ্ণকান্ত কেমন লোক ।

সেও তোকে অনেকবার বলেছি । কৃষ্ণর মতো মানুষ হয় না ।

এই যে তোমরা বলো এতে আমার ভীষণ অবাক লাগে । কৃষ্ণকান্ত যদি এতই ভাল তবে আমি কেন লোকটাকে শ্রদ্ধা করতে পারিনি ? কেন লোকটাকে আমার ভণ্ড আর দান্তিক বলে মনে হয় ?

ছিঃ ধুব । ওসব কথা মুখে বা মনে আনাই পাপ । কৃষ্ণ যদি ভণ্ড তবে দেশে আর খাঁটি লোক একটাও নেই ।

কেন ঠাকুমা, সেটাই বুঝিয়ে বলো ।

আগে বল তোদের বাপে ব্যাটায় হয়েছোটা কী ?

ধুব একটা দীর্ঘশ্বাস ছেড়ে বলে, নতুন করে কিছু হয়নি, ভয় নেই । যা হয়ে আসছে তারই জের চলছে । বাইরে আমাদের ঝগড়া বা অশান্তি কিছুই নেই । হয়তো তোমার কৃষ্ণর মনেও কিছু নেই । শুধু আমার ভিতরেই লোকটা সম্পর্কে যত সন্দেহ ।

রঙ্গময়ী একটা দীর্ঘশ্বাস ফেলে বললেন, সেইসব দিনে যদি তুই থাকতি, দেখতি কৃষ্ণ কেমন মানুষ । ওইটুকু বাচ্চা ছেলে যেন দেশ কাঁপিয়ে দেওয়ার শক্তি রাখে । রামকান্ত রায়কে খুন করে পাবনায় পালিয়ে গিয়েছিল । ঢাকায় গিয়ে ধরা দিল । তাকে দেখতে গাঁ গঞ্জ ভেঙে পড়েছিল সেখানে ।

সেসব শুনেছি । দিল্লীতে নিয়ে গিয়েছিল । ফাঁসি হওয়ার কথা ছিল, কিন্তু পাবনার আশ্রম থেকে লোক গিয়ে কী সব কলকাঠি নেড়ে তাকে ছাড়িয়ে আনে ।

রঙ্গময়ী মাথা নেড়ে বললেন, ছোট্ট করে বললি, কথাটা ফুরিয়ে গেল । কিন্তু সেদিন কী উত্তেজনা, কী তোলপাড় । তোর দাদু বোধহয় তিন দিন তিন রাত জলস্পর্শ করেনি, ঘুমোয়নি ।

লোকটা যে হীরো ছিল তা তো আমি অস্বীকার করছি না । কিন্তু হীরোর মুখোশ আঁটা মানুষটার ভিতরের কথা জানতে চাই ।

রঙ্গময়ী মাথা নেড়ে বললেন, কৃষ্ণর ভিতর-বার আলাদা ছিল না কখনো, ও তো তোদের যুগের মানুষ নয়, তোদের দলেরও নয় ।

আমরা কি খুব খারাপ ঠাকুমা ?

তোর খারাপ হওয়ার কথা তো নয় দাদু । খারাপ হবি কেন ? কৃষ্ণ যার বাপ সে কি খুব খারাপ হতে পারে কখনো ? তবে তোকে যে ভূতে পেয়েছে সে কথাও সত্যি । নইলে ওসব ছাইপাঁশ গিলে মাতলামি করে বেড়াতে পারিস কখনো ?

তুমি জানো না, আমি কিন্তু ছেড়ে দিয়েছি ।

সব জানি । ছেড়ে দিলি ভাল কথা, কিন্তু ধরেছিলি কেন ? কোন দেবদাস রে তুই ?

ধুব একটু হাসল । কিছু বলল না ।

রঙ্গময়ী বললেন, যদি ইচ্ছে ছিল না তবে মদ খেতি কেন ? সেইজন্যই তো বলি তোদের ভিতর-বার এক নয় । তোরা কোন সাহসে কৃষ্ণর বিচার করিস ?

নাঃ ঠাকুমা, তুমিও হিপনোটাইজড ।

কৃষ্ণর কথাই শুনতে এসেছিস তো ! শোন বলি, সে ভাবের মানুষ ছিল না, অলস চিন্তা করে সময় কাটানোর মানুষ ছিল না । সে সারাজীবন কাজ করেছে । জেল থেকে বেরিয়েই ঝাঁপিয়ে পড়েছে কাজে । ফের জেলে গেছে । বন্দী অবস্থাতেও সংগঠন করেছে । কত বদমাশ, পাজি, গুণ্ডা, চোর, ডাকাতকে স্বদেশী করে তুলেছে । প্রাণ হাতে করে চলতে হয়েছে তাকে । তোদের মতো বাবুগিরি করে সময় তো কাটায়নি ।

দেশ স্বাধীন হওয়ার পর তোমার কৃষ্ণর চরিত্র তাহলে পালটাল কেন ?

কে বলেছে পালটাল ? তোরা তাকে বুঝতেই পারলি না বলে ওসব কথা বলিস । মন্ত্রী হয়েছিল বলে ওরই যেন সব দোষ । আমি তো বলি বাপু, কৃষ্ণর যা পাওনা ছিল তা দেশ ওকে দেয়নি । তোরা সেদিনের ছোঁড়া ওসব বুঝবি না । যা, গিয়ে মানুষটার পায়ের ওপর পড়ে থাক ।

বলছো ?

বলছি কি সাথে ? বলাজ্জিস বলে বলছি । ওর সম্পর্কে কেউ আকথা কু-কথা বললে তার জন্যই

আমার দুঃখ হয়। আহা বেচারী তো জানে না।

শোনো ঠাকুমা, আমি কৃষ্ণকান্তর মুখে কালি মাখাতে চাই না। সত্যিই চাই না।

তবে কী চাস?

ঠিক তোমরা যে চোখে লোকটাকে দেখ সেই চোখেই দেখতে চাই। কিছুতেই সেটা পারছি না। আমারও ইচ্ছে হয় লোকটাকে শ্রদ্ধা করতে, ভালবাসতে। পারি না। কেন পারি না বলো তো!

সেটা তুই বোঝ গিয়ে। আমাকে জ্বালাস না।

তোমার নাতবউ রেমিও অসম্ভব ভালবাসে স্বশুরকে। নিজের বাপের চেয়েও বেশি। আমি অনেক বলেও টলাতে পারিনি।

তবেই বুঝে দেখ কৃষ্ণ কেমন মানুষ।

ধুব মাথা নেড়ে বলল, তুমি বা রেমি বা আর সবাই লোকটার কেবল একটি দিক দেখতে পাও, দিকটা আলোকিত। কিন্তু ওঁর একটা অন্ধকার দিকও তো আছে। তোমরা সেটা দেখতে পাও না কেন?

কৃষ্ণর নামটাই কৃষ্ণ। তাছাড়া ওর মধ্যে আর কোনো অন্ধকার নেই। চিরকাল লোকে ওকে ঠিকিয়েছে, ন্যায্য পাওনা দেয়নি, কলঙ্ক রটিয়েছে। কৃষ্ণ নির্বিকার। ভোগসুখ বলে ওর জীবনে কিছু নেই। কাশীতে গিয়ে আমার কাছে যখন ছিল তখন ভালমন্দ রেঁধে খাওয়াতে গেলে খুব বকত। বলত, দেশের লোক যতদিন....

আঃ ঠাকুমা, তোমার ঝাঁপ খুললে বন্ধ করা বড় মুশকিল।

তাহলে খোলাস কেন? বোস, চা করে আনি। মুখখানা তো শুকিয়ে আমের আঁটি হয়েছে দেখছি।

চা দাও।

আর কী খাবি?

যা দেবে।

রঙ্গময়ী কষ্টে উঠলেন। চা আর জলখাবার নিয়ে এসে ফের বসে বললেন, কী যে তোর হয় মাঝে মাঝে বুঝি না। বাপ যার অমন পিতৃভক্ত তার ছেলের এ দশা কেন হয়?

ধুব আন্তে আন্তে আনমনে খাচ্ছিল। জবাব দিল না। খাওয়া শেষ করে বলল, একটা কথা ঠাকুমা।

বল না।

অনেক ভেবেচিন্তে মনে হচ্ছে, আমারই কোথাও একটা ভুল হয়ে থাকবে, দোষ কৃষ্ণকান্তর নয়, আমার।

তাদের কারোই দোষ নয় দাদু। মনটাকে পরিষ্কার কর, বুঝতে পারবি। কৃষ্ণ কখনো দশজনেরটা মেরে নিজের ঘর গোছায়নি। বরং নিজেরটা দিয়ে দশজনকে খুশি করতে চেয়েছে। আমার তো মনে হয় কৃষ্ণর আর একটু স্বার্থপর হওয়া উচিত ছিল। তাতে ভাল হত।

ধুব বসে রইল চুপ করে। তারপর হঠাৎ জিজ্ঞেস করল, ঠাকুমা, নোটন এ বাড়িতে আসে? নোটন! কেন বল তো!

বলোই না।

রঙ্গময়ীর মুখে ভ্রুকুটি দেখা দিল। মাথা নেড়ে বললেন, নোটনের অত সাহস নেই।

তুমি কি তাকে ঘেন্না করো?

ঘেন্নার কাজ করে বেড়ালে তো ঘেন্না করাই উচিত।

তুমি কি জানো নোটনের সঙ্গে আমার বিয়ের প্রস্তাব উঠেছিল বলে....?

রঙ্গময়ী ধমক দিয়ে বললেন, সব জানি। পাপ।



তার মানে ?

নোটনের সঙ্গে তোর বিয়ে হয় নাকি ? আত্মীয়তায় আটকায় না ?

লতায় পাতায় আত্মীয় । সেকথা বলছি না । বলছিলাম বিয়ের প্রস্তাব উঠেছিল বলে তার দাদাকে কৃষ্ণকান্ত কী করেছিলেন জানো ? লোকটার আজও কোনো খোঁজ নেই ।

বললাম তো, সব জানি । কৃষ্ণ নিজে এসে জানিয়ে গেছে । ঠিক করেছে ।

দোষটা কী বলো তো !

বিয়ের প্রস্তাব তোলাই দোষের ।

নোটন যে জীবন যাপন করে তার জন্য কি সে দায়ী ? না দায়ী কৃষ্ণকান্ত ?

রঙ্গময়ী বার্ষিক্যের তেজহীন দুই চক্ষু যথাসম্ভব তীক্ষ্ণ করে ধুবর দিকে চেয়ে বললেন, নোটনকে নিয়ে তোকে ভাবতে হবে না । সে তার কর্মফল ঠিক ভোগ করবে ।

ধুব ধীরে ধীরে উঠল । তারপর বলল, তুমি নোটনকে যত ঘেন্না করো কৃষ্ণকান্ত ততটা করেন না । তিনি নোটনকে...

ধুব মাঝপথে থামতেই রঙ্গময়ী ব্যঙ্গের স্বরে বললেন, তিনি নোটনকে...বল, বল না, থামলি কেন ?

ধুব মাথা নেড়ে বলল, তোমাকে বলা যাবে না । কিন্তু শুনে রাখো, তিনি নোটনকে আমার পিছনেও লেলিয়ে দিয়েছেন ।

রঙ্গময়ী অত্যন্ত প্রত্যয়ের সঙ্গে বললেন, তাই যদি হয় তবে জেনে রাখ, ওর মধ্যেও কিছু মঙ্গল আছে ।

নোটন না তোমার নাতনী ? আত্মীয় ?

বটেই তো । এমন আত্মীয় যে পরিচয় দিতে ঘেন্না হয় । এখন বল তো ঘটনাটা কী ? নোটন তোকে পেল কোথায় ?

আর একদিন ঠাকুমা । আজ চলি ।

না বললে বলিস না । কিন্তু নোটনের মুখ থেকে কথা আমি টেনে বার করবই ।

ধুব ম্লান হেসে বলে, তোমাদের নিয়ে পারা যাবে না ঠাকুমা, কিছুতেই পারা যাবে না । যত দিন যাচ্ছে তত মনে হচ্ছে দিস ওয়ার্ল্ড বিলংস টু কৃষ্ণকান্ত, ওনলি কৃষ্ণকান্ত । আমরা তোমাদের কাছে ফাউ, ফালতু । আজ চলি ঠাকুমা, আবার আসব ।

ধুব বাড়ি ফিরল একটু গাড় রাতে । ঘড়িতে বোধ হয় দশটা । ফটকের ধারেই দাঁড়িয়ে ছিল জগা । নিঃশব্দ স্বাপদের মতো । বলল, এই ফিরলে ?

ফিরলাম কিছু বলবে জগাদা ?

একটু ওপরে যাও । কর্তাবাবু তোমার জন্য বসে আছেন ।

হঠাৎ কী ব্যাপার ?

কি করে বলব ? আমরা চাকরবাকর মানুষ ।

চাকর বলে চিনতে পারছো নিজেকে এতদিনে ?

বরাবরই চিনি ।

চিনলে অনেকদিন আগেই নিজের ভিতরের চাকরটাকে নিকেশ করে কৃষ্ণকান্তর ভাঁবেদারি ছেড়ে চলে যেতে । তুমি যে চাকর, তোমাকে যে চাকর করে রাখা হয়েছে সেটা বুঝতেই পারোনি ।

বুঝলাম । এখন ওপরে যাও । কর্তাবাবু তোমার জন্যই বসে আছেন । সকালের প্লেনে দিল্লি যাবেন । তাড়াতাড়ি ঘুমোনা দরকার । যাও ।

ধুব ধীর পায়ে ওপরে উঠে কৃষ্ণকান্তর অফিসঘরে উঁকি দিল । কৃষ্ণকান্ত একখানা বই

পড়ছিলেন। চোখ তুলে তাকালেন।

কিছু বলবেন আমাকে ?

কৃষ্ণকান্ত স্মিত মুখে বললেন, এসো, ভিতরে এসো।

ধুব খুব বিস্মিত পায়ে ঢুকল।

বোসো, বোসো।

ধুব বসল।

কাল সকালে আমাকে একবার দিল্লি যেতে হচ্ছে।

জগাদা বলছিল।

ফিরব কবে তার ঠিক নেই। তারপর...

ধুব অপেক্ষা করতে লাগল। কৃষ্ণকান্ত বেশ কিছুক্ষণ থেমে ভূঁচকে চেয়ে রইলেন। তারপর বললেন, অনেক কাজ।

কাজ ! ধুব প্রতিধ্বনি করল মাত্র। কৃষ্ণকান্তর কথাবার্তা তার বেশ অসংলগ্ন লাগছিল।

কৃষ্ণকান্ত স্বগতোক্তি মতো করে বললেন, ছেলে দুটো বাইরে রয়ে গেল। লতুটার কথাও ভাবা দরকার।

ধুব একটু ধৈর্যহীন গলায় বলে, আমাকে কি কিছু করতে হবে ?

কৃষ্ণকান্ত মাথা নেড়ে বললেন, সেইজন্যই ডাকা।

বলুন কী করতে হবে।

তোমার দাদা আর ভাইয়ের একটু খোঁজ নাও। ওদের চিঠিপত্র অনেককাল পাই না।

দাদাকে তো আপনি ত্যাজ্যপুত্র করেছেন।

আমার ত্যাজ্যপুত্র হলেও সে তোমার ত্যাজ্য ভাই তো নয়।

ঠিক আছে। খবর নেবো। লতুর কথা কী বলছিলেন ?

লতুর বিয়ে দেওয়া দরকার।

ও। সে ক্ষেত্রেই বা আমার করণীয় কী ?

করণীয় অনেক। যদি করো।

পাত্র দেখা তো !

হ্যাঁ। উপযুক্ত ঘর বর চাই। কাজটা সহজ নয়।

দেখব। আর কিছু ?

আপাতত তোমাকে নাসিক যেতে হবে না।

প্রোগ্রামটা কি ক্যানসেল হল ?

হল। ভেবে দেখলাম এসময়ে তোমাকে নাসিক পাঠালে এদিকে অসুবিধে দেখা দেবে। দিবা এখনও ছোটো। তাকে নিয়ে বউমা অত দূরে যেতে পারবে না।

এখানে থেকে আমি কী করব ?

সেটা তোমার ওপর নির্ভর করছে।

তার মানে ?

তুমি একটা চাকরি করছো শুনেছি। চাকরি জিনিসটা আমার পছন্দ নয়। একটু বাঁধা কাজ, একটু বাঁধা মাইনে, ওতে মানুষ ক্ষুদ্র হয়ে যায়, খণ্ডিত হয়ে যায়, জীবনের স্বাদ পায় না। আমি কেমন চাই জানো ? কাজ অফুরন্ত, আয় অফুরন্ত, আয়ু অফুরন্ত। ইংরিজীতে একটা কৃপণ-কথা আছে, কাট ইস্তর কোট অ্যাকর্ডিং টু ইয়োর ক্লথ। আর ঠাকুর ঠিক উপ্টো করে বলতেন, কাট দি ক্লথ অ্যাকর্ডিং টু ইওর কোট।

আমি ঠিক বুঝতে পারলাম না।

বোঝা সহজও নয়। যাক গে, সবটাই তোমার ওপর নির্ভর করে। তুমি চাইলে চাকরিই করবে, আমার সাজেশন যদি নাও তো বলব, ব্যবসা কর। একটা কোনো প্রোডাকশনে নামো। তাতে এমপ্লয়ী না থেকে নিজেই এমপ্লয়ার হতে পারবে।

ভেবে দেখব।

দেখ। আর একটা কথা।

বলুন।

বউমা খুব কান্নাকাটি করেছে আজ।

কেন?

তোমার জন্য।

আমার জন্য?

হ্যাঁ। প্রথমে আমাকে বলতে চায়নি। কিন্তু শেষ অবধি একটু বলেছে। তোমার নাকি একটা ডেথ উইশ হয়েছে আজকাল।

ধুব চোখ নামিয়ে নিচের চোঁট কামড়াল। তারপর বলল, ওটা কিছু নয়।

কৃষ্ণকান্ত একটা দীর্ঘশ্বাস ছেড়ে বললেন, তাহলেই মঙ্গল। বাবা হয়েছে দায়িত্বও অনেক। মরলেই মরা যায় বটে, কিন্তু সেটা প্রকৃতির আইন নয়, জৈবিক চাহিদাও নয়। বাবা পিতামহের কাছ থেকে পাওয়া এই জীবন যতটা সম্ভব প্রলম্বিত করাই হচ্ছে জৈবিক আকৃতি। বউমা আমার কাছে কথটা ভেঙেছে বলে তাকে আবার বকো না, সে বড় নরম মানুষ। পাজি হলে চেপে রাখতে পারত।

আজ্ঞে।

সে তোমার অতিশয় অনুগত। নিশ্চয়ই সেটা টের পাও?

ও সব কথা থাক।

আচ্ছা থাক, যে কথটা বলছিলাম। কাল দিল্লি যাচ্ছি বিশেষ একটা কাজে। খুব ব্যস্ত থাকব। হয়তো আমার চিঠিপত্র পাবে না। ফিরতেও দেরি হবে। সেক্ষেত্রে তোমাকে কিছু দায়িত্ব নিতে বললে অসম্মত হবে না তো!

ধুব এবার কৃষ্ণকান্তর দিকে তাকিয়ে ব্যাপারটা আঁচ করতে চেষ্টা করল। কৃষ্ণকান্তকে বেশ প্রশান্ত, পরিতৃপ্ত ও উজ্জ্বল দেখাচ্ছে। দিল্লিতে একটা বড় রকমের অফার আছে নিশ্চয়ই। কেন্দ্রীয় মন্ত্রিত্ব নাকি? সেটাই সম্ভব। প্রধানমন্ত্রী এবং হাই কম্যান্ডের সঙ্গে সম্ভবত একটা আঁতাত হয়েছে।

ধুব বলল, অসম্মত হব কেন?

জগা রইল, অন্য সবাই রইল। বউমা তো আছেই।

ঠিক আছে।

এখনই উঠো না। একটু বসো।

ধুব অপেক্ষা করল। কৃষ্ণকান্ত তাঁর দেৱাজের চাবি বাড়িয়ে দিয়ে বললেন, এটা রাখো। নিচের দেৱাজে আরও কিছু চাবি পাবে। আলমারি, সিন্দুক এই সবের।

এগুলো আমাকে দিচ্ছেন কেন?

যদি দরকার হয়?

আপনার সব জিনিস, আমি হাত দিতে যাব কেন?

হাত দেওয়ার কথা বলিনি। চাবি নিয়ে ঘুরে বেড়ানোর কোন মানে হয় না বলে তোমাকে দিয়ে যাচ্ছি। রাখো।

অনিচ্ছের সঙ্গে ধুব হাত পেতে চাবি নিয়ে বলে, আর কিছু বলবেন?

হ্যাঁ। এনিমি প্রপাটির কিছু টাকা পেয়েছি। সেটা ক্যাশ করে আলমারিতে রাখা আছে। যদি

কোন ব্যবসার কথা ভাবো তাহলে নিও । আমার অনুমতি দেওয়া রইল ।

সে টাকা নিয়ে আত্মীয়দের কি সব ঝামেলা চলছে না ?

এখন আর নেই । ঝামেলা হলেও গ্রাহ্য করো না । টাকা আমার । ওরা প্রাপ্যের অনেক বেশি আমার কাছ থেকে পেয়ে এসেছে ।

ঝামেলা আমার ভাল লাগে না ।

কৃষ্ণকান্ত একটু হেসে বললেন, এ ব্যাপারে আমি আর কিছু বলতে চাই না । তবে তোমার যদি ইচ্ছে করে তাহলে আত্মীয়দের ওই টাকা থেকে কিছু ভাগ দিতেও পারো । তাতে তোমার সুনামই বৃদ্ধি পাবে ।

আমার সুনাম নেই ।

আমারও বোধহয় নেই । তবে সৎকাজ করে গেলে একদিন না চাইতেও সুনাম হয়ে যায় । প্রসঙ্গটা থাক । মোট কথা যা ভাল বুঝবে করবে । আমি দূরে যাচ্ছি, সেখানেই থাকতে হবে আপাতত । নিজের বুদ্ধি বিবেচনা খাটিয়ে চলো ।

আচ্ছা ।

এবার যাও । বিশ্রাম করো ।

ধুব উঠল । ঘরে আসবার পথে সে ভারী অনামনস্ক রইল । কৃষ্ণকান্ত কি সত্যিই কেন্দ্রীয় মন্ত্রী হচ্ছেন ?

॥ ১০৩ ॥

“বিশাখার বিবাহই বোধহয় আমার জীবনের শেষ শুভ কাজ । কারণ, আমার কনিষ্ঠ পুত্র কৃষ্ণকান্তের বিবাহ আমি দিয়া যাইতে পারিব বলিয়া ভরসা করি না । স্বদেশী ও সন্ন্যাসী কৃষ্ণকান্ত আপাতত ঢাকার পথে । সেখানে সে আত্মসমর্পণ করিবার পর কী হইবে তাহা ঠাকুর জানেন । ফাঁসী যদি নাও হয় যাবজ্জীবন দ্বীপান্তর কি ঠেকানো যাইবে ? লক্ষণ দেখিয়া বুঝিতেছি, তাহাকে বেশ কিছুদিন হাজতবাস করিতে হইবে । সে গেল এক কথা । তাহার উপর পুত্রের মতিগতি দেখিয়া বুঝিতেছি, সংসারধর্ম পালন করিবার বিন্দুমাত্র আগ্রহ তাহার নাই এবং অদূর ভবিষ্যতে হইবেও না । আমার আয়ুর বেষ্টনী দিয়া আমি আর তাহার জন্য বিশেষ কিছু করিতে পারিব বলিয়া মনে হয় না । তাই ধরিয়া লইয়াছি, বিশাখার বিবাহই আমার জীবনের শেষ শুভ কাজ । কাজটি নির্বিন্দে সমাধা হয়, ইহাই আমার ইচ্ছা ।

“এই কাজে বাধা পড়িলে মর্মস্পীড়ার কারণ হইতেই পারে । আমার প্রতি পুত্র কন্যা ও পুত্রবধূদের বিরাগের ভাবটি তাহারা গোপন রাখে নাই, স্পষ্ট ভাবেই প্রকাশ করিয়াছে । মনুর প্রতি আমার গোচরে ও অগোচরে আরো কত লাঞ্ছনা বর্ষিত হইতেছে তাহা জানি না । মনুও আমাকে খুলিয়া বলিবে না । কিন্তু সংসারের বন্ধ জলাশয়ে সফরীর ন্যায় ক্ষণ ও ক্ষুদ্রজীবী এইসব আত্মীয়েরা যে আমার সত্তা, আমারই শোণিত ধারণ করিয়া আছে তাহা ভাবিলে নিজের প্রতিই মিত্কার দিতে ইচ্ছা করে । আমি অপরাধ যদি বা করিয়া থাকি তাহার দণ্ড বিশাখাকে পাইতে হইবে কেন ?

“অপটু শরীর লইয়াই উঠিলাম । ঘুরিয়া ঘুরিয়া বিবাহের আয়োজন দেখিতে লাগিলাম । পূর্বের চণ্ডা বারান্দায় কনককান্তি পুরোহিতের সামনে বসিয়া বৃদ্ধিশ্রদ্ধ করিতেছে । নিচের উঠানে জেলেরা মস্ত মস্ত মাছ আনিয়া ধড়াস ধড়াস করিয়া ফেলিতেছে । বিশাল আকৃতির ঝকঝকে ঝাঁটতে তাহা চোখের পলকে খণ্ড বিখণ্ড হইয়া ঝুড়িতে জ্বপাকৃতি হইতেছে । উঠানে, বাহিরের মাঠে শামিয়ানা টাঙানোর শেষ পর্ব চলিতেছে । ফটকের উপর নহবৎখানায় সানাই বাজিয়া চলিয়াছে । বাহির হইতে

দেখিলে কোনো গণ্ডগোল নাই, সবই সুশৃংখল ভাবে চলিতেছে। এস্টেটের পুরাতন ও বিশ্বস্ত কর্মচারিরা বুক দিয়া খাটিতেছে এবং তত্ত্বাবধান করিতেছে। গরুর গাড়ি করিয়া কত যে জিনিস এখনো আসিতেছে তাহা হিসাব করিতে পারি না। তবু এইসব আয়োজনের আড়ালে একটি উলটা ধারাত্রোতও বহিতেছে। স্ত্রী-আচার হইতেছে না, বা প্রতিবেশিনী কতিপয় স্ত্রীলোকের উদ্যোগে ক্ষীণভাবে হইতেছে। উল্ধবনি শোনা যায় না। গাত্র-হরিদ্রার উদ্যোগ নাই। বিশাখা সম্ভবত একা ঘরে বসিয়া অশ্রুবিসর্জন করিতেছে। মনুর মাকে ছোট্টাছুটি করিতে দেখিলাম, কিন্তু সে মনুর মা বলিয়াই মহা অপরাধী। তাহাকে কে আমল দিবে ?

“জীমূত কোথায় গিয়াছে জানি না। হয় কাজেই কোথাও গিয়াছে বা কাজের নাম করিয়া গা-ঢাকা দিয়াছে। জামাই বাবাজীবনদেরও পাত্তা নাই।

“হতাশভাবে কাছারির বারান্দায় দুর্বল শরীরে বসিয়া পড়িলাম। একজন বৃদ্ধ কর্মচারী শশব্যস্তে আগাইয়া আসিয়া কহিল, কতবাবু, একখানা চেয়ার বের করে দিই।

“মাথা নাড়িয়া কহিলাম, চেয়ারের দরকার নাই। শোন, আমার বাড়িতে এয়ার কান্ড করার লোক নেই। আমি চাই, এস্টেটের কর্মচারীরা প্রত্যেকেই নিজের স্ত্রী, মা এবং বয়স্কা অস্বীয়ারদের এখনই নিয়ে আসুক। এটা আমার দায় বলে জেনো। এ দায় উদ্ধার করতেই হবে।

“সে ব্যস্ত হইয়া উঠিল, কহিল, যে আজ্ঞে।

“আমি আবার কহিলাম, বেশি দেরী যেন না হয়।

“সে অনুগতের মতো মাথা নাড়িয়া কহিল, যে আজ্ঞে।

“সে চলিয়া গেল। আমি ক্লান্তভাবে বসিয়া রইলাম। এয়ার অভাব হইবে না, কিন্তু তবু মন শান্ত হইতেছে না। পাড়া প্রতিবেশী দিয়া কি সব কাজ হয় ?

“ক্লান্তির ভার লইয়াই উঠিলাম। অন্দরমহলে এক দাসীকে দিয়া আমার জ্যেষ্ঠা কন্যা সবিতার কাছে এণ্ডোলা পাঠাইয়া নিজের ঘরে বসিয়া অপেক্ষা করিতে লাগিলাম।

“থমথমে মুখ লইয়া সবিতা আসিল। চক্ষু নত রাখিয়া বলিল, ডেকেছেন

“হ্যাঁ। তোমরা সব কী করছ ? এত বড় আয়োজন, একটু দেখাশোনা করার লোক নেই।

আমরা তো দেখাশোনা করতেই চাই। কিন্তু মানমর্যাদা বলেও তো একটা কথা আছে।

তার অর্থ কী ? তোমাদের মানমর্যাদার হানি হল কিসে ?

আপনি অসুস্থ ছিলেন তাই জানেন না। আমরা এসে অবধি দেখছি এ বাড়িতে একজনেরই আধিপত্য। আমরা যেন কেউ কিছুই নই।

সেই একজন কি মনু ?

পুরুতের মেয়েকে আঙ্কারা দিয়ে আপনি মাথায় তুলেছেন। চিরকাল আমাদের ঐটোপাত কুড়িয়ে ওদের সংসার চলেছে। কাঙালকে শাকের ক্ষেত দেখালে যা হয়।

সে কি তোমাদের কোনো ঐমর্যাদা করেছে ?

অনবরতই করছে। আপনি তাকে ঘরে স্থান দিয়েছেন শুনেছি, কিন্তু সে কোন অধিকারে ঘরে ঢোকে, তা আমাদের জানা নেই।

অধিকার তার একটু আছে।

আমরা তা কী করে জানব ? আপনি তাকে বিয়ে করেছেন বলে সে শতমুখ করে লোকের কাছে বলে বেড়াচ্ছে। কিন্তু বিয়ের কোনো সাক্ষী নেই, নিমন্ত্রণপত্র নেই, শহরের লোকেও বিয়ের খবর কেউ রাখে না। সুতরাং লোকে যা খুশি তা বলেও বেড়াচ্ছে। পাঁচজনের কাছে আমরা মুখ দেখাতে পারছি না।

তোমরা কি এখানে আসবার আগে খবর পাওনি ?

আপনি কি আমাদের জানিয়েছেন ?

জানাইনি ঠিকই, তবে—

আপনি একজন নষ্টচরিত্রের মেয়েমানুষকে ঘরে ঠাই দেবেন জানলে আমরা বিশাখার বিয়েতে আসতাম না। আপনার জামাইরাও অত্যন্ত লজ্জায় পড়েছেন।

“নিজেকেই কহিলাম, ধীরে রজনী ধীরে। উত্তেজিত হইয়া লাভ নাই, ক্রুদ্ধ হইলে ব্যাপার আরো বহুদূরে গড়াইবে। কিন্তু বাহিরে ক্রোধ বা উত্তেজনা প্রকাশ পাইতে না দিলেও আমার ভিতরে ঝড় বহিতেছিল। বৃকে আবার চাপ ও মৃদু বেদনা অনুভব করিতেছি। সম্মুখে দাঁড়াইয়া আমারই তো কন্যা, ইহার শিরায় আমারই রক্ত প্রবহমান। এত কঠিন কথা ইহার মুখ হইতে বাহির হইল কিরূপে ?

“মৃদুস্বরে কহিলাম, তোমার কথার জবাব দেওয়ার সাধ্য আমার নেই। তবে মনুকে নিয়ে তোমরা আন্দোলন করো না। তাকে আমি অগ্নি ও শালগ্রাম সাংক্ষী রেখেই বিয়ে করেছি। কিন্তু তার বিচার পরে হতে পারবে। বিশাখার বিয়ে তো আর ফিরে আসবে না।

আমাদের আপনি কী করতে বলেন

ব্যাপার-বাড়িতে কত কাজ !

বললাম তো, কাজ করতে আমাদের কেউ ডাকেনি। আপনার মনুই যখন সব দিক সামলাচ্ছে, তখন আমাদের আর কিসের দরকার ?

বউমাদেরও কি তাই মত ?

জানি না। আপনি তাদের ডেকে জিজ্ঞেস করতে পারেন। তবে আমি আজই স্বশুরবাড়ি রওনা হয়ে যাচ্ছি। সেখানেও এসব কেলঙ্কারির কথা পৌঁছবে। কি করে যে স্বশুর শাশুড়ির কাছে মুখ দেখাব তা জানি না।

বিশাখার মুখের দিকে চেয়েও আজকের দিনটা থাকতে পারবে না ?

কারো মুখের দিকে চাইতেই আর প্রবৃত্তি নেই। এ বাড়িতে পা দেওয়াই পাপ। বংশের মুখে এমন চুনকালি পড়বে তা জানতাম না।

“আজ আমি আর সেই হেমকান্ত নাই যে অল্প আঘাতেই আহত হইবে ! নানা দাগা খাইয়া পরিণত বয়সে আজ আমি একটু শক্তপোক্ত হইয়াছি। কিন্তু আমার বৃকের ব্যথাটা চাগাড় দিতেছে। রক্তচাপ বাড়িতেছে। চেয়ারের হাতলটা শক্ত করিয়া ধরিয়া কহিলাম, যদি যেতে হয় তবে যাবে। আমি আটকাবো না। আমি শুধু জানতে চেয়েছিলাম তোমাদের অসহযোগিতাটা কেন। এখন জেনে নিশ্চিত হয়েছি।

“সবিতা বিনা বাক্যব্যয়ে চলিয়া গেল। আমি একাকী বসিয়া আকাশপাতাল ভাবিতে লাগিলাম। শরীরটা ঝড় দুর্বল লাগিতেছে। মাথাটা ঘুরাইতেছে। চোখে অন্ধকার দেখিতেছি। বারান্দায় কাহার পদশব্দ পাইলাম। ক্ষীণ কণ্ঠে ডাকিলাম, ওরে, কে আছিস ? মনুকে একটু খবর দে।

“খবর দিতে হইল না। মনু নিজেই সামনে আসিয়া দাঁড়াইল। পরণে চওড়া লালপেড়ে গরদ। মুখখানি উপবাসে ক্ষীণ, তবু জ্যোতির্ময়ী হাতখানা বাড়িয়া দিয়া কহিলাম, আমার শরীর আবার খারাপ লাগছে।

“মনু আসিয়া আমাকে ধরিল। তারপর আর কিছু মনে নাই।

“মরিবার আর একটি মাহেন্দ্রক্ষণ নিকটে আসিল। কিন্তু মরিলাম কই ? মানুষ কখন মরিবে তাহার কোনো স্থিরতা নাই। কিন্তু আমার মনে হইতেছে ঠিক সময়ে মরিতে পারাটাও এক মস্ত বড় সাধনার বস্তু। আমরা মরিতে জানি না।

“যখন জ্ঞান ফিরিল তখন আমার চারিদিকে ভীড়। ডাক্তার গম্ভীর মুখে বসিয়া আছে। বৃক কাঁপাইয়া একটা দীর্ঘশ্বাস বাহির হইয়া গেল

“কে প্রশ্ন করিল, কেমন আছেন ?

“কহিলাম, ভাল। বেশ ভাল। প্রায়শ্চিত্ত হচ্ছে।

“ডাক্তার কহিল, প্রায়শ্চিত্ত আপনার একার কেন। আমাদেরও। এবার বলুন তো কী হয়েছিল ? কিছু না। বসে ছিলাম। হঠাৎ মাথাটা ঘুরে গেল। এখনি ঠিক হয়ে যাবে।

হলে ভাল। মনে রাখবেন, আপনার শরীরে দু দুটো ফেটাল অসুখ। ব্লাডপ্রেশার আর হার্ট ট্রাবল। কোনোরকম রিস্ক নিলে কিছু বিপদে পড়বেন।

আমার তো এসব রোগ কোনোদিন ছিল না ডাক্তার।

শরীরং ব্যাধিমন্দিরম্, শরীর থাকলে রোগ ভোগ আছেই। একটু সাবধানে থাকবেন।

“বিছানার চারদিকে জমায়েত লোকজনের মধ্যে হঠাৎ সবিতাকেও দেখিতে পাইলাম। সে এখনো যায় নাই। সর্পিলা কঠিন এক চোখে আমার দিকে চাহিয়া আছে। আমার মৃত্যু কামনা করিতেছে কি ? আহা, তাহার বাসনা কেন যে ঈশ্বর পূরণ করিলেন না !

“ডাক্তার বলিল, আপনার এখন ফুল রেস্ট দরকার। বিশাখার বিয়ে না হলে আমি ওষুধ দিয়ে ঘুম পাড়িয়ে রেখে যেতাম। তা অবশ্য করছি না। কিন্তু এখন ঘন্টা কয়েক আপনি একদম নড়াচড়া করবেন না। বিয়ের সময়ে আপনাকে ধরাধরি করে অসরে নিয়ে যাওয়া হবে। খবদার সিঁড়ি ভাঙবেন না। কিন্তু। শরীর খারাপ বোধ করলেই শুয়ে পড়বেন এসে।

ঠিক আছে, তাই হবে।

“ডাক্তার চলিয়া যাইবার আগে সকলকে সাবধান করিয়া গেলেন। কোনো কারণেই যেন আমাকে বিরক্ত করা না হয়। এই সাবধানবাণী শুনিয়া ধীরে ধীরে সকলে বাহির হইয়া গেল। রহিল শুধু মনু। সে যথারীতি আমার মাথায় হাত বুলাইতেছিল।

“আমি কিছুক্ষণ চোখ বুজিয়া মটকা মারিয়া পড়িয়া রইলাম। বুকে ক্ষীণ হইলেও ব্যথাটা আছেই। রক্তের চাপও যে বেশি তাহাও অনুভব করিতেছি। চোখ বুজিয়াই ডাকিলাম, মনু। বলো।

আমরা কবে কাশী যাবো ?

যেদিন তুমি যেতে চাও।

আমি তো আজই যেতে চাই।

আজ তো আর হয় না। বউভাত মিটে যাক, তার পরেই।

আজ যে হয় না তা জানি। একটা কথা জিজ্ঞেস করবো ?

এখন একটু চুপ করে শুয়ে থাকো। কথা পরে হবে।

না, জরুরী কথা।

বলো।

আমরা বিয়েটা না করলে কী হত ?

কেন গো, কেউ কিছু বলেছে ?

তোমাকেও তো বলে।

আমাকে বলে বলুক। তোমাকে বলেছে কিনা বলো।

বলেছে।

কে ? সবিতা নাকি ?

তুমি কী করে জানলে ?

কাশীবাড়ি থেকে ফিরে সিঁড়ি দিয়ে ওঠার সময় দেখলাম সবিতা ঝড়ের বেগে নেমে যাচ্ছে। এসে দেখি তোমার এই অবস্থা।

“চুপ করিয়া থাকিয়া কিছুক্ষণ পরে বলিলাম, ওদের দোষ দিয়ে লাভ নেই। দোষ আমাদের মনু।

দোষ ! দোষ হবে কেন ? ওসব কথা ভাবো না। যত ভাববে ওর থৈ পাবে না। ঘুমোও।

মাথাটাকে একটু ক্কাস্তি দাও ।

আজকের দিনটায় ওরা যদি কেউ বিয়ের উৎসবে যোগ না দেয় তাহলে কেমন দেখাবে মনু ?  
লোকে ভাববেই বা কি ?

আবার কথা বলছো ! ডাক্তারবাবু কী বলে গেলেন মনে নেই ?

ডাক্তার কি আর ঘরের কথা জানে ? ওরা চোখ বুজে নিদান দেয়, বিশ্রাম করুন, ঘুমোন, ভাববেন না ।

কী বলব বলো ? তোমাকে সান্ত্বনা দিতে পারি এমন কথা আমার জানা নেই । তবে আমার একবারও মনে হয়নি যে বিয়ে করে আমরা ভুল করেছি ।

ভুল যে করিনি তা বুঝিয়ে দিতে পারো ?

পারি । তবে কথা দিয়ে নয় । কথায় কি সব হয় গো ? তুমি নিশ্চিন্ত থাকো, যতদিন বাঁচবে ততদিন ধরে তোমাকে বোঝানোর চেষ্টা করবো যে, বিয়ে করে আমরা একটুও ভুল করিনি ।

“আজ কাশীতে বসিয়া অনেক বিলম্বে সেদিনের কথা লিখিতেছি । লিখিতে লিখিতে মনটা স্নিগ্ধ হইতেছে । আজ আমারও মনে হয়, কিছুমাত্র ভুল করি নাই । মনুকে বিবাহ করিয়া আমি ঠিকই করিয়াছি । বঙ্কিমবাবুর সেই লাইনটি মনে পড়িতেছে, আমরা একই বস্তুর দুটি ফুল । চন্দ্রশেখর একটি ফুল ছিড়িয়াছিলেন । আমার ক্ষেত্রে পুষ্পটি বড় বিলম্বে ফুটিয়াছে ।

“বিবাহসভায় ঘটা হইয়াছিল মন্দ নহে । আমার বিরূপ আত্মীয়স্বজনেরা কিছু নিশ্চিন্ত ছিল । কিন্তু অভ্যাগতের সমাগম আমার কলঙ্ক সম্বন্ধেও বড় কম হয় নাই । সামনের উঠানটিতে ভীড় উপছাইয়া পড়িতেছিল । বিবাহ বাসরের একপার্শ্বে কয়েকখানা চেয়ারে বিশিষ্ট ব্যক্তিরা সমাসীন । গোলাপজল ও আতরের গন্ধে চারিদিক ম ম করিতেছে । কলকোলাহলে অনুষ্ঠান পরিপূর্ণ । ভিতরে ভিতরে কীটের দংশন হয়তো ছিল ।

“রাজেনবাবু আমার পাশেই উপবিষ্ট ছিলেন । হঠাৎ নিম্নস্বরে কহিলেন, আপনার আত্মীয় কুটুম্বরা বোধহয় খুব খুশি নন ?

না । খুশি হওয়ার কথাও নয় ।

“রাজেনবাবু মাথা নাড়িয়া কহিলেন, জানি । বুঝিও সব’ । আপনার এই অপমানের জন্য আমি নিজেকেও খানিকটা দায়ী ।

ও কিছু নয় । সংসার বিচিত্র জায়গা ।

তা বলে আমি নিজেকে অপরাধী ভাবছি না । রঙ্গময়ীর সঙ্গে আপনার বিয়ে হওয়াটার পিছনে একটা কারণ ছিল ।

আপনি তো আমাকে তাও বলেছেন ।

আপনার আত্মীয়দেরও কারণটা আমি বুঝিয়ে বলতে চাই ।

তার দরকার কী ? ওরা বুঝতে চাইবে না ।

“রাজেনবাবু একটা দীর্ঘশ্বাস ছাড়িয়া কহিলেন, সে কথাও ঠিক । এ সংসারে যে যার নিজের সুবিধেমতো ঘটনাবলীর অর্থ বা ব্যাখ্যা করে নেয় । আমরা আমাদের মতো ব্যাখ্যা করেছি । ওরা ওদের মতো করবে । কিন্তু আমি ভাবছি, আপনার মানসিক চাপের কথা । আপনাকে অনেক সইতে হচ্ছে তো ! শরীরটাও তাই বোধহয় খারাপ !

শরীর সেয়ে যাবে । এখন ভালই আছি । আমার কোনো অনুশোচনা নেই ।

“রাজেনবাবু একটু কী ভাবিলেন । তারপর বলিলেন, শচীনকে আপনি কতটা চেনেন জানি না । তবে বলি ওর চিন্তা ভাবনাগুলো আমাদের মতো নয় । খুব আধুনিক ধ্যানধারণার ছেলে । দৃষ্টিটাও স্বচ্ছ । আপনার সঙ্গে যে রঙ্গময়ীর বিয়ে হওয়াটা দরকার তা ওই আমাদের বুঝিয়ে দেয় ।

আপনার ছেলেটি রত্নবিশেষ ।



আপনাদেরই আশীর্বাদ ।

“সেদিন রাজেনবাবুর উক্তি বড় স্বাদু লাগিয়াছিল । রাজেনবাবু আমাদের ত্যাগ করেন নাই । তিনি সমর্থন জানাইয়াছেন, মন্দার বাজারে সেইটুকুরই তো অনেক দাম ।

“অনেক রাতে শয্যাগ্রহণ করিলাম । ডাক্তার ঘুমের ওষুধ ঠাসিয়াছে । মনু তখনো আসে নাই । একাই ঘুমাইয়া পড়িলাম । ঘুম ভাঙিল মাঝরাতে । আমার পাশে শুইয়া অন্যদিকে মুখ ফিরাইয়া মনু ফুলিয়া ফুলিয়া কাঁদিতেছে । মনুকে ইদানীং কাঁদিতে দেখি নাই । তাহার কান্নার রকমটাই জানি না ।

মনু, কাঁদছো কেন ?

ওরা তোমাকে ওরকম করে কেন ?

কারা কিরকম করে ?

তোমার ছেলেমেয়েরা ?

করুক । তুমিই তো বলেছ ওসব গ্রাহ্য না করতে ।

বলেছি, কিন্তু তুমি তো আর সে কথা শুনছো না !

শুনছি তো আর ভাবছি না ।

তোমার শরীর ভাল নেই, জেনেও ওরা কেন যে—

তুমি কেঁদো না মনু । তুমি কাঁদলে আমার পায়ের তলা থেকে মাটি সরে যায় ।

সেইজনাই তো লুকিয়ে কাঁদছিলাম ।

লুকিয়েও কেঁদো না স্বামী-স্ত্রীর দুজনের মধ্যে একজনকে অন্তত শক্ত হতেই হয় ।

সব মানি । কিন্তু ওদের কথায় তোমারও সন্দেহ হচ্ছে আমাকে বিয়ে করে ভুল করেছে কিনা !

সন্দেহ নয় মনু । ভুল যে করিনি তার একটা অ্যাসুয়ারেন্স তোমার কাছ থেকে পেতে

চাইছিলাম

তোমার সন্দেহ হলে আমারও যে পায়ের তলায় মাটি থাকে না ।

কাশী করে যাচ্ছি আমরা ?

কবে যেতে চাও ?

দ্বিরাগমনের পর চলো ।

তাই হবে ।

শচীনকে সব বুঝিয়ে দিতে কদিন সময় লাগবে ।

“আর দুজনের ঘুম হইল না । সারা রাত্রি আমরাও নানা কথা কহিয়া একরকম বাসর জাগিলাম ।

“বউভাতের জন্য কেহ অপেক্ষা করিল না । বিবাহের পরদিনই আত্মীয়রা বিদায় লইল ! কুটুম্বেরা কিছু রহিল । কিছু গেল । তবে বাড়ি অনেক ফাঁকা হইয়া গেল ।

“দ্বিরাগমনের পর একদিন শচীনকে ডাকাইয়া উইল পাকা করিলাম । স্বাধর অস্থাবর সমুদয় সম্পত্তিই পাইবে কৃষ্ণকান্ত আপাতত শচীন কেয়ারটেকার থাকিবে । যদি কৃষ্ণকান্ত দখল না লয় তবে জ্যোষ্ঠ দুই পুত্রের উপর সকল সম্পত্তি বতহিবে ।

“আর এই জায়গা ভাল লাগিতেছিল না । সব বন্ধন যেন ছিন্ন হইয়াছে । একদিন শুভ লগ্ন দেখিয়া আমি ও মনু কাশী রওনা হইলাম ।

“ইহাই বনগমন কিনা জানি না । বন মানে তো বৃহৎ পৌরাণিক আমলে বৃদ্ধবয়সে বৃহৎ সংসারের অর্থাৎ দেশ ও দেশের সেবায় আত্মনিয়োগ করা বিধি ছিল । জঙ্গলে যাওয়ার বিধান বলিয়া অনেকে ভুল করেন । যাহা ইউক, আমার এই কাশী গমনটি জঙ্গল বা বৃহৎ কোনোটাতেই গমন নয়, ইহা কেবল পলায়ন

“আজ কাশীর উত্তরবাহিনী গঙ্গার ধারে আমাদের নান্দিবৃহৎ বাড়ির দ্বিতলে জ্ঞানালার পাশে বসিয়া এই ডায়েরী লিখিতে লিখিতে মনে হইতেছে, জীবনটা বড়ই করুণ-মধুর

“পৃথিবীতে আমার কোনো কীর্তি নাই, বৃহৎ ত্যাগ নাই, যশ নাই। আমি একরূপ আত্মগোপনকারী পলায়নবাদী কাপুরুষ মানুষ। কিন্তু মানুষ তো এক প্রজন্মের নহে। সে যেমনই হোক তাহার উত্তরাধিকারী, বংশপরম্পরার ভিতর দিয়া তাহার রেশ চলিতে থাকে। পুত্রের ভিতর দিয়া পিতাই তো জন্ম লাভ করে। আজ মনে হইতেছে আমি যদি কৃষ্ণকান্তর ভিতরে একটুখানিও জন্ম লইয়া থাকি তবেই জীবন সার্থক হইবে।

“খবরের কাগজে আকস্মিকভাবে একদিন কৃষ্ণকান্তর নাম দেখিতে পাইলাম। স্বদেশী নেতা কৃষ্ণকান্ত চৌধুরি বিচারে দোষী সাব্যস্ত হইলেও তাহার তরুণ বয়সের কথা বিবেচনা করিয়া মাত্র পাঁচ বৎসর কারাদণ্ডে দণ্ডিত করা হইয়াছে।

॥ ১০৪ ॥

গুজবটা কি করে ছড়াল কে জানে। কিন্তু খবরের কাগজে একদিন বেশ ফলাও করে ছাপা হল, কৃষ্ণকান্ত চৌধুরী কেন্দ্রীয় মন্ত্রিত্ব পাচ্ছেন। হাই কম্যাণ্ডের সঙ্গে তাঁর আঁতাত হয়ে গেছে। চূড়ান্ত পর্যায়ে প্রধানমন্ত্রীর সঙ্গে কথা বলতে তিনি শীঘ্র দিল্লি যাচ্ছেন।

খবরটা ছাপা হওয়ার পর আত্মীয়, বন্ধু ও পরিচিত মহলে একটা উল্লাসের হাওয়া বয়ে গেল। সর্বভারতীয় এই পরিচিতি কৃষ্ণকান্তর তো পাওনাই ছিল। দেশের জন্য তিনি তো কিছু কম করেননি।

এ খবরে উল্লসিত হল না শুধু ধুব। তাজিল্লোর সঙ্গে একটু চোখ বুলিয়ে খবরের কাগজটা ফের টেবিলে ফেলে রেখে রেমিকে বলল, তোমার স্বস্তুর আবার মন্ত্রী হচ্ছেন, খবর রাখে?

না তো!

খবরের কাগজে আছে। সেন্ট্রাল মিনিস্টার। ল্যাজ বেশ মোটা হল।

ও কি রকম কথা! ছিঃ।

ল্যাজ মোটা নয়? ওয়েস্ট বেঙ্গলের মতো একটুখানি এক রাজ্যে গণ্ডুযজ্ঞের সফরী আর তো নয়। এবার ভারতবর্ষের মতো বিশাল চারণভূমি।

যোগ্য বলেই ঠুকে নিচ্ছে।

হ্যাঁ, যোগ্য বইকি, ভাল চেষ্টাতে পারেন। পার্লামেন্টে ঠর ভয়েস ভালই শোনা যাবে।

উঃ, তোমাকে নিয়ে আর পারি না।

ধুব ফের খবরের কাগজটা তুলে নিয়ে খবরটার দিকে চেয়ে রইল। সে খবরটা দেখছিল না। সে ভাবছিল। কৃষ্ণকান্ত কলকাতার পাট প্রায় চুকিয়ে দিলেন। তাকে চাবি দিয়ে দিয়েছেন। টাকা পয়সার উত্তরাধিকার দিয়েছেন। আর দিচ্ছেন দুর্লভ স্বাধীনতা। সবচেয়ে বড় কথা, নিজের জ্যোষ্ঠ ও কনিষ্ঠ পুত্রের জন্য তেমন কোনো বিলিবাবস্থাও করেননি। সম্ভবত সেটাও ধুবর বিবেচনার ওপর ছেড়ে দিচ্ছেন। এটাকে কৃষ্ণকান্তর মহৎ ত্যাগ বলে ধরে নিতে পারত ধুব। বা এক ধরনের বাণপ্রস্থ। কিন্তু তা তো নয়। কৃষ্ণকান্ত চললেন বৃহত্তর মুগয়ায়। ধুব জানে, কৃষ্ণকান্ত সাদামাটা ভাবে চোর নন, ঘুষ নেন না। কিন্তু তাঁর দুর্নীতির রকমটাই আলাদা, যাকে দুর্নীতি বলে চেনাও যাবে না। অগাধ প্রশাসনিক ক্ষমতা ভোগ করতে করতে ভিতরের কঠিন নীতিবোধ গলে জ্বল হয়ে যায়। আর সেই ক্ষমতার রক্ত পথেই ঢোকে ক্ষমতার নানারকম অপব্যবহার। আসে দাঙ্গিতা, অত্যাচারী মনোভাব, আসে পরমত অসহিষ্ণুতা। ভাল মন্দের বিচারবোধ লুপ্ত হয়ে যায়। অতীতের ব্রহ্মচারী ত্যাগব্রতী স্বদেশপ্রেমিক কৃষ্ণকান্ত খুব ধীরে ধীরে নিজের অজান্তে নেমেছেন নীচে। তাঁর পতন তিনি নিজেও টের পাননি কখনো। অতীতের কঠিন আদর্শপ্রাণতা কবে তাঁকে ছেড়ে চলে গেছে। এখন

আদর্শের কথা তিনি মুখস্থ বলে যান মাত্র, সেগুলোকে অপরিহার্য বলে বোধ করেন না, পালনযোগ্য বলে মনে করেন না।

ধুব একটা দীর্ঘশ্বাস ফেলল।

রেমি তার বাচ্চাকে ঘুম পাড়িয়ে সাবধানে মশারিতে ঢাকা দিল। তারপর এসে ধুবর হাত থেকে খবরের কাগজটা নিয়ে সাগ্রহে খবরটা পড়ল। তারপর বলল, এঃ মা!

কী হল!

সেন্ট্রাল মিনিস্টার! তার মানে তো ঠুকে দিল্লিতে থাকতে হবে।

সেটাই তো স্বাভাবিক।

উনি দিল্লি গেলে চলবে কী করে?

চলবে না কেন?

বাঃ, এদিক সামলাবে কে?

কী সামলানোর আছে? একরকম একটু সংসার। এটা সামলানোর জন্য কৃষ্ণকান্তর মতো বৃহৎ মস্তিষ্কের দরকার কী? উনি ভারতবর্ষের জনগণের বৃহৎ সংসার সামলানোর পবিত্র দায়িত্ব নিয়ে যাচ্ছেন রেমি।

আর দিবা! ওকে ছেড়ে উনি থাকতে পারবেন?

না পারার কী আছে? উনি একদিন ঠুর প্রিয় বাবা এবং সংসার ছেড়েছিলেন। দীর্ঘদিন জেল-এ কাটিয়েছেন। বিয়ের পরই ঠুকে একবার গ্রেফতার করা হয়। তখন সদ্য পরিণীতা স্ত্রীকে ছেড়েও থাকতে হয়েছে। বৈরাগ্য ঠুর রক্কে।

ঠাট্টা করছো?

বাপ রে, ঠুকে নিয়ে ঠাট্টা! ডন কুইকসোটকে নিয়ে ঠাট্টা চলে নাকি?

কে ডন কুইকসোট! স্বশ্রমশাই! তাহলে ঠুকে তুমি ছাই চেনো।

সেটা ঠিক। আমি ঠুকে চিনি না। কে বলো তো লোকটা? কেমন লোক?

ফের ইয়ার্কি? চুপ করো।

কেন চুপ করবো রেমি? আমি ভারতের জনগণের একজন। আমার জ্ঞানার অধিকার আছে, আমাদের পরবর্তী কেন্দ্রীয় মন্ত্রীটি কেমন লোক।

ভাল লোক। এত ভাল লোক কোথাও পাবে না। তোমার ভারতবর্ষের অনেক ভাগি যে ওর মতো লোক মন্ত্রী হচ্ছেন।

সাবাশ, এ না হলে পুত্রবধূ!

শুধু পুত্রবধূ নই, আমি ঠুর মেয়েও।

তুমি পারো বটে রেমি। এত জেনে এত বুঝেও অন্ধ। হিপনোটাইজড অ্যাণ্ড ব্রেন ওয়াশড।

বেশ। আমরা কিছু লোক এই রকমই অন্ধ এবং হিপনোটাইজড হয়ে থাকতে চাই। লেট আস বী হোয়াট উই আর।

ওটা যুক্তি হল না।

এটাই যুক্তি মশাই, কারণ এই হিপনোটাইজম অনেক চেষ্টা করেও তুমি ভাঙতে পারোনি। আমাদের জ্ঞানচক্ৰও খুলতে পারোনি। পেরেছো, বলো?

তাই দেখছি।

তাহলে এবার স্বীকার করো, ঠুর মধ্যে একটা দারুণ পজ্জিটিভ ফোর্সও আছে।

ছিল।

এখনো আছে। তুমি অপোজিশনের লোক বলে টের পাও না।

অপোজিশন? বলে ধুব খুব হোঃ হোঃ হাসল।

অপোজিশনই তো । তাছাড়া আর কী বলা যায় তোমাকে ?  
বেশ বলেছো ! আসলে কী জানো ? আমরা হচ্ছি সোরাব রুস্তম ।  
আমি একটু ঠুর কাছে যাই, প্রণাম করে আসি ।  
যাও ।

কিন্তু উনি দিল্লি চলে গেলে যে কী করে এই ভূতের বাড়িতে থাকব । সংসারটাই বা কে সামলাবে  
কিছু বুঝতে পারছি না ।

উনি পরশুদিন আমাকে চার্জ বুঝিয়ে দিয়েছেন ।

তার মানে ?

মানে আমাকে কলকাতার সিংহাসনে অভিষিক্ত করেছেন ।

কী বলতে চাইছো ?

আরো বুঝিয়ে বলতে হবে ?

জানোই তো আমি একটু বোকা ।

উনি আমার হাতে সিন্দুক আলমারি ইত্যাদির চাবি তুলে দিয়েছেন ।

তোমার হাতে ! বলো কী ?

আমিও বিস্মিত এবং তোমার মতোই বজ্রাহত রেমি । কিন্তু ঘটনাটা ঘটেছে ।

তুমি চালাবে ?

তা বলতে পারি না । তবে কৃষ্ণকান্ত দি গ্রেট-এর এটা একটা নতুন চালও হতে পারে । মে বি হি  
ইজ হ্যাচিং সামথিং, নইলে আমার হাতে চাবি কেন ? মাইণ্ড ইউ মাই ডিয়ার, তুমি ঠুর এত আপন,  
এত বিশ্বস্ত এবং প্রিয়পাত্রী হওয়া সত্ত্বেও চাবির গোছা তোমার হাতে দেননি । অথচ সেটাই  
স্বাভাবিক হত ।

উনি যা ভাল বুঝেছেন তাই করেছেন । তার মধ্যে ষড়যন্ত্র থাকবে কেন ?

নেই বলছো ?

ঠুর বিষয় সম্পত্তি তো কম নয় । আমি মেয়েমানুষ সামলাতে পারবো না বুঝেই তোমাকে ভার  
দিয়েছেন ।

এমন নয় তো রেমি যে, তোমাকে উনি আর বিশ্বাস করেন না ! কিংবা তেমন ভালও বাসেন না  
আর !

কক্ষনো নয় । ঠুর ভালবাসা উপচে পড়ে । মাপা জিনিস নয় সেটা । তুমি বুঝবে না ।

তাহলে কেসটা কী ?

আমি ঠুর কাছে যাই ।

হিপনোটাইজড । কমপ্লিটলি হিপনোটাইজড ।

বেশ । হিপনোটাইজড তো হিপনোটাইজড ।

ধুব হাত বাড়িয়ে রেমির একখানা হাত ধরল, শোনো রেমি । আমি ফের তোমাকে জিজ্ঞেস  
করছি, বাস্তবিকই কৃষ্ণকান্ত লোকটি কী রকম ? উনি কি জনগণের প্রতিনিধি হওয়ার উপযুক্ত ?

একশোবার উপযুক্ত । ওরকম মানুষ দেশে বেশি নেই ।

তাহলে সেটা আমি ফিল করি না কেন ?

সেটা তোমার দোষ ।

হি কিলড হার ।

কী বললে ?

হি কিলড মাই মাদার ।

কক্ষনো নয় । এটা হতেই পারে না । তুমি ভুল ব্যাখ্যা করছো ।

ধুব একটা দীর্ঘশ্বাস ফেলে রেমির হাত ছেড়ে দিয়ে বলে, যাও প্রণাম করে এসো ।

তুমিও চলো না ।

আমি ঠুকে প্রণাম করি না ।

ছিঃ, কী যে হচ্ছে দিন দিন

উনি জন্মদাতা মাত্র । তার বেশি কিছু নন । তুমি যাও ।

রেমি মুখ ঘুরিয়ে চলে গেল ।

ধুব আবার খবরের কাগজটা তুলে নেয় । অনেকক্ষণ ধরে চেয়ে থাকে খবরটার দিকে । পড়ে না । শুধু চেয়ে থাকে ।

আজ সকাল থেকে অবিরাম টেলিফোন বেজে যাচ্ছে । অজস্র লোকের আগমনও ঘরে বসে টের পাচ্ছে ধুব । এ এক অলিখিত উৎসব । খবরটা বেরোনার পর লোকের মনে নানা আশা আকাঙ্ক্ষা প্রত্যাশা উদ্বেল হয়ে উঠেছে, তাই তারা থাকতে না পেরে আগাম সেলাম বাজাতে চলে এসেছে । মেরুদণ্ডহীন অয়েল মাস্টারস । এদের নিয়েই কৃষ্ণকান্তের কারবার । এদের ক্ষুধাতৃষ্ণা লোভ লালসা মিটিয়ে তারপর এদের কাঁধে ভর দিয়েই কৃষ্ণকান্তকে চলতে হবে । তাঁর আর উপায় নেই ।

করিডোরের মুখে দাঁড়ালে বাইরের ঘরের দৃশ্য খানিকটা দেখা যায় । ধুব নিঃশব্দে উঠে এসে দাঁড়াল । প্রচুর লোক হা হা, হি হি করে উল্লাস জানিয়ে যাচ্ছে । মস্ত এক একক সোফায় কৃষ্ণকান্ত সমাসীন । উনি লোকের তোয়ামোদ এবং সাধুবাদ গ্রহণ করতে খুব ভালবাসেন । ভালবাসেন স্তুতি ও অন্যের মুখে নিজের গুণকীর্তন । ভালবাসেন লোককে ভয় দেখাতে এবং ভেঙে ফেলতে । নিজেকে ছাড়া উনি আর কিছুই বোঝেন না ।

ধুব বিস্মিত এক দৃষ্টিতে দৃশ্যটা দেখছিল । ঘোমটা মাথায় রেমি স্বশরের সোফার পিছনে দাঁড়িয়ে । তার মুখে অহংকার জ্বলজ্বল করছে । সামনে স্তাবকের দল । তাদের মুখ বিগলিত, চোখ সশ্রদ্ধ, দেহ বিনয়ে ন্যূন । যাদুকের তাঁর সম্মোহন বিস্তার করে রেখেছেন চারধারে ।

ধুব মুখ ফিরিয়ে নিল । ঘরে এসে পোশাক পরে খিড়িকির দরজা দিয়ে বেরিয়ে পড়ল বাইরে

যখন অফিসে এসে পৌঁছোলো তখন অফিস শুক হতে অনেক দেরী । ফাঁকা ঘরে বসে ধুব চূপচাপ চেয়ে রইল । সে এখনো জানে না, কৃষ্ণকান্তের ওপর তার এই বিরাগের প্রকৃত কারণ কি ? সত্য বটে এক সময়ে নিজের পরিবারকে তিনি বড় হেলাফেলা করেছিলেন । তাঁর অমনোযোগ এবং নিষ্ঠুর গুদাসীনাই তাঁর স্ত্রীকে আত্মহননের দিকে ঠেলে দিয়েছিল । ধুবর মনে আছে মরার আগে তার মা যে চিঠি লিখে রেখে গিয়েছিলেন তাতে স্পষ্ট ভাষায় তিনি তাঁর স্বামীকে নিজের মৃত্যুর জন্য দায়ী করে যান । এ গেল স্ত্রীর কথা । নিজের সন্তানদের সঙ্গেও কৃষ্ণকান্তের কোনো সম্পর্ক গড়ে ওঠেনি । নিজের পরিবারের চেয়ে ভোটদাতা বা দলীয় কর্মীদের সঙ্গে তাঁর বোঝাপড়া অনেক বেশি । বড় এবং ছোট দুই ছেলে তাঁর অবহেলাতেই বাড়ির সঙ্গে সম্পর্ক চুকিয়ে দিয়েছে । মেয়ে লতু বাড়িতে থেকেও নেই । বুড়ো বয়সে যখন আর আপনজন বলতে কেউ অবশিষ্ট নেই তাঁর তখন রেমিকে আঁকড়ে ধরেছেন কাঙাল ছেলের মতো । পরোক্ষে তোয়াজ করছেন ধুবকেও । কিন্তু ধুব মনে-প্রাণে লোকটিকে কিছুতেই গ্রহণ করতে পারছে না । এই মানুষের সঙ্গে তার কোনো আত্মীয়তা গড়ে ওঠেনি যে !

ধুবর কি কোনো দোষ নেই ? আছে । কৃষ্ণকান্তের বিপুল প্রভাব ও প্রতিপত্তি সে দেখে আসছে জ্ঞান হওয়ার সময় থেকে । বিখ্যাত ও প্রভাবশালী পিতাদের পুত্ররা বড় হতভাগ্য । বাপের জ্যোতির পাশে তারা মিট মিট করে । ক্ষমতা, প্রতিভা, ব্যক্তিত্ব থাকলেও তা সহজে স্বীকৃতি পেতে চায় না । লোকে তাদের আমল দেয় না । এই সত্য ধুব খুব ছেলেবেলা থেকে টের পেয়ে আসছে । তার কোনো আলাপা সম্মান নেই, স্বীকৃতি নেই, তার ব্যক্তিত্ব গড়ে উঠতে পারেনি নিজের মতো করে । কৃষ্ণকান্তের কাছে আত্মসমর্পণ ছাড়া ধুবর সামনে আর কোন্ পথই বা খোলা ছিল ? আর একটা পথ

ছিল। তা বিদ্রোহের এবং বিনাশের। বিখ্যাত বাপের কপুত্রা কিছু মনোযোগ পায়। ধুব দ্বিতীয় পন্থা বেছে নিয়েছিল। কিন্তু কোথাও পৌছোতে পারেনি, কিছু লাভ হয়নি।

আজ কৃষ্ণকান্ত তাকে দয়া করছেন। দয়া ছাড়া আর কী? নিজেকে দিল্লিতে সরিয়ে নিচ্ছেন, ধুবকে দিয়ে যাচ্ছেন দায়দায়িত্ব। বিকশিত হওয়ার সুযোগ। ইউটের নিচে চাপা ঘাস হলুদবর্ণ ধারণ করেছে, এখন ইউট সরে গেলে হয়তো বা সবুজ হয়ে উঠবে। কিন্তু এই দয়াটা নিতে হচ্ছে বলে ধুবর ভিতরটা আজ তেতো, বিষাক্ত।

অফিসে আজ অনেকেই তাকে অভিনন্দন জানাতে এল। তার বাবা কেন্দ্রে মন্ত্রী হচ্ছেন, সোজা কথা তো নয়। অভিনন্দনটা ধুবর পাওনা নয়। কিন্তু সে হাসিমুখেই কৃষ্ণকান্তর পাওনা গ্রহণ করল টেলিফোনটা এল দুপুরে। প্রথম রেমির।

কী গো, না বলে কয়ে চলে গেছ যে বড়! খেয়েও যাওনি!

যা অবস্থা দেখলাম ভাই, তাতে মনে হল আজ ধুব চৌধুরীর মতো একজন নগণ্য লোককে অফিসের ভাত দেওয়ার কথা কারো খেয়াল হওয়ার নয়।

বাজে কথা বলো না। সব রেডি ছিল। ঘরে এসে দেখি বাবু নেই।

বাবু যে নেই তা এতক্ষণে খেয়াল হল?

বাড়ি ভর্তি লোক, সকলের তদারক করতে হচ্ছে না! আমি তো ধরে নিয়েছি তুমি কোথাও আড্ডা মারতে গেছ।

বাঃ, চমৎকার।

ইয়াকি কারো না! কিছু খেয়েছো?

খেয়েছি। ওটা কোনো প্রবলেম নয়।

রাগ করোনি তো!

আরে না।

দিব্য ভীষণ দুটুমি করছে, ফোন ছাড়লাম।

আচ্ছা।

দ্বিতীয় ফোনটা কৃষ্ণকান্তর। কদাচিৎ তিনি ধুবকে ফোন করেছেন। আদৌ কোনোদিন করেছেন কিনা তাই আজ ধুব মনে করতে পারল না।

ধুব? আমি কৃষ্ণকান্ত বলছি।

কথাটা ধুবর কানে খট করে লাগল। ধুব যে কৃষ্ণকান্তকে 'বাবা' বলে ডাকে না এটা হয়তো তারই পান্টি।

ধুব একটু চমকে উঠলেও স্বাভাবিক স্বরেই বলল, বলুন।

তুমি বোধহয় আজ বউমাকে না জানিয়েই অফিসে চলে গেছ। উনি খুব চিন্তা করছিলেন।

একটু কাজ ছিল, তাই।

তা থাকতেই পারে। বউমা ভাবছিলেন বলেই আমি তোমার খবরটা নিলাম।

আচ্ছা।

আজ সকালে বাড়িতে অনেক লোক এসেছিল। মোস্ট ডিস্টার্বিং। তবে আমি লোককে ফিরিয়ে দিতেও পারি না। তোমাদের হয়তো একটু অসুবিধে হয়েছে।

না, অসুবিধে কিসের? আমি তো ছেলেবেলা থেকেই বাড়িতে ভিড় দেখছি।

তা অবশ্য বটে। এখন বড় হয়েছে, নিজস্ব মতামত হয়েছে। বলে কৃষ্ণকান্ত একটু থামলেন। তারপর বললেন, আমি আগামীকাল দিল্লি যাচ্ছি। বিকেলের প্লেনে। আমার ইচ্ছে কালকের দিনটা তুমি বাড়িতেই থাকো।

ধুব একটু অবাক হয়ে বলল, আমি!

হ্যাঁ। যদি একটু অসুবিধে হয়ও তবু চেষ্টা করো।

আচ্ছা।

আমি হয়তো শীগগীর ফিরব না। বউমা খুব কান্নাকাটি করছেন। দিব্যর জন্য আমারও মনটা খারাপ হবে। তবু কী আর করা!

ধুব কী বলবে! চুপ করে রইল।

কৃষ্ণকান্ত একটু গলা খাঁকারি দিলেন। তারপর বললেন, কালকের দিনটার কথা ভুলে যেও না। না ভুলব না।

কৃষ্ণকান্ত ফোন ছেড়ে দিলেন।

ধুবর শরীরটা হঠাৎ খুব শিথিল এবং শীতল লাগতে লাগল। কৃষ্ণকান্তর হলটা কী?

সন্ধ্যাবেলাই আজ ধুব বাড়ি ফিরে এল। কেন এল তা সে নিজেও জানে না। এসে ভাল ছেলের মতো মুখটুখ ধুয়ে একটা চেয়ারে বসে একখানা বই খুলল। রেমি ঘরে নেই। বোধ হয় ওপরে স্বশুভের গোছগাছ করে দিচ্ছে। বইখানা খুলেও ধুব কিছু পড়তে পারছিল না। মনটা চঞ্চল।

কৃষ্ণকান্ত বাড়িতে থাকলে কতগুলো লক্ষণ দেখে তা বোঝা যায়। বাড়িটা নিস্তব্ধ থাকে, চাকর-বাকরেরা ফিস ফিস করে কথা বলে, বাসনের শব্দ হয় না, কেউ রেডিও চালায় না বা হঠাৎ গান গেয়ে ওঠে না, পা টিপে টিপে হাঁটে। এমনকি বাড়ির আবহাওয়াটাও যেন একটু থমথমে থাকে। ধুব সেই আবহাওয়াটা তার ষষ্ঠ ইন্দ্রিয় দিয়ে অনুভব করার চেষ্টা করল। তারপর বুঝল, কৃষ্ণকান্ত বাড়িতে নেই। বই রেখে সে ওপরে উঠে এল।

কৃষ্ণকান্তর ঘরে বাস্তবিকই রেমি বিশাল এক ফাইবার গ্লাসের সুটকেস গোছাতে বসেছে। তাকে সাহায্য করছে দুজন যি।

কী করছো?

গোছাচ্ছি। বাবা কাল দিল্লি যাচ্ছেন।

জানি।

তুমি এত তাড়াতাড়ি ফিরলে যে!

এমনি। ছেলেটা কোথায়?

ঘুমোচ্ছে।

এত ঘুমোয় কেন ওটা?

বাচ্চারা ঘুমোয়, ওটাই নিয়ম। কেন, তোমার কি একটু ছেলেকে আদর করতে ইচ্ছে করছে? না বাবা, আদর করতে হলে তো বোধ হয় ডেটল দিয়ে হাতমুখ ধুতে হবে! অতটা পেরে উঠবো না।

ডেটল না হলেও চলবে। সাবান দিয়ে হাতমুখ ধুলে আর বাধা নেই। বাচ্চাদের চট করে ইনফেকশন হয় বলেই স্বশুরমশাই সাবধান হয়েছেন। ওরকম বাঁকা ভাবে সব কথা ধরো কেন?

তোমার স্বশুরমশাই কোথায়?

পার্টির কী একটা জরুরী মিটিং-এ গেছেন। জানো, আজ প্রাইম মিনিস্টারের ট্রাংককল এসেছিল?

বলো কী! তাহলে তো আমরা ধন্য। বাড়িতে আলোকসজ্জা করতে বলো।

ফের ইয়ার্কি?

তা প্রাইম মিনিস্টার কী বলল?

কী করে জানব?

ধুব একটু হাসল। তারপর বলল, তোমার স্বশুর একটা অদ্ভুত আন্দার করেছেন।

কিসের আন্দার?

কাল উনি দিল্লি যাবেন বলে আমাকে বাড়িতে থাকতে বলেছেন ।

তাই নাকি ? তুমি রাজি হলে ?

হলাম । উনি নাকি দিল্লি থেকে আর সহজে আসছেন না ।

তাই শুনছি । কী যে খারাপ লাগছে !

তুমিও দিল্লি গেলে পারো । যাবে ?

সে কি আর বলতে বাকি রেখেছি ভাবো ?

উনি কী বললেন ?

বললেন, বউমা, তুমি গেলে আমার ছেলেটাকে কে দেখবে ?

বটে ! এতবড় কথা !

কেন বড় কথার কী হল ?

বড় কথা নয় ? আমি কি ছেলেমানুষ ?

তুমি তার চেয়েও অধম ।

কৃষ্ণকান্ত ফিরলেন অনেক রাতে । সঙ্গে এক দঙ্গল লোক । অনেক রাত অবধি বৈঠকখানায় মিটিং চলল । ধুবর সঙ্গে চোখাচোখিও হল না । ঘুমও হল না তার । মনটা চঞ্চল । ভীষণ চঞ্চল । রাত তিনটোর সময় উঠে সে দু পেগ-এর মতো হুইস্কি খেল জোর করে । দশ মিনিটের মধ্যে পেটে প্রবল ব্যথা উঠল । হুইস্কিটা গলায় আঙুল দিয়ে তুলে ফেলতে হল তাকে । তারপর সারারাত এক ধরনের মানসিক ছটফটানির মধ্যে ছেঁড়া ছেঁড়া তন্দ্রা এল মাত্র ।

পরদিন ধুব অফিসে গেল না । কিন্তু তা বলে কৃষ্ণকান্তর সঙ্গে তার ভাল করে দেখাও হল না । কৃষ্ণকান্তকে সকাল থেকেই ফের হেঁকে ধরেছে লোক । বেলা দশটায় পার্টি অফিসে যাওয়ার আগে ধুবকে ডেকে পাঠিয়ে বললেন, তোমার সঙ্গে ভাল করে দুটো কথাও বলতে পারছি না আজ । বড় ঝামেলা হয়েছে । অথচ কয়েকটা কথা বলার ছিল ।

কী কথা ?

কাজের কথাই । তা সে আর সময় হবে না । তবু তুমি আজ বাড়িতেই থেকো । যদি সম্ভব হয় তবে এয়ারপোর্টে আমার সঙ্গে যেও । রাস্তায় বলা যাবে ।

কিন্তু সেটাও সম্ভব হল না । বিকেল পর্যন্ত কৃষ্ণকান্ত ফিরতে পারলেন না । ফোন করে তাঁর জিনিসপত্র এয়ারপোর্টে পাঠিয়ে দিতে বললেন । তারপর ফোনেই ধুবকে ডেকে বললেন, সব দিক সামলে চলো । সাবধানে থেকো । এখন তুমিই অভিভাবক ।

ধুব বলল, ঠিক আছে ।

বউমাকে একটু যত্ন করো । লতুর বিয়ের কথা ভুলো না । সব তোমাকেই করতে হবে ।

চেষ্টা করব ।

চলি ।

আচ্ছা ।

ফোন রেখে দিল ধুব । কিন্তু সে একটা অস্থিরতা বোধ করছিল ভিতরে ভিতরে । এটার কোনো কারণ নেই । অন্তত কারণ কিছু খুঁজে পাচ্ছিল না সে ।



“কাশী আসিবার পর চার বৎসরের বেশি অতিক্রান্ত হইল। ইতিমধ্যে কত কী ঘটিয়া গেল। ভরতবর্ষের রাজনীতিতে কত ঘটনার চমক। তবে তাহার চেউ আমাকে বড় একটা স্পর্শ করে না। রাজনীতিতে আমি কোনোদিনই জড়িত নহিঁ। শুধু প্রাণাধিক প্রিয় পুত্রের জন্য যেটুকু খবর রাখা আবশ্যক তাহাই রাখি। একদিন কানে আসিল, কৃষ্ণকান্তকে দিল্লি লইয়া যাওয়া হইয়াছে। ভোলানাথ সরকার নামক পাবনার আশ্রমবাসী এক ভদ্রলোক আসিয়া একদিন খবর দিয়া গেলেন, পাবনায় অন্তরীণ থাকিবার শর্তে কৃষ্ণকে মুক্তি দেওয়া হইবে। আমার নানা প্রশ্নের জবাবে তিনি যাহা জানাইলেন তাহা কিছু বিস্ময়কর। কৃষ্ণ ঢাকায় আত্মসমর্পণ করিলে তাহাকে গ্রেফতার করিয়া দিল্লিতে চালান দেওয়া হয়। তাহার বিরুদ্ধে গুরুতর অভিযোগ ছিল, যাহাতে ফাঁসি বা দ্বীপান্তর নিশ্চিত। পাঁচ বৎসরের মেয়াদ সেই তুলনায় কিছুই না। সেই মেয়াদ ফুরাইবার। আগেই সে মুক্তি পাইল। আশ্রমবাসী কতিপয় ব্যক্তি গিয়া দিল্লিতে দরবার করায় সরকার খুবই আকস্মিক ও অদ্ভুত ভাবে তাঁহাদের আবেদন মানিয়া লন।

“ইহার কিছুদিন পর পাবনা আশ্রম হইতে কৃষ্ণের চিঠি আসিল। সে লিখিয়াছে, আপনি চিন্তা করিবেন না, আমি ভাল আছি। তারপর অন্যান্য সব কথা। আমার ও মনুর প্রসঙ্গ সে এড়াইয়া গিয়া শুধু লিখিয়াছে, নূতন মাকে প্রণাম দিবেন।

“চিঠি পড়িয়া মনু রাগিয়া বলিল, আমি আবার ওর নতুন মা হতে গোলাম কবে? আমিই তো আসল মা, শুধু ডাকের পিসি ছিলাম। এখন শুধু মা বলে ডাকবে, নয়তো পিসি, ওকে লিখে দাও।

“আমি হাসিয়া কহিলাম, তুমি ওর পিসি হলে তোমার সঙ্গে আমার সম্পর্ক হয় ভাইবোন। সেটা কি ভাল দেখাবে?

“কৃষ্ণ যে আর ঘরের ছেলে হইয়া ঘরে ফিরিবে না তাহা মনে মনে বুঝিতে পারিতেছিলাম। তাই তাহার বিরহের অনভূতিও ধীরে ধীরে তীব্রতা হারাইতেছিল। উপরন্তু আমি এই অগ্র বয়সে আজ কিছু গৃহস্থ উপভোগ করিতেছি। লজ্জার মাথা খাইয়া বলি, নারীপ্রেমও। ফলে প্রিয়জনদিগের সহিত বিচ্ছেদ সত্ত্বেও তেমন একটা অভাব কিছু বোধ করি না। সম্ভবত ইহাই মানবের ধন, ইহাই সত্য।

“আজকাল আলস্যে সময় কাটাইব সাধা কী? মনু নূতন সংসার পাতিয়াছে, সুতরাং সেই সংসারের জোগানদার, বাজার সরকার, বরকন্দাজ সব ভূমিকাই আমাকে পালন করিতে হয়। আমি কর্মচারী নিয়োগের কথা তুলিয়াছিলাম, মনু আমল দেয় নাই। তার বক্তব্য, এতটুকু সংসারে একজন বাজার সরকার বা হিসাবরক্ষকের দরকার নাই। জমিদাররের ঠাঁটবাট কিছু ছাড়িতে হইবে। বুড়াবয়সে যাতে বাতে না ধরে তাহার ব্যবস্থাও করিতে হইবে। একজন ঝি ও একজন চাকর সম্বল করিয়া আমাদের চলিতেছে।

“এইসব কাজ করিতে আমার খরাপও লাগে না। তাছাড়া কাশীতে বাজার করিয়া সুখ আছে। আমাদের দেশ বেগুনের জন্য প্রসিদ্ধ। এখানে দেখিলাম তদপেক্ষা বৃহৎ ও সুস্বাদু বেগুন মিলে। অন্যান্য সজ্জীর স্বাদও ভাল। মনুর রান্না তো চমৎকারই। রাবড়ি, প্যাঁড়া ইত্যাদিও এখানে সস্তা ও খাঁটি। গুরুভোজনে আমার কোনোকালেই আসক্তি নাই। কিন্তু সুস্বাদু খাদ্যের প্রতি আকর্ষণ আছে। সুতরাং নূতন সংসারে এবং নূতনরকম জীবনধারায় প্রবেশ করিয়া অতীতের সহিত সম্পর্ক ছিন্ন করিতে যে ক্রেশ্ন বোধ করিতে পারিতাম তাহার অনেকটাই মনু নানাভাবে নিবারণ করিয়াছে। তাহার প্রতি আমার কৃতজ্ঞতার শেষ নাই।

“কনক বা জীমূত এবং আমার জ্যেষ্ঠা দুই কন্যা বড় একটা খোঁজখবর করে না। ইহাতে দুঃখ অনুভব করি না। কারণ এইরূপই ঘটবার কথা। তবে বিশাখা ও শচীন একদিন আকস্মিকভাবে

আসিয়া কাশীতে হানা দিল। বিশাখার কোলে একটি ফুটফুটে শিশু। তাহাদের পাইয়া আনন্দে আত্মহারা হইলাম।

“শচীন জনান্তিকে আমাকে জানাইল, পাবনা হইতে কৃষ্ণকান্ত আবার উধাও হইয়াছে। আমাকে দৃষ্টিভ্রান্ত করিতে নিষেধ করিয়া শচীন বলিল, সে সম্ভবত আপনার কাছে আসবে।

“আমি অবাক হইয়া কহিলাম, কি করে জানলে?

“সে হাসিয়া কহিল, পাবনায় আমি গিয়ে তার সঙ্গে দেখা করে এসেছি। আর কারো জন্য নয়, আপনার জন্য সে সবসময়েই বেশ উদ্বিগ্ন ও ব্যাকুল।

“বুকাটা ভরিয়া গেল। স্নেহ স্বভাবত নিম্নগামী। পিতা যেমন পুত্রকে স্নেহ করেন, পুত্র ততটা স্নেহ পিতাকে করিতে পারে না। আমার ক্ষেত্রে স্নেহের প্রকৃতি আরো বিচিত্র। কৃষ্ণ ছাড়া অন্যান্য পুত্রকন্যার সহিত আমার তেমন সম্পর্ক রচিত হয় নাই। আমার দিক হইতে স্নেহ হয়তো কিছু ছিল, কিন্তু তাহাদের দিক হইতে স্নেহের প্রকৃতি কিরূপ তাহা কখনো পরীক্ষা করা হয় নাই। কৃষ্ণ আমাকে কিছু স্নেহ করে জানিতাম। আজ আবার নূতন করিয়া তাহার ব্যাকুলতার কথা শুনিয়া আমার ক্ষুধার্ত পিতৃত্ব জাগিয়া উঠিল।

“কহিলাম, আমার জন্য সে কি খুব ভাবে?

“শচীন কহিল, খুব ভাবে। আপনার অসুস্থতার সংবাদ সে শুনেছে। তাই খুব দৃষ্টিভ্রান্ত।

“যে কয়দিন বিশাখা ও শচীন আমাদের কাছে ছিল সেই কয়টা দিন বড় আনন্দে কাটিয়া গেল। ভাবিতে লজ্জা করে আমরা উভয়পক্ষই নববিবাহিত দম্পতি। আমি ও মনু বয়সে কিছু প্রবীণ, উহারা নবীন। প্রায় একই সময়ে আমাদের বিবাহ হয়। আমার ও মনুর মধ্যে প্রগলভতা নাই, উচ্ছ্বাস নাই, এক শান্ত তৃপ্তি আছে। উহাদের মধ্যে উচ্ছলতা, প্রগলভতা কিছু বেশি। আমি মনে মনে উভয় দম্পতির তুলনা না করিয়া পারিলাম না। শুধু একটা ব্যাপারে বিশাখা ও শচীনের তুলনায় আমরা পিছাইয়া আছি। আমাদের ও মনুর সন্তান হয় নাই।

“কয়েকদিন থাকিয়া বিশাখা ও শচীন ফিরিয়া গেল। বাড়িটা বড়ই শূন্য মনে হইতে লাগিল। কিন্তু শূন্যতা ভরিয়া দিতে মনুর জুড়ি নাই। গানে, গল্পে সেবার্য সে আমাকে সর্বদা ঘিরিয়া থাকে। আমার মনের কথাটি মুখে আসিবার আগেই সে কী করিয়া যেন টের পায়। তাই অভাব থাকিতে দেয় না। আমার কাছে তাহার যেন চাহিবার কিছুই নাই, শুধুই দেওয়ার আছে। মনু দিবসরজনী সেই দানযজ্ঞই করিয়া চলিয়াছে। উজাড় করিয়া নিজেকে সে যতই দিতেছে ততই যেন অফুরাণ হইয়া উঠিতেছে। স্ত্রীলোক আমি বেশি দেখি নাই সত্য, তবু মনে হয় এইরূপ স্ত্রীরত্ন পৃথিবীতে অল্পই আছে।

“শীঘ্র মরিব এমন মনে হয় না। তবু একদিন তো ভবের খেলা সাক্ষ করিতেই হইবে। তখন মনুর কী হইবে? আমা অপেক্ষা সে বয়সে প্রায় বিশ বৎসরের ছোটো। তাহার দেহে মনে কোথাও বয়সের ভাঁটা পড়ে নাই। সে এখনো দীর্ঘদিন বাঁচিবে। সুতরাং তাহার প্রতি আমার কিছু কর্তব্য থাকিয়াই যায়। তাই কাশীর বাড়িটি আমি তাহার নামে বেজিস্টারি করিয়া দিলাম। ডাকঘরে তাহার নামে অ্যাকাউন্ট খুলিয়া কিছু টাকাও রাখিলাম। কিছু গহনা গড়াইয়া দিলাম যাহা ইহজন্মে তাহার অঙ্গস্পর্শে ধন্য হইবে কিনা জানি না। সে গহনা পরে না।

“আমাকে এইসব আঁটঘাট বাঁধিতে দেখিয়া একদিন সে হাসিয়া কহিল, যদি মরার কথা ভেবে থাকো তাহলে এই বলে দিচ্ছি, যমের সাধা নেই তোমাকে ছোঁয়। কাঁটা মেরে তাকে তাড়াব।

“আমি কহিলাম, তোমার চেয়ে বয়সে আমি বড়। আমার আগে মরাই তো স্বাভাবিক। তোমাকে ভাসিয়ে দিয়ে যেতে পারব না।

“এ কথায় মনু রাগিল, কাঁদিল এবং ঝগড়াও করিল। তাহাকে কি করিয়া বুঝাইব বোধ হয় বুঝাইবার কিছুই নাই। ভালবাসার কাছে পরাজয় মানিয়া লওয়াই বুদ্ধিমানের কাজ। আমি তাহাকে

শাস্ত করিয়া কাছে টানিয়া লইয়া কহিলাম, তোমার ওরকম স্বভাব কেন বলো তো ? যত যাই হোক তুমি তো আমার নতুন বউ । একটা ভাল শাড়ি পরো না, গয়না পরো না, সাজো না, কিছু আবদার করে চাও না ! এরকম হওয়া কি ভাল ? যৌবনে যোগিনী সাজার কী হল তোমার ?

“সে আমার চোখে বিহুল চোখ রাখিয়া কহিল, আমি সাজবো কেন ? কাকে ভোলাতে ? তাছাড়া আমি বড় বড় ছেলেমেয়ের মা, আমার নাতিপুতি আছে ।

“করুণভাবে হাসিয়া কহিলাম, তা বটে, তবে একতরফা । তোমাকে তারা এই জন্মে মা বলে স্বীকার করবে না ।

“মনু মাথা নাড়িয়া কহিল, কৃষ্ণ স্বীকার করবে, বিশাখাও করবে । স্বীকার না করলেও দুঃখ নেই । আমি তো জানি, তাহলেই হবে ।

“মনু প্রত্যহ বিশ্বনাথ মন্দিরে যায় । আমাকেও টানাটানি করে । মাঝে মাঝে যাইতে হয় । কিন্তু আমি মন্দিরের বিগ্রহে তেমন আকর্ষণ বোধ করি না । বিগ্রহ মূক, স্থবির । মানুষ ইচ্ছা করিলে বিগ্রহকে সামনে রাখিয়া নানা দুষ্কার্য করিতে পারে । বিগ্রহ আমাদের শাসন করে না, উপদেশ দেয় না, বিগ্রহের কোনো জীবনদর্শন নাই । আমি বিশ্বাস করি, তিনি যেমন শ্রীকৃষ্ণ বা রামচন্দ্ররূপে অবতীর্ণ হইয়াছিলেন তেমনি এখনো অবতীর্ণ হন । মানুষ তাঁহাকেই খোঁজে । পরম শ্রেয়ময় করুণাঘন, সর্বজ্ঞ, মানুষের প্রতি তাঁহার ভালবাসার শেষ নাই । ঈশ্বরকে আমি মানুষের মধ্যেই পাইতে চাই । কিন্তু মনু তত প্রাজ্ঞ নহে । সে ঠাকুরপূজা বোঝে । এই ব্যাপারে তাহার সহিত আমার কিছু মতভেদ আছে । কখনো কখনো তর্কও হয় । মনু শেষে হাল ছাড়িয়া দিয়া কহে, বেশ তো, তোমার কথাই মেনে নিচ্ছি ।

“আমি বলি, মানবে কেন ? বুঝতে হবে ।

“সে মাথা নাড়িয়া বলে, অত বুঝে কাজ নেই । আমি এই বেশ বুঝেছি আমার ব্রহ্মা বিষ্ণু মহেশ্বর সব তুমি । আর ঠাকুরে আমার দরকার নেই । বিশ্বনাথ মন্দিরে যাই তোমার কথাই বলে আসতে । বলি, ও দেবতা, আমার দেবতাকে ঠিক রেখো ।

“উচ্চৈশ্বরে হাসিয়া ফেলি । আমাকে দেবতা বানাইয়াও তাহার ভয় কাটিতেছে না । আর একজন দেবতাকে রক্ষক হিসাবে ধার করিতেছে ।

“মাঝে মাঝে দশাশ্বমেধ ঘাটে গিয়া বসি । একা একা নিজের জীবনের রুখা বসিয়া বসিয়া ভাবি । বছরের হিসাবে অনেক দিন পৃথিবীতে আছি বটে, কিন্তু এই জীবনের পরিসর কতটা ? গভীরতাই বা কতখানি ? আত্মগ্লানিতে মনটা বড় তিক্ত হইয়া ওঠে । আমি আত্মমুগ্ধ অন্ধ নহি । নিজের দোষ ত্রুটি দুর্বলতা কোনো কিছুকেই এড়াইয়া যাই না । জমিদার বংশে জন্মগ্রহণ করায় আমাকে খাটিয়া খাইতে হয় নাই । যদি উপার্জন করিতে হইত তবে আমি কী করিতাম ? অর্জনপটু হইতে পারিতাম কি ? নাকি উজ্জ্বল করিয়া ন্যূনত্বপূর্ণে অকালবৃদ্ধ খিঁচিটে এক কৃপণে পরিণত হইতাম ?

“নিজেকে লইয়া আমার এই নিরবচ্ছিন্ন ভাবনাও হয়তো একপ্রকার আত্মরতি । কিন্তু আমার সমস্যাও যে নিজেকে লইয়াই । উত্তরবাহিনী গঙ্গা ওই যে অবিরল বহিয়া চলিয়াছে উহার স্রোতোধারার মধ্যে যে অবিরল চরৈবেতি-চরৈবেতি মন্ত্র জপ হইয়া চলিয়াছে জীবনের মূলমন্ত্রও তাহাই । চল, অগ্রসর হও, তীব্রতা ও ক্রমাগতিতেই জীবনের সৌন্দর্য ও সার্থকতা । নদীর বিশ্রাম নাই, ঘুম নাই, আছে শুধু চলা । উৎস হইতে মোহনা পর্যন্ত তাহার গতিতে কোথাও মৃত্যুর ছায়াপাত ঘটে নাই । যতক্ষণ জীবন, যতক্ষণ গতি ততক্ষণ মৃত্যু নাই ।

“আমি আজকাল ফের মৃত্যুর কথা একটু বেশি ভাবিতেছি । গত বৎসর আমার হৃদয়স্ত্র বেশ কয়েকবার বেয়াদপি করিয়াছে । রক্তচাপটাও যে বিদায় লয় নাই তাহা অভ্যন্তরে টের পাই । আর এইসব বৈকল্যই বোধ করি আমাকে মৃত্যুর কথা মনে করাইয়া দেয় । সেই যে কয়েক বৎসর আগে এক প্রত্যুষে কুয়ার দড়ি হাত হইতে পড়িয়া গেল সেদিন হইতেই আমার জীবনে মৃত্যুর ছায়া আসিয়া

পড়িলে। সেই ছায়া প্রলম্বিত হইয়া এতদূর আসিয়াছে। নদীর ধারে আসিয়া দাঁড়াইলে মাঝে মাঝে মনে হয়, এইখানেই বৃষ্টি যাত্রাশেষ। আর কোথাও যাওয়া হইবে না। আর কোথাও যাওয়ার নাই।

“দশাশ্বমেধের বিশাল ঘাটে পুরোহিত, জ্যোতিষী, গণকর, হেটোমেটো পণ্ডিতের অভাব নাই। তীর্থস্থানে সর্বত্রই ইহাদের দেখিতে পাওয়া যায়। ইহাদের মধ্যে একজনের সহিত আমার কিছু সন্তাব হইয়াছে। লোকটি বাঙালী। পূর্ববঙ্গেই নিবাস। লোকটি ভৃগুজ্যোতিষী। গ্রামে থাকিতে জ্যোতিষচর্চায় বিশেষ আয়পয় হইত না। কাশী পুণ্যার্থীদের জায়গা বলিয়া এখানে আসিয়া থানা গাড়িয়াছেন। মজ্জেল যে বিশেষ জুটিয়াছে তাহা মনে হয় না। তবে নিত্যই বিকালের দিকে আসিয়া একটি শতরঞ্চি পাতিয়া চাতকের ন্যায় বসিয়া থাকেন। দু-একজন আসে, দুই চারি আনা দক্ষিণা পান। দুজনেই প্রায় নিষ্কর্মা বলিয়া আলাপ হইয়া গেল। আলাপ হওয়ার পর বুঝিলাম, মানুষটি লোক ঠকাইয়া খাওয়ার মানুষ নহেন। রীতিমত কষ্ট করিয়া অধাবসায় সহযোগে ভৃগু পরাশর আয়ত্ত করিয়াছেন। এই কাশীতেই তিনি যৌবনকালে এক পণ্ডিতের চেলাগিরি করিয়াছিলেন। তাঁহার নাম ধনঞ্জয় বন্দ্যোপাধ্যায়।

“জ্যোতিষে আমার বিশ্বাস পাকা নহে। সব কিছুর মতো এই বিষয়টির প্রতিও আমার ঔদাসীন্য ছিল। ধনঞ্জয়ের সহিত আলাপ হইবার পর একটু কৌতূহল জন্মিল। আমার কোষ্ঠী একটা আছে বটে, কিন্তু কোথায় আছে জানি না। ধনঞ্জয়কে তাই কোষ্ঠী দেখানো হইল না। তবে উনি আমার কররেখা দেখিয়া কিছু আঁক কথিয়া কহিলেন, আপনার দ্বিতীয়বার দার পরিগ্রহ করার যোগ দেখছি। আপনার দ্বিতীয়া স্ত্রী সুলক্ষণা।

“একটু বিস্মিত হইলাম। ধনঞ্জয় নিবিষ্টমনে আরো আঁক কথিয়া কহিলেন, আপনি ভূমি ও সম্পদের অধিপতি। সুপুত্রের পিতা। আপনার কোষ্ঠী বিচার কবার আর কী আছে?

“আমি কহিলাম, মৃত্যুর কথা কি কিছু বলা সম্ভব?

“উনি বলিলেন, সম্ভব। তবে আরো ভাল করে বিচার করতে হবে। সময় সাপেক্ষ।

“কয়েকদিনের মধ্যে আলাপ আরো গাঢ়তর হইল। ধনঞ্জয় আমার মৃত্যুর প্রসঙ্গ তুলিলেন না। কিন্তু আমি একটি অন্য প্রসঙ্গ তুলিলাম। আমি তাহাকে ধরিয়া পড়িলাম, এ বিদ্যে আমাকে শিখিয়ে দিন।

“আশ্চর্য এই যে, ধনঞ্জয় ইহাতে আপত্তি প্রকাশ করিলেন না। সাগ্রহে বলিলেন, শিখবেন? বেশ তো! কাছেই আমার বাসা। সকালের দিকে চলে আসবেন।

“পরদিনই ধনঞ্জয়ের বাসায় গেলাম। নিতান্তই হতদরিদ্র অবস্থা। ব্রাহ্মণী রোগাভোগা মানুষ, নিঃসন্তান। বারান্দায় মাদুর পাতিয়া বসিয়া ধনঞ্জয় আমাকে শাস্ত্র ব্যাখ্যা করিয়া শুনাইতে লাগিলেন। প্রথমটায় খটোমটো লাগিল। তারপর বেশ মজিয়া গেলাম।

“নূতন শেখা বিদ্যা পরখ করিতে মাঝে মাঝে মনুর কোষ্ঠী লইয়া পড়ি। কখনো নিজের হস্তরেখা বিচার করি। মনু হাসিয়া বলে, এ কোন নতুন বাই চাপল মাথায়! অত ভাগ্য বিচার করার আছেই বা কী?

“না কিছু নাই। জীবনের বারো আনা পার করিয়াছি। স্রোত এখন মোহনার মুখে। আমার আর ভবিষ্যৎ কী? কিন্তু আমি তো ভবিষ্যৎ জানিবার জন্য শিখিতেছি না। শাস্ত্রটা কতটা খাঁটি তাহাই বিচার করিতেছি। এসব বুঝাইয়া বলায় মনু বলিল, তাহলে বলা তো আমি সধবা মরবো কি না!

“আমি একটা দীর্ঘশ্বাস ফেলিলাম। সধবা মরিবে কিনা তাহা জানি না। অত পাকা জ্যোতিষী আমি হইয়া উঠি নাই। তবে মনুর কোষ্ঠী বেশ জটিল। ধনঞ্জয়বাবুও আজকাল মাঝে মাঝে আমাদের বাড়িতে আসেন। আমাদের জমিদারি ঠাঁটবাট এই কাশীর বাড়িতেও কিছু আছে। ঝাড়লগুন হইতে বার্মা সেগুনের মহার্য আসবাব, খিলান গম্বুজও কিছু কম নাই। উনি কিছু জড়োসড়ো বোধ করেন। একদিন আমি তাহাকে মনুর কোষ্ঠী দেখাইলাম। বহুক্ষণ দেখিয়া এবং

আঁক কষিয়া কহিলেন, ইনি অনেকদিন বাঁচবেন ।

“ইহা শুনিয়া মনু জনান্তিকে কহিল, মরণ !

“ভাগ্যক্রমে ধনঞ্জয় এবং আমি সমবয়স্ক । বহুকাল আমার তেমন কোনো বন্ধু জোটে নাই । ধনঞ্জয়ের মধ্যে আমি একজন বন্ধুকে পাইলাম । শাস্ত্র শিক্ষার ফাঁকে ফাঁকে নিজেদের সুখ দুঃখের কথা বলি । দিন বেশ কাটিয়া যায় । মানুষের যে বন্ধুকে কত দরকার তাহা ধনঞ্জয়ের সহিত সখ্য হইবার পর বুঝিতে পারিলাম । সকালে বিকালে তাহার সঙ্গে পাইবার জন্য রোজ মন আনচান করে । মনু একদিন কপট রাগের গলায় কহিল, এ যে আমার সতীন হয়ে দাঁড়াল দেখছি গো । তোমার যে আর টিকির নাগাল পাই না ।

“নৌকায় করিয়া একদিন দুই পরিবার বেড়াইতে বাহির হইলাম । মণিকর্ণিকার ঘাট পার হইয়া অনেকদূর যাওয়া গেল । বেশ লাগিল এই জলপ্রমণটি । মনুর সহিত ধনঞ্জয়ের স্ত্রীরও বেশ আলাপ জমিয়া গেল । কথায় কথায় প্রকাশ হইয়া পড়িল যে, আমি এশ্রাজ বাজাইতে জানি । মনুই অংগ বাড়াইয়া প্রচারটি করিল । ইহাতে ধনঞ্জয় আনন্দে উদ্বেল হইয়া কহিল, আমারও কিছু গানবাজনার চর্চা ছিল । তা ভায়া একদিন জলসা বসানো যাক ।

“ধনঞ্জয় যে বাস্তবিকই গুণী লোক তাহাতে আর সন্দেহ কী । জলসার দিন সে একজন তবলায় ঠেকা দিবার লোক ও একজন সারেসঙ্গীদারকে কোথা হইতে ধরিয়া আনিল । দুজনেরই পাকানো চেহারায় দুর্দশার ছাপ । আমার বৈঠকখানায় সেদিন বিরল-শ্রোতা জলসা খুবই জমিয়া গেল । ধনঞ্জয় পুরানো বাংলা গান চমৎকার সুরে লয়ে গাহিল । আমি এশ্রাজ মন্দ বাজাইলাম না । মালকোষ ধরিয়াছিলাম । বাজাইতে বাজাইতে চক্ষু দুইটি বারবার অশ্রুপূর্ণ হইয়া আসিতেছিল । বারবার কৃষ্ণর কথা মনে হইতেছিল । ইহজন্মে কি আর তাহাকে দেখিব ? পিতৃহৃদয় এশ্রাজ বাজাইয়া কেবল কাদিতেছিল ।

“পরদিন সকালেই রক্ষ শঙ্ক চেহারার এক যুবক উদ্ভাস্তভাবে আমাদের দরজায় আসিয়া নাঁড়াইল । তাহাকে চিনি না । তবু সে খুব উচ্চগ্রামে ডাকিল, বাবা !

“আমি বৈঠকখানায় বসিয়াই দৃষ্টিপান করিতেছিলাম । শ্বেতপাথরের গেলাসটি হাত হইতে পড়িয়া ভাঙিয়া গেল । বুক কাঁপিয়া উঠিয়া শ্বাসকষ্ট হইতে লাগিল । যুবকটি আসিয়া আমার পায়ের উপর উপড় হইয়া প্রণাম করিয়া কহিল, কেমন আছেন

“কী বলিব ? এই যুবককে কী বলিব ? কে বিশ্বাস করিবে যে একদিন এ কীটগুণীট হইয়া আমার শরীরের অভ্যন্তরে ছিল । মাতৃজঠর হইয়া পৃথিবীর আলো দেখিল এই তো সেদিন ! ইহার মধ্যেই লম্বা চওড়া চেহারার বিশাল যুবক হইয়া উঠিল কিরূপে ? রক্ষতা ও শঙ্কতার ভিতর দিয়াও তাহার বিশাল কাঠামো ও অভ্যন্তরীণ তেজ প্রকাশ পাইতেছে । একটি অগ্নিশিখা ।

“বুকটা ব্যথাইয়া উঠিল কি ? শ্বাসকষ্ট হইতেছে । কোনোক্রমে দুটি হাত বাড়াইয়া তাহাকে জড়াইয়া ধরিলাম, এলে ! অবশেষে এলে !

“বেশ কয়েকদিন ডায়েরী লিখি নাই । শরীরের অবস্থা ভাল বুঝিতেছি না । বৃকের মধ্যে এখনো অসহনীয় কষ্ট আছে । শ্বাসের গতিও অনিয়মিত । ডাক্তার বলিয়া গিয়াছে, রক্তচাপও মারাত্মক । সবই ঠিক, তবু মরি তো নাই । দুই চক্ষু ভরিয়া পুত্রের মুখ দেখিয়াছি । আর এখন মরিলেই বা দুঃখ কী ? মনু বিধবা হইবে ! সে আর বেশি কথা কী ? সে তো জানিয়াই আমার সহিত সংসার পাতিয়াছে ।

“না আজ আর অন্য কথা নহে । শুধু কৃষ্ণর কথা ভাবিব । পুত্রের ভিতর দিয়া পিতাই আবার জন্মগ্রহণ করে বলিয়া শাস্ত্রে একটা কথা আছে না আজ মনে হইতেছে ওই তো আমি জন্মগ্রহণ করিয়াছি আর কেন মিথ্যা এই দেহটি লইয়া থাক।

“কৃষ্ণ আছে। থাকিবার কথা ছিল না। তিনদিনের কড়ারে আসিয়াছে। কিন্তু তাহাকে দেখিয়াই আমার রক্তচাপ বাড়িয়া যাওয়ার এবং দুর্বল হৃদযন্ত্র বিকল হওয়ার লক্ষণ প্রকাশ করায় সে যাইতে পারে নাই। মনে মনে প্রার্থনা করিতেছি, সে যেন একেবারে আমার মুখাঙ্গি করিয়া যায়।”

হেমকান্ত মারা গেলেন ভোর রাতে। কেউ টেরও পেল না। শেষ সময়টায় শুধু তিনি নিজেই টের পেয়েছিলেন। বৃকে অসংখ্য ছুরির আঘাতের মতো ব্যথার ফলা ঢুকে যাচ্ছে। টনটনে জ্ঞানে সবটাই তিনি অনুভব করতে পারলেন। শ্বাসকষ্ট প্রবলভাবে নাড়িয়ে দিচ্ছিল বৃক। হেমকান্ত উঠে বসবার চেষ্টা করলেন। রক্তময়ী পর পর সাতদিন একটানা রাত জেগে আর পারেনি। পায়ের কাছে কুণ্ডলী পাকিয়ে অঘোর ঘুমে ঢলে পড়েছে। হেমকান্ত তাকে আর ডাকলেন না। তিনি গঙ্গার স্রোতের শব্দ শুনতে পাচ্ছিলেন। অঙ্গকারে নদী বয়ে চলেছে।

অশ্রুট একটা শব্দ করলেন হেমকান্ত। বৃষ্টি বললেন, ওরা রইল। দেখো।

কাকে বললেন তা স্পষ্টভাবে তিনি নিজেও জানেন না। কিন্তু তাঁর মনে হল, কেউ শুনল। মনে রাখল।

পরদিন মণিকর্ণিকার ঘাটে হেমকান্ত পঞ্চভূতে বিলীন হয়ে গেলেন। তাঁর আর কোনো চিহ্ন রইল না।

কৃষ্ণকান্ত বসে নিভস্ত চিতার দিকে একদৃষ্টে চেয়ে ছিল। যে বুঝতে পারছিল না, বাবা কেন শুধু তার আগমনটুকুর জন্যই প্রাণটা রেখেছিল কোনোক্রমে। কোনো গৃঢ় কারণে সে পিতৃঘাতী হল না তো!

চিতায় জল ঢেলে অস্থি নিয়ে কৃষ্ণকান্ত যখন স্নান সেরে ফিরে এল তখনও রক্তময়ী অচেতন। তাকে পাখার বাতাস দিচ্ছেন ধনঞ্জয়ের স্ত্রী।

বিছানাটার পাশে মেঝেয় বসে কৃষ্ণকান্ত খাটের পায়ায় একটু হাত বোলাল। শোক গভীর। শোক গুরুভার। তবু অপেক্ষা করার সময় তো তার নেই। যেতে হবে।

খাটে মাথা রেখে ঘুমিয়ে পড়েছিল কৃষ্ণকান্ত। শেষরাতে রক্তময়ী তাকে ডেকে তুলল। ওরে ওঠ! আয় দুজনে মিলে একটু কাঁদি।

॥ ১০৬ ॥

কৃষ্ণকান্ত দিল্লি চলে যাওয়ার পর ধ্রুব কিছুদিন বুঝতে পারল না তার কী করার আছে বা কী করা উচিত। আলমারি এবং সিন্দুক খুলে সে বিস্তর দলিল দস্তাবেজ, টাকা এবং শেয়ারের কাগজ ইত্যাদি পেল। কিছুই সরাল না। কৃষ্ণকান্ত তাকে একরারনামা দিয়ে গেলেও নিজের ভিতরে কোনো অধিকারের জোর বোধ করল না সে। সবই জায়গামতো আবার যেমন-কে-তেমন রেখে দিল। কৃষ্ণকান্ত হয়তো তাকে লোভ দেখাচ্ছেন। সংসারমুখী গৃহস্থে পরিণত করতে চাইছেন। কিন্তু ধ্রুব জানে, যতদিন কৃষ্ণকান্ত বেঁচে আছেন ততদিন কোনো উত্তরাধিকারই তাতে বর্তাবে না। রাশ সবসময়ই অলক্ষ্যে থাকবে কৃষ্ণকান্তের হাতে। সংসারের কর্তা হওয়ার অবশ্য কোনো সাধই নেই ধ্রুবর। কর্তা হওয়ার অনেক অসুবিধে, অনেক ভজঘট, অনেক মন রেখে চলা। একথাও ঠিক যে, কৃষ্ণকান্তও প্রকৃত অর্থে সংসারী ছিলেন না। তাঁর জীবনের প্রায় সবটাই বহিমুখী, বৃহৎ জীবন। ঘর-সংসারে তাঁর একটা নাম-লেখানো ছিল মাত্র। কিন্তু স্ত্রীর মৃত্যুর পর খানিকটা হাল তাঁকে ধরতেই হয়েছিল এবং তখন দেখা গেল, সংসার চালানোটোও তাঁর কাছে শক্ত কিছু নয়। সব ব্যাপারেই তাঁর এক অনায়াস সিদ্ধি।

ধ্রুব এইসব ভাবে আর মাঝে মাঝে কৃষ্ণকান্তের চেয়ারে বসে অনেকক্ষণ ধরে কৃষ্ণকান্তের মন এবং

চোখ নিয়ে সবকিছুকে বিচার করার চেষ্টা করে। লোকটাকে বুঝতে চায়।

রেমি এসে বলে, এখানে কেন ভূতের মতো বসে থাকো বলো তো ?

সিংহাসনটা কেমন তা ফিল করার চেষ্টা করি।

সিংহাসন হবে কেন ?

সিংহাসনই তো। হি ইজ এ কিং ইন হিজ ওন কিংডম। উনি আমাকেই যৌবরাজ্যে অভিষিক্ত করে গেছেন। তাই নেট প্র্যাকটিস করছি।

তুমি কোনোদিন ওরকম হতে পারবে না। তোমার সেই মুরোদই নেই।

কৃষ্ণকান্তর মতো থার্ডরেট পলিটিসিয়ান হওয়ার ইচ্ছেও আমার নেই।

শ্বশুরের পক্ষ নিয়ে রেমি কিছুক্ষণ তর্ক করার চেষ্টা করে তারপর হাল ছেড়ে রণে ভঙ্গ দেয়। আজকাল সে ধুবকে একেবারেই চটাতে চায় না।

কৃষ্ণকান্ত মাঝে মাঝে দিল্লি থেকে ট্রাংক কল করেন। কথা হয় রেমির সঙ্গেই। কী কথা হয় তা ধুব জানে না।

তবু একদিন ধুব রেমিকে জিজ্ঞেস করল, তোমার শ্বশুরের মন্ত্রী হওয়ার আর কদূর ? কাগজে তো কোনো উচ্চবাচ্য নেই দেখছি।

রেমি বিরস মুখ করে বলে, তোমার বুঝি সে জন্য ঘুম হচ্ছে না ? শ্বশুরমশাইকে ঠিকই মন্ত্রী করা হবে।

কোন দফতরের সর্বনাশ করবেন তা শুনেছো ?

সেটা নিয়েই একটু মতের অমিল হচ্ছে। প্রাইম মিনিস্টার ঠেকে রাষ্ট্রমন্ত্রী করতে চাইছেন। উনি চাইছেন ক্যাবিনেট স্ট্যাটাস।

ও বাবাঃ, একেবারে ক্যাবিনেট মন্ত্রী ! সাম্প্রতিক কথা।

ঠেকে তাই করাও হবে। কথা এগোচ্ছে।

ধুব একটা কপট দীর্ঘশ্বাস ফেলে বলে, বিচিত্র নয়। এ দেশে সবই সম্ভব।

একদিন কৃষ্ণকান্তর ট্রাংক কল এল রাত এগারোটায়। রেমি গিয়ে ফোন ধরল। কিছুক্ষণ কথা বলার পরই দৌড়ে এসে ধুবকে ডাকল, ওগো, শ্বশুরমশাই তোমার সঙ্গে কথা বলতে চাইছেন। শীগগীর যাও।

আমার সঙ্গে কী কথা ?

যাও না, উনি কী বলবেন যেন তোমাকে।

ধন্য হলাম। যাচ্ছি, আর হাতে খিমচি দিও না।

ধুব গিয়ে বৈঠকখানার এক্সটেনশন ধরল।

কিছু বলবেন ?

তেমন কিছু বলার নেই। কেমন আছো সব ?

ভালোই তো।

আজ প্রাইম মিনিস্টারের সঙ্গে ফাইন্যাল কথা হয়ে গেল। আমাকে উনি ইনফর্মেশন অ্যাণ্ড ব্রডকাস্টিং দিচ্ছেন।

ধুব একটুও উৎসাহ বোধ না করে বলল, তাই নাকি ?

বুঝতেই পারছো, এখন স্থায়ীভাবে দিল্লিতেই থাকতে হবে। তোমাদের সঙ্গে ছুট করে দেখা হবে না। সংসারের দায়দায়িত্ব এখন সবই তোমার হাতে।

এদিকে সবই ঠিক আছে।

বউমার কাছে সব খবরই পাই। আজ হঠাৎ তোমার গলার স্বর শুনেই ইচ্ছে করল। তাই ডাকলাম। ঘুমোচ্ছিলে নাকি ?

না। বই পড়ছিলাম।

দিব্য কি জেগে আছে?

না, অনেকক্ষণ ঘুমিয়েছে।

জেগে থাকলে ওর সঙ্গে একটু কথা বলার চেষ্টা করতাম। আমাকে খুব চিনে গিয়েছিল।  
আফটার অল রক্তের টান তো, শিশুরাও বোঝে।

এই অপ্রাসঙ্গিক কথায় ধ্রুব বিরক্ত হল। বলল, আর কিছু বলবেন?

না। বেশি কথা কিছুই বলার নেই। এই একটু আগে প্রাইম মিনিস্টারের সঙ্গে বৈঠক শেষ হল। ফিরে এসেই ফোনটা করলাম। এখন একটু বেড়াতে বেরোবো।

ও। বেশ তো।

যাও, তুমি গিয়ে ঘুমোও। আর একটা কথা।

বলুন।

আলমারি সিঁদুক সব খুলে দেখেছো নাকি?

দেখেছি।

কাগজপত্র সব দেখেছো?

না, সব দেখা হয়নি।

দেখো। দলিল-দস্তাবেজ সব তুমি বুঝবে না। আমাদের উকিল ভট্টাচার্যের কাছে সব বুঝে  
নিও। ওকে আমার বলা আছে।

আমার বুঝে কী হবে?

বুঝে রাখা ভাল। কখন কিসের দরকার হয় কে জানে।

আমার তো বিষয় সম্পত্তির কোনো প্রয়োজন নেই।

তোমার না থাক দিব্যর আছে। তাছাড়া সম্পত্তি, বিষয়, টাকা এসব হাতে থাকলে তুমি  
পাঁচজনের উপকারও করতে পারবে, যদি চাও। এগুলো এমনিতে কিছু নয়, কিন্তু কাজে লাগাতে  
পারলে এগুলো মস্ত সহায়।

আপনার জিনিস আপনিই কাজে লাগাবেন।

কৃষ্ণকান্ত একটু হেসে বললেন, এইসব সম্পত্তির বেশির ভাগই উত্তরাধিকার সূত্রে পাওয়া। আমি  
ওকালতি করে খুব একটা অর্জন করিনি। ওকালতি করলে অবশ্য পারতাম। তুমি যদি কাজে  
লাগাতে না চাও তবে অন্তত রক্ষণাবেক্ষণ করো।

দেখা যাবে।

ধৈর্য হারিও না। সব দিকে চোখ রেখে চললে ভাল হবে। আর বউমাকে কষ্ট দিও না। অমন  
মেয়ে দুটি হয় না। কী ধৈর্য, সহ্য আর অধ্যবসায়। সে যখন মরতে বসেছিল তখন আমি দুনিয়া  
হারিয়ে ফেলেছিলাম। বুঝলে?

বুঝেছি। এ সবই আপনি আমাকে আগে বলেছেন।

আবার বললাম। বারবার শুনলে কথাটা মনে গাঁথে যায়।

তাহলে ছাড়ছি।

হ্যাঁ।

ধ্রুব ফোন রেখে দিল। কোনো জরুরী কথা নয়, তবু লোকটা এত রাতে তাকে ডেকে এই  
খেজুরে আলাপ কেন করল তা বুঝতে পারল না সে।

রেমি এতক্ষণ পাশেই দাঁড়িয়ে ছিল। ফোন রাখতেই বলল, একবার ওঁকে বাবা বলে ডাকলে  
না?

ধ্রুব অবাক হয়ে বলে, ডাকার কী হল?



ডাকতে হয় ।

তার মানে ?

ওঁর খুব ইচ্ছে ছিল তোমার মুখে একবার বাবা ডাকটা শোনে।

তাই নাকি ?

আমাকে কী বললেন জানো ? বললেন, খুব মুখে বহুকাল বাবা ডাক শুনিনি, ওকে একটু ডেকে দাও তো বউমা, কথা বলি ।

ওসব সেণ্টিমেন্টাল ব্যাপার ওঁর আছে নাকি ?

না থাকলে বলবেন কেন ?

ওঁকে বাপ ডাকার অনেক লোক আছে রেমি । আমি না ডাকলেও ওঁর চলবে ।

হিঃ, ও কী কথা ?

কিছু খারাপ নয় । ওঁকে বহু লোক দায়ে পড়ে বাপ ডাকে । আরো বহু লোক ডাকবে । আর আমরা—আমরা ওঁর কে ? 'ছেলেবেলায় লোকটাকে মনে হত বাড়ির পেয়িং গেস্ট । সর্পকটা তো ছুট করে তৈরি হয় না, ধীরে ধীরে গড়ে নিতে হয় । উনি তাঁ গড়েননি ।

রেমি ছলছল চোখে চেয়ে থেকে বলল, তুমি মানুষকে কষ্ট দিয়ে খুব আনন্দ পাও, তাই না ? জানোই তো আমি স্যাডিস্ট ।

মোটাই নয় । স্যাডিস্টরা অন্যরকম হয় । তুমি সেরকমও নও ।

এখন ঘুমোতে চলো ।

তুমি ভীষণ নিষ্ঠুর ।

নিষ্ঠুর হয়ে থাকলে সেটাও কৃষ্ণকান্তর কাছ থেকেই উত্তরাধিকারসূত্রে পাওয়া ।

রেমি আর তর্ক করল না ।

পরদিন সকালে ফের দিল্লি থেকে ট্রাংক কল এল । কৃষ্ণকান্ত নন, তাঁর সেক্রেটারি ফোন করছে, খুব চৌধুরিকে চাই । আর্জেন্ট মেসেজ ।

খুব গিয়ে ফোন ধরল, কী হয়েছে ?

মিস্টার চৌধুরি ভীষণ অসুস্থ । হাসপাতালে রিমুড করা হয়েছে । আপনাদের এক্ষুনি আসা দরকার ।

কী হয়েছে ? স্ট্রোক ?

ঠিক বুঝতে পারছি না ।

কণ্ডিশন কি খুব সিরিয়াস ?

খুব । ডাক্তাররা কোনো ভরসা দিতে পারছেন না । ওঁর একটা চিঠি রয়েছে, আপনাকে। অ্যাক্সেস করা । আর একটা পুলিশকে ।

পুলিশকে ?

হ্যাঁ । আপনি চলে আসুন । ফোনে সব বলা যাবে না ।

ফোনটা রেখে খুব কিছুক্ষণ বুঝতে পারল না, কী করবে বা কী করা উচিত । একধরনের পাথুরে অসাড়া তার সর্বাস্থে । বোঝা ভার ।

জগা কখন এসে নিঃশব্দে দাঁড়িয়ে ছিল পিছনে । হঠাৎ সে খুবর হাতটা ধরে একটা প্রবল ঝাঁকুনি দিয়ে বলল, কী হয়েছে ?

খুব তার দিকে চেয়ে মাথা নাড়ল । কিছু বলল না ।

কতর কিছুর হয়েছে ?

খুব খুব ক্ষীণ কণ্ঠে বলল, অবস্থা খারাপ । হাসপাতালে ।

জগা কোনো আহা উচ্চ করল না, বেশি জিজ্ঞাসাবাদের মধ্যেও গেল না । বরং সত্যিকারের

কাণ্ডজ্ঞানের পরিচয় দিয়ে এক ঝটকায় টেলিফোন তুলে ইণ্ডিয়ান এয়ারলাইনস-এ ডায়াল করে বিকেলের ফ্লাইটে দুটো সীট বুক করে ফেলল। তারপর ধুবর দিকে চেয়ে বলল, বউমাকে কিছু জানিও না। চেষ্টামেচি করবে। অফিসের জরুরী কাজে যাচ্ছে বলে বাস্তব গুছিয়ে নাও। আমি তোমার সঙ্গে যাবো।

ধুব স্বস্তির শ্বাস ফেলল। জগাদা সঙ্গে থাকলে অনেকখানি ভরসা।

জগা জিজ্ঞেস করে, কী হয়েছে বলল? স্ট্রোক?

কিছু বোঝা যাচ্ছে না।

জগা বিশেষ বিচলিত হল না। কাজের মানুষরা হয়ও-না। তাদের কাছে যতক্ষণ শ্বাস ততক্ষণ আশ। ধুবকে একটা ঠেলা দিয়ে বলল, যাও গুছিয়ে নাও। বেশি কিছু নিও না। দুটো জামা, দুটো প্যান্ট, গেঞ্জি, আঙুরওয়ার আর পাজামা। দিল্লিতে এখন খুব গরম, একটা টুপি নিও। বউমাকে কিছু বোলো না। আমি টিকিট কাটতে এয়ারলাইনস অফিসে যাচ্ছি। কেটে না রাখলে পরে গড়বড় হতে পারে।

ধুব ঘরে এল।

রেমি উৎকণ্ঠিত গলায় বলল, কার টেলিফোন গো?

অফিসের। আজ একটু বাইরে যেতে হবে।

কোথায়?

জয়পুর।

ক'দিনের জন্য?

ঠিক নেই। দেখি। তাড়াতাড়িই ফিরে আসবো।

তোমাকে ওরকম দেখাচ্ছে কেন?

ধুব আনমনে একটা কম্পিত হাত নিজের মুখে বুলিয়ে নিল। রেমির কথার জবাব না দিয়ে জগার কথাটা মুখস্থ বলে গেল, দুটো প্যান্ট, দুটো জামা, গেঞ্জি, আঙুরওয়ার, পাজামা আর একটা টুপি বড় আটাচি কেসটায় গুছিয়ে দাও।

কৃষ্ণকান্ত হাসপাতালে, এই সংবাদটা ধুবকে তেমন চঞ্চল করেনি। যেটা রহস্যময় তা হল, কৃষ্ণকান্ত ধুবকে একটি এবং পুলিশকে একটি চিঠি লিখেছেন। তাঁর সেক্রেটারি বলেছে, টেলিফোনে সব কথা বলা যাবে না। এইসব ব্যাপারকে ধুব মনে মনে নানাভাবে উন্টেপাণ্টে মিলিয়ে জুলিয়ে দেখছিল। ভাবতে ভাবতে বড্ড বেশি অস্থির আর চঞ্চল লাগছিল তার।

বাড়ি থেকে বেরিয়ে সে কিছুক্ষণ এদিক সেদিক ঘুরে বেড়াল। অনেক সিগারেট খেল পরপর। দুপুর গড়িয়ে বাড়ি ফিরে সে খুব অনিচ্ছের সঙ্গে কয়েক গ্রাস ভাত মুখে তুলল মাত্র। রেমি খুব লক্ষ্য করছে তাকে। সেই দৃষ্টির সামনে আরো অস্বস্তি বোধ করছে ধুব।

রেমি খুব সন্দেহের গলায় বলল, তোমার একটা কিছু হয়েছে।

কিছু না।

টেলিফোনটা পাওয়ার পর থেকেই তোমাকে অন্যরকম দেখছি।

ধুব মাথা নেড়ে বলল, অফিসের একটা প্রবলেম নিয়ে ভাবছি।

অফিস নিয়ে তুমি এত ভাবো নাকি?

মাঝে মাঝে ভাবতে হয় বৈকি।

আমার কাছে কিছু লুকোচ্ছে না তো?

আরে না। এটা অন্য ব্যাপার।

থেয়ে উঠে ধুব কিছুক্ষণ ঘুমের ভান করল। করতেই হল, নইলে রেমি আরো অনেক প্রশ্ন করবে।

বিকেল চারটের মধ্যেই জগা এসে গেল। মুখ থমথমে গভীর চোখ টকটকে লাল। প্লেন ছাড়তে অনেক দেরী, তবু জগা তাড়া দিয়ে বলল, চলো চলো, অনেক ঝামেলা আছে। একটু হাঁফ ছাড়ল ধুব। রেমির আওতা থেকে একটু দূরে গিয়ে তার ভালই লাগবে। গাড়ি এয়ারপোর্টের পথে রওনা হতেই জগা বলল, শেষ খবরটা পেয়েছো ? না। কী খবর ?

জগা একবার ডাইনে বাঁয়ে মাথা নেড়ে বলল, নেই।

মানে ?

তোমার বাবা বেঁচে নেই।

সামনের সিঁটাটা একবার আঁকড়ে ধরল ধুব। তারপর শ্লথ শরীরে বসে বলল, কখন ? দুপুরে মারা গেছেন।

কিছু বলল কী হয়েছিল ?

জগা মাথা নাড়ল, না। ওখানে না গেলে কিছু বোঝা যাবে না।

ধুব খুব ধীরে ধীরে একটা ঘোরের মধ্যে চলে যাচ্ছিল। কৃষ্ণকান্তর মৃত্যুটা তার খুব স্বাভাবিক বলে মনে হচ্ছিল না। কাল রাতে কৃষ্ণকান্ত নিজে যেচে তার সঙ্গে কথা বলেছেন। সেই কথাতেও কিছু অসংলগ্নতা ছিল। সব কিছু মিলে একটা দিকেই অঙ্গুলি নির্দেশ করে। কিন্তু কেন ? কেন ? তাঁর তো কোনো ফ্রাঞ্চেইশন ছিল না !

দিল্লি পৌঁছোতে সঙ্গে হয়ে গেল। তবে গ্রীষ্মকাল বলে এবং দিল্লি কলকাতার পশ্চিমে বলে একটু দিনের আলোর আভা তখনো ছিল। সেই গোখুলিতে ধুব দিল্লিতে নামল। দেখল চারদিকে মৃত্যুর বিবর্ণতা।

এয়ারপোর্টে কৃষ্ণকান্তর সেক্রেটারি উপস্থিত ছিলেন গাড়ি সহ। ধুব গাড়িতে উঠতেই উনি মুখ-আঁটা একটা খাম ধুবর হাতে দিয়ে বললেন, এটা আগে পড়ে নিন। মনে হচ্ছে চিঠিতে জরুরী কোনো কথা আছে।

কি করে বুঝলেন ? চিঠিটা আপনি পড়েছেন ?

সেক্রেটারি মাথা নেড়ে বললেন, না। তবে কাল রাতে উনি আমাকে হঠাৎ বললেন, আমার ছেলেকে লেখা একটা চিঠি তোমার হেফাজতে রইল। মানুষের কখন কী হয় বলা যায় না। যদি আমার হঠাৎ কিছু হয় তবে আমার ছেলেকে সবার আগে খবর দিও। চিঠিটা পড়বার পর সে যা সিদ্ধান্ত নেবে তাই হবে।

এ কথা উনি বললেন ?

হ্যাঁ। প্রথমটায় আমিও খুব অবাক হয়েছিলাম শুনে। উনি খুব সেক্টিমেন্টাল মানুষ ছিলেন না যে মৃত্যু নিয়ে বিলাসিতা করবেন।

আপনার খটকা লাগেনি ?

লোগেছিল। কিন্তু বেশি কিছু জিজ্ঞেস করতে সাহস হয়নি।

ধুব চিঠিটা খুলল।

প্রিয় ধুব, ঠাকুর তোমার মঙ্গল করুন। আজ তোমার জন্য যত শুভকামনা করা যায় সবই করিলাম। ঠাকুর তোমাকে রক্ষা করিবেন, আনন্দে রাখিবেন, আয়ুস্থান করিবেন—এই আশা লইয়া আজ বিদায় হইতেছি।

বিদায় লওয়াটা কিছু নাটকীয় হইল। কিন্তু যাহা বুঝিতেছি, স্বাভাবিকভাবে এই জীবনের উপর যবনিকাপাত হইতে এখনো বহুদিন লাগিবে। আমার রক্তচাপ বা হৃদরোগ আছে বটে, কিন্তু তবু এই শরীরের ভিত স্বাধীনতার পূর্বে ভেজালহীন খাদ্য ও পরিষ্কার জলবায়ুতে রচিত হইয়াছিল। ব্রিটিশের জেলখানায় ইহার উপর অনেক উপদ্রব গিয়াছে এবং তাহাতে এই দেহ বরং আরো পাকাপোক্ত হইয়া

উঠিয়াছে। কিন্তু এখন এই বাঁচিয়া থাকার উপর একটি যতিচিহ্ন টানিয়া দেওয়া একান্তই প্রয়োজন হইয়া পড়িয়াছে। সেই প্রয়োজনটি হইল তুমি।

হিসাব কবিয়া দেখিয়াছি গত পাঁচ বৎসর তুমি আমাকে একবারও পিতৃ সন্মোদন কর নাই। বউমার কাছে জানিয়াছি, আমার আড়ালেও তুমি আমাকে বাবা বলিয়া উল্লেখ কর না। ইহাতে আমার দুঃখের কিছুই নাই। আমার প্রতি তোমার মনোভাব অনুকূল নহে তাহা জানি। আমার ভাবপ্রবণতা বিশেষ নাই, কাহার স্নেহ পাইলাম বা পাইলাম না তাহা লইয়া বড় একটা মাথাও ঘামাই না। কিন্তু মানুষকে একসময়ে পরবর্তী প্রজন্মের কথা ভাবিতেই হয়। আমার জীবন বারো আনা কাটিয়া গিয়াছে, কাজেই এখন নিজেকে লইয়া ভাবিবার কিছুই নাই। কিন্তু এখন কী বা কাহাকে রাখিয়া যাইতেছি তাহা একটু হিসাব করিতে হয়। তোমাকে যতটুকু বুঝিয়াছি, তাহাতে অনুমান হয় তোমার মদ্যপান বা অন্যান্য বিরূপ আচরণ আমার বিরুদ্ধে একটি অপ্রত্যক্ষ বিদ্রোহ। কিন্তু সেই বিদ্রোহের মূল কোথায় তাহা বহু চিন্তা করিয়াও সঠিক সন্ধান পাই নাই। তোমার সহিত আমার প্রজন্মগত ব্যবধান বা জেনারেশন গ্যাপই বোধহয় সে জন্য দায়ী। কিন্তু এটুকু বুঝিতে অসুবিধা নাই যে, যতদিন আমি বাঁচিয়া আছি ততদিন তুমি সুখী হইবে না। আমার তিন পুত্রের মধ্যে কেহই বোধহয় সুখী নয়। এবং সেই জন্য বোধহয় প্রত্যক্ষ বা অপ্রত্যক্ষভাবে কমবেশি আমিই দায়ী। আজকাল এই জন্য বড় আত্মগ্লানি বোধ করিতেছি। সত্য বটে, সমাজে আমার প্রতিষ্ঠা আছে, সম্মানও আছে, নিন্দাও বড় কম নাই। কিন্তু নিজের পুত্রদের কাছ হইতে আমি যাহা পাইয়াছি তাহা অবিমিশ্র ভীতিমিশ্রিত ঘণা। কেন এই বিদ্বেষ জন্মাইল তাহার কারণ অনুসন্ধান করিয়া কিছুই লাভ নাই। কিন্তু এইটা বুঝিতেছি, এই ঘণা ভয় ও বিদ্বেষ আর তোমাদের মন হইতে সম্পূর্ণ মুছিয়া ফেলা যাইবে না। যেমন নিজেকে এই পরিণত বয়সে আর আমূল পরিবর্তনও আমি করিতে পারিব না। তিন পুত্রের কথা কহিতেছি বটে, কিন্তু আমার প্রধান সমস্যা তোমাকে লইয়াই। পিতৃহৃদয়ে সম্ভাবনাবিশেষের প্রতি পক্ষপাত থাকিবার কথা নহে। আমারও না থাকিবার কথা। কিন্তু আমার জ্যেষ্ঠ ও কনিষ্ঠ পুত্র নিজেদের বিপন্ন করে নাই। জ্যেষ্ঠ ঘোরতর একটি অব্যায় কাজ করিয়াছে বটে, কিন্তু সে নিজে নিজের দায়িত্ব লইতে জানে। কনিষ্ঠটি—যতদূর খবর পাই—তাহার মতোই লায়েক হইয়া উঠিয়াছে। কেবল তুমিই ভিন্নরকম। তিনজনের মধ্যে তুমি ছিলে উজ্জ্বলতম। আবার তুমিই সবচেয়ে বেশী চঞ্চল ও অবিমূঢ়াকারী। সম্ভবত সেই জন্যই তোমাকে লইয়া যত ভাবিয়াছি তত আর কাহাকেও লইয়াই ভাবি নাই। আর এইরূপে আমার চিন্তারাজ্যে তুমি যত অনুপ্রবেশ করিয়াছ ততই তোমার প্রতি এই পিতৃহৃদয় বিগলিত হইয়াছে। আমার বাহিরটা যতই পাষণাণনির্মিত বলিয়া মনে হউক না কেন, এ জীবনে আমি আপনজনের স্নেহ কমই পাইয়াছি। বাবা আমাকে বড় ভালবাসিতেন, কিন্তু তাঁহাকেই বা কতটুকু পাইয়াছি? তাই হৃদয়টি বড় স্নেহবৃত্তি হইয়া রহিয়াছে। সেই স্নেহস্ফুটা নানাজনকে নানা সময়ে অবলম্বন করিতে চাহিয়াছে, কিন্তু আশ্রয় মিলে নাই। সর্বাপেক্ষা অধিক যাহার স্নেহের জন্য আমার কাঙালপনা ছিল সে তুমি। কতবার যে আমার তাপিত হৃদয় ভিতরে ভিতরে তোমার দরজায় স্নেহ ভিক্ষার আশায় দাঁড়াইয়া থাকিয়াছে সে ইতিহাস অলিখিত থাকুক। কতবার যে আমার শ্রবণ তোমার বাবা ডাক শুনিবার জন্য উৎকণ্ঠ হইয়াছে তাহা আজ বলিয়া লাভ নাই। এই মরণের লগ্নটি স্থির করিবার পর তোমাকে টেলিফোনে ডাকিয়া একবার জন্মের শোধ সেই বাবা ডাকটি শুনিবার অক্ষম চেষ্টা করিলাম। তুমি ডাকিলে না। না, তুমি অস্বস্তি বোধ করিও না। আমার হৃদয়ে তোমার প্রতি কোনো অভিষাপই উদ্যত হইবে না। তোমার প্রতি আমার স্নেহ ধৃতরাষ্ট্রের ন্যায় অক্ষ। সেই স্নেহবৃত্তি হৃদয়টি আজ ছুটি চাহিতেছে। পরজন্ম অবশ্যই আছে। আবার যদি জন্মগ্রহণ করি তবে যেন ঈশ্বর আমাকে সুমতি দেন। আর যেন নিজদোষে এইরূপ মরুভূমিতে বসবাস করিতে না হয়।

দুই ক্ষুদ্র মুষ্টি ভরিয়া আমাকে অকুপণ স্নেহ দিয়াছেন বউমা। আমার মাকে সেই কোন শৈশবে

হারাইয়াছি। বৃদ্ধবয়সে ফের তাহার ভিতর দিয়া মা আসিলেন। বিসর্জনের বাজনা বাজাইয়া আসিয়াছিলেন। ঈশ্বরপ্রসাদাৎ তিনি আমাদের ত্যাগ করেন নাই। তাঁহার হৃদয়টিকে চিনিবার চেষ্টা করিও। আমার মায়ের অপমান করিও না। মনে রাখিও তিনি যথেষ্ট লাঞ্ছনা ও গঞ্জনা পাইয়াও আমাদের নিকটে আছেন। তিনি বিদায় লইলে কুললক্ষ্মী আমাদের ছাড়িবে। আমি তাঁহার মন্তু সহায় ছিলাম। আজ আর আমি থাকিব না। তুমি তাঁহার যথার্থ রক্ষক হইও।

তোমার সারা জীবন ধরিয়া পিতারূপ যে পাষণ্ডভার চাপিয়া বসিয়াছিল আজ সেই ভার অপসৃত হইল। তোমাকে সুখী করিবার জন্য, তোমাকে স্বাধীনতা দেওয়ার জন্য, তোমাকে স্বাভাবিক জীবনযাত্রার পথে ফিরাইয়া আনিবার জন্য আজ স্বেচ্ছায় বিদায় লইতেছি। পোস্টমর্টেমের নামে আমার দেহটি লইয়া কিছু টানাহাঁচড়া হওয়ার সম্ভাবনা। ডাক্তার বিকাশ জৈনের সঙ্গে দেখা করিও। তিনি আমার সব জানেন। বিনা কাটাছেঁড়ায় আমার দেহটি তিনি হস্তান্তর করিতে সাহায্য করিবেন। কোনোক্রমেই এই মৃতদেহ কলিকাতায় নিও না। দিল্লি ভারতবর্ষের রাজধানী, সেখানেই আমার শেষকৃত্য সম্পন্ন করিও। আমার মৃতদেহ কলিকাতায় লইয়া গেলে বউমা বড় অস্থির হইবেন। সেটা অভিপ্রেত নহে।

আর একটা কথা। দিব্য চিরকাল শিশু থাকিবে না। বড় হইবে, ব্যক্তিত্ববান হইবে। তাহার প্রতি তুমি এমন আচরণই করিও যাহাতে পিতাপুত্র সহজ সম্পর্ক স্থাপিত হয়। তোমার ও আমার মতো দুস্তর দুরধিগম্য দূরত্বে দু'জনকে বাস করিতে না হয়। আমি যাহা পারি নাই তুমি তাহা পারিও।

আজ আমি সুখী ও তৃপ্ত। আমার কোনো ক্ষোভ নাই। আজ তোমাকে মুক্তি দিলাম, নিজেও -মুক্তি লইলাম। আজ অনাবিল হৃদয়ে তোমাকে আশীর্বাদ করি, সুখী হও, সকলকে সুখী করিয়া তোলা। বউমা ও দিব্যকে আমার প্রাণভরা আশীর্বাদ করিলাম। মঙ্গলময়, তোমার ইচ্ছাই পূর্ণ হউক। ইতি,

শ্রীকৃষ্ণকান্ত চৌধুরি

ধুব নিখর হয়ে বসে রইল কিছুক্ষণ। কান্না এল না, তেমন কষ্ট হল না। শুধু বৃকের ভিতরটা মথিত হয়ে একটা ডাক উঠে আসতে চাইছিল—বাবা !



জন্ম ২ নভেম্বর, ১৯৩৫।

দেশ—ঢাকা জেলার বিক্রমপুর। মোক্তার দাদু আইন ব্যবসা জমাতে দেশ ছেড়ে গিয়েছিলেন ময়মনসিংহে। সেখানে ব্রহ্মপুত্র নদীর ধারে জন্ম। শৈশব কেটেছে নানা জায়গায়। পিতা রেলের চাকুরে। সেই সূত্রে এক যাযাবর জীবন। দ্বিতীয় বিশ্বযুদ্ধের সময় কলকাতায়। এরপর বিহার, উত্তরবাংলা, পূর্ববাংলা, আসাম। শৈশবের স্মৃতি ঘুরে-ফিরে নানা রচনায় উঁকি মেরেছে। পঞ্চাশ দশকের গোড়ায় কুচবিহার। মিশনারি স্কুল ও বোর্ডিং-এর জীবন। ভিকটোরিয়া কলেজ থেকে আই-এ। কলকাতার কলেজ থেকে বি এ। স্নাতকোত্তর পড়াশুনা কলকাতা বিশ্ববিদ্যালয়ে। স্কুল-শিক্ষকতা দিয়ে কর্মজীবনের শুরু। এখন বৃত্তি—সাংবাদিকতা। আনন্দবাজার পত্রিকার সঙ্গে যুক্ত। ছাত্রজীবনের ম্যাগাজিনের গুণ্ডী পেরিয়ে প্রথম গল্প—দেশ পত্রিকায়। প্রথম উপন্যাস ‘ঘুগপোকা’। ‘দেশ’ শারদীয়া সংখ্যায় প্রকাশিত। প্রথম কিশোর উপন্যাস—‘মনোজদের অদ্ভুত বাড়ি’। কিশোর সাহিত্যে শ্রেষ্ঠত্বের স্বীকৃতিরূপে ১৯৮৫ সালে পেয়েছেন বিদ্যাসাগর পুরস্কার। ১৯৮৯ সালে পেয়েছেন সাহিত্য আকাদমি পুরস্কার। আনন্দ পুরস্কার পেয়েছেন দুবার। খেলায় তাঁর উৎসাহ অদম্য। বকসিং, টেনিস, ক্রিকেট, ফুটবল, টেবিল টেনিস সম্পর্কে যেমন, অ্যাথলিটিক্‌সেও তেমনই আগ্রহী। জীবনের এক সংকটময় মুহূর্তে তিনি জীবনের প্রতি আস্থা ফিরে পান শ্রীশ্রীঠাকুর অনুকূলচন্দ্রের সান্নিধ্যে এসে। নিরামিষাশী। ঠাকুরের মন্ত্রশিষ্য। তাঁর রচনাতেও ঘুরে-ফিরে আসে আধ্যাত্মিক অন্বেষণ। পাঠক হিসেবে সর্বগ্রাসী। ধর্মবিষয়ক গ্রন্থ প্রিয়, প্রিয় থ্রিলার এবং কল্পবিজ্ঞানও।